


Cohamacu Yare Yahari
Tjuel



New Testament in Guanano

Cohamacu Yare Yahari Tjuel

New Testament in Guanano

copyright © 2007 Wycliffe Bible Translators, Inc.

Language: Guanano

Translation by: Wycliffe Bible Translators, Inc.

Copyright Information

© 2007, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guanano

© 2007, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 21 Feb 2024 from source files dated 29 Jan 2022
1f3a4366-edba-553b-a17f-bc47c9049c98

Contents

SAN MATEO	1
SAN MARCOS	48
SAN LUCAS	76
SAN JUAN	124
HECHOS	159
ROMANOS	201
1 CORINTIOS	222
2 CORINTIOS	242
GÁLATAS	255
EFESIOS	262
FILIPENSES	270
COLOSENSES	275
1 TESALONICENSES	280
2 TESALONICENSES	284
1 TIMOTEO	286
2 TIMOTEO	292
TITO	296
FILEMÓN	299
HEBREOS	301
SANTIAGO	318
1 SAN PEDRO	324
2 SAN PEDRO	330
1 SAN JUAN	334
2 SAN JUAN	339
3 SAN JUAN	340
SAN JUDAS	341
APOCALIPSIS	343

San Mateo

Jesucristo Cohamacu macuno to coyea panopu macaina jira
(Lc 3.23-38)

¹ Jesucristo coyeare panopu macainare õ sehe ni yahuihtja yahũ. Jesucristo ñuchuno cjiro panopu macariro Davi wama tiriro jia tiha. To jihto pano ti ñuchuno cjiro Abrahã wama tiriro jia tiha.

² Abrahã Isaa pucuro jiha.

Isaa Jacobo pucuro jiha.

Jacobo Juda cãhu pucuro jiha.

³ Juda pohna puaro jiha. Fares, Zara jiha. Ti pocoro Tamar wama tiricoro jiha.

Fares Esrom pucuro jiha.

Esrom Aram pucuro jiha.

⁴ Aram Aminadab pucuro jiha.

Aminadab Naasón pucuro jiha.

Naasón Salmón pucuro jiha.

⁵ Salmón Booz pucuro jiha. Booz pocoro Rahab jiha.

Booz Obed pucuro jiha. To pocoro Rut jiha.

Obed Jesé pucuro jiha.

⁶ Jesé Davi pucuro jiha.

Davi sehe Israe masa bui puhtoro jiha. Tiro Uria wama tiriro cjiro namonore to nuõari baharo Salomo wama tirirore pohna tiha.

⁷ Salomo Roboã pucuro jiha.

Roboã Abías pucuro jiha.

Abías Asa pucuro jiha.

⁸ Asa Josafat pucuro jiha.

Josafat Joram pucuro jiha.

Joram Uzías pucuro jiha.

⁹ Uzías Jotam pucuro jiha.

Jotam Acaz pucuro jiha.

Acaz Ezequia pucuro jiha.

¹⁰ Ezequia Manase pucuro jiha.

Manase Amón pucuro jiha.

Amón Josia pucuro jiha.

¹¹ Josia Jeconia cãhu pucuro jiha. Tina ti jiri pjare Israe yahpa macainare Babilonia macaina sehe ñaha wahcãha ti ya yahparũ.

¹² Æ yoa Babilonia yahpai ti sũri baharo, Jeconia Salatieri pohna tiha.

Salatie Zorobabe pucuro jiha.

¹³ Zorobabe Abiud pucuro jiha.

Abiud Eliaquim pucuro jiha.

Eliaquim Azor pucuro jiha.

¹⁴ Azor Zadoc pucuro jiha.

Zadoc Aquim pucuro jiha.

Aquim Eliud pucuro jiha.

¹⁵ Eliud Eleazar pucuro jiha.

Eleazar Matán pucuro jiha.

Matán Jacobo pucuro jiha.

¹⁶ Jacobo José pucuro jiha. José María manũno jiha. María sehe Jesu pocoro

jire. Jesu sehe masare yuhdohtiro jiro Cristo ti ni pisuriro jire.

¹⁷ Tõ sehe jiro Abrahãre mari quihõ muhtachu, pu Davipure mari quihõ batoachu ahrina jipihitina ti panamana ji turiaina mehne jia, catorce curuari waro jiha. Pari turi Davire mari quihõ muhtachu, pu Babiloniapu Israe masare ti naahto pano mari quihõ batoachu jipihitina ti panamana ji turiaina mehne jia, catorce curuari waro pari turi jiha. Æ yoa tuhsũ Babiloniapu ti sũri baharo mari quihõ muhtachu, pu Cristo to masa bajuachũpu mari quihõ batoachu jipihitina ti panamana ji turiaina mehne jia, catorce curuari waro jiha tjõa.

Jesucristo to masa bajuarire yahuha
(Lc 2.1-7)

¹⁸ Æ yoa õ sehe Jesucristo masa bajuari jire. To pocoro María sehe José namono cjihto jiri jire. Wiho mejeta ti puaro ji dũcahto pano Espiritu Santo to tuaa mehne wahma nijinocãre bocaro masiha ticoro to basi. ¹⁹ Æ yoa José to manũno cjihto quihõno yoariro jiro, tĩre masino, ticorore cohãno taro nimaha. Masa ti ñurocaroi ticorore buhiri tichũ yoa duaeraro, masa ti tuhoerasinichũta yaroca ticorore cohãno taro nimaha. ²⁰ Tĩre to tuhoturo watoi Cohamacu anjo sehe cahãnopu Josere bajuaro, õ sehe niha:

—José, Davi cjiro panamino, Mariare buõ tiro marieno namo tĩga. Ticoro Espiritu Santo to yoadohoro mehne wahma nijinocãre bocaricoro jira. Æ jicũ buõ tiro marieno namo tĩga ticorore. ²¹ Ticoro pohna tirohca. Tirota to macunota to masare, pichacapu wahaborinare yuhdohtiro jirohca. To Æ yuhdohtiro jichũ ñacũ, Jesu ni wama pisuihca mũhu —niha anjo Josere.

²² Panopu macariro Cohamacu yare yahu muhtariro cjiro “Æ waharohca”, to ni joariro seheta ahri jipihitia Æ wahaa tiha. Ahri Æ wahatore õ sehe ni joa dutia tiha Cohamacu tirore:

²³ “Cũcoro nuhmino, ne mũno mehne jieraricoro, nijinocãre bocaro pohna tirohca to macunocãre.

Tirocã Emanuel wama tirohca”, ni joaa tiha Cohamacu yare. (Emanuel nino: “Cohamacu mari mehnetã jira”, nino nica.)

²⁴ Cohamacu anjo Josere to Æ ni yahuri baharo José sehe wahcã, anjo to ditiriro seheta tiro María mehne wamomaca dũhteha.

²⁵ To macunocãre to pohna tihto pano José sehe ticoro mehne jiera tiha. Baharo ticoro sehe pohna tia wahaha. Tiro sehe wihãrirocãre Jesu wamoaha.

2

Sū mŭja taro macaina Jesucāre űna sŭha

¹ Herode Judea yahpa macaina ti bui puhtoro to jiri pja ti yahpai jiri macai Belēi Jesu masa bajuaha. To ā masa bajuari baharo űahpichohare buheina űahpichohare noano masiina sū mŭja taro macaina ta, Jerusalēry wihia. ² Ā wihia, masare tó macainare sinituha:

—¿Judio masa ti bui puhtoro jihtiro cjihto mipure nohoru masa bajuacari tiro? Sū mŭja taroru jina, űahpichohaca to wahma bajua wahā sŭchu űna, “Puhtoro masa bajuaro nica”, ni masihi sā. Ā to bajuachu űna, sā cāno mehne tirore űo payona tana tahi ōry —ni yahuha buheina masare.

³ Ā yoa paina Herode tīre yahua tiha. Ti ā yahuchu tuhoro Herode sehe soro tuhotuha. Ā jia jipihtina Jerusalē macaina cāhu to yoar sehetā soro tuhotuha tina cāhu. ⁴ Ā jiro Herode sehe jipihtina sacerdotēa puhtoare, mari judio masare buheina cāhure to pjirocari baharo ti cahmachu pitichu űnao, tinare sinituha tiro:

—¿Nohoru masa bajuarohcari Cristo sehe masa tuhotuchu? —ni sinitu űna tiro.

⁵ Ō sehe ni yahuha tirore:

—Belēi, Judea yahpai jiri macai Cristo masa bajuarohca. Ō sehe ni joaa tiha Cohamacu yare yahu muhtariro cjiro:

⁶ “Belēi yu yainare Israe masare dutihtiro tarohca.

Ā jiro paye macari Judea yahpai jia macari yuhdoro jira Belē”, ni joaa tiha Cohamacu yare —ni yahuha tina Herodere.

⁷ Ti ā ni yahuri baharo Herode masa ti marieno watoi sū mŭja taroru tarinare pjirocaha. To caharu tina ti sŭchu űnao, tinare sinitu űna. To ā sinitu űnachu tuhoa, űahpichohacare ti űuri dachore yahuha tina.

⁸ Ti ā yahuri baharo Herode sehe tinare Belēry warocarō ō sehe niha tinare:

—Tirocāre noano macaga. Tirocāre bocana tjuahna yuhure yahu tjuahga. Yuhu cāhu tirocāre űo payoi wahai tai nija —nimaha tinare Herode.

⁹ To ā niri baharo, tina wahaa wahaha. Ti ā wahachu sū mŭja taroi ti űuria űahpichohaca sehe mu tārucuha. Ā yoa wihārirocā to jiro bui waroi tjuua wahā sŭha tia sehe. ¹⁰ Ā jia űahpichohacare űna, tuaro wahcheha tina. ¹¹ Wihārirocā to jiri wuharu su, sāa wahaha tina. Ā sāa suā, wihārirocāre to pocoro mehne jirocāre űna tina. Ā űna tina na tuhca caha su, tirocāre űo payoha. űo payo tuhsu ti caa pocare naroca pjōroca, urure, incensore, mirra wama tia me sitia cāhure na wio, tīre tirocāre wapa marieno waa tiha. ¹² Tīre wa tuhsu carīa wahaha tina.

Ti ā carīchu cahānoru Cohamacu yahuha tinare: “Herode cahai tjuarena tjiga”, ni yahuha Cohamacu tinare cahānore. To ā ni yahuri baharo, tina sehe wahcāha. Ti ā wahcāri baharo pa maharu ti ya dihtarū tjuaa wahaa tiha.

José cāhu Jesucāre Egiptoru na duhti wahcāa wahaha

¹³ Ti ā wahari baharo Cohamacu anjo cahānoru Josere bajuaro, ō sehe niha:

—Wahcāga. Herode sehe maharirocāre wajāno taro, macano nina mipure. Ā yoa maharirocāre, to pocoro cāhure Egiptoru cjero na duhti wahcāa wahaga. Tōrye yu niri purota jiga —ni yahuha anjo Josere.

¹⁴ To ā nichu tuhoro, José sehe űamihta wahcā, maharirocāre to pocoro cāhure Egiptoru na duhti wahcāa wahaha.

¹⁵ Egiptoru suā, Herode to catiro puro tōrye jiha tina. Ā yoa panoru macari Cohamacu yare yahu muhtariro cjiro to ni joariro sehetā. Tīre tirore Cohamacu joa dutia tiha. Ō sehe ni joaa tiha Cohamacu yare: “Egiptoru jirirore yu macare pjirocahi”, ni joaa tiha Cohamacu yare.

Herode macanacāre wajā dutiri jire

¹⁶ Ā yoa űahpichohare buheina ti duhti yuhduachu tuhoro Herode sehe sua yuhduaha. Ā suaro, Belē macainare, ti maca duhtu caha macaina cāhure ti pohmare mu pohmare pu cāhma cjuainacāre wajā batoa dutiha tiro. Wahmanore űahpichoha buheina űahpichohacare ti űuri dachore yahuha Herodere. Ti ā nichu tuhoro tiro to wajā duarrocā to masa bajuari dachore masino, “Ōpe cāhmari cjuara” nino, pu cāhma cjuainare wajā batoa dutiha.

¹⁷ Panoru macariro Jeremia Cohamacu yare yahu muhtariro cjiro to ni joariro sehetā ā wahaha. Ō sehe ni joaa tiha tiro:

¹⁸ “Ramā wama tiropu bisiro coa tarohca.

Tuaro cahya mehne tiiro coa tarohca. Raquel panamana numia ji turia numiaru Israe masa namosānumia ti pohmare tuaro tiiaha.

Ti pohmare ti wajāchu űna, ne cahya duhusi”,

ni joaa tiha panoru.

¹⁹ Ā yoa Herode to yariari baharo Egiptoi jirirore Josere Cohamacu yairo anjo cahānoru bajuaha. Ā bajuaro ō sehe niha Josere:

²⁰ —Maharirocāre wajā duaina cjiri yariaa wahahre. Ā jicu tirocāre to pocoro mehne Israe yahparu na tjuaa wahaga muhu —ni yahuha anjo Josere.

²¹ To ā niri baharo tiro wahcā, maharirocāre to pocoro mehnetā Israe yahparu na tjuaa wahaha. ²² Wiho mejeta

Arquelao Herode macano sehe to pucaro cohtotariro to jichu tuhoro José sehe Judea yahpai cuuro, tjueraha. Á jiro pari turita cahānopu tirore yahu namoha tjoa. Tirore pari turi Judea yahpare ji dutieraha. To ā ni yahuri baharo, tina Galilea yahparu wahaa wahaha. ²³ Ti yahpapore Nazare wama tiri macai jiha tina. Á yoaha tina Cohamacu yare yahu mahtaina cjiri ti joariro seheta. Ō sehe ni joaa tiha: “‘Cristo Nazare macariro tjira’, niahca masa”, ni joaa tiha Cohamacu yare yahu mahtaina panopu macaina.

3

João masare bautisariro masare yahuha
(Mr 1.1-8; Lc 3.1-9, 15-17; Jn 1.19-28)

¹ Á yoa baharopu João masare bautisariro jiha. Judea yahpai masa marienopu tiro Cohamacu yare yahu dūcaha masare. ² Ō sehe ni yahuha tinare:

—Māno macariro Cohamacu masa puhtoro to sūho jihto mahanocā duhsara. Á jina “Ñano yoaeraja”, masa ni tuhotumari cjirire duhuga. Masa űaa buhirire cahya, Cohamacu sehere cahmaga masa —ni yahuha tiro tinare.

³ Panopu macariro Isaia Cohamacu yare yahu mahtariro cjiro João to buhehtore ō sehe ni joaa tiha:

“Masa marienopu cūiro sañurucu, ō sehe ni buherohca:

‘Mari puhtoro to tahto pano tirore cahmaeraina cjiri masa tuhotuare cohtota, tirore cahmaina jiga masa’, ni sañurucu buherohca”,

ni joaa tiha Isaia cjiro João cjihtore.

⁴ Tiro João camello pjoari suhtirore sāario, wahiquiro cahsareta tuā dihoriro jiha. Poroare, macaroca macaina miquina mi cūhure chua tiha. ⁵ Jerusalē macaina, jipihtiro Judea yahpai jiina, Jordāo wama tiri ma cahai jiina cūh tirore tuhoa taha. ⁶ Wihi, tirore tuho, ti űaa yoarire Cohamacu yahuha tina. Ti ā ni yahuchu tuhoro Jordāo wama tiri mai João tinare bautisaha.

⁷ Á jiro payu fariseo curua macaina, sādūceo curua macaina cūhu Joāore ti bautisa dutia tachu űano tiro tinare ō sehe ni yahuha:

—¿Masa cūhu agāa űima tiina yoaro sehe masa mahñoa buhea mehne masare dojomehneina jina, Cohamacu masare to buhiri dahrehto pano tirore cui, duhti masierara masa? ⁸ Á jina potocāta masa űaa buhirire bujua witi, Cohamacu cahmana jiihna, noaa yoa űoga.

⁹ Ō sehe ni tuhotuena tjiga: “Panopu macariro Abrahā mari űachu cjiro jia tiha. Á jina to panamana jina mari Cohamacu

yaina jija”, ni tuhotuena tjiga masa. Masare niita nija. Abrahā panamana jiina jimana masa. Masa ā jipachuta ti masa ā jia yaba cjihti jierara. Cohamacu sehe ahri taa mehne Abrahā coyeare dahre masina. Á jiro Abrahā coyea masa jia wiho waro jira taa ti wiho waro jiro seheta. ¹⁰ Ō sehe jira: Masa yucari yoaro seheta jira. Cohamacu sehe coma mehne yucarire cjā cohāriro yoaro sehe jira. Á jiro noaa dicta maria yucare nuhcōri mehneputa cjā cohānohca tiro. Tiro to cjā cohāri baharo, pichacapu jū cohānohca tiro. Áta yoaro taro nina masa cūhure tirore cahmaerainare. ¹¹ Yu baharo yu bui tuariro tarohca. Noa yuhduariro jira tiro. Tiro yoaro sehe jieraja yuhu sehe. Á jicu tirore tuhotucu, “Wiho jiriro jija yuhu”, ni tuhotuja yuhu. Yuhu sehe masa űaare tuhotumari cjirire tuhotu cohtotainare diapu bautisacu, co mehne yoamahi. Tiro sehe yu yuhdoro yoarohca. Espiritu Santore masa mehne ā jirucuchu yoarohca tiro. Wiho mejeta paina sehere űaare ti tuhotumari cjirire duhu du-aeraina sehere tiro pichaca mehne buhiri dahrerohca. ¹² Yu baharo tariro cahsari cohāriro yoaro sehe jira. Cahsari cohāriro to batiro mehne jipihtia to trigo yapari cahsare putiwera. To ā putiwere baharo trigo sehere to wihbōri wūhu wihborohca. Tó seheta yoarohca tirore cahmainare yu baharo tariro. To putiwea cahsari sehere tiro jūnohca. Ti pichaca ne yatisi. Áta yoarohca tiro yu baharo tariro tirore cahmaerainare —ni yahuha João.

João Jesure bautisaha
(Mr 1.9-11; Lc 3.21-22)

¹³ Baharo Jesu Galileapu jiriro cjiro waha, Jordāo wama tiri mapu buhu sūha Joāore bautisa dutiro. ¹⁴ Wahmanore João tirore bautisa duaeramaha.

—Neho, muhu sehe yu yuhdoro tuariro yuhu sehere mu bautisachu noaboa. Muhure bautisaboriro jieraja yuhu —ni yuhtimaha João Jesure.

¹⁵ Jesu sehe ō sehe ni yuhtihā tirore:

—Yuhure bautisasiniga. Ō sehe yoana, Cohamacu to dutiriro seheta sohtori tina nija mari —niha Jesu.

To ā nichu tuhoro:

—Jai —ni yuhtihā João.

¹⁶ Á ni tuhsu, Jesure bautisaha. To bautisa tuhsachu Jesu diapu ducuriro maja sūacu sūha. To maja sūacu sūchuta, māano pari māaha. Cohamacu to Espiritu buja yoaro sehe tiro bui to duji tachu űaha. ¹⁷ To ā duji tachu māanopu durucuro coa taha:

—Ahriro yu macu yu cahāriro jira. Tiro mehne tuaro wahcheja —nino coa taha māanopu.

4

*Watino ñaare yoa dutimaha Jesure
(Mr 1.12-13; Lc 4.1-13)*

¹ Ā yoa Espiritu Santo sehe Jesure masa marienopu naaha, tópu watino tirore ñaare to yoa duti ñahto sehe.

² Tópu suro cuarenta dachori waro churo marieno jiha Jesu. Ā jiro jusa baaha. ³ Jusa to baachu ñuno watino sehe tiro cahapu suro, ð sehe niha:

—Muhu Cohamacu macno jicu, ahri tãa pocare chua dojomehnege —nimaha tiro Jesure.

⁴ Jesu ð sehe ni yuhtiha:

—Yoaeraja. Cohamacu yare ti joari pui ð sehe nina: “Masare chua mehne dihta catierago cahmana. Jipihia Cohamacu to ya yahua mehne jiro cahmana”, nina Cohamacu —ni yuhtiha Jesu watinore.

⁵ To ā ni yuhtiri baharo watino sehe Jerusalēpu “Cohamacu ya maca”, ti niri macapu Jesure naaha. Tópu na suro, Cohamacu ya wuhu bui Jesure na suha tiro. ⁶ Na su tuhsu, tirore ð sehe nimaha:

—Cohamacu yare ti joari pui ð sehe nina: “Cohamacu to anjoare muhare ñu wihbo dutirohca. Ā jia tina sehe muhare ñu wihboahca,

‘Tācapu puha tu muari’ nia”, nina ti joari pui. To ā niri potocā jichu muhu Cohamacu macno jicu yahpau pju bora ñoñujata yuhare. Muhare tina ti yoadochu ñoñujata yuhare —nimaha watino.

⁷ Jesu pju bora ño duaeraro ð sehe ni yuhtiha:

—Cohamacu yare ti joari pui ð sehe nina: “Musa puhtoro Cohamacu to niri cjiirire ‘¿Potocā tjiari?’ ni masi duana Cohamacure yoa ño duti macaena tjiga”, nina Cohamacu yare ti joari pui —niha Jesu.

⁸ To ā ni yuhtiri baharo mua yuhduu tūcupu Jesure na mujaha watino tjoa. Tu buipū muja pja su, jipihia macarine ñoroca boroha Jesure. Ti cjuaa cahure ñoha. ⁹ Ā ñono Jesure ð sehe nimaha:

—Yuhare na tuhcuca caha su, ño payoga muhu. Mu ā yoachu jipihia ahri macarine muhare waihtja —ni yahumaha watino.

¹⁰ To ā nichu Jesu ð sehe ni yuhtiha:

—Satana, wahaga muhu. Ō sehe nina Cohamacu yare ti joari pui: “Mu puhtoro Cohamacu dihtare ño payoga. To ya dutia dihtare yoaga”, nina Cohamacu yare ti joari pui —niha Jesu watinore.

¹¹ To ā nichu tuhoro watino wahaa wahaha. To wahari baharo anjoa sehe wihi, Jesure yoadohoa tirore chua waha.

*Galilea yahpai Jesu buhe ducaha
(Mr 1.14-15; Lc 4.14-15)*

¹² Ā yoa Joãore peresu ti yoachu tuhoro, wahaa wahaha Jesu. Waha, Galilea yahpau suha. ¹³ Tói jiri macapu Nazarepu waha, yuhdu wahcã, Capernau wama tiri macapu suha. Galilea wama tiri bucupariro duhtu cahai jira Capernau. Ti maca Zebulō yahpa cahai, Neftali yahpa cahai jire Capernau. Tópu su, jiha Jesu. ¹⁴ Āta yoaha Jesu panopu macariro Cohamacu yare yahu muhtariro Isaia cjiro to ni joariro seheta. Ō sehe ni joaa tiha:

¹⁵ “Zebulō yahpa cahai, Neftali yahpa cahai, bucupariropu waharoi, Jordão pa buhusehe coapu Galilea yahpa jira.

Ti yahpa judio masa jieraina ya yahpa jira. ¹⁶ Tó macaina Cohamacu yare noaare masierara.

Ā masierapahta noarirore ñuapu masiahca. Tina sehe Cohamacure ne masierara.

Ā jia pichacapu wahaborina jimaha. Ā jiro cãiro tinare Cohamacu yare masichu yoarohca”, ni joaha Isaia cjiro.

¹⁷ Tópu jiro, Cohamacu yare yahu ducaha Jesu:

—Musa ñaare tuhotumari cjiirire duhu, noaa sehere tuhotu cohtota, Cohamacureta macaga musa. Muanu macariro Cohamacu jipihina bui puhtoro to suho jihto mahano cã duhsara —ni yahu ducaha tiro.

*Pititiro wahi wajãmare tiro mehne
macaina cjihtire pjiha Jesu
(Mr 1.16-20; Lc 5.1-11)*

¹⁸ Ā yoa Galilea wama tiri bucupariro duhtu cahapu Jesu sito wahcãmahno ñuha Simore, to bahuro Andre mehne. Simota Pedro ti ni pisuriro jiha. Tina sehe wahi wajãina jia, ti wañuyucure doca ño mujaa niha bucupariropu.

¹⁹ —Yuhu mehne macaina cjihti taga musa. Yuhu mehne musa tachu, musa wahire ñaha cahmachuina musa jiro seheta, Cohamacu yaina cjihtire masare pji cahmachuina cjihtire yoaihtja musare. Yuhu mehne musa tachu ā yoahtina cjihtire cūihtja musare —niha tiro tinare.

²⁰ To ā nichu tuhoata ti wañuyucure cūnoca, tiro mehne wahaa wahaha.

²¹ Ā yoa Jesu tina mehne yuhdu wahcã, Santiagore to bahuro João mehne boca suha tjoa. Tina Zebedeo pohna jiha. Ti yaria dohoriai ti pucaro mehne tina cūhu ti wañuyucure cahnoa niha. Tina puarore tiro pjirocaha. ²² To ā pjirocachu tuhoro, tina sehe dóihtia ti pucarore, dohoria cahure cū, Jesu mehne wahaha.

*Payu masare buheha Jesu
(Lc 6.17-19)*

²³ Ā yoa jipihitiro Galilea yahpare Jesu buhe tiniha. Judio masa mari buhea

wahusepa noaa buheare, muano macariro puhtoro to suho jia tiare buheha. Tinare buhe, dohatiinare noaina wahachu yoaro jipihtia dohatiare cohaha tiro. ²⁴ To a yoaare tuhoa Siria yahpa macaina jipihitiropa ti yahpai jiina tire masi ducaha. A masia, soro jia dohatia cjuainare, tuaro puriare cjuainare, wafia ti saanohrinare, nama yaria manare dohatiinare, tini masieraina cahure na suha. Ti a na sachu nuano jipihitina tinare noaina wahachu yoaha Jesu. ²⁵ To a yoachu nuu, Galilea yahpa macaina, Decapoli wama tiropu jia macari macaina, Jerusalē macaina, Judea yahpa macaina, Jordao pa buhusehe coa macaina payu masa tiro mehne wahaha.

5

Tācupu mija, tōi buheha Jesu masare

¹ Masa payu to cahai ti sachu nuano Jesu tācupu mijaha. Mija su, tōi dujiha. Tōi to dujichu to buheina sehe tiro cahapu suha. ² Ti sachu nuano o sehe ni buhe ducaha:

Ō sehe jiina jira wahcheina
(Lc 6.20-23)

- ³ –Ti ŋaa tuhotumari cjirire duhu, noaa sehere tuhotu cohtotaina Cohamacure cahmaina wahcheina jira. Muano macariro puhtoro to suho jiropare wahaahca tina. Muano macaa ti ya jira.
- ⁴ ‘Yahco tiina cahu wahcheina jira. Tinare wahchechu yoarohca mari Pucu.
- ⁵ ‘Painare yuhduraca duaeraina a jica nieraina wahcheina jira. Cohamacu “Waihtja”, tinare to nirire cjuahca tina.
- ⁶ ‘Cohamacu to dutiro sehe yoa duaina, noaare yoa duaina wahcheina jira. Cohamacu to yoadohochu tina noaare yoa sohtori tiaha.
- ⁷ ‘Painare pja nuina wahcheina jira. Ti a pja nuachu Cohamacu tina cahure pja nuahca.
- ⁸ ‘Ti ŋaa buhirire cosanohrina wahcheina jira. Cohamacure nuahca tina.
- ⁹ ‘Masare bosaina wahcheina jira. Tinare “Yu pohna jira”, ninohca Cohamacu.
- ¹⁰ ‘Cohamacu dutiare ti yoari buhiri ti ŋano yoanohrina sehe wahcheina jira. Muano macariro puhtoro to suho jiropu to yare cjuahca tina.
- ¹¹ ‘Yu yare masa yoari buhiri paina musare ti tuhtipachuta wahcheina jira musa. Musare ti ŋano yoapachuta wahcheina jira musa. Yu yaina masa jiri buhiri musare jipihtia ŋaa ti quiti dojomehnepachuta ti mahnopachuta wahcheina jira musa. ¹² Cohamacu yare yahu muhtainare masa pano jinare tinapureta ŋano yoa muhtaha. Masa

cahure ti yoariro sehe ti yoachu wahchega. Noano yajeripohna tiga. A jiro muanopu masa sachu pjiro noano yoarohca musare Cohamacu –ni yahuha Jesu.

Moa yoaro sehe, buhriaro yoaro sehe jira Jesu yaina

(Mr 9.50; Lc 14.34-35)

¹³ A yoa Jesu o sehe ni buhe namoha:

–Moa wahiquireo dihire to ŋano wahaerachu yoaro sehetu masa sehe yu yaina sehe jipihtina painare ŋaare ti yoa duaerachu yoara. Wiho mejeta moa sehe ti ŋaa wahachu pari turi noaa yoahto basioerara. Ti moa ne noaerara. Ti a wahachu ti moare cohano cahmana. Ti a cohari baharo ti bui masa tu cuna. Ne yaba cjihti jierara ti moa ti cohōa. (Ti yaba cjihti jieraro sehetu jiena tjiga masa. Cohamacu ya sehere cohāena tjiga) –ni yahuha Jesu.

¹⁴ A yoa tiro o sehe ni buhe namoha:

–Buhriaro marine to nuachu yoaro sehetu masa sehe yu yaina sehe ahri yahpa macainare Cohamacure masichu yoara. Tacu bui jiri macare nuohu basioerara. ¹⁵ A yoa sihariare masa sihāa, biato docapu noaerara. Tiare sihariare muanoi duhu payora ti wahu macaina jipihtina ti nuhtiare. ¹⁶ Ō sehetu masa cahu buhriaro yoaro sehe jiina jina, noaare yoaga. Masa a yoachu nuu masa mari Pucu muano macarirore no payo, “Tuariro, noariro jira”, niaha –ni yahuha Jesu.

Cohamacu to dutiare to joari cjirire yahuha Jesu

¹⁷ A ni tuhsu, tinare o sehe ni yahu namoha:

–Ahrire masa masichu cahmaja yuhu. Cohamacu to dutiare Moise cjirore to cūire, to yare yahu muhtaina cjiri ti joari cjiri cahure cohāi tai nierahi. Ti dutiare musare noano yahu potoi tai nii. Ti dutiare ti quihōno jichu ŋoi tai. Ti niriro sehetu yoa sohtori tii tai nii. ¹⁸ Potocā musare nii nija. Pihtiri dacho pano jisinchu Cohamacu dutia Moise cjirore to cūire ne mahanocā baro cohāsi mari. Ahri yahpa, muano cahu ti jisninino puro to dutia cahu jirucuahca. A jirucua ti niriro sehetu sohtori tirohca. ¹⁹ A jia ti dutiare caina yuhduraca, painare tō sehe yuhduraca dutia, muano macariro puhtoro to suho jiropu cahamaca yoaro sehe jiaha. Cāno dutiacā to jipachuta tina yuhduraca, cahamaca yoaro sehe jiaha tina. Paina ti dutiare noano yoa, painare ti yoaro sehe yoa dutia, muano macariro puhtoro to suho jiropu puhtoa yoaro sehe jiaha tina sehe. ²⁰ Musare niita nija yuhu. Judio masare buheina, fariseo curua macaina cahu Cohamacu cahmaare quihōno yoaerara. Tina ti yoariro yuhdoro Cohamacu cahmaare

yoaga m̄sa sehe. M̄sa ā yoaerana, puhtoro Cohamacu to saho jiropare ne susi m̄sa –ni yahuha Jesu.

Susiniare yahuha Jesu
(Lc 12.57-59)

²¹ Ā ni tuhsu, tinare ō sehe ni yahu namoha:

–Panoru macaina ō sehe ni ti yahuri cjirire tuhori jimare m̄sa: “Masare wajāena tjiga. Masare wajāiro ti buhiri dahretiro jira”, ti niri cjirire tuhori jimare m̄sa. ²² Ahri ti yahuri yuho curero musare ahri sehere yahu namoihtja. To coyeiro mehne susiniriro sehe ti buhiri dahretiro jira masunore wajāiro yoaro seheta. To coyeirore tuhtiriro, “Ne tuho masia maer-ariro jira m̄hu”, niriro buhiri dahre dutina cahai ti naahitiro jira. “Tuho masierariro jira m̄hu”, to coyeirore nirirore pichacaru wahahto cua yuhdura tireore.

²³ M̄sa coyeiro musare to ũ tuhtichu ō sehe yoaga. Cohamacu wuhuru Cohamacu m̄sa ũ payohto pano, wahiquire jū m̄o, m̄sa wahto pano ō sehe yoaga. ²⁴ M̄sa wahtire duhu cū, m̄sa coyeiro caharu waha, “Pari turi cahmachena tjiijhna. Tō puorta duhujihna tīre”, niga tireore. M̄sa ā niri baharo Cohamacu wa, ũ payona wahaga to wuhuru.

²⁵ Pairo m̄hure to yhusā duachu, puhtoro masare beseriro caharu m̄hure to naa duachu, tiro mehne suaro marieno wahaga. Masare beseriro caharu to na saho pano tiro mehne noano jiga. M̄ ā yoachu ũano tiro m̄hure yhusāeraboca. M̄ ā yoerachu tōp̄re m̄sa sachu tiro sehe m̄hure masare beserirore yhusānohca. To ā yhusāchu, beseriro sehe peresu yoainapare m̄hure warohca. Ā jia tina m̄hure peresu yoahca. ²⁶ Potocā nii nija m̄hure. Tōp̄re jisiniihca m̄hu. Pu ti wapa dutirire m̄hu wapa pahōiru wijaaihca m̄hu –ni yahuha Jesu.

Pairo namono mehne ũano yoare yahuha Jesu

²⁷ Ō sehe ni yahu namoha Jesu:

–Panoru macainare ō sehe ti ni yahuri cjirire tuhori jimare m̄sa: “Pairo namono mehne ũano yoarena tjiga”, ti niri cjirire tuhori jimare m̄sa. ²⁸ Ahri ti yahuri yuho curero musare ahri sehere yahu namoihtja. Numinore ũahaerapota, cūiro ticoreore ũano goa pjaro, ũano wacū tuhoturo ũano yo tuhsaha ticoro mehne.

²⁹ Ā jicu m̄ capariaca potō buhusehei jiri-acā mehne ũano yoacu, tiare orewe na m̄ cohāboriro seheta ti ũana yoare duhuga. Tīre duhueracu pichacaru wahaiha. M̄ capariacare m̄ cohāchu tia capariaca dihta butira. M̄hu sehere pichacaru m̄ wahachu

ũa yuhdura. Ā jicu ti ũana yoare duhuga. ³⁰ Ā jicu m̄ wamomaca potō buhusehei jiri wamomaca mehne ũano yoacu, ti wamomacare m̄ date cohāboriro seheta ti ũana yoare duhuga. Tīre duhueracu pichacaru wahaiha. M̄ wamomacare m̄ cohāchu ti wamomaca dihta butira. M̄hu sehere pichacaru m̄ wahachu ũa yuhdura. Ā jicu ti ũana yoare duhuga –ni yahuha Jesu.

To namonore cohāre yahuha Jesu
(Mt 19.9; Mr 10.11-12; Lc 16.18)

³¹ Ō sehe ni yahu namoha Jesu:

–Panoru ahri cāhure niha: “To namonore cohā duariro to cohāhtore yahuri pū mehne ticoreore cohā masina”, nimaha panoru. ³² Ahri ti yahuri yuho curero musare ahri sehere yahu namoihtja. To namono pairo mehne ũano yoeraricoro to jipachuta to manūno ticoreore cohāboca. To ā cohā daporicoro pairore manū tiro ũano yoaro nica ticoro pairo mehne jiro. To manūno ticoreore ā cohāno ticoreore pairo mehne ũano yoachu yoara. To baharo namo tiriro cāhu ticoro mehne ũano yoaro nina –ni yahuha Jesu.

Wama payo niare yahuha Jesu

³³ Ō sehe ni yahu namoha Jesu:

–Panoru macaina ō sehe ti ni yahuri cjirire tuhori jimare m̄sa: “M̄sa niriro seheta yoaga. ‘Cohamacu mehne potocā ā yoaihtja’, m̄sa niriro seheta yoaga”, ti ni yahuri cjirire tuhori jimare m̄sa. ³⁴ Ahri ti yahuri yuho curero musare ahri sehere yahu namoihtja. “M̄ano mehne potocā nii nija”, ni m̄ano mehne wama payo niena tjiga. M̄ano sehe Cohamacu mari puhtoro to saho jiro jira. Wiho jiro jierara. To ā jichu ũana m̄ano mehne ā niena tjiga. ³⁵ Ahri yahpa mehne ne wama payo “Potocā nii nija”, niena tjiga. Ahri yahpa Cohamacu ya yahpa jira. To ā jichu ũana ā niena tjiga. “Jerusalē mehne potocā nii nija”, ne wama payo niena tjiga. Tuariro mari puhtoro ya maca jira Jerusalē. Wiho jira maca jierara. To ā jichu ũana ā niena tjiga. ³⁶ “Yū dapu mehne potocā nii nija”, ni wama payo niena tjiga. M̄sa pjoari ti yehsea wahachu yoa masierara m̄sa. Ti ũia wahachu cāhure yoa masierara m̄sa. Ā yoa masieraina jina “Yū dapu mehne potocā nii nija”, ni wama payo niena tjiga. ³⁷ “Yoanahija”, nina wama payoro marieno ō sehe dihta tīre nirucuga. “Yoasi”, nina cāhu wama payoro marieno nirucuga. M̄sa wama payo nina, watīno ũariro to dutiriro seheta yoana nica m̄sa –ni yahuha Jesu.

Ti cahma suaare yahuha Jesu
(Lc 6.29-30)

³⁸ Ō sehe ni yahu namoha Jesu:

—Panopu ð sehe ti ni yahuri cjiirire tuhori jimare musa. “Muhure pairo mu capariacare to cja tihãriro sehetu muhu cãhu tirore cja tihã cahmaga. Mu piriacare to cja nuhariro sehetu muhu cãhu cja nuha cahmaga”, ti niri cjiirire tuhori jimare musa. ³⁹ Ti yahuri yuhdo curero ahri sehere yahu namoihtja musare. Muhure ñano yoarirore ã ñunocahga. Cã buhusehe mu wahsupure to cjaçhu, pa buhusehe cãhure cja dutiga tirore. ⁴⁰ Pairo buhiri dahre dutirirore muhure to yahusãchu, dutiriro sehe mu camisare muhure yahusãrirore wa dutiboca. To ã wa dutichu, tirore waga. Mu bui macari suhtiro cãhure wa namoga tirore. ⁴¹ Pairo surara paye barore cã kilómetro muhure to naabasa dutichu, pa kilómetrore waha namoga tjoa. ⁴² Muhure sinirirore waga. Tuhsu, pairo muhure to waso dutichu wasoga tirore —ni yahuha Jesu.

*Musare ñu tuhtiinare cahiga
(Lc 6.27-28, 32-36)*

⁴³ Õ sehe ni yahu namoha Jesu:

—Masa ð sehe nina: “Musa mehne macainare cahiga. Á yoa musare ñu tuhtiinare ñu tuhti cahmaga tjoa”, ti niri cjiirire tuhori muhtari jimare musa. ⁴⁴ Ti yahuri cjiiri yuhdo curero ahri sehere yahu namoihtja musare: Musare ñu tuhtiinare cahiga. Á cahina tinare noano yoaga. Musare ñano yoainare ti ya cjihtire Cohamacure sini payoga. ⁴⁵ Musa ã yoana mari Pucu muano macariro pohna jira musa. Cohamacu sehe cãno potori yoara masare. Ñaina cãhure, noaina cãhure sã sichu yoara tiro. Tuhsu, Cohamacu dutiare yoaina cãhure, yoaeraina cãhure coru tachu yoara tiro. Masare cãno potori to yoariro sehetu musa cãhu yoaga. ⁴⁶ Musare cahina dihtare musa cahichu ti ne yaba cjihti jierara paina sehere musa cahierachu. Puhtoa ya cjihtire wapa na cohtaina cãhu tó sehetu yoara. Á jina jipihitnare cahiga. ⁴⁷ Musa coyea dihtare musa noano piti bocachu ti cãhu ne yaba cjihti jierara paina sehere musa noano piti bocaerachu. Cohamacure masieraina cãhu tó sehetu yoara. Á jina jipihitnare noano piti bocaga. ⁴⁸ Ñaa marieina jiga musa. Musa Pucu muano macariro to ñaa marieriro to jiriro sehetu musa cãhu ñaa marieina jiga —ni yahuha Jesu.

6

Noa yoaare yahuha Jesu

¹ Pari turi tiro ð sehe ni yahu namoha:

—Cohamacu ya cjihtire noaare yoana, “Cohamacu yare yoa pahñoina jija sã”, ni yahuena tjiga painare. Musa ã ni yahuri buhiri noaare musa yoari cjiiri ne yaba cjihti

jierara. Á jiro Cohamacu muano macariro noaare musa yoari wapa musare ne wasi. ² Á jina pjacoinare yoadohona, tãre masare yoa ñoina tjiga. Masa ti ñuenoi yoadohoga tinare. Cãina noaa ti yoare yoa ñohna mahapu jünare, judio masa mari buhea wãhusepu jüina cãhure. Tina mari baharo buhusehei ñano yoa cohtaina jira. Á yoa ñohna tina, “Noaina jira”, masare ni ñu dutia. Ti ã ni ñuchu ã yoa ñoina sehe wahche tuhsure. “Noaina jira” ni, masa ti ño payochu wahche tuhsure tina. Á jiro Cohamacu sehe ne wahche namochu yoasi tinare. ³ Á jina pjacoinare yoadohona, masa ti ñuenoi yoadohoga tinare. Musa mehne macaina mehne jina ti ñuenoi pjacoinare yoadohoga. ⁴ Masa ti ñueraropu musa yoadohopachuta Cohamacu sehe ñuna. Á ñuno musa ã yoari wapa warohca musare —ni yahuha Jesu.

*Cohamacure siniare yahuha Jesu
(Lc 11.2-4)*

⁵ Pari turi tiro ð sehe ni yahu namoha:

—Cohamacure sinina, mari baharo buhusehei ñano yoa cohtaina yoaro sehe yoaina tjiga musa. Judio masa mari buhea wãhusepu ducu, mahapu cãhure ducu, Cohamacure sini ñohna tina masare. Á sini ñoa potocã masa tinare ti ño payochu ti mehne tina wahche tuhsure. ⁶ Cohamacure sinicu tacu, mu ya tahtiaru biha sãaga. Biha sãa, musa Pucu ñumahnouerarirore siniga. Musa ã yoachu masa marieno musa sinipachuta musa Pucu musare tuhoroçha. Á tuhoro musare noano yoarohca tiro.

⁷ Á jina Cohamacure sinina, tuhuroturo marieno musa sinirireta pari turi sini majare tjua mujaena tjiga. Õ sehetu yoara Cohamacure masieraina. “Payu durucua mehne Cohamacure sã sinichu tiro sãre tuhoroçha”, ni tuhutumana tina. ⁸ Tina yoaro sehe yoaina tjiga. Musa sinihtu pano musa Pucu musa cahmaare masi tuhsura. ⁹ Á jina ð sehe ni sininahca Cohamacure:

“Sã Pucu, muano macariro muhu ñaa marieriro ã jirucura.

¹⁰ Mipure jipihitna bui puhtoro jiga.

Muanopu mu dutiro sehetu ti yoariro sehetu ahri yahpa macaina cãhu yoajaro.

¹¹ Á jicu dachoripe sã chũhtire warucuga sãre.

¹² Paina sãre ti ñano yoarire sã boja.

Á jicu muhu cãhu sã ñano yoarire boga.

¹³ Á jicu sã ñaare yoa duana sã goa pjachu ñucu tãre yoa dutii tjiga.

Á jicu sãre ñaare yoerachu yoaga.

[Muhu sã puhtoro tuariro ã jirucuihca. Jipihitina muhure ã ño payorucuahca], ni siniga Cohamacure.

¹⁴ 'Paina musare ti ñaa yoarire musa bochn ñuno, musa Pycu mñano macariro cãhu musa ñaa yoarire borohca. ¹⁵ Wiho mejeta paina musare ti ñaa yoarire musa boaerachũ musa Pycu cãhu musa ñaa yoarire ne bosì —ni yahuha Jesu.

Chũ duhuare buheha Jesu

¹⁶ Æ jiro tiro tinare õ sehe ni yahu namoha:

—Cohamacũ ño payona tana chu duhuna bujua witiina yoaro sehe yoa ñoena tjiga. Tó sehe yoara mari baharo buhusehei ñano yoa cohtaina. Tina ti wũhdũa poca cahyaina yoaro sehe jira. Ti ã jiina jichũ ti chũ duhuchũ ñũ masina masa. Potocãta musare nii nija. Tinare masa ño payochũ cahmana tina. Æ jia tinare ti ño payochũ ñũa tina wahche tuhsure. (Cohamacũ sehe tirore ti ño payori wapa tinare wahchechũ yoasi. Æ jina tina yoaro sehe yoa ñoena tjiga musa.) ¹⁷ Musa chũ duhuna, musa pjoarire co mehne wa payo waha majare payoga. Æ jina musa wũhdũa pocare cosaga. ¹⁸ Musa ã yochũ musa chũ duhuchũ ñũ masisi masa. Mari ñũ mahnoerariro Cohamacũ dihta musa chũ duhuare ñũ masinohca. Musa sahsero musa jichũ tiro musa mehne ã jirucura. Æ ñuno tiro musare noano yorohca tirore musa ño payori wapa —ni yahuha Jesu.

Mñano macaare cjuã dutiha Jesu
(Lc 12.33-34)

¹⁹ Æ jiro tiro õ sehe ni yahu namoha:

—Ahri yahpa macaare na cahmachuena tjiga. Õ macaa baa wahaboca. Ti baerachũ yacariro naboca tire. To yacaerachũ machũ tuaboca. Æ jia ahri yahpa macaa nu butihto cuara. Æ jina ahri yahpa macaare tuaro cahmaena tjiga. ²⁰ Mñano macaa sehere cahmaga musa. Mñano macaare machũ tua masierara. Tõpũ musa cjuãa ne baerara. Tõpũ yacariro na masierara. Æ jina mñano macaare cahmaga musa. ²¹ Tõpũ musa cjuãa ti jichũ, mñano macaare Cohamacũ yare tuaro wacũna musa —ni yahuha Jesu.

Masa ti tũhoturo seheta yoara
(Lc 11.34-36)

²² Æ jiro õ sehe ni yahu namoha tinare:

—Sihãria to noano buhriachũ mari ñũ masino seheta Cohamacũ yare tũhotuna to yare noano yoa masinahca musa. Musa tũhoturo seheta yoara musa. Cohamacũ yare tũhotuna noaare yoara musa. ²³ To yare tũhotuerana ñaare yoara musa. Musa ñaa dihtare musa tũhoturucuchũ tí ñaa sehe ñabíaa jira —ni yahuha Jesu.

Niñerure cahĩna, Cohamacũ sehere cahĩerara

(Lc 16.13)

²⁴ Æ jiro tiro õ sehe ni yahu namoha tinare:

—Cãiro Cohamacũ sehere wacũno, tuabiaro niñeru sehere wacũerara. Niñeru sehere tuabiaro wacũno Cohamacũ sehere wacũerara. Niñeru dihtare cahmariro jiro Cohamacũre wahchechũ yoaerara. Cohamacũ cãhũre, niñeru cãhũre pũarore cahma yũhdũrucãhto basioerara musare —ni yahuha Jesu.

Cohamacũ to pohñare ñũ wihbora
(Lc 12.22-31)

²⁵ Æ jiro tinare õ sehe ni yahu namoha:

—Æ jicũ musare nii nija: Musa chũare, siñniare, suhti cãhũre pjĩro cahya tũhotuena tjiga. Musare bajuamehnenno chũare chũhtina cjihti dihtare suhti sããhtina cjihti dihtare Cohamacũ yoaeraha musare. ²⁶ Minichahca perire Cohamacũ to ñũ wihboare masiga musa. Tina weseri maeraina jira. Æ yoa chũare ti wihboa wũhuse tinare mariahna. Musa Pycu mñano macariro sehe tinare ti chũhtire wara. Minichahca yũhdoro musa sehere cahĩna Cohamacũ. Æ jiro musa cãhũre ñũ wihborohca tiro. ²⁷ Pjĩro musa tũhotua mehne cã hora musare cati namochũ yoa masierara musa. Æ jiro musa pjĩro tũhotua yaba cjihti jierara.

²⁸ Æ jina musa suhti sããhtire pjĩro cahya tũhotuena tjiga. Macaroca macaa cohoři ti cohoare tũhotuga. Ti cohoři ti basi suhtire yoaerara. Wiho mejeta tí cohoři noaa suhti yoaro sehe noaa cohoři bajura. ²⁹ Salomo cjiro noaa suhtire sããriro to jipachũta tí cohoři sehe tiro yũhdoro noabia cohoři waro jira. ³⁰ Cohõrre noaa cohoři yoara Cohamacũ sehe. Ti cohoři sehe mahaa dachoricã jirucuma ñai boraa wahara. Mahanocã ji, pa dachoi pichacũ jũa wahara. Ti ã jipachũta cohořire noaa cohoři jichũ yoara Cohamacũ. Æ jiro Cohamacũ cohořire to noaa cohoři to yoariro yũhdoro musa cãhũre noano yorohca. Suhtire warohca. Cohamacũre mahanocã wacũ tuara musa. ³¹ Æ jina musa chũhtire, musa siñnihtire, musa suhti sããhtire pjĩro cahya tũhotuena tjiga. ³² Cohamacũre cahmaeraina sehe tire ã macarucua nina. Musa Pycu mñano macariro jipihtia musa cahmaare masina. To ã masichũ pjĩro cahya tũhotuena tjiga. ³³ Cohamacũ musa pũhtoro to jihto cjihtore cahma mũhtaga musa. Jipihia paye baro yũhdoro tirore cahmaga musa. Noaare to yoa dutia cãhũre cahmaga. Musa ã yoari baharo Cohamacũ sehe musa cahmaa duhsachũ warohca. ³⁴ Æ jina

ñamichacapurẽ mûsa dohse wahahtore pjïro cahya tãhotuena tjïga. Mûsa ã pjïro cahya tãhotuna payubiaa jãhca mûsa tãhotuhto sehe. Micha macaa dihtare mûsa tãhotuhtu tó purota mû sarohca –ni yahuha Jesu.

7

*Painare “Ñaina jira”, niena tjiga
(Lc 6.37-38, 41-42)*

¹ Æ jiro tiro tinare õ sehe ni yahu namoha: –Painare “Ñaina jira”, niena tjiga mûsa. Mûsa ã nierachu Cohamacu musare “Ñaina jira”, nisi. ² Painare “Noano yoerara”, mûsa ni ñuriro seheta Cohamacu sehe mûsa cãhure ãta ni ñunohca. ³ Mari piti dahre buhechu õ sehe yoaina jira mûsa. Mûsa coyeiro to capariacapu mahari pohcarocã to sãachu tí pohcarocãre noano ñuna mûsa. Mûsa ya capariaca sehene pjiri pjï to jipachuta tí pjïne ne ñuerara mûsa. Mahari pohcarocãre mûsa ñuno seheta mûsa coyeiro to ñano yoaa sehene noano ñuna mûsa. Mûsa basi mûsa ñaare tuaro yoapanahata tíre masierara mûsa, pjiri pjïne mûsa ñueraro seheta. ¿Dohse jiro baro ã jïjari mûsa? ⁴ Õ sehe niina jira mûsa: “Coyeiro, ñaare yoai nica mûhu. Æ jicu tíre duhuga”, niina jira mûsa. Æ niina jipanahta pjïro ñaare yoara mûsa sehe. ¿Dohseana mûsa ñaare yoapanahata tíre masierajari mûsa? ⁵ Masa tí baharo buhusehei ñano yo cohtaina jira mûsa ã yoaina. Pjiri pjïne mûsa capariacai jiri pjïne mûsa na muhtaboriro seheta mûsa ñano yoaa sehene duhu muhtaga. Mûsa ã yoari baharo mûsa coyeiro to ñano yoare duhuchu yo masiboca, mahari pohcarocãre mûsa naboro seheta.

⁶ ‘Dieya yoaro sehe jiina, yesea yoaro sehe jiina cãhu ñabianare Cohamacu ya noa yuhduare tí ño payoerare yahuena tjiga tinare. “Tinapu bujpe, ñano ni, musare ñabiaro yoari”, nina yahuena tjiga tinare –ni yahuha Jesu.

*Cohamacure mari siniare yahuha Jesu
(Lc 11.9-13; 6.31)*

⁷ Æ jiro tiro tinare õ sehe ni yahu namoha: –Cohamacure siniga mûsa. Mûsa sinina mûsa sinirire ñahanahca. Mûsa sinirire bocanahca. Tirore ã sinirucuga mûsa. Mûsa ã yoachu tiro musare warohca. ⁸ Jipihtina Cohamacure siniina naahca. Æ yoa tí sinirire bocaahca. Jipihtina Cohamacure ã sinirucuinare tiro tinare warohca.

⁹ ¿Mûsa pohna pão curire musare tí sinichu tãca sehene wabocari mûsa tinare? Ne wasi mûsa. ¹⁰ ¿Mûsa pohna wahire musare tí sinichu agã sehene wabocari mûsa tinare? Ne wasi. ¹¹ Mûsa ñaina jipanahta mûsa pohnare noare waa tíre mûsa. Æ jiro

Cohamacu sehe mûsa yuhdoro noare wara musare to pohnare tirore siniinare. Mûsa pohnare mûsa wariro yuhdoro Cohamacu sehe to pohnare wara.

¹² ‘Paina musare tí noano yoachu cahmana mûsa. Tinare mûsa noano yoachu cahmano seheta mûsa cãhu noano yoaga tinare. Tí noano yoerapachuta mûsa sehe tinare noano yoaga. Æta yoa dutira Cohamacu dutia Moise cjirore to cãripu Cohamacu yare yahu muhtaina cjiro tí joari cjiro cãhu –ni yahuha Jesu.

*Mahari sopacacã quitire yahuha Jesu
(Lc 13.24)*

¹³ Æ jiro tiro õ sehe ni yahu namoha tinare:

–Muaporu Cohamacu cahapu waha duana to yare yoaro cahmana musare. Æ jina to yare ã yoamacanocaeraro cahmana. Mahari sopacacãpu mûsa sãa duachu mijo curega. Tó seheta mijo nina Cohamacu cahapu mûsa waha duachu. Pichacapu masa tí wahachu mijoerara. Pjiri sopacapu mari sãachu mijoerara. Tí sopacapu masa tí sãaboro seheta pichacapu masa tí wahachu mijoerara. Æ jia payu masa tópu wahaa nina. ¹⁴ Cohamacu cahapu mûsa waha duachu mijo nina. Mahainacã masa tópu wahaa. Tópu wahaina jipihtia dachoripe Cohamacu mehne jirucuahca –ni yahuha Jesu.

Masa tí yoarire ñuna tí jia tiare masija mari

(Lc 6.43-44)

¹⁵ Æ jiro tiro õ sehe ni yahu namoha tinare:

–Noano yoaga. “Cohamacu yare yahu muhtaina jija”, ni mahñoinare tãhoena tjiga mûsa. Tina oveja yoaro sehe suaeraina sehe bajumana. Tí tãhotuapu ñaina jira tina. ¹⁶ Tí ñano yoachu ñuna, ñaina tí jichu masinahca mûsa. Tí noano yoachu ñuna noaina tí jichu masinahca mûsa. Agã potacu se tãhorine dicha tierara. Pota tidu cãhu higuera pocare dicha tierara. ¹⁷ Noadu yucucu noare dicha tira. Ænadu sehe ñaare dicha tira. ¹⁸ Noadu yucucu ñaare ne dicha tierara. Æ yoa ñadu noare dicha tierara. ¹⁹ Noare dicha tiera yucure dute cohãnoca, pichacapu jãnohca. Æta yoarohca Cohamacu to cahmaare yoerainare. ²⁰ Æ jina “Cohamacu yare yahu muhtaina jija”, ni mahñoinare õ sehe masinahca. Tí yoarire ñuna, mahñoina tí jiare masinahca –ni yahuha Jesu.

“Musare ne masieraja”, ninohca Cohamacu payu masare

(Lc 13.25-27)

²¹ Æ jiro tiro õ sehe ni yahu namoha tinare:

—Payu yuhure “Puhtoro”, niina jipahta mmano macariro puhtoro Cohamacu to suho jiroprure wahasi tina. Yu Pucu mmano macariro to cahmaare yoaina dihta puhtoro to suho jiroprure wahaahca. ²² Pihtiri dacho jichu payu masa o sehe niahca yuhure: “Puhtoro, mu yare sa buhehi. Mu wama mehne wafiare cohā wiohi. A yoa mu tuua mehne payu yoa fihhi sa”, yuhure niina jiaahca. ²³ O sehe ni yuhtiihca tinare: “Musare ne masieraja. Naa buhiri tiina jira musa. A jina yu cahai taena tjiga”, ni yuhtiihca tinare.

Pua wuhu yoaina quitire yahuha Jesu
(Lc 6.47-49; Mr 1.22)

²⁴ A yoa jipihtina ahri yu buherire tuhorina yu dutiare yoaina, noano tuho masiriro wuhu dahreriro yoaro sehe jira tina. Tiro sehe cuāa copari tāa wapapu saha, wuhure noano dapo dūcaha. ²⁵ Ti wuhure to tuhsari baharo coro tuaro ta, dia mini yuhduu waha, tuaro wihnono wāha. A to tuaro wāpachuta ti wuhu cuāno tāa wapa bui to daporī wuhu jiro ne waha su cahaerara. ²⁶ A jia jipihtina yu buherire tuhopahta yu dutiare yoaeraina, tuho masieriro wuhu dahreriro yoaro sehe jira. Tiro sehe to wuhure paduro buicā dapo, noano yoa dūcaeraha. ²⁷ Ti wuhure to tuhsari baharo, coro tuaro ta, dia mini yuhduu waha, wihnono tuaro wāha. A tuaro wāno ti wuhu sehere wāroca cūnocaha. A jiro ti wuhu tuaro bora su cahaa wahaha —ni yahuha Jesu.

²⁸ To ā ni buhechu tuhoa, cuua wahaha masa. ²⁹ “Tiro potocāta puhtoro jira. A jiro noano masi pahñoriro marine buhera tiro. Mari judio masare buheina yoaro sehe buherara”, ni tuhoutuha tina.

8

Jesu cami baarirore noariro wahachu yoaha

(Mr 1.40-45; Lc 5.12-16)

¹ Jesu tūcupu buhe dujiriro cjiro dujia wahaha. To ā dujiachu fūna masa payu tiro baharo wahaha. ² To ā wahachu cāiro cami bucu baariro tirore piti boca, na tuhcuca caha su, tirore siniha:

—Puhtoro, muhu yuhure noariro yoa duacu yoaga —niha.

³ To ā nichu tuhoro to wamomaca mehne Jesu tirore fāa payoha.

—Jai, muhure noariro wahachu yoaja —niha Jesu tirore.

To ā nichuta ti to cami baari cjiri yati muu wahaha. ⁴ A ni tuhsu Jesu tirore o sehe niha tjoa:

—Yu muhure o sehe yoarire ne painare yahui tjia. Mu pjacure noari pjacu to

waharire sacerdotere fūoi wahaga. Moisere Cohamacu to cūiro sehetā sacerdotere minichahcare waga mu yuhdurire ti noano masihto sehe —niha Jesu.

Surara puhtoro to mmano to dohatichu Jesu noariro wahachu yoaha tirore
(Lc 7.1-10)

⁵ Tō baharo Jesu Capernau wama tiri macapu to suchu cien surara puhtoro to cahai su, tirore tuaro o sehe ni siniha:

⁶ —Puhtoro, yuhure dahra cohtariro pjacu buhariro jiro waha masieratjāhno tirore tuaro purichu yu wuhupu coāhre tiro —niha tiro Jesure.

⁷ To ā nichu, Jesu “Jai”, ni yuhtihā:

—Tirore to dohatiare yuhduchu yoai wahahtja —niha Jesu.

⁸⁻⁹ To ā nichu o sehe niha surara puhtoro:

—Puhtoro, noanohca. Tai tjia. Yu yuhdoro noa yuhduriro jira muhu. Ya wuhū muhure sāa ta dutiboriro jieraja yuhū. Mu masia mehne noariro wahachu yoaga tirore. Mu ā yoachu yu yuhure dahra cohtariro noariro waharohca. Yuhure yu bui jiina paina puhto dutira. Yuhū cāhu surarare dutija. Cūirore “Wahaga”, yu nichu tiro wahara. Pairore “Taga”, yu nichu tiro tara. Yuhure dahra cohtarirore “Ahrire yoaga”, yu nichu tīre yoara. (Muhu cāhu dutirirota jira. A jiro mu dutiro sehetā tiro dohatiriro yuhdurohca) —niha tiro.

¹⁰ To ā nichu tuho cuua waharo payu masa tiro mehne jīnare o sehe niha Jesu:

—Potocāta musare niita nija. Ahriro surara puhtoro Israe masuno jierariro Cohamacure tuaro wacū tuara. Tirore dahra cohtarirore yu noariro wahachu yoahire masi tuhsaha. Ne Israe masare ahriro yoaro sehe jīnare fūerasinija. ¹¹ Musare niita nija. Payu ahriro yoaro sehe Cohamacure wacū tuaina jipihtiro macaina mmano macariro puhtoro to suho jiropru sa, tōpru jiina mehne chuahca. Abrahā, Isaa, Jacobo mehne chuahca tina. ¹² Masa paina sehe puhtoro Cohamacu to suho jiropru wahaaborina ti jipachuta fūanopu nahitianopu cohānocanohca tinare. Tōpru to cohārina tuaro tūi, cahyaa mehne bahca dihoahca —ni yahuha Jesu.

¹³ Tīre ā ni tuhsu, surara puhtoro o sehe niha:

—Tjuahga mu ya wuhupu. Muhure dahra cohtariro yuhdurohca. “Potocāta yuhdurohca”, ni mu tuhoturiro sehetā yuhdurohca —niha Jesu.

To ā nino watoihā tirore dahra cohtariro sehe noa tuhsaha.

Pedro marechonore dohatiricorore yuhdoha Jesu
(Mr 1.29-31; Lc 4.38-39)

¹⁴ Baharo Jesu Pedro ya wuhapu sa, Pedro marechono dohatichu ñuha tiro. Juaro tichu cama bui coãha ticoro. ¹⁵ To ã jichu ñutjiãhno to wamomacare ña payoha. To ã ña payochata juaro surua wahaha. Suruchu ñahoturo ticoro sehe wahcãrca, tinare chuare payoha.

Jesu payu dohatiinare yuhdoha
(Mr 1.32-34; Lc 4.40-41)

¹⁶ Æ yoa ñamichahapu payu watia ti sãanohrinare masa na wihaha Jesu cahapu. Ti ã na wihichu ñuno cã tahata to waha dutichu watia wahaa wahaha. Tuhsu, jipihtina dohatiina ti na sãrinare ti dohatiare cohã pahñoha Jesu. Æ jia noaa wahaha tina. ¹⁷ Æta yoaha tiro panop macarico Cohamacu yare yahu mahtariro Isaia cjiro to niriro seheta. Æ sehe ni joaa tiha: “Mari dohatiare yuhdonocanohca tiro. Mari duti tiare cohãnocanohca”, ni joaa tiha Isaia cjiro Jesure.

Cãina Jesu mehne waha duamaha
(Lc 9.57-62)

¹⁸ Jesu payu masa to cahai ti jichu ñuno: —Sie coapu basa pahãjihna —niha.
¹⁹ Ti pahãhto pano judio masare buheriro Jesu cahapu sa, Æ sehe niha:
—Buheriro, muhu mehne waha duaja nohoi mu waharoi —niha.

²⁰ Jesu Æ sehe ni yuhtihã:
—Cãina macaroca macaina wahiquina ti copari cjuara. Minichahca cãhu ti suhti cjuara. Yuhu masuno Cohamacu warocariro sehe yu cariri wuhu maeraja. (Æ jina yuhu mehne tana ñano yuhdunahca musa) —ni yuhtihã Jesu.

²¹ Æ yoa paio Jesu buheriro Æ sehe niha:
—Puhtoro, yu pucu to yariachu yasinii wahahtja. Æ ya tuhsu pinihta muhu mehne wahahtja —niha tiro Jesure.

²² Jesu Æ sehe ni yuhtihã:
—Yuhure cahmaeraina yariaina yoaro seheta jira. Tina sehe yariainare yajaro. Æ jicu muhu sehe yuhu mehne macarico cjihto taga —niha tiro.

Jesu wihnonore yusu dutiha
(Mr 4.35-41; Lc 8.22-25)

²³ Æ ni tuhsu Jesu to jiriapu dohoriapu samuha. Æ jia to buheina cãhu tiro mehne waha, samuha. ²⁴ Ti bucpariropu ti pahãchu waro wihnono tuaro taha. Æ jia pahcõri dohoriare mionocamaha. Æ wihnono wãpachata Jesu sehe carino niha. ²⁵ To ã wahachu ñua tina tirore wahcõha. Wahcõ Æ sehe niha:

—Puhtoro, yuhdoga. Mari mini yariana tana nija —niha tina.

²⁶ Ti ã nichu Jesu Æ sehe ni yuhtihã:

—¿Dohse jiro baro cuimacanocana nijari musa? Yuhure wacũ tueraina jira musa —niha Jesu tinare. Æ ninota wahcãrca sa, wihnonore pahcõri cãhure “Yusua wahaga”, niha. To ã nichu wihnono yuhdunahca wahaha. Æ jia pahcõri cãhu yusu boraahaha. ²⁷ To Æ yoachu ñu caaa, Æ sehe niha tina:

—¿Cue, dohse jiro baro masuno jijari ahriro? Ahri wihnono, pahcõri cãhu to dutichu yuhdurcaerara tirore —niha tina.

Watĩare cohã wioha Jesu
(Mr 5.1-20; Lc 8.26-39)

²⁸ Tinare Æ wahari baharo pahã sa, Gadara macaina ya yahapu suha. Tõpu ti suchu puaro musa masa copari watopu jina Jesure piti bocaha. Tina watia ti sãanohorina cuaina jiha. Æ jiro tõpu masa ti wahamahnoeno jiha. ²⁹ Tirore piti boca, Æ sehe ni sañurucua:

—¿Muhu Cohamacu macuno dohse yoai tai tajari muhu sã cahapure? ¿Sãre Cohamacu to buhiri dahrehti pja to jierapachata sãre buhiri dahrei tai nijari muhu? —ni sañurucua tina.

³⁰ Tõ cahai payu yesea maca chua niha.
³¹ Tinare ñua, watia Æ sehe niha Jesure:

—Sãre cohã wocu sina yesea cahapu yeseare sãa dutiga sãre —ni siniha watia Jesure.

³² —Jai, wahaga —niha Jesu.

To ã nichu watia puaro masa mehne jirina cjiri waha, yesea ti pjacuripu sãaha. Æ yoa tinare ti sãari baharo, yesea pari canapu muroca buha, bucpariropu bora ñoja, mini yaria pihtia wahaha.

³³ Ti ã wahachu ñua yeseare ñu wihboina sehe cui, murocaa wahaha. Macapu sa, yesea ti minirire yahu site pahñoha. Watia ti sãanohrinare Jesu to cohã wiori cãhure yahu pahñoha tina. ³⁴ Æ ti yahu siteri baharo ti maca macaina jipihtina Jesure ñua taha. Æ jia tirore ñua, tuaro mehne waha dutiha tirore.

9

Pjacu buharitore noariro wahachu yoaha Jesu
(Mr 2.1-12; Lc 5.17-26)

¹ Æ ti waha dutiri baharo Jesu dohoriapu samu, bucpariropu pahã, to bucari macapu suha. ² Tõpu paina pjacu buharitore to coãri cahsaro mehne yo wua wihaha Jesu cahai: “Jesu ahrirore to dohatiare yuhdachu yorohca”, ni ñahotuha tina. Ti Æ ni ñahotuchu masino dohatirirore Æ sehe ni yahaha Jesu:

—Macu, wahchega muhu. Ñano mu buhiri tiare cohã tuhsuja yuhu —niha tiro.

³ To ã nichu ñaoha cãina mari judio masare buheina Æ sehe ni ñahotumaha: “Ahriro

wiho jiriro ā nino, ‘Cohamacu jija’, nino nina. Ā nino Cohamacure ñano nino nina”, ni tūhotumaha tina. ⁴ Ti ā ni tūhotuchū masino, ō sehe niha Jesu:

—ĶDohseana ā ñano tūhotujari mūsa?
⁵ “Ñano mū buhiri tiare cohā tuhsūja”, yū nichū, “Mahñoriro jira”, nina mūsa noano masierapanahta. “Wahcārūca, wahaga”, yū nichū yū niri potocā jia jichū dōihta mūsa masinahca. ⁶ Yūhū masūno Cohamacu warocariro ahri yahpai masa ti ñano buhiri tiare cohā masija yūhū. Masa ti ñano buhiri tiare cohāntiro cjihtore cūre Cohamacu yūhūre. Yū ā cohārire mūsa masihto sehe ō seheta yoa ñoihtja mūsa ñuhti cjihtire —niha Jesu.

Tinare ā ninota, pjacū bħariroro ō sehe niha:

—Wahcārūcaga. Mū coāri cahsarore na wahcāga mū ya wūhūpū —niha tirore.

⁷ To ā nichū tūhoro pjacū bħariro wahcārūcū sū, to ya wūhūpū tjuaa wahaha. ⁸ Masa to ā wahachū ñūa cuiha. Ā yoa Jesure Cohamacu to tuare to wachū ñūa masa Cohamacure ño payo, noano durucuha.

Jesu Mateore pjiha

(Mr 2.13-17; Lc 5.27-32)

⁹ Ti ā yoari baharo Jesu tōpū jiriro ta, yūhūre Mateore boca wihire. Pūhtoa ya cjihtire masare wapa na cohtariro jimai. Ā jicū tí pjare yū dahrari tahtiapū dujiū. Tóí yū dujichū ñūno ō sehe nire yūhūre:

—Yūhū mehne macariro cjihto taga mūhū —nire Jesu yūhūre.

To ā nichū tūhoco wahcārūca tiro mehne wahai.

¹⁰ Baharo ya wūhūpū Jesu cūhū chūa tare. Payū pūhtoa ya cjihtire wapa na cohtaina, “Ñano yoaina”, ti niina cūhū sā mehnetā chūre. ¹¹ Tina mehne sā chūchū ñūa, fariseo curua macaina sāre Jesu buheinare ō sehe nire:

—ĶDohsearo mū sare buheriro wapa na cohtaina mehne, ñano yoaina mehne chūjari? —nire tina sāre to buheinare.

¹²⁻¹³ Ti ā nichū tūhoro Jesu sehe piti dahre buhea mehne yūhtire:

—Dohatieraina duhturure macaerara. Dohatiina dihta duhturure macana. Ñaare yoaina dohatiina yoaro sehe jira. Ā jicū ñaare yoaina dihtare ti ñaare ti tūhotumari cjirire duhu, noaa sehēre ti tūhotu cohtotachū yoai tai nii yūhū. Ti basi “Noaina jija sā”, ni tūhotuina barore yahui tai nierahi. Cohamacu to niriire ti joarire masiga mūsa. “Wahiquinare mūsa wajā, jū mūoa mehne yūhūre mūsa ño payochū cahmaeraja. Painare mūsa pja ñūchū sehēre cahmaja”, ni joaha. Ahri to joari to dohse niare masiga mūsa. Tīre noano buhe

namona wahaga —nire Jesu fariseo curua macainare.

Chū duhuare sinituha Joāo buheina Jesure

(Mr 2.18-22; Lc 5.33-39)

¹⁴ Baharo Joāo masare bautisariro to buheina Jesu cahapū sū, ō sehe ni siniture:

—Sā Joāo buheina sehe Cohamacure ño payona tana, chū duhuja. Fariseo curua macaina cūhū āta chū duhura. ĶDohse yoa mū buheina sehe chū duhuerajari? —nire tina Jesure.

¹⁵ Jesu to tūhotua mehne piti dahre buhero taro tinare ō sehe ni yūhtire:

—Ō sehe jira tí: Wamomaca duhteropū ti pjirocaina wamomaca duhteriro mehne jia, chū duhu masierara. Tó seheta yū buheina cūhū yūhū mehne jia, chū duhu masierara. Yūhū wamomaca duhteriro yoaro sehe jija. Wamomaca duhteriro bōse nūmū to yoachū tiro mehne macaina cahyaa mehne jierara. Ā jia chū duhuina jierara. Yū Pūcū Cohamacu yūhūre to naari baharo pinihtare yū buheina mehne jisi yūhū. Ā jia tí pjapūta yū buheina cūhū chū duhuahca —ni yūhtire Jesu.

¹⁶ Panopū macaa buhea wahma buhea mehne ti buhe more duachū ñūno ō sehe ni namore Jesu tinare piti dahre buhero:

—Ne wahma cahsaro suhtiro cahsaro mehne mūnāno suhtirore sere ōno cahmaerara. Ā yoachū wahma cahsaro mari cosari baharo mūnāno suhtirore waja cahmachu, pjibiaro tūhūnūchū yoara. (Ahri yoaro sehe ni, mūna buhea wahma buhea mehne piti dahre buheraro cahmana.) ¹⁷ Ā jina ne se co bisia core wahiquiro cahsaro wajuru mehne mūna wajuru mehne posaeraro cahmana. Ā yoachū se co bisia pahmoapū mūna wajurure tūhrēnocahna. To tūhūnūchū se co cūhū, wajuru cūhū cohōa wahara. Ā jina se co wahma core wahma wajurupū posaro cahmana. Ā yoachū se co cohōeraa, wajuru cūhū cohōerara. (Tó seheta wahma buhea mūna buhea mehne buhe moreraro cahmana) —ni yahure Jesu tinare.

Jairo maconore noaricoro yoa, cahā ñūricoro cūhūre noaricoro yoaha Jesu

(Mr 5.21-43; Lc 8.40-56)

¹⁸ To ā ni yahuro watoi judio masa mari buheri wūhū pūhtoro Jesu cahapū wihire. Wihi, na tuhcuca caha sū, ō sehe nire:

—Yū maco yoatapū yariaa wahahre. Ticorore mū wamomacare duhu payoi taga. Mū ā yoachū masanohca —nire tiro Jesure.

¹⁹ To ā nichū tūhoro Jesu wahcārūca tiro mehne wahare. Sā to buheina cūhū wahai. ²⁰ Sā mahai waharucuchū tóí numino ā cahā ñurucuricoro Jesu baharo bħūsehei ta, to

suhtiro sohtoare ñaha ñaha. Doce cahmari waro dachoripe cahã ñurucuricoro jiha. ²¹ Õ sehe ni tuhoutuha ticoro ã yoaro: “To suhtirore ñaha ñuco, noaricoro wahacohca”, ni tuhoutuha ticoro. ²² To ã yoachũ masino Jesu majareũũ sũ, ticorore õ sehe nire:

—Maco, wahchega mũhu. Mũ yũhũre wacũ tuaa mehne noaricoro tjuara mũhu mipũre —nire tiro.

To ã nichũta noaa wahare ticoro.

²³ Æ yoa tuhsũ Jesu pũhtoro ya wũhũpũ sure. Sãa sũro, ñahacaha tiinare teneniãca yoaro sehe jiriare putĩnare ñũre. Payũ masa ti ñano bisichũ cũhũre tahore tiro. ²⁴ Ti ã nichũ tuhoro masare õ sehe nire:

—Wijaahga mũsa. Yariaerari jira ticoro. Carĩno nina —nire tinare.

To ã nichũ tuhõa, “Æ nimacanocano nina ahriro”, nia masa bujũre tirore. ²⁵ Æ jiro wũhũ puhichapũre masare to wio pahñori baharo yariaricoro cahapũ sũ, to wamomacare ñahaha. To ã ñahachũ masa cahã sũ, wahcãũũ sũha ticoro. ²⁶ To ã yoarire tuhõa, tó macaina masa jipihũna yahu sitere.

Pũaro capari bajuerainare ñũchũ yoaha Jesu

²⁷ Æ yoaro Jesu tó jiro to wahachũ, pũaro capari bajueraina tirore pisu mũũũ tire:

—Davi panamino masare yũhdohtiro, sãre pja ñũga mũhũ —ni saũurucure tina.

²⁸ Ti ã nichũta Jesu pa wũhũpũ sãare. To ã sãachũ masia capari bajueraina to cahapũ sãa wahare. Ti ã sãa suchũ ñũno tiro sehe siniture tinare:

—“Marine ñũchũ yoarõhca tiro”, ¿ni tuhõtujari mũsa yũhũre? —nire tiro.

—Pũhtoro, ãta ni tuhõtujã sã —ni yũhtire tina.

²⁹ Ti ã nichũta ti caparire ña payore. Æ ña payorõta õ sehe nire:

—Yũhũre “Æ yoarõhca”, mũsa ni tuhõturiro seheta ã yoaja —nire Jesu.

³⁰ To ã nichũta ti capari sehe noaa wahare. Æ yoa Jesu õ sehe nire tinare:

—Ahri yũ õ sehe yoarire painare ne yahuena tjiga —nire.

³¹ To ã nipachũta waha, tó jĩnare yahu sitere tina to ã yoarire.

Durucuerarirore durucuchũ yoaha Jesu

³² Ti wũhũre ti wijaachũ waro cũiro durucuerarirore na tare masa. Watĩno tiro mehne jiroro tirore durucuerachũ yoaha. ³³ Ti na suchũ ñũno watĩnore Jesu cohã wiore. To ã cohã wiochũ watĩno to sãanõhriro cjiro sehe durucua wahare. To ã yoachũ ñũna jipihũna cãa pihtiare.

—Ne, ahri yahpa Israe yahpapũre õ sehe yoare ñũera tihi mari —ni durucure tina ti basi.

³⁴ Fariseo curua macaina sehe soro ni durucure:

—Watia pũhtoro to tuaa mehne watĩare cohãna ahriro —ni durucure tina.

Masare pja ñũhã Jesu

³⁵ Æ yoa jipihũtia macari tó jia macaricãre, bujũna macari cũhũre buhe tinino wahare Jesu. Noaa buheare judio masa mari buheha wũhũsepu buhero wahare tiro. Æ jiro pũhtoro Cohamacũ to sũho jĩhtore yahure. Jipihũtia dohatia cũhũre tó macainare yũhdore tiro. ³⁶ Masa payũ ñano yũhũũina, pjacũoro wahaina ti jichũ ñũno Jesu tinare pja ñũre. Tina oveja pũa marieina yoaro sehe ti jichũ ñũno Jesu tuaro pja ñũre tinare. ³⁷ Æ jiro õ sehe nire tiro sãre to buheinare, piti dahre buhero:

—Yo payũ ti buũca tuhsũchũ payũ jichũ dahraa jĩro jira. Wiho mejeta dahraina sehe mahainacã jira. (Tó seheta noaa buheare tuhõhtina payũ jichũ jĩro jira mari dahraa. To ã jipachũta mahainacã dahrari masa yoaro seheta noaa buheare buhehtina cũhũ mahainacã jira.) ³⁸ Æ jina noaa buheare buhehtinare painare to warocah-tore siniga Cohamacure —nire Jesu.

10

Jesu doce waro bese dapõha to warocah-tinare

(Mr 3.13-19; Lc 6.12-16)

¹ Baharo doce sãre to buheinare Jesu pjiroca, tuare cũre sãre. Watĩare sã cohã masihtĩ cjihtire jipihũtia dohatiare sã cohã masihtĩ cjihtire cũre sãre.

² Õ sehe wama tii sã Jesu to bese cũrina: Simo jire. Tiroreta Pedro ni pisure Jesu. Simo baharo Andre cũhũ jire. Santiago cũhũ to baharo Joã mehne jire. Tina Santiago cũhũ pũcũro Zebedeo wama tire. ³ Felipe, Bartolomé, Toma, yũhũ Mateo jii sã. Yũhũ sehe pũhtoã ya cjihtire masare wapa na cohtariro jimai. Sã mehne paio Santiago jire. Tiro sehe Alfeo macũno jire. Æ jiro Tadeo cũhũ jire. ⁴ Simo cananeo ya curua macariro cjiro, Juda Iscariote cũhũ jire. Juda sehe Jesure ñũ tuhtĩnare ñõhtiro jire.

Jesu to buheinare buhe dutiro warocaha
(Mr 6.7-13; Lc 9.1-6)

⁵ Æ yoa sãre doce to buheinare warocaro, “Õ sehe mũsa yoanahca”, ni yahu quĩõre sãre Jesu:

—Judio masa jieraina cahapũre wahaena tjiga. Ne Samaria yahpai jia macaripũ cũhũre wahaena tjiga. ⁶ Israe yahpa macaina cahapũ sehẽre wahaga. Tina oveja peri wisia wahaina yoaro sehe Cohamacũre

masieraina jira. ⁷ “Mũano macariro to suho jilhto mahanocã dũhsara”, ni buhega tinare.

⁸ Å jina cami bucu baainare, paye payu soro jia dohatiare cjuaina cũhure noaina yoaga. Yariainare masoga. Wafia masare ti sãanohorinare cohã wioga tinare. Musare ã wanocai nija ahri tuaare. Å jina musa cãhu yu ã wanocariro sehetã masare noaina ã yoanocahga.

⁹ Musã wahana niñerure ne naena tjiga. ¹⁰ Ne musã wajure, puaro camisare, puã wahpa dahpo suhtire, musã tjua yucu cũhure naena tjiga. Musã sãano dihtare sãa wahcãga. Paye suhtire naena tjiga. Musã buhena waharopũ jiina tina sehe musare musã puhĩ cjihtire waahca. Åta waro cahmana tinare.

¹¹ “Tĩ macaripu sũna, ji coaro mehne carĩnore warirore macaga. Å jina tí wũhũhta tjuasiniga. Pu, coã wahanapu wijaahga tí wũhũre. ¹² Å jina wũhũpu sãahna, “Jĩmajari musã?” niga tí wũhu macainare. ¹³ Musare noano tí cahmachũ “Cohamacũ mehne noano jiga musã”, niga tinare. Musare ti cahmaerachũ, musã ã niborire niena tjiga. ¹⁴ Å jina musare ti cahmaerachũ, ti tũho duaerachũ tí wũhũre wijaahga. Wijaana, dahpo suhti macaa dihta pohcarire wajã site cũga musã tinare ti ya buhirire masichũ yoana. Tĩ macã macaina musare ti cahmaerachũ ãta yoaga tina cũhure. ¹⁵ Potocã musare niita nija. Ahri dacho pihtichũpũre Sodoma macaina, Gomorra macaina cãhu tuaro buhiri tihtinata jira. Tĩ ã jipachũta tina yũhdoro musare cahmaeraina buhiri tihtina jiahca –ni yahure Jesu.

Jesu yainare paina ti ñano yoahore yahuha Jesu

¹⁶ Å ni tuhsũ õ sehe ni namore:
–Yũhũre tũhoga musã. Oveja yoaro sehe jiinare musare ñaina watoi warocai nija. Tina ñaina macaroca macaina yaya suaina yoaro sehe jira. Å jina musã sehe paina wahiquina wacũ masiina yoaro sehe jiga. Å jiina jipanahta buja yoaro sehe ne suaeraina jiga musã. ¹⁷ Noano yoaga musã. Masa musare puhtoare waahca. Tuhsũ Judio masa mari buhea wũhũsepu cãpeahca musare. ¹⁸ Å jia yu yaina musã jiri buhiri macari macaina puhtoa cahapu ti bui jina puhtoa cahapu cũhũre naahca musare. Å jina musare tũpu ti naachũ tinare judio masa jieraina puhtoa cũhũre noaa buheare buhenahca musã. ¹⁹⁻²⁰ Musare puhtoare ti wachũ tinare musã nihtire “Cue, masier-aboca”, ni tũhotuena tjiga. Musare ti sini-tuchũta musã nihtire masinahca. Å masina tinare yahuna musã tĩre musã mũ sũro durucuna nisi. Cohamacũ sehe musã Pũcu to

Espĩritu mehne musare durucuchũ yoarohca.

²¹ “Tĩ pjare ti wahmisũma ti bahanare wajã dutia waahca puhtoare yu yaina ti jiri buhiri. Tĩ pũcusũma ti pohñare wajã dutia waahca puhtoare. Tĩ pohna sehe ti pũcusũmare wajã dutia waahca puhtoare. ²² Jipihtina masa sehe yu yaina musã jiri buhiri musare ñũ tuhtiahca. Tĩ ã yoapachũta ahri yahpai musã catisinino puro musare ti ñano yoarire cãno pjana yũhũre, yu buhea cũhũre duhuerana, yũhdũnahca musã. ²³ Cũmacai musare ti ñano yoachũ pa macapu duhti wahcãga. Potocã musare niita nija. Israe yahpai jia macarine jipih-tia tí macaripu musã duhti wahcãhũto pano, yũhũ masũno Cohamacũ warocariro ahri yahpũpu tjua taihtja.

²⁴ “Ne cãiro buheriro tirore yahuriro buipu jierara. Cahamacũno cãhu to puhtoro bui cure jierara. ²⁵ Å jiro õ sehe tũhoturo cahmana buherirore: “Yũhũre buheriro yoaro sehetã jiihtja”, ni tũhoturo cahmana. Cahamacũno cũhũre ãta ni tũhoturo cahmana. “Yu puhtoro yoaro sehetã jiihtja”, ni tũhoturo cahmana. (“To bui jiihtja. Å jicu yu puhtoro to ñano yũhdũriro sehetã ñano yũhdũsi yũhũ sehe”, ni tũhotueraro cahmana.) Yũhũ sehe wũhũ puro yoaro sehe jija. Musã sehe tí wũhũ dahraina yoaro sehe jira. Å jia masa yũhũre “Beelzebũ jira”, ni yahusã, musã cũhũre yu yainare ñano ni durucuahca tina –ni yahure Jesu.

“¿Diro barore cuichũ noajari?” ni yahuha Jesu

(Lc 12.2-7)

²⁶ Å ni tuhsũ õ sehe ni namore:

–Å jina musare ñano yoainare cuiena tjiga. Masa ti ya sãari cjirire baharo paina masiahca. Å jia ti nũori cjiri cũhũre paina masiahca. ²⁷ Musare yaroca yu yahuri cjirire payũ masa watoi buhe turiaga musã. ²⁸ Masũnore wajãina to pjacu dihtare wajãna. To yajeripohna yariaerara. Å jina musare wajã duainare cuiena tjiga. Cohamacũ sehere cuiga. Tiro musã pjacũrĩre, musã yajeripohnari cũhũre pichacapu cohã masina. Å jina tiro sehere cui, yũhtiga musã.

²⁹ Puaro siripia wapa mariahna. Tĩ ã wapa mariapachũta cãirocãre Cohamacũ ne boerara. Cohamacũ to dutierachũ ne yari-erara tirocã. ³⁰ Å jiro musã pjoarĩre ne cã pjoada dũhsaro marieno masi pahũona Cohamacũ. Tũ sehetã musã jia tia cũhũre masi pahũona Cohamacũ. Å masino musare ñũ wihborucura. ³¹ Siripiare to cahũno yũhdoro, musã sehere cahũna Cohamacũ. Å jina pjĩro tũhotuena tjiga musã –ni yahure Jesu.

Jesure m̄sa wacū tuari c̄jirire yahuga masare

(Lc 12.8-9)

³² Ā jiro tinare ō sehe ni yahu namore:

—Cūiro “Jesu yairo jija”, masare to ni yahuchū yuhū cūhū tirore “Yū yairo jira”, ni yahuihtja yū P̄sc̄ure m̄ano macarirore.

³³ Wiho mejeta cūiro “Jesu yairo jieraja”, masare to nichū yuhū cūhū “Yū yairo jierara tiro”, ni yahuihtja yū P̄sc̄ure —ni yahure Jesu.

Jesu masare tju wachū yoara

(Lc 12.51-53; 14.26-27)

³⁴ Ā ni tuhsū ō sehe ni yahu namore:

—ĒDohse ni tuhōtjari m̄sa yuh̄ure? “Tiro masare to buheri baharo paina tinare n̄u tuhtisi”, Ēni tuhōtjari m̄sa? Ā jierara. Masare yū buheri baharo cāina yū yare tūhoahca. Paina sehe tinare n̄u tuhtiahca. Cūno potori waro jisi masa. ³⁵ B̄sc̄na yū buheare ti tūhori buhiri ti pohna yū buheare cahmaeraa, tinare n̄u tuhtiahca. B̄sc̄u numia yū buheare ti tūhori buhiri ti pohna numia yū buheare cahmaeraa, tinare n̄u tuhtiahca. Ti marechosanumia yū buheare ti tūhori buhiri ti macū namosānumia yū buheare cahmaeraa, tinare n̄u tuhtiahca. ³⁶ Ā jia masa ti coyere n̄u tuhtina jiahca.

³⁷ Yuh̄ure ti cah̄iboriro yūhdoro ti p̄sc̄us̄ma sehere cah̄i yūhdur̄caa yū yaina jisi tina. Yuh̄ure ti cah̄iboriro yūhdoro ti pohna sehere cah̄i yūhdur̄caa yū yaina jisi tina. ³⁸ Ā jia paina crusap̄u yū yariahto seheta yū yaina ti jiri buhiri n̄ano yūhd̄uahca tina cūhū. Tō sehe n̄ano yūhd̄u duaeraina yū yaina jisi tina. ³⁹ Masa yuh̄ure wacūno marieno ti m̄u s̄uro yoaa, pichacap̄u wahaahca tina. Ā jia yū yare ā yoarucua jipih̄tia dachoripe yuh̄u mehne jirucuahca tina —ni yahure Jesu.

Mari wapatahtore yahuha Jesu

(Mr 9.41)

⁴⁰ Ā ni tuhsū ō sehe ni yahu namore:

—M̄sare yū yainare cūiro noano cahmano, yuh̄u cūh̄ure cahmano nina tiro. Ā yoa tiro yuh̄ure noano cahmariro yuh̄ure warocariro cūh̄ure cahmano nina. ⁴¹ Ā jiro Cohamac̄u yare yahuriro wapatarohca. Tirore noano yoarohca Cohamac̄u. Ā jiro to yare yahuriro to jichū n̄ano paiore tirore noano cahmano, yahuriro yoaro seheta wapatarohca tiro cūhū. Ā yoa paiore noano yoariro wapatarohca. Tuhsū, noano yoariro to jichū n̄ano paiore sehe tirore noano cahmano noano yoariro yoaro sehe wapatarohca tiro cūhū. ⁴² Yū yairo cūiro to jichū n̄u, wiho jiriro to jipach̄ta dohse jina tirore core ti sih̄ōchū mahanocā ti wapach̄ta potocāta tinare noano yoarohca Cohamac̄u —ni yahure Jesu.

11

João masare bautisariro to buheinare Jesure sinitu n̄u dutiro warocaha

(Lc 7.18-35)

¹ Sāre to buheinare to ā ni yahuri baharo tō cahai jia macarip̄u buhero wahare Jesu.

² Ā yoa to yoarire João pesesū jiriro tūhorocaha. Ā tūhoro João to buheinare Jesure sinitu n̄u dutiro warocaha. ³ Ā jia Jesu cahap̄u sū, sinitu n̄ure tina João buheina.

—ĒJoão “Yū baharo paiore tarohca”, to niriro t̄jjarirō m̄u? ĒTo niriro m̄u jierachū paiore cohtanahcari s̄a? —ni sinitu n̄ure tina sehe Jesure.

⁴ Ti ā nichū tūhoro Jesu ō sehe ni yūhtire: —M̄ir̄e m̄sa tūhorire, m̄sa n̄ur̄ire Joāore yahuna wahaga: ⁵ “Capari ba-jueraina n̄u. Tini masieraina tinina. Cami b̄sc̄u baina noaina wahara. Tūho bocaeraina tūho wahara. Yariaina masaa wahara. Tina jipih̄tinare noaina wahachū yoah̄i yuh̄u. Tuhsū, p̄sc̄uoinare noaa buheare yahuja. ⁶ Yuh̄ure tūhoriro ‘Potocā tjira’, niriro tiro wahcheriro jira” ni, Joāore yahuna wahaga —nire Jesu.

⁷ João buheina ti wahari baharo, Jesu sehe João to jia tiare yahu d̄care payū masare:

—Masa marienop̄u João cahap̄u s̄na, tjare wihnono to w̄aroca cohtotachū yoariro seheta to buheare cohtota m̄jarirōre n̄u s̄erare m̄sa. ⁸ “Noaa suhti tirirore n̄u wahajihna”, nierare masa João cahap̄u masa marienop̄u wahana. Noaa suhti tiina wapa buj̄are c̄uaina p̄htoa ya wuh̄serp̄u jira. ⁹ Masa marienop̄u s̄na Cohamac̄u yare yahu m̄htarirōre n̄u s̄ere m̄sa. Potocā tjira. João Cohamac̄u yare yahu m̄htariro jira. Paina Cohamac̄u yare yahu m̄htaina yūhdoro jiriro jira tiro. ¹⁰ Panop̄u Cohamac̄u yare ti joari p̄ū Joāore ō sehe ni yahu joaa tiha:

“Cohamac̄u to mac̄nore ō sehe niha: ‘M̄u pano m̄h̄ure yahuyūhtirore warocai nija’, niha”,

ni joaa tiha panop̄ure Joāore. ¹¹ M̄sare potocā niita nija. Paina jipih̄tina bui jira João bautisariro. Ahri turup̄ure to ā jipach̄ta m̄ano macarip̄u p̄htoro to s̄ho jirōp̄ure jipih̄tina docap̄u jiriro pinihta João bui jira.

¹² João masare bautisariro to buhe, bautisa d̄sc̄achū payū masa m̄ano macarip̄u p̄htoro to s̄ho jirore pih̄tichū yoa duaa, ti m̄u s̄uro cahmache, t̄re yoa duamana. ¹³ Cohamac̄u yare yahu m̄htaina ti joari c̄jirire, Cohamac̄u Moise c̄jire to c̄uri c̄jirip̄u cūh̄ure buhena p̄htoro Cohamac̄u to s̄ho jiltore masija mari. João cūhū t̄reta yahure. ¹⁴ “Elia tarohca”, panop̄u ti niriro c̄jirota jira João sehe. Panop̄u macaina ti nirire “Potocā

tjira”, ni duana João ti ã niriro cjiro to jichu masinahca musa. ¹⁵ Noano tuhoga musa ahrire.

¹⁶ ¿Mipu macaina masa yabaina yoaro sehe jijari tina, musa tuhotucha? Tina macanacã yoaro sehe jira. Paina ti cahmano sehe ti yoerachu tó wahaerara tinacãre. Pache duaropu pape dujia, õ sehe ni pisurucura tinacã ti basi: ¹⁷ “Musa basahti cjihire sã putipemahi. ¿Dohseana musa basaerari sã tire putipechu? Sã tuaro ñahacaha tiipe, sañurucumahi. ¿Musa sehe dohseana sã mehne tiiperari?” nirucuína yoaro seheta jira mipu macaina cãhu. Mipu macaina ti cahmano seheta sã yoerachu ñaa tó wahaerara tinare. ¹⁸ Tina yoaro sehe yoana õ sehe yoara musa mipu macaina. João bautisariro Cohamacu ño payoro taro chu duhuro vinore sihniere. To ã sihnierechu ñuna “Watino tó sãanohriro, tuho masierariro jira”, nimare musa tiro sehere. ¹⁹ Yuhu masano Cohamacu warocariro jicu yuhu chu, sihniya. Yu ã yoachu ñuna õ sehe nina musa yuhu sehere: “Ñuga. Ahriro pijiro churiro, cahariro jira. Wapa na cohtaina, ñano yoaina cãhu ti piti tiriro jira ahriro”, nina musa yuhure. (Ã nina macanacã yoaro sehe durucuína jira musa. Musa cahmano sehe sã yoerachu tó wahaerara musare. Ne sahsaerana musa.) Ã masierapanahca sã yoarire ñuna, Cohamacu masiare sã cjuachu masinahca musa –nire Jesu tinare.

Ti ñaare cahyaeraina ya macari macainare tuhtija Jesu
(Lc 10.13-15)

²⁰ Baharo macari macainare tuhtire Jesu. Tí macarine paye macari yuhdoro Cohamacu tuaa mehne yoa ñomare tiro. To ã yoa ñopachuta ti ñaare tuhhotumarire duhuerasinire tina. Ã jiro õ sehe ni tuhtire tinare tiro:

²¹ –Corazí macaina, musa ñano yuhdunahca. Betsaida macaina, musa cãhu ñano yuhdunahca. Musa ya macaripure Cohamacu tuaa mehne yoa ñomahi. Tiro wama tiri macare, Sidõ wama tiri maca cãhure to tuaa mehne yu yoa ñochu ñaa panopu tó macaina sehe ti ñaare cahyaboa. Ã yoa ti ñaare tuhhotumari cjiire tuhotu cohtotaboa. Cahyaa suhtire sãa, niti pohcare tina bui dahra site payoboa ti ñaa cahyaare ñoa. ²² Musare niita nija. Buhiri dahrehti dacho jichu Cohamacu Tiro macaina, Sidõ macaina yuhdoro ñaina musa jiri buhiri musare ñano waro buhiri dahrerohca tiro. ²³ Capernau macaina, musa mu sũro manopu waha duamana. Musare Cohamacu pichacapu cohãnohca. Musa ya macaru Cohamacu tuaa mehne yoa ñomahi. Musa yuhure tuhoerare. Sodoma wama tiri macare Cohamacu tuaa mehne

yu yoa ñochu tí maca sehe mipu jisinihoa. ²⁴ Musare niita nija. Buhiri dahrehti dacho jichu Cohamacu Sodoma macainare to yoariro yuhdoro, musa sehere musa ñaa buhiri ñabiario buhiri dahrerohca –nire Jesu tí macari macainare.

“Yu cahapu sona taga”, niha Jesu
(Lc 10.21-22)

²⁵ Tí pjare õ sehe nire Jesu to Pucuro mehne durucuro:

–Yu Pucu, mahu muano macaina bui puhtoro, ahri yahpa macaina bui puhtoro jira. Ahri mu buheare “Noano masiina jija sã”, niinare masichu yoerare mahu. Buhe pahnoeraina sehere mu yare masichu yoare mahu. Mu ã yoachu, “Noana”, nija yuhu mahure. ²⁶ Ã tjira. Tina sehere ti masichu cahmare mahu –nire Jesu to Pucurore.

²⁷ Ã ni tuhsu, masare õ sehe ni yahu namore:

–Yu Pucu jipihtiare yuhure ware. Tiro dihta yuhure noano masina. Ã jina sã dihta yuhu yu masi dutiina mehne yu Pucure masija sã. ²⁸ Musa ñano buhiri tia nucua yoaro sehe jira. Nucuaere muna musa tahrino seheta ñano buhiri tiare pumea wahara musa. Ã pumeina jina yuhure cahmaga musa. Musare sochu yoaihtja. Musa ñaa yoare duhuchu yoaihtja. ²⁹ Yu dutiare yoaga. Yu yare noano masiga. Yuhu niiji siaro yoariro jija. Yu ã jiriro jichu yu yare noano masiga musa. Ã yoa yuhu mehne sogã musa. Ã sona noano yajeripohna tinahca musa. ³⁰ Yu yare musa yoachu mi-joerara. Ã yoa musa mari cjiri ti nucueraro seheta yuhu sehe musa bihoro purota yoa dutija musare –nire Jesu.

12

Judio masa ti sori dachoi trigo parorire pahaha Jesu buheina

(Mr 2.23-28; Lc 6.1-5)

¹ Mahanocã tó ã ni buheri baharo Sabado jichu sã Jesu mehne trigo wesepu sui. Sã to buheina juca baana, trigo parorire paha, chu tuhsu yuhdu wahcã sã. ² Sã ã yoachu ñaa, fariseo curua macaina Jesure õ sehe nire:

–Tuhosiniga sãre. ¿Dohse yoa tina Sabado mari sori numu to jipachuta dahrajari, trigo parorire ã pahaa? Mari dutiare yuhdurucua nina –nire tina.

³⁻⁴ Jesu yuhtire. “Yu buheina yuhdurucua nierare”, ni yahuro taro õ sehe ni yuhtire:

–Davi cjiro tiro mehne macaina mehne juca baaro Cohamacu wuhuru sãa, Cohamacu ya pãore chuha. Tí pãore sacerdotea dihtare chu dutira. Cohamacu dutiare ti joari pu painare tí pãore chu dutierara. ¿Davi cãhu tire ti yoari cjirire

Cohamacu joari pürü buherari musa? (Tí pãore churo Cohamacure yuhdurucaro nieraha. Michare ahri yaparire chua yu buheina cãhu Cohamacure yuhdurucaa nierara.)⁵ Æ yoa Cohamacu wãhũ dahraina sacerdotea ne soerara mari soa nãmãrine. Æ soerapahta Cohamacu dutiare yuhdurucaina jierara. ¿Tíre buherari musa Cohamacu Moise cjirore to cãri pũ? ⁶ Mũsare niita nija. Cohamacu wãhũre ño payona tí wãhũ dahraina tí soerachũ ñũpanahta “Noanohca”, nina musa. Tí wãhũ yuhdoro yũhũ sehere ño payoro cahmana. ⁷ Cohamacu yare tí joari pũ ò sehe nina: “Wahiquinare wajã, jũ mũoa mehne yũhũre musa ño payochũ cahmaeraja. Painare musa pja ñũchũ sehere cahmaja yũhũ”, nina to yare tí joari pũ. To ã niriire musa noano tuhona yu buheinare tuhtieraboa musa. Tina tíre chua yuhdurucaa nierare. Æ jina tinare tuhtieraboa musa. ⁸ Yũhũ masũno Cohamacu warocararo ahri dacho Sabado dachore masa tí yoahire yahurirota jicu puhtoro tjija –nire Jesu fariseo curua macainare.

Wamomaca buhariro quiti jira
(Mr 3.1-6; Lc 6.6-11)

⁹ To ã niri baharo waha, judio masa mari buheri wãhũpũ sui sã Jesu mehne. ¹⁰ Tóí wamomaca buhariro jire. Æ jia fariseo curua macaina sehe Jesure yahusãa taa, tirore ò sehe ni siniture:

–Sabado dachoi mari sori dachoi masũnore noariro yoa dutierara Cohamacu. ¿Æ tjijari mũ tuhochũ? –ni siniture tina.

¹¹ Jesu ò sehe ni yũhtire tinare:

–¿Musa yairo oveja Sabado jichũ copapũ to bora sãachũ tirore na wioerabocari musa? Na wionahca musa. ¹² Oveja yuhdoro jira masũno sehe, Cohamacu to ñũchũ. Æ jiro Sabado jichũ masũnore yuhdochũ noa nina –ni yũhtire Jesu tinare.

¹³ Æ ni tuhsũ, wamomaca buharirore ò sehe nire:

–Mũ wamomacare siõrocaga –nire tiro.

To ã nichũ buhariro sehe siõroca, noari wamomaca wahare. ¹⁴ Tí sori nãmũ to ã yoachũ ñua, fariseo curua macaina waha, tí basi ò sehe niha:

–¿Dohse yoa Jesure wajãnahcari mari? –niha tina tí basi.

Cohamacu yare yahu mũhtariro panopũ macariro Jesure yahuha

¹⁵ Jesu tí ã niriire masino, waha wahare. To ã wahachũ payu masa tirore nãmũ tire. Tí ã nãmũ tichũ ñũno tiro sehe jiphtina tina mehne macainare dohatiinare noaina wahachũ yoare. ¹⁶ Æ yoaro dohatiina cjirore

tinare to yuhdorire painare yahu dutierare tiro. ¹⁷ Æ dohatiinare noaina wahachũ yoaro Cohamacu yare yahu mũhtariro Isaia cjiro panopũ to ni joariro seheta yoaro nire Jesu. Ò sehe ni joa tiha Isaia:

¹⁸ “Ò sehe nina Cohamacu:

‘Ahriro yu cahamacano jira.

Tiro yu beseriro jira.

Tirore cahija.

Æ jicu tiro mehne wahcheja.

Yu Espiriture tirore waitja.

Æ jiro yu tuaa mehne jiphtina masare yu buheare yahurohca tiro.

¹⁹ Æ yahuro tiro ne purĩno mehne yahusi.

Æ yoa niji siaroca yahuriro jiro sañurucusi.

Tuhsũ, maca macari mahai payu masa watoi tiro tuaro sañurucu yahusi.

²⁰ Wujũcũ o muquearũca sũchũ to nuhnuerachũ yoaro seheta masa cãhũre niji siaro dero yoarohca tiro.

Pjiroca jãri pichacare to yareraro seheta masa cãhũre noano yoarohca tiro.

Æta yoarucurohca tiro watĩnore to yuhdurũcahto pano.

²¹ Æ jia payu masa tirore wacũ tuaahca’, nina Cohamacu”,

ni joa tiha Isaia.

“Jesu watĩno tuaare cjuara”, ni yahusãha masa

(Mr 3.19-30; Lc 11.14-23; 12.10)

²² Cũ dachoi watĩno to cohtotarirore masa na tare Jesu cahapũ. Tiro sehe watĩno cjuaro durucu masierare. Tuhsũ, capari ne ñũerare. Tí ã na wihichũ ñũ, noariro wahachũ yoare Jesu tirore. To ã yoachũ watĩno to cohtotariro cjiro ñũ, durucure. ²³ To ã wahachũ ñua, masa ñũ cãaa wahare.

–¿Ahriro Davi cjiro panamino masare yuhdohtiro jijari? –nire tina tí basi.

²⁴ Jesu watĩare to cohãrre tuhõa fariseo curua macaina ò sehe ni tuhõture:

–Beelzebú watĩa puhtoro to tuaa mehne watĩare cohãna Jesu –ni tuhõture tina.

²⁵ Tí ã ni tuhõuchũ masino, Jesu quiti mehne piti dahre yahure tinare:

–Watĩno ya tuaa mehne watĩare cohãni nieraja. Cũ yahpa macaina tí basi cahma wajã, tí yahpa macaina yaria pihtia wahaboa. Cũ maca macaina tí basi cahmachea tí maca macaina waha pihtia wahaboa. Cũ wũhũ macaina cãhũ ãta wahaboa. ²⁶ Æ jia Beelzebú watĩa puhtoro sehe watĩare cohãno, tina watĩa tí basi cahmachea ni-bõa. Æ jia tina cãhũ waha pihtia wahaboa. ²⁷ Ò sehe ni yahusãna musa yũhũre: “Tiro Beelzebú yoadohoa mehne watĩare cohãna”, ni yahusãna musa. Mũsa mehne macaina cãhũ watĩare cohãna. ¿Watĩno to tuaa mehne watĩare cohãjari tina cãhũ, musa ñũchũ? Æ cohãerara. Tíre masina musa. Yũhũ cãhũ

watfno tuaa mehne watfare cohæeraja. ²⁸ Æ jicu yuhu sehe watfare cohæcu Cohamacu to Espiritu tuaa mehne tinare cohâja. Yuhu ã cohæchu ñuna õ sehe masiga musa: Cohamacu masa bui pãhtoro ahri yahpapre jituhsura mipure.

²⁹ Õ seheta jira mari piti dahre buhechu: Tuariro ya wuhuru pairu sãa su yaca masierara. Tuarirore dahteraro to ya wuhuru sãa su yaca masierara. Tirore to dahteri baharo sãa su yaca masina –ni yahure Jesu. (Ã ni yahure watfno to yuhduarucarire yahuro. Watfno tuariro to jipachata Jesu tirore yuhduarucara watfare cohãno.)

Ã ni tuhsu õ sehe ni yahu namore Jesu:

³⁰ –Cãiro yuhure cahmaeraro, yuhure ñu tuhtiriro jira. Cãiro yuhure yoadoheraro, yuhure wapu tichu yoaro nina.

³¹ Æ jicu musare potocã niita nija yuhu. Jipihita ñaare masa ti yoachu ti durucuchu cãhure Cohamacu bo masina. Æ boparota Espiritu Santore ti ñano ni durucuchu ti pinine ne bosu. ³² Yuhure masuno Cohamacu warocarirore yuhure ti ñano ni durucurire bo masina Cohamacu. Espiritu Santo sehere ti ñano ni durucurire ne bosu Cohamacu. Mipure, pihtiri dacho baharoru cãhure ti ã niri cjirire bosu tiro –ni buhere Jesu tinare.

Masa ti durucuaru tuhona ti jia tiare masija mari

(Lc 6.43-45)

³³ Æ ni buhe tuhsu, piti dahre buhero õ sehe ni yahu namore tinare:

–Noadu yucucu noaare dicha tira. Ñaadu yucucu ñaare dicha tira. Yucucu dichare masina “Tu dichata jira”, ni masija mari. (Mari ã masino seheta masa ti durucuaru tuhona ti jia tiare masija mari.) ³⁴ Agãa ñima tiina yoaro sehe ñaina jira musa. Musa ñaina jina, noaare ni masierara musa. Mari wacũaru mari tuhoturiro seheta mari duseroi wijara. ³⁵ Noariro noaare tuhotura. Æ jiro noaare durucura. Ñariro ñaare tuhotura. Æ jiro ñaare durucura. ³⁶ Musare niita nija. Noano tuhotu durucuna jiga musa. Noano durucuerana, buhiri dahrehti dacho jichu musa ã nimacanocarire Cohamacure yahu yuhduahca. ³⁷ Quihõno musa durucurire masino “Noaina jira”, ninohca Cohamacu. Tuhsu, ñano musa durucurire masino “Ñaina jira”, ninohca tiro –nire Jesu tinare.

Masa ñaina Jesure Cohamacu tuaa mehne yoa ño dutiha

(Mr 8.12; Lc 11.29-32)

³⁸ To ã niri baharo mari judio masare buheina, fariseo curua macaina cãhu tirore õ sehe nire:

–Buheriro, Cohamacu warocariro jicu Cohamacu tuaa mehne yoa ñoga sãre –nimare tina.

³⁹ Jesu õ sehe ni yuhtire:

–Mipuru macaina ñaina, Cohamacure cahmaeraina Cohamacu tuaa mehne yu yoa ñochu ñu duamana. Ti ã ñu duapachata Cohamacu yare yahu muhtarirore Jona cjiro panoru macarirore Cohamacu to tuaa mehne to yoari dihtare yoa ñonohca masare.

⁴⁰ Jona tia dacho waro pjiriro wahi pjaro puhichapu jiha. To ã wahariro seheta yuhu cãhu masuno Cohamacu warocariro tia dacho waro masa copapu jiihca. ⁴¹ Nínive macaina sehe Jona Cohamacu yare to yahurire tuhõa ti ñaa yoarire cahya, Cohamacu mehne macaina tjuaha. Æ tjuaina jia buhiri dahrehti dacho jichu tina mipuru macainare ti ñaare tuhotumari cjirire duhuerainare “Ñaina jira”, ni yahusãahca. Jona cjiro tinare Cohamacu yare to yahuchu tuhõa noaare cahmaha tina sehe. Æ cahmaa noano yoaa niha mipuru macaina yuhdoro. Æ jia tina mipuru macainare “Ñaina jira”, ni yahusãahca. Musare niita nija. Mipuru musare yu buhea Jona cjiro to buheri yuhdoro jira. ⁴² Æ yoa buhiri dahrehti dacho jichu pãhtorocoro sur macaricoro panoru macaricoro ducu, mipuru macainare “Ñaina jira”, ni yahusãanohca ticoro cãhu. Ticoro Salomo panoru macariro to masiare tuhõa duaro yoaroru ahri yahpa pa buhuseheru jiricoro Salomore tuhõa taha. Æ yoaro noano yoaro niha mipuru macaina yuhdoro. Æ jiro ticoro “Ñaina jira”, ni yahusãanohca mipuru macainare. Musare niita nija. Mipuru musare yu buhea to buheri yuhdoro jira –nire Jesu tinare.

Watfno pari turi masunore to sãari quitire yahuha Jesu

(Lc 11.24-26)

⁴³ Æ ni tuhsu, pari turi Jesu to tuhotua mehne õ sehe ni piti dahre buhere tinare:

–Watfno masunore cohtotariro cjiro waha, tiro co marieni yahpai tini, to jihto cjihtore macamaha. ⁴⁴ Æ bocaeraro, õ sehe ni tuhotuha tiro. “Masuno yu cohãriro cjiro mehnetu pari turi jii wahaihtja”, ni tuhotuha tiro. Æ ni tuhoturo tiro tjuaa waha, to cohãriro cjirorehta boca. Æ to bocachu masuno sehe noariro jimaha.

⁴⁵ Æ jiro watfno paina siete watfare to yuhdoro ñainare pjiro wahaha. To ã pjichu tina jipihita tiro mehne jiha. Masuno sehe tó pano cãiro watfno to cohtotariro jiro, ñariro jimaha. Mipuru sehere payu watfa ti cohtotariro jiro, tó pano to jiriro yuhdoro ña yuhduariro jiha. Mipuru macaina Cohamacure masimarina tirore cohãa, tina

cāhū ñaa yuhduina warota wahaahca —nire Jesu tinare.

*Jesu coyea tiro mehne sūhūdu duaha
(Mr 3.31-35; Lc 8.19-21)*

⁴⁶ Masare to ā ni durucuro watoi to pocoro to bahana mehne sopacai ducu, tiro mehne sūhūdu duare. ⁴⁷ Ā jiro cāiro Jesure ō sehe ni yahure:

—Mū poco mū bahana mehne sopacai ducura, mūhare sūhūdu duaa —nire.

⁴⁸ To ā nichū tūhoro tirere yahurire ō sehe nire Jesu tinare buhero taro:

—¿Noa jijari yū poco, yū bahana cāhū, mūsa ñūchū? —nire.

⁴⁹ Ā nino, sāre to buheinare ñūipuro, ō sehe nire:

—Ahrina jira yū poco yū bahana yoaro sehe jiina. ⁵⁰ Tina yū Pūcu mūano macariro to cahmaare yoara. Tó sehe yoaina yū bahū, yū baho, yū poco yoaro seheta jira —nire Jesu tinare.

13

*Jesu wesere toari masūno quitire yahuha
(Mr 4.1-9; Lc 8.4-8)*

¹ Tí dachoihta Jesu wūhūi jiro wijaare. Wijaa, būcuparioropū waha, būcupariro duhtū cahai dujire. ² To ā dujichū ñūa payū masa tiro cahapū cahmachu wahpata yūhdūa, bihsaro yoare Jesure. Ā bihsachū ñūno dohoriai samu, tiapū dujire tiro. Masa sehe padaroi ducure. ³ Ā jiro payū to tuhotua mehne piti dahre yahure tinare buhero taro. Ō sehe nire tiro:

—Toari masūno toaro, to toaa yaparire doca site cūno wahaha. ⁴ To ā doca site cū wahcāchū paye yapari maha duhtū cahai bora caha sūha. Ā bora caha sūare tí yaparire minichahca duji ta, chūnocaha.

⁵ Ā yoa paye yapari sehe taa wapa buicā bora caha sūha. Tāa wapa buicā dihta mariea cureroi dóihta dumaha. ⁶ Ā duri jipahta, sū to tuaro sichū, ñūcori mariaa, ñāia wahaha. ⁷ Paye yapari sehe tja watoi bora caha sūha. Tja sehe dia yūhdūa waha, toaa sehene wajānocaha. ⁸ Paye yapari sehe noari yahpai bora caha sūha. Noano dua jia noano dicha tiha. Paye yucū cien yapari, paye yucū sesenta yapari, paye yucū treinta yapari dicha tiha. ⁹ Ahrire tuho duaina noano tuhoga mūsa —nire Jesu.

*Jesu quti mehne to buherire yahuha
(Mr 4.10-12; Lc 8.9-10)*

¹⁰ To ā niri baharo sā to buheina tiro cahai sū, sinitui sā tirere:

—¿Ne, dohseacū masare quti mehne piti dahre buhejari mūhū? —ni sinitui sā.

¹¹ Jesu ō sehe ni yūhtire:

—Mūano macariro masa bui pūhtoro masare to noano sūho jiare panopū

macaina ti masierari cjirire mū sare yū buheinare masichū yoara Cohamacū. Paina sehene ā yoerara tiro. ¹² Ā jiro masiinare masi namochū yoarohca tiro. Ā jia tina sehe noano masiahca. Masieraina sehe mahanocā ti masipachūta tina sehene masierachū yoarohca tiro. ¹³ Ā jicū quti mehne buheja. Ō sehe jira. Mipū macaina ñūpahta, ñūeraina cjiri yoaro sehe tjuara. Ā jia tuhopahta masierara. Tīre tuhoeraina yoaro sehe jira tina. ¹⁴ Ā jiina jia Isaia cjiro panopū macariro to ni joariro seheta yoara tina. Ō sehe ni joaa tiha:

“Ō sehe nina Cohamacū: ‘Yū yare tuhonahca mūsa.

Ā tuhopenahta, ne masi mūsa.

¹⁵ Mūsa dapu butiina tjuara.

Tuhsū, mūsa cahmo coparire bihara mūsa, “Tūhori”, nina.

Mūsa caparire wihmitjiahna mūsa, “Ñūri”, nina.

Ā yoerana noano ñūna masiboa mūsa.

Ā yoa tuhona, masiboa mūsa.

Mūsa wacūapū noano masiboa.

Ā masiina baro jina, mūsa tuhotumari cjirire tuhotu cohtota, yūhare macaboa.

Mūsa ā macachū ñūno, yūhū sehe mūsa buhiri tiare cohāboa’, nina Cohamacū”, ni joaha Isaia cjiro.

¹⁶ Mūsa sehe mūsa capari mehne ñūna, masina. Mūsa cahmo mehne tuhona, masina. Ā jina wahcheina jira mūsa.

¹⁷ Mū sare niita nija. Mipū mūsa ñūare mūsa tuhoere panopū macaina Cohamacū yaina cjiri tuaro ñū duamaha. Cohamacū yare yahu muhtaina cjiri cāhū tīre tuaro ñū duamaha. Wiho mejeta ne ñūeraha. Mipū mūsa tuhoa cūhare tuaro tuho duamaha tina. Ā masi duapahta tīre masieraha —ni yahure Jesu sāre to buheinare.

Jesu wesere toari masūno quitire yahu pahūoha

(Mr 4.13-20; Lc 8.11-15)

¹⁸ Baharo Jesu sāre ō sehe ni yahu namore:

—Tūhoga mūsa. Wesere toari masūno quitire mū sare yahuihtja. Yūhare tuhona, noano masiga. ¹⁹ Doca site cūa yapari noaa buhea yoaro sehe jira. Ā jia maha duhtū cahai boraa yapari noaa buhea yoaro sehe jira. Masa noaa buheare tuhopahta ne masierara. Noaa buheare masa ti tuhochū ñūno wafino sehe ta, tí buheare noaa buheare masi dutierara masare. Minichahca tí yaparire ti dota nariro seheta yoara wafino. ²⁰ Ā yoa taa wapa buicā boraa yapari noaa buhea yoaro sehe jira. Ā jia masa noaa buheare tuho, wahchea mehne

dóih̄ta tíre tuho nana. ²¹ Ā tuho napahta t̄aa wapa buicā jia yuca nuhcori mariea yuca yoaro seheta ahrina masa cāhu tuاعرارا. Ā tuاعرara n̄ano yuhduu, yu yaina ti jiri buhiri paina tinare ti n̄ano yoachū n̄ua yu ya sehene duhunocahna. Paina tinare ti n̄ano yoachū tíre cūno p̄jaerara, yu yare duhunocahna. ²² Ā yoa tja watoi boraa yapari noaa buhea yoaro sehe jira. Ā jia masa noaa buheare tuho, ahri yahpa macaare p̄jiro cahya tuh̄otua, niferure cah̄ina. Ti ā yoachū tí sehe noaa buheare d̄ucatarata. Ti ā d̄ucatachū masa noaa sehene yoاعرارا. ²³ Ā yoa noari yahpai boraa yapari noaa buhea yoaro sehe jira. Masa noaa buheare tuhoa, tíre noano masina. Ā masina jia, Cohamacu to cahmano seheta noaare yoara tina. Cāina p̄jiro noaare yoara cien yapari dicha tiro seheta. Paina doca curero noaare yoara sesenta yapari dicha tiro seheta. Paina mah̄anocā noaare yoara treinta yapari dicha tiro seheta —ni yahure Jesu s̄are.

Trigo watoi tja diari quitire yahuha

²⁴ Ā yoa pari turi to tuh̄otua mehne piti dahre buhere Jesu:

—Muano macariro masa bui puhtoro to suho jiro ō sehe jira. Wese puero to wesepu noaa yaparire to toariro seheta jira muano macariro masa bui puhtoro to suho jiro. ²⁵ Wese puero jipihtina tiro mehne macaina cāhu ti car̄ino watoi tirore n̄u tuhtiriro tara. Ā taro trigore ti toariroi tjare toaha. Toa tuhsu wahaah wahaah. ²⁶ Baharo trigo duha. Ā jiro ti dicha tia cahachu waro diaa wahaah. ²⁷ Ā jia wese puore dahra cohtaina tiro cahapu su, yahua: “¿Puhtoro, noaa yapari dihtare mu wesere mu toapachuta, dohse yoa tja cāhu diajari tí wesere?”, niha tina. ²⁸ “Yuhure n̄u tuhtiriro jia tí tjare toaro”, niha wese puero. “¿Tjare s̄a curechū cahmajari m̄ahu?” nimaha tirore dahra cohtaina. ²⁹ “Tjare curenata tjiga, tjare curemahna ‘Trigo sehene cureri’, nina. ³⁰ Trigo tja mehnetata bucuawahnosinijaro. Dicha n̄aini p̄ja jichū, trigo dicha nainare ō sehe nihtija: ‘Tjare cure m̄ah̄taga. Tuhsu masa curerire j̄aga. Baharo trigore pahaga. Paha pah̄no, tíre yu wih̄bori wuhapu cūga’, nihtija tinare”, niha wese puero —nire Jesu, quiti mehne yahuro.

Mostaza yapa quitire yahuha Jesu
(Mr 4.30-32; Lc 13.18-19)

³¹ Ā yoa paye quiti mehne s̄are ō sehe ni buhere tjao:

—Muano macariro masa bui puhtoro to suho jiro mostaza yapacā yoaro sehe jira. Tí yapacā mahabiari yapacā jira. ³² Tí yapacāre wesepu to toari baharo, noano dura. Ā jiro p̄ji curedu wahara. Ā wahachu minichahca peri tu d̄up̄urip̄u

suhti suhara. (Tó seheta muano macarirore mari puhtoroce masiina mahainacā ti j̄i m̄ah̄tapachuta baharopu tina payu wahaahca) —ni yahure Jesu.

P̄ao bucuaro quitire yahuha Jesu
(Lc 13.20-21)

³³ Ā yoa paye quiti mehne s̄are ō sehe ni buhere tjao:

—Muano macariro masa bui puhtoro to suho jiro p̄ao bucuaro yoaro sehe jira. Tíre numino cū wajuru trigo pohcare co mehne noano tíre dahra morena p̄ao bucuah̄tore. To ā yoachū p̄ao bucuaro sehe trigore noano sahseracu s̄ura. (Tó seheta p̄ao bucuaro to sahseracu s̄uro seheta muano macarirore mari puhtoroce payu masa jipihtiro macaina masiahca) —nire Jesu.

Quiti mehne Jesu to buherire yahuha
(Mr 4.33-34)

³⁴ Ahri jipihtiare buhero, quiti mehne yahure Jesu. Quiti marieno yahuerare tiro tinare. ³⁵ Āta yoare tiro Cohamacu yare yahu m̄ah̄tariro cjiro to ni joariro seheta. Ō sehe ni joaa tiha panopu:

“Quiti mehne yahuihtja. Cohamacu ahri yahpare to bajuamehneri baharo ne masare to yahuerari cjirire yahuihtja”, ni joaa tiha Cohamacu yare yahu m̄ah̄tariro cjiro.

Trigo watoi tja diari quitire yahu pah̄noha

³⁶ Ā yoa masare coha siti, wuhapu s̄aa wahare Jesu. Ā jina s̄a to buheina tiro cahapu su, sinitui s̄a:

—Trigo watoi tja diari quitire yahu pah̄noga s̄are —nii s̄a tirore.

³⁷ Jesu ō sehe ni yahure s̄are:

—Wese puero noaa yaparire toariro yoaro sehe jija yuhu. Yuhu masuno Cohamacu warocariro jija. ³⁸ Wese sehe ahri yahpa yoaro sehe jira. Noaa yapari dua muano macariro puhtoro to suho jiro p̄u jihtina c̄ijhti yoaro sehe jira. Tja sehe wat̄ino yaina yoaro sehe jira. ³⁹ Wese puore n̄u tuhtiriro tjare toariro wat̄ino yoaro sehe jira. Tí n̄aini p̄ja sehe pihtiri dacho yoaro sehe jira. Ā jia trigore naina anjoa yoaro sehe jira. ⁴⁰ Tjare ti cure j̄uriro seheta pihtiri dacho jichū wat̄ino yainare, pichacapu j̄u cohāahca tinare. ⁴¹ Yuhu masuno Cohamacu warocariro yu anjoare warocaihtja. Yu ā warocachu anjoa sehe n̄aare yoa dutiinare, n̄aare yoainare puhtoro yu suho jiro p̄ure j̄i marinare na wioahca. ⁴² Na wio tuhsu pichacapu cohāahca tinare. Tópu tina tuaro t̄i, cahyaa mehne bahca dihoahca. ⁴³ Ā jia Cohamacu yaina ti puero puhtoro to suho jiro p̄u j̄iaha. Tóti jia, s̄u dacho macariro

yoaro sehe noano buhriaahca tina. Ahrire noano tuhoga masa —ni yahure Jesu.

Noa yuhduare to nuorire to bocari quitire yahuha

⁴⁴ Ā yoa paye quiti mehne ō sehe ni yahure tjao:

—Mũano macariro masa bui puhtoro to suho jiro niñeru to nuori yoaro sehe jira. Masano tĩre wesepũ wacũeno boca, pari turi tĩre nuo namona. Ā yoaro tuaro wahcheha tiro. Ā jiro to bocari cjirire nano taro, ti wesere nuchũ duaha. Ā nuchũ duaro to yare dua pahũo, ti wesere nuchũha. Mũano macariro puhtoro to suho jiro to bocari cjiri yoaro sehe jiha. (To bocarire to cahma yuhduariro seheta mũano macarirore masa bui puhtoro noano ti masini baharo masa tuaro cahmana tirore) —ni yahure Jesu.

Wapa bujuri yapa quitire yahuha

⁴⁵ Ā yoa paye quiti mehne ō sehe ni yahure tjao:

—Mũano macariro masa bui puhtoro to suho jiro wapa bujũa yaparire perla wama tia yaparire nuchũro yoaro sehe jira.

⁴⁶ Ti yaparire macano noa yuhduari yapare bocaha. Ā bocaro, ti yapare nuchũ duaro, jipihitia to yare dua pahũono wahaha. Ā dua tuhsũ ti yapare wapa bujuri yapare nuchũra. (Ti yapare tuaro to cahmariro seheta mũano macarirore masa bui puhtoro noano ti masini baharo masa tuaro cahmana tirore) —nire Jesu.

Wañũno quitire yahuha

⁴⁷ Ā yoa paye quiti mehne Jesu ō sehe ni yahure tjao:

—Mũano macariro masa bui puhtoro to suho jiro wañũno ti docañodu yoaro sehe jira. Tu wañũno mehne payũ wahi soro jinare ñahana. ⁴⁸ Tu to wahpaa wahachũ wahi wajãina sehe tũre padũropũ waja maja, noaina wahire besera. Noinare ti puhusepũ bese sãana. Ñaina wahire cohãnocahna. ⁴⁹ Pihtiri dacho jichũ ō sehe jirohca. Anjao sehe masare beseahca. Ñainare na wioahca noaina cahapũ jimarinare. ⁵⁰ Na wio, tinare pichacapũ cohãahca. Tõĩ tina tii, tuaro cahyaa mehne bahca dihoahca ñaina sehe —ni yahure Jesu.

Mũna buheare, wahma buhea cãhũre yahuha

⁵¹ To ã ni yahuri baharo tiro ō sehe ni siniture sãre:

—¿Ahri jipihitiare tuhajari masa? —ni siniture tiro.

—Tuhaja sã —ni yuhtii sã.

⁵² Sã ã nichũ tiro yahure sãre:

—Judio masare buheina mũano macariro masa bui puhtoro to suho jirore buhea, puaro buheare yahura. (Panopũ ti buhea

cãhũre mipũ ti buhea cãhũre yahura.) Tina, Judio masare buheina wuhũ puaro yoaro sehe jira. Tiro to wuhũ jiare noare na wioro, wahmaare, mũnaa cãhũre na wiora tiro —nire Jesu sãre.

Jesu Nazarepũ wahaha

(Mr 6.1-6; Lc 4.16-30)

⁵³ Ti quitire to buheri baharo, wahai sã tiro mehne. ⁵⁴ Waha, to bucuari macapũ suhi. Tõpũ su, judio masa mari buhea wuhũsepũ buhere tiro. To ã buhechũ tuhõa, tuhõ cuaa wahare tina.

—Cuenah, ¿ahriro nohopũ tuhõari ahri buheare? ¿Dohsearo noano masi pahũojari ahriro? Cohamacũ tuaa mehne yoa ñona tiro to basi. ⁵⁵ Ahriro tabõa dahrari masano macano jimanaro. Ā yoa to pocoro María jimanaro. Ā yoa Santiago, Josẽ, Simo, Juda, to bahana jimanabu. ⁵⁶ Mipũre to bahana numia ahri macai jira. Ā jiro tiro mari yoaro sehe jirore tjira. ¿Ā jiparõta nohopũ tuhõari tiro ahri buheare? —ni durucure tina ti basi.

⁵⁷ Ā jia tina tirore cahmaerare. Ti ã cahmaerachũ ñũno ō sehe nire Jesu tinare:

—Cohamacũ yare yahu muhtarirore paina ño payora. Ti ã ño payopachũta to ya maca macaina, to coyera tirore ño payoerara. Ā jina yuhũre ño payoerara masa õi yũ bucuariro jichũ —nire tiro tinare.

⁵⁸ Ā jiro tirore ti wacũ tuaerachũ ñũno “Cohamacũ macano jira”, ti ni duaerachũ ñũno, ti macai Cohamacũ tuaa mehne payũ tahari yoa ñoerare Jesu.

14

João bautisariro cjiro to yariarire yahuha

(Mr 6.14-29; Lc 9.7-9)

¹ Ti pjare Herode Galilea macariro puhtoro Jesu to yoirire tuhõrocaha. ² Ā tuhõro ō sehe nimaha:

—João masare bautisariro yariariro cjiro pari turi bajuaro nica. Ā jiro mipũre to bajuari baharo ahri tuaare cjuara tiro bajuamehneare yoaro —nimaha Herode to cahamacare. (Jesure “Joãõta jira”, ni tuhõtumaha tiro Joãõre ti wajãri baharo.)

³⁻⁵ Joãõre to wajã dutihõto pano Herode to bahũro Felipe namonore namo tiha. To ã yoachũ ñũno João bautisariro Herode sehere ō sehe ñia timaha:

—Mũ bahũ namonore namo ticũ Cohamacũ dutiare yuhduũcaĩ nina muhũ —ña timaha Joãõ.

To ã niri buhiri Herode tirore wajã duamaha. “João Cohamacũ yare yahu muhtariro jira”, ni tuhõtura judio masa” nino, tina sehẽre cuiha Herode. “Joãõre yũ wajãchũ tina suabõca” nino, tinare cuiha. Ā cuiro Joãõre wajã duaeramaha. Ā wajã

duaeraparota Herode tireo ñaha ðahte duti, peresu yoaha. To namono Herodia to dutiro mehne ã yoaha. ⁶ Æ yoa Herode to masa bajuari dacho jichu bose numu yoaha tiro. Tói Herodia macono bose numu wihiina ti ñurocaroi basa ñoha. To ã basa ñochu ñuno Herode wahcheha. Æ wahchero ticorore õ sehe niha:

⁷ —Cohamacu mehne potocã niita nija. Yuhure mu sinino purota waihtja yahu muhare —niha juna Herode sehe Herodia maconore.

⁸ To ã nichu tuhoro Herodia to maconore to sinihtore yahuha ticorore. To ã yahuchu to macono sehe õ sehe ni siniha Herodere:

—João masare bautisariro dapure cã ta dutiga. Æ yoacu waparo mehne ti dapure waga yuhure —niha ticoro.

⁹ To ã nichu tuhoro Herode tuaro cahyaha. Masa ti ñurocaroi “Waihtja muhare”, niha tiro. Æ jiro tiro buo tiro “Muhure to dapure waeraja”, ni masieraha ticorore. Æ jiro ticoro to dutiriro seheta Herode sehe to cahamacare Joãoare waja dutiha. ¹⁰ João dapure cã taroca dutiha juna. ¹¹ Æ cã ta tuhsu, waparo mehne to dapure na taha tina. Herodia maconore to dapure ti wachu, ticoro sehe to pocorore yuhdoha tjoa.

¹² Ti ã yoari baharo João buheina ta, to pjacure masa copapu na cüha. Æ cü tuhsu, tina tire Jesure yahua tare.

*Cinco mil bui masare chua waha Jesu
(Mr 6.30-44; Lc 9.10-17; Jn 6.1-14)*

¹³ Ti ã ni yahuchu tuhoro, Jesu sã mehne dohoriai samu, masa marienopu suho wahare. Jesu tópu to wahachu tuhoa, masa ti ya macaripu jirina ta, mahapu tireore nunu ti wahcãre. ¹⁴ Tuhsu, sã wahã sari baharo tiro payu masare ñuno, pja ñure tinare. Æ pja ñuno tina mehne macaina dohatiinare noaina wahachu yoare. ¹⁵ Ñamichahapu sã to buheina tireo õ sehe nii:

—Ñamichahapu jira. Õ masa marienopu jira. Æ jicu macaripu masare ti chuhtire nuchu dutiga ti puhu tilhti cjihtire —nimai sã tireore.

¹⁶ Jesu yuhtire sãre:

—Wahaea tjijaro tina. Musa basita chure waga tinare —nire sãre.

¹⁷ —Cã wamomaca pihtia pão curi, puaro wahi mehne jira sãre. Ti dihtare cjuaja sã —ni yuhtii sã.

¹⁸ —Tire yuhure na tahga musa —nire sãre.

¹⁹ To ã nichu tuhona na wahcãhi sã to cahai. Sã na sari baharo tja bui masare tiro duji dutire juna. Ti dujichu cinco pão curire, puaro wahire na, muanopu ñu muo, Cohamacure “Noana”, nire. Æ ninota pão curire nuha, sãre to buheinare ware. To ã wachu sã sehe tire masare witi. ²⁰ Æ jia

jipihtina noano chu, yapi yuhduu wahare. Ti yapi wahyore doce puhuse waro na cahmachu, wahpo dapoi sã to buheina. ²¹ Tói tire churina mua dihtare mari quihochu cinco mil mua jire. Numia, macanacã cãhu jire.

*Jesu co bui ducu wahcãha
(Mr 6.45-52; Jn 6.16-21)*

²² Baharo sãre to buheinare Jesu bucupariro pa buhusehe coapu pahãyu dutire masare to coha sitiro watoi. ²³ Coha siti tuhsu, tãcupu muja, Cohamacare sinino wahaha. Ñamine tói tiro cãirota jiha. ²⁴ Tí pjaihta bucupariro dacho macai dohorio mehne pahãrucuna nimai sã. Wihnono tuaro ta, pahcõri bujua wahcã, dohorio cã sãare. ²⁵ Wihnono tuaro to wãchu bohrea muja tahto pano Jesu co bui ducu tare sã cahapu juna. ²⁶ Sã cahapu to tachu ñuna cui nii sã. Æ cuina sañurucumai sã:

—Yariariro cjiro pjacu jira —ni sañurucumai sã.

²⁷ Sã ã cuichu ñuno Jesu õ sehe nire:

—Ne yuhure ñu cuaena tjiga. Yuhuta jija —nire sãre.

²⁸ To ã nichu tuhoro Pedro õ sehe nire tireore:

—Puhtoro, potocãta muhuta jicu, co bui yuhure mu cahapu ducu wahcã dutiga —nire tiro.

²⁹ —Taga —ni yuhtire tiro sehe.

To ã nichu Pedro dohoriapu jiro co bui ducu su Jesu cahapu ducu wahcãmare. ³⁰ Wihnono tuaro to tachu ñuno cuire tiro. Æ cuiro diha boraahamare.

—Yuhure yoadohoga puhtoro —ni sañurucure tiro Jesure.

³¹ To ã nichuta to wamomacare ñaha:

—Mahanocã wacü tuara muhu yuhure. ¿Dohseacu yuhure wacü tuaerajari muhu? —nire tiro Pedore.

³² To ã niri baharo dohoriapu samu tare tina. Ti ã samu tari baharo wihnono yasü borare. ³³ Æ jina sã to buheina dohoriapu jiina na tuhucua caha su, Jesure ño payoi:

—Potocãta muhu Cohamacu macnota jira —nii sã tireore.

Genesare macaina dohatiinare yuhdoha Jesu

(Mr 6.53-56)

³⁴ Æ yoarina cjiri pahã, Genesare wama tiri yahpamu sui. ³⁵ Tó macaina Jesure ñu masire. Æ masia tó cahai jiinare Jesu to wihirire yahu site pahãore. Æ ti yahu sitechu tuhoina payu dohatiinare tiro cahapu na tare.

³⁶ —Mu suhtiro ðahtu caha dihtare sãre ñaha ñu dutiga —ni sinire tina Jesure. Æ jia to suhtirore ñaha ñunape tópeinata noaina wahare.

15

Masa ñaina wahachu yoaere yahuha Jesu (Mr 7.1-23)

¹ Á yoa Jerusalē macaina, fariseo curua macaina, marine judio masare buheina mehne Jesu cahapu wihia, ò sehe ni siniture tirore:

² —¿Dohse yoa mari ñuchusuma cjiropu ti yoa dutihiro sehetā yoajerari mu buheina sehe? Tina ti chũto pano ti dutihiro sehetā wamo cosaerara —nire tina Jesure.

³ Jesu ò sehe ni yũhtire tinare:
—¿Musa sehe dohse yoana Cohamacu dutia sehere yoajerari musa? ¿Dohse yoana mari ñuchusuma cjiro panopu macaina ya dutia dihtare yoajari musa sehe? ⁴ Ó sehe nina Cohamacu: “Musa pũcusumare ño payoga”, nina. “Cũiro to pũcusumare ñaare quiti dahreriro jiro ti buhiri paina ti wajãhtiro cjihto jirohca”, nina Cohamacu.

⁵ To ā nipachuta ò sehe ni dutira musa sehe ti pũcusumare yoadoho dutierana: Ti pũcusumare ti waborire Cohamacu sehere wa dutira musa. Á ni buhemana musa. ⁶ Á buhena ti pũcusumare ño payochu yoajerara musa. Musa ā yoana Cohamacu dutiare yũhdũrcana nina musa, mari ñuchusuma cjiro panopu macaina ya dutia dihtare yoana. ⁷ Masa ti baharo buhusehe ñano yoa cohtaina jira musa. Cohamacu yare yahu mũhtariro Isaia cjiro musare potocãta yahu joaa tiha panopure: ⁸ “Ahrina masa yũhũre noano durucupahta ti tũhotuare yũhũre ne ño payoerara.

⁹ Á jia yũhũre ti ño payoa ne yaba cjihti jierara.

‘Cohamacu ya dutia jira ahrĩ’, ni mahũo buhera ti ya buhea sehere”, ni joaa tiha Isaia cjiro —nire Jesu fariseo curua macainare, mari coyea judio masare buheina cãhũre.

¹⁰ Á ni tuhsu to cahapu paina cãhũre pjiroca, ò sehe nire:

¹¹ —Yũhũre tũhona taga. Tuhsu, yu niare noano tũho ñahaga musa. Musa dũserihi sãa sehe musa chũa sehe musare buhiri tichu yoajerara. Musa ñaa durucua sehe musa dũseri wijaa sehe musare buhiri tichu yoara —nire Jesu.

¹² To ā ni buheri baharo sã to buheina sehe tirore yahui:

—Mu ā nichu tũhoa fariseo curua macaina suaa nire —ni yahui sã tirore.

¹³ Tĩre tũhoro, ò sehe ni yũhtire sãre:

—Tina fariseo curua macaina toaa yucu yoaro sehe jira. Yu Pũcu mũano macariro jipihitia toaa yucure to toaerari cjirire nuhcori mehneta cure, cohãnohca. Áta yoarohca tinare. ¹⁴ Tinare ā ñũnocahga musa. Tina capari ñũeraina ti ñũ masieraro sehetā ne Cohamacu yare masierara. Á

jia pichacapu wahaahca. Á masierapahta paina masierainare buhe duamana. Á jia tina, ti buheina cãhu soro jia buheare cahmaahca, capari ñũeraina painare tuã wahcã, jipihitia copapu ti borariro sehetā —nire Jesu.

¹⁵ To ā nichu tũhoro Pedro ò sehe nire:

—Ahrĩ quitire masa ti dũseri wijaa quitire yahu namoga sãre tjoa —nire tiro Jesure.

¹⁶ Jesu ò sehe ni yũhtire:

—¿Ne, tũhoerasinijari musa? ¹⁷ Masa ti chũare chũchu ti ti dũseroi sãahna. Á jia ti pjaropu sãa su, yũhdu wijaa wahara. Wiho waro jira. Mari chũa marine buhiri tichu yoajerara, Cohamacu to ñuchu. ¿Ahrĩre masierari musa? ¹⁸ Masa ti dũseroi wijaa, ti durucua sehe ti tũhotuapu tara. Ti durucua sehe ñaa jia masare buhiri tichu yoara.

¹⁹ Ñaa tũhotua, masare wajãa, paio namono mehne ñano yoaa, ñano yoaa numia mehne ñano yoaa, yacaa, mahũoa, masare ñano quiti dahrea masa ti tũhotuapu tara. ²⁰ Tĩ ñaa sehe masare buhiri tichu yoara. Wiho mejeta mari ñuchusuma cjiro ti yoaa tiriro cjiro sehetā masa wamo cosaerapahta ti chũchu ti masare buhiri tichu yoajerara —nire Jesu.

Judio masono jieraricoro Jesure wacũ tuaha

(Mr 7.24-30)

²¹ Á ni buhe tuhsu, sãre suho wahare tjoa. Tiro wama tiri maca cahapu Sidõ wama tiri maca cahapu sui sã. ²² Sã tũpu suchu Canaa yahpa macaricoro tõi jiricoro Jesu cahapu wihiro, sañurucure:

—Pũhtoro, Davi panamino masare yũhdũchu yoahtiro, yũhũre pja ñũga mũhu. Yu macore yũhdũchu yoabasaga mũhu. Yu maco watĩno to cohtotaricoro, ñabiaro yũhdũra ticoro —ni sañurucure to pocoro.

²³ To ā nipachuta Jesu ticorore yũhtierare. To ā yoachũ ñũna sã to buheina sehe tirore ò sehe nimai:

—Waha dutiga ticorore. Nu cariboro bisica —nimai sã.

²⁴ Sã ā nichu tũhoro Jesu ò sehe ni yũhtire ticorore:

—Israe masare Cohamacure masieraina dihtare yoadoho dutiro warocare yu Pũcu yũhũre —nire tiro.

²⁵ To ā nipachuta Jesu dahpori cahai na tuhcuca caha sũre ticoro tirore ño payoro.

—Pũhtoro, yoadohoga yũhũre —nire ticoro.

²⁶ Jesu ò sehe ni yũhtire ticorore:

—Ó sehe jira ahrĩ: Wahmanore wãhu pũro pohna ya chũare dieyacãre yu wa mũhtachu tõi wahaerara. (Israe masa yare pa yahpa macainare yu wa mũhtachu tõi wahaerara) —nire Jesu ticorore piti dahre yahuro.

²⁷ —Ã tjira puhtoro. Ã jipachuta diey-acã cãhu wãhu pãro mesa docai ti chu site boroare chu cohtara tinacã cãhu. (Pa yahpa macaricoro yu jipachuta yãhu cãhure yoad-oho masina mãhu) —ni yãhtire ticoro.

²⁸ To ã nichu tiro õ sehe ni yãhtire:
—Ne numino, mãhu yãhure tuaro wacũ tuara. Mũ cahmano seheta ã waharohca — nire Jesu ticorore.
To ã nichuta dõihata noaricoro wahare to macono.

Payu dohattinare noaina wahachu yoaha Jesu

²⁹ Æ ni tuhsu sãre suho waha, Galilea wama tiri bucãpariro dãhtu cahapu suho sure tjoa. Sũ, mahaducã tãcure mija, tu buipũ dujire. ³⁰ Tõi to jichu payu masa tini masierainare, capari ñuerainare, cã buhusehe ñano dahporo tiinare, durucu masierainare, payu paina dohattinare tiro cahapu na wihire masa. Na wihĩ tuhsu Jesu dahpori cahai duhu cãre tina. Ti ã duhu cãri baharo noaina wahachu yoare Jesu tinare. ³¹ To ã yoachũ ñua masa ñu cãaa wahare. Durucu masieraina ti durucuchũ ñua, cã buhusehe ñano dahporo tiina noaina ti wahachũ ñua, tini masieraina ti tinichũ ñua, capari ñueraina ti ñuchũ ñua, cãaa wahare tina. Æ jia õ sehe nire:

—Israe masa mari puhtoro, Cohamacu tariro, noariro jira —ni ño payore tina Cohamacure.

Cuatro mil masare chũare waha Jesu (Mr 8.1-10)

³² To ã yoari baharo Jesu sãre to buheinare to cahapu pjiroca, õ sehe nire:

—Ahrina masa yãhu mehne tia dacho waro ji tuhsura. Æ yoa tinare ti puhĩ mari-ahna. Ti puhĩ mariachũ ñucũ tinare pja ñuja. “Tinapu jũca baaina, mahai borari”, nicũ tinare chũa marieno ti wãhusepũ waha duti duaeraja. Æ jicu tinare puhĩ wa duaja —nire tiro.

³³ To ã nichu sã to buheina tirore sinitu ñui:

—¿Dohse yoa mari õre masa marienopãre pãore boca wabocari mari? —nii sã tirore.

³⁴ —¿Nohope curi pão curire cjuajari mũa? —nire Jesu.

—Siete curi, wahi cãhure mahainacã cjuaja —ni yãhtii sã.

³⁵ Sã ã nichu tiro masare yahpai duji dutire. ³⁶ Tuhsu siete pão curire, wahicã cãhure na, Cohamacure “Noana”, nire. Æ ninota pão curire nuha, sãre to buheinare ware. Æ jina sã sehe ti chũare masare witi.

³⁷ Æ jia masa tíre chu, yapi yãhdũa wahare. Ti yapi wahyorire siete puhuse waro wahpo dapoi sã. ³⁸ Tõi chãrinare mũa dihtare mari quihõchũ cuatro mil waro mũa jire. Numia,

macanacã cãhu jire. ³⁹ Ti ã chu tuhsuchũ Jesu masare waha dutire. Æ ni tuhsu dohoriapũ samu, Magadãn wama tiri yahpãpũ sãre suho sure.

16

Fariseo curua macaina, saduceo curua macaina cãhu Cohamacu tuua mehne Jesu to yoa ñochũ ñu duamaha (Mr 8.11-13; Lc 12.54-56)

¹ Æ yoa fariseo curua macaina, saduceo curua macaina mehne Jesu cahapu wihire. To ñano yoachũ ñu duamare tirore yahusã duua. Æ jia tina tirore Cohamacu tuua mehne yoa ño dutimare to masierachũ ñu duua, “Cohamacu warocariro jierara”, nia taa. ² Ti ã yoa dutichũ Jesu õ sehe ni yãhtire tinare:

—Ñamichahapu sũ sãachũ to noano sohãchũ ñua “Noari ñami jirohca”, nina mũa. ³ Tuhsu, bohrearo ñichuri dacho to jichũ ñua “Coro tarohca”, nina mũa. Æ noano masiina jipanahata Cohamacu tuua mehne mũsare yu yoa ñochũ ñupanahta ne tíre noano masierara mũa. ⁴ Mipũ macaina ña yãhdũina Cohamacure cahmaeraina Cohamacu tuua mehne yu yoa ñochũ ñu duamana. Yoa ñosi yãhu. Cohamacu yare yahu mãhtariro cjiro Jona cjiro to dohse waharirore masi tuhsure mũa. Tí dihtare ñoihtja mũsare —ni yãhtire Jesu.

Æ ni yahu tuhsu suho wahaa wahare tjoa.

Fariseo curua macaina, saduceo curua macaina ti ñaa buheare yahuha Jesu (Mr 8.14-21)

⁵ Bucãparirore sã pahãna, pãore bo pahã tari jihti sã. ⁶ Æ jiro Jesu sãre õ sehe ni yahure:

—Noano yoanohbu. Fariseo curua macaina, saduceo curua macaina ti pão bucãarore ñua noano yoaga. Cua nina tí —ni yahure.

⁷ To ã nichu tuhona tuhõ wisia wahana, sã basi tíre õ sehe ni durucui:

—Mari pãore mari na taerachũ ñuno ã nipũcu tiro —nimai sã, sã basi.

⁸ Sã ã nirire masino, sãre õ sehe ni siniture:

—¿Dohse yoana pão sehere wacũjari mũa? Mahanocã waro yãhure wacũ tuara mũa.

⁹ ¿Masierasinihari mũa? ¿Cinco mil mũare cinco pão curire yu nuha warire numia cãhure yu warire wacũerajari mũa? ¿Ti yapi wahyorire doce puhuse waro mũa wahpo daporire wacũerajari mũa? ¹⁰ ¿Æ jicu si-ete pão curire nuha, cuatro mil mũare yu warire numia cãhure yu warire wacũerajari mũa? ¿Nohope puhuse waro mũa wahpo daporire wacũerajari mũa? ¹¹ ¿Æ jina pão bucãarore yu yahuchũ dohse yoana noano

tahoerari masa? Ā nicu pāo warore nicu nieraja. Fariseo curua macaina, saduceo curua macaina ti pāo būsuarore űana noano yoaga. Cua nina tí –ni yahure säre tiro.

¹² To ā ni yahuchupu sā masil. “Pāo būsuaru” nino, pāo warore nino nierare. Ā nino fariseo curua macaina, saduceo curua macaina ti buheare nino niri jimare säre. “Ti ya buheare tahoena tjiga”, nino nire.

Jesu potocā Cristo to jiare Cohamacu warocariro to jiare yahuha Pedro

(Mr 8.27-30; Lc 9.18-21)

¹³ Ā yoa Jesu mehne wahana, Cesarea Filipino wama tiri maca cahai jia macaripu sui sā. Tuhsu, macapu sā suri baharo Jesu säre to buheinare siniture:

–ĶDiro baro jicari yuhsu masa yuhure ti tūhotuchu? –ni siniture tiro.

¹⁴ –“Joāo masare bautisariro jira”, nina mūhure. Paina “Elia jira”, nina. Ā yoa paina sehe tjoa, “Jeremía jiboca o paio Cohamacu yare yahu mūhtariro cjiro jiboca”, nina –ni yuhtii sā tirore.

¹⁵ –ĶMusa sehe musa tūhotuchu diro baro jicari yuhsu? –ni siniture tiro.

¹⁶ Simo Pedro ō sehe ni yuhtire:

–Mūhu Cristo Cohamacu warocariro jira. Cohamacu catiriro waro macanota jira mūhu –ni yuhtire Simo Pedro.

¹⁷ To ā nichu tūhoro Jesu tirore ō sehe nire:

–Simo Jona macano mūhu wahcheriro jira. Ō sehe ni yuhure mū yuhtichu masa ti ni yahuri jierara. Yu Pūcu mūano macariro sehe tíre mūhure masichu yoare. ¹⁸ Mūhure niita nija. Mūhu Pedro wama tirore jira. (Pedro nino, “tāca”, nino nina.) Ahri tāa wapa bui pjiri wūhure yu yoaboriro seheta yu yaina sehene pjiri curua jichu yoaihca yuhsu. Ā jia watino to yaina mehne ne yu yainare yuhdūrucasi. Ā jia yu yaina ne pichacapu wahasi. ¹⁹ Mūano macariro mari puhtoro to suho jiro macari sawire mūhure waihtja. Ā jicu ahri yahpare űaare mū yoa dutierachu mūanopu cūhure yoa dutisi. Ahri yahpare noaare mū yoa dutichu mūanopu cūhure yoa dutia jahca –nire Jesu.

²⁰ To ā niri baharo säre to buheinare ō sehe nire:

–Yuhure “Cristo jira tiro”, ni yahu sitesiniena tjiga painare –ni dutire säre.

Jesu to yariahtore, to masa wijaahito cūhure yahuha

(Mr 8.31-9.1; Lc 9.22-27)

²¹ Tí pjata Jesu säre to buheinare noano yahu pahño ducare:

–Jerusalēpu yuhure waharo cahmana mipure. Tōpu mari coyea judio masa būsana, sacerdotea puhtoa, marine judio masare buheina cūhu yuhure űano yoaahca.

Yuhure wajāahca. Āta űano yuhdūro cahmana yuhure. Ā jicu tia dacho wahaboroi masa wijaaihca –ni yahure säre tiro. ²² To ā nichu tūhoro Pedro sehe pa sehe cūerocā Jesure narūcu su, tirore ō sehe nire:

–Puhtoro, mū nino sehe ā wahaero tji-jaro. Mūhure tina wajāea tji-jaro –nimare tiro Jesure.

²³ To ā nichu tūhoro Jesu majarerūca, tirore ō sehe nire:

–Satana yoaro sehe durucui nina mūhu.

Ā nii tjiga. Mū tūhotua masa ya jira. Cohamacu ya jierara. Ā jicu yu yoahore ducata duara mūhu –nire Jesu Pedore.

²⁴ To ā niri baharo säre yahure:

–Cūiro yu yairo ji duaro, to cahmano yoa duamarine duhunocanohca. Crusapu yu űano yuhdūhtiro seheta yu yairo to jiri buhiri űano yuhdūparota yuhure duhūsi. Ā jiro yu yare yoarucuriro jirohca. ²⁵ Masano yuhure wacūno marieno to mū suro to cahmano seheta yoariro pichacapu waharohca. Tuhsu, masano yu yare ā yoarucuriro jipihtia dachoripe yuhsu mehne mūanopu jirucurohca tiro. ²⁶ ĶCūiro masano ahri yahpa macaare jipihtiare cūariro Cohamacure cahmaeraro pichacapu waharo, yabare wapatajari tiro? Ā jiriro ne wapataerara. Pichacapu to wahachu ne dohse wapa wiohto basioerara. ²⁷ Yuhū masano Cohamacu warocariro yu yaina anjoa mehne ahri yahparu tjua tacu yu Pūcu to si sitea mehne tjua tacu jipihtina masare ti űaa yoari buhiri buhiri dahreihitja. Noaa sehene ti yoachū noano yoaihtja tinare. ²⁸ Potocā masare yahuhtija. Cāina musa ōpūre jiina musa yariahto pano yuhure yu tachū yu puhto sāachū cūhure űanahca –ni yahure Jesu.

17

Jesu to pjacure cohtotaha

(Mr 9.2-13; Lc 9.28-36)

¹ Ā yoa seis dachori baharo Jesu Pedore, Santiago to baharo Joāo cūhure mūadu tūcupu tina dihtare pji majare. ² Mūanopu ti suri baharo ti űarocaroi to pjacure cohtotaha. To wuhdūa sū dacho macariro yoaro sehe si siteha. Tuhsu, to suhtiro buhriaro yoaro seheta yehsea tiha. ³ To ā cohtotachu Jesu Moise cjiro, Elia cjiro mehne ti suhūduchu űaha tina tiaro Jesu buheina. ⁴ Ā jiro Pedro Jesure ō sehe nimaha:

–Puhtoro, mari ōi jichu noa duara. Mū cahmachu tia wūhūcā yoaihtja. Mū ya wūhūcā, Moise ya wūhūcā, Elia ya wūhūcā yoaihtja –nimaha tiro.

⁵ To ā nino watoi me curua noano si sitea me ti bui duji pja wihūha. To ā duji pja wihūhata, me curua watoi ō sehe nino coa taha:

—Ahriro yu macu yu cahīriro jira. Tiro mehne wahcheja. Tirore tahoga —nino coa taha.

⁶ Ā nino coa tachu tūhoā to buheina caaa waha, yahpai doca caha sūha. ⁷ Tī ā wahari baharo Jesu tina cahapu su, tinare bua carerota, ō sehe niha:

—Wahcārcagaga mūsa. Mipure mūsa űūrire, mūsa tūhori cūhure cuiena tjiga —niha tiro tinare.

⁸ To ā nichu tina űūroca, Jesu dihtare űūha. Tī űūrina cjiri sehe marieraha jūna.

⁹ Ā jia tūcāpu ti duji tachu Jesu tinare tuaro mehne ō sehe niha:

—Michapucā yu ā waharire painare yahuenta tjiga. Yūhu masuno Cohamacu warocariro yu yaria masa wijaari baharo tīre painare yahuga mūsa —niha Jesu.

¹⁰ To ā niri baharo Pedro cūhu tirore ō sehe ni sinituha:

—“Cristo masare yūhdohtiro to tahto pano Eliare ta mūhtano cahmana”, nina marine judio masa buheina. Ā Dohse jiro baro ā nijari tina? —ni sinituha tina tirore.

¹¹ Jesu ō sehe ni yūhtihā:

—Potocā tjira. Eliare ta mūhta dutire Cohamacu, jipihtiare cahno mūhtahtirore.

¹² Ō sehe nica mū sare nii nija. Elia wihi tuhsare. To ā wihpachūta tina tirore ne űū masierare. Ā jia ti dohse yoa duaro űāno yoari jire tirore. Āta yoaahca yūhu cūhure. Yūhu masuno Cohamacu warocariro jija. Tī ā yoachu űāno yūhdūhca yūhu —niha Jesu.

¹³ To ā ni yahuchū tina noano tūhoā. “Elia” nino, Joāo bautisarirore nino niha. Tīre masiha tina.

Jesu űāma yaria mūnare dohatirirore yūhdoha

(Mr 9.14-29; Lc 9.37-43)

¹⁴ Ā yoa payu masa cahapu ti duji tachu űūno cūro mūno Jesu cahapu su, na tuhca caha sūre.

¹⁵ —Puhtoro, yu macūcāre pja űūga. Tiro űāma yaria mūnare dohatiro jira. Ā jiro tiro űābiaro yūhdūra. Payu tahari pichacapū bora su caha mūjana tiro. Cāa tahari diapu bora űōja mūjana. ¹⁶ Ā jicu mū buheina cahapu tirore na sūmahī. Tina tirore noariro wahachū yoa masierare —nire tiro Jesure.

¹⁷ Jesu ō sehe ni yūhtire:

—Mipū macaina, mūsa űāa buhiri tiina jira. Yūhure ne wacū tuerara. Yoabiari pja mū sare buhemaja yūhu. Ā Noho puro yoari pja yūhure mūsa caribobocari? Tirore na tahga yūhure —nire Jesu.

¹⁸ Ā jiro wātinore to tuhtichūta wātinore sehe masunocāre sāariro cjiro wahāa wahare. To ā wahari baharocāta noariro wahare tiro.

¹⁹ Baharo sā to buheina sā sahsero jina Jesure ō sehe ni sinitui:

—Ā Dohse yoana sā sehe ahriro sehere wātinore cohā masierari, mū tūhotuchū? —ni sinitui sā.

²⁰ Jesu ō sehe ni yūhtire:

—Yūhure mahanocā wacū tuara mūsa. Potocā mū sare yahuita nija. Mostaza yapacā mahari yapacā jiparota duropū pjiidū wahara. To ā wahariro seheta Cohamacure wacū tuana ō sehe wahachū yoa masinahca mūsa. Ahdū tūcure “Sohōpū wahaga”, mūsa nichū, waharohca. Cohamacure tō seheta wacū tuana, jipihtiare yoa masina mūsa. ²¹ [Wiho mejeta ahriro baro wātinore mūsa cohā duana Cohamacure tuaro sinino cahmana mū sare. Ā yoa duana chū duhuoro cahmana mū sare Cohamacure sinina tana] —nire Jesu sāre.

Pari turi Jesu to yariahtore, to masah-tore yahuha

(Mr 9.30-32; Lc 9.43-45)

²² Ā yoa Galilea yahpāpū sā tinichū, Jesu sāre ō sehe ni yahure:

—Yūhu masuno Cohamacu warocariro jija. Masa yūhure űāha, painapure yūhure waahca. ²³ Ā ti wari baharo yūhure wajāahca tina. Ā ti wajāricū tia dacho wahaboroi masa wijāahca —ni yahure tiro sāre.

To ā ni yahuchū tūhona tuaro cahyai sā.

Cohamacu wūhu macaa wapa cjihtire sinituha paina

²⁴ Ā jina Capernaupū sā sūchū, Cohamacu wūhu macaa cjihtire wapa na cohtaina Pedro cahapu su, tirore ō sehe ni sinitu űūre:

—Ā Mū sare buheriro Cohamacu wūhu macaa wapa cjihtire wapajari tiro? —ni siniture tina.

²⁵ —Wapara tiro —ni yūhtire Pedro.

To ā niri baharo wūhūpū to sāachū Jesu ō sehe ni sinitu mahtare Pedrore:

—Ā Simo, dohse ni tūhotujari mūhu? Ā Ahri yahpa macaina puhtoā yabaina sehere wapa cahmajari, mū tūhotuchū? Ā Tina mehne macainare wapa cahmajari? Ā Ō pa yahpa macaina sehere wapa cahmajari, mū tūhotuchū? —ni siniture tiro Pedrore.

²⁶ —Pa yahpa macaina sehere wapa cahmana —ni yūhtire Pedro.

To ā nichū Jesu ō sehe ni yahure:

—Ā jiro puhtoro to ya yahpa macainare wapa cahmaerara. ²⁷ Ā jipachūta wapa na cohtainare suachū yoa duaeraja mari. Ā jina wapanahca tinare. Wūcūpariropū wahaga. Tōpū su, yohgari canore doca űōga. Ā yoa su wahi mūhure chūrirore tūāga. To dūseropū niűūru tūre bocaihca mūhu. Tī tū quihōno wapa tiri tū jirohca. Yūhure, mūhu cūhure Cohamacu wūhu macaina ti wapa cahmachū noano quihōno mū sūrohca tī tu.

Tí tare bocacu mari wapamonore wapai wahaga —nire Jesu Pedrore.

18

Jesu buheina tina mehne macarirore puhtoro sō duaa nimaha

(Mr 9.33-37; Lc 9.46-48)

¹ Tí pjare sã to buheina Jesu cahapu su, ò sehe ni sinitui tirore:

—¿Mũano macariro puhtoro to suho jiropure sã mehne macariro diro baro sehe wahabocari puhtoro? —ni sinitui sã.

² Sã ã nichu Jesu nijinocãre pjiroca, tirocãre sã panoi duhu dapore. Duhu dapo tuhsu, sãre ò sehe nire:

³ —Potocã musare yahu bahrañoihtja. Ahrina macanacã Cohamacure ti puhtoro waro tuhotura. Æ jina musa cãhu pano musa tuhotumari cjirire cohtotaerana, tinacã yoaro sehe tuhotuerana mũano macariro puhtoro to suho jiropure wahasi musa. ⁴ Æ jiro mũano macariro puhtoro to suho jiropure niji siaroca yoariro painare yuhduraca duaerariro ahriri nijinocã yoaro sehe tuhoturirota paina bui puhtoro wahara. ⁵ Æ jina yu yare yoana tana ò sehe jinanãre cahmana, yuhũ cãhũre cahmana musa —ni yahure Jesu.

Ñaaare yoachũ cua nina

(Mr 9.42-48; Lc 17.1-2)

⁶ Æ ni yahu tuhsu, tinare ò sehe ni yahu namore:

—Ahrirocã sehe jiriro yuhũre wacũ tarirocãre yahuihtja musare. Pairo ahrirocã sehe jirirore ñaaare yoa dutiro tiro ñabiario yuhdurõhca. Cũirore to wamũare pjiria tãcare duhte yo, pjiri mapũ tirore ti cohãchũ ñano wahaboa tiro. Æ jiro ahrirocã sehe jirirore ñaaare yoa dutiriro tiro sehe pjiri mapũ ti cohãriro yuhdoro ñano yuhdurõhca. ⁷ Masare ñaaare yoachũ yoaa jira. Tĩre yoaa ahri yahpa macaina ñano yuhdura. Ñaaare yoarucura masa. Tĩ Æ yoachũ tinare ñaaare yoachũ yoaina sehe ñabiario yuhdurõhca.

⁸ Mũ wamomaca mehne ñano yoacu tí wamomacare mũ dute cohãboro seheta tí mũ ñaa yoaa sehere duhuga. Tĩre duhueracu pichacaru wahaihca. Tõpũre ne pichaca yatierara. Mũ wamomacare mũ cohãchũ tí si dihta butiboa. Tuhsu, mũhu sehe Æ si jipaihta baharo Cohamacũ mehne jiihca. Pũca wamomaca mehne pichacaru wahacu mũ Æ wahachũ ñaa yuhduaboa mũhũre. Æ jicu tí mũ ñaa yoaa sehere duhuga.

Mũ dahporo mehne ñano yoacu tí dahporo cãhũre mũ dute cohãboro seheta tí mũ ñaa yoaa sehere duhuga. Tĩre duhueracu pichacaru wahaihca. Tõpũre ne pichaca yatierara. Mũ dahporore mũ cohãchũ tí

si dihta butiboa. Tuhsu, Æ si jipaihta baharo Cohamacũ mehne jiihca. Pũca dahporo mehne pichacaru wahacu mũ Æ wahachũ ñaa yuhduaboa mũhũre. Æ jicu tí mũ ñaa yoaa sehere duhuga.

⁹ Mũ capariaca mehne ñano yoacu tiare orewe mũ cohãboro seheta tí mũ ñaa yoaa sehere duhuga. Tĩre duhueracu pichacaru wahaihca. Tõpũre ne pichaca yatierara. Tiare mũ cohãchũ tia dihta butiboa. Cũ buhũsehe capariaca mariapaihta baharo Cohamacũ mehne jiihca. Pũca capariaca mehne pichacaru wahacu mũ Æ wahachũ ñaa yuhduaboa mũhũre. Æ jicu tí mũ ñaa yoaa sehere duhuga —ni yahure Jesu.

Oveja butiriro quitire yahuha Jesu

(Lc 15.3-7)

¹⁰ Æ ni tuhsu, tinare ò sehe ni yahu namore:

—Ne, ahrinacãre macanacãre ñu yabiena tjiga. Musare niita nija yuhũ. Tinacãre ñu wihboina anjoa mũanopũ jiina sehe yu Pũcu cahapu Æ jirucura. ¹¹ [Yuhũ masũno Cohamacũ warocariro ahri yahparu pichacaru wahaborinare yuhdurũchũ yoai tai nii yuhũ] —ni yahure Jesu.

¹² Æ ni tuhsu to tuhotua mehne ò sehe ni quiti dahre buhere sãre:

—Ovejare ñu wihboriro cien ovejare cjuariro cãiro oveja butia wahachũ ò sehe yoarõhca tinare ñu wihboriro sehe. Paina ovejare noventa y nueve ovejare tí churi campopũ duhu dapo, butirirore macano waharõhca. ¹³ Potocã niita nija musare. Tirore bocaro wahcherõhca tiro. Paina noventa y nueve duhsaina mehne wahchera tiro. Tinare to wahcheriro yuhdoro butiriro sehere bocaro tuaro wahcherõhca. ¹⁴ Tõ seheta ñu wihboriro oveja to butichũ cahmaeraro seheta musa Pũcu mũano macariro ahrina wiho jiina cãhũre pichacaru tí wahachũ cahmaerara —ni yahure Jesu.

Mũ coyeyiro mũhũre ñano to yoachũ ò sehe yoa dutiha Jesu

(Lc 17.3)

¹⁵ Æ ni tuhsu ò sehe ni yahu namore:

—Mũ coyeyiro mũhũre ñano to yoachũ tiro mehne suhũdui wahaga. Mũsa sahsero tĩre suhũduga. Mũ Æ yoachũ tiro mũhũre tuhoboca. To tuhochũ “Mũhũre ne pari turi ò sehe yoasi yuhũ”, to nichũ mũ coyeyirore pari turi piti tii nica mũhũ. ¹⁶ Mũhũre to tuho duaerachũ pinihta cãiro mehne waha duacu o pũaro mehne waha duacu tinare piti tí wahcã, pari turi tirore suhũduna wahaga. Mũsa Æ yoachũ musare pũaro o tiarore to tuhoeraputiachũ ñana paina Jesu yainare tirore yahusãga, Cohamacũ yare tí joari pũ to niriro seheta. ¹⁷ Æ jina musa mehne

macaina cūhare to tūho duaerachū jipihtina Jesu yaina cahmachuinare yahusāna wahaga. Ā jina Jesu yaina cahmachuinare to tūho duaerasinichū űana Cohamacūre cahmaerarore mūsa yoaboriro sehe yoaga tirore. Wapa na cohtarirore mūsa yoaboriro sehe yoaga tirore.

¹⁸ Potocā mū sare niita nija. Ahri yahpai mūsa Jesu yaina űaare mūsa yoaga dutierachū mūanopū cūhare yoaga dutisi. Ahri yahpai mūsa noaare yoaga dutichū mūanopū cūhare yoaga dutia jahca.

¹⁹ Pari turi mū sare yahuihtja ahrire: Mūsa pūaro Cohamacūre sinichū, mūsa pūaro mūsa sinirire cūno potori mūsa tūhotuchū yū Pūcu mūano macariro tūre yoarohca. ²⁰ Pūaro o tiaro yū yaina yū yare yoahina cjihti ti cahmachuchū yūhū tina mehne jija —ni yahure Jesu.

Cahamacūno paio to wapamonore to bo duaerari quitire yahuha Jesu

²¹ Baharo Pedro Jesu cahapū sū, ō sehe ni siniture:

—ĶPūhtoro, yū coyeiro mū yairo payū tahari yūhare űano to yoachū űacu nohope tahari tūre boihcari yūhū? ĶSiete tahari boihcari yūhū? —ni siniture Pedro.

²² Jesu ō sehe ni yūhtire:

—Siete tahari dihta mūhare paio to űano yoarire mū bochū tō waharara. Payū tahari mūhare űano to yoachū cūhare boga.

²³ Mūano macariro masa bui pūhtoro to suho jiro ahri qūiti yoaro sehe jira. Jipihtina masa bui pūhtoro jiro tirore dahra cohtainare tirore wapamoinare wapa pahűo duti dutimaha. ²⁴ Ti wapamori cjirire to quihō dūcachū, tirore dahra cohtaina sehe pjiro wapamorirore tiro cahapū na taha. Wapamoriro pjiabiari wapamoha to pūhtoro.

²⁵ Ā jiro tiro to wapa masierachū űano to pūhtoro tirore, to namonore, to pohinare cahamaca sō, tinare painare dua dutimaha. Ā yoaga jipihtia to cūaa cūhare dua duamaha, to wapamonore wapa dutiro. ²⁶ To ā dua dutichū pjiro wapamoriro sehe na tuhcuca caha sū, to pūhtoro turo sinihā: “Pūhtoro, yūhare pja űacu cohtasiniga. Mūhare wapa pahűoihca”, niha tiro to pūhtoro. ²⁷ To ā nichū tūhoro, tirore pja űano to wapamorirore āta bonocaha.

²⁸ To ā yoari baharo pjiro wapamorirore cjiro sehe waha, paio dahra cohtarirore tirore mahanocā wapamorirore boca sūha. Ā boca sūro wamūa űahaha tirore. “Yūhare mū wapamonore wapa bahraűoga”, niha tiro to mehne macarirore to yoaro sehe dahra cohtarirore. ²⁹ To ā nichū paio dahra cohtariro sehe na tuhcuca caha sū, tirore turo sinimaha. “Yūhare pja űacu mahanocā cohtasiniga. Mūhare wapa pahűoihca”, nimaha paio dahra cohtariro tirore. ³⁰ To

ā ni sinipachūta tō mehne macariro tirore yūhtieraha. Tuhsū, tiro paio dahra cohtarirore peresu yoaga dutiha. Pū to wapa pahűochapū wiorohca tirore. ³¹ Pjiro wapamoriro cjiro mahanocā wapamorirore to űano yoachū űu, susini, paina dahra cohtaina sehe ti pūhtoro yahusāa wahaha. ³² Ti ā ni yahusāchū tūhoro ti pūhtoro ti yahusārirore pjiroca, ō sehe niha: “Mūhū űabiaro jira. Mū yūhare tuaro sinichū mū wapamorirore bo pahűomahi yūhū. ³³ Mūhare yū ā yoapachūta mūhū sehe mūhare wapamorirore boerayūhti. Mū wapamoriro sehere yū boriro seheta tiro mūhare to wapamoriro cūhare mū bochū noabiaboa. ĶDohseacu tirore pja űuerari mūhū ā yoacu?” niha to pūhtoro tirore. ³⁴ Ā nino tuaro sū, peresu yoaga tirore dahra cohtarirore. Pū to wapa pahűochapū wiorohca —ni yahure Jesu.

³⁵ Ā ni tuhsū, ō sehe ni ahri quitire yahu batoare:

—Tō seheta yoarohca yū Pūcu mūano macariro mū sare. Mūsa jipihtina mūsa coyea mū sare ti űano yoarire noano mūsa bo pahűoerachū tiro mū sare buhiri dahrerohca —nire Jesu.

19

Ti namosānumiare cohāare yahuha Jesu (Mr 10.1-12; Lc 16.18)

¹ Tūre to ā ni yahuri baharo tiro Galileai jiro Judea yahparū sāre sūho wahare. Jordāo pa buhusehe coapū sūi sā. ² Tōrū sā wahachū payū masa sāre nūnū ti wahcāre. Tina mehne macainare dohatiinare noaina wahachū yoare tiro.

³ Ā yoaga cāina fariseo curua macaina Jesure yahusā dua, űano to durucuchū tūho dua, tirore ō sehe ni sinitu űure:

—ĶMari cahmano seheta mari namore cohāchū noabocari? ĶMari dutia sehe tō seheta yoaga dutijari, mū tūhotuchū? —ni sinitu űure tina.

⁴ Jesu ō sehe ni yūhtire:

—ĶCohamacū yare ti joari pūi ne ahrire buherasiniri masa? Ō sehe ni joaga tiha: “Wahmanopūre ahri yahpare bajuamehneriro mūno, numino cūhare yoaga”, ni joaga. ⁵ Tuhsū ō sehe ni joa namoha: “Mūno to pūcusūmare cohā wija, to namono mehne jirohca. Ā jia tina pūaro jipahta cū pjacū yoaro seheta jira”, ni joa namoa tiha. ⁶ Ā jia tina pūaro yoaro sehe jierara. Cū pjacū yoaro sehe jia nina. Cohamacū to wamomaca dūhte dutiina jira. Ā jia tinare duhueraro cahmana —nire Jesu tinare.

⁷ To ā nichū fariseo curua macaina ō sehe ni siniture tjoa:

—Mu ã ni yahupachuta õ sehe ni joaa tiha Moise cjiro sehe: “Mu namore cohã duacu papera pũi tíre joaga. Æ joacu tí pũre mu namore mu wari baharo ticorore cohã masina muhu”, ni joaa tiha Moise cjiro. ¿Mu nino sehe jipachuta Moise cjiro sehe dohsearo õ sehe ni joari? —ni sinitu namore tina tirore.

⁸Jesu õ sehe ni yuhtire tinare:

—Cohamacure musa ñachusuma ti tuho duaerachu ñano ti namosãnumiare ti cohãchu, “Áta yoawahnojaro”, ninocaa tiha Moise. To ã nipachuta wahmanopare ahri yahpare ã jierare. ⁹Musare niita nija. Masuno to namono to ñano yoaerapachuta ticorore cohãno, pacorore namo tiro, tiro pacoro mehne ñano yoaro nina. [Tuhsu, ahriro to cohãricorore namo tiriro cãhu ticoro mehne ñano yoariro jira] —nire Jesu.

¹⁰To ã nichu tuhona, sã to buheina sehe tirore õ sehe nii:

—Tó sehe muno to namono mehne ti cahma cohãerachu mari sehere mari namo tierachu noaboca —nii sã.

¹¹Jesu õ sehe ni yuhtire:

—Musa nino seheta jira. Æ jiro cãinare namo ti dutierara Cohamacu. ¹²Musare namo ti dutierara cãa jira. Cãina musa numiare cahmaeraina masa bajuara. Paina musa masa ti wapãri tãhoca ti warina sehe namo ti masierara. Paina musa musano macariro ti puhtoro yare yoadoho duaa, namo tierara. Æ jia ahriina namo ti duaeraina ãta tuhotunocaina, tã seheta ti ji sohtori tichu noana —nire Jesu sãre.

Macanacã ya cjihtire Cohamacure sini payoha Jesu

(Mr 10.13-16; Lc 18.15-17)

¹³Æ yoa masa macanacãre Jesu cahapu na wihire. Æ na wihia, tina Jesure to wamomacare tinacã bui ña payo duti duamare. Æ yoa tinacãre Cohamacure sini payo duti duamare Jesure. Ti ã yoachu ñuna sã to buheina tinare tuhtimahi. ¹⁴Sã ã tuhtichu ñano, sãre Jesu õ sehe nire:

—Macanacã ya cahapu tajaro. “To cahai wahaena tjiga”, niena tjiga tinacãre. Tinacã Cohamacure ti puhtoro tuhotura. puhtoro Cohamacu to suho jiina ahriacã yoaro sehe tuhotuina baro dihta jira —nire Jesu sãre.

¹⁵Æ ninota to wamomacare tinacã bui ña payo tuhsu, wahaah wahare.

Pache puro Jesure sinitu ñuha

(Mr 10.17-31; Lc 18.18-30)

¹⁶To ã yoari baharo cãiro masuno Jesu cahapu wihi, siniture tirore:

—¿Ne, buheriro, jipihtia dachoripe Cohamacu mehne ã jirucu duacu, noaare yoa duacu di baro sehere yoabocari yuhu? —nire tiro.

¹⁷—¿Dohse jiro baro yahure noaa barore ni sinitujari muhu? Cohamacu dihta noariro jira. Jipihtia dachoripe Cohamacu mehne ã jirucu duacu to dutiare yoaga —nire Jesu.

¹⁸—¿Di baro dutia sehere nii nijari? —ni sinitu namore tiro.

Jesu õ sehe ni yuhtire:

—Masare wajãecu tjiga. Namu tiriropu paye numia manũ tia numia mehne jiecu tjiga. Yacaecu tjiga. Mahñoa mehne painare yahusãecu tjiga. ¹⁹Mu pãcãsumare ño payoga. Mu basi mu cahino seheta mu cahai jiriro cãhure cahiga. Ahri dutiare yoaihca muhu —nire Jesu.

²⁰—Ahri dutiare ne yuhdũcaera tihũ yuhu. ¿Dohse yoa namoihcari yuhu jipihtia dachoripe Cohamacu mehne jirucu duacu? —nire tiro Jesure.

²¹To ã nichu tuhoro Jesu õ sehe ni yahu namore:

—Mũhu ñaa buhiri marieriro ji duacu mu ya jipihtiare duai wahaga. Æ duacu jipihtia mu wapatarĩ niñerure pjacãoinare waga. Mu ã yoachu payu mu wapataa mũanopũ, Cohamacu cahapu jiyuahca. Mu ã yoari baharo yuhu mehne macariro cjihto taga —ni yahure Jesu.

²²To ã nichu tuhoro tuaro cahyare. Tiro payu pache cãariro jiro, tíre pjacãoinare wa duaeraro, cahya, wahaah wahare.

²³To ã wahari baharo Jesu sãre to buheinare õ sehe ni yahu namore:

—Potocã musare niita nija. Pache puro puhtoro Cohamacu to suho jiropure to waha duachu mijobiara. ²⁴Musare yahu namoihtja: Camello sehe awicã copapu to sãa nuhri wijaa duachu basioerara tirore. To ã jiro yuhdoro pache puro puhtoro Cohamacu to suho jihtoru to waha duachu mijobiara —nire tiro.

²⁵To ã nichu tuhona sã cãaa waha, sã basi õ sehe nii:

—Cue, to nino seheta jichu, ne cãiro masuno Cohamacu cahapu waha masieraboca —nii sã basi.

²⁶Sã ã nichu Jesu sãre ñũroca õ, õ sehe ni yahure:

—Masa ti basi ti mu suro yuhdu masierara. Wiho mejeta Cohamacu sehe masare pichacu wahaborinare yuhdo masina. Tiro jipihtiare noano yoa masi pahñoriro jira —nire tiro sãre.

²⁷To ã nichu Pedro tirore õ sehe nire:

—Tuhosiniga. Sã sehe sã ya jipihtiare cũnocaa tii muhu mehne wahana tana. ¿Sã õ sehe yoana, dohse jiare wapatanahcari sã? —nire tiro.

²⁸To ã nichu tuhoro õ sehe nire Jesu:

—Musare niita nija: Pihitiri dacho jichu jipihtia wahma dihta cohtotaahca. Ti pjapure yuhu masuno Cohamacu waro-cariro yuhu puhtoro ya dujirõ si siterõ

dujiihca yuħu. Tóí yu dujichu masa cħuħu doce dujia pahtarihi pħtoa ti dujia pahtarihi dujinahca. Ā jina Israe masare doce curuari macainare besenahca masa noaina, ĩainare. ²⁹ Ā yoa yu yare yoana tana masa wħusere, masa bahanare, masa pħcħsumare, masa pohnare, masa weserire cħnocarina jina, pjıro wapatanahca. Tuhsu, jıpihtia dachoripe Cohamacu mehne jırucunahca. ³⁰ Wiho mejeta mipure payu pħtoa jirina cjiri tí pjapure wiho jiina tjuanocaahca. Tuhsu, mipure payu wiho jiina jirina cjiri tí pjapure pħtoa cohtotaahca tjoa –ni yahure Jesu säre to buheinare.

20

Se wesere dahraina quitire yahuħa Jesu

¹ Ā yoa Jesu pari turi to tħotua mehne piti dahre õ sehe ni yahu namore tjoa:

–Muano macariro masa bui pħtoro jira. Wese puro quiti mehne pħtoro Cohamacu to sħho jırore yahuihtja musare. Tiro wese puro bohrea parıcaroi to wesere dahrahtinare pjıro wahaha. ² “Cũ tu niħeru tu wapaihtja cħ dachore”, niha tinare. “Jai”, niha dahrahtina. Ti Ā nichu wesepu dahra dutiro warocaha tiro tinare. ³ Ā yoa dachoru nueve hora jichu pache duaroru wahaha tiro. Tõru sũro, paina dahraerainare ĩaha. ⁴ Ā ĩano tinare õ sehe niha: “Masa cħuħu yu wesere dahrana wahaga. Noano wapaihtja”, niha tiro tinare. ⁵ To Ā nichu tħoa, tina cħuħu wesepu dahraa wahaha. Ā yoa wese puro cohari pja jichu, ĩamichahapu tres hora jichu cħhure painare dahra dutiha. ⁶ Ā yoa ĩamichahapu cinco hora jichu pache duaroru tiro wahaha tjoa. Tõru su, paina dahraerainare ĩano, tinare õ sehe niha: “¿Ne yaba barore yoaerapanahta cħ dacho ĩħrucu nahħoajari masa?” ni sinitu ĩaha tinare. ⁷ “Ne, säre dahraa mariahna”, ni yahtia tina. “Masa cħuħu yu wesere dahrana wahaga”, niha tinare. Ā jia to niriro seheta to wesere dahraa wahaha. ⁸ Ā yoa ĩamichahapu dahra duhuri pja jichu wese puro to yaina dahrainare cohtarirore õ sehe niha: “Dahrainare pjıga. Ti wihichu tinare wapaga. Ti baharoru yu dahra dutirinare wapa mahtaga. Tinare wapa tuhsu, paina cħhure wapa tuhsu, yu dahra duti mahtainare wapa batoaga juna”, niha tiro. ⁹ Ā yoa cinco hora jichu dahra ducainare cħ tu niħeru tu wapaha. ¹⁰ To Ā wapachu ĩaha, “Säre bui curero waparohca”, ni tħotumaha to duti mahtaina cjiri sehe. Tina cħhure cħno potori wapanocaha. ¹¹ Ā jia niħerure to wapachu ti pħtoro mehne susinia ti basi õ sehe cahma niha: ¹² “Ahrina sã baharoru to dahra dutirina sehe cħ

horata dahrahe. Sã sehe cħ dacho noano dahra nahħoamahi. ĩano sũ sħre säre. Sã Ā yoiari pja dahrapachuta sã baharoru dahra ducaina cħhure cħno potoriga wapanocahre tiro”, ni suaha tina ti basi. ¹³ Cħiro tina mehne macariro to Ā nichu tħoro, wese puro yahtia tirore: “Ne coyeyro, ‘Cũ tu niħeru ture wapaihtja’, nimahicu musare. Yu Ā nichu yahtihre masa. Ā jicu yu niriro seheta musare wapahi yahu. Quiħono wapahi musare. Ne yacaerahi musare. ¹⁴ Ā jicu yu waparire na, mu wħuħu tjuahga. Ahriroro baharo yu dahra dutiriro cħhure musare yu wapariro purota wapaihtja. ¹⁵ Yu ya niħeru jira aħri. Ā jicu yu cahmano seheta aħri mehne wapaihtja. ¿Painare yu noano wapachu ĩu tuhtijari maħu?” niha tiro wese puro –ni yahure tí quitire Jesu.

¹⁶ Ā nino, õ sehe ni yahu namore tiro:

–Aħri quiti ti nino seheta baharo macari curua wiho jiina yoaro sehe ya curua ji mahtari curua pħtoa ya curua jirohca maanoru. Ā yoa ji mahtari curua pħtoa ya curua cjıro sehe ti baharoru macari curua wiho jiina ya curua tjuarohca maanoru –ni yahure Jesu.

Pari turi Jesu to yariahtore, to masa wıjaahore yahuħa

(Mr 10.32-34; Lc 18.31-34)

¹⁷ Ā yoa Jerusalõpu wahana cħnoihta wħarucuma, säre doce to buheinare pjıroca tuhsu, pa sehery sã dihtare naahre Jesu. Sã saħsero sã jichu säre õ sehe ni yahure:

¹⁸ –Tuhoga yahure. Mıpuru Jerusalõpu wahana niya mari. Tõru yħhure masanore Cohamacu warocarirore ĩaha, painapure yħhure waahca. Sacerdotea pħtoare, mari coyeyro judio masare buheina cħhure yħhure waahca. Ā jia yħhure wajã dutiahca tina. ¹⁹ Ā wajã dutia, judio masa jieraina sehery yħhure waahca. Ti Ā wari baharo tina sehery yħhure bujıpe, tjana, crusapu cħ puhaahca yħhure. Ā jii yu yariari baharo tia numu wahaboroi masa wıjaahca –ni yahure Jesu säre.

Santiago, João mehne ti pocoro tinare sinibasaha Jesure

(Mr 10.35-45)

²⁰ Ā yoa Zebedeo namono puro to pohna mehne Jesu cahapu su, na tuhcu caha sħha tirore sinino taro:

²¹ –¿Dohse yu yoachu cahmajari maħu? – niha Jesu ticorore.

–Mħu pħtoro sãcu yu pohnare dutiina sõga. Ā yoacu mu pja buħuseheri batoi dapoga tinare –ni sinia ticoro.

²² Jesu õ sehe ni yahtia:

–Masa ĩano yħduhtore masierapanahta Ā sinina masa. ¿Mıpuru yu ĩano yħduhtu

seheta musa cãhu ñano yãhduna cãno pjabocari musa? —niha Jesu ticoro pohmare.

—Cãno pjanahca —ni yãhtihã Santiago, João mehne.

²³ —Potocã tjira. Yu ñano yãhdũhto seheta ñano yãhdunahca musa cãhu. Wiho mejeta yũhu mehne dutihtinare, yũhu mehne dujhtinare bese masieraja yũhu. Yu Pũca sehe cahno tuhsure tĩre. Å jia to besehtina dihta yũ potõ buhusehei yũ cõ buhusehei dujiahca —niha Jesu tinare.

²⁴ Å jina sã paina diez to buheina sehe Santiago, João ahrina pũaro mehne susinii sã. Jesure ti pocoro to sinibasariire tuhona susinii tina mehne. ²⁵ Sã ã susinichũ ñũno, Jesu sãre jipihina to buheinare pji cahmachu, õ sehe ni yahure sãre:

—Cohamacure masieraina puhtoa sehe ti masare dutia, purĩno mehne dutira. ²⁶ Musa sehe ne ã yoasi musa basi. Musa mehne macariro puhtoro ji duaro, jipihina tiro mehne macaina cahamacũno jiro cahmana tirore. ²⁷ Å yoa jipihinare dutiriro ji duariro paina cahamacũno jiro cahmana tirore. ²⁸ Tõ seheta jiriro jija yũhu cãhu. Yũhu masũno Cohamacũ warocariro ahri yahparure masare yoadohocũ tacũ tai. Tuhsũ, payũ masa ya buhirire yariai tai nii. Å yoa masare pichacaru wahaborinare yãhdũchũ yoai tai nii —nire Jesu sãre.

Pũaro capari bajuerainare ñũchũ yoaha Jesu

(Mr 10.46-52; Lc 18.35-43)

²⁹ Å yoa Jericõru jirina sã wahachũ payũ masa Jesure nũnũ tĩre. ³⁰ Ti ã nũnũ tichũ Jesu to yãhdũachũ pũaro capari ñũeraina maha dũhtũ cahai dujiina tuhore. Å tãhoa, õ sehe ni sañurucure:

—Sã puhtoro, Davi cjiro panamino masare yãhdõhtiro, sãre pja ñuga —ni sañurucure.

³¹ Ti ã ni sañurucuchũ masa sehe tinare tuhtire:

—Dihta mariahga —nire masa tinare.

Ti ã tuhtichũ tãhoa, ti pano sañurucuriro yãhdõ curero sañurucu namore tjõa:

—Sã puhtoro, Davi cjiro panamino, sãre pja ñuga —ni sañurucure.

³² Ti ã nichũ tuhoro Jesu sũrũca, tinare pjiroca, õ sehe ni sinitu ñũre:

—¿Dohse musare yũ yoachũ cahmajari musa? —ni sinitu ñũre.

³³ —Sã puhtoro, sãre ñũchũ yoaga —ni yãhtire tina.

³⁴ Ti ã nichũ Jesu tinare pja ñũre. Å pja ñũno ti caparire ña payore. To ã ña payochũta tina sehe ñũa wahare. Å ñũa, tirore nũnũ ti wahcãre.

21

Jerusalẽpu suha Jesu

(Mr 11.1-11; Lc 19.28-40; Jn 12.12-19)

¹ Å yoa Jerusalẽpu sã suhto pano Betfagẽ wama tiri macaru su mahtasinii sã Jesu mehne. Betfagẽ tũcu Olivo wama tidũ cahai jire. Tõru sũro, sã mehne macainare pũaro to buheinare Jesu to pano waroca muhtare. ² Õ sehe ni yahure tinare:

—Sĩ macaru burroare nana wahaga. Tõru sũna, dõihã burrore to macũnocã mehne ti dũhte daporicorore boca sũnahca. Tinare boca, yuta dare pjã, na tabasaga yũhure. ³ Musa pjãchũ ñũno, cãiro dohse jiriro, “¿Dohseana tana burroare pjãjari musa?” to nichũ tuhona õ sehe ni yãhtiga: “Mari puhtoro burroare cahmarocasinire. Michapucacã tinare wiarohca tiro”, ni yãhtiga tirore —ni duti warocare Jesu to buheina puarore.

⁴ Å yoare Cohamacũ yare yahu muhtariro cjiro to ni joarigo seheta. Õ seheta ni joaa tiha panoru:

⁵ “Jerusalẽ macainare õ sehe ni yahuga: ñũga musa.

Musa puhtoro musa caharu tara.

Tiro masa noarigo jira.

Burro macũnocã bui pisariro tarohca’, ni yahuga Jerusalẽ macainare”, ni joaa tiha panoru.

⁶ Jesu to dutirocaina pũaro tí macaru su, to dutiriro seheta yoaha tina. ⁷ Burrore, to macũnocã cãhure na ta, ti bui sãa suhtire tjuwe na, burrocã bui pjũpaha payore tina. Ti ã yoari baharo Jesu tirocã bui muja pjare waharo taro. ⁸ Muja pja tuhsũ, tirocã bui Jerusalẽpu wahare. To tachũ ñũa masa payũ ti bui macaa suhtire tjuwe na, saño cũ muhtare to wahãhti mahai, Jesure ño payoa. Paina sehe pũri tia dũpũrĩre mahai duhu cũ muhta wahcãre tirore ño payoa. ⁹ Å yoa to pano wahaina, to baharo nũnũ tiina mehne õ sehe ni sañurucure:

—Davi cjiro panaminore marine yãhdõhtirore wahche payojihna. Ahriro Cohamacũ to warocariro noano jijaro. Mũano macarirore “Tuariro jira”, ni wahche payojihna —ni sañurucure masa.

¹⁰ Å jia Jerusalẽpu ti sũchũ tõ macaina sehe ñũ caaa wahare.

—¿Cue, dirõ barõ jijari ahriro? —ni cahma siniture tina.

¹¹ Paina masa õ sehe ni yãhtire:

—Ahriro Cohamacũ yare yahu muhtariro Nazare Galilea yahpai jiri maca macariro Jesu wama tirore jira —ni yahure tina masare.

Cohamacũ wũhũpu suha Jesu

(Mr 11.15-19; Lc 19.45-48; Jn 2.13-22)

¹² Baharo Cohamacu wuhuru sure Jesu. Ti wuhuru su, sa wahare. Ti wuhuru du-ainare, nuchina cahure cohã wiore tiro. A yoaro niñeru cohtotaa mesarire na majareroa doca cū majare. Bujaare duaina ti dujia pahtari cahure aña yoare. ¹³ A yoaro tinare õ shehe nire:

—Cohamacu yare ti joari pui õ shehe nina: “Yu wuhu Cohamacu mehne durucuri wuhu wama tirohca”, nimare to joari pui. Msa shehe ahri wuhui duana msa basi cahma yacara msa —nire tiro tinare.

¹⁴ To a yoari baharo capari ñeraina, tini masieraina cahu Cohamacu wuhuru tiro cahuru wihire. Ti a wihuru tinare noaina wahachu yoare tiro. ¹⁵ A noare to yoachu ña, sacerdotea puhto, marine judio masare buheina cahu suare tiro mehne. A yo macanacã Jesure “Davi cjiro panamino masare yuhdohtiro, tuariro jira maha”, ti ni ño payochu tuhoa tó cahure tina suare. ¹⁶ A suaa õ shehe nire Jesure:

—¿Ti a nichu tuhoerajari mahu? A niea tjijaro —ni tuhtire tina Jesure.

Ti a tuhtichu tuhoro Jesu tinare õ shehe ni yuhtire:

—Tina ti a nichu tuhoja. ¿Cohamacu yare ti joari pui ahrire ne buherari msa?

“Macanacãre, wihainacãre Cohamacure noano ño payochu yoare mahu”, nina Cohamacu yare ti joari pui —nire Jesu (“Macanacã yuhure ti ño payochu noana”, nino).

¹⁷ A ni tuhsu tinare cohã wahcã, Betania wama tiri macapu su, ti ñamine tói jire.

Jesu higueraçare yaria dutiha
(Mr 11.12-14, 20-26)

¹⁸ Pa dachoi bohrearopu Jerusalëpu tjuaaro, jca baare Jesu. ¹⁹ A jca baaro, maha dahu cahai jidu higueraçu wama tidare ñano, tu dichare macano wahamare. Dicha mariahare tu shehe. Puri dihta jire. Tu a jichu ñano Jesu tare õ shehe nire:

—Ahdu ne pari turi dicha tisi —nire tiro.

To a nichuta doihita tu shehe ñaia wahare. ²⁰ Tu a wahachu ñana sa to buheina ñi ca wahai.

—Cue, ¿dohsearo ahdu doihita ñaia waha-jari? —ni sinitui sa.

²¹ Jesu õ shehe ni yuhtire:

—Potocã nii nija msare. Cohamacure noano wacu tuaga. “Potocã a yoarohca tiro”, nina ahdu yu yoariro seheta yo masinahca msa cahu. Tuhsu, ahdu yu yaria dutiriro yuhdoro yo masinahca msa. Ahdu tãcure “Duha na, pjiri mapu cohãdu jijaro”, msa nichu duha cohãdu jirohca. ²² Cohamacure msa wacu tuachu, “Yu siniriro seheta a waharohca”, msa ni

wacuhu msa siniriro seheta a waharohca —nire Jesu sa.

Jesure dutirirore sinituha paina
(Mr 11.27-33; Lc 20.1-8)

²³ A yo Cohamacu wuhuru tju su, buhere tiro. To a buhechu sacerdotea puhto, mari coyea judio masa bucana mehne tiro cahuru wihi, õ shehe ni siniture:

—¿Dohseacu canare a yoari mahu? ¿No mahure tãre a yo dutiri? —ni siniture tina.

²⁴ Ti a nichu Jesu õ shehe ni yuhtire:

—Msa sehene sinitu mahtaitja. Noano yuhure msa quihono yuhtichu msare yahuihtja yuhu cahu. ²⁵ ¿Joã masare to bautisachu diro baro shehe tirore bautisa dutia tiari, msa tuhotuchu? ¿O Cohamacu dutiera tiari? ¿O masa shehe dutia tiari, msa tuhotuchu? —ni siniture Jesu tinare.

To a nichu tina shehe ti basi õ shehe nire:

—¿Dohse ni yuhtinahcari mari? “Cohamacu Joãore dutia tiri jire”, mari nichu, “¿Dohseana Cohamacu Joãore to dutipachata tirore tuho duaerari msa?” niboca Jesu marine. A jina “Cohamacu Joãore dutia tiri jire”, ni yuhti masieraja mari. ²⁶ Ahrina masa shehe “Potocã Joã Cohamacu yare yahu mahtariro jire”, ni tuhotura tina. A ni tuhotua “Joã to bautisachu Cohamacu shehe tirore dutirari jire”, mari nichu tuhoa masa suaboca mari mehne. A jina ti cahure yahu masieraja mari —nire tina ti basi.

²⁷ Ti a niri baharo Jesure õ shehe ni yuhtire tina:

—Joãore bautisa dutirirore sa masieraja —nire tina.

Ti a nichu tuhoro õ shehe nire Jesu:

—Ti pja pinihta yuhu cahu msa sinitu mahtarire yahueraja msare. Yu yoarire dutirirore yahueraja msare —nire tiro tinare.

Puaro puçuro quitire yahuha Jesu

²⁸ To a niri baharo Jesu to tuhotua mehne paye quiti mehne piti dahre buhe namore tinare:

—¿Ne, dohse ni tuhotujari msa ahri quitire? Puaro puçuro jiha. Wahmino sehere õ shehe niha to puçuro: “Macu, wesepu dahrai wahaga”, niha. ²⁹ “Wahaeraja”, ni yuhtimaha to macano wahmanore. A niparota baharopure wesepu waha duaro jiha tirore. A jiro wahaha tiro. ³⁰ Tuhsu, ti puçuro to macano dũsariro cahuru su, to wahminore to dutiriro seheta wesepu waha dutimaha. “Jai”, nimaha dũsariro shehe. A niparota wahaeraha tiro. ³¹ ¿Diro shehe to puçuro to dutiriro seheta yoari? —ni siniture Jesu.

—To wahmino shehe yoaha —ni yuhtire tina.

Ti a nichu Jesu õ shehe ni yahure:

—Musare niita nija. Wapa na cohtaina, mña mehne ñano yoarucua numia ti buipm waro mña sehe ñabiaina jira. Æ jia puhtoro Cohamacu to suho jiropure mña suborirore tina sehe musare mñ cõ su muhtaahca. ³² João bautisariro buhero musare “Noano yoaga”, ni yahumare. Æ to yahuchu duhsariro to puçurore to yuhtierariro seheta tirore tuhoerare mña. Æ yoa tirore yuhtierare. Wapa na cohtaina sehe, mña mehne ñano yoarucua numia cãhu tirore tuhore. Ti Æ tuhochu ñure mña. Mña Æ ñupanahta tirore ne tuho duaerare mña. Tuhsu, tuhoerare mña —nire Jesu sacerdotea puhtoare, mari coyea judio masa bucuna cãhare.

Ñaina dahra cohtaina quitire yahuha Jesu (Mr 12.1-12; Lc 20.9-19)

³³ Æ yoa Jesu pari turi to tuhotua mehne õ sehe ni piti dahre tinare buhe namore:

—Ahri quitire tuhoga mña. Yahpa puro jiha. Tiro to ya yahpai se dari cjihtire toaha. Toa tuhsu, sahrinore dapo, sere ti tu mutohiti copare saha, muari wuhacã dahreha.

‘Æ jiro tí wesere painare cã buhusehe coa pahma cãha. Æ pahma cño tí wesere tinare ñu wihbo duti, pa yahpamu wahaha tiro. ³⁴ Æ yoa se ñiri pja jichu wese puro tirore dahra cohtainare wesere ñu wihboina cahamu warocaha. Wese macaa to toaa dichare to ya coa macaa dichare na dutiro warocamaha. ³⁵ To Æ warocachu wesere ñu wihboina sehe tirore dahra cohtainare ñano yoaha. Cãirore tuaro cjã, pairore wajã, pairore tãa mehne docaha. ³⁶ Baharo wese puro pari turi tirore dahra cohtainare to waroca muhtarina bui curero puhtoa jiri curuare warocaha tjoa. To Æ warocachu wesere ñu wihboina tina cãhare mananota yoaha tjoa.

³⁷ Æ yoa to waroca batoariro to macno jiha. “Yu macu sehere ño payoahca”, nino tirore warocamaha. ³⁸ To Æ ni tuhotupachuta wesere ñu wihboina to macno to tachu ñua, õ sehe niha: “Wese puro macno jira ahriro. Tirore wajãjihna mari. Mari Æ wajãchu ahri wese mari ya wese tjuarohca”, nimaha tina ti basi. ³⁹ Æ niata tirore ñaha, wese duhtu cahai na wahcã, wajãha tina tirore.

⁴⁰ ‘¿Ne, wese puro taro dohse yoarohcari tiro wesere ñu wihboinare, mña tuhotuchu? —ni siniture Jesu sacerdotea puhtoare, bucuna cãhare.

⁴¹ To Æ nichu tina õ sehe ni yuhtire:

—Tiro painare wesere ñu wihbohtinare cohtotarohca ji muhtainare ñabiainare wajãno taro. Tirore quihõno dichare tju wahtina sehere ñu wihbo dutirohca —ni yuhtire tina.

⁴² Ti Æ nichuta Jesu yahu namore tinare:

—¿Cohamacu yare ti joari pui ahrire yuhure to ni joari cjihtire ne buherari mña?

“Ahriro Cristo tãca yoaro seheta jira.

Tãcare wuhu dahreina ti cohãno seheta masa tirore cohãhca.

Ti Æ yoapachuta mipure wuhu dahreina wuhure yoaa ti cõ muhtari tãcare ti cño seheta Cohamacu tirore puhto sõre.

Cohamacu sehe ahrire yoare.

To Æ yoachu ñuna, ‘Noa yuhduara’, ni tuhotuja mari”,

ni joaa tiha panopu. ¿Tire ne buherari mña? ⁴³ Musare niita nija yuh. puhtoro Cohamacu to suho jiro mña jihto cjihto jiboa. To puhtoro jirore paina sehere mña jiborirore warohca Cohamacu. Paina masa sehe to dutiro seheta yoahca. ⁴⁴ [Jipihtina tia tãca bui bora pjainare payu dihicã peri yihsorohca tia tãca. Tuhsu, tia tãca sehe masuno bui bora pjaro tahãnocanohca tirore. To pjacu cjirore daa manaricã wahachu yoarohca. (Tõ seheta yuhure cahmaeraina yu buhiri dahrehtina ñano yuhduahca) — nire Jesu sacerdotea puhtoare, mari coyea judio masa bucuna cãhare.]

⁴⁵ Ti quitire to Æ nichu tuhoa, “Sohõ to yahu muhtari quiti wesere ñu wihboina quiti mehne marine nino nica tiro”, ni tuhoture tina. ⁴⁶ Æ ni tuhotua, tirore ñaha duamare. Masa sehe Jesure ño payo “Cohamacu yare yahu muhtariro jira tiro”, nina jia tiha tina. Tiro masia, sacerdotea puhtoa, bucuna mehne masare cuia, Jesure ñahaerare.

22

Pjiri bose numu macaa quitire yahuha Jesu

¹ Æ yoa pari turi to tuhotua mehne paye quiti mehne tinare buhe ducare Jesu:

² —Muanu macariro puhtoro to suho jiro ahri quiti yoaro sehe jira. Cã yahpa macaina bui puhtoro jiha. Æ yoa to macano ya numu bose numu yoaha. To wamomaca duhteri bose numu jiha. ³ Æ yoa puhtoro tirore dahra cohtainare bose numure ñua tahtinare pji dutiro warocamaha. Tina sehe ta duaeraha. ⁴ Æ jiro painare pji dutiro warocamaha tjoa tirore dahra cohtainare. “Yu pjirocainare õ sehe ni yahuga. ‘Mari chuhtire dahre tuhsuhre. Wachuare, wachuacã dihi tiinacã cãhare wajã tuhsuhre. Æ yoa jipihtiro bose numu macaa cjihtire cahno tuhsuhre. Æ jina bose numu macaare chuna taga’, ni yahuga tinare”, ni warocamaha puhtoro tirore dahra cohtainare. ⁵ Dahra cohtaina ti Æ yahuri baharo to pjirocarina cjiri Æ

tuhotunocaha. Bose numure ñua wahaeraha. Cäiro to wesepu wahaahahaha. Pairo to dahraare ñano wahaha. ⁶ Paina sehe tirore dahra cohtainare ñaha, tinare ñano yoa, wajänocaha juna. ⁷ Ti ä yoachü tuhoro, puhtoro sehe sua. Sua, ti ä wajäri buhiri buhiri dahre dutiro to surarare warocaha. Ä jia surara tinare wajä pahño, ti ya macare janocaha. ⁸ Ti ä yoari baharo, puhtoro tirore dahra cohtainare ö sehe niha: “Bose numu macaa cjihtire cahno tuhsamahre. Wiho mejeta yu pjiroca muhtarina cjiri yu bese numure ñuborina jierara. Ñaina jira tina. ⁹ Ä jina macare jia maharipu dohse jiina masa boca suinare bese numure ñuhtinare pjiga”, niha tirore dahra cohtainare. ¹⁰ To ä nichu tirore dahra cohtaina maharipu waha, jipihtinare ti boca suinare, ñaina, noaina cähure yahuha. Ti ä pjiri baharo to cahapu suha tina peri. Noano ti bese numu ti yoari tahtiare masa wahpata yehdua wahaha.

¹¹ Tóí ti dujichu puhtoro sehe cäirore wamomaca duhteri numu macari suhtirore säaerariore ñuha. ¹² “¿Ne coyeiro, dohse yoacu wamomaca duhteri numu macari suhtirore säaerapaita sä tari muhu?” ni sinituha puhtoro. To ä sinituchü masuno sehe yuhtieraha. ¹³ To ä yuhtierachü ñano tirore dahra cohtainare ö sehe niha: “Ahrirore to wamomacarine duhtega. To dahpori cähure duhtega. Duhte tuhsu na wijaa, sopacapu cohäga tirore nahitianopu. Tópu tiro tuaro tií, cahyaro mehne bahca dihorohca”, niha puhtoro —ni yahure Jesu.

¹⁴ To ä niri baharo ö sehe ni batoare tiro: —Ahri quiti jiro seheta Cohamacu payu masa to pjirocarina ti jipachata mahainacä tiro mehne tjuaahca —ni yahu batoare Jesu.

*Puhtoa ya wapare paina sinituha Jesure
(Mr 12.13-17; Lc 20.20-26)*

¹⁵ To ä niri baharo fariseo curua macaina waha, Jesure ti yahusähtore ti basi durucua tina. To ñano yuhtichü tuho duaa nimaha tirore yahusäa taa. ¹⁶ Ä durucua tina mehne macainare, Herode ya curua macaina cähure Jesure sinitu dutia warocaha. Tina sehe Jesu cahapu wihi, tirore mahño cü sinitu ñumare:

—Buheriro, potocä durucuriro mahñoa marieriro mü jichü masija sä. Cohamacu yare quihöno mü yahuchü cähure sä masija. Ä jicu cäiro puhtoro waro to jipachata tiro cähure dórero marieno potota yahura muhu. ¹⁷ Ä jicu säre yahuga. ¿Roma macariro jipihtina bui puhtoro jirirore gobierno macaare marine waparo cahmajari, mü tuhotchü? ¿Mari dutia tirore wapa dutjari? —ni siniture tina Jesure.

¹⁸ Ti ä nichu tuhoro tirore ti yahusä duare masino ö sehe nire:

—Mahñopeina jira masa. ¿Dohseana yu ñano durucuchü tuho duajari masa? ¹⁹ Mipure niñeru türe puhtoare wapahti türe na tahga. Tí türe ñujihna —nire tiro.

To ä nichu tuhoah niñeru türe na tare tina.

²⁰ Ti ä na tachü ö sehe ni siniture tiro tinare:

—¿Diro baro masu wahäjari ahri tare? ¿Diro baro wama wahäjari? —ni siniture.

²¹ —César, masa bui puhtoro masu, to wama cähü wahäna —ni yuhtire tina.

Ti ä nichu tuhoro Jesu ö sehe ni yahure:

—Tí pja pini masa bui puhtoro yare tiro sehete waga. Cohamacu yare Cohamacu sehete waga —nire Jesu.

²² To ä nichu tuhoah, tuho caaa waha, wahaah wahare Herode ya curua macaina.

Saduceo curua macaina Cohamacu to masoare sinituha Jesure

(Mr 12.18-27; Lc 20.27-40)

²³ Ä yoa tí dachoihta cäina saduceo curua macaina Jesu cahapu wihire. Saduceo curua macaina sehe “Cohamacu yariainare masosi”, ni tuhotuina jire. Ä jia ö sehe nire tirore tina:

²⁴ —Buheriro, ö sehe ni buhea tiha Moise cjiro: “Cäiro to wahmino namo tiroro pohna mariaparota to yariachü to bahurore to wahmino namono cjirore nñoano cahmana. Ä yoaro to wahmino munano to pohna tiboro seheta pohna tiro cahmana to bahurore. Ä jia to pohna tiro wahmino munano pohna yoaro sehe jiahca”, ni joaa tiha Moise cjiro —nire tina saduceo curua macaina.

²⁵ Türe ä ni yahu tuhsu ahri quitire yahu namore tina Jesure:

—Cäiro masuno jiha. Seis to bahana jiha. Ti wahmino sehe namo ti, pohna marieriro yariaa wahaha. Tuhsu, pairo to baharo cähü to wahmino namono cjirore nñoaha. ²⁶ To ä nñoari baharo to wahmino yoaro seheta pohna mariaparota yariaa wahaha tjoa. Ä yoa ahriro baharo to wahmino munano yoaro seheta pohna mariaparota yariaa wahaha. Ä dihta wahaha cäiro pohna waro. Ne pohna mariapahta yaria pihtia wahaha tina. ²⁷ Ti namono cjiro cähü ti baharota yariaa wahaha juna. ²⁸ ¿Ne, Cohamacu jipihtinare yariaina cjirire to masochü diro baro namono jibocari ticoro? Tina jipihtina ticorore namo tirina cjiri jiha. ¿Ä yoa diro namono sehe jibocari ticoro pototi? —ni siniture tina.

²⁹ Jesu ö sehe ni yuhtire tinare:

—Cohamacu yare ti joari püre, to masia cähure ne masierara masa. Ä yoa masa tuhutua sehe ne potocä jierara. ³⁰ Yariarina cjiri ti masa mujari baharo tina anjoa yoaro sehe jira. Tina namo marieina, manü

mariea numia jira tóþure. ³¹ Yariarina cjiri ti masa wijaahito sehere masare yahuihtja. ¿Cohamacu masare to niri cjirire ne buherari masa? Ó sehe niha tiro: ³² “Yuhu Abrahã, Isaa, Jacobo ti puhtoro tjija”, nina Cohamacu”, ni joaa tiha panopure. Ti yariari baharo “Ti puhtoro tjija”, ni yahuha Cohamacu. Á niparota yariarina cjiri puhtoro jierara Cohamacu. “Ti puhtoro tjija”, to nia mehne catiina ti jichu masija mari. Tiro catiina puhtoro jira —ni yahure Jesu tinare.

³³ To á ni buhechu tuhoa payu masa tuho caaa wahare.

Cãno noa yuhduro to dutiare yahuha Jesu (Mr 12.28-34)

³⁴ Á yoa saduceo curua macaina Jesure ti yuhti masierachu tuhoa, fariseo curua macaina sehe tiro cahapu cahmachure. ³⁵ Cahmachu, tina mehne macariro marine judio masare buheriro sehe Jesu to ñano nichu tuho duaro mahño cü sinitu ñumare tirore.

³⁶ —¿Buheriro Cohamacu ya dutia noa yuhduro di baro sehe jijari, mu tuhotuchu? —ni siniture tiro.

³⁷ Jesu tirore ó sehe ni yuhtire:

—“Tuaro masa yajeripohna mehne, masa tuaa mehne, noano masa wacüa mehne Cohamacure cahíga”, nina Cohamacu. ³⁸ Ahri dutiata paye dutia yuhdoro noa yuhdura. ³⁹ Ahri dutia baharo paye dutia noa yuhdura: “Mu basi mu cahíno seheta mu cahai jiina cãhure cahíga”, nina Cohamacu. ⁴⁰ Ahri puaro dutiare yoana, jipihitia paye dutiare yoa pahñona nija mari. Cohamacu yare yahu muhtaina cjiri panopu ti joari cãhure yoa pahñona nija mari —ni yahure Jesu.

¿Diro baro coyeyro jijari Cristo? (Mr 12.35-37; Lc 20.41-44)

⁴¹ Á yoa fariseo curua macaina tói cahmachuina ti jichu ⁴² Jesu tinare ó sehe ni siniture:

—“Cristo, Mesia mari ni pisuriro Cohamacu to warocahtiro jira”, nina masa. ¿Diro baro jijari Cristo ñuchano cjiro panopu macariro, masa tuhotuchu? —nire tiro.

—Cristo Davi cjiro panamino jirohca —ni yuhtire tina.

⁴³ Jesu ó sehe ni yahure tinare:

—¿Cristo Davi cjiro panamino to jichu dohsearo Davi sehe puhtoro tiari Cristore? ¿Dohsearo á puhtoro ti dutiri Espiritu Santo tirore? Ó sehe niha Davi cjiro:

⁴⁴ “Cohamacu yu puhtore ó sehe nire:

‘Ói yu poto buhusehei dujiga.

Á jicu muhare ñu tuhtiinare muhare yuhdurucabasaihca yuha’, nire Cohamacu yu puhtore”,

ni joaha Davi cjiro. ⁴⁵ Á ni joarota Davi cjiro puhtoro tiha Cristore. ¿Davi cjiro Cristo ñuchano cjiro jiro dohsearo tiro puhtoro tiari Cristore? (Cristo Davi cjiro puhtoro tjira) —ni yahure Jesu.

⁴⁶ To á ni yahuchu tina tirore ne yuhti masierare. Á jia tó purota sinitu duhunocare tina tirore. Tuhsu tirore cuia pari turi sinitu ñerare tirore juna.

23

Judio masare buheina, fariseo curua macaina cãhu ti ñano yoaare yahuha Jesu (Mr 12.38-40; Lc 11.37-54; 20.45-47)

¹ Á yoa payu masare sã cãhure Jesu ó sehe ni yahure tjoa:

² —Marine judio masare buheina fariseo curua macaina cãhu Cohamacu dutia Moise cjirore to cüri cjirire yahuina jira tina. ³ Ti á yahuina jichu masare ti yahuriro seheta tíre yoa pahñoga masa. Á yoapanahita tinare ñu cüena tjiga masa. Ti buheriro seheta yoerara tina. ⁴ Masare payu dutira tina. Á dutipahta ti dutiro sehe masa ti yoerachu ñua tinare yoadoherara. ⁵ Masa ti ñarocaró dihta noano yoa ñomana tina. Cohamacu yare ti joari püre ti duhu sãa caa pocacãre, buju cürea caa pocacãre ti wuhduca poca bui duhte yohre tina masare ñu dutia. Ti yachuri cãhure duhte yohre. Á yoa ti suhtipu ti duhu yoa bocari bujubia bocari jira. Cohamacu ti ño payorire masa sehere yoa ñoa nimana tina. ⁶ Tuhsu, bese numari jichu puhtoia ti dujiapu duji duara. Judio masa mari buhea wuhusepu cãhure noaa dujia pahitari dihtare jicoara tina. ⁷ Á yoa mahapu ño payoa mehne paina tinare ti noano piti bocasinichu cahmana tina. Tinare “Buheriro”, masa ti ni pisuchu cahmana.

⁸ Paina masare pisua “Buheriro”, niea tjijaro. Masa jipihitina cãno potori jina nina. Á yoa masare buheriro cãirota jija yuhu Cristo. ⁹ Ahri yahpa macainare “Mari pucu”, nina tinare ño payona nica. Ne á niena tjiga. Mũano macariro dihta mari pucu jira. Tiro dihtare ño payoro cahmana marine. ¹⁰ Á yoa masunore “Puhtoro”, niena tjiga. Masa puhtoro yuhu Cristo sehe cãirota jija. ¹¹ Cahamacuno yoaro sehe masare yoadohoriro tiro tjica masa puhtoro jihtiro. ¹² Cãiro puhtoro ji duaro tirore wiho jiriro yoaro sehe jiro cahmana. “Wiho jiriro jija yuhu”, ni tuhoturiro painare yuhduraca duaerariro tiro sehe puhtoro jirohca —ni yahure Jesu.

Judio masare buheina, fariseo curua macaina mehne ti mahñopere yahuha Jesu

¹³ To á niri baharo tinare ó sehe ni yahu namore:

—Musa judio masare buheina, fariseo curua macaina cūhu ñano yuhdñahca. Mahñopeina jira musa. Soro musa buhechu tūhoa musare tūhorina sehe puhtoro Cohamacu to sūho jiropure wahasi. Musa cūhu tōpure wahasi. Ā buhena tōpure waha duainare dūcatana nina musa.

¹⁴ [Musa judio masare buheina, fariseo curua macaina cūhu ñano yuhdñahca. Mahñopeina jira musa. Wapewahya numia ya wūhūserē manocahna musa ti numiare. Tuhsu, yoari pja masa ti ñarocaroi Cohamacure sini ñomana musa masare. Musa ā yoari buhiri paina bui curero Cohamacu pjiro buhiri dahrerohca musare.]

¹⁵ Musa judio masare buheina, fariseo curua macaina cūhu ñano yuhdñahca. Mahñopeina jira musa. Pjiri mapu pahā, yoaro macaa yahparipū wahara musa, musa dutiare yoahitirore macana tana. Musa dutiare yoahitirore boca, tirore buhera. Musa ā yoachu tiro sehe musa yuhdoro pichacapū wahaitiro jirohca.

¹⁶ Musa ñano yuhdñahca. Capari ñueraina ti ñu masieraro seheta masieraina jira musa. Ā jipanahta painare buhemana musa. Ō sehe ni buhemana musa: “Cohamacu wūhu mehne yu nino seheta yoaihtja”, niriro to niriro sehe to yoerapachūta noanohca”, ni buhemana musa. “Cohamacu ya wūhu macaa uru mehne yu nino seheta yoaihtja”, niriro tiro sehere to niriro seheta yoa sohtori tiro cahmana” ni, ti cūhure buhemana musa. ¹⁷ Capari ñueraina ti ñu masieraro seheta masieraina jira musa. Tūho masieraina jira. ¿Di baro sehere ño payoro cahmajari? Urure ño payoeraro cahmana. Cohamacu sehe ti uru to wūhūi jichū noaa jichū yoara tūre. Ā jina to wūhū sehere ño payoro cahmana musare. Ā jia musa buhea sehe tó wahaerara. ¹⁸ Ahri cūhure buhemana musa: “Cohamacu wūhu macari mesa mehne yu nino seheta yoaihtja”, niriro to niriro seheta to yoerachū noanohca”, ni buhemana musa. “Ti mesa bui jia mehne Cohamacure ño payoa ti wari mehne yu nino seheta yoaihtja”, niriro tiro sehere to niriro seheta yoa sohtori tiro cahmana”, ni buhemana musa. ¹⁹ Capari ñueraina ti ñu masieraro seheta masieraina jira musa. ¿Di sehe ti waro jijari, musa tūhotuchū? Cohamacure masuno to ño payoro to wari cjiri ti waro jiera curera. Ti mesa bui Cohamacure to wachu, noaa wahara ti mesa bui jia. Ā jiro ti mesa sehe wiho jiri mesa jierara. Cohamacure ño payoa ti wari bui curero noari mesa jira. ²⁰ Ā jiro “Cohamacu wūhu macari mesa mehne yu nino seheta yoaihtja”, cūiro nino, ti mesa bui macaa to wari mehne tiro ā nino nica. Ā jia musa

buhea sehe tó wahaerara. ²¹ “Cohamacu wūhu mehne yu nino seheta yoaihtja”, cūiro nino, potocāta Cohamacu mehneta ā ninota nica. Cohamacu ti wūhu macariro jira. ²² Ā jiro “Mūano mehne yu nino seheta yoaihtja”, cūiro nino, Cohamacu to jiropu mehneta ā nino nica. Ā jiro Cohamacu mehneta ā nino nica. Tiro sehe tó macariro jira. Ā jia musa buhea sehe tó wahaerara.

²³ Musa judio masare buheina, fariseo curua macaina cūhu ñano yuhdñahca. Mahñopeina jira musa. Moa yoaro sehe jiare chūare coachū yoare cjuana mahanocā wamana musa. Cohamacure ño payona tana sacerdotearē wamana musa. Mahanocā wamana musa. Menta, anis, comina wama tia coachū yoare wamana musa. Ā wapanahatja noare yoerara musa. Tuhsu, masare pja ñuerara musa. Ā yoa Cohamacure wacū tuerara musa. Toaa dichare musa narire mahanocā sacerdotearē musa wachū noa nina. Ā wana ō sehe yoa namoga: Noare yoaga. Ā yoa pja ñuga masare. Tuhsu, Cohamacure wacū tuaga. ²⁴ Capari ñueraina ti capari ñueraro seheta masieraina jira musa. Ō sehe yoara musa: Musa ya dutiare yoa dutina, wiho jia waro dutiare yoara musa. Ā yoapanahata Cohamacu to pototi to dutia warore yoerara musa.

²⁵ Musa judio masare buheina, fariseo curua macaina cūhu ñano yuhdñahca musa. Mahñopeina jira musa. Musa waparire, musa sihnia wahwarire bui musa cosaro seheta noare yoa ñomana musa buicā warohna. Ā yoapanahata Cohamacu yare quihōno yoerara musa. Paina yare maina, musa basi dihta bñjūare na duaina jina, ā dihta tūhotura musa. ²⁶ Capari ñueraina ti ñu masieraro seheta masieraina jira musa fariseo curua macaina. Ñaare musa tūhotuare cohtotaga. Musa ā yoana masa ti ñurocaroi noaina jinahca musa.

²⁷ Musa judio masare buheina, fariseo curua macaina cūhu ñano yuhdñahca. Mahñopeina jira musa. Masa copa, yehsea mehne ti wisōri copa yoaro sehe jira musa. Masa ti copare ti ñuchū noari copa bajura. To ā bajupachūta, puhicha macariro baarirore, to cohārine, ñaare ñuerara tina. ²⁸ Tó seheta musa cūhu masa ti ñurocaroi noaina sehe bajumana musa. Ā noaina sehe bajumana musa jipachūta musa tūhotuapū ñaa, mahñoa ji yuhdūara yariaina yoaro seheta —ni yahure Jesu.

Judio masare buheina, fariseo curua macaina cūhure to buhiri dahretore yahuha Jesu

²⁹ Ā ni tuhsu ō sehe ni namore tinare:

—Musa judio masare buheina, fariseo curua macaina cūhu ñano yuhdunahca. Mahñopeina jira musa. Cohamacu yare yahu muhtaina cjiri panopu macaina ti masa coparire noano cahnomana musa. Tuhsu, noano yoaina cjiri ti masa coparire noano cahnomana musa. ³⁰ Æ yoana õ sehe nirucumana musa: “Panopure sã ñuchusuma cjiri ti yoariro sehe sã sehe yoeraboa. Ti pjapu jünare Cohamacu yare yahu muhtaina cjirire sã wajæeraboa”, nirucumana musa. ³¹ Æ nina musa ñuchusuma cjiri Cohamacu yare yahu muhtainare wajärina cjiri ti jiri cjirire bajuro wana nica. Tinare wajärina cjiri panamana ji turiaina musa jia cūhure bajuro wana nica musa. ³² Musa ñuchusuma cjiri ti yoariro seheta yoa sohtori tiwahnoga.

³³ Agãa ñima tiina yoaro sehe ñabiaina jira musa. Musa ñaa tuhotumari cjirire cohtota duaerana Cohamacu musa ñaa buhirire pichacapu musare to cohãto pano duhti masierara musa. ³⁴ Æ jii musare niita nija. Cohamacu yare yahu muhtainare, paina noano masiinare, paina musare buhehtinare musa cahai warocaihtja. Yu ã warocachu musa sehe cãina tinare wajänahca. Painare crusapu cã puhanahca. Painare musa buhea wuhseru tjananahca. Æ yoana macariperu tinare ñano yoa, muroca nunu tinahca musa. ³⁵ Musa ã yoana jipihtina ñaa marieinare musa wajäri buhiri buhiri tinahca. Noariro Abe cjirire Caï to wajäri buhiri jipihtina musa cūhu buhiri tinahca. Jipihtina to baharo jünare noinare ti wajäri buhiri cūhure buhiri tinahca musa cūhu. Æ yoa Cohamacu wuhu cahai wahiquinare ti wari mesa cahai Zacariare wajäre tina. Tiro sehe Berequias macno jire. Æ jina Zacaria cūhure ti wajäri buhiri buhiri tinahca musa cūhu. ³⁶ Potocã musare yahuita nija. Tina jipihtinare ti wajäri buhiri mipu macaina cūhu musa buhiri tinahca —ni yahure Jesu.

*Jerusalē macainare tuaro cahña Jesu
(Lc 13.34-35)*

³⁷ Æ ni tuhsu õ sehe ni namore:

—Cue, Jerusalē macaina, Cohamacu yare yahu muhtaina cjirire wajärina jira musa. Musa coyea panopu macaina cjiri cūhu äta yoarina cjiri jia. Æ yoa musa cahai to warocaina cjirire tãa mehne doca wajärina jira musa. Caracacoro to pohnare to cãa muu dũpuri mehne to moha coño seheta payu tahari cahirucumahi musare. Musare cahmamahi. Musa sehe yuhure ne cahmaerare. ³⁸ Mipure musa ya maca cohãri maca cjiro jirohca. ³⁹ Potocã musare niita nija. Baharopu taihtja yuhu. Æ yu tachu ñana musa yuhure “Cohamacu tuua mehne

tariro noano tajaro”, ninahca. Yuhure musa tãre nihto pano yu tjua tahto pano pari turi yuhure ñasi musa —nire Jesu tinare.

24

*“Cohamacu wuhu cohãri wuhu jirohca”,
niha Jesu*

(Mr 13.1-2; Lc 21.5-6)

¹ Æ yoa Cohamacu wuhai jiroro Jesu to wijaa wihichu sã to buheina ti wuhure ti wuhu cahai jia wuhuse cūhure ñana:

—Ahri wuhuse jira. Ñuga muhu cāhu —nii sã tirore.

² Jesu õ sehe ni yuhtire:

—Ahri wuhusere mipure ñumana musa. Musare yahuita nija. Ahri wuhusere jipihitia musa ñuri cjiri ahri wuhuse macaa tãa cūhu cohõ pihtia wahaahca. Ne cãria tãca tjuasi —nire tiro sãre.

Pihtiri dacho cjihtore yahuha Jesu

(Mr 13.3-23; Lc 21.7-24; 17.22-24)

³ Baharo Olivo wama tidu tũcũpu su, tũpu dujire Jesu. Tõi to dujichu sã to buheina sã sahsero tiro cahapu su, õ sehe ni sinitu ñahi:

—Yahuga sãre. ¿Dohse jichu ã waharohcari mu niriro sehe waharo? ¿Pihtiri dacho panocãre to jichu cūhure, mu tjua tahto cūhure dohse to waha dũcachu ñunahcari sã? —ni sinitu ñai sã.

⁴ Jesu õ sehe ni yuhtire:

—Noano yoaga musa. Musare paina ti mahñoare tuhoena tjiga. ⁵ Payu masa “Cristo jija yuhu”, ni mahñoina tahca. Ti ã mahñochu tuhoa payu masa Cohamacu yare duhuahca. ⁶ Musa cahacã masa paina ti cahma wajächu tuhonahca musa. Tuhsu, yoaropu cūhure ti cahma wajächu tuhorocanahca musa. Æ tuhopanahta ne tãre pjiro tuhotuena tjiga. Æ waharohca. Ti ã yoachu pihtiri dacho cjihto duhsasininohca mini. ⁷ Ti pjare cã yahpa macaina pa yahpa macaina mehne cahma wajäahca. Æ yoa cãiro puhtoro yaina paio puhtoro yaina mehne cahma wajäahca. Tuhsu, payu masa jũca mehne yariaahca. Æ yoa dohatia payu jiaha. Tuhsu, pjaro yahpa ñuhminohca. ⁸ To ã wahachu ahri yahpa macainare ti ñano yuhdu namohto duhsasinina mini. Ñano yuhdũsiniaha.

⁹ Ti pjare paina musare ñaha, ñano yoa dutia waachu musare paina puhtoapure. Ti ã wachu musare wajäahca. Yu yaina musa jiri buhiri jipihtina musare ñu tuhtiaha. ¹⁰ Ti pjare payu yu yaina jimarina cjiri yuhure cohãhca. Æ jia tina mehne macainare tina ñu tuhtiaha. Æ yoaa tina mehne macaina ti jipachuta tinare ñano yohtinare waahca tina. ¹¹ Ti pjare payu “Cohamacu yare yahu muhtaina jija”, ni mahñoina jiaha. Æ jia payu masa ti mahñoare tuhoahca. ¹² Ti pjare

ñabiaro yoaahca masa. Á yoa tina mehne macainare cahí namosi. ¹³ Á jina m̄sa tuaina jina, ahri yahpai m̄sa catisinino puro c̄no pjarucuna, yuhd̄nahca m̄sa. ¹⁴ Tuhs̄u, ahri noaa buhea jipih̄tirop̄u ahri yahpare ti yahua buhea jiahca. P̄h̄t̄oro Cohamac̄u to s̄ho jiare yahuri buheare ti yahu siteri jiahca, jipih̄tina tí buheare ti masihto sehe. Tí ā yahuri baharo pih̄tiri dacho d̄carohca.

¹⁵ 'Cohamac̄u yare yahu m̄htariro Daniel cjiro panop̄u macariro ñabiarore Cohamac̄u yare ñano yoarore yahua tiha panop̄ure. Tí pjare tiro ñariro sehe Cohamac̄u w̄h̄ap̄u to ducuch̄u ñnahca m̄sa. Ahri yu nirire noano masiga m̄sa. ¹⁶ Tóí to ducuch̄u ñna, Judea yahpap̄u jina sehe t̄yuc̄u cah̄p̄u m̄roca duhtijaro. ¹⁷ Soaro mehne m̄roca duhtijaro. Tí pjare ti w̄h̄useri bui macaa waparip̄u jina w̄h̄u puhichap̄u jiare ti yare na wahaea t̄jijaro ti waha bahrañhohto sehe. ¹⁸ Tuhs̄u, tí pjare paina ti weserip̄u jina ti bui macaa suhti w̄h̄ap̄u jia suhtire na wahaea t̄jijaro ti waha bahrañhohto sehe. ¹⁹ Tí pjare nijipocosanumia, ti poh̄nare p̄a numia c̄h̄u p̄jac̄oro wahaahca. ²⁰ Á jina Cohamac̄ure ð sehe ni siniga: "Puh̄iro jich̄u judio masa s̄a soa num̄ari jich̄u c̄h̄ure s̄a m̄roca duhtihti dacho jiero t̄jijaro", ni siniga m̄sa Cohamac̄ure. ²¹ Tí dachorire masa nu ñano wahaahca. Ahri yahpare to bajuamehneri baharo masa ñano ti yuhd̄ua jisina tiha. Tí ā jipachuta jipih̄tia tí pur̄ia yuhdoro pih̄tiri dacho panoc̄a ñabiaro yuhduahca masa. Á ñano ti yuhd̄uri baharo pari turi tó sehe ñabiaro yuhd̄usi ahri yahpai juna. ²² Cohamac̄u tí dachorire mahaa dachoric̄a jisinch̄u yoarohca. To ā yoerach̄u ne c̄airo mas̄no yuhd̄eraboca. Á jiro to beserina ti yuhd̄hti c̄jhitire mahaa dachoric̄a ā c̄usininh̄ca Cohamac̄u.

²³ Tí pjare paina m̄sare "Ñ̄uga. Ōi jira Cristo", ti nich̄u tinare t̄hoena t̄jiga. "Tóí jira Cristo", ti nich̄u tinare t̄hoena t̄jiga. ²⁴ "Cristo jija", ni mah̄ñoina, "Cohamac̄u yare yahu m̄htaina jija", ni mah̄ñoina jiahca tí pjare. Á jia Cohamac̄u to beserinare mah̄ñoa, tina bajuamehneare yoa ñoahca. Tí ā yoa ñoch̄u ñna, Cohamac̄u yaina c̄aina tinare t̄hoena "Potoc̄a t̄jira" n̄ia, Cohamac̄u yare pa tehe n̄ia duh̄boca. ²⁵ Ahri jipih̄tiare m̄sare yahuyuja m̄sare to ā wahahto pano. Á jina t̄hoga m̄sa. ²⁶ Paina masa m̄sare "Ñ̄uga. Masa marienop̄u jira Cristo", ti nich̄u t̄p̄ure ñna wahaena t̄jiga. Á yoa tina "Ōi ahri tahti p̄ocai jira tiro", ti nich̄u tinare t̄hoena t̄jiga. ²⁷ Yuh̄u mas̄no Cohamac̄u warocariro wac̄uenoca tjua taiht̄ja. Oroca sitero m̄anore s̄a m̄aja tarop̄u, s̄a s̄anop̄u wac̄uenoca to oroca siterocar̄o seheta

wac̄uenoca tjua taiht̄ja yuh̄u. ²⁸ Yucaare mari ñna, yariariro to p̄jac̄u cjiro jich̄u mari noano masinahca. (Tó seheta ahri m̄sare yu yahuyurire m̄sa ñna noano masinahca ahri yahpap̄u yu tjua tahto mah̄noc̄a to d̄hsach̄u c̄h̄ure) –ni yahure Jesu.

Cristo ahri yahpap̄u to tjua tahtore yahuha tiro

(Mr 13.24-37; Lc 21.25-33; 17.26-30, 34-36)

²⁹ Á yahu tuhs̄oro tinare ð sehe ni yahu namore:

–Tí dachori masa ti ñano yuhd̄ua dachori baharo s̄a dacho macariro, ñami macariro c̄h̄u buhria duhua wahaahca. Tí ā wahach̄u ñah̄pichoha poca m̄anop̄u jia poca boraahca. Tuhs̄u, m̄ano macaa yahpari tuaro ñuh̄miahca. ³⁰ Tí pjata yuh̄u mas̄no Cohamac̄u warocariro m̄anop̄u yu bajuamehnenore yu ñoch̄u ñnahca masa. Á ñna jipih̄tia curuari macaina tiha. Tuhs̄u, yu tuaa mehne, yu si s̄itea mehne m̄ano macaa me bui ahri yahpare yu tjua tach̄u ñnahca tina. ³¹ Corneta bisiro coa tarohca. To ā coa tach̄u yu yaina anjoare jipih̄tirop̄u ahri yahpap̄u warocaiht̄ja. Tuhs̄u, jipih̄tirop̄u yu yaina yu beserinare tina naahca.

³² M̄ip̄ure higuerac̄ure t̄hotuga m̄sa. T̄u q̄uiti mehne m̄sare p̄iti dah̄re buheih̄t̄ja. T̄u yuc̄u p̄uri tich̄u ñna, c̄h̄ma mah̄anoc̄a to d̄hsach̄u masina m̄sa. ³³ Tó seheta ahri jipih̄tia yu niri c̄jirire ti ā wahach̄u ñna, yu tjua tahto mah̄anoc̄a to d̄hsach̄u masinahca m̄sa. ³⁴ Potoc̄a niita nija m̄sare. Tí p̄ja macaina ti yariahto pano jipih̄tia yu niriro seheta ā waharohca. M̄ano, ahri yahpa c̄h̄u pih̄tia wahaahca. ³⁵ M̄ano c̄h̄u ahri yahpa c̄h̄u pih̄tia wahaahca. Ȳu durucua sehe ne cohtotasi. Jipih̄tia yu niriro seheta ā waha sohtori t̄iarohca.

³⁶ Tí dachore yu tjua tahti dachore, tí ora c̄h̄ure masieraja yuh̄u. Anjoa c̄h̄u t̄ire masierara. Masa c̄h̄u masierara. Ȳu P̄uc̄u dihta t̄ire masina.

³⁷ Noé to jiri p̄ja macaina ti jiriro seheta ahri yahpap̄u yu tjua tahto panoc̄are tó seheta jiahca masa. ³⁸ Yahpa to min̄ihto pano masa ch̄u, sihni, yoaha. Tuhs̄u, m̄sa, numiare namo tiha. Noé c̄h̄u ti dohoriap̄u ti samuhto pano ā yoa timaha masa. ³⁹ Dóih̄ta tuaro coro ta, wac̄uenoca yahpa minia wahaha. Masa c̄h̄u mini pih̄tia wahaha. Wac̄uenoca to miniriro seheta yuh̄u mas̄no Cohamac̄u warocariro ahri yahpap̄ure wac̄uenoca tjua taiht̄ja. ⁴⁰ Tí pjare wesep̄u p̄aro dah̄rain̄a ti jich̄u c̄airo yuh̄ure cahmarir̄ore naahca. Á yoa yuh̄ure cahmaerar̄iro tóí t̄jarohca. ⁴¹ Tí pjare p̄aro numia c̄anoi ti yore ar̄ea numia jich̄u c̄acoro yuh̄ure cahmaricorore naahca. Á

yoa yuhure cahmaeraricoro tóihita tjuarohca.

⁴² Noano wacū masi cohtaga. Yuhū mūsa pūhtoro, yū tjuā tahti dachore ne masierara mūsa. ⁴³ Ahrire wacūga mūsa. Yacariro to wūhūpū to sāa yacahto panore wūhū pūro masino, tí űamine tiro carīeraboa, yacarirore cohtaro taro. Ā yoa yacarirore to wūhūpū sāa dutieraboa. Yuhū yacariro to wacūenoca to tariro seheta wacūenoca taihtja. ⁴⁴ Ā jina yū yare ā yoarucuna yuhure cohtaga. Yuhū masūno Cohamacū warocariro ahri yahparū tjuā tai wacūenoca taihtja —nire Jesu.

Dahra cohtariro to pūhtoroře űo pay-orirore, űo payoerario cāhure yahuha (Lc 12.41-48)

⁴⁵ Ā yoa Jesu to tūhotua mehne ō sehe ni piti dahre buhe namore tjoa:

—Dahra cohtariro to pūhtoroře űo pay-oriro tūho masiriro jira. To ā jichū űūno paina dahra cohtaina bui cūna tirore to pūhtoro sehe waharo taro. Ā tirore cū tuhsū wahaa wahara pūhtoro. To ā wahachū űūno, chūri pja jichū dahra cohtariro painare chūare witura. ⁴⁶ Baharo pūhtoro to ya wūhūi tju wihira. To tju wihichū űūno dahra cohtariro sehe to pūhtoro to dutiriro seheta yoa pahūoriro jiro, wahcheriro jirohca. ⁴⁷ Potocā mū sare niita niija. To ā noano dahrachū űūno to pūhtoro jipihitia to yare űū wihbohtiro cūnohca tirore. ⁴⁸⁻⁴⁹ Wiho mejeta űariro dahra cohtariro sehe “Yū pūhtoro so bajuerara” nino, paina dahra cohtainare cāpe, pjīro chū, sihni, cahaina mehne caharohca. ⁵⁰ Baharo to pūhtoro wacūenoca tjuā tarohca. Tí dachore ne masierara dahra cohtariro. ⁵¹ Pūhtoro sehe tjuā taro űariro to yoarire tūhoro, tirore tuaro buhiri dahrerohca. Ā buhiri dahrero, masa ti baharo būhūsehei űūno yoa cohtaina ti waharopū cohānohca tirore. Tōpūre tiro tuaro tii, cahyaro mehne bahca dihorohca —ni yahure Jesu.

25

Diez nuhmia quti mehne buheha Jesu

¹ Ā yoa Jesu pari turi to tūhotua mehne ō sehe ni piti dahre buhe namore tjoa:

—Mūano macariro masa bui pūhtoro to suho jia ahri quti yoaro sehe jira: Diez nuhmia jiha. Cū űami tina ti sihāa poca mehne wamomaca dūhtehtirore piti bocaa wahaha. ² Tina mehne macaa numia cinco numia tūho masiera numia jiha. Paye numia sehe cinco numia tūho masia numia jiha. ³ Tūho masiera numia sehe ti sihāa pocare, posa tia pocare naamaha. Paye pocare se posa tia pocare ti pihtichū ti pio-borire naaeraha. ⁴ Tūho masia numia sehe

ti sihāa poca se posa tia pocare naaha. Paye se poca cūhure naaha. ⁵ Ā jia wamomaca dūhtehtiro to bajuerachū ti numiare wūjo purīchū carīa wahaha. ⁶ Ā ti carīni baharo űami dacho macai saűurucuro coa taha: “Tūhoga. Wamomaca dūhtehtiro taro coa tara. Tirore piti bocana taga”, ni saűurucuro coa taha. ⁷ To ā nino coa tachū tūhoā tí numia wahcā, ti sihāa pocare cahnoha. ⁸ Ā yoa tūho masiera numia sehe paye numia tūho masia numiare ō sehe niha: “Sā sihāa poca yatia nina. Ā jina mahanocā mūsa ya sere waga sāre”, ni sinimaha tí numia. ⁹ Tí ā sinipachūta tūho masia numia ō sehe ni yūhtihā: “Sā ya se mari jipihitinare mū saeraboca. Ā jina se cūainare mūsa basi nuhūna wahaga”, ni yūhtihā tūho masia numia sehe. ¹⁰ Tí ā nichū tūhoā, tūho masiera numia sere nuhūna wahaha. Tí ā wahari baharo wamomaca dūhtehtiro wihihā. Ā to wihichū űūna ti yare cahno tuhsūri numia tūho masia numia tirore piti bocaha. Piti boca, to wamomaca dūhtire bōse nūmūpū tiro mehne űūna wahaha. Tuhsū, bōse nūmūre ti yoari wūhūpū paina mehne tí numia ti sāari baharo, sopacare bihanocaha. ¹¹ Baharopū tūho masiera numia sehe wihimaha. “Pūhtoro, sāre pjōohga”, nimaha tí numia. ¹² “Potocā mū sare niita niija. Mū sare masieraja yūhū”, niha tiro tí numiare.

¹³ Ā jina tūho masia numia ti yare ti noano cahno tuhsū ti cohtariro seheta yū tahtore noano cohtaga mūsa cūhū. Yū tjuā tahti dachore tí hora cūhure ne masierara mūsa —ni yahure Jesu.

Niűeru tūri uru tūri qutire yahuha Jesu

¹⁴ Ā ni yahu tuhsū to tūhotua mehne ō sehe ni piti dahre buhe namore tjoa:

—Tí pja yū tjuā tahti pja ahri quti yoaro sehe jirohca. Wūhū pūro jiha. Tiro pa sehēpū tinino waharo taro, tirore dahra cohtainare pjirocaha. Ā yoaro tinare to yare cohta duihā.

¹⁵ Ā cohta dutiro ti wihbo masino puro tinare niűeru turire waha. Cūirore cinco tūri wapa bujua tūri uru turire waha. Pairore pūa tū waha. Pairore cū tū waha. Tinare wa tuhsū, wahaa wahaha. ¹⁶ Ā yoa cinco tūri to wariro dōihita to wahari baharota tí tūri mehne paye barore nuhūna. To nuhūrire painare duaha. To duari wapa diez tūri waro wapataha tiro. Ā jiro diez tūri cūjaha. ¹⁷ Ā yoa pūa tū to wariro dōihita to wahari baharota tí tūri mehne paye barore nuhūna. To nuhūrire painare duaha. To duari wapa pitiitā tūri waro wapataha tiro. Ā jiro pitiitā tūri cūjaha. ¹⁸ Cū tūre to wariro sehe copā saha, tí tūre yaha, tí copapū nūono.

¹⁹ Yoari pja baharo ti puhtoro wihiha. Ā wihiro to niñeru tūri mehne ti ñaha namorire quihōno taro tirore dahra cohtainare pjirocaha. ²⁰ Ā to pirocachu cinco tūri to waro cjiro to puhtoro cahapu su, diez tūri wiaha tirore. “Cinco tūri yuhare ware mahu. Ñujata. Tí tūri mehne paye cinco tūrire ñaha namohi”, niha tirore. ²¹ “Noano yoari jire mahu. Mahu noariro, yu dutiriro seheta yoariro jira. Mahanocā mehne noano yoare mahu. Ā jicu mipure mūhare pjiro mū dahrahtore cūihtja. Ā jicu yuhū mehne wahchega mahu”, niha to puhtoro. ²² Ā yoa pua ture nariro cjiro to puhtoro cahapu su, yahuha tirore: “Pua tū yuhare ware mahu. Ñujata. Tí tūri mehne paye tūri pua tū ñaha namohi”, niha tiro. ²³ “Noano yoari jire mahu. Mahu noariro, yu dutiriro sehe yoariro jira. Mahanocāre noano yoare mahu. Ā jicu mipure pjiro mū dahrahtore cūihtja. Ā jicu yuhū mehne wahchega mahu”, niha to puhtoro. ²⁴ Ā yoa cū ture nariro cjiro to puhtoro cahapu su, yahuha tirore: “Puhtoro, mahu paina sehene tuaro dahra dutiriro jira. Ā tuaro dahra dutiriro jicu toaa maerariro jipaihta ti dichare mahu nana. ²⁵ Mū ā jiriro jichū mūhare cuihi. Ā cuicu copa saha, tí copapu mū niñeru ture nuohi. Ñujata. Ōi jira mū niñeru tū”, niha tiro. ²⁶ To puhtoro to ā nichū tuhoro tirore ō sehe niha: “Mahu ñariro, capa bujariro jira. Yu toaa maerariro jipaihta ti dichare yu nariro jichū masina mahu. ²⁷ Yu ā jiriro jichū ñucu ya ture niñeru wihbori wuhapu wihboboa mahu. Mū ā wihbochu tina tí ture wiaapu paye niñeru wa namoboa tina”, niha puhtoro tirore. ²⁸ Ā nino paina tirore dahra cohtainare dutiha tiro: “Niñeru ture maga tirore. Diez tūrire cjuariro sehene waga. ²⁹ Cjuainare wa namoihtja. Ā jia pjiro cjuahca. Cjuaraina sehene mahanocā ti cjuapachuta tūre maihtja. ³⁰ Ahriro dahra cohtariro yaba cjihti jierara. Nahitianopū ñanopū cohānocahga tirore. Tópu tiro tuaro tii, cahyaro mehne bahca dihorohca”, niha puhtoro –ni yahure Jesu.

Buhiri dahrehtore yahuha Jesu

³¹ Ā yoa Jesu ō sehe ni yahu namore:
–Yuhū masano Cohamacu warocariro jipihitina anjoa mehne puhtoro jicu tacu, yu puhtoro dujiropu yu si sitea mehne dujiihca. ³² Ā yu dujichū, ahri yahpa macaina jipihitina yu चाहि cahmachuahca. Tí ā cahmachuri baharo pua curua tinare tju waihtja. Ovejare ñū wihboriro to ovejare, to cabra cūhare to tju wariro seheta masare tju wa dapoihtja. ³³ Ā tju wacu oveja yoaro sehe jina noainare yu poto bñhusehei bese dapoihtja. Ā yoa cabra yoaro sehe

jinaare ñainare yu cō bñhusehei bese dapoihtja. ³⁴ Yu ā yoari baharo yuhū jipihitina bui puhtoro sehe yu poto bñhusehei yu bese dapoinare ō sehe ni yahuihtja: “Yu Pucu masare noano yoare. Ahri yahpare ba-uamehnenopū musa ya cjihtire puhtoro to sūho jirore cahno basayu tuhsare Cohamacu. Ā jina mipure to cahnoripopare jina taga. ³⁵ Yu jūca baachu musa sehe yuhare chuare ware. Yu ñahma yapiochu yuhare musa sihōre. Musa चाहि yu tinichū yuhare ñū masierapanahca yuhare noano piti bocare musa. ³⁶ Suhti maerariro yu jichū ñuna musa sehe yuhare suhti sāre. Dohatiriro yu jichū musa yuhare ñuna tare. Peresui yu jichū cūhare yuhare ñuna tare musa”, nihtja noainare. ³⁷ Yu ā nichū tuhōa tina yuhare sinituahca: “¿Puhtoro dohse jichū mū jūca baachu mūhare chuare wari sā? ¿Dohse jichū mū ñahma yapiochu mūhare sihōri sā? ³⁸ ¿Dohse jichū mūhare ñū masierapanahca mūhare noano piti bocari sā? ¿Dohse jichū suhti maerariro mū jichū mūhare suhti sāari sā? ³⁹ ¿Dohse jichū mū dohatichū o peresui mū jichū cūhare mūhare ñuna sari sā?” niahca yuhare. ⁴⁰ Tí ā ni sinituchū tuhocu yuhū puhtoro tinare yahuihtja. “Potocā musare niita nija. Ahrina yu yaina mehne macariro wiho jiriro to jipachuta, tirore musa to seheta yoare. Ā jirirore ā yoana, yuhare yoaro seheta yoana nire musa tinare”, ni yahuihtja.

⁴¹ Noainare yu ā ni yahuri baharo yu cō bñhusehei ducuinare yuhū jipihitina bui puhtoro ō sehe ni yahuihtja: “Cohamacu to buhiri dahrehtina jira musa. Yuhū mehne tjuarena tjiga. Pichacapu wahaga musa. Tí pichaca ne yatierara. Watino, to yaina anjoa cūhu tí jihtore tí pichacare yoare Cohamacu. ⁴² Yu jūca baachu musa sehe yuhare chuare waerare. Yu ñahma yapiochu musa yuhare sihōerare. ⁴³ Yuhare masierana musa yuhare piti bocaerare. Ā ñunocaboare. Suhti maerariro yu jipachuta, yuhare suhti sāerare musa. Dohatiriro yu jichū peresui yu jichū cūhare ā ñunocare musa yuhare”, ni yahuihtja tinare ñainare. ⁴⁴ Yu ā nichū tuhōa tina yuhare sinituahca: “¿Puhtoro, mū jūca baachu, mū ñahma yapiochu, sā masierariro mū jichū, suhti maerariro mū jichū, dohatiriro mū jichū, peresupū mū jichū dohse jichū sā sehe mūhare yoadohoerari?” ni sinituahca yuhare. ⁴⁵ Tí ā ni sinituchū yuhū tinare ō sehe ni yahuihtja: “Potocā musare niita nija. Ahrina yu yaina mehne macariro wiho jirirore musa ne yoadohoerana. Ā jirirore musa yoadohoerana, yuhareta ā yoana nire musa”, ni yahuihtja tinare. ⁴⁶ Ā jiro tinare ā buhiri dahrerucurohca Cohamacu. Tí buhiri dahrea ne pihtisi. Ā yoa, noaina sehe jipihitina dachoripe noano

jirucuahca —ni yahure Jesu.

26

Sacerdotea puhto, judio masa bucuna mehne Jesure wajā duaha

(Mr 14.1-2; Lc 22.1-2; Jn 11.45-53)

¹ Tí jipihtiare to buheri baharo Jesu säre to buheinare ò sehe ni yahure:

² —Pua dacho baharo pascua jirohca. Tíre musa masina. Tí pjare yuhu masanore Cohamacu warocarirore ñahaahca. Ñaha tuhsu, yuhure crusapu wajāhca —nire tiro säre.

³ Ā yoa sacerdotea puhto, judio masa bucuna cāhu cahmachuha. Caifa sacerdotea bui puhtoro ya wuhui cahmachuha tina. ⁴ Tói cahmachu, ti mahñoa mehne Jesure ñaha ti wajāhtore cahma sūhūdua niha:

⁵ —Bose nūmu jichu tirore ñahaena tjiijhna, “Masa suari”, nina —niha tina ti basi.

Numino me sitia se mehne Jesure pio payoha

(Mr 14.3-9; Jn 12.1-8)

⁶ Tí pjare Simo camí bucū baariro cjiro ya wuhui jire Jesu. To jiri maca Betania wama tiri maca jire. ⁷ Tí wuhui to churo watoi cācoro numino me sitia na ta, Jesu dapu bui pio payore. Tí me sitia alabastro wama tiriai posa tire. Wapa bujua co jire. ⁸ To ā pio payochu ñuna sã Jesu buheina suahi.

—¿Dohsearo ahricoro ahri me sitia co wapa bujuaere ā yoa sitejari? ⁹ Tí me sitiare duaboa. Ā duaro pjíro wapa naboa. Ā nano tí niñerure pjacoinare waboa ahricoro —ni sã to buheina.

¹⁰ Sã ā ni suachu ñuno, Jesu ò sehe ni yahure säre:

—Ā niena tjiga ticorore. Yuhure noano yoaro nina. ¹¹ Pjacoina sehe musa mehne ā jirucuahca. Ā jina tina sehere musa wa masina. Yuhu sehe ahri yahpare musa mehne ā jirucusi. ¹² Yuhure ti yahto pano yu pjacure cahnoyuro, ticoro yuhure pio payore. ¹³ Potocā musare niita nija. Jipihtiro ahri yahparu noaa buheare ti yahuropu ahricoro mipure to yoarire yahuahca. Tí ā yahuchu tuhoa ticorore masa payu wacūahca —ni yahure Jesu säre.

Juda Iscariote Jesure ñu tuhtiinare to ñohtore yahuha sacerdotea puhtoare

(Mr 14.10-11; Lc 22.3-6)

¹⁴ Tí pjare cāiro sã mehne macariro Juda Iscariote sacerdotea puhto cahapu suha. ¹⁵ Su, tinare ò sehe ni sinituha:

—¿Jesure musare yu ñochu noho puro wapanahcari musa? —ni sinituha tinare.

To ā nichu tina tirore treinta turi plata turire waha. ¹⁶ Tí ā wari baharo Juda sehe Jesure to ñohti ñamine cohtasiniha.

Jesu to buheina mehne to chu batoari nūmu jiha

(Mr 14.12-25; Lc 22.7-23; Jn 13.21-30; 1Co 11.23-26)

¹⁷ Bucuaerari pāore ti chūa nūmuri ducari nūmū sã to buheina sehe ò sehe ni sinitu ñuhi Jesure:

—¿Mari pascua macaa chūhtire noho baroi cahnoyu dutirocaijari mūhu säre? —ni sinitu ñuhi tirore.

¹⁸ Sã ā nichu tiro ò sehe ni yahure säre:

—Jerusalēpu wahaga. Tói jirirore ò sehe ni yahuga: “Marine buheriro to ñano yuhduhti pja mahano cā dūhsatjāyuhti. Pascua jichu mu ya wuhui Jesu säre to buheinare suho chūhto jiyuhti”, ni yahuga tí wahu purore —ni warocare Jesu säre.

¹⁹ To ā ni warocachu säre to dutiriro se-heta yoana, pascua jichu sã chūhtore cahnoyui sã.

²⁰ Ā yoa tí ñamine sã mehne doce to buheina mehne churo nire Jesu. ²¹ Sã churo watoi tiro säre ò sehe ni yahure:

—Potocā musare niita nija. Cāiro musa mehne macariro yuhure ñu tuhtiinare ñonohca yuhure —ni yahure tiro säre.

²² To ā nichu tuhona tuaro cahyana, tirore sinitu ñu ducai sã cāina jipihtina:

—¿Puhtoro, yuhuta jajari mūhure ñohtiro? —ni sinitu.

²³ Sã ā ni sinituchu tiro ò sehe ni yūhtire:

—Yu churi wapai yuhu mehne soha chūrirota jira yuhure ñu tuhtiinare ñohtiro.

²⁴ Panopu yuhure ti joariro sehta yuhu masuno Cohamacu warocariro yariaihca. Ā jiro yuhure ñu tuhtiinare ñoriro ñano yuhdurohca. Tiro sehe to masa bajuerachu noa yuhduaboa. Ñano yuhdueraboa —nire Jesu.

²⁵ To ā nichuta tirore ñohtiro Juda ò sehe ni siniture:

—Buheriro, ¿mūhure ñohtiro tjijari yuhu? —ni siniture tiro.

Jesu ò sehe ni yūhtire:

—Ūju. Mūhuta jira —nire.

²⁶ Ā ni yahu tuhsu sã to buheina mehne churo taro nire. Ā yoa Jesu pāore na, Cohamacure “Noana”, nire. Ā ni tuhsu tīre nuha, säre to buheinare witire.

—Ahrire na, chuga. Ahri yu pjacu jira —nire tiro.

²⁷ Ā ni tuhsu tiro sihniri wahware na, Cohamacure “Noana” ni, säre ware.

—Musa jipihtina ahrire sihniga. ²⁸ Ahri yu di jira. Payu masa ti ñaa yoari buhirire cohācu tacu yariaihca. Ā yariacu yu dire cohāhca. Cohamacu “Musare yuhdoihtja”, to ni cūriro mu sachu yu ā yu yariaro mehne to niriro sohtori tiilhca. ²⁹ Musare niita nija. Yu Pacu puhtoro to suho jiropu muanopu musa mehne wahma co vinore sihniihtja.

Mari ā sihniho pano ahri co vinore sihni namosi yuħu –nire Jesu säre.

³⁰ Ā jina Cohamacure ño payo basana cānore basa tuhsuna tūcu Olivo wama tidupū sui sã.

*Pedro Jesure to cohāhtore yahuha Jesu
(Mr 14.26-31; Lc 22.31-34; Jn 13.36-38)*

³¹ Tōpū sã suchu Jesu sehe säre õ sehe ni yahure:

–Micha ñami yuħure cohã wahcānahca mūsa. Ō sehetā nina Cohamacu to yare ti joari pūi yuħure yahuro: “Ovejare ñu wihboriro yoaro sehe jirirore yuħu Cohamacu cohāihtja. Yu ā cohāchu to yaina oveja yoaro sehe jiina duhti site wahcāa wahaahca”, nina Cohamacu to yare ti joari pūi. ³² Ā yoa Cohamacu yuħure to masori baharo mūsa pano Galileapū wahayuihca yuħu –nire tiro.

³³ To ā nichu tahoro õ sehe nimare Pedro: –Yuħu mehne macaina jipihtina mūhare ti cohã wahcāpachūta yuħu sehe mūhare ne cohāsi –nimare Pedro tirore.

³⁴ Jesu õ sehe ni yuhtire:

–Potocã niita nija mūhare. Micha ñami caraca to duhto pano “Yuħu Jesure masieraja”, niihca mūhu. Tia taha ā niihca mūhu –nire tiro Pedore.

³⁵ To ā nipachūta Pedro õ sehe ni yuhtire: –Mūhu mehne yuħure ti wajã duapachūta “Jesure masieraja”, ne nisi yuħu –ni yuhtimare Pedro.

Ā jina sã cāhu paina to buheina Pedro to niriro sehetā nimai sã Jesure.

*Getsemaní wama tiropū Cohamacure
siniha Jesu*

(Mr 14.32-42; Lc 22.39-46)

³⁶ Ā yoa Getsemaní wama tiropū Jesu sã to buheina mehne waha, tōpū su, säre õ sehe nire:

–Ōi dujiyusiniga. Mūsa õi dujiro wato sohõ cureropū Cohamacure sinii wahai nija –nire tiro säre.

³⁷ Ā ni tuhsu, Pedore, pūaro Zebedeo pohñare tina tiarore pji wahcäre. Pji wahcã tuhsu, tiro tuaro cahya, ñano yajeripohna tiha. ³⁸ Ā cahyaro tó mehne macainare to pji wahcārinare õ sehe niha:

–Tuaro ñano yajeripohna tija yuħu. Yuħure tuaro puriño sehetā tuhōtūi nija michapucacã yu yariaboro sehetā. Sohõ curero wahasinii nija. Ōi tjuasiniga. Ā yoa yu cāno potori catiģa mūsa cāhu –niha tiro tinare.

³⁹ Ā ni tuhsu mahanocã waha namo, yahpai na tuhcuā caha su, Cohamacure õ sehe niha:

–Mai, yu ñano yuhduhtire yoa duaeracu yoai tija. Yu ā nipachūta yu cahmano sehe

yoai tija. Mūhu sehe masina. Mū cahmano sehetā yoaga yuħure –ni siniha tiro Cohamacure.

⁴⁰ Ā ni tuhsu, tiaro to buheina cahapū wihmahno, carīinare boca wihhi tiro. Ā boca wihiro Pedore õ sehe niha:

–¿Cū hora waro yu cāno potori cati masierari mūhu? ⁴¹ Noano yoaga mūsa. Mūsa mū sūro quihōno yoa duamana mūsa. Wiho mejeta mūsa basi tīre bihoerara. Ā jina Cohamacure siniga ñano mūsa yoaerahto sehe –ni yahuha Jesu.

⁴² Ā ni yahu tuhsu, pari turi waha, Cohamacure õ sehe ni siniha:

–Mai, yu ñano yuhduhtire yoa duacu yoaga yuħure. Mū cahmano sehetā yoaga –ni siniha tiro.

⁴³ Ā ni tuhsu, to buheina tiaro buheina cahapū pari turi wihhi tjoa. Ā wihiro carīinaretā boca wihhi tjoa. Wūjo caha yuhduaha tina. ⁴⁴ Ā jiro tinare cūnoca, pari turi waha, Cohamacure siniha. Tó pano to niriro sehetā niha tjoa. ⁴⁵ Ā ni tuhsu to buheina cahapū wihhi, tinare õ sehe niha:

–¿Carī, sosinina nijari mūsa? Tó purota carīģa mūsa –niha tiro.

Ā ni tuhsu, õ sehe ni namoha Jesu:

–Tuħosiniga. Michapucacã yuħu masūnore Cohamacu warocarirore ñainare waahca yuħure. ⁴⁶ Wahcāģa. Basa wahana. Ñūģa. Yuħure ñu tuhtiinare ñohtiro õi tara –niha tiro.

*Jesure ñu tuhtiina tirore peresu yoaha
(Mr 14.43-50; Lc 22.47-53; Jn 18.2-11)*

⁴⁷ To ā nino watoi sã mehne macariro cjiro Juda sehe wihire. Tiro mehne masa payu wihire. Tina sacerdotea puħtoa, judio masa bucūna cāhu ti warocarina jire. Ñosaa pīñine, yucu siri cāhure cjaare. ⁴⁸ Wahmanore Jesure ñu tuhtiinare ñohtiro masare õ sehe ni yahu quihō tuhsaha:

–Yu wahsupu wihmirirota jirohca mūsa ñahahtiro. Tirore yu wihmiri baharo ñahaga tirore –niha Juda tinare.

⁴⁹ To ā ni tuhsari baharo wihiro, Jesu cahapū dói waha bahañore.

–Buheriro, ¿jimajari mūhu? –ni tirore wahsupu wihmire.

⁵⁰ To ā wihmichu Jesu õ sehe nire:

–Coyeiro, ¿michapucacã mū yoa duarere yoaga? –nire tiro.

To ā ni tuhsuchū tina Jesure ñahare.

⁵¹ Ti ā yoachū ñano Jesu mehne macariro to ñosari pīñe tuāwe na, sacerdotea bui puħtoro cahamacūnore to cahmonore date pahñenocare. ⁵² To ā yoachū ñano Jesu tirore õ sehe ni yahure:

–Mū ñosari pīñe wihboga. Painare mū ñosachu ti ñosa cahmachū yariaihca mūhu. ⁵³ Yu Pucure yuħure yu yoadoho dutichū

tiro sehe payu anjoare doce curuarire yu cahai warocabo tiro. ¿Tire masierajari mũhu? ⁵⁴ Ā yoadohoboriro to jipachuta tirore yuhure yoadoho dutisi yũhũ. Yu ā dutierachu Cohamacu yare ti joari pũ to niriro seheta ā waharohca –nire tiro.

⁵⁵ Ā ni tuhsu masare õ sehe ni yahure tiro: –¿Dohse jiro baro masa ñosaa pjĩni mehne, yucu tiri mehne yacarirore ti yoariro seheta masa yuhure ñahana tajari? Dachoripe Cohamacu wũhũru musare yu buhe dujichu, masa yuhure ne ñahaerare. ⁵⁶ Ā jipachuta ahri jipihitia ā waharo cahmana Cohamacu yare yahu muhtaina cjiri ti ni joariro seheta –nire Jesu.

Tirore ti ā ñahachu ñuna sã to buheina tirore cohã muroca wahcã wahai sã.

Judio masa puhtoa Jesure sinituha

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Ā yoa tirore ñaharina cjiri sacerdotea bui puhtoro Caifa wama tiriyo ya wũhũru na suha tirore. Tĩ wũhũihtã marine judio masare buheina, bũcũna cũhu cahmachuha. ⁵⁸ Tõpu Jesure ti naachu Pedro yoarõpu tinare ñu nanu tiha. Ā nanu tiro Caifa ya wũhure dũcatari sahrĩnoe su, tĩ sahrĩno puhichapu sãa wahaha. Sãa su, tĩ wũhure cohtaina surara mehne dujiha. Jesure ti dohse yoachu ñuno taro niha.

⁵⁹ Ā jia sacerdotea puhtoã, mari coyega judio masa bũcũna, paina puhtoã mehne Jesure wajã duti duaa, tiro to quihõno yoaerare ti yahusãhtire wacũ macamaha. ⁶⁰ Wiho mejeta tire bocaeraha. To quihõno yoaerari mariapachuta, payu masa tirore ti cahmano yahusãmacanocaha. Ā jia puaro ti baharo macaina tirore ⁶¹ õ sehe ni yahusãha tjoa:

–Ahriro õ sehe nire: “Cohamacu wũhure cohã masija. Ā cohãcu tia numu wahaboroi tĩ wũhure pari turi yoaihtja”, to nichu tuhohi sã –ni yahusãmacanocaha Jesure.

⁶² Tĩ ā niri baharo sacerdotea bui puhtoro wahcãrucu su, Jesure õ sehe ni sinituha:

–¿Ahrina mũhure ti yahusãpachuta tinare yuhti cahmaerajari mũhu? ¿Mũhure ti yahusãrire dohse ni yuhti cahmajari mũhu? –niha puhtoro.

⁶³ To ā nichu tuhõparota Jesu āta tuhõnucaha. To ā yuhtierachu ñuno sacerdotea bui puhtoro pari turi sinituha tjoa:

–Cohamacu catiriro wama mehne potocã niga mũhu. Mũ ā nierachu tiro mũhure buhiri dahrerohca. Yahuga sãre. ¿Cristo Cohamacu macũnota jijari mũhu? –ni sinituha tjoa.

⁶⁴ To ā nichũpũta Jesu õ sehe ni yuhtiha: –Tirota jija. Musare potocã yahuita nija. Baharo yuhũ masũno Cohamacu warocariro

yu Pucũ jipihitia bui tuariro cahapu to poto buhũseherũ yu dujichu ñunahca masa. Ā yoa muano macaa me bui yu tachũ cũhure ñunahca masa –ni yuhtiha Jesu.

⁶⁵ To ā nichu tuhõro sacerdotea bui puhtoro, to basi to sãari suhtirore tuhũrenocaha painare “Sua yuhũuara”, ni ñu masi dutiro. Ā tuhũrenocahno õ sehe niha:

–Cohamacure pjĩro ñano durucuro nina ahriro. Ā jina to ñano durucure tuhõ tuhsuja mari. Ā jia tó peinata yahusãjaro ahriroro. Oĩhta to ñano durucuchũ tuhõja mari. ⁶⁶ ¿Dohse yoanahcari mari mipũre ahriroro? –ni sinituha tiro paina puhtoare. –To ñari buhiri wajãnocano cahmana tirore –ni yuhtiha tina.

⁶⁷ Tĩ ā niri baharo to wũhũare chahcho puti sihõ mujã, tirore cjãpe, dota mujaha tina. ⁶⁸ Tirore cjãpe tuhsu, õ sehe nipeha tirore:

–¿Diro sehe mũhure cjãjari? Cristo jicu ñuerapaihta yahuga sãre –ni cjãpe dota mujaha tina.

“Tirore masieraja”, niha Pedro Jesure

(Mr 14.66-72; Lc 22.56-62; Jn 18.15-18, 25-27)

⁶⁹ Ā yoa tĩ wũhu cahai jiri wapai noari wapai Pedro sehe dujiha. To ā dujichu ñuno sacerdotea bui puhtoro cahamacono tiro cahapu sũro, õ sehe niha:

–Mũhu cũhu Jesu Galilea macariro mehne jire –niha ticoro.

⁷⁰ To ā nichu tuhõro, Pedro õ sehe niha:

–¿Dohse nimacanocaco nijari mũhu? Mũ nirirore ne masieraja yuhũ –niha Pedro ticorore jipihitia ti tuhõrocaroi.

⁷¹ To ā niri baharo tĩ wapa macari sahrĩno sopaca cahapu wahaha Pedro. Tõi to jichu pacoro cahamacono tirore ñuno, tõi jinare õ sehe niha:

–Jesu Nazare macariro mehne jire ahriro cũhu –niha ticoro Pedroro tjoa.

⁷² To ā nichu tuhõro Pedro õ sehe ni yuhtiha:

–Cohamacu mehne potocã nii nija. Tiro mũ nirirore ne masieraja yuhũ –ni yuhtiha Pedro.

⁷³ Ā yoa mahanocã baharota tõi ducuína Pedro cahapu waha, tirore õ sehe niha tjoa: –Potocã tjira. Jesu yaina mehne macariro jira mũhu cũhu. Tina yoaro seheta durucura mũhu –niha tina Pedroro.

⁷⁴ Tĩ ā nichu Pedro õ sehe ni yuhtiha:

–Potocã Cohamacu mehne nii nija musare. Yuhũ potocã yu nierachu Cohamacu yuhure buhiri dahrejaro. Tirore masa nirirore ne masieraja yuhũ –ni yuhtiha tiro tinare.

To ā nichũta caraca duha. ⁷⁵ To duchu tuhõro Jesu tirore to nirire wacũha. “Caraca to duhto pazo ‘Jesure masieraja’, niilha

mũhu. Tia taha ā niihca mũhu”, Jesu to niri cjiire wacũha Pedro. Ā wacũno, tí sahrĩno sopacare wijaa, tuaro tiha.

27

Pilato cahapu Jesure naaha
(Mr 15.1; Lc 23.1-2; Jn 18.28-32)

¹ Ā yoa bohrearopũ sacerdotea puhtoa, mari judio masa bũcũna cãhu Jesure ti wajã dutihtore cahma sũhũduha. ² Ti ā yoari baharo tirore dũhte, Pilato cahapu naa, tirore waha Pilatore. Pilato sehe tí yahpa macaina puhtoro jire.

Juda Iscariote yariaa wahaha

³ Ā yoa Jesure ti wajã dutichũ ñũno Juda sehe Jesure ñoriro tirore to ñori cjiire tuaro wacũ cahyaha. Ā cahyaro treinta tũri to ñahari niĩeru tũrire wiaro waharo, sacerdotea puhtoa cahapu, bũcũna cahapu sũ, ō sehe niha:

⁴ —Jesu mũsare yũ ñoriro ñaa marieriro to jipachũta tina wajã dutire tirore. Ā jicu mũsare tirore ñocu ñano yoai nihti yũhu —ni yahuha Juda tinare.

To ā ni yahuri baharo tina ō sehe ni yũhtiha:

—Āta yoawahnojaro. Sãre yaba cjihti jierara ti mũ ā nia. Mũhu dihta ā ni tuhotura tũre —ni yũhtiha tina tirore.

⁵ Ti ā ni yũhtiri baharo Cohamacũ ya wũhũi Juda to niĩeru tũrire doca site cũnocaha. Doca site cũnocaha, wahaa wahaha. Waha, yuta dare dũhte yo, to basi wamũai tju suha, puroca yoja sũ, yariaa wahaha jũna.

⁶ Ā jia sacerdotea puhtoa niĩeru tũrire naa, ō sehe niha:

—Ahri niĩerure Cohamacũ wũhu macari caropũ niĩeru wiħbori caropũ mari cũ masieraja. Ahri niĩeru mehneta masũnore wajã dutire. Ā jia mari dutia marine tó sehe jia niĩerure wiħbo dutierara —niha tina ti basi.

⁷ Ti ā niri baharo “Ō sehe yoajihna”, ti ni sũhũduri baharo dihi biatorire yoariro ya yahpare nuchũha. Tí tũri mehne nuchũha. Pa sehe macaina ti wihi ti yariachũ ti yahti yahpa cjihtore tí yahpare nuchũha. ⁸ Ā jia tí yahpare “Di yahpa” wamoare masa. Mĩpũ cãhũre āta wama tira. ⁹ Ahri jipih-tia ā wahari jire Jeremía cjiro panopũ “Ā waharohca”, to ni joariro seheta. Tiro Cohamacũ yare yahu mũhtariro cjiro jiha. Ō sehe ni joaa tiha tiro: “Treinta niĩeru tũrire plata tũrire ‘Tó purota wapanahca tirore sã ñahahtore’, niahca Israe masa. ¹⁰ Ā jia tí tũri mehne dihi biatorire yoariro ya yahpare nuchũahca tina. Ō seheta yũhũre yoa dutire Cohamacũ”, ni joaa tiha Jeremía panopũ.

Pilato Jesure sinituha
(Mr 15.2-5; Lc 23.3-5; Jn 18.33-38)

¹¹ Ā yoa Pilatore ti wari baharo tiro sehe Jesure ō sehe ni sinituha:

—¿Potocãta judio masa ti puhtorota jijari mũhu? —ni sinituha Jesure.

—Mũ nino seheta tiro tjija —ni yũhtiha Jesu.

¹² Ā ni yũhtiparota, sacerdotea puhtoa, bũcũna cãhu ti yahusãchũ yũhtieraha tiro. ¹³ To ā yũhtierachũ ñũno Pilato ō sehe ni sinituha:

—¿Ahri jipihitia mũhũre ti yahusãrire tuhoerajari mũhu? —ni sinituha tiro Jesure.

¹⁴ To ā ni sinitupachuta Jesu ne cã dũsero yũhtieraha. To ā yũhtierachũ ñũno Pilato cũaa wahaha.

Jesure wajã dutiha
(Mr 15.6-20; Lc 23.13-25; Jn 18.38-19.16)

¹⁵ Cũhmaripe pascuaripe masa yairo cjihtore cãiro peresupũ jiriroro Pilato ā wiobasa mũjaa tiha. Masa ti wio dutirirore wiobasa mũjaa tiha. ¹⁶ Tĩ pjare Barrabá wama tĩrore peresupũ jiha. Tĩrore masia tiha payũ masa.

¹⁷ Ā yoa ti ā cahmachuchũ Pilato sehe ō sehe ni sinituha tinare:

—¿Diro sehene mũsare wiobasabocari yũhu? ¿Ō Barrabá sehene o Jesure Cristo ti nĩrĩrore wiobasabocari yũhu? —ni sinituha tiro.

¹⁸ Jesure masa ti cahĩchũ ñũna judio masa mari puhtoa tirore ñũ tuhtiha. Ā ñũ tuhtia tirore waha Pilatore. Ā jiro masa ti cahĩri buhiri judio masa mari puhtoa ti ñũ tuhtirire masino Pilato Jesure wio duamaha.

¹⁹ Ā yoa Pilato masare soro sehe yoinare to beseri pahtai to dujichũ to namono tirore quiti warocaha: “Micha ñamine Jesure cahãco, tuaro ñano yũdũhi. Ā jicu tirore ñaa marierirore ne jiape yoai tjiga mũhu”, ni yahurocaha to namono Pilatore.

²⁰ Ā jia wahmanopure sacerdotea puhtoa, bũcũna cãhu masare ō sehe ni duti tuhsũha. “Barrabá sehene wio duti, Jesu sehene wajã dutiga”, ni dutiha masare. ²¹ Ā yoa Pilato masare ō sehe ni sinituha:

—¿Ahrina pũarore diro sehene mũsare wiobasabocari yũhu? —ni sinituha.

—Barrabá sehene wiobasaga sãre —ni yũhtiha.

²² —¿Ahrĩro Jesu Cristo ti nĩrĩro sehene dohse yoaihcari yũhu mũsa ā ni sañurucuchũ? —ni sinituha tiro.

—Crusapũ cã puha wajãga tirore —ni yũhtiha masa jipihitina.

²³ —¿Yaba barore ñaare yoari ahrĩro mũsa ā nichũ? —ni sinitu namoha tiro. To ā nichũ tuhoa tina tuaro mehne sañurucũha:

—Crusapũ cã puha wajãga tirore —ni sañurucuha masa tirore.

²⁴ Ti ã ni sañurucuchũ tuhorõ, tirore ti tuho duaerachũ ñũno “Masa sua, cahmacheboca” nino, yuhtirota õ sehe yoaha Pilato. Masa ti ñũrocarõ tiro wamo cosaha. ã wamo cosaro õ sehe niha:

—Ahrirore ñaa marierirore wajãri buhiri ya buhiri jierara. Mũsa ya buhiri jira —nino wamo cosaha.

²⁵ To ã nichũ tuhoa jipihitina masa õ sehe niha:

—Ahrirore wajãri buhiri sã, sã pohna cãhũ sã ya buhiri jijaro —niha masa.

²⁶ Ti ã nichũ tuhorõ Pilato Barrabãre peresupũ jirirore wio dutiha masa ti cahmarirore. ã yoa tuhsũ Jesu sehere yuta dari mehne tjana duti, tirore crusapũ wajã dutiro wiaha surarare.

²⁷ To ã wiachũ Pilato ya wũhũpũ to surara Jesure na suha. ã yoaa tina surara jipihitina Jesu cahapũ cahmachuha. ²⁸ ã cahmachua to suhtire tjuwe na, pũthoro ya suhtiro sehe bajuri suhtirore tirore sãaha. ²⁹ ã sãa tuhsũ, pota sorore yoaa tuhsũ, to dapu bui duhu payoha. ã duhu payo tuhsũ, wũjucure potõ buhusehe sehe dahra suhaha. Dahra suha tuhsũ, na tuhca caha sũ, bujũpeha tirore:

—Noano tagã. Judio masa pũthoro noano tagã —ni bujũpeha tirore.

³⁰ ã niata tirore chahcho puti sihõ mũja, ti dahra suhadũ cjirore tirore tuãwe na, to dapure cãha tu mehneta. ³¹ Ti ã bujũperi baharo ti sãari suhtirore tjuwe na, to ya suhti sehere sãaha tjõa. Sãa tuhsũ, crusapũ wajãa taa tirore na wijaaha.

Tina Jesure crusapũ cã puha, wajãha

(Mr 15.21-32; Lc 23.26-43; Jn 19.17-27)

³² Tirore na wahcã, Simo wama tirore Cirene macarirore piti boca, tirore Jesu to wãari crutare wũa wahcã dutire.

³³ Wũa wahcã, Gõlgotã wama tiropũ sure. Gõlgotã nino, “Dapu cohã”, nino nina.

³⁴ Tuhsũ, vinore suẽa co ñimaca macaa co mehne ti morea core Jesure wamare tina. Ti core sihni ñũ, sihniare tiro.

³⁵ ã yoa to suhtire ti tjuwe nari baharo tirore crusapũ cã puhare tina. ã cã puha tuhsũa, to sãa suhti cjirore ti basi cahma witiya taa, “¿Noa yoã jirohcarõ õ?” ni masia taa, docapea potã mehne docape mũjaha tina. [ã yoaa Cohamacũ yare yahu mũhtariro cjiro to ni joariro seheta yoaa nire tina. Õ sehe ni joaa tiha tiro: “Yũ suhtire ti basi naa taa, ¿Noa yoã jirohcarõ õ?” ni, docapea potã mehne docape mũjaha tina”, ni joaa tiha panopũ.]

³⁶ Docape tuhsũ tirore ñũ dujirucure tina.

³⁷ ã yoã Jesure “¿Yaba buhiri mehne yariabocari tiro?” ti ni masihtõ sehe, õ sehe

ni ti joã õri pjĩne crusapũ duhu õha tina. “Ahriro Jesu judio masa bui pũthoro jiriro jira”, ni joã õre tina tí pjĩpũ. ³⁸ Baharo pũaro yaca buccana cãhure Jesu cahai paye crusari pjĩnipũ cã puha dapore tina. Cãiro to potõ buhusehe, paio to cõ buhusehe cã puha dapore tina. ³⁹ Crusari cahai yũhdũ wahcãina Jesure ñũ, ti dapu pocare yure-roca, tirore ñano durucure:

⁴⁰ —¿Cohamacũ wũhũre cohã, tia dacho wahaborõ pari turi tí wũhũre dahrehtiro jijari mũhũ? Cohamacũ macũno jicũ mũ basĩ dujia taga. ã yoã mũ basĩ yoadohoga. ã jii yũhdũ witiĩhca mũhũ —nire masa.

⁴¹ ãta ni bujũpere tirore. Sacerdotea pũthõa cãhũ, marine judio masare buheina cãhũ buccana cãhũ tirore ã ni bujũpere:

⁴² —Tiro painare yũhdõro jiparõta to basi yũhdõ masierara. “Israe masa pũthoro jija”, nimana tiro. ã jina to basi to duji tachũ ñũna tirore wacũ tuanhca. ⁴³ Tiro sehe Cohamacũre wacũ tuamana. Tuhsũ, “Cohamacũ macũno jija”, nimana tiro. To ã jiriro jichũ Cohamacũ sehe tirore yoadohõjaro —ni bujũpere tina.

⁴⁴ Yaca buccana tiro cahai ti cã puharina cjiro cãhũ to seheta tirore bujũpe, ñano ni durucure tina cãhũ.

Jesu yariaa wahaha

(Mr 15.33-41; Lc 23.44-49; Jn 19.28-30)

⁴⁵ ã yoã cohari pja jichũ tia hora warõ jipihitropũ nahitiano jire. ⁴⁶ To nahitia duhuchũ warõ Jesu tuaro sañurucure:

—Elĩ, Elĩ ¿lama sabactari? —nire tiro. ã nino õ sehe nino nire: “Yũ Cohamacũ, yũ Cohamacũ, ¿dohseacu yũhũre cohãri mũhũ?” nino nire.

⁴⁷ To ã nichũ tuhoa cãina tõi ducũina õ sehe nimare:

—Cohamacũ yare yahu mũhtariro Elia cjirore pjirocarõ niboca —nimare tina.

⁴⁸ Ti ã ni tuhsũchũ cãiro tina mehne macariro wihmi nari suhterũ vino suẽa core soha tuhsũ, na mũroca, yucũcũ sohtoai duhte õ, Jesure wihmi dutimare. ⁴⁹ To ã yoachũ ñũa paina wihmi dutirirore õ sehe nimare:

—Depũsinia. Elia wihi, ahrirore to na borochũ ñũsinijihna mari —nimare paina.

⁵⁰ Ti ã niri baharo pari turi sañurucu, Jesu sehe yariaa wahare. ⁵¹ To ã yariachũta Cohamacũ wũhũ macari suhtiro, ti ducatarĩ suhtiro dacho macai bui sehe tuhũna bora ta, tuhũnõroca yoã sua wahaha. Tuhsũ, yahpa cãhũ ñũhmire. To ã ñũhmichũ tãa bujũna potã wahitia wahare. ⁵² ã yoã masa coparigẽ pjõochũ, payũ Cohamacũ yaina cjiro panopũ yariarina cjiro masa wijaaha. ⁵³ Masa wijaã, Jesu sehe to masa wijaari baharo tí coparigẽ cohãnoca, noari macapũ Jerusalẽpũ wahare

tina. Tópu ti wahachu payu masa ñua tihá tinare.

⁵⁴ Á jia yahpa to ñuhmichu ñua, payu paye ti á wahachu ñua surara puhtoro to surara mehne cuaa wahare. Tina Jesure crusapu jirirore cohtaina jire. Cuaa waha, ó sehe nire:

—Potocá tjiri jimana. Ahriro Cohamacu macanota jiri jimana —nire tina.

⁵⁵ Á yoa Galileapu Jesu mehne tari numia cjiri tirore yoadohori numia cjiri yooropu tirore crusapu jirirore ñurocarucua nire.

⁵⁶ Ti numia mehne María Magdalena jire. Pacoro María wama tiricoro cahu jire. Ticoro sehe Santiago, José cahu pocoro jire. Pacoro Zebedeo namono jire.

Jesu pjacure masa copapu cüha José

(Mr 15.42-47; Lc 23.50-56; Jn 19.38-42)

⁵⁷ Á yoa ñamichahapu José Arimatea macariro pache puo tói sua tihá. Tiro Jesu buheriro jire. ⁵⁸ Á yoa Pilato cahapu su, Jesu pjacure siniha. To á sinichu tuhoró Jesu pjacure tirore wa dutiha Pilato. ⁵⁹ To á dutiri baharo José sehe Jesu pjacure na boro, noari suhtiro wete marieni suhtiro mehne to pjacure wahmaha. ⁶⁰ Wahma tuhsu, José to ya masa copapu sió payoha to pjacure. Ti copa ti tácai sahari copa wahma copa jire. Ti copapu yo sáa duhu payo tuhsu, pjiria tácare tju turé wahcáha tia mehne bihoro taro. Biha tuhsu, wahaah wahaha. ⁶¹ Á jia María Magdalena, pacoro María mehne ti copare ñu dujirucuha.

Jesure ti cüri copare surara cohtaha

⁶² Á yoa pa dachoi, Pascua cjihtore ti cah-nori dacho baharo, sabado jichu sacerdotéa puhtoá fariseo curua macaina cahu Pilato cahai cahmachuha. ⁶³ Cahmachu tuhsu ó sehe niha tina Pilatore:

—Puhtoro, tiro mahñoriro Jesu catisinino ó sehe niha tiro: “Tia dacho wahaboroi masa wijaaíhca yuhu”, niha tiro. ⁶⁴ To á niriro jichu to buheina sehe to pjacure yacaboca. Á yacaa masare ó sehe niboca: “Jesu masa wijaaere”, niboca tina. Tiro Jesu sehe masare mahñoño nire. Wiho mejeta to buheina sehe “Tiro masa wijaaere” nia, mahñoína jia-ahca tina. Á jiro Jesu to mahñoriro yuhdoro ti ya mahñoa sehe ñaa yuhduarohca. “Á yacari” nicu, tia dacho waro to masa copare nu surarare cohta dutiga —niha tina Pilatore.

⁶⁵ Pilato ó sehe ni yuhtiha:

—Jai. Yu yaina surara cohtajaro. Á yoa masa cahu masa bihoro puro ti copare noano cohtaga —niha tiro tinare.

⁶⁶ To á nichu tina waha, ti copapu bihari táca mehnerpata ñahachupata wihá ñahaha masa ti sáachu ñu masia taa. Á yoa tuhsu, surarare ti copare cohta dutiha.

28

Jesu masa wijaaha

(Mr 16.1-8; Lc 24.1-12; Jn 20.1-10)

¹ Á yoa judio masa mari sori dacho sabado dacho sehe to yuhduri baharo domingo jichu ñami curero jichu María Magdalena, pacoro María mehne Jesu masa copare ñua wahaha. ² Ti pjare dóihta yahpa tuaro ñuhmi bahrañoa. To á ñuhmichu mari puhtoro to yairo anjo manopu jirore duji ta, masa copare bihari tácare tju turéroca, tia bui dujiha. ³ Tiro anjo orocasitero yoaro sehe noano si siteriro, to suhti yaja pjoa yoaro sehe noano yehsea suhti jia. ⁴ To á bajuachu ti copare cohtaina surara cui yuhduá, teteré, bui warohna yaria yuhduá wahaha. ⁵ Á yoa tuhsu anjo sehe ti numiare ó sehe niha:

—Yuhure cuiena tjiga. Crusapu ti cja puhariro, Jesure masa macachu masija yuhu. ⁶ Wiho mejeta tiro sehe mipure ore mariahna. To niriro seheta tiro masa wijaa wahare. To pjacure ti duhu payoriro cjirore ñua taga. ⁷ Á ñu tuhsu na to buheina cahapu ño duaro waha, ó sehe ni yahuna wahaga: “Jesu masa wijaare. Á jiro masa pano Galileapu tiro wahayurohca. Tópu tirore ñunahca masa”, ni yahuna wahaga masa. Ahri yu nirire wacüga masa —niha anjo ti numiare.

⁸ To á niri baharo ti numia masa copapu jia numia soaro mehne wijaa, tirore cuipahta wahche yuhduá mehne Jesu buheinare yahua waha, marocaha. ⁹ Á waha numiare Jesu piti boca, ó sehe niha:

—¿Noano jimajari masa? —niha tiro.

To á niri baharo, tina sehe tiro cahapu su, to dahporire ñaha, tirore ño payoha.

¹⁰ —Cuiena tjiga masa. Yu buheinare “Galileapu wahaga”, ni yahuna wahaga. Tópu yuhure ñuahca tina —niha Jesu tinare.

Masa copare cohtaina surara ti ñurire yahuha

¹¹ To á niri baharo ti numia ti waharo watoi cáina masa copare cohtaina mehne macaina surara, Jerusalépu sacerdotéa puhtoare yahu pahñoa wahaha. Jesu to masa copapu wijaarire yahu pahñoocaha. ¹² Ti á ni yahuchu sacerdotéa puhtoá, judio masa mari bucana mehne cahmachuha. Cahmachu, sühuduha. Á jia surarare mahño dutia payu niñerure wapaha.

¹³ —Ó sehe niga masa masare: “Ñami sá caríno watoi to buheina sehe masa copapu wihi, to pjacure nanocari jire”, ni yahuga masare. ¹⁴ Masa á ni yahuchu Pilato sehe masa carí yuhduarire tuhorocaboca. To á tuhochu, “Masare tuhtiri”, nina masare yahubasanahca sá tirore —niha tina surarare.

¹⁵ Ti ã niri baharo surara sehe niñerure ñaha, tinare ti mahño dutiriro seheta masare yahua wahaha tina. Æ jia tó sehe Jesu to masa copare wijaarire yahurucura judio masa. Mip_u cãhure ãta ni yahura tina.

Jesu buhe dutiro to cõrinare dutiha

(Mr 16.14-18; Lc 24.36-49; Jn 20.19-23)

¹⁶ Æ yoa sã Jesu buheina once buheina tãc_u Galileai jid_u Jesu to waha dutid_u wahai sã. ¹⁷ Tõp_u s_u, Jesure ñuna, ño payoi tirore. Æ ño payoina jipanahta, sã cãina “Ahriro Cohamac_u mac_uno jieraboca”, ni tãhotumai. ¹⁸ Sã ã ño payoch_u tiro sehe sã cahap_u wihi, õ sehe nire:

—Ahrì yahrap_ure, m_uano cãhure Cohamac_u jipih_utinare dutiriro waro jich_u yoare y_uhure. ¹⁹ To ã yoach_u õ sehe dutija m_usare: Jipih_utiro macainare y_u yare buhena wahaga. Y_u yaina ti wahahto sehe buhena wahaga. Æ yoana y_u P_usc_u to wama mehne, y_u wama mehne, Espiritu Santo to wama mehne tinare bautisaga. ²⁰ Æ jina m_usare y_u dutirire ti yoa pahñ_uohti cijhtire buhega tinare m_usa. Æ yoana ahrire y_u nihtire wacõga: Jipih_utia dachoripe ahri yahpa to jiro puro m_usa mehne ã jirucuihca. M_usa mehne y_u ã jirucuh_uto wacõga m_usa —ni yahure sãre Jesu.

San Marcos

João masare bautisariro buhe dũcaha
(Mt 3.1-12; Lc 3.1-9, 15-17; Jn 1.19-28)

¹ Ahri tjuí Jesucristo Cohamacu macano to yoare noaa buheare yahu dũcaja.

² Cohamacu yare yahu mũhtariro cjiro Isaia to joariro seheta ahri yahua jira. Ô sehe ni joaha tiro:

“Cohamacu to macanore ô sehe niha:

‘Mũ pano mũhare yahuyutirore warocai nija.

³ Ā jiro tiro masa marienopũ waharohca.

Tirore tũhoinare yahuro sañurucurohca: “Mari puhtoro to tahto pano mũa ñaa tũhotuare cohtota, cahno mũhtaga mũa”, ni sañurucurohca, niha Cohamacu”,

ni joaa tiha Isaia cjiro João cjihtore.

⁴ João masare bautisariro masa marienopũ masare buhea tiha:

–“Sã noaina jija”, ni mũa tũhotumari cjirire duhu, mũa ñaa buhirire cahya, Cohamacu sehere cahmaga mũa. Ā jina bautisarina jija. Mũa ā yoachũ ñano Cohamacu mũa ñaa buhirire borohca –ni buhea tiha tiro.

⁵ Ā yoa jipihtina Judea yahpa macari macaina, Jerusalẽ macaina mehne tiro cahapũ ti sachũ ñano João sehe Jordão wama tiri mapũ bautisaha tinare. Tinare to bautisahito pano tina sehe ti ñaa yoarire yahu yũdũha Cohamacu.

⁶ Tiro João sehe camello pjoari suhtirore sãariro wahiquire cahsaroreta tuã dihoriro jiha. Porerore, macaroca macaina miquina mi cãhare chũa tiha. ⁷ Ā yoa ô sehe ni buhea tiha:

–Yũ baharo yũ yũdoro tuariro tarohca. Noa yũdũariro jira tiro. Tiro yoaro sehe jieraja yũhũ sehe. Ā jicu tirore tũhotuca, “Wiho jiriro jija yũhũ”, ni tũhotuja yũhũ. ⁸ Mũsare bautisacu co mehne yoamahi. Tiro sehe yũ yũdoro yorohca. Espiritu Santore mũa mehne jirucuchũ yorohca –ni buhea tiha João.

João Jesure bautisaha
(Mt 3.13-17; Lc 3.21-22)

⁹ Ā yoa ti pjare Jesu Nazarepu Galilea yahpai jiri macapu jiriro Jordão wama tiri mapũ sũha. Tõpu to sachũ João bautisaha tirore. ¹⁰ To ā bautisa tuhsuchũ Jesu diapu ducuriro sũrucũ sũro mũano to parĩ mũaa wahachũ ñaha tiro. To parĩ mũachũta Espiritu Santo buja yoaro sehe Jesu bui duji pja sũha.

¹¹ To ā duji pja sachũ mũanopũ durucuro coa taha:

–Mũhũ yũ macũ yũ cahĩriro jira. Mũhũ mehne tuaro wahcheja –nino coa taha mũanopũ.

Satana ñaare yoa dutimaha Jesure
(Mt 4.1-11; Lc 4.1-13)

¹² Tĩ pjare Jesure masa marienopũ Espiritu Santo naaha. ¹³ Tõpũre sũro cuarenta dachori waro jiha. Watĩno sehe Jesu to ñaare yoachũ ñũ duaro, ñaare yoa dutimaha tirore. Tuhsũ, Jesu wahiquina nũcũ macaina mehne jiha. Tõi to jichũ ñũa anjoa sehe tirore yoadohoa, chũare waha.

Jesu Galilea yahpai buhe dũcaha
(Mt 4.12-17; Lc 4.14-15)

¹⁴ Ā yoa Joãoire peresupũ ti biha dapori baharo Jesu sehe Galilea yahpapu noaa buheare puhtoro Cohamacu to sũho jiare yahuro wahaha. ¹⁵ Ô sehe ni yahua:

–Mipũre ô sehe jira. Puhtoro Cohamacu mũsare to noano sũho jihto mahanocã dũsara. Ā jina “Sã noaina jija”, mũa ni tũhotumari cjirire duhuga. Mũa ñaa buhirire cahya, Cohamacu sehere cahmaga. Ahri noa buheare “Quihõnota jira”, ni tũhoga mũa –ni buhea tiha Jesu tinare.

Jesu pititarore wahi wajãinare “Yũhũ mehne macaina cjihti taga”, niha
(Mt 4.18-22; Lc 5.1-11)

¹⁶ Tĩre yahu tuhsũ, Galilea wama tiri bũcupariro duhtũ cahapũ sito wahcãmahno ñũha Simore, to bahũro Andre mehne. Tina wahi wajãina jiha. Ā jia ti wañyucũre bũcuparioropũ doca ñoa niha. ¹⁷ Ā yoa Jesu tinare ô sehe niha:

–Yũhũ mehne macaina cjihti taga mũa. Yũhũ mehne mũa tachũ mũa wahire ñaha cahmachuina mũa jiro seheta, Cohamacu yaina cjihtire masare pji cahmachuina cjihtire mũsare wahachũ yoahtja. Yũhũ mehne mũa tachũ ā yoahtina cjihtire cũihtja mũsare –niha Jesu tinare.

¹⁸ To ā nichũ tuhoa ti wañyucũre cũnoca, tiro mehne wahaa wahaha.

¹⁹ Ā yoa tina mahanocã yũhũ wahcã, Santiagore, to bahũro João mehne boca sũha tjoa. Tina sehe Zebedeo pohna jiha. Ti yaria dohoriapũ wañyucũre cahnoa niha. ²⁰ Ā yoa tiro to pjirocachũ tina sehe ti pũcũrore, tiro mehne dahra cohtaina mehne dohoriapũ cũnoca, Jesu mehne wahaa wahaha.

Watĩ ti cohtotariro Jesure piti bocaha
(Lc 4.31-37)

²¹ Ā yoa tina Capernau wama tiri macapu sũha. Tõpu sũro Sabado jichũ judio masa sã buherĩ wũhũpũ buhero sãaha tiro. ²² Sã judio masare buheina yoaro sehe jieraha tiro. Noano masi pahũriro ji, noano waro buheha. To ā buhechũ tĩ maca macaina tũho caaa wahaha. ²³ Tĩ pjare cãiro ti wũhũ jiriro

watīa ti cohtotariro jiha. Tóí jiro ō sehe niha Jesure:

²⁴ —Muhū Jesu Nazare macariro cariboi tjiga säre. ¿Dohse yoai tai nijari säre? ¿Muhū säre butichū yoai tai nijari? Cohamacū macūno buhiri tia marieriro mū jichū masija yuhū —ni sañurucūha tiro Jesure.

²⁵ To ā nichū tuhorō Jesu tuhtiha watīare: —Dihta mariaha. Wijaaha tirore —niha Jesu.

²⁶ Ā jia watīa tirore yahpapū doca caha sū tunuchū yoā, to tuaro sañurucuro watoihā wijaaha tirore. ²⁷ Ā jia jipihtina tí wuhūi dujiina nū cūaa yuhdūa wahaha.

—Cue, ¿wahma buhea jijari ahri? Tiro puhtoro yoaro seheta dutira watīare. To dutichū tina watīa sehe yuhdurūcaerara tirore —ni durucūha tí wuhūi dujiina ti basi.

²⁸ Ā jia mahaa dachoricā baharoihta dóihā jipihtina Galilea yahpa macaina tíre to yoarire tuho sahsea wahaha.

Jesu Simo Pedro marechonore noaricoro wahachū yoaha

(Mt 8.14-15; Lc 4.38-39)

²⁹ Ā yoā Jesu cāhū judio masa mari buheri wuhūpū jiina wijaaha. Tí ā wijaari baharo Jesu, Santiago, João, paina tina mehne macaina cūhure Simo to bahuro Andre mehne tí ya wuhūpū suho sāa suha. ³⁰ Tí pjare Simo marechono juaro mehne to dohatichū cama bui to coāchū yahuha Jesure. ³¹ Tí ā yahuchū tuhorō tiro sehe ticoro cahapū sūro, to wamomacare nīaha, ticorore waja wahcō dapoha. To ā waja wahcō dapochūta ticorore juaro surua wahaha. To ā sururi baharo ticorota tinare chūare payoha.

Jesu payū dohatiinare noaina wahachū yoaha

(Mt 8.16-17; Lc 4.40-41)

³² Ā yoā sū sāari baharo nahi borachūpū masa payū dohatiinare, watīa ti cohtotarinare Jesu cahapū na suha. ³³ Ā jia jipihtina tí maca macaina cahmachuracū suha tí wuhūi sopacai. ³⁴ Ā jiro Jesu payū dohatiinare, payū soro jia dohatia cūainare noaina wahachū yoaha. Watīa cūhure, masare sāamarinare payū cohā wioha. Ā jiro watīa Jesure tí masichū nūno Jesu sehe tinare durucu dutieraha.

Jesu buhe tinino wahaha

(Lc 4.42-44)

³⁵ Ā yoā nāmi curerocā wahcā, nahitia curechūta masa marienopū Cohamacure sinino wahaha Jesu. ³⁶ To ā wahari baharo Simo cāhū tirore maca wahaha. ³⁷ Tina tirore boca sū, ō sehe niha:

—Masa jipihtina mūhure maca nihre —niha tina.

³⁸ Tí ā nichū tuhorō ō sehe niha Jesu tinare:

—Tinare buhe tuhsūhi. Pa sehēpū ō cahacā maca macaripū wahajihna mari. Ahri yahpa macainare yahu site pahñoi tahi. Ā jichū yahu paye macari macaina cūhure buheihā —niha Jesu.

³⁹ Ā ni tuhsū, jipihtia Galileai jia macaripū judio masa mari buhea wuhūsepū buhero, watīare masare sāamarinare cohā wioha.

Jesu camī barirore noariro wahachū yoaha

(Mt 8.1-4; Lc 5.12-16)

⁴⁰ Ā yoā paio dohatiriro camī bariro Jesure piti bocaro, na tuhcuā caha sū ō sehe ní sinīha:

—Muhū yuhure noariro wahachū yoā duacu yoaga —niha camī bariro.

⁴¹ To ā nichū tuhorō Jesu tirore pja nūha. Ā jiro to wamomacare siōroca, tirore nā payoha. Ā nā payoro ō sehe niha:

—Tíre yoā duaja. Noariro jiga mūhū —ni yahuha Jesu.

⁴² To ā nichūta dohatiriro to camī bari cjiro yati mūaa wahaha. Noariro wahaha tiro. ⁴³ To ā wahachū nūno Jesu tirore tuaro mehne ō sehe ní yahuha:

⁴⁴ —Painare ahrire yahuecū tjiga. Ā yahuerapaihta mū pjacure sacerdotere nōga. Cohamacū dutia Moise cjirore to cūriro seheta yoaga. Ā yoacu minichahcare waga sacerdotere noariro mū waharire mū nōhti cjihtire —niha Jesu. Ā ni tuhsū “Wahaga”, niha tirore.

⁴⁵ To ā yahu dutierapachūta tiro waha, jipihtia macari macainare Jesu to yoarire yahuha. To ā yahuri baharo Jesu masa payū tí jiropūre waha masieraha. Ā jiro tiro mahainacā tí jiropū jiha. Tórpū to jichū payū macari macaina tiro cahapū suha.

2

Jesu pjacu būharirore ducuchū yoaha

(Mt 9.1-8; Lc 5.17-26)

¹ Mahaa dachori baharo Jesu Capernaupū tjuaa wahaha. Wuhūi to jichū masa tuhoaha.

² Ā jia tóí masa payū cahmachū tí wuhure wahpata wijaa surucaha. Ā jiro Jesu tinare noa buheare yahuha. ³ To ā yahuro wato, pitiaro mūa jipihtiri pjacu būharirore na wihīha. ⁴ Tí masa payū jichū nūa Jesu cahapū sāa masieraha. Ā jia tina wuhūi buipū Jesu bui waroi mahanocā muji pahmare nawe, pjacu būharirore to coāri cahsaro mehne duhu boroha Jesu cahai. “Jesu ahrirore to dohatiare yuhdūchū yoarohca”, ní tuhotuha tina. ⁵ Tí ā ní tuhotuchū masino Jesu sehe dohatirirore ō sehe ní yahuha:

—Macū, mū nāa yoari buhiri tiare cohā tuhsūja —niha Jesu pjacu būharirore.

⁶ To ā nichu tūhoa sā coyea judio masare buheina tópru dujiina ti basi ō sehe ni tūhotumaha: ⁷ “Ahriro ā ni durucuero tji-jaro. Cohamacu űano durucuro nina tiro. Tiro masino mari yoaro sehetā jiri-ro jira tiro cūhu. Ā jiro to űaa yoari buhiri tiare cohā masierara. Cohamacu dihta masa ti űaa yoari buhiri tiare cohā masina”, ni tūhotumaha tina. ⁸ Ti ā ni tūhotuchū űuno Jesu ti tūhotuare masino ō sehe niha:

—¿Dohse yoana mūsa ā ni tūhotujari? ⁹ “Mū űaa yoari buhiri tiare cohā tuhsuja”, yu nichu “Mahñoriro jira”, yūhure nina mūsa masierapanahā. “Wahcārcu, wahaga”, yu nichu to tinichu űana yu niri potocā jia jichu dóihtā masinahca mūsa. ¹⁰ Yūhu masuno Cohamacu warocariro ahri yahparure masa ti űaa yoari buhiri tiare cohā masija yūhu. Ahrire mūsa masihto sehe ō sehetā to wahachū yoaihtja —niha Jesu judio masare buheinare.

Tinare ā ninota pjacu būharirore ō sehe niha:

¹¹ —Mūhure niita nija. Wahcārcaga. Mū coāri cahsarore na wahcāga mū ya wūhūpū —niha Jesu tirore.

¹² To ā nichūta pjacu būhariro cjiro wahcārcu sū to coāri cahsarore na, jipihtina ti űurocaroi wijaa wahaha. To ā yoachū űaa tina jipihtina űu cūa wahaha. “Cohamacu tuariro jira” ni, “Ne, mari ō sehe yoare űera tihī”, niha tina ti basi.

Jesu Levire Mateo ti ni pisurirore “Yūhu mehne macariro cjihto taga”, niha (Mt 9.9-13; Lc 5.27-32)

¹³ Ā yoa pari turi Jesu būcupariro duhtū cahapū wahaha tjoa. Tópru sūro masa payū tiro cahai ti cahmachuchū űuno tiro buheha tinare. ¹⁴ Ā yoa tuhsu tópru jiri-ro wahamahno Levire Alfeo macsnore to dahrari tahtiapū boca saha. Paina mehne puhtoa ya cjihtire wapa na cohtaina jiha Levī cūhu. Tirore boca sūro ō sehe niha:

—Yūhu mehne macariro cjihto taga mūhu —niha Jesu Levire.

To ā nichūta Levī sehe wahcā sūrcu, Jesu mehne wahaa wahaha.

¹⁵ Ā yoa baharo Jesu sehe to buheina mehne Levī ya wūhūpū churo niha. Jesu mehne wahaina sehe payū jiha. Cāina puhtoa ya cjihtire wapa na cohtaina, ā jichū paina masa “űaa dihtare yoara”, ti niina mehne payū mesa cahai duji, tina cūhu tiro mehne cānoi sūho chūa niha. ¹⁶ Tópru ti dujiri baharo paina sā coyea judio masare buheina, fariseo masa ya curua macaina mehne Jesu to chū dujichū űūha tina. Ā űua ō sehe ni sinituha:

—¿Dohsearo űano yoina, puhtoa ya cjihtire wapa na cohtaina mehne chujari Jesu?

—ni sinituha judio masare buheina Jesu buheinare.

¹⁷ Ti ā nichū tūhoro piti dahre buheina mehne ō sehe ni yūhtiha Jesu:

—Dohatieraina duhturure macaerara. Dohatiina dihta duhturure macana. űano yoina dohatiina yoaro sehe jira. Ā jicu űano yoinare yahui tai nihi yūhu. Ti basi “Noaina jija sā”, ni tūhotuinare yahui tai nierahi yūhu —niha tiro tinare.

Chū duhuare Jesure sinituha paina (Mt 9.14-17; Lc 5.33-39)

¹⁸ Ti pjare João buheina, fariseo curua macaina cūhu Cohamacu űo payoa taa, chūera tiha. Ā jia masa Jesure ō sehe ni sinituha:

—João buheina, fariseo buheina cūhu Cohamacu űo payoa taa chūerara. ¿Dohse yoa mū buheina sehe chū duhuerajari? —niha tina Jesure.

¹⁹ Jesu to tūhotua mehne quitī dahre buhero tinare ō sehe ni yūhtiha:

—Ō sehe jira tí: Wamomaca dūhteriro bose nūmū to jichū tiro mehne macaina cahyaro mehne jierara. Tuhsu, chūeraina jierara. Tó sehetā yu buheina cūhu yūhu mehne jia, chū duhu masierara. ²⁰ Yu Pūcu Cohamacu yūhure to naari baharo pinihtare yu buheina mehne jisi yūhu. Ā jia tí pjapūta yu buheina cūhu chū duhuahca —niha Jesu.

²¹ Panopū macaa buhea wahma buhea mehne ti buhe more duachū űuno ō sehe ni namoha Jesu tinare piti dahre buhero:

—Ne, wahma cahsaro suhtiro cahsaro mehne mūnāno suhtirore sere ōno cahmaerara. Mari ā yoachū wahma cahsaro mari cosari baharo mūnāno suhtirore waja cahmachu, pijbiaro tūhūchū yoara. ²² Ā yoa ne se co bisia core wahiquire cahsaro wajuru mehne mūna wajuru mehne posaeraro cahmana. Mari ā yoachū se co bisia pahmoapū mūna wajurure tūhrēnocahna. To tūhūchū se co cūhu, wajuru cūhu cohōa wahara. Ā yoa se co wahma core wahma wajurupū posaro cahmana. Mari ā yoachū se co cohōera, wajuru cūhu cohōerara. (Tó sehetā wahma buhea mūna buhea mehne buhe moreraro cahmana) —ni buheha Jesu tinare.

Sabado jichū Jesu buheina trigo parorire pahaha

(Mt 12.1-8; Lc 6.1-5)

²³ Pa dacho Sabado jichū Jesu cūhu trigo wesepū wahaha. To buheina sehe trigo parorire paha yūhdū wahcāha. ²⁴ Ti ā yoachū űua ō sehe ni tuhtiha fariseo curua macaina Jesure:

—Tuhosiniga säre. ¿Dohse yoa tina Sabado mari sori namu to jipachuta dahrajari? Marine dutiare yuhduhcaaa nina —niha tina Jesure.

²⁵⁻²⁶ Ti ã nichu tuhoro Jesu tinare yuhtiha. “Yu buheina yuhduhcaaa nierara”, nino taro õ sehe niha:

—Davi cjiro tiro mehne macaina mehne juca baaro, Cohamacu wuhuru sãa, Cohamacu ya pãore chuha. Æ churo tiro mehne macaina cãhure ti pãore waha. Ti pãore sacerdotea dihtare chu dutira. Cohamacu dutia ti joari tjuu painare ti pãore chu dutierara. Tí pjare Abiata wama tiroro sacerdotea puhtoro jiha. ¿Davi cãhu tãre ti yoari cjiro Cohamacu yare ti joari tjuu buherari musa? (Ti pãore churo Cohamacure yuhduhcaaro nieraha. Michare ahri yaregire chuha yu buheina cãhu Cohamacure yuhduhcaaa nierara) —niha Jesu tinare.

²⁷ Æ ni tuhsu õ sehe ni namoha:

—Æ yoa Cohamacu Sabado dachore ti sori namu cãno masa ya dacho cjihto cãno nire dahra wahyarinare so dutiro. Tí dachore ño payohtina cjihtire cãno nierare masare Cohamacu. ²⁸ Æ jicu yuhu masano Cohamacu warocaroi ahri dacho Sabado dachore masa ti yoahire yahurirota jicu puhtorota jija —niha Jesu tinare.

3

Wamomaca buhariro quiti jira
(Mt 12.9-14; Lc 6.6-11)

¹ Æ yoa Jesu sã judio masa buheri wuhuru soro sãaha tjoa. Tí wuhui cãuro wamomaca buhariro dujiha. ² Sabado jichu Jesu wamomaca buhariroro to noariro yoachu ñu duaha cãina tí wuhui dujiina. To ã yoachu ñua tirore yahusã duamaha. “Mari sori namui Jesu dahraro nina”, ni yahusã duamaha tina. Æ jia Jesu to sãa tachu ñua, tirore yahusã duaina sehe tiro dihtare ñuroca õha. ³ Tirore ti ã ñuroca õpachuta Jesu sehe wamomaca buhariroro õ sehe niha:

—Wahcã surucaga jipihitina ti ñurocaroi —niha.

⁴ Æ ni tuhsu tí wuhui dujiinare õ sehe ni yahuha:

—¿Sabado jichu noaare yoachu noajari? ¿O ñaare yoachu sehere noajari, musa tuhutuchu? Sabado jichu masunore masochu noa nina. Masunore wajãchu sehere noajari —ni yahuha Jesu tinare.

To ã nipachuta tina yuhtieraha. ⁵ Tí ã yuhtierachu ñuno Jesu tina mehne suaha. Tí tuho duaerachu ñuno Jesu cahyaha.

—Mu wamomacare siõrocaga —niha tiro wamomaca buhariroro.

To ã nichu tuhoro tiro to wamomacare siõrocaga. To ã yoachuta noari wamomaca wahaha. ⁶ To ã noari wamomaca wahachu

ñua, fariseo curua macaina wijaa wahaha. Wijaa, Herode mehne macaina mehne cahmachu, “¿Dohse yoa Jesure wajãnahcari mari?” niha tina ti basi.

Masa payu bucupariro duhtu cahapu jiha

⁷⁻⁸ Æ yoa pari turi Jesu to buheina mehne bucupariro cahapu wahaha tjoa. Tí ã wahachu ñua Galilea macaina masa payu to baharo tuhaha. Æ jia Judea yahpa macaina, Jerusalẽ macaina, Idumea yahpa macaina, Jordão wama tiri ma sie coa macaina, Tiro wama tiri maca macaina, tó cahai jiina, Sidõ wama tiri maca macaina, tó cahai jiina mehne masa payu jipihitina to yoarire tuhoa, tiro cahapu suha. ⁹⁻¹⁰ Tõpu sua, payu masa jiha. Payu dohatiinare noaina to yoachu tuhoa, paina dohatiina cãhu Jesure piha dua, tju bihsarucu suha. Tí ã tju bihsarucu suchu ñuno, Jesu busocare cahnopohobasa dutiha to buheinare. ¹¹ Æ yoa paina watã ti cohtotarina sehe Jesure ñua tiro cahai na tuhcuca caha suha.

—Muhu Cohamacu macuno jira —ni sañurucuha tina tirore.

¹² Tí ã sañurucuha tuhoro tinare Cohamacu macuno to jiare tuaro mehne ni dutieraha Jesu.

Jesu to buheinare doce to waroachtinare bese dapoha

(Mt 10.1-4; Lc 6.12-16)

¹³ Æ yoa Jesu tãcupu muja, to cahmainare pjirocaha. To pjirocachu tuhoa, tiro cahapu muja suha tina. ¹⁴ Tí muja sari baharo doce muare tiro mehne macaina cjihtire, paye macaripare to yare buhe duti to waroachtinare, bese dapoha Jesu. ¹⁵ Æ yoaro dohatiinare ti yuhdohti cjihtire, watãre ti cohã wiohti cjihti cãhure cãha tinare. ¹⁶⁻¹⁹ Ahrinare doce muare Jesu bese dapoha: Simo, Santiago Zebedeo macuno, João to bahuro, Andre, Felipe, Bartolomé, Mateo, Toma, Santiago Alfeo macuno, Tadeo, Simo cananista ya curua macariro cjiro, Juda Iscariote, tina jiha to bese daporina. Jesu Simore Pedro ni wama pisuha. Santiagore, João mehne Boanerges ni wama pisuha. Boanerges “Wupo yoaro sehe jiina tuaro bisiina jira”, nino nina. Juda Iscariote Jesure ñu tuhtiinare ñohtiro jiha. Tinare bese dapo tuhsu, dujiaa, Jesu to buheina mehne wuhuru sãa wahaha.

“Jesu watãno tuaare cjuara”, ni yahusãha masa

(Mt 12.22-32; Lc 11.14-23; 12.10)

²⁰ Æ yoa tói pari turi masa payu cahmachua bihsa niha. Tí ã bihsachu ñuno Jesu chu masieraha. Tuhsu, to buheina cãhu chu masieraha. ²¹ Æ jia paina Jesu coyea tãre tuhoa, tiro cahapu sua, tirore ñahamaha.

—Tiro tũho masierariro waharo nina —nimaha tina.

²² Paina õ sehe niha:

—Beelzebú tirore ã wahachu yoaro nica. Tiro watiare cohãno Beelzebú watiã puhtoro to tuaa mehne tinare cohãna —niha Jerusalêru tarina sã judio masare buheina.

²³ Ti ã nichu tũhoro Jesu sehe tinare pjiroca, to tũhotua quti mehne piti dahre yahuha tinare:

²⁴ —Watiño ya tuaa mehne watiãre cohãi nieraja. Watiã ti basi cohã masierara. Cũ yahpa macaina ti basi cahma wajãa, ti yahpa macaina yaria pihitia wahaboa. ²⁵ Cũ wũhu macaina ti basi cahmachea ti wũhu macaina waha pihitia wahaboa. ²⁶ Tuhsu, Satana watiã puhtoro sehe watiãre cohãno ti basita cahmachea niboa. ã jia tina waha pihitia wahaboa.

²⁷ Õ sehetã jira mari piti dahre buhechu. Tuariro ya wũhuru paio sãa su yaca masierara. Tuariroro dũhteraro to ya wũhuru sãa su yaca masierara. Tuariroro to dũhteri baharo sãa su yaca masina —ni yahuha Jesu. (Õ sehe ni yahuha watiñore to yuhũrucarire yahuro. Watiño tuariro to jipachũta Jesu tirore yuhũrucara watiãre cohãno.)

²⁸ ã ni tuhsu õ sehe ni yahu namoha Jesu:

—Potocã niita nija musare. Jipihitia ñaare masa ti yoachu ti durucuchũ cãhure Cohamacũ bo masina. ²⁹ ã boparota Espiritu Santore ti ñano durucuchũ ti pinine ne bosu. Ti ã niri buhiri ã buhiri tirucuina jahca —niha Jesu tinare.

³⁰ Jesu Espiritu Santo to tuaa mehne watiãre to cohãpachũta “Tiro watiño to tuaa mehne watiãre cohãno nina”, nimaha masa. Ti ã nichu tũhoro ti quitire Espiritu Santo quitire yahuha Jesu tinare.

Jesu coyea tirore pjiha
(Mt 12.46-50; Lc 8.19-21)

³¹ ã yoa Jesu bahana to pocoro mehne wihiha. ã wihia sopacaru jia, painare pji dutiha tirore. ³² ã jia masa tiro caharu dujiina yahuha tirore:

—Mu poco, mu bahana mehne sopacaru pjiã nina mũhare —niha tina.

³³ Ti ã nichu tũhoro õ sehe niha Jesu tinare buhero taro:

—¿Noa jijari yu poco, yu bahana cãhu, musa ñũchu? —niha tiro tinare buhero taro.

³⁴ ã nino to cahai dujiinare ñũno õ sehe niha:

—Ahrina jira yu poco yu bahana yoaro sehe jiina. Cohamacũ cahmaare yoara ahrina. ³⁵ Tõ sehetã yoaina yu bahu, yu baho, yu poco yoaro sehetã jira —ni buheha Jesu tinare.

4

Jesu wesere toari masũno quitire buheha
(Mt 13.1-9; Lc 8.4-8)

¹ ã yoa pari turi bucupariro dũhtũ caharu Jesu masare buhe dũcaha tjoa. ã tũpũre buhe dũcaro masa payũ tiro caharu ti cahmachuchũ ñũno Jesu sehe dohoriarũ samu wijaa, pahsaha. ã jia masa sehe bucupariro dũhtũ cahai ducucha. ² ã jiro Jesu payũ to tũhotua mehne quti dahre yahuha tinare buhero taro:

³ —Ahri quitire tũhoga musa —niha tiro tinare.

—Toari masũno toaro, to toaa yaparire doca site cũno wahara. ⁴ To ã doca site cũ wahcãchu paye yapari mahai bora caha suha. ã bora caha suare ti yaparire minichahca duji ta, chũnocaha. ⁵ ã yoa paye yapari sehe tãa wapa bui dihta se mininocã bui bora caha suha. Tãa wapa buicã dihta mariea cureroi bora caha su, dõi dumaha. ⁶ ã dõi duri jipahta, mũhcori mariaa, sũ to tuaro sichũ, ñaia wahaha. ⁷ Paye yapari sehe tja watõi bora caha suha. Tja sehe dia yuhũua waha, toaa sehere wajãnocaha. ã jia tja watõi jiare dicha mariachũ yoaha. ⁸ Paye yapari sehe noari yahpai bora caha suha. Noano du, noano dicha tiha. Paye yucũ treinta yapari, paye yucũ sesenta yapari, paye yucũ cien yapari dicha tiha. ⁹ Ahrire tũho duaina noano tũhoga musa —niha Jesu.

Jesu quti mehne to buherire yahuha
(Mt 13.10-17; Lc 8.9-10)

¹⁰ ã yoa ti sahsero jia doce to buheina, paina Jesu mehne jiina cãhu ti quitire masi duaa, Jesure sinitu ñũha. ¹¹ Ti ã sinitu ñũri baharo Jesu õ sehe ni yahuha:

—Cohamacũ masa bui puhtoro masare to noano suho jiare, panoru paina ti masierari cjirire musare yasichũ yoara Cohamacũ. Paina sehere ã yoaerara tiro. ã jicu tinare quti mehne dihta buheihtja. ¹² ã jia tina ñũpahta ñũeraina cjiri yoaro sehe tjuara. ã jia tũhopahta tũho ñaha masisi. Tina tũho ñahaina jia, ti ñaa yoarire cahya, Cohamacũre macaboa. Ti ã macachũ ñũno, tiro sehe ti ñaa yoari buhirire bonocaboa. ã jipachũta tina sehe ne tũho duerara —niha Jesu.

Jesu wesere toari masũno quitire yahu pahũoha

(Mt 13.18-23; Lc 8.11-15)

¹³ To ã niri baharo õ sehe ni yahu namoha tinare:

—¿Ahri quitire tũhoerasinijari musa? ¿Musã ahri quitire tũhoerana, dohse paye quitire tũhonaahcari musa? —niha Jesu tinare.

ã ni tuhsu tiro õ sehe ni yahuha tinare:

¹⁴—Toari masuno toaro, to doca site cūa yapari noaa buhea yoaro sehe jira. ¹⁵Ā yoa mahai boraa yapari noaa buhea yoaro sehe jira. Cāina noaa buheare ti tuhochu űno Satana sehe ta, tí buhea noaa buheare ti tuho űhamarire bochu yoara tinare, minichahca tí yaparire ti churo seheta yoaro. ¹⁶Ā yoa tãa wapa bui dihta se mininocã bui boraa yapari noaa buhea yoaro sehe jira. Ā jia paina noaa buheare tuho, wahchea mehne dõihita tíre tuho nunu wahcãna. ¹⁷Ā tuho nunu wahcãpahta tãa wapa buicã jia yucu nuhcori mariea yucu yoaro sehe ahrina masa cãhu yoari pja cãno pjaerara. Ā cãno pjaerara, yu yare tí cahmari buhiri paina tinare tí űno yoachu, űno yãhduã, yu yare duhunocahna. Paina tinare tí űno yoachu tíre cãno pjaerara, yu yare duhunocahna. ¹⁸Ā yoa tja watoi boraa yapari noaa buhea yoaro sehe jira. ¹⁹Ā jia paina sehe noaa buheare tuhoa, ahri yahpa macaare wacũ nunu yãhduãra. Niferure bujua cahma, paye baro cãhure payu cahma, tíre goa pja yãhduãra tina. Ti ã tuhotuchũ tí sehe noaa buheare ducatarã. Ti ã ducatachu masa noaa sehere yoerara. Dicha maria yucu yoaro seheta jira. ²⁰Ā yoa noari yahpai boraa yapari noaa buhea yoaro sehe jira. Ā jia paina sehe noaa buheare tuhoa tíre cahmana. Tíre masina jia, Cohamacu to cahmano seheta noaare yoara tina. Cãina mahanocã noaare yoara treinta yapari dichã tiro seheta. Paina bui curero noaare yoara sesenta yapari dichã tiro seheta. Paina pjíro noaare yoara cien yapari dichã tiro seheta —ni yahuha Jesu tinare.

Jesu sihãria quitire buheha
(Lc 8.16-18)

²¹Ā ni tuhsũ õ sehe ni yahu namoha Jesu: —Ne, sihãriare ti sihãri baharo tiare dihi biato docapu cũerara. Ā jia tiare coãri casario docapu cũerara. Muanopũ duhu payora noano buhria dutia. ²²Jipihti ti masierari cjrيره baharo masa masiahca. Sihãria to buhriachu mari ű masino seheta panopure tí masierari cjrيره masiahca masa. ²³Ahrire noano tuhoga musa. ²⁴Mahanocã masi duana mahanocã masinahca. Pjíro masi duana pjíro masinahca. Ā jina musa tuhona noano tuho nunuga. ²⁵Noano tuho nunũgiri noano masinohca. Tuho nunũerariro “Mahanocã tuhoja”, to nipachuta tí sehe butia waharohca —niha Jesu tinare.

Jesu trigore toariro quitire buheha

²⁶Ā ni tuhsũ õ sehe ni yahu namoha: —Cohamacu masa bui puhtoro to suho jia trigore toariro yoaro sehe jira. ²⁷Toa tuhsũ bohrearo to toari duare űna tiro. “¿Dohse du wijaa ta bucãjari tí?” ni ű masierara

toariro to basi. ²⁸Tí toari tí basi dichã tira. Pari pũca ji muhtana. Baharo pari paro wijaa bucãara. ²⁹Tí parori bucãa tuhsũchu űno pahara. Pahari pja jira. (To toaa ti bucãarire to masieroro seheta Cohamacu yaina masa ti wahachu cãhure yahu pahũo masierara masa) —ni buheha Jesu.

Mostaza yapa quitire yahuha Jesu
(Mt 13.31-32; Lc 13.18-19)

³⁰Ā ni tuhsũ õ sehe ni buhe namoha Jesu piti dahre buhero:

—¿Ne Cohamacu masa bui puhtoro to suho jia yaba baro yoaro sehe jijari, musã tuhotuchũ? ¿Di quiti mehne tíre yahunahcari? ³¹Mostaza yapacã yoaro sehe jira puhtoro Cohamacu to suho jia. Ti yapacã to toachu mahabiari yapacã jira. ³²Ā jiparota tí yapacã noano dura. Ā jiro pjibiadu wahara. Ā jia tu dupuri bujua dupuri bucãachu űna minichahca peri tu dupuripu suhti suhara. (Pjibiadu to wahariro seheta muano macarirore mari puhtoro masina mahainacã tí ji muhtapachuta baharopũ tina payu wahaahca) —niha Jesu.

Quiti mehne to buherire yahuha Jesu
(Mt 13.34-35)

³³Ā ni tuhsũ, tí quiti ti niriro seheta payu quitire tuho tí cãno pjaro puro noaa buheare buheha tinare. ³⁴Quiti marieno yahueraha tinare. Tuhsũ, ti sahsero jĩnare Jesu noano yahu pahũoha to buheinare.

Jesu wihtonore yusũ dutiha
(Mt 8.23-27; Lc 8.22-25)

³⁵Ā yoa tí dachoreta nahi borachupũ Jesu to buheinare õ sehe niha:

—Basa, sie coapu pahãjihna —niha tinare.

³⁶To ã nichu tuhoa Jesu to jiriapu dohoriapu samu, masare yahpapũ ducuinare tõihta cũ, to buheina dihta Jesure na pahãa wahaha. Ā yoa paye buso mehne paina cãhu tinare piti tí pahãa wahaha. ³⁷Ti ã pahãchu wihtonono tuaro taha. Ā taro dohoriare pahcõri tuaro cjã sãaha. Mahanocã duhsamaha ti miniboro. ³⁸To ã waharo watoi Jesu sehe dohoriã oturopũ suhti puti mehne to dapu ño tu tjãhno carĩno niha. Ā jia tina tirore wahcõha.

—Buheriro, mari mini yariana tana nija.

¿Ā jica niera putiajari muhu? —niha tina tirore.

³⁹Ti ã nichuta Jesu sehe wahcã, wihtonore:

—Tó purota wã duhuga —niha. Ā ninota pahcõri cãhure:

—Yusua wahaga —niha bucãparirore.

To ã nichuta wihtonono yãhduã wahaha. Ā jia pahcõri cãhu yusũ boraa wahaha.

⁴⁰—¿Dohse ni cuimacanocana nijari m̄sa? ¿M̄sa yuh̄re wacū tuaerasinijari? —niha Jesu.

⁴¹To ā yoachū ñua tina c̄ua yuh̄d̄ua wahaha.

—Cue, ¿dohse jiriro baro mas̄no jijari ahriro? Ahri wih̄nono, pah̄c̄ōri c̄āh̄u to dutich̄u yuh̄d̄uac̄aerara tirore —niha tina ti basi.

5

Wat̄ia ti cohtotarirore noariro wahachū yoaha Jesu

(Mt 8.28-34; Lc 8.26-39)

¹⁻² Ā yoa tina sie coar̄p̄ Gerasa macaina ya yah̄rap̄ pah̄ā suha. Pah̄ā su, Jesu sehe dohoriar̄p̄ s̄āariro maja s̄ur̄c̄aha. To ā maja s̄ur̄c̄ari baharoc̄āta, wat̄ia ti cohtotariro t̄āa copari, masa copari watoi jiriro wija ta, tiro cahar̄p̄ taha. ³ Tiro wat̄ia ti cohtotariro masa copari watoi jiriro jia tiha. Tirore ne c̄āiro coma da pjiri da mehne ñaha duhte c̄ūno bihoeraha. ⁴ Paȳu tahari masa tirore dahpori w̄ap̄ōa sorori mehne comaa dari mehne duhte timaha. To wamomacari c̄āh̄ure duhte timaha. Wiho mejeta tiro sehe comaa darire nuha, dahpori w̄ap̄ōa sorori c̄āh̄ure nuha site m̄jaha. Ā jia tiro tuariro to jich̄u ñua masa sehe tirore c̄j̄uaa bihoeraa tiha. ⁵ Ñamine, dachore t̄ū yuc̄arip̄u jia copari t̄āa copari watoi ā sañurucu tiha tiro. Ā yoa t̄āa mehne to basi to pjac̄ure c̄j̄āye m̄jaja tiha tiro. ⁶ Ā yoa Jesu to maja s̄ur̄c̄ach̄u yoarop̄u Jesure ñuroca, tiro cahar̄p̄u m̄roca ta, na tuh̄cua caha suha, tirore ño payoro taro.

⁷⁻⁸—Wat̄ia wijaahga tirore —niha Jesu.

To ā nich̄u tuhoro wat̄ia ti cohtotariro ō sehe ni sañurucuha:

—Jesu, Cohamac̄u Jipihtina Bui Jiriro mac̄no, ¿yabare yoai tai nijari m̄h̄u yuh̄re? Cohamac̄u to ñurocaroi sinija yuh̄u m̄h̄ure. Yuh̄re ñano yoai tjiga —ni sañurucuha wat̄ia ti cohtotariro Jesure.

⁹—¿Yabariro wama tijari m̄h̄u? —niha Jesu tirore.

—Sā paȳu jija. Ā jina “Paȳu wat̄ia”, wama tija. ¹⁰ Ahri dihtar̄p̄u j̄inare s̄āre pa yah̄rap̄u waha dut̄iecu tjiga —ni paȳu tahari siniha wat̄ia ti cohtotariro.

¹¹ T̄i pjare ti cacah̄ā t̄ācu dahpotoi yesea nuina paȳu c̄h̄ua niha. ¹² T̄oi ti ch̄arucuch̄u ñua ō sehe ni siniha wat̄ia:

—Sina yesea cahar̄p̄u warocaga s̄āre ti pjac̄arip̄u s̄ā s̄āhto sehe —ni siniha wat̄ia tirore.

¹³ T̄i ā nich̄u tuhoro “Jai. Wahaga”, niha Jesu. To ā dutich̄u, wat̄ia mas̄nop̄u jirina cjiri sehe wijaa, yesea pjac̄arip̄u s̄āha. Tina yesea sehe paȳu waro jiha, dos mil.

Ā yoa tinare ti s̄āari baharo, yesea jipihtina būc̄pariro duht̄u cahar̄p̄u pari c̄ñ̄ar̄p̄u m̄roca buha, t̄i tarop̄u bora ñoja, mini yaria pihtia wahaha.

¹⁴ T̄i ā mini yariach̄u ñua yeseare ñu wih̄oina sehe m̄roca wahc̄ā, pjiri macar̄p̄u c̄āh̄ure, daa macaric̄ar̄p̄u c̄āh̄ure t̄ire yahu sitea wahaha. T̄i ā yahuch̄u t̄ahoa, masa sehe paȳu ti ā waharire ñua wahaha. ¹⁵ Ā jia Jesu cahar̄p̄u wih̄ia, paȳu wat̄ia ti cohtotariro cjiro to suhti tiriro, tuh̄o masiriro to dujich̄u ñua, cui niha. ¹⁶ Wat̄ia ti cohtotariro cjirore, yesea c̄āh̄ure ti ā waharire ñuina sehe paina masa ti caha wih̄inare noano yahu pah̄ñoha. ¹⁷ T̄i ā yahu pah̄ñoch̄u t̄ahoa, Jesure tuaro mehne pa seh̄ep̄u waha dutiha.

¹⁸ Ā yoa dohoriar̄p̄u Jesu to samuch̄u ñuno, “M̄h̄u mehne waha duaja” ni, tuaro sinimaha wat̄ia ti cohtotariro cjiro sehe Jesure. ¹⁹ To ā nich̄ata Jesu tirore ō sehe ni yahuha:

—Yuh̄u mehne taecu tjiga. M̄u ya wuh̄ar̄p̄u m̄u coyea cahar̄p̄u yuh̄u m̄u puhtoro m̄h̄ure yu yoarire yahui wahaga. M̄h̄ure yu p̄ja ñ̄ar̄ire yahuga tinare —niha tirore.

²⁰ To ā nich̄u wat̄ia ti s̄āanoriro cjiro sehe Decapoli wama tirōp̄u jia macarip̄u Jesu tirore to yoari cjirire yahu ducaha. To ā ni yahuch̄u t̄ahoa jipihtina masa c̄uaa wahaha.

Jairo maconore yuh̄d̄uch̄u yoa, cah̄ā ñ̄ur̄icoro c̄āh̄ure yuh̄d̄uch̄u yoaha Jesu

(Mt 9.18-26; Lc 8.40-56)

²¹ Ā yoa pari turi Jesu to majare pah̄ā s̄uch̄u masa paȳu tiro cahar̄p̄u būc̄pariro duht̄u cahar̄p̄u cahmachuha. ²² T̄i ā cahmachuch̄u s̄ā judio masa buheri wuh̄are ñu wih̄boriro Jairo wama tiriro wihi, Jesure ñu, to dahpori cahar̄p̄u na tuh̄cua caha s̄uro, ²³ ō sehe niha:

—Yu macoc̄ā yariaro nihre. Ā jicu ticorore m̄u wamomaca mehne ña payo, noaricoro yoai taga. M̄u ā yoach̄u ticoro masanohca —niha tiro Jesure.

²⁴ To ā nich̄u Jesu c̄āh̄u sehe tiro mehne wahaha. Mahai to wahach̄u paȳu masa tirore n̄n̄u ti wahc̄ā bihsaro s̄ur̄c̄u s̄uha tirore. ²⁵ To ā bihsaro wahach̄u numino doce c̄uh̄mari waro dachoripe cah̄ā ñ̄ur̄uricoro t̄oi jiha. T̄o pano paȳu duhturuu ticorore ñano yuh̄d̄uch̄u yoaha.

²⁶ Ā yoa duhturuare jipihtia to niñeru mehne wapamaha ticoro co tiro. T̄i ā yoapach̄ata ticoro munanota jirucuha. Ā jiro ticoro t̄o pano to jiriro yuh̄d̄uro ñano wahaha. ²⁷ To ā ñano yuh̄d̄uricoro to jich̄u masia Jesu to yoarire t̄ahoa paina t̄ire yahuha ticorore. Ā ti yahuch̄u tuhoro ticoro Jesu baharo masa paȳu watoi wihi, Jesu suhtirore ñaha ñua. ²⁸ “Yuh̄u to suhtiro dihtare ñaha ñuco noaricoro wahacohca”, ni tuh̄otuha. ²⁹ Ā jiro ticoro to ñaha ñ̄uri baharo to cah̄ā ñ̄uare duhuro to pjac̄ure

noari pjacu tūhotuha. ³⁰ Ā jiro Jesu to tuaa mehne dohatiare to cohārire masino, masa watoi majare űaha.

—ĶNoa yu suhtirore űaha űiri? —niha tiro.

³¹ To ā nichu tuhoa to buheina ō sehe niha:

—Bihsa nina. Ā jia masa payu mūhare pihanocahna. “ĶNoa yūhare űaha űiri?” nicu, Ķdohseacu ā nijari mūhu? —niha tina sehe tirore.

³² Ā jiro Jesu tirore űaha űaricorore macaha. ³³ To ā macano watoi ticoro sehe to pjacu noano wahachu tūhoturo cui, tetere na tuhcu caha suha to panoi tirore űo payoro. ³⁴ Ā jiro ticoro poto yahu pahűoha tirore. To ā ni yahuri baharo Jesu ticorore ō sehe ni yahuha:

—Maco, yūhare mu wacū tuaa mehne noaricoro tjuara mipure. Wahchea mehne wahaga. Dohatia marienicooro jiga —niha Jesu ticorore.

³⁵ To ā ni durucuro watoi judio masare buheri wūhare űu wihboriro ya wūhu macaina yahua wihiha:

—Mu maco yariaa wahahre. Ā jicu buherirore pji tai tjiga —niha tina.

³⁶ Ti ā nipachuta ā tūhotunocahno, Jesu űu wihborirore ō sehe ni yahuha:

—Cahya tūhotu tjiga. Yūhare wacū tuaga. Ti dihtare yoaga —niha űu wihborirore.

³⁷ Ā ni tuhsu Santiago, to bahuro Joāo, Pedro tina dihtare “Yūhu mehne taga”, niha Jesu. ³⁸ Ā pji wahcāno sā judio masa buheri wūhare űu wihboriro ya wūhuru suha tina. Ti wūhuru masa payu űano bisi, űahacaha tiia ti saűurucuhu űaha Jesu.

³⁹ —űano ni, űahacaha tiiena tjiga musa. Maharicorocā musa ā ni tiichu yariaerara. Carűo nina —niha Jesu tinare.

⁴⁰ To ā nichu tuhoa “Ā nimacanocano nina ahriro”, ni bujūha tina sehe tirore. Ti ā yoachu tiro tinare sopacaru wio pahűonocaha. Ā wio tuhsuro maharicorocā pūcusumare, tiro mehne macaina cūhare ticorocā caharu naaha Jesu.

⁴¹ Ā naa tuhsuro Jesu ticorocāre to wamomacare űaha:

—Talita cumi —niha tiro. (“Talita cumi” nino, “Maharicorocā wahcāga”, nija yūhu”, nino nina.)

⁴² To ā nichuta ticorocā wahcārcu su, tiniha. Doce cahmari cjuaricoro jiha ticoro. Ticorore to ā yoachu űua tina cūa yūhūa wahaha. ⁴³ Ti ā yoachu űuno, Jesu tuaro mehne tūre to yoarire yahu site dutieraha. Ā jio tuhsu ticorore chūa wa dutiha.

6

*Nazare macaina Jesure cahmaeraha
(Mt 13.53-58; Lc 4.16-30)*

¹ Ā yoa tōpu jiriho waha, Jesu to buheina mehne to ya dihtaru tju suha. ² Ā tju sūro Sabado jichu sā judio masa buheri wūhu buhe dūcaha Jesu. To ā buhechu masa payu tirore tuhoa, cūa wahaha.

—Cue, Ķahriro nohopu tuhoari ahri buheare? ĶDohsearo noano masi pahűonocajari ahriro? Cohamacu tuaa mehne yoa űona tiro to basi. ³ Ahriro taboa dahrari masuno Maria macano, Santiago, José, Juda, Simo ti wahmino jimanaro. Ā yoa to bahana numia mari ya macai jisinimanabu. Ā jiro tiro mari yoaro sehe jiriho tjira —niha tina Jesure tuhomarina.

Ā jia Jesure űu tuhtia, tirore cahmaeraha. ⁴ Ti ā cahmaerachu űuno ō sehe niha Jesu:

—Cohamacu yare yahu mūhtarirore paina űo payora. Ti ā űo payopachuta to ya maca macaina, to coyea, to ya wūhu jiina űo payoerara tirore. Ā jina yūhare űo payoerara musa ōi yu bucararo jichu —niha Jesu tinare.

⁵ Ā jiro ti macai jiro Jesu Cohamacu tuaa mehne yoa űo masieraha. Ā yoaeraparota cāna dohatiina bui to wamomacare duhu payo, noaina wahachu yoaha tiro. ⁶ Ā jiro tō macaina Jesure ti quihōno tuhoerachu űuno cūa wahaha tiro. Ā jiro Jesu tō cahai jia macaripu buhero wahaha.

Jesu doce buheinare buhe dutiro warocaha

(Mt 10.5-15; Lc 9.1-6)

⁷ Ā yoa Jesu doce to buheinare pjiroca, puaro dihta warocaha tinare macaripure buhe dutiro. Ā jiro to tuare waha tinare watiare ti cohā wiohto sehe. ⁸ Ā warocaro pāore, wajure, niűerure tiro naa dutieraha tinare. Ti tjuayucu dihtare naa dutiha. ⁹ Ā ni tuhsu, dahpori tu cūa cahsarire sāa dutiha tinare. Cānoto suhtirore sāa dutiha tinare. Puaro sāa dutieraha. ¹⁰ Ā jiro ō sehe ni yahuha tinare:

—Jipihtia macaripu musare ti carűo wachu ti wūhihta tjuasiniga. Coā wahanaru wijaahga ti wūhare. ¹¹ Ā jina pa maca macaina musare ti cahmaerachu, ti tuho duaerachu ti macare yūhūana dahpori maca dihta pohcari mene wajā site cūga musa tinare ti ya buhirire masichu yoana —ni yahuha Jesu tinare.

¹² Ā jia tina doce buheina masare ti űaa tūhotumari cjirire tūhotu cohtota duti, Cohamacure maca duti, buhea wahaha. ¹³ Ā wahaa payu watiare cohā wio, dohatiinare se mehne wisōa, noaina wahachu yoaha.

*Joāo masare bautisarirore paina wajāha
(Mt 14.1-12; Lc 9.7-9)*

¹⁴ Ā yoa Jesure masa payu masiha. Ā jiro to yoarire puhtoro Herode tuhorocaha. Ā

tuhorocaró ò sehe ni tuhutumaha tiro paina mehne:

—João masare bautisariro yariariro cjiro pari turi bajuaro nica. Á bajuariro jiro to tuaa mehne tíre yoaro nica —ni durucumaha Herode paina mehne. (“Jesu Joãoa jira”, ni tuhutumaha.)¹⁵ Paina sehe ò sehe ni tuhutumaha:

—Elia jira —ni tuhutumaha.

Paina sehe:

—Cohamacu yare yahu muhtariro panopu macaina cjiro yoaro sehe jira tiro —ni tuhutumaha Jesure.

¹⁶ Ti á ni tuhutupachuta Herode sehe Jesu to yoarire tuhoro ò sehe ni tuhutumaha:

—João dapure yu cja ta dutiriro cjiro bajuaro nica —ni tuhutumaha.

¹⁷⁻¹⁸ Joãoire ti wajáhto pano Herode tire ñaha duti, peresu yoa dutiha. Tó pano Herode to baharo Felipe namonore Herodire amo tiha.

—Mu bahu namonore amo ticu Cohamacu dutiare yuhduracai nica muhu —ni yahumaha João Herodere.

To á niri buhiri to namono Herodia Joãoire peresu ti yoachu cahmaha. ¹⁹ Á jiro ticoro sehe Joãoire ñu tuhtiro, tireore wajá duti duamaha. Á yoa duaparota ticoro tireore wajá duti masieraha. ²⁰ Herode Joãoire cuíro, “João noaare yoariro, ñaa buhiri marieriro jira”, ni tuhoutuha. Á jiro Herodere cariboro yoaha João sehe tireore yahu. Á to caribopachuta tiro wahchea mehne tuhomaha Joãoire. ²¹ To á wahchea mehne tuhopachuta Herodia tireore to wajá dutihtí dacho mu suha. Tí pjare Herode to masa bajuari dacho jichu tiro bose numu dahreha. Á jia to gobierno macaina, to surara puhto, Galilea macaina puhto cahu to ya bose numure ñua wihíha. ²² Tí á wihiri baharo Herodia macono bose numu ñuno wihíro ti ñurocaroi basa ñoha. To á basa ñochu ñua Herode to pjirocaina mehne wahcheha. Á jiro ò sehe niha Herode ticorore:

—Mu cahmaare siniga yuhure. Á jicu waitjta muhure mu cahmaare. ²³ Cohamacu mehne potocá ní nija muhure. Mu sinino puro yu yare dacho macai waitjta muhure —niha tiro ticorore.

²⁴ To á nichu tuhoro ticoro Herodia macono sehe to pocoro cahapu waha, ò sehe ni sinituha:

—¿Yabare sinicohcari yuhu? —ni sinituha ticoro to pocorore.

—João masare bautisariro dapure siniga —niha to pocoro.

²⁵ To á nichuta ticoro Herodia macono ño duaro mehne puhtoro Herode cahapu waha, siniha:

—João masare bautisariro dapure waparo mehne waga yuhure —niha ticoro.

²⁶ To á nichu tuhoro puhtoro Herode sehe tuaro cahyaha. Masa ti ñurocaroi “Waitjta muhure”, ni tuhsaha tiro. Á jiro buo tiro “Muhure waeraja”, ni masieraha ticorore.

²⁷ Á jiro dóihta surarare peresupu jiinare cohtarirore João dapure cja ta, na ta dutiha.

²⁸ To á dutichu tuhoro surara sehe waha, to dapure cja ta, waparo mehne na taha. Na ta tuhsu, nuhminore Herodia maconore waha. To á wachu ticoro to dapure ñaha, to pocorore yuhdoha.

²⁹ Á jia João buheina sehe tíre tuhoa tópure waha, to pjacu cjirore na wahcá, tácaru ti sahari copapu na sãa duhu payoha.

Jesu cinco mil bui masare chua waha (Mt 14.13-21; Lc 9.10-17; Jn 6.1-14)

³⁰ Á yoa Jesu to warocarina to cahapu tju suha, ti yoarire ti buherire yahuha tireore.

³¹ Tí pjare masa payu á majarerucua, tinare churo waeraha. Á jiro ò sehe niha Jesu tinare:

—Masa marienopu mari sahsero sosinina wahajihna —niha tinare.

³² Á jia tina ti sahsero dohoría mehne masa marienopu wahaha. ³³ Tí á wahachu ñua masa payu tinare masiha. Á masia payu macari macaina mahapu waha, Jesu to suhtopu tina masa sehe mucoca wahcá su muhtaha. ³⁴ Tí á suchu Jesu wahá su, busocapu sãariro majano, tiro masa payu jinare ñua. Oveja puá marieina yoaro sehe jiha tina masa, to ñuchu. Á jiro Jesu tinare pja ñuno, payu noaare buheia tiha tinare. ³⁵ Ñamichahapu doce buheina Jesu cahapu su ò sehe niha:

—Ò masa marienopu jira. Ñamichahapu jira. ³⁶ Ó cahacá jia macaripu daa macaricaru, bujua macaripu ti chuhtire nuchu dutiga masare ti puhí tihtí cjihtire —niha tina Jesure.

³⁷ —Chuare waga tinare —nimaha Jesu to buheinare.

To á nichu ò sehe ni yuhtíha:

—¿Dos cientos dachori dahrari wapa niñeru mehne ti chuhtí pãore nuchubocari sã? —niha tina Jesure.

³⁸ —¿Nohope curiri pão curiri jijari? Ñua wahaga —niha tiro.

To á nichu tina sehe chuare boca ò sehe niha:

—Cã wamomaca pihitia curiri pão curiri, puaro wahi jira —niha tina.

³⁹ Tí á nichu tuhoro Jesu sehe pja curuari tja bui duji dutiha masare. ⁴⁰ To á duji dutiri baharo tina pja curuari dujiha. Cãa curuari cincuenta masa jiha. Paye curuari sehe cien masa jiha. ⁴¹ Tí á duji tuhsuchu ñuno Jesu sehe cã wamomaca pihitia curiri pão

curirire, p̄aro wahi mehne na, m̄anop̄a ñuha. ⁴² Æ ñano Cohamac̄are “Noana”, niha. To ã niri baharo p̄ao curirire nuha, to buheinare masare witi dutiro waha. Æ yoa tuhsu, p̄aro wahire witi dutiha jipih̄tinare. ⁴³ Ti yapi wahyore doce p̄h̄use waro p̄ãore, wahi c̄ah̄re na cahmachu wahpo dapoha tina. ⁴⁴ Æ yoa p̄ãore ch̄aina m̄a dihtare ti quih̄õch̄u cinco mil m̄a jiha. (Numia c̄ahu, macanac̄a c̄ahu tói ch̄aina jiha.)

Jesu co bui ducu wahc̄aha
(Mt 14.22-27; Jn 6.16-21)

⁴⁵ Ti pjata Jesu to buheinare dohoriap̄u samu duti, sie coap̄u Betsaidap̄u to pano pah̄ayu dutiha. Æ jiro ti pah̄ari baharo Jesu sehe masare coha sitiha. ⁴⁶ Coha siti tuhsu t̄ac̄ap̄u Cohamac̄are sinino wahaha. ⁴⁷ Baharo ñamip̄u dohoriari b̄uc̄ap̄ariro dacho macai ti pah̄aruc̄uch̄u Jesu c̄airota ti pah̄a tariorop̄u jiha. ⁴⁸ Tõp̄u jiro, tina ñano yuh̄du ti wajach̄u ti panoi wihnono tach̄u ñarocaha tiro. Æ jiro bohrea m̄aja tahto pano tina cahap̄u waharo co bui ducu wahc̄aha. Tinare tiro yuh̄du wahc̄a duamacha. ⁴⁹ To yuh̄du wahc̄a duapach̄uta tireore co bui to tach̄u ñua, “Yariariro cjiro jiboca”, ni tuhotumaha tina. Æ ni tuhotua tina sañurucuha. ⁵⁰ Jipih̄tina tireore ñua, ñu c̄ua waha, sañurucuha. Ti ã ñu c̄uach̄u ñano Jesu tinare õ sehe ni yahuha:

—Ne, yuh̄re cuiena tjiga. Yuh̄ta jija — niha tinare.

⁵¹ Æ ni tuhsu tiro tina mehne dohoriap̄u samua wahaha. To samuri baharoc̄ata wihnono yuh̄du wahaha. To ã wahach̄u tina sehe c̄ua yuh̄du wahaha. ⁵² To p̄ao payu yoarire wac̄eraha tina. Tua yuh̄dariro to jiare noano tuho ñahaeraha.

Jesu Genesare macainare, dohatiinare noaina wahach̄u yoaha
(Mt 14.34-36)

⁵³ Æ yoa tina pah̄a su, Genesare dihtap̄u wah̄a su, tia dohoriare d̄ah̄te poho, d̄ah̄tu cahap̄u pahsaha. ⁵⁴ Æ yoa tina dohoriap̄u jiina ti majach̄uta masa sehe Jesure ñu masiha. ⁵⁵ Æ ñu masia jipih̄tiro ti ya yahp̄ap̄u m̄aroca maja, dohatiinare ti coãa cahsari mehne yo wahc̄a, suha Jesu cahap̄u. “Jesu tõp̄u jih̄re”, masa ti nich̄u tuhoa to cahap̄u suha tina. ⁵⁶ Æ jia jipih̄tia macari to sua macarip̄u, b̄ujua macarip̄u, daa macaric̄ap̄u, pache duaina cahap̄u, masa dohatiinare ti c̄unop̄u Jesure to suhtiro d̄ah̄tu cahare ñaha ñu dua tuaro siniha tina:

—M̄u suhtiro d̄ah̄tu caha dihtare s̄are ñaha ñu dutiga —ni siniha.

Æ jia to suhtirore ñaha ñuinape tópeinata noaina wahaa tiha.

7

Masa ñaina wahach̄u yoaa yahuha Jesu
(Mt 15.1-20)

¹ Æ yoa Jerusal̄ep̄u tarina s̄a coyea judio masare buheina, fariseo curua macaina c̄ahu Jesu cahap̄u cahmachuha. ²⁻⁴ Fariseo curua macaina jipih̄tina paina judio masa c̄ahu ti ñuch̄usuma cjirop̄u ti yoa dutiriro seheta wamo cosaro marieno ch̄uera tiha. Æ jia pache duaina cahap̄u waha, su, majare tju wihina c̄ahu ti yoa dutiriro seheta wamo cosaro marieno ch̄uera tiha. Payu paye dutia c̄ah̄re ti ñuch̄usuma cjirop̄u ti yoa dutiare yoaa tiha. Tasa waparire cosaa, dihi biatorire cosaa, comaa biatorire cosaa, yoaa tiha tina judio masa, “Cohamac̄u ã cahmana”, nia. Æ jia s̄a coyea judio masare buheina, fariseo curua macaina c̄ahu Jesu cahap̄u cahmachua, Jesu buheina wamo cosaro marieno ti chuch̄u ñuha. ⁵ Æ ñu tuhsua Jesure õ sehe ni sinituha:

—M̄u buheina ch̄ua, mari ñuch̄usuma cjiro ti yoa dutiriro cjiro seheta ti wamomacarine wamo cosaerara. ¿Dohse yoa mari dutiare yoajerari? —niha tina Jesure.

⁶ Ti ã nich̄u tuhoru Jesu õ sehe ni yahuha tinare:

—Masa ti baharo buh̄usehei ñano yoa cohtaina jira m̄asa. Panop̄are Cohamac̄u yare yahu muhtariro cjiro Isaia potoc̄ata yahuro niri jira masa yoaro sehe tuhoerainare. Õ sehe ni yahu, joaa tiha tiro:

“Ahrina masa yuh̄re noano durucupahta ti tuhotuap̄u yuh̄re ne ño payoerara.

⁷ Æ jia yuh̄re ti ño payoa yaba cjihti jierara. ‘Cohamac̄u ya dutia jira ahr̄i’, ni mah̄ño buhera ti ya buhea sehere”,

ni joaha Isaia cjiro. ⁸ Ti potoc̄a tjira. Cohamac̄u ya dutia sehere duhu, masa ti yoa dutia sehere cohtota yoa yuh̄darucu sua tira m̄asa. ⁹ Cohamac̄u ya dutiare coh̄ana, m̄asa coyea ya dutia sehere yoara m̄asa. ¹⁰ Õ sehe yoana Cohamac̄u ya sehere yuh̄darucana nina m̄asa: Panop̄are õ sehe niha Cohamac̄u Moise cjiro to joariro seheta: “Musa p̄uc̄usumare ño payoga. C̄airo to p̄uc̄usumare ñano quiti dahreriro jiro ti buhiri ti wajãhtiro cjihto jirohca”, niha Cohamac̄u Moise cjirore to c̄uri dutiai.

¹¹ To ã nipach̄uta õ sehe yoa dutira m̄asa ti p̄uc̄usumare yoadoho dutierana: Ti p̄uc̄usumare ti waborire Cohamac̄u sehere wa dutira m̄asa. Æ ni buhemana m̄asa. ¹² Æ buhena ti p̄uc̄usumare ño payoch̄u yoaerara m̄asa tinare. ¹³ Æ yoana Cohamac̄u dutiare yuh̄darucana nina m̄asa mari ñuch̄usuma cjiro ya dutia sehere yoana. Painare m̄asa buhea dihtare tuho dutira m̄asa. Payu tó sehe jiare yoara m̄asa —niha Jesu tinare.

¹⁴ Ā ni tuhsuro paina cūhare pjirocaha tiro. Ō sehe niha tinare:

—Musa jipihtina yūhare tuhona taga. Tuhsu yu niare noano tuho űahaga musa. ¹⁵ Musa dūserire sāa sehe musa chūa sehe musare buhiri tichu yoerara. űaare musa tuhotua sehe musare űaina jichu yoara. ¹⁶ [Yūhare noano tuhoga musa] —niha Jesu.

¹⁷ Tinare ā ni yahu tuhsu Jesu masa cahapu jiriro cjiro waha, wūhupu sāa waha. Ā to sāa sūchu űua to buheina sehe to buherire sinitu űaha. Ti ā sinitu űūchu tuhoro ō sehe niha tiro:

¹⁸ —¿Musa cūhu ne tuho űahaerasinjiri tīre? Musa dūserire sāa sehe musa chūa sehe musare űaina jichu yoerara, Cohamacu to űūchu. ¹⁹ Tī musa tuhotuapure sāaerara. Musa pjaropu sāa su, yūhdu wijaa wahara —niha Jesu.

Ā nino “jipihtia chūa noaa jira”, nino niha. ²⁰ Ā yoa ō sehe ni namoha tjoo:

—Musa űaa durucu sehe musa dūseri wijaa sehe musare űaina jichu yoara, Cohamacu to űūchu. ²¹⁻²² űano tuhotua, numia mehne űano yoarucua, yacaa, masare wajāa, namo tirirupu jiparota pacorore manū tiricorore wūana tia, paio yare turo cjoa, űano yoa, mahñoa, buo tiro marieno űaa yoa, paina ti cjaare űu yabia, űano quitī dahrea, “Painare yūhdurūcaja”, ni tuhotua, tuho masieraina jia, ti jipihtia musare musa tuhotuapu tara. ²³ Jipihtia ahri űaa musa tuhotuapu taa, musare űaina jichu yoara, Cohamacu to űūchu —niha Jesu.

Judio masono jieraricoro Jesure wacū tuaha

(Mt 15.21-28)

²⁴ Ā ni tuhsuro Tiro wama tiri maca cahapu, Sidō wama tiri maca cahapu sūro tō macari wūhupu sāa waha. Ā sāahno painare to jiri wūhare yahu dutieraha. Ā yahu dutieraparota tinare tiro duhti masieraha. ²⁵ Tī pjareta numino to macono watīno to cohtotaricoro to cahai jia. Ā jia Jesu yoirere űua paina to pocorore yahuha. Ti ā yahuri baharo to pocoro sehe waha, Jesu dahpori cahapu na tuhcuca caha sūha tirore űo payoro. ²⁶ Ticoro Sirofenicia wama tiri yahpa macaricoro jia.

—Watīnore cohā wiosiniga yu macore —ni sinihā ticoro Jesure.

²⁷ To ā sinichu tuhoro ō sehe niha Jesu:

—Wahmanore wūhu purō pohna ya chūare dieyacāre yu wa muhtachu tō wahaerara. Israe masa yare pa yahpa macainare yu wa muhtachu tō wahaerara —niha Jesu ticorore piti dahre yahuro.

²⁸ —Ā tjira puhtoro. Ā jipachūta dieyacā cūhu mesa docai ti pohna ti chu site boroare chu cohtara tinacā cūhu. (Pa yahpa

macaricoro yu jipachūta yūhu cūhare yoadoho masina muhu) —ni yūhtihā ticoro.

²⁹ —Mu ā ni yūhtichu mu macore watīno wijaa tuhsūhre. űūco wahaga —niha Jesu ticorore.

³⁰ To ā nichu tuhoro majare tjuaa, to wūhupu tju sūro, to maconore watīno marienicorore camapu jiricorore űaha.

Cahmono tuhoeraritore, durucu masieraritore noariro wahachu yoaha Jesu

³¹ Tī pjare Jesu Tiro wama tiri maca cahapu jiriro waha, Sidō wama tiri macare su yūhdu wahcā, Decapoli wama tiroru jia macarine su yūhdu wahcā, Galilea wama tiri bucūpariroru sūha jūna. ³² Ā jia cahmono tuhoeraritore, noano durucu masieraritore Jesu cahapu na wihihā paina.

—Mu wamomaca mehne űa payoga tirore —ni sinihā tina tirore.

³³ Ti ā nichūta Jesu sehe tuhoeraritore na wahcā, masa marienoru sūho sūha. Ti sahsero jia. Tuhsu, Jesu to wamo picari mehne tuhoerariro cahmo coparire be sōha. Ā yoa tuhsu, chahcho puti, to űahmanore űa payoha.

³⁴ Ā yoa tuhsu manopu űu muo, yajeri na, ō sehe niha:

—Efata —niha Jesu. (“Efata” nino, “Pjōohga”, nino nina. Ā nino tirore tuho dutiro niha. Ā nino noano durucu dutiro niha.)

³⁵ To ā nichūta tiro sehe tuho boca, to űahmano bidaro wahachu tuhoturo noano durucuha. ³⁶ Ā jiro Jesu tinare tīre painare yahu site dutieraha. To ā yahu site dutierachu tuhopahta tina sehe painare yahu site namoha. ³⁷ Ā jia masa tuho cūa yūhdu waha, ō sehe niha:

—Jipihtiare tiro noano yoara. Tuhoerainare noano tuhochu yoara. Durucu masieraina cūhare noano durucuchū yoara Jesu —niha masa.

8

Cuatro mil bui masare chūare waha Jesu
(Mt 15.32-39)

¹ Tī pjare pari turi masa payu ti cahmachuri baharo chūa maeraina ti jichu űūno Jesu to buheinare pjirocaha:

² —Ahrina masa tia dacho waro yūhu mehne ji tuhsura. Ā yoa tinare puhū marihana. Tī puhū maerachu űūcu tinare pja űūja yūhu. ³ Paina tina mehne macaina yoropu tahre. “Tinapu jūca baaina mahai borari”, nicu tinare chūa marieno ti wūhusepu waha duti duaeraja. Ā jicu tinare puhū wa duaja —niha Jesu to buheinare.

⁴ —¿Dohse yoa mari űre masa marienopure pāore boca wabocari mari? —niha to buheina sehe Jesure.

⁵ —¿Nohope curiri pão curirire cjuajari mûsa? —ni sinituha Jesu.

—Siete curiri jira —niha tina.

⁶ Ti ã ni yuhtichu tuhoru, tiro masare yajpai duji duti, siete curirire pão curirire na, Cohamacure “Noana”, niha. ã ni tuhsu, ti curirire nuha, to buheinare wa, masare witi dutiha. To ã dutiri baharo to buheina sehe pãore masare witiha. ⁷ ã jia wahi cãhure mahainacã cjuaha tina. ã jiro tinare Cohamacure “Noana” ni, wahi cãhure witi dutiha. ⁸ Ti witi tuhsuchu tina chuã, yapi yuhduã wahaha. Ti yapi wahyorire siete puhuse waro wahpo dapoha tina. Tina cuateo mil bui masa jiha. ⁹⁻¹⁰ ã yoa tuhsu Jesu masare coha sitiha. Coha siti tuhsu to buheina mehne dohoriapu samuha. Samu tuhsu Dalmanuta wama tiro cahapu wahaha.

Fariseo curua macaina Jesure Cohamacu tuua mehne yoa ño dutiha

(Mt 16.1-4; Lc 12.54-56)

¹¹ ã yoa fariseo curua macaina wihi, Jesu mehne cahma sayoha. Tina Jesure Cohamacu tuua mehne yoa ño dutia, to yoa ño masierachu ñu duamaha. ¹² Ti ã dutichu tuhoru Jesu cahyaro mehne yajeri sãano, õ sehe niha:

—¿Musa mipu macaina dohse yoana mûsa Cohamacu tuua mehne yoa ñoare ñu duajari? Potocã niita nija musare. Mipu macainare musare Cohamacu tuua mehne ne yoa ñosi yuhu —niha Jesu.

¹³ ã ni tuhsu waha, pari turi dohoriapu samu, sie coapu pahãa wahaha.

Fariseo curua macaina, Herode mehne macaina cãhure ñaare ti buheare yahuha Jesu
(Mt 16.5-12)

¹⁴ ã wahaã, pãore boa waha, dohoriai cã curita pãore cjuaha tina. ¹⁵ ã yoa Jesu cuaro mehne yahuha tinare:

—Noano yoanohbu. Fariseo curua macaina, Herode mehne macaina cãhu ti pão bucuarore ñuna noano yoaga. Cua nina ti —ni yahuha.

¹⁶ To ã nichu tuhoa tina to buheina sehe tire ti basi õ sehe ni durucuha:

—Mari pãore mari na taerachu ñuno ã nino nica ahriru —nimaha tina ti basi.

¹⁷ Ti ã nirire masino tinare õ sehe ni sinituha Jesu:

—¿Dohse yoana mûsa pão borire wacujari mûsa? ¿Musa masierasiniari? ¿Tuho ñahaerasiniari? ¿Tuho duaerajari mûsa? ¹⁸ ¿Capari tiina jipanahta ñerajari mûsa? ¿ã jina cahmori tiina jipanahta tuhoerajari mûsa? ¿Musa ahrire wacuerajari? ¹⁹ ¿Yuhu cã wamomaca pihitia pão curirire nuha, cinco mil bui masare yu warire wacuerajari mûsa? ¿Ti yapi wahyorire nohope puhusere pão

curirire wahpo dapori mûsa? —niha Jesu tinare.

—Doce puhuse —ni yuhtia tina tireore.

²⁰ —¿ã yoa yuhu siete curirire pão curirire cuatro mil bui masare yu wari baharo nohope puhusere pão curiri wahpo dapori mûsa? —niha Jesu.

—Siete puhuse —ni yuhtia tina tireore.

²¹ —¿ã ñupanahta noano tuho ñahaerasiniari mûsa? —niha Jesu tinare.

Jesu capari ñerarirore ñuchu yoaha

²² ã yoa tina Betsaidapu ti sychu ñua, masa sehe capari ñerarirore na wihiha.

—Tireore ña payoga —ni, tuaro siniha tina Jesure.

²³ Ti ã sinichu tuhoru, Jesu capari ñerarirore wamomacare ñaha, ti maca duhtu cahapu tireore tuã wahcãha. Tôpu na su, to caparire chahcho puti, to wamomacari mehne tireore ña payoha.

—¿Mû ñuchu bajujari? —ni sinituha Jesu.

²⁴ To ã nichu tiro sehe ñuno, õ sehe niha:

—Muare ñuja. Yu ã ñupachuta tina yucuri tinia yucu yoaro sehe bajura —niha capari ñerarirore cjiro.

²⁵ To ã nichu tuhoru Jesu sehe to wamomacari mehne to caparire ña payoha tjoa. To ã ña payori baharo capari ñerarirore cjiro tuaro to ñuchu to capari noano bajuha. ã yoaro jipihitiare noano ñuha tiro. ²⁶ To ã ñu masichu ñuno, Jesu tireore to wuhupu warocaha.

—Macapu pinihtare wahai tjiga —niha Jesu tireore.

“Jesu potocã Cristo, Cohamacu to warocarirore jira”, ni yahuha Pedro
(Mt 16.13-20; Lc 9.18-21)

²⁷ ã yoa Jesu to buheina mehne Cesarea Filipino wama tiri maca cahai jia macaripu waha namoha. Tôpu ti waharo wato, Jesu õ sehe ni sinitu ñuha to buheinare:

—¿Diro baro jicari yuhu masa yuhure ti tuhotuchu? —ni sinitu ñuha tiro tinare.

²⁸ To ã sinitu ñuchu tuhoa õ sehe ni yuhtia tina:

—“João masare bautisarirore cjiro jira”, nina paina. Paina “Elia jira”, nina. Paina “Cohamacu yare yahu muhtaina cjiro mehne macarirore jira”, nina muhare —ni yuhtia to buheina tireore.

²⁹ Ti ã ni yuhtiri baharo Jesu õ sehe ni sinitu namoha tinare:

—¿Musa sehe mûsa tuhotuchu diro baro jicari yuhu? —ni sinitu ñuha tjoa.

—Muhu Cristo Cohamacu masare yuhdo duti to warocarirore jira —ni yuhtia Pedro.

³⁰ To ã nichu tuhoru Jesu õ sehe niha:

—Yuhure “Cristo jira tiro”, ni yahu sitesiniena tjiga painare —niha tinare.

Jesu to yariahtore, to masa wijaahito cãhure yahuha

(Mt 16.21-28; Lc 9.22-27)

³¹ Tinare to ã ni sinitu ñari baharo, ò sehe ni buhe ðacaha tiro:

—Yũhũ masũno Cohamacũ warocariro jija. Æ jicũ tuaro ñano yũhdũcãhca. Æta waharo cahmana yũhure. Mari coyea judio masa, bũcana, sacerdotea pũtoa, mari judio masare buheina yũhure cahmaeraa, yũhure wajã dutiahca. Ti ã wajãchũ tia dacho wahaboroi masa wijaahca —niha Jesu tinare.

³² Æ nino ne tũho wisiachũ yoaro marieno yahuro niha tinare. To ã nichũ tũhoro Pedro sehe pa sehe curerocã Jesure narũcũ sũ, tireore ã ni dutieraha. ³³ To ã ni dutierachũ tũhoro Jesu to buheinare majare ñũ, tuhtiha Pedrore:

—Satana yoaro sehe durucui nina mũhũ. Æ nii tjiga. Mũ tũhotua masa ya jira. Cohamacũ ya jierara —niha tiro Pedrore.

³⁴ Æ ni tuhsũ masare to buheina mehne tiro caharũ pjiroca, ò sehe niha:

—Cãiro yũ yairo ji duaro, to cahmano yoa duamarire duhunocanoahca. Æ jiro crusarũ yũ ñano yũhdũhtiro seheta tiro yũ yairo to jiri buhiri ñano yũhdũparota yũhure duhusi. Æ jiro yũ yare yoarucuriro jirohca. ³⁵ Masũno to mũ sũro to cahmano seheta yoariro pichacarũ tiro waharohca. Æ yoa masũno yũ yare ã yoarucuro, noaa buheare ã yoarucuro, jipih-tia dachoripe yũhũ mehne mũanorũ jirucurohca. ³⁶ ¿Cãiro masũno ahri yahpa macaare jipihitiare cjariri pichacarũ waharo yabare wapatajari tiro? Æ jiriro ne wapataerara. ³⁷ Pichacarũ to wahachũ ne dohse wapa wiohto basioerara. Masũno to jia tia wioho waro jierara. ³⁸ Mipũre ñaina, Cohamacũre cahmaeraina ti mũ sũro ti yoari dacho jiro nina. Cãina yũ wamare, yũ buheare ni dua bũo tiboca. Ti ã yoachũ ñũcũ yũhũ masũno Cohamacũ warocariro noaina anjoa mehne yũ Pũcũ to si sitero mehne tjua tacũ yũ wamare ni duapahta bũo tiinare bũo tisãaihca yũhũ cãhũ —ni yahuha Jesu.

9

¹ Æ ni tuhsũ ò sehe ni namoha Jesu:

—Potocãta niita nija mũsare. Cãina mũsa õpũre jiina mũsa yariahto pano pũhtoro Cohamacũ to sũho jiropũre yũ sãachũ yũhure ñũnahca —niha Jesu tinare.

Jesu to pjacũre cohtotaha

(Mt 17.1-13; Lc 9.28-36)

² Æ yoa seis dachori baharo Jesu Pedrore, Santiagore, ã yoa Santiago bahũro João cãhure mũadũ tũcũrũ tina dihtare pji mũjahã. Mũanorũ ti mũja suri baharo ti

ñũrocaroi to pjacũre cohtotaha. ³ To suhtiro noano si sitero, noano yehseri suhtiro wahaha. Ahri yahpa macaa numia suhti cosaa numia ã yehsechũ yoa masierara. ⁴ Æ jia Elia cjiro, ã jichũ Moise cjiro mehne Jesu mehne ti sahũdũchũ ñũha tina tiaro Jesu buheina. ⁵⁻⁶ Æ jia tina tuaro cuiha. Æ curo dohse ni masieramahno ò sehe nimaha Pedro:

—Pũhtoro, mari òi jichũ noa duara. Tia wũhũcã yoanahtja sã. Mũ ya wũhũcã, Moise ya wũhũcã, Elia ya wũhũcã yoanahtja —nimaha tiro Jesure.

⁷ To ã niri baharocãta, me curua ti bui duji pja sũha. To ã duji pja sũchũta, me curua watoi ò sehe nino coa taha:

—Ahriro yũ macũ yũ cahĩriro jira. Tũhoga tireore —nino coa taha.

⁸ Æ nino coa tachũta Pedro cãhũ ñũrocãmaha. Jesu dihtare ñũha. Ti ñũrina cjiri sehe mariaha jũna. ⁹ Æ jiro tũcũrũ ti duji tachũ Jesu tinare ò sehe ni yahuha:

—Michapucã yũhure ã waharire painare yahuena tjiga. Yũhũ masũno Cohamacũ warocariro yũ yaria masa wijaari baharo tire painare yahuga mũsa —ni yahuha tiro.

¹⁰ Æ jia to dutiriro seheta tina ti ñũrire yahueraha painare. Æ jia tina ti basi ò sehe ni sinitu durucuha:

—“Yũ yaria masa wijaari baharo” nino, ¿dohsearo ã niri tiro? —ni durucuha tina.

Æ jia Jesure ò sehe ni sinituha:

¹¹ —“Cristo to tahto pano Eliare ta mũhtano cahmana”, nina mari coyea judio masare buheina. ¿Dohse jiro baro ã nijari tina? —ni sinituha tina tireore.

¹²⁻¹³ Jesu ò sehe ni yũhtiha:

—Potocã tjira. Eliare ta mũhta dutire Cohamacũ, jipihitiare cahno mũhtahtiro cjih-tore. Yũhũ masũno Cohamacũ warocariro payũ tahari ñano yũhdũhũca. Paina yũhure cahmaeraa, ñano yoaahca. ¿Ti cãhure masijari mũsa? Æ jicũ ahrire nihtja mũsare: Elia wihũ tuhsure. To ã wihũpachũta tina ti cahmariro seheta tireore ñano yoaaha. Æta ni joaha tireore —niha Jesu tinare.

Jesu wahma wahmũa tarirore noariro wahachũ yoaha

(Mt 17.14-21; Lc 9.37-43)

¹⁴ Æ yoa duji ta, paina buheina caharũ sũ, payũ masare ñũha Jesu. To buheina sehe judio masare buheina mehne cahma sayoa niha. ¹⁵ Æ jia Jesu cãhũ ti duji tachũ ñũha, jipihitina masa caaa wahã, tiro caharũ mũrocaa wahaha. Tiro caharũ sũa:

—¿Tamajari? —niha tireore.

¹⁶ —Tamaja —ni tuhsũ—, ¿dohse ni cahma sayona niri mũsa tina mehne? —ni sinituha Jesu to buheinare.

17 To ã ni sinituchu tãhoro, masa watoi ducuriro õ sehe ni yahuha tirore:

—Buheriro, yu macure watino to cohtotarirore muhare na tamahi. Watino sehe tirore durucu dutierara. 18 Yu macure to ñahachu yahpapu bora, bahca diho, buhaa wahaa tire tiro. ã wahoro sahpo tua tire. ã jicu mu buheinare watino cohã wio dutimahi. Yu ã dutipachuta tina sehe cohã wio masierare watino —ni yahuha Jesure.

19 To ã nichu tãhoro Jesu õ sehe niha tinare:

—Ne, yuhure wacũ tuaerara musa. Yoabari pja musare buhemaja yuhu. ¿Noho puro yoari pja yuhure musa caribobocari? Tirore na tahga yuhure —niha Jesu.

20 To ã nichu tãhoro watino to cohtotarirore Jesu cahai na taha. Ti na wihichu ñuno watino sehe wahma wahma tarirore yahpapu doca caha su, tunu terechu yoaha. ã yoa sahpo tua wahaha.

21 —¿Noho puro yoari pja watino to cohtotarirore jijari ahriro? —ni sinituha Jesu sehe to pucãrore.

—Wihãrirocã jiroputa tiro watino to cohtotarirore jira. 22 ã cohtotaro payu tahari watino sehe tirore pichacapu, copu cãhure cohã wajãmaha. ã jicu muhu yoa masicu sãre pja ñu, yoadohoga —niha to pucãro Jesure.

23 To ã nichu tãhoro õ sehe niha Jesu:

—¿Dohsea jiro baro “Muhu yoa masicu”, nijari muhu yuhure? Yuhure mu wacũ tuachu ñuno, Cohamacu jipihtiare yoa pahño masina muhare yoadohobasaro —niha Jesu.

24 To ã nichu tãhoro wahma wahma tariro pucãro õ sehe ni sañurucuha:

—Muhure wacũ tuaja. Yu wacũ tuaerachu ñucu yuhure yoadohoga muhare yu noano wacũ tuahto sehe —niha tiro.

25 ã jiro masa payu tina cahapu muroca ta, ti cahmachu ñuno, Jesu watino õ sehe ni tuhtiha:

—Muhu durucu dutierariro, tãho dutierariro ahrirore cohtotarirore wijaaaha. ã wijaaçu tirore pari turi cariboi tjiga —niha Jesu.

26 To ã nichu tãhoro watino sañurucu, wahma wahma tarirore yahpapu doca caha su tunu terechu yoa, wijaaaha. To ã wijaaçu wahma wahma tariro yariariro yoaro sehe wahaha.

27 —Tiro yariaa wahara —nimaha masa payu.

Ti ã nipachuta Jesu sehe to wamomacare ñaha, tirore wahcõha. To ã wahcõchu wahcãha tiro sehe. 28 Baharo Jesu cãhu wãhupu ti sãa suchu to buheina tirore õ sehe ni sinitu ñuha:

—¿Dohseana sã sehe watino cohã wio masierari, mu tahotuchu? —ni sinitu ñuha tina.

29 —Ahriro baro watino cohã wio duana Cohamacure tuoro sinino cahmana musare. [ã yoa duana chu duhuro cahmana musare Cohamacure sinina tana] —ni yuhtiha Jesu tinare.

Pari turi Jesu to yariahtore, to masa wijaahtore yahuha

(Mt 17.22-23; Lc 9.43-45)

30 ã yoa tãhu jina waha, Galilea yahpapu su, yuhduaha. Tãhu ti waharire paina ti masichu cahmaeraha Jesu to buheinare buhe duaro. 31 Tãhu sãro to buheinare buhe taha. Õ sehe ni buheha:

—Yuhu masuno Cohamacu warocariro jija. Masa yuhure ñaha, painapure yuhure waaha. Ti ã wari baharo yuhure wajãhca tina. Ti ã wajãricu tia dacho wahaboroi masa wijaaihca —niha tinare.

32 To ã nichu tãhoro tina noano tãhoeraha. ã jia cuia tirore tire sinitu ñu namoeraha.

Jesu buheina tina mehne macarirore puhtoro sã duaa nimaha

(Mt 18.1-5; Lc 9.46-48)

33 ã yoa tina Capernaupu ti sãri baharo wãhupu ti jichu Jesu sehe õ sehe ni sinituha tinare:

—¿Mahapure tana, dohse ni durucu tana niri musa? —ni sinituha tinare.

34 To ã nichu tina yuhtieraha. Mahapure taa, cahma õ sehe ni durucu taa niha:

—¿Mari mehne macarirore diro sehere mari puhtoro sãnahcari mari? —ni durucua niha mahai tarucua.

35 ã jia ti ã nirire buo tia Jesure yuhtieraha. Ti ã yuhtierachu ñuno Jesu nuju su, to buheinare doce buheinare pjiroca õ sehe niha:

—Musa puhtoia ji duana jipihtina masa ti cahamacu jiro cahmana musare. Tuhsu, wiho jina jipihtina docai jinahca musa —niha Jesu tinare.

36 ã nino nijinocãre tina watoi duhu dapoha. Duhu dapo tuhsu tirocãre na wã, õ sehe ni yahuha:

37 —Yu yare yoa duana ahrirocãre musa cahmana, yuhu cãhure cahmana musa. ã yoa yuhure cahmana, yuhure warocariro mari Pucu cãhure cahmana musa —niha Jesu tinare.

Marine ñu tuhtiriro jieraro, mari mehne macariro jira

(Mt 10.42; Lc 9.49-50)

38 Baharo Joã õ sehe niha Jesure:

—Buheriro, mu wama mehne mu tua mehne watãre cohã wiorirore sã ñuhi. Tiro mari mehne macariro to jierachu ñuna tire tirore yoa dutiera tãhi sã —niha tina.

39 Ti ã nichu tãhoro Jesu tinare õ sehe ni yahuha:

—Ā niena tjiga m̄sa tirore. C̄airo yu wama mehne Cohamacu tuaa mehne yoaro, baharo yuhure ñano ni durucu masierara. ⁴⁰ Marine ñu tuhtiriro jieraro, tiro mari mehne macariro jira. ⁴¹ M̄sare potocāta nii nija. Yu yaina m̄sa jichu ñua paina m̄sare ti yoadohochu ñano Cohamacu tinare noano yoarohca. Core m̄sare ti sihōchū mahanocā ti wapachata tinare noano yoarohca Cohamacu ti ā yoari wapa —niha Jesu tinare.

Ñaare yoachū cua nina
(Mt 18.6-9; Lc 17.1-2)

⁴² Ā yoa Jesu ō sehe ni yahu namoha:

—Ahrirocā sehe jiriroro yuhure wacū tua ducariroro yahuihtja m̄sare. Pairo ahrirocā sehe jiriroro ñaare yoa dutiriro ñabiaro yuhd̄rohca. C̄airore to wam̄arū p̄jiria t̄acare d̄hte yo, p̄jiri mapu tirore ti cohāchū ñano wahaboa tiro. Ā jiro ahrirocā sehe jiriroro ñaare yoa dutiriro tiro sehe p̄jiri mapu ti cohāriro yuhdoro ñano yuhd̄rohca.

⁴³⁻⁴⁴ 'M̄u wamomaca mehne ñano yoacu ti wamomacare mu dute cohāboro seheta ti mu ñaa yoaa sehere duhuga. T̄ire duhueracu pichacaru wahaiha. T̄op̄re ne pichaca yatierara. [Ā yoa dachoa ne yarierara.] M̄u wamomacare mu cohāchū ti si dihta buti-bōa. Tuhsu, m̄hu sehe ā si jipaihta baharo Cohamacu mehne jiihca. P̄ua wamomaca mehne pichacaru wahacu mu ā wahachū ñaa yuhd̄aboa m̄hure. Ā jicu ti mu ñaa yoaa sehere duhuga.

⁴⁵⁻⁴⁶ 'M̄u dahporo mehne ñano yoacu ti dahporo cūhure mu dute cohāboro seheta ti mu ñaa yoaa sehere duhuga. T̄ire duhueracu pichacaru wahaiha. [T̄op̄re ne pichaca yatierara. Ā yoa dachoa ne yarierara.] M̄u dahporore mu cohāchū ti si dihta buti-bōa. Tuhsu, ā si jipaihta baharo Cohamacu mehne jiihca. P̄ua dahporo mehne pichacaru wahacu mu ā wahachū ñaa yuhd̄aboa m̄hure. Ā jicu ti mu ñaa yoaa sehere duhuga.

⁴⁷⁻⁴⁸ 'M̄u capariaca mehne ñano yoacu tiare orewe mu cohāboro seheta ti mu ñaa yoaa sehere duhuga. T̄ire duhueracu pichacaru wahaiha. T̄op̄re ne pichaca yatierara. Ā yoa dachoa ne yarierara. Tiare mu cohāchū tia dihta buti-bōa. Cū buhusehe capariaca mariapaihta baharo Cohamacu mehne jiihca. P̄ua capariaca mehne pichacaru wahacu mu ā wahachū ñaa yuhd̄aboa m̄hure. Ā jicu ti mu ñaa yoaa sehere duhuga.

⁴⁹ 'Ahri yahpai jina ñano yuhd̄nahca m̄sa. Pichacaru mari jichu marine pur̄ino seheta ñano yuhd̄nahca m̄sa. ⁵⁰ Moa noano coara. Moa coerachū, coa yoahito

basioerara. Moa coaeraro tí moa ne noaerara. Tí moare dohseahito basioerara. Moa noano to coaro seheta m̄sa cūhū ji coaina jiga. Tuhsu, paina mehne noano mehne jiga —ni yahuha Jesu tinare.

10

Ti namosānumiare cohāare yahuha Jesu
(Mt 19.1-12; Lc 16.18)

¹ Ā yoa tiro t̄op̄u jiriro waha, Judea yahpa cahapu su, Jordāo wama tiri ma pa buhusehe coaru suha. T̄op̄u to suchū ñua masa payu tiro cahapu cahmachuha tjao. Ti ā cahmachuchū ñano t̄o pano to buheriro seheta pari turi buheha tjao. ² To ā buhero watōi fariseo curua macaina wihiha. Jesure ñano to durucuchū tuho duamaha tina tirore yahusā duaa. Ā tuho duaa tina Jesure ō sehe ni sinitu ñuha:

—¿Mari namore cohāchū noabocari? ¿Mari dutia sehe t̄o seheta yoa dutijari, mu tuhotuchū? —ni sinitu ñuha tina.

³ —¿Dohse yoa dutiri Moise cjiro m̄sare? —ni yuhtiha Jesu.

⁴ —“M̄u namore cohā duacu papera pūi t̄ire joaga. Ā joacu ti p̄ure mu namore mu wari baharo ticorore cohā masina m̄hu”, ni joaa tiha Moise cjiro —ni yuhtiha fariseo curua macaina sehe.

⁵ Ti ā nichu tuhorō ō sehe ni yahuha Jesu:

—Cohamacu dutiare m̄sa yoa duerachū ñano ā ni joaa tiha Moise cjiro. ⁶ To ā ni joariro jipachata ahri yahpare ba-juamehneriro m̄no, numino cūhure yoaha. ⁷ Ā jiro m̄no to p̄cusumare cohā wijaa, to namono mehne jirohca. ⁸ Ā jia tina p̄aro jipaihta cū p̄acu yoaro sehe jira. Tina p̄aro yoaro seheta jierara. Cū p̄acu yoaro sehe jia nina. ⁹ Cohamacu to wamomaca d̄hte dutiina jira. Ā jia tinare duhueraro cahmana —niha Jesu tinare.

¹⁰ Ā ni tuhsu tiro to buheina mehne wuhupū sāa wahaha. Wuhupū sāa suu, ti namosānumiare cohāare to buheina sinitu ñuha tjao tirore. ¹¹ Ti ā sinitu ñuchū tiro ō sehe ni yuhtiha:

—To namonore cohāriro pacorore namo tiro, pacoro mehne ñano yoariro jira. Ā jiro to cohāricorore ñano wahachū yoaro nina. ¹² Ā yoa numino sehe to manunore cohāno, pairore manū tiro, tiro mehne ñano yoaricoro jira —niha Jesu tinare.

Macanacā ya cjihtire Cohamacure sini payoha Jesu
(Mt 19.13-15; Lc 18.15-17)

¹³ Ā yoa macanacāre Jesure ña payo dutia taa tinacāre Jesu cahapu na taa tiha. Ti ā na tachū ñua to buheina sehe tinacāre na tainare tuhtiha. ¹⁴ Ti ā tuhtichū ñano Jesu

suaha tina mehne. Ā suaro ò sehe niha tinare:

—Macanacã yu cahapu tajaro. “To cahai wahaena tjiga”, niëna tjiga tinacãre. Tinacã Cohamacure ti puhtoro tuhutura. Puhtoro Cohamacu to suho jiina ahrinacã yoaro sehe tuhoutuina baro dihta jira. ¹⁵ Potocã niita nija musare. Ahrinacã Cohamacu ti puhtoro cjihtore cahmana. Ti yoaro seheta musa cãhu Cohamacu musa puhtoro cjihtore cahmaerana, puhtoro Cohamacu to suho jihtina ne jisi musa —niha Jesu.

¹⁶ Ā ni tuhsu Jesu macanacãre na wua tjiãhno, tinacãre ña payoro, ò sehe niha:

—Ahrinacã noainacã wahajaro —ni sini payoha Cohamacure.

Pache puero Jesure sinitu ñuha
(Mt 19.16-30; Lc 18.18-30)

¹⁷ Ā yoa Jesu mahai to waharucuhu pairo sehe ñuroca wihi, to dahpori cahapu na tuhcuca caha suha tirore ño payoro.

—¿Ne, noariro buheriro, yuhu jipihtia dachoripe Cohamacu mehne ã jirucu duacu dohse yoacuhcari yuhu? —niha tiro Jesure.

¹⁸ To ã nichu Jesu ò sehe ni yuhtiha:

—¿‘Noariro’ ni pisujari muhu yuhure? Noariro sehe Cohamacu dihta jira. ¹⁹ Ahri Cohamacu dutiare masina muhu: Masare wajãena tjiga. Namo tiriropu paye numia mehne jiena tjiga. Yacaena tjiga. Mahñoa mehne pairore yahusãena tjiga. Paina yare mahño naena tjiga. Musa rucuhumare ño payoga. Ahri dutiare yoaihcã muhu —ni yahuha Jesu tirore.

²⁰ —Buheriro, yuhu tí jipihtiare wahma wahma tariro jiputa yuhducaera tih yuhu —niha tiro Jesure.

²¹ To ã nichu tuhoro Jesu sehe tirore cahã mehne ñuroca òre. Ā ñuroca òno, ò sehe niha:

—Mahanocã duhsara muhure mu yoa pahñohto. Jipihtiare mu yare duai wahaga. Ā yoacu jipihtia mu wapatari niñerure pjacuoinare waga. Mu ã yoachu payu mu ya noaa manopu, Cohamacu cahapu jiyuahca. Mu ã yoari baharo yuhu mehne macariro cjihto taga —niha Jesu tirore.

²² To ã nichu tuhoro tiro sehe payu pache cjuariro jiro tíre pjacuoinare wa duaeraro, cahya, jicoaeraa, waha wahaha.

²³ To ã cahyachu ñuno Jesu majareracu saro, to buheinare ñuroca ò, ò sehe niha:

—Pache pu puhtoro Cohamacu to suho jiropure ti waha duachu mijobiara —niha tinare.

²⁴ To ã nichu tuhoa tina sehe tíre tuho cuaa wahaha. Ā ni tuhsu Jesu pari turi ò sehe ni yahu namoha tinare:

—Coyea, jipihitina [Cohamacure wacũno marieno “Mari mu saro mari cjuaa mehneta noano yuhduhãhca”, ni tuhoutuina pache

puu] puhtoro Cohamacu to suho jiropure ti waha duachu mijobiara. ²⁵ Camello sehe awicã copacãre to sãa nuhri wijaa duachu basioerara. To ã jiro yuhdoro pache puero puhtoro Cohamacu to suho jiropure to waha duachu nu mijobiara —ni yahuha Jesu tinare.

²⁶ To ã nichu tuhoa tina sehe tuho cuu yuhduu waha, ti basi ò sehe niha:

—Cue, to nino seheta potocã jichu ne cãiro masunore yuhdoeraboca Cohamacu —niha tina ti basi.

²⁷ Ti ã nichu tuhoro Jesu tinare ñuroca ò, ò sehe niha:

—Masa ti basi ti mu saro yuhdu masierara. Wiho mejeta Cohamacu sehe masare pichacapu wahaborinare yuhdo masina. Tiro jipihtiare noano yoa masi pahñoriro jira —niha Jesu tinare.

²⁸ To ã nichu Pedro tirore ò sehe niha:

—Tuhosiniga. Sã sehe jipihtia sã yare cunocaa tii muhu mehne tana —niha tiro Jesure.

²⁹ To ã nichuta Jesu ò sehe niha:

—Potocã niita nija musare. Noaa buheare, yu yare yoana tana yuhure ño payona tana musa wuhusere, musa bahanare, musa pocsãnumiare, musa pohñare, musa weserire cunocarina jina, pjiro wapatanahca musa mipure. ³⁰ Ā yoana musa wuhuserire, musa bahanare, musa pocsãnumiare, musa pohñare, musa weserire, tó pano musa cjuariro yuhdoro mipure payu cjuanahca musa. Ā yoa paina musare ñano yoahca. Ā jina baharopure pa turupu jipihtia dachoripe Cohamacu mehne jinahca. ³¹ Mipure payu puhtoã jirina cjiri tí pjarure wiho jiina tjuanocahca. Ā yoa mipure payu wiho jiina jirina cjiri tí pjarure puhtoã cohtotaahca tjoa —ni yahuha Jesu tinare.

Pari turi Jesu to yariahtore, to masa wiaahtore yahuha

(Mt 20.17-19; Lc 18.31-34)

³² Ā yoa tina mahapu maja, Jerusalẽpu mujaa niha. Jesu ti panocã mu tãha. Ā to mu tãchu ñua to buheina ñu cuaa wahaha. Ā yoa ti baharo nãnu tiina sehe cuiro mehne nãnu tiha. Ā yoa Jesu doce to buheinare ti sahsero naaha tjoa. Ā naa tuhsu, masa tirore tí dohse yoahñare Jesu yahu ducaha tinare:

³³ —Tuhoga yuhure. Mipure Jerusalẽpu wahana nija mari. Tõpu masa yuhure masunore Cohamacu warocarirore ñaha, painapure yuhure waahca. Sacerdotea puhtoare, mari coyea judio masare buheina cãhure yuhure waahca. Ā jia yuhure wajã dutiahca tina. Ā wajã dutia judio masa jieraina sehene yuhure waahca. ³⁴ Ti ã wari

baharo tina sehe yuhure bujape, chachcho puti sihõ, tjana, wajãahca. Á yoa yu yariari baharo tia namu wahaboroi masa wijaa-hca —ni yahuha Jesu tinare.

*Santiago João mehne Jesure siniha
(Mt 20.20-28)*

³⁵ Á yoa Santiago, João mehne Jesu cahapu sãa, siniha tire. Tina Zebedeo pohna jiha. Á jia õ sehe ni siniha:

—Buheriro, sã sinino seheta sãre yoaga mahu —niha tina Jesure.

³⁶ —¿Dohse yu yoachu cahmajari masa? —niha Jesu tinare.

³⁷ —Jipihtina bui puhtoro jicu sãre mahu mehne duji dutiga. Cãiro mu potõ buhusehei paio mu cõ buhusehei duji dutiga sãre, mahu mehne puhtoã sã jihto sehe —niha tina Jesure.

³⁸ Ti á nichu tãhoro õ sehe ni yahuha Jesu tinare:

—Musa ñano yuhduhtore masierapanahta á sinina yuhure. ¿Mipure yu ñano yuhduhto seheta ñano yuhduna cãno pjabocari masa cãhu? —ni sinituha tinare.

³⁹ To á sinituchu tãhoa tina õ sehe ni yuhtiha:

—Cãno pjanahca —ni yuhtiha tina.

Ti á nichu Jesu õ sehe ni yahuha:

—Yu ñano yuhduhto seheta ñano yuhdunahca masa cãhu. ⁴⁰ Musa á yuhduhtina masa jipachuta, yuhu mehne dutihtinare, yuhu mehne dujihtinare bese masieraja yuhu. Ahrire yu Pucu sehe cahno tuhsure. Á jia to besehtina dihta yu potõ buhusehei yu cõ buhusehei dujiahca —niha Jesu tinare.

⁴¹ Á jia paina diez buheina Santiago, João ahriña puaro mehne susiniha ti á sinirire tãhoa. ⁴² Ti á susinichu ñano Jesu to buheinare pjiroca, õ sehe niha:

—Cohamacure masieraina puhtoã sehe ti masare dutia, purino mehne dutira. ⁴³ Musa sehe ne á yoasi masa basi. Diro masa mehne macariro masa bui puhtoro ji duaro, jipihtina tiro mehne macaina cahamacano yoaro sehe jia tiro cahmana tire. ⁴⁴ Á yoa diro masa mehne macariro masare dutiriro ji duarimo masa cahamacano yoaro sehe jia tiro cahmana tire. ⁴⁵ Tô seheta jiriro jija yuhu cãhu. Yuhu masano Cohamacu waro-cariro jipacuta ahri yahpãpãre yuhure masa yoadohohire masare sinii tai nierahi. Masa sehene yoadohoi tai nii. Á yoacu payu masa ya buhirire varia, wapabasai tai nii. Yu á yariaro mehne payu masare pichacaru wahaborinare yuhduchu yoai tai nii —niha Jesu tinare.

Bartimeore, capari ñuerarirore ñuchu yoaha Jesu

(Mt 20.29-34; Lc 18.35-43)

⁴⁶ Á yoa baharo tina Jericõpu sãha. Jesu to buheina mehne, á jichu paina masa payu mehne tí macai jiina ti wahachu tí macare ti yuhdu wahcãchu waro, Bartimeo sehe ti wahari maha duhtu cahai dujiha. Tiro Timeo macano capari ñuerariro jiro, masare niñerucãre á sinirucuriro jiha. ⁴⁷ Ti wahari maha duhtu cahai dujiro, “Jesu Nazare macariro tara”, ti nichu tãhoro, Bartimeo sehe õ sehe ni sañurucuha:

—Jesu, Davi cjiro panamino masare yuhdohtiro, pja ñuga yuhure —ni sañurucuha Jesure.

⁴⁸ To á nichu tãhoa masa payu Bartimeore “Dihta mariaha”, ni tuhtiha tina tire. Ti á ni tuhtichu tãhoro Bartimeo tó pano to sañurucuriro yuhdo curero sañurucu namoha tjõa:

—Jesu, Davi cjiro panamino masare yuhdohtiro, pja ñuga yuhure —ni sañurucuha tiro.

⁴⁹ To á ni sañurucuchu tãhoro Jesu sehe tjuarucu su, “Pjirocaga tire”, niha. To á nichu tãhoa tina sehe capari ñuerarirore õ sehe ni yahuha:

—Wahchega. Wahcãrucaga. Tiro muhure pjira —niha tina Bartimeore.

⁵⁰ Ti á nichu tãhoro to bui macari suhtirore tjuwe cõ, pu wahcãrucu su, Jesu cahapu sãrucu sãha. ⁵¹ Á jiro, Jesu sehe õ sehe ni sinituha tire:

—¿Dohse yu yoachu cahmajari mahu? —niha Jesu tire.

—Yu puhtoro, yuhure ñuchu yoaga —niha capari ñuerariro Jesure.

⁵² —Wahaga mahu. Mahu yuhure wacõ tuacu noariro wahara —niha Jesu tire.

To á nichu capari ñuerariro ñua wahaha. Á noariro waharo Jesu mehne maharu wahaa wahaha.

11

Jerusalẽpu sãha Jesu

(Mt 21.1-11; Lc 19.28-40; Jn 12.12-19)

¹ Á yoa tina Jerusalẽpu ti suhto panocã tãcu Olivo wama tidu duhtu cahai jiri maca Betfagã wama tiri maca cahai, á jichu Betania wama tiri maca cahai su mahtaha. Ti macari puã maca cahai Jesu sũro, to buheina puarore warocaro taro, õ sehe ni yahu quihõha:

² —Sĩ macapu wahaga. Tôpu sãna dõihã burrocãre ti duhte daporirocãre boca sãnahca. Tiro ne cãiro ti pisamahnoer-arirocã jica. Tirocãre bocana, yuta dare pjã, na tabasaga yuhure. ³ Musa tirocãre pjãchu ñano cãiro dohse jiriro, “¿Dohse yoana tana burrocãre duhte daporĩ dare pjãjari masa?”, to nichu tãhona, õ sehe ni yuhtiga tire: “Mari puhtoro burrocãre cahmarocasinire. Michapucacãta wiarohca tiro”, ni yahuga

tirore —ni yahu duti warocaha to buheina puarore.

⁴ To ā nichu waha, tī wuhu sopaca cahai burrocāre ti duhte daporirocāre boca. Boca, tirocāre pjāha. ⁵ Tirocāre yuta dare ti pjāchu űna tōi ducuina ō sehe ni sinituha tinare:

—¿Dohse yoana tana burrocāre duhte daporī dare pjājari mūsa? —ni sinituha tina.

⁶ Ti ā nichu tuhoa, tina sehe Jesu to niriro seheta yahuha tōi ducuinare. Ti ā ni yahuchū tuhoa tōi ducuina sehe “Naahga”, niha tinare. ⁷ Ā jia tina burrocāre Jesu cahapu na suha. Ti na sari baharo tirocā bui ti bui sāa suhtire ti pjūpaha payo tuhsuchū űno, Jesu sehe tirocā bui mūja pja, wahaha. ⁸ Tirocā bui to wahachū űna, masa payu ti bui sāa suhtire tjuwe na, to wahahti mahai saño cū muhtaha, Jesure űo payoa. Paina sehe camporu pūri tia dūpurire yuca dūpurire date na ta, to wahahti mahai duhu cūha.

⁹ Ā jia to pano wahaina, to baharo nūnu tiina mehne ō sehe ni sañurucuha:

—Ahrirore wahche payojihna. Ahrīro Cohamacu to warocarīro noano jijaro. ¹⁰ Mari űuchū Davi cjīro puhtoro to noano suho jīro seheta, ahrīro marine to suho jīhto cūhu noano jijaro. Mūano macarīro Cohamacu, mūhu tuarīro waro jira —ni sañurucuha tina.

¹¹ Ti ā yoari baharo Jesu sehe Jerusalēpu suha. Su, Cohamacu ya wūhupu sāa sūro, tī wūhu jīare jīpīhtīare űu pahñonocaha. űu tuhsu “űamichahapu waro jira marine” nia, Jesu to buheina doce buheina mehne Betaniapu wahaa wahaha.

Jesu hīgueracūre yaria dutīha
(Mt 21.18-19)

¹² Ā yoa pa dachoi tina Betaniapu jīina wahaa wahaha. Ā jiro Jesu sehe jūca baa, yoaropu hīguera wama tidure noano pūri tidure űno tu dichare macano wahamaha. ¹³ Dīcha mariaha. Dīcha tiri pja jieraro pūri dīhta jīha. ¹⁴ Ā jiro dīcha mariachū űno ō sehe niha:

—Ahdū dichare masa ne pari turi chūea tjījaro. Ne dīcha tīro tjījaro —niha Jesu.

To ā nichu to buheina sehe tuhoaha.

Jesu Cohamacu wūhure Cohamacu mehne durucurī wūhure yoa dutīha
(Mt 21.12-17; Lc 19.45-48; Jn 2.13-22)

¹⁵ To ā yoari baharo tina Jerusalēpu suha. Tōpu sūro, Jesu Cohamacu ya wūhupu sāa sūro pache duainare, nuchūina cūhure cohā wioha. Ā yoaro niñeru cohtotaa mesarīre yo wahcō na majare cū mūjaa tīha. Bujaare duaina ti dujīa pahtari cūhure āta yoaha. ¹⁶ Ā yoaro paye barore na sāa dutieraha

masare. ¹⁷ Tō sehe yoa tuhsu, Jesu ō sehe ni buheha tinare:

—Ō sehe nina Cohamacu yare ti joari pūi: “űu wūhu Cohamacu mehne durucurī wūhu wama tirohca. Ā jiro jīpīhtīro macaina ya wūhu cīhtō jirohca”, ni joaa tīha Cohamacu yare ti joari pūi. To ā nipachūta mūsa sehe ahri wūhu duana, mūsa basi cahma yacara mūsa —ni buheha tinare.

¹⁸ To ā ni buhechū jīpīhtīna masa sehe tuho chāa wahaha. Ā jia sacerdotēa puhtoa, sā judio masare buheina mehne tirore cui niha. Ā jia tina tirore ti wajāhti cīhtīre wacū macamaha. ¹⁹ Ti ā yoachū űamichahapu Jesu to buheina mehne tī macapu jirina cjīri wahaa wahaha.

Hīgueracū űaia wahaha
(Mt 21.20-22)

²⁰ Ā jia bohrearo mahapu maja taa, hīgueracūre űaha. Tu nuhtorīpu űai dūca, űaia wahaha tu. ²¹ Ture űno Pedro sehe wacūno ō sehe niha:

—Buherīro, űaga. Hīgueracū mū yaria dutīdū yaria wahari jira —niha Pedro.

²² To ā nichūta Jesu ō sehe ni yahuha tinare:

—Cohamacūre wacū tuaga mūsa. ²³ Potocā niita nija mū sare. Ahdū tūcūre pjīri mapu mūsa cohā dutīchū mūsa nirīro seheta ā waharohca. Cohamacūre noano mūsa wacū tuachū “űu sinirīro seheta ā waharohca”, mūsa ni tuhotuchū mūsa nirīro seheta ā waharohca. ²⁴ Ā jīcū ahriire yahūhtīja mū sare. Cohamacū mehne durucuna, tirore sinina, “űu sinirīro seheta warohca yūhure”, ni tuhotuga. Mūsa ā ni tuhotuchū űno Cohamacū mūsa sinīare warohca. ²⁵ Ā yoana Cohamacū mehne mūsa durucūto pano mū sare paina ti űano yoachū mūsa suari cjīrīre duhuga. Mūsa ā yoachū űno Cohamacū mūano macarīro mūsa űaa buhīrīre tiro cūhu sua duhurohca. ²⁶ [Mū sare űano yoainare mūsa sua duhuerachū mari Puca cūhu mūano macarīro mūsa űaa buhīri sehēre bosī tiro cūhu] —niha Jesu.

Sacerdotēa puhtoa, judio masare buheina, būcūna mehne Jesu mehne cahma sayoha
(Mt 21.23-27; Lc 20.1-8)

²⁷ To ā niri baharo tina Jerusalēpu wahaha tjoa. Ā jia Jesu Cohamacū wūhu to tinichū űna sacerdotēa puhtoa, sā judio masare buheina, būcūna mehne tiro cahapu sua tirore ō sehe ni sinitu űaha:

²⁸ —¿Dohseacu canure ā yoari mūhu? ¿Noa mūhure tīre ā yoa dutīri? —ni sinitu űaha tina Jesure.

²⁹ Ti ā nichū Jesu ō sehe ni yāhtīha:

—Musa sehere sinitu mahtaitja. Noano yuhare musa yuhtichu musare yahuhtja yuhu cahu. ³⁰ ¿João masare to bautisachu diro baro sehe tirore bautisa dutia tiari, musa tuhotuchu? ¿O Cohamacu dutiera tiari? ¿O masa sehe tirore dutia tiari, musa tuhotuchu? —ni sinituha tinare.

³¹ To ā nichu tina sehe ti basi ō sehe niha: “¿Dohse ni yuhtinahcari mari? ‘Cohamacu João dutia tiri jire’, mari nichu, ‘¿Dohseana Cohamacu João to dutipachuta tirore tuhoerari musa?’ niboca Jesu marine.

³² Ā yoa, ‘João to bautisachu Cohamacu sehe tirore dutierari jire’, mari nichu masa sehe suaahca mari mehne”, niha tina ti basi. “Potocāta João Cohamacu yare yahu mahtariro jira”, ni tuhotua tiha masa sehe. Ti ā ni tuhotuchu masia, João doca dahre duaeraha sacerdotea puhtoa cahu, “Masa suari”, nia. ³³ Ā jia tina Jesure ō sehe ni yuhtiha:

—João bautisa dutirirore sā masieraja — niha tina Jesure.

—Tí pja pinihta yuhu cahu ahrire yu yoare dutirirore yahueraja musare —niha Jesu tinare.

12

Naina dahra cohtaina quitire yahuha Jesu (Mt 21.33-46; Lc 20.9-19)

¹ Ā yoa Jesu to tuhotua mehne ō sehe ni piti dahre buhe ducaha tinare:

—Wese puro se dari cjihtire toaha. Toa tuhsu, sahrinore dapo, sere ti tu mutohiti copare saha, mari wuhacā dahreha tiro. Tuhsu, tí wesere painare cū bahusehe coa pahma cūno, tí wesere űu wihbo dutiha. űu wihbo duti tuhsu, pa yahparu wahaha tiro.

² Baharo se űiri pja jichu wese puro tirore dahra cohtarirore wese macaa to ya coa macaa dichare na dutiro warocamaha. ³ Ā jia tí wesere űu wihboina sehe tirore dahra cohtarirore űaha, cjāha. Ā yoa tuhsu tirore dahra cohtarirore se tōhorine waerapahta tjuaa dutiha tirore. ⁴ Ā jiro wese puro paio tirore dahra cohtarirore warocamaha tjoa. Ā jia wesere űu wihboina sehe tirore dahra cohtarirore dapure cami dahre, űano yoaha tina tirore. ⁵ Tuhsu, paio sehere to warocachu űu wihboina tirore wajāha. Payu paina cāhure ā dihta yoa mujāha. Paina sehere cjā, paina sehere wajāha tina.

⁶ Ā jiro wese puro macano dihta dūhsaha. Tiro to cahīriro jiha. Ā jiro to macanore warocaha juna, “Yū macu sehere űo payoahca”, nino. ⁷ To ā ni tuhotupachuta tina űu wihboina ti basi ō sehe ni durucuha: “Wese puro macano baharo ahri wesere cjuahitiro jira ahriro. Tirore wajājihna mari. Ā jiro ahri wese mari ya wese tjuarohca”, nimaha tina ti basi. ⁸ Ā nia tirore űaha, wajā,

wese dūhtu caharu na wahcā, cohānocahna tina tirore.

⁹ ¿Ne wese puro taro dohse yoarohcari tiro wesere űu wihboinare? Ō sehe yoarohca tinare: Tiro tinare wajāno, paina sehere wesere űu wihbo dutirohca. ¹⁰⁻¹¹ ¿Cohamacu yare ti joari pūre ahrire buherari musa? Ō sehe ni joa tiha:

“Ahriro Cristo tāca yoaro seheta jira.

Tācare wuhu dahreina ti cohāno seheta masa tirore cohāhca.

Ti ā yoapachuta mipare wuhu dahreina wuhare yoaa tí cū mahtari tācare ti cūno seheta Cohamacu tirore puhto sōre.

Cohamacu sehe ahrire yoare.

To ā yoachu űuna, ‘Noa yuhduara’, ni tuhotuja mari”,

ni joa tiha panopu. ¿Tire ne buherari musa? —niha Jesu tinare.

¹² To ā nichu tuhoa sacerdotea puhtoa, sā coyea judio masare buheina, bacuna mehne ō sehe ni tuhotuha: “Jesu wesere űu wihboina quiti mehne marine tuhtiro nina”, ni tuhotuha. Ā ni tuhotua Jesure űaha duamaha. Ā űaha duapahta masare cui niha. Ā cuia tirore cohā wahcā wahaha.

Fariseo curua macaina, Herode ya curua macaina mehne gobierno macaa wapare sinituha Jesure

(Mt 22.15-22; Lc 20.20-26)

¹³ Waha, tina fariseo curua macainare, Herode ya curua macaina cāhure Jesure sinitu dutia warocaha tjoa. Jesu űano to yuhtichu yoa duamaha tina, tirore yahusāa taa. ¹⁴ Ā jia Jesu caharu sua, tirore mahño cū sinitu űumaha:

—Buheriro, potocā durucuriro, mahño marieriro mu jichu masija sā. Cohamacu yare quihōno mu yahuchu cāhure masija sā. Ā yoa cūiro puhtoro waro to jipachuta tiro cāhure dórero marieno potota yahura muhu. Ā jichu sāre yahuga. ¿Roma macariro jipihtina bui puhtoro jirirore gobierno macaare marine waparo cahmajari, mu tuhotuchu? ¿Mari dutia tirore wapa dutijari, mu tuhotuchu? —ni sinitumaha tina Jesure.

¹⁵ Tí ā sinituchu tuhoro ti yahusā duaare masino ō sehe ni sinituha tinare:

—¿Dohseana yu űano durucuchu tuho duajari musa? Mipare niűeru ture na tahga. Tí ture űujihna —niha Jesu tinare.

¹⁶ To ā nichu tuhoa tina sehe cū ture na taha. Tí na wihichu Jesu ō sehe ni sinituha tinare:

—¿Diro baro masu wahājari ahri ture? ¿Diro baro wama wahājari? —ni sinituha tiro.

—César, masa bui puhtoro masu, to wama cahu wahāna —ni yuhtiha tina.

¹⁷ Tí ā nichu Jesu ō sehe ni yahuha tinare:

—Tí pja pinihta masa bui puhtoro yare tiro sehère waga. Cohamacu yare Cohamacu sehère waga —ni yahuha Jesu.

To á nichu tuhoa, tuho cuaa wahaha.

Saduceo curua macaina Cohamacu to masoare sinituha Jesure

(Mt 22.23-33; Lc 20.27-40)

¹⁸ Á yoa cáina Saduceo curua macaina Jesu cahapu wihia. Saduceo curua macaina sehe “Cohamacu yariainare masosi”, ni tuhotuina jimaha. ¹⁹ Á jia tina ó sehe niha tirore:

—Buheriro, ó sehe ni buhea tiha Moise cjiro: “Cáiro to wahmino namo tiriro pohna mariaparota to yariachu ñuno to bahurore to wahmino namono cjirore nuoano cahmana. Á yoaro to wahmino munano to pohna tiboro seheta pohna tiro cahmana to bahurore. Á jia to pohna to wahmino munano pohna yoaro sehe jahca”, ni joaa tiha Moise cjiro —niha tina Jesure.

²⁰ Tíre ni tuhsu, ahri quitireta yahu namoha Jesure:

—Cáiro masano jiha. Seis to bahana jiha. Ti wahmino sehe namo ti, pohna mariaparota yariaa wahaha. ²¹ Tuhsu, paio ro bahuro cahu to wahmino namono cjirore cjamaha. To á nuoari baharo to wahmino yoaro seheta pohna mariaparota yariaa wahaha tjoa. Á jiro ahriro bahuro to wahmino munano yoaro seheta pohna mariaparota yariaa wahaha tjoa. ²² Á dihta wahaha cáiro pohna waro. Ne pohna mariapahta yaria pihtia wahaha tina. Ti namono cjiro cahu ti baharota yariaa wahaha. ²³ ¿Ne, Cohamacu jipihtinare yariaina cjirire to masochu diro namono sehe jirohcari ticoro? Tina jipihtina ticorore namo tirina cjiri jiha. ¿Á jiro diro namono sehe jibocari ticoro pototi? —ni sinituha tina.

²⁴ Jesu ó sehe ni yuhtia tinare:

—Cohamacu yare ti joari püre, to masia cature ne masierara musa. Á jia musa tuhota sehe ne quihõno jierara. ²⁵ Yariarina cjiri ti masa mujari baharo tina anjao yoaro sehe jira. Tina musa namo tierara tópure. ²⁶ Yariarina cjiri ti masa wijaahto sehère musare yahuihtja: Tíre Moise cjiro noano yahu pahõho. To mahaducã jãri quitire ó sehe ni yahuha tiro: “Yuhu Abrahã, Isaa, Jacobo ti puhtoro tjija”, ni yahure Cohamacu yuhure”, ni joaa tiha Moise cjiro to joari tjui. ²⁷ Ti yariari baharo “Ti puhtoro tjija”, ni yahuha Cohamacu. Á niparota yariarina cjiri puhtoro jierara Cohamacu. “Ti puhtoro tjija”, to nia mehne catiina ti jichu masija mari. Tiro catiina puhtoro jira. Á jina “Yariaina masasi”, ni tuhota quihõno tuhoterara musa —niha Jesu tinare.

Cãno noa yuhdoro to dutiare yahuha Jesu
(Mt 22.34-40)

²⁸ Á yoa cáiro sã coyeya judio masare buheina mehne macariro tina cahapu wihi, ti cahma durucuchu tuhoha. Jesu to noano yuhtiare tuhoro ó sehe ni sinituha tirore:

—¿Cohamacu ya dutia noa yuhdoro di baro sehe jijari, mu tuhotuchu? —ni sinituha tiro Jesure.

²⁹ Jesu tirore ó sehe ni yahuha:

—Ahri dutiata paye dutia yuhdoro noa yuhdura: “Israe masa tuhoga. Cohamacu musa puhtoro yuhu cáirota jija. ³⁰ Tuaro musa yajeripohnari mehne, noano musa wacua mehne, musa tuaa mehne yuhure cahiga”, nina Cohamacu. ³¹ Ahri dutia baharo paye dutia noa yuhdura: “Mu basi mu cahino seheta mu cahai jiina cature cahiga”, nina Cohamacu. Ahri puaro dutia jipihtia paye dutia yuhdoro jira —ni yahuha Jesu tirore.

³² To á nichu tuhoro judio masare buheriro ó sehe niha:

—Á tjira. Buheriro, potocã nina muhu. Cohamacu cáirota jira. Pairo tiro yoaro sehe jiroro mariahna. Mu nia potocã tjira. ³³ Cohamacure tuaro mari yajeripohnari mehne, mari wacua mehne, mari tuaa mehne tirore cahino cahmana marine. Yu cahai jianare yu basi yu cahino seheta tina cature cahino cahmana yuhure. Wahiquinare wajã ju muo mari wari mehne mari ño payochu noa nimana. Ahri yuhdoro Cohamacure masa cature mari cahia noa yuhdura. Mu á nia potocã tjira —niha judio masare buheriro Jesure.

³⁴ To á noano yuhtichu tuhoro Jesu ó sehe ni yahuha tirore:

—Mahanocã dahsara mure Cohamacure mu noano masihto —niha tirore.

To á nichu tuhoa paina cuia, ne sinitu ñeraha tirore.

¿Diro baro coyeyo jijari Cristo?

(Mt 22.41-46; Lc 20.41-44)

³⁵ Á yoa Cohamacu wahu buhero ó sehe niha Jesu:

—“Cristo Davi cjiro panamino jira”, ni buhera mari coyeya judio masare buheina. ¿Dohse yoa á ni buhejari tina? ³⁶ Davi cjiro to basi Espiritu Santo to dutiriro seheta ó sehe ni yahuha tiha:

“Cohamacu yu puhtoro ó sehe nire: ‘Ói yu poto buhusehe dujiga.

Á jicu mure ñu tuhtinare mure yuhdugabasaiha yuh’, nire Cohamacu yu puhtoro”,

ni joaa tiha Davi cjiro. ³⁷ Á ni joaro Davi cjiro puhtoro tia tiha Cristore. ¿Davi cjiro Cristo ñuchano cjiro jiparota dohsearo Davi sehe puhtoro tiari Cristore? Cristo Davi cjiro puhtoro jira —ni yahuha Jesu.

To ã ni buhechu payu masa wahchea mehne tuhoha tireore.

Jesu judio masare buheina ti ñaare yahuha

(Mt 23.1-36; Lc 11.37-54; 20.45-47)

³⁸ Æ yoa tiro buhe namono õ sehe niha:

—Mari coyea judio masare buheina ti ñaare yoare noano ñuga. Æ jina ti yoaro sehe yoarena tjiga. Tina yoaa suhti sãa, masa ti ñarocaroi majarea, pache duaropu paina puhtoare noano ño payo ti sinino sehe ti piti bocasinichu cahmana tina. ³⁹ Æ cahmaina jia, mari judio masa buhea wuhusei noaa dujia dihtare duji duara. Tuhsu, bose namu jichu tó cãhure noaa dujia dihtare cahmana tina. ⁴⁰ Tina wapewahya numia ya wuhusere ti ya cãhure mana tí numiare. Æ yoaina jia, tina masa ti ñarocaroi yoari pja Cohamacu mehne durucumana masare ñu dutia. Ti Æ yoari buhiri paina bui curero tinare Cohamacu pjíro buhiri dahrerohca — niha Jesu tinare.

Wapewahyoro to warire yahuha Jesu
(Lc 21.1-4)

⁴¹ Æ yoa Jesu niñeru wihbori caro cahapu dujiha. Tí caropu masa ti niñeru duhu sãachu ñu dujiro niha. (Tí niñeru Cohamacu wuhure ti cahnochu ti wapahti jiha.) Æ jia pache puã tí caropu pjíro duhu sãaha. ⁴² Æ yoa wapewahyoro pjacoricoro tí caropu ta, puã tucãre duhu sãaha. Puã tu cã centavo posa jira. ⁴³ Tí tãire to duhu sãachu ñuno to buheinare pjirocaha:

—Potocã niita nija musare. Ahricoro wapewahyoro pjacoricoro sehe niñeru wihbori caropu duhu sãano paina jipihtina ti wari yãhdoro wahre ticoro sehe. ⁴⁴ Paina pache puã pjíro ti wapachuta ti ya pjíro dũhsara. Ahricoro sehe pjacoricoro jiparota jipihtia to chãhtire to nuchãboacãre wa pahñohre —ni yahuha Jesu.

13

“Cohamacu wuhu cohãri wuhu jirohca”, niha Jesu

(Mt 24.1-2; Lc 21.5-6)

¹ Æ yoa Cohamacu wuhũpũre ti wijaaachu cãiro buheina mehne macariro õ sehe niha:

—Buheriro, ñuga. Ahri wuhuse noaa tãa mehne ti yoaa wuhuse noacaa wuhuse jijari —niha tiro.

² To ã nichu Jesu õ sehe ni yahuha tinare:

—Ahri jipihtia mari ñuri wuhuse cjiri, ahri tãa cãhu cohõ pihitia wahaahca. Ne cãria tãca tjuasi —niha Jesu tinare.

Pihtiri dacho cjihtore yahuha Jesu
(Mt 24.3-28; Lc 21.7-24; 17.22-24)

³ Æ yoa Jesu Olivo wama tidu tũcũpu Cohamacu wuhu potoi jidũpu sũha. Tu bui dujiha. Tóí Pedro, Santiago, João, Andre

mehne ti sahsero jia, tina tireore õ sehe ni sinituha:

⁴ —Yahuga sãre. ¿Dohse jichu Æ waharohcari mu niriro sehe waharo? ¿Pihtiri dacho panocã to jichu dohse to waha dũcachu ñanahcari sã? —ni sinituha tina Jesure.

⁵ Jesu õ sehe ni yãhtihã:

—Noano yoaga musa. Tuhsu, paina ti mahñoare tuhoena tjiga musa. ⁶ Payu masa “Cristo jija yuhu”, ni mahñoina taahca. Ti Æ mahñochu tuhõa payu masa Cohamacu yare duhuahca.

⁷ Musa cahacãi masa paina ti cahma wajãchu tuhõnahca musa. Tuhsu, yoaropu cãhure ti cahma wajãchu tuhõrocannahca musa. Æ tuhõrocapanahca ne tíre pjíro tuhõtuena tjiga. Æ waharohca. Ti Æ yoachu pihtiri dacho cjihto dũhsasininhõca mini. ⁸ Tí pjare cã yahpa macaina pa yahpa macaina mehne cahma wajãahca. Æ yoa cãiro puhtoro yaina paio puhtoro yaina mehne cahma wajãahca. Tuhsu, pjaro yahpa ñuhminohca. Æ yoa payu masa juca mehne yariaahca. To Æ wahachu ahri yahpa macinare ti ñano yãhdũ namõhto dũhsasinina mini. Ñano yãhdũsiniahca.

⁹ To Æ wahachu ñana musa basi noano yoaga. Paina musare ñaha, ñano yoa dutia waahca paina puhtoapũre. Æ yoa judio masa mari buhea wuhusei musare cjãahca. Ti Æ yoachu bujua macari macaina puhtoa, ti bui puhtoa cãhu musare buhiri dahrea taa sinituahca musare. Yu yaina musa jiri buhirire paina musare yahusãhca. Æ jina yare yahunahca musa tinare. ¹⁰ Æ jia pihtiri dacho pano noaa buheare jipihtiro yahpari macinare yahuha buhea jiahca. ¹¹ Æ jina musare buhiri dahre dutia, buhiri dahre dutiro cahapu ti naachu tireore musa nihtire “Yahu masieraboca”, ni tuhõtuena tjiga musa. Ti pjare musa nihtire musare Espiritu Santo yahurohca. To Æ yahurire yahuga musa. Musa mu sãro durucusi musa. Espiritu Santo sehe musare durucubasarohca. ¹² Tí pjare cãiro to bahõrore wajã dutiro warohca. Pairo sehe to wahminore wajã dutiro warohca. Ti pũcãro to pohñare wajã dutiro warohca. Æ yoa ti pohna sehe ti pũcũsmare wajã dutia waahca. ¹³ Yu yaina musa jiri buhiri musare masa jipihtina ñu tuhtiahca. Æ ñano yãhdũpanahca yu yare musa ne cohãerachũ pihtiri dacho jichu musare yãhdõihca.

¹⁴ Æ yoa ñabiarõro Cohamacu yare ñano yoarõro ñunahca musa. Cohamacu ya wuhũ to ducuchũ ñunahca. Tóí tireore jieraro cahmana. [Panopu Cohamacu yare yahu muhtarõro Daniel cjiro tireore yahuro joaa tiha.] Tóí to ducuchũ ñana Judea yahparũ jiina tãyũcũpu duhti mũroca mũjaa

wahajaro. Ahri yu nirire noano masiga musa. ¹⁵ Soaro mehne muroca duhtijaro. Ti pjare ti wuhseri bui macaa waparipu jiina wuhu puhichapu jiare ti yare na wahaea tjijaro ti waha bahrañohto sehe. ¹⁶ Á jia ti pjare paina ti weseripu jiina ti bui macaa suhtire wuhupu jia suhtire na wahaea tjijaro ti waha bahrañohto sehe. ¹⁷ Ti pjare niji pocosanumia, ti pohnare pu numia cahu pjacuro wahaahca. ¹⁸ Á jina o sehe ni siniga Cohamacu: “Puhiro jichu á wahaero tjijaro”, ni siniga tirore. ¹⁹ Ti dachore masa nu nano wahaahca. Ahri yahpare to bajuamehneri baharo masa nano ti yuhduu jia tiha. Ti á jipachuta jipihtia ti puria yuhdoro pihtiri dacho jichu masa nabiaro yuhduahca. Á nano ti yuhdari baharo pari turi to sehe nabiaro yuhdusi ahri yahpai juna. ²⁰ Á jiro Cohamacu ti dachore mahaa dachoricá ti jichu yoarohca. To á yoaerachu ne cairo masuno yuhdueraboa. Á jiro to beserina ti yuhdusti cjihtire mahaa dachoricá á cüsininohca Cohamacu.

²¹ Ti pjare paina musare “Ñuga. Oi jira Cristo”, ti nichu tinare tuhoena tjiga. “Tói jira Cristo”, ti nichu cühare tuhoena tjiga. ²² “Cristo jija”, ni mahñoina, “Cohamacu yare yahu mahtaina jija”, ni mahñoina jahca ti pjareta. Á jia Cohamacu to beserinare mahñoa, tina bajuamehneare yoa ñoahca. Ti á yoa ñochu ñua, Cohamacu yaina caina tinare tuhoa “Potocá tjira” nia, Cohamacu yare pa tehe nia duhuboca. ²³ Ahrire yahuyuja musare to á wahahto pano. Á jina noano yoaga musa —ni yahuha Jesu.

Jesu yahpapare to tjua tahtore yahuha
(Mt 24.29-35, 42-44; Lc 21.25-36)

²⁴ Á ni tuhsu o sehe ni yahu namoha Jesu: —Ti dachori ti nano yuhdari baharo su dacho macariro, ñami macariro cahu buhria duhua wahaahca. ²⁵ Ti á wahachuta ñahpichoha poca muanoru jia poca boraa wahaahca. Á jia muano macaa yahpari tuaro ñuhmiahca. ²⁶ Ti pjata yuhu masuno Cohamacu warocariro taihtja. Yu á tachu muanoru yu tuaa mehne yu si sitea mehne muano macaa me bui ahri yahpapare yu tjua tachu ñuahca masa. ²⁷ Á jicu yu yaina anjoare jipihtioru ahri yahpapare warocaihtja. Á jia jipihtioru yu yaina yu beserinare tina naahca.

²⁸ Mipare higueraçure tuhotuga musa. Tu quti mehne musare piti dahre buheihitja. Tu yucucu püri tichu ñua, cühma mahanocá duhsachu masina musa. ²⁹ To seheta ahri jipihtia yu niri cjihtire ti á wahachu ñua, yu tjua tahto mahanocá duhsachu masinahca musa. ³⁰ Potocá niita nija musare. Ti pja macaina ti yariahto panore jipihtia yu

niriro seheta á waharohca. ³¹ Muano, ahri yahpa cahu pihtia wahaahca. Yu durucua sehe ne cohtotasi. Jipihtia yu niriro seheta á waha sohtori tiarohca.

³² Ti dachore yu tjua tahti dachore, ti hora cühare masieraja yuhu. Anjoa cahu tire masierara. Masa cahu ne masierara. Yu Pucu dihta tire masina.

³³ Musa cahu ti dachore masierara. Á jina noano yoaga. Noano cohtaga. (Cohamacu siniga musa.) ³⁴ O sehe cohtaga musa. Ahri quti mehne musare piti dahre buheihitja. Wuhu puro yoaroru to tinino seheta jira ahri. Tiro to wahahto pano to cahamacare wuhare cohta dutiha. Cainare ti dahrahtire caha. Á jiro wuhare ñu wi-hborirore tirore to tjua tahtore cohta dutiha. ³⁵ Á jina musa cahu noano wacu masi cohtaga. Wuhu puro to tjua tahtore tina ti masieraro seheta yuhu musa puhtoro yu tjua tahti dachore masierara musa cahu. Namichaparu, ñami dacho macaru, caraca to duri pja jichu, bohrearoru taboca. ³⁶ Yu á wacüenoca yu wihitore masina, yu yare á yoarucina jiga musa. Á yoa wuhare noano cohtaga. ³⁷ Á jicu musare yu nino seheta jipihtinare á nija musare. Noano wacu masi cohtaga —niha Jesu tinare.

14

Sacerdotea puhto, judio masare buheina mehne Jesure wajá duaha
(Mt 26.1-5; Lc 22.1-2; Jn 11.45-53)

¹ Á yoa ti pjare pasua wama tiri bose numu cjihto bucuerari paore ti chuhti numari cjihto pu dacho duhsasiniha. Ti pjare sacerdotea puhto, á jichu á coyera judio masare buheina mehne dohse yoa ti mahñoa mehne Jesure ñaha ti wajáhtore cahma suhduua niha:

² —Mari bose numari yuhdoro puro tirore ñahasiniena tjijihna, “Masa sua safiurucuri”, nina —niha tina ti basi.

Numino me sitia se mehne Jesure pio payoha
(Mt 26.6-13; Jn 12.1-8)

³ Á yoa Jesu cahu Betaniaru, Simo cami bucu baariro cjiro yu wuhupu jia. Toru ti churo watoi numino sehe alabastro mehne ti yoiare me sitia nardo wama tia sere posa tiriare na wihiha. Ti se sehe wapa buju niha. Á na wihiro, ticoro tiare poharoca, Jesu dapu bui pio payoha. ⁴ To á yochu ñua paina suaa waha, ti basi o sehe niha:

—¿Dohse yoaro ahricoro ahri me sitia co wapa bujuare á yoa sitejari? ⁵ Tire ticoro duaboa. Tire duaro tres cientos niñeru purine wapataboa. Á wapataro, ti niñerure pjacoinare waboa ticoro —ni cohtaha paina sehe ticoro to á yochu ñua.

Ā jia tina ticorore tuhtiha.

⁶ Ti ā nichu tuhoru Jesu tinare ō sehe ni yahuha:

—Ā niena tjiga ticorore. Yuhare ticoro noano yoaro nina. ⁷ Pjacuoina sehe musa mehne ā jirucuahca. Ā jina musa cahmari pja tinare wa masina. Yuhu sehe ahri yahpare musa mehne ā jirucusi. ⁸ To cjuaro puro mehne ticoro yuhare ā yoahre. Yuhare ti yahto pano yu pjacure cahnoyuro, me sitiare pio payohre ticoro. ⁹ Ā jicu potocā niita nija musare. Jipihitiro ahri yahparu noaa buheare ti yahuropu ahricoro mipure to yoarire yahuahca. Ti ā yahuchu tuhoa ticorore masa payu wacuahca —ni yahuha Jesu.

Juda Iscariote Jesure nu tuhtiinare to űohtore yahuha sacerdotea puhtoare
(Mt 26.14-16; Lc 22.3-6)

¹⁰ Ti pjareta Juda Iscariote wama tiriro doce to buheina mehne macariro Jesure to űohtire yahuro wahaha tirore nu tuhtiinare, sacerdotea puhtoare. ¹¹ To ā ni yahuchu tuhoa, sacerdotea puhtoatire tuhoa wahcheha.

—Muhare niűerure wanahtja —niha tina Judare.

Ti ā nichu tuhoru, tiro Jesure nu tuhtiinare to dohse yoa űohto cjihtore wacu macaha.

Jesu to buheina mehne to chu batoari namu jiha

(Mt 26.17-29; Lc 22.7-23; Jn 13.21-30; 1Co 11.23-26)

¹² Bucuauerari pāore ti chuā namari ducari namu sehe oveja pascua macaina cjihtire ti wajāhti namu jiha. Ti namu to buheina sehe ō sehe ni sinitu űuha Jesure:

—ĀMari pascua macaa chuhtire noho baroi cahnoyu dutirocaijari muhu sare? —niha tina tirore.

¹³ Ti ā nichuta Jesu sehe puaro to buheinare ō sehe ni yahu warocaha:

—Jerusalēru wahaga. Tōru musa sūchu co situ wuaro musare piti bocarohca. To piti bocachu tiro mehne wahaga. ¹⁴ Ā wahana tiro to suho sāari wuhuru suna, ti wuhu puore ō sehe niga: “ĀDī tah-tai yuhu yu buheina mehne pascua macaa chware chunahcari?” ni sinitu dutirocahre buheriro”, niga ti wuhu puore. ¹⁵ Musa ā nichu tuhoru, tōru muano macari tahtiare pjiri tahtiare, noano ti cahnoyuri tahtiapure musare űonohca wuhu puore. Tōi mari chuhti cjihtire dahrega musa —niha Jesu tinare.

¹⁶ To ā nichu tuhoa tina to buheina ti macaru wahaha. Tōru ti sūchu tinare to niriro seheta ā wahaha. Ā jia tina pascua macaa chware dahrega.

¹⁷ Ā yoa nahitia bora tachu Jesu doce to buheina mehne ti wuhupure suha. ¹⁸ Ti

wuhuru ti sari baharo, tina mehne mesapu churo Jesu tinare ō sehe ni yahuha:

—Potocā niita nija musare. Cūiro musa mehne macariro yuhu mehne chūrirota yuhare nu tuhtiinare űonohca yuhare —ni yahuha Jesu tinare.

¹⁹ To ā nichu tuhoa tina sehe cahyaha.

—ĀYuhuta jijari muhare űohtiro? —ni sinitu pihitaha tina cāina jipihitina Jesure.

²⁰ —Musa mehne macarirota jira tiro. Yu chūri wapai yuhu mehne soha chūriro tjira yuhare nu tuhtiinare űohtiro. ²¹ Panoru yuhare ti yahu joariro seheta yuhu masano Cohamacu warocariro yariaihca. Yuhare nu tuhtiinare űoriro pjacuro yuhdūrohca. Tiro to masa bajuerachu noaboa —niha Jesu tinare.

²² Ā ni yahu tuhsu, to buheinare suho churo, Jesu pāore na, Cohamacure “Noana”, niha. Ā ninota, ti curire nuha, witiha tinare.

—Ahrire na chuga. Ahri yu pjacu jira —niha tiro tinare.

²³ Ā ni tuhsu tiro sihnia posa tiri wahware na, Cohamacure “Noana” ni tuhsu, wahu tinare. To wachu tina jipihitina tīre sihni pihitaha.

²⁴ —Ahri yu di jira. Payu masa ti űaa yoari buhirire cohācu tacu yariaihca. Ā yariacu yu dire cohāihca. Cohamacu “Musare yuhdoihtja”, to ni cūiro mu sūchu yu ā yariaro mehne to niriro sohtiro tirohca. ²⁵ Potocā niita nija musare. Mipure ahri co, se core ne sihni namosi yuhu. Pu puhtoro Cohamacu musare to suho jichuru ahrire coā pari turi sihniihca tjoa —niha Jesu tinare.

Pedro Jesure to cohāhtore yahuha Jesu

(Mt 26.30-35; Lc 22.31-34; Jn 13.36-38)

²⁶ To ā ni tuhsūchu tina Cohamacure űo payoa cūno basaare basaha. Ti basa pahūori baharo, tūcu Olivo wama tiduru tina wahaa wahaha. ²⁷ Tōru suho sūro Jesu tinare ō sehe ni yahuha:

—Mipure musa jipihitina yuhare cohānahca. Ō seheta nina Cohamacu yare ti joari pūi yuhare yahuro: “Ovejare nu wihboriro yoaro sehe jirirore Cohamacu cohānohca. Ā to cohāchu to yaina oveja yoaro sehe jina duhti site wahcāa wahahca”, nina Cohamacu yare ti joari pūi.

²⁸ Ā yoa Cohamacu yuhare to masori baharo musa pano Galilearu wahayuihca yuhu —niha Jesu tinare.

²⁹ To ā nichu Pedro sehe ō sehe niha:

—Yuhu mehne macaina jipihitina ti cohā wahcāpachuta yuhu sehe muhare ne cohāsi —nimaha Pedro tirore.

³⁰ Jesu ō sehe ni yuhtiha:

—Potocā niita nija muhare. Micha űami pinihtare caraca puā taha to duhto pano

“Yuhũ Jesure masieraja”, niilha mũhũ. Tia taha ã niilha mũhũ —niha Jesu Pedrore.

³¹ To ã nipachũta Pedro õ sehe ni tuaro bisiro yuhtihã:

—Mũhũ mehne yuhũre ti wajã duapachũta “Jesure masieraja”, ne nisi yuhũ —ni yuhtimaha tiro Jesure.

Pedro to ã nichũ tuhoa tiro mehne macaina cãhũ ã dihta ni yuhtihã.

Getsemaní wama tiropũ Jesu Cohamacũre siniha

(Mt 26.36-46; Lc 22.39-46)

³² Æ yoa tina Getsemaní wama tiropũ wahaha. Tõpũ sũro, õ sehe niha Jesu:

—Cohamacũre yũ sinino watõĩ õĩ dujiyusiniga mũsa —niha to buheinare.

³³ Æ ni tuhsũ Pedrore, Santiagore, Joãore tina tiarore pji wahcãha. Tinare ã pji wahcãno, pjĩro tuhotu dũcaha tiro. Æ yoa ñano yajeripohna tihã.

³⁴ Æ cahyaro tó mehne macainare to pji wahcãinare õ sehe niha:

—Yuhũ ñano yajeripohna tii nija. Ñano purĩnõre tuhotu nija. Tĩ mehne variahto cua yuhũaro coa taca yuhũre. Õĩ tjuaga. Yũ cãno potõrĩa catiga mũsa cãhũ —niha Jesu tinare.

³⁵⁻³⁶ Æ ni tuhsũ tiro tõpũ mahanocã waha namo, yahpai caha sũro, Cohamacũre õ sehe niha:

—Mai, mũhũ jipihtiare yoa masina. Æ jicũ yũ ñano yuhũhtire yoa duaeracũ yõai tjia. Yũ ã nipachũta yũ cahmano sehe yõai tjia. Mũhũ sehe masina. Mũ cahmano seheta yoaga yuhũre —ni siniha tiro Cohamacũre.

³⁷ Æ ni tuhsũ, tiaro to buheina cahapũ wihiro, carĩinare boca wihihã tiro. Tinare ñano Pedrore õ sehe niha:

—Simo, ¿carĩĩ nijari mũhũ? ¿Cũ hora waro yũ cãno potõri cati masierari mũhũ?

³⁸ Noano yoaga mũsa. Mũsa mũ sũro quihõno yoa duamana mũsa. Wiho mejeta mũsa basi tĩre bihoerara. Æ jina Cohamacũre siniga ñano mũsa yoerahto sehe —niha Jesu Pedrore.

³⁹ Æ ni yahu tuhsũ pari turi waha, Cohamacũre siniha. Tõ pano to siniriro seheta siniha tjõa. ⁴⁰ Æ sini tuhsũro pari turi tina cahapũ wihihã tjõa. Æ wihiro carĩinare boca wihihã tjõa. Wũjo caha yuhũdũaha tina. Æ jia tina Jesure dohse ni masieraha. ⁴¹ Æ yoa pari turi Cohamacũ mehne to durucuro sũri baharo tina cahapũ wihĩ, tinare õ sehe niha:

—¿Carĩĩ, sosinina nijari mũsa? Tõ puro carĩga mũsa. Michapucacã yuhũre Cohamacũ warocarirõre ñano yoainare ti wahti pja mũ sũ tuhsũra. ⁴² Wahcãga. Basa wahana. Ñuga. Yuhũre ñũ tuhtiinare ñõhtiro õi tara —niha Jesu tinare.

Jesure ñũ tuhtiina tirore peresu yoaha

(Mt 26.47-56; Lc 22.47-53; Jn 18.2-11)

⁴³ To ã nino watõihã Juda, doce buheina mehne macariro cjiro wihihã. Tiro mehne masa payũ ñõsaa pjĩni, yucũ siri cjuaina cãhũ wihihã. Sacerdotea puhtõa, sã judio masare buheina, Æ jichũ bucũna, ti warocarina jiha masa sehe. ⁴⁴ Wahmanore Jesure ñũ tuhtiinare ñõhtiro sehe tiro mehne tahtinare õ sehe ni yahu quihõ tuhsũha:

—Yũ wahsupu wihmiriro tirota jirohca mũsa ñahahtiro. Tirore yũ wihmiri baharo ñahaga tirore. Æ yoana tirore noano ñahaga to duhtierahto sehe —ni yahu quihõ tuhsũha Juda sehe.

⁴⁵ Æ yahu quihõ tuhsũro wihirota Jesu cahapũ dõihã waha bahrañõha.

—Yũ puhtõro —ninõta wahsupu wihmiha tirore.

⁴⁶ To ã yoachũ ñũa tina Jesure ñahaha.

⁴⁷ Ti ã yoachũ ñũno cãiro Jesu cahapũ ducũina mehne macariro to ñõsari pjĩne tuãwe narõca, sacerdotea bui puhtõro cahamacũnõre to cahmonõre dũte pahrẽnocaha.

⁴⁸ To ã yoachũ Jesu õ sehe niha:

—¿Dohse jiro baro mũsa ñõsaa pjĩni mehne, yucũ tiri mehne tajari? ¿Yaca bucũrore mũsa ñahano seheta yuhũ cãhũre ñahana tana nijari? ⁴⁹ Dachõripe Cohamacũ wũhũpũ musare yũ buhe dujichũ, mũsa yuhũre ne ñahaerare. Mũsa ã ñahachũ ahri jipihtia ã waharo nina Cohamacũ yare ti ni joariro seheta —niha Jesu masare.

⁵⁰ To ã ni tuhsũchũ, Jesu buheina tirore cohã wahcã, jipihtina mũroca site wahcãa wahaha.

⁵¹ Æ yoa cãiro wahmũno suhti marieriro cãno coma yõsaro dihta comariro Jesu baharo ñũ nũnũ timaha. To ã ñũ nũnũ tichũ ñũa tirore ñahamaha. ⁵² Tirore ti ñahachũ ñũno to coma yõsarõre cohãnocã, suhti marieriro mũrocaã wahaha.

Puhtõa cahapũ naaha Jesure

(Mt 26.57-68; Lc 22.54-55, 63-71; Jn 18.12-14, 19-24)

⁵³ Æ yoa sacerdotea bui puhtõro cahapũ Jesure na wahcãha. Ti na sũri baharo sacerdotea puhtõa, bucũna, sã coyõea judio masare buheina cãhũ jipihtina cahmachũha. ⁵⁴ Tiro Pedro sehe Jesu baharo yoarõpũ nũnũ tihã. Æ nũnũ tiro sacerdotea bui puhtõa ya wũhũ cahapũ sũha. Æ sũro tiro tí wũhũre cohtaina surara mehne pichaca dũhtũ cahai sohma dujiha.

⁵⁵ Sacerdotea puhtõa, jipihtina paina puhtõa cãhũ Jesure wajã dutia taa, Jesu to quihõno yoerarire ti yahusãhtire wacũ macamaha. Wiho mejeta tĩre bocaeraha.

⁵⁶ Æ wacũ bocaerapahta payũ masa tirore ã yahusãmacanõcaha. Ti ã yahusãa potõcã

jieraha. Pairo soro ni, pairo soro niha. ⁵⁷ Ā yoa paina wahcārucū sū, Jesure ō sehe ni yahusāha tjoa:

⁵⁸ —Ahrīro ō sehe nire: “Yuhū ahrī wuhūre Cohamacū wuhūre masa ti dahreri wuhūre cohāihtja. Ā cohācū tia nūmū wahaborōi tī wuhūre pari turi yoihtja. Tī wuhū masa ti dahreri wuhū jisi”, to nichū sā tūhohi —niha tirore yahusāina.

⁵⁹ Tī ā ni yahusāpachūta ti yahusā cāhu potocā jieraha. Pairo soro ni, pairo soro niha tjoa.

⁶⁰ Tī ā nichū tūhoro sacerdotēa puhtoro ti watoī ducuriro wahcārucū sū, Jesure ō sehe ni sinituha:

—ĶAhrina mūhure ti yahusāpachūta tinare yuhti cahmaerajari mūhū? ĶMūhure ti yahusārire dohse ni yuhti cahmajari mūhū? —niha tiro Jesure.

⁶¹ To ā nichū tūhoparota Jesu āta tūhotunocaha. To ā yuhtierachū űno sacerdotēa bui puhtoro tirore sinituha tjoa:

—Cristo, ĶCohamacū warocarirota jijari mūhū? ĶNoariro Cohamacū macūno warota jijari mūhū? —niha tiro Jesure.

⁶² —Tiro tjija. Ā jina yuhūre masūnore Cohamacū warocarirore yū Pucū jipihtina bui jiro to potō buhusehei yū dūjichū űnahca mūsa. Ā yoa mūano macā me watoī yū tachū cāhure űnahca mūsa —niha Jesu tirore.

⁶³⁻⁶⁴ To ā nichūta sacerdotēa bui puhtoro sehe to sāari suhtirore to basi tūhrēnocaha painare “Sua yūhdūara”, ni űni masi dutiro.

—Cohamacūre űno durucuro nina ahrīro. To űno durucūare tūho tuhsūja mari. Ā jia tōpeinata yahusājaro ahrīrore. ĶĀ jina dohse yonahcari mari mipure ahrīrore? —niha sacerdotēa bui puhtoro paina puhtoare.

—Cohamacūre to űno durucuri buhiri wajānocano cahmana tirore —ni yuhtiha paina puhtoa.

⁶⁵ Ā ni yuhti tuhsū, cāina tina mehne macaina Jesure chahcho puti sihō mūja, to caparire dūhte ducata, tirore cĵā, dota mūjaha. Cĵā tuhsū ō sehe ni bujūpeha:

—ĶNoa jijari mūhure dotaro? űnerapaita yahuga sāre —ni bujūpeha tina.

Tī ā cĵā dotari baharo puhtoro yaina surara sehe tirore na wahcā, tina cāhu tirore ti wamomacari mehne űno cĵā namoha.

“Tirore masieraja”, niha Pedro Jesure
(Mt 26.69-75; Lc 22.56-62; Jn 18.15-18, 25-29)

⁶⁶ Ā yoa wuhū cahai jiri wapai noari wapai Pedro to jichū sacerdotēa bui puhtoro cahamacono wihiha. ⁶⁷ Ticoro Pedro to sohmachū űno tiro dihtare űrucuha.

—Nazare macariro mehne, Jesu mehne mūhū cūhū jihre —niha ticoro Pedrore.

⁶⁸ To ā nichū tūhoro tiro ō sehe niha:

—ĶDohse nimacanocaco nijari mūhū? Mū nirirore ne masieraja yuhū —niha Pedro ticoro.

To ā niri baharo Pedro sahrīno sopaca macari mahapū wahaha. Tōi to ducuchū caraca duha. ⁶⁹ Tōi to jichū űno cahamacono sehe ticoro cahapū ducuinare yahurocaha tjoa.

—Ahrīro cūhū Jesu buheina mehne macariro jira —niha ticoro.

⁷⁰ To ā nichū tūhoro Pedro pari turi ō sehe niha tjoa:

—Tirore masieraja yuhū —niha tjoa.

Baharo curero tōi ducūina Pedrore ō sehe niha:

—Potocā tjira. Mūhū Galilea macariro jira. Ā jicū tina mehne macarirota jira mūhū —niha tina tirore.

⁷¹ Tī ā nichū tūhoro tiro ō sehe ni yuhtiha:

—Potocāta Cohamacū mehne ni nija mūsa. Potocāta yū nierachū Cohamacū yuhūre buhiri dahrejarō. Tirore mūsa nirirore ne masieraja yuhū —ni yuhtiha Pedro tinare.

⁷² To ā nichūta caraca duha tjoa. To ā duchū tūhoro Jesu tirore to nirire wacūha: “Caraca pūa taha to duhto pano mūhū yuhūre ‘Jesure masieraja’, ni ihca mūhū. Tia taha ā ni ihca mūhū”, Jesu to nirire wacūha Pedro sehe. To ā nirire wacūno, tuaro tiirucūha Pedro.

15

Pilato Jesure sinituha

(Mt 27.1-2, 11-14; Lc 23.1-5; Jn 18.28-38)

¹ Ā yoa bohrearopū sacerdotēa puhtoa, bucūna, sā judio masare buheina, jipihtina paina puhtoa mehne cahmachu, durucuha Jesure ti yoahtire masia taa. Tirore ti wajāhtore durucu cahno tuhsū, Jesure dūhte, na wahcā, Pilatore waha tirore. ² Tirore ti na sū wachū űno Pilato tirore ō sehe ni sinituha Jesure:

—ĶPotocāta judio masa ti puhtoro tjijari mūhū? —ni sinitu űaha tiro Jesure.

—Āja. Mū nino seheta tirota jija —ni yuhtiha Jesu.

³ Ā yoa sacerdotēa puhtoa payū ni yahusāha tirore. ⁴ Tī ā ni yahusāchū tūhoro Pilato tirore ō sehe ni sinituha tjoa:

—Ahrina mūhure payū yahusāa nina. ĶTī ā yahusāpachūta dohse yoaucū ne yuhtierajari mūhū tinare? —niha tiro.

⁵ To ā nipachūta Jesu ne pari turi yuhti namoeraha. Ā jiro Pilato cūaa wahaha.

Jesure wajā dutiha

(Mt 27.15-31; Lc 23.13-25; Jn 18.38-19.16)

⁶ Cuhmaripe pascuaripe masa yairo cjihtore cãiro peresupũ jirirore, masa ti wio dutirirore Pilato ã wiobasa mujaa tiha. ⁷ Tĩ pjare Barrabá wama tiriore peresupũ jiha. Tiro puhtoore cohã duaina, masare wajãina mehne macariro jiha. ⁸ Æ jia masa payũ Pilato cahapũ sãa, tirore õ sehe ni siniha:

—Cuhmaripe sãre mũ yoarucuriro seheta yoaga sãre. Cãiro peresupũ jirirore sãre wiobasaga —niha tina.

⁹ Ti ã nichuta Pilato tinare õ sehe ni sinitu ñuha:

—¿Ahriro Jesure masa judio masa puhtorere ya wiobasachũ cahmajari masa? —ni sinitu ñuha masare Jesure wio duaro.

¹⁰ Jesure masa ti cahĩchũ ñua sacerdotea puhtoã cãhũ tirore ñu tuhtiha. Æ ñu tuhtia tirore waha Pilatorũre. Æ jiro masa ti cahĩri buhiri sacerdotea puhtoã ti ñu tuhtirire ti peresu yoa dutichũ masino Jesure wio duamaha Pilato. ¹¹ To ã wio duapachuta sacerdotea puhtoã masare Jesu mehne suachũ yoaha. Õ sehe ni dutiha tinare: “Jesu wijaaachũ cahmaeraja. Barrabá sehese wioga”, ni dutiha masare. ¹² Æ jiro Pilatore Barrabãre ti wio dutiri baharo Pilato sehe tinare õ sehe ni sinituha tjoa:

—¿Ahriro judio masa ti puhtore masa niriro sehese dohse yoahicari yuhũ masa ã nichũ? —ni sinituha tiro.

¹³ —Crusapũ cãã puha wajãga tirore —ni sañurucuha masa.

¹⁴ —¿Yaba barore ñaare yoari ahriro masa ã ni sañurucuchũ? —ni sinitu namoha tinare. To ã nichũ tuhoa tina sañurucu namoha tjoa:

—Crusapũ cãã puha wajãga tirore —ni sañurucuha tina.

¹⁵ Ti ã ni sañurucuchũ tuhorõ Pilato sehe masare wahchechũ yoa duaro Barrabãre peresupũ jirirore wio dutiha masa ti wio dutirirore. Tirore to wio dutiri baharo, Jesu sehese ñano tjanaye dutiha. Tirore ti tjanayeri baharo, tirore surarare wiaha, crusapũ cãã puha wajã dutiro.

¹⁶ Æ yoa surara Pilato ya wuhũ puhichapũ pretorio wama tiri wuhũ puhichapũ tirore na sãa suha. Na sãa su tuhsũ, tina mehne macaina surarare pjiroca, cãnoi cahmachu dutiha. ¹⁷ Cahmachu tuhsũ, tina puhtoro ya suhtiro yoaro sehe bajuri suhtirore Jesure sãa, pota sorore yoa, ti sorore to dapu bui duhu payoha. ¹⁸ Æ yoa tuhsũ õ sehe ni bujũpeha tina tirore:

—Noano tagã. Judio masa puhtoro noano tagã —ni bujũpeha.

¹⁹ Æ niata yucucũ mehne to dapure cãã mujã, tirore chahcho puti sihõ mujaha tina. Tuhsũ, cua pisaro yoaina yoaro seheta tirore na tuhcuã caha sũ, ño payoro sehe yoaa, bujũpeha tirore. ²⁰ Æ yoa bujũpe tuhsũ

ti sãari suhtirore tjuwe naroca, to ya suhti sehese tirore sãa, tirore crusapũ cãã puha wajãa waha, naa wahaha tina.

Tina Jesure crusapũ cãã puha, wajãha
(Mt 27.32-44; Lc 23.26-43; Jn 19.17-27)

²¹ Jesure ti ã naano watoĩ, tõi wahariro Simo Cirene macariro campopũ sãriro, tina cahapũ to wihichũ ñua surara sehe tirore Jesu to wuhari crusare wua wahcã dutiha. Alejandro, Rufo puaro puãro jiha Simo sehe.

²² Baharo, Gólgota wama tiropũ Jesure na suha. Gólgota nino, “Dapu cohã”, nino nina. ²³ Tõpũ tirore ti na sãri baharo, se core, mirra wama tidũ co mehne ti morea core Jesure wamaha. Wiho mejeta tiro sehe ti core sihni duaeraha. ²⁴ Baharo tina Jesure crusapũ cãã puha dapoha. Cãã puha dapu tuhsũ, to sãa suhti cããrore ti basi cahma witia taa, “¿Noa yaro jirohcari õ?” ni masia taa, docapea poca mehne docape mujaha tina.

²⁵ Jesure crusapũ ti cãã puhachũ tia hora waro duhsasinaha cohari pja to suhto. ²⁶ Æ yoa crusapũ õ sehe ni joari pjine duhu õha tina tirore ti yahusãrire yahu duaa. “Ahriro judio masa bui puhtoro jiriro jira”, ni joaha tina ti pjine. ²⁷ Æ yoa puaro yaca buãna Jesu cahai paye pjĩnĩpũ crusarĩpũ ti cãã puha daporina jiha tina. Cãiro to potõ buhũsehei, paio to cõ buhũsehei cãã puha dapoha tina cãhũre. ²⁸ [Ti ã yoachũ panopũ Cohamacũ yare ti yahu joariro seheta ã waharo niha. Õ sehe ni joaa tiha: “‘Dutiare yuhduũcaina mehne macariro jira’, ni tuhoture masa tirore”, ni joaa tiha panopũ.]

²⁹ Æ yoa crusari cahai yuhdu wahcãina Jesure ñu, ti dapu cocare yurerũca, tirore ñano ni durucuha:

—Noana. Noana. ¿Cohamacũ wuhũre cohã, tia dacho wahaborõĩ pari turi ti wuhũre dahrehtiro jajari muhũ? ³⁰ Æ jiriro jicũ, mũ basi dujiaga. Æ jicũ mũ basi yoadohoga. Æ jji yuhdu witiũca muhũ —ni bujũpeha tina.

³¹ Ti yoaro seheta sacerdotea puhtoã cãhũ sãã judio masare buheina cãhũ tirore ã ni bujũpeha. Æ ni bujũpeã õ sehe niha ti basi:

—Tiro painare yuhdoriro jiparota to basi yuhdo masierara: ³² “Cristo, Cohamacũ warocariro Israe masa puhtoro jija”, ni mana tiro. Æ jina to basi to duji tachũ ñua tirore wacũ tuãnahca —ni bujũpeha tina.

Æ yoa yaca buãna tiro cahai ti cãã puha õrina cããro cãhũ to seheta tirore ñano ni bujũpeha tina cãhũ.

Jesu yariaa wahaha
(Mt 27.45-56; Lc 23.44-49; Jn 19.28-30)

³³ Æ yoa cohari pja jichũ tia hora waro jipĩhtiropũ nahitiano wahaha. ³⁴ To nahitia duhuchũ waro Jesu tuaro sañurucuha:

—Eloi, Eloi, ¿lama sabactani? —niha tiro.

Ā nino ō sehe nino niha. “Yū Cohamacu, yū Cohamacu, ʔdohseacu yūhare cohāri māhu?” nino niha.

³⁵ To ā nichu tūhoa cāina tōi ducuiua ō sehe nimaha:

–Tuhoḡa mūsa. Cohamacu yare yahu māhtarirore Elia cjirore pjirocaro nina –nimaha tina.

³⁶ Ā jiro cāiro tina mehne macariro wiḡmi nari suhtere vino suēa core to sohari suhtere na mūroca, yucucu sohtoapa duhte ō, Jesure wiḡmi dutiha. Ā wiḡmi dutiro, ō sehe nimaha:

–Depusinia. Elia cjiro wiḡi aḡrirore to na bororo tachū űusiniḡihna mari –nimaha tiro painare.

³⁷ To ā niri baharo Jesu sehe tuaro sañurucu, yariaa wahaha. ³⁸ To yariachūta Cohamacu wūhu macari suhtiro tōre to jiri tahtia waropu ti ducataro suhtiro dacho macai bui sehe tūhnu bora ta, pua cahsaro tūhnūroca yoḡa suā wahaha. ³⁹ To ā yariachū űūno surara pūhtoro Jesu to wahāno potoi ducuriro ō sehe niha:

–Potocā tjiro jimana. Aḡriro Cohamacu macanota jiri jira –niha tiro.

⁴⁰ Ā yoḡa yoaropu ducua numia cāhu Jesure űūrocarucua niha. Tī numia mehne María Magdalena jiha. Pacoro María wama tiricoro cāhu jiha. Ticoro sehe José, to bahuro Santiago ti pocoro jiha. Pacoro Salomé jiha. ⁴¹ Tī numia Jesu yahuare quihōno tūhoa numia jia, Galilea yahpai to jisinichū tirore piti tī, yoadohoa tīha. Tī numia mehne payū paye numia cāhu Jerusalēpu Jesu to suho tarina numia jiha.

Jesu pjacure masa copapu cūha
(Mt 27.57-61; Lc 23.50-56; Jn 19.38-42)

⁴²⁻⁴³ Ā yoḡa tī dacho to yariari dacho Sabado pano judio masa sā sori nūmu pano jiri dacho jiha. Ā yoḡa Pascua macaa cjihtire ti cahnori dacho jiha. Tī űamihta José Arimatea macariro cuiro marieno Pilato cahapu suha Jesu pjacure sinino suro. José judio masa sā pūhtoa mehne macariro, pūhtoa tī cua pisaro űūroro waro jiha. Tiro pūhtoro Cohamacu masare to suho jihtore cohtaro niha. ⁴⁴ Ā yoḡa José Pilatore to ā sinichū tūhoro, tūho cuāa wahaha Pilato sehe. “ʔJesu yaria tuhsuari?” ni tuhoturo, cuāa wahaha. Ā jiro surara pūhtoro pjiroca ō sehe niha tirore:

–ʔPotocāta Jesu yariaa wahari? –ni sinituha tirore.

⁴⁵ To ā nichu surara pūhtoro ō sehe ni yūtiha:

–Āja. Yariaa wahahre –niha.

To ā nichū tūhoro, Pilato Jesu pjacure wa dutiha Josére. ⁴⁶ To ā wa dutiri baharo José noari suhtirore nuchūbasaha. Nuchūbasa

tuhsu, Jesu pjacu cjirore na boro, suhtiro mehne wahma, masa copapu tūcai ti sahari copapu to pjacure siō sāa payoha. Siō sāa payo tuhsu, tī copa cahai jiria tācare pjiiria tācare tju turē wahcā, tī copare biha dapoha. ⁴⁷ María Magdalena, ā jichū María José pocoro Jesure ti na sāa duhu payorirore űūha.

16

Jesu masa wijaaha

(Mt 28.1-10; Lc 24.1-12; Jn 20.1-10)

¹ Ā yoḡa Sabado dacho yūhdūri baharo, sā sāari baharo, María Magdalena, Salomé, ā jichū María Santiago pocoro, tina tiaro numia wisōa me sitia core nuchūha Jesu pjacure wisōa taa. ² Ā jia domingo bohrea mūja tachū Jesure ti duhu payori copapu űūa wahaha tina. ³ Tī copa cahapu waharucua, ō sehe niha tina ti basi:

–ʔTī copare bihari tācare noa marine pʔōbasarohcari na? –niha tī numia ti basi.

⁴ Baharo tī copa cahapu suā, tī copare bihari tācare, pjiiria tācare ti nawe cūriare űūha tina. ⁵ Ā űūa tī copapu sāa wahaha. Tōpu suā, cāiro wahmūnore ti poto buhūsehei dujirirore, yehsiri suhtiro sāarirore űūa, cuāa wahaha tina. ⁶ Tī ā cuachū űūno, tiro sehe ō sehe niha tī numiare:

–Yūhare űū cuāena tjiḡa. Jesu Nazare macariro, crusapu ti cā puha wajāriro cjirore mūsa macana nimana. Wiho mejeta tiro sehe masa wijaa tuhsūhre. Ōre mari-ahna. Tirore ti duhu payoro cjirore űūḡa. ⁷ “Tiro mūsa pano Galileapu wahayuhto jiyuhti. Tōi to niriro seheta mūsa tirore űūhtina jiyuhti”, ni yahuna wahaga to buheinare, Pedro cūhare –ni yahu dutiha wahmūno tī numiare.

⁸ To ā nichū tūhoa tina cui, tetere, masa copa cahai jirina mūrocaa wahaha. Ā cuia painare yahueraha.

Jesu María Magdalenare bajuaha
(Jn 20.11-18)

⁹ [Ā yoḡa Jesu sehe domingo űamicunucā to masa wijaari baharo, María Magdalenare to siete watīa to cohānohricorore tiro bajua māhtaha. ¹⁰ Jesu mehne macaina cjiro sehe to yariachū űūa, tuaro cahya, tiia niha. Ā ti tiuro watōi, María Magdalena sehe Jesure to űūrire tinare yahuro samaha. ¹¹ “Jesu catihre. űūhi yūhu”, ni yahumaha ticoro. To ā ni yahupachūta, tina sehe ticorore ne tūho duaeraha.

Jesu to buheinare bajuaha
(Lc 24.13-35)

¹² Baharo pūaro tina mehne macaina masa marienopu ti tinichū Jesu soro bajiuro tina cūhare bajuaha tjoa. ¹³ To ā bajuachū űūa tina tjuā waha, paina Jesu

yainare tíre yahuha. Ti ã ni yahupachuta tina cáhure tuho duaeraha.

Jesu to yare buhe dutiro warocaha to buheinare

(Mt 28.16-20; Lc 24.36-49; Jn 20.19-23)

¹⁴Baharo to buheina oncere mesa cahapu ti chu dujiro wato, tinare bajuaha tjoa Jesu. Tirore ñarinare ti yahuchu ti tuho duaerari buhiri, tirore ti noano wacū tuaerari buhirire masino, tiro tuhtiha tinare. ¹⁵ Æ tuhti tuhsu, tinare õ sehe niha:

—Ahri yahpa jipihtiropane ahri yu ya quti noaa buheare jipitina ahri dacho macainare noano yahu site pahõna wahaga. ¹⁶ Yuhure wacū tuainare ti bautisarinare pichacapu wahaborinare yuhdorohca Cohamacu. Tuhsu, yuhure wacū tuaeraina Cohamacu to buhiri dahrehtina pichacapu wahahtina jiahca. ¹⁷ Æ jia yuhure wacū tuaina yu tuaa mehne õ sehe yoaahca: Yu tuaa mehne, yu wama mehne watiare cohã wioahca. Tuhsu, wahmaa duserire durucuahca. ¹⁸ Æ yoa agãare ti ñahachu, jipitia ñima dohse jia ñimare ti sihnichu, tinare ne purisi. Æ yoa dohatiina bui ti wamomacarine ti ña payochu tina noaina wahaahca —ni yahuha Jesu to buheinare.

Jesu mnanopu mujaa wahaha

(Lc 24.50-53)

¹⁹ Æ ni yahu tuhsu mari puhtoro Jesu mnanopu mujaa wahaha. Tõpu sũro Cohamacu poto buhusehei dujiha tiro mehne puhtoro jiro. ²⁰ Æ jia tina jipihtiropu noaa buheare Cohamacu masare to yuhduchu yoahiti buheare buhea wahaha. Ti ã buhechu mari puhtoro tinare yoadohoha. To tuaa mehne yoa ño masichu yoaha tinare, masare to ya buheare tuho dutiro. Tó puro tjira.]

San Lucas

1-3 Puhtoro Teófilo, ahrire mu buhehti cjihtire mahure joarocai nija. Jesu sā mehne jisnino to yoari cjiire payu paina joa dāca tuhsure. Wahmanopure Jesure űina cjiiri, to yare buheina cjiiri ti ni yahuriro seheta paina tīre joa dāca tuhsure. Ā jicu ahri jipihitiare noano masi pahño duacu buhei. Ā jicu yahu cūhu tīre noano joa duaja mu buhehti cjihtire yoacu tacu. ⁴ Jesu yare yahuina mahure buhe tuhsure. Tīre noano mu masi namohto sehe ahri tjure mahure joarocai nija.

João masare bautisahtiro to masa bajuhtire anjo yahuha

⁵ Herode Judea yahpa macaina puhtoro to jichu cūiro sacerdotē Zacaria wama tiroto jia tiha. Ā jiro Zacaria to ya curua macaina sehe sacerdotē curua Abías cjiro ya curua jiha. Zacaria namono cūhu sacerdotē Aarō cjiro panamañono ji turiaricoropu jiha. Ticoro Elisabe wama tiricoro jiha. ⁶ Tina puaro Cohamacu dutiare noano yoa pahñoina ti jichu űino, “Ahriina yu cahmano seheta ā jia tirucura”, ni űaha Cohamacu tinare. ⁷ Ticoro Elisabe ne pohna marienicoro jiha. Ā jia tina puaro ne pohna marieina ji, bucana waro jiha.

⁸ Ā yoa sacerdotē ti dahraare dahraa taa, ō sehe yoaā tiha: Dahra muhtari curua cjiro pa curua mehne cahma cohtota mujaa tiha. Ā jia Zacaria ya curua macaina dahrahti dachori jichu, tina dachoripe sacerdotē ti dahraa tirucururo seheta Cohamacu ya wuhuru dahraa taa niha. ⁹ Sacerdotē Cohamacure ti űo payori mesapu incensore me sitia pohcare jūhtiro cjihtore besea taa, docapea mehne besea tiha. Ā yoa ti quihōri dacho jichu Zacaria ya curua macaina me sitiare jūhtirore besea taa docapeha. Ā docapea Zacariare beseha. Ā jiro tiro puhtoro Cohamacu ya wuhuru sāa wahaha me sitiare jāno waharo. ¹⁰ Ti wuhuru tīre to jāno watōi jipihitina masa sehe sopacaru Cohamacure sinia tiha. ¹¹ Ti pjare Cohamacu yairo anjo Cohamacure űo payori mesa potō buhusehei bajuarucu saha Zacariare. ¹² To ā bajuachu űino Zacaria tirore űi cna yuhūa wahaha. ¹³ To ā cuachu űino anjo tirore ō sehe ni yahuha:

—Zacaria, cuii tjiga. Cohamacu mu sinirire tuhore. Ā jina mipure masa pohna tinahca. Masa macu cjihto masa bajuarohca. To bajuachu “João” ni wama pisuga tirocāre. ¹⁴⁻¹⁷ “Tiro yu tuaa mehne payu noaare yoarucururo jira”, ni űnohca Cohamacu mu macure. Tiro to masa

bajuari baharo vinore, sihbiore cāhure sihnisi. Ā jiro tiro to masa bajuahito pano Espiritu Santo to niriro sehe yoariro jirohca tiro. Espiritu Santo tiropure sāarucu su tuhsu ā baju yoarucurohca tiro mehne. Ā yoa payu Israe masare Cohamacu mari puhtorore cahmaeraina cjiire noano cahmachu yoarohca mu macu. Mari puhtoro to tahto pano Elia cjiro Cohamacu yare yahu muhtariro to buheriro seheta Espiritu Santo to yoadohoro mehne Cohamacu to tuaa mehne mu macu cāhu buherohca. Ā buhero ti pucsuma ti pohna mehne űano jimarinare ti noano cahma cahī jichu yoarohca. Ā yoa Cohamacure yuhdūacaina cjiiri cāhure noano űo payoa mehne yūhtichu yoarohca. Ā buhero mari puhtoro Cohamacu yaina cjihtire yoarohca tiro. Ā jicu to masa bajuari baharo muhu wahcheihca. Payu paina cāhu wahcheahca —niha anjo Zacariare.

¹⁸ To ā nichu tuhoro Zacaria sehe ō sehe ni sinituha anjore:

—Sā bucana jija. Ā jicu mu niri potocā jichu dohse masicuhcari yuhū? —niha tiro.

¹⁹ To ā nichu anjo sehe tirore ō sehe ni yahuha:

—Yuhu Gabrie wama tiroto jija. Cohamacu cahamacuno to cahai ducururo jija yuhu. Cohamacu ahri noaa quitire yahu dutiro, mu cahai yuhure warocare. ²⁰ Yu yahuriro seheta potocāta waharohca. Yu ā nipachuta yuhure muhu potocā tuhoerare. Ā jicu mipure muhu durucu masierariro wahai-hca. Mu macu to bajuari baharo durucuihca tjoa —niha anjo Zacariare.

²¹ Sopacaru jiina masa Zacariare cohtaa niha. “Ā Dohse jiro baro tiro Cohamacu wuhuru jiro, so wijaa taerajari?” ni, cohtaa niha masa tirore. ²² Tuhsu, tiro wuhuru jiroto wijaa wihi, tina mehne durucu masieraha. “Tiro Cohamacu wuhūi bajuare űino niboca”, ni tuhotu masiha tina. Ā jiro tiro durucu masierariro jiro to wamomacari mehne yoa cayoha masa ti masihto sehe.

²³ Cohamacu wuhūi to dahraa pihtichu, tiro to namono mehne tjuaa wahaha ti wuhuru. ²⁴ Ti ā tju sari baharo to namono Elisabe nihi pocoro jiha. Ā jiro ticoro cinco sari waro masa cahai wahaeraha. ²⁵ Ō sehe ni tuhotuha ticoro: “Mipure yuhure Cohamacu yoadohoro jāna. Pohna marienicoro jico buobiaro yuhdūhi yuhu. Cohamacu to yoadohoro mehne mipure nijinocāre bocaja yuhu”, ni tuhotuha ticoro.

Jesu to masa bajuhtore yahuha anjo

²⁶⁻²⁷ Elisabe cinco sari nihi pocoro to ji wahcāhu waro Cohamacu sehe anjore Gabrie wama tirirore nuhmino, ne muā

mehne jieraricoro cahapũ warocaha. Ticoro María wama tiricoro Nazarei Galilea yahpai jiri macai jia tiha. José wama tiriro jiha to manano cijhto. Tiro panopũ macariro Davi cjiro panamino ji turiarirópũ jiha. ²⁸ Á to warocachu María cahapũ sũro, anjo ð sehe ni yahuha:

—María, ¿jimajari mũhu? Cohamacũ mũhare yoadohoro nina. Mũhare noano yoaro nina —niha anjo ticorore.

²⁹ To á nichũ tuhoro, ticoro tuaro wacũ tuhoutuha. Anjo to yahurire tuhoturo “¿Dohse nino baro yũhure á nicari?” ni wacũha ticoro. ³⁰ To á ni tuhotchũ masino anjo ð sehe ni yahu namoha ticorore:

—María, Cohamacũ mũhare tuaro cahĩna. Á jico mũhare yũ yahuhũtũre tuhũ cũaeco tjiga. ³¹ Noano tuhoga. Cũiro nijinocãre pohna ticohca mũhu. Tirocã to masa bajuari baharo, “Jesu” ni wama pisucohca mũhu tirocãre. ³²⁻³³ Tiro tua yuhũuariro jirohca. Á jia tirore “Cohamacũ Jipihtina Bui Jiriro macũnota jira”, ni masiahca masa. Mũ macũ ñuchũno mananopũ Davi cjiro Israe masa ti puhtoro to jia tiriro cjiro seheta mũ macũ cijhto cãhũre cũnohca Cohamacũ. Á jiro jipihtia dachoripe tiro Israe masare dutirohca. Puhtoro to jihto ne phtisi —niha anjo.

³⁴ To á nichũ tuhoro María sehe ð sehe ni sinituha:

—¿Dohse yũhu manũ mariapacohta pohna ticocari yũhu? —niha ticoro.

³⁵ To á nichũ tuhoro anjo ð sehe ni yũhtiha: —Espíritu Santo to tuaa mehne mũhare nijinocãre bocachũ yoarohca. Á jiro Cohamacũ Jipihtina Bui Jiriro to tuaa mũhare to masũruca caharo seheta bajuaeraparota tarohca mũhare. Á jia “Cohamacũ macũno, ñaa buhiri tia marieriro jira”, niahca masa mũ macũre. ³⁶⁻³⁷ Cohamacũ jipihtiare yoa masina. Á jiro mũ coyeacoro Elisabe cãhu bũcero waro jiparota mipũre nijl pocoro jira ticoro. Ticoro pohna tirohca mũnocãre. Masa ticorore “Nijinocã boca masienicoro jira”, ti niricoro cjiro mipũre nijinocãre to bocari baharo seis sãri waro wahara —niha anjo Mariare.

³⁸ To á nichũ María ð sehe ni yũhtiha:

—Yũhure tuhoga. Mari puhtoro to cahamacoño jija yũhu. Mũ niriro seheta yũhure á wahajaro —niha ticoro.

To á niri baharo anjo wahaa wahaha.

María Elisabere ñũno wahaha

³⁹ To á niri baharo María tũyucũri jiri yahpũ Judea yahpai jiri macapũ ño duaro wahaa wahaha. ⁴⁰ Tõpũ sũro, Zacaria ya wũhũpũ sãano, “¿Jimajari?”, niha ticoro Elisabere. ⁴¹ To á nichũ Elisabe to tuhochũta, to macũno sehe nijl suhtiropũ jirocã ñuhmiha. Elisabe Espiritu Santo to dutiriro

seheta yoa pahñoricoro jiro, to tuare cjuaricoro jiha. ⁴² Á jiro tuaro wahchea mehne ticoro bisiro durucuha:

—Jipihtia numia yũdoro mũhare noano yoahre Cohamacũ. Mũ macũ cãhũre noano yoahre Cohamacũ. ⁴³ Cue, yũ puhtoro pocoro yũ cahai mũ tachũ noano yoara yũhure Cohamacũ. ⁴⁴ Mũ yũhure “¿Jimajari?” mũ nichũ yũ macũ sehe nijl suhtiropũ jirocã wahchea mehne ñuhmihti yũhure. ⁴⁵ Cohamacũ to niriro seheta yoarohca. Á jico to yahurire tuhoricoro jico wahchericoro jira mũhu —niha Elisabe Mariare.

⁴⁶ To á nichũ María ð sehe ni yũhtiha:

“ ‘Cohamacũ noariro, tuariro jira’, nija. Yũhu noano yajeripohna tija.

⁴⁷ Cohamacũ yũhure pichacapũ wahaboricorore yoadohoriro jira.

Á jiro mipũre yũhure noano wahchea mehne jichũ yoara.

⁴⁸⁻⁴⁹ Tiro yũhure to cahamaconore wacũri jira. Cohamacũ tua yuhũuariro noaa dihtare yũhure yoadohohre.

Á jia mipũre ‘Ticorore Cohamacũ noano yoahre’, jipihtina masa á ni, durucuahca yũhure.

Cohamacũ ñaa marieriro jira.

⁵⁰ Jipihtia dachoripe jipihtina tirore ño payoinare tiro pja ñũriro jira.

⁵¹ Cohamacũ to tuaa mehne yoaha. ‘Painare yuhũarũcãja’, niinare yuhũarũcãha tiro.

⁵² Puhtoare cohãha tiro. Á jiro cahamaca sehẽre tiro puhtoa yoaro seheta cũha tinare.

⁵³ Jũca baaina cjiire tiro noaa chũare waha. Tuhsũ, payũ cjuaina cjiire paye baro cjuaeraina yoaha tiro.

⁵⁴⁻⁵⁵ Mari ñuchũsuma cjiire to yahu cũrigo seheta yoa pahñoha Cohamacũ.

To cahamaca Israe masare tiro yoadohoha. Abrahã cjiore mari ñuchũsuma cjiire jipihtina to coyea to baharo jiina cãhũre Cohamacũ jipihtia dachoripe á pja ñũrucurigo jia tiha.

Tinare to yahu cũrigo boeraha Cohamacũ”, niha María.

⁵⁶ Tia sã waro Elisabe mehne jiha ticoro. Tõ puro to jiri baharo to ya macapũ tjuaa wahaha María.

Joã masa bajuaha

⁵⁷ Elisabe to nijl wahcõri baharo to macũno masa bajuaha. ⁵⁸ Á jia Cohamacũ ticorore to á noano yoachũ to ya maca macaina to coyea cãhu ticoro mehne wahcheha. ⁵⁹ Ocho dachori to masa bajuari baharo, to pũcũsuma tirocãre mahanocã to pjacũ cahsarocãre yihso dutia taa niha. Á jia tina mehne macaina ti cahapũ sũha ti yihsochũ ñũaa taa. Tina mehne macaina

Zacaria to pucaro wamare tirocãre wamoa duamaha. ⁶⁰ Ti ã wamoa duapachuta to pocoro õ sehe niha:

—To pucaro wamare wamoeraja. João wamoaanahca tirocãre —niha ticoro.

⁶¹ —Mũ coyea ne cãiro João wama tiriõ mariahna —niha tina ticorore.

⁶² Æ jia ti wamomacari mehne yoa ño, Zacariare õ sehe ni sinitu ñaha tina:

—¿Mũhu waro dohse wamoa duajari mũ macãre? —ni sinitu ñaha tiirore.

⁶³ Ti ã nichũ tiro sehe joahti pjiõne siniroca, ñaha, joaha: “Yũ macũ João wama tirohca”, ni joaha Zacaria. To ã ni joachũ tina sehe cãaa wahaha. ⁶⁴ To ã ni joari baharo tirore durucuchũ yoaha Cohamacũ. Æ jiro tiro durucua wahaha juna:

—Cohamacũ tuariro, noariro jira —niha tiro.

⁶⁵ To ã ni durucuchũ tuhoa tó macaina cãaa wahaha. Æ jia ahri jipihtiare Judea yahpa macainare tãyucũ watoj jiiõnare masa yahu siteha. Æ jia masa tó macaina noano masi pihtia wahaha. ⁶⁶ Jipihtina tãre tuhoa wacũha. “Cohamacũ tuaare ahrirocã cãara. Æ jiro wiho jiriõ jierara ahrirocã”, ni tahotuha masa.

Zacaria Cohamacũre ño payoha

⁶⁷ Æ yoa to pucaro Zacaria sehe Espiritu Santo to dutiriõ sehetã yoa pahñoriõ jiro to tuaare cãariõ jiro Cohamacũ yare õ sehe ni yahuã:

⁶⁸ “Mari Israe masa Cohamacũre, mari puhtoroõre wahche payojihna mari. To yaina jija mari.

Æ jiro tiro mari cahapũ wihiõ, marine yoadoho, noano yũhdũchũ yoaro taro nina.

⁶⁹ Cohamacũ marine, pichacapũ wahaborinare yũhdũchũ yoahitiore, tua yũhdũarigore warocara.

Ahriõ marine yũhdũchũ yoahitiõ cjihto sehe Cohamacũre dahra cohtariõ Davi cjiõ panamino jì turiariõ jira.

⁷⁰ Panopũre to yaina waro, to yare yahu mũhtaina cjiõre ahri õ sehe wahahto cjihtore yahu cũ mũhta tuhsũa tiha.

⁷¹ ‘Mũsare ñũ tuhtiõnare, jipihtina mũsare ñano yoinare dũcataihtja’, ni cũha Cohamacũ marine.

⁷² Mari ñũchũsũma cjiõripũre ‘Mũsare pja ñũi, yoadohoihtja.

Mũsare yũ yahu cũriõre wacũihtja’, niha Cohamacũ.

Ti pjarũre to ni cũriõ sehetã mipũre marine sohtori tiro taro nina.

⁷³⁻⁷⁵ Panopũre õ sehe ni cũa tiha Cohamacũ Abrahãre: ‘Potocã niita nija mũhũre.

Mũ coyea baharopũ jì nũnũhtinare paina tinare ti ñũ tuhtichũ, yũhũ sehe tinare dũcataihtja.

Æ jia mũ coyea sehe ne cuiõ marieno yũ dutiare yoa, yũhũre ño payoahca.

Tina ti catiro puro yũ ñũrocariõ buhiri marieno, quihõno jia tiina jiru-cuahca’, ni yahu cũa tiha Cohamacũ mari coyero Abrahã cjiõre”,

niha Zacaria. Æ ni tuhsũ tiro to macãno cãhũre õ sehe niha tjõa:

⁷⁶⁻⁷⁷ “Macũ, mũhũre õ sehe niahca masa: ‘Cohamacũ Jipihtina Bui Jiriõ yare yahu mũhtariõta jira’, ni masiahca mũhũre.

Mũhũ mari puhtoroõ Cristo to tahto panore masare yahuyui wahaihca.

Æ yahuyui wahacũ, õ sehe ni yahuyuihca tinare: ‘Mari puhtoro tarohca.

Tiro mũsa ñaa yoari buhiri tiare cohã, pichacapũ wahaborinare yũhdorohca mũsare’, ni yahuihca mũhũ.

Æ ni yahucũ, mari puhtoro to tahtore cahnoyũ dutiõ niõhca mũhũ tinare.

⁷⁸ Cohamacũ sehe marine tuaro pja ñũriõ jì, marine noano yoariõ jitiõãno, tiro marine pichacapũ wahaborinare yũhdũchũ yoa duara.

Æ jiro tiro Cristore buhriõ yoaro sehe jiriõre mari cahapũ warocara.

⁷⁹ Tiro mari cahai wihiõ marine pichacapũ wahaborinare nahitiano waropũ jìmarinare buhriõ marine to noano ñũ bocachũ yoaro sehetã Cohamacũ ya potocã ni yahuare masichũ yoarohca tiro.

Æ yoa mari tiro mehne cãno mehne mari noano jì masihto cjihto cãhũre yahurohca marine”, niha Zacaria.

⁸⁰ Æ yoa Zacaria macãno noano pjarũ tiriõ bũcãaha. Æ bũcãaro, Cohamacũre tuaro ño payoriõ jìha. Tuhsũ, yoari pja masa marienopũ jia tiha. Israe masare buhe dũcãro tóõpũta to jiriõ cjiõriõ jia tiha.

2

Jesu masa bajuaha

(Mt 1.18-25)

¹ Ti pjarẽ jipihtia yahpari macaina bu puhtoro Augusto jia tiha. Æ jiro jipihtinare quihõ dutiõ. ² Ahriõna masare ti coã quihõ dũcachũ Siria yahpa macaina puhtoro Cirenio wama tiriõ jìha. ³ Æ jia jipihtina ti ñũchũsũma panopũ macaina ya macaripũ ti wamare joa õa wahaha. ⁴ José cãhũ Nazarepũ Galilea yahpai jiri macapũ jina waha, Judea yahparũ Belẽ wama tiriõ macapũ sũha. Puhtoro Davi cjiõ panopũ macariõ to masa bajuariõ jìha Belẽ. José Davi cjiõ panamino jì turiariõ jiro puhtoa masare to quihõ dutichũ tahoro Belẽpũ to wamare joa õ dutiro wahaha. ⁵ Æ jiro

tiro María to namono cjihto mehne tópu to wamare joa ô dutiro suha. Ticoro sehe wihãrirocãre cjuaro caharicoro jiha. ⁶ ã jiro Belêpu suro ticoro niji wahcôha. ⁷ Tópure masa ti cariri wahu ne mu sneraha tinare. ã jiro ticoro pohna ti tuhsu, tirocãre suhtiro mehne coma, wachua ti churi wahwai, tja bui tirocãre duhu payoha. Tirocã wahma to pohna ti muhtarirocã jiha.

Anjoa ovejare ñu wihboinare bajuaha

⁸ Ti ñamine camporu ovejare ñu wihboina ti yaina ovejare ñu wihboa niha. ⁹ Tópu ti jichu Cohamacu warocariro anjo tinare bajuaha. To ã bajuachu Cohamacu to si sitea tinare buhriaha. To ã si sitechu ñua, ovejare ñu wihboina cuia wahaha. ¹⁰ Ti ã wahachu anjo tinare ô sehe ni yahuha:

—Noaa quitire musare yahui taja. Jipihntinare masare wahchechu yoarohca ahri quití. ã jina yahure cuiena tjiga musa. ¹¹ Micha ñamine puhtoro cjiro Davi ya macapu musare pichacapu wahaborinare yuhdohtiro, Cristo Cohamacu warocariro mari puhtoro masa bajua tuhsuhre. ¹² Suhtiro mehne comariro wachua churi wahwa bui ti duhu payoriro musa ñuhtiro tiro tjirohca —ni yahuha anjo tinare.

¹³ To ã nichuta payu muano macaina ji muhtariro anjo mehne Cohamacure wahche payoha. Ô sehe ni wahche payoha tina:

¹⁴ “Cohamacure muano macarirore ño payojihna.

ã jia Cohamacu to cahina cuiro marieno cahmachenno marieno noano jijaro”, ni wahche payoha anjoa peri.

¹⁵ ã ni wahche payo tuhsu muanoru ti mujari baharo ovejare ñu wihboina sehe ti basi cahma durucuha:

—Ahrire Cohamacu marine to yahurire Belêpu basa ñujihna —niha tina ti basi.

¹⁶ ã nia ño duaro wahaa wahaha tina. Mariare, Josére boca su, wihãrirocãre wachua churi wahwai ti duhu payorirocãre ñuha tina. ¹⁷ Ovejare ñu wihboina tirocãre ñu tuhsu anjo wihãrirocãre to yahurire yahu turiaha painare. ¹⁸ Ti ã ni yahu turiachu jipihntina tinare tuho sua wahaha. ¹⁹ Ahri jipihntiare María wacú tuhoturucuha. ²⁰ ã yoa ovejare ñu wihboina sehe anjo to yahuriro seheta jichu ñua, “Cohamacu tuariro jira”, ni wahcheha. ã ni wahche, majare tjuaa wahaha.

Cohamacu wuhuru Jesu pucsuma tirocãre naaha

²¹ Cú somana baharo wihãrirocã to pjacure mahanocã cahsarocãre yihso na tuhsu tirocãre tina Jesu wamoaha. Jesure wahma to bocahto pano anjo sehe “Jesu’ ni

wama pisuga tirocãre”, ni yahu tuhsuha. ã jia tirocãre “Jesu” ni wama pisuha.

²² Cohamacu dutia Moise to yahuriro seheta yoa taa José, María mehne Jerusalêpu wahaha. Tópu wahaha María to pohna tiri baharo to noaricoro to wahari baharo to ã waharire ñono taro. ã wahaa, tina Jesucãre naa wahaha. Tirocãre Cohamacure “Ahrirocã mu yairo cjihto jira”, ni ñoa wahaha. ²³ Ô sehe yoaha Cohamacu yare ti joari pui to yoa dutiriro seheta. “Jipihntina musa pohna wahma bajua muhtainacãre Cohamacure ñoga. ‘Ahrirocã mu yairo cjihto jira’, ni ñoga”, ni dutia tiha Cohamacu. ²⁴ ã ño tuhsu Cohamacu to yoa dutiriro seheta tina minichahcare waa wahaha Cohamacure ño payoa. Ô sehe dutia tiha Cohamacu: “Bujaa puaro waga yahure. O tina mariachu uritua wihãnacã puaro waga yahure ño payona”, ni dutia tiha Cohamacu. To yoa dutiriro seheta yoaha tina ticoro pjacu noari pjacu to waharire ñoa taa.

²⁵ Jerusalê Simeo wama tiroiro jiha. Tiro quihono yoariro, Cohamacure ño payoriro jiro, Cohamacu Israe masare to yoadohotire cohtariro jiha. Tiro Espiritu Santo to nino sehe yoariro jiha. ²⁶ ã jiro tiro to yariahto pano Cohamacu to warocahtirore Cristore to ñuhti cjihtire tó pano yahu tuhsuha Espiritu Santo tirore Simeore. ²⁷ ã jiro Espiritu Santo tirore to dutichu Cohamacu wuhuru sãa wahaha. To sãa sari baharo Jesu pucsuma ti macunocãre na sãaha. Cohamacu to dutiriro seheta yoa niha. ²⁸ Simeo sehe tirocãre waa na, Cohamacure ño payo, “Noana” ni, tiro mehne durucuha.

Ô sehe niha tiro Cohamacure:

²⁹⁻³² “Mipu pinihtare puhtoro, mu niriro seheta jipihntina masare pichacapu wahaborinare yuhdachu yoahitiro cjihtore warocahre muhu.

Tiro judio masa jierainare buhero muhure noano masichu yoarohca tinare.

Masare yuhdohtiro Israe masunore muhu cüha.

Sã coyeroire Israe masunore mu cüchu jipihntina masia, ‘Israe masare noano yoara Cohamacu’, niahca masa.

Ahrirocã sãre yuhdachu yoahitiro jira.

ã jicu ahrirocãre ñu tuhsucu, mipure noano wahcheriro yariaihca”, niha Simeo.

³³ Simeo tirocãre to ã nichu Jesu pucsuma sehe tuho sua wahaha. ³⁴ ã jiro Simeo tinare “Noano jiga musa” nino, tiro María Jesu pocorore ô sehe ni yahuha:

—Cohamacu ahrirocãre beseha. To ã beseriro to jipachuta judio masa payu tirore yuhdachuahca. ã yoa tina pichacapu waahca. Judio masare payu yuhdohtirore

Cohamacu beseha tirocäre. Tiro Cohamacu yare yahuriro to jipachuta masa payu tirore ñano ni yahu wajaahca. ³⁵ Ti ä yoachu paina ti ñano wacüare masiahca. Ä jico muhu tuaro cahyacohca —niha Simeo Mariare.

³⁶ Tói Cohamacu yare yahu muhtaricoro Ana wama tiricoro jiha. Ticoro Fanuel macono jiro, Aser cjiro ya curua macaricoro jiha. Bucoro waro jiha. Ticoro nuhmino jiro manu tiha. Ä yoa siete cahmari to manano mehne jiha. Tó puro to jiri baharo to manano yariaha. ³⁷ Ä jiro ochenta y cuatro cahmari waro wapewahyoro jia tiha ticoro. Ä jiro ticoro dachoru cühare ñamiru cühare Cohamacu yare yoaro taro chaaeraro, Cohamacu mehne durucu, Cohamacu wuhure ne wijaaera tiha. ³⁸ Simeo to durucuro watoi ticoro tina cahai wihiro, wahchero Cohamacuare “Noana”, niha. Ä jiro Jerusalé macainare pichacaru waha- borinare yuhdohtirore cohtainare ticoro Jesucäre yahuha tina jiphtinare.

José, María, Jesu mehne Nazarepu tjuaa wahaha tjoa

³⁹ Cohamacu to dutiriro seheta yoa tuhsua, tina ti ya macaru Nazarepu tjuaa wahaha. Galilea yahpai jiha ti maca Nazare. ⁴⁰ Jesu sehe noano busua, tairiro wahaha. Ä jiro tiro noano tuho masiriro busuaaha. Cohamacu tirore noano yoaha.

Jesu wahma wahma tariro jiro, Cohamacu ya wuhni judio masare buheina mehne shuduro niha

⁴¹ Cahmaripe Jesu pucsumama Jerusalépu pasua numurine bese numurine yuhdoa wahaa tiha. ⁴² Ä jia Jesu doce cahmari to cjuachu waro ti yoarucuriro seheta tina jiphtina Jerusalépu bese numurine yuhdoa wahaha tjoa. ⁴³ Ti macaru su, ti bese numurine yuhdo tuhsu tina ti ya macaru majare tjuaa wahaha tjoa. Wiho mejeta Jesu sehe ti ä majare tjuaapachuta, Jerusalépu tjuanocaha. To pucsumama sehe tite to tjuarire masieraha. ⁴⁴ “Paina mari mehne macaina mehne taca mari macu”, ni tuhutumaha tina. Ä jia tina cü dacho waro noano Jesu marieno waharucumaha. Ti dacho pihtichu waro tina Jesure ti coyey watoi ä jichu ti ñu masiina watoi cühare macamaha. ⁴⁵ Wiho mejeta ne bocaeraha. Ä jia tina pari turi Jerusalépu majare tjuaa wahaha tjoa, tirore macaa wahaa.

⁴⁶ Tia dacho baharo Cohamacu wuhu wiaro tirore boca suha. Tói Jesu judio masare buheina watoru duji, tinare tuho, tinare sinituro niha. ⁴⁷ Tina jiphtina Jesure to quihöno yuhlichu tuhoa noano masirocä to jichu ñua, tina suaa wahaha. ⁴⁸ Jesu pucsumama cühu tirore ñua, tina cühu suaa wahaha. Ä jiro to pocoro tirore ö sehe niha:

—Macu, ¿dohseacu ä yoari muhu säre? Sä mu pucsumama jiro tuhutu, cahya, macana nihi muhure —niha ticoro to macanore.

⁴⁹ To ä nichu tuhoro tiro to pucsumare ö sehe ni yuhthiha:

—¿Dohseana yuhure macari musa? Yu Pucu waro ya wuhni ji to dutiriro seheta yoai nija. ¿Tire masierajari musa? —niha tiro tinare to pucsumare.

⁵⁰ To ä ni yahupachuta tina to yahuaire tuho ñahaeraha.

⁵¹ Ä yoari baharo, Jesu to pucsumama mehne Nazarepu tjuaa wahaha. Tju su, to pucsumare ne yuhdurucuaririro jia tiha tiro. Ahri jiphtina to yoarire ñano María noano tuhutu, wacürucua tiha. ⁵² Ä yoa Jesu busua, noano tuho masiriro wahaha. Tó sehe jiriro to ji busuachu ñano, Cohamacu sehe tirore noano ñu ji coa, tuaro cahia tiha. Masa cühu tirore tó seheta noano ñu ji coa, tuaro cahia tiha.

3

João masare bautisariro masare Cohamacu yare yahuha

(Mt 3.1-12; Mr 1.1-8; Jn 1.19-28)

¹ Ti pjare ti bui puhtoro jiriro Tiberio wama tiro to puhtoro jiri baharo quince cahmari wahaha. Tuhsu, Poncio Pilato wama tiro sehe Judea yahpa macaina puhtoro jiha. Ä yoa Herode wama tiro sehe Galilea yahpa macaina puhtoro jiha. To bahuro Felipe sehe Iturea yahpa macaina, Traconite yahpa macaina cühu ti puhtoro jiha. Tuhsu, Lisania wama tiro Abilinia yahpa macaina puhtoro jiha. ² Ti pjare Ana, Caifa mehne jiphtina sacerdotea bui puhtoa jiha. Ahrina jiphtina ti jiri pjare João Zacaria macano masa marienopu jirirore Cohamacu sehe tirore to yare buhe dutiha. ³ Ä jiro Jordão wama tiri ma duhtu cahai jiri yahpai jiphtiropu João buhero wahaha:

—“Noaina jija sä”, ni musa tuhutumari cjirire tuhutu cohtota, Cohamacuare cahmaga musa. Ä yoana tite musa yoarire ñona tana, bautisaina jiga. Musa ä cohtotachu ñano Cohamacu musa ñaa buhirire borohca —ni buhea tiha tiro.

⁴ Isaia cjiro panoru macariro Cohamacu yare yahu muhtariro to joariro seheta ahriro Joao yoaro niha. Ö sehe ni joa tiha Isaia cjiro Joao to buhehtore:

“Masa marienopu durucu sañurucuriro ö sehe ni buherohca: ‘Mari puhtoro to tuhutu pano “Noaina jija sä”, ni musa tuhutumari cjirire tuhutu cohtota, Cohamacuare cahmaga musa.

⁵ Pja wuhitari, pja buri cühare noari wapa mari yoariro seheta, tuhcu maharine potoa mahari mari yoariro

seheta, ñaa maharine noaa maharine mari yoiro seheta, wetere m̄sa cosariro seheta m̄sa ñaa t̄hotuare cohtota, cahno mahtaga m̄sa.

⁶ M̄sa ā yoach̄u Cohamac̄u m̄sare pichac̄u wahaborinare to yuhd̄uch̄u yoach̄u ñahca jipihti ahri yahpa macaina', ninohca tiro sañurucu yahuriro sehe",

ni joaa tiha Isaia cjiro panop̄re.

⁷ Masa paȳu João cahai wihia tiro tinare bautisach̄u cahmaha tina. Ā jiro tiro tinare ð sehe ni yahuha:

—Agāa ñima tiina yoaro seheta masare dojomehneina, cui duhti duaina jira m̄sa. M̄sa ñaa yoiro m̄sa cahya, duhu du-aerari buhiri Cohamac̄u to buhiri dahrehto pano duhti masierara m̄sa. ⁸ Potocāta m̄sa ñaa t̄hotumarine cohtotaina jina, Cohamac̄u cahmaina jina, t̄re m̄sa yoaa mehne ñoga. Ĕ sehe ni t̄hotu wisiena tjiga. “Panop̄u macariro Abrahā mari ñuch̄u cjiro jia tiha. Ā jina to panamana jina mari Cohamac̄u yaina jija”, ni t̄hotu wisiena tjiga m̄sa. M̄sare niita nija. Abrahā panamana m̄sa jiina jimana m̄sa. M̄sa ā jipach̄uta t̄i m̄sa ā jia yaba cjihti jierara. Cohamac̄u sehe ahri t̄aa mehne Abrahā coyeare dahre masina. Ā jiro Abrahā coyea m̄sa jia wiho waro jira t̄aa ti wiho waro jiro seheta.

⁹ Ĕ sehe jira: Masa yuc̄uri yoaro seheta jira. Cohamac̄u sehe coma mehne yuc̄arire c̄jā cohāriro yoaro sehe jira. Ā jiro noaa d̄icha maria yuc̄are nuhc̄ōri mehneputa c̄jā cohānohca tiro. T̄re to c̄jā cohāri baharo, pichac̄u j̄u cohānohca tiro. (Āta yoaro taro nina masa c̄hure tirore cahmaerainare) —ni yahuha João masare.

¹⁰ To ā nich̄u t̄hōa masa sehe tirore ð sehe ni sinituha:

—¿Dohse yoanahcari s̄ā? —niha tina Joãoore.

¹¹ —P̄ua suht̄iro c̄juariro suhti marierirore c̄no waga. Ā yoa m̄sa ch̄ua c̄juana paina c̄hure waga —niha João.

¹² Mahainac̄a puhtoa ya c̄jht̄ire wapa na cohtaina c̄h̄u tinare to bautisach̄u cahmaha. Ā jia João cahai wihia, tirore ð sehe ni sinituha:

—¿Buhero, s̄ā sehe dohse yoanahcari s̄ā? —niha tina tirore.

¹³ —M̄sa puhtoa ti wapa na dutiro purota masare wapa naga. Mahño na namoena tjiga —ni yahuha João tinare.

¹⁴ Paina surara tirore ð sehe ni sinituha tjoa:

—¿S̄ā sehe dohse yoanahcari? —niha tina tirore tjoa.

—Masa ti niñerure maena tjiga. Ā yoana mahñoa mehne ti niñerure naena tjiga. M̄sare ti waparo purota wahchega —ni yahuha João.

¹⁵ Masa Cristore Cohamac̄u to waroc̄ah-ti-rore cohtaa niha. Ā jia ð sehe ni t̄hotu d̄ucaha tina Joãoore. “Ahriro João sehe Cristo jiboca”, ni t̄hotumaha tina. ¹⁶ T̄i ā nich̄u t̄hōro João jipihtinare ð sehe ni yahuha:

—Ȳu baharo ȳu yuhdoro tuariro tarohca. Noa yuhd̄uariro jira tiro. Tiro yoaro sehe jieraja ȳu sehe. Ā jic̄u tirore t̄hotuc̄u, “Wiho jiriro jija yuh̄u”, ni t̄hotuja ȳu. Ȳu sehe m̄sare bautisacu co mehne yoamahi. Tiro sehe ȳu yuhdoro yoirohca. Esp̄iritu Santore masa mehne ā jirucuch̄u yoirohca. Wiho mejeta paina sehere ti ñaare t̄hotumari c̄jire t̄hotu cohtota du-aeraina sehere tiro pichaca mehne buhiri dahreho. ¹⁷ Ȳu baharo tariro cahsarire cohāriro yoaro sehe jira. Cahsarire cohāriro to batiro mehne jipihtia to trigo yapari cahsarire putiwera. Ā yoa tuhs̄u trigo sehere to wihb̄ori w̄h̄u c̄nohca. T̄o seheta yoirohca ti tirore cahmainare ȳu baharo tariro. To putiwea cahsari sehere tiro j̄nohca. T̄i cahsarire to j̄ri pichaca ne yatisi. (Āta yoirohca tiro ȳu baharo tariro tirore cahmaerainare) —ni yahuha João.

¹⁸ Paȳu to ā ni yahuha mehne masare noaa buheare yahuha João. ¹⁹ Tuhs̄u, puhtoro Herode sehe to bah̄ro Felipe namonore to namo tiri buhiri, p̄j̄ro ñaare to yoiro buhiri c̄hure João tirore yahumaha. ²⁰ To ā ni yahuri buhiri Herode sehe ñaare yoa namoha, Joãoore peresu yoaro.

João Jesure bautisaha

(Mt 3.13-17; Mr 1.9-11)

²¹ Joãoore ti peresu yoahto pano paina masare João sehe bautisaro niha. Tinare bautisaro Jesu c̄hure bautisaha. To ā bautisach̄u, Jesu diap̄u ducuriro Cohamac̄u to sinino wato m̄ano par̄i m̄a wahaha. ²² To par̄i m̄ari baharo Esp̄iritu Santo buja yoaro sehe Jesu buip̄u duji taha. To ā duji tach̄u m̄anop̄u durucuro coa taha:

—M̄h̄u ȳu mac̄u ȳu cah̄riro jira. M̄h̄u mehne wahcheja —nino coa taha m̄anop̄u.

Jesu coyea panop̄u macainare yahua jira ahri

(Mt 1.1-17)

²³ Jesu to buhe d̄ucari c̄hmare treinta c̄hmari c̄juaha tiro. “Tiro José mac̄no jira”, ni t̄hotumaha masa. José sehe El̄i mac̄no jiha. ²⁴ El̄i Matat mac̄no jiha. Matat Lev̄i mac̄no jiha. Lev̄i Melqui mac̄no jiha. Melqui Jana mac̄no jiha. Jana José mac̄no jiha. ²⁵ José Matatias mac̄no jiha. Matatias Amós mac̄no jiha. Amós Nahum mac̄no jiha. Nahum Esli mac̄no jiha. Esli Nagai mac̄no jiha. ²⁶ Nagai Maat mac̄no jiha. Maat Matatias mac̄no jiha. Matatias Semei mac̄no jiha. Semei Josec mac̄no jiha. Josec Joiad̄a

macano jiha. ²⁷ Joiadá Johanán macano jiha. Johanán Resa macano jiha. Resa Zorobabe macano jiha. Zorobabe Salatie macano jiha. Salatie Neri macano jiha. ²⁸ Neri Melqui macano jiha. Melqui Adi macano jiha. Adi Cosam macano jiha. Cosam Elmodam macano jiha. Elmodam Er macano jiha. ²⁹ Er Josué macano jiha. Josué Eliezer macano jiha. Eliezer Jorim macano jiha. Jorim Matat macano jiha. ³⁰ Matat Leví macano jiha. Leví Simeo macano jiha. Simeo Juda macano jiha. Juda José macano jiha. José Jonan macano jiha. Jonan Eliaquim macano jiha. ³¹ Eliaquim Melea macano jiha. Melea Mená macano jiha. Mená Matatá macano jiha. Matatá Natán macano jiha. ³² Natán Davi macano jiha. Davi Jesé macano jiha. Jesé Obed macano jiha. Obed Booz macano jiha. Booz Sélah macano jiha. Sélah Nahasón macano jiha. ³³ Nahasón Aminadab macano jiha. Aminadab Admín macano jiha. Admín Arní macano jiha. Arní Esrom macano jiha. Esrom Fares macano jiha. Fares Juda macano jiha. ³⁴ Juda Jacobo macano jiha. Jacobo Isaa macano jiha. Isaa Abrahá macano jiha. Abrahá Taré macano jiha. Taré Nahor macano jiha. ³⁵ Nahor Serug macano jiha. Serug Ragau macano jiha. Ragau Péleg macano jiha. Péleg Éber macano jiha. Éber Sélah macano jiha. ³⁶ Sélah Cainán macano jiha. Cainán Arfaxad macano jiha. Arfaxad Sē macano jiha. Sē Noé macano jiha. Noé Lame macano jiha. ³⁷ Lame Matusalē macano jiha. Matusalē Enoco macano jiha. Enoco Jared macano jiha. Jared Mahalaleel macano jiha. Mahalaleel Caina macano jiha. ³⁸ Caina Eno macano jiha. Eno Sete macano jiha. Sete Adão macano jiha. Adão Cohamacu to yoariro jiha.

4

*Watīno ñaare yoa dutimaha Jesure
(Mt 4.1-11; Mr 1.12-13)*

¹ Jesu Espírītu Santo to dutiriro seheta yoa pahñoriro jiro, tiro Jordão wama tiri mapu jiriro tjuaa wahaha. To á tjuaa wahachu Espírītu Santo sehe tirore masa marienopu naaha. ² Tópu saro cuarenta dachori waro jiha. Tópu to jiro wato watīno sehe Jesure ñaare yoachu cahmamaha. Á jiro ñaare yoa dutimaha tirore. Tí dachorire Jesu chueraha. Á jiro tí dachori pihtichu waro tiro júca baaha.

³ To á júca baachu ñūno watīno ó sehe nimaha Jesure:

—Muhū Cohamacu macano jicu, ahria tácare chua dojemehnega —nimaha Jesure.

⁴ Jesu ó sehe ni yuhtihā:

—Yoaeraja. Cohamacu yare ti joari pūi ó sehe nina: “Masare chua mehne dihta

catieraro cahmana. [Jipihtia Cohamacu ya yahua mehne jiro cahmana]”, nina Cohamacu —ni yuhtihā Jesu watīnore.

⁵ To á niri baharo watīno sehe tirore tácu maadu buipū na mēja sūrota jipihtia macari perire ño bahrañoha Jesure. ⁶ Á ñono Jesure ó sehe ni yahua:

—Jipihtia ahri macari yuhure to wari cjiri jira. Á jicu yu cahmarirore wa masija. Á jicu ahri macarine, ti cjuaa mehne mūhare waitija. (Yu á wachu ahri macari macainare mūhu dutiuhca.) ⁷ Yuhure mu ño payochu ahri macari jipihtia macarine mūhare waitija —niha watīno Jesure.

⁸ Jesu ó sehe ni yuhtihā tirore:

—Mūhare ño payoeraja. Ó sehe nina Cohamacu yare ti joari pūi: “Mu puhtoro Cohamacu dihtare ño payoga. To ya dutia dihtare yoaga”, ni joaa tiha Cohamacu yare —niha Jesu watīnore.

⁹⁻¹¹ To á niri baharo Jerusalēpu watīno sehe tirore na wahcā, Cohamacu wahu bui na sūha tirore. Na su tuhsu tirore ó sehe nimaha:

—Cohamacu yare ti joari pū ó sehe nina: “Cohamacu yaina anjoare mūhare ñu wihbo dutirohca. Á jia tina sehe mūhare ñu wihboahca, ‘Mūhupu tácapu puha tu muari’ nia”,

ni joaa tiha Cohamacu yare ti joari pūi. To á niri quihōno jichu mūhu Cohamacu macano jicu, yahrapu pju bora ño ñujata yuhure. Mūhare yoadohochu ño ñujata yuhure —niha watīno Jesure.

¹² Jesu pju bora ño duaeraro ó sehe ni yuhtihā tirore:

—Cohamacu yare ti joari pūi ó sehe nina: “Musa puhtoro Cohamacu to niri cjirire ‘¿Potocā tjjari?’ ni masi duana, Cohamacure yoa ño duti macaena tjiga”, nina Cohamacu yare ti joari pūi —niha Jesu watīnore.

¹³ Á jiro watīno jipihtia ñaare Jesure yoa dutimaha. Á duti tuhsuro mahanocā duhu wahcāsiniha.

*Galilea yahpai Jesu buhe dūcaha
(Mt 4.12-17; Mr 1.14-15)*

¹⁴ Baharo Jesu Galileapu tjuaa wahaha. Á jiro, tiro Espírītu Santo tuua mehne yoaha. Tói jipihtiropu masa tirore quiti tiha. ¹⁵ Judio masa buhea wūhūsei tiro buhea tiha. Á jia jipihtina masa tirore noano durucuha.

*Nazare macaina Jesure ne cahmaeraha
(Mt 13.53-58; Mr 6.1-6)*

¹⁶⁻¹⁷ Baharo Nazarepu Jesu to bucarioropu tju sūha. Tópu tju sūro, Sabado jichu to á yoarucuriro seheta tiro judio masa ti buheri wūhūpu sūa sūha. Tói tiro Cohamacu yare ti joari pūre buhero taro ducuha. To á ducuchū ñūa tó macaina sehe

Cohamacu yare yahu muhtariro Isaia cjiro to joari püre tirote waha. Tí püi Jesu ahri yahuare bocaro buheha:

¹⁸ “Cohamacu to Espiritu yuhu mehne jiro, yuhure dutira.

Tiro pjacoinare noa buheare yahu dutiro warocare yuhure.

Å yoa peresupu jiina cåhure tinare to yuhdohtore yahu dutiro warocare yuhure.

Capari ñæraina ti noano ñuhto cjihtore, painare ti ñano ti yoapeinare wiohtiro cjihtore yuhure warocare.

¹⁹ Mari puhtoro Cohamacu to yainare pichacaru wahaborinare to yuhdohtore yuhure yahu dutiro warocare”, ni buheha Jesu.

²⁰ Å ni buhe tuhsu Jesu ti püre noari tia turënoca, wuhu macariroro wia tuhsu, dujiha. To dujichu ñua tói jiina jipihtina tiro dihtare ñuha. ²¹ Tí å yoachu tiro tinare õ sehe ni yahu ducaha:

—Ahri michapucacå yu buheriro seheta Cohamacu to niriro mu saro nina —niha Jesu.

²² To å nichu tuhoa “Ahriro noariro jira”, ni tuhotuha tina. Å jia tina to noano buhechu tuhoa, caaa wahaha. Å caaa waha, õ sehe niha tina ti basi:

—Cuenah, ¿José macano jierajari ahriro? —niha tina ti basi.

²³ Tí å nichu masino Jesu õ sehe ni yahuha tinare:

—Yu buheare tuho duaerana, õ sehe ni tuhotura musa yuhure: “Duhturu dohatiro to basi co ti masina duhturu waro to jiare ñono. Muhu cåhu duhturu to yoa ñono seheta mu niriro sehe jiriro jicu Cohamacu tuaa mehne yoa ñoga säre. Capernaure Cohamacu tuaa mehne yoa ñoyuhti muhu. Så cåhure å yoa ñoga, mu buheare ‘Potocå tjira’, sã ni masihto sehe”, ni duara musa yuhure.

²⁴ ‘Ahrire yahuihtja musare. Cohamacu yare yahu muhtariroro to ya maca macaina cahmaerara. Å jina yuhure cahmaerara musa õi yu bucariro jichu. ²⁵ Yuhure tuhoga mipure. Panoru Elia to jiri pjarure tia cahma noano pa cahma dacho maca waroi ne coro taeraha. Å jiro jipihtiropta ne chna mariaha. Tí pjare payu wapewahya Israe yahparu ti jipachuta Cohamacu Elia cjirore tinare yoadoho dutiro warocaeraha. (Eliare, Cohamacu ya cåhure ti cahmaerachu ñano tinare yoadoho dutiro warocaeraha.) ²⁶ To ya macare å yoa dutieraparota pa yahpai Sidõ cahai jiri macai Sarepta wama tiri maca macaricoro wapewahyore yoadoho dutiro Elia cjirore warocaha Cohamacu.

²⁷ Baharo Cohamacu yare yahu muhtariro Eliseo cjiro to jiri pjarure Israe yahparu payu camí baina ti jipachuta cåiro Israe masnore ne noariro wahachu yoeraha Eliseo cjiro. To ya yahpa macainare yoeraparota Naaman wama tirorore Siria yahpa macariro dihtare noariro wahachu yoaha tiro. Å yoaro Israe masare yoadohoeraro, Israe masno jierariro sehere yoadohoha Cohamacu —niha Jesu tinare.

²⁸ To å nichu tuhoa jipihtina tí wuhui jiina sua yuhduha wahaha. ²⁹ Å jia tina wahcåruca, Jesure na wijaa, tí maca duhtu cahai jiri canaru tirote tjuroca boro duamaha. ³⁰ Tí å yoa duapachuta Jesu ti watoihta wahaa wahaha.

Watino to cohtotariro Jesure piti bocaha (Mr 1.21-28)

³¹ Baharo Jesu Galilea yahpai jiri macaru Capernau wama tiri macaru su, Sabado jichu masare buheha. ³² Tiro noano masi pahñoriro to buhechu tuhoa masa tuho caaa wahaha. ³³ Tí wuhui watino to cohtotariro jiro, õ sehe ni tuaro sañurucuha:

³⁴ —Muhu Jesu Nazare macariro säre cariboi tjia muhu. ¿Dohse yoai tai nijari säre? ¿Muhu säre butichu yoai tai nijari? Yuhu masija Cohamacu macano, ñaa marieriro mu jiare —ni sañurucuha Jesure.

³⁵ To å nichu tuhoro Jesu tuhtihä watinore: —Dihta mariaha. Wijaaaha tirote —niha Jesu.

To å niri baharo masnore watino sehe yahparu doca caha su tunuchu yoaro, tirote wijaaaha. To å yoari baharo tiro sehe noariro tjuaa. ³⁶ Tói jiina jipihtina to å wahachu ñu caaa wahaha. Å jia ti basi õ sehe ni durucuha:

—¿Yaba baro buhea jijari ahri å wahachu yoaa? Cuenah. Tuaro mehne puhtoro yoaro seheta ahriro watiare dutira. Å jia to dutiro seheta tina masare wijaaara —ni durucuha tina ti basi.

³⁷ To å yoachu ñua tí yahparu jipihtiropta masa Jesu yoarire yahu siteha.

Jesu Simo Pedro marechonore noaricoro wahachu yoaha

(Mt 8.14-15; Mr 1.29-31)

³⁸ Judio masa ti buheri wuhure wijaa, Simo ya wuhuru sã suha Jesu. Tói Simo marechono dohati, tuaro juaro tihä. Å jia tina ticoro to dohatichu yahuha Jesure. ³⁹ Tí å yahuri baharo tiro ticoro cahai su, juarore suru dutiha. To å suru dutiri baharo ticorore juaro surua waha, dohta noaricoro wahaha. Ticoro å waharo wahcå nuju su, tinare chure payoha.

Payu dohatiinare noaina wahachu yoaha Jesu

(Mt 8.16-17; Mr 1.32-34)

⁴⁰ Sā sāari baharo jipihtina masa tó cahaí jina dohatinare Jesu cahap̄u na s̄uha. Dohatiina payu soro jia dohatiare c̄uaha. Á jiro Jesu to wamomacari mehne tina bui ña payo, jipihtinare ti dohatiare noano yuhduchu yoaha. ⁴¹ Watia c̄uhare Jesu to wijaa dutichu tina wijaa wahaa, ò sehe ni sañurucuha:

—Muh̄u potoc̄ata Cohamacu mac̄ano jira — niha tina Jesure.

Jesu Cohamacu warocariro to Cristo to jichu watia masiha. Á jiro Jesu tinare durucu dutieraha, “‘Cristo jira’, ni yahu siteri”, nino.

Galilea yahpai buheha Jesu

(Mt 1.35-39)

⁴² Bohrea m̄aja tachu Jesu tí macai jiriro waha, masa marienopu s̄uha. To ā suri baharo masa tirore maca, boca s̄ua ò sehe niha:

—Sā ya macai t̄uaga. Wahai t̄jiga — nimaha tina Jesure.

⁴³ Ti ā nipach̄ata tiro sehe ò sehe ni yuhtia:

—Cohamacu masare puhtoro to noano s̄uho jiare noaa buheare paye macaripu c̄uhare buhero cahmana yuh̄ure. Cohamacu yuh̄ure warocare t̄ire yahuhtirore —niha Jesu tinare.

⁴⁴ Á ni tuhsu judio masa ya yahpa macaa wuh̄usei, judio masa ti buhea wuh̄usei tiro buhe tiniha.

5

Jesu to buheinare payu wahire bocachu yoaha

(Mt 4.18-22; Mr 1.16-20)

¹ Pa namu Jesu Genesare wama tiri buc̄upariro duhtu cahap̄u s̄uha. Tói to jichu ñua payu masa Cohamacu yare tuho duaa t̄irore namu ti s̄uha. Noano wahpa taruc̄u s̄uha masa peri. ² P̄haria buso paduroi pahsaa busore Jesu ñuha. Tí buso macaina wahi wajaina m̄aja sur̄aca, ti wañyuc̄arire cosaa niha. ³ Á jiro Jesu Simo yariapu samua wahaha. Samu tuhsu tia dohoriare dia duhtu cahaí coãriare siò buhu dutiha. Tuhsu, dohoriapu duji, masare buheha. ⁴ Buhe tuhsu, Jesu Simore ò sehe niha:

—Dacho maca cureroi siò wioga. Á jina muhu mehne macaina mehne masa wañyuc̄are doca ñoga wahi ñahana —niha Jesu.

⁵ To ā nichu tuhorro Simo Jesure ò sehe ni yuhtia:

—Puhtoro, wahi maca bohreamahi s̄a micha ñamine. Bohrepanahta ne c̄uroc̄a wajærahti s̄a. Á wajærapanahta mu dutiro seheta doca ño ñunahtja —ni yuhtia Simo.

⁶ Á ni tuhsu tina doca ñoha. Á ti doca ñochu ti wañyuc̄are payu wahi s̄aaha. Payu ti s̄achu wañyuc̄u tuhna wahamaha. ⁷ Á wahachu ñua tina paria macainare tina mehne macainare pjirocaha:

—Musa c̄uhu yoadohona tagã s̄are —ni pjirocaha Simo c̄uhu.

Tina ti ā yoadohori baharo paria buso noano minipahro bocaha wahire. ⁸ Simo Pedro ā wahi payu ti s̄achu ñuno, Jesu panoi na tuhcuca caha s̄u, tirore ò sehe ni yahuha:

—Yu puhtoro, muhu mehne jiboriro jieraja yuhu. Ñariro jija yuhu. Á jicu mu cahaí ji masieraja —niha Simo Pedro Jesure.

⁹ Tiro, jipihtina tiro mehne macaina c̄uhu payu wahi s̄achu ñua, cuaa wahaha tina c̄uhu. ¹⁰ P̄haro Simo Pedro mehne macaina Zebedeo pohna Santiago to bahuro João mehne, tina c̄uhu ñu cuaa wahaha. Tí ā cuachu ñuno Jesu Pedroro ò sehe ni yahuha:

—C̄uaecu t̄jiga. Mip̄ure muhu wahire ñaha cahmachuriro mu jiro seheta Cohamacu yaina c̄jhtire p̄ji cahmachuriro jilica muhu —niha Jesu Simo Pedroro.

¹¹ To ā niri baharo tina ti busore buc̄upariro duhtu cahap̄u waja mo c̄unoca, ti ya jipihtire t̄oihta c̄unoca, Jesu mehne wahaa wahaha.

Jesu cami barirore noariro wahachu yoaha

(Mt 8.1-4; Mr 1.40-45)

¹² Á yoa Jesu pa macai to jichu cami bariro tirore piti bocaha. Á piti bocaro tiro Jesure ñu, na tuhcuca caha s̄u, ò sehe ni tuaro siniha:

—Puhtoro, muhu yoa duacu yuh̄ure noariro yoa masina muhu —ni siniha.

¹³ To ā niri baharo Jesu tirore ña payoro ò sehe niha:

—T̄ire yoa duaja. Mip̄ure noariro jiga muhu —niha.

To ā nichuta to cami bari c̄jiri yati mua wahaha. ¹⁴ Á jiro Jesu tirore ò sehe ni dutiha:

—Ahri yu ò sehe yoirire painare yahui t̄jiga. Sacerdote cahaí wahaga mip̄ure. Á jicu mu p̄jac̄are noari p̄jac̄u to waharire ñoga tirore. Cohamacu dutia Moiserere to c̄uri to niriro seheta yoaga. Á yoacu sacerdotere p̄haro minichahcare waga noariro mu waharire sacerdotearo ñoi tai —niha cami bariro c̄jiroro.

¹⁵ “Yahui t̄jia”, to nipach̄ata jipihtiropu masa tirore yahu site namoha. Tí ā yahu sitechu tuhoa masa payu tiro cahap̄u s̄uha. Dohatiina noaina waha duaa, tina c̄uhu tiro cahap̄u s̄uha. ¹⁶ Tí ā supach̄ata Jesu masa marienopu Cohamac̄are sinino wahaha.

Jesu pjacu baharirore noariro wahachu yoaha

(Mt 9.1-8; Mr 2.1-12)

17 Pa dachoi Jesu to buhech_u fariseo curua macaina, judio masare buheina cāh_u tói dujiha. Tina jipihtina Galilea yahpai jia macari macaina, Judea yahpai jia macari macaina, Jerusalē macaina jiha. Ti ā jich_u ñno Jesu Cohamac_u tuaa mehne dohatiinare noaina wahach_u yoaha.

18 Mahainacā m_ua pjac_u buhariroro to coāri cahsaro mehne yo w_ua wihaha. Ā jia tirore Jesu cahai cū duaa, w_uh_up_u yo sāa duamaha tina tirore. 19 Ā sāa duapahta masa pay_u jich_u tina tirore yo sāa masieraha. Ā jia tirore w_uh_u buip_u yo m_ujaaha. Yo m_uja s_u, mahanocā muj_i pahmare nawe, ti copai pjac_u buhariroro to coāri cahsaro mehnetu duhu boroha Jesu cahai jiina watoi. 20 “Jesu ahiroro to dohatiare yuhd_uch_u yoarohca”, ni t_uhotuha tina. Ti ā ni t_uhotuch_u masino Jesu pjac_u buhariroro ō sehe ni yahuha:

—Coyeiro, m_u ñaare yoari buhiri tiare yuh_u cohā tuhs_uja —niha Jesu tirore.

21 To ā nich_u t_uhoā fariseo curua macaina, judio masare buheina cāh_u ti basi ō sehe ni t_uhotumaha: “Ahroro ā ni durucuro t_ujararo. Tiro mas_uno mari yoaro sehe jiro, ñaare to yoari buhiri tiare cohā masierara. Cohamac_u dihta masa ti ñaare yoari buhiri tiare cohā masina”, ni t_uhotumaha tina.

22 Jesu ti ā ni t_uhotuare masino, ō sehe niha:

—¿Dohse yoana ā ni t_uhotujari m_usa?

23 “M_u ñaa yoari buhiri tiare yuh_u cohā tuhs_uja”, y_u nich_u, “Mahñoriro jira”, yuh_ure nina m_usa noano masierapanah_u. “Wahcārc_ua wahaga”, y_u nich_u y_u niri potocā jia jich_u dōih_uta masinahca. 24 Yuh_u mas_uno Cohamac_u warocariro ahri yahpai ti ñaare yoari buhiri tiare cohā masija yuh_u. Masa ti ñaare yoari buhiri tiare cohāhtiro c_ujlthore cūre Cohamac_u yuh_ure. Y_u ā cohārine m_usa masihto sehe ō seheta yoā ñoiht_uja m_usa ñuhti c_ujlthire —niha Jesu.

Ā ni tuhs_u pjac_u buhariroro ō sehe niha:

—Muh_ure niita nija. Wahcārc_ucaga. M_u coāri cahsarore na wahcāga m_u ya w_uh_up_u —niha tirore.

25 To ā nich_u t_uhorota jipihtina ti ñarocaroi wahcārc_ua, to coāri cahsarore na, to ya w_uh_up_u t_uuaa wahaha. Ā waharo tiro Cohamac_ure ño payoro, wahchea mehne noano durucuha. 26 To ā yoach_u ñ_ua masa sehe jipihtina c_uaa wahaha. Tina c_uaa waha, Cohamac_ure ño payoā, wahchea mehne noano durucuha:

—Michare soro jiare ñ_uhi s_u —niha tina.

Jesu Levíre piha

(Mt 9.9-13; Mr 2.13-17)

27 Ā yoā tuhs_u waha, Leví wama tiroro to dahrari tahtiap_u jiroro boca s_uha Jesu. Leví sehe p_uhtaō ya c_ujlthire masare wapa

na cohtaroro jiha. Ā boca s_uro tirore ō sehe niha:

—Yuh_u mehne macariro c_ujltho taga m_uh_u —niha tiro Levíre.

28 To ā nich_u Leví sehe jipihtia to dahraare duhunoca, Jesu mehne wahaa wahaha.

29 Baharo Leví ya w_uh_ui bose n_um_u Jesure yoā payoro niha. Tói pay_u wapa na cohtaina, paina cāh_u Leví mehne dujiha. 30 Tina mehne Jesu cāh_u ti dujich_u ñ_ua mahainacā fariseo curua macaina, judio masare buheina mehne sua, Jesu buheinare ō sehe ni sinitu ñ_uha:

—¿Dohseana ñano yoaina, wapa na cohtaina mehne ch_ujar_u m_usa? —ni tuhtiha tina.

31 Ti ā nich_u t_uhororo Jesu y_uhtiha tinare. Ō sehe ni piti dahre buheha:

—Dohatieraina duhturure macaerara. Dohatiina dihta duhturure macana. Ñaare yoaina dohatiina yoaro sehe jira. 32 Ā jic_u ñaare yoainare yahui tai nihi yuh_u Cohamac_ure cahma dutic_u. Ti basi “Noaina jija s_u”, ni t_uhotuinare yahui tai nierahi yuh_u —niha Jesu.

Ch_u duhuare Jesure sinituha paina

(Mt 9.14-17; Mr 2.18-22)

33 Ā yoā mahainacā masa Jesure ō sehe ni sinitu ñ_uha:

—Joāo buheina pay_u tahari Cohamac_ure ño payoā taa ch_u duhura. Ā yoā, tina pay_u tahari Cohamac_ure sinina. Fariseo buheina cāh_u ti yoaro seheta yoara. Ti ā yoapach_uta m_u buheina sehe Cohamac_ure ño payoā taa ch_u duhuerara. ¿Dohse yoā ā yoerajari tina? —niha tina Jesure.

34 Ti ā nich_u Jesu to t_uhotua mehne quit_u dahre buhero taro tinare ō sehe ni y_uhtiha:

—Ō sehe jira ti: Wamomaca d_uhteror_u ti pjirrocaina wamomaca d_uhteroro mehne jia, ch_u duhu masierara. Tó seheta y_u buheina cāh_u yuh_u mehne jia, ch_u duhu masierara. Yuh_u wamomaca d_uhteroro yoaro sehe jija. Wamomaca d_uhteroro bose n_um_u to yoach_u tiro mehne macaina ch_ueraina jierara. 35 Y_u p_uc_u Cohamac_u yuh_ure to naari baharo p_unihtare y_u buheina mehne jisi yuh_u. Ā jia ti p_ujar_uta y_u buheina cāh_u ch_u duhuahca —niha Jesu.

36 Panor_u macaa buhea wahma buhea mehne ti buhe more duach_u ñ_uno ō sehe ni namoha Jesu tinare piti dahre buhero:

—Ne wahma suhtirore mahari cahsarocā t_uhrē na, m_unano suhtirore sere ōno cahmaerara. Mari ā sere ōna wahma cahsarore t_uhrē cohāna nija. Ā yoā wahma cahsaro m_unano suhtiro mehne c_uno potori bajuerara. (Tó seheta m_una buhea wahma buhea mehne piti dahre buheraro cahmana.)

37 Ā yoā ne se co bisia core wahiquiro cahsaro wajuru mehne m_una wajuru

mehne posaeraro cahmana. Mari ã yoachũ se co bisia pahmoapu mũna wajurure tuhñenocahna. To tuhñuchũ se co cãhũ, wajuru cãhũ cohõa wahara. ³⁸ Æ yoa se co wahma core wahma wajurupu posaro cahmana. Mari ã yoachũ se co cohõera, wajuru cãhũ cohõerara. (Tõ seheta wahma buhea mũna buhea mehne buhe moreraro cahmana.) ³⁹ Mũna core masa ti sihniri baharo, wahma core cahmaerara tina. Õ sehe nia tire masa: “Mũna co wahma co bui curero noaa jira”, nia tire masa —niha Jesu tinare.

6

Sabado jichũ Jesu buheina trigo parorire paha yuhdũ wahcãha

(Mt 12.1-8; Mr 2.23-28)

¹ Pa dacho Sabado jichũ Jesu cãhũ trigo wesepũ suha. Tõpu su, to buheina sehe trigo parorire paha, ti pohcarire sahcã site boro, ti yaparire chũ wahcãa niha. ² Ti ã yoachũ ñã mahainacã fariseo curua macaina tinare õ sehe ni sinituha:

—¿Dohse yoana masa Sabado mari sori namũ to jipachũta dahrajari? Marine dutiare yuhdũrucana nina mũsa —niha fariseo curua macaina Jesure.

³⁻⁴ Ti ã nichũ tuhoro Jesu tinare yahtiha, (“Yũ buheina yuhdũrucaa nierara”), nino taro:

—Davi cjiro tiro mehne macaina mehne jũca baaro, Cohamacũ wuhũpu sãa, Cohamacũ ya pãore chũha. Æ chũro tõi mehne macaina cũhũre ti pãore chũ dutiro waha. Tĩ pãore sacerdotia dihtare chũ dutira. Cohamacũ dutia tĩ pãore painare chũ dutierara. ¿Davi cjiro tĩre to yoari cijire buherari mũsa? (Tĩ pãore chũro Cohamacũre yuhdũrucaro nieraha. Michare ahri yaparire chũa yũ buheina cãhũ Cohamacũre yuhdũrucaa nierara.) ⁵ Yũhũ masũno Cohamacũ warocariro ahri dacho Sabado dachore masa ti yoahire yahurirota jicũ pũhtorota jija —niha Jesu.

Wamomaca buhariro quti jira

(Mt 12.9-14; Mr 3.1-6)

⁶ Pa dacho Sabado jichũ Jesu judio masa ti buheri wuhũpu sãa sũro, buheha masare. Tõi wamomaca poto buhũsehe buhariro jiha. ⁷ Mahainacã judio masare buheina, fariseo curua macaina cãhũ Jesure yahusã duamaha. “Sabado dachoi masũno noariro wahachũ yoaboca Jesu” ni, ñã nũnũ yahusã duamaha tina Jesure. ⁸ Jesu ti tuhotuare masino, buharirore õ sehe niha:

—Wahcã sũhũcaga jipihtina ti ñũrocaroi —niha tirore.

To ã niri baharo buhariro sehe wahcãruca su, tõi ducuha. ⁹ Æ jiro Jesu tinare õ sehe ni sinituha:

—Mũsare sinituhtja: ¿Sabado jichũ yabare yoa dutijari Cohamacũ dutia? ¿Noaare yoachũ noajerari? ¿O ñaaare yoachũ sehere noajari, mũsa tuhõtochũ? Sabado jichũ masũnoare masochũ noa nina. Sabado jichũ masũnoare wajãchũ sehere noajerara —niha Jesu tinare.

¹⁰ Æ nino Jesu tinare ñũroca õ pahõo, buharirore õ sehe niha tjoa:

—Mũ wamomacare siũrocaha —niha tiro.

To ã nichũta buhariro sehe siũroca, noari wamomaca wahaha. ¹¹ To ã yoachũ ñã tina Jesu mehne tuaro suaha. Æ suaa õ sehe niha:

—¿Dohse yoanahcari mari ahrirore? —niha tina ti basi.

Jesu to buheinare doce to warocahtinare bese dapoha

(Mt 10.1-4; Mr 3.13-19)

¹² Tĩ dachorire Jesu tũcũpu Cohamacũre sinino mũjaa wahaha. Tõpu jiro, ñamine Cohamacũ mehne durucu bohreaha.

¹³ Bohrearopũ to buheinare to cahapũ pjirocaha. Pjiroca tuhũ, tina mehne macainare doce waro to warocahtinare bese dapoha. ¹⁴⁻¹⁵ Ahriina jiha Jesu to bese daporina: Simo jiha. Simore Pedro ni pisuha Jesu sehe. Simo bahũro Andre, Santiago, Joãõ, Felipe, Bartolomé, Mateo, Toma, Santiago jiha. Santiago sehe Alfeo macũno jiha. Æ jia Simo cananista ya curua macariro cjiro, ¹⁶ Juda Santiago macũno, Juda Iscariote tina jiha to bese daporina. Juda Iscariote sehe Jesure ñũ tuhtiinare ñõhtiro jiha.

Jesu payũ masare buheha

(Mt 4.23-25)

¹⁷ Æ yoa Jesu to buheina mehne tũcũ buipũ jirina duji taa, payũ paina to buheina mehne duji wihirũca, noari wapai ducuha tina. Jipihtiro Judea yahpa macari macaina, Jerusalẽ macaina, Tiro wama tiri maca macaina, Sidõ wama tiri maca macaina, pjiri ma duhtũ cahai jia macari macaina masa payũ tiro cahapũ wihũha. ¹⁸ Tina Jesu buheare tuhõa taa, ti dohatiare cohãchũ cahmaha tina. Watã ti cohtotarina cãhũ tiro cahapũ wihi, noaina wahaha. ¹⁹ Jesu to tuua mehne noaina wahachũ yoaha tinare. Æ jia tina jipihtina tirore dahra ñã taha.

Jesu wahcheare, cahyaa cãhũre buheha

(Mt 5.1-12)

²⁰ Baharo Jesu to buheinare ñũ, õ sehe ni yahuha:

—Mũsa pjacũnoina, puhtoro Cohamacũ to sũho jiropu wahanahca mũsa. Æ jina mũsa wahchenahca.

²¹ Mĩpũre mũsa jũca baaina yapiina jinahca. Æ jina wahchenahca.

‘Mipri tiina jina, baharo musa bujunahca. Á yoa musa wahchenahca.

²² Yuhre masano Cohamacu to warocariro jija. Á jina yu yare yoaina musa jiri buhiri paina musare ti ñu tuhtipachuta wahcheina jira musa. Musare ti cohāpachuta wahchenahca. Musare ti ñano durucupachuta “Ñaina jira”, musare ti nipachuta musa sehe wahchenahca. ²³ Musare ti á yoachu ñuno muanopri musa suchu pjiro noano yorohca Cohamacu musare. Á jina tuaro wahcheina jiga. Noano yajeripohna tiina jiga. Musare ñu tuhtiina ti coyea panopri macaina to seheta ñano yoaha Cohamacu yare yahu muhtaina cijri cūhure.

²⁴ ‘Á yoa musa mipri payu cjuaina ahri yahpapu musa noano jinoca tuhsare. Á jina ñano yuhduina jinahca musa.

²⁵ ‘Mipri yapiina musa juca banahca. Musa á jina ñano yuhduinahca.

‘Mipure musa bujuina jina baharopri musa cahya, tiinahca. Á jina musa ñano yuhduinahca.

²⁶ “Cohamacu yare yahu muhtaina jija”, ni mahñoinare “Noaina jira”, nimaha payu panopri macaina. Á nimarina ti coyea mipri macaina cūhu āta “Noaina jira”, niboca cāina musa mehne macainare. Ti á nimarina musa jina ñano yuhduinahca musa cūhu —ni buheha Jesu.

Musare ñu tuhtiina ti jipachuta tina cūhure cahīga

(Mt 5.38-48; 7.12)

²⁷ Á yoa ó sehe ni buhe namoha Jesu:

—Yuhre tuho duainare, musareta niu nija. Musare ñu tuhtiina ti jipachuta tina cūhure cahīga. Musare ñu tuhtinare noano yoaga. ²⁸ Musare “Ñano yuhdujaro”, niina ti jipachuta noa dutiga tinare. Musare ñano yoaina ti jipachuta “Tina cūhu noano jijaro”, ni sini payoga Cohamacure. ²⁹ Cāiro musa wahsupure to cjāchu, pa buhusehe cūhure cjā dutiga tire. Musa bui macari suhtirore to machu musa camisa cūhure á wanocahga tire. ³⁰ Musare sinirirore to sinino purota tina tire. Musa yare to nachu tire sinituena tjia jiri turi tire. ³¹ Paina musare ti noano yoachu cahmana musa. Tinare musa noano yoachu cahmano seheta musa cūhu noano yoaga tinare. Musare ti noano yoerapachuta musa sehe tinare noano yoaga.

³² ‘Musare cahīina dihtare musa cahīchu tí ne yaba cjihti jierara paina sehere musa cahīerachu. Ñaina cūhu tinare cahīina dihtare cahīna. ³³ Á jina musare noano yoaina dihtare musa noano yoachu tí cūhu ne yaba cjihti jierara paina sehere musa noano yoerachu. Tíre ñaina cūhu yoaa tire. ³⁴ Á yoa “Yuhre wiaa tire”, musa niina dihtare

musa wasochu ne tí yaba cjihti jierara. Ñaina cūhu painare “Yuhre wiaa tire”, ti niinare wasoa tire. ³⁵ Á jina musa sehe musare ñu tuhtiina cūhure cahīga. Á yoa, tinare noano yoaga. Pairore wasona “Yuhre ne wiaa ahriro”, ni tuhotuena tire wasoga. Cohamacu sehe tirere ji coeraina cūhure, ñaina cūhure noano yoara. To yoaro se-heta yoaga musa cūhu. Musa á yoachu Cohamacu pjiro noano yorohca musare. Musa á yoana Cohamacu tua yuhduariro muano macariro pohna jinahca. ³⁶ Mari Pncu muano macariro to pja ñuriro seheta musa cūhu masare pja ñuga —ni yahuha Jesu.

Paina cūhure “Ñaina jira”, niena tjiga
(Mt 7.1-5)

³⁷ Á yoa tinare ó sehe ni yahu namoha:

—Painare “Ñaina jira”, niena tjiga musa. Musa á nierachu Cohamacu musa cūhure “Ñaina jira”, nisi. Paina musare ti ñano yoirire ti ñano niri cūhure boga musa. Musa á bochu ñuno Cohamacu musa cūhure musa ñaa yoari buhirire borohca. ³⁸ Paye barore cjuana painare waga. Musa á wachu Cohamacu musare warohca. Á waro noano quihōno musare pjiro warohca. Wahpa yuhduaro warohca. Painare musa wariro purota Cohamacu musa cūhure warohca —niha Jesu tinare.

³⁹ Á ni tuhsu Jesu quiti mehne piti dahre buhero ó sehe ni yahu namoha:

—Capari ñueraina sahsero ti basi noano tuā wahcā masierara. Á tuā wahcā, tina puaro doca wahā su bora sāa wahaahca copapu. (Tó seheta Cohamacu yare masieraina painare buhe masierara. Á jia tina jipihtina pichacapu wahaahca.) ⁴⁰ Buheina tinare buherirore masi yuhducaerara. Á jipahta jipihtina buheina ti noano buhe pahñori baharo tinare buheriro yoaro seheta jiaha —niha Jesu.

⁴¹ Á ni tuhsu paye quiti mehne yahu namoha:

—Mari piti dahre buhechu ó sehe yoaina jira musa: Musa coyero to capariacapu mahari pohcarocā to sāachu tí pohcarocāre noano ñuna musa. Musa ya capariacare pjiri pjí to jipachuta tí pjíne ne ñuerana musa. (Mahari pohcarocāre musa ñuno seheta musa coyero to ñano yoaa sehere noano ñuna musa. Musa basi musa ñaare tuaro yoapanahca tíre masierara musa pjiri pjíne musa ñueraro seheta.) ¿Dohse jiro baro á jijari musa? ⁴² Ó sehe niina yoaro sehe jira musa: “Coyero, muhu ñaare yoai nica muhu. Á jicu tíre duhuga”, niina yoaro sehe jira musa. Á niina jipanahta pjiro ñaare yoara musa sehe. ¿Dohseana musa

ñaare yoapanahita tíre masierajari mûsa? Masa tí baharo bûhusehei ñano yo cohtaina jira mûsa ã yoaina. Pjiri pjîne mûsa capariacai jiri pjîne mûsa na mũhtaboriro seheta mûsa ñaa yoaa sehese duhu mũhtaga. Mûsa ã yoari baharo mûsa coyeyiro to ñano yoaaare duhuchu yoaa masiboca mahari poharocãre mûsa naboro seheta –ni buheha Jesu.

Masa tí durucuare tahona tí jia tiare masija mari

(Mt 7.17-20; 12.34-35)

⁴³ ã yoa piti dahre buhero õ sehe ni yahu namoha tinare:

–Noadu yucucu ñaare dicta tierara. ã yoa ñadu noaare dicta tierara. ⁴⁴ Yucucu dichare masina tãre masina. Pota tidu higuera pocare dicta tierara. ã yoa agã potacu se tõhorine dicta tierara. ⁴⁵ Tõ seheta jira masa cãhu. Noariro to tãhotuapũ noaa jira. ã jiro tiro noaare yoara noadu to noano dicta tiro seheta. Ñariro to tãhotuapũ ñaa jira. ã jiro tiro ñaare yoara ñadu ñaare to dicta tiro seheta. Mari tãhotuapũ marine tí jiro seheta durucuaja mari –ni yahuha Jesu.

Pna wũhu yoaina quitire yahuha Jesu

(Mt 7.24-27)

⁴⁶ ã yoa tinare õ sehe ni yahu namoha:

–Musa yũhũre “Pũtoro”, nina. ã nipanahta yũ dutia sehese yoaerara mûsa. ¿Dohse jiro baro ã yoajari? ⁴⁷ Jipihitina yũhũre cahmaina yũ yahuafe tũhõra. ã jia yũ dutiare yũhũrucãerara. õ seheta jira yũhũre yũhũrucãeraina: ⁴⁸ Wũhu dahreriro yoaro sehe jira tina. Tiro cããa coparire tãa wapai to sũchũpũ saha, wũhũre noano dapõ dũcaha. Tí wũhu noano to yoari wũhu jiro dia to minichũ tuaro to cotiãpachuta tí wũhu noano tjuaha. ⁴⁹ ã jia yũ dutiare tũhopahta yũhũrucãina sehe wũhũre noano yoaerariro yoaro sehe jira. Tí wũhũre buicã dapõ, noano dahre dũcaeraha. To ã cũri wũhu jiro dia minino to cotiãchũ dõihita tí wũhu buũna wahaha. ã jiro tí wũhu tuaro bõra sũ cahaa wahaha –niha Jesu.

7

Surara pũtoro cahamacũnore to dohatichũ Jesu noariro wahachũ yoaha tirore
(Mt 8.5-13)

¹ Tí quitire masare yahu tũhsũ Jesu cãhu Capernaupũ saha. ² Tõi jiriro cien surara pũtoro to cahamacũnore tuaro cahĩha. To cahamacũno sehe dohatiriro jiro, yariaro cahariro jimaha. ³ ã jiro Jesu to yoaafe tũhõro, judio masa bũcũnare Jesu cahapũ warocaha pũtoro sehe.

–Dohatirirore noariro wahachũ yoai taga –ni yahu dutiro warocaha pũtoro bũcũnare.

⁴ Tina Jesu cahapũ sũa, õ sehe ni tuaro mehne yahuha tirore:

–Surara pũtoro sãre warocahre. To cahamacũnore dohatirirore to yũhũchũ cahmahre tiro. Tiro pũtoro sehe noariro jira. To ã jichũ yoadohõga tirore. ⁵ Mari ya maca macainare tiro cahĩna. ã jiro tiro sã buheri wũhũre tí yoari wapa wapare –niha bũcũna Jesure.

⁶ Tí ã ni yahuchũ tũhõro Jesu sehe tina mehne wahaha. Surara pũtoro ya wũhu cahacãi to sũro cahachũ pũtoro sehe tiro mehne macainare Jesure õ sehe ni yahu dutiro warocaha:

–Pũtoro, noanõhca. Tai tjiga. Noariro jieraja yũhu. Ya wũhũi mũhũre sãa ta dutibõrõro jieraja yũhu. ⁷ ã jicu mũ cahai wahaeraja. Yũ ã jipachũta mũ masia mehne noariro wahachũ yoaga mũhu tirore. Mũ ã yoachũ yũ cahamacũno noariro waharõhca. ⁸ Yũhũre yũ bui jiina paina pũtoa dutira. ã jicu yũhu cãhu surarare dutija. Cãirore “Wahaga”, yũ nichũ tiro wahara. Pairõre “Taga”, yũ nichũ tiro tara. Yũ cahamacũnore “Ahrire yoaga”, yũ nichũ tíre tiro yoara. (Mũhũ cãhu dutirirota jira. ã jiro mũ dutiriro seheta tiro dohatiriro yũhũrõhca) –ni yahu dutiha surara pũtoro.

⁹ To ã nichũ tũho cãaa waharo, payũ masa tiro mehne jĩinare majarerũcũ sũ, õ sehe ni yahuha:

–Mũsare niita nija. Tiro surara pũtoro Israe masũno jierariro Cohamacũre tuaro wacũ tuara. To cahamacũnore yũ noariro wahachũ yoahitire masi tũhsũra. Israe masare ne ahriro yoaro sehe jĩinare ñuerasinija –niha Jesu.

¹⁰ To ã niri baharo surara pũtoro Jesu cahai to warocarina sehe tí pũtoro ya wũhũpũ tjuaa wahaha. Tju sũ dohatiriro to noariro jichũ ñũha tina.

Jesu wapewahyoro macũnore masõha

¹¹ To ã yoari baharõcã Nai wama tiri macapũ Jesu to buheina mehne payũ masa mehne wahaha. ¹² Tí macare sãari sopaca cahai to sũchũ yariarirore masa na wijaa taa niha. Yariariro pocoro wapewahyoro jiha. Cãirota jiriro yariaha. ã jia tã macaina masa payũ ticoro mehne wahaha. ¹³ To ã wahachũ ñũno Jesu ticorore pja ñũha.

–Tiicõ tjiga –niha Jesu ticorore.

¹⁴ ã nino yariariro to masa putihĩ ña payõha. To ã ña payõchũ ñũa tí putire wũaina sehe sũrucãha.

–Macũ, yũhu mũhũre õ sehe nija. Wahcã nuju suga –niha Jesu.

¹⁵ To ā niri baharo yariariro cjiro wahcā nuju s_u, durucuha. Ā jiro Jesu tireto ro pocorore waha. ¹⁶ To ā yoach_u n_ua tina jipihtina cuia wahaha. Ā jia tina Cohamac_ue ño payoa, õ sehe niha:

—Cohamac_u yare yahu m_uhtariro masi yuh_uariro mip_u pinihtare mari watoi jira —niha tina.

—Cohamac_u marine to yainare yoadohoro wihi tuhs_uhre —niha paina.

¹⁷ Ā jia jipihtina Judea yahpa macainare tó d_uht_u cahai jia macari macainare Jesu to yoarire masa yahu site pahñoha.

João masare bautisariro to buheinare Jesure sinitu dutiha

(Mt 11.2-19)

¹⁸⁻¹⁹ Ā yoa Jesu to yoarire n_ua Joãore yahuha to buheina. Ā ti yahuch_u t_uhoro p_uarore tiro cahai pjiroca, Jesure sinitu dutiro warocaha João. Ő sehe ni sinitu dutiha:

—Ĵoão “Y_u baharo pairo tarohca”, to niriro tjijari m_uhu? ĴTo niriro m_u jierach_u pairore cohtanahcari sã? —ni sinitu dutiha João p_uaro to buheinare.

²⁰ Ā yoa tina Jesu cahai s_u, sinituha tireto:

—João masare bautisariro m_uh_ure sinitu dutiro warocahre sãre. ĴJoão “Y_u baharo pairo tarohca”, to niriro tjijari m_uhu? ĴTo niriro m_u jierach_u pairore cohtanahcari sã? —ni sinituha tina Jesure.

²¹ Tí pjata pay_u dohattinare, watia ti cohtotainare, capari ñ_uerainare noaina wahach_u yoaha Jesu. ²² Ā jiro João warocainare Jesu õ sehe ni yahtia:

—Mip_ure masa n_urire masa t_uhorire Joãore yahuna wahaga: Ő sehe niga: “Capari ñ_ueraina n_una. Tini masieraina tinina. Cami buc_u baaina noaina wahara. T_uho bocaeraina t_uhoa wahara. Yariaina masaa wahara. Tina jipihtinare noaina wahach_u yoahi y_uhu. Ā yoa pjac_uoinare noaa buheare yahuja. ²³ Y_uh_ure t_uhoriro ‘Potocã tjira’, niriro tiro wahcheriro jira”, Joãore ni yahuna wahaga —niha Jesu.

²⁴ João buheina ti wahari baharo Jesu sehe João to jia tiare yahu d_ucaha pay_u masare:

—Masa marienop_u suna tjare wihnono to wãroca cohtotach_u yoiariro seheta to buheare cohtota m_ujariroro n_una s_uerare masa. Ā yoiariro jierare João. ²⁵ “Noa suhti tiriroro n_una wahajihna”, nierare masa masa marienop_u wahana. Noaa suhti tiina wapa buj_uare c_uainaina p_uhtoa ya w_uh_usep_u jira. Masa marienop_u jierara. ²⁶ Masa marienop_u suna Cohamac_u yare yahu m_uhtariroro n_una s_uhre masa. Potocã tjira. João Cohamac_u yare yahu m_uhtariro jira. Paina Cohamac_u yare yahu m_uhtaina yuh_udoro jiriro jira tiro. ²⁷ Panop_u Cohamac_u

yare ti joari p_ui Joãore õ sehe ni yahu joaa tih:

“Mari P_uc_u to mac_unore õ sehe niha: ‘M_u pano m_uh_ure yahuyuhtireto warocai nija’, niha Cohamac_u”,

ni yahu joaa tih panop_ure Joãore. ²⁸ Musare potocã niita nija. Paina jipihtina bui jira João. Ahri turup_ure to ā jipach_uta m_uanop_ure Cohamac_u masare p_uhtoro to noano s_uho jiropp_ure jipihtina docapu jiriro pinihta João bui jira —niha Jesu masare.

²⁹ To ā nich_u t_uhoa jipihtina masa, p_uhtoa ya cjihtire wapa na cohtaina mehne João to bautisarina jia õ sehe ni t_uhotuha Cohamac_ue. “Cohamac_u quih_uno yoiariro jira”, ni t_uhotuha tina. ³⁰ Fariseo curua macaina sehe judio masare buheina c_uhu João to bautisanohrina ji duaeraha. Ā jia tinare Cohamac_u to yaina to yoa duach_u cahmaeraha.

³¹ Ā yoa Jesu pari turi õ sehe ni yahuha:

—ĴMip_u macaina masa yabaina yoaro sehe jijari tina, musa t_uhotuch_u? ³² Tina macanacã yoaro sehe jira. Paina ti cahmano sehe ti yoaerach_u tó wahaerara tinacãre. Pache duarop_u pape dujia, õ sehe ni pisurucura tinacã ti basi: “M_usa basahti cjihtire sã putipemahi. ĴDohseana musa basaerari sã tire putipechu? Sã tuaro ñahacaha tiipe, sañurucumahi. ĴMusa sehe dohseana sã mehne tiiperari?” nirucaina yoaro seheta jira mip_u macaina c_uhu. (Mip_u macaina ti cahmano seheta sã yoaerach_u n_ua tó wahaerara tina c_uh_ure.) ³³ João bautisariro Cohamac_ue ño payoro taro ne ch_ueraro, vinore sihnierare. To ā sihnierach_u n_una “Watino to cohtotariro jira”, nimahre masa tireto. ³⁴ Y_uhu mas_uno Cohamac_u warocariro jic_u, y_uhu ch_u sihniya. Y_u ā yoach_u n_una õ sehe nina masa y_uhu sehene. “Ñ_uga. Ahriro pjiro ch_uriro, cahariro jira. P_uhtoa ya cjihtire wapa na cohtaina, ñano yoina c_uhu ti piti tiriro jira ahriro”, nina masa y_uh_ure. Ā nina macanacã yoaro sehe durucuina jira masa. (Musa cahmano sehe sã yoaerach_u tó wahaerara musare. Ne wacherara masa.) ³⁵ Ā masierapanahta sã yoa ñorire n_una, Cohamac_u yare sã masich_u masinahca masa —ni yahuha Jesu.

Simo wama tiro fariseo curua macariro ya w_uhui jiha Jesu

³⁶ Fariseo curua macariro to w_uh_up_u ch_u dutiro pjha Jesure. To ā pjich_u Jesu to ya w_uh_up_u s_u, ti ch_uri mesa cahai nuju s_uha. ³⁷⁻³⁸ Tí macap_ure ñaare ñaare yoaucuricoro cjiro jiha. Jesu fariseo curua macariro ya w_uh_up_u to dujich_u ticoro t_uhoha. Ā t_uho tuhs_u alabastro mehne yoiariare me sitia posa tiriare na ta, Jesu baharo b_uh_usehei wihi tar_uca, tiha. Ā tiro Jesu dahporire

to yahco co mehne wayo, to pjoari mehne pahā cohāha. To dahpori wuachu űu tico ro to dahporire wihmi, me sitia mehne pio payoha. ³⁹ To ā yoachū űuno fariseo curua macariro Jesure pjiro to basi ō sehe ni tūhotumaha: “Ahricoro tirore űaha űaricoro űaare yoarucuricoro jira. Ahriri Jesu Cohamacu yare yahu mūhtariri jiro tīre masiboa”, ni tūhotumaha. ⁴⁰ To ā ni tūhotuare masino Jesu ō sehe ni yahuha tirore:

–Simō mīpū pinihtare mūhare yahu du-
aja –niha Jesu.

–Buheriro, ěyūhare dohse ni yahu dua-
jari mūhu? –ni yūhtiha Simo.

⁴¹ To ā nichū Jesu ō sehe ni piti dahre buhe
yūhtiha:

–Pūhtoro pūaro wapamōina jiha. Cūiro
wapamoriro quinientos niűeru tūrire wa-
pamoha. Pairo sehe cincuenta niűeru tūrire
wapamoha. ⁴² Ā jia tina ti wapamoare
ti wapa bihoerachū űuno pūhtoro ti wa-
pamoare wapa dutieraha. ěMīpū pinihtare
diro sehe wapamoriro sehe to pūhtoro
caĵi yūhdarohcarī? –ni sinituha Jesu.

⁴³ Simo ō sehe ni yūhtiha:

–Būah, pjīro wapamoriro mahanocā
wapamoriro yūhdoro to pūhtoro caĵi
yūhdaboca –niha Simo.

–Potocā ni yūhtihre mūhu yūhare –niha
Jesu.

⁴⁴ Ā ni tuhsū tirore pio payoricorore ma-
jare űu, Jesu Simore ō sehe ni yahu namoha:

–Ahricorore űuga mūhu. Mū ya wūhūpū
yū sāa wihiri baharo yū dahporire cōsahī
core yūhare waerare mūhu. Ahricoro sehe
to yahco co mehne yū dahporire wayo, to
pjoari mehne pahā cohāhre yūhare. ⁴⁵ Mūhu
sehe yūhare piti boca wihmierare. Ahricoro
sehe ōi yū dujiro puro yū dahporire wih-
mihre. ⁴⁶ Mūhu sehe yū dapure se mehne
pio payoerare. Ticoro sehe yū dahporire
me sitia mehne pio payohre. ⁴⁷ Ā nicū
mūhareta yahui niĵa. Ahricoro to űaa yoari
cĵiri payūbia jira. Ā jiricoro jiparota ticoro
tuaro caĵihre yūhare. Ā jicu űaare to yoari
buhirire cohāhi. Ā jia űaare ti yoari buhirire
mahanocā yū cohānohrina mahanocā caĵina
yūhare –niha Jesu Simore.

⁴⁸ Ā ni tuhsū tiro ticorore ō sehe ni
yahuha:

–Mīpū pinihtare űaare mū yoari buhirire
boja –niha Jesu.

⁴⁹ To ā nichū tūhoa Jesu mehne dujiina ti
basi ō sehe ni durucūha:

–ěDohse jiriro baro jijari ahriri űaa
buhirire boriro? –niha tina ti basi.

⁵⁰ Ā ni tuhsū, Jesu numiore ō sehe ni
yahuha:

–Yūhare mū wacū tuachu mūhare
pichacapū wāhaboricorore yūhdoĵa. Cūiro

marieno mū wūhūpū tĵuua wahaga –niha
Jesu ticorore.

8

Numia Jesure yoadohoha

¹ Baharo buĵūa macaripū daa macaricāpū
cūhare sū, Cohamacū masare pūhtoro to
noano sūho ĵiare noaa buheare yahuha
Jesu. Doce to buheina sehe tiro mehne
jiha. ² Ā yoa numia cūhu wafā ti cohtotari
numia cĵiri, dohatia numia cĵiri Jesu noaa
numia to yoari numia tiro mehne tiniha.
“María”, ti nimaricorore “Magdalena”, ni
pisua tiha ticorore. Ticorore siete wafāre
Jesu cohā wioha tō pano. Ā jiro ticoro
cūhu Jesu mehne tiniha. ³ Cuza wama
tiriro Herodere dahra cohtaina pūhtoro
cĵiro namono Juana cūhu Jesu mehne tiniha.
Susana wama tiricoro cūhu paye numia
mehne payū ti cĵuua mehne tirore yoado-
hoha.

Jesu wesere toari masuno quitire yahuha
(Mt 13.1-9; Mr 4.1-9)

⁴ Ā yoa payū macari macaina Jesu cahapū
cahmachuha. Ti ā cahmachuri baharo Jesu
to tūhotua mehne qiti dahre tinare ō sehe
ni yahuha buhero taro:

⁵ –Toari masuno toaro, to toaa yaparire
doca site cūno wahaha. To ā doca site
cū wahcāchū paye yapari mahai bora caha
sūha. Ti ā bora caha sūchū paye yaparire
masa tū diho cūha. Ā jia paye yaparire
minichahca duĵi ta, cūnocaha. ⁶ Ā yoa paye
yapari sehe tāa wapa bui dihta se mininocā
bui bora caha sūha. Ti yahpāpū co mariaha.
Ā jia ti yapari du wĵa tarucuma űaia wa-
haha. ⁷ Paye yapari sehe tĵa watōi bora caha
sūha. Tĵa sehe ti toaa mehne duha. Tĵa sehe
dia yūhdūa waha, toaare wajānocaha. ⁸ Paye
yapari noari yahpai bora caha sūha. Noano
dua jia noano dicĵa tiha. Ā jia payū dicĵa
tiha –niha Jesu.

Ā ni tuhsū ō sehe tuaro ni namoha:

–Ahrire tūho duaina noano tūhoga mūsa
–niha tiro.

Jesu qiti mehne to buherire yahuha
(Mt 13.10-17; Mr 4.10-12)

⁹ Baharo to buheina ti quitire masi duaa,
Jesure ō sehe ni sinituha:

–ěAhri qiti mehne dohse ni yahui niĵari
mūhu? –ni sinituha tina.

¹⁰ Ti ā nichū Jesu ō sehe ni yūhtiha:

–Cohamacū masa bui pūhtoro to noano
sūho ĵiare panorpū paina ti masierari cĵirire
mūhare masichū yorohca Cohamacū.
Paina sehēre ā yoaerara tiro. Tinare qiti
mehnetā buheihĵa. Yū ā yoachū tina yū
buheare tūhopahta masi –niha Jesu to
buheinare.

Jesu wesere toari masʷno quitire yahu pahñoha

(Mt 13.18-23; Mr 4.13-20)

11 Ā ni tuhsʷ tinare ō sehe ni yahu namoha:

—Ō sehe ni yahura ahri quiti: Toaa yapari noaa buhea yoaro sehe jira. 12 Ā yoa maha duhtʷ cahai boraa yapari sehe noaa buhea yoaro sehe jira. Cāina masa noaa buheare ti tuhochʷ ñno watño sehe ta, tí buheare masi dutierara masare, minichahca tí yaparire ti chʷ cohāno seheta yoaro. To ā yoerachʷ tina Cohamacʷre wacū tuaboa. Tí ā wacū tuachʷ ñno Cohamacʷ sehe tinare pichacapʷ wahaborinare yuhdoba. 13 Ā yoa taa wapa bui dihta se mininocā bui boraa yapari noaa buhea yoaro sehe jira. Ā jia masa noaa buheare tʷho, wahchea mehne tře tʷho nʷnʷ wahcāna. Ā tʷho nʷnʷpahta taa wapa buicā jia yucʷ nʷhcori mariea yucʷ yoaro seheta ahriina masa cʷhʷ yoari pja cāno pjaerara. Ā cāno pjaeraa yʷ yare tí cahmari buhiri paina tinare ti ñano yoachʷ ñna yʷ yare duhunocahna. 14 Ā yoa tja watoi boraa yapari noaa buhea yoaro sehe jira. Ā jia masa noaa buheare tuhopahta, ahri yahpa macaare wacū nʷnʷ yuhduara. Niñerure bujua cahma, paye baro cʷhʷre payʷ cahma, tře goa pja yuhduara tina. Tí ā yoachʷ tí sehe noaa buheare ducatara. Tí ā ducatachʷ masa noaa sehene yoerara. Dicha maria yucʷ yoaro seheta jira. 15 Ā yoa noari yahpai boraa yapari noaa buhea yoaro sehe jira. Ā jia masa noaa buheare tʷho, noano mehne tí buheare yuhducaerara. Ā jia yucʷca dica tiro seheta noaa buheare tʷhoina sehe Cohamacʷ to cahmano seheta noare yoara —niha Jesu.

Jesu sihāria quitire buheha

(Mr 4.21-25)

16 Ā ni tuhsʷ paye quiti mehne piti dahre buheha tiro:

—Ne sihāriare ti sihāri baharo tiare dihi biato docai cūerara masa. Ā yoa tiare coāri casario docai cūerara. Mʷanopʷ tiare duhu payora wʷhʷpʷ s̄āa taina ti noano ñu s̄āahto sehe. 17 Jipihti ti masierari cjirire baharo masa masiahca. Sihāria to buhriachʷ mari ñu masino seheta panopʷ ti masierari cjirire masiahca masa.

18 Ā jina masa tuhona noano tuho nʷnʷga. Noano tʷho nʷnʷrīro, noano masinohca. Tuho nʷnʷerariro “Mahanocā tuhoja”, to nipachata tí sehene boa waharohca —niha Jesu.

Jesu coyea tirote pjiha

(Mt 12.46-50; Mr 3.31-35)

19 Baharo Jesu bahana ti pocoro mehne tiro cahapʷ waha nimaha. Masa payʷ jichʷ

to cahapʷ sʷeraha. 20 Ā jiro cāiro Jesure ō sehe ni yahuha:

—Mʷ pocoro mʷ bahana mehne sopacapʷ ducuhre. Mʷhʷre ñna taa niyuhti —niha tiro Jesure.

21 To ā nichʷ Jesu ō sehe ni yahuha jipitinare:

—Cohamacʷ ya buheare tʷhoina, tře yuhducaeraina tinata yʷ pocoro yʷ bahana yoaro sehe jira —niha Jesu tinare.

Jesu wihnonore yʷsʷ dutiha

(Mt 8.23-27; Mr 4.35-41)

22 Pa dachoi Jesu to buheina mehne doho-riapʷ samu:

—Basa, pahājihna —ni, tina jipihina tia mehne bucpariropʷ pahāa wahaha.

23 Ā pahāno carīa wahaha Jesu. Tí ā pahārucuchʷ waro tuaro wihnono taha. Wihnono to tachʷ bujua pahcōri wahcā, tinare mionocamaha. Ā to wahachʷ miniho cua yuhduaha tinare. 24 Ā wahachʷ ñna Jesu cahai waha, tirote wahcōha.

—Buheriro, mari mini yariana tana nijā —niha tina.

Tí ā nichʷ Jesu sehe wahcā, wihnonore “Tó purota wā duhuga”, niha. Ā ninota pahcōri cʷhʷre “Yʷsʷa wahaga”, niha. To ā nichʷta wihnono yuhduaha wahaha. Ā yoa pahcōri cʷhʷre yʷsʷa boraa wahaha. 25 Ā wahari baharo Jesu tinare ō sehe niha:

—¿Mʷsa yʷhʷre wacū tuaerasinijari? —niha tiro.

To ā nichʷ tina sehe cui, cʷaa waha, ti basi ō sehe ni durucuha:

—Cue, ¿dohse jiriro baro masʷno jijari ahriro? Ahri wihnono, pahcōri cʷhʷre to dutichʷ yuhducaerara tirote —niha tina ti basi.

Watīa ti cohtotarirore noariro wahachʷ yoaha Jesu

(Mt 8.28-34; Mr 5.1-20)

26 Ā yoa tina sie coapʷ Gerasa macaina ya yahpapʷ pahā suha. Tí yahpa Galilea yahpa potoihta jiha. 27 Tóí Jesu to maja sʷrʷcʷ sʷchʷ waro tó macariro watīa tí cohtotariro tiro cahapʷ taha. Tiro yoari pja suhti mari-eriro jiro, to wʷhʷpʷre ne jieraha. Ā yoa masa copari taa copari watoi jia tiha tiro. 28-29 Ā jia payʷ tahari watīa tirote ñahaha. Ā jiro tiro peresui to jichʷ to wamomacarine dahporire comaa dari mehne duhteriro jiparota, tiro tí darire nuha mʷjaha. Ā yoa watīa sehe tirote masa marienopʷ na wahcāa taha. Ā yoa tiro Jesure ñuroca ō tuaro sañurucu, Jesu panoi na tuhca caha suha. To ā yoachʷ ñno Jesu sehe tirote ō sehe ni dutiha:

—Watīa, duhuga ahrirore —niha Jesu.

To ā nichʷ tʷhoro watīa tí cohtotariro tuaro sañurucu, ō sehe ni sinituha Jesure:

—Jesu, ¿Cohamacu Jipihtina Bui Jiriro macano yabare yoai tai nijari mũhu yuhure? Yuhure, ñano yoai tjiga —niha watia ti cohtotariro.

³⁰ To ã nichu Jesu sehe õ sehe ni sinituha tirore:

—¿Yabariro wama tijari mũhu? —niha.

Payu watia tiro mehne jiha. Æ jiro õ sehe niha watia ti cohtotariro:

—Watia payu wama tija sã —ni yũhtihã watia ti cohtotariro tiro.

³¹—Cuãri copapu sãre waha dutiecu tjiga —ni, tuaro siniha watia sehe.

³² Tĩ pjare tói tũcu dahpotoi yesea payu chua niha. Ti tói chachu ñna watia õ sehe ni siniha Jesure:

—Sina yesea cahapu warocaga sãre ti pjacuripu sã sãahto sehe —ni siniha watia.

Ti ã sinichu tuhoro “Jai. Wahaga”, niha Jesu. ³³ To ã dutichu, watia masuno mehne jirina cjiri sehe waha, yesea pjacuripu sãa wahaha. Æ yoã tinare ti sãari baharo, yesea jipihntina bucpariropu duhtu cahapu pari cãnrũ mũrocã buha, ti taropu bora ñoja, mini yaria pihtia wahaha.

³⁴ Yeseare ñu wihboina yesea ti ã minichu ñna, cui, mũrocaa wahaha. Æ mũroca wahcã pjiri macapu cãhure, daa macaricãpu cãhure tĩre ti ñurire yahu sitea wahaha. ³⁵ Ti ã yahuchu tuhoa, masa sehe payu ti ã waharire ñna wahaha. Æ jia Jesu cahai su, watia ti cohtotariro cjirore to suhti tĩro, tuho masiriro to dujichu ñna tina. Tĩ jipihntiare ñna, tina cui niha. ³⁶ Watia ti cohtotariro cjiro noariro to waharire ñuina, ti ñurire painare noano yahu pahũoha. ³⁷ Tĩ pjata Gerasa yahpa macaina payu Jesure tuaro cuia, tirore pa sehepu waha dutiã. Ti ã waha dutichu Jesu dohoriapu samu, waharo taro niha. ³⁸ Watia ti cohtotariro cjiro Jesu to wahahto pano tuaro siniha tirore:

—Mũhu mehne waha duaja —ni sinimaha.

³⁹ To ã nichuã Jesu tirore õ sehe ni yũhtihã:

—Mũ ya macapu wahaga. Æ wahacu Cohamacu mũhure to yoarire yahuga painare —niha Jesu.

To ã niri baharo waha to ya macapu sũro watia ti cohtotariro cjiro sehe Jesu tirore to yoarire jipihntina to ya maca macainare yahuha.

Jairo maconore yũhdũchu yoã, cahã ñũricoro cãhure yũhdũchu yoãha Jesu

(Mt 9.18-26; Mr 5.21-43)

⁴⁰ Pari turi Jesu ti bucpariropu pahãa wahaha tjoa. To pahã tariropũta masa payu tirore cohtaa niha. Æ cohtaa, tirore piti bocasiniha wahchea mehne. ⁴¹⁻⁴² Tói judio masa buheri wũhu pũthoro Jairo wama tĩrore Jesu cahai su, to dahpori cahai na

tuhcua caha sãha tirore ño payoro. To macono yariaro niha. Ticoro cãcorota jiricoro doce cahmari cjãaricoro jiha. Æ jiro tiro to ya wãhũpu Jesure pji wahcãha. “Jai” ni, tiro mehne wahaha Jesu cãhu.

Mahai ti ã wahachu payũbia masa tirore mũhu ti wahcã, bihsaro sũrcũ sãha tirore.

⁴³ To ã bihsaro wahachu numino doce cahmari waro ã cahã ñurucuricoro tói jiha. Tó pano duhturuare jipihntia to ñũeru mehne wapamaha ticoro co wa dutiro. Ti ã co wapachũta mũnanota jirucunocaha ticoro. ⁴⁴ Æ jiro ticoro Jesu baharo masa payu watoĩ wihi, Jesu suhtirore to ñaha ñuchũta to cahã ñna pihtia wahaha. ⁴⁵ To ã ñaha ñuchũ tuhoturo Jesu õ sehe ni sinituha:

—¿Noa yũ suhtirore ñaha ñũri? —niha tiro.

Jipihntina “Yoãerahi”, niha. Æ jia Pedro cãhu õ sehe niha:

—Buheriro, bihsa nina. Æ jia masa payu mũhure pihanocahna. ¿Dohseacu ã ni sinitu-jari mũhu? —niha tina Jesure.

⁴⁶ Tĩ ã nichu Jesu õ sehe ni yũhtihã:

—Michapucacã yũhu noaricoro wahachu yoahi cãcorore. Æ jicu yũhure to ñaha ñuchũ masija —niha tiro.

⁴⁷ To ã nichu tuhoro ticoro duhti masieraro, teterericoro Jesu cahai na tuhcuã caha sãha tirore ño payoro. Æ jiro jipihntina masa ti tuhoroĩ to dohatiare, Jesure to ñaha ñurire to noaricoro to waharire yahuha ticoro. ⁴⁸ To ã ni yahu tuhsũchu Jesu ticoro õ sehe ni yahuha:

—Maco, yũhure mũ wacũ tuaa mehne noaricoro tjuara mipure. Wahchea mehne wahaga —niha ticoro.

⁴⁹ To ã nino watoĩ Jairo ya wãhuĩ jiriro yahuro wihiã:

—Mũ macocã yariaa wahahre. Æ jicu buherirore pji tai tjiga —niha tiro.

⁵⁰ To ã nichu tuhoro, Jairore õ sehe ni yahuha Jesu:

—Cahã tuhotui tjiga. Yũhure wacũ tuaga. Tĩ dihtare yoaga. Mũ ã yoachu ticorocã masaa waharohca —niha Jesu.

⁵¹ Æ ni tuhsũ to wãhũpu su, Pedro, João, Santiago, dohatiricoro pũcũsãma tópeinata na sãaha. Paina sehere Jesu sãa dutieraha. ⁵² Tói jipihntina masa ti ñahacaha tiro watoĩ sãa sãha Jesu.

—Tĩiena tjiga. Ticorocã yariaerare. Carĩno nica —niha tiro.

⁵³ To ã nichu tuhoa tina sehe ticoro yariaricoro to jichũ masia, Jesure bujuha. “Æ nimacanocano nina”, ni bujuha. ⁵⁴ Æ yoã Jesu ticorocã wamomacare ñaha, õ sehe ni pisuha:

—Maharicorocã wahcãga —niha.

⁵⁵ To ã nichũta yariaricoro masaa waha, ti pjata wahcãrucũ sãha ticorocã. To wahcãri baharo Jesu ticoro cãhãre wa dutiã. ⁵⁶ To

ã masachũ ñua to pũcsũma ñũ caaa wahaha. Æ jiro Jesu tíre painare yahu dutieraha.

9

Jesu doce to buheinare buhe dutiro warocaha

(Mt 10.5-15; Mr 6.7-13)

1 Æ yoa Jesu doce to buheinare pjiroca, to tuaare waha tinare. Watĩare tí cohãhti cjihtire, dohatiinare noaina tí yoahiti cjihtire to tuaare waha tinare. 2 Æ yoa tuhsũ tinare Cohamacũ masare puhtoro to noano suho jiare buhe dutiro, dohatiinare noaina wahachũ yoa dutiro warocaha tinare. 3 Õ sehe ní dutiha Jesu tinare:

—Mũsa wahana paye barore naaena tjiga. Tjuadure, wajure, chũare, niñerure naaena tjiga. Mũsa sãano dihtare sãa wahcãga. Paye suhtire naaena tjiga. 4 Jipihtia macaripũ mũsare tí carĩno wachũ tí wuñihta jinocasiniga. Coã wahanapũ wijaahga tí wũhure. 5 Paye macari macaina mũsare tí cahmaerachũ ñũna tí macarine yuhũ wahcãa wahaga. Æ wahana mũsa dahpori macaa dihta pohcari mene wajã site cũga mũsa tinare tí ya buhirire masichũ yoana —niha Jesu.

6 To ã niri baharo to buheina sehe waha, jipihtia macaripepũ noaa buheare yahu tinia tiha. Æ yoa dohatiinare noaina wahachũ yoa tiha.

Jesu to yoirire Herode tuhoja

(Mt 14.1-12; Mr 6.14-29)

7 Æ yoa Herode Galilea yahpa macaina puhtoro Jesu yoirire tuhorocaha. “¿Diro baro jijari tiro Jesu?” nĩparota ne masieraha. Cãina õ sehe nimaha Jesure: “Joã masare bautisariro cjiro pari turi bajuaro nica. Æ jiro ‘Jesu’, tí nĩriro tiro tjira”, nimaha cãina. Tĩ ã nichũ tuhoro Herode Jesure dohse ní masieraha. 8 Paina “Tiro Elia cjiro mipũ bajuaro nina”, nimaha. Paina sehe “Cohamacũ yare yahu mũhtaina panopũ macaina mehne macariro cjiro mipũ bajuaro nica”, nimaha Jesure. 9 Tĩ ã ní durucupachata õ sehe ní tuhotuha Herode sehe: “Joã dapure dute ta duti tuhsũhi yũhũ. ¿Mipure jĩro masa tí yahuriro diro baro jibocari tiro sehe?” ní tuhoturo tiro Jesure ñũ duamaha.

Jesu cinco mil bui masare chua waha

(Mt 14.13-21; Mr 6.30-44; Jn 6.1-14)

10 Æ yoa Jesu to warocarina tiro cahapũ tju sũa, tí yoirire yahuha Jesure. Tĩ yahu tuhsũchũ Jesu tina dihtare Betsaida wama tĩri macapũ suho wahamaha. 11 Tĩ wahirire masia, masa payũ tinare nũnũ tí wahcãha. Jesure tí mũ sachũ ñũno piti bocasinia Jesu tinare. Æ jiro tiro Cohamacũ masare

puhtoro to noano suho jiare tinare yahu, dohatiinare noaina wahachũ yoaha.

12 Ñamichapũ doce to buheina tiro cahapũ sũ, Jesure õ sehe ní yahuha:

—Õ masa marienopũ jira. Õ majano macaa macaripũ, daa macaricãpũ cũhare ahrina masare warocaga. Carĩa tí chũhti cjihtire maca dutiga tinare —niha tina Jesure.

13-14 Tĩ ã nichũ Jesu õ sehe ní yuhtiha tinare:

—Æ nienata chũare waga tinare —niha.

To ã nichũ tuhoja tina õ sehe ní yuhtiha:

—Cũ wamomaca pihtia pão curiri, puaro wahi tó purocãta cjuaja mari. ¿Ahrina payũ masa tí chũhti cjihtire nuchabocari sã? — niha to buheina.

Payũ masa tí jichũ ñua ã niha to buheina. Tõpũre cinco mil mũa jiha. (Numia, macanacã cãhũ jiha.) Æ jiro Jesu õ sehe ní yahuha to buheinare:

—Cincuenta masare cã curuai duji dutiga. Paye curuari cũhare tõeina duji dutiga — niha Jesu to buheinare.

15 To ã nichũ to buheina to dutiro seheta yoa, jipihtina masare duji duti. 16 Duji duti tuhsũ Jesu cã wamomaca pihtia pão curirire puaro wahi mehne na, mũanopũ ñũha. Æ ñũno Cohamacũre “Noana”, niha. To ã niri baharo pão curirire nuha, to buheinare masare witi dutiro waha. 17 Tĩ ã witi tuhsũchũ, tina jipihtina masa chũ, yapi yuhũha wahaha. Tĩ yapi wahorire doce puhuse waro wahpo dapoha to buheina.

Jesu potocã Cristo to jiare Cohamacũ warocariro to jiare yahuha Pedro

(Mt 16.13-19; Mr 8.27-29)

18 Cũ dacho Jesu cãirota jiro, Cohamacũre sinino niha. To ã sinino watoĩ to buheina tiro cahapũ sũha. Æ jiro Jesu õ sehe ní sinitu ñũha tinare:

—¿Diro baro jicari yũhũ masa yũhũre tí tuhotuchũ? —ní sinitu ñũha.

19 To ã sinituchũ tuhoja to buheina õ sehe ní yuhtiha:

—“Joã masare bautisariro jira”, nina mũhũre. Paina “Elia cjiro jira”, nina. Paina “Panopũ macariro Cohamacũ yare yahu mũhtariro cjiro masa wijariro cjiro jira”, nina mũhũre —ní yuhtiha to buheina sehe tire.

20 Tĩ ã niri baharo Jesu tinare õ sehe ní sinitu ñũha tjoa:

—¿Mũsa sehe mũsa tuhotuchũ diro baro jicari yũhũ? —ní sinitu ñũha tjoa.

—Mũhũ Cristo Cohamacũ warocariro jira —ní yuhtiha Pedro.

Jesu to yariahto cjihtore yahuha

(Mt 16.20-28; Mr 8.30-9.1)

21 Æ yoa Pedro “Cristo jira mũhũ”, to nĩre painare Jesu yahu site dutieraha to

buheinare. ²² Ā ni yahu site dutiera tuhsu ō sehe ni namoha:

—Yuhu masano Cohamacu warocariro tuaro ñano yuhduihca. Āta yuhduro cahmana yuhure. Ā jia mari coyca judio masare buheina, bucuna, sacerdotea puhto mehne yuhure cahmaeraa, yuhure wajāhca. Tī ā wajāri baharo tia dacho wahaboroi masa mujaihca —niha Jesu tinare.

²³ Baharo jipihtinare ō sehe ni yahuha Jesu:

—Cairo yu yairo ji duaro, to cahmano yoa duamarine duhunocanohca. Ā yoa crusapu yu ñano yuhduhtiro seheta yu yairo to jiri buhiri ñano yuhduparota yuhure duhusi. Ā jiro yu yare yorucuriro jirohca. ²⁴ Masano yuhure wacūno marieno to mu saro to cahmano seheta yoiriro pichacapu tiro waharohca. Ā jiro yu yare ā yorucuriro jipihtia dachoripe yuhu mehne muanoru jirucurohca. ²⁵ Ā Cairo masano ahri yahpa macaare jipihtiare cjuariro Cohamacure cahmaeraro pichacapu waharo yabare wapatajari tiro? Ā jiriro ne wapataerara. ²⁶ Caina yuhure, yu buheare buo tiboca. Tī ā yoachū ñucu yuhu cāhu yuhure ā yoainare buo tisāihca. Yuhu masano Cohamacu warocariro noaina anjoa ti si sitea mehne, yu si sitea mehne, yu Pucu to si sitea mehne tjua tacu tinare buo tisāihca. ²⁷ Potocā niita nija musare. Mipure caina musa opure jiina musa yariahto pano Cohamacu jipihtina bui puhtoro noano to suho ji ducachu ñunahca —niha Jesu tinare.

Jesu pjacu cohtotaha
(Mt 17.1-8; Mr 9.2-8)

²⁸ Ā yoa ocho dachori tīre to yahuri baharo Jesu Pedrone, Joāore, Santiagore tina dihtare pjihca. Ā yoa waha, Cohamacure sinia waha, tūcupu mujaa wahaha tina. ²⁹ Cohamacure to sinino watoi Jesu wuhduca cohtotaha. To ā cohtotachu to suhtiro mi-noari suhtiro noano yehseri suhtiro wahaha. ³⁰ To ā waharo watoi puaro mua tiro mehne durucua niha. Durucua sehe Elia cjiro, Moise cjiro jiha. ³¹ Tina muano macaa si sitea mehne bajuaha. Jesu baharocāta Jerusalēpu to yariahtore tina Jesu mehne durucua niha. ³² Pedro cāhu wujo caha yuhduaha. Ā carīpahta cūa wahcā wihi Jesu to si siteare ñua, puaro tiro mehne ducua cāhure ñua. ³³ Moise cjiro cāhu ti wahahto panocā Pedro Jesure ō sehe nimaha:

—Puhtoro, mari ōre jichu noa duara. Tia wuhcā yonahntja. Mu ya wuhcā, Moise ya wuhcā, Elia ya wuhcā yonahntja —nimaha Pedro.

Ā niparota to nirire ne masieraha. ³⁴ To ā ni durucuro watoi tinare me curua duji boro pja suha. To ā duji boro pja sūchu

ñua tina cuia wahaha. ³⁵ Tuhsu, me curua puhichapu ō sehe ni durucuro coa taha:

—Ahriro yu macu, yu beseriro jira. Noano tuhoga tirore —nino coa taha me curua puhichapu.

³⁶ To ā nino coa tari baharo Jesu dihtare ñua tina. Baharo ti ñurire painare yahueraha. Ne cāirore yahueraha.

Jesu watino to cohtotarirocāre noariro wahachu yoaha
(Mt 17.14-21; Mr 9.14-29)

³⁷ Pa dachoi tina tūcupu ti duji tachu payu masa Jesure piti bocaha. ³⁸ Ā jiro tina mehne macariro Jesure ō sehe ni pisuha:

—Buheriro, muhure tuaro ahrire sini duaja yuhu. Yu macu cāirota jira. Ā jicu tirore ñubasaga muhu. ³⁹ Watino tirore ñaha, sañurucuchū yoa, tunu teterechū yoa, sahpo tua wahachu yoaah tihre. Ā yoro watino yu macure ñano yuhduchū yoa, ne duhu du-aerara. ⁴⁰ Mu buheinare watino cohā wio duticu tuaro sinimahi. Yu ā sinipachūta tina sehe tirore cohā wio masierare —niha tiro Jesure.

⁴¹ To ā nichu Jesu sehe ō sehe niha:

—Mipu macaina musa ñaina jira. Ā Yuhure ne wacū tuaeraputajari? Yoabiari pja musare buhemaja yuhu. Ā Noho puro yoiari pja yuhure musa caribobocari? —ni tuhtia Jesu.

Ā ni tuhsu watino ti cohtotariro pucurore ō sehe niha:

—Mu macure na tahga —niha.

⁴² To ā niri baharo to macano Jesu chapu to taro watoi watino sehe tirore yahpapu doca caha su, tunu teterechū yoaha. To ā yoachū Jesu watinore wijaa dutiha. To ā wijaa dutichū watino sārīrocā noariro wahaha. Ā jiro Jesu sehe tirocāre wiaha to pucurore. ⁴³ Cohamacu tuaa mehne noariro to wahachu ñua, jipihtina masa cūaa wahaha.

Pari turi Jesu to yariahtore, to masah-tore yahuha
(Mt 17.22-23; Mr 9.30-32)

Masa Jesu to yoirire ti ñu, cūaa wahachu Jesu sehe to buheinare ō sehe ni yahuha:

⁴⁴ —Michapucacā yu yahuhtire boena tjiga musa. Yuhure Cohamacu to warocarirore paio yuhure ñaha dutiro warohca masare —niha Jesu.

⁴⁵ To ā nipachūta tina sehe to yahuare noano tuho ñahaeraha. To yahurire tinare masihto basioeraha. Tī pjata Cohamacu tinare tīre tuho ñaha dutierasiniha. Ā jia tina cuia, tīre tirore sinitu ñueraha.

Jesu buheina tina mehne macarirore puhtoro sō duamaha
(Mt 18.1-5; Mr 9.33-37)

⁴⁶ Baharo Jesu buheina durucu sayoa niha:

—¿Mari mehne macariro diro sehe puhtoro ti cohtotacari? —ni sayoa niha tina ti basi.

⁴⁷ Ti ā nichu Jesu sehe ti tuhotuare masino, nijinocāre to cahai duhu dapo, to buheinare ō sehe ni yahuha:

⁴⁸ —Yu yare yoana tana ahrirocāre cahmana yuhu cāhure cahmana mūsa. Ā yoa yuhure cahmana, yuhure warocariro cāhure cahmana mūsa. Mūsa mehne macariro mūsa cahamacuño jiro tiro cāhu puhtoro tjirohca —niha Jesu.

Marine űu tuhtiro jieraro, mari mehne macariro jira

(Mr 9.38-40)

⁴⁹ Baharo João Jesure ō sehe ni yahuha:

—Buheriro, mu wama mehne watāre cohārirore sā űhi. Tiro mari mehne macariro to jierachu űna tīre tirore yoa dutiera tīhi sā —niha João Jesure.

⁵⁰ To ā nichu Jesu Joāore paina buheina cāhure ō sehe ni yahuha:

—Ā niena tjiga mūsa tirore. Marine űu tuhtiro jieraro, tiro mari mehne macariro jira —niha Jesu to buheinare.

Jesu Santiagore, João cāhure tuhtiha

⁵¹ Tī pjare Jesu muanoru to wahahto panocā, “Jerusalēru wahahtja”, niha tiro. Ā nino tōru waharo niha. ⁵² Ā jia Jesu to panoi warocaina waha, Samaria yahpa macari macaru su, tōi Jesu to jihtore cahno duamaha. ⁵³ Jesu Jerusalēru waharo taro niha. Tōru wahahtiro to jichu tuhoa, tō macaina tirore cahmaeraha. ⁵⁴ Tīre tuhoa Santiago, João mehne ō sehe ni yahuha Jesure:

—Puhtoro, mu cahmachu muano macari pichaca mehne tinare wajā dutinahca —niha tina tirore.

⁵⁵ Ti ā nichu Jesu majare űu, tuhtiha tina puarore.

[—Espiritu Santo yaina jira mūsa. Mīru mūsa tuhoturo seheta tiro sehe tuhotuerara. Yuhu masuño Cohamacu warocariro ahri yahparu tacu pichacaru wahaborinare yoadohohtiro tai. Masare butichu yoacu tacu nierahi —ni yahuha Jesu.]

⁵⁶ Ā tuhti tuhsu, pa macaru Jesu cāhu waha wahaha.

Paina Jesu mehne wamahaha

(Mt 8.19-22)

⁵⁷ Tina mahai ti wahachu, masuño Jesure ō sehe ni yahuha:

—Mūhu mehne waha duaja nohoi mu waharoi —niha tiro.

⁵⁸ To ā ni tuhsuchu Jesu ō sehe ni yuhtiha: —Cāina macaroca macaina wahiquina ti copari cūara. Minichahca cāhu ti suhti

cūara. Yuhu masuño Cohamacu warocariro sehe yu cariri wahu maeraja —niha Jesu.

⁵⁹ Baharo pairore Jesu pjiaha:

—Yuhu mehne macariro cjihto taga —niha.

To ā nichu tiro ō sehe ni yuhtiha Jesure:

—Puhtoro, yu pucu to yariachu yasinii wahahtja. Ā ya tuhsucu pinihta mūhu mehne wahahtja —niha tiro.

⁶⁰ To ā nichu Jesu ō sehe ni yahuha:

—Yuhure cahmaeraina yariaina yoaro seheta jira. Tina sehe yariainare yajaro. Ā jicu mūhu sehe Cohamacu masare puhtoro to noano suho jiare noaa buheare buhei taga —niha Jesu tirore.

⁶¹ Ā yoa paio Jesure ō sehe niha:

—Puhtoro, mūhu mehne wahahtja. Wahmanore yu coyeare coha sitisinii wahahtja —niha tiro Jesure.

⁶² To ā nichu Jesu ō sehe ni yahuha tirore:

—Wachu sahari pjine tuā puriro mehne dahrariro noari dare saha duara. Ā dahrariro to baharo buhusehere majare űno, noano potori da saha masierara. (Tō seheta Cohamacu yare yoaro taro, dahrariro tō pano to jia tiare tuaro wacūboca tīre duhu duaeraro, dahrariro to majare űno seheta.) Ā wacūro Cohamacu mari puhtoro yare dahraboriro jierara —niha Jesu.

10

Jesu setenta y dos buheinare buhe dutiro warocaha

¹ Baharo Jesu paina buheinare setenta y dos buheinare bese, macariperu to wahahto pano warocayuha. Cāa macaripare puaro dihta warocaha tiro. ² Ā warocaro ō sehe ni yahuha tinare piti dahre buhero:

—Trigo payu ti bucua tuhsuchu payu jichu dahraa pjiro jira. Wiho mejeta dahraina sehe mahainacā jira. Tō seheta noaa buheare tuhohtina payu jichu pjiro jira mari dahraa. To ā jipachuta mahainacā dahrari masa yoaro seheta noaa buheare buhehtina cāhu mahainacā jira. Ā jina noaa buheare buhehtinare painare to warochahtore siniga Cohamacu mūsa. ³ Wahaga mūsa. Mūsure yu warocachu mūsa oveja pohna yaya watoi ti jiro seheta mūsa cāhu űaina suaina watoi jinahca. ⁴ Niñeru wajure, bujuawacūa waju cāhure, dahpo suhtire naena tjiga. Mūsa mahai tinina painare boca su durucuena tjiga. Poto wahaga. ⁵ Jipihtia mūsa sāa wuhūseru sāahna “Ahri wūhu macaina noano jijaro”, ni muhtaga. ⁶ Tī wūhu macaina noano mehne jiina cahmachea marieina ti jichu, tīre niga tinare. Noano mehne ti jierachu űna ti wūhu macainare ā niena tjiga. ⁷ Cū wūhi sāa sūrucana ti noaina jichu ti

wahũihta tjuaga. Tó ti duhu payorire chu, sihnituga. Dahrainare ti wapataare nano cahmana. Á jina ti wapataare ti nano seheta ti duhu payorire naga musa cãhu. Á jina cã wahũihta musa sari wahũihta jina, ti maca macaa wuhũsepu ji tiniena tjiga. ⁸ Macapure musa suna tó macaina sehe musare ti cahmaina jichũ ti chũa ti duhu payorire chũga. ⁹ Tó macaina dohatiinare noaina wahachũ yoaga. Á jina õ sehe niga tinare: “Cohamacũ mipũre mari puhtoro noano to sũho jihtore yahuna nija musare”, niga tinare. ¹⁰ Pa macapu musa sũchũ tina sehe musare cahmaeraboca. Ti á cahmaerachũ ñũna tí maca dacho macapu waha, õ sehe niga tinare. ¹¹ “Ahri maca macaa dihta pohcari mene wajã site cũna nija sãre musa cahmaerari buhiri ñona. Á jina ahrire wacũga. Cohamacũ mari puhtoro mipũre to noano sũho jihtore yahuna nija musare”, niga tinare. ¹² Musare potocã niita nija. Sodoma macaina ñabiaina jiha. Ti á jipachuta pihitiri dacho jichũ Cohamacũ to buhiri dahreri dacho jichũ Sodoma macaina yũdoro musare cahmaeraina sehere buhiri dahrerohca —niha Jesu.

Paye macari macaina Cohamacũre yũdũrũcaina jira
(Mt 11.20-24)

¹³ Baharo Jesu õ sehe niha macari macainare:

—Corazĩ macaina, musa ñano yũdũnahca. Betsaida macaina, musa cãhu ñano yũdũnahca. Musa ya macaripure Cohamacũ tuaa mehne yoa ñomahi. Tiro wama tiri macare, Sidõ wama tiri maca cãhũre to tuaa mehne yũ yoa ñochũ ñũa tó macaina sehe ti ñaare cahyaboa. Á yoa “Noaina jija”, ni ti tuhutumari cjirire tuhutu cohtotaboa. Dõihita tina duji, cahyaa suhtire sãa, ti basi niti pohcare ti bui dahra site payoboa ti ñaare cahyaare ñoa. ¹⁴ Cohamacũ to buhiri dahreri dacho jichũ Tiro macaina, Sidõ macaina yũdoro ñaa buhiri tiina musa jiri buhiri musare ñano waro buhiri dahrerohca tiro. ¹⁵ Capernaũ macaina, musa mũ sũro mũanopũ waha duamana. Musã á waha duapachuta musã ñaa buhiri tiina musa jiri buhiri musare Cohamacũ pichacapu cohãnohca —niha Jesu.

¹⁶ Á ni tuhsũ Jesu to buheinare õ sehe ni yahuha:

—Musare tuhoina yũhũ cãhũre tuhora. Musare cahmaeraina, yũhũ cãhũre cahmaerara. Á jia yũhũre cahmaeraina, tina yũhũre warocarigo cãhũre cahmaerara —niha Jesu tinare.

Setenta y dos buheina tju wihaha

¹⁷ Baharo setenta y dos buheina wahchea mehne tju wihaha:

—Puhtoro, mũ wama mehne mũ tuaa mehne wafĩare sã dutichũ tina sehe sãre yũdũrũcaerare —niha tina Jesure.

¹⁸ Ti á nichũ Jesu õ sehe ni yũhtiha tinare:

—Mũanopũ to oroca site bora taro seheta, wafĩno to bora tachũ ñũhi. ¹⁹ Noano tuhoga. Musare yũ tuare wahi yũhũ. Á jina agãare, pichõno soroare, wafĩnore marine ñũ tuhtirirore musa yũdũrũcahtire wahi yũhũ. Á jia tina musare ñano yoa masierara. ²⁰ Yũ á wapachuta wafĩa musare ti yũdũrũcaerachũ ñũna ti dihtare wahchena tjiga. Ahri sehere wahchega. Mũanopũ Cohamacũ yaina ti wamare to joa õri tjui musa wamare to joa õchũ ñũna, ti sehere wahchega musa —niha Jesu tinare.

Jesu wahcheha

(Mt 11.25-27; 13.16-17)

²¹ Tĩ pjare Espĩritu Santo Jesure tuaro wahchechũ yoaha. Á jiro Jesu õ sehe niha:

—Mai, mũhũ mũanopũ cãhũre yahpapu cãhũre puhtoro jira. Masi yũdũrũcũ sũinare mũ yahuerari cjirire wiho jiina sehere yahure mũhũ. Mũ á yoachũ ñũcũ “Noa yũdũara”, nija. Á tjira, Mai. Mũ yoa duariro seheta, mũ cahmariro seheta tinare mũ yare yahure —niha Jesu.

Á ni tuhsũ painare õ sehe niha:

²² —Yũ Pũcũ jipihtiare yũhũre ware. Yũ Pũcũ dihta yũhũre masina. Yũhũ cãhũ tirore masija. Yũ beserina cãhũ tirore masina, yũ masi dutiina jia. Tõpeinata yũ Pũcũre masija sã —niha Jesu.

²³ To á niri baharo ti sahsero ti jichũ Jesu to buheinare õ sehe niha:

—Ahri jipihtiare musa ñũna wahcheina jira. ²⁴ Potocã tjira. Payũ Cohamacũ yare yahu muhtaina cjiri, yahpari macaina puhtoa cãhũ mipũ musa ñũrĩre ñũ duamaha tina cãhũ. Á jia musa tuhori cãhũre tuhõ duamaha —niha Jesu.

Noariro Samaria macariro quitire yahuha Jesu

²⁵ Tĩ pjata judio masare buheriro Jesu cahai wihi, Jesure ñano to durucuchũ yoa duamaha tirore yahusã duaro:

—¿Buheriro, yũhũ jipihtia dachoripe Cohamacũ mehne ji duacu dohse yoaihcarĩ yũhũ? —ni sinituha tiro Jesure.

²⁶ To á nichũ Jesu õ sehe ni yũhtiha tirore:

—¿Dohse ni yahujari Cohamacũ yare ti joari pũi? ¿Cohamacũ to ni joari cjirire dohse ni tuhõtuarita mũhũ? —niha Jesu tirore.

²⁷ To á nichũ tiro õ sehe ni yũhtiha:

—Õ sehe niha Cohamacũ: “Tuaro musa yajeripohnari mehne, noano musa tuaa mehne, musa wacũa mehne Cohamacũre cahĩga. Á yoa mũ basi mũ cahĩno seheta mũ cahai jiina cãhũre cahĩga” —niha tiro Jesure.

²⁸ To á nichũ Jesu õ sehe ni yahuha:

—Quihōno nire mahu. Tíre yoaga. Ā yoacu jipihtia dachoripe Cohamacu mehne jiihca mahu —niha tirore.

²⁹ “Ahríro Cohamacu dutiare yoa pahñoriro jira”, masa tirore ti ni tuhotechu cahmaha judio masare buheriro. Ā cahmano tiro Jesure ò sehe ni sinituha:

—¿Yabariro baro jicari yuhare mu cahĩ du-ti-ro? —niha tiro.

³⁰ To ā nichu Jesu ò sehe ni piti dahre quitu mehne yuhtia:

—Cū dacho Jerusalēpu tariro Jericópu wahariro mahai to tinichu yacaina tirore ñahaha. Ā ñahaa, to suhtirore tjuwe na, tirore tuaro cĵaa. Ā tuaro cĵaa, mahano to yariaro cahachu waro duhuha tina tirore. ³¹ Tí pjata sacerdote tí mahapu taha. Ā taro ti cĵariro cĵirore ñuparota maha pa buhusehe duhtu cahai do yuhdu wahcā, yuhduu wahaha. ³² Ā yoa Cohamacu wuhui dahrariro cāhu pĵacuroriro cahai su, tirore ñu, maha pa buhusehe coai do yuhdu wahcā wahaha. ³³ Ā yoa Samaria macariro sehe tói waha, yoa cureropu pĵacurorirore ñu, tirore pĵa ñuha. ³⁴ Ā pĵa ñuno, tiro pĵacuroriro cahai su, se, vino mehne morea core to camine pio sihōha. Pio sihō tuhsu suhtiro cahsaro mehne duhteha to camine. Tuhsu, pĵacurorirore to burro bui duhu payo, carĩni wuhupu na suha tirore. Tói jiro, Samaria macariro noano ñu wihboha tirore. ³⁵ Pa dachoi tiro carĩni wuhu purore puu tu niñeru tarire wa, ò sehe niha: “Ahrírore ñu wihboga. Ahrí mu suerachu pari turi tĵua tacu wapa pahñoihtĵa”, niha Samaria macariro wuhu purore —niha Jesu.

³⁶ Ā ni tuhsu judio masare buherirore ò sehe ni sinituha Jesu:

—¿Ahrina tiaro mua diro sehe jijari pĵacurorirore cahĩro? —niha Jesu.

³⁷ To ā nichu tuhoro buheriro sehe Jesure ò sehe ni yuhtia:

—Pĵacurorirore yoadohoriro jica tirore cahĩro —niha tiro Jesure.

—Wahaga. Mūhu cāhu masare tó seheta yoai wahaga —niha Jesu buherirore.

Marta, María cāhu cahai Jesu tiniha

³⁸ Ā yoa Jesu to buheina mehne ti wahachu, pa macapu ti tinichu, Marta wama tiricoro tinare to wuhui sãa ta dutiha. ³⁹ To bahoro María to dahpori cahai duji, to buheare tuhoha. ⁴⁰ To ā yoachu ñuno Marta to dahraa pĵiro jichu suaha. Ā jiro ticoro Jesure ò sehe ni sinituha:

—Puhtoro, ¿yuhu cācoro yu dahrachu yuhare yu baho to yoadohoerachu mūhare noajari, mu ñuchu? Ticorore yuhare yoadoho dutiga —niha Marta Jesure.

⁴¹ To ā nichu Jesu ò sehe ni yuhtia:

—Marta, dahraa pĵiro cĵuaco pĵiro tuhutura mahu. ⁴² Cohamacu to yare tuho dutira. María noaare yoaro taro tíre cahmahre. Ā jicu yuhare to tuhochu “Dahradohoco wahaga”, nieraja ticorore —niha Jesu Martare.

11

Jesu Cohamacure siniare buheha (Mt 6.9-15; 7.7-11)

¹ Cū dacho Jesu Cohamacure sinino niha. To sini tuhsuchu, cāuro to buheina mehne macariro tirore ò sehe niha:

—Puhtoro, João to buheinare to buheriro seheta Cohamacure siniare sã cāhare buhega mahu —niha tiro Jesure.

² To ā nichu tuhoro Jesu tinare ò sehe ni yahuha:

—Ò sehe ni Cohamacure siniga:

“Sã Pucu, mahu ñaa marieriro ā jirucura. Mipure jipihtina bui puhtoro jiga.

³ Ā yoa dachoripe sã chũtire warucuga sãre.

⁴ Paina sãre ti ñano yoarire sã boja.

Ā jicu mahu cāhu sã ñaa yoarire boga.

Tuhsu, sã ñaare yoa duana sã goa pĵachu ñucu tire sãre yoa duerachu yoaga”, ni siniga Cohamacure —niha Jesu tinare.

⁵ Bahoro Jesu quitu mehne to buheinare ò sehe ni buheha:

—Cāuro ñami dacho macai to coyeiro ya wuhupu waha, tirore ò sehe ni siniha: “Coyeiro tia curi pão curi waga yuhare.

⁶ Pairo yu coyeiro tinino tariro michapucacãta ya wuhui wihĩre. Ā yoa tirore yu chaa waboa mariahna”, niha tiro to coyeirore. ⁷ To ā nichu to coyeiro wuhu puhichapu jiriro yuhtia: “Yuhare cariboi tĵiga. Sopa pahma bihariro jira. Yuhu yu pohna mehne carĩna nija. Wahcãno pĵaeraca yuhare. Mūhare chũare waboricu jieraja”, niha to coyeiro. ⁸ ¿Dohse wahaohcari sinirirore? Potocã niita nija musare. To coyeiro jiparota, chaa waboriro wahcã dueraha. Wahcã dueraparota chaa siniriro sehe buo tiro marieno to yoari pĵa sinirucuchu tuhoro jipihtia to siniriro seheta warohca. ⁹ Ā jicu ahrire musare ni yahui nija: Cohamacure siniga. Ā sinina musa sinirire ñahanahca. Musa sinirire bocanahca. Tirore ā sinirucuga. Musa ā yoachu tiro musare warohca. ¹⁰ Jipihtina Cohamacure siniina ti sinirire naahca. Ā yoa ti sinirire bocaahca. Ā jiro jipihtina Cohamacure ā sinirucuarine tiro tinare warohca.

¹¹ ¿Musa pohna musare wahire ti sinichu agã sehene wabocari musa tinare? ¹² ¿Musa pohna caraca diecare ti sinichu pichōno soro sehene wabocari musa tinare? Ne

wasi. ¹³ Músa ñaina jipanahta músa pohñare noare wa masina músa. Á yoa Cohamacu sehe músa wari yúhdoro noare wara mú sare. Tiro mari Ручу múano macariro to Espiritu Santore warohca tirore siniinare —niha Jesu to buheinare.

“Jesu watíno tuaare cjuara”, ni yahusãha masa

(Mt 12.22-30; Mr 3.19-27)

¹⁴ Tí pjare Jesu watíno are cohã wioero niha. Watíno sehe durucu masierariro jichu yoaha masunore. Á jiro watíno masunore to duhuri baharo masuno sehe durucu ñacaha. To durucuchu tũhoa masa payu caaa wahaha. ¹⁵ Tí á cwapachuta paina sehe ò sehe niha:

—Ahriro Jesu watíare to cohã wiochũ Beelzebú wama tiriro watíã pũthoro sehe tirore yoadohora —niha paina.

¹⁶ Paina “¿Jesu Cohamacu to warocariro jijari?” ni masi duaa tirore Cohamacu tuaa mehne yoa ño dutimaha. ¹⁷ Tí á dutichu tũhoro “Watíno tuaa mehne watíare cohã wiora”, ni ti tũhotuare masino, tinare ò sehe ni yahuha Jesu:

—Watíno ya tuaa mehne watíare cohã wioi nieraja. Cũ maca macaina ti basi cahma wajãa, tí maca macaina yaria pihtia wahara. Á jia cũ wũhu macaina ti basi cahmachea, tí wũhu macaina waha pihtia wahara. ¹⁸ Á yoa watíno yaina watíã ti basi cahmachea, tina watíã cũhu waha pihtia wahaboa. Cũ curua ji masieraboa. Músa yũhare ò sehe nina. “Tiro watíno tuaa mehne watíare cohã wiora”, músa yũhare nina nica. ¹⁹ ¿Yũhare músa niri potocã jichu músa mehne macaina watíare cohã wioa, watíno tuaa mehnetã cohã wiojari tina cãhu, músa ñuchũ? Músa mehne macaina watíare cohã wioa, watíno tuaa mehne cohã wioa nierara. Ahrire masina watíno to tuaa mehne watíare yũ cohã wioerachũ masinahca músa. ²⁰ Á jicu yũhu sehe watíare cohã wioocu Cohamacu tuaa mehne cohã wioja. Ahrire masina, Cohamacu músa pũthoro to noano suho ji ñacare masinahca músa.

²¹ Tuariro to wamoa mehne to wũhare to ñũ wihbochũ to yare paina na masierara. ²² To á ñũ wihbopachuta paio tua yũhdariro tiro mehne cahmache, tirore yũhdarũca, to wamoa manoca, to yare manocahna. (Ó seheta yoa yũhdarũcaro cahmana watíare.) ²³ Cãiro yũhare cahmaeraro, yũhare ñũ tuhtiriro jira. Cãiro yũhare yoadohoeraro yũhare ñano yoaro nina —ni buheha Jesu.

Watíno pari turi masunore to sãari quitire yahuha Jesu

(Mt 12.43-45)

²⁴ Á yoa to tũhotua mehne ò sehe ni piti dahre buheha tinare:

—Watíno masunore duhuro tiro co marieni yahpai tinino, to sohto cjihtore macamaha. Bocaeraro, ò sehe ni tũhotuha: “Masuno yũ duhuriro mehne pari turi jii wahaihtja”, ni tũhotuha tiro. ²⁵ Á nino tiro tjua waha, masunore bocaha. Á to bocachu masuno sehe noariro jimaha. ²⁶ Tuhsu, watíno paina siete watíare tiro bui ñaa yũhdũinare nano wahaha. Na wihũ, tina jipihũtina watíã masuno mehne jiha. Á jiro masuno sehe tó pano cãiro watíno are cjuaro, ñariro jimaha. Mipũ sehere payu watíã ti cohtotariro jiro, tó pano to jiriro yũhdoro ña yũhdũariro jiha —niha Jesu.

Jesu wahcheare yahuha

²⁷ Tíre to á nichu masa watoi jiricoro numino Jesure ò sehe ni yahuha:

—Mũhare pohna tiricoro, mũhare pũricoro wahchericoro jira —niha Jesure.

²⁸ To á ni tuhsuchũ tũhoro Jesu ticorore ò sehe ni yũhtia:

—Cohamacu durucuaare tũhoina to dutiare yoina tina tjica wahcheina —niha Jesu ticorore.

Masa ñaina Jesure Cohamacu tuaa mehne yoa ño dutiha

(Mt 12.38-42; Mr 8.12)

²⁹ Á yoa payu masa Jesu cahai ti wihichũ, tiro tinare ò sehe ni yahu namoha:

—Mipũ macaina nu ñaina jira. Cohamacu tuaa mehne yũ yoa ñochũ ñũ duamana. Tí á ñũ duapachuta Jona panopũ macariro Cohamacu tuaa mehne to yoari dihtare ñonohca Cohamacu tinare.

³⁰ Jona Cohamacu yare yahu mũhtariro jiro, tiro Nínive macainare Cohamacu yare to masichũ yoariro seheta yũhu masuno Cohamacu warocariro masichũ yoaja mipũ macainare. ³¹ Buhiri dahrehti dacho jichũ pũthorocoro sur macaricoro panopũ macaricoro ducu, mipũ macainare “Ñaina jira”, ni yahusãnohca ticoro. Ticoro Salomo panopũ macariro to masiare tũho duaro yoaropũ ahri yahpa pa seherpũ jiricoro Salomore tũhoro taha. Á yoaro noano yoaro niha mipũ macaina yũhdoro. Á jiro ticoro yahusãnohca mipũ macainare. Á nicu mú sare potocã niita nija. Mipũ mú sare yũ buhea Salomo to buheri yũhdoro jira. ³² Buhiri dahrehti dacho jichũ Nínive macaina cãhu ducu, mipũ macainare “Ñaina jira”, ni yahusãahca tina. Jona tinare Cohamacu yare to yahuchũ tũhoa, ti ñaare tũhotumarire tũhotu cohtota Cohamacure cahmaha tina sehe. Á cahmaa noano yoaa niha mipũ macaina yũhdoro. Á jia tina cãhu mipũ macainare “Ñaina jira”, ni yahusãahca. Mú sare potocã niita nija. Mipũ mú sare yũ buhea Jona to buheri yũhdoro jira —ni yahuha Jesu.

*Masa ti tuhuturo seheta yoara
(Mt 5.15; 6.22-23)*

³³ Ā ni yahu tuhsu, piti dahre buhero ò sehe ni yahu namoha tinare:

—Masa sihāiare sihāa nūoerara. Tiare sihāa dihi biato docapu duhu dapoerara. Tiare muanoi duhu payora wuhuru sāa taina ti noano nū sāahto sehe. ³⁴ Sihāria to noano buhriachu mari noano nū masino seheta noaare tuhotua mehne noaare yoa masinahca mūsa. Mūsa tuhuturo seheta yoara mūsa. Noaare tuhotuna noaare yoara mūsa. Noaare tuhotuerana űaare yoara mūsa. ³⁵ Ā jina noano yoaga. Mūsa tuhotuapu űaa jiero tjijaro. űaare goa pjaena tjiga. ³⁶ Tuhsu mūsa tuhotuapu noaa jichu, űaa ne mariachu noaa dihtare tuhotunahca —ni buheha Jesu.

*Fariseo curua macaina, judio masare
buheina cāhure Jesu tuhtiha*

(Mt 23.1-36; Mr 12.38-40; Lc 20.45-47)

³⁷ Jesu to buhe tuhsuchu nū fariseo curua macaruro tirore to ya wuhuru chu ditiro pjiha. Ā jiro Jesu tiro ya wuhuru sāa su, ti churoi tina mehne nuju sūha. ³⁸ To ā nuju sūchu fariseo curua macaruro sehe Jesure nū nūno judio masa ti wamo cosarucuro seheta to wamo cosaerachu űano ò sehe ni tuhoutuha: “Cuenah. ĶAhriro dohsearo wamo cosaerajari mari yoaro sehe?” ni tuhoutuha. ³⁹ To ā ni tuhoutuha masino Jesu tirore ò sehe ni yahuha:

—Musa fariseo curua macaina sihnia wahwarire, wapari cāhure bui sehe dihtare mūsa cosaro seheta noaare yoa űona mūsa buicā warohna. Ā yoapanahca Cohamacu yare quihōno yoerara. Paina yare maina jina, űaa dihtare tuhutura mūsa. ⁴⁰ Tuho masieraina jira mūsa. Cohamacu mūsa pjacāre yoaruro mūsa tuhoutuhi cāhure yoaha. ĶTire masierajari mūsa? ⁴¹ Ā jina mūsa yare pjacūoinare waga mūsa. Mūsa ā yoana noaare tuhoutuina jinahca.

⁴² Mūsa fariseo curua macaina űano yuhdunahca. Moa yoaro sehe jiare chūare coachu yoaare cūana mahanocā wamana mūsa. Cohamacure űo payona tana sacerdotiare wamana mūsa. Ā wapanahta noaare yoerara mūsa. Ā jina masare pja űerara mūsa. Ā yoa Cohamacure űo payoerara mūsa. Toaa dichacāre mūsa narire mahanocā Cohamacure mūsa wachu noa nina. Ā wana ò sehe yoa namoga: Noaare yoaga. Ā yoa pja űuga mūsa masare. Tuhsu, Cohamacure űo payoga mūsa.

⁴³ Mūsa fariseo curua macaina űano yuhdunahca. Buheri wuhuru jina, noaa dujia dihtare duji duara mūsa. Pache duaropu masa mū sare puhtoare noano

űo payo ti sinino sehe ti piti bocasinichu cahmana mūsa.

⁴⁴ űNano yuhdunahca mūsa. Masa copa nūori copa yoaro seheta jira mūsa. Tí copa cahai masa jia, puhicha macaruro baarirore űerara tina. Tó seheta masa mūsa cahai jia, mūsa tuhotuapu űaa jiare masierara tina —niha Jesu tinare.

⁴⁵ To ā nichu tuhoro judio masare buheina mehne macaruro Jesure ò sehe ni yahuha:

—Buheriro, tire nicu sā cāhure űano nii nica mūhu —niha tiro Jesure.

⁴⁶ To ā nichu Jesu ò sehe ni yahtiha:

—Potocā tjira. Judio masare buheina mūsa cāhu űano yuhdunahca. Mūsa painare ti bihoeraare yoa dutira tinare. Ā dutipanahta mūsa sehe tinare ne mahanocā yoadohoerara tí dutiare ti yoahito sehe.

⁴⁷ Ā jina mūsa űano yuhdunahca. Cohamacu yare yahu mūhtaina panopu macaina ti masa coparire noano cahnomana mūsa tinare űo payoro sehe yoana. Mūsa ā yoapachuta panopu macaina mūsa coyea sehe tinare wajāha. ⁴⁸ Tina sehe Cohamacu yare yahu mūhtaina cjirire ti wajāriro seheta mūsa cāhu yoaboa. Ā jina mipure ti masa coparire cahnomana mūsa. Ā cahnona mūsa coyea tinare ti wajāri cjirire wacū bajuro wana nica mūsa. Ā ti wajārire wacūna “Noa nina”, nina nica mūsa.

⁴⁹ Cohamacu to masia mehne ò sehe ni yahuha: “Yu yare yahu mūhtaina cāhure yu buhe duti cūrina cāhure warocaihtja tinare. Ā jia tina yu warocainare painare wajā, painare űano yoahca”, niha Cohamacu. ⁵⁰⁻⁵¹ Ahri yahpare Cohamacu to bajuamehneri baharo Caī sehe Abere wajāha. Tuhsu, Cohamacu yare yahu mūhtaina cjirire Abe baharo jina cāhure űaina wajāha. Baharo Zacariare Cohamacu wuhai Cohamacure űo payori mesa cahai mūsa coyeata wajāha. Jipihtina tinare ti wajāri buhiri mipu macainare Cohamacu buhiri dahrerohca. Ā tjira. Mū sareta nii nija. Jipihtina tinare ti wajāri buhirire mipu macainare Cohamacu buhiri dahrerohca.

⁵² Mūsa judio masare buheina, űano yuhdunahca. Cohamacu masiare ti joaa pūrine cūapanahca painare yahuerara mūsa. Mūsa basi Cohamacu yare tuhoerara. Tuhsu, paina to yare ti tuho duapachuta tire mūsa tinare tuho dutierara —niha Jesu tinare.

⁵³⁻⁵⁴ To ā nichu tuhoa judio masare buheina fariseo curua macaina cāhu tiro mehne sua tirore űano ni durucuha. Ā jia Jesu to űano ni yahtichu tuho duaa, tina payu mahño cū sinitu űumaha tirore, tirore yahusā duaa.

12

Fariseo curua macaina ti ā mahñorucurire Jesu yahuha

¹ Ā yoa Jesu cahai masa payu cahmachua, bihsa yuhduaha. Tōi Jesu to buheinare ō sehe ni yahu dūcaha:

—Noano wacū masiga mūsa. Fariseo curua macaina ti pāo bucuarore ñuna noano wacū masiga. Ti mahñorucurire nii nija “Pāo bucuaro”, nicu. ² Jipihtia ñaare paina ti masierari cjiire baharo masiahca. ³ Ā yoa ñamipure ti pjiroca durucuri cjiire buhriaroi to bajuro waro seheta masiahca jipihtina. Bihari tahtiaru pairore yaroca ti nimari cjiire masa payu masiahca —ni yahuha Jesu.

Masa ti cuihtirore yahuha Jesu

(Mt 10.28-31)

⁴ Ā ni tuhsu Jesu ō sehe ni yahu namoha tinare:

—Potocā niita nija mūsare. Masa wajāina wajā tuhsu pari turi ti wajārina cjiire ñano yoa namo masierara. Ā jina mūsare wajā duainare cuiena tjiga. ⁵ Mipure masa cuihtirore mūsa ño payohtirore yahuihtja. Cohamacu sehene cui, ño payoga. Tiro mūsa yariari baharo pichacaru cohā masina mūsare. Ā tjira. Potocā nii nija. Cohamacu sehene cui, ño payoga.

⁶ Cincosiripia wapa mariahna. Ti ā wapa mariapachata cāirocāre Cohamacu ne boerara. ⁷ Ā yoa mūsa pjoarire ne cū pjoa da duhsaro marieno masi pahñona Cohamacu. Tō seheta mūsa jia tia cūhare masi pahñona Cohamacu. Ā masino mūsare ñu wihborucura. Siripiare to cahño yuhdoro mūsa sehene cahña Cohamacu. Ā jina tirore ño payona cuiena tjiga mūsa —niha Jesu.

Jesu yaina mūsa jiare yahuga masare

(Mt 10.32-33; 12.32; 10.19-20)

⁸ Ā yoa Jesu ō sehe ni yahu namoha:

—Mūsare niita nija. Cāiro “Jesu yairo jija”, masare to nichu ñucu, yuhu masuno Cohamacu warocariro “Tiro yu yairo jira”, ni yahuihtja Cohamacu yaina anjoare. ⁹ Cāiro “Jesu yairo jija”, masare nierariro sehene yuhu “Tiro yu yairo jierara”, ni yahuihtja Cohamacu yaina anjoare.

¹⁰ Cāiro yuhare ñano to ni durucuchu ti ñaa buhirire Cohamacu bo masina. Ā boparota cāiro Espiritu Santo sehene to ñano ni durucuchu ti ñaa buhirire ne Cohamacu bosu.

¹¹ Mari judio masa buheri wuhuru puhtoa cahai paina mūsare na sāa yahusāhca. Ti ā yahusāchu mūsa ni ducatahti cjihtire “Cue, masieraboca”, ni tūhotuena tjiga. ¹² Ti pjaihta Espiritu Santo

mūsa yahuhti cjihtire yahurohca —niha Jesu.

Pache puru quitire yahuha Jesu

¹³ Ā yoa masa mehne macariro Jesure ō sehe ni yahuha:

—Buheriro, sā puru to yariari baharo to ya cjiri sāre tjuara. Ā jicu yu wahmine tīre yuhu cūhare quihōno tju wa dutiga —niha tiro Jesure.

¹⁴ To ā nichu Jesu ō sehe ni yahuihtja:

—Ne ti barore tju waboricu jieraja yuhu —niha Jesu tirore.

¹⁵ Ā ni tuhsu Jesu jipihtinare ō sehe ni yahuha:

—Noano yoaga mūsa. Pachere, paye baro cūhare cahña tjiga. Payu cjuapanahca ti mehneta wahche tuhsueraja mari —niha Jesu.

¹⁶ Ā ni tuhsu Jesu quiti mehne ō sehe ni yahuha tinare:

—Pache puru noari yahpare cjuaha. Ā jia ti yahpuru to toaa noano dicha tija. ¹⁷ Ā jiro tiro to basi ō sehe ni tūhotumaha: “Dicha wihboa wuhuse ne mū suerara. ¹⁸ Mipure ō sehe yoaihtja: Mipuru yu wihboa wuhuse cohānoca, mūna wuhuse cjiri yuhdoro wahma wuhuse yoaihtja. Ti wuhusei yu toaa dichare, jipihtiare yu yare wihboihtja. ¹⁹ Yu ā yoari baharo, ō sehe ni tūhotuihtja yu basi: ‘Yuhu jiape cjuariro jija. Noano soihtja. Ā jicu chu, sihni, wahcheihtja’, ni tūhotuihtja yu basi”, ni tūhotumaha tiro. ²⁰ To ā ni tūhotuchu Cohamacu tirore ō sehe ni yahuha: “Muhu ne tūho masierariro jira. Micha ñamihtja muhu yariaihca. Mū ā wahachu mū ya mū cahñi butia wahaahca”, niha Cohamacu tirore —niha Jesu masare.

²¹ Tīre nino, masare ō sehe ni yahuha Jesu:

—Āta wahaahca pache puru Cohamacure wacūeraina. Payu pachere, niñerure to ya cjihti dihtare wihboriro, Cohamacure wacūeraro tiro pjacuoriro jirohca, Cohamacu to ñucu. Ā jiro Cohamacu tirore ñu jicoaerara —niha Jesu.

Cohamacu to pohñare ñu wihbora

(Mt 6.25-34)

²² Ā yoa Jesu to buheinare ō sehe ni yahuha:

—Ahrire mūsare nii nija: Mūsa chuhti cjihtire, mūsa suhti sāhtire pjiro cahya tūhotuena tjiga. ²³ Cohamacu mūsare ba-juamehnenno, chuhtina cjihti dihtare yoaeraha mūsare. Tuhsu, suhti sāhtina cjihti dihtare yoaeraha tiro mūsare. ²⁴ Minichahca perire Cohamacu to ñu wihboare masiga. Tina weseri maeraina jira. Ā jia chuare ti wihboa wuhuse tinare mariahna. Ti ā jiina jichu ñuno tinare Cohamacu ti chuhtire wara. Minichahca yuhdoro mūsa sehene cahña Cohamacu. ²⁵ Pjoro mūsa tūhotua

mehne cã hora waro musare cati namochu yoa masierara musa. Å jiro musa pjïro tuhotua yaba cjihti jierara. ²⁶ Å yoa pjïro musa tuhotua ti yaba cjihti jierapachuta dohse yoana musa chuhtire, musa sihnihtire, musa sãahtire pjïro cahya tuhotujari?

²⁷ Macaroca macaa cohore tuhotuga. Tí cohori ti basi suhtire yoerara. Å yoerapahta noaa suhti tiina yoaro sehe noaa bajura tí cohori. Salomo cjiro noaa suhtire sãariro to jipachuta tí cohori sehe tiro yuhdoro noabiaa cohori waro jira. ²⁸ Cohore noaa cohori yoara Cohamacu sehe. To å yoapachuta cohori sehe mahaa dachoricã jirucuma ñai boraa wahara. Mahanocã ji, pa dachoi pichacaru jãa wahara. Ti å jipachuta cohore noaa cohori jichu yoara Cohamacu. Å jiro Cohamacu cohore to noaa cohori to yoariro yuhdoro musa cãhure noano yoarohca. Suhtire warohca. Mahanocã Cohamacure wacũ tuara musa. ²⁹ Å jina musa chuhtire, musa sihnihtire pjïro cahya tuhotuena tjiga. ³⁰ Cohamacure cahmaeraina sehe ahri yahpa macaina sehe tãre å macarucua nina. Mari Pucu muano macariro jipihtia musa cahmaare masina. To å masichu pjïro cahya tuhotuena tjiga. ³¹ Cohamacu musa puhtoro to jihto cjihtore cahma mahtaga. Jipihtia paye baro yuhdoro tirore cahmaga musa. Musã å yoari baharo Cohamacu sehe musa cahmaa dahsachu warohca –ni yahu namoha Jesu.

Μυαπορη μαρι παυη σμη masija
(Mt 6.19-21)

³² Å ni tuhsu, tinare õ sehe ni yahu namoha:

–Yu cahina, mahainacã jipanahta, cuiena tjiga musa. Cohamacu musa puhtoro to noano suho jiroprare tiro mehne musa jichu cahmana tiro. ³³ Å jina musa yare dua pahõoga. Tãre duanoca tí niñerure na, pjacuinare waga. Tõ sehe musa yoachu muano macaa musa wapataa ne pihtisi. Μυαπορη musa ya jia ne pihtierara. Tõprare musa yare na masierara yacariro. Å yoa machu cãhu tãre tua masierara. ³⁴ Μυαπορη musa ya jichu muano macaa dihtare tuhotunahca musa –niha Jesu.

Jesu to tjua tahtore cohta dutiha to yainare

³⁵⁻³⁶ Å ni tuhsu, tinare õ sehe ni yahu namoha:

–Musa yare cahnoyu tuhsuina yoaro sehe yu yare å yoarucuna jina cohtaga yuhare. Dahra cohtaina tí puhtoro wamomaca dãhteri bõse namaru to wahachu to tjua tahtore tina cohtara. Tina ti å cohtariro seheta yu tjua tahtore cohtaga musa cãhu. Puhtoro to wãhuru wihi, sopacare to

dotachu tuhoa tina dõihã pjõo sõhna tirore. ³⁷ Dahra cohtaina tí puhtoro to wihihu to cahmano seheta yoarucuna jia, wahcheina jiaha. Ti å yoachu ñano puhtoro sehe dahra cohtariro yoaro sehe cohtotarohca. Å yoaro dahra cohtainare duji dutiro, tiro ti chuare duhu payorohca. ³⁸ Tiro to wihihti pja ñami dacho macaru, o bohrearopu to jipachuta dahra cohtaina sehe to wihihti pjare tirore noano cohtaina jia, wahcheina jiaha tina. ³⁹ Ahrire wacũga musa. Yacariro wãhuru to wihihto pano tí wãhu purõ masierara. Wãhu purõ yacariro to wihihtore masino, tiro yacarirore sãa dutierabo. Å jiro wacũenoca tara yacariro. ⁴⁰ Å jina musa cãhu cohtaga. Yuhu masuno Cohamacu warocariro wacũenoca taihca. Å jina yu yare å yoarucuna jina cohtaga musa –niha Jesu tinare.

Dahra cohtariro to puhtoro ño payorirore, ño payoerario cãhure yahuha
(Mt 24.45-51)

⁴¹ To å nichu Pedro sehe õ sehe ni sinituha Jesure:

–Åhri quitire yahucu sãre nii nijari? ¿O jipihtinare å nii nijari? –niha Pedro.

⁴² To å nichu Jesu to tuhotua mehne õ sehe ni piti dahre buheha tinare:

–Dahra cohtariro to puhtoro ño payoriro tuho masiriro õ seheta jira. Puhtoro tinino waharo, dahra cohtarirore to wãhure cãna. To cãriro sehe dutiriro jirohca. Å jiro tiro churi pja jichu paina dahra cohtainare chãare wãtira. ⁴³ Baharo puhtoro to wihihu dahra cohtariro sehe to puhtoro to dutiriro seheta yoa pahõoriro jiro, tiro wahcheriro jirohca. ⁴⁴ Potocã niita nija musare. To å yoachu to puhtoro jipihtia to yare ñu wihtoriro cãnohca tirore. ⁴⁵ To å cãpachuta dahra cohtariro “Yu puhtoro yoari pja bauerara”, niboca. Å nino paina dahra cohtainare muare, numia cãhure cãpe, payu chu, sihni, cahaboca. ⁴⁶ To å yoari baharo wacũenoca to puhtoro wihirohca. Å wihiro tirore ñano buhiri dahrerohca. Å jiro Cohamacure yuhduruainare to cohãriropu tirore cohãnohca.

⁴⁷ Å yoa dahra cohtariro to puhtoro cahmaare masiriro jiparota tãre to yoerachu, tiro to noano dahraerachu to puhtoro sehe tirore yuta da mehne tuaro tjananohca. ⁴⁸ Pairo sehe dahra cohtariro to puhtoro cahmaare masierario jiro to noano yoerachu ñano to puhtoro sehe pjiroca dero tirore tjananohca. Cohamacu to cahmaare masichu yoara masare. Å jiro masirirore yuhtiro cahmana. Tuhsu, noano masirirore noano yuhtiro cahmana –niha Jesu.

Jesu masare cahma tju wachu yoara
(Mt 10.34-36)

⁴⁹ Ā ni tuhsu Jesu tinare ð sehe ni yahuha tjoa:

—Pichaca to jawero seheta yuhu ahri yahpapure Cohamacu tirore cahmaerainare to buhiri dahrehtore tinare masichu yoai tai nii. Mipu pinihta ture ti masichu tuaro cahmaja yuhu. ⁵⁰ Yuhu ñano yuhduihca. Yu ã ñano yuhduhtire cohtacu, ñano yajeripohna tija yuhu. ⁵¹ ĆDohse ni tuhotujari musa yuhure? “Tiro masare to buheri baharo paina tinare ñu tuhtisi”, Ćni tuhotujari musa yuhure? Ā jierara. Masare yu buheri baharo caina yu yare tuhoahca. Paina sehe tinare ñu tuhtiahca. Cãno potori waro jisi masa. Musare nii nija. Masa yu buheare tuhoa, puã curua cahma tju waahca. ⁵² Mipure cã wuhu macaina cinco masa yu buheare tuhoa, puã curua ti basi cahma tju waahca. Cã curua tiaro, pa curua puaro jiahca. ⁵³ To puãuro to macãnore ñu tuhtirohca yu yairo to jiri buhiri. Tuhsu, paio macãno cãhu to puãurore ñu tuhtirohca to puãuro yu yairo to jiri buhiri. Ā yoa to pocoro to maconore ñu tuhtirohca yu yacoro to jiri buhiri. Tuhsu, pacoro macono cãhu to pocorore ñu tuhtirohca to pocoro yu yacoro to jiri buhiri. Ā yoa to marechono to macu namonore ñu tuhtirohca yu yacoro to jiri buhiri. Tuhsu, pacoro macu namono cãhu to marechonore ñu tuhtirohca yu yacoro to jiri buhiri. Āta waharohca, yu buheare ti tuhochu —niha Jesu.

Noari dacho cjhitore, ñari dacho cjhitore masa ti masiare yahuha Jesu

(Mt 16.1-4; Mr 8.11-13)

⁵⁴ Ā yoa Jesu masare ð sehe ni yahuha tjoa:

—Ahrie sehepu coro siterire ñuna, doihta “Coro tarohca”, nina musa. Musa ã niri baharo coro tara. ⁵⁵ Ā yoa surpu wihnono tachu “Siri dacho jirohca”, nina musa ahri yahpai jiina. Musa ã niri baharo dacho sira. ⁵⁶ Musa mahñoperucina jira. Musa ahri yahpare muano cãhure ñuna, noari dacho cjhitore, ñari dacho cjhito cãhure masina musa. ĆĀ jina mipu macaa dachore masipanahta dohseana ahri yahpa macaina mipure musa dohse wahahtore masierajari musa? —niha Jesu.

Musare ñu tuhtiriro mehne musa cahmacherire cahma pjãga

(Mt 5.25-26)

⁵⁷ Ā ni tuhsu ð sehe ni yahu namoha:

—ĆMuhu quihõno mu yoahure masierajari muhu mipu? ⁵⁸ Pairo muhare yahusãno waharo buhiri dahre dutiri wuhupu waha dutiboca. Tõpu wahana “Pari turi muhare ã yoasi”, nicu cahma pjãga. Mu ã cahma pjãerachu tiro buhiri dahre dutiriro cahapu naaboca muhare. Tuhsu, buhiri dahre

dutiriro sehe muhare surarare to wachu, muhare surara peresu yoahca. ⁵⁹ Muhure nii nija. Tõpu jisinihca muhu. Pu ti wapa dutirire mu wapa pahñõpu wijaahca muhu —niha Jesu.

13

“Noaina jija”, ni musa tuhotumarine tuhotu cohtota, Cohamacure cahmaga

¹ Ti pjare mahainacã masa Jesure ð sehe ni yahuha tiha:

—Galilea macaina wahiquirore wajã jũ muo Cohamacure ti ño payoro watoi Pilato sehe tinare wajãha. To ã wajãchu wahiquiro di mehne masa di moreha —ni yahuha tina Jesure.

² Ti ã ni yahu tuhsuchu Jesu ð sehe ni yahuha:

—ĆGalilea macaina Pilato to wajãrina cjirire dohse ni tuhotujari musa? ĆTi ã yariachu paina Galilea macaina yuhdoro ñaina ti jiri buhiri ã yoa dutiri Cohamacu tinare, musa tuhotuchu? ³ Jierara. Musare niita nija. Musa sehe “Noaina jija” ni, musa tuhotumari cjirire tuhotu cohtotaerana, Cohamacure cahmaerana, musa cãhu yariana pichacapu wahanahca. ⁴ Ā yoa sohõ jirina diez y ocho masa Siloé wama tiri wuhu muari wuhu ti bui bora pja wajã pahñoha. ĆĀ waha yariaa, paina Jerusalé macaina yuhdoro ñaina jiri tina, musa tuhotuchu? ⁵ Jierara. Musare niita nija. Musa ñaa tuhotumari cjirire tuhotu cohtotaerana, Cohamacure macaerana, musa cãhu yarianahca. Ā jina pichacapu wahanahca —niha Jesu tinare.

Higueracu dicha mariedu quitire yahuha Jesu

⁶ Ā ni tuhsu quiti mehne piti dahre yahuha tinare:

—Wese puro to wesepu higueracure cjuaha. Ā jiro tiro tu dichare macano wahamaha. Bocaeraha. ⁷ Bocaeraro tiro wese dahrarirore yahuha. “Tuhoga yuhure. Tia cahma waro higueracu dichare macamaja. Dicha mariahna. Tu dicha mariahu ture cã cohãnocahga. Tu yu wesei jichu padure yuhu toa masieraja. Yu wesei jiri yahpa macaare wiho waro nana tu”, niha wese puro tirore dahra cohtarirore. ⁸ To ã nichu tuhoro dahra cohtariro ð sehe niha: “Puhtoro, ahdu cã cahma waro ducusinijaro. Tu dahpotoi yuhu sahaihtja. Tuhsu, wahiquiro tu mehne ti copare yaihtja. ⁹ Yu ã yoari baharo tu pa cahmai dicha tiboca. Tu dicha tierachu muhu cã cohã dutihca”, niha dahra cohtariro wese puore —ni yahuha Jesu.

Sabado dachoi Jesu dohatiricorore noaricoro wahachu yoaha

¹⁰ Tí pjare Sabado dachoi Jesu judio masa buheri wuhú buhero niha. ¹¹ Tói wafino to cohtotaricoro jiha. Watíno sehe diez y ocho cahmari waro dohatichu yoaha ticorore. Á jiro pari muti ducuricoro jiro, potó ducu masieraha. ¹² To á jichu ñano Jesu ticorore ñu, ó sehe ni pisuha:

—Numino, m^u dohatia pihtia wahahre — ni pisuha Jesu.

¹³ To á pisuri baharo ticorore to ña payochu dóihita ticoro noano potó ducuricoro wahaha. Á waharo “Cohamacu tuariro, noariro jira”, ni ño payoha ticoro. ¹⁴ Jesu ticorore Sabado dachoi to noaricoro yoachu ñano judio masa buheri wuhú puhtoro sehe tiro mehne suaha. Á suaro tiro masare ó sehe niha:

—Seis dachori jira mari dahraa dachori. Á jina masa dohatiinare noaina wahachu yoa duana, tí dachorire tíre yoaga. Sabado dachore mari sori dachore tíre yoaena tjiga —niha wuhú puhtoro.

¹⁵ To á nichu Jesu ó sehe ni yuhtihá:

—Musa á mahíforucuina jira. M^usa wachure, burro cahure cjuana Sabado dachoi tí duhteri dare pjá, tinare na buha, sihni dutiboa. ¹⁶ Mip^u ahricorore Abrahá cjiro coyeacorore wafino diez y ocho cahmari waro ticorore dohatichu yoahre. ¿Sabado dachoi ticorore noaricoro wahachu yoa dutierajari masa? —niha Jesu.

¹⁷ To á nichu tuhóa, tina buoro wahaha. Á jia paina sehe jipihtina Jesu yoarire ñu, wahcheha.

Mostaza yapa quitire yahuha Jesu

(Mt 13.31-32; Mr 4.30-32)

¹⁸ Á yoa Jesu quiti mehne piti dahre buheha masare:

—¿Ne Cohamacu masa bui puhtoro to noano suho jia yaba baro yoaro sehe jijari, masa tuhotuchu? Ahri quiti mehne tíre puhtoro to suho jiare yahuihtja yuhú. ¹⁹ Mostaza yapacá yoaro sehe jira. Tí yapacáre toari masano to wesei toaha. To toari baharo tí yapacá duha. Á jia tu bucuachu minichaha peri tu dápuri suhti suhaha. (Tó seheta m^uano macariroro mari puhtoro masina mahainacá tí jí muhtapachuta baharopu tina payu wahaahca) —niha Jesu.

Pão bucuaro quitire yahuha Jesu

(Mt 13.33)

²⁰ Á ni tuhsu, pari turi Jesu ó sehe ni piti dahre buheha:

—¿Ne Cohamacu masa bui puhtoro to noano suho jia yaba baro yoaro sehe jijari, masa tuhotuchu? ²¹ Pão bucuaro yoaro sehe jira. Tíre numino cá wajuru trigore co mehne noano tíre dahra morena pão bucuhtore. To á yoachu pão bucuaro

sehe trigore noano sahseracu suha. (To sahseracu suro seheta m^uano macariroro mari puhtoro payu masa masiahca) — niha Jesu.

Mahari sopacacá quitire yahuha Jesu
(Mt 7.13-14, 21-23)

²² Á yoa Jesu bujua macaripu, daa macaricápu cahure buhe wahcá, Jerusalépu suro taro niha. ²³ To á waharo watói cáuro Jesure ó sehe ni sinituha:

—Puhtoro, ¿mahainacá masare pichacapu wahaborinare yuhdorohcari Cohamacu? — ni sinituha tiro Jesure.

To á nichu Jesu piti dahre buhero ó sehe ni yahuha:

²⁴ —Payu masa Cohamacu cahapu waha duaa, sáa duamana. Mahari sopacacáre masa sáa duachu mijo curera. Tó seheta Cohamacu cahapu masa waha duachu mijo nina. Masa á sáa duapahta sáa masierara. Á jina masa sehe mahari sopacacáre masa tuaro sáa duaboro seheta Cohamacu sehete tuaro masiga. ²⁵ Ó sehe yoarohca Cohamacu payu masare. Tiro wuhú puero yoaro sehe jira. Wuhú puero wahcá, sopacacáre biharohca. To á yoachu sopacacápu ducuna, sopa pahmare dotanahca. Á dotana ó sehe ninahca: “Puhtoro, sopa pahmare pjóhga”, masa nichu wuhú puero sehe ó sehe ni yuhtirohca. “Musare ne masieraja yuhú. Nohoi masa taro cahure masieraja”, ni yuhtirohca. ²⁶ To á nichu masa ó sehe ni yuhtinahca: “Mahu mehne sá chu, sihnihi. Sá ya macai buhere muhu”, ninahca masa. ²⁷ Musa á nichu tiro sehe ó sehe ni yuhtirohca: “Musare ne masieraja. Nohoi masa taro cahure masieraja. Jipihina masa ñaa buhiri tiina yu cahai taena tjiga”, ninohca wuhú puero. ²⁸ Á yoa Abrahá cjirore, Isaa cjirore, Jacobo cjirore, jipihina Cohamacu yare yahu muhtaina cjirore Cohamacu masare puhtoro to noano suho jirore tí jichu ñuna, masa sehe sopacapu cohárina jina tuaro tiinahca. Á tiina jina, masa tuaro cahyaro mehne piri bahca dihonahca. ²⁹ Tí pjare jipihtiuro macaina puhtoro Cohamacu to noano suho jirore su, tiro mehne chu dujahca. ³⁰ Mipure wiho jina jirina cjirore tí pjare puhtoa jahca. Á jia mipure puhtoa jirina cjirore tí pjare wiho jina jahca —niha Jesu.

Jerusalé macainare tuaro cahina Jesu

(Mt 23.37-39)

³¹ Tí pjare mahainacá fariseo curua macaina Jesu cahapu sua, tirore ó sehe ni yahuha:

—Herode mahure wajá duara. Á jicu pa sehépu wahaga muhu —niha tina tirore.

³² Tí á nichu Jesu sehe ó sehe ni yuhtihá:

—Herode mahñoa payariro jira tiro. Õ sehe ni yahuga tirore: “Jesu wafäre cohâ wioro nina. Tuhsu, dohatiinare noaina wahachu yoaro nina. Tîre michare, ñamichaca cûhare yoarohca. Ñamichaca bohrearo dahra batoarohca”, ni yahuga Herodere. ³³ Æ jicu michare waha, ñamichaca cûhare waha, ñamichaca bohrearo cûhare waha, Jerusalêpu sâihca. Cohamacu yare yahu muhtarirore yuhure wajâhca masa. Cohamacu yare yahu muhtainare ti wajâchu Jerusalêpu jiro cahmana tinare. Æ jicu yahu cûhare Jerusalêpu jiro cahmana.

³⁴ Cue Jerusalê macaina. Mûsa Cohamacu yare yahu muhtaina cjiirire wajâ, mûsa cahai to warocainare tâa mehne doca wajâre mûsa. Mûsa coyea panoru macaina cûhu âta yoarina cjiiri jîha. Caracacoro to pohñare to cjárû dupuri mehne to moha coño seheta payu tahari musare cahîrucumahi. Musare cahmamahi. Mûsa sehe yuhure ne cahmaerare. ³⁵ Mîpûre mûsa jiro cohâri maca jirohca. Potocâ niita nija musare. Cohamacu mari puhtoro to tuaa mehne taihca yuhu. Yu Æ tachû ñûna mûsa yuhure “Cohamacu tuaa mehne tariro noajaro”, ni nahca. Yuhure mûsa tîre nihto pano pari turi yuhure ñûsi mûsa —niha Jesu tinare.

14

Dohatirirore noariro wahachu yoaha Jesu

¹ Pa dacho Sabado dacho jichû fariseo curua macaina puhtoa mehne macariro ya wûhuru Jesu chûro wahaha. Tî wûhui jiina tiro dihtare ñûroca ôha. ² Tî Æ ñûroca ôno watoi yachûri wipiriro, ñûchûa wipiriro tiro cahapu sûha. ³ Æ jiro Jesu judio masare buheinare, fariseo curua macaina cûhare ò sehe ni sinituha:

—¿Sabado dachore dohatirirore noariro wahachu yoa dutijari Cohamacu yare ti joari pûi? —ni sinituha Jesu.

⁴ To Æ ni sinitupachûta tina yuhtieraha. Tî yuhtierachû ñûno Jesu dohatirirore noariro wahachu yoa, “Wahaga”, niha tirore. ⁵ Æ yoa tuhsuro, tinare ò sehe ni sinituha tjoa:

—“¿Cûiro mûsa mehne macariro to macûno Sabado dachoi mari sori dachoi copapu to bora sâachû na wioerabocari?” mûsa Æ nina. “¿To wachû cûhare na wioerabocari?” mûsa Æ nina —niha Jesu.

⁶ To Æ nipachûta tina to sinituare yuhti masieraha tjoa.

Wamomaca dâhteroru pjirocainare yahuha Jesu

⁷ Fariseo curua macariro ya wûhui jiro tî wûhu macariro to pjirocaina noaa dujiare ti besechû ñûha Jesu. Æ ñû tuhsu ò sehe ni yahuha jipihtinare:

⁸ —Wamomaca dâhteri bese numûi musare to pjirocachû, noaa dujiare bese dujiena tjiga. Mûsa yuhdoro cua pisainare pjirocaboca ahri wûhu puro. ⁹ To Æ yoachû mûsa noaa dujaii dujichû, “Ahrina cua pisainare mûsa dujiare waga”, ni boca wûhu puro musare. To Æ nichû mûsa sehe buo tina, ñaa dujaii dujiboca. ¹⁰ Æ jina wûhu puro musare to pjirocachû, ñaa dujaii duji muhtaga. Mûsa Æ yoachû wûhu puro musare “Noaa dujia sehere dujina taga”, ninohca musare tiro. Mûsa Æ wahachû paina to pjirocaina sehe musare ño payoa mehne ñûahca. ¹¹ Cûiro to basi “Puhtoro tjija”, ni tahoturiro cahamacûno jirohca. Pairo “Cahamacûno jija”, ni tahoturiro painare yuhdûrûca duaerariro tiro sehe puhtoro jirohca —niha Jesu tinare.

¹² Æ ni tuhsu Jesu wûhu puro ò sehe ni yahuha:

—Mûhu bese numû dahrecu mu cahai jinare, mu bahanare, mu coyeare, pache pûare pjiecu tjiga. Mûhu tinare pjichû mûhu cûhare tina cûhu pji cahmaahca tjoa. Æ pji cahmaa mûhare ti wapamoare wapaahca.

¹³ Mûhu bese numû dahrecu pjacoinare, tini masierainare, cûbûhusehe dahporo dojori tiinare, capari ñûerainare pjirocaga.

¹⁴ Mu Æ yoachû ñûno Cohamacu mûhare noano yoarohca. Tina sehe mûhare ti wapamoare wapa masierara. Æ jiro noaina yariaina ti masa mûjari pja jichû Cohamacu sehe noare mu yoari wapa mûhare noano yoarohca —niha Jesu wûhu purore.

Pjiri bese numû quitire yahuha Jesu

¹⁵ To Æ nichû tuhoro pairo chûri mesa cahai dujiriro, Jesure ò sehe ni yahuha:

—Cohamacu masare puhtoro to noano sûho jiroi to chûri mesa cahai dujiina tuaro wahcheina jahca —niha tiro Jesure.

¹⁶ To Æ nichû Jesu ahri quitire yahuha tirore:

—Pjiri bese numû dahreriro payu masare pjirocaha. ¹⁷ To pjirocari baharo bese numû dachoi to cahamacûnore to pjirocainare yahu dutiro warocaha. “Ma, jipitiare bese numû macaa cjihtire cahno tuhsûhre. Æ jiro musare pjirocahre”, ni yahu dutiha to cahamacûnore.

¹⁸ To cahamacûno to Æ ni yahupachûta, to pjirocaina sehe “Waha masieraja”, niha tina. To pjiroca muhtariro ò sehe ni yahuha to cahamacûnore: “Michapucacâ yahpare nuchûhi. Æ jicu tî yahpare ñûi wahai tai nija. Æ yoacu waha masieraja. Ño payo curea yuhure. Yuhure basioerahca”, niha to pjiroca muhtariro sehe to cahamacûnore.

¹⁹ Pairo sehe ò sehe niha: “Wachûare pûa wamomaca pîhtiinare michapucacâta nuchûhi. Æ jicu wachûare buhe cayo ñûi wahai tai nija ti

waja wahcāhtore. Ā yoai wahaeraja. Yuhare basioerahca", niha tiro cūh. ²⁰ Pairo sehe ò sehe niha: "Yuhū michapucacā wamomaca duhtehi. Ā jicu bose numurū waha masieraja", niha tiro to cahamacunore. ²¹ To ā nichū to cahamacunore sehe tjua waha, to puhtoropare ti niri cjirire yahu pahñoaha. To ā ni yahuchū to puhtoro tuaro susini, ò sehe niha to cahamacunore. "Macari macaa maharipū pjacuoina ti ducua maharipū wahaga. Ā jicu pjacuoinare, tini masierainare, capari ñaerainare, cū buhusehe dahporo dojori tiinare cjero na tahga tinare", niha puhtoro. ²² Baharo curero to cahamacunore yahuha to puhtoro: "Puhtoro, mu dutiriro seheta yoahi. Yu ā yoapachata paina cūh mu suahca", niha to cahamacunore. ²³ To ā nichū puhtoro tirore ò sehe ni dutiha: "Campopū wahaga. Tói bujua maharipū jinare, daa maharicāpū jiina cūhure masare yu wuhupū ta dutiga, ya wuhū to noano wahpahto cjihti sehe. ²⁴ Potocā nii nija mūhare. Ahrina yu pjiroca muhtarina yu chūare ne mahanocā chūsi", niha puhtoro —ni yahuha Jesu.

Jesu mehne wahachū mijo nina

²⁵ Ti pjare payū masa Jesu mehne wahaha. Ā jiro Jesu tinare majare ñū, ò sehe ni yahuha:

²⁶ —Cāiro yu buheriro ji duaro painare to cahīriro yuhdoro yuhū sehese cahīno cahmana. To pūcarore, to pocorore, to namonore, to pohnare, to bahanare, to pjacu cūhure to cahīriro yuhdoro yuhū sehese cahīno cahmana. Ā yoareraro yu buheriro ji masierara. ²⁷ Cāiro yu buheriro ji duaro yu yare ā yoarucuriro jirohca. Ā yo crusapū yu ñano yuhduhtiro seheta yu yairo to jiri buhiri ñano yuhdu duaeraro yu buheriro ji masierara. ²⁸ Ahrire masiyuro cahmana musare. Ē sehe jira ti: Wuhū dahreriro to muari wuhure yoahito pano wuhū wapa tihtire quihō cū muhtana. Ā yoaro to wuhure to pahñohtore masina tiro. ²⁹ Wapa tihtire quihōeraro to wuhure yoaro pahñoeraboa. Ā jia tirore ñūina bujūpeboa. ³⁰ "Ahriro to wuhure yoaro bihoerare", ni bujūpeboa. ³¹ Puhtoro pairo puhtoro yaina mehne ti cahma wajāhto pano, to yaina surarare to cahma wajā duhtito pano, to surarare quihōnohca. "¿Yuhū diez mil surara mehne pairo veinte mil surara cūarigiro mehne cahma wajācu bihobocari yuhū?" ni tuhoturo quihōnohca tiro. ³² Ā quihōno, to bihoerahtore masinohca. Ā masino pairo puhtoro to surara mehne cahma wajāno tariro yoaropū to jichūta, bihoerariro sehe "Cahma wajāena tjiijihna", ni dutiro warocaboa dahra cohtarirore. ³³ Ā jina yu buheina ji duana,

musā yoahitire musare masino cahmana. Musā yoa duari sehese cohā duaerana, yu buheina ji masierara —ni yahuha Jesu.

Moa coaerarore yahuha Jesu

(Mt 5.13; Mr 9.50)

³⁴ Ā ni tuhsū tinare ò sehe ni yahu namoha:

—Moa noano coara. To coaerachū coa yoahito basioerara. ³⁵ Moa coaerachū ti moa ne noaerara. Ti moare dohseahito basioerara. Ti ā jichū ti moare cohāno cahmana. Ne yaba cjihti jierara ti cohōa. (Ti yaba cjihti jieraro seheta jiena tjiga musā. Moa noano to coaro seheta musā cūhū ji coaina jiga. Tuhsū, paina mehne noano mehne jiga.) Ahrire noano tuhoga musā —niha Jesu.

15

Oveja butiriro quitire yahuha Jesu

(Mt 18.10-14)

¹ Ā yo pa dachoi payū puhtoa yare wapa na cohtaina paina "Ñaaare yoaina", ti niina mehne Jesure tahoa taha. ² Ti ā yoachū ñūa fariseo curua macaina, judio masare buheina cūhū Jesure ñū tuhtia, ò sehe niha ti basi:

—Ahriro ñainare piti tira. Ā jiriro jirota tina mehne chūra —ni durucuchū tina ti basi.

³ Ti ā ni durucuchū Jesu to tuhotua mehne ò sehe ni piti dahre buheha tinare:

⁴ —¿Cien oveja puro cāiro oveja butichū ñūno dohse yoarohcari tiro? Ē sehe yoarohca. Tiro noventa y nueve ovejare ti churi campopū cū, butirirore macano waharohca. Ovejare bocaropū duhurhōca. ⁵ Tirore bocaro wahcherohca. Ā jiro to comapariaca buipū tirore cǵa payo, to wuhupū na tjuaa waharohca. ⁶ Na tju sū, to cahai jīnare, to coyeare pji cahmachunohca. "Yu oveja butirirore boca tuhsūhi. Ā jina yuhū mehne wahchega", ninohca tiro tinare. ⁷ Potocā niita nija musare. Noventa y nueve oveja payū ti jiriro seheta, payū masa ò sehe ni tuhotura: "Ñano yoaeraja. Ā jicu yu ñaaare cahya, yu tuhotumari cjirire tuhotu cohtotasi yuhū", ni tuhotura payū masa. Ti ā ni tuhotuchū ñūa muano macaina Cohamacū cahai jīna wahcherara. Pairo sehese wahchera. Butiriro oveja cāirota to butiriro seheta to puro tirore to bocariro seheta cāiro ñariro to ñaaare cahyachū, "Ñano yoaeraja", ni to tuhotumari cjirire tuhotu to cohtotachū, Cohamacūre to cahmachū ñūa, Cohamacū cahai jīna tuaro wahchera —niha Jesu.

Niñeru tu butiri quitire yahuha Jesu

⁸ Ā ni yahu tuhsū, paye quitu mehne piti dahre yahu namoha tjao:

—¿Diez niñeru tãri cjuaricoro cã tã butichu ñano dohse yoarohcari ticoro? Õ sehe yoarohca ticoro. Sihãriare sihã, wãhure coha, noano maca pahñonohca. Tí ture boca tuhsu, to cahai jijnare, to coyere pji cahmachunohca. “Niñeru tu ya tu yãhure butiri tare bocahi. Á jina yãhu mehne wahcheha”, ninohca ticoro.⁹ Potocã niita nija musare. Tó seheta cáiro ñariro to ñaare cahyachu, “Ñano yoer-aja”, ni to tahotumari cjiire tuhutu to cohotachu Cohamacure to cahmachu Cohamacu yaina anjoa sehe tuaro wahcheahca —niha Jesu.

To macuno butiri quitire yahuha Jesu

¹¹ Á ni yahu tuhsu Jesu paye quti mehne piti dahre yahu namoha tjoa:

—Bucuro pohna puaro muã jiha.¹² Duhsariro sehe õ sehe niha to puçurore: “Mai, mu yariari baharo yãhure mu wahtire yãhure wa bahrañoga”, niha tiro to puçurore. To á nichu ti puçuro puaropureta to pohñare witira to cjuari cjiire.¹³ Mahaa dachoricã baharo duhsariro to yare jipihitiare na, yoaropu pa yahrapu wahaa wahaha. Tõpu sũro tuho masierariro seheta yoa, to niñerure to yare yoa site pahñonocaha.¹⁴ To yoa site pahñori baharo tí yahrapure ne chuã marieni pja ji dũcaha. Á jiro tiro juca baaha.¹⁵ Á jiro tí yahpa macaa dahraare macaha. To bocachu to puhtoro yesea cohtariro sõha tirore.¹⁶ Á jiro tiro yeseare nu, ti chuãre chuã duamaha. To á chuã duapachuta tí chuãre tó macaina waeraha tirore.¹⁷ Á yoa tirore tói wacũa taha juna. “Yu puçure dahra cohtaina sehe bujuã chuãre chuãca. Ti chuã dahaa cãhu bujuã duhsaca. Tí á noano yãhũro watõ yãhu sehe õi jicu, juca yariari nija.¹⁸ Mipure yu puçu cahapu tjuaihtja. Yu puçu cahapu sũcu õ sehe nihtja tirore: ‘Mai, Cohamacure ñano yoahi. Muã cãhure ñano yoahi.¹⁹ Ñariro jija. Mu macu jiboriro jieraja yãhu. Muãhure dahra cohtaina seheta yoaga yãhure’, nihtja yu puçure”, ni tahotuha tiro.²⁰ Á ni tahoturota wahcãruca, to puçuro cahapu tjuaa wahaha. Tõpu to sũrigo tjuã tachu to puçuro sehe yoaroputa to macunore ñãha.

To á wihichu ñano to macunore pja ñãha. Á pja ñano to cahai mũroca wahcã tirore cã sũhu muã, to wahsupui wihmiha to puçuro to macunore.²¹ “Mai, Cohamacure ñano yoahi. Muã cãhure ñano yoahi. Ñariro jija yãhu. Mu macu jiboriro jieraja yãhu”, niha tiro to puçurore.²² To á nichu tuho to puçuro sehe dahra cohtainare pjiha: “Cjero, noa yãhũri suhtirore na tahga. Á jina yu macure sãaga. Sãa tuhsu, to wamomaca sãari sorore sãa, to dahporire dahpo suhti cãhure

sãaga.²³ Sãa tuhsu, dihi tiriocã wachũcãre wajãga. Bose numu yoajihna.²⁴ Ahriro yu macu yariariro seheta wahare. Á wahaparota mipure catira tiro. To butiboriro seheta jirirore mipure bocahi. Á jina bõse numu yoajihna”, niha to puçuro. To á niri baharo bõse numu dahre dũcaha tina.

²⁵ Tí pjare to wahmino sehe wesepu jiha. Wesepu jiro coha tjuã taro wãhu cahai sũro, ti basaae tuhorocaha tiro.²⁶ Á tuhorocarõ, cáiro dahra cohtarirore pjiroca, tirore sinitu ñãha tiro: “¿Dohse yoa basaa niri?” ni sinitu ñãha tiro dahra cohtarirore.²⁷ “Mu bahu tju wihire. Tiro noariro, catiriro to tju wihichu mu puçu dihi tiriocã wachũcãre wajã dutihre”, ni yãhtiha dahra cohtariro.²⁸ To á ni yahuchu to wahmino sehe tuaro suaro, wãhũpu sãa taeraha. To sãa taerachu ñano to puçuro sopacapu wijaa ta, “Sãa taga” ni, tuaro pjimaha to macunore.²⁹ “Tuhoãga, Mai. Yoari pja muãhure dahra cohtariro seheta muãhure yoadohomahi. Á jicu muã dutiare ne cã taha yãhũrucaera tihã. Yu muãhure dahra cohtapachuta yãhure ne waerare muãhu. Ne cáiro wãhiqũrocãre ne waera tire muãhu yãhure yu piti tiina mehne yu bõse numu dahrehti cjihtire.³⁰ Wiho mejeta ahriro mu macu sehe ñaina numia mehne mu yare yoa site pahñoyuhti. Tire yoa site pahño tuhsu, tiro wãhũpu to tju wihichu dihi tiriocãre wachũcãre wajã dutiyuhti muãhu to chuhtiro cjihtore”, niha to wahmino to puçurore.³¹ “Macu, yãhu mehne jipihitiã dachoripe mu jichu jipihitiã ya mu ya cãhu jira.³² Mu bahu sehe yariariro seheta wahare marine. Á yoa mipure tiro catiriro jira. Tiro butiboriro seheta jire. To á wahari baharo mipure tirore bocahi. Á jina to tju wihichu mari bõse numu yoa wahchechu noana”, niha tiro to macunore —niha Jesu tinare.

16

Niñeru ñu wihbo cohtariro tuho masiriro quitire Jesu yahuha

¹ Á yoa ahri quitire to buheinare õ sehe ni yahuha Jesu:

—Pache puõro ya niñerure ñu wihbo cohtariro niñerure noano to ñu wihboerachu ñano paio sehe yahusãha pache puõrore: “Tiro mu niñerure yoa sitero nina”, ni yahusãha tirore.² To yahusã tuhsũri baharo niñeru ñu wihbo cohtarirore pjirocaha. Á pji tuhsu, to wihichu ñano, tirore puhtoro õ sehe niha: “Paio yu niñerure mu yoa siterire yãhure yahure. Á jicu mipure yu yare ñu wihboriro jisi muãhu. Á jicu yu yare mu yoari cjiire yahu pahño joaga. Muãhure cohãi nija”, niha to puhtoro tirore.³ To á niri baharo õ sehe ni tahotuha ñu

wihboriro to basi: “Yu puhtoro yuhare cohāno taro nica. Yuhu tuaeraja. Ā jicu tuaro dahraare bihoeraja. Tuhsu, painare yuhu niñerure sinicu buobiario yuhduboca yuhu. ¿Dohse yoaihcari yuhu?”⁴ Miṛu pinihtare yu yoahtire masija yuhu juna. Ō sehe yu yoachu yu dahraa maerachu yu puhtorore wapamoina yuhare cahāhca. Ā jia ti wuhseṛu sāa dutiahca yuhare”, ni tuhotuha tiro.⁵ Ā ni tuhoturo tiro jipihitina to puhtorore wapamoinare pjirocaha. Pjiroca tuhsu, cohtaha. Ā cohtaro wihi mahtariorore ō sehe ni sinituha tiro: “¿Yu puhtorore noho puro wapamojari maṛu?” niha tiro.⁶ To ā nichu wapamoriore sehe ō sehe ni yuhtiha: “Cien tambores sere olivo dicha mehne ti yoari sere wapamoja tirore”, ni yuhtiha tiro. To ā ni yahuchu niñeru űu wihboriro sehe ō sehe ni yahuha: “Ōi jira mu wapamonore joa ōri pū. Dujiga. Ā jicu mu wapamonore dacho macai na, dacho macai joa cahnoga”, niha űu wihboriro wapamoriore.⁷ Ā ni tuhsu paio wapamoriore sinituha tiro: “¿Maṛu waro, noho puro wapamojari?” niha tjoa. “Cien waju trigo yapari wajure wapamoja yuhu”, niha wapamoriore niñerure űu wihboriorore. “Ōi jira mu wapamonore joa ōri pū. Mu wapamonore ochenta joa cahnoga”, niha űu wihboriro.⁸ To ā noano mahño mihnichu űano “Ahriri mahñoriro noano masiriro jica”, ni tuhotuha to puhtoro niñerure űu wihboriorore. Ahri dacho macaina, Cohamacure cahmaeraina ti yare cahnorire ti niñeru ti űu wihborire Cohamacu yaina yuhdoro masica tina – niha Jesu.

⁹ Ā ni tuhsu Jesu ō sehe ni yahu namoha:

–Ahri quitire ā ni yahucu, musare ō sehe niita nija. Musa cjuare, pjacoinare musa wachu, tina sehe musare cahāhca. Musa ā yoachu musa cjuaa pihtari baharo musa maanoru sachu musare cahāhca tōṛure.

¹⁰ Wiho jiina ya dahraare quihōno yoana, puhtoa ya dahraa cūhure quihōno yoanahca. Wiho jiina ya dahraare quihōno yoaerana, puhtoa ya dahraa cūhure quihōno yoasi musa.¹¹ Ā jina ahri yahpai musa cjuaa mehne musa noano yoaerana Cohamacu musare to yoa dutia cūhure noano yoasi musa.¹² Ā jiro paio yare musa noano yoabasaerachu űano musa ya cjhitiire wasi musare.

¹³ Cāiro Cohamacu sehene wacūno, tuabiario niñeru sehene wacūerara. Niñeru sehene tuabiario wacūno Cohamacu sehene wacūerara. Niñeru dihtare cahmariro jiro Cohamacure wahchechu yoaerara. Cohamacu cūhure, niñeru cūhure puarore cahma yuhdurucahto basioerara musare.

Niñerure cahma yuhdurairo Cohamacure noano űo payo masierara –niha Jesu.

¹⁴ To ā nichu tuhoa fariseo curua macaina sehe tirore bujipeha. Tina sehe niñerure cahāha. Ā jia bujipeha.¹⁵ Ti bujipechu tuhoro Jesu tinare ō sehe ni yahuha:

–Masa ti űurocaroi musa noano yoamana. Musa ā yoachu “Noaina, quihōno yoaina jira”, nimana masa musare. Cohamacu sehe musa tuhotuare masina. Masa “Noa yuhdūara”, ti nirire Cohamacu sehe soro ni tuhotu, tīre űu yabira –niha Jesu.

Cohamacu to dutiare, puhtoro to suho jiare yahuha Jesu

¹⁶ Ā ni tuhsu ō sehe ni namoha Jesu:

–Joā masare bautisariro to jihto pano Moisere to cūri dutia mehne Cohamacu marine dutire. Cohamacu yare yahu mahtaina cjiri ti joari cjiri mehne cūhure marine dutire. Miṛu sehene Joāo to buhe dūcari baharo noaa buheare, Cohamacu masare puhtoro to noano suho jia cūhure masi dūcara masa. Ā masia masa ti mu sūro ti tuaa mehne Cohamacu masare puhtoro to noano suho jirore sāa duamana.

¹⁷ Moisere to cūri dutiai Cohamacu to niriro sehetā yoa pahñonohca tiro. Cohamacu yare yahu mahtaina cjiri ti joari cjiripū cūhure to niriro sehetā yoa pahñonohca tiro. Muano cūhu ahri yahpa cūhu ti pihtia wahapachūta Cohamacu to niriro sehetā yoa pahñonohca –niha Jesu.

Namonore cohāare yahuha Jesu (Mt 19.1-12; Mr 10.1-12)

¹⁸ Ā ni tuhsu ō sehe ni namoha Jesu:

–Masuno to namonore cohāno, pacorore namo tiro, tiro ticoro mehne űano yoaro nina. Tuhsu, masuno paio to cohāricorore namo tiro, tiro cūhu ticoro mehne űano yoaro nina –niha Jesu.

Pache puṛo cūhure, Lázaro cūhure to yahuri quitire buheha Jesu

¹⁹ Ā yoa paye quitī mehne piti dahre yahuha Jesu:

–Tī pjarure pache puṛo jia. To suhti sehe wapa bujabiaha. Tuhsu, dachoripe tiro noaa dihtare churo, payu cjuaha tiro.²⁰ Ā yoa ti pjare paio pjacuroro, Lázaro wama tiroro jia tiha. Tiro to pjacu payu cami tiroro jia. To ā jiriro jichu paina sehe tirore pache puṛo ya wuharu na suha.²¹ Ā jiro pjacuroro sehe pache puṛo to churi mesa docai yahpai dujiro to chu site boroare chumaṛa. “To chu site boroare chucu yaricahca yuhu”, ni tuhotumaha tiro. Ā jia dieya to camine nehnea taa tiha.²² Baharo pjacuroro to yariaa wahachu, Abrahā caharu paraíso wama tiropu anjoa tirore naa mājaha. Pache puṛo cūhu to baharocāta yariaa wahaha. To yariachu tirore yaha.

23 Ā yoa pache p̄rore tuaro pichaca j̄ha. To ā tuaro j̄chu, pichacaru jiro m̄anopu jirirore Abrahāre ñaha. Lázaro cūhure ñaha. 24 Ñu tuhsu, tiro Abrahāre pisuroc-aha: “Coyeiro Abrahā, p̄a ñuga yuhure. Pichacaru yuhu ñano yuhdui nica. Yu ā wahachu Lázarore yuhure warocaga. Tiro core to wamo picaru soha, yu ñahmanore co mehne nehoharo. Tóre yusuojaro tiro”, niha pache p̄ro. 25 To ā nichu Abrahā tirore õ sehe ni yahuha: “Coyeiro, catiriro jicu j̄p̄i- tiare muhu noaare c̄jahre. Lázaro sehe dachoripe ñano yuhdure. M̄ipu sehene muhu ñano yuhdachu tiro sehe õp̄re wahchea mehne jinocahno nina. 26 Ā yoa mari watoi caāri copa jira. Ā jia õre jiina t̄op̄ure waha masierara. Tuhsu t̄ore jiina õp̄u ta duaina ta masierara”, niha Abrahā pache p̄rore. 27 To ā nichu pache p̄ro õ sehe ni namoha: “Coyeiro, tuaro sinija m̄uhure. Lázarore yu p̄ucu ya wuhuru warocaga. 28 Yuhu cū wamomaca pihtina bahana tija. Lázaro tinare yahujaro. Tina õre ñano yuhd̄op̄ure taea tjijaro”, niha tiro. 29 To ā nichu Abrahā sehe õ sehe ni yuht̄i: “Cohamacu dutiare Moise marine to cūri cjirire, Cohamacu yare yahu muhtaina ti joari cjirire c̄juara mu bahana. Ā jia mu bahana t̄ireta t̄uhoharo”, niha Abrahā. 30 To ā nichu pache p̄ro sehe yuht̄i: “Coyeiro Abrahā, t̄ire c̄juapahta noano tuhosi. Lázaro yariariro masariro tina cahapu to s̄chu ñua tina sehe ti ñaare cahya, noaare cohtotaahca. Ā jia noaare yoahca yu bahana sehe”, niha pache p̄ro c̄jro. 31 To ā nichu Abrahā sehe õ sehe ni yahuha: “Mu bahana Moise to cūri p̄u to yahuaire, Cohamacu yare yahu muhtaina c̄jiri ti yahuaire t̄uhoeraina jira. Ā jia Lázaro yariariro c̄jro masariro to jipachuta tina Cohamacure t̄uho duasi”, niha Abrahā —ni yahuha Jesu.

17

Ñaare yoach̄u cua nina

(Mt 18.6-7, 21-22; Mr 9.42)

1 Ā yoa Jesu õ sehe ni yahuha to buheinare:

—Masare ñano yoach̄u yoaa payu jira. Ā jia masa ñaare yoara. Ti ā jipachuta masunore ñaare yoach̄u yoariro sehe ñabiaro yuhd̄urohca. 2 Masunore to wam̄ai pjiria t̄aca dahte yo, pjiri mapu tirore ti cohāchu ñano wahaboa tiro. Pairo sehe ahrinacā mehne macarirocāre ñaare yoach̄u yoaro pjiri mapu ti cohāro yuhdoro ñano yuhd̄urohca. Tirore tuaro buhiri dahrero cahmana. 3 Noano yoaga musa. Musa coyero ñano to yoach̄u ñana “Yoai tjiga”, niga tirore. Ā jina tiro to ñaare cahyachu, noaare to cohtotachu musa sehe to ñaa

yoaare boga. 4 Ā yoa musa coyero cū dachoihta siete tahari musare ñano to yoach̄u t̄op̄e tahari musare, “Yu ñaare cahyaja. Pari turi ā yoasi”, to nichu t̄op̄e taharita to ñaa yoaare boga —niha Jesu.

Cohamacure wacū tuaare yahuha Jesu

5 Ā yoa Jesu buhe duti to cūina tirore õ sehe niha:

—Cohamacure s̄are noano wacū tua namochu yoaga —niha tina Jesure.

6 Ti ā nichu Jesu õ sehe ni yuht̄i:

—Mostaza yapacā mahari yapacā j̄parota duropu pjidu wahara. To ā wahariro seheta Cohamacure pj̄ro wacū tuana, õ sehe wahachu yoa masinahca musa. Ahdu sicómoro wama tidure õ sehe ni masina: “M̄ihu yucucu mu basi duhtu wahcā, pjiri mapu bora ñojaga”, ni masina musa. Musa ā nichu tu yucucu sehe musa dutiro seheta waharohca —niha Jesu.

Dahra cohtariro to dahraare yahuha Jesu

7 Baharo õ sehe ni buheha Jesu:

—Musare dahra cohtariro jiro wesepu tjana, ovejare ñu wihbora. ¿Dahra cohtariro to t̄ju wihichu dohse nibocari musa tirore? “C̄jro taga. Mu chua õi jira”, ¿nibocari musa?

8 Ā nierara musa. Tirore õ sehe nina musa: “Yu ch̄are doha cahnoga. Ā jicu yu ch̄u sih- nichu yuhure cohtaga. Yu baharo m̄ihu c̄hu ch̄u sihniaga”, nina musa dahra cohtarirore.

9 Dahra cohtariro musa dutiare to yoach̄u tirore “Noana”, nierara musa. To dahraa dihtare yoaro nica tiro. 10 Musa c̄hu tiro yoaro sehe tjira. Cohamacu to dutiriro seheta yoa pah̄ona õ sehe ni tuhotuga musa: “Sā c̄hu dahra cohtaina dihta jija. Wiho jiina jija s̄a. Sā dahraa dihtare yoaja s̄a”, ni tuhotuga musa —niha Jesu to buheinare.

Diez cami baainare noaina wahachu yoaha Jesu

11 Pa dacho Jerusal̄epu Jesu waharo niha. T̄op̄u waharo Samaria yahpa, Galilea yahpa dacho macai yuhdu wahcāha. 12-13 Pa macaru wahari mahapu to tinichu diez cami baaina sehe tirore piti bocaha. Ā jia tina yoa cureropu ducuata pisuha:

—Jesu, p̄ah̄toro, s̄are p̄a ñuga —niha tina.

14 Ti ā nichu tinare ñu, õ sehe ni yahuha Jesu:

—Sacerdotere musa pjac̄urire noaa pjac̄uri ti waharire ñona wahaga —niha tinare.

To ā niri baharo ti waharo watoi tina ti pjac̄uri noaina wahaha. 15 Ā jiro c̄uro tina mehne macariro noano to pjacu wahachu ñano, Jesu cahapu majare t̄juaha. Ā t̄juaro tuaro mehne Cohamacure ño payoha. “Cohamacu tuariro, noariro jira”, tuaro ni, ño payoha tiro. 16 Ā nino tiro Jesu dahpori

cahai na tuhcuca caha su, “Noana”, niha tiro. Tiro sehe Samaria macariro jiha. ¹⁷ To ā yoari baharo Jesu ō sehe ni yahuha:

—Diez jihre masa noaina wahaina. Ā Paina nueve dūhsaina sehe nohopu jicari tina? ¹⁸ Ahriro pa yahpa macariro dihta Cohamacure “Noana”, nino taro tjua tahre. Ā Dohse yoa paina taerari? —niha Jesu.

¹⁹ Ā ni tuhsu Jesu ō sehe ni yahuha na tuhcuca caha sarirore:

—Wahcārucaga. Wahaga. Mūhu Cohamacure wacū tuacu, noariro wahahre mūhu —niha Jesu tirore.

Cohamacu masare puhtoro to noano suho jihtore yahuha Jesu
(Mt 24.23-28, 36-41)

²⁰ Tí pjare mahainacā fariseo curua macaina Jesure ō sehe ni sinituha:

—Ā Dohse jichu puhtoro Cohamacu masare suho ji ducarohcari? —niha tina.

Ti ā nichu Jesu ō sehe ni yuhtiha:

—Cohamacu masare puhtoro to noano suho ji ducachu masa űu masierara. ²¹ Cohamacu masare puhtoro to noano suho jia ōi jira”, ni masierara. “Sohōpu jira”, ni masierara. Cohamacu masare puhtoro to noano suho jia masa ti tuhotuapu jira —niha Jesu fariseo curua macainare.

²² Ā ni tuhsu Jesu to buheinare ō sehe ni yahuha:

—Baharo yuhu masuno Cohamacu warocariro ahri yahrapu yu tjua tahtore tuaro cahmanahca masa. Cū dachoihta yuhure űu duapanahca yuhure űu masa. Masa yuhure ā űu duapachata ti pjare tasi yuhu. ²³ Paina musare ō sehe niahca: “Tirore űuga. Tiro Cristo jira. Ahrirore űuga. Ahriro Cristo jira”, niahca musare. Ti ā nipachata tinare tuhoena tjiga. ²⁴ Oroca sitero wacūenoca to oroca sitero seheta yuhu cūhu masuno Cohamacu warocariro wacūenoca tjua taihca. ²⁵ Ā yu tjua tahto pano yuhu tuaro űano yuhdūihca. Ā jia yuhure mipu macaina cahmasi. ²⁶ Noé to jiri pja macaina ti jiriro seheta yuhu masuno Cohamacu warocariro yu tjua tachu tó seheta jiahca masa. ²⁷ Noé to jiri pjare jipihtina masa ā churucua tiha. Ā yoa sinnirucua tiha. Ā jia mūa numiare namo tia tiha. Noé pjiria dohoriapu to samuhto pano Cohamacu tinare to miohto pano ti jipihtiare masa yorucua tiha. Tó seheta jirohca pari turi yu tjua tachu cāhure. ²⁸ Lote to jia tiri pja macaina ti jiriro seheta yu tjua tachu jiahca masa. Lote to jia tiri pjare masa chu, sihni, nuchu, dua, weserire toaa, wūhuse yoaha. ²⁹ Ti ā yoaro watoi Sodoma wama tiri macai jiriro Lote to wahari dachoi mūano macaa pichaca, picha sohāa poca tūa peri cūhu coro taro seheta tina bui bora ta, tinare wajā pahñonocaa tiha. ³⁰ Yuhu masuno Cohamacu warocariro

wacūenoca yu tjua tachu tina yoaro seheta yoaina jiahca masa ti pjare.

³¹ Tí pjare cāiro to wūhu bui macari wapapu jiriro wūhu puhichapu to ya jichu tīre nano sāaeno tjjaro to waha bahrañohito sehe. Tuhsu, wesepu jiriro cūhu ti pjare to wūhupu piha taero tjjaro to waha bahrañohito sehe. ³² Lote namono to waharire wacūga masa. ³³ Masuno yuhure wacūno marieno to mū sūro to cahmano seheta yoaro pichacapu waharohca. Yu yare ā yorucuriro sehe jipihtia dachoripe yuhu mehne mūanopu jirucurohca.

³⁴ Tí űamine puaro cā casario bui carinare cāiro yuhure cahmariroro naaihca. Tuhsu, yuhure cahmaerariro tó tjuarohca. ³⁵ Tí pjare puaro numia cānoi ti trigore arēa numiare cūcoro yuhure cahmaricorore naaihca. Tuhsu, yuhure cahmaeraricoro tóihca tjuarohca. ³⁶ [Ā yoa wesepu puaro dahrainna ti jichu cūirota naihca. Cūiro tó tjuarohca] —niha Jesu.

³⁷ To ā nichu to buheina sehe ō sehe ni sinituha tirore:

—Ā Nohopu ā waharohcari? —ni sinituha tina.

Ti ā nichu Jesu ō sehe ni yuhtiha:

—Yucaare mari űuna, yariariro to pjacu cjiro jichu mari noano masinahca. (Tó seheta ahri musare yu yahuyurire masa űuna noano masinahca ahri yahrapu yu tjua tahto mahanocā to dūhsachu cūhure) —niha Jesu.

18

Wapewahyoro to buhiri dahre dutia quitire yahuha Jesu

¹ Ā yoa Jesu tinare Cohamacure siniare yahuro ō sehe niha:

—Musa Cohamacure sinina, cohtaga to yuhtihtore. Yoari pja cohtapanahca cahyaena tjiga. Tirore sinina duhuena tjiga —niha Jesu.

² To ā nire buhero taro ahri quiti mehne piti dahre yahuha tinare:

—Pa macapu ti buhiri dahre dutiriro jiha. Tiro Cohamacure űo payoeraha. Ā yoa masa cāhure űo payoeraha. ³ Wapewahyoro cāhu tōpu jiha. Ticoro tiro cahapu sūroca majareno ō sehe niha: “Yuhure űu tuhtirirore buhiri dahre dutiga mūhu. Yuhure ni ducataga”, ni sinirucua ticoro tirore. ⁴ To ā nichu payu tahari tiro “Yoasi yuhu”, nimaha ticorore. To ā nipachata ticoro payu tahari ā sinirucuro tirore caribobiario yoaha. To ā caribochu, tiro ō sehe niha to basi: “Yuhu Cohamacure, masa cāhure űo payoeraja. ⁵ Yu ā űo payoerario yu jipachata ahricoro sehe yuhure caribobiara. Yuhure ā cariboro yuhure pomea wahachu yorohca ticoro. To ā ni yahūsārucuchu ticorore űu tuhtirirore

buhiri dahre dutihtja”, niha buhiri dahre dutiriro –niha Jesu.

⁶ Ā nino Jesu tinare ō sehe ni yahu namoha:

–Ā niha tiro űariro buhiri dahre dutiriro. To niri cĵirire wacūga musa. ⁷ Tiro yuħdoro Cohamacu sehe to yainare to be-seinare űamipũ cūhure, dachopũ cūhure tireore sinirucuinare yuħtiro, yoadohoro-hca. ⁸ Musare niita nija. Cohamacure ti siniriro seheta dōicāta tinare yoadohoro-hca. Ĵto Ā yuħtiro to ĵipachuta yahu masano Cohamacu warocariro ahri yah-papũ tjua tacu Cohamacure wacū tuainare bocabocari yuħũ? –niha Jesu.

Pũaro Cohamacure ti sinia quitire yahuha Jesu

⁹ Ā yoa pari turi piti dahre buhero ō sehe ni yahuha Jesu: “Sā sehe noaina ĵija. Paina sehe űano yoina ĵira”, ni tuhotuina barore Jesu ō sehe ni yahuha:

¹⁰ –Cohamacu ya wuħũpũ pũaro mũa Cohamacure sinia wahaha. Cũiro fariseo curua macariro ĵiha. Pairo puħtoa yare wapa na cohtariro ĵiha. ¹¹ Ā yoa fariseo curua macariro sehe wahcāũcu sũ, ō sehe ni yahuha Cohamacure: “Cohamacu, yuħũ paina yare mahũopea mehne nariro, űano yoariro, paina namosānumia mehne wũana tiriore ne ĵieraja. Paina yoaro sehe űariro ĵieraja. Ahriro wapa na cohtariro yoaro sehe űariro ne ĵieraja yuħũ. Ā ĵicu muħũre ‘Noana’, nija Cohamacu. ¹² Yuħũ somanaripe pũa dachore ne chũeraja, mũ yare yoacu tacu. Tuħũ ĵipihtia dohse ĵiape yũ wapataa cūhure mahano (diezmo) wa muĵaja yuħũ muħure űo payocu”, niha fariseo curua macariro Cohamacure. ¹³ Ā yoa wapa na cohtariro sehe yoa cureropũ muhri yo dũcu sũ, muanonopũre űũ muoeraha. Ā űũ muoeraro, to pēbuhui cĵaroca ō, ō sehe ni sinia Cohamacure: “Cohamacu, yuħũ űaare yoariro ĵija. Ā ĵicu muħũ pja űuga yuħure”, niha tiro Cohamacure. ¹⁴ Musare niita nija. Ahriro wapa na cohtariro sehe Cohamacu to űũchũ buhiri marieriro to ya wuħũpũ tjuaa wahaha. Wiho mejeta pairo fariseo curua macarirore “Mũ űaa buhirire cohāhi”, nieraha Cohamacu. “Yuħũ noariro waro ĵija”, ni tuhoturirore Cohamacu buoro dahrerohca. Wiho mejeta “Yuħũ űaare yoariro ĵija. Ā ĵicu tĩre tuaro cahyaja” nirirore Cohamacu wahchechũ yoarohca tiro sehere –niha Jesu.

Macanacā ya cĵihtire Cohamacure sinia payoha Jesu

(Mt 19.13-15; Mr 10.13-16)

¹⁵ Ā yoa masa ti pohinare wiħāinacāre Jesure űa payo dutia ta, to cahapũ na wi-himaha. Ti ā yoachũ űua Jesu buheina

tinacāre na wiħāinare tuhtia. ¹⁶ Ti ā tuhtichũ űũno Jesu wiħāinacāre pĵirocaha to cahapũ. Pĵiroca tuħũ ō sehe niha tiro to buheinare:

–Macanacā yũ cahapũ tajaro. “To cahai wahaena tjiga”, niena tjiga tinacāre. Tinacā Cohamacure ti puħtoro tuhotura. Puħtoro Cohamacu to suħo ĵiina ahriinacā yoaro sehe tuhotuina baro dihta ĵira. ¹⁷ Potocā niita nija masare. Ahriinacā Cohamacu ti puħtoro cĵihtore cahmana. Ti yoaro seheta musa cūhũ Cohamacu musa puħtoro cĵihtore cahmaerana, puħtoro Cohamacu to noano suħo ĵihtina ne ĵisi musa –niha Jesu.

Pache pũro Jesure sinitu űũha
(Mt 19.16-30; Mr 10.17-31)

¹⁸ To ā niri baharo judio masa puħtoa mehne macariro Jesure ō sehe ni sinitu űũha:

–ĴNe noariro, buheriro, ĵipihtia dachoripe Cohamacu mehne ĵi duacu, dohse yoaiħcari yuħũ? –niha tiro.

¹⁹ To ā nichũ Jesu ō sehe ni yuħtiha:

–Ĵ‘Noariro’, ni pisujari muħũ yuħure? Noariro sehe Cohamacu dihta ĵira. ²⁰ Ahri Cohamacu dutiare masina muħũ. “Numia mehne űano yoacu tjiga. Masare wajĵecu tjiga. Yacuacu tjiga. Mahũoa mehne pairore yahusāecu tjiga. Mũ pũcusũmare űo payoga”, ni dutira Cohamacu –niha Jesu.

²¹ To ā nichũ tiro Jesure ō sehe ni yuħtiha:

–Tĩre ĵipihtiare yũ waha wahmũa tariro ĵiiputa yuħdurũcaera tihũ yuħũ –niha tiro.

²² To ā nichũ tuħoro, Jesu tireore ō sehe ni yahuha:

–Mahanocā duħsara muħure mũ yoa pahũohto. Ĵipihtiare mũ yare duai wahaga. Ā yoacu ĵipihtia mũ wapatarĩ niħerure pĵacuoinare waga. Mũ ā yoachũ pĵiro mũ wapataa muanonopũ, Cohamacu cahapũ ĵiyuahca. Mũ ā yoiri baharo yuħũ mehne macariro cĵihtu taga –niha Jesu tireore.

²³ To ā nichũ tuħoro tiro sehe payũ pache cĵuariro ĵiro tĩre pĵacuoinare wa dueraro, tuaro cahya, wahaa wahaha. ²⁴ To ā cahyachũ űũno Jesu ō sehe ni yahuha painare:

–Pache pũa Cohamacu masare puħtoro to noano suħo ĵiropũre ti wahachũ basioerara curera. ²⁵ Camello sehe awicā copacāre to sāa nuhri wijaa duachũ basioerara. To ā ĵiro yuħdoro pache pũro puħtoro Cohamacu noano to suħo ĵiropũre to waha duachũ nu mijobiara –niha Jesu.

²⁶ To ā nichũ tireore tuħoina ō sehe niha:

–Cue, mũ nino seheta potocā ĵichũ, ne cũiro masano Cohamacu cahapũ waha masieraboca –niha tina Jesure.

²⁷ Ti ā nichũ Jesu ō sehe ni yuħtiha:

–Masa ti basi ti mũ sũro yuħdu masierara. Wiho mejeta Cohamacu sehe masare pichacapũ wahaborinare yuħdo masina. Tiro

jipihtiare noano yoa masi pahñoriro jira – niha Jesu tinare.

²⁸ To ã nichu Pedro tireo ð sehe niha:

–Tuhosiniga. Sã sehe jipihtia sã yare cūnoca tii mūhu mehne wahana –niha tiro Jesure.

²⁹ To ã nichu Jesu ð sehe niha:

–Potocã musare niita nija. Mūsa Cohamacu yare yoana tana mūsa wūhūserē, mūsa namosānumiare, mūsa bahanare, mūsa pūcūsumare, mūsa pohnare cūnocarina jina, pjiro wapatanahca mūsa mipure. ³⁰ Mūsa cūriro yūhoro wapatanahca. Ā jina mūsa yariari baharo jipihtia dachoripe Cohamacu mehne jirucunahca mūsa –niha Jesu tinare.

*Pari turi Jesu to variahtore, to masa wi-
jaahore yahuha*

(Mt 20.17-19; Mr 10.32-34)

³¹ Ā yoa Jesu doce to buheinare ti sahsero naaha. Ā naano tinare ð sehe ni yahuha:

–Tuhoga yūhare. Mipure mari Jerusalēru wahana nija. Tōru yūhare masūnore Cohamacu warocaritore Cohamacu yare yahu mūhtaina cjiri panoru ti yahuriro cjiro seheta paina ã yoaahca yūhare. ³² Tōru masa yūhare ñahaa, judio masa jieraina sehene waahca yūhare. Yūhare ti wari baharo tina yūhare bujipe, ñano ni, yūhare chahcho pūti sihōahca. ³³ Tuhsu, yuta dari mehne tjana tuhsu wajāahca yūhare. Ti ã wajāri baharo tia dacho wahaboroi masa wijaaihca yūhu –niha Jesu tinare.

³⁴ To ã nichu to buheina to yahuare noano tuho ñahaeraha. Cohamacu tīre tinare noano tuho ñahachu yoerasiniha.

*Capari ñueraritore ñuchū yoaha Jesu
(Mt 20.29-34; Mr 10.46-52)*

³⁵ Ā yoa Jesu cāhu Jericó wama tiri maca cahacāru sūha. Tóji capari ñuerariro maha dūhtu cahai duji, niñere sinino niha. ³⁶ Ā jiro masa payu to cahai ti yūhdūachu tuhoro tiro sinituha tinare:

–¿Dohse yoaa payu masa yūhdūjari? –ni sinituha tiro.

³⁷ –Jesu Nazare macariro waharo nina – ni yahuha paina tireo.

³⁸ Ti ã ni yahuchū tuhoro tiro ð sehe ni sañurucuha:

–Jesu, Davi cjiro panamino masare yūhdohtiro, yūhare pja ñuga –ni sañurucuha Jesure.

³⁹ To ã nichu to pano waha mūhtaina sehe, “Dihta mariahga”, ni tuhtiha tireo. Ti ã ni tuhtipachūta tó pano to sañurucuriro yūhdo curero sañurucu namoha tjao:

–Davi cjiro panamino masare yūhdohtiro, yūhare pja ñuga –ni sañurucuha tiro.

⁴⁰ To ã ni sañurucuchū tuhoro, Jesu sehe tjuaracu sū, “Pjirocaga tireo”, niha. To ã nichu tina sehe capari ñueraritore pji wahcāha. Ti ã pji wahcāchu tiro Jesu cahapu to sūchu Jesu sehe tireo ð sehe ni sinituha:

⁴¹ –¿Dohse yū yoachū cahmajari mūhu? – niha Jesu tireo.

–Yū pūhtoro, yūhare ñuchū yoaga –ni yūhtiha capari ñuerariro.

⁴² –Ñuga. Yūhare wacū tuacu, noariro wahara mūhu –niha Jesu tireo.

⁴³ To ã nichūta capari ñuerariro ñua wahaha. Ā noariro waharo, tiro Jesu mehne waha, “Cohamacu tuariro jira”, niha tiro. Ā jia masa payu capari ñuerariro to ñuchū ñua “Cohamacu noariro, tuariro jira”, niha tina cāhu.

19

Zaqueo Jesure piti bocaha

¹ Ā yoa Jesu Jericóru sū, tí macapu yūhdū wahcāno taro niha. ² Pache pūro Zaqueo wama tiriro pūhtoa ya cjihtire wapa na cohtaina pūhtoro tóji jiha. ³ Ā jiro tiro Jesure “¿Diro baro jcari?” ni ñu masino taro Jesure ñu duamaha. Ā to ñu duapachūta yahparirocā to jichū masa payu tirocāre dūcataha. ⁴ Ā jiro tiro masare mūroca yūhdūa waha, sicómoro wama tidū yucūcūru mujaha Jesure ñuno taro. Baharo curero tū cahai Jesu yūhdūaro taro niha. Ā jiro Zaqueo tūi cohtaro niha. ⁵ To ã cohta pisaro watōi Jesu sehe tū dahpotoi sūhca, Zaqueo ñuroca mūo, tireo ð sehe ni yahuha:

–Zaqueo mipure mū wūhūi tjuasinihtja yūhu. Ā jicu cjero duji taga –niha Jesu tireo.

⁶ To ã nichū Zaqueo sehe soaro mehne duji ta, tuaro wahchea mehne to wūhūru pji wahcāha Jesure. ⁷ To ã ni piti bocachū ñua, jipihtina masa ti basi ð sehe ni durucuha:

–Ahiro Jesu ñaare yoariro ya wūhūru tinino waha duara –ni durucuha jipihtina ti basi.

⁸ Zaqueo sehe piti boca tuhsū tóji ducu, Jesure ð sehe ni yahuha:

–Pūhtoro tuhoga yūhare. Jipihtia yū yare dacho macai pjacūoinare waihtja. Ā jicu yūhu paioire cien niñeru tūrire mahño mariro jicu, cuatro cientos niñeru tūrire wapa bui payoihtja tireo –niha Zaqueo Jesure.

⁹ To ã nichū Jesu sehe ð sehe ni yahuha tireo:

–Michare mūhare mū wūhūi jiina cūhare pichacapu wahaborinare Cohamacu yūhdo tuhsūra. Mūhu cūhu Abrahā cjiro coyeyro jira. ¹⁰ Yūhu masūno Cohamacu warocariro pichacapu wahaborinare macai tai nii. Tōru wahaborinare noano yūhdoi tai nii –niha Jesu Zaqueo.

*Niñeru tãri uru tãri quitire yahuha Jesu
(Mt 25.14-30)*

¹¹ Æ yoa tire tũhoinare Jesu paye quiti mehne piti dahre yahuha. Mahanocã dahsaha Jerusalẽpu to suhtu. Æ jia tire tũhoina õ sehe ni tuhotuha: “Pũtoro Cochamacã mipũre saho ji dacaro taro nina”, ni tuhotuha tina. ¹² Ti Æ ni tuhotuchũ Jesu õ sehe ni yahuha tinare:

—Cãiro pũtoro sãahitiro to ya yahpa macaina bui pũtoro jĩtiro yoaopũ waharo taro niha. Tõpũre to suchũ ñano ti bui pũtoro tire pũtoro sõno taro niha. Pũtoro sãahitiro ya macã macaina bui pũtoro sõno taro niha tire. Baharo to ya wũhũpũ tju wihiro taro niha. ¹³ Wahmanore to wahaito pano pũtoro diez dahra cohtainare pjirocã. Æ pjirocãro, tiro tinare cãinare tũpe tũri niñeru tũri wapa bujũã tũri uru tũrire waha. Wa tuhsũ, õ sehe ni yahuha tinare: “Yũhũ yũ mariachũ ahri niñeru mehne mũsa wapata namohtire macaga”, niha tiro dahra cohtainare. ¹⁴ Pũtoro sãahitiro to jipachũta to ya macã macainata tire cahmaeraha. Æ cahmaeraa, ti waroachũtinare tire pũtoro sõhtĩrore yahu dutia warocaha. “Ahriro sã pũtoro jichũ cahmaeraja sã”, niha tina ti yahu duti warocaina sehe. ¹⁵ Æ ti cahmaerapachũta baharo ti pũtoro sãaha tiro. Æ pũtoro sãã tuhsũro tiro to wũhũpũ tjuã taha. Æ tju wihiro tiro dahra cohtainare to niñeru mehne ti wapata namore masino taro, tinare pjirocã. ¹⁶ To pjirocãro baharo, wihĩ muhtãrĩro tire yahuha: “Pũtoro mũ niñeru tũ, yũhũre mũ wari tũ mehne diez tũri wapata namohi yũhũ”, niha dahra cohtarĩro to pũtorore. ¹⁷ “Noano yoiri jire mũhũ. Mũhũ noarĩro dahra cohtarĩro jira. Mũhũ mahanoã mehne yũ dutĩro seheta yoa pahũorĩro jicũ mipũ diez macari macaina ti pũtoro cjĩhto wahaĩhca mũhũ”, niha pũtoro dahra cohtarĩrore. ¹⁸ To baharo wihĩro tiro mehne macarĩro õ sehe niha: “Pũtoro, mũ niñeru tũ, yũhũre mũ wari tũ mehne cinco tũri wapata namohi yũhũ cãhũ”, ni yahuha to pũtorore. ¹⁹ “Cinco macari macaina pũtoro cjĩhto wahaĩhca mũhũ”, niha pũtoro tire. ²⁰ To Æ niri baharo paio dahra cohtarĩro wihĩ, õ sehe ni yahuha: “Pũtoro, mũ niñeru tũ õi jira. Suhtiro cahsaro mehne coma, ti tũre wihbohi. ²¹ Mũhũ tuaro dahra dutĩro jira. Paina yare mana mũhũ. Tuhsũ, tuaro dahra dutĩro jicũ dahraerãrĩro jipacũta mũhũ paina ya dahrãri wapare nana. Æ yoa toaerãrĩro jipãihũta dichare narĩro jira mũhũ. Æ jicũ mũhũre cui nihi”, niha to pũtorore “Wapataerãhĩ yũhũ”, ni yahuro. ²² “Mũhũ Æ nicũ ñano yoirĩro jira mũhũ. Yũhũre mũ Æ niri buhĩri mũhũre buhĩri

dahreĩtja yũhũ. Yũhũ mũhũre tuaro dahra dutĩro yũ jichũ masina mũhũ. Paina yare yũ nachũ toaerãrĩro jipãĩ dichare narĩro yũ jichũ masina mũhũ. ²³ Yũ Æ jĩrĩro jichũ ñũpacũta ya tũre niñeru wihborĩ wũhũpũ cũerare mũhũ. Tĩre ti wasorĩ wapa wapata namoboa mũhũ. ¿Dohseacũ Æ yoaerãri mũhũ? Tĩre mũ yoaichũ tju wihicũ wapata namoboa yũhũ”, niha ti pũtoro. ²⁴ Æ ni tuhsũ tiro cahã ducũinare dutiã: “Niñeru tũre maga tire. Diez tũrĩre cjuarĩrore waga”, niha pũtoro. ²⁵ To Æ nichũ tina sehe õ sehe ni yahuha tire: “Pũtoro, diez tũri cjuarĩro payũ cjuã tuhsũã”, niha tina. ²⁶ Ti Æ nichũ pũtoro õ sehe ni yũhtihã: “Mũsare niita nija. Jipĩhtina cjuãĩnare wa namoĩhtja. Cjuãerãrĩro sehẽre mahanoã to cjuapachũta tĩre mãĩhtja. ²⁷ Mĩpũ pĩnihta yũhũre ñũ tuhtĩĩnare yũhũre ti pũtoro jĩ dutĩerãĩnare yũ cahã na tahga. Æ yoaã yũ ñũrocaroĩ wajãga tinare”, niha pũtoro dahra cohtainare —ni buheha Jesu.

Jerusalẽpu suha Jesu

(Mt 21.1-11; Mr 11.1-11; Jn 12.12-19)

²⁸ Æ ni tuhsũ Jesu paina pano Jerusalẽpu wahaha. ²⁹ Æ yoa tina Jerusalẽpu ti suhtu panocã tãcũ Olivo wama tidũ dahũã cahã jiri macã Betfagẽ wama tiri macã cahã, Æ jichũ Betania wama tiri macã cahã sũ muhtaha. Ti macari pũã macã cahã Jesu sũro, to buheina pũarore warocaro taro, õ sehe ni yahu quihõha:

³⁰ —Sĩ macapũ burrocãre nana wahaga. Tõpũ suna, burrocãre ti dahũ daporĩrocãre boca sanahca. Tiro ne cãiro ti pisamahnoerãrĩrocã jica. Tirocãre bocana, yuta dare pjã, na tabasaga yũhũre. ³¹ Tirocãre mũsa pjãchũ ñũno, cãiro dohse jĩrĩro: “¿Dohse yoana tana burrocãre dahũte daporĩ dare pjãjari mũsa?” to nichũ tũhona õ sehe ni yũhtiga tire: “Mari pũtoro burrocãre cahmarocasinire”, ni yahuga tire —ni yahu duti warocaha to buheina pũarore.

³² To Æ nichũ tina pũaro sehe to nirĩropũ suha. Ti Æ suchũ jipĩhtia Jesu to nirĩro seheta wahaha. ³³ Æ jia tina tirocãre ti pjãchũ ñũã tirocã pũã tinare õ sehe ni sinituha:

—¿Dohse yoana tana burrocãre dahũte daporĩ dare pjãjari mũsa? —ni sinituha tina.

³⁴ —Mari pũtoro burrocãre cahmarocasinire —ni yũhtihã tina.

³⁵ Æ ni yahu tuhsũ tirocãre Jesu cahapũ na suha. Na sũ tuhsũ ti bui sãã suhtĩre tirocã bui pjũpaha payo tuhsũchũ ñũ, Jesu sehe tirocã bui to mũja pjachũ yoadohõha tina. ³⁶ Jesu tirocã bui to pisachũ to wahahto pano masa ti bui sãã suhtĩre tjuwe na, to wahahti mahã saõõ cũ muhtaha, Jesure ño payoa. ³⁷ Tina Jerusalẽ cahacãpũ sũ, Olivo wama tidũã dujiãri mahãpũ suha.

TóꝑꝢ Jesu to buhechꝢ tuhoina payꝢ jipihtia CohamacꝢ tuaa mehne to yoa ñorire, noaa to yoarire ti ñiri cjiŕire wacꝢa, CohamacꝢe “Noariro, tuariro jira”, ni sañurucuha. Á yoa CohamacꝢe ño payoꝢ, õ sehe ni sañurucuha:

³⁸—Ahriro CohamacꝢ to warocariro, mari puhtoro noano jijaro. MꝢano macariro CohamacꝢ, mꝢhꝢ tuariro waro jira —ni ño payoha tina.

³⁹Ti á nichꝢ tuhoa fariseo curua macaina mahainacá ti watoi jiina Jesure õ sehe ni yahuha:

—Buheriro, mꝢ buheinare dihta mariea dutiga —niha tina.

⁴⁰—Musare niita nija. Tina ti sañurucuerachꝢ tãa peri sehe sañurucuboa —niha Jesu fariseo curua macainare.

⁴¹Á ni tuhsꝢ Jesu Jerusalē cahacãꝑꝢ su, ti macare ñurocaro, tiha. ⁴²Õ sehe niha tiro:

—Jerusalē macaina mipꝢ pinihtare musare pichacãꝑꝢ wahaborinare CohamacꝢ to yũdhohtore mꝢsa masichꝢ noa yũdũaboa. Á jipachũta mipũre mꝢsa tíre ne tuho duaerare. Á jiro CohamacꝢ tíre musare masi dutierare. ⁴³Musare ñũ tuhtiina mꝢsa jiri macare soroahca. Á yoaa musare tina wijaaro wasi. ⁴⁴Ti pjata tina mꝢsa ya macare cohã pahñoahca. MꝢsa cãhũre wajãahca. Musare ñũ tuhtiina noano cohã pahñoahca mꝢsa ya macare. CohamacꝢ pichacãꝑꝢ wahaborinare musare to yũdhohtore mꝢsa masi duaerare. MꝢsa masi duaerari buhiri musare ñũ tuhtiinare CohamacꝢ musare cohã dutirohca —niha Jesu Jerusalē macainare.

*CohamacꝢ wũhũꝑꝢ Jesu suha
(Mt 21.12-17; Mr 11.15-19; Jn 2.13-22)*

⁴⁵Á yoa JerusalēꝑꝢ sũro, Jesu CohamacꝢ wũhũꝑꝢ sãa wahaha. Á yoaero pache duainare ti wũhũꝑꝢ jiinare boca sũro, tinare cohã wionocaha. ⁴⁶Õ sehe niha tiro tinare:

—Õ sehe nina CohamacꝢ yare ti joari pũi: “Yũ wũhũ CohamacꝢ mehne durucuri wũhũ wama tirohca”, niha to yare ti joari pũi. To á nipachũta mꝢsa sehe ahri wũhũ duana, mꝢsa basi cahma yacara mꝢsa —niha Jesu.

⁴⁷Á yoa dachoripe CohamacꝢ wũhũꝑꝢ Jesu buheha. Á jia sacerdotea puhtoa, judio masare buheina, masa puhtoa cãhũ tirore ti wajãhti cjihtire wacũ macaha. ⁴⁸Masa jipihtina tirore á tuhorucua, to buheare noano tuho ñũũina jiha. Ti á noano tuho ñũũichꝢ ñua, Jesure wajã duaina sehe tirore ti wajãhtire bocaerasiniha.

20

*Sacerdotea puhtoa, judio masare buheina, bũcũna mehne Jesure sinitu ñũha
(Mt 21.23-27; Mr 11.27-33)*

¹Pa dachoi CohamacꝢ wũhũi Jesu masare noaa buheare buhero niha. To á buhechũ sacerdotea puhtoa, judio masare buheina, bũcũna mehne tiro cahãꝑꝢ wihia, tirore õ sehe ni sinitu ñũha:

²—Yahuga sãre. ¿Dohseacũ canũre á yoari mꝢhũ? ¿Noa mꝢhũre tíre á yoa dutiri? —niha tina Jesure.

³Ti á nichꝢ Jesu õ sehe ni yũhtiha tinare: —MꝢsa sehere sinitu muhtaihtja. Yahuga yũhũre. ⁴¿Joãno masare to bautisachꝢ diro baro sehe tirore bautisa dutia tiari, mꝢsa tuhotuchũ? ¿O CohamacꝢ dutiera tiari? ¿O masa sehe dutia tiari, mꝢsa tuhotuchũ? —ni sinituha Jesu tinare.

⁵To á nichꝢ tina sehe ti basi õ sehe niha:

—¿Dohse ni yũtinahcari mari? “CohamacꝢ Joãore dutia tiri jire”, mari nichꝢ, “¿Dohseana CohamacꝢ Joãore to dutipachũta tirore tuho duaerari mꝢsa?” niboca Jesu marine. Á jina “CohamacꝢ Joãore dutia tiri jire”, ni yũhti masieraja mari. ⁶Ahrina masa sehe “Potocãta Joãno CohamacꝢ yare yahu muhtariro jira”, ni tuhotura tina. Á ni tuhotua “Joãno to bautisachꝢ CohamacꝢ tirore dutierari jire”, mari nichꝢ tuhoa marine tãa mehne docaboca masa. Á jina ti cãhũre yahu masieraja mari —ni durucuha tina ti basi.

⁷Á ni durucu tuhsua tina Jesure õ sehe ni yũhtiha:

—Joãore bautisa dutirirore sã masieraja —niha tina.

⁸Ti á nichꝢ Jesu õ sehe ni yũhtiha:

—Ti pja pinihta yũhũ cãhũ mꝢsa sinitu muhtarire yahueraja musare. Ahrire yũ yoarire dutirirore yahueraja musare —niha tiro tinare.

*Ñaina dahra cohtaina quitire yahuha Jesu
(Mt 21.33-44; Mr 12.1-11)*

⁹Á yoa Jesu to tuhotua mehne piti dahre õ sehe ni buhe dacaha masare:

—Wese pũro se dari cjihtire toaha. Toa tuhsꝢ, ti wesere painare cã buhusehe coa pahma cũha. Pahma cũno ti wesere tinare ñũ wihbo dutiha. Á duti tuhsꝢ pa yahpãꝑꝢ waha, yoari pja bajueraha. ¹⁰TuhsꝢ, se ñiri pja jichꝢ wese pũro to cahamacũnore wesere ñũ wihboina cahãꝑꝢ warocaha. Wese macaa to toaa dichare to ya coa macaare na dutiro warocamaha. Á jia ñũ wihboina sehe to cahamacũnore wiho piti boca cãnocaha tirore. Á cãnocaa, tina tirore dichare waerapahta tjuaa dutiha tirore. ¹¹Á jiro wese pũro paio to cahamacũnore ti wese macaa toaa dichare na dutiro warocamaha tjoa. Á jia wesere ñũ wihboina tiro cãhũre cjã, ñano yoaha. Á yoa tuhsꝢ tirore ti dichare waerapahta tjuaa dutiha tirore. ¹²Tirore ti á yoari baharo wese pũro

païro cahamacuore warocamaha tjoa. To ã warocachu ñua, wesere ñu wihboina sehe tiro cãhure camí dahre, tí wese dãhtu cahai cohãnocaha tirore.

¹³ “Tí ã yoari baharo wese pãro ò sehe ni tuhutumaha: “¿Dohse yoaihcarí yũhu? Ò sehe yoaihtja. Yũhu yũ macũre ya cahũrĩrore warocaihtja. Tina tirore ño payoboca”, ni tuhutumaha wese pãro sehe. ¹⁴ Æ jia to macũno to warocarĩrore to suchũ ñua ñu wihboina sehe tí basi ò sehe ni durucuha: “Ahrĩro wese pãro macũno jira. Baharo ahri wesere cãhãhtiro jira. Tirore wajãjihna. Mari ã yoachu ahri wese mari ya wese tjuarohca”, nimaha tina tí basi. ¹⁵ Æ ni tuhsua wese pãro macũno wese dãhtu cahai cohã, wajãnocaha tirore. ¿Tí ã yoachu ñuno dohse yoarohcarĩ wese pãro wesere ñu wihboinare? –niha Jesu.

¹⁶ –Tiro wesere ñu wihboinare wajãno taro, paina sehere wesere ñu wihbo dutirohca –ni yũhtĩha Jesu to basi.

To ã nichũ tuhõa masa sehe ò sehe niha:

–Marine ã wahaero tjijaro –niha tina.

¹⁷ Tí ã nichũ Jesu sehe tinare ò sehe ni sinituha:

–¿Cohamacũ yare tí joari pũre ò sehe ni durucua, dohse nino nijari, masa tuhõtuchũ?:

“Ahrĩro Cristo tãca yoaro seheta jira. Tãcare wãhũ dahreina tí cohãno seheta masa tirore cohãhca.

Tí ã yoapachũta mipũre wãhũ dahreina wãhũre yoaa tí cũ mũhtari tãcare tí cũno seheta Cohamacũ tirore puhto sõhre”;

ni joaha. ¹⁸ Jipihtina tia tãca bui bora pjainare payũ dihicã peri yihsorohca tia tãca. Tuhsũ, tia tãca masũno bui bora pjaro, tahãnocanohca tirore. Æ tahãno to pjacu cjirore daa manaricã wahachu yoarohca. (Tõ seheta yũhũre cahmaeraina, yũ buhiri dahrehtina ñano yũhdwãhca) –niha Jesu.

*Pũhõa ya wapare paina sinituha Jesure
(Mt 21.45-46; 22.15-22; Mr 12.13-17)*

¹⁹ To ã nichũ tuhõa judio masare buheina sacerdotea puhtoã cãhũ, “Jesu wesere ñu wihboina quiti mehne marine tuhtiro nina”, ni tuhõtũha tina. Æ ni tuhõta tina Jesure ñaha duamaha. Æ ñaha duapahta tina masare cui niha. ²⁰ Æ cuia, Jesure tí ñahahtĩ pjare cohtasiniha tina. Æ jia tina quihõno yoaina yoaro sehe jí mahõo dutĩha painare. To ñano ni yũhtichũ yoã duaã nimaha tirore yahusã duaã. Æ jia Jesure sinitu dutia warocaha mahõoinare. Jesu ñano to ni durucuchũ tuhõa tí yahpa macaina bui puhtoro peresu yoã dutia taa nimaha. ²¹ Æ jia tina Jesure mahõo cũ ò sehe ni sinitu ñumaha:

–Buheriro, potocã durucũro, mahõoa marieriro mũ jichũ sã masija. Æ jicu wĩho jĩnare, puhtoã cãhũre cãno potori yoara mũhũ. Mũhũ Cohamacũ yare potocã mũ buhechũ cãhũre sã masija. ²² Yahuga sãre. ¿Ne, Roma macarĩrore jipihtina bui puhtoro gobierno macaãre marine waparo cahmajari, mũ tuhõtuchũ? ¿Mari dutia wapa dutijari, mũ tuhõtuchũ? –ni sinituha tina Jesure.

²³ Tí ã nichũ tuhõro Jesu tí ñano yoã duaãre masino, tinare ò sehe ni yũhtĩha:

²⁴ –Mipũre niñeru tũre na tahga. Tí tũre ñũjihna –niha.

Tí tũre tí na wihichũ ñuno ò sehe niha Jesu:

–¿Diro baro masũ wahãjari ahri tũre? ¿Diro baro wama wahãjari? –niha Jesu tinare.

–César, masa bui puhtoro jiriro ya masũ, to wama cãhũ wahãna –ni yũhtĩha tina.

²⁵ Tí ã nichũ Jesu ò sehe ni yãhuha:

–Tí pja pinihta masa bui puhtoro yare tiro sehere waga. Cohamacũ yare Cohamacũ sehere waga –niha Jesu tinare.

²⁶ Æ to noano yũhtichũ, masa tí ñurocaroi Jesure ñano ni durucuchũ yoã masieraha tina. Æ jia Jesu yũhtĩha tuhõa, tina cãaa waha, dihta marieã wahaha.

*Saduceo curua macaina Cohamacũ to masoare sinituha Jesure
(Mt 22.23-33; Mr 12.18-27)*

²⁷ Æ yoã mahainacã saduceo curua macaina Jesu cahapũ wihĩha. “Cohamacũ yariainare masosi”, ni tuhõtũina jĩa saduceo curua macaina. Æ jia tina ò sehe niha tirore:

²⁸ –Buheriro, ò sehe ni buhea tiha Moise cjiro: “Cãiro to wahmino namo tĩro pohna mariaparota to yariachũ ñano to bahũrore to wahmino namono cjirore nũoano cahmana. Æ yoaro to wahmino mũnãno to pohna tiboro seheta pohna tiro cahmana to bahũrore. Æ jia to pohna to wahmino mũnãno pohna yoaro sehe jiahca”, ni joã tiha Moise cjiro –niha tina.

²⁹ Tĩre ni tuhsũ ahri quitiũre yahu namõha tjoã Jesure:

–Cãiro masũno jĩa. Seis to bahana jĩa. Tĩ wahmino sehe namo tí, pohna marieriro yariaã wahaha. ³⁰ Æ jiro paio to bahũro cãhũ to wahmino namono cjirore nũoaha. To ã nũoari baharo to wahmino yoaro seheta pohna mariaparota tiro cãhũ yariaã wahaha. ³¹ Æ jiro ahriro bahũro cãhũ to wahmino mũnãno yoaro seheta pohna mariaparota yariaã wahaha. Æ dihta wahaha cãiro pohna waro. Ne pohna maria-pahta yariaã pihtia wahaha. ³² Tĩ namono cjiro cãhũ tí baharota yariaã wahaha. ³³ ¿Ne Cohamacũ jipihtinare yariaina cjirore to

masochu diro namono sehe jibocari ticoro pototi? Tina jipihtina ticorore namo tirina cjiro jiha. ¿Á jiro diro baro namono jirohcari? —ni sinituha tina.

³⁴Ti á nichu Jesu ó sehe ni yuhtiha:

—Mipú macaina wamomaca duhtera. ³⁵Ti á duhtepachuta paina sehe pa turu macaina sehe á jierara. Paina muare, numia cáhure to yainare Cohamacu ñaa marieina jichu yorohca. Tina ti yariari baharo masa mujaahca. Á yoa tina tópu wamomaca duhterara. ³⁶Á jia tina anjoa yoaro seheta ne yariasi. Tina Cohamacu to masorina jia, Cohamacu pohna jira. ³⁷Mipure yariarina cjiro ti masa wijaahto sehere musare yahuihtja. Tíre Moise cjiro noano yahu pahña tiha. To mahaducá júri quitire ó sehe ni yahua tiha tiro: “Yuhú Abrahamá, Isaa, Jacobo ti puhtoro tjija”, ni yahure Cohamacu yuhure”, ni joaa tiha Moise cjiro. ³⁸Ti yariari baharo “Ti puhtoro tjija”, ni yahua tiha Cohamacu. Á niparota yariarina cjiro puhtoro jierara Cohamacu. “Ti puhtoro tjija”, to nia mehne catiina ti jichu masija mari. Tiro catiina puhtoro jira. Jipihtina masa catira Cohamacu to ñuchu —niha Jesu tinare.

³⁹⁻⁴⁰To á nichu tina sehe pari turi Jesure sinitu duaeraha. Á jia mahainacá judio masare buheina ó sehe niha:

—Buheriro, muhu noano yuhtihre —niha tina Jesure.

*¿Diro baro coyeyro jijari Cristo?
(Mt 22.41-46; Mr 12.35-37)*

⁴¹Baharo Jesu ó sehe ni yahuha tinare:

—“Cristo Davi cjiro panamino jirohca”, ni buhera paina. ¿Dohse yoa tina á ni buhejari?

⁴²Davi cjiro to basi Salmopu to joari tjupu ó sehe ni joaa tiha:

“Cohamacu yu puhtorore ó sehe nire: ‘Ói yu potó buhusehei dujiga.

⁴³Á jicu mahure ñu tuhtinane mahure yuhdurucabasaishca yuhu’, nire Cohamacu yu puhtorore”,

ni joaa tiha Davi cjiro. ⁴⁴Á ni joaro Davi cjiro puhtoro tiha Cristore. Davi cjiro Cristo ñuchano cjiro jiparota Cristore puhtoro tiha. ¿Davi cjiro Cristo ñuchano cjiro jiparota dohse jiro baro tiro puhtoro tiari Cristore? —ni yahuha Jesu. (Cristo sehe Davi cjiro puhtoro jira.)

Judio masare buheina ti ñaa yoaare yahuha Jesu

(Mt 23.1-36; Mr 12.38-40; Lc 11.37-54)

⁴⁵Masa payu Jesure ti tuhoro watoi Jesu sehe to buheinare ó sehe ni yahuha:

⁴⁶—Mari judio masare buheina ti ñaa yoaare ñuna noano wacú masiga. Á jina ti yoaro sehe yoaena tjiga. Tina yoaa suhti saa, masa ti ñurocaroi majarea, pache

duaropu paina puhtoare noano ño payo ti sinino sehe ti piti bocasinichu cahmana tina. Á cahmana jia, tina mari judio masa buhea wuhusei noaa dujia dihtare bese duji duara. Tuhsu, bese numu jichu tó cáhure noaa dujia dihtare cahmana. ⁴⁷Tina wapewahya numia ya wuhusere ti ya cáhure mana tí numiare. Á yoaina jia, tina masa ti ñurocaroi yoari pja Cohamacure sinimana masare ñu dutia. Ti á yoachu tinare Cohamacu pjíro buhiri dahrerohca —niha Jesu tinare.

21

Wapewahyoro Cohamacu wuhui to warire yahuha Jesu

(Mr 12.41-44)

¹Á ni yahu tuhsu niñeru wiñbori caroi pache pua ti niñerure ti duhu sáachu ñu dujiro niha Jesu. Tí niñeru Cohamacu wuhure ti cahnochú ti wapahti jiha. ²Á ñuno wapewahyoro pjacuricoro to pua tucäre to duhu sáachu cáhure ñuha. ³Tíre ñu tuhsu ó sehe ni yahuha:

—Potocá niita nija musare. Ahricoro wapewahyoro pjacuricoro sehe niñeru wiñbori caropu duhu sáano paina jipihtina ti wari yuhdoro wahre ticoro sehe. ⁴Paina pache pua pjíro ti wapachuta ti ya pjíro duhsara. Ahricoro sehe pjacuricoro jiparota jipihtia to chuhtire to nuchuboacäre wa pahñohe —ni yahuha Jesu.

“Cohamacu wuhu cohári wuhu jirohca”, niha Jesu

(Mt 24.1-2; Mr 13.1-2)

⁵Á yoa paina Cohamacu wuhure ó sehe ni ñua niha:

—Noaa taa mehne yoari wuhu, noacari wuhu jijari. Masa Cohamacu ya wuhu cjihtire ti wari cjiro cáhu ti wuhupure noaca cúri jira —ni durucua niha.

Ti á nichu Jesu ó sehe ni yahuha tinare:

⁶—Ahri jipihtia mari ñuri cjiro wuhuse, ahri taa cáhu cohó pihtia wahaahca. Ne cária taca tjuasi —niha Jesu tinare.

Pihtiri dacho cjihtore yahuha Jesu

(Mt 24.3-28; Mr 13.3-23)

⁷To á nichu tuhoo tina sehe ó sehe ni sinituha tirore:

—Buheriro, ¿dohse jichu mu niro sehe waharo á waharohcari? ¿Pihtiri dacho panocá jichu dohse to waha ducachu ñnahcari sá? —ni sinituha tina Jesure.

⁸Jesu ó sehe ni yuhtiha tinare:

—Noano yoaga masa. Á jina musare paina ti mahñoare tuhoena tjiga. Payu masa “Cristo jija yuhu”, niina taahca. Á nia, “Mipure pihtiri dacho cjihto mahancá duhsara”, niaha. Ti á nichu tinare tuhoena tjiga. ⁹Á yoa paina “Cahma wajáa nina”,

mūsare niahca. “Mipure puhtoare masa cohāa nina”, niahca. Mūsa tīre tuhona cuiena tjiga. Pihtiri dacho pano ō sehe waha muhtanoahca. To ā wahachu pihtiri dacho cjihto dūhsasininohca mini —niha Jesu.

¹⁰ Ā ni tuhsu ō sehe ni yahu namoha:

—Cū yahpa macaina pa yahpa macaina mehne cahma wajāahca. ¹¹ Tuhsu, tuaro yahpa űuhmi, masa payu jūca mehne yaria, jipihtiro macaina dohatiahca. Ā yoa muano macaa bajuamehneare masa űua, űu cūaa wahaahca.

¹² Ahri jipihtia ti ā wahahto pano, paina mūsare űaha, űano yoaahca. Tuhsu, mari judio masa buhea wūhusei tina mūsare yahusā, peresu yoaahca mūsare. Ti ā yoachu yahpari macaina puhto panoi, macari macaina puhto panoi ducunahca masa ti yahusāhtina. Yu yaina mūsa jiri buhiri ā yoaahca. ¹³ Ti ā yahusāchu mūsa sehe noaa buheare tinare yahunahca. ¹⁴ Tī pjare mūsare ti yahusāchu puhtoro mūsa yuhtitore “Yahu masieraboca”, ni tuhoutuena tjiga mūsa. ¹⁵ Yuhu mūsare yahubasaitja. Mūsare ā yoadohocu tuho masiare, noaa durucua cūhare mūsare yahuchu yoahtja. Mūsa ā yoachu mūsare űu tuhtiina sehe mūsa durucua tuho, “Tī potocā jierara”, ni yuhti masisi. ¹⁶ Tī pjare mūsa pūcusuma, mūsa bahana, mūsa coyea, mūsa mehne macaina cūhu mūsare űu tuhtiinare waha mūsare yu yaina mūsa jiri buhiri. Ti ā yoachu mūsare űu tuhtiina mūsa mehne macainare painare wajāahca. ¹⁷ Ā yoa yu yaina mūsa jichu űua, jipihtina mūsare űu tuhtiahca. ¹⁸ Mūsare ā űu tuhtipahta ne mahanocā mūsare űano yoasi. ¹⁹ Ā jina Cohamacu wacū tuaina jiga mūsa. Mūsa ā yoana, Cohamacu mehne ā jirucunahca.

²⁰ Ā yoa payu surara Jerusalēpu ti soroachu űua, Jerusalēne ti cohāto to mahanocā dūhsachu masinahca mūsa. ²¹ Ti ā yoachu űua Judea yahpai jiina tūyucu cahapu mūroca duhtijaro. Ā yoa Jerusalēi jiina wahajaro. Ā yoa campoi jiina Jerusalēpu wahaeta tjjaro ti waha bahraűohto sehe. ²² Tī dachorihi buhiri dahrea dachorihi jipihtia Cohamacu yare ti joari pū to niriro cjiro seheta ā waharohca. ²³ Jipihtiropu ahri yahpai űano yuhduahca. To ā wahachu, nihi wahcōa numia, ti pohnare pūina numia cūhu pjacurogo wahaahca. ²⁴ Paina ahri maca Jerusalē macaina mehne cahma wajāahca. Ā cahma wajāa, paina ahri maca macainare jipihtia yahparipu na wahcā, peresu yoaahca. Ā jia judio masa jieraina Jerusalēne űano yoa, tinare yuhducaahca. Judio masa jieraina ya dacho to pihtichapu Jerusalē macainare űano yoa duhuahca —ni yahuha Jesu.

Jesu yahpapu to tjua tahtore yahuha
(Mt 24.29-35, 42-44; Mr 13.24-37)

²⁵ Ā ni yahu tuhsu, tinare ō sehe ni yahu namoha:

—Tī pjare sū dacho macariro, űami macariro, űahpichoha cūhu cohtotaahca. Jipihtina ahri yahpa macaina “Cue, yarianahca”, ni tuhoutuina pjiri ma macaa pahcōri cuaro choro ti bisiro coa tachu tuho tuaro cuiahca. ²⁶ Tī pjare muano macaa yahpari, űahpichoha cūhu tuaro űuhmiahca. Ti ā wahachu űua, masa sehe ahri yahpa to pihtitore cohtaa, tuaro cuiahca. ²⁷ Tī pjata yuhu masuano Cohamacu warocariro Cohamacu tuua mehne to si sitea mehne yu tachu űuahca masa. ²⁸ Ahri ti ā waha dūcachu űua, wacū tuaina jiga. Ā jina muanoru űuga. Tī pjare Cohamacu mūsare pichacapu wahaborinare to yuhdohto mahanocā dūhsarohca —niha Jesu.

²⁹ Ā ni tuhsu ahri quitu mehne piti dahre buheha Jesu:

—Higueracure, paye yucu cūhare tuhutuga mūsa. ³⁰ Tī yucari pūri tichu űua, cahma cjihto to mahanocā dūhsachu masina mūsa. ³¹ Tó seheta ahri jipihtia yu niri cjiire ti ā wahachu űua, Cohamacu masare puhtoro to noano sūho jihti pja mahanocā dūhsachu masinahca mūsa.

³² Mūsare potocā niita niha. Tī pja macaina ti yariahto pano jipihtia yu niriro seheta ā waharohca. ³³ Muano, ahri yahpa cūhu pihtia wahaahca. Yu durucua sehe ne cohtotasi. Jipihtia yu niriro seheta ā waha sohtori tiarohca.

³⁴ Yu tjua tahti dachore ne masierara mūsa. Ā jina noano yoaga. Bose numirine bujua yoarucuenta tjiga. Ā jina cahaena tjiga. Ahri yahpa macaare pjiro tuhoutuena tjiga. Mūsa yu niriro seheta yoana, wacūenoca ahri yahpapu yu tachu mūsa ne cūasi. ³⁵ Wahiquirore yurida wahiquirore wacūenoca to tuā suhoro seheta wacūenoca taihca yuhu. Jipihtina ahri yahpa macaina ti masieraro watoi tī dachoi wacūenoca ā waharohca. ³⁶ Noano wacū masi cohtaga. Ā jina Cohamacu ahrire ā sinirucuga: “Ahri pihtiri dachore ā wahachu yuhare yoadohoga. Tuuaare waga yuhare ahrire noano yu yuhduhti cjihtire. Tuhsu, Cristore mu warocarirore cuuro marieno yuhare piti bocachu yoaga”, ni siniga Cohamacu —niha Jesu.

³⁷ Ā yoa tī dachorire Cohamacu wūhui Jesu buhea tiha. űaminipe buhe tuhsuro Olivo wama tidu tūcupu waha, tōpu ji bohrea tiha. ³⁸ Bohrea taharipe jipihtina masa Cohamacu wūhupu tiore tuho waha tiha.

22

Sacerdotea puhtoa, judio masare buheina mehne waja duaha Jesure
(Mt 26.1-5, 14-16; Mr 14.1-2, 10-11; Jn 11.45-53)

¹ Å yoa ti pjare bucaerari pãore ti chuhti bose numari mahanocã duhsaha. Ti bose numari pascua wama tiha. ² Å jia sacerdotea puhtoa, judio masare buheina mehne Jesure waja duaa, ti wajahtore wacũ macaha. Jesure waja duapahta, masa sehere cuha, "Suari", nia.

³ Å yoa watino Juda Iscariotere ñano to yoa dutichu Juda sehe yahtihã tireore. Juda doce buheina mehne macariro jimaha. ⁴ Å yoa tiro sacerdotea puhtoa, Cohamacu wuhu macaina surara puhtoa mehne cãhare sãhũduro wahaha. Ti cahapu su, tinare Jesure to ñohtore sãhũduha tina mehne. ⁵ To ã nichu tuhoa, tina wahche, "Muhure niñerure wapanahãtja", niha tina Judare. ⁶ Ti ã nichu Juda "Jai, tireore musare ñohtja", ni masa ti ñueraro watoi Jesure ñu tuhtiinare to ñohti ñamine cohtasinia.

Jesu buheina mehne to chu batoari numari jia

(Mt 26.17-29; Mr 14.12-25; Jn 13.21-30; 1Co 11.23-26)

⁷ Bucaerari pãore bose numari ti ji dacari dacho jia. Å jiro pascua macaina cjihtire ovejare ti chuhtinare ti wajahti numari jia. ⁸ Ti pjata Pedrore, João cãhare Jesu õ sehe ni yahuha:

—Bose numari mari chuhtire cahnoyuna wahaga —niha Jesu tinare.

⁹ —¿Mari pascua macaa chuhtire noho baroi cahnoyuro dutirocajari muha sare? —ni sinituha tina tireore.

¹⁰ Ti ã nichu Jesu õ sehe ni yahtihã:

—Jerusalẽpu musa sachu co situ wuariro musare piti bocarohca. To piti bocachu tiro mehne wahaga. ¹¹ Å wahana tiro to suho saari wuhuru suna ti wuhu purore õ sehe ni yahuga. "¿Dĩ tahtiai yahu yu buheina mehne pascua macaa chware chnahcari?" ni sinitu dutirocahare buheriro", niga ti wuhu purore. ¹² Musa ã nichu tuhoro, tõpu muanõ macari tahtiare pjiri tahtiare, noano ti cahnoyuri tahtiapure musare ñonohca wuhu purõ. Tõi mari chuhti cjihtire dahrega musa —niha Jesu tinare.

¹³ To ã nichu tina ti macapu wahaha. Tõpu ti sachu tinare to niriro sehetã wahaha. Å jia tina pascua macaa chware dahreha.

¹⁴ Ti churi pja jichu Jesu doce to buheina mehne chu dujia. ¹⁵⁻¹⁶ Tõpu ti churõpu dujiro Jesu tinare õ sehe ni yahuha:

—Musare niita nija. Ahri pascua bose numarine mari dahreja Cohamacu to yainare to yãhdohtore wacũna. Baharo

Cohamacu masare puhtoro to noano suho jiropu to yainare yãhdo tuhurohca. To ã yãhdohtõ pano ahri numari baro macaare pari turi chueraja yahu. Å jicu mipure ñano yãhdu, yu yariahto pano ahri pascua macaa chware musa mehne tuaro chu duaa tihi —niha Jesu.

¹⁷⁻¹⁸ Å ninota Jesu sihniri wahware na, Cohamacure "Noana", ni sini, tinare õ sehe ni yahuha:

—Musare niita nija. Cohamacu jipihtina bui puhtoro to noano suho jihto pano ahri vinore ne pari turi sihnisi yahu. Å jina ahri vinore na, musa basi witi, sihniga —niha Jesu.

¹⁹ Å ni tuhuru pãore curire na, Cohamacure "Noana", niha. Å ninota, ti curire nuha, witiha tinare. Ti curire witirota, tinare õ sehe ni yahuha:

—Ahri yu pjacu jira. Yu pjacu yuhure ñu tuhtiinare ti wari pjacu jirohca. Musa ñaa yoari buhirire cohacu tacu yariaihca yahu. Å jina yuhure musa wacũti cjihtire ahrire chuga —niha Jesu.

²⁰ Å chu tuhuru tã sehetã tiro tinare sihniri wahwa cãhare waha. Å waro, tinare õ sehe ni yahuha:

—Musa ñaa buhirire cohacu tacu yariaihca. Å yoacu yu dire cohãihca. Cohamacu "Musare yãhdohtja", to niriro mu sachu ã yu yariaro mehne to niriro sohtori tirohca.

²¹ Mipure tuhoga musa. Yuhure ñu tuhtiinare yuhure ñohtiro mipure yahu mehne õi dujira. ²² Cohamacu to dutiriro sehetã yahu masano Cohamacu warocariro yariaihca. To ã yaria dutipacheta yuhure ñu tuhtiinare ñoriro pinihta ñabiaro yãhdurohca —niha Jesu tinare.

²³ To ã nichu tina sehe ti basi õ sehe ni sinituha:

—¿Jesure ñu tuhtiinare ñohtiro mari mehne macariro diro baro jicari na? —ni durucuha tina ti basi.

"¿Mari mehne macariro diro sehe jicari na puhtoro?" ni durucuha Jesu buheina ti basi

²⁴ Baharo Jesu buheina õ sehe ni durucuha:

—¿Mari mehne macariro diro sehe jicari na puhtoro? —ni durucuha ti basi.

²⁵ Ti ã ni durucuhu tuhoro Jesu tinare õ sehe ni yahuha:

—Cohamacure cahmaeraina puhtoã sehe ti masare dutia, purino mehne dutira. Å jia puhtoãre "Tina masare yoadohoinã jira", nimana paina masa tinare. ²⁶ Musa sehe tã sehe yoasi musa basi. Musa mehne macariro musa wahmi sehere to bahuro yoaro sehe jiro cahmana. Musa mehne macariro puhtoro ji duaro cahamacano

yoaro sehe jiro cahmana tirore. ²⁷ ¿Diro jijjari puhtoro? ¿Chũ dujiriro sehe puhtoro jijjari? ¿O chũare duhu payoriro sehe puhtoro jijjari? Chũ dujirirotā jica puhtoro. To ā jipachuta yũhũ sehe cahamacũno yoaro sehetā musare yoadohoi tai.

²⁸ Māsa yũhũre ti ñano yoapachuta māsa sehe yũhũre duhuerare. ²⁹ Ā jicu yũ Pũcũ yũhũre to puhtoro sōriro sehetā māsa cũhũre puhtoa sōihtja yũhũ. ³⁰ Yũhũ puhtoro yũ jichũ yũ chũri mesai māsa cũhũ chũ, sihñinahca. Ā yoana māsa puhtoa dujiare dujinahca. Māsa tōi dujina Israe masare doce curuari macainare besenahca māsa ñaina, noainare —niha Jesu to buheinare.

Pedro Jesure to cohãntore yahuha Jesu (Mt 26.31-35; Mr 14.27-31; Jn 13.36-38)

³¹ Ā ni tuhsũ Pedrore Jesu ō sehe ni yahuha:

—Simo Pedro yũhũre tuhoga. Musare jipihitinare yũhũre cohãchũ yoa duara watĩno. Trigo wese puro to trigore to wã site cohãriro sehetā musare jipihitinare watĩno ñano yoa duara “Ñaaŕe yoajaro”, nino. Ā yoa duara, Cohamacũre sinihre. ³² To ā sinichũ ñũcũ yũhũ sehe Cohamacũre sini payohi mũhũre. Yũhũre mũ wacũ tua duhuerahiti cijitire sini payohi mũhũre. Ā jicu mũhũ yũhũ mehne macariro pari turi jicu mũ coyare yũ yainare yoadohoga mũhũ —niha Jesu Pedrorre.

³³ To ā nichũ Pedro ō sehe ni yahtihã:

—Puhtoro, yũhũre ti peresu yoapachuta, yũhũre ti wajã duapachuta mũhũ mehne macariro jiihtja —nimaha Pedro.

³⁴ Jesu ō sehe ni yahtihã:

—Pedro mũhũre niita nija. Micha ñami caraca to duhto pano “Jesure masieraja”, niĩhca mũhũ painare. Tia taha ā niĩhca mũhũ —niha Jesu Pedrorre.

Jesure ti ñano yoa ducahto mahanocã duhsaha

³⁵ Ā ni tuhsũ Jesu to buheinare ō sehe ni yahuha:

—¿Sohō jiri pja māsa niñeru wajuru marieina, pjiri wajuru marieina, dahpo suhti marieina musare yũ warocachũ paye baro duhsari musare? —ni sinitu ñũhã Jesu.

—Ne sãre yaba duhsaerare —ni yahtihã tina.

³⁶ —Tĩ pjare musare duhsaerapachuta mipũ sehere niñeru wajurure cjuana tĩre naga. Pjiri wajurure cjuana cãhũ naga. Ā jina musare ñosari pjĩ mariachũ māsa suhtire duana ti pjĩne nuchũga. ³⁷ Ahriŕe musare niĩ nija. Cohamacũ yare ti joari pũi ti niriro sehetā yũhũre ā waharo cahmana. Ō sehe niha ti pũi: “Tiro dutiare yũhdũrcaina mehne macariro jira”, niahca masa”, ni joaã tihã —niha Jesu.

³⁸ —Ñũga puhtoro. Pua pjĩ ñosaa pjĩnĩne cjuaja sã —niha to buheina.

—Tó puro tjica —ni yahtihã Jesu.

Getsemanĩ wama tiorpũ Jesu Cohamacũre siniha

(Mt 26.36-46; Mr 14.32-42)

³⁹ Ā yoa Jesu to ā yoarucuriro sehetā Olivo wama tidũ tũcupũ wahaha. To ā wahachũ to buheina tiro mehne wahaha. ⁴⁰ Tõpũ sũro tiro tinare ō sehe ni yahuha:

—Cohamacũre siniga ñano māsa yoaerãhtō sehe —niha Jesu tinare.

⁴¹ Ā ni tuhsũ tiro to sahsero mahãnocã wahã namo, na tuhcuã caha sũ, ⁴² Cohamacũre ō sehe ni siniha:

—Mai, yũ ñano yũhdũhtire yoa duaeracũ yoai tjia. Yũ ā nipachuta yũ cahmaa sehere yoai tjia. Mũhũ sehe masina. Mũ cahmano sehetā yoaga yũhũre —ni siniha Jesu Cohamacũre.

⁴³ [To ā sinichũ mũanõpũ duji tariro anjo Jesure bajua, yoadohoha tirore. ⁴⁴ Tuhsũ, Jesu ñano yajeripohnã ti, tuaro mehne Cohamacũre siniha. Ā jia to so witia di yahpari yoaro sehe jia tirore wijaa, yahpapũ bora caha suhã.]

⁴⁵ Cohamacũre sini batoã wahcãrcũ sũ, tiro to buheina cahapũ wihihã. Ā to wiichũ to buheina tuaro cahyaina jia, carĩã niha. ⁴⁶ Ā jiro Jesu tinare ō sehe ni yahuha:

—¿Dohseana carĩna nijari masa? Wahcãga. Cohamacũre siniga ñano māsa yoaerãhtō sehe —niha Jesu tinare.

Jesure ñũ tuhtiina tirore peresu yoaha

(Mt 26.47-56; Mr 14.43-50; Jn 18.2-11)

⁴⁷ To ā ni durucuro watoĩ masa payũ wihihã. Juda doce buheina mehne macariro cjiro masare mũ tã tariro jiha. Ā jiro tiro Jesu cahaĩ wihi, wahsupu wiĩmihã tirore. ⁴⁸ To ā wiĩmichũ Jesu tirore ō sehe ni sinituha:

—Judã, ¿yũhũ masãnore Cohamacũ warocãrirore yũhũre ñũ tuhtĩnãre ñõcũ yũhũre wahsupu wiĩmijari mũhũ? —niha Jesu.

⁴⁹ To ā niri baharo Jesu buheina masa Jesure ti ñahãhtire masia, tirore sinituha:

—Puhtoro, ¿sã ñosaa pjĩni mehne tina mehne cahmachema? —niha tina.

⁵⁰ Ti ā niri baharo cãiro Jesu buheina mehne macariro sehe sacerdotea bui puhtoro cahamacũnore to ñosari pjĩ mehne to cahmonore potõ buhũsehei jiri cahmonore cjã pahrẽnocaha. ⁵¹ To ā yoachũ ñano Jesu tirore ō sehe niha:

—Ā yoai tjica —niha.

Ni, cahamacũno cahmono jirore cjiroĩ ñã payoha. To ā ñã payõchuta cahmono mũnãno sehetã jiha tjoã. ⁵² Ā yoa tuhsũ sacerdotea puhtoare, Cohamacũ wũhũ

macaina surara puhtoare, bucsuna cãhure tirore ñaha tainare Jesu õ sehe ni sinituha:

—¿Dohse jiro baro musa ñosaa pjĩni, yuca tiri mehne yacarirore ti yoariro seheta musa yuhure ñahana tajari? ⁵³ Dachoripe Cohamacu wuhuru musa mehne yu jichu, musa yuhure ne ñahaerare. Æ jipachuta mipure musa ya dacho yuhure musa ñano yoahiti dacho jira. Mipu watino to ñano yoahiti dacho cãhu jira —niha Jesu.

“Tirore masieraja”, niha Pedro Jesure

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Tina Jesure ñaha tuhsu sacerdotea bui puhtoro ya wuhuru naaha tina tirore. Ti tõpu naachu Pedro yoaropu tinare ñu nuu tiha. ⁵⁵ Puhtoro wuhuru su, tõi wuhu caha jiri wapai, noari wapa dacho macai pichaca wijãha paina. Ti Æ wijãchu ñuno Pedro pichaca caha dujiina mehne dujaha. ⁵⁶ To Æ dujiri baharo cãcoro cahamacono tirore noano ñu, painare õ sehe ni yahuha:

—Ahriri cãhu tiro mehne jihre —niha ticoro.

⁵⁷ To Æ nichu tuhoro Pedro õ sehe ni yuhtiha:

—Numino, tirore ne masieraja yuhu —nimaha tiro.

⁵⁸ Ticoro to Æ niri baharocãta paio Peddrore ñu, õ sehe niha tjoa:

—Muhu cãhu tina mehne macariro tjira —niha tiro.

—Ne jieraja —nimaha Pedro.

⁵⁹ Cã hora baharo paio painare õ sehe ni yahuha:

—Potocã tjira. Ahriri Galilea macariro jira. Æ jiro potocãta Jesu mehne jihre ahriri cãhu —ni yahuha tiro painare.

⁶⁰ To Æ nichu Pedro õ sehe ni yuhtiha:

—Ne, mu nirirore masieraja yuhu —ni yuhtiha Pedro.

To Æ ni durucuro watõi caraca duha.

⁶¹ To Æ duchuta Jesu wuhu caha jiriro Peddrore majare ñurocaha. To Æ yoachu Peddrore sehe Jesu to yahirire wacũha. “Micha ñami caraca to duhto pano, ‘Yuhu Jesure masieraja’, niuhca muhu. Tia taha Æ niuhca muhu”, Jesu to niri cjirire wacũha Pedro.

⁶² Æ wacũno Pedro tõpu jiriro wijaa ta, tuaro tiirucuha.

Jesure bujipe, cjãha tina

(Mt 26.67-68; Mr 14.65)

⁶³ Æ jia Jesure cohtaina surara tirore bujipe, cjã mÿjaha. ⁶⁴ Æ cjã mÿja, to caparire dante dacata, tirore õ sehe ni sinituha:

—¿Diro muhare cjãjari? Ñuerapaihta yahuga sãre —ni sinitu, bujipeha tina.

⁶⁵ Æ jia payu ñano ni durucuha tina tirore.

Jesure puhto sinituha

(Mt 26.59-66; Mr 14.55-64; Jn 18.19-24)

⁶⁶ Bohrearoio judio masa bucsuna, sacerdotea puhtoa, judio masare buheina cãhu cahmachuha. Ti Æ cahmachunoi paina tina cahapu Jesure na taha.

⁶⁷ —Yahuga sãre. ¿Cristota jijari muhu? —ni sinituha tina Jesure.

Ti Æ nichu Jesu õ sehe ni yuhtiha:

—Musare yu yahuchu, yuhure tuhosi musa.

⁶⁸ Musare yu sinituchu yuhure yuhtisi musa. ⁶⁹ Musa yuhtierapachuta baharo curero jipihitia dachoripe yuhu masuno Cohamacu warocariro Cohamacu tua yuhduarigo to poto buhusehei dujihtja —niha Jesu.

⁷⁰ To Æ nichu tina jipihitina sinituha tjoa pari turi:

—¿Æ nicu Cohamacu macunota jijari muhu? —niha tina.

—Tirota jija musa nino seheta —ni yuhtiha Jesu tinare.

⁷¹ To Æ nichu tuhoa, tina õ sehe ni durucuha ti basi:

—Ahriri Cohamacure pjõro to ñano durucuhu mari basi tuhohi. Æ yoa ahriroro yahusãina tõeina tjijaro. (Tõeina mehne tirore mari wajã duti masija) —niha tina ti basi.

23

Pilato Jesure sinituha

(Mt 27.1-2, 11-14; Mr 15.1-5; Jn 18.28-38)

¹ Æ ni tuhsu tina jipihitina wahcãruca, Jesure Pilato cahapu naaha. ² To cahapu na su, Jesure yahusã dacaha:

—Ahriri mari ya yahpa macainare to ñano yoa dutichu sã tuhohi. Mari bui puhtororo ahriri wapa dutierara. Tuhsu, tiro “Puhtoro jija. Cristo masare yahdohtiro jija yuhu”, ni durucure to basi —ni yahusãha tina Jesure.

³ Ti Æ ni yahusãri baharo Pilato Jesure õ sehe ni sinituha:

—¿Judio masa puhtorota jijari muhu? —niha tiro Jesure.

—Mu nino seheta tiro tjija —ni yuhtiha Jesu.

⁴ To Æ nichu Pilato sacerdotea puhtoare, masa cãhure õ sehe ni yahuha:

—Ahriri yaba buhiri mariahu —niha tiro.

⁵ To Æ nipachuta tina tuaro yahusã namoha:

—Tiro to buhea mehne masare cahmachechu yoara. Galilea yahpai tiro ture yoa dacare. Æ yoa dacu tuhsu jipihitiro Judea yahpau ture tiro yoare. Mipu õpu cãhure ture yoaro turo nina —ni yahusãha tina.

Herode Jesure sinituha

⁶ Ti Æ ni yahusãchu tuhoro Pilato sehe õ sehe ni sinituha:

—¿Ahriri Galilea macariro jijari? —niha tiro.

7—Tó macariro tjira —ni yuhtihá paina.

Ti á ni yuhtichu tuhoro Pilato sehe Jesu to jiri yahpare masino puhtoro Herode ya yahpa macariro Jesu to jichu masiha. Tíre masino Jesure Herode cahai warocaha. Tí pjare Herode Jerusaléi jia tiha. ⁸ Tó panopu Herode Jesure tuhoá tiha. To á tuhori baharo yoari pja baharo tirore nu duaha. Jesu Cohamacu tuaa mehne to yoa nochu nu duamaha tiro. Á jiro tiro Jesure nuho, wahcheha. ⁹ Á jiro payu tahari sinituha Jesure. To á sinitupachuta Jesu ne yuhtieraha tirore. ¹⁰ Sacerdotea puhtoa, judio masare buheina cahu Herode cahai wahcáruca, tuaro Jesure yahusáha. ¹¹ Ti yahusári baharo, Herode to surara mehne bujape, Jesure nana yoaha. Á bujapea, noari suhtirore puhtoro to sári suhtiro yoaro sehe bajuri suhtirore sáaha tina Jesure. Á bujape tuhsu, tirore Pilato cahapu warocaha tjoa. ¹² Tí dachore Herode, Pilato mehne noano ti basi cahma yoaina ji ducaha. Tó panore ti basi cahma nu tuhtiina jisinimaha.

Masa Jesure wajá dutiha

(Mt 27.15-26; Mr 15.6-15; Jn 18.39-19.16)

¹³ Á yoa Pilato sacerdotea puhtoare, paina puhtoare, masa cahure to pjirocachu, cahmachuha. ¹⁴ Ti cahmachu pichtichu nana ó sehe niha Pilato tinare:

—Ahrirone yuhure na tana, “Tiro masare nana yoa dutira”, nimahre masa yuhure. Mipu masa narocaroi ahrirone noano sinitu pahohi tjoa. Yu á sinituri baharo masa tirore á yahusáruccuhu tirore nana buhiri ne mariahna, yu nuchu. ¹⁵ Herode cahu tirore “Ne, nana buhiri mariahna”, nihre. Á nino ahrirone pari turi sare wa majare tjuhre tjoa. Á jina ahrirone to nana buhiri mariachu tirore masa wajá duti masierara. ¹⁶ Á jicu tirore yuta dari mehne tjana dutiuhca yuhu. Á ti tjanari baharo tirore woihtja —nimaha Pilato masare.

¹⁷ [Cahmaripe pascua bese numarine masa yairo cjihore curo peresupu jirirore Pilato wiobasa mujaa tiha.] ¹⁸ Á jia Pilato “Jesure woihtja”, to nichu tuhoá jipihina masa ó sehe ni sañurucuha:

—Tirore Jesure wajága. Sá yairo cjihore Barrabá sehere sare wiobasaga —ni sañurucuha masa.

¹⁹ Tí pjare Barrabá wama tiriro Jerusalépu puhtoare cohá duaina mehne macariro, masanore wajáriro peresupu jiha. Á jia tirore masa wio dutia niha. ²⁰ Pilato Jesu sehere wio duamaha. Á jiro tiro masare sinitu nuha tjoa. ²¹ To á wio duapachuta tina tirore ó sehe ni sañurucuha tjoa:

—Crusapu cjá puha wajága tirore. Wajága tirore —ni sañurucuha tina.

²² Ti á nichu Pilato tia taha waharoi ó sehe nimaha tinare:

—¿Yabare nana yoari tiro masa á ni sañurucuha? Ne tirore nana buhiri mariahna. Á jicu tirore wajá duti masieraja. Tirore yuta da mehne tjana dutiuhca. Tó purota yoa dutiuhca. Á yoacu woiuhca tirore —niha Pilato.

²³ To á nipachuta tina tuaro mehne sañurucu namo, Jesure crusapu wajá dutiha. Ti á ni sañurucuha tuhoro ti cahmariro seheta Pilato yoaha. ²⁴ Tirore ti siniriro seheta Pilato Jesure wajá dutiha. ²⁵ Á dutiro tiro peresupu jirirore masare cahmachechu yoarirore, masare wajárirore masa ti siniriro seheta Pilato Barrabá sehere wioha. Tuhsu, Pilato Jesure crusapu wajá dutiha.

Tina Jesure crusapu cjá puha, wajáha

(Mt 27.32-44; Mr 15.21-32; Jn 19.17-27)

²⁶ To á wajá dutichu tina Jesure wajága wahaa, naaha. Tí pja ti á yoaro watoi Simo wama tiriro Cirene macariro campopu sariro wihiha. Jerusalépu to wihihu nana Jesure naaina tirore piti boca, nana, Jesu to wari crusare tirore wna wahcá dutiha Jesu baharo.

²⁷ Á yoa masa payu Jesure nu nana tiha. Á jia masa watoi jia numia tirore ti á yoachu nana tuaro tiha. ²⁸ Ti á tiichu tuhoro, tí numiare Jesu majare nu, ó sehe niha:

—Jerusalé macaa numia, yuhure tiiena tjiga. Masa basi, masa pohna masa nana yuhduhtire masina, tiibasaga. ²⁹ Paye dachori jichu nabiaro yuhduhahca masa. Tí pjare masa ó sehe niahca: “Pohna mariea numia, pohna tierari numia, púra numia mipu mari jichu noabiaboa”, niahca masa. ³⁰ Tí pjare tucare ó sehe ni durucuhca masa. “Mahu tucu sá buipu bora pjaga. Sáre ducatahga”, niahca masa cuia. ³¹ Masa buhiri marieriro yuhure ó sehe ti yoachu, nana buhiri cuaina sehe nabiaro wahaahca —niha Jesu.

³² Paina puaro, dutiare yuhduhacaina ti jichu tina cahure Jesu mehne ti wajáhtinare naaha tina. ³³ Tinare naa, “Dapu cohá”, wama tiropu su, crusapu Jesure cjá puha óha. Puaro yuhduhacaina cahure pairore to poto buhusehei, pairore to cõ buhusehei cjá puha óha. ³⁴ [Tí á yoachu Jesu ó sehe niha:

—Mai, ahrina mipu ti nana yoarire boga tinare. Tina ti dohse yoarire masierara. Á jicu ti nana yoari buhirire boga —niha Jesu.]

Á yoa Jesu suhtire cahma witia tina docapeha. To suhti cjirore “Noa yaro jirohcari ó”, ni cahma docapeha tina. ³⁵ Tuhsu, masa tói ducuina ti narucuro watoi judio masa puhtoa Jesure ó sehe ni bujapeha:

—Tiro paina masare yariaborinare yoad-
ohoyumahtiro. Ā jiro tiro Cristo Cohamacu
to beseriro jiro, mipu yariaboriro jiro, to
basi yoadohojaru —ni bujupaha tina.

³⁶ Surara cāhu tirome bujupaha. Jesu ca-
hai sua, tina tirome űaa co vinore wamaha.
³⁷ Tiro waa, ō sehe niha tina:

—Mahu judio masa ti puhtoro jicu mu basi
yoadohoga. Ā jii yuhdu witiilca mahu —ni
bujupaha tina.

³⁸ Ā yoa tiro bui ti cjā puha ōri pjine ō sehe
ni joaha: “Ahiro judio masa bui puhtoro
jiriro jira”, ni joaha. (Griego ya mehne,
Roma macaina ya mehne, judio masa ya
mehne ā ni joaha.)

³⁹ Pairo tiro mehne ti cjā puha daporiro
yuhdūrcariro sehe ō sehe ni, űano duru-
cuha Jesure:

—ǳmahu Cristo masare yuhdoriro jiera-
jari? Mu basi, sā cāhure yoadohoga —niha
tiro Jesure.

⁴⁰ To ā nichu tuhoro pairo yuhdūrcariro
Jesu poto bahusehei ti cjā puha daporiro
sehe tirome ō sehe niha:

—Mari cāhure cāno pоторi buhiri dahrera
tina. ǳDohseacu Cohamacure ne űo pay-
oerajari mahu? ⁴¹ Marine űaa buhirire
yoaa, quihōno yoaa nina tina. Naare mari
yoari buhiri marine buhiri dahrera tina.
Ahiro sehe űaare yoaerare —niha tiro pairo
yuhdūrcariro.

⁴² Ā nino, tiro Jesure ō sehe niha:

—Jesu, mahu puhtoro jicu, tjua tacu,
yuhure wacūga —niha tiro Jesure.

⁴³ To ā nichu tuhoro, ō sehe niha Jesu:

—Mahure ahrire nii nija. Michare paraíso
wama tiropu mahu yuhu mehne jiihca —
niha Jesu tirome.

Jesu yariaa wahaha

(Mt 27.45-56; Mr 15.33-41; Jn 19.28-30)

⁴⁴ Ā yoa cohari pja jichu sū si duhua wa-
haha. Ā jiro jipihtiro ti dihtapure tia hora
waro noano nahitiano jiha. ⁴⁵ Nahitiano to
jiro watoi, Cohamacu wahu macari suhtiro,
ducataru suhtiro dacho maca waroi bui sehe
tuhnu bora ta, puca cahsaro tuhnuroca yoja
sua wahaha. ⁴⁶ Ā jiro Jesu ō sehe ni tuaro
sañuruca:

—Mai, yu catiare mahure wiaja mu űu
wihbohto cjihtore —ni sañuruca Jesu.

Ā ni tuhsu yariaa wahaha.

⁴⁷ To ā yariachu űano, surara puhtoro
sehe “Cohamacu tuariro jira”, nino: “Ahiro
Jesu cjiro potocāta noariro jiri jimana”, niha
surara puhtoro.

⁴⁸ Ā jia ti wajachu űua tarina Jesu to
yariachu űua, ti wuhusepu tjuaa wahaha.
Tjuaa waha, ti űaa yoarire cahyaa mehne
ti pēbuhui cjā ō wahcāha. ⁴⁹ Jipihina Jesu
yaina tiro mehne macaina, Galileapu tiro

mehne tari numia cāhu Jesure yoaropu
ñyogacarua niha.

*Jesu pjacure masa copapu na sāa duhu
payoha*

(Mt 27.57-61; Mr 15.42-47; Jn 19.38-42)

⁵⁰⁻⁵¹ Tí pjare José wama tiroto tói jiha.
Judea yahpai jiri maca Arimatea wama
tiri maca macariro jiha. Tiro noariro,
quihōno yoariro jiro, Cohamacu to puhtoro
ji ducatore cohtariro jiha. Ā jiro tiro ju-
dio masa puhta mehne macariro jiparota
Jesure ti wajā dutichu cahmaeramaha tiro.

⁵² Ā jiro Pilato cahapu su, Jesu pjacure
siniha. ⁵³ Sini tuhsu, Jesu pjacure na boro,
noari suhtiro mehne to pjacure wahmaha.
Ā wahma tuhsu, masa copapu tācai ti sa-
hari copapu na sāa duhu payoha to pjacure.
Tí copare ne paina yariainare duhu pay-
oerasiniha mini. ⁵⁴ Tí dacho Sabado da-
cho macaa cjihtire ti cahnyuri dacho jiha.
Sabado judio masa ti sori numu cjihto ma-
hanocā dahsaha.

⁵⁵ Ā jia Galileapu Jesu mehne tari numia
masa copapu José mehne wahaha. Masa
copapu su, tí copare űu, Jesu pjacure ti duhu
payorire űua. ⁵⁶ Baharo ti wuhusepu tjuaa
waha, me sitia mehne wisōa co mehne cah-
noha tina. Tuhsu, Sabado jichu Cohamacu
to dutiare Moise cjirore to cūri to dutiriro
seheta tina soha.

24

Jesu masa wijaaha

(Mt 28.1-10; Mr 16.1-8; Jn 20.1-10)

¹ Domingo jichu bohrearopu ti numia ti
me sitia ti cahnoyumarire Jesu masa co-
papu na wahcāmaha. ² Tí copapu sua, tí
copare bihari tāca pjōo ti duhu cūri tācare
ñua. ³ Ā űua tina tí copapu sāa wahaha.
Jesu pjacure bocaeraha tina. ⁴ To pjacure
bocaeraa, “ǳDohse wahapju?” ni tuhotu
tina. Tí ā ni tuhotu durucu coāno watoi
pūaro mu si sitea suhti tina tina caha
ducua. ⁵ Tói ti ducuchu űu, numia cuia
na tuhcuca caha saha. Tuhsu, mu sehe ti
numiare ō sehe ni yahuha:

—ǳDohseana yariariro to jiriro cjirore
tirome macajari musa? Mipure tiro catiriro
jira. ⁶ Tiro ōre mariahna. Masa wijaa
tuhsahre. ǳSohō jiri pjare Galileapu masa
mehne jiro musare to niri cjirore wacūjari
musa? ⁷ “Yuhure Cohamacu warocarirore
pairo warohca űainare. To ā wari baharo
yuhure crusapu cjā puha wajāhca tina. Ā
jicu yu yariari baharo tia dacho wahaboroi
masa wijaihca yuhu”, ǳmusare to nirire
wacūjari musa? —niha mu sehe.

⁸ Tí ā nichu tuhoo, numia sehe Jesu to
nirire wacūha. ⁹ Tí ā niri baharo tina
tjuaa waha, once buheinare paina cāhure
tiro yahu pahñoa. ¹⁰ Tí numia sehe María

Magdalena, Juana, María Santiago pocoro jiha. Tí numia mehne paye numia cāhu jiha Jesu buheinare yahua numia. ¹¹ Tí ā ni yahupachūta Jesu buheina sehe “Potocā nia nieraca. Mahñoepa nica ahri numia”, ni tuhotumaha. Ā jia tí numiare tuho duaeraha.

¹² Tí ā nichu tuhoro, Pedro sehe masa copapu muroca wahcā, ñuno wahaha. Tí copapu su, tiro muhri caha, ñuroca sōha. Jesure tí wahmari suhtiro dihtare ñuha. “¿Dohse wahari na?” ni tuhotu, tiro wuhapu tjuaa wahaha.

Emau wama tiri macapu wahari mahapu Jesu bajuaha

(Mr 16.12-13)

¹³ Tí dachoihta puaro Jesu buheina mehne macaina Emau wama tiri macapu wahaa niha. Jerusalē once kilómetro yoaro jira Emaupu suhto. ¹⁴ Emaupu wahaa, jipihtina Jerusalēi tí pjare to ā waharire Jesure tí ñano yoarire durucu wahcā niha. ¹⁵ Tí ā ni durucuro watoi Jesu sehe tí cahapu su, tina mehne wahaha. ¹⁶ Tirore ñupahata tina tirore “Jesu jira”, ni ñu masieraha.

¹⁷ —¿Dohse ni cahya durucu wahcāna nijari mūsa? —ni sinituha Jesu.

¹⁸ To ā nichu tuhoa tina cahyaro mehne suruca, Cleofa wama tiroro sehe Jesure ō sehe ni yūhtiha:

—¿Mipare Jerusalēi tiniri jipaihta mūhu dihta tí yoari cjirire masierajari? —ni sinituha tiro.

¹⁹ —¿Dohse wahari Jerusalēi? —niha Jesu.

To ā nichu tina ō sehe ni yūhtiha:

—Jesure Nazare macarirone tí yoarire nina nija. Tiro Cohamacu yare yahu muhtariro jimahre. Ā jia to durucurire tuhoa to yoari cāhure ñua, “Tuariro jira”, ni tuhotuhre masa. Cohamacu cāhu āta ni tuhotuca. ²⁰ Mari sacerdotea puhto, paina puhto mehne tirore wajā dutia, painare wahre. Tí ā wachu paina sehe tirore crusapu cjā puha wajāhre. ²¹ “Roma macainare cohāhtiro Israe masa puhtoro cjihto jira”, ni tuhotumahi sā tirore. Micha mehne tia dacho wahara tiro to yariari baharo. ²²⁻²³ Mahainacā numia sā mehne macaa numia säre cuachu yoahre. Bohrearopu Jesu to masa copapu tí numia su, to pjacure bocaerayūhti. To pjacure bocaeraa, tina tju wihí yahuhre. “Säre anjoa bajuahre. Jesu catiyūhti”, ni yahuhre numia sehe. ²⁴ Tí ā nichu paina sā mehne macaina tí copapu su, numia tí niriro seheta ñayūhti. Tina cāhu Jesure ñerayūhti —niha tina Jesure.

²⁵ Tí ā niri baharo Jesu ō sehe ni yahuha tinare:

—Mūsa ne tuho masiera cureina jira. ¿Cohamacu yare yahu muhtaina cjiri tí

nirire noano tuhoerari mūsa? ²⁶ Cristore to puhtoro jihto pano muanopu to mujahto pano tirore ñano yuhduro cahmare. ¿Tire masierasinjari mūsa? —niha Jesu tinare.

²⁷ Ā nino Cohamacu Cristore to ni yahu tí joari cjirire Jesu yahu pahñonocaha tinare. Moise cjiro to joari cjirire Jesu yahu dūcaha. Tuhsu, jipihtina Cohamacu yare yahu muhtaina cjiri Cristore tí joari cāhure yahu pahñonocaha tiro.

²⁸ Tina tí wahari macapu tí sua cahachu, Jesu sehe tinare yuhdu wahcāno sehe yoaro nimaha. ²⁹ To ā yoapachūta tina tirore waha dutieraha:

—Sā mehne tjuaga. Ñamichapu jira. Nahinopu nina —niha tina tirore.

Ā jiro Jesu tina mehne wuhapu sāa wahaha. ³⁰ Wuhapu sāa su, tiro tina mehne tí chāri mesapu nuju su, pāore na, Cohamacure “Noana”, niha. Ā nino tí pāore nuha na, tinare waha. ³¹ To ā yoachū ñua tina Jesure ñu masiha. Tí ñu masi muari baharo tiro buti mūa wahaha. ³² To ā buti mūa wahachu ñua tina tí basi ō sehe ni durucuha:

—Mahai tiro marine to durucuro watoi Cohamacu to joari cjirire to yahuro watoi tuaro mari wacū tuhotua mehne noano wahchea mehne tuhotuhi mari —niha tina tí basi.

³³ Ā ni tuhsu tina dóicāta Jerusalēpu majare tjuaa wahaha tjoa. Tópu sua, once buheinare paina mehne cahmachuinare bocaha. ³⁴ Ā tí sachu, once buheina ō sehe niha:

—Potocāta mari puhtoro masa wijaayuhti. Simo Pedro tirore ñayūhti —niha once buheina.

³⁵ Tí ā nichu puaro Emau macaina mahai Jesure tí ñurire yahuha:

—Jesu to pāore to nuhachu sā ñu masihi tirore —ni yahu pahñoha tina painare.

Jesu to buheinare bajuaha

(Mt 28.16-20; Mr 16.14-18; Jn 20.19-23)

³⁶ Tí ā ni yahuro watoi tí cahai jí tuhsuha Jesu sehe.

—¿Jimajari mūsa? Noano jiga mūsa —niha tiro tinare.

³⁷ To ā nichu tuhoa tina “Mari yariariro cjirire ñuna nija”, ni tuhotua, tuaro cuiha. ³⁸ Tí ā cuichu ñuno tiro tinare ō sehe ni yahuha:

—¿Dohseana cuijari mūsa? ¿Dohseana “Ahri potocā jierara”, nijari mūsa? ³⁹ Yu wamomacarine, yu dahpori cāhure ñuga. Mūsa yuhure ñuna, ñu masinahca. Yuhure ñaha ñuga. Ñaha ñuna, masinahca mūsa. Yariariro cjirōpu pjacu mariaha. Yuhu sehe pjacu tija —niha Jesu.

⁴⁰ Ā nino to wamomacari cāhure, to dahpori cāhure űoha tinare. ⁴¹ To ā űopachuta tina tuaro wahche, cūaa waha, “Ahri potocā jieraca”, ni tūhotusinimaha. Ti ā tūhotuchū masino Jesu tinare sinitu űūha:

—ĶŌi chūa jijari? —niha tiro.

⁴² To ā nichū tūhoa wahi doharirore mi cāhure waha tirore. ⁴³ Tīre na, ti űurocaroi Jesu chūha. ⁴⁴ Chū tuhsū, Jesu yahuha tinare:

—Sohō jiri pja mūsa mehne jicū mūsure yū yahuriro seheta mipū yūhū ā wahahi. Cohamacū dutia Moise cjiro marine to cūri cjiri to ā ni joariro seheta yūhure ā wahahre. Cohamacū yare yahu mūhtaina cjiri, Salmo joari tjure joaina cūhū panopū yūhure ti ni yahuriro seheta mipūre yūhure ā wahahre. Āta waharo cahmahre —niha Jesu.

⁴⁵ Ā ni tuhsū Cohamacū yare ti yahu joari cjirire to buheinare masichū yoaha Jesu:

⁴⁶ —Cohamacū yare ti joari cjiri ō sehe niha: “Cristore űano yūhdūro cahmana. Ā jiro tia dacho wahaboroi to yariari baharo tiro masa wijaarohca. ⁴⁷ To masa wijaari baharo jipihtia yahparipū to yaina Cristo yare yahuahca. Masa ti űaa yoarire ti cahyahti cijhtire, “űāno yoaeraja” ni, ti tūhotumarire ti cohtotahti cijhtire, Cohamacūre ti cahmahti cijhtire, ti űaa buhiri tiare to cohāhti cijhtire yahuahca to yaina. Ā yahua taa, Jerusalēpū yahu dūcaahca”, niha Cohamacū yare ti joari pūi —niha Jesu.

⁴⁸ Ā ni tuhsū ō sehe ni yahu namoha:

—Mūsa sehe ahri jipihtiare űūrina jira. Ā jina painare yahunahca. ⁴⁹ Cohamacū “Tīrore mūsure warocaihtja”, to niriore yūhū sehe mūsure warocaihtja. Ā jina Jerusalēpū ahri mūano macaa tuaa mūsure to wihihtore cohtaga mūsa —niha Jesu to buheinare.

Jesu mūanopū mūjaa wahaha
(Mr 16.19-20)

⁵⁰ Ā ni tuhsū Jesu tinare Jerusalēi jinare Betania cahapū naaha. Tōpū sū, Jesu to wamomacari mehne űūi mūo, “Noano jiga”, niha tinare. ⁵¹ Ā ni tuhsū, tinare cū, mūanopū mūjaa wahaha. ⁵² To mūjari baharo tina tirore űo payo, Jerusalēpū tuaro wahchea mehne tjuaa wahaha. ⁵³ Tōi jia, dachoripe tina Cohamacū wahūi Cohamacū mehne durucu, “Noana”, ni űo payoha tina tirore.

San Juan

Cohamacu ya duserore yahuriro masunotaji ducaha

¹ Dóiputa ahri yahpa to jihto panoputa Cohamacu ya duserore yahuriro Cristo masare yuhduchu yoahitiro dóihta ji tuhsua tiha. Tiro Cohamacu mehne jiha. ² Á yoa tirota Cohamacuta jinocahno niha. ² Dóiputa wahmanoputa Cristo Cohamacu mehne jiha. ³ Á yoa wahmanopure ne mariahri cjirire bajuamehneha. Ahri yahpare, mnanore, jipihtiare, jipihtina cãhure bajuamehne dutiha Cohamacu tirore. Á jiro ahrire bajuamehne pahñoha tiro. Ahrire mipare mari ñuare, mari ñuera cãhure to bajuamehnerachu ne mariaboa. ⁴ Cristo catiare wariro jiro nina. Buhriaro marine to noano ñu masichu yoaro seheta tiro to Pucaro mñano macarirore noano masichu yoara. Á yoaro to Pucaro mñano macarirore masichu yoara masare. ⁵ Ahri yahpa macaina ñaare ti wacü ti goa pjaa nahitiano yoaro sehe jia nina. Cohamacu ya duserore yahuriro buhriaro noano marine to ñu masichu yoaro seheta masare masichu yoara. Á yoa nahitiano buhriarore to yuhducaeraro seheta Cristore ñaa ne yuhducaerara.

⁶⁻⁷ Cohamacu João wama tiriro sehere warocaha, Cristore buhriaro yoaro sehe jirirore masare yahu mñata dutiro. To á warocachu João sehe masare yahuro tare to yahurirore Cristore jipihtina ti wacü tu-ahti cjihtire. ⁸ João sehe Cristo jierare. Á jieraro tiro Cristo sehere masare yahu mñtano tare. ⁹ Cristo buhriaro yoaro sehe jiriro jipihtina masare Cohamacure masichu yoahitiro sehe ahri yahpapu tari jire. Potocã tjira ahri. Tiro buhriaro yoaro sehe jiriro waro tjira.

¹⁰ Cristo ahri yahpai jia timare. Ahri yahpare bajuamehneriro jiri jimare. To á jipachuta ahri yahpa macaina sehe tirore ne masierare. ¹¹ To ya yahpai tiro masa bajuari jimare. To ya yahpai masa bajuariro to jipachuta to ya yahpa macaina sehe ne tirore cahmaerare. ¹² Ti á cahmaerapachuta, tirore cahmaina sehere, tirore wacü tuaina sehere Cohamacu to pohna jichu yoari jire. ¹³ Tina Cohamacu pohmata jia nina. Á jia masa ti masa bajuariro seheta jierara, Cohamacu pohna ti wahachu. Tuhsu, masa ti cahmariro seheta jierara, Cohamacu pohna ti wahachu.

¹⁴ Á jiro Cristo masuno to ji ducari baharo mari mehneti jire tiro. To á jichu ñuna masare cahñiro, potocã jiare yahuriro to jichu sã masii. Tiro dihta Cohamacu macuno

jiro tuariro noariro jire. To á jiriro jichu sã masii. ¹⁵ João Cristore yahu mñtano ó sehe ni sañurucure masare yahuro:

—Siro tara yu ó sehe ni yahuriro: “Tiro yu baharo taro jira. Á jiparota tiro yu yuhdoro tuariro jira. Tiro yu masa bajuahito panoputa ji tuhsua. Á jiro tiro yu yuhdoro tuariro jira”, masare yu ni yahuriro ahriro tjira —nire João Cristore masare yahuro.

¹⁶ Tiro Cristo sehe noariro tuaro masare cahñiro jiro marine jipihtinare noano yoarucure. ¹⁷ Cohamacu dutiare Moise cjiro sehe cãbasa mñtata tiha marine. Jesucristo sehe Cohamacu masare to cahñare buhero tare. Cohamacu to potocã durucua cãhure buhero tare tiro. ¹⁸ Masa ne Cohamacure ñuerara. Tirore mari ñuerapachuta to macano to tuaro cahñiro cãirota jiriro sehe to Pucarore marine masichu yoare.

Paina João masare bautisarirore sinituha

(Mt 3.11-12; Mr 1.7-8; Lc 3.15-17)

¹⁹ Sã coyey judio masa puhto Jerusalei jjinare sacerdotiare, Cohamacu wahu dahraina cãhure João cahapu warocari jire. “¿Diro baro jijari mñu?” ni sinitu dutia warocari jire tinare. Ti á ñi sinituchu ó sehe ni yahure João sehe. ²⁰ Ne yaro marieno yahure. Potota yahure:

—Yuhu Cristo Cohamacu masare yuhduchu yoa dutiro to warocariro jieraja —nire tiro.

²¹ To á nichu tina sehe tirore pari turi siniture tjao:

—¿Muhu Cristo jieracu, Elia sehe jijari mñu? —nire tina.

—Jieraja yuhu —nire tiro.

—¿Sã cohtariro Cohamacu yare yahu mñtariro sehe jijari mñu? —nire tina.

—Tiro jieraja yuhu —nire João sehe.

²² To á nichu tina tirore pari turi ó sehe ni siniture tjao:

—Sãre sinitu dutiinare sã noano yahuhto sehe poto sãre yahu bahrañoga. ¿Diro baro sehe jijari mñu? ¿Mu basi mñu sehe dohse jiriro baro “Jija yuhu”, nijari mñu? —nire tina João.

²³ Ti á nichu ó sehe ni yuhtire tiro:

—Masa marienopu ó sehe ni sañurucuriro jija yuhu Cohamacu yare yahu mñtariro Isaia cjiro to ni yahuriro seheta: “Mari puhtoro to tahto pano masa ñaa tahotuare cohtota, cahno mñtaga masa”, ni masare yahu sañurucuriro jija yuhu —nire João tinare.

²⁴ João sinituina fariseo curua macaina ti warocarina jire. ²⁵ Á jia tina João ó sehe ni siniture tjao:

—¿Muhu Cristo, Elia, Cohamacu yare yahu mñtariro sã cohtariro jierapacuta

dohseacu masare bautisajari mũhu? —nire tina.

²⁶ Ti ã nichu tuhoru õ sehe ni yũhtire tiro:

—Yũhu co mehne masare bautisaja. Pairo sehe mũsa masierariro mũsa watoi ji tuhsara. ²⁷ Tiro sehe yũ baharo tariro yũ yũhdoro tuariro jira. Noa yũhduariro jira. Tiro yoaro sehe jieraja yũhu sehe. Æ jicu tirore tuhotucu, “Wiho jiriro jija yũhu”, ni tuhotuja yũhu —nire João tinare.

²⁸ Æ ni durucure tina, Betaniaru Jordão wama tiri ma pa buhũsehe coaru, João masare to bautisariropu.

Jesu Cohamacu to warocariro to oveja yoaro sehe jiriro jira

²⁹ Pa dachoi Jesu João cahai cahacã curero to tachu João tirore ñũno õ sehe nire:

—Ñuga. Ahriro Cohamacu to warocariro to oveja yoaro sehe jiriro jira. Ovejare mari wajãriro seheta masa ahriro cãhure wajãahca. Æ yariaro ahri yahpa macainare ti buhiri tiare cohãnohca tiro. ³⁰ Ahrirota jira yũ õ sehe niriro: “Yũ baharo tariro yũ yũhdoro tuariro jira. Yũ masa bajuahto pano tiro ji tuhsaha. Æ jiro tiro yũ yũhdoro tuara”, yũ niriro ahrirota jira. ³¹ Yũhu sehe ahrirore noano waro masiera tihĩ. Æ masierapahita co mehne bautisai tai ni yũ coyae Israe masa ahrirore ti masihto sehe —nire João.

³² Æ ni tuhsu João to ñũri cjirire õ sehe ni yahu namore tjoa:

—Espiritu Santo mũanonu buja yoaro sehe duji ta, Cristo mehne to tjuachu ñũhi. ³³ Cohamacu yũhure to yahuerachu tirore ne masieraboa yũhu. Wiho mejeta tiro yũhure masare co mehne diaru bautisa duti warocariro Cohamacu sehe õ sehe ni yahu mũhta tuhsure yũhure: “Espiritu Santo duji ta to bui to tjuaracu suriro tirota jirohca. Tiro sehe Espiritu Santore to yaina mehne ã jirucuchu yoarohca”, nire Cohamacu yũhure. ³⁴ Mipu pinihtare to ã ni yahurirore ñũ tuhsahi yũhu. Æ ñũcu “Ahriro potocãta Cohamacu macano jira”, ni yahuja yũhu mũsare —ni yahure João sãre.

Jesu buheina to pji mũhtaina jira

³⁵⁻³⁶ Pa dachoi João mehne sã puaro to buheina sã ducuchũ, Jesu sã cahai yũhdũ wahcãno nire. To ã yũhdũ wahcãchu João tirore ñũno, pari turi õ sehe nire sãre:

—Ñuga. Ahriro Cohamacu to oveja yoaro sehe jiriro jira —nire João.

³⁷ To ã nichu sã puaro to buheina sehe tĩre tuhona Jesu baharo wahahi. ³⁸ Sã ã wahachu ñũno Jesu sãre majare ñũ, õsehe ni siniture:

—¿Nohopu wahajari mũsa? —nire tiro.

To ã nichu sã cãhu õ sehe ni sinitu ñũi tirore:

—Rabi, ¿nohopu jijari mũhu? —nihi sã tirore. (Rabi sã ya mehne nina “buheriro”, nina nija.)

³⁹ —Yũhu mehne tatjãhna ñũna taga —nire Jesu sãre.

To ã nichu sã sehe to jiropu ñũna wahi. Tĩ pjare ñamichahapu cuatro hora jire. Æ jina tĩ dachore tiro mehne tjuai sã.

⁴⁰ Sã puaro Joãore tuhoina, Jesure nũnu ti wahcãina yũ piti Andre mehne jii. Andre sehe Simo baharo jire. ⁴¹ Æ jiro tiro dõhta to wahminore Simore maca, boca, tirore õ sehe ni yahuha:

—Mesiare Cohamacu marine yũhdũchu yoa dutiro to warocariro sã bocahi —niha Andre Simore. (Mesia sã ya mehne nina “Cristo”, nina nija.)

⁴² Æ ni tuhsu tiro Simore Jesu cahai naahre. To cahai ti sachu ñũno Jesu sehe Simore õ sehe nire:

—Mũhu Simo wama tiriro, Jona macano jira. Mipure mũhure Cefa ni wama pisuihtja —nire Jesu Simore. (Cefa sã judio masa ya mehne nina “Pedro”, nina nija.)

Felipere, Natanae cãhure pjiha Jesu

⁴³ Pa dachoi Jesu Galilea yahparũ waha duare. Æ jiro to wahahto pano tiro Felipere piti boca, õ sehe nire:

—Yũhu mehne macariro cjihto taga —nire Jesu.

⁴⁴ Felipe sehe Betsaida macariro jire. Tiro, Andre, Pedro mehne cã maca macaina jire tina. ⁴⁵ Æ yoa Felipe Natanaene maca, tirore bocaro õ sehe ni yahure:

—Cohamacu dutiare Moise cjiro to joari pũpu to yahurirore paina Cohamacu yare yahu mũhtaina cjiri cãhu ti yahurirore sã bocahi. Jesu Nazare macariro, José macano tjira —nire tiro Natanaene.

⁴⁶ —Nazarepũre ne cãiro noariro mari-ahna —nire Natanae.

—Ñũi taga mũhu —nire Felipe.

⁴⁷ Æ yoa Jesu cahai to sachu ñũno Jesu sehe õ sehe nire Natanaene:

—Ahriro mipũ tariro potocãta noariro judio masano waro jira. Tirore mahñoa ne mariahna —nire Jesu Natanae sehere.

⁴⁸ To ã nichu tuhoru Natanae sehe tirore õ sehe ni siniture:

—¿Dohseacu yũhure noano masijari mũhu? —nire.

—Felipe mũhure to pjihto pano, higueraçu docai mũ jichu ñũhi yũhu mũhure —nire Jesu.

⁴⁹ To ã nichu Natanae sehe tirore õ sehe nire tjoa:

—Buheriro, potocãta mũhu Cohamacu macano jira. Mũhu Israe masa sã Puhtoro cjihto jira —nire Natanae.

⁵⁰ To ã nichu tuhoru õ sehe ni yũhtire Jesu:

—Higueracu docai mähure ya ñarire masicü yühure “Cohamacu macano jira”, ni wacü tuara mähü. ¿Títa mähure ä masichü yoajari? Ahri mähure ya ñari yuhdoro Cohamacu tuaa mehne yoa ñoicha yuhü. Yü ä yoa ñochü ñühca mähü —nire Jesu Natanaene.

⁵¹ Ä ninota ö sehe ni yahu namore:

—Potocäta mähure niita nija. Yuhü masüno Cohamacu warocariro tjija. Muanopu parí mähachü Cohamacu to yaina anjoa yu bui ti duji tachü, ti mujachü cühure ñühca mähü —nire Jesu tirore.

2

Caná wama tiri macapu ti wamomaca dakteropu Jesu wahaha

¹ Tia dacho baharo Canái Galilea yahpai jiri macai wamomaca dakteri bose numu jire. Ä jiro Jesu pocoro ti wuhupü jire. ² Jesu mehne säre to buheina cühure wamomaca dakteropu pjirocare tina. ³ Ti bose numu macaa vino pihtichü Jesu pocoro tirore ö sehe ni yahure:

—Mipure vino pihtia wahare —nire ticoro Jesure.

⁴ To ä nichu tuhoro Jesu ö sehe nire:

—Inö, ¿dohseaco taco türe yühure yahujari mähü? Masa yühure ti masihto däsasinina mini —nire Jesu to pocorore.

⁵ To ä niri baharo to pocoro sehe ti cahamacare ö sehe ni dutire:

—Yü macu to dutiriro seheta yoaga —nire ticoro.

⁶ Tí pjapure sä coyera judio masa Cohamacu yare yoaa taa masare ti pjacurire ä cosaracunoca dutia türe. Ä yoa ti wuhü seis situ pari täa mehne ti yoaa situ pari co posa tia situ pari jire. Tí situ pari Cohamacu yare yoaa taa ti cosaa co posa tia pari cjiri jire. Tí situ parire cincuenta a setenta litro posa mü sure. ⁷ Tóti ti jichü ñüno tí wuhü macaina cahamacare ö sehe ni dutire Jesu:

—Ahri situ parire co mehne pio säa namoga wahpaa pari ti wahahto sehe —nire Jesu.

To ä nichu tina sehe noano wahpo dapu pahñonocare ti parire.

⁸ Tí ä yoari baharo Jesu tinare ö sehe ni dutire tjoa:

—Mipure tí core wa na, wuhü macarirore waga —nire.

To ä nichu tuhóa tí core wa na, wuhü macarirore ware.

⁹ Tí ä wachü tiro sehe tí core vino to wahachü yoaa core sihni ñüre. Tí core nohoi to tarirore masierare tiro. To ä masierapachuta to cahamaca tí core waina sehe masire. Wuhü macarirore ä masieraro wamomaca dakterirore pjiroca, ¹⁰ ö sehe ni yahure:

—Paina masa noaa core vinore wa mähüta. Masa ti noano sihñiri baharo ña curea core wara tina. Mähü sehe noaa core wihbo, baharo curero tí core ware säre —nire wuhü macarirore wamomaca dakterirore.

¹¹ Canái Galileai jiri macai Jesu core vino to wahachü yoari cjiri coä to bajuamehne ducari jire. Ä yoaro painare to tuaare ñore Jesu. To ä ñori baharo sä to buheina tirore wacü tuai.

¹² Baharo Jesu to pocorore, to bahanare, säre to buheina cühure Capernaupü süho süre. Tópu süna, mahaa dachoricä tjuasinii sä.

Jesu Cohamacu wuhupure süha

(Mt 21.12-13; Mr 11.15-18; Lc 19.45-46)

¹³ Pascua jichü judio masa sä bose numari cjihti mahanocä däsatiähre. Ä jiro Jesu Jerusalépü süre. ¹⁴ Tópu süro tiro Cohamacu wuhupü säa süro, wachüare, ovejare, bujaare duainare boca süre. Tuhsü, niñerure cohtotaina ti mesaripü ti dujichü tina cühure boca süre. ¹⁵ Ä boca süro yuta dari mehne tjanari da yoa, tinare jip-ihñinare sopacapu tjana numu wionocare. Oveja, wachüa cühure tjana numu wionocare tiro. Ä yoa niñeru cohtotaina ti mesarire na majarero ca doca cünocare. Tí niñeru türi cühure doca sitenocare. ¹⁶ Ä yoa tuhsü bujaare duainare ö sehe nire:

—Musa bujaare na wijaahga. Yü Pucü ya wuhure pache duari wuhü yoarena tjiga —nire Jesu tinare.

¹⁷ To ä yoachü ñüna sä to buheina sehe Cohamacu yare ti joari püi to niri cjirire wacüi: “ ‘Cohamacu, mü wuhure tuaro cahüja. Ä cahüca mü wuhure ñano ti yoachü ñüca tuaro cahyaja yuhü’, ni joaa tiha Cohamacu yare ti joari püi”, ni wacüi sä Jesu buheina.

¹⁸ Jesu to ä yoari baharo sä coyera judio masa pahüta tirore ö sehe ni siniture:

—¿Dohseacu mähü ahñinare Cohamacu wuhupure jiiinare cohä wiori? Cohamacu mähure türe yoa dutiriro to jichü Cohamacu tuaa mehne yoa ñoga mähü sä ñühti cjihtire —nire tina Jesure.

¹⁹ Tí ä nichü Jesu ö sehe ni yuhñire:

—Ahri wuhure müsa cohächü tia dacho wahaboroi tuhsühtja yuhü —nire Jesu tinare.

²⁰ —Tia dacho mehne ahri wuhure tuhsüsü mähü. Cuarenta y seis cahmari waro ti yoari wuhü jira ahri wuhü —nire tina Jesure.

²¹ To ä nichü tina tirore noano tuhóerare. Jesu “Ahri wuhure” nino, to pjacure nino niri jimare.

²² Ä yoa to yariari baharo, to masa wijaari baharo sä to buheina sehe to niri cjirire

wacūna, Cohamacu yare ti joari pūre Jesu to yahuri cūhare “Tí potocā tjira”, ni wacūi sã.

Jipihtina ti wacūare Jesu masina

²³ Pascua bose nūmari jichu Jesu Jerusalēpu jire. Tóti to jichu masa payu Cohamacu tuaa mehne to yoa ñochu ñua tirore wacū tuare. ²⁴ Tí ã wacū tuapachuta Jesu masa ti wacūare noano masino, “Yuhure ã wacū tuarucuahca”, ni tūhotueraha. ²⁵ Tiro masa ti tūhotuare noano masire. Æ masino masa ti tūhotuare painare ne sinitu ñuerare.

3

Jesu Nicodemore yahuha

¹ Tí macai Nicodemo wama tiro, judio masa puhtoa mehne macariro jire. Tiro fariseo curua macariro jire. ² Cū ñami tiro Jesu cahai ta, tiro mehne ò sehe ni sūhūduri jire:

—Buheriro, mūhu Cohamacu to buhe dutiro to warocariro mū jichu sã masija. Mūhu payu tahari Cohamacu tuaa mehne yoa ñona. Cohamacu mūhare to yoadohoerachu, mūhu sehe to tuaa mehne ne ã yoa ñoaeraboa —niri jire Nicodemo Jesure.

³ To ã nichu tūhoro Jesu sehe ò sehe ni yahuri jire:

—Potocā mūhare niita nija. Pari turi masa bajuariro yoaro sehe wahariro dihta mari puhtoro Cohamacu mehne ji masina —niha Jesu.

⁴ —Cuenah. ¿Bucuro sehe dohse yoa pari turi masa bajuabocari tiro? To pocoro niji suhtiropu majare sã, pari turi bajua masieraboca tiro —niri jire Nicodemo.

To ã nichu tūhoro Jesu ò sehe ni yūhtiri jire tjoa:

⁵ —Potocā niita nija mūhare. Co mehne, Espiritu Santo to tuaa mehne pari turi masa bajuariro dihta mari puhtoro Cohamacu mehne ji masina. ⁶ Numia nijipocosanumia jia, macanacāre masa bajuachu yoara. Espiritu Santo sehe masare Cohamacu pohna jichu yoara. ⁷ “Pari turi masa bajuariro yoaro sehe wahariro dihta mari puhtoro Cohamacu mehne ji masina”, yu nichu, tūho wisiecu tjiga. ⁸ Espiritu Santo masare Cohamacu pohna to yochu wihnono yoaro sehe jira. Wihnono to tariropu tara. To taro coa tachu mari tūhoja. Æ tūhopenahta to tarirore, to waharirore ne masieraja. Tó seheta yoara Espiritu Santo masare Cohamacu pohna jichu yoaro —niri jire Jesu Nicodemore.

⁹ —Mū niare noano masieraja —niri jire Nicodemo.

¹⁰ To ã nichu tūhoro ò sehe niri jire Jesu:

—Mūhu judio masare buheriro jipaihta, ¿dohseacu yu niare tūhoerajari? ¹¹ Potocā mūhare niita nija. Sã masirire, sã ñarire sã

yahuja. Sã ã yahupachuta ne mūsa sã coyeya judio masa ne tūho duerare. ¹² Ahri yahpa macaa mehne masa ti masa bajuari mehne mūhare piti dahre yu buhe mūhtarire “Potocā tjira”, nierara mūsa. Æ nierana piti dahre buhero marieno Cohamacu yare yu yahuchu cūhare “Potocā tjira”, nisi mūsa.

¹³ Ne cūiro mūanoru Cohamacu cahapu wahariro ne pari turi tjua tasi. Yūhu masino Cohamacu warocariro yūhu dihta mūanoru jiriro ahri yahparu tahi. (Æ jicu yūhu dihta Cohamacu yare mūshare yahu masija.) ¹⁴ Panopure masa marienoru Moise cjiro bronze wama tiri comaa mehne ti yoarirore agāre yucucu ti dapodu sohtoapu duhu ò dapoha. Yūhu cūhare masino Cohamacu warocarirore tiro agāre to duhu ò daporiro seheta yūhu cūhare duhu ò dapoha. ¹⁵ Yūhure ti ã yoari baharo jipihtina yūhure wacū tuaina jipihtia dachoripe Cohamacu mehne ã jirucuahca —niri jire Jesu.

Cohamacu jipihtinare cahina

¹⁶ Æ ni tuhsu ò sehe ni namori jire Jesu:

—Cohamacu jipihtina ahri yahpa macainare tuaro cahina. Æ jiro yūhure to macunore cūirota jirirore Cohamacu warocare jipihtina yūhure wacū tuaina pichacapu ti wahaerahto cjihtore. Æ jia Cohamacu ya catia mehne ã catirucuahca tina. ¹⁷ Cohamacu yūhure to macunore masare buhiri dahre dutiro warocaerare ahri yahparu. Masare pichacapu wahaborinare yūhdachu yoahiro cjihto sehene yūhure warocare.

¹⁸ Yūhure Cohamacu macunore wacū tuainare ne buhiri dahresi Cohamacu. Yūhure wacū tuainera pinihtare Cohamacu buhiri dahre duti tuhsure. Masa yūhure Cohamacu macunore cūirota jirirore ti wacū tuainera buhiri buhiri dahrerohca tinare. ¹⁹ Yūhu Cohamacu macuno ahri yahparu tacu buhriaro to noano marine to ñu masichu yoaro seheta Cohamacu yare noano masichu yoaja. Yu ã masichu yoapachuta, yūhure wacū tuainera sehe yūhure cahmaerara. Ti ñaa yoaa sehene noano cahmana. Ti ã cahmari buhiri tinare buhiri dahre duti tuhsure. ²⁰ Jipihtina ñaare ã yoarucuina baro ti ñaa yoare duhu duerara. Æ jia buhriaro to bajuro dahrero seheta ti ñaa yoarire “Bajuro dahreri” nia, yūhure cahmaerara tina. ²¹ Quihōno yoaina sehe yūhure, yu buhea cūhare cahmana. Cohamacu yoadohoro mehne to yare ti yoare yu noano bajuro dahrechū buo tierara tina. Æ jia yūhure buhriaro yoaro sehe jirirore cahmana —ni yahuri jire Jesu.

Pari turi João masare bautisariro Jesure yahuha

²² Baharo Jesu säre to buheinare Judea yahparu suho wahare. Tóru saro to macaina mehne mahaa dachoricã tja, tinare bautisare. ²³ João cūhu masare bautisaro niha Enón wama tiri macai. Enón Salim wama tiri maca cahai jire. Tói dia jire. Tói dia jichu João bautisaro niha masare. ²⁴ Tire ti peresu yoahito pano Enóni masare bautisaro niha João.

²⁵ Tí pjare João buheina mehne macaina mahainacã judio masano mehne bautisaa macaare durucua niha. ²⁶ Á jia tina João caharu suu, tire o sehe ni yahuha:

—Buheriro, Jordão sie coaru mūhu mehne jiriro “Tiro tjica”, mu niriro sehe mipare masare bautisaro nina. To á yoachu jipihitina tiro caharu dihta wahara —niha tina João.

²⁷ Tí á nichu tuhoro João o sehe ni yuhtiha:

—Tiro tuariro to jichu Cohamacu sehe tire o á jichu yoariro jira. ²⁸ “Cristo jieraja”, yu nichu tuhore musa. Á jierapaihta to pano to waroca muhtariro jija yuhu. ²⁹ Cristo mehne masa ti wahachu ñucu tuaro wahcheja. O sehe jira ti: Wamomaca duhtericoro to manano mehne jiro wahara. Wamomaca duhtehtirore cohtariro sehe duhtehtiro to namo tichu ñano to durucuhu tuhoro tuaro wahchera. Á jicu yuhu wamomaca duhtehtirore cohtariro to wahcheriro seheta Cristo mehne masa ti wahachu ñucu tuaro wahcheja. ³⁰ Cristo sehere wacu tuaro cahmana masare. Yuhu sehere wacu tuaeraro cahmana masare —ni yuhtiha João.

Cohamacu masano manopu tariro jira

³¹ Á ni tuhsaro o sehe ni namoha João:

—Manopu tariro jipihitina yuhdoro tuariro jira. Ahri yahparu jiina jina ahri yahpa macaina jija mari. Á jina ahri yahpa macaare durucua mari. Manopu tariro sehe jipihitina yuhdoro tuariro jira. ³² To ñari cjiire, to tuhori cjiire tiro yahura. To á yahupachuta to yahuafe masa sehe ne tuho duarera. ³³ Manopu tariro to yahuafe masa tuhoa, tife cahmaa, “Cohamacu potocã niriro jira”, nia nina tina. ³⁴ Ahriro Cristore Cohamacu warocarirore Espiritu Santo ya tuaare cū pahña Cohamacu. Á jiro tiro Cohamacu ya durucuafe yahura. ³⁵ Cohamacu to macanore tuaro cahña. Á jiro jipihitina bui ti puhtoro ji dutire to macanore. Jipihitia paru ji dutire tire. ³⁶ Cohamacu macanore wacu tuaina sehe Cohamacu catia mehne á catirucuahca. To macanore cahmaeraina sehe Cohamacu catia mehne jisi. Á jiro Cohamacu tinare tuaro buhiri dahrerohca —niha João.

4

Jesu Samaria macaricoro mehne durucua

¹ Jesu João yuhdoro payu buheinare to cjuachu João yuhdoro masare to bautisachu fariseo curua macaina tuhorocaha. ² Tí á tuhorocapachuta Jesu sehe to basi masare bautisaerare. Sã to buheina sehe masare bautisahi. ³ Fariseo curua macaina ti á masichu tuhoro Jesu sehe Judea yahpai jiriro Galilea yahparu säre suho tjuaa wahare.

⁴ Tóru wahana Samaria yahpare su yuhdu wahcãna tana nihi sã. ⁵ Á yuhdu wahcãna Samaria yahpai jiri macaru Sica wama tiri macaru suhi. Tí maca cahai panopu macariro Jacobo cjiro to macano José cjirore to wari yahpa jire. ⁶ Tói Jacobo cjiro co to naari copa jire. Á yoa Jesu sehe yoaropu tariro cjiro jiro, tiro wahya yuhduaro tí copa duhtu cahai nuju sare. Tí pja tói to so nuju sari pja cohari pja waro jire. ⁷⁻⁸ Sã to buheina sehe macaru chuare sã nuchuna wahari baharo cūiro tiro tói tjua nuju sare. Á so nuju saro Samaria macaricoro tí coparu co waro to wihichu Jesu ticorore core siniha:

—Core waga yuhare —niha.

⁹ —Mūhu judio masano jira. Yuhu sehe Samaria macaricoro jija. ¿Dohseacu yuhare core sinijari mūhu? —niha ticoro Jesure. Judio masa Samaria macainare ñu tuhtiina jira. Á jiro ticoro á niha.

¹⁰ To á niri baharo Jesu ticorore o sehe ni yahuha:

—Mūhare Cohamacu to yoadoho duarire masico, mūhare core sinirirore masico, mūhu yuhu sehere siniboa. Mu á sinichu paye co sehere waboa yuhu. Tí co sehe catichu yoara —niha Jesu ticorore.

¹¹ To á nichu tuhoro ticoro o sehe ni yuhtiha tire o:

—Ne mūhare situ mariahna. Wiho mejeta ahri copa cūari copa jira. ¿Á jicu ahri catichu yoaa core nohopu wabocari mūhu? ¹² Mari ñichu cjiro Jacobo panopu macariro ahri copare marine cūa tiha. Tiro, to pohna, to nuina cūhu ahri core sihnia tiha. “Paye core waboa yuhu” nicu, ¿Jacobu yuhdoro masiriro jijari mūhu, á ni tuhotucu? —niha ticoro.

¹³ To á nichu Jesu o sehe ni yuhtiha:

—Jipihitina ahri core sihniina, pari turi ñahma yapioahca. ¹⁴ Ya co sehere sihniina ne pari turi ñahma yapio. Á jia ya core sihniina Cohamacu mehne á jirucuahca. Ma pohtarpu co to á wijaarucuro seheta ya co ne pihtisi —niha Jesu.

¹⁵ To á nichu tuhoro numino sehe o sehe niha:

—Ne pari turi yu ñahma yapioerahto sehe tí core waga yuhure. Á jico pari turi ne òpure co wasi —niha ticoro.

¹⁶ To á nichu Jesu ticorore ò sehe ni yahuha:

—Tí pja pinihta mu manure pjico wahaga. Pji tuhsu òpu taga tiro mehne —niha Jesu ticorore.

¹⁷⁻¹⁸ —Manu marienicoro jija yuhu —niha ticoro.

—Potocáta nimana muhu. Muhu cinco tahari manu ti tuhsu mare. Tuhsu, mipure muhu mehne jiriro mu manu jierara. Á yoa “Manu marienicoro jija” nico, potocáta nimana muhu —niha Jesu ticoro.

¹⁹ To á nichu turo ò sehe niha ticoro:

—Ne, Cohamacu yare yahu muhtariro jira muhu, yu tuhotucha. ²⁰ Sá ñachusuma cjiri ahdu tucuru Cohamacu ño payoa tiha. Á jina masa sehe judio masa “Jerusaléi Cohamacu ño payoro cahmana masare”, nia tire masa judio masa —niha ticoro.

To á nichu Jesu ò sehe ni yuhtiha:

²¹ —Numino yuhure tuhosiniga. Baharopu ahdu tucui, Jerusalépu cuhure mari Pucure ño payosi masa. ²² Masa sehe masa ño payorirore masierara. Masare yuhduchu yoahitiro judio masuota jira. Á jina sá judio masa sehe sá ño payorirore masija. ²³ Mipure baharopu cuhure Cohamacu potocá ño payoina ti noano tuhotua mehne tirore ño payoahca. Tó sehe mari ño payochu cahmana Cohamacu. ²⁴ Cohamacu pjacu marieriro to jichu masa tirore ñuerara. Á jia tirore ño payoa, ti noano tuhotua mehne tirore noano potocá ño payoro cahmana masare —niha Jesu.

²⁵ To á nichu ta ticoro ò sehe ni yuhtiha:

—Mesia, “Cristo” ti niriro sehe masare yuhduchu yoahitiro, to tahti cjihtiare masija yuhu. Tiro taro, marine jipihtiare buhe pahñonohca —niha ticoro.

²⁶ —Yuhata jija Cristo —niha Jesu ticorore.

²⁷ To á ni yahuchu waro wihina sá to buheina sehe Jesu numino mehne to durucuhu ñana, cúa wahi. Á cwapanahta “Dohse cahmajari muhu? ¿Dohse ni nijari muhu ticorore?” ni sinitu ñuerahi. ²⁸ Á jiro numino to siture tói duhu daponoca, macapu waha, masare yahuro, ò sehe niha:

²⁹ —Yu yoari cjirire yahu pahñorirore ñana taga masa. Tiro potocáta Cristo jiboca pa tehe nino —niha ticoro.

³⁰ To á nichu tuhoa tí maca macaina sehe Jesure ñua taa nire. ³¹ Tí pjare sá Jesu buheina sehe tirore tuoro chu dutimai:

—Buheriro, chuga —nimai sá.

³² —Soro jia chure cjuaja yuhu. Tíre masa masierara —nire tiro.

³³ To á nichu tuhona sá basi ò sehe ni durucui:

—¿Paina tirore chure wa tuhsuari? —ni sá basi.

Sá á nichu Jesu ò sehe ni yahure:

³⁴ —Masa sehe chu ji coara. Yuhure warocariro to cahmaare yoacu ji coaja yuhu sehe to yuo ditiriro seheta yoa pahñocu tacu. ³⁵ “Cuatro sári duhsara dicha naahto”, wese purro to niriro seheta masa sehe ni tuhotuena tjiga. “Cohamacu yare sá yahuho duhsasinina”, ni tuhotuena tjiga. Potocá niita nija masare. Mipuru pinihtare masare ñuga. Dicha tichu masa naari pja to jiriro seheta, mipuru pinihta masa yu buheare ti tuhohti pja jiro nina. ³⁶ Toaa dichare naainare ti wapariro seheta yu yaina cjihti naainare yu yare buheinare ti á yoari wapa tinare noano yoahitja yuhu. Tí á buhechu tuhoa yu buheare tuhona yu yaina sehe Cohamacu mehne jipihtia dachoripe jirucua hca. Á jia tinare buhe muhtaina, baharo yu yaina jichu yoaina cuhu cano potori wahcherucua hca. ³⁷ “Cairo toa muhtariro jira. Pairo sehe toaa dichare nariro jira”, nia tiha panoru. Tí potocá tjira. Tí á niriro seheta cáina yu yare yahu muhtaina jira. Paina sehe yu yare buhe yu yaina jichu yoaina jira. ³⁸ Wese purro to yaina dahrainna toaeraina ti jipachuta to toaa dichare tinare naa dituro warocara. Tó seheta masare buhe muhtaineraina masa jipachuta yu yaina cjihti yoa duticu warocaja masare. Paina sehe tinare buhe muhta tuhsure. Tí buherinapure pari turi buhe namona, yu yaina jichu yoanahca masa sehe. Á jina buhe muhtaina sehe ti yoadohoro mehne painare yu yaina jichu yoanahca masa —nire Jesu.

³⁹ Tí pjare Samaria macaricoro “Yu yoari cjirire tiro yahu pahñore”, to á nichu tuhoa Samaria macaina payu Jesure wacú tua, tirore cahmaha. ⁴⁰ Á jia Samaria macaina Jesu cahai sua, “Sá mehne tjuasiniga”, nire tirore. Tí á nichu sá cuhu tiro mehne pu dacho tói tjuasinii. ⁴¹ Paina cuhu payu Jesure tuhoa cahmare tirore. ⁴² Ó sehe nire masa numinore:

—Wahmanopure mu yahurire tuhona, Jesure cahmahi. Mipuru pinihtare Jesu to durucua tuhona tirore wacú tuana, tirore cahmaja. Á jina tiro sehere tuhona ahri yahpa macainare pichacapu wahaborinare yuhduchu yoariro potocá to jichu mipuru sá masija —nire masa Samaria macaricorore.

Puhtoro macunore dohatirirore noariro wahachu yoaha Jesu

⁴³ Pu dacho baharo Jesu sare Galilea yahparu suho wahare. ⁴⁴ Wahmanopure ò sehe nia tire tiro: “Cohamacu yare yahu muhtarirore to ya yahpa macaina tirore ño payoerara. Á jia yuhure ño payoerara ò macaina òi yu buchariro jichu”, nia tire

Jesu. ⁴⁵ Ā jia Galileapɔ to sɔchɔ tó macaina tirore noano piti bocare. Tó pano Jerusalēi bose nɔmɔi Jesu Cohamacɔ tuaa mehne to yoachɔ ñɔrina jire tina.

⁴⁶ Ā yoa Canápɔ Galileai jiri macapɔ core vino to wahachɔ yoari macapɔ wahaa wahai sã tiro mehne. Caná चाहai jiri macai Capernau wama tiri macai jipihtina bui puhtoro docai jiriro puhtoro macɔno dohatiro niha. ⁴⁷ Tuhsɔ, Jesu Judeapɔ jiriro Galileapɔ to sɔchɔ puhtoro tãhoha. Tiro tãhoro Jesu cahapɔ wihire:

–Yɔ macɔ yariaro nihre. Ā yoa tirore noariro wahachɔ yoai taga –ni tuaro mehne pjire tirore.

⁴⁸ To Ā nichɔ tãhoro Jesu ð sehe ni yãhtire: –Cohamacɔ tuaa mehne yɔ yoachɔ ñɔnerana, ne yãhare wacũ tuaerara mɔsa –nire Jesu tirore.

⁴⁹ To Ā nichɔ puhtoro sehe ð sehe nire: –Puhtoro, yɔ macɔ to yariahto pano taga –nire tiro Jesure.

⁵⁰ –Tjuaahga. Mɔ macɔ catica –nire Jesu. To Ā nichɔ tãhoro, “To niriro seheta catirohca yɔ macɔ” nino, puhtoro tjuaa wahare. ⁵¹ Ā tjuaarucirirore to cahamaca tirore piti boca, ð sehe ni yãhuha:

–Mɔ macɔ catihre –ni yãhuha tina tirore. ⁵² –¿Noho waroi sã jichɔ noariro wahari tiro? –ni sinituha tiro to cahamacare.

–Canãre cohari pja baharocã juaro suhure tirore –niha tina.

⁵³ Tí Ā nichɔ tãhoro ð sehe ni tãhotuha tiro: “Jesu yãhare to Ā ni yahuri pjahta juaro surua wahari jire”, ni tãhotuha puhtoro sehe. “Potocãta nino niri jira yãhare” nino, tiro jipihtina to coyea mehne Jesure wacũ tuaha.

⁵⁴ Jesu Judea yahrapɔ jiriro Galilea yahrapɔ to suri baharo puhtoro macɔnore noariro to waharire mari quihõchɔ pãa taha Cohamacɔ to tuaa mehne yoa ño tuhsare Jesu.

5

Tini masierarirore noariro wahachɔ yoaha Jesu

¹ Baharo judio masa Cohamacure sã ño payori bose nɔmari jichɔ Jesu Jerusalēpɔ sure tjoa. ² Tó oveja wama tiri sopaca चाहai cuhɔari copa jihre. Sã judio masa ya mehne nia Betesda wama tiri copa jihre. Tí copa चाहai cinco tihamahnoera tahti poca jihre. ³ Tí tahti pocai payɔ dohatiina coãre. Capari ñɔneraina, cã buhusehe dahporo ñaina, pjacɔ buhaina tina tí copa चाहai jia, [co ñuhmi mɔa mɔjanore cohtaa nire. ⁴ Tórpɔ buharo tí copa macaa core cãa tahari ñuhmichɔ yoa mɔjare anjo. Tí copa macaa co ñuhmiri baharo ña mio muhtariro sehe dohse jiare dohatiare cjuariro noariro wahare.] ⁵ Ā yoa tó treinta

y ocho cãhmari waro dohatiriro jire. ⁶ Tó to coãchɔ ñuno to Ā yoari pja dohatiriro jichɔ masire Jesu tirore. Ā masino tirore ð sehe ni siniture:

–¿Pjacɔ dohatia marieriro ji duajari muhɔ? –nire Jesu.

⁷ To Ā nichɔta dohatiriro ð sehe ni yãhtire: –Tí co to ñuhmichɔ yãhare co jiri copapɔ naboriro mariahna. Tí copapɔ yɔ ña mio duapachɔta paina sehe yɔ pano ña ña mio muhtaruraca –nire tiro Jesure.

⁸ –Wahcãrucaga. Mɔ coãri cahsarore naa, wahaga –nire Jesu tirore.

⁹ To Ā nichɔta dohatiriro sehe to coãri cahsarore naa, ducu ducare. Tí dacho Sabado judio masa sã sori nɔmɔ jire. ¹⁰ Tí dachoi Jesu to Ā yoachɔ ñua judio masa sã puhtoa sehe dohatiriro cjirore ð sehe ni yãhuha:

–Michare Sabado dacho mari sori nɔmɔ jipachɔta mɔ coãri cahsarore naahna muhɔ. Ā yoacɔ mari dutiare yãhdɔrucacai nina muhɔ –niha tina tirore.

¹¹ –Yãhare yɔ dohatiare cohãiro sehe ð sehe nire yãhare: “Mɔ coãri cahsarore na, wahaga”, nire tiro yãhare –ni yãhtihã dohatiriro cjiro.

¹² –¿Tiro mehare ña niriro sehe diro baro jijari tiro? –ni sinituha tina.

¹³ Tó masa payɔ tí jichɔ ñuno Jesu sehe waha tuhsãha. Ā jiro dohatiriro cjiro sehe tirore noariro wahachɔ yoarirore to wamare masieraha. ¹⁴ Baharo Cohamacɔ wuhɔi Jesu tirore piti boca, ð sehe ni yãhare: –Tuhosiniga muhɔ yãhare. Mipãre noano pjacɔ tira muhɔ. Ñaare yoa namoi tjiga. Pari turi ñaare yoa namocɔ mɔ dohatiriro yãhdoro wahaihca muhɔ –nire Jesu tirore.

¹⁵ To Ā niri baharo dohatiriro cjiro sehe sã judio masa puhtoa tirore sinituha cjiro cahapɔ suru, ð sehe ni yãhuha tina:

–Jesu wama tiriro yãhare noariro wahachɔ yoahre –ni yãhuha tiro.

¹⁶ Ā yoa Sabado jichɔ Jesu dohatirirore to dohatiare to cohãchɔ masia judio masa sã puhtoa sehe tirore ña tuhtia, yahusãa dua ducare.

¹⁷ Ā tirore tí yahusãa duachɔ masino Jesu sehe ð sehe ni yãhare tina:

–Yɔ Pɔcɔ mipure dahrasinina. Yɔhɔ cãhɔ dahrasinii nija –ni yãhare tirore yahusãa duainare.

¹⁸ To Ā nichɔ judio masa sã puhtoa sehe tiro mehne tuaro suaa, tó pano tí niriro yãhdoro tirore wajã duare. Sabado dachore sã sori nɔmure cãirore to noariro yoachɔ ñua tina suare. Ā suaa tiro Cohamacure “Yɔ Pɔcɔ” to nichɔ tãhoca, tina sehe tó pano tí niriro yãhdoro sua namoha tjoa. “Yɔhɔ Pɔcɔ” nino, Jesu to basi ‘Cohamacɔ mehne cãno potori jija’, ni wacũca tiro’, ni tãhoture judio masa sã puhtoa.

Jesu Cohamacu to warocariro jira

¹⁹ Æ yoa Jesu tinare ð sehe ni yahure:

—Potocã musare niita nija. Yuhu, Cohamacu macano, yu mu suro yoeraja. Yu Pucu to yoirire ñucu, tîre yojaja. ²⁰ Yu Pucu yuhure, to macanore, cahîna. Æ jiro to yoirire yuhure ño pahîona. Ahri mipu to tuaa mehne yu yoiri yuhdoro tiro payere yoa dutirohca yuhure. To Æ yoa dutichu to tuaa mehne yoa ñoihca yuhu. Æ jina ñu canahca musa. ²¹ Yu Pucu yariarinare to masoriro seheta yuhu cãhu yu cahmainare masoihtja. ²²⁻²³ Ne yu Pucu sehe masa ti ñaa buhirire buhiri dahreriro jierara. Yuhu sehere tîre ti ñaa buhirire buhiri dahrehtirore cûre yu Pucu. Jipihtina masa tirore ti ño payoriro seheta yuhu cãhure ti ño payohti cjihtire buhiri dahrehtirore cûre yuhure. Yuhure to macanore ño payoerana yu Pucu cãhure ño payoerara musa. Tiro jira yuhure warocariro —nire Jesu.

²⁴ Æ ni tuhsu ð sehe ni yahu namore:

—Potocãta musare nii nija. Yu durucare tuhoina yuhure warocarirore wacû tuaina jipihtia dachoripe manopu Æ jirucuahca. Æ jicu tinare buhiri dahresi yuhu. Æ jia tina pichacapu wahaborina yuhdahca. ²⁵ Potocã musare niita nija. Pichacapu wahahtina yuhure Cohamacu macanore ti tuhohti pja mipu jira. Baharopu cãhure yuhure tina tuhoahca tjoa. Æ tuhoa tuho nanaina sehe Cohamacu mehne Æ jirucuahca. ²⁶ Cohamacu yu Pucu sehe Æ jirucuchu yoiriro jira. Æ jiro yuhure to macanore Æ jirucuchu yoah tiro ji dutire tiro yuhure. ²⁷ Æ jicu yuhu masno Cohamacu to warocariro yu jichu tiro masare buhiri dahrehtirore cûre yuhure. ²⁸ Ahrire tuhona, tuho caena tjiga musa. Pa dachopure jipihtina yariaina masa coparipu jiina yu durucuchu tuhoahca. ²⁹ Æ tuhoa, noaare yoaina cjiri jipihtia dachoripe Cohamacu mehne jihtina cjihti masa mujaahca. Ñaare yoaina cjiri sehe ñaare ti yoiri buhiri pichacapu wahaahca —ni yahure Jesu.

³⁰ Æ ni tuhsu ð sehe ni yahu namore:

—Yuhu yu mu suro ne yoeraja. Ne yu basi yu cahmano yoa duaeraja. Yuhure warocariro to dutiriro seheta yoa duaja. Æ jicu to niriro seheta buhiri dahreja. Tuhsu yuhu masare buhiri dahrecu quihõnota yojaja. ³¹ “Yuhu tuariro jija”, yu ni yahuchu “Mu yahua ne quihõno jierara”, ni masiboca musa. ³² Pairo jira yuhure yahuriro. Tiro João sehe masare yahure yuhure. Masare yuhure to yahuri cjiri quihõno tjira. Tîre yuhu noano masija. ³³ Musa paina sehere Joãopure yuhure sinitu dutina warocare. Æ jiro potocãta yahure tiro musare. ³⁴ “Cohamacu macano jira ahriro”, yuhure

ni yahuhtinare macaeraja. Æ macaerapacuta João masno to jipachuta yuhure “Cohamacu macano jira”, to ni yahurire yahui nija. Musa yuhure wacû tuahti cjihtire, musa pichacapu wahaborina musa yuhdahhti cjihtire yuhure João to yahurire yahui nija. ³⁵ Sihãria mahaa dachoricã to ñu masichu yoaró seheta João musare buhe muhtano mahanocã to catiro puro musare masichu yoare. To Æ buhechu tuhona mahaa dachoricã wahchere musa. ³⁶ Yu jia tiare to Æ buhepachuta Cohamacu sehe yu jiare noano yahura. To Æ yahuchu João yu jiare to yahua yuhdoro jira Cohamacu ya yahua. Æ jicu Cohamacu to tuaa mehne yuhure to yoa dutiri cjirire mipu yoi nija. Ahrire yu yoachu ñana potocãta Cohamacu to warocariro yu jiare masina musa. ³⁷ Æ yoa yu Pucu yuhure warocariro to basi “Tiro yu warocariro jira”, ni yahura musare. To Æ ni yahupachuta to durucare ne tuhoerare musa. Æ jina musa tirore ne masierare. ³⁸ Yuhure Cohamacu warocarirore musa ne tuho duaerare. Æ jina musa Cohamacu yare ne cahmaerare. ³⁹ Cohamacu yare ti joari pûre musa buhena, “Mari ahri pûre buhena jipihtia dachoripe Cohamacu mehne Æ jirucuanhca”, nina musa. Tí pûta yuhure yahura. ⁴⁰ Tí pû yuhure to yahupachuta musa sehe yuhure cahmaerara. Jipihtia dachoripe Cohamacu mehne musa Æ jirucuhiti cjihtire yuhure sini duaerara musa —ni yahure Jesu.

⁴¹ Æ ni tuhsu ð sehe ni namore:

—Yuhure musa ño payoerachu ñucu suaeraja yuhu sehe. ⁴² Musa sehe Cohamacu musa cahîrachu masija yuhu. ⁴³ Cohamacu yu Pucu yuhure to dutiriro seheta yu tapachuta musa yuhure cahmaerare. Pairo sehere Cohamacu tirore warocareriro to jipachuta to mu suro to tapachuta tiro sehere cahmanahca musa. ⁴⁴ Paina masa musare ti ño payochu cahmana musa. Cohamacu musa mehne to ji coachu cahmaerara musa. Tiro dihta Cohamacu waro jira. Æ cahmaerana yuhure tuhoerara musa. Yuhure wacû tuaerara. ⁴⁵ Musare yu Pucupure ne yahusãsi yuhu. Tîre masiga musa. Moise cjiro to joari pû sehe musare yahusãnohca. “Tí pû macaa dutiare mari yoa pahîona, Cohamacu cahai wahanahca”, musa niri pû sehe musare yahusãnohca. ⁴⁶ Moise cjiro to joari pûi yuhu sehere yahuha. Æ jina tí pûre “Potocã tjira” nina, yu yahua cãhure “Potocã tjira”, niboã musa. ⁴⁷ Moise cjiro to joari pûre “Potocã tjira” nierana, yu ya durucua cãhure “Potocã tjira”, nisi musa —nire Jesu tinare.

6

Cinco mil bui masare chua waha Jesu (Mt 14.13-21; Mr 6.30-44; Lc 9.10-17)

¹ Ā to buheri baharo yoa cureri pja baharo Galilea wama tiri bucupariro pa buhusehe coapu sã to buheinare Jesu suho pahãa wahare. Tí taro pjiri taro pa wama Tiberia wama tire. ² Tó pano Galilea yahpai Jesu Cohamacu tuaa mehne yoa ño, dohatiinare ti dohatiare to cohãchu masa ñua tire. Ā jia Jesu to pahãchu ñua, masa payu tirore nunu ti pahãre. ³ Ā yoa baharo ti taro duhtu cahapu Jesu sãre suho pahã su, tãcupu muja, ta buipũ sãre suho dujire. ⁴ Tí dachore Pascua wama tiri bose numu cjihto, sã judio masa ya bose numu suhti dacho cjihto mahaa dachoricã duhsare. ⁵⁻⁶ Tópu dujiro, Jesu payu masa to cahapu ti tarucuchu ñure. Ā ñuno Felipere õ sehe ni sinitu ñure:

—¿Ahrina masa ti chũti cjihtire nohopu nuchunahcari mari? —nire Felipere.

Jesu to basi to yoahire masiparota Felipere ā sinitu ñure “¿Dohse ni yuhtirohcari?” nino. ⁷ To ā sinitu ñuchu tuhoro Felipe sehe õ sehe ni yuhtire:

—Ocho sãri posa dahra wapataa niñeru mehne chuare mari nuchupachuta masare cãinare daacã chuare mari witipachuta ne mu susi —nire Felipe Jesure.

⁸ Ā yoa paio, sã mehne macariro Andre, Simo Pedro baharo sehe Jesure õ sehe ni yahure:

⁹ —Ahriri wahma wahmuã tariro cinco pão curirire, ā jichu wahi puarocã cãhure cjuara. Wiho mejeta masa sehe payubia jira. Ā jiro ahri mahanocã chua ne mu susi —nire Andre.

¹⁰ To ā niri baharo:

—Masare duji dutiga musa —nire Jesu sã to buheinare.

Tó daacã tja jiro jire. Sã duji dutichu masa nuju su pihtiare tja bui. Tina muã dihtare sã quihõchu cinco mil wahtaroi jire. ¹¹ Tí ā nuju sachu ñuno Jesu sehe pãore na, Cohamacure “Noana”, nire. Ā ni tuhsurota sãre to buheinare witi dutire. To ā dutichu sã sehe tó dujiinare witi wahcãi. Tuhsu, puaro wahi cãhure witihi tinare. Jiphtinare noano ti chu duaro puro chuare tinare witihi. ¹² Baharo masa sehe yapi yuhdua wahare. Tí ā yapi yuhduachu ñuno Jesu sãre õ sehe ni yahure:

—Tí chu duharire noano saa cahmachu pahñoga. Ā yoana ti chu duhaare ne bosí —nire.

¹³ To ā nichu tuhona sã sehe cinco pão curiri duhsarire sã saa cahmachuchu doce puhuse waro wijare. ¹⁴ Ā jia Jesu tĩre to tuaa mehne to yoa ñochu ñua, masa sehe õ sehe nire:

—Potocãta jira. Ahriri Cohamacu yare yahu muhtariri ahri yahapu “Tarohca”, ti niriro mari cohtariri tjira —nire tina.

¹⁵ Ā jia tina Jesure ti puhtoro jihtoro cjih-tore ñaha sõ duamare. Jesu ti ā ni tuhotaure masino pari turi cãirota tãcupu wahaa wahare.

Jesu co bui ducu wahcãha
(Mt 14.22-27; Mr 6.45-52)

¹⁶ Ñamichahapu sã to buheina bucupariropu buhai. ¹⁷ Tópu buhu su, dohoriapu samu, Capernau wama tiri macapu majare pahãi. Tí pjare sã majare pahãri pjare ñamiru jire. Jesu sehe sã cahapu tju wihierasinare mini. ¹⁸ Sã ā majare pahãno watoĩ wihnono tuaro sãre tachu, pahcõri bujua pahcõri wahcãre. ¹⁹ Sã cinco kilómetro suboro waroi sã sachu waro Jesu sãre mu sure. Co buipũ to tachu ñui sã. Ā sã cahai to tachu ñua, sã sehe cua yuhdua wahacũru. ²⁰ Sã ā cua yuhduachu ñuno tiro sãre õ sehe ni yahure:

—Cuiena tjiga. Yuhuta jija —nire Jesu.

²¹ To ā nichu tuhona sã wahchea mehne tirore piti boca samu dutihi. To samuri baharocãta wacũenoca sã wahari yahpapure pahã su tuhsuahi.

Masa sehe Jesure macaha

²² Ā yoa tí ñamine masa bucupariro pa buhusehe coapu tjuaina sehe sã yaria busoca, sã pahãntia cãria to jichu ñure. Tia mehne sã sahsero sã pahã wahachu cãhure ñure tina. Tuhsu Jesu sã mehne to pahãerachu ñure tina. Ā jia pa dachoi tirore tó cohtaa niri jimare tina. ²³ Tí ā cohtaroi watoĩ, paye buso, Tiberia wama tiri macapu taa buso Jesu Cohamacure “Noana”, to niriro cahacã curerorpu, masare to chua witiro cahacã curerorpu wahã sãri jire tí buso. ²⁴ Ā yoa sãre Jesu to suho jimariroro to mariachu ñua, masa ti busorpu samu, Capernaupu sãre nunu ti pahã tari jire, Jesure maca taa.

Jesu catichu yoaã chua yoaro sehe jiriro jira

²⁵ Tí pahã wihiri baharo, Jesure boca wihi, tina masa õ sehe ni sinitu ñure tirore:

—Buheriro, ¿dohse jichu tari muhu õpuare? —ni sinitu ñure tina.

²⁶ Tí ā ni sinitu ñuchu, Jesu tinare õ sehe ni yahure:

—Potocã niita nija musare. Yuhu musare Cohamacu tuaa mehne yu yoa ñopachuta yuhure sehere wacũ tuaerara musa. Yuhure wacũ tuaerapanahta yuhure macana musa. Yuhu mehne bujua chu, musa yapirina cjiri jina yuhure maca tari jira musa. ²⁷ Wiho mejeta chua ne ā jirucuerara. Baharorpu pihtia wahara. Ā jina tĩre ā macarucena tjiga musa. Paye baro chua soro jia chuare macaga musa. Tí soro jia chuare bocana jiphtia dachoripe Cohamacu mehne jirucunahca. Ā jia tí chua pinihta ne pihtisi. Tí

chuaře yuħu masuno Cohamacu warocariro musare waihtja. Cohamacu yu Pucu yuhure ti baro chuaře wa dutiriro jira. Tirota to warocariro yu jiare ño tuhsure musare – nire Jesu.

²⁸ To ā nichu tuhoa tina õ sehe ni sinitu ñure tirore:

–¿Cohamacu to yoa dutiare yoana tana dohse yoanahcari sã? –ni sinitu ñure tina.

Jesu sehe ti ā nichu tuħoro, õ sehe ni yuhtire tinare:

²⁹ –Cohamacu musare õ sehe dutira. To warocarirore masa noano tuho, wacu tuachu cahmana tiro –ni yuhtire Jesu.

³⁰ To ā nichu tuhoa tina õ sehe nire tjoa:

–Cohamacu warocariro jicu tiro to tuaa mehne yoa ñoga sãre muħure sã noano wacu tuahto cjihtore. ¿Yaba barore yoa ñobocari muħu? ³¹ Mari ñuchusuma cjiřipũ panopũ macaina masa marienopũ manã wama wama tiare chua tiha. Cohamacu yare ti joari pũpũ õ sehe ni yahura: “Tiro tinare muano macaa chuaře waa tiha ti chuhti cjihtire”, ni joaa tiha Cohamacu yare ti joari pũpũ. ¿To ā yoariro seheta yoaihcari muħu cãhu? –nire tina.

³² Ti ā nichu tuħoro õ sehe ni yahure Jesu tinare:

–Potocã musare niita nija: Moise cjiro muano macaa chuaře waera tire musare. Yu Pucu sehe muano macaa chuaře potocã jia chuaře musare wariro jira. ³³ Cohamacu to chua muanopũ duji ta, jipihtiro yahpa macainare catichu yoa masina –nire Jesu tinare.

³⁴ –Puħtoro, dachoripe ti baro chuaře ā warucuga sãre –nire tina.

³⁵ Ti ā nichu tuħoro, Jesu sehe õ sehe ni yahure tinare tjoa:

–Yuhu sehe catichu yoaa chua yoaro sehe jiro jija. Mari ya chuaře mari churi baharocãta doicãta jũca baa wahaja mari tjoa. Sihnia cãhure mari sihniri baharocãta ñahma yapiõa wahaja tjoa. Wiho mejeta diro yuhure cahmariro, yuhure wacu tuariro, ne jũca baaerariro yoaro seheta to wahchea sehe tirore ne pihtisi. ³⁶ Musa sehe yuhure ñũpanahta yuhure wacu tuarasinina mini. Tireta musare yahumahi yuhu. ³⁷ Jipihina yu Pucu yu yaina cjihtire yuhure to cũrina sehe yuhure cahmaahca. Ā jii yuhure cahmainare ne cohãsi yuhu.

³⁸ Muanopũ tacu yu cahmano yoai tai nierahi. Yuhure warocariro to cahmariro seheta yoai tai nii yuhu. ³⁹ Ahrita jira yuhure warocariro to cahmaa waro: Jipihina yu yaina cjihti yuhure to warina cjiřire yu boerachu cahmana yuhure warocariro pihtiri dachoi ti masa mujahto cjihtore. ⁴⁰ Jipihina yuhure Cohamacu macunore ñuina, yuhure wacu tuaina jipihtia dachoripe tiro mehne

ti jirucuchu cahmana yu Pucu. Ā jicu pihtiri dachoi tinare masoihtja –nire Jesu.

⁴¹ “Yuhu muanopũ taa chua yoaro sehe jiro jija”, to nichu tuhoa judio masa sã puħtoa sehe tiro mehne sua, ⁴² ti basi Jesure ñano ni durucure:

–¿Ahriro Jesu Josẽ macuno jierajari? To puħtoro, to pocoro cãhure mari masija. Tuhsu mari yoaro sehe pjacu tiriota jira. ¿Ā jiparota dohsearo “Muanopũ tahi”, nijari tiro? –ni suare tina.

⁴³ Ti ā nichu tuħoro Jesu õ sehe ni yahure tinare:

–Musa yuhure ñano ni durucuenta tjiga.

⁴⁴ Yu Pucu yuhure warocariro sehe masare yuhu sehere cahmachu yoara. To ā yoerachu masa sehe yu yaina ji masieraboa. Pihtiri dachoi yu yainare masoihca yuhu. ⁴⁵ Cohamacu yare yahu muhtaina cjiři sehe õ sehe ni joaa tiha: “Cohamacu tinare buherohca”, ni joaa tiha Cohamacu yare yahu muhtaina cjiřipũ. Jipihina yu Pucu to buheare tuhoina, tirore yuhtina yuhure cahmana. Ā jia yu yaina jira.

⁴⁶ Yu Pucure ne cãiro masuno ñerare. Yuhu Cohamacu warocariro dihta yu Pucure ñuhi. ⁴⁷ Potocã niita nija musare. Yuhure wacu tuariro jipihtia dachoripe yu Pucu mehne ā jirucurohca. ⁴⁸ Yuhu catichu yoaa chua yoaro sehe jiro jija. ⁴⁹ Musa ñuchusuma cjiři masa marienopũ manãre chua tiha. Ā tíre chũpahta yariaa waha tiha. ⁵⁰ Muanopũ taa chuaře yu nia chuaře masuno chũro, ne pichacaru wahasi. ⁵¹ Yuhu muanopũ taa chua catichu yoaa chua yoaro sehe jiro jija. Ahri chuaře chũriro jipihtia dachoripe yu Pucu mehne ā jirucurohca. Ahri chua catichu yoaa chua yoaro sehe jia yu pjacũta jira. Jipihtiri yahpa macaina Cohamacu mehne ti ā jirucũti cjihtire yu pjacũre waihtja. Ā wacu yariaihca –nire Jesu.

⁵² To ā nichu tuhoa sã coyera judio masa sehe tíre õ sehe ni durucure ti basi:

–¿Ahriro dohse yoa to pjacũre chuhti cjihtire warohcari? –nire tina ti basi.

⁵³ Ti ā nichu tuħoro Jesu õ sehe ni yahure:

–Potocã niita nija musare. Yuhu masuno Cohamacu warocariro jija. Yu pjacũre chũerariro, yu dire sihnierariro Cohamacu ya catia mehne ā jirucusi. ⁵⁴ Yu pjacũre chũriro, yu dire sihniriro yu ya catia mehne ā jirucurohca. Ā jicu pihtiri dachoi tirore masoihtja. ⁵⁵ Yu pjacu potocãta chua waro yoaro sehe jira. Yu di potocãta sihnia waro yoaro sehe jira. ⁵⁶ Yu pjacũre chũriro yu dire sihniriro yuhu mehne wahchea mehne jirucura. Yuhu cãhu tiro mehne wahchea mehne jirucuja. ⁵⁷ Yu Pucu yuhure warocariro ā jirucura. Ā jirucuro, yuhu cãhure ā jirucuchu yoara. Ā jia yuhure ā jirucurore

masa chua, Cohamacu mehne manopu ã jirucuahca tina cãhu. ⁵⁸ Ahrita jira manopu taa chua. Mari ñuchusuma cjiri maná wama tia ti churi cjiri yoaro sehe jierara ahri chua. Tina sehe tí chũare chũpahta yariaa wahaa tiha. Ahri chua sehere chũriro manopu ã jirucurohca —nire Jesu.

⁵⁹ Capernaupu judio masa sã buheri wãhũi Jesu buhero, ata ni yahure.

Jesu buheare tuhona manopu ã jirucunahca mari

⁶⁰ Payu Jesure cahmaina to ã ni buheare tuhoa, õ sehe ni durucure:

—Ahri buhea nucu mijona. Æ jina mari tuho duaera cureja —ni durucure tina ti basi.

⁶¹ Ti ã nichu Jesu sehe ti durucure masire. Æ masino tiro õ sehe ni siniture tinare:

—¿Ahri buheare tuhona suajari musa? ⁶² ¿Yũhu masuno Cohamacu warocariro manopu yu tjuaa wahachu ñuna dohse ni tuhotubocari musa? ⁶³ Espiritu Santo masunore catichu yoara. Masa sehe ti basi catichu yoerara. Espiritu Santo masare to catichu yoariro sehta yu buhea sehe musare Cohamacu mehne ã jirucuchu yoara. ⁶⁴ Cãina musa mehne macaina ne yũhure wacũ tuaerara —nire Jesu.

Wahmanopure Jesu tirore wacũ tuaerainare masire. Tirore ñu tuhtinane ñohtiro cãhure masi tuhsure. Æ tirore wacũ tuaerainare masino “Cãina musa mehne macaina yũhure wacũ tuaerara”, nire Jesu.

⁶⁵ Æ ni tuhsu õ sehe ni namore:

—Õ sehe ni yahumahi musare: “Yu Pũcu sehe masare yũhu sehere cahmachu yoara. To ã yoerachu masa sehe yu yaina ji masieraboa”, musare nii nimahi —nire Jesu.

⁶⁶ To ã ni buhechu tuhoa payu Jesure cahmamarina cjiri tirore cohã, tiro mehne pari turi wahaerare. ⁶⁷ Ti ã yoachũ ñuno Jesu sãre doce to buheinare õ sehe ni siniture:

—¿Musa cãhu yũhure cohãnahcari? —ni siniture sãre.

⁶⁸ To ã nichu Simo Pedro õ sehe ni yũhtire tirore:

—Pãhtoro, sãre paio buheriro mariahna. Mu ya buheare tuhona Cohamacu mehne ã jirucunahca sã. Mu ya buhea dihta tíre yahura sãre. ⁶⁹ Æ jina sã mũhure wacũ tuaja. Æ yoa mũhu noariro, Cohamacu macuno to warocariro mu jichu sã masija. Æ jina mũhure cohãsi sã —nire Simo Pedro Jesure.

⁷⁰ To ã nichu tuhoro Jesu õ sehe ni yahure sãre:

—Yũhu sehe musare doce besehi. Wiho mejeta cãiro musa mehne macariro watino yairo cjihto jira —nire sãre to buheinare.

⁷¹ Æ nino Judare Simo Iscariote macunore nino niri jire. Juda sehe doce buheina sã mehne macariro Jesure ñu tuhtinane ñohtiro jire.

7

Jesu bahana tirore “Cohamacu macuno jira”, ni masieraha

¹ Baharo Jesu Galilea yahpai tinino wahare. Judea yahpai judio masa tirore wajã duare. Ti ã wajã duachu masino tiro ti yahpau wahaerare. ² Judio masa daa wãhusecã sã yohti numuri bese numuri mahanocã duhsatjãhre. ³ Æ jia Jesu bahana tirore õ sehe ni yahure:

—Judeapu wahaga. Tói mu yainare Cohamacu tuaa mehne mu ñohtiro cjihto wahaga mũhu. ⁴ Masare yoa ño duacu yaeraro cahmana mũhure. Yoa ñono cahmana. Potocãta Cohamacu tuaa mehne yoariro jicu tíre masare ñoga —nimare tina.

⁵ To bahana jipahta Jesure “Cohamacu macuno jira”, nierare. Æ jia, ã nire tina tirore. ⁶ Ti ã niri baharo Jesu õ sehe ni yahure tinare:

—Masa yũhure ti noano masihti pja duhsasinina mini. Musa sehe ñu duana bese numuri jichu waha masina. ⁷ Ahri yahpa macaina musare ñu tuhtierara. Yũhu ti ñaa buhirire yu yahuchũ tina yũhu sehere ñu tuhtira. ⁸ Bese numu jichu wahaga musa sahsero. Yũhure yu wahahto duhsasinina mini. Æ jicu yũhu sehe bese numarine ñu wahaerasinija —nire Jesu tinare.

⁹ Æ nino tiro Galileai tjuare.

Jesu daa wãhusericã ti yoari numuri bese numuri jichu wahaha

¹⁰ Bese numuripu Jesu bahana ti ñu wahari baharo Jesu cãhu ti baharo wahare. Æ waharo masa ti ñeraro watoi wahare. ¹¹ Bese numurihi jiina judio masa sã pãhtoa tirore macare:

—¿Nohoru jicari tiro? —ni sinituha tina.

¹² Æ jia masa cãhu Jesure payu yahuwajaha. Paina “Tiro noariro jira”, niha. Paina sehe “Tiro ñariro jira. Masare mahñoriro jira”, ni yahuwajaha tina.

¹³ Æ nipahta judio masa sã pãhtoare cuia, masa ti ñeraropu Jesure yahuwajaha.

¹⁴ Bese numuri dacho macai Cohamacu wãhuru Jesu sãa sũro, buhere. ¹⁵ To ã buhechu sã coyea judio masa tuho cuaa waha, õ sehe nire:

—¿Ahriro buheropu buhemahnoerariro jiparota dohsearo noano masi pahñonocajari? —nire tina tirore.

¹⁶ Ti ã nichu Jesu õ sehe ni yahure tinare:

—Yu buheri cjiri yu ya durucua jierara. Yũhure warocariro ya durucua sehe jira

ahri buhea. ¹⁷ Cohamacu cahmaare yoa duaina yu buhea sehere Cohamacu ya durucua ti jichu masiahca. Yu mu saro yu buherachu cahure masiahca tina. ¹⁸ Curo to mu saro to masia mehne buheriro jiro “Yuhu dihtare no payoga”, niriro jira tiro. Wiho mejeta yuhure warocariro sehere masa no payochu cahmaja yuhu sehe. Yu a nichu tuhona “Potocã durucuriro jira tiro. Ne mahnoerara”, ni masinahca masa.

¹⁹ Cohamacu dutiare Moise cjiro sehe cu tiha musare. To a cupachuta masa jipihitina ti dutia sehere ne yuhtiere. ¿Dohseana yuhure wajã duajari masa? —nire Jesu sa coyea judio masare.

²⁰ —Muhu tuho masierariro, wafino to chtotariro jira. Muhure wajã duaina mari-ahna —ni yuhtire tina Jesure.

Ti a nichu Jesu o sehe ni yuhtire:

²¹ —Sori numu Sabado jichu cu tahata Cohamacu tuaa mehne dohatiriro to dohatiare yu cohachu masa nu cuaa wahare. ²² Mari nuhusuma cjiro ranoru macaina sehe ti pjacure mahanocã cahsarocãre yihsoina ti yoariro seheta Moise cjiro yihso dutiha. To a dutichu Sabado mari sori numu jipachuta masanore to pjacure mahanocã cahsarocãre yihsoina masa. ²³ Sabado jichu masanore to pjacure mahanocã cahsarocãre yihsoina masa, Moise cjiro dutiri cjirore yoana tana. ¿Musa cuhu Sabado dachoi tire yoapanahata ti dachoi dohatirirore jipihiti to pjacure noariro yu yoachu nuha dohseana yuhu mehne suari masa? ²⁴ Yu yoarire masa noano masierapanahata, yuhure nuha tuhoutuena tjiga. Masa noano masiri baharo yuhure masa tuhoutua potocã tjiaha —nire Jesu.

Jesu wahmanoru to taritore yahuha

²⁵ To a ni yahuri baharo mahainaca Jerusalẽ macaina tirore o sehe ni yahuwajare:

—¿Ahriro judio masa puhto ti wajã duariro jierajari? ²⁶ A tirore ti wajã duapachuta jipihitina panoi masare buhero nina tiro. Wiho mejeta tirore wajã duaina jipahta a nuhocahna. “Tiro potocãta Cristo jira”, ¿ni tuhutubocari puhto sehe? ²⁷ Wiho mejeta ahriro Jesu to taritore sa masija. Cristo sehe masare yuhduchu yoahitiro to tachu to tariro sehere masimahnoerara. A jiro masare yuhduchu yoahitiro Cristo waro jierara Jesu —ni yahuwajare tina Jerusalẽ macaina.

²⁸ Ti a niare masino, Jesu o sehe ni tuaro sañurucu buhere Cohamacu wahu:

—Yuhure o sehe ni tuhutura masa: “Tirore masija. A jina to tariro cahure masija”, ni tuhutumana masa. Masa a ni tuhutupanahta yuhure warocarirore ne masierara masa. Yuhure warocariro

potocã niriro, potocã yoariro jira. Tirore ne masierara masa. ²⁹ Tirota yuhure warocare. A jicu tiro cahaputa tahi. A jicu yuhu sehe tirore masija —nire Jesu judio masare.

³⁰ To a nichu tuhoa tirore nuha duamare. Ti a nuha duapachuta Jesu to nuha yuhduhti pja duhsasinire. A jia tina tirore nuha masierare. ³¹ Paina masa sehe payu tirore wacu tua, o sehe nire:

—Ahriro Jesu sehe payu tahari Cohamacu to tuaa mehne yoa no tuhsare. Jipihitina paina yuhdoro Cohamacu tuaa mehne yoa nuha tiro. A yoarota Cristo Cohamacu to warocariro tjira ahriro Jesu —nire Jesure wahma wacu tua ducaina.

Fariseo curua macaina Jesure peresu yoa dutiha

³² Masa Jesure ti a ni durucuchu tuhoa sacerdotea puhto, fariseo curua macaina mehne Jesure nuha dutia warocaha surarare.

³³ A jiro Jesu judio masare o sehe nire:

—Mahaa dachoricã masa mehne jisinihca. A jicu baharocãta yuhure warocariro caharu wahaihca. ³⁴ Yu jihtoru masa waha masierara. A jina yuhure macapanahata ne bocasi masa —nire Jesu judio masare.

³⁵ To a nichu tuhoa tina ti basi o sehe ni durucure:

—¿Ahriro a nino nohoru wahabocari, masa tuhutuchu? ¿Griego masa cahai judio masa waha siteina ti jia macari cjiropu griego masapure buhero wahabocari ahriro? ³⁶ “Yu jihtoru masa waha masierara. A jina masa yuhure macapanahata ne bocasi”, to nichu ¿dohse nino baro ahriro a nijari? —ni durucure judio masa ti basi.

Catichu yoa marine yahuha Jesu

³⁷ Bose numuri pihtiri dacho ti dacho waro jiro nire. Ti dachoi Jesu toi ducuro, tuaro mehne sañurucu o sehe ni yahure:

—Nuha yapioina core ti tuaro cahmano seheta jipihiti dachoripe Cohamacu mehne masa jihtire tuaro cahmaina yuhure siniga. Masa a sinichu Cohamacu yaina musare ji dutiitja. ³⁸ Yuhure wacu tuainare o sehe ni joa tiha Cohamacu yare ti joari tju: “Mari pohtaripu catichu yoa co to a wi-jaarucuro seheta Cohamacu yaina mehne catichu yoariro a jirucurohca”, ni joa tiha Cohamacu yare ti joari tju —ni yahure Jesu judio masare.

³⁹ A catichu yoarirore wama payo yahuro “Yuhure wacu tuainare Espiritu Santo saarucu su muaharohca”, nino nire Jesu. Tiro manoru to mujaerasinichu Espiritu Santo sehe wihierasiniha.

Judio masa pu curua tju waha

⁴⁰ Jesu to ã nichu tuhoa, masa payu ò sehe ni durucure:

—Ahriri potocãta Cohamacu yare yahu muhtariro mari cohtariro jira —nire masa.

⁴¹ Ò sehe nire paina sehe:

—Ahriri Cristo marine yuhdachu yoahrtiro jira —nire.

Paina sehe ò sehe nire tjoa:

—Cristo taro, Galilea yahpa macariro jisi tiro. Ahriri Jesu sehe tó macariro tjira.

⁴² Cristo Davi cjiro panamino ji turiariro jirohca. Á jiro Davi ya maca cjiroi Beléi Cristo masa bajuaro hca. Ò seheta ni yahura Cohamacu yare ti joari púi. Ahriri Jesu sehe Beléi masa bajueraha. Á jiro tiro Cohamacu to warocariro Cristo waro jierara — nire tina.

⁴³ Á jia Jesure tuhomarina cjiri tju ware ti basi pua curua. ⁴⁴ Mahainacã masa sehe Jesure ñaha duamare. Á ñaha duapahta tirore ñahaerare.

Judio masa puhtoa Jesure ne wacũ tuaeraha

⁴⁵ Á yoa surara sacerdotea puhtoa cahapu fariseo curua macaina cahapu tjuaa wahaha. Ti tju sachu ñua tina surarare sinituha:

—¿Dohseana Jesure ñahaerari musa? —ni sinituha tina sehe.

⁴⁶ —Tiro noaputiario durucuro jihre. Paina tiro yoaro sehe durucuna ne mariahna —ni yuhtiha surara tinare.

⁴⁷ Ti ã nichu fariseo curua macaina sehe ò sehe ni yahuha:

—¿Musare to mahñochu “Potocã nino nica”, niri musa cãhu? ⁴⁸ Mari puhtoa Jesure wacũ tuaeraina jia ne tirore cahmaerare. Sã cãhu ã jina tirore cahmaeraja. ⁴⁹ Ahrina masa sehe Cohamacu dutiare Moise cjirore to cãrire masierara. Á masieraina jia Jesure wacũ tuaina jia tirore cahmana. Ti ã cahmari buhiri tinare Cohamacu buhiri dahrerohca —niha fariseo curua macaina.

⁵⁰ Fariseo curua macariro Nicodemo Jesure suhduro sariro cjiro tó jia tina mehne. Ti ã nichu tuhoro ò sehe niha tiro cãhu tinare:

⁵¹ —Jesu to ñano yoarire masieraja mari. Á masierana tiro marine to yahuhto pano tirore buhiri dahre masieraja mari. Á masierapanahta tirore buhiri dahrena, mari ya dutiare yuhdarcana nija mari — niha Nicodemo tinare.

⁵² To ã nichu tuhoa ò sehe ni yuhtiha tina: —¿Mahu cãhu tiro yoaro seheta Galilea macariro tjijari? Cohamacu yare ti joari tjure buhe pahñoga. Á buhecu, “Cohamacu yare yahu muhtaina ne cãiro mariahna Galileare”, ni buhe masiuhca mahu. Á jiro

ã nimacanocano nina Jesu —ni yuhtiha tina Nicodemore.

⁵³ [Ti ã niri baharo ti ya wuhusepu tjuaa wahaha.

8

Muno mehne ñano yoaricorore judio masa puhtoa wacũenoca su pja

¹ Jesu tacupu Olivo wama tidupu wahare.

² Á yoa pa dachoi bohrearo jichu Cohamacu wuhupu tiro sure tjoa. To ã sachu ñua masa payu tiro cahai cahmachure. Ti ã cahmachuchu ñuno tiro sehe dujtijãhno tinare buhe dacare. ³ To ã buhero watoi sã coyea judio masa buheina, fariseo curua macaina mehne tí wuhupu numinore na tare. Ticoro muno mehne to ñano yoachu waro wacũenoca su pja suha tina ticorore. Á su pja sua ticorore Cohamacu wuhupu na sãare tina. Na sãa su tuhsu jipihtina panoi ticorore duhu dapo, ⁴ ò sehe nire:

—Buheriro, ahricoro muno mehne ñano to yoachu waro wacũenoca ticorore su pja suhi.

⁵ Cohamacu dutiare Moise cjiropu marine to cãri ò sehe nina: “Muno mehne ñano yoaricorore tãa mehne doca, wajãga”, nia tiha Cohamacu dutia. Mahu waro, ¿dohse ni tuhutujari ahrire? —ni siniture tina Jesure.

⁶ Jesu to ñano nichu tuho duaa nimare tina tirore yahusa duaa. Ti ã sinitupachuta Jesu sehe puhsa nuju su, yahpapu to wamo pica mehne joare. ⁷ Á jiro ã ti ni siniturucuchu Jesu sehe wahcãraca, tinare ò sehe ni yahure:

—Musa mehne macariro ñano yoarerario sehe ticorore tãa mehne doca muhtajaro — nire Jesu.

⁸ Á ni tuhsu pari turi tiro puhsa nuju, yahpapu joare tjoa. ⁹ Tíre tuhoa ti ñaa yoarire wacũa, ti wahmisuma sehe wijaa muhtare. Ti baharo tina mehne macaina cãhu wijaa pihtia wahare. Á ti wijaa pihtitari baharo numino tó ducuricoro Jesu mehne tjare. ¹⁰ Á jiro Jesu wahcã nuju su, ticorore ò sehe ni sinitu ñure:

—¿Nohopu wahari tina? ¿Muhare buhiri dahre duamarina mariajari mipure? —nire ticorore.

¹¹ —Mariahna, puhtoro —ni yuhtire ticoro.

—Yuhu cãhu buhiri dahreraja muhare. Wahaga. Á jico ñaare yoa namoeco tjiga — nire Jesu ticorore.]

Buhriaro marine to ñu masichu yoaro seheta Jesu ahriyahpa macainare Cohamacure masichu yoara

¹² Pari turi Jesu tí wuhupu jijnare ò sehe ni yahure:

—Buhirio marine to ñu masichu yoaro seheta yuhu ahri yahpa macainare Cohamacu masichu yoaja. Yuhure wacu turariro jipihtia dachoripe Cohamacu mehne ã jirucurohca. ã jiro tiro noaare wacũnohca. ã yoa tiro ñaare wacu duasi —ni yahure Jesu.

¹³To ã nichu tirote fariseo curua macaina õ sehe nire:

—Muhu mu basi mu jia tiare ã ni durucui nina. ã jia mu õ sehe ni, mu mu sũro mu nimacanocachu tí yaba cjihti jierara —nire tina Jesure.

¹⁴Ti ã nichu Jesu õ sehe ni yuhtire:

—Yu tarirore masija yuhu. Yu wahahto cãhure masija yuhu. Musa sehe ne tíre masierara. Musa õ sehe nipachuta yu jia tiare musare yu yahuri potocã tjira. ¹⁵Musa mu sũro musa ñuri dihtare masina musa. ã jina noano masierara musa. ã masierapanahta yuhure ñano ni durucua musa. Yuhu sehe yu mu sũro masare ne ã nieraja. ¹⁶ã jicu masa ti jia tiare ñu masichu yu mu sũro ñu masieraja. Yuhu pini yu Pucu yuhure warocariro mehne ñu masija. ã jicu masa ti jia tiare yu ñu masia tí potocã tjira. ¹⁷Musare dutia ti joari pũ õ sehe ni yahura: “Pũaro masa cãno potori ti yahuchu ti yahua potocã tjira”, ni yahu joari jira. ¹⁸Yuhure yahuri mehne sã pũaro tjija. Yuhu yu jia tiare yahua. Tuhsu, yu Pucu cãhu yahura yuhu sehene. Tirota jira yuhure warocariro —nire Jesu.

¹⁹—¿Nohorũ jicari mu Pucu? —ni siniture tina.

—Yuhure musa masierara. Yu Pucu cãhure masierara musa. Yuhure masina, yu Pucu cãhure masiboã musa —ni yuhtire Jesu tinare.

²⁰Jesu tinare buhero ã ni durucure Cohamacu wuhui ti niñeru duhu sãa caa poca cahai. To ñano yuhduhti pja duhsasinire. ã jia tina mehne to jipachuta tina tirote ñahaerare.

“Yu wahahtopure musa sehe waha masisi”, niha Jesu

²¹Pari turi Jesu tinare õ sehe ni yahure tjoa:

—Yu tarirore wahaihca. Yu wahari baharo yuhure macanahca musa. ã jina musa ñaa buhiri tiina yarianahca. Yu wahahtopure musa sehe waha masisi —ni yahure Jesu.

²²—“Yu wahahtopure musa sehe waha masisi”, ¿to nichu tuhoa ahriro to basi wajã yariarohcari ã nino? —nire sã coyera judio masa ti basi.

²³Ti basi ti ã nichu masino õ sehe ni yahure Jesu tinare:

—Musa sehe ahri yahpa macaina jira. Yuhu sehe maano macariro jija. Ahri yahpai

bajuarina jira musa sehe. Manopũ tariro jija yuhu sehe. ²⁴Musa yu jia tiare yu nirire “Potocã jierara” nina, musa ñaa buhiri tiina yarianahca musa. ã jicu “Musa ñaa buhiri tiina yarianahca musa”, nimahi musare —nire Jesu tinare.

²⁵—¿Noa baro jijari muhu? —ni siniture tina.

—Wahmanopure yu nirucuro sehta jija yuhu. ²⁶Musare yu yahuhti pjiro duhsasinina. Tuhsu, musa ñano yoari buhirire musare yu yahuhto cjihto pjiro duhsasinina mini. ã jicu yuhure warocariro to yahuri cjirore ahri yahpa macainare yahua. To yahuri potocã tjira —nire Jesu tinare.

²⁷“Yuhure warocariro”, to nichu tuhoa “Mari Pucu jica”, ni tuhotuerare tina. ²⁸Ti ã ni tuhotuerachu ñano Jesu õ sehe ni yahure tinare:

—Yuhure masunore Cohamacu warocarirore musa yucucu taño mehne wahcõ daponahca. Musa ã yoana, “Tiro Cohamacu warocariro tjira”, ni masinahca. ã jina yu mu sũro yu yoerariro yu jia tiare masinahca musa. ã jina yu Pucu yuhure to buheri dihtare yahuriro yu jia cãhure masinahca musa. ²⁹Yuhure warocariro sehe yuhu mehne jira. To cahmaare jipihtia dachoripe yoarucuja. ã jiro yuhure tiro ne cohãerara —nire Jesu tinare.

³⁰To ã nichu tuhoa, tirote masa payũ wacu tuare.

Cohamacu pohñare, ñaare yoaina cãhure yahua Jesu

³¹ã jia paina judio masa Jesure wacu tuare. ã jiro Jesu tinare õ sehe ni yahure:

—Yu dutiare yoa pahõina jina, potocãta yu buheina jira musa. ³²ã jina potocã masinahca musa. Potocã jiare masina, ñaa yoare duhu masinahca. ã jina cahamaca yoaro sehe ji namosi musa —nire Jesu tinare.

³³To ã nichu tuhoa tina õ sehe ni yuhtire:

—Sã sehe panopũ macariro Abrahã cjiro panamana ji turiaina jija. ã jina ne paina ti cahamaca jieraja sã. ã jicu “Cahamaca yoaro sehe ji namosi” nicu, ¿dohse jiro baro sãre ã nijari muhu? —ni siniture tina Jesure.

³⁴Ti ã nichu tuhorõ õ sehe nire tiro:

—Potocã musare niita nija. Jipihtina ñaare yoaina sehe ti ñaa yoare duhu masierara. ã jia tí ñaa sehe ti puhtoro yoaro sehe jira. ã jiina jia cahamaca yoaro sehe jira tina. ³⁵Cahamacuno sehe to puhtoro ya curua macariro jipihtia dachoripe jirucuerara. ã jiro painare dutiriro jierara. Tí wuhu macariro sehe to macuno sehe jipihtia dachoripe potocãta tí curua macariro

jira tiro. (Yuhũ sehe Cohamacũ macano jija. Ā jicu dutiriro jija. Mũsa ñaa yoaare duhu dutiĩhtja.)³⁶ Ā jina yuhũ Cohamacũ macano ñaare yũ duhuchũ yoarina jina potocãta ñaare duhurina jira mũsa. (Ā jina tĩ ñaa cahamacũ yoaro sehe ji namoerara mũsa.)³⁷ Abrahã cjiro panamana ji turiaina mũsa jichũ masija. Ā jipanahta yũ yahua sehere tũho duaerara mũsa. Ā jina yuhũre wajã duara mũsa.³⁸ Yũ Pũcũ yuhũre to masichũ yoari cjiire yahuja mũsare. Yũ Ā yahupachũta mũsa pũcũ watĩno mũsare to dutiare yoara mũsa cũhũ —nire Jesu tinare.

³⁹ —Abrahã cjiro panopũ macariro sã ñũchũ cjiro jia tiha. Ā jiro watĩno sã pũcũ jierara —ni yũhtire tina.

Ti Ā nichũ Jesu õ sehe ni yũhtire:

—Abrahã panamana jina, to yoariro se-heta yoaboa mũsa.⁴⁰ Cohamacũ yuhũre potocã to yahuare mũsare yũ yahupachũta yuhũre wajã duara mũsa. Abrahã cjiro sehe ne Ā yoaera tiha.⁴¹ Mũsa pũcũ to yoariro seheta yoara mũsa —nire Jesu tinare.

To Ā nichũ tina õ sehe ni yũhtire:

—Wamomaca duhtemahnoeraina pohna jieraja sã. Cãirota jira sã Pũcũ. Tirota jira Cohamacũ —nire tina.

⁴² Ti Ā nichũ Jesu õ sehe ni yũhtire:

—Cohamacũ mehne macariro jicu, õpũre tahi. Ā jina Cohamacũ mũsa Pũcũ to jichũ yuhũre cahĩboa mũsa. Yũ mũ sũro taer-ahi yuhũ pinihta. Cohamacũ to waro-cachũ tahi õpũre.⁴³ ¿Dohseana yũ durucuare tũhoerajari mũsa? Yũ yuhare tũhona bi-hoerara mũsa. Ā jina tũho duaerara mũsa.⁴⁴ Mũsa pũcũ sehe watĩno jira. Ā jina watĩno cahmaa sehere yoa duara mũsa. Ahri yahpa wahmanopũ to ji dũcachũpũ, mipũ cũhũre tiro masare wajũrucuriro jira. Tire potocã durucua mariaha. Ā jiro tiro potocã ne durucuerara. Tiro wahmanopũre mahũo mũhta dũcariro jia tiha. Ā jiro tiro Ā mahũorucuriro jiro, mahũoare yahura.⁴⁵ Yuhũ sehe mũsare potocã yahuja. Ā yũ yahuchũ yuhũre tũhoerara mũsa.⁴⁶ “Mũhũ ñano yoariro jira”, yuhũre ni masierara mũsa. ¿Potocã mũsare yũ yahupachũta dohseana tũhoerajari mũsa? ⁴⁷ Cohamacũ pohna sehe to durucuare tũhora. To pohna jierana, to durucuare tũho duaerara mũsa —nire Jesu tinare.

Abrahã cjiro to jшто pano Cristo sehe ji mũhta tuhsũa tiha

⁴⁸ To Ā nichũ tũhoa judio masa tire õ sehe nire:

—“Mũhũ Samaria macariro jira. Ā jicu tũho masierariro watĩno to cohtotariro jira mũhũ”, sã niri potocã tjira —nire tina Jesure.

⁴⁹ Ti Ā nichũ tũhoro õ sehe ni yũhtire Jesu:

—Tũho masierariro, watĩno to cohtotariro jieraja yuhũ. Yũ Pũcũre ño payoja. Mũsa sehe yuhũre ño payoerara.⁵⁰ Yuhũre masa ti ño payohtire macaeraja yuhũ. Yũ Pũcũ sehe masare yuhũre ño payo dutira. Tiro pinihta yũ jia tiare noano ñũ masino, Āta ño payo dutira. Tuhsũ, yuhũre ti cahmaerari buhiri buhiri dahreriro jirohca tiro.⁵¹ Potocãta mũsare nii nija. Yũ dutiare yoariro jipihtia dachoripe Cohamacũ mehne Ā jirucurohca —nire Jesu.

⁵² To Ā nichũ tũhoa õ sehe nire tina:

—Mipũ pinihtare tũho masierariro, watĩno to cohtotariro mũ jichũ sã noano masija. Abrahã cjiro yariaa wahaha. Cohamacũ yare yahu mũhtaina cjiri cũhũ yaria pihtia wahaha. Ā jicu “Yũ dutiare yoariro jipihtia dachoripe Cohamacũ mehne Ā jirucurohca” nicũ, ¿dohse nicũ Ā nijari mũhũ? ⁵³ ¿Sã ñũchũ cjiro Abrahã yũhoro tuajari mũhũ? Tiro cjiro, Cohamacũ yare yahu mũhtaina cjiri cũhũ yariaa wahaha. ¿Mũhũ sehe diro baro jijari mũhũ Ā ni durucucu? Mũhũ Ā niboriro jierara —nire tina.

⁵⁴ Ti Ā nichũ tũhoro Jesu õ sehe ni yahu namore:

—Yuhũ yũ basi “Tuariro jija yuhũ” nicũ, tuariro jieraboca yuhũ. Yũ Pũcũ sehe “Tiro tuariro jira”, nina yuhũre. “Sã yairo Cohamacũ”, mũsa niriro sehe yũ Pũcũ tjira.⁵⁵ Mũsa sehe yũ Pũcũre ne masierara. Yuhũ sehe tireore masija. “Tirore masieraja” nicũ, mũsa yoaro seheta mahũoa payuriro jiboa yuhũ. Potocãta tireore masija. Ā jicu to dutiare yoaja.⁵⁶ Ahri yahpapũ yũ tahtore mari ñũchũ cjiro Abrahã cjiro masia tiha. Ā masino tiro wahchea tiha —nire Jesu.

⁵⁷ To Ā nichũ tina õ sehe ni yũhtire:

—Mũhũ cincuenta cũhmari cjuerasinica. Abrahã cjiro panopũ macariro jira. ¿Mipũre tiro cjirore mũhũ dohsea masiboari? —nire judio masa Jesure.

⁵⁸ —Potocã mũsare niita nija. Abrahã to jшто pano yuhũ sehe ji mũhta tuhsũa tii —nire Jesu tinare.

⁵⁹ To Ā nichũ tũhoa tina sehe tãare na, tireore doca duamare. Ti Ā doca duapachũta Jesu sehe Cohamacũ wũhũ jiriro duhti wi-jaa wahare.

9

Capari ñũerarirore ñũchũ yoaha Jesu

¹ Ā yoa Jesu sã to buheina mehne mahai wahana pairore capari ñũerarirore boca sũ. Tiro wahma masa bajuaropũta capari ñũerariro jia tiha. ² Sã cũhũ tireore ñũna, õ sehe ni sinitu ñũhi Jesure:

—¿Buheriro, ahriro dohseoro capari ñũerariro masa bajua tiari? ¿Ñaae yoa tiari Ā waharo? ¿O to pũcũsuma sehe ñaare

yoaa tiari to ã wahachũ? —ni sinitu ñahi sã sehe Jesure.

³ Sã ã nichũ tuhoro ð sehe ni yuhtire tiro:

—Ahriro to ñaare yoari buhiri capari ñuerariro wahaerare. To pũcusũma cũhũ ñaare ti yoari buhiri capari ñuerariro wahaerare. Cohamacũ sehe tireore capari ñuerachũ yoare tireore ñuchũ yoaro taro masare to ñohtire. ⁴ Yuhũre warocariro to cũrire mipũre yoaro cahmana yuhũre. Ñamipũ mari dahra masieraro seheta baharopũ yuhũre warocariro to cũrire yoa masieraja yuhũ. ⁵ Ahri yahpapũ buhriaro marine to ñũ masichũ yoariro seheta jiriro jicũ ahri yahpa macainare Cohamacũ yare masichũ yoaja yuhũ —nire Jesu.

⁶ Æ ni tuhsũrota yahpapũ chahcho puti cũre. To ã chahcho puti cũrire dahra more, capari ñuerarirore to caparire wisðre. ⁷ Æ wisðno ð sehe nire Jesu:

—Silóe wama tirĩ copai cuhsũri copai mũ caparire cosai wahaga —nire Jesu. (Silóe sã ya dũsero mehne nia “Warocari copa”, nia nire.)

Jesu to caparire cosa dutiriro sehe waha, cosa, capari ñuriropũ tju wihire. ⁸ To tju wihichũ tiro cahai jiina tireore ñũre. Tó pano niñeru siniriro cjiro to jichũ ñurina tireore ð sehe nire ti basi:

—¿Ahriro sohð jiriro niñeru siniriro cjiro jierajari? —nire tina.

⁹ —Tirota jira wiho —nire paina sehe.

—Tiro jierara. Æ jierapurota tiro yoaro sehe bajuriro jira —nire paina.

Ti ã nichũ tuhoro capari ñuerariro cjiro sehe ð sehe nire:

—Tiro tjija yuhũ —nire tinare.

¹⁰ To ã nichũ masa tireore ð sehe ni siniture:

—¿Capari ñuerariro cjiro jicũ dohse waha ñuri mũhũ? —ni siniture tina tireore.

¹¹ —Jesu wama tiro dihta sohãare dahra more, yũ caparire wisðre. Yuhũre wisð tuhsũ “Silóe wama tirĩ copapũ mũ caparire cosai wahaga”, to nichũ cosai sũhi yuhũ. Yũ ã cosari baharo yũ capari noano bajure yuhũre —ni yahure tiro masare.

¹² —¿Mũhũre ã yoariro nohopũ jicari tiro? —nire tina.

—Bũh. Nohoi jiro jica —nire tiro.

Capari ñuerariro cjirore fariseo curua macaina sinituha

¹³ Æ ni durucu tuhsũ tina capari ñuerariro cjirore fariseo curua macaina cahapũ naahre. ¹⁴ Tĩ dacho Jesu dihta sohãare dahra more capari ñuerarirore noariro to yoari dacho Sabado dacho jire. Tĩ dacho sã sori mũmũ jire. ¹⁵ Æ jia fariseo curua macaina sehe tireore ð sehe ni sinituha tjoa:

—¿Dohse yoa mũhũ ñuri? —ni sinituha tina.

—Dihta sohãa mehne yũ caparire wisðhre. Æ jicũ yũ caparire yũ cosari baharo ñũ dũcahi yuhũ —ni yahuha tiro tinare.

¹⁶ —Tiro Sabado dacho mari sori mũmũ mari dahra dutierari mũmũ dahrahre. Æ jiro tiro Cohamacũ yairo jierara —niha paina fariseo curua macaina sehe.

Paina sehe ð sehe niha:

—Ñaare yoariro ð sehe noariro wahachũ yoa masierara. Æ jiro tiro noariro jiboca —niha paina.

Æ jia tina pũa curua ti basi tju waha. ¹⁷ Æ jia pari turi tina capari ñuerariro cjirore ð sehe ni sinituha tjoa:

—¿Mũhũre mũ caparire noano yoarirore mũhũ waro dohse ni tuhotujari Jesure? —niha tina tireore.

—Tiro potocãta Cohamacũ yare yahu mũhtariro jira —niha capari ñuerariro cjiro.

¹⁸ Wahmanopũre judio masa ð sehe ni tuhotumaha: “Ahriro capari ñuerariro cjiro jierara”, ni tuhotumaha tina. Æ ni tuhotua capari ñuerariro cjiro pũcusũmare pjiroc-aha tina. ¹⁹ Pjiroca tuhsũ, to pũcusũmare ð sehe ni sinituha fariseo curua macaina puhtoa:

—¿Ahriro potocãta mũsa macũ jijari? ¿Dóihita tiro capari ñuerariro masa bajuari? ¿Potocãta capari ñuerariro cjiro jipurota dohsearõ ñurari mipũre? —ni sinituha tina to pũcusũmare.

²⁰ —Ahriro sã macũta jira. Æ yoa dóihita capari ñuerariro masa bajua tire tiro. ²¹ Tire masipanahita to ñurire, tireore ñuchũ yoariro cãhure masieraja sã. Sã macũre sinituga. Bũcũro jira tiro. Tiro to basi yahu masina —niha to pũcusũma.

²² Judio masa sã puhtoa wahmanopũre ð sehe nia tiha:

—“Jesuta Cristo Cohamacũ warocariro jira”, niinare mari buhea wãhusepũ sãa dutisi sã —nia tiha judio masa puhtoa.

Ti ã nichũ tuhoro capari ñuerariro cjiro pũcusũma sehe judio masa puhtoare cui niha. ²³ Æ cuiã, “Bũcũro jira tiro. Tirereta sinituga”, niha tina judio masa puhtoare.

²⁴ Baharo judio masa sã puhtoa pari turi capari ñuerariro cjirore pjirocãha tjoa. Pjiroca tuhsũ, ð sehe niha tireore:

—Cohamacũ mehne poto yahuga mũhũ. Jesure mahñoriro to ñaa yoariro jichũ sã masija. Æ jicũ poto yahuga sãre —niha judio masa capari ñuerariro cjirore.

²⁵ Ti ã nichũ tuhoro ð sehe ni yuhtihã tiro:

—Jesure to ñaa yoariro to jichũ masieraja yuhũ. Cãnota masija yuhũ. Panopũre capari ñuerariro jia ticũgũ yuhũ. Mipũ sehere ñũja yuhũ. Tĩ dihtare masija yuhũ —ni yuhtihã capari ñuerariro cjiro tinare.

²⁶ —¿Dohse yoari mähure tiro? ¿Mu capari ñahto cjihtore dohse yoari tiro mähure? — ni sinituha tina tjoa.

²⁷ —Tireta mäsare yahu tuhsamahicu yuhü. Yu ä ni yahupachuta masa ne tuho duerare yähure. ¿Dohse yoa duana pari turi yu yahuchü tuho duajari masa? ¿Masa cähü to buheina ji duajari? —niha tiro tinare.

²⁸ To ä nichü tuhoa tina tuhtihä tireore: —Mühü Jesu buheriro jira. Sä sehe Moise cjiro buheina jija. ²⁹ Potocäta Cohamacü Moise cjirore durucua tihä. Jesu to tarirore sä masieraja —niha tina capari ñuerariro cjirore.

³⁰ Ti ä nichü ö sehe ni yuhtihä tiro: —¿Tiro to tarirore masa masierachü yahure ñuchü yoariro jiro Cohamacü warocariro jierabocari tiro? ³¹ Cohamacü ñaa yoinare ti siniare tuhoerara. Ti pinihtare mari masija. Tinare tuhoeraparota Cohamacüre ño payorirore, to dutiare yoarirore to siniare tuhora Cohamacü. ³² Wahmanopure ahri yahpa to ji ducachüpare ne coä masa bajaropü capari ñuerarirore ne cüiro baro ñuchü yoariro mariea tihä. ³³ Ä jiro Jesu Cohamacü warocariro jieraro yähure ñuchü yoaeraboa tiro —niha tiro tinare.

³⁴ —Mühü döihtä ñariro jia tihä. ¿Ä jipacuta säre buhe duajari mähü? —niha judio masa sä puhtoa tireore.

Ä ni tuhsuata tina tirore cohä wionocaha.

Jesu yare cahmaeraina capari ñueraina ti ñu masieraro seheta Cohamacüre masierara

³⁵ Ä yoa capari ñuerariro cjirore ti cohä wiorire Jesu tuhore. Ä tuhorö capari ñuerariro cjirore boca saro, tirore ö sehe ni siniture:

—¿Masünoe Cohamacü warocarirore wacü tuajari mähü? —nire Jesu.

³⁶ —¿Puhtoro, noa jijari tiro? Tireore masicü wacü tuaihtja tirore —nire capari ñuerariro cjiro Jesure.

³⁷ —Tirore ñu tuhsüre mähü. Mipüre mähü mehne durucuriro tiro tjija yuhü —nire Jesu capari ñuerariro cjirore.

³⁸ —Puhtoro, mähure wacü tuaja —nire capari ñuerariro cjiro.

Ä ninota tiro Jesu panoi na tuhcuä caha sü, tirore ño payore.

³⁹ To ä ño payochü ñuno ö sehe nire Jesu: —Noaina, ñaina cähü ti yoarire masichü yoai tai ahri yahpüre tahi. Capari ñueraina ti ñu masieraro seheta tina yaro sehe jiina yu Pucüre masierara. Ä masierainare yu Pucüre masichü yoai tai tahi yuhü. “Sä noano masija”, ni tuhotumarina noano ti masierarire masichü yoai tai tahi yuhü —nire Jesu.

⁴⁰ To ä nichü tuhoa mahainacä fariseo curua macaina tirore ö sehe nire:

—“Capari ñueraina ti ñu masieraro seheta noano masierara masa cähü”, ¿nii nijari mähü säre? —nire fariseo curua macaina Jesure.

⁴¹ Ti ä nichü Jesu ö sehe nire:

—Capari ñueraina ti ñu masieraro seheta potocä masa noano masierachü, mäsare buhiri mariaboa. “Sä noano masiina jija”, masa niri buhiri buhiri tiina jisinina masa mipüre —nire Jesu tinare.

10

Ovejare ñu wihboriro quitire yahuha Jesu

¹ Baharo quiti mehne piti dahre buhero taro ö sehe nire Jesu:

—Potocäta nii nija mäsare. Ovejare wihbori sahrüno sopacai säaerario, sopaca marienopü säariro sehe yaca bucüro jira. ² Sopacai säariro sehe ovejare ñu wihboriro jira. ³ Sopacare cohtariro sopacare pjööhna ovejare ñu wihboriro to säahto sehe. Ovejare ñu wihboriro to durucuchü tuho tara to nuina oveja peri. Tinare pjirocaro, ti wama mehne pisurocarura tiro. Ä yoaro tinare sahrüno pjiinare pji wiorucura sopacaru. ⁴ To yainare jipihtinare pji wio tinare mü tärucura. Oveja sehe to durucuae masia, to baharo nunu tirucura. ⁵ Pairöre ti masierarirore nunu tierara tina. Ä jia paina ti durucuae tuhoa, cui märocaa wahara —nire Jesu tinare.

⁶ Ahri quitire to ä yahupachuta to yahuare tuho ñahaerare tina.

Jesu ovejare noano ñu wihboriro yoaro seheta to yainare noano ñu wihbora

⁷ Pari turi Jesu tinare ö sehe ni yahure tjoa:

—Potocäta mäsare nii nija. Ovejare wihbori sahrüno säari sopaca yoaro sehe jija yuhü. ⁸ Jipihtina yu pano tarina quihöno yu durucuae buheraina, ovejare ñu wihbo mahñoina yacaina yoaro sehe jira. Ti ä jipachuta yu yaina sehe oveja yoaro sehe jiina painare ne tuho wahcäerara. ⁹ Yuhü ovejare wihbori sahrüno säari sopaca yoaro sehe jija. Ti sopacai säaina yoaro sehe tjira yähure wacü tuaina. Ä jicu yuhü tinare pichacaru wahaborinare yuhduchü yoaihtja. Oveja sehe tinare ñu wihboriro mehne ti cahmaare bocaro yoaro seheta yu yuhduchü yoaina cähü yuhü mehne ti cahmaare bocahca. Yuhü tinare noano ducata, noano ñu wihboihca —nire Jesu.

¹⁰ Ä ni tuhsü ö sehe ni namore:

—Mäsare mahñoare buheina, ovejare ñu wihbo mahñoina sehe ovejare yacaina yoaro sehe jira. Yacaa taa, wajäa taa, dojomehnea taa tara tina. Wiho mejeta

yuhũ sehe yũ yainare, oveja yoaro sehe jiinare, tuaro waro ti wahchea mehne ã catirucuchũ yoai tahi. ¹¹ Ovejare noano ñũ wihboriro yoaro sehe jija yuhũ. Ovejare noano ñũ wihboriro tinare noano ðacata, to yariahtore ne cuierara. Tó yoaro seheta yuhũ cãhũ yainare noano ðacata, yariahca, tinare ne soro wahaerahto sehe. ¹² Oveja pũro cahamacũno sehe potocã ovejare ñũ wihboriro jierara. Æ jia oveja to yaina jierara. Æ jiro yairo ovejare to chũro tachũ ñũno to cahamacũno sehe ovejare cohã cũnoca, mũrocaa wahara. To Æ cohã cũri baharo, yairo ovejare to ñahachũ ñũa oveja peri mũroca site wahcãa wahara. ¹³ To cahamacũno sehe to wapataa dihtare cahmana. Æ jiro tiro ovejare noano ñũ wihbo ji coaerara —nire Jesu.

¹⁴ Æ ni tuhsũ ð sehe ni namore:

—Ovejare noano ñũ wihboriro yoaro sehe jija yuhũ. Æ jicũ yũ yainare masija yuhũ. Æ jia yũ yaina sehe yuhũre masina. ¹⁵ Tó seheta yũ Pũcu cãhũ yuhũre masina. Æ jicũ yuhũ cãhũ yũ Pũcũre masija. Oveja yoaro sehe jiina yũ yaina Cohamacũ mehne ti Æ jiru-cuhti cjhtire yariaihca yuhũ. ¹⁶ Paina oveja pa sahrĩno macaina yoaro sehe jiina paina masa cãhũ yũ yaina jiahca. Tina cãhũre naaihca. Æ jia yũ durucuchũ tuho wahcãahca tina cãhũ. Æ jia yũ yaina jipihtina cã curuata jiahca. Æ jicũ yuhũ dihta yũ yainare ñũ wihboihca —nire Jesu.

¹⁷ Æ ni tuhsũ ð sehe ni namore:

—Yũ yaina Cohamacũ mehne ti Æ jiru-cuhti cjhtire yariaihca. Yũ yariari baharo masa mũjaihca. Yũ Æ yoahitiro jichũ yũ Pũcu yuhũre cahĩna. ¹⁸ Yũ wajã dutierachũ yuhũre wajã masieraboa tina. Yũ cahmano seheta yuhũre wajãahca. Æ jicũ yũ yaina Cohamacũ mehne ti Æ jirucuhti cjhtire yariaihca. Yaria masija yuhũ. Æ yoa masa mũja masija. Yũ Pũcu yuhũre tíreta yoa dutire —nire Jesu.

¹⁹ To Æ nichũ tuhoa judio masa pũa curua tju ware. Paina soro tuhotu, paina cãhũ soro tuhoture:

²⁰ —Tiro watĩno to cohtotariro jira. Æ jiro tuho masierariro jira. ¿Dohseana tirore pari turi tuhojari mũsa? —nire paina payũ judio masa.

²¹ Paina sehe ð sehe nire:

—Watĩno to cohtotariro jiro Æ ni durucueraboa. Capari ñũerarirore ñũchũ yoa masierara watĩno to cohtotariro. Æ jiro jiro tiro watĩno to cohtotariro jierara —nire paina judio masa.

Judio masa Jesure cahmaeraha

²² Pa dachoi sã coyeyã judio masa Jerusalẽi bose numari yoaa nire pari turi. Cohamacũ yuhũre panopũ tirore ti wari cjirire ti

wacũhti dachori jire. Tí pjare puhuro jire. ²³ Tí dachoi Salomo wama tiri tahtiapũ Cohamacũ wuhũi jiri tahtiapũ Jesu ñũ tinino nire. ²⁴ Tí tahtiapũ to jichũ ñũa sã coyeyã judio masa tiro cahapũ cahmachu, tirore ð sehe ni siniture:

—Yoaputiari pja sãre noano yahueraca mũhũ. Poto sãre noano yahu bahrañoga mũhũ. ¿Cristo Cohamacũ to warocariro tji-jari mũhũ? —nire tina Jesure.

²⁵ Tí Æ nichũ tuhoru ð sehe ni yuhtire Jesu:

—Mũsare yahu tuhsũmajacu yuhũ. Yũ Æ yahupachuta yuhũre tuho duaerare mũsa. Yũ Pũcu yuhũre to dutiriro seheta to tuua mehne yoa ñoja. Æ yoacu yũ Cristo jiareta mũsare ñoi niija. ²⁶ Yũ Æ ñopachuta yuhũre tuho duaerara mũsa. Mũsa sehe yũ yaina jierara. Æ jina paio yaina oveja yoaro sehe jiina jina, yuhũ sehere tuhoerara mũsa. ²⁷ Ovejare ñũ wihborirore to yaina ti tuhoriro seheta yuhũ cãhũre yũ yaina tuhora. Æ jicũ yũ yainare masija yuhũ. Æ jia tina yuhũ mehne wahara. ²⁸ Æ jicũ jipihtia dachoripe Cohamacũ mehne Æ catirucuchũ yoaja tinare. Æ jia tina sehe pichacapũ ne wahasi. Æ jia yũ yainare yũ ñũ wihbochũ paina sehe ne cãirore yuhũre ma masierara tinare. ²⁹ Æ yoa yũ Pũcu yũ yainare yuhũre wariro jipihtina yuhũdoro tuariro jira. Æ jiro yũ Pũcu sehe yũ yainare to ñũ wihbochũ, ne cãiro tiro cãhũre ma masierara tinare. ³⁰ Yuhũ yũ Pũcu mehne cãirota jija —nire Jesu judio masare.

³¹ To Æ nichũ tuhoa judio masa sehe tirore ti doca wajãhti tãare pari turi namare tjoa. ³² Tí Æ yoachũ ñũno Jesu ð sehe ni siniture tinare:

—Yũ Pũcu ya tuua mehne payũ tahari yoa ñomahi mũsare. ¿Di baro sehere yũ yoari buhiri yuhũre tãa mehne doca wajã duajari mũsa? —ni siniture Jesu.

³³ To Æ nichũ tuhoa ð sehe nire tina:

—Cohamacũ tuua mehne mũ yoa ñori buhiri mũhũre tãa mehne doca wajã duaeraja sã. Cohamacũre mũ ñano durucuri buhiri mũhũre tãa mehne doca wajã duaaja sã. Masũno jipaihta “Cohamacũ jija yuhũ”, mũ nia buhiri mehne mũhũre tãa mehne doca wajã duaaja sã —ni yuhtire tina.

³⁴ Tí Æ ni yuhtichũ tuhoru Jesu tinare ð sehe ni yahure:

—Mũsa cãhũre “Cohamana”, ni pisure Cohamacũ. Æta ni joaa tãa to dutiare ti joari pũi. ³⁵ Cohamacũ yare ti joari pũ quihũno to jichũ mari masija. “Mahñoa jira”, tí pũre ni masieraja mari. Æ jiro to yare masinare potocãta tiro “Cohamana”, ni pisura. ³⁶ Cohamacũ yuhũre besetjãhno,

ahri yahpapure warocare. Ā jicu yuhū “Cohamacu macano jija”, yū niri buhiri “Cohamacure ñano durucuro nina Jesu”, nina musa yuhure. ¿Dohseana yuhure ā nijari musa? ³⁷ Yū Pucu to cahmariro seheta to tuaa mehne yū yoa ñoerachū pinihtare yū buherire “Potocā tjira”, nieraboca musa. ³⁸ Yū Pucu to tuaa mehne yū yoa ñopachuta yuhū sehene tuho duaeraboca musa. Ā tuho duaerapanahata to tuaa mehne yū yoa ñochū ñana yū yoirire “Potocā tjira”, niga musa. Musa ā nina, yū Pucu mehne sã cãno potori sã jichū masinahca musa. Ā jina yuhū yū Pucu mehne cãno potori yū jichū masinahca musa. Ā jina tuho ñahanahca musa –nire Jesu tinare.

³⁹ To ā nichū tina pari turi tirore ñaha duamare. Ti ā ñaha duachū ñuno tiro duhti wijaa wahare.

⁴⁰ Ā wijaariroputa João masare to bautisa muhtaripū Jordão sie sehēpū pari turi wahare tjoa. Tópu saro tjuanocare tiro. ⁴¹ Ā jia masa payu tirore ñaa sure. Ō sehe nire tina ti basi:

–João sehe Cohamacu tuaa mehne yoa ñoerare. Ā to yoa ñoerapachuta jipihtia Jesure to yahuri cjiri sehe potocāta jira –nire masa ti basi.

⁴² Ā jia tópure masa payu wacū tua ducare Jesure.

11

Lázaro wama tiri yariaa wahaha

¹ Ā yoa cãiro Lázaro wama tiri to wahmiosãnumia María, Marta cãhū mehne Betania wama tiri macai jia tire. Tiro cã numū dohatia wahari jire. ² Tiro wahmionio María sehe baharo Jesu to dahporire me sitia wisō, to pjoari mehne tirore pahā cohãhticoro jiri jire. ³ Ā yoa to dohatia wahachū ñaa, to wahmiosãnumia sehe painare Jesure yahu dutirocari jire:

–Puhtoro, mū cahīro dohatiro nina –ni yahu dutirocari jire Lázaro wahmiosãnumia.

⁴ Tí quitire tuhoro ō sehe nire Jesu:

–Mipure Lázaro to dohatia to yariahti cjihti jierara. Cohamacu tuaare masare ñohti cjihtire mipure tiro dohatira. Ā jia yuhū to macano tuariro yū jia cãhure ñuahca masa –nire Jesu.

⁵ Jesu Martare, to bahoro cãhure, Lázaro cãhure tuaro cahīa tire. ⁶ Ā nino Lázaro dohatiriro to jichū tuhoparota tói Jesu sehe pua dacho tjuasinire. ⁷ Pua dacho baharo Jesu ō sehe nire sãre to buheinare:

–Pari turi Judea yahpapū tjuaa wahajihna tjoa –nire sãre.

⁸ –Buheriro, canupucãta judio masa tó macaina muhure tãa mehne doca wajã duamare. ¿Dohseacu tópu pari turi tjuaa waha duajari muhū? –nihi sã to buheina.

⁹ Sã ā nichū tuhoro, tirore ti wajã masierasinore yahuro, piti dahre buhero sãre ō sehe nire:

–Pjiro tuhotuena tjiga. Cū dachore doce horari waro jira. Sū dacho macariro to jisnichū, noano ñūja mari. Ā jina dachore tinina ne pua tu maa boraeraja mari. ¹⁰ Wiho mejeta nahitianio tiniina sehe pua tu maa boraah wahara. Sū dacho macariro mariachū noano ñuerara tina –nire Jesu. (Ā nino ō sehe nino niri jimare: “Mipure yū Pucu yare yū yahu pahñohto duhsasinina. Ā jia yuhure wajã masierasinina”, nino niri jimare.)

¹¹ Ā nino sãre ō sehe ni yahu namore tjoa:

–Mari mehne macariro Lázaro, carīno nica. To ā carīpachuta yuhū tirore wahcōi wahaihtja –nire sãre.

¹² –Puhtoro, Lázaro carīro jiro, yuhdurohca –nimahi sã.

¹³ Sã ā nipachuta Jesu “Carīno nica” nino, “Yariaa wahaca”, nino niri jimare. To ā nichū tuhona “Lázaro soro nica”, ni tuhotumai sã sehe. ¹⁴ Sã ā ni tuhotuchū masino Jesu poto yahure sãre:

–Lázaro yariaa wahaca. ¹⁵ Yū marieno to yariachū, noa nina. Ā jina musa yuhure wacū tua namonahca. Musa yū jia tiare masi namo, musa yuhure wacū tua namohti cjihti jiahca ahri. Ā yoana basata. Mari ñana wahajihna to cahapū –nire Jesu.

¹⁶ Toma sãhduariro wama tiriro ō sehe nire sãre:

–Mari cãhū Jesu mehne wahajihna. Tirore wajãa, mari cãhure wajãjaro –nire Toma.

Jesu ā jirucuchū yoiriro masare masoriro jira

¹⁷ Ā yoa sã tópure sã sãna cahachū waro tó macaina ō sehe ni yahure Jesure:

–Pititia dachori wahara Lázaro cjirore masa copapū ti siō sãari baharo –ni yahuha tirore.

¹⁸ Betania wama tiri maca sehe Jerusalē cahacãi tia kilómetro yoaro jire. ¹⁹ Ā jia Lázaro to yariari baharo, payu Jerusalē macaina sã coyey judio masa Martare, María cãhure ñahacaha tiia taa tari jire. ²⁰ Tópure sã sãna cahachū tuhoro, Marta sehe sãre piti bocaro wihire. Wiho mejeta to bahoro María sehe to ya wãhpū tjuari jire. ²¹ Marta sehe Jesure piti boca wihi, ō sehe nire tirore:

—Puhtoro, yu bahu to variahto pano mu õi jichu, tiro yariaeraboa. ²² Mipu cãhure Cohamacure mu sini payochu, tiro mu sinino seheta yoarohca —nire Marta Jesure.

²³ —Mu bahu masa wijaarohca —nire Jesu ticorore.

²⁴ —Åja. Ahri yahpa to pihtiri dachoi yariarina cjiri ti masa wijaahiti dachoi to masa wijaahitore masija yuhu —nire ticoro sehe.

²⁵ To ã nichu Jesu õ sehe ni yahure tjoa:

—Yuhu masa wijaachu yoariro jija. Yuhu ã jirucuchu yoariro jija. Yuhure wacũ tuariro yariaparota ã catirucurohca. ²⁶ Å jia jipihitna Cohamacu mehne ã catirucuína, yuhure wacũ tuaina pichacapu ne wahasi. ¿Ahrire masijari muhu? —nire Jesu ticorore.

²⁷ —Puhtoro, masija yuhu. Cristo Cohamacu macano, masare yuhduchu yoariro “Ahri yahparu tarohca”, ti niriro mu jichu masija yuhu —nire Marta Jesure.

Lázaro to masa copa cahai Jesu tiia

²⁸ Marta ã ni tuhsu to bahoro Mariare pjiro wahare:

—Marine buheriro mari ya macai taro nina. Muhure pjihre —ni yaroca yahuri jire Mariare.

²⁹ To ã nichu tuhoro María ño duaro wahcãruca, sã cahapu tari jire Jesure ñano taro. ³⁰ Ti ya macapu suerasinihi sã, Marta sãre to piti bocaroihta jisinihi sã. ³¹ Judio masa ti wuhui Mariare ñahacaha tiia niha. Å jia ticoro to wahachu ñua, tina ticorore nuhu ti tari jire. “To wahmino cjiroro ti siõ sãari copapu tiuro waharo nina ticoro”, ni tuhoturi jimare tina. Å ni tuhotua ticorore nuhu ti tari jire.

³² Å yoa María sã cahapu wihiro, Jesure ñu, to dahpori cahai na tuhcuca caha sure.

—Puhtoro, yu bahu to variahto pano mu õi jichu tiro yariaeraboa —nire ticoro Jesure.

³³ Å jiro ticoro judio masa ticoro mehne tarina cãhu ti tiichu ñuno Jesu sehe tuaro cahya ñano yajeripohna tire.

³⁴ —¿Lázaro cjiroro nohopu siõ sãari musa? —ni siniture Jesu.

—Ñui taga —ni pji wahcãre tina.

³⁵ Ti ã nichu tuhoro Jesu tiia wahare.

³⁶ —Lázaro cjiroro Jesu tuaro cahiri jira —nire judio masa ti basi.

³⁷ Wiho mejeta paina tina mehne macaina sehe õ sehe nire:

—Capari ñuerariroro ñuchu yoariro jira ahriro Jesu. ¿Å jiro Lázaro cãhure to yariaborore yuhduchu yoeraboari ahriro? —nire tina ti basi.

Lázaro masa wijaaha

³⁸ Å jiro pari turi Jesu tuaro cahya namore. Å jina sã jipihitna to masa copapu sahi. Ti copa tãcapu ti sahari copa jire. Ti

copapu to pjacu cjiroro siõ sãa, tãca pjiria mehne tju biha cãri jire tina.

³⁹ —Tãcare na pjõohga —nire Jesu.

To ã nichu tuhoro Marta yariariro cjiro wahmiono õ sehe nire:

—Puhtoro mipu pititia dachori waha tuhsura to yariari baharo. Å jiro to pjacu cjiro urãbiahca —nire Jesure.

⁴⁰ —“Yuhure wacũ tuaco Cohamacu tuare ñucohca”, muhare nimahi —nire Jesu Martare.

⁴¹ To ã niri baharo tina tãcare na pjõohre. Å ti na pjõori baharo Jesu sehe muaporu ñu, Cohamacure õ sehe nire:

—Mai, yuhure muhu tuho tuhsuhre. Tíre mu yoachu masicu wahcheja muhare. ⁴² Å yoa yuhure muhu dachoripe ã tuhorucura. Tíre masija. Å masipaihta yuhu mu warocariro yu jiare õre ducuína ti masihti cjihtire muhare ã nii nija. Tíre “Potocã tjira”, ti nihti cjihti cãhure ã nii nija —nire Jesu to Pucurore.

⁴³ Å ni tuhsu Jesu tuaro sañurucure:

—Lázaro, wijaa tagá —ni sañurucure tiro.

⁴⁴ To ã nichu yariariro cjiro to wamomacarine to dahpori cãhure suhti cahsari mehne ti wahmariro cjiro, to dapure suhtiro mehne ti wahmariro cjiro, masa copapu wijaa tare juna.

—Ti wahmari cjirire pjãga —nire Jesu.

Judio masa puhto sehe Jesure ñaha duamaha

(Mt 26.1-5; Mr 14.1-2; Lc 22.1-2)

⁴⁵ To ã masochu ñua, payu judio masa Mariare ñua tarina mehne macaina Jesure wacũ tuare. ⁴⁶ Wiho mejeta paina sehe, tina mehne macaina sehe fariseo curua macaina cahapu waha, su, Jesu to yoarire yahuri jire tinare. ⁴⁷⁻⁴⁸ Å jia sacerdotea puhto, fariseo curua macaina puhto cãhu cahmachu, ti basi õ sehe ni durucuha:

—Jesu payu tahari Cohamacu tuaa mehne yoa ño mujana. To ã yoa ñoare mari tirore ã ñunoca mari dacataerachu, jipihitna masa tirore wacũ tua, tiro mehne waha pihitiaboca. Å yoa tiro Jesure ti puhtoro cjihto ti sõchu ñua, Roma macaina puhto sehe “Marine cohãa nina”, ni sua, ñano yoahca marine. Tuhsu, Cohamacu wuhure cohã duti warocaahca ti yaina surarare. Mari ya dihta cãhure maahca tina. ¿Å jina dohse yoanahcari mipure? —ni durucuha tina ti basi.

⁴⁹ Ti ã nipachuta paio Caifa wama tirore, ti cãhmare sacerdotea bui puhtoro jiriro tinare õ sehe ni yahuha:

—Musa sehe ne masierara. ⁵⁰ Judio masa jipihitna mari ya cjihtire cãiro masno to

yariachu noana. To yariaerachu mari jipihina judio masare cohã pahñonocaboa. Tíre masa masierara —niha Caifa tinare.

⁵¹ Á nino to m̄suro ã nino nieraha. Sacerdotea bui puhtoro to jichu judio masa ya cjihtire Jesu to yariahtore Cohamacu sehe Caifare ã ni yahu dutiha. ⁵² Jesu yariaro judio masa dihtare yuhduchu yoaro taro nierare. Á yariaro jipihina Cohamacu pohna ahri yahpau ji siteina çahu cã curuata ti jihti cjihtire yariahtiro jire Jesu. ⁵³ Á jia ti dachoihta tina “¿Jesure dohse yoa wajãnahcari mari?” ni durucua, tirore wajã taa nimaha.

⁵⁴ Tirore ti ã wajã duachu masino Jesu payu judio masa watoi pari turi tinino wahareare. Á jiro masa marieno cahacãi Efrai wama tiri macapu sãre suho wahare. Sãre tí macai suho tjuasinire Jesu.

⁵⁵ Tí pjare pascua bose numari sã judio masa sã bose numari cjihto mahanocã duhsatjiãhre. Á jia bose numari panocã masa payu paye macari macaina Jerusalëpu cahmachure. Pascua macaare ti chũto pano Cohamacu yare yoaã taa ti ñaa buhiri cosaa taa nire. ⁵⁶ Tí pjare tina Jesure macaa niri jire. Á jia Cohamacu wuhupu jiina ò sehe ni durucua:

—¿Bose numarine ñuno taerabocari Jesu, masa tuhutuchu? —ni durucua tina ti basi.

⁵⁷ Á jia sacerdotea puhtoa, fariseo curua macaina çahu ò sehe ni yahu dutiha masare:

—Jesu to jirore masa masina, yahuga sãre. Tirore ñahana tana ni ja —niha puhtoa masare.

12

María Jesu dahporire me sitia mehne pio payore

(Mt 26.6-13; Mr 14.3-9)

¹ Jesu sã to buheina mehne Betaniapu sã suri baharo pascua dachori seis dachori waro duhsasinire. Lázaro Jesu to masoriro cjiro tí maca macariro jire. ² Sã suri baharo Jesu çahu ya chua cjihtire yoare paina. Á yoa Lázaro, Jesu, sã mehne mesai nuju suhi. Sã ã nuju suri baharo Marta chuare payore sãre. ³ Tuhsu, María me sitia sere nardo wama tidu macaa sere cã kilo dacho macai na ta, Jesu dahporire pio payore. Pio payo tuhsu to pjoari mehne tju cosare. To ã pio payori baharo tí wuhu noano me siti sahsea wahare. ⁴ Sã mehne macariro, Jesure ñu tuhtinare ñohtiro Juda Iscariote sehe ò sehe nire:

⁵ —¿Dohse yoaro ahricoro ã yoa sitejari? Tíre ticoro duaboa. Á duaro tres cientos dachori posa dahrari wapa wapataboa. Á jiro ticoro tí niñerure pjacoinare waboa —nire tiro.

⁶ Juda sehe pjacoinare yoadoho duaerare. Tiro sã niñerure wihbobasariro jiparota yacariro jire. Tuhsu, tiro sã niñerure cãa tahari na mujare. Á jiro “Tí niñerure naihtja” nino, ã nire Mariare tiro.

⁷ To ã nichu tuhoro ò sehe nire Jesu:

—Á niecu tjiga ticorore. To me sitiare yuhure to daharire yuhure pio payore, yuhure masa copapu tí siõ sãahto pano yu pjacure cahnoyuro. Pjacoina sehe masa mehne ã jirucuahca. Á jina tinare wa masina masa. ⁸ Yuhu sehe ahri yahpapure masa mehne ã jirucusi —nire Jesu.

Sacerdotea puhtoa Lázaro wajã duaha

⁹ Á yoa Jesu Betaniapu to jichu tuhoa sã coyea judio masa payu tirore ñua tare. Tiro dihtare ñua taa nierare. Lázaro yariaro cjirore Jesu to masorirore tiro çahure ñua taa nire. ¹⁰ Tí ñua surire masia sacerdotea puhtoa Lázaro çahure wajã duare. ¹¹ Lázaro yariaro cjiro Jesu to masoriro jichu ñua payu masa Jesure wacú tuare. To ã masochu ñua payu judio masa tí sacerdotea ya buhea sehere duhunocari jire. Á ti duhuchu ñua sacerdotea puhtoa sehe sua yuhduã Lázaro wajã duare.

Jerusalëpu suha Jesu

(Mt 21.1-11; Mr 11.1-11; Lc 19.28-40)

¹² Pascua bose numarine ti yoachu payu masa Jerusalëpu ñua wahari jire. Pa dachoi Jerusalëpu Jesu to tahto cjihtore masa tuhori jire. ¹³ Á jia pja pũ sahnarine na wahcã, tirore piti bocaa wahare. Á piti bocaa ò sehe ni sañurucure tina:

—Ahrirore wahche payojihna. Ahriro Cohamacu to warocariro noano yuhdujaro. Ahriro Israe yahpa macaina mari puhtoro tjira —ni sañurucure tina.

¹⁴ Jesu burrocã to bocariro bui pisare. “Ò seheta yorohca”, ni joaa tiha Cohamacu yare ti joari tju:

¹⁵ “Jerusalë wama tiri maca macaina, cuiena tjiga masa.

Ñuga. Masa puhtoro burrocã bui pisa tara”, ni yahuha Cohamacu yare ti joari tju.

¹⁶ “To ã ni joari Jesure nino nica” ni, sã to buheina noano masierasinihi. Á masierasinipanahta muanopu Jesu to mujari baharo sã ti joari cjiire wacú boca tuho ñaha masihi. Ò sehe ni tuhutuhi: “Cohamacu yare ti joari tju sehe Jesure yahuro nimaha. Á jia Cohamacu yare ti joari tju to niriro seheta yoare masa Jesure”, ni tuhutu, sã masihi.

¹⁷ Lázaro ti siõ sãari copapu jirirore Jesu to pisuchu tirore to masochu ñurina cjiro yuhure masare. ¹⁸ Á jia Lázaro Jesu masorire tí tuhori baharo masa payu Jesure

ñua tare. ¹⁹ Ti ã tachu ñua fariseo curua macaina ti basi õ sehe niri jire:

–Jipihtina Jesu yaina dihta wahaa nina mipare. Æ jina mari dohse yoa masieraja tinare –niri jire fariseo curua macaina ti basi.

Mahainacã griego masa Jesure maca taha

²⁰ Æ yoa bose numari Cohamacure ño payoa taina mehne macaina mahainacã griego masa jire. ²¹ Æ jia tina Felipe cahapu wihiri jire. Felipe sehe Betsaida wama tiri maca Galilea yahpai jiri maca macariro jire. Æ jia tiro cahapu wihirina õ sehe niri jire tire:

–Jesure ñu duaaja sã –niri jire tina.

²² Ti ã nichu tuhoro Felipe Andrepare tîre yahuro wahari jire. Æ jia tina pñaro Jesure yahure. ²³ Ti ã yahuri baharo Jesu tinare õ sehe ni yahure:

–Yuhu masano Cohamacu warocariro jija. Yuhure jipihtina ti ño payohti pja mipare jirota nina. Mipare yu yariahti pja jirota nina. ²⁴ Potocãta masare yahui nija. Toari yapare yahparu mari yaerachu, tí yapare mari toerachu cã yapata tjuarohca. Æ jiro tí yapare mari yari baharo dicha tirohca. (Tó seheta yu yariari baharo yuhure masa copapu ti siõ sãari baharo payu masare Cohamacu mehne ã jirucuhitina jichu yoaihca yuhu.)

²⁵ Ahri yahpai masa jiare pjîro tuhutuboca masa. Æ tuhutuna Cohamacure wacũerana, pichacapu wahanahca masa. Ahri yahpai masa jiare ã tuhutunocahna, Cohamacu mehne ã jirucunahca. ²⁶ Yu yare yoa duana, yu buheare noano tuhoga masa. Mûsa ã yoana masa cãhu yu jihtopure jinahca. Yu yare yoarirore yu Pucu sehe wahchea mehne ñanohca –nire Jesu.

Jesu to yariahtore yahuha

²⁷ Æ ni tuhsu õ sehe ni namore:

–Mipare yuhu ñano yajeripohna tija. ¿Yu Pucure dohse nihcari yuhu? “Mai, yu ñano yuhduhtore yoa tjia yuhure”, ¿nihcari yuhu? Tîre nieraja yuhu. Nãno yuhduhti cjihõtota ahri yahpare tahi. Æ yoa yu ñano yuhduhti pja mipare jiro nina –ni yahure Jesu sãre to buheinare.

²⁸ Æ yoa õ sehe nire to Pucurore:

–Mai, mu tuariro jiare mipare ñoga masare –nire Jesu to Pucurore.

To ã nichu muanopu durucuro coa tare:

–Tuariro yu jiare masare ño tuhsu. Mipare ã jicu pari turi ñoihca masare –nino coa tare.

²⁹ To ã nino coa tachu tuhõa tói ducuína masa payu õ sehe nire:

–Wupo jica ã coa taro –nire masa.

–Anjo Jesure yahuro nire –nire paina masa.

³⁰ Æ sehe nire Jesu sehe:

–Muanopu yuhure tuhõ dutiro ã nino coa taerare. Mûsa sehete tuhõ dutiro ã nino coa tare. ³¹ Mipare ahri yahpa macaina ti ñano yoari buhirire buhiri dahrerohca tinare. Ahri yahpa macaina ti puhtorore wafinore cohãnohca Cohamacu. ³² Æ jicu yuhure crusapu tí wahcõ dapochnu payu masare yuhu mehne macaina ti wahachu yoaihca yuhu –nire Jesu.

³³ Æ nino “Crusapu to yariahtore”, yahuro nire Jesu masare. ³⁴ To ã nichu tuhõa masa sehe tire õ sehe nire:

–Cohamacu yare ti joari tjui õ sehe nina: “Cristo jipihtia dachoripe jirohca”, ni joaa tiha. ¿To ã ni joachu mũhure masunore Cohamacu warocarirore dohse jiro baro mũhure crusapu wahcõ dapoahcari masa? ¿Masuno Cohamacu warocariro noa jijari tiro? –ni siniture tina.

³⁵ Ti ã nichu õ sehe ni yuhure Jesu:

–Buhriaro to ñu masichu yoaro seheta jicu masare Cohamacu yare noano masichu yoaja yuhu. Baharo crurerocã mûsa mehne jisi yuhu. Mûsare yu buhechu mipare tuhoga ñaare mûsa yoerahti cjihure Cohamacu mehne mûsa ã jirucuhiti cjihure. Yu buheare tuhõeraina nahitianoi tiniina yoaro seheta ti wahahtore masierara. ³⁶ Yuhu buhriaro yoaro sehe jiriro tjija. Æ jicu masare buhecu Cohamacu yare noano masichu yoaja masare. Mipare yu wahahto pano yuhure wacũ tuaga. Æ wacũ tuana yu yaina jinahca masa –nire Jesu.

Æ ni yahu tuhsu duhti wahcãa wahare.

Judio masa Jesure cahmaeraha

³⁷ Payu tahari Cohamacu tuua mehne tinare Jesu to yoa ñopachuta judio masa payu tire ne tuhõ duaerare. ³⁸ Cohamacu yare ti joari tjui Isaia cjiro to joariro seheta ã yoaa nire tina. Æ sehe ni joaa tiha Isaia cjiro:

“Cohamacu, mu buheare sã yahuchu masa tuhõ duaerare.

Mu tuare tinare mu yoa ñopachuta, tîre ‘Potocã jierara’, nire tina”, ni joaa tiha Isaia cjiro.

³⁹ Ti ã tuhõ duaerachu ñano Cohamacu tinare masierachu yoare. Tí cãhure Isaia cjiro õ sehe ni joaa tiha tjõa:

⁴⁰ “Capari ñeraina yoaro sehe jiina jichu yoaa tiha Cohamacu tinare.

Æ yoa to yare masierachu yoaa tiha tinare.

Æ jia to tuare ñupahta tina ti ñurire tuhõ ñahaerara.

Æ jia to buheare tuhõpahta tîre tuhõ ñahaerara tina.

Cohamacu ya buheare masia, ti ñaa yoari buhirire cohã dutibõa.

Ā jiro tinare yuħduchu yoaboa tiro”, ni joaa tiha Isaia cjiro Cohamacu yare ti joari tjui. ⁴¹ Ā ni joaro Isaia cjiro Cristo tu-aare masino to niriro seheta Cristore yahu joaa tiha tjoo.

⁴² Paina Jesure ti cahmaerapachuta judio masa, sã puħtoa mehne macaina cãhu payu Jesure wacũ tuaa, tirore cahmare. Ā cahmapahta tina fariseo curua macainare cuia painare “Jesu mehne sãahi”, ni yahu duaerare. Tĩre ti yahuchũ tuhoa Jesure ti cahmari buhiri judio masa sã buheri wũhũpũ tinare sãa dutieraboa fariseo curua macaina sehe. ⁴³ Cohamacure wahchechũ yoa duapahta ti yuħdoro fariseo curua macaina sehere wahchechũ yoa duare Jesure cahma ducaina. Ā jia tina “Jesu yaina wahahi”, ni painare yahu duaerare.

Jesu yahuare ti tuho duaerari buhiri masa buhiri tiaha

⁴⁴ Ā yoa Jesu tuaro sañurucu, õ sehe ni yahure:

–Yuħure wacũ tuariro, yuħu dihtare wacũ tuaerara. Yuħure warocariro cãhure wacũ tuara tiro. ⁴⁵ Tuhsu, yuħure masina yuħure warocariro cãhure masina. ⁴⁶ Buhriaro to ñu masichũ yoaro seheta ahri yahparũ Cohamacu yare masichũ yoai tai nihi yuħu. Ā jicu Cohamacu yare masare masichũ yoaja. Nahitianoĩ wahariro yoaro sehe jiriro ñaare yoarucura. Yuħure wacũ tuariro tiro yoaro sehe yoasi. Yuħure wacũ tuariro quihõno tuhorohca. ⁴⁷ Paina yu yahuare tuħopahta yu niriro seheta yoerara. Ti ā yoaerapachuta yu yahuare ti yoaerari buhirire buhiri dahresi yuħu sehe tinare. Ahri yahparũre buhiri dahrei tai nierahi yuħu. Ahri yahpa macainare pichacaru wahaborinare yuħduchu yoahitiro cjihto tai nihi yuħu. ⁴⁸ Yuħure cahmaerainare, yu yahua cãhure cahmaerainare buhiri dahrea jiaha. Tina yu yahuare ti tuhoerari buhiri ahri yahpa pihtiri dachoi buhiri tiaha. ⁴⁹ Yuħu yu mũ sũro yahueraja. Yu Pũcu yuħure warocariro sehe yuħure yahu dutire. Ā jia yu yahua sehe to yu durucua jira. ⁵⁰ To yu durucuaire “Quihõno jira” nina, Cohamacu mehne ā jirucunahca mũsa. Ā jicu yu Pũcu to yahu dutiriro seheta yahuja mũsare –nire Jesu.

13

Jesu to buheina dahporire cosaha

¹ Ā yoa pascua bose numari panocã ahri yahpare to cohã wahcãhto cjihtore to Pũcũro caharu to wahahto cjihtore masire Jesu. Tuhsu, ahri yahpa macainare to yainare tiro tuaro cahire tina mehne to jiro puro. Ā cahĩrucura to yainare.

² Tĩ ñamine Jesu sã to buheina mehne sã chũchu Juda Iscariotere Simo macanore Jesure ñu tuhtiinare ño duti tuhsũri jire wafĩno sehe. ³ Tuhsu, to Pũcũro Cohamacu Jesure jipihtina bui to puħtoro sũre masire Jesu. Ā yoa Cohamacu caharu to tari cjiire, baharo mũanopũ to mũjahti cãhure masire.

⁴ Ā masino wahcãruca, to suhtiro bui macanore tjuwe na, tũre cũ tuhsu, suhtiro cahsaro mehne to pjaro yũjui duhtere. ⁵ Duhte tuhsu, waparoi core pio sãa, sã to buheinare sã dahporire cosa dũcare. Sãre cosa tuhsu to duhteri cahsaro mehne pahã cohãre sã dahporire.

⁶ Paina buheinare cosa wahcã, Simo Pedropũre sũre. To dahporire to cosahto pano Pedro sehe tirore õ sehe nire:

–Puħtoro, ĩyũ dahporire cosai tai nijari mũhu? –nire Jesure Pedro.

⁷ –Michapucacã mũhũre yu yoahitire masierara mũhu. Ā masierapachuta baharo masihca mũhu –nire Jesu.

⁸ –Yu dahporire ne cosasi mũhu –nire Pedro.

–Mũhũre yu cosaerachũ yu yairo jisi mũhu –nire Jesu.

⁹ –Puħtoro, yu dahpori dihtare cosai tjiga. Yu dahporire, yu wamomacarine, yu dapu cãhure cosaga –nire Pedro.

¹⁰ To ā nichũ Jesu piti dahre buhero õ sehe nire:

–Cũiro masũno cuhsũro to pjacũre noano tju cosa pahõna. Ā jiro pari turi tirore tju cosaro cahmaerara. To dahpori dihtare cosaro cahmana. Jipihtina mũsa ñaa yoari buhirire cosarina cjiro mũsa jipachuta cũiro mũsa mehne macariro to ñaa yoari buhirire cosamahnoerariro jira –nire Jesu.

¹¹ Jesu tirore ñu tuhtiinare ñohtirore masire. Ā masino “Cũiro mũsa mehne macariro to ñaa yoari buhirire cosamahnoerariro jira”, nire.

¹² Sã dahporire cosa tuhsu, to suhtirore sãa tuhsu, nuju sũre to dujiriroihta.

–ĩMichapucacã mũsare yu yoirire tuho ñahajari mũsa? ¹³ Mũsa yuħure “Buheriro”, ni pisuna, “Puħtoro”, ni pisuna potocãta nina nica yuħure. Mũsare buheriro, mũsa puħtoro potocãta jija yuħu. ¹⁴ Ā jina yuħu mũsare buheriro, mũsa puħtoro jipaihta mũsa dahporire cosariro yu jichũ ñũna mũsa cãhu mũsa mehne macaina dahporire cosaga. ¹⁵ Michapucacã mũsare cosacu, baharo mũsa yoahti cjihtire mũsare ñoi nija. Mũsa mehne macainare mũsa yoad-ohoitire ñoi nija. Mũsare yu yoiriro seheta mũsa cãhu yoaga. ¹⁶ Potocã mũsare niita nija. Mũsa yu cahamaca yoaro sehe jiina yu bui jierara. Mũsare buhe duti yu warocarina jira mũsa. Ā jina yu bui jierara mũsa. Ā jicũta “Yu yoiriro seheta yoaga”,

nihni mäsare. ¹⁷ Ahrire masina, yu dutiare yoana, wahcheina jinahca mäsa.

¹⁸ Mäsare jipihtinare ä nieraja. Yu beserinare masija yuhu. Cohamacu to yare ti joari tjui to ni joariro sehetä ä waharohca. “Yuhu mehne churirota yuhure wajä duare”, ni joaä tiha Cohamacu yare ti joari tjui. ¹⁹ To ä yoahito pano ahrire yahuyui nija mäsare. Yuhure to ä yoari baharo “Jesuta Cristo Cohamacu warocarirota jira”, mäsa nihti cjihtire ahrire mäsare yahuyui nija yuhu. ²⁰ Potocä mäsare niita nija. Yu warocainare cahmariro yuhu cähure cahmana tiro. Tuhsu, yuhure cahmariro yuhure warocariro cähure cahmana tiro —nire Jesu säre to buheinare.

Juda Jesure nu tuhtiinare to ñohtore yahuha Jesu

(Mt 26.20-25; Mr 14.17-21; Lc 22.21-23)

²¹ Ä ni yahu tuhsu Jesu tuaro cahyare. Ä cahyaro ö sehe ni yahure tiro säre:

—Potocäta mäsare nii nija. Cäiro mäsa mehne macariro yuhure nu tuhtiinare yuhure ñonohca —nire Jesu.

²² To ä nichu tuhona Jesure ñohtirore masierana, sä basi cahma ñuroca öi. ²³ Cäiro Jesu to buheina mehne macariro yuhu, Jesu to cahiriro sehe to pari wahpa dujiji. ²⁴ Yu ä dujichu ñano Simo Pedro yuhure to wamomaca mehne yoa ño, siniture:

—Jesure ñohtirore diro sehere nino nibocari Jesu? Yahuga säre —ni to wamomaca mehne yoa ño, sinitu ñure Pedro.

²⁵ To ä nichu yuhu sehe Jesu cahacäi dujiriro jicu sinitu ñahi tirore:

—Puhtoro, ñdirore nii nijari mähu? —ni sinitu ñahi yuhu.

²⁶ —Ahri päore dahra waha na, soha yu wahtiro sehe tirota jira yuhure ñohtiro —nire Jesu.

Ä ni tuhsu ti päo to dahra waha narirore soha tuhsu türe Judare Simo Iscariote macanore ware. ²⁷ Ä yoa päore to ñahari baharo watino sehe Judare ñano yoa dutiri jire. Ä jiro Jesu tirore ö sehe nire:

—Mu yoahito cjihtore cjero yoa bahrañoga mähu —nire Jesu Judare.

²⁸ To ä nichu tuhona sä mesapu dujiina, Jesu Judare to nirire noano tuho ñahaerahi. ²⁹ Cäina ö sehe ni tuhutumahi: “Judä sä niñerure wihboriro jira. Ä jiro bose numui sä chuhti cjihtire nuchu dutiro warocare Jesu Judare. O pjacoinare niñerure waha dutiro niboca Jesu”, ni tuhutumahi sä cäina. ³⁰ Ä yoa Juda ti päore ñaha tuhsu, wijaa wahare. To wijaari pja ñami jire.

Wahma dutiare yahuha Jesu

³¹ To ä wijaari baharo ö sehe nire Jesu:

—Mipu pinihtare yuhu masano Cohamacu warocariro yu tuariro yu jia tiare ñonohca

Cohamacu masare. Ä jicu Cohamacu to tuariro to jiare ñoihca yuhu sehe. ³² Ä jiro Cohamacu to tuare yu ñochu tiro sehe yu ya tuaa cähure mipu pinihtare ñono taro nina. ³³ Yu pohna yu cahina, yuhure tuhoga. Mahaä dachoricä mäsa mehne jisinihca. Yu wahari baharo yuhure macanahca mäsa. Ä jicu mari coyeyä judio masare yu niriro sehetä mäsa cähure nija. “Yu wahahtore mäsa sehe waha masierara”, tinare yu niriro sehetä mäsa cähure ä ni yahuja. ³⁴ Wahma dutiare mäsare yahuihtja. Mäsa mehne macainare cahiga mäsa. Mäsare yu cahiriro sehetä, mäsa mehne macainare cahiga. ³⁵ Ä jina mäsa mehne macainare mäsa cahichu ñua yu yaina mäsa jiare masiahca paina —nire Jesu säre.

“Jesure masieraja”, Pedro to nihto cjihtore yahuha Jesu

(Mt 26.31-35; Mr 14.27-31; Lc 22.31-34)

³⁶ To ä nichu Simo Pedro Jesure ö sehe ni sinitu ñure:

—Puhtoro, ñnohopa wahaihcari mähu? —nire Pedro.

—Yu wahahtopure mipure yuhu mehne waha masierara mähu. Mipure waha masierapaihta baharo yu cahai wahacuhca —nire Jesu Pedrorre.

³⁷ —Puhtoro, ñdohseacu mipure mähu mehne waha masierabocari yuhu? Yuhure ti wajä duapachuta mähu ne duhusi yuhu —nire Pedro Jesure.

³⁸ —Jä tjiari? ñMuhure ti wajä duapachuta, mähu yuhure duhueraihcari? Potocäta mähu nii nija. Caraca to duhto pano “Jesure masieraja”, niihca mähu painare. Tia taha ä niihca mähu —nire Jesu Pedrorre.

14

Jesu Cohamacu cahapu wahari maha yoaro sehe jira

¹ Baharo Jesu säre ö sehe ni yahure:

—Ne cahya pjiro tuhoutuena tjiga. Cohamacure wacü tuaga. Ä jina yuhu cähure wacü tuaga. “Cohamacu mehne yuhdunahca”, ni tuhotuga tirore. Yuhu cähure äta ni tuhotuga mäsa. ² Yu Pacu to jiropure payu wuhuse jira. Mäsa jihto cjihtore cahnoyui wahai nija. Ti potocä tjira. Ä jicu mäsare türe yahuja. ³ Ä jicu mäsa jihto cjihtore cahno tuhsu, öpata pari turi majare tjua taihtja yuhu. Ä jina toi yu jiroita mäsa cähü jinahca tjoa. ⁴ Mipure yu suhtopure wahari mahare masi tuhsura mäsa —nire Jesu säre to buheinare.

⁵ —Puhtoro, mu suhtore masieraja sä. Jä jina dohse yoa mu wahari mahare masinahcari sä? —ni sinitu ñure Toma Jesure.

⁶ To ā ni sinituču tūhoro Jesu sehe ō sehe ni yūhtire:

—Yūhu Cohamacu cahapu wahari maha yoaro sehe jiriro jija. Cohamacu cahapu wahachu yoariro, potocā yahuriro, ā catirucuchū yoariro jinocaita nija yūhu. Ā jia yū yaina dihta yū Pucu cahapu wahaahca. ⁷ Panoru yūhare masina, yū Pucu cūhare masiboa mūsa. Mipāre tirore űure mūsa. Ā jina tirore masi tuhsura mūsa —nire Jesu sāre.

⁸ To ā nichu Felipe sehe ō sehe nire:

—Puhtoro, mari Pucure űoga sāre. Tō purota űu duaja sā —nire tiro.

⁹ To ā nichu Jesu ō sehe ni yahure:

—Felipe, űyoari pja yūhu mehne jipaihta, mūhu masierasinihari yūhare? Yūhare űariro yū Pucu cūhare űu tuhsure. Ā jicu “Mari Pucure űoga sāre” nicu, űdohseacu ā nijari mūhu yūhare? ¹⁰ Yūhu yū Pucu mehne puaro jipanahta cūrota jija. űTire “Potocā jierara”, niimeje nijari mūhu? Mūsare yahucu yū mū saro yahui nieraja. Yū Pucure yahubasai nija. Ā jiro tiro yūhu mehne jiriro to tuaa mehne yoa űona. ¹¹ Yūhu yū Pucu mehne puaro jipanahta cūrota jija. Tire “Potocā tjira”, ni wacūga mūsa. Tire “Potocā tjira” nierana, Cohamacu tuaa mehne yū yoa űoare wacūna, yū Pucu mehne yū cūrota jiare “Potocā tjira”, ni wacūga mūsa. ¹² Potocāta mūsare ni nija. Yūhare wacūtuariro yū yoariro sehta yoarohca. Ā yoa tiro yū yūhdoro yoarohca. Yū Pucu cahapu tjuaai tai nija mipāre. Ā jiro yūhare wacūtuariro yū yūhdoro Cohamacu tuaa mehne yoa űonohca. ¹³ Ā jicu yūhare wacū tuaina ti sinino purota yoaihca. Ā yoacu yū Pucu to tuariro jiare űoihca. ¹⁴ Yūhare wacū tuaina mūsa jichū mūsa sinino purota yoaihtja —nire Jesu.

“Espiritu Santore mūsare warocaihtja”, ni yahuha Jesu

¹⁵ Ā ni tuhsū ō sehe ni namore:

—Yūhare mūsa cahīna, yū dutiare noano yoanahca. ¹⁶ Yū Pucure sinibasaihtja. Yū ā sinibasachu yū Pucu sehe pairore mūsare yoadohohtirore mūsare warocarohca. Ā jiro tiro mūsare yoadohohtiro sehe jipihitia dachoripe mūsa mehne ā jirucurohca. ¹⁷ Tiro potocāta yahuriro Espiritu Santo tjira. Ahri yahpa macaina yūhare cahmaeraina sehe tirore masierara. Ā jia tirore cjuā masierara. Tirota mūsa mehne ā jirucurohca. Ā jina tirore masina mūsa.

¹⁸ Mūsare cohāsi yūhu. Mūsa mehne jihtiro cjihto tjua taihca yūhu tjoa. ¹⁹ Wiho mejeta mahanocā dūhsara yū wahahto cjihto. Yū wahari baharo ahri yahpa macaina yūhare wacū tuaraina yūhare pari turi űusi. Mūsa sehe yūhare űnahca. Yū

catiriro jichū mūsa cūhu jipihtia dachoripe Cohamacu mehne catirucunahca. ²⁰ Tī dachoi yū tjua tahti dachoi yūhu yū Pucu mehne cūrota sā jichū masinahca mūsa. Ā jina yūhu mehne macaina mūsa jichū mūsa mehne macariro yū jichū cūhare masinahca mūsa. ²¹ Yū dutiare yoariro yūhare cahīrota jira. Ā jiro yūhare cahīrore yū Pucu sehe cahīnohca. Ā jicu yūhu cūhu yū dutiare yoarirore cahīhca. Ā yoa yū jia tiare noano masichū yoaihca tirore —nire Jesu sāre to buheinare.

²² Sā mehne macariro paio Juda wama tirore jire. Juda Iscariote Jesure űu tuhtinire űohtiro jierare tiro. Pairo Juda jire. Ā jiro tiro Jesure ō sehe ni siniture:

—Puhtoro, űdohse yoaijari mūhu tinare ā nicu? űAhri yahpa macainare mūhare masichū yoeracu, dohse yoacu sā dihtare mūhare masichū yoaihcari mūhu? —ni siniture Juda.

²³ To ā nichu tūhoro Jesu tirore ō sehe ni yahure:

—Yūhare cahīna, yū dutiare noano yoa nina. Ti ā yoachū yū Pucu sehe tinare cahīnohca. Ā jina tina mehne jina tanahca sā. ²⁴ Yūhare cahīerario yū dutiare yoerara. Tuhsū, yū yahua mūsa tūhori cjiri sehe yū ya yahua jierara. Yūhare warocariro ya yahua sehe jira. Tiro yū Pucu tjira.

²⁵ Mūsa mehne jisinicū ahrire mūsare yahusinii nija. ²⁶ Baharo yū sinibasachu yū Pucu Espiritu Santore warocarohca mūsare. Tiro Espiritu Santo sehe mūsare yoadohohtiro jiro, mūsare buhe pahīonohca tiro. Ā yoa mūsare yū yahuri cjirire mūsare wacūchū yoarohca tiro.

²⁷ Mūsare noano jichū yoaihca yūhu. Yūhu yū noano jiriro sehta noano jichū yoaihca mūsare. Ahri yahpa macaina ti mahīoperiro sehta yoasi yūhu mūsare. Yūhu pinihta potocāta noano jichū yoaihca mūsare. Cahya pjiro wacūena tjiga mūsa. Ā jina cuiena tjiga mūsa. ²⁸ “Yūhu wahaahca. Ā jicu mūsa mehne jihtiro cjihto tjua taihtja tjoa”, mūsare yū ā ni yahuchū tūho tuhsure mūsa. Tire tūhona, wahcheboa mūsa. Yūhare mūsa potocā cahīrina jina, wahcheboa mūsa. Yū Pucu sehe yū yūhdoro tuara. Ā jina tiro cahapu yū wahahto cjihtore mūsa masiri baharo yūhare cahīna, wahcheboa mūsa. ²⁹ Yūhare mūsa wacū tuhti cjihtire yū wahahtore yahuyui nija mūsare.

³⁰ Ahri yahpa macaina puhtoro watīno sehe tara mipāre. To ā tachū yūhu mūsa mehne yū durucu batohti pja mahanocā dūhsara. Tiro sehe yūhare yūhduruca masierara. ³¹ Wiho mejeta yūhare yū Pucu to dutiriro sehta yoaja yūhu. Āta

yoaja yuhũ yu Pũcũre yu cahĩare ahri yahpa macaina ti masihti cjihtire. Wahcãrucaga. Basa wahana —nire Jesu sãre to buheinare.

15

Jesu secũ yoaro sehe jiriro jira

¹ Baharo piti dahre buhero sãre õ sehe nire Jesu:

—Yuhũ potocãta secũ yoaro sehe jiriro jija. Yu Pũcũ sehe secũre ñu wihboriro yoaro sehe jiriro jira. ² Yu yaina secũ dũpũri yoaro sehe jiina yuhũ mehne macainata jira. Dicha mariea dũpũrire secũre ñu wihboriro to paha cohãrigo sehetã yu Pũcũ to cahmaare yoerainare cohãna. Dicha tia dũpũrire secũre ñu wihboriro to cahnoriro sehetã yu Pũcũ to cahmaare yoainare yoadohorohca tiro “Yu cahmaare yoa namojaro”, nino. ³ Yu yahuaire tũhona, “Potocã tjira”, nire mũa. ⁴ A jiro yu Pũcũ mũa ñaa yoari buhirire cohã tuhsure. ⁵ Yuhũ mehne macaina jiga mũa. ⁶ A jii mũa mehne jiihca. Secũ dũpũri secũ mehne wahã sũera dũpũri jia, tí dũpũri sehe dicha mariahna. Tó sehetã yuhũ mehne macaina jierana yu Pũcũ cahmaare yoa masierara mũa.

⁵ Yuhũ secũ yoaro sehe jiriro jija. Mũa sehe tu dũpũri yoaro sehe jiina jira. Yuhũ mehne macarigo mehne yu jichũ dicha tia dũpũri yoaro sehe tiro yu Pũcũ cahmaare yoara. Yuhũ mehne macaina jierana yu Pũcũ cahmaare yoa masierara mũa. ⁶ Ñaa dũpũrire to cohãboriro sehetã yuhũ mehne macaina jierainare yu Pũcũ cohãnohca. Tí dũpũri ñaia wahachũ secũre ñu wihboriro tí dũpũrire na cahmachu pichacapũ jã cohãnohca. ⁷ Ata yoarohca Cohamacũ yuhũ mehne macaina jierainare.

⁷ Yuhũ mehne macaina jina, yu buheare boeraboca mũa. ⁸ A boerana, mũa cahmano purota siniga. ⁹ A jicu mũa sinino purota yoabasaihtja. ⁸ Yu Pũcũ cahmaare yoaina mũa jichũ ñua “Jesu yaina jira ah-rina”, ni masiahca masa. ⁹ A jia mũsare ñua yu Pũcũre ño payoahca. ⁹ Yu Pũcũ yuhũre to cahĩrigo sehetã mũsare yuhũ cãhũ cahĩa tihi. Yu cahĩina jirucuga mũa. ¹⁰ Yu cahĩina jirucuína yu dutiare yoara. Yu Pũcũ to dutiare yoaja yuhũ. ¹¹ A yoacu to cahĩrigo jirucuja yuhũ. Tó sehetã mũa cãhũ yu dutiare yoana yu cahĩina jirucunahca mũa.

¹¹ Ahrire mũsare yahuhi yuhũ mehne mũa noano wahchehto cjihtore. ¹² A jina tuaro wahchenahca mũa. ¹² Õ sehe dutija mũsare: Mũsare yu cahĩrigo sehetã mũa mehne macaina cãhũre cahĩga. ¹³ Cãiro masũno tiro mehne macarigo yaro jiborirore yariaro tiro mehne macarigo tuaro cahĩna, paina ti cahĩrigo yuhdoro. ¹⁴ A jina yu dutiare yoana yuhũ mehne macaina

jira mũa. ¹⁵ Potocãta yuhũ mehne macaina waro jira mũa. Mũa ã jiina jichũ jipihtia yu yoarire yahuja mũsare. Cahamacũno to puhtoro yoarire masierara tiro. ¹⁶ A jicu “Yu cahamaca wiho jiina jira mũa”, mũsare nieraja. Yu Pũcũ yuhũre to yahurire mehne yahu pahĩnohi. ¹⁷ A yahucu “Yuhũ mehne macaina jira mũa”, mũsare nija mipũre. ¹⁶ Mũa sehe yuhũre ne beserare. Yuhũ sehe mũsare besei yu Pũcũ cahmaare mũa yoahntina cjihtire. Mũa ã yoachũ mũa yoaa ne wiho waro jisi. ¹⁷ A jia mũa yoaa ã jirucuahca. Mũa ã yoachũ yuhũre mũa wacũ tuachũ yu Pũcũre mũa sinino purota tiro mũsare warohca. ¹⁷ Ahrire mũsare dutija yuhũ: Mũa mehne macainare cahĩga mũa —ni yahure Jesu.

Jesure to yaina cãhũre ahri yahpa macaina ñu tuhtira

¹⁸ A yoã tiro õ sehe ni yahu namore:

—Ahri yahpa macaina mũsare ti ñu tuhtichũ ñua ahrire wacũga mũa: Mũsare ti ñu tuhtitlo pano yuhũ sehẽre ñu tuhti dũcare tina. ¹⁹ Cohamacũre cahmaeraina mũa jisnichũ, tina mehne macainare ti cahĩrigo sehetã mũa cãhũre cahĩboa tina. Ahri yahpa macaina mũa jisnichũ mũsare besei. ²⁰ A jina mipũre ahri yahpa macaina waro jierara mũa. Mũa ã jierachũ ñua ahri yahpa macaina mũsare ñu tuhtira. ²⁰ “Yu yaina jina mũa yu bui jierara”, mũsare yu niri cjiire wacũga mũa. ²¹ A yu docai jiina jina yu ñano yuhdũrigo sehetã ñano yuhdũnahca mũa cãhũ. Yuhũre ñano yoarinata mũa cãhũre ñano yoahca. Yu buhechũ yuhtirinata mũa buhechũ cãhũre yuhtiahca tina. ²¹ Ahri yahpa macaina yuhũre warocarirore masierara. ²² A jia yuhũre wacũ tuaina mũa jichũ ñua tina ñano yoahca mũa cãhũre.

²² Tinare yu buhei taerachũ yuhũre ti cahmaerari buhiri buhiri mariaboa. Mipũre tinare yu buheri baharo “Ñaa buhiri mariahna sãre”, ni masierara tina. ²³ Yuhũre ñu tuhtirigo yu Pũcũ cãhũre ñu tuhtira. ²⁴ Cohamacũ to tuaa mehne paina ti ne yoerarire yoa ñohi. ²⁵ A yoa tinare tũre yu yoa ñoerachũ tinare ñaa buhiri mariaboa. Cohamacũ tuaa mehne yu yoa ñoare ti ñuri baharo yuhũre yu Pũcũ cãhũre ñu tuhtira tina. ²⁵ A ñu tuhtia Cohamacũ yare ti joari tjui dõipũta to ni joarigo sehetã yoaa nire tina. ²⁶ Õ sehe ni joaã tiha: “Tinare yu ñano yoerapachũta yuhũre ñu tuhtire tina”, ni joaã tiha dõipũta Cohamacũ yare ti joari tjui.

²⁶ Yu baharopũ mũsare yoadohohtiro, yu Pũcũ mehne jirigo mũsare yu warochahtiro Espĩritu Santo tjira. Tiro potocãta yahurigo jira. ²⁷ A jiro tiro taro yu jia tiare yahurohca mũsare. ²⁷ Masare yu buhe dũcachũpũta

musa cãhu dachoripe yãhu mehne ã jirucure. Æ jina musa cãhu yã jia tiare yahunahca painare –ni yahure Jesu.

16

¹ Æ ni tuhsu sãre õ sehe ni yahu namore:

–Baharo yu buheare yãhu cãhure musa cohãerahti cjihtire ahrire jipihtiare yahuhi musare. ² Judio masa mari buhea wãhusepu musa sãa duachã sãa dutisi musare yu yaina musa jiri buhiri. Æ jia pa teheru musare wajãa, “Cohamacã cahmaare yoana nija”, ni tahotuahca paina. ³ Yu Pucãre, yãhu cãhure tina masierara. Æ masieraa musare ñano yoahca tina. ⁴ Æ jina musare ñano ti yoachã ñana, “Ti õ sehe yoahito panota Jesu yahu tuhsure sãre”, ni wacũnahca musa. Musa ã ni wacũhti cjihtire mipure ahrire yahu mãhtai nija musare –ni yahure Jesu.

Espiritu Santo to yoahitire yahuha Jesu

Æ ni tuhsu õ sehe ni yahu namore Jesu:

–Wahmanopure musa mehne jicu ahrire musare yahuerahi. ⁵ Mipu sehere yãhure warocarigo cahapu wahaihca wahai tai nija. “¿Cõhorõ wahaihçari mãhu?” yãhure ni, ne cãiro barota sinitu ñerara musa. ⁶ Æ sinitu ñerapanahca yu wahahtore musare yu yahu mãjachu musa ñano yajeripohna tira. ⁷ Musare potocãta yahui nija. Yu wahari baharo musare noanocanhca. Yu mãnanopu wahaerachu musare yoadohohtiro sehe taeraboa. Wahacu musare tirore warocaihtja yãhu. ⁸ Yu ã warocachu tiro tarohca. Æ wihiro ahri yahpa macaina ñaa yoaina ti ñaa buhiri tiare tinare masichã yoarohca tiro. Noano jia tia cãhure buherohca tiro musare. Tuhsu, Cohamacã masare to buhiri dahrehto cãhure masichã yoarohca masare yoadohohtiro sehe. ⁹ Yãhure wacũ tuaeraina jira ahri yahpa macaina. Æ jiro yoadohohtiro sehe masa ñaa yoaina ti ñaa buhiri tiare tinare masichã yoarohca. ¹⁰ Yu Pucã cahapu wahaihca. Yu ã wahari baharo musa yãhure ne ñasinisi. Æ jiro noano jia tia cãhure masichã yoarohca yoadohohtiro sehe. ¹¹ Ahri yahpa macaina pahutoro wafĩnore Cohamacã buhiri dahre duti tuhsure. Æ jiro Cohamacã masare, wafĩno mehne macainare to buhiri dahrehti cãhure masichã yoarohca yoadohohtiro sehe.

¹² Pjiro jira musare yu yahuhiti cjihti. Wiho mejeta musa sehe yu yahu pahñochu, tuho ñaha pahñoaeraboa. ¹³ Æ jiro potocã jiare yahuriro Espiritu Santo sehe musare quihõno jiare yahu pahñono tarohca. Tiro to mã surõ musare yahusi. Yu Pucã tirore to yahu dutirire tiro yahurohca musare. Æ yoa “Baharõ õ sehe waharohca”, ni

yahuyurohca tiro sehe musare. ¹⁴ Æ yoa yu yare musare tiro yahurohca. Æ yahuro yãhure ño payochu yoarohca musare. ¹⁵ Jipihtia yu Pucã yu yu ya cãhu jira. Æ jicu “Espiritu Santo sehe yu yare yahurohca musare”, nihi musare –ni yahure Jesu.

“Cahyainajipanahta baharo wahchenahca musa”, ni yahuha Jesu

¹⁶ Æ ni tuhsu õ sehe ni yahu namore:

–Mahanocã baharo yãhure ñusi musa. Æ jina baharocãta musa yãhure ñunahca tjoa –nire Jesu sãre to buheinare.

¹⁷ To ã nichu tãhona, sã sehe mahainacã õ sehe ni durucui sã basi:

–“Mahanocã baharo yãhure ñusi musa. Æ jina baharocãta musa yãhure ñunahca tjoa” nino, ¿dohse nino ã niri marine? Æ yoa “Yu Pucã cahapu wahaihca” nino, ¿dohse jiro baro marine ã niri tiro? ¹⁸ “Mahanocã” nino, ¿dohse nino ã niri tiro? To yahurire noano tuho ñahaeraja mari –ni durucui sã basi.

¹⁹ Sã ã ni durucuchu Jesu tirore sã sinitu duarire masino, sãre õ sehe ni yahure:

–“Mahanocã baharo yãhure ñusi musa. Æ jina baharocãta yãhure ñunahca tjoa”, ¿yu niri cjihtire sinitu duajari musa? ¿Tire yu nirire tuho ñahaerajari musa? ²⁰ Potocãta musare nii nija. Yu yariachu ñana musa tiinahca. Tuhsu, tuaro cahyanahca. Æ jia yãhure ño payoeraina sehe wahcheahca. Musa sehe cahyaina cjihti jipanahta, baharo wahchenahca musa. ²¹ Æ sehe jira ti: Numino nijih wahcõno, to ñano yahduhtu pano jira. Æ jiro ticoro tuaro cahyara. Æ cahyaparota to pohna tiri baharo ticorore purĩrere wacũerara ticoro. Wihãrirocã ahri yahpapu to masa bajuaçu ticoro wahchera. Æ jiro ticorore purĩrere wacũerara ticoro. ²² Tõ sehetã musa mipure cahyanahca. Baharo musare ñunahca tjoa. Yãhure ã ñana musa tuaro wahchenahca. Musa ã wahchechu paina musare cahyachu yoa masisi.

²³ Tĩ dachoi yãhure musa ñuri dachoi yãhure sinitu ñusi musa. Masi tuhsurinaru jinahca. Potocãta musare nii nija. Yãhure musa wacũ tuachu ñano yu Pucãre musa siniare tiro musare warohca. ²⁴ Yãhure wacũ tuaina jina, Cohamacãre sini masina musa. Ahri dacho panoi tirore ã sinierasiniare musa. Yãhure wacũ tuatjãhna Cohamacãre siniga. Musa ã sinichu musa sinirire musare warohca, musa wahche pahñohiti cjihtire –nire Jesu sãre.

Ñainare Jesu yahdurucaha

²⁵ Æ ni tuhsu õ sehe ni namore:

–Quiti mehne musare yahua tihã. Æ yahupaihta baharo musare quiti mehne

yahusi yuħu. Ā yahueracu yu Pucu sehere noano poto yahuiħtja masare. ²⁶ Ti dachore musa ya cjiħtire yu Pucare sini payosi yuħu. Yuħure wacu tuana, musa basi tirore sininahca. ²⁷ Musa yuħure cahina. Ā jira yu Pucu caharu yu tariro jichu “Potocā tjira”, nina musa. Ā niina musa jichu ĩno, yuħure cahina musa jichu ĩno yu Pucu sehe masare cahina. To ā cahichu tirore musa sininahca. ²⁸ Yu Pucu cahai jiriro jicu ahri yahparure tai yuħu. Ā jicu mipure ahri yahparu jiriro jisinicu yu Pucu caharu wahaiħca –nire Jesu.

²⁹ To ā nichu sã to buheina õ sehe nii:

–Mipu piniħta quiti marieno durucui noano poto yahui nina muħu sãre. ³⁰ Muħu noano masi pahñoriro mu jichu mipu piniħtare sã masija. Ā jia paina muħure buhe masierara. Tíre mipure sã noano masija. Sã noano masina jina, Cohamacu caharu tariro mu jichu “Potocā tjira”, nija sã –nii sã Jesure.

³¹ Sã ā nichu Jesu õ sehe ni yuħtire sãre:

–¿Mipure “Potocā tjira”, nijari musa juna?

³² Baharo curero jipiħtina musa wuhusepu waha siteina jina, yuħure cohãnahca musa. Musa ā cohãpachuta yu Pucu sehe yuħu mehne jira. Ā jicu yuħu cãirota jieraja. ³³ Ahrire masare yahu muħtahi, yuħure musa wacu tuaa mehne musa noano jiħto sehe. Cohamacure cahmaeraina caharu musa jichu ĩno yoahca masare tina. Ti ā yoapachuta wahchega musa. Ahri yahpa macaina ĩaa buħiri tinare, ti puħtoro watino cãhure yuħduracariro jija yuħu. Ā jina yuħure wacu tuana wahchega musa –nire Jesu sãre to buheinare.

17

Jesu to buheina ya cjiħtire Cohamacure sini payoha

¹ Ā ni yahu tuħsu Jesu muanoru ĩuroca muo, Cohamacure õ sehe ni durucure:

–Mai, mipure mu yahu quihõriro seheta yuħure ĩno ti yoaħti pja mu sãrota nina. Yuħure mu masare masare ño payochu yoaga. Mu ā yoachu muħure masare ño payochu yoaiħca yuħu cãhu. ² Jipiħtina bui puħtoro yuħure cãre muħu. Ā jicu yuħure mu warinare muħu mehne ā jirucuchu yoaiħca yuħu. Tuħsu, muħure masare ño payochu yoaiħca yuħu. ³ Muħu diħta Cohamacu waro jira. Yuħu Jesucristo mu warocariro jija. Ā jia jipiħtina muħure masiina, yuħu cãhure masiina muanoru mari mehne ā jirucuaħca –nire Jesu.

⁴ Ā ninota õ sehe ni namore Cohamacure:

–Ahri yahpare mu yoa dutiri cjirire yoa pahñoja yuħu. Ā yoacu muħure masare ño payochu yoaja yuħu. ⁵ Ahri yahpa to jiħto

pano muħu mehne yu jichu jipiħtina yuħure ti ño payo muħtariro seheta mipure yuħure ti ño payochu yoaga tjoa.

⁶ Ahri yahpai jinare yuħure mu warinare muħure masichu yoahi. Mu warina mu yaina jira. Ā jicu tinare ware muħu yuħure. Ā jia mu dutiare yoare tina. ⁷⁻⁸ Yuħure mu yahurire tinare buhehi. Yu ā buhechu tuhoa yu buheare cahmare tina. Ā jia potocãta mu cahai tariro yu jichu masina tina. Tuħsu, mu warocariro yu jichu “Potocā tjira”, ni tuhotura tina. Ā yoa jipiħtia yu ya mu ya ti jichu masina tina.

⁹ Ti ya cjiħtire muħure sini payoi nija. Paina ya cjiħti sehere sini payoi nieraja yuħu. Yuħure mu warina mu yaina jira. Ā jicu ti ya cjiħtire sini payoi nija muħure.

¹⁰ Tina jipiħtina mu yaina jira. Ā jia mu yaina sehe yu yaina jira. Yuħure wacu tuaa yu tuariro jiare masichu yoara tina masare.

¹¹ Mipure ahri yahpare tjuasi yuħu. Mu caharu waha tai nija. Yu ā wahapachuta mipure yuħure mu warina ahri yahpare tjuahca. Mai, muħu noariro jira. Yuħure mu warinare mu tuaa mehne ñu wihbobasaga. Mu ā ñu wihbochu mari cãirota mari jiro seheta tina cãhu cã curuata jiaħca. ¹² Tina mehne jicu mu tuaa mehne tinare noano ñu wihbohi. Cãiro piniħta pichacaru waharohca mu yare ti joari tjui to yahuriro seheta.

¹³ Mipure mu cahai waha tai nija. Ā jicu ahri yahpai ahri jipiħtiare yu yainare yahuja yuħu mehne ti noano wahcheħto cjiħtore. ¹⁴ Mu yare yahui tinare. Tina yu yoaro seheta ahri yahpai ji dojahtina jierara. Ā jia ahri yahpa macaina sehe tinare ñu tuħtura. ¹⁵ “Ahri yahpai jinare, yu yainare naaga”, nieraja. Ā nierapaiħta tinare noano ñu wihboga “Watino ĩaare yoa dutiri”, tinare nicu. ¹⁶ Ahri yahpa macariro jieraja. Tina cãhu yu yoaro seheta ahri yahpai ji dojahtina jierara. ¹⁷ Yu yainare mu buhe mehne noaina wahachu yoaga tinare. Mu yahua sehe potocã tjira. ¹⁸ Ahri yahpare yuħure mu warocariro seheta yuħu sehe yu yaina cãhure mu yare buhe duticu warocahi. ¹⁹ Mu cahmaare yoaħtiro cjiħtore yariaħtiro jicu yu pjacure waja. Ā waja yuħu yu yaina cãhu mu cahmaare potocã ti noano yoaħti cjiħtire.

²⁰⁻²¹ “Yu yaina mipure jiina diħtare yoadohoga”, ni sini payoeraja yuħu. Yu yaina painare yu yare ti buheri baharo paina cãhu yuħure wacu tuahca. Tina cãhure yoadohoga, yu yaina jipiħtina cã curuai ti jiħto cjiħto sehe. Yuħu muħu mehne mari puaro jipanaħta cãiro tjija. Mari cãirota mari jiro seheta tina cãhu mari mehne cã curuaiħta jijaro. Cã curuaita jijaro mu warocariro yu jiare jipiħtina masa “Potocã

tjira” ti nihto sehe. ²² Yuhure mu masichu yoariro seheta yu yainare yu jia tiare masichu yoai. Tinare yu a masichu yoachu cairota mari jiriro seheta tina cahu cu curuaita jiahca. ²³ Yuhu tina mehne jija. Tuhsu, muhu yuhu mehne jira. Mari a jiina jichu yu yaina potocata cu curuaita noano jiahca. Cu curuaita ti jichu nua mu warocariro yu jiare ahri yahpa macaina masiahca. Tuhsu, yuhure mu cahiriro seheta yu yaina cahure mu cahiare masiahca masa.

²⁴ Mai, ahri yahpa to ji dacha to pano yuhure cahia tire muhu. A cahicu yu masi pahnoriro, si siteriro yu jichu fiore muhu. A jicu yuhure mu warina yuhu mehne ti jichu cahmaja masi pahnoriro, si siteriro yu jichu ti masihtu cjihtire. ²⁵ Mai, muhu noariro jira. Ahri yahpa macaina naina muhure masierara. Yuhu sehe muhure masija. A jia mu warocariro yu jichu masina yu yaina. ²⁶ Muhure tinare masichu yoai. Baharopu cahure muhure tinare masichu yoaihtja yuhure mu cahiriro seheta painare ti cahihtu cjihtire. A jicu yu yaina mehne jiihca —nire Jesu Cohamacure.

18

Jesure peresu yoaha

(Mt 26.47-56; Mr 14.43-50; Lc 22.47-53)

¹ To a niri baharo Jesu sa cahu to buheina Cedro wama tiri mare pahā, olivo wama tia yucari ti toari wesepu sui. ² Payu tahari ti wesei, ti yuca docai sa Jesu mehne cahmachua tii. A jiro Juda Jesure nu tuhtiinare nohtiro ti wesere masire. ³ A masino pu curua surarare mu ta tare ti wesepu Jesure fiore taro. Cu curua surara waro jire. Pa curua surara Cohamacu wuhure cohtaina jire. Tina sacerdotea puhto, fariseo curua macaina ti warocaina jire surara, Cohamacu wuhure cohtaina mehne. A taa sihāa pocare, sihāa yucari cahure sihā tare. Ti wamao cahure cjuare jira. ⁴ Ti wesepu ti wihiri baharo Jesu to fiore wahahtore masino, tinare piti boca, o sehe ni siniture:

—¿Noare macana nijari musa? —nire Jesu.

⁵ —Jesu Nazare macarirore macaja sa —ni yuhtire tina.

—Tiro tjija yuhu —nire Jesu.

Juda sehe, Jesure fiore dutiro fiore tina mehne jire. ⁶ A jia “Tiro tjija yuhu”, Jesu to nichuta tina sehe caa waha, yahpapu du siti mu bora caha sure. ⁷ Ti a wahachu fiore tinare pari turi o sehe ni siniture Jesu:

—¿Noare macana nijari musa? —nire.

—Jesu Nazare macarirore macana nija sa —ni yuhtire tina tjoa.

⁸ —“Tiro tjija”, ni tuhsu mahicu yuhu musare. A jina yuhure fiore, ahrinare

yuhu mehne macainare peresu yoena tjiga musa —nire Jesu.

⁹ A sae cahino ne cairore butichu yoare. A yoaro to pano Cohamacure to niriro seheta yoaro nire tiro. “Yuhure mu warinare ne cairore boerahi”, to niriro seheta yoaro nire Jesu. ¹⁰ A yoa Simo Pedro fiore pjiore cjuaro, ti pjiore tua we naroca, sacerdotea bui puhtoro cahamacano Malco wama tirore cahmonore cja pahrēnocare. To poto buhusehe macari cahmonore cja pahrēnocare. ¹¹ A to cja pahrēchu fiore Jesu tirore o sehe nire:

—Mu fiore pjiore wihboga. Yu Pucu yuhure to fiore yuhu dutiriro seheta fiore yuhduhtja yuhu —nire Jesu Pedore.

Sacerdotea bui puhtoro cahapu Jesure naaha tina

(Mt 26.57-58; Mr 14.53-54; Lc 22.54)

¹² To a ni tuhsu chuta surara, ti puhtoro mehne, Cohamacu wuhure cohtaina surara cahu Jesure fiore, tirore duhtere. ¹³ Duhte tuhsu Ana cahapu naa muhtare tina. Ana sehe Caifa marechano jire. Caifa sehe ti cahmare sacerdotea bui puhtoro jire. ¹⁴ “Judio masa ya cjihtire cairo masano yariachu noana”, niriro cjiro jire Caifa sehe.

“Jesure masieraja”, niha Pedro

(Mt 26.69-70; Mr 14.66-68; Lc 22.55-57)

¹⁵ A jina yuhu Simo Pedro mehne Jesure yoa cureropu nu nua tii. Yuhu sehe sacerdotea bui puhtoro to nu masiriro jicu Jesu baharo puhtoro wuhu jiri sahnopu saa waha. ¹⁶ Yu a saachu Pedro sehe sahnopu sopacai tjuaracu sure. A jicu majare wiaa ta, sopacare cohtaricore sinitu fiore “Ahriro Pedro saa ta masijari”, nicu. Yu a sinitu tuhsu ticoro Pedore saa ta dutire. To saa ta dutiri baharo yuhu Pedore na saa waha. ¹⁷ Yu a na saachu fiore sopacare cohtaricore sehe Pedore o sehe ni siniture:

—¿Jesu buheina mehne macariro jierajari muhu? —nire ticoro Pedore.

—Jieraja yuhu —ni yuhtire Pedro sehe.

¹⁸ Sa suhto pano to macaina cahamaca, surara mehne ti sohmahti pichacare wijā tuhsu jire. Yusua nire. A jia tina ti pichaca duhtu caha ducua, sohmaa nire. Ti a sohmachu fiore, Pedro cahu waha, sohmare.

Sacerdotea puhtoro Jesure sinituha

(Mt 26.59-66; Mr 14.55-64; Lc 22.66-71)

¹⁹ A yoa sacerdotea bui puhtoro Jesu buherire, sae to buheina cahure sinitu fiore jire Jesure. ²⁰ To a sinituchu Jesu sehe o sehe ni yuhtiri jire tirore:

—Jipihtinare buhecu ti pano ducuh. A buhecu judio masa mari buhea wuhusei Cohamacu wuhu cahure a buherucuh. Musa fiore buherahi yuhu. ²¹ ¿Dohseacu yuhure

sinitujari mahu? Sinitu duacu ya buheinare sinitu nuga. Yu buherire tina masina –ni yuhtiri jire Jesu.

²² To a nichu tuhoro toi ducuriro surara sehe to wamomaca mehne Jesure cjari jire.

–A nii tjiga sacerdotea bui puhtorore –niri jire surara sehe Jesure.

²³ To a nichuta Jesu o sehe niri jire:

–Nano ya ni durucurire yahuga yuhare. ¿Potocata masare ya yahupachuta, dohseacu yuhare cjajari mahu? –niri jire Jesu surarare.

²⁴ Baharo Ana Jesure paina ti dakterirore Caifa sacerdotea bui puhtoro cahapu warocari jire.

“Jesure masieraja”, pari turi niha Pedro (Mt 26.71-75; Mr 14.69-72; Lc 22.58-62)

²⁵ A yoa Simo Pedro pichaca duhtu cahai ducuro, sohmano nire. A to sohmarucuhu nua, to macaina tirore o sehe ni siniture:

–¿Muhu cahu Jesu buheina mehne macariro jierajari mahu? –nire tina Pedrore.

–Jieraja yahu –ni yuhtire Pedro.

²⁶ Tuhsu, sacerdotea bui puhtoro cahamaca mehne macariro, Pedro to cahmono cja pahrero coyeiro sehe Pedrore o sehe ni siniture:

–¿Jesure ti nahari wesei ya jichu mahu cahu tiro mehne jierapahte? –ni siniture tiro Pedrore.

²⁷ –Yuhu tiro mehne jierahi –nire Pedro. To a nichuta caraca dure.

Jesure Pilato sinituha (Mt 27.1-2, 11-14; Mr 15.1-5; Lc 23.1-5)

²⁸ Namiwacu ni jichu Caifa ya wuhapu jirina Jesure naa wijaa, ti maca macaina puhtoro Pilato ya wuhapu naa wahare tina. A wahapahta to ya wuhapu saerare. Pascua dachori jichu tina ti bese numari macaare chuhtina jia o sehe nire: “Judio masano jierara Pilato. To a jiriro jichu to ya wuhare sana, mari dutiare yuhduacana niboca. A jina mari saachu marine bese numari macaa chare chu dutierahca”, nire tina. A nia puhtoro Pilato ya wuhare saerare Jesure naahrina sehe. ²⁹ Ti a saa taerachu nuno Pilato tina cahapu, wuhu sopacaru suracu saro, tinare o sehe ni siniture:

–¿Yaba buhirire ahrirore yahusa duajari masa? –nire Pilato tinare.

³⁰ –Ahriro to noariro jichu muhare sa waeraboa. Nariro jira tiro –ni yuhtire tina.

³¹ Ti a nichu Pilato o sehe nire:

–Masa sehe tirore naahga. A jina masa ya dutia ti niriro seheta tirore buhiri dahrega –nire Pilato tinare.

–Masa Roma macaina ya dutia sehe sare masanore waja dutierara –nire tina Pilatore.

³² A nia Jesure judio masa ti waja duarire masichu yoaa nire. Jesu sehe crusapu to yariahtore to pano to yahuriro seheta a waharo nire. ³³ Ti a ni durucuri baharo Pilato sehe wuhapu majare saa, Jesure pjirocari jire. Pjiroca tuhsu, tirore o sehe ni sinituri jire:

–¿Judio masa ti puhtoro tjijari mahu? –ni sinituri jire Pilato.

³⁴ –¿Muh mu surota a sinitui nijari mahu yuhare? ¿O paina sehe yuhare ti yahusari baharo tire sinitu njari mahu? –niri jire Jesu Pilatore.

³⁵ –Judio masano jieraja yahu. Mu ya yahpa macaina, sacerdotea puhtoa cahu muhare ware sare. ¿Yabare nano yoari mahu ti a buhiri dahre duachu? –niri jire Pilato.

³⁶ –Ahri yahpa macariro puhtoro jieraja yahu. Ahri yahpa macariro puhtoro ya jichu ya buheina yuhare yoadohoboa. Judio masare yuhare naha dutieraboa. Yu puhtoro jia ahri yahpa macaa jierara –niri jire Jesu Pilatore.

³⁷ –¿A jicu puhtoro jijari mahu a nicu? –niri jire Pilato.

–Mu nino seheta puhtoro tjija. Masa ti puhtoro jihtiro cjihto masa bajuai yahu. A jicu ahri yahpau tai ti puhtoro jicu tacu, potocã jiare yahucu tacu. Jipihina potocã jiare tuho duaina, ya yahuare tuhora –niri jire Jesu.

³⁸ –¿Yaba baro jijari potocã jia? Potocã jiare masihto basioerara –niri jire Pilato.

Judio masa Jesure waja dutiha (Mt 27.15-31; Mr 15.6-20; Lc 23.13-25)

A ni tuhsu Pilato judio masa cahai majare tjua waha, tinare o sehe ni yahure:

–Ahriro Jesure yaba buhiri mariaha.

³⁹ Cuhmaripe pascua jichu cairo peresui jirirore masa wio dutirucura. ¿A jicu ahriro Jesureta masa puhtoro cjihto masare wiobasabocari yahu? –nire Pilato judio masare.

⁴⁰ To a nichu tuhoa judio masa o sehe ni sañurucure:

–Tirore wioi tjiga. Barrabá sehene sare wiobasaga –ni sañurucure judio masa Pilatore.

Barraba sehe yaca bucuro jire.

19

¹ Ti a ni sañurucuri baharo Pilato Jesure tjana dutiri jire. To a dutichu to masa sehe tirore tjanari jire. ² Tjana tuhsu tina pota soro dahre tuhsu, Jesu dapu bui duhu payori jire. Duhu payo tuhsu, puhtoa ya suhti barore tirore saa, payu tahari tiro cahacai suracu, o sehe ni bujuperi jire tina:

³ –Noano tagã. Judio masa puhtoro noano tagã –ni bujupe, Jesu wuhduahi cja mujari jire.

4 Ā yoa pari turi Pilato judio masa cahapu waha, tinare ō sehe ni yahure:

—Tuhoga masa. Ahrirore ñaa buhiri mari-ahna. Ā jicu tīre masa masihtu cjihtire masa cahai tire na tai tai nihi —nire tiro.

5 To ā ni tuhsuchu Jesu pota soro pisariro, puhtoa ya suhtu barore sāariro, wuhai jirirowijaa tare. To ā wijaa tachu Pilato tinare ō sehe nire:

—Ñuga. Ahriro tjira tiro —nire Pilato.

6 To ā ni tuhsuchu tuhoa, sacerdotea puhtoa, Cohamacu wuhu cohtaina surara cahu Jesure ñua, sañurucure:

—Crusapu cĵa puha wajāga tireore. Crusapu cĵa puha wajāga tireore —ni sañurucure tina.

—Tirore ne ñaa buhiri mariaha. Ā jina masa basita tireore naaga. Ā jina musata tireore crusapu cĵa puha wajāga —nire Pilato tinare.

7 —Tiro to basi “Cohamacu macuno jija”, nia tire. Tīre to ā nichu sā dutia sehe tireore wajā dutira —nire tina Pilatore.

8 Ti ā nichu tuhoroto pano to cuiriro yahdoro cuia wahare Pilato sehe. 9 Ā jiro pari turi to wuhapure majare sāa, Jesure ō sehe ni sinituri jire tjao:

—ĴNoho macariro jijari mahu? —niri jire Pilato Jesure.

To ā ni sinitupachuta Jesu tireore yuhtierari jire.

10 To ā yuhtierachu ñano Pilato tireore ō sehe ni sinitu namori jire:

—ĴYahure yuhtierajari mahu? Yahuhuhure peresui jirirowio masija. Ā yoa muhare crusapu cĵa puha wajā duti masija yuhu. ĴTīre masierajari mahu? —niri jire Pilato Jesure.

11 —Cohamacu mahu to dutierachu yahure ñano yoape dutieraboa mahu. Yahure ñu tuhtiinare ñoriro sehe mu yahdoro ñano buhiri tira —niri jire Jesu Pilatore.

12 To ā nichu tuhoroto Pilato sehe tireore wio duari jimare. To ā wio duapachuta pari turi judio masa ō sehe ni sañurucure:

—Jesu “Puhtoro jija” nino, mari jipihtina bui puhtoro jirirowio Roma macarirore ñu tuhtiro jira tiro. Ā jicu tireore wioca mahu cahu mari bui puhtoro jirirowio ñu tuhtiro jiihca —ni sañurucure judio masa Pilatore.

13 Ti ā nichu tuhoroto Jesure wuhai jirirowio na wijaa ta, buhiri dahre dutiro taro to dujiri pahtai nuju sare Pilato sehe. Tōi to buhiri dahre dutiri wapa, tãa mehne ti yoari wapa judio masa sā ya mehne Gabatã wama tire. 14 Tã dacho pascua dacho bose namu sā chuhti cjihtire sā cahnoridacho jire. Tã pjare cohari pja waro jire. Nuju su tuhsu Pilato masare ō sehe ni yahure:

—Ahriro tjira masa puhtoro —nire tiro.

15 To ā nichu tuhoa judio masa ō sehe ni sañurucure:

—Yariajaro tiro. Yariajaro tiro. Crusapu cĵa puha wajāga tireore —ni sañurucure tina.

—ĴMasa puhtoro to jipachuta tireore crusapu cĵa puha wajā dutijari masa? —nire Pilato.

To ā nichu tuhoa ō sehe ni yuhtire sacerdotea puhtoa:

—Mari jipihtina bui puhtoro Roma macarirota sā puhtoro jira. Pairo puhtoro sare mariaha —ni yuhtire sacerdotea puhtoa.

16 Ti ā ni durucuri baharo Pilato Jesure crusapu cĵa puha wajā dutiro, tireore ware tinare, tireore wajāhtinare.

Jesure cĵa puha wajāha tina

(Mt 27.32-44; Mr 15.21-32; Lc 23.26-43)

17 Ā jia tina Jesure naa wijaaare. Ti naa wijaaachu Jesu sehe to crusare to basi wua naa, dapu cohã wama tirore sare. Sã judio masa ya mehne dapu cohã Gólgota wama tire. 18 Tõru sua tina Jesure cĵa puha õre. Tuhsu, paina puarore cãiro to pototo buhusehei, paio to cõ buhusehei cĵa puha dapore tina. Ā jiro Jesu ti dacho macai jire. 19 Ti cĵa puha tuhsuchu, Pilato taboa pjine joa, Jesure ti cĵa puha õri crusai cĵa puha ō dutire tã pjine. Ō sehe ni joare tiro: “Ahriro Jesu Nazare macariro, judio masa bui puhtoro jira”, ni joare Pilato tã pjine. 20 Tã pjine joaro judio masa ya dusero mehne, Roma macaina ya dusero mehne, griego masa ya dusero mehne joare tiro. Ā yoa Jesure crusapu ti cĵa puha daporiro maca cahacã jire. Tõ cahacã jiina payu judio masa Pilato joarire ñu, buhere. 21 Ā buhe tuhsu judio masa sã sacerdotea puhtoa ō sehe nire Pilatore:

—“Ahriro judio masa puhtoro jira”, ni joari tjiga. Sã puhtoro jierara ahriro. Ā jicu ō sehe ni joa cahnoga mahu. “Ahriro ‘Judio masa puhtoro jija’, ni cãirota to basita ā ni tuhoturiro jira”, ni joa cahnoga —nire sacerdotea puhtoa.

22 —Yu joa muhtariro sehetã jirohca —nire Pilato tinare.

23 Jesure ti cĵa puhari baharo pititiaro surara sehe Jesu suhtire ti basi witire. Ti ā witi duapachuta cã suhtirota yoari suhtiro dohori marieni suhtiro jire. Tã suhtiro suhari suhtiro jire. 24 Tã suhtiro to ā jichu ō sehe nire tina ti basi:

—Ahri suhtirore tuhrẽna tjiijihna. Ahri suhtirore nahtiro cjihtore masi duana, docapejihna mari —nire tina ti basi.

Ā docapea, Cohamacu yare ti joari tjui ti ni joariro sehetã yoaa nire tina. “Yu suhtire tina ti basi witire. Ā jia yu suhtire nahtiro cjihtore masi duaa, docapere tina”, ni joaa

tihā Cohamacu yare ti joari tjui. To ā ni joariro seheta ā yoa nire tina.

²⁵ Surara ti ā yoachū Jesu pocoro, Jesu m̄ono, Mariā Cleofa namono, Mariā Magdalena mehne Jesu crusa cahacāi n̄urucure tina. ²⁶ Ā jiro to pocoro yūhū to cah̄iriro cāhū to cahacāi s̄a ducuchū n̄uno to pocorore ō sehe ni yahure Jesu:

—Mip̄are ahriro m̄a macu cjihto jira —nire Jesu to pocorore.

²⁷ Ā ni tuhsū, yūhure ō sehe ni yahure tiro: —Mip̄are ahricoro m̄a poco cjihto jira —nire Jesu yahure.

To ā niri baharo Jesu pocorore yū ya wuh̄ap̄u ji dutii.

Jesu yariaa wahaha

(Mt 27.45-56; Mr 15.33-41; Lc 23.44-49)

²⁸ To ā ni yahuri baharo ō sehe ni t̄ahotu masiri jire Jesu: “Jipihtia Cohamacu yūhure dahra dutiro to cūrire yoa pah̄ñohi”, ni t̄ahotu masiri jire Jesu. Ā masino Cohamacu yare ti joari tjui to ni yahuriro seheta ō sehe nire Jesu:

—N̄ahma yapioca yūhure —nire Jesu.

²⁹ Ā yoa t̄oi vino s̄uēa core posa tiri situ dujire. Ā jiro t̄oi jiriro wiḡmi nari s̄ahtere s̄uēa co mehne ti sohari s̄ahtere yuc̄acu hisopo wama tidū sohtoai d̄ah̄te ōre. D̄ah̄te ō tuhsū, Jesu d̄useroi siō m̄uo, siō ōre. ³⁰ T̄i core Jesu wiḡmi tuhsū ō sehe nire:

—T̄o puro tjica —ninota to dapure muhrir̄uca, yoja s̄u, yariaa wahare.

Surara Jesu patipahma batoī n̄osaha n̄osadu mehne

³¹ T̄i dacho pascua bose n̄umu pano jire. T̄i bose n̄umu macaare s̄a chuḡti cjihtire s̄a cah̄nori n̄umu jire. Ā jia pa dacho Sabado jichū t̄i bose n̄umu jichū crusarip̄u ti waj̄arinare cū duerare judio masa. T̄i dacho Cohamacure ti n̄o payori dacho bose n̄umu jire. Ā jia t̄i dachoi t̄i c̄jā puharina c̄jirire crusap̄u t̄i jichū cahmaerare tina. Ā jia t̄i c̄jā puharina c̄jirire t̄i n̄uchua coh̄arine c̄jā nuha dutia taa judio masa sinia Pilatore, ti yaria m̄urocahto c̄jihto sehe. T̄i ā yoari baharo ti p̄jac̄ari c̄jirire na boro bahrañoa taa nire. ³² T̄i ā dutichū surara sehe crusari cahap̄u s̄u, c̄airo yacariro c̄jiro n̄uchua coh̄arine c̄jā nuhare. Pairo c̄ahure āta yoare tina. ³³ Ā jia Jesu n̄uchua coh̄arine c̄jā nuha tamaa, to yariariro jichū n̄ua, c̄jā nuhaerare.

³⁴ Ā c̄jā nuhaeraa c̄airo surara to patipahma batoī n̄osadu mehne n̄osare. To ā n̄osachu d̄oihta to di, co mehne wijaare. ³⁵ To ā wahachu n̄ui yūhū. Yūhū ahri t̄jure joariro m̄usare potocā yahuja. Potocā yū yahua jichū masija yūhū. M̄usare yahuja m̄usa c̄ahū Jesure m̄usa wacū tuahto sehe. ³⁶ Cohamacu yare ti joari t̄ju to niriro seheta

ā wahare: “To coh̄arine ne c̄u coh̄are c̄jā nuhaerare”, to ni joariro seheta Jesu n̄uchua coh̄arine ne c̄u coh̄are c̄jā nuhaerare. ³⁷ Ā yoa pa t̄ju Cohamacu yare ti joari tjui ō sehe nina: “T̄i rore ti n̄osario c̄jirire nuahca tina”, ni joa tiha Cohamacu yare ti joari tjui.

Jesu p̄jac̄ure masa copap̄u cūha

(Mt 27.57-61; Mr 15.42-47; Lc 23.50-56)

³⁸ To yariari baharo José Arimatea macariro Jesu p̄jac̄u c̄jirire na bororo taro, Pilatore siniri jire. José sehe paina judio masare cuiro, Jesure wacū tuariro to jiare yahu duaerari jire. To p̄jac̄u c̄jirire to siniri baharo Pilato sehe to p̄jac̄ure naa dutiri jire. To ā na dutichū José crusa cahai s̄u, Jesu p̄jac̄u c̄jirire naa wahari jire. ³⁹ Nicodemo c̄ahū me sitiare yuc̄acu di pohca, mirra wama tia me sitia yuc̄acu pohca mehne dahra moreare na tari jire. Jesu p̄jac̄u c̄jirire masa copap̄u t̄i siō s̄ahto pano t̄i cahnohti jiri jire t̄i me sitia. T̄i na tari c̄jiri treinta kilo n̄uc̄ari jire. Nicodemo soh̄o jiri p̄ja Jesu mehne to coā durucuri p̄ja n̄amip̄u Jesu cahai sariro jiri jire. ⁴⁰ Ā jia tina p̄aro Jesu p̄jac̄u c̄jirire naa, judio masa s̄a yariainare s̄a yoarucuriro seheta to p̄jac̄u c̄jirire me sitia mehne suhtiro cahsaro mehne wahmari jire. ⁴¹ Crusap̄u Jesure ti waj̄ano cahai wese jire. T̄i wesep̄u masa copa t̄ac̄ap̄u wahma ti sahari copa jire. T̄i copai ne yariariro c̄jirire siō s̄aerasinire. ⁴² Pascua dacho bose n̄um̄i judio masa s̄a bose n̄um̄i s̄a chuḡti cjihtire s̄a cah̄nori dacho jire. To ā jiri dacho jichū t̄i copa cahacāi to crusa jichū, t̄oi siō s̄ari jire tina Jesu p̄jac̄u c̄jirire.

20

Jesu masa wijaaha

(Mt 28.1-10; Mr 16.1-8; Lc 24.1-12)

¹ Domingo n̄ami curero jichū, bohreahto panocā Mariā Magdalena Jesu masa copap̄u sari jire. T̄op̄u suro t̄i copare ti t̄ju bihari t̄acare ti p̄j̄o c̄uria t̄acare n̄uri jire ticoro. ² Ā n̄uricoro jiro s̄a cahap̄u m̄urocaa tare ticoro. Simo Pedro mehne yūhū s̄a p̄aro jii. Wihi, ō sehe ni yahure s̄are ticoro:

—Mari puhtoro p̄jac̄u c̄jirire naanocari jihre. Ā jina tiro c̄jirire ti c̄urire mari masieraja —nire ticoro s̄are.

³ To ā nichu tuhona, Pedro mehne masa copap̄u n̄una wahai s̄a. ⁴ Ā n̄una wahana s̄a p̄aro m̄uroca wahcāi. Ā m̄urocana, yūhū Pedroro m̄uroca yūhū wahc̄acu masa copap̄u s̄u muhtai. ⁵ T̄op̄u s̄acu muhri caha n̄uroca s̄oi t̄i copap̄are. Muhri caha n̄uroca s̄ocu tirore ti wahmari suhtiro c̄jiro dihtare n̄ui. Ā jii t̄i copare s̄aerahi. ⁶ Yū ā n̄uri baharop̄u Simo Pedro yū baharo wihire. Wihi, masa copap̄u s̄a, to p̄jac̄u c̄jirire t̄i wahmari

suhtiro cjirore ñure tiro. ⁷ Jesu dapure ti wahmari cahsaro cùhare ñure tjoa. Tí cahsaro soro coáno to turëri cahsaro jire. ⁸ Æ jicu yùhu cùhu masa copapù su muhtariro tí copapù sàai. Jesure to ã mariachu ñucù “Potocãta Jesu masa wijaari jira”, ni tuhotui yùhu. ⁹ Tí copapù sã wahahto pano Cohamacù yare ti joari tjui Cristo to yariahtore yahurire, to masa wijahtore yahuri cùhare sã noano tuho ñahaerasinimai. Tí copare yù ñuri baharo, “Potocãta Jesu masa wijaari jira”, ni tuhotui yùhu. ¹⁰ Æ ñu tuhsana sã wuhusepu tjuaa wahai.

*Jesu María Magdalenare bajuaha
(Mr 16.9-11)*

¹¹ Æ yoa masa copapù María majare tjuaa tí copa sopapapù wihi, ducuro, tiiro niri jire. Æ tiiparota ticoro muhri caha ñuroca sôri jire masa copapure. ¹² Æ ñuroca sôno puaro anjoare, yehsea suhti tiinare Jesu cjiro to coãriro cjiropù ti dujichù ñuri jire ticoro. Coãiro to dapu coãriro cjiroi dujiri jire. Pairo to dahpori coãriro cjiroi dujiri jire. ¹³ Tinare to ñuchù tina sehe ticorore ò sehe ni sinituri jire:

—Numino, ¿dohse jiro baro tiico nijari muhu? —niri jire tina.

—Yù puhtoro pjacu cjirore naanocari jihre. Æ jico to pjacu cjirore ti cùire masieraja yùhu —niri jire ticoro.

¹⁴ Æ ni tuhsu, majareracù samahno Jesure tói ducurire ñuri jire ticoro. Æ ñuparota Jesure ñu masierari jire ticoro.

¹⁵ —Numino, ¿dohse jiro baro tiico nijari muhu? ¿Noare macaco nijari? —niri jire Jesu ticorore.

“Ahriroro ahri wesere ñu wihboriro jira”, ni tuhotumari jire ticoro Jesure. Æ ni tuhoturo, ò sehe niri jire ticoro:

—Muhata to pjacu cjirore naariro jicu to pjacure mu cùirire yahuga yùhare. Mu yahuri baharo to pjacu cjirore naaco waha-cohtja —niri jire ticoro tirore.

¹⁶ To ã niri baharo Jesu ò sehe niri jire:

—María —niri jire.

To ã ni pisuchù tuhoro majare ñuroca, ticoro hebreo ya mehne sã judio masa ya mehne ò sehe niri jire:

—Raboni —niri jire ticoro Jesure. (Raboni nino “Buheriro”, nino nina.)

¹⁷ —Yù Pucù cahapù mujaerasinija yùhu. Yù ã mujaerasinichù yùhare ñahaeco tjiga. Tuhsu, paina yù yaina cahapù wahaga. Tí cahapù sùco ò sehe ni yahuga tinare: “Yù Pucù cahapù wahai tai nija. Musa Pucù cùhu jira tiro. Yù yairo Cohamacù cahapù wahai tai nija. Musa yairo Cohamacù cùhu jira tiro”, ni yahuga tinare —niri jire Jesu Mariare.

¹⁸ To ã niri baharo María Magdalena sã Jesu buheina cahapù wihi, yahure sãre:

—Mari puhtorore ñuhi yùhu —ni, Jesu ticorore to yahu dutirire yahure sãre ticoro.

Jesu to buheinare bajuaha

(Mt 28.16-20; Mr 16.14-18; Lc 24.36-49)

¹⁹ Tí dacho domingoi ñamichahai sã Jesu buheina sã coyea judio masare cuina, wuhupù biha sãa, dujii sã. Sã ã dujichù Jesu sã watoi bajuaracù sùro, sãre ò sehe nire:

—¿Jimajari musa? Noano jiga musa —nire.

²⁰ Æ ni tuhsu, to wamomacarine, to patipahma bato cùhare sãre ñore. Æ jina sã tirore sã puhtorore ñuna, wahchei. ²¹ Pari turi Jesu sãre ò sehe nire:

—Noano jiga musa. Yù Pucù yùhare to warocariro seheta, musa cùhare yù ya buheare buhehtinare warocaja —nire Jesu sãre.

²² Æ ni tuhsu tiro sãre puti sãare. Æ puti sãano Espiritu Santo sãre to sãaracù su muu wahahtore ñono nire sãre. Æ no tuhsu ò sehe nire:

—Mipù Espiritu Santore ñahaga musa, musa mehne jihtirore. ²³ Paina ti ñaa yoarire musa bochu, ãta jahca. Æ jia paina ti ñaa yoarire musa boerachù ti bori jisi —nire Jesu sãre to buheinare.

Jesure masa wijaarirore Toma ñuha

²⁴ Jesu sã watoi to bajuachù Toma sùhdhuroiro ti ni pisuriro sã mehne mari-ahre.

²⁵ To ã mariachù sã mehne macaina tirore yahumare:

—Mari puhtorore sã ñuhi —ni yahumai sã Tomare.

Sã ã ni yahupachuta ò sehe nire Toma:

—To wamomacarine ti cjã puhaa coparire ñueracù tí coparire yù wamo pica mehne be ñueracù, “Potocãta masa wijaari jira”, nisi yùhu. Æ yoa to patipahma bato jiri copare yù wamomaca mehne siò sôeracù, “Potocãta masa wijaari jira”, nisi yùhu tirore —nire Toma.

²⁶ Ocho dachori baharo pari turi sã to buheina sã wuhupù jil. Tí pjare Toma sã mehne jire juna. Tí wuhù bihari wuhù jire. Bihari wuhù to jipachuta Jesu wuhupù sãa taro, sã watoi bajuaracù sùro ò sehe nire:

—¿Jimajari musa? Noano jiga —nire.

²⁷ Æ ni tuhsu, tiro Tomare ò sehe ni yahure:

—Ñuga yù wamomacarine. Æ yoa mu wamo pica mehne yù wamomacarine ti cjã puhaa coparire be ñuga. Tuhsu, mu wamomaca mehne yù patipahma bato jiri copare siò sô ñuga. “Potocã jierara”, nii tjiga. “Potocã tjira”, niga muhu, —nire Jesu Tomare.

²⁸ To ã niri baharo Toma ò sehe ni yuhtire:

—Mahu yu puhtoro jira. Mahu yu yairo Cohamacu jira —nire Toma Jesure juna.

²⁹—Yuhure mu nuri baharo yuhure wacu tuara mahu. Paina sehe yuhure nuerapahta yuhure wacu tuaahca. A jia tina mu yuhdoro wahcheahca —nire Jesu Tomare.

Jesure masa ti masihtu cjihtire ahri tjure joaha Joao

³⁰ A yoa payu paye cahure Cohamacu to tuaa mehne yoa nore Jesu sa mehne jiro. Tire to yoarire ahri tju joa pahnoerati yuhu. ³¹ A joa pahnoerapahta ahri tju yu yahuaire joahi “Jesuta Cristo Cohamacu macano jira”, musa ni masihtu cjihtire. A jina musa tirore wacu tuaina Cohamacu mehne musa a jirucuhi cjihtire joahi ahri tjure.

21

Jesu siete to buheinare bajuaha

¹ Baharo Tiberia wama tiri bucpariuro duhtu cahai sare to buheinare Jesu pari turi bajuare tjoa. Sare bajuaro o sehe yoare tiro tjoa. ² Simo Pedro, Toma suhduariro ti niriro, Natanae Galilea yahpai jiri maca Cana wama tiri maca macariro, Zebedeo pohna sa puaro, paina puaro buheina sa opeinata cahmachui.

³ Sa a cahmachuri baharo Simo Pedro sare o sehe nire:

—Wahi wajai wahi nija —nire tiro.

—Sa cahu mahu mehne wahanajtja —nii sa tirore.

A ni tuhsu buhaa wahi. A jina dohoria mehne wahi. Wiho mejeta ti namine sa noano maca bohreapanahta ne cauro wahi wajerahi. ⁴ Bohrea pari cahachu Jesu paduroi to ducuhu tirore numai sa. A nuapanahta tirore “Jesu jira”, ni nu masierahi sa. ⁵ A jiro sare tiro o sehe ni siniture:

—Ne, wahi wajari musa? —nire Jesu.

—Ne wajeraputiati sa —ni yuhtii sa.

⁶—Dohoria poto buhusehe sehe doca noaga. Tie sehe doca noa wahi wajanaha musa —nire sare.

To a nichu tuhona sa to niriroihtu doca noi. Sa doca no tuhsachu payu wahi sare. Payu wahi saachu wahunore dohoriapu waja sana bihoerahi sa. ⁷ A jicu yuhu Jesu cahiroi Pedore o sehe ni yahui:

—Mari puhtorota jira siro paduroi ducuro —nii Pedore.

Yu a nichu tuhoro Jesuta to jichu masino, Simo Pedro to suhtirore sare. Wahi wajano taro to suhtirore tjuweri jisinire. To suhtirore saa tuhsu, diaru pjuroca nojare. ⁸ Sa paina buheina dohoriai jina, cien metro yoaro diaru pahai sa. A jina wahunore wahi payu saadure dohoria mehne waja najai sa. ⁹ Duhtu cahai waha suna pichaca

niti dihta si coari pichaca bui Jesu to puhu curiure wahire nuai sa. Pao cahure nuai sa.

¹⁰ Sa a nichu nuano Jesu sare o sehe nire:

—Michapucaca musa wajarinare mahainaca na tahga —nire sare.

¹¹ To a nichu Simo Pedro sehe Jesu mehne jiro dohoriapu samu, wahunore, bujaina wahi ciento cincuenta y tres wahi saadure waja majare. Payu wahi saapahta wahunore tuhure.

¹²—Chusina taga —nire Jesu sare.

“Noa baro jijari mahu?” ni sinitu nuerahi sa tirore. Sa puhtoro to jichu masii sa. ¹³ A yoa Jesu pichaca cahapu suro, paore na, sare witiire. Wahi cahure witiire.

¹⁴ A jiro Jesu to masa wijaari baharo paduroi bajuaro tia taha sare to buheinare bajuaro nire.

Jesu Simo Pedro mehne suhduha

¹⁵ Sa churi baharo Jesu Simo Pedore o sehe ni siniture:

—Simo Jona macano, zahrinare mu cahiroi yuhdoro yuhare cahijari mahu? —nire Simo Pedore.

—Puhtoro, mahuare cahija yuhu. Mahuare yu cahichu masina mahu —ni yuhtire Simo Pedro.

—A jicu ovejacare ti nuriro sehetu yu yainare buhega mahu —nire Jesu.

¹⁶ A ni tuhsu pari turi tiro Simo Pedore o sehe ni siniture:

—Simo Jona macano, yuhure cahijari mahu? —nire Jesu.

—Puhtoro, mahuare cahija yuhu. Mahuare yu cahichu masina mahu —ni yuhtire Simo Pedro.

—Ovejare nu wihboriro ovejare to noano nu wihboriro sehetu, yu yainare noano buhe nu wihboga —nire Jesu Pedore.

¹⁷ A ni tuhsu pari turi tiro Simo Pedore o sehe ni siniture:

—Simo Jona macano, potocata yuhure cahijari mahu? —nire Jesu tjoa.

Tia taha a ni to sinituchu tuhoro Simo Pedro tuaro cahyare.

—Puhtoro, mahu masi pahiona. Mahuare yu cahichu masina mahu —ni yuhtire Simo Pedro.

—Ovejare ti nuriro sehetu yu yainare buhega mahu. ¹⁸ Potoca mahuare niita nija. Mahu wahmano jicu mu suhtire saa, mu cahmariporu tinia tiri jire mahu. A jiricu mu jipachata baharo mu bucuro jichu, mu wamomacarine mu sirocachu pairo mahuare suhtire saanohca. Tuhsu, mu waha duaerorpu mahuare naanohca —nire Jesu Simo Pedore.

¹⁹ A nino Simo Pedore dohse waha to yariahtore yahuro nire. A jiro Simo Pedro yariaro Cohamacure “Noariro, masi pahiroi jira”, masa ti nichu to yoahtore

yahuro nire Jesu. Ñ Pedro mehne sahadu tuhsaro ò sehe ni namore Jesu tirore:

—Quihõno yu buheriro seheta yoaga mahu —nire Jesu Pedrone.

Jesu to cahĩro buheriro ahri tjure joariro jira

²⁰ To ã nichuta Pedro sehe majare ñuroca, yuhare Joãore Jesu to cahĩro buherirore tinare yu nana tichu ñuno Pedro Jesure siniture. Yuhu sehe to ñũro to tó pano ò sehe niriro jii: “Puhtoro, ¿muhare ñu tuhtinare ñohtiro sehe diro baro jicari tiro?” ni, Jesure sinitu ñũro jii yuhu. Tí pjare Jesu to pari wahpa chu dujii yuhu sehe. ²¹ Ñ jiro yuhare ñuno Pedro Jesure ò sehe ni siniture:

—Puhtoro, ¿ahriro sehe dohse waharohcari? —ni siniture.

²² Tíre muhare yahueraja. Ahri yahparyu yu tjua tahto pano ahrirore jirucuchu yu yoachu tíre masierara mahu. Ñ jicu muhare yahueraja. Quihõno yu buheriro seheta yoaga mahu —nire Jesu Pedrone.

²³ Tíre to yahurire jipihina Jesu yaina ti basi yahu sitemare. Tíre yahu sitea ò sehe nimare tina sehe: “Jesu to cahĩro buheriro yariasi”, ni yahu sitemare yuhare Jesu yaina ti basi. Tí ã nipachuta “Tíro yariasi”, nino nierari jimare Jesu. “Ahri yahparyu yu tjua tahto pano ahrirore jirucuchu yu yoachu tíre masierara mahu. Ñ jicu muhare yahueraja”, nire Jesu Pedrone.

²⁴ Jesu buheriro ahrire yahuriro, ahri tjure joariro jija yuhu. Ñ jina ahri yu yahua quihõno jichu masija mari.

²⁵ Payu paye cahare Jesu yoare. To yoarire mari joa pahñochu tí tjuri joa tjuri payubia wahaboa. Ñ jia tí tjurire mari wihbochu mu sneraboa ahri yahpa. Wahpaa yuhduu wahaboa, yu tuhochu. Tó puro tjira.

Hechos

“Espíritu Santo tarohca”, niha ahri tjure joariro

¹⁻² Teofilo, ahri quitire mahure joarocai nija. Pano yu joa mahitari pure Jesu to yoaare, to buheare mahure yahu tuhsai. Pu manopu to mujarire yahu batoai. To mujahito pano Jesu Espiritu Santo mehne dutiha to bese cūrinare. ³ Ā yoa Jesu crusapu to yariari baharo payu tahari pjacu tiriro bajua mujaha to cūrinare, tina “Potocāta tiro catira”, ti ni masihto sehe. Cuarenta dachori waro tiro bajua mujaha tinare. Ā bajuaro tiro to basi to catiriro jiare fiono niha tinare. Ā bajuaro puhtoro Cohamacu to suho jiare yahuha tinare.

⁴ Jesu to cūrina mehne jisninino tinare ō sehe ni yahuha:

—Jerusalēita jisniniga mipure. “Espiritu Santore musare warocaihtja”, yu Pucu to nirirore cohtasiniga. Tíre to nirire musare yahui yuhu. ⁵ João musare bautisaro co mehne yoamare. Yuhu sehe ti yuhdoro yoaihtja musare. Maha dachoricā baharo yuhu sehe Espiritu Santore masa mehne jirucucu yoihtja musare —niha Jesu.

Jesu manopu mujaa wahaha

⁶ Ā yoa tina tucu Olivo wama tidapu Jesu mehne cahmachuina sehe ō sehe ni sinitu fūha tire:

—Puhtoro, ζ mipure sāre Israe yahpare pari turi cū, mari coyea warore puhto sōihcari mahu? —ni sinitu fūha to yaina.

⁷ Ti ā nichu tuhoro Jesu ō sehe niha:

—Musa puhto sāhti pjare yahu quihōriro, ā wahachu yoariro yu Pucu dihta jira. Musa sehere tíre ne masihto basioerara. ⁸ Wiho mejeta musare Espiritu Santo to wihichu Cohamacu ya masiare cjuanahca masa. Ti masiare masa cjuana Jerusalē macainare, jipihitina Judea yahpa macainare, Samaria yahpa macainare, ā yoa jipihitina ahri dacho mu suro macainare noaa buheare buhenahca masa. Yu yariarire, yu masa mujarire tinare buhenahca masa —ni yahuha Jesu tinare.

⁹ To ā ni tuhsari baharota, Cohamacu Jesure manopu mujachu yoaha jana. Tina tire to fū nuhu mēochuta me curua watoru sāa, buti mujaa wahaha. ¹⁰ To ā buti mujari baharota tina Jesu to mujarirore ti fū mēono watoi puaro anjoa yehsea suhti tiina Jesu to cūrina watoi bajuarucu suha. ¹¹ Ā bajuarucu su, tinare ō sehe niha:

—Musa Galilea macaina, ζdohse jiro baro fū mēorucuna nijari masa? Ahriro Jesu, masa mehne jiriro cjirota, Cohamacu manopu to mujachu yoarirota, mipure to

mujachu masa fūriro seheta, pari turi duji tarohca tjoa —ni yahuha anjoa tinare.

Jesu to cūrina Juda cjirore cohtotahtirore beseha

¹² Ā yoa Jesu yaina tucu Olivo wama tidapu jiina duji taa, Jerusalēpu tju suha. Tu tucu cū kilómetro bui curero yoaro jira Jerusalē dahu cahapure. ¹³ Tju su, tina manopu ti jiri tahtiapu mujaa wahaha. Ahrina jiha: Pedro, João, Santiago, Andre, Felipe, Toma, Bartolomé, Mateo, Santiago, Simo, Juda jiha. Santiago sehe Alfeo macuno jiha. Simo sehe cananista wama tiri curua macariro jimaha. Juda sehe Santiago macuno jiha. ¹⁴ Payu tahari ahrina jipihitina, to cūrina, ā jichu numia, María Jesu pocoro, ā yoa Jesu bahana mehne cahu noano cahmachu, Cohamacare ā sinirucua tiha.

¹⁵ Ā yoa tí dachore masa payu cahmachuha. Ciento y veinte jia jiboa. Ā jiro Pedro sehe tiro mehne macaina Cristo yaina watoi ducu, ō sehe ni yahuha tinare:

¹⁶ —Yu coyea, Cohamacu panopu to niriro seheta ā wataro nihre. Tíre Espiritu Santo Davi cjirore yahu dutiha Juda cjirore. Juda cjiro Jesure fahahtinare fūriro jihre. ¹⁷ Ā yoahtiro jiparota mari mehne Jesu yare yoariro jimahre. Ā jiro sā mehne macarirota jimahre —niha Pedro.

¹⁸ Juda cjiro sehe Jesure fū dutia ti waparire to wiari baharo to basita wajā yariaha. Ā yoaro boraa waha, to tu misida tuhnuu waha, yariaa wahaha. To wiari cjiro mehne paina mahanocā yahpare nuchaha. ¹⁹ Jipihitina Jerusalē macaina masi pihtinocari jire Juda cjiro to fūno yoarire. Ā masia ti ya dasero mehne to niheru mehne ti nuchari yahpa cjirore Acéldama wamoari jire. Acéldama nia, “Di yahpa”, nia nina. ²⁰ Baharo ō sehe ni namoha Pedro:

—Panopu to joariro seheta ā wahahre Juda cjiro. Salmo to joari tjui ō sehe ni joaa tiha:

“Tiro to jiri wahu masa marieni wahu tjuarohca.

Ne noa jisi tí wuhare”,

ni joaa tiha. ō cahure ō sehe ni joaa tiha:

“Pairo to dahraa cjirore cohtotariro jirohca”,

ni joaa tiha Salmopu.

²¹⁻²² Ā jina mari cūiro besejihna. João masare bautisariro cjiro masare to buhero watoi caina Jesu yaina mari mehne wahare. Tina mehne macarirore cūiro bese nano cahmana mari mehne macariro cjihto. Jesu mehne mari jichu mari mehne ā jirucurirore besero cahmana. Ā mari beseri baharo Jesu to masa mujarire mari

mehne buherohca —ni yahuha Pedro to coyeare Cristo yainare.

²³ To ā nichu tūhoa pwarore bese dapoha tina. Cūiro José Justo wama tirirore beseha. Tiro Barsaba ti ni pisuriro jiha. Bese tuhsu, pairore Matia wama tirirore beseha. ²⁴⁻²⁵ Tinare bese dapo tuhsu, tina Cohamacare ō sehe ni siniha:

—Muhu sā pūtoro jipihtina masa ti tūhotuare masina. Ahrina pwaro sā beseina jira. Juda cjirore cohtotahtirore diro mu cahmarirore besega. Jesure cohātjiāhno Juda cjiro sehe pichacaru wahaha. Tirore cohtotahtiro Jesu to cūiro jirohca. Ā jiro sā mehne noaa buheare buherohca —ni siniha tina Cohamacare.

²⁶ Ā niata taa mehne doca mujaha besea taa. Matia yaro to noano quihōno wijachu, tiro sehe Jesu to cūrina once cūrina mehne macariro tjuaha.

2

Espiritu Santo Jesu yaina mehne ji ducaha

¹ Ā yoa Pentecoste wama tiri dacho jichu tina jipihtina cū wūhai cahmachuha.

² Tí pjareta wihnono to tuaro taro seheta muanoru bisiro coa taha. To ā bisiro coa tachu tūhoha jipihtina ti wūhuru jiina.

³ Ā yoa picha pohna yoaro sehe jia tina jipihtina dapu poca bui bajuaha. Tí picha pohnaricā űahmanoricā yoaro sehe bajuha.

⁴ Ā yoa Espiritu Santo tinapure sāarucu sua wahaha. Tinapure to sāarucu sua wahachu, paina ya durucua to durucuhu yoaa mehne tina sehe paina ya durucua noano durucuha.

⁵ Tí dachorire Jerusaleru payu judio masa, cū curua macaina masa jipahta, paró paye yahpari macaina jiha. Cohamacare űo payoina jiha. ⁶ Ā yoa muanoru coa tachu tūhoha tina Jesu buheina caharu payu wahmachu wahcāha. Cahmachuina masape ya durucua Jesu buheina ti durucu pahūochu tūhoha, tina tūho cūaa wahaha.

⁷⁻⁸ —Cuenah. ĀDohse yoaa ahrina Galilea macaina jipahta mari ya durucua noano durucujari? Tina mari ya yahparu taina yoaro seheta durucua nina —niha tina sehe.

⁹⁻¹⁰ —Jipihtina mari durucua mipare durucua nina: Ōpe yahpari macaina mari ōre cahmachuina jija: Partia macaina, Media macaina, Elam macaina, Mesopotamia macaina, Judea macaina, Capadocia macaina, Ponto macaina, Asia macaina, Frigia macaina, Panflia macaina, Egipto macaina, Libia yahpai Cirene caharu jiina, Romaru taina jija mari. Cāina judio masa waro jija mari. Paina judio masa dojoina jija mari. ¹¹ Creta macaina cūhu, Arabia macaina cūhu jira mari mehne. Mari payu paró macaina soro durucua tiina

mari jipanata ahrina sehe mari masape curuari macaina durucua ti durucuhu tūhoha mari. Tina mari ya durucua mehne Cohamacu tuaa mehne to yoarire yahua nina —ni durucua masa ti basi.

¹² Ā niata tina cūaa waha, ti űuri cūhure ti tūhori cūhure noano tūho űahaeraha.

—Āhrina dohse jiro baro paina ya mehne Cohamacu yare ā noano durucujari, musa tūhotuchu? —ni cahma sinitu űuha tina ti basi.

¹³ Wiho mejeta paina Jesu yaina ti durucuhu tūhoina mehne macaina sehe tinare ō sehe ni bujupaha:

—ĀDohse ahrina sihbiori sihni cahaa nijari? —ni bujupaha paina tinare Jesu yainare.

Pedro masare yahuha

¹⁴ Ā jiro Pedro once Jesu to cūrina mehne wahcārcu su, tuaro durucutiāhno masare ō sehe ni yahuha:

—Musa Judea yahpa macaina, jipihtina Jerusaleru jiina, ahrire masiga musa. Yu yahuchu tūhoga musa. ¹⁵ Musa tūhotua quihōno jierara. Nueve hora jira miputa. Mari chu sihni hora jierasina. Ā jia ahrina cahaina jierara. ¹⁶ Ahrina Cohamacu panoru to niriro seheta yoaa nina. Tí pjapure Joere Cohamacu yare yahu mahariro cjirore, ahrire yahu dutia tih Cohamacu sehe:

¹⁷ “Sohtori tia dachori jichu ō sehe jirohca: ‘Yu yairo Espiriture masare jipitnare warocaitja.

Ā jia musa pohnapu yu yare yahuahca.

Ā yoa musa mehne macaina wahma yapia bajuamehneare űuahca.

Ā jia musa mehne macaina bucuna cahānoru cahāhca.

¹⁸ Ā jichu yu cahamacare, mware, numia cūhure yu yairo Espiriture warocaitja.

Ā jia tina yu yare yahuahca.

¹⁹ Tuhsu, yu tuaa mehne bajuamehneare yoā űoihca muanoru.

Yahparu cūhure yu bajuamehneare űoihca: Dire, pichacare, mene űoihca.

²⁰ Tuhsu, sū dacho macariro nahitianore cohtotarohca.

űami macariro di yoaro sehe sohāriro cohtotarohca.

Ō sehe waharohca Cristo musa pūtoro to tahti dacho, yu niri dacho panoi.

Tí dachoi űu cūaa wahaahca masa.

Ā jiro wiho jiri dacho jisi.

Tí dacho noari dacho jirohca.

²¹ Ā jiro ō sehe jirohca.

Jipihtina masa Cristore ti űaa buhirire cohā duti siniinare tiro tinare pichacaru

wahaborinare yǎhdorohca', nina Cohamacu", ni joaha Joe.

²² Musa Israe masa yu yahuchu tuhoga: Jesu Nazare macariro sehe Cohamacu to warocariro jihre. Jesure to warocarire masa ti masihto sehe Jesu to Pucuro ya tuaa mehne yoa ñohre musare. Musa tire masina. ²³ Jesure wajā dutina judio masa jierainare wahre musa. Cohamacu panopu to cahmariro seheta, "ǎ waharohca", to niriro seheta ā yoahre. Ā jina musa Jesure crusapu wajā dutihre Cohamacu dutiare cǎaerainare. ²⁴ Musa ā yoapachuta Cohamacu sehe Jesure yariariro cjirore masohre. Pari turi ne yariasi tiro. Tiro yaria dojoaerara. Ā catirucuhitiro jira. ²⁵ Ō sehe nia tiha Davi cjiro panopu macariro Cristo to ni durucuboriro seheta:

"Yu puhtoro yuhu mehne jira muhu. Jipihtia dachoripe Cohamacu yu puhtoro yu cahai mu jichu ñua tihi yu cuierahto sehe.

²⁶⁻²⁷ Muhu Cohamacu yuhure yariaina ti jiropure ne cohāsi.

Yuhure mu cahirirore ñanopu cohāsi muhu. Yuhu mu cahamacuno mahure ño payoriro jija.

Yu pjacure baa dutisi muhu.

Ā jicu tuaro wahcheja.

Wahchea mehne durucuja.

Ā jicu mahure Cohamacure noano wacū tariro jicu ñaa buhiri marieriro jicu cuiro marieno noano jinocaja.

²⁸ Yuhure pari turi catichu yoaiha muhu.

Yuhu mehne mu jichu tuaro wahcheja", ni joaa tiha Davi cjiro Cristo to ni durucuboriro seheta.

²⁹ Coyea, ō sehe noano yahuihtja musare Davi cjirore mari coyeiro, panopu macarirore. Tiro yariaa wahaha. Ā jiro tiro to masa copa mipure jisinina. (Ā jiro "Yu pjacure baa dutisi muhu", ni joaro to basi wama payo yahuro nieraha.) ³⁰⁻³¹ Panopu Cohamacu Davi cjirore ō sehe niha: "Potocā nii nija. Mu panamana ji turiaina mehne macariro mu yoaro seheta ahli yahpa macaina bui puhtoro jirohca", nia tiha Cohamacu Davi cjirore. Davi Cohamacu yare yahu muhtariro cjiro jiha. Ā jiro Cristore Cohamacu to puhto sōhtore masino, Cristo to masa mǎjahtore yahu muhta tuhsaha Davi sehe. Ō sehe niha: "Tiro yariaina ti jiropure ji dojoasi. To pjacu tói baasi", nia tiha Davi cjiro. ³² Ahriro Jesureta Cohamacu masohre. Sā jipihtina tirore ñuhi. ³³ Mipure Cohamacu poto buhuseheru jira dutiriro jiro. Tó panopu to Pucuro "Espiritu Santore mu yainare warocaihtja", to ni cūriro seheta wari jire Jesure. Ā jiro Jesu sehe ahrinare Espiritu Santore

warocari jira. Ā jina mipure Espiritu to yoare musa ñu, tuhona nina. ³⁴ Davi cjiro sehe Jesu to mǎjariro seheta muanopu mǎjaeraa tiha. Ā jiro tiro to basi ō sehe nia tiha:

"Cohamacu ō sehe nire yu puhtorore: 'Yu poto buhusehei dujiga muhu.

³⁵ Mahure ñu tuhtiinare mahure cūihtja mu cahamacu yoaro sehe jihtinare', nire Cohamacu yu puhtorore", nia tiha Davi cjiro.

³⁶ Ā jina jipihtina Israe masa ahrire noano masiga musa: Ahriro Jesure musa crusapu wajāriro cjirore musa puhtoro sōhre Cohamacu sehe. Tirore musare yuhdohtirore Cristore cūre Cohamacu –ni yahuha masare Pedro.

³⁷ To ā nichu tuhoa tuaro cahya, pjiro tuhotua, masa sehe Pedro cūhure ō sehe ni sinitu ñuha:

–¿Sā coyea, dohse yoanahcari sā? –ni sinitu ñuha tina.

³⁸ Ti ā ni sinitu ñuchu ō sehe ni yuhtiha Pedro:

–Musa ñaa yoari buhirire cahyaga. Musa ñaa tuhotumari cjirore tuhotu cohota, "Ā tjiri jira" ni, Cohamacureta maca, tuhoga. Ā yoa Jesu yaina jina, bautisarina jiga musa jipihtina. Jesure musa wacū tuachu ñuno, musa ñaa yoari buhirire borohca Cohamacu. Tó sehe musa yoachu Espiritu Santore warohca musare. ³⁹ Musare, musa pohmare, musa panamana ji turiainare, yoaro macainare, ā yoa jipihtina Cohamacu mari puhtoro to beserinare, "Potocāta yuhdoihtja musare", ni cūha Cohamacu –niha Pedro.

⁴⁰ Tuhsu, tuaro mehne ō sehe ni yahu quihōha tinare:

–Ahri yahpa macaina, Cohamacure ji coaerainare buhiri dahrerohca Cohamacu. Wiho mejeta musa sehe, tina watoi jiina, Cohamacu yahurire, "Ā tjira", ni bahrañoga musa yuhdoihtja sehe –yahu quihōha Pedro masare.

⁴¹ To ā nichu tuhoa tina payu to yahuare noano tuhoha. Ā jiro tinare tiro bautisa dutiha. Tí dachore Cohamacu yaina mehne macaina tres mil masa waha namoha. ⁴² Ā yoa tina masa Cristo to cūrina mehne dachoripe cahmachu, tí buheare tuho nunu, tire yuhti mǎjaa tiha. Tina pāore nuha, cahma witi, Cohamacure sini, Cristo to cūrina mehne noano jinocaa tiha.

Jesu yaina wahma ji ducaina ti jia tiare yahuha

⁴³ Ā yoa Cohamacu to tuaa mehne yoa ño mǎjaha to cūrina. Tí ā yoachu ñua masa jipihtina ñu caaa wahaa tiha. ⁴⁴ Jipihtina Jesure wacū tuaina cahmachu, noano jinocaa tiha.

Ā jia ti yare cahma witia tiha. ⁴⁵ Ti yare dua, jipihtinare paye baro maerainare caina ti cahmaare waa tiha tina. ⁴⁶ Ā jia dachoripe tina Cohamacu wuhu wijaaroi cahmachua tiha. Ā yoa cāa wuhuse, ti ya wuhusepu cāhure nohopeina cahmachu, pāore nuha, wahchea mehne tina cānoi chūa tiha. ⁴⁷ Ti ā cahmachuno watōi “Cohamacu noariro jira”, ni űo payoa tiha. Paina masa tinare ji coa yuhduu tiha. Ā yoaro dachoripe Cohamacu painare to yaina to yuhdohtina wahachu yoaa tiha.

3

Tini masieraritore noariro wahachu yoaha Cohamacu

¹ Cū namu űamichahapu tres jichu Cohamacu mehne durucuri pja jichu Pedro, Joāo mehne Cohamacu wuhupu wahaa niha. ² Dachoripe ti wāhure ti sahrī sāari sahrīno tāa mehne ti yoari sahrīno macari sopaca cahai paina cūiro masunore na ta duhu dapoa tiha. Ti sopaca noari sopaca wama tiha. Tiro masuno sehe wahma masa ba-juaropata dojori wahiro jiro tini masierariro jiha. Ā jiro tiro ti sopaca cahai niñerure sini dujia tiha ti sopacai sāainare. ³ Ā yoa Pedro, Joāo mehne ti sopacare ti sāa cahachu tini masierariro sehe tinare űu, niñerure siniha. ⁴ Ā jia tina puaropata tirore űu, Pedro sehe ō sehe niha:

–Sāre űuga muhu –niha Pedro tirore.

⁵ To ā nichu tuhoro “Ahrina mahanocā yuhure niñerure waahca”, ni tuhoturo űuroca ō tuhoha tinare. ⁶ To ā ni tuhotupachata Pedro tirore ō sehe ni yahua:

–Niñerure cjueraja yuhu. Cjueraapaihta, ahrire yoaihtja muhare. Jesucristo Nazare macariro to tuaa mehne wahcāruca, tiniga muhu –niha Pedro tini masierarirore.

⁷ Ā ninota to wamomacare potō buhusehe macari wamomacare űaha, tirore waja wahcō dapoha. To ā yoachata tini masierarirore to űuchua tuaa wahaha. ⁸ To ā wahachuta tiro wahcāruca purucu su, tini ducaha. Ā tini ducaro tiro waha, pu tini “Cohamacu noariro jira”, to ni wahcheriro mehne tina mehne Cohamacu wuhu macari sahrīno puhichapu sāa wahaha. ⁹ To ā tinichu “Cohamacu noariro jira”, to nichu masa jipihtina tirore űaha. ¹⁰ Ā jia masa tirore űu masiha. Tiro Cohamacu wuhu macari sahrīno tāa mehne to yoari sahrīno macari sopaca noari sopaca cahai niñerure to sini dujirire masiha masa. Ā jia tiro to tinichu űha, űu cūaa wahaha.

Cohamacu wuhui Pedro masare buheha

¹¹ Ā yoa tini masierariro cjiro Pedro cāhure to siō suha mujano watōi, masa

jipihtina űu cūaa waha, noari wapapu Salomo wama tiri wapapu muroca wahcā, cahmachuha. ¹² Ti ā cahmachurucu sachu űuno, Pedro sehe ō sehe ni yahuha tinare:

–Musa Israe masa, ĳdohseana ahrirore űu cūajari? ĳdohseana sāre musa űu nanujari? Sā sehe sā ya tuaa mehne noaina sā jia tia mehne sā mu sūro ahrirore tinichu yoerahi sā. Jesu sehe tīre yoahre. ¹³ Abrahā, Isaa, Jacobo mari űuchusama, panopu macaina ti yairo Cohamacu sehe to cahamacuno Jesure Jipihtina Bui Jirore cūhre. Wiho mejeta musa sehe tō sehe jirirore tirore űu tuhtinane wahre. Baharo puhtoro Pilato tirore to wio duapachuta, musa sehe tirore to wiochu cahmaerare. ¹⁴ Pilato tirore wio duamahre. Wiho mejeta musa Jesure űaa buhiri marierirore, quihōno yoarirore cahmaerana, pairore masa wajāriro sehere wio dutihre musa. ¹⁵ Ā yoana Jesure marine catichu yoarirore wajāchu yoare musa sā coyey judio masa. To yariachu Cohamacu tirore masohre. Tīre sā űahi. ¹⁶ Ā jina Jesu pjirore to jia tiare wacū tuaina jija. Tirore sā ā wacū tuachu űuno ahrirore musa mipu űurirore musa űu masirirore Jesu sehe to tuaa mehne tinichu yoahre.

¹⁷ Yu coyey, musa puhtoa mehne Jesure noano masierapanahta tirore wajāchu yoare musa. Tīre masija yuhu. ¹⁸ Wiho mejeta panopu macaina Cohamacu yare yahu muhtaina cjiro Cohamacu tinare to yahu dutiriro seheta, yahua tiha tina. “Cristo űano yuhdu, yariarohca”, ni yahua tiha tina. Ti ā ni yahuriro seheta ā wahahre mipure. ¹⁹ Ā jina musa űaare yoari buhirire cahyaga. Musa tuhotumari cjirore tuhotu cohtota, űaare musa goa pjarire duhu, Cohamacureta majareruca, to ya sehere quihōno tuhoga. Musa tirore majareruca, quihōno tuhochu űuno, Cohamacu musa űaare yoari buhirire borohca. Ā boro, musare wahchehti dachorire cū, musare noano yajeri sāachu yoarohca tiro. ²⁰ Ā yoa tiro musa puhtoro cjihtore to beseriro Cristore musare warocarohca tjoa. Tiro Cristo sehe Jesuta jira. ²¹ Cohamacu cahapu jisininohca Jesu, pu Cohamacu ahri yahapu jipihtiare wahma to cohtota pahñochupu. To ā cohtota pahñohore Cohamacu yare yahu muhtaina cjiro, to yaina waro panopu yahu quihō tuhsua tiha. ²² Moise cjiro tīre yahuro ō sehe ni muhtaha: “Cūiro mari mehne macarirore mari coyeroreta Cohamacu yare yahu muhtahtiro cjihtore Cohamacu mari puhtoro warocarohca musare. Yuhure to warocariro seheta warocarohca tiro cāhure. Ā jina musare to yahuchu tuhona, ‘Jai’, ni yuhti pihtinocaga musa. ²³ Ō sehe jirohca. Jipihtina tirore yuhtieraina to

cohāhtina jiahca. Cohamacu yaina mehne macaina jisi tina”, ni mūhtaa tiha Moise cjiro.

²⁴ Jipihtina Cohamacu yare yahu mūhtainape Samue, ā yoa to baharo jiina cūhu mipu jia dachoi cjihtire yahu mūhtaa tiha. ²⁵ Mari űchusuma cjiirire, Cohamacu yare yahu mūhtaina cjiiri cūhare panopu macainare yahua tiha Cohamacu. Mari cūhare ā ni yahuro nia tiha. Abrahāre to niriro seheta mari cūhare ni yahuro nia tiha. Ō sehe ni yahua tiha Cohamacu Abrahāre: “Jipihtiro ahri yahpa macainare noano yoaihtja. Ō sehe tīre yoaihtja: Mū coyero baharo jiriro sehe masare noano yoabasarohca yūhure”, nia tiha Cohamacu Abrahāre. ²⁶ Cohamacu to macunore masa wijachu yoaro mari cahapu waroca mūhtare mari űaa yoare duhuchu yoahitirore. Ā yoaro marine tiro noano yoare —niha Pedro tinare.

4

Pedro, João mehne puhtoa mehne sahuduha

¹⁻³ Pedro, João cūhu masa mehne ti durucuro watoi sacerdotea, Cohamacu wūhure cohtaina surara puhtoro, saduceo curua macaina cūhu tinare tuhoha. Ō sehe ni buheha Pedro João mehne masare:

—Jesu to yariari baharo masa mūjaa wahare. To ā masa mūjarire űna mari cūhu baharo to yaina mari masa mūjahtore masija mari —ni yahua Pedro cūhu.

Ti ā nichu tuhoa puhtoa sehe tina mehne suaha. Ā suaa nahi cahachu űna tina Pedreore, João cūhare űaha, peresu yoaha. ⁴ Ā tinare peresu ti yoapachuta payu ti yahua tuhoina sehe “Potocāta jira”, ni tuhotuha. Ā jia Jesu yaina payu waha, ti dachoi wahma to yaina ji ducaina, ā yoa tó panopu Jesure wacū tua tuhsarina mehne mūa sahserore mari quihochu, cinco mil masa sūro cahai jiha.

⁵ Ā yoa pa dachoi tí maca macaina puhtoa, bucana, ā yoa judio masa buheina cūhu Jerusalēpu cahmachuha. ⁶ Ti ā cahmachunoi sacerdotea bui puhtoro, Ana wama tiriro cūhu tóji jiha. Ā yoa to coyee cūhu jiha. Caifa, João, Alejandro, paina mehne Ana coyee cūhu jiha. To coyee to dahraare dahraina jiha tina cūhu. ⁷ Ā jia tina Pedro cūhare ti cahmarocachu, surara sehe puhtoa watopu tinare naa wihi dapoha. Ti ā na wihi dapochu, tina puhtoa ō sehe ni sinitu űaha Pedro cūhare:

—ĴNoa ya tuaa mehne mūa tirore noariro yoari? ĴNoa jijari masare tīre yoa dutiriro? —ni sinitu űaha tina.

⁸ Ti ā nichu tuhoro Espiritu Santo to yoa dutiriro seheta to tuua mehne yahua Pedro tinare:

⁹ —Mūa puhtoa, Ĵmūa bucana, sā dohse yoa ahriro tini masierarirore sā tinichu yoarire masi duana, sāre sinitu űna nijari mūa? ¹⁰ Ti pja pini ahrire masiga mūa jipihtina, Israe masa. Jesucristo Nazare macariro, mūa crusapu wājāriro, Cohamacu to masoriro tiro sehe ahriro tini masierarirore noariro wahachu yoahre. Ā jina ahrirore mipure mūa űnurocaroi to tinichu űna mūa. Ō sehe nina Cohamacu yare ti joari pūi Jesu cjihtore yahuro: ¹¹ “Ahriro tāca yoaro sehe jiriro jira. Tācare wūhu dahreina wiho jiriare ti cohāriro seheta mūa judio masa tirore cohāre. Mūa ā yoapachuta mipure wūhu dahreina wūhure yoa ti cū mūhtari tācare ti cūriro seheta Cohamacu tirore puhtoro sōhre. Tiro Cristo mariachu Cohamacu yaina wahaeraboa masa. (To ā wiho jiriro jierapachuta mūa mari puhtoa mehne tirore cahmaerare. Mūa ā cahmaerapachuta Cohamacu sehe tirore mari puhtoro sōhre)”, ni joaha panopu. ¹² Ne, paio masare pichacapu wahaborinare yūhdoriro ne mariahna. Ahri yahpapure Jesu dihta masare yūhdoriro jira. Ne paina tiro yoaro sehe jiina mariahna —ni yahua Pedro tinare.

¹³ To ā ni yahuri baharo Pedro, João mehne buhemahnoeraina jipahta cuiro marieno ti buhechu űna, puhtoa, bucana, judio masa buheina mehne űu caaa wahaha. Ā jia Jesu yoaro sehe ti buhechu űna, ō sehe masiha tina: “Potocā Jesu mehne macaina tjira ahriro”, ni masiha tina. ¹⁴ Ā yoa tini masierariro cjiro Pedro cūhu mehne jiha. Tiro to noariro jichu űaha puhtoa, bucana, judio masa buheina mehne. Ā jia tina Pedro cūhare “űna yoaa nina”, ni yahusā masieraha. ¹⁵ Ā yahusā masieraa puhtoa ti cahmachuri tahtiapu jinaare Pedro cūhare wijaa dutiha. ¹⁶ Ti wijaari baharo puhtoa sehe ti basi ō sehe ni sahuduha:

—ĴAhriro dohse yoanahcari mari? —ni durucuha tina ti basi.

Ō sehe ni durucu namoha:

—Pedro, João Cohamacu tuua mehne tini masierarirore tinichu yoari jire. Ā jia Jerusalē macaina jipihtina ti ā yoarire masica. Ā jina mari sehe “Ā yoerare tina” ni masieraja mari. ¹⁷ Ā jina Jesu to buheri cjiirire painare buhe dutiena tjijihna tinare, “Paina tí buheare cahmari”, nina —ni durucuha tina ti basi.

¹⁸ Ā ni durucu tuhsua Pedro cūhare jiroca, ō sehe niha:

—Jesu to buheri cjirire ne buhena tjiga painare. Tíre ne durucu namoena tjiga —ni yahumaha tinare.

¹⁹ Ti ā ni yahuchũ tũhoa tina Pedro João mehne ō sehe ni yũhtiha tinare:

—Mũsa ō sehe ni dutichũ mũsare yahtina, Cohamacũ sehere yũhdũracana niboca sã. ĴDiro ya sehere sã yoachũ quihũno jijari? ĴCohamacũ ya sehere sã yoachũ quihũno jierajari, mũsa tũhotuchũ? ²⁰ Sã sehere sã ñũrire, sã tũhorire sãre yahto basioerara —ni yũhtiha Pedro, João mehne.

²¹ Ti ā nichũ tũhoa pũthoa sehe pari turi dutimaha tjõa tinare:

—Jesu to buherire mũsa buheri buhiri ñano yũhdũnahca mũsa —niri jimare pũthoa tinare.

“João, Pedro mehne ñano yoaa nina”, ni masierari jire tina. Ā jia masa sehe tini masierariro to noariro wahachũ ñũa, “Cohamacũ potocãta noariro jira”, niha masa. Ti ā nichũ tũhoa pũthoa sehe Pedro cũhare ti dohse yoa buhiri dahreboara bocaeraa, tinare wiõha. ²² Tini masierariro, noariro ti yoariro cuarenta cũhari bui cũariro jiha.

Jesu yaina ti cuierahto cjihtore siniha Cohamacũre

²³ Ā yoa, Pedro João mehne ti wiõri baharo tina mehne macaina cahapũ sũ, sacerdotea pũthoa, bũcũna jipihitia tinare ti niri cjirire yahuha. ²⁴ Ti ā ni yahuchũ tũhoa tina jipihitia cũno potori Cohamacũre siniha:

—Sã pũthoro mũhũ mũanore, yahpare, mĩri cũhare yoariro jipihitia catinãre bajuamehneriro jira mũhũ. ²⁵ Mũ Espĩritu Santo sã ñũchũ cjiõre Davire mũ cahamacũnore ahrire yahu dutia tiha mũ niriõ seheta:

“ĴDohse yoa Israe masa jieraina suajari?

ĴDohse yoa Cohamacũre ti yũhdũracãhtire wiho waro durucujari tina?

²⁶ Payũ yahpari macaina pũthoa cahmachu, mari pũthoro Cohamacũre, to pũthoro sũõriõ Cristo cũhare ñũ tuhti, ñano yoa duara tinare”,

ni yahua tiha Davi cjiõro mũ ni dutiriro se-heta.

²⁷ Ā tjira. Ahri macai Herode, Poncio Pilato, judio masa jieraina, ā yoa judio masa cũhũ cahmachuhre, mũ beserĩõre Jesure noariro mũ cahamacũnore wajãa taa. ²⁸ Tĩ pja mũ cahmariro seheta “Ā waharõhca”, mũ niriõ seheta yoahre tina. Mũ masia mehne ā ni yahuha mũhũ. ²⁹ Ā jicũ mipũre sã pũthoro, tina sãre purĩõno mehne mũ jia tiare ti yahu namo dutierachũ wacũ payõga mũhũ. Sãre mũ cahamacũre cuiro marieno mũ buheare yahuchũ yoaga sãre.

³⁰ Mũhũ mũ tuaa mehne dohatiinãre noaina

yoaga. Ā jicũ mũ buheare cuiro marieno yahu dutiga sãre. Ā yoa Jesu noariro mũ cahamacũno to tuaa mehne yoa ñõ masichũ yoaga sãre. Ā jicũ dohatiinãre noaina sã waha dutichũ to tuaa mehne yoadõhõga sãre —ni siniha tina Cohamacũre.

³¹ Ti ā ni siniri baharo, ti cahmachuri wũhũ ñũhmi mũaa wahaha. To ā ñũhmichũta Espĩritu Santo to tuaa mehne wacũ tua namoina wahachũ yoaha tinare. Tinare ā wahachũ Espĩritu Santo to dutiriro seheta yoaa, cuiro marieno Cohamacũ yare yahu namõha tjõa tina.

Jesu yaina ti yare tju waa tiha

³²⁻³³ Ā jia Cohamacũ to tuaa mehne tina Jesu to cũrina ō sehe ni yahua tiha masare: “Jesu yariariro to masarire sã ñũhi”, ni yahua tiha tina masare. Ā jiro tinare jipihitãre Cohamacũ noano yoadõhorucua tiha. Ā yoa Jesure wacũ tuaina payũ jia, tina cũno potori tũhotuina jia tiha. Ā jia tina ti yare ti cjuãare “Yũ ya dihta jira”, ne niera tiha. Tina jipihitia ti yare paye baro maerainãre tina mehne macainãre tju waa tiha. ³⁴ Ā jia tina mehne macaina pjacũõina mariea tiha. Tina mehne macaina yuapari cjuaina, wũhũse cjuaina ti yare duaa tiha. ³⁵ Ā duaa ti wapa narire tina na ta, Jesu to cũrinãre waa tiha. Ā jia tina sehe tíre tina mehne macainãre tju waa tiha. Jipihitia cjuãerainãre tju waa tiha. ³⁶ Tĩ pjare cũiro tina mehne macariro José wama tĩõriõ jiha. Jesu to cũrina Josẽre Bernabẽ ni wama pisuha. To wama Bernabẽ “Masare wahchechũ yoariro jira”, nia nina. Tiro Levĩ ya curua macariro Chĩpre nũco macariro jiha. ³⁷ Ā jiro tiro yahpare cjuãiro jiro tíre duaha. Ā duaro to wapa narire Jesu to cũrinãre waha tiro painãre witi dutiro.

5

Anania to namono Safira mehne mahũõha

¹ Paina cũhũ Bernabẽ yoaro sehe yoaa timaha. Tina Anania wama tĩõriõ, to namono Safira wama tĩõriõõ jiha. Ti ya yahpare duaha tiro. ² Ā duaparato tiro to wapatãre to basi naha. To namono cũhũ to ā yoarire masiha. Ā jiro ti wapataa ti dũharire na ta, Jesu to cũrinãre waha Anania sehe. Ā waro “Wa pahũõiõ nija”, nimaha tiro. ³ To ā yoachũ ñũno Pedro tĩõre ō sehe ni yahuha:

—Anania, watĩno mũhũre mahũõ dutiriõ jire Espĩritu Santõre. Ā jicũ mũ ya yahpare dua, mũ wapatãre mũ basi nariõ jire mũhũ. ⁴ Mũ duahto pano mũ ya yahpa jĩhre. Ā jiro mũ duari baharo mũ ya wapataa jĩhre. ĴĀ yoacũ dohse jiro baro ā mahũõri mũhũ?

Mũhũ sã dihtare mahñoerare. Cohamacũ cãhũre mahñoere mũhũ —niha Pedro tire.

⁵ To ã nichũ tãhorota, Anania sehe doca caha sũ, yariaa wahaha. Æ jia jipihĩna tiro to ã wahachũ masia, tuaro cuiha. ⁶ To yariari baharo wahma yapia ta, to pjacũre suhtiro cahsaro mehne wahma, sopacaru na wijaa, masa coparu cohãnocaha tire.

⁷ Æ yoa tia hora baharo Anania mũnano namono, to yariarire masieraro Pedro caharu sãaha. ⁸ Æ jiro Pedro ticorore õ sehe niha:

—¿Musa ya yahpare duatjiãhna noho puro wapatarĩ musa? —niha tiro.

Æ jiro ticoro to manũno mũnano to niriro purota, “Tõ purota wapatahi sã”, ni yahtimaha ticoro.

⁹ To ã ni yahtichũ tãhoro Pedro õ sehe ni yahuha ticorore:

—¿Dohse yoana musa cũno potori Cohamacũ Espĩriture mahño duajari? “¿Potocãta marine buhiri dahrebocari?” nina. Tũhoga mipũre. Mũ manũ cjirore yarina tara. Mũhũ cũhũre mũ pjacũre naa taa nina —niha Pedro.

¹⁰ To ã ni yahuchũta ticoro doca caha sũ, yariaa wahaha. Æ jia wahma yapia tí wũhũre sãa wihi, ticoro pjacũre na wijaa wahaha. Na wijaa, to manũno mũnano pari wahpa ticoro pjacũre masa coparu cohãha. ¹¹ Æ jia Jesu yaina jipihĩna paina tire tũhoah cui yũhũaa wahaha.

Jesu to cũrina Cohamacũ tuaa mehne yoa ñoha

¹² Æ yoa masa watoi Jesu to cũrina payũ tahari Cohamacũ tuaa mehne yoa ñoa tiha. Æ yoa tina Salomo wama tiri tahtiapũ tihamahnoeni tahtiapũ cahmachua tiha. ¹³ Æ jia paina Jesu yaina jieraina sehe cui curea, tina caharu wahaera tiha. Æ cuiptahtina tire Jesu yaina warore “Noaina jira ah-rina”, nia tiha masa. ¹⁴ Æ jia mũa, numia payũ Jesure wacũ tua dũcaah tiha. ¹⁵ Æ jia tina dohatiĩnare na ta, coma yosaa mehne pjũpaha duhu cũa tiha maharu tinare. Æ yoa Pedro tinare to ña payochũ cahmaha tinare na taina sehe dohatiĩna ti noaina wahachũ cahmaa. Tinare to ña payoerachũ Pedro ti bui masarũca cũchũ cahmaha tina. Tĩ dihtare cahmaa tiha ti noaina wahahto sehe. ¹⁶ Æ jia Jerusalẽ cahai jia macari macaina cũhũ dohatiĩnare, watĩa ti sãaina cũhũre na taa tiha. Tĩ ã na tachũ tina jipihĩna ti pjacũri noaina wahaha.

Jesu to cũrinare paina ñano yoa tiha

¹⁷ Tĩ ã yoachũ ñaa sacerdotea bui puhtoro, tiro mehne macaina mehne Pedro cãhũre ñũ tuhtĩha. Sacerdotea puhtoro mehne macaina saduceo curua macaina jiha. ¹⁸ Æ

ñũ tuhtia tina sua yũhũaa Jesu to cũrinare ñaha, peresu yoaha. ¹⁹ Æ jiro ñamĩpũ Cohamacũ yairo anjo pjõoha tinare peresui dujiĩnare. Æ yoa tinare wijaa ta dutiro õ sehe ni yahuha anjo:

²⁰ —Cohamacũ wũhũpũ wahaga. Tĩ wũhũpũ jina Cohamacũ to masorire ahri noaa buheare yahuga masare —niha anjo tinare.

²¹ To ã nichũ tũhoah, ñamiwacũnu jichũ Cohamacũ wũhũpũ sãa, masare buhea tiha tina. Tĩ dachoihta sacerdotea puhtoro, tiro mehne macaina, Israe masa puhtoa mehne cahmachu, Jesu to cũrinare peresupũ jiĩnare na ta dutimaha surara puhtoare.

²² Wiho mejeta surara puhtoa peresu ti yoari wũhũpũ waha, ñumaha. Tinare bo-caeraha. Bogaeraa tjuaa wahaha. Tju sũ õ sehe ni yahuha ti puhtoare:

²³ —Peresupũ jia pahmari bihaa pahmari jihre. Æ jia tí pahmari cahai ti peresu yoarinare cohtaina ti ducuchũ ñũhi sã. Wiho mejeta pjõo sãa, sã ñũchũ, ti peresu yoarina mariahere —ni yahuha tina.

²⁴ Tĩ ã nichũ tũhoah, surara Cohamacũ wũhũre cohtaina puhtoro, sacerdotea puhtoa mehne tire tũho, caaa waha, “¿Dohse waha sohtori tiahcũ tina ã yoa?” ni tũhotuha tina. ²⁵ Æ jiro tina caharu pairo sũ, tinare õ sehe ni yahuha:

—Musa peresu yoarina Cohamacũ wũhũpũ jihre. Ñana wahaah wiho. Tĩ wũhũpũ masare buhea nihre tina —ni yahuha.

²⁶ To ã nichũ tũhoro, surara puhtoro, to surara mehne waha, Jesu to cũrinare pari turi ñaha taha tjoa. Wiho mejeta tinare surara tuhtieraha. Æ jia tinare cããborina jipahta, masare cuiã cããeraha tinare. “Ahrinare mari cããchũ paina masa sehe tãa mehne docaahca marine”, ni tũhotuha tina surara sehe. ²⁷ Æ jia tinare na ta, puhtoa panoi duhu dapoha tina. Tĩ ã na wihi dapochũ sacerdotea puhtoro tinare õ sehe ni tuhtĩha:

²⁸ —Musare sã tuaro dutimahi. “Jesu yare buhena tjiga”, nimahi sã musare. Sã ã nipachũta musa sehe jipihĩna Jerusalẽ macainare buhehere musa. Jesu to yariari buhiri, sãre buhiri tichũ yoa duana nica musa —niha puhtoro sehe.

²⁹ To ã nichũ tũhoro Pedro sehe paina Jesu to cũrina mehne õ sehe ni yahtĩha:

—Cohamacũ to dutiri sehere yoa mũhtanahtja. Æ jina baharo Cohamacũ cahmachũ masa tí dutiare yoanahtja. ³⁰ Cohamacũ, mari coyee panopũ macaina puhtoro, Jesure masori jire. Tirota jira musa crusaru cãã puha wajã dutiriro. ³¹ Jesure “Noariro jira” ni, to poto buhuseheĩ duji dutihre Jesure Cohamacũ sehe. Æ jiro Jesu masa puhtoro, masare masoriro jiro,

Israe masare ti ñaa yoarire cahyaina ji dutiro, ti ñaa yoari buhirire cohã duara Jesu. ³² Æ jina sã sehe Jesu to yoarire ñarina jina tãre yahuja sã. Espiritu Santo tãre ñariro jiro yahura tiro cãhu. Tirore Espiritu Santore Cohamacu warocahre. Jipihtina Cohamacu dutiare yoainare tiro Espiritu Santore wahre –ni yahuha tinare.

³³ To ã nichu tãhoa puhtoa sehe sua yuhduaha. Æ suaa, tina Jesu to cãrinare wajã duamaha. ³⁴ Wiho mejeta Gamalie, fariseo curua macariro tõi jiro tinare wajã dutiro taro nieraha. Tiro puhtoa mehne macariro, dutiare buheriro to jichu, masa tirore ño payoa tiha. Tiro Jesu to cãrinare mahanocã cohta dutiro pa sehepu tinare naa wahcã dutiha surarare. ³⁵ Ti ã naari baharo tiro õ sehe ni yahuha masare:

–Musa Israe masa, ahrinare musa yoahitre noano tuhotuga “Masapu wajãri”, nina. ³⁶ Wacũga Teuda cjirore. Tiro to basi “Masare yuhduarucariro jija yuhũ”, nire masare. To ã yoachũ ñua, masa payu cuatros cientos masa tiro mehne macaina tjuare. Baharo paina sehe tirore wajãri jire. To buheare buherina cjiri sehe waha sitea wahari jire. Æ jia tina cjiri mipure mariaha. ³⁷ Baharo masare ti quihõri pja jichu Galilea macariro Juda wama tãro cjiro masare to buhechu tiro mehne masa payu tjuare. Tiro cãhu yariaa wahari jire. Æ yoa to yaina jipihina waha sitea wahari jire. ³⁸ Æ ñucã musare mipu ahrire nii nija. Æ ñucãhã ahrinare Jesu yare yahuinare. Æ yoa ahrĩ buhea, ahrina ti ya buhea Cohamacu ya buhea jieraa, pihtia wahaahca Teuda cãhu ti ya buhea ti pihtiro sehetã. ³⁹ Wiho mejeta ahrĩ Cohamacu ya buhea jia, ne pihtisi. Ahrĩ buhea Cohamacu ya jichu ne ahrire butichu yoa masierara musa. Musa ahrire butichu yoa duana Cohamacu mehne cahmachena niboca musa –niha Gamalie tinare.

⁴⁰ To ã ni yahuchũ tãhoa, “Potocã tjira”, ni tuhotuha masa. Æ jia tina Jesu to cãrinare pjiroca, ti wihichũ ñua, tinare tjanaha. “Jesu yare buhe namoena tjiga musa”, ni tuhsu, tinare waha dutiha. ⁴¹ Ti ã waha dutichu tãhoa tina puhtoa cahapu jirina cjiri wahaah wahaha. Jesu yare ti yoari buhiri ñano yuhduã tuaro wahcheha Jesu to cãrina. ⁴² Æ jia dachoripe Cohamacu wuhũ cahai jia waparihi, ti ya wuhusei Cristo yare buhea, yahua tiha tina.

6

Siete yoadohinare beseha Jesu yaina

¹ Tĩ dachoripe Jesu yaina payu wahaha. Wiho mejeta ti ã waharo wato, cũ curua macaina judio masa jipahta, pa sehepu masa bajuaina griego ya durucuina jiha. Æ jia tina tõita masa bajuaina hebreo ya durucuinare õ sehe ni tuhotu, nureha: “Dachoripe masare yoadohore ti witichu, mari griego ya durucuina wapewahya numia sehere daacã waro wara”, ni tuhotu, nure cohtaha. ² Ti ã nurechu masia, Jesu cãrina, doce jiina sehe jipihtina Jesu yainare ti cahapu pjiroca, õ sehe ni yahuha tinare:

–Sã Cohamacu yare buheina jija. Tãre duhu, masare yoadohore witiborina sã jirucuchũ tõi wahaerara. ³ Musa sã coyee, siete mure, paina noaina ti niinare Espiritu Santo to dutirire yoainare, noano tãho masinare macaga. Tinare ahrĩ dahraare cũga musa. ⁴ Wiho mejeta sã sehe dachoripe Cohamacu sine mija, Cohamacu yare painare buhenahca –ni yahuha tina Jesu to cãrina.

⁵ Ti ã nichu tãhoa, “Jai. Æta yoajihna”, niha tina jipihina Jesu yaina. Baharo Estebãre Cristore wacũ tuarirore, Espiritu Santo to dutiare yoarirore beseha tina. Æ jichu Felipere, Prõcorore, Nicanore, Timore, Parmentare, Nicola cãhure Jesu yainare yoadohotinare beseha tina. Nicola sehe Antioquia macariro, judio masano jierariro, judio masa ya buheare cahmano, tina mehne sãariro jiha. ⁶ Tinare bese tuhsu, ti beseinare Jesu cãrina cahai na wihihã tina. Ti ã na wihichũ ñua, tina Jesu cãrina sehe tinare Cohamacu sine payo tuhsu, ti dapu poca bui ti wamomacarine duhu payoha.

⁷ Æ yoa Jesu yaina painapare Cohamacu yare yahu site pahõoa wahaha. Æ jia Jerusalẽpu jiina paina Jesu yaina payu waha namoha. Sacerdotea cãhu payu Jesu yaina wahaha.

Paina Estebãre ñahaha

⁸ Æ yoa cãiro masare yoadohore witi cohtariro Estebã sehe Cohamacu to noano yoariro ji, Cohamacu tuaare cjuariro jiha. Æ jiro tiro Cohamacu tuaa mehne yoa ño mujaha masa ti ñurocaroi. ⁹ Wiho mejeta judio masa buheri wuhũ macaina tirore ñu tuhti, to yahuchũ, tirore soro ni cohtaha. Tina soro ni cohtaina “Cahamaca ji, wijarina cjiri”, wama tiri curua macaina sehe jiha. Æ jia Cirene macaina, Alejandrĩa macaina, Cilicia macaina, Æ jichu Asia macaina cãhu jiha tina. ¹⁰ Tirore soro ni cohtapahta, Espiritu Santo to masia mehne Estebã to durucu mihnichu, tina to buheare ti dohse soro ni yuhtiboare wacũ bocaeraha. ¹¹ Ti soro ni yuhtiboare wacũ bocaeraa, tina painare mahõo dutia, wapaha tinare.

Ti ā mahño dutichu ò sehe ni yahusāmaha tina:

—Ahriri Cohamacure, ā jichu Moise cjirore Cohamacu to cūri dutia cāhure to ñano durucuchu sã tūhohi —ni yahusāmaha tina mahñoina Estebäre.

¹² Ti ā nichu tūhoa masa, judio masa buheina, bucuna cūhu tiro mehne sua. Ā jia tina Estebäre ñaha, ti puhtoah capahu naaha tirore. ¹³⁻¹⁴ Ā yoaa tina painare mahño dutiha:

—Ahriri dachoripe Cohamacu wāhure, to dutia cāhure ñano durucuriro jira. Tūhohi sã tirore to ò sehe nichu: “Jesu Nazare macariro Cohamacu wāhure cohã, ā yoa Moise dutiri cjiri, marine to yahu cūri cjirore cohatarohca”, nihe Estebã sã tūhochu —ni mahño yahusāmaha tina.

¹⁵ Ā jia jipihtina tōi dujiina Estebäre noano ñaroca ò, to wāhūare ñuha tina. Anjo yoaro sehe bajuha to wāhūa.

7

Estebã Jesu yare yahuha

¹ Ā yoa sacerdotia bui puhtoro ò sehe ni sinitu ñuha Estebäre:

—¿Ahrina ti nia potocã tjijari? —ni sinitu ñuha tiro Estebäre.

² To ā nichu tūhoro, Estebã sehe tinare ò sehe ni yahtia:

—Coyea, bucuna sã pucūsuma tūhoga. Abrahã mari ñuchū cjiro panorū macariro Mesopotamiarū to jisnichū, Harãrū to jilto pano, Cohamacu tuariro si siteriro sehe tirore Abrahãre bajuaa tiha. ³ Ā bajuaro, Cohamacu ò sehe ni yahu tiha tirore: “Mū ya yahpare, ā jichū mū coyea poto cāhure duhunoca, wahaga. Pa yahpa, yū mūhure ñohi yahpare wahaga”, nia tiha Cohamacu Abrahãre. ⁴ To ā nichū tūhoro Abrahã cūhu Caldea yahpai jiina wijaa, Harãrū sū, jisinia tiha. Abrahã pucuro to yariari baharo, tiro cūhu tí macai wijaa, ahri yahpa, mirū mūsa jiri yahparū Cohamacu yoadohoro mehne taa tiha. ⁵ Cohamacu Abrahãre òrū suho na taparota, tirore dói “Ahri yahpa pūro jiga”, ni cūerasinia tiha. Ne mahanocã ahri yahpare, “Pū tēga mūhu”, ni dutiasinia tiha tiro. Wiho mejeta Abrahã pohna marieriro to jipachata, Cohamacu sehe tirore ò sehe ni yahu māhtaa tiha. “Mūhure ā jichū mū panamana, pa tjuru macainarū cāhure ahri yahpare waitja”, nia tiha Cohamacu Abrahãre. ⁶ Ā ninota ò sehe ni yahu namoa tiha Cohamacu. “Mū panamana pa tjuru macaina pa yahparū waha, tōrū paina capahu jia, ti cahamaca jahca tina. Tuhsū, cuatro cientos cūhmarī waro tō macaina ñano yopeahca mū panamanare. ⁷ Ā jicū tō macainare ti ā yoari buhiri buhiri dahrehtja yūhu. Yū

ā yoari baharo mū panamana ji turaina ahri yahparū wihi, wāhure ño payohtina jahca tina”, nia tiha Cohamacu Abrahãre. ⁸ To ā ni yahu cūare ti noano wacūrucuhto sehe, ò sehe yoa turia wahcã dutiha tirore. Mūno pjacure mahanocã cahsarocãre yihso na dutia tiha tirore. Ā jiro ocho dachori to macano Isaare to pohna tiri baharo, mahanocã cahsarocãre yihso naa tiha tiro Isaa pjacure. Baharo Isaa Jacobore pohna ti, to pjacu cāhure mahanocã cahsarocãre yihso naa tiha. Baharo Jacobo cūhu doce to pohñare ò dihta yoaa tiha ti pjacurire. Tina doce mūa sehe tōpe curuari, mari masa curuari dahpoto macaina cjihti jia tiha.

⁹ Ā yoa baharo, tina Jacobo pohna, mari ñuchūsuma cjiri, ti baharo Joséré pahsu tia, paina ti cahamacano cjihtore duanocaa tiha Egiptorū wahainare. Ti ā yoapachata, Cohamacu Joséré yoadohoa tiha. ¹⁰ Jipihti tí to ñano yūhūare Cohamacu tirore noano yūhūchū yoaa tiha. Cohamacu tirore noano tūho masichū yoaa tiha. Ā yoa faraō Egipto macaina puhtoro sehere Joséré ñū ji coachū yoaa tiha. Ā jiro faraō sehe Joséré puhto sōa tiha, tiro mehne masare dutihti cjihtore. Tirore faraō ya wāhū cāhure puhtoro cūa tiha.

¹¹ Ā yoa tí pjapure Egiptorū, Canaarū cāhure parō ne coro taeraa, yahpa sehe wūaa sã wahaa tiha. To ā wūa sã wahachū, masa ti toamari cūhu ñai pihtia wahaa tiha. Ā jia mari ñuchūsuma cjiri ñano yūhūa, ti chūboare ne bocaeraa tiha. ¹² Wiho mejeta Egiptorū “Trigo jiyuhca”, ti nichū tūhoro, Jacobo sehe to pohñare, mari ñuchūsuma cjirore tōrū coã warocaa tiha. ¹³ Baharo pari turi to warocarina cjiri Egiptorū ti sūchū tjoa, José to wahmisumare “Mūsa bahata jija yūhu”, ni yahu, tinare masichū yoaa tiha. Tí pja puhtoro faraō sehe José coyeare coã ñuno nia tiha. ¹⁴ Baharo José to wahmisumare, ti pucuro Jacobore, ā jichū jipihina ti coyea cāhure cahmarocaa tiha. To coyea setenta y cinco masa jia tiha. ¹⁵ To macano to pjirocachū tūhoro Jacobo cjiro wahaa tiha Egiptorū to macano capahu. To macano capahu jiro, tiro yariaa wahaa tiha. Ā yoa to pohna, mari ñuchūsuma cjiri cūhu tōrū yaria pihtia wahaa tiha. ¹⁶ Tina ti yariari baharo, ti coyea ti pjacuri cjirore Siqué wama tiropū naa tiha. Tōrū na sū, tãa coparipū Abrahã Hamor pohñare niñeru mehne to nuchari yahparū tina ti pjacuri cjirore cūa tiha.

¹⁷ Ā yoa Cohamacu Abrahãre “Canaa yahpare waitja mūhure”, to ni cūriro cjiro mū sūro cahachū, Abrahã panamana, Israe masa, Egiptoí jisinia payū wahaa tiha. ¹⁸ Ti ā payū wahari baharo, paio faraō, Egipto masa puhtoro José cjirore masierariro sã

tiha. ¹⁹ Tiro mari coyeare mahño, ñano yoa, ti pohñare ma pohñare wajã dua, cohãnocã dutia tiha tinacãre. Wahma bajuainacãre cohã dutia tiha “Tinacã yariajaro”, nino. ²⁰ To ã yoaro watoi Moise cjihto sehe masa bajuaa tiha. Tirocã noariro, Cohamacu to noano ñu jicoariro jia tiha. Tia sũ waro to pũcũsuma tirocãre noano ñu wihboa tiha. ²¹ Æ jiro Moiserere nuõ namo masieraa, diaru tirocãre pũhuroi comape mehne ti bihari pũhuroi poho bũroha. Ti ã yoachu faraõ macõno tirocãre ñu boca, na maja, to macunore yoaro seheta cjuaa tiha tirocãre. ²² Æ jia tina Egipto macaina, noano masiina ya jip-ihitiare Moiserere buhe dũcũõa tiha. Baharo, ne cuiro marieno durucuriro, puhtoã jia tia cãhũre mihni yũhdũrucũ sũriro wahaa tiha Moise.

²³ Æ yoa tiro cuarenta cãhmari cjuaro to coyea Israe masare ñu duaro ti caharu ñuno wahaa tiha. ²⁴ Tõru ñuno sũro, Egipto macariro cãiro Moise coyeirore to ñano yoachu ñua tiha. Tiro to ñano yoaborirore dũcata duaro, Egipto macariro sehere wajã cohãnocã tiha. ²⁵ Æ wajã cohãno, Moise õ sehe ni tãhotua timaha. “Yũ coyea ti coyeirore yũ yoadohochũ ñua ‘Cohamacu marine noano yũhdũchũ yoa dutiro warocare ahrirore’, ni tãhotuahca yũ coyea”, ni tãhotua timaha Moise. Wiho mejeta tina sehe ne ã ni tãhotueraa tiha. ²⁶ Pa dachoi Moise to coyeare pũaro ti basi cahmacheinare boca sũa tiha. Æ boca sũro, tinare yahu duaro tinare õ sehe ni yahua timaha: “¿Musa basi jipanahca cahmachejari mũsa?” ni yahua timaha Moise tinare. ²⁷ To ã ni yahuchũ tũhoro, cãiro to coyeirore ñano yoariro sehe Moiserere tjurocaa tiha. “Mũhũ sã puhtoro jierara. Sãre yahuboriro jierara mũhũ. ²⁸ ¿Canũre Egipto macarirore mũ wajãriro seheta yũhũ cãhũre wajã duacu nijari mũhũ?” nia tiha tiro Moiserere. ²⁹ To ã nichũ Moise tũho cũaa waha, mũrocaa duhti wahcã, Madiã yahparu wahaa wahaa tiha. Tõpũre pa sehe macariro jiparota, numino boca, pũaro pohña tia tiha.

³⁰ Æ yoa Moise cuarenta cãhmari waro tõi to jiri baharo, Sinaĩ wama tidũ tũcũ cahai masa marienoru to jichũ anjo tirore bajuaa tiha. Anjo sehe mahadũcã jari picha pohñaĩ bajuaa tiha. ³¹ Tũ yucũscãpũ to jãrucuchũ ñuno, Moise ñũ cũaa wahaa tiha. Ti pichacare cahacã noano to ñũ wahcãchũ waroi Cohamacu to durucuchũ tũhoã tiha. ³² “Cohamacu jija yũhũ. Mũ ñũchũsuma cjiiri, Abrahã cjiro, Isaa cjiro, Jacobo cjiro ti ño payorih jija”, nia tiha Cohamacu Moiserere. To ã nichũ tũhoro Moise sehe tetere, ne ñũ wahcõeraa tiha. ³³ Cohamacu õ sehe ni durucu namoa tiha tirore. “Yũhũ ñaa mari-eriro yũ õi jiro wato, mũ ducuri yahpa sehe

wiho jiri yahpa jierara. Æ jicu mũ dahpo suhtire tjuwe cũga. ³⁴ Æ yoa yũ yaina masa Egiptoru ti ñano yũhdũchũ ñũja. Ti tũchũ tũhoja. Æ jicu õpũre wihija yũhũ, tinare yũhdũ witichũ yoaĩ tai. Ti ã wahachũ, ñũcũ wahaga mũhũ cãhũ. Egiptoru mũhare warocaihtja. Tinare na wioi wahaga”, nia tiha Cohamacu Moiserere.

³⁵ Tõ panoru tina sehe mari coyea, Israe masa Moiserere cahmaeraa tiha. “Mũhũ sã puhtoro jierara”, ni tuhtia tiha tina tirore. Wiho mejeta baharo, Cohamacu ti ã niriro cjirore Egiptoru warocaa tiha, mari coyea Israe masare yũhdũ witichũ yoahtiro, ã jichũ ti puhtoro jihitiro cjihtore. Æ yoa anjo, tirore jũdũpũ bajuariro sehe to ã yoahtire yahua tiha tirore. ³⁶ Moise jia tiha mari coyea, Israe masare Egiptoru jiinare na wioriro. Tinare na wioro, Egiptoru Cohamacu tuua mehne tiro sehe yoa ño dũcaa tiha tõru jiinare. Pjiri ma sohãri mapũ ãta yoa ñoa tiha tjoa. Baharoru masa marienoru cãhũre cuarenta cãhmari waro Cohamacu tuua mehne yoa ño mũjaa tiha tiro to masare. ³⁷ Æ yoa Moise cjiro jia tiha mari coyea, Israe masare õ sehe ni yahuriro: “Cohamacu cãiro masa coyeiro, to yare yahu mũhtahtiro, yũ yoaro sehe jirirore warocahca mũsare”, nia tiha Moise tinare. ³⁸ Moise masa marienoru mari coyea Israe masa mehne jia tiha. Tuhsũ, Sinaĩ wama tidũ tũcũpũ ti cahmachuchũ tirore yahuriro anjo mehne jia tiha. Æ yoa mari ñũchũsuma panoru macaina cjiiri mehne jia tiha tiro. Cohamacu to dutiare cũriro jia tiha Moise.

³⁹⁻⁴⁰ Æ jia ti dutiare tãcũ Moiserere to cũno watoi mari ñũchũsuma cjiiri Egiptoru tjuua dua Moiserere yũhdũrucãa tiha. Tina tirore cahmaeraa tiha. Æ cahmaeraa tina Moise cjiro wahminore Aarõ wama tiriro cjirore õ sehe nia tiha: “Paina cohomanare yoaga mari yaina cjihti. Tina mari wahahti mahare marine sũho naahca. ¿Wiho mejeta marine Egiptoru jiinare na tariro Moise dohse wahari tiro? Masieraja sã”, nia tiha tina. ⁴¹ Æ jia ti dachorire tina wachũ masure uru mehne yoaã tiha. Æ yoa tuhsũ, tina wahiquinare wajã, ti yoariro cjiro cahai na ta, ño payoa tiha tirore. Æ jia tina ti yoariro cjirore wachũre ñũ, wahche, bõse nũmũ yoaã tiha. ⁴² Wachũre ti ño payochũ ñũno, Cohamacu tinare cohã wahcãã wahaa timaha. “Yũhũre cohã, mũanoru bajuaa, sũ dacho macariro, sũ ñami macariro, ã yoa ñahpichoha poca cãhũre ño payowahnojarõ”, nino cohã wahcãã wahaa timaha. Cohamacu yare yahu mũhtaina cjiiri ã ni joaa tiha:

“Musa Israe masa, yũhũre nu ñano yoare.

Masa marienopu cuarenta cahmari waro jina wahiquinare musa wajainare musa waja, ju wa mupanahta, yuhure musa no payoboriro seheta yomare musa.

Wiho mejeta yuhu sehere musa no payoerare.

⁴³ A jina musa Molo wama tiri masare no payoina jiina, ti masare no payori wuhure cjuare musa.

A yoa paio cohamacu nahpichohaca Refa wama tiria to masare musa yoariare musa cjuare tjoa.

Ti masarine musa yoarire musa no payore. Musa a yoari buhiri masare Babilonia sie seheru coharcotija yuhu", ni yahu joaa tiha Cohamacu yare yahu muhtaina cjiri.

⁴⁴ A jia masa marienopu Cohamacu masa mehne ti jiri wuhure wahiquina cahsari mehne ti yoari wuhure cjuaa tiha mari nuchusuma cjiri panopu macaina. Ti wuhu Cohamacu masa mehne to durucuri wuhu jia tiha. Ti wuhuru Cohamacu dutia to joaa pjini taa pjini jia tiha. Ti wuhure Cohamacu Moiseru to fioriro seheta, "O sehe yoaga", to ni yoa dutiriro seheta yoaa, ti wuhure cjuaa tiha tina. ⁴⁵ A yoa ti panamanapu cahu cjuaa turia nunu tia tiha ti wuhure, wahiquina cahsari mehne ti yoari wuhure. Baharo mari nuchusuma cjiri Josue mehne Cohamacu mari coyee Israe masare to cuhti yahpare, ahri yahpare pu tia taha. Ti pu tia tachu ahri yahpai ji muhtaina cjirire Cohamacu cohancocaa tiha. Ti pjare Cohamacu ti no payori wuhure na taa, cjuaa tiha tina ahri yahparu, mipure mari jiri yahparu. Pu Davi cjiro to jiri tjurupu cjuaa batoo tiha ti wuhure. ⁴⁶ Tiro Davi cjiro sehe Cohamacu wahchehu yoariro jia tiha. Cohamacu ya wuhu cjihtore pa wuhu tiro yoa duaro, sinia timaha Cohamacu. ⁴⁷ To a sinipachuta Salomopu Cohamacu ya wuhu sehere yoaa tiha. ⁴⁸ To a yoapachuta Cohamacu Jipihina Bui Jiro sehe masa ti yoari wuhure jierara. O sehe nia tiha Cohamacu yare yahu muhtariro cjiro:

⁴⁹ "Muno yu dujiro jira.

Toi dujicu dutija yuhu.

A jiro yahpa sehe yu dahporire duhu payoro yoaro sehe jira.

Yuhu tua yuhdariro jija.

Yu ya wuhu cjihtore yoa masierara musa.

Cohamacu yu jichu yu jihti wuhure musa yoa masierara.

⁵⁰ Yu basi ahri yahpare jipihiti yoahi yuhu", ni durucua tiha Cohamacu", ni joaa tiha Cohamacu yare yahu muhtariro cjiro.

⁵¹ 'Musa Cohamacu yare tuhpanahta, tireu yuhti duaerara. Cohamacu

masieraina yoaro sehe tuhutuina baro jira musa. Espiritu Santore yuhduruca yuhdura musa. Musa nuchusuma cjiri ti yoariro cjiro seheta yoara musa cahu. ⁵² Musa nuchusuma cjiri jipihitina Cohamacu yare yahu muhtaina cjirire nuno yoaa tiha. Tina Cohamacu yare yahu muhtaina cjiri "Baharo cauro naa buhiri Marieriro tarohca", ti ni yahu quihd muhtachu tuhoa, musa nuchusuma cjiri sehe tinare waja tiha. A yoa mipu cahure tiro "Naa buhiri Marieriro", to panopu ti niyuriro sehe opu to wihichu, "Muhu mehne macaina jija", ni ji mahno, tireu waja. ⁵³ Cohamacu dutiare anjoo sehe yahu turia timaha masare. Ti a yahu turichu musa ti dutiare cjuamaha. Wiho mejeta ti dutiare yuhduruca musa —niha Estebã.

Tina Estebãre taa poca mehne doca waja

⁵⁴ To a nichu tuhoa tina sehe tuaro suaha. A tuaro suaa, cuaina wahaha. ⁵⁵ Ti a suapachuta Estebã sehe Espiritu Santo mehne wacu tuariro to tuaa mehne manopu nuroca mo, Cohamacu si siteare naha. A yoaro Cohamacu potu buhusehei Jesu to ducuhu cahure naha tiro. ⁵⁶ A nuroca muno, o sehe niha:

—Nuh muoga musa. Manopu mahancã to tjuwe machu, Jesu Cohamacu to warocariro Cohamacu potu buhusehei to ducuhu nija yuhu —niha Estebã tinare.

⁵⁷ To a nichu tuhoata tina tuaro sañurucu, ti cahmo coparire bihanoca, cano potori tiro cahapu nuroca wahcã, tireu nahaha. ⁵⁸ Naha tuhu, tireu na wahcã, ti maca daktu cahapu cohaha tireu. A jia taa poca mehne doca waja tireu. Ti a wajahto pano tireu yahusarina tireu taa poca mehne docahtina ti bui saa suhtire tjuwe na, wahmunore Saulo wama tirore ti suhtire cjuabasa dutiha. ⁵⁹ Estebãre ti taa docaro watoi, sinino sehe o sehe niha tiro:

—Jesu, yu puhtoro yu catiare naga —niha tiro.

⁶⁰ Ni tuhu, tiro na tuhcuca caha su, o sehe ni tuaro sañurucuha:

—Puhtoro Jesu, ahriina mipu yuhure ti waja buhiri tinare buhiri dahrei tjia —ni sañurucuha Estebã.

A ni sañurucu batoarota, yariaa wahaha tiro.

8

Saulo Jesu yainare nano yoaha

¹ Estebã to a yariachu nuno, "Noana", niha Saulo sehe.

Ti dachoreta Jesu yainare Jerusalã macainare nano yoa ducaha Saulo mehne macaina sehe. Ti a yoa ducachu Jesu yaina Judea yahparu, Samaria yahparu yoaropu

duhti site wahcāa wahaha. Ti pūhtoa, Jesu to cūrina dihta wahaeraha. ² Ā yoa paina Cohamacure ņo payoina Estebā pjacu cjirore tāca copapu, duhu sāa, tiro cjirore tuaro tii payoha tiro cjirore tina. ³ Wiho mejeta Saulo sehe Jesu yainare ņabiario yoa timaha. Tiro ti wūhūsepu sāa, mūare, numiare ņaha wahcā, peresupu biha dapoa tiha.

Samariai Jesu yare buheha Felipe

⁴ Ā yoa yooropu waha siteina cjiri nohoi ti waharoi Jesu yare buheha tiha. ⁵ Cūiro tina mehne macariro Felipe cū maca, Samaria wama tiri yahpai jiri macapu su, Cristo masare yūhdoriro ya quitire buheha tí maca macainare. ⁶ To ā buhechu, tó macaina sehe tirore tūho cahmachu, Cohamacu to tuua mehne to yoa ņochu ņaha tina. Ā jia tina jipihtina cūno potori to yahuare noano tūho nūnūa tiha. ⁷ Payu masa watia sāanohrina tiro cahai ti wihichu ņūno, watia sehere tiro wijaa dutia tiha masapu jirinare. To wijaa dutichu, tina watia sehe tuaro sañurucu, wijaa wahaha. Tuhsu payu pjacu buhainare, pari yuri tini-ina cūhure pjacu noaina wahachu yoa tiha.

⁸ To ā yoa ņochu ņua tí maca macaina payu masa wahchea tiha.

⁹ Tí pjare Simo wama tirore tí maca macariro yairo jiha. Ā jiro yaya ti yoarire yoa ņoa tiha Samaria macainare. To ā yoa ņochu ņua, tó macaina ņu cūaa waha, tirore cua pisaro ņūina jiha.

—Yūhu masi pahñoriro jija —nimaha Simo sehe tinare.

¹⁰ To ā yoachū ņua masa sehe ō sehe nia timaha:

—Ahriro Cohamacu ya tuaare cjuariro jira. Cohamacu yoa sehe tuariro jira —nia timaha tirore masa, pūhtoa mehne. Tina jipihtina noano tūho nūnūa tirore.

¹¹ Tiro yaya ti yoa mehne yoari pja yoa ņoa tiha tinare. To ā yoa ņochu ņua tina cūaa wahaha. Ā cūaa waha, tina tirore ņo payoa tiha. ¹² Wiho mejeta ti ā ņo payopachūta Felipe sehe pūhtoro Cohamacu to sūho jiare, Jesucristo yare noaa buheare yahuare. To ā yahuchū tina tirore noano tūhoha. Ti ā noano tūhochū ņūno mūare, numia cūhure bautisaha Felipe. ¹³ Ā jiro Simo cūhu Felipere noano tūhoa tiha. Ā jiro tiro cūhure bautisaha. To ā yoari baharo Felipe mehne tjuaa tiha tiro. Felipe sehe Cohamacu tuua mehne to yoa ņochu ņūno Simo ņu cūaa waha tiha.

¹⁴ Ā yoa Samaria yahpa macaina Cohamacu yare ti tuaro cahmachu tūhoa Jerusalēpu jiina tūhorocaa tiha tinare. Ā ti cahmachu tūhoa Pedrone, João cūhure warocaa tiha Samaria yahparu. ¹⁵ Tōpu sūa

Pedro cūhu Cohamacure siniha: “Ahrina Samaria yahpa macaina mūhure ņo payoinare mū Espiritu Santo sāajaro”, ni sini payoha tina Cohamacure. ¹⁶ Tina Samaria yahpa macaina Jesucristo yaina jia to bautisarina jiha. Tí dihtare masiha tina. Ā jiro Espiritu Santo tinare sāaerasihi. ¹⁷ Ā jia Pedro, João mehne Samaria yahpa macainare ti wamomacarine ti dapupoca bui ti duhu payori baharo Espiritu Santo tinare sāari jire.

¹⁸ Ā yoa Pedro cūhu ti wamomacari mehne ti duhu payochū ņūha Simo. Espiritu Santo tinare to sāachū cūhure ņūha tiro. Ā ņuriro jiro, tí tuare cahmano niñeru mehne wapa duamaha. ¹⁹ Ō sehe nimaha Simo:

—Yūhu cūhure waga ahri tuaare. Yūhu cūhu yu wamomacari mehne masa dapupoca bui duhu payoi tai nija Espiritu Santo tinare to sāahto sehe. Ā jicu ahri yu yoahiti wapare wapa duaja —nimaha Simo tinare.

²⁰ To ā nichū tūhoro Pedro ō sehe niha:

—Mūhu niñeru mehne Cohamacu ya tuaare mū nuchū duari buhiri mū niñeru mehneti pichacapu wahaga mūhu. Cohamacu mū tūhotuare masina. Mūhu ņariro jisina. ²¹ Ā jicu ahrire sā yoare yoa masierara mūhu. Ahri mū yoa baro jierara. ²²⁻²³ Paina ti cjuare ņūca suariro jira mūhu. Ā jicu ņaa yoare ne duhu masierara mūhu. Ā jicu ahrire mū ņaa yoarire cahyaga mūhu. Cohamacure mū ņaa tūhotuare to bohto sehe siniga mūhu. Mū ā yoachū ņūno tiro mū ņaa buhirire boboca, pa tehe nino —ni yahuha Pedro tirore.

²⁴ To ā nichū tūhoro Simo ō sehe ni yūhtihā tirore:

—Yūhure sini payoga mūsa Cohamacure mū niriro sehe yu wahaeraho sehe. Tí buhiri pichacapu waha duaeraja yūhu —niha Simo tirore.

²⁵ Baharo Pedro João mehne Cohamacu yare yahuha: “Jesu to masa mūjachū ņūhi sā”, ni payu Samaria yahpai jia macari macainare noaa buheare buheha. Tinare Cohamacu yare buhe tuhsu, Jerusalēpu tjuaa wahaha.

Felipe Etiopia yahpa macarirore buheha

²⁶ Ā yoa Cohamacu yairo anjo Felipere ō sehe ni yahuha:

—Mipure sur sehēpu wahaga. Jerusalē cahai jiri mahapu Gazapu wahari mahapu, masa marienopu jiri mahapu wahaga —ni yahuha anjo Felipere.

²⁷ To ā nichū tūhoro tiro sehe tí mahapu waha tiha. Baharo tí mahapu cūiro masunore piti bocaro taro niha. To piti bocahtiro jiha Etiopia yahpa macariro

pūhoro. Tiro numiare cahmaerariro eunuco masuno jiha. Ā jiro Candace wama tiricoro Etiopía macaricoro pūhorocono yare niñerure jipihtiare ñu wihboriro jiha. Wiho jiriro jieraha. Tiro Jerusalēpū Cohamacure ño payoro waha tuhsaha. ²⁸ To ya macapū tunuria mehne tjuā taro tiapū wahaparota buhero niha. Cohamacū yare yahu mūhtariro Isaia cjiro to joari pūre buhero niha. ²⁹ Ā jiro Espiritu sehe Felipere ð sehe ni yahua tiha:

—Siro tunuriapū wahariro cahapū waha —niha Espiritu tirore.

³⁰ To ā nichū tūhoro Felipe sehe tunuria cahapū mūroca wahcā, Isaia cjiro to joarire Etiopía macariro to buhechū tūhoha. Ā tūhoro Felipe ð sehe ni sinituha tirore:

—¿Mū buheare tūho ñahajari mūhū? —niha tiro.

³¹ To ā nichū tūhoro Etiopía macariro ð sehe ni yuhtiha:

—Pairo yūhure yahu yūhdoriro mariachū noano masieraja yūhū. Ōi yūhure yahu dujii taga yū pari wahpa —ni yuhtiha tiro Felipere.

—Jai —ni nuju sūha to cahai.

³² Ā yoa Cohamacū yare Etiopía macariro to buheri pū ð sehe niha:

“Ovejare ti ñaha wajāriro seheta tiro cūhure ñaha wajāhca masa.

Ā jiro ovejacā to pjoare ti sachū to sañurucueraro seheta tiro masuno cūhū dihta marieriro jirohca.

³³ Tirore tina bujūpeahca.

Ā jia tiro to ñano yoerapachuta tina sehe ñano yoahca tirore.

Tiro ahri yahpā to jichū tina tirore wajāhca.

Ā jiro tiro pohna marieriro yariaa waharohca”,

ni joaha tí pūpūre.

³⁴ Tí pū to ā ni yahuchū ñano, Etiopía macariro ð sehe ni sinituha:

—Yahuga yūhure. ¿Ō sehe Isaia cjiro to niriro diro baro jicari ahriro? ¿Isaia cjiro to basi yahuro nicari? ¿Ō pairoro yahuro nicari? —ni sinituha Etiopía macariro.

³⁵ To ā ni sinitu ñuchū tūhoro Felipe sehe tí pūre ñū, Jesu yare yahua Etiopía macarirore. ³⁶ Ā yoa tina tia mehne waha, mácapū sūha.

—Ñuga, ði máca jira. Ahri mácapū yūhure bautisaga —niha Etiopía macariro.

³⁷ [—Jesure mū noano wacū tuachū ñūcū mūhure bautisaihtja —niha Felipe tirore.

—Jesure wacū tuaja yūhū. Tiro Cristo Cohamacū macūno jira. Tīre noano masija yūhū —niha Etiopía macariro.]

³⁸ Ā ninota tiro tunuria uturirore yūsuo dutiha. Tia to yūsu caha suri baharo wijaaha

tina. Wijaa, tí mácapū sū, ñumurūcū sūha tina. Tóí ñumurūcū sū, Felipe sehe tirore bautisaha. ³⁹ Bautisa tuhsū tí maja sūrcūcū sūchū Cohamacū to Espiritu Felipere naa waha. To ā wahari baharo Etiopía macariro noano wahcheriro to ya yahpā tjuā waha. To ā yoari bato tichū ne pari turi Felipere ñueraha. ⁴⁰ Ā yoa tuhsū Azotopū sūha Felipe sehe. Tuhsū, payū macarine noaa buheare buheha masare. Pū Cesareapū buhe batoa tiha.

9

Saulo Jesucristore ñūno tirore wacū tua dūcaha

(Hch 22.6-16; 26.12-18)

¹ Wiho mejeta tí pjare Saulo Jesu yainare ā ñū tuhtirucusinino, “Tinare wajāihtja” nino, tiro sacerdotea pūhoro cahapū waha. ² Tórpū sūro tiro joaa pūrine ð sehe ni siniha sacerdotea pūhoro:

—Joaa pūrine waga yūhure yū tuahti pūri cjihtire. Tí pūripū mū wama mū joa payochū, yūhū sehe tí pūri mehne, mū dutiro mehne Damascopū wahahtja. Tórpū sū, judio masa mari buheha wūhūsepū Jesu yaina mūa, numia cūhure boca sūcū, tinare ñaha duhte, ðpū Jerusalēpū na majare tjuāa taihtja —ni siniha Saulo sacerdotea pūhtoare.

³ Tí pūrine na tuhsū, tiro waha, Damasco cahai to sūro cahachū waro mūanopū wacūenoca si siteroca boroha tirore.

⁴ Wacūenoca to ā si siteroca borochuta tiro yahpā bora caha sūro, ð sehe ni durucuchū tūhoha:

—Saulo, Saulo, ¿dohseacū mūhū yūhure ñano yoajari? Mūhū yūhū mehne suacu yūhure yūhtieracū, mū basita ñano yūhdūra —nino coa taha.

⁵ —Pūhoro, ¿diro baro jijari mūhū? —ni sinitu ñūha Saulo sehe.

—Yūhuta jija Jesu, mū ñano yoarucuriro —niha Jesu Saulore. ⁶ [To ā nichū ð sehe ni sinituha Saulo:

—Pūhoro, ¿dohse yū yoachū cahmajari mūhū? —niha Saulo.]

—Wahcārcaga mūhū. Macapū wahaga. Tí macapū mū sūchū tó macariro mū yoahtere yahurohca mūhure —niha Jesu Saulore.

⁷ To ā nichū Saulo mehne macaina sehe to durucua dihtare tūhoha. Wiho mejeta Jesu sehere ñueraha. To ā wahachū ñūa, cuia, tina durucu masieraha. ⁸ Ā jiro Saulo yahpā coāriro wahcārcūca, to ñūchū to capari bajueraha. Ā jia tina to wamomacare ñaha, Damascopū tuā wahcāa waha tirore. ⁹ Tórpū sūro, tiro tia dacho waro ne ñuera, chuera, ne sihniera tiha.

¹⁰ Ā yoa cūiro Jesu to buheriro Anania wama tiriro Damascói jiha. Ā jiro Jesu

bajua tiha Ananiare. Ā bajuaro ō sehe ni pisuha tirore:

—Anania, ėjimajari mūhū? —niha Jesu.

—Jimajā —ni yuhtiha Anania tirore.

¹¹ To ā nichū Jesu sehe ō sehe ni yahuha tirore:

—Potori Maha wama tiri mahapū wahaga. Ā wahacu Juda ya wūhūpū cāiro Tarso macariro Saulo wama tirirore macaga. Tiro Cohamacure sinino nica. ¹² Tiro cahānopure tirore mū yoahūre űo tuhsūhi yūhū. Ō sehe jiare űūhure tiro: Mūhū mū wamomacarine tiro bui duhu payo, to capari noaa wahachu űūhure tiro to cahānopure —niha Jesu Ananiare.

¹³ To ā nichū tuhoro Anania sehe ō sehe ni yuhtiha:

—Pūhtoro, tiro mū yainare, noinare Jerusalē macainare nu űāno yoa mūjayuhti. Payū masa yūhure ā ni yahure. ¹⁴ Ā yoa ō cāhure tiro jipihtina mūhure cahmainare peresu yoaro taro niyuhti. Sacerdotea pūhtoa tirore ā yoa dutiyuhti —ni yuhtiha Anania Jesure.

¹⁵ To ā nichū Jesu sehe ō sehe ni yahuha tirore:

—Tiro Saulo sehe yū beseriro jira. Tiro yū ya buheare judio masa jierainare, ti pūhtoare, ā jichū Israe masa cāhure buherohca. Ā jicū wahaga mūhū. ¹⁶ Payū tahari yū yare yoaro tiro űāno yūhdūrohca. Tiro tirore masichū yoaihtja —niha Jesu Ananiare.

¹⁷ To ā niri baharo Anania sehe waha, sū, Saulo to jiri wūhūpū sāaha. Sāa sū, to wamomacarine Saulo bui duhu payo, ō sehe ni yahuha tirore:

—Coyeiro Saulo, mū capari mū űūhto sehe, Espiritu Santo mūhū mehne to jihto sehe, to dutiriro seheta mū yoahūto sehe, mari pūhtoro Jesu sehe mahapū mūhure bajuariro yūhure warocahre —ni yahuha Anania Saulore.

¹⁸ To ā nichūta to caparire wahi nūteri yoaro sehe bajua to caparipū wahāa pahna borachū űūha Saulo. To ā űū tuhsūri baharo to wahcārcū sūchū paio sehe tirore bautisaha. ¹⁹ Tirore to bautisa tuhsūchū, tiro sehe chū, tuariro wahaha.

Saulo Damascoi Jesu yare buhe dūcaha

Ā yoa Saulo mahaa dachoricā Damasco macaina Jesu yaina mehne jiha.

²⁰ Dōi ti dachorita tiro judio masa buheah wūhūserū sū, Jesu Cohamacū macino to jiare yahu dūcaha masare. ²¹ To ā yahuchū űūha jipihtina tirore tuhoina cūaa wahaha.

—Cho, ahriro Jerusalēpūre Cohamacū yainare Jesure cahmainare űāno yoariro cjiro jira. Ā yoa tirota jimana ō macaina Jesure cahmaina cāhure űāha, duhte, sacerdotea pūhtoare wiaboriro. Ā yoa

duaro ōpūre tari jimahre tiro —niha masa tirore tuhoina.

²² Wiho mejeta Saulo sehe cui tuhoturo marieno buhe mihni wahcāa tiha. “Ahriro Jesu potocāta Cristo, marine yūhdohtiro jira”, to ni yahu mihnichū, tō macaina judio masa ti ni yuhti yūhdūrcaborirore bocaeraha.

²³ Ā jia payū dachori baharo judio masa tirore wajā duaa, ti basi durucua tiha.

²⁴ Wiho mejeta Saulo tirore ti wajā duachū masiha to basi. Tina tí macare sahrīno tāa mehne ti yoari sahrīno macaa sopocarire dachopūre űāmirū cūhure cohāta tiha tirore wajā duaa. ²⁵ Ti ā wajā duachū űūha űāmirū Saulo buheina tirore pūhuro pjiri pūhi na sāa, ti maca macari sahrīno baharo būhūsehei duhu boroha tirore. Tō sehe ti yoachū yūhdūha tiro.

Saulo Jerusalēi jiha

²⁶ Ā yoa Saulo Jerusalēpū sūro, tōpū Jesu yaina mehne tiro ji duamaha. Wiho mejeta tina tirore “Jesu buheriro jierara ahriro” nia, tirore cui niha. ²⁷ Ti ā cuipachūta Bernabé sehe tirore na wahcāha Jesu to cūrina cahapū. Ā jiro Saulo mahai Jesure to űūrire, Jesu Saulore to durucurire, ā jichū Damascopū cuiro marieno Jesu yare to buhe dūcarire yahuha Bernabé sehe. ²⁸ To ā ni yahuri baharo Saulo sehe tina mehne sāano, Jerusalēpū tina mehne jia tiha. ²⁹ Tiro cuiro marieno judio masare Jesu yare yahu yūhdūrcaro niha. Tina judio masa griego masa yare durucuina jiha. Ā yoa Saulo to ā yahu yūhdūrcachū, tina tirore wajā duamaha. ³⁰ Ti ā wajā duachū űūha, Saulo mehne macaina Jesu yaina sehe tirore Cesareapū na duhti wahcāa wahaha. Tōpū tirore sūho jirucuma Tarsopū warocaha tirore.

³¹ Ā yoa jipihtipū, Judea yahapū, Galilea yahapū, Samaria yahapū cāhure Cohamacū yaina noano jia tiha. Ti pjare ne masa űāno yoera tiha tinare. Ā jia noano buheha tina. Tina Cohamacū yare buhe, tirore masi namo, noano yūhtia tiha. Ā yoa Cohamacūre cua pisaro űūha tiha. Espiritu Santo tinare to yoadohochū tina sehe payū wahaa tiha.

Pedro Eneare noariro wahachū yoaha

³² Ā yoa Pedro jipihtia macaripū waharo, Jesu yaina Lida macaina cahapū cāhure sūha tiro. ³³ Tōpū sūro Enea wama tirirore boca sūha. Enea pjacu būhariro jiro, ocho cūhmari waro ti pūpaha cūriro coāa tiha. ³⁴ Ā jiro Pedro sehe tirore ō sehe niha:

—Enea, Jesucristo mūhure noariro wahachū yoara. Wahcārcāga. Mū pūpaha coāri cahsarore cahnoga —niha Pedro tirore.

To ā nichata tiro wahcārūcaha. ³⁵ Ā jia jipihntina Lida macaina, Sarón macaina tirore ñua, tina tí ñaa yoare duhu, Jesure wacū tuaa tiha.

Dorca wama tiricorore masoha Pedro Jesu to tuaa mehne

³⁶ Ā yoa Jope wama tiri macai Jesure ño payoricoro Tabita wama tiricoro jiha. To wama Tabita griego ya dūsero mehne Dorca jira. Ticoro noare yoaro payu waa tiha pjacūoinare. ³⁷ Ā jiro tí pjare ticoro dohati wahcō, yariaa wahaa tiha. To yariachū ñua, tina ticorore noano cosa, mūano macari tahtiapu cūa tiha ticorore. ³⁸ Lida wama tiri maca Jope cahai jire. To ā jichū Jesu buheina Jope macaina Pedro Lidapu to jichū tūhorocaa tiha. Ā tūhorocaa, pūaro warocāha Pedro cahapu. Tiro cahapu sūa Pedrorre ō sehe ni yahuha tina:

—Soaro mehne sā jiropu wahaga —ni yahuha tina.

³⁹ Tí ā nichū tūhoro tina mehne wahaa wahaha tiro. Tópu tirore tí na sūri baharo mūano macari tahtiapu na mūjaa wahaha tirore. Ā jia jipihntina wapewahya tiro cahai sūrcūa, tiia tiha. Tabita tina mehne jisninorpu payu suhtire yoaa tiha. Ā jia tina to yoari suhtí cjirire ñoha Pedrorre. ⁴⁰ Wiho mejeta Pedro tinare tí tahtiapu jūinare wijaa dutilha. Tí wijaaari baharo tiro na tuhcuca caha sū, Cohamacūre ticorore sini payoha. Ā jiro to pjacu cjirire majare ñu:

—Tabita wahcāga —niha tiro.

To ā nichata ticoro sehe ñu wahcō, Pedrorre ñu, wahcā nuju sūha. ⁴¹ To wahcā nuju sūchū ñu, tiro to wamomacare ñaha, tuā wahcō dapoha ticorore. Ā jiro tiro to tó macainare Jesu yainare, wapewahyare pijroca, ticorore catiricorore wiaha tinare. ⁴² To ā yoari baharo jipihntina Jope macaina tūre masia, payu masa Jesure wacū tua dūcaa tiha. ⁴³ Baharo Jopepu Simo wahiquina cahsarire cahnoriro mehne payu dachori Pedro tiro mehne jia tiha.

10

Pedro Cornelio Jesu yare yahu dūcaha

¹ Tí pjare Cesareapu cūiro Cornelio wama tirore jiha. Tiro cien surara puhtoro jiha. Tina surara sehe tí ya curua Italiano wama tiha. ² Cornelio to ya wūhū macaina mehne judio masa jieraina jipahta, Cohamacūre ño payoina, cua pisaro ñūina jiha. Tiro judio masa pjacūoinare yoadohoro payu waha. Ā yoa dachoripe tiro Cohamacūre siniha. ³ Cū ñamū ñamichahapu tres jichū Cohamacū yairo anjo tirore bajuaha. Ā bajuaro Cornelio cahapu sāaha.

—Cornelio —niha anjo tirore.

⁴ To ā nichū tūhoro Cornelio tirore ñu, cuiro ō sehe niha:

—Puhtoro, ¿yabare cahmajari mūhu? —niha tiro.

—Masa pjacūoinare mū warire, Cohamacūre mū sinirire Cohamacū noano ñu no nina. ⁵ Ā jicu Jopepu mū mūare warocaga. Tópu Simo Pedro wama tirore jira. Tirore na ta dutiga mū mūare. ⁶ Tiro paio Simo wahiquina cahsari cahnoriro cahai, pjiri ma dūhtū cahai jiri wūhūi jira —niha anjo Cornelio.

⁷ Anjo ā ni tuhsū, wijaa wahaha. To wijaaari baharo Cornelio pūaro tirore dahra cohtainare, ā yoa cūiro to surara mehne macariorre pijrocaha. Surara sehe Cohamacūre ño payoriro jiro, dachoripe Cornelio yoadohoa tiha. ⁸ Ā jiro Cornelio tinare anjo to yahuri cjirire yahu pahūo, Jopepu warocaha tinare.

⁹ Ā yoa pa dachoi Jopepu tí waharo watoí cohari pja jichū Pedro sehe wūhū buirpu Cohamacūre sinino wahaha. ¹⁰ To mūja sūri baharocā tirore jūca purīchū chū duaha. Wiho mejeta paina to chūare tí dahrero watoi, tiro sehe ō sehe bajuachū ñua. ¹¹ Muanore parí mūachū, pjiri cahsaro pititia sohtoarire dūhteri cahsaro to duji tachū ñūha. ¹² Tí cahsaro puhichapūre payu wahiquina būa tiniina, chihchōina, wūina perí cāhū jiha. ¹³ Tūre to ñūri baharo, Pedro durucuro coa tachū tūhoha:

—Pedro, wahcārūcaga. Ahrinare wajā chūga —nino coa taha tirore.

¹⁴ To ā nipachata Pedro ō sehe niha:

—Puhtoro, ne tina barore chūeraja yūhū. Ñainare, Cohamacū to chū dutierainare ne chūera tihí yūhū —niha Pedro.

¹⁵ To ā niri baharo Pedro pari turi durucuro coa tachū tūhoha:

—Cohamacū “Noaina jira”, to nirinare “Ñaina jira”, nii tjia mūhū tinare —nino coa taha Pedrorre.

¹⁶ Ā yoa tia taha tí ā ni durucuri baharo tí cahsaro mūanorpu mūjaa wahaha tjoa. ¹⁷ To ā mūjaa wahari baharo, Pedro tuaro wacū “¿Dohse ni duaro nijari ā bajuaro?” ni tūhotuha tiro to basi. To ā ni tūhoturo watoi Cornelio mūa to warocaina sehe Simo ya wūhūpu sūha. “¿Simo ya wūhū nohorpu jijari?” ni, tí sinituri baharo to ya wūhūpu sūha tina. ¹⁸ Sū, tina sinitu ñū bahrañoha. “¿Simo Pedro wama tirore ahri wūhūi jijari?” ni sinitu ñūha tina. ¹⁹ Ā jiro Pedro to tūhoturo watoi Espiritu Santo tirore ō sehe ní yahuha:

—Ñuga. Tiaro mūa mūhūre macaa nina. ²⁰ Wahcārūcaga. Dujiaga. Tina mehne wahaga. Jiape ní tūhotuecūta wahaga noano mehne. Yūhū sehe tinare ōpūre warocahi —niha Espiritu Santo Pedrorre.

²¹ To ā nichu tuhoro Pedro ti cahapu dujia wahaha.

—Nuga. Ōi jija yahu musa maca tariro. ¿Dohse yoana tana niri musa yu cahai? —niha Pedro tinare.

²² To ā nichuta tina sehe ō sehe niha:

—Cornelio cien surara puhtoro, noare yoariro, Cohamacuere cua pisaro nuriro, jipihtina judio masa “Noariro”, ti niriro mūhare pji ta dutiro warocahre sare. Cohamacu yairo anjo Cornelio mūhare pji dutiyuhti. Ō sehe niyuhti: “Pedrore mu wuhapu na ta dutiga mu mūare. Ā yoa tiro mūhare to yahuchu, noano tuhoga tirore”, ni pji dutiyuhti anjo Cornelio —ni yahuha Cornelio Pedrore to pji dutirina sehe.

²³ Ti ā nichu Pedro sehe tinare sā ta duti, chuwa wa, to jiri wuhapu carī dutiha tinare. Pa dachoi Pedro wahcā, tina mehne wahaa wahaha. Ā yoa paina Cristo yaina Jope macaina Pedrore piti ti wahcāha.

²⁴ Pa dachoi tina Cesareapu suha. Ti suhto panocā Cornelio sehe to coyecare, tiro mehne macaina cāhure pji cahmachu, Pedrore cohtaa niha. ²⁵ Ā jiro Pedro Cornelio ya wuhu cahapu to tachu nuno Cornelio sehe tirore piti boca wijaa, to dahpori cahai caha suha. ²⁶ Wiho mejeta Pedro tirore na wahcō ō sehe niha:

—Ducuga mahu. Yuhu cāhu mu yoaro seheta jiriro jija —niha Pedro tirore.

²⁷ To ā ni tuhsari baharo Cornelio tirore na sāa wahaha to ya wuhapu. Tōpu sāa suro masa peri ti wuhapu cahmachu tirore cohtainare nūha Pedro. ²⁸ Tinare nuno ō sehe ni yahuha tinare:

—Judio masano jipaihta pa curua macaina musa mehne jicu, musa wuhusepu sāacu, judio masa sā dutiare yuhdarucai nija yuhu. Tīre noano masina musa. Wiho mejeta pa curua macainare “Naina jira”, yuhare ni dutierare Cohamacu. Tīre ni yahuhre yuhare tiro. ²⁹ To ā nichu tuhocu ōpūre musa cahapūre tahī. Musa yuhare pjirocachu “Ne waharaja”, nierahi. ¿Dohse jiro baro yu ōpu tachu cahmari musa? —niha Pedro tinare.

³⁰ To ā nichu tuhoro Cornelio sehe ō sehe niha:

—Pititia dachori wahara, Cohamacu yairo anjo yuhare to bajuari baharo. Tī dachore tres jichu, ahri hora waroihta Cohamacuere yu sinino watoi anjo minoa suhti tiriro yu cahai ducuhre. ³¹ Ā ducuro tiro yuhare ō sehe nihre: “Cornelio, mūhu Cohamacuere mu sinichu tiro tuhohre. Ā yoa pjacoinare ti cahmaare mu wachu noano masino, Cohamacu mūhare yoadohorohca. ³² Ā jicu Joperu mu mūare warocaga, Simore, Pedro wama tirirore mu cahapu ti na tahto sehe. Tiro paio Simo wahiquina cahsari

cahnoriro ya wuhai, pjiri ma duhtu cahai jiri wuhai jira tiro. Mu cahapu wihiro mūhare yahurohca”, ni yahuhre yuhare tiro. ³³ To ā nichu tuhocu dōicāta yu mūare mūhare na ta duticu warocahi yuhu. Ā jicu noano yocu tari jira mūhu sā cahapūre. Ā jina sā jipihtina ōre Cohamacu to nurocaroi jina nija sā. Jipihtiare Cohamacu mūhare to yahu dutirore tuho duana, cohtahi sā —niha Cornelio Pedrore.

Pedro Jesu yare yahuha

³⁴ To ā nichu tuhoro, Pedro ō sehe ni yahuha:

—Mipu masija. Potocā tjira. Cohamacu cāno potori noano yoara marine. ³⁵ Ā jiro jipihtia macari macaina Cohamacuere cua pisaro ti nūchu, noare ti yochu Cohamacu sehe tinare nū wahchera. ³⁶ Cohamacu sā judio masa cahai Jesucristore noaa buheare yahuhtiore warocare. Masa Cohamacu mehne noano jī masica Jesu to yaria masa mūjano mehne. Tī buheare musa masina. Jesucristo sehe jipihtina masa puhtoro jira. ³⁷ João bautisariro masare, “Musa nāa yoari buhiri tiare masiga”, ni yahu, to bautisari baharo, Galileapu noaa buheare Jesu sehe yahu dūcare. Baharo Judea yahapu cāhure tī buheare yahu pahūre. ³⁸ Ahriro Jesu Nazare macarirore Cohamacu sehe to tuaare Espiritu Santo mehne to yoa masihtire ware Jesure. Ā jiro Jesu noano yoaro wahare. Ā waharo wafā sāanohrinare, nūno yuhdūinare jipihtinare noaina wahachu yoare. Cohamacu Jesu mehne jiri jire. ³⁹ Judea yahpai, Jerusalē cāhure jipihtia to yoarire sā nūhi. Baharo tina crusapu cā puha wajāhre tirore. ⁴⁰ Wiho mejeta tia dacho wahaboroi Cohamacu tirore masori jire. Maso, Jesure sare bajuachu yoari jire Cohamacu. ⁴¹ Tī pjare Jesure jipihtina nūerare. Sā dihtare bajuahre tiro. Cohamacu to cahmainare, Jesure nū, painapūre yahuhtinare panopu sare beseha. Sā sehe Jesu to masari baharo tiro mehne chu, sihnihi. ⁴² Ā jiro tiro sare ō sehe ni dutihre. “Masare ō sehe ni yahuga. Yuhu Jesu jipihtina catiinare, yariaina cjiri cāhure ti nāa yoari buhiri tiare yahuhtiro buhiri dahrehtiro yu jichu yoare yuhare Cohamacu. Ā jina tīre masare yahuga”, ni dutihre Jesu sare. ⁴³ Dohse jiina baro Jesure ti wacū tuachu nūno Cohamacu ti nāa yoari buhiri tiare borohca. Tīre jipihtina Cohamacu yare yahu mūhtaina cjiri panopu macaina yahuyuha —ni yahuha Pedro.

Judio masa jierainapu cāhure Espiritu Santo sāaru chu sua wahaha

⁴⁴ Tī jipihtiare to ā ni yahuro watoi, jipihtina tīre tuhoinapūre Espiritu Santo sāaru chu sua wahaha. ⁴⁵⁻⁴⁶ Tinapūre to

sāarucu sūa wahachu, tuho mahnoeraa dūseri mehne wahchea mehne durucu dūcaha tina. Tí dūseri mehne Cohamacūre “Tuariro, noariro jira mūhu”, nia niha. Ti ā nichu tuhoha Pedro mehne tarina judio masa, Jesu yaina. Ā tuhoa Espiritu Santo judio masa jierainapu cūhure to sāarucu sūa yoadohochu űna, judio masa sehe cūaa wahaha. Ā jiro Pedro ō sehe ni yahuha judio masare:

⁴⁷ —Mari yoaro seheta Espiritu Santore cūara ahrina cūhu. Ā jina tina bautisa duaa ti sinichu, tinare, dūcataena tjiijhna —niha Pedro tinare.

⁴⁸ Ā ni tuhsu judio masa jierainare Jesu yaina ti jiare űohto sehe bautisa dutiha Pedro. Ti ā yoari baharo “Sā mehne mahaa dachoricā tjuasiniga”, niha tina Pedro cūhure.

11

Pedro Jerusalē macainare Jesu yainare yahuha

¹ Ā yoa judio masa jieraina cūhu Cohamacu yare ti noano cahmachu Jesu to cūrina sehe ti coyea Judeapu jiina mehne tuhorocaha. ² Ā jia Pedro Jerusalēpu to tju sūchu űna judio masa Jesu yaina mahainacā tirore ō sehe ni tuhtiha:

³ —Ĵudio masa jierainare dohse jiro baro űni sūri mūhu? ĴDohse jiro baro tina mehne chūri mūhu? —ni tuhtiha Pedore tina.

⁴ Ti ā nichu tuhoro Pedro to yoari cjirire yahu pahūoha tinare. Ō sehe ni yahuha:

⁵ —Yūhu Jopepu jicu Cohamacure sinii nihi. Ā jiro yūhure ō sehe bajuahre. Pjiri cahsaro pititia sohtoarire dūhteri cahsaro mūanopu yū cahai to duji tachū űūhi. ⁶ Ā jicu tí cahsarore noano űūhi “ĴYaba baro tí cahsaropure jijari?” nicu. Ā jicu űūhi tí cahsaropure jijnare: Tí cahsaro puhichapure payu wahiūina, bua tiniina, chihchōina, wūina peri cūhu jire. ⁷ Ā jicu yūhure to durucuchū tuhohi. “Pedro, wahcārucaga. Wajā chūga ahrinare”, nino coa tahre yūhure. ⁸ To ā nichu tuhocu ō sehe nihi yūhu: “Puhtoro, ne tina barore chūeraja yūhu. űainare, Cohamacu to chu dutierainare ne chūera tihī yūhu”, nihi yūhu. ⁹ Wiho mejeta mūanopu pari turi yūhure durucuro coa tahre tjoa. “Cohamacu ‘Noaina jira’ to niinare, ‘űaina jira’, nii tjia mūhu”, nino coa tahre yūhure.

¹⁰ Ā jiro tia taha sā ā ni durucuri baharo tí cahsaro mūanopu mūjahre tjoa. ¹¹ Yū ā űūno watoī tiaro mūa sā jiri wūhūru sūri jihre. Tina Cesarea macariro to warocarina jiri jihre. ¹² Ā jiro Espiritu Santo sehe yūhure tina mehne waha dutiro, “ ‘Tina űaina jira’, nii tjia tinare”, ni yūhure yūhure tiro. Ā jia ahrina seis mehne yū coyea Jesu yaina

mehne Cesarea macariro ya wūhūru sāahi sā. ¹³ Ā jiro tiro sāre ō sehe ni yūhure: “Anjo yū wūhūi ducuchū űūhi yūhu. Ō sehe ni yūhure yūhure: ‘Jopepu Simore Pedro wama tirirore na ta dutiga. ¹⁴ Tiro mūhure mū coyea mehne mū sare jipihtinare pichacapu wahaborina mūsa yūhūhtore yahurohca’, nihi anjo yūhure”, ni yūhure Cesarea macariro yūhure. ¹⁵ Ā yoa yū durucuro watoī Espiritu Santo sehe tinapure sāarucu suahre, marine to yoa mūhtariro seheta. ¹⁶ Ā jicu Jesu to yahurire wacūhi yūhu. Ō sehe ni yūhure tiro: “Joāo mū sare bautisaro, copu yoamahre. Yūhu sehe tí yūhdoro yoaihtja mū sare. Baharo Espiritu Santore mūsa mehne jirucuchū yoaihtja mū sare”, ni yahuha. ¹⁷ Ā jiro Jesucristo mari puhtoro mari wacū tuachū űūno Cohamacu to Espiritu Santore wahre marine. Ā jiro Cohamacu marine to Espiritu Santore to wariro seheta judio masa jieraina cūhure tiro wahre. Cohamacu to ā yoachū űūcu tirore yūhdūrucā masieraja yūhu —niha Pedro tinare, judio masare Jesu yainare.

¹⁸ To ā nichu tuhoha, tina tirore ne ni namoeraha. Ā ni namoeraa, Cohamacure wahche payo, tina ō sehe niha:

—Tí pja pini judio masa jieraina cūhure Cohamacu cahiri jira. Ti űaa yoari buhiri tiare masi, Cohamacure cahma, tina cūhu Cohamacu mehne ā catirucuahca —niha tina.

Antioquiā paina Jesu yaina jiha

¹⁹ Ā yoa Estebāre ti wajāri baharo masa Jesu yainare űano yoaha. Ti ā yoachū űna Jesu yaina duhti sitea wahaha. Ā jia tina Feniciapu, Chiprepu, Antioquiapu cūhure waha site, tōpūre judio masa dihtare Cohamacu yare yahua timaha tina. ²⁰ Wiho mejeta paina Jesu yaina mehne macaina Chipre macaina, Cirene macaina, Antioquiapu sū, judio masa jierainare Jesu yare buheha Cohamacu tinare to yūhdohito sehe. ²¹ Ti ā buhechū, Cohamacu tinare yoadohoha. Ā jia masa payu Cohamacure cahma dūca, mari puhtoro Jesure wacū tuaha.

²² Ā yoa “Antioquiā macainapu Jesure cahmaca”, ni tuhorocaha Jerusalē macaina Jesu yaina. Ti ā tuhorocari baharo Jerusalē macaina Bernabé wama tirirore Antioquiapu warocaha. ²³ Tōpu sūro, Cohamacu yoadohoa mehne judio masa jieraina to yaina ti wahachū űūno, tuaro wahcheha. Tuaro wahche, tiro tó macainare ō sehe ni yahuha:

—Jesure ā wacū tuarucuga. To yare ne duhuena tjiga —ni yahuha tiro jipihtina tinare.

²⁴ Bernabé noariro jiro, Espiritu Santo dutiare yoariro Jesure noano wacū tuaha tiro.

Ā jia to buheri baharo Jesure wacū tuaina payu waha namoha tjoa.

²⁵ Baharo tiro Tarso wama tiri macapu Saulore macano wahaha. ²⁶ Tõpu tirore boca suha. To boca suri baharo Antioquiapu na majare tjuaaha Saulore. Tõpu ti suri baharo cū cahma waro tina Cohamacu yaina mehne cahmachu, payu masare buheha tina. Ā jia Antioquiapu Cristo yaina Cristianio wama ti ducaha.

²⁷ Tí pjare Cohamacu yare yahu mahtaina Jerusalõpu jiina cjiri waha, Antioquiapu suha. ²⁸ Ā ti suri baharo tina mehne macariro Agabo wama tiro Jesu yaina watõi ducuro, Espiritu Santo to tuaa mehne yahuha tinare. “Jipihtiro yahpapure tuaro jucarõ waharõha”, ni yahuyuha tiro. Tí pjare chua marieni pja jichu jipihtina bui puhtoro Claudio jiha. ²⁹ Ā jia Cristo buheina, jipihtina ti cjaro puro ti coyeare wa dua ti basi cahma durucuha. “Judea yahpa macaina Jesu yainare niñerure warocajihna”, niha tina ti basi. ³⁰ Tí Ā niri baharo Bernabé Saulo mehne tí niñerure na wahcãbasaha. Tõpu sua Judea yahpa macainare Jesu yaina puhtoare waha tí niñerure pja cuoinare tju wa dutia.

12

Pedrore peresu yoaha

¹ Tí pjare puhtoro Herode cãinare Jesu yainare ñano yoa ducaha. ² Tiro João wahminore Santiago sehere yoari pjí mehne to wajã dutichu pairo sehe tirore wajãha. ³ Santiagore to wajãchu judio masa wahcheha. Ti wahcheare Herode masino, “Ā dihta cahmana tina”, nino Pedro cãhare peresu yoaha. Tí dachõrõre bucuaerari pãore ti chuhti bõse namari pascua jiha.

⁴ Ā jiro Herode Pedrore ñaha, peresu yoaha. Peresu yoa diez y seis surarare cohta dutiha tirore. Pititiaro surara cohtaha tirore. Baharo pititiaro ti cohtotaina tirore cohta mujaa tiha. Āta yoaha tina diez y seis surara. Herode sehe pascua baharo Pedrore peresupu jirirore masa panoi duhu dapo duamaha tirore wajã dutiro taro. ⁵ Ā jiro Pedro peresupu jiha. Tõpu to jichu Jesu yaina sehe Cohamacure tuaro sini payorucu niha tirore.

Cohamacu peresupu jirirore Pedrore wioha

⁶ Ā yoa ñamine Pedro puaro surara mehne comaa dari mehne ti duhteriro jiha. Ā ti duhteriro jiro, ti watõi carino niha. Ā yoa paina surara sopacai cohtarucua niha tirore. Tí ñami bohrearo Herode Pedrore judio masa panoi duhu dapo duamaha tirore wajã dutiro taro. ⁷ Wacũenoca Cohamacu yairo anjo Pedro cahai to ducuchũ to peresu

jiri tahtia buhria pihitia wahaha. Ā jiro anjo Pedro cahai ducuro Pedro patipahmai be careha, tirore wahcõno.

—Cjero wahcãrucaga —niha tiro Pedrore.

To Ā nichuta to wamomacarine ti duhteã dari comaa dari parĩ site boraa wahaha. ⁸ Ā yoa anjo tirore õ sehe ni yahuha:

—Tuã dihoga mu tuã dihori dare. Mu dahpo suhti cãhare sãaga —niha tiro.

To Ā nichu Pedro sehe to niriro seheta yoaha.

—Mu bui macari suhtirore sãa, yuhu mehne wahaga —niha anjo.

⁹ To Ā nichu tí tahtiapu jiriro wijaa, anjo baharo waha wahaha tiro. Ā wahaparota õ sehe ni tuhotumaha tiro. “¿Ahri potocã jieracari? ¿Cahãi nicari yuhu?” ni tuhotumaha tiro. ¹⁰ Ā yoa tina to jiri tahtia sopacai ducuaina surarare yuhdu wahcã, paina yoawacũno ducuaina cãhare yuhdu wahcã, pjiri sopacapu suha. Tí sopa pahma, comaa pahma macapu wahari mahare ducatarari pahma jiha. Tí sopa pahma to mu sũro parĩchu tina wijaa wahaha. Wijaa waha, tina mahapu mahano wahachuta, anjo sehe buti mua wahaha. Ā jiro Pedro cãirota tjuaaha. ¹¹ Ā tirore anjo to wahari baharo to yoarire Pedro masiha. Ō sehe ni tuhotuha tiro. “Potocã tjira. Anjo Cohamacu to warocariro peresupu jirirore yuhure wioro wihihre. Mipu tũre masija to Ā yoarire. Judio masa sehe yuhure ti ñano yoaborire Cohamacu sehe tinare yoa dutierare. Ā jiro yuhure, Herode to peresu yoarirore wiohre”, ni tuhotuha Pedro.

¹² To Ā ni tuhoturi baharo María João pocoro ya wuhũpu suha Pedro. João sehe pa wama Marco wama tira. Tí wuhũpu masa payu cahmachu, Cohamacure sinia niha. ¹³ Tí wuhũpu sũro, Pedro sopa pahmare dotaha. Cãcoro ti cahamacono Rode wama tiricoro to dotachu tuhoro, ñano suha ticoro. ¹⁴ Ā yoaro Pedro ticorore to pisuchũ tuhoro to durucuaire tuho masi, tuaro wahche, sopa pahmare pjõoboricoro pjõoeraha. Pedro tõi to ducuchuta ticoro majarerũca mũroca sãa wahaha painare yahuro waharo.

—Pedro sopacapu wihihre —ni yahuro sãaha.

¹⁵ To Ā nichu tuhoa, tí wuhũni jiina sehe:

—Ā ninocaco nica mũhu —niha tina ticorore.

—Potocã tjira. Potocã nicota nija —niha ticoro.

To Ā nichu tuhoa:

—Tiro jieraca. To yairo anjo wihiro nica —nimaha tina sehe.

¹⁶ Tí Ā nino watõi Pedro sopa pahmare ãta dotarucuro niha. To Ā yoachũ tuhoa, tina sopacare pjõo, tirore ñu, cãaa wahaha. ¹⁷ Ā jiro tiro Pedro to wamomaca mehne “Dihta

mariaha” ni, Cohamacu peresupu tirore to wiorire yahuha tinare:

—Ahrire yahuga musa puhtoro Santiagore, paina Jesu yaina cahure —niha tiro.

Å ni yahu tuhsu tiro pa sehepu yahdu wahcãa wahaha.

¹⁸ Å yoa bohrea bora tachu surara Pedro to dohse yoa wijaarire ne masieraha. Å masieraa cuua wahaha. ¹⁹ Å jiro Herode Pedrora maca dutimaha. Å dutiro tiro surarare peresu cohtainare to sinituro baharo tinare wajã dutiha Herode sehe. Å jiro Herode Judeapu jiriho waha, Cesareapu jiro wahaha.

Herode yariaa wahaha

²⁰ Å yoa Tiro wama tiri maca macaina mehne, Sidõ macaina mehne Herode sehe suaha. To å suachu ñua ti macari macaina sehe Herode tina mehne to suarire cahnoa waha, tiro mehne durucua wahaha. Å jia to docai jiriho puhtorore Blasto wama tiriore piti tiha. Å jia tina Blasto to yoadohoro mehne Herode cahapu suha. Tiro cahapu sua, õ sehe niha:

—Mari noano jijihna. Mari basi ñu tuhtiena tijjihna —ni siniha tina Herodere.

Tina ya yahpa macaina Herode ya yahpai chãare boca tiha. Å jia Herode tinare ñu tuhtichu cahmaeraha tina. ²¹ Å yoa Herode to quihõri dachoi, puhtoro to sãa suhti noaa suhtire sãa tiha tiro. Å sãano tiro to dujiroi dujitjiãhno, masare durucu ñoa tiha. ²² To å durucu ñochu tuhoa masa sehe õ sehe ni sañurucuha:

—Ahriro durucuriro masuno jierara. Cohamacu jira —ni sañurucu payomaha tina Herodere.

²³ Ti å nichuta Cohamacu yairo anjo Herodere dohatichu yoaha. Cohamacure ño payoeraro, “Cohamacu jieraja yuhu”, ne nieraha Herode. To å nierari buhiri anjo tirore dohatichu yoaha. To å dohatichu tirore dachoa chu wajãnocaha.

²⁴ Å yoa Jesu yaina payu masare Jesu ya buheare buhea tiha.

²⁵ Å jia Bernabé, Saulo mehne buhe tuhsu, Jerusalëpu tjuaa wahaha. Å jia João Marco wama tiriore tina na wahcãa tina mehne.

13

Jesu yaina Bernabé Saulo cahure Cohamacu yare buhe dutia warocaha

¹ Ti pjare Antioquiapu Cohamacu yaina mehne macaina Cohamacu durucuaare yahu turiaina jiha. Å yoa Cohamacu to joa na dutiri cjirire, Jesu yaina ti yoaa tiare yahuina cãhu jiha. Bernabé, Simo Negro wama tiriro, Lucio Cirene macariro, Menahem, Saulo mehne tina jiha. Menahem sehe puhtoro Herode cjiro

mehne tina puaro cãno potori bucaina jimaha. ² Cũ namu tina Jesu yaina chu duhu, Cohamacu yare ti buhero watoi Espiritu Santo õ sehe ni yahuha tinare:

—Bernabé, Saulo mehne cãga yu cahmano sehe yoahinare. Tiro yoahinare bese cũ nija tinare —niha Espiritu Santo.

³ To å nichu tina sehe chu duhu namo, Cohamacure sini, Bernabé dapu bui Saulo dapu bui ti wamomacarine duhu payoha. Å duhu payoa tinare buhe dutia warocaha.

Chiprepu Jesu to cãrina buheha

⁴ Å jia tina Espiritu Santo to warocaina jia, Seleuciapu su, ti macare dohoriapu samu, Chipre wama tiri nucoru pahãha tina.

⁵ Å pahãa, Salamina wama tiri pitamahapu wahã suha. Ti macai judio masa buhea wãhusepu, Cohamacu yare yahu ducaha tina. Å yoa João Marco cãhu tina mehne jiro, tinare yoadohõa. ⁶ Tuhsu, tina ti nãco sohtoai maja, ti nãco topai jiri macapu Pafõ wama tiri macapu sua, yairore boca suha tina. Tiro judio masuno, Barjesu wama tiriro jiha. Barjesu griego ya mehne nia Elima ti ni pisuriro jiha. “Cohamacu yare yahu muhtariro jija yuhu” ni, masare mahõperucuriro jiha tiro. ⁷ Å yoa tiro Sergio Paulo wama tiriro mehne macariro jiha. Sergio Paulo sehe ti nãco macaina puhtoro masi pahõnoro jiha. Å jiro Cohamacu yare tuho duaro tinare Bernabé, Paulo mehne pjirocaha tiro. ⁸ Wiho mejeta Elima yairo sehe tinare buhe dutieraha. Tiro Sergio Paulo Jesu yare to ño payochu cahmasãeraha yairo sehe. Å jiro Sergio Paulore Cohamacu yare cohã dutiro nimaha. ⁹⁻¹⁰ To å dutipachuta Saulo, Paulo ti niriro Espiritu Santo dutiare yoariro jiro yairore noano ñu diho cũ tirore õ sehe ni yahuha:

—Muhu mahõoa payariro, ñariro, watõno to dutiare yoariro, noaare ñu yabiriro jira muhu. ¿Dohseacu Cohamacu yare “Ñaa jira. Mahõoa jira”, å nirucujari muhu? ¹¹ Muhu å yoariro jicu Cohamacu muhare to phachu capari bajuerariro jiihca muhu. Å jicu mahaa dachoricã muhu ahri dachore ñusini —niha Paulo.

To å nichuta tiro yairo sehe me yoaro sehe jiare ñu muhtano, baharo nahitiano dihtare ñuha. Å jiro tirore tuãhtirore macaha tiro. ¹² To å wahachu ñano, Sergio Paulo sehe Jesu yare “Potocã tjira”, ni masiha. Mari puhtoro yare tiro tuho, cuua waha, Jesure wacũ tua ducaha.

Paulo Bernabé mehne Antioquiã Pisidia yahpai jiri macai jiha

¹³ Å yoa Paulo cãhu Pafõpu jina dohoria mehne pahã turia waha namo, Pergepu suha. Perge Panflia yahpau jira. Tõpu su,

João Marco tinare cohã wahcã, Jerusalêpu majare tjuaa wahaha. ¹⁴ To ã wahapachuta tina sehe Pergepu jiina waha namo, Antioquia sãha. Antioquia Pisidia yahpapu jira. Tõpu sãa, Sabado dacho jichu tina judio masa buheri wuhpu sãa su, tõpu dujiha. ¹⁵ Tí wuhu macaina puhto Cohamacu dutiare, Moise cjiro masare to cõrre, ã yoa Cohamacu yare yahu muhtaina cjiri ti joari cjirire ti buhe ñori baharo tina pijrocaha Paulo cãhure:

—Coyea, ¿masare wahchechu yoahiti cjihiti musa yahu duaa jijari? Tíre yahu duana, yahuga michapucacã —niha tí wuhu macaina puhto.

¹⁶ Ti ã nichu tuhoro, Paulo wahcãrucu su, “Durucuena tjiga”, nino to wamomaca mehne cã tuha. Tí dihta mariachu ñu, tiro õ sehe niha:

—Israe masa, ã yoa musa Israe masa jieraina, Cohamacure ño payoina, tuhoga musa. ¹⁷ Mari ñuchusuma cjiri Cohamacure ño payoa tiha. Tina cjirire Cohamacu be-sea tiha. ã jia mari ñuchusuma cjiri yoari pja Egiptõpu jia tiha paina jipahta. Tõpu ti jichu Cohamacu noano yoa ti tinare. ã jia payu masaputia tiha tina. Õ sehe yoa ti tinare. Tinare Egiptõpu jinare to tuaa mehne wioa tiha Cohamacu. ¹⁸ To ã wiori baharo tina cuarenta cahmari waro masa marienõpu tinia tiha. Tõpu tirore ti yuhducachu Cohamacu ãta tuhutonocaa tiha. ¹⁹ Tuhsu, Canaa wama tiri yahpapore sietu curuari macainare cohã tuhsu, Cohamacu tí yahpare waa tiha Israe masa sehere. ²⁰ Israe masa Egiptõ ti ji ducachu, pu Cohamacu ahri yahpare to wachupu cuatrocientos cincuenta cahmari waro yuhdu tiha. Baharo Israe masare dutihtinare cã tiha Cohamacu tinare. Pu, Cohamacu to cõrina Samue to jichupu ji batoa tiha. Samue sehe Cohamacu yare yahu muhtariro cjiro jia tiha.

²¹ Baharo Israe masa sehe ti puhtoro cjihore macaa tiha. ã jia Cohamacure sinia tiha. Tí ã sinichu ñuno Cohamacu Saulo cjirore cã tiha tinare. Saulo cjiro Cis macano jiro, Benjami ya curua macariro jia tiha. ã yoa cuarenta cahmari waro ti puhtoro jihtiro cjihore cã tiha Cohamacu tiro cjirore. ²² Cohamacu Saulo cjirore to cohãri baharo Davi cjirore cã tiha tiro. Õ sehe nia tiha Cohamacu Davi cjirore: “Davi Jesé macunore bocahi yuhu. Tiro mehne wahcheja yuhu. Tiro yu cahmaare yorohca”, nia tiha Cohamacu. ²³ Ahriro Davi cjiro to panamino ji turiariro jira Jesu. Cohamacu Jesure cõri jire Israe masare yuhdohtiro cjihito. “Masare noano yoihca”, niha Cohamacu. To niriro seheta yoare tiro. ²⁴ To ã yoahito pano Jesu to tahto

pano João cjiro õ sehe ni buheri jire: “Musa ñaa tuhutumari cjirire tuhutu cohtota, Cohamacure macaga. ã yoana bautisarina jiga”, ni buheri jire João cjiro jipihtina Israe masare. ²⁵ João cjiro to buhe batoahito pano, to yariahto pano õ sehe ni yahua tiri jire: “¿Diro baro jijari yuhu, masa tuhutuchu? Cristo jieraja yuhu. Pairo jija. ã jipachuta tuhoga yuhure. Yu baharo yu yuhdoro turariro tarohca. Tiro noa yuhduariro jira. Tiro yoaro sehe jieraja yuhu”, ni yahuha João cjiro masare.

²⁶ Coyea, Abrahã panamana, jipihtina Cohamacure cua pisaro ñuina marine ahri to yuhdohtore yahua buheare warocari jire Cohamacu. ²⁷ Jerusalê macaina ti puhto mehne Sabado dachori jichu Cohamacu yare yahu muhtaina cjiri ti joarire buhepaha noano tuho ñahaerari jire. ã tuho ñahaera, Jesu tinare yuhdohtiro to jichu cãhure masierari jire. Tina ã masierapahta Jesure wajã dutiha. ã yoa Cohamacu yare yahu muhtaina cjiri ti joariro seheta yoa niha. ²⁸ Tirore ti wajãhto pano tina Jesure yahusãmaha. Wiho mejeta to ñaa yoerapachuta tina Pilatore Jesure wajã dutia taa, sinia. ²⁹ ã yoa, panõpu ti joariro seheta Jesure yoa tuhsu, tirore crusapu jirirore na boro, masa copapu tãcai ti sahari copapu na sãa, duhu payoha tirore. ³⁰ Tirore ti ã wajãpachuta tiro to yariari baharo Cohamacu masori jire tirore. ³¹ ã jia Galileapu taina Jerusalêpu tiro mehne suina payu dachori tirore yaria masa bajuarirore ñua tiri jire. ã jia mipure tirore ti ñurire masare yahuhre tina.

³²⁻³³ ã jina noaa buheare yahuja sã masare. Cohamacu mari ñuchusuma cjirire “Masare noano yoihca”, panõpu to niriro seheta mipure marine tinare ji ñunu ti turianare yoahre. Tíre to yahuri cjirire õ sehe yoahre tiro. Cohamacu Jesure masori jire. ã jina Jesure to masorire yahuja masare. Salmo capítulo dosre panõpu to joariro seheta ã wahari jire: “Muhu yu macu jira. Michare muhare yuhu mu Pucu jiare masichu yoahi”, nina Cohamacu to macunore”, ni joaa tiha panõpu. ³⁴ ã jiro Cohamacu Jesure to masohtire pari turi to yariaerahtore yahuyuro õ sehe ni yahua joa tiha Salmo joariro. “Davire yu pja ñuriro seheta tirore yu niriro seheta potocãta noano yoihtija musa cãhure”, nire Cohamacu”, ni joaa tiha. ³⁵ Tuhsu, pa Salmo cãhure õ sehetu ni yahua tiha: “Cohamacu mu yairo ñaa buhiri marieriro to pjacure baa dutierara muhu”, ni joaa tiha. ³⁶ ã jiro Davi Cohamacu to cahmariro seheta to jisiniri pja macainare yoadohoha. Baharo tiro yariaa wahaha. To yariari baharo to

pućsumare ti yoariro seheta masa copapu siõ säaha tiro cãhure. Á jiro tiro baa wahaha.

³⁷ To á baapachuta ahriro, Cohamacu to masoriro sehe ne baaerare. ³⁸ Á jina masa yu coyea ahrire masiga: Jesu to yariaro mehne Cohamacu mari ñaa yoari buhiri tiare to cohãhtore musare yahuja sä. ³⁹ Á jiro Jesure wacü tuainare Cohamacu ti ñaa ñano yoaa, buhiri tiare bonocanohca. Wiho mejeta Moise cjiro to cüri dutiare masa yoari mehne masa ñaa yoari buhiri tiare ne cohãsi Cohamacu. ⁴⁰ Á jina noano yoaga. Masa noano yoerachu Cohamacu yare yahu mahtaina cjiri ti joariro seheta musare wahaboca. Ó sehe ni joaa tiha:

⁴¹ “Tuhoga masa.

Cayoã payuina, yuhure ñu tuhtiina jira masa.

Yu õ sehe yoachu cuiga masa.

Á jina pichacaru wahaga.

Masa jia dachorire musare yoa ñoihtja.

Yu á yoa ñochu ñupanahta ‘Potocã tjira’, nisi masa.

Pairo tíre musare to noano yahupachuta ‘Potocã tjira’, nisi masa”,

ni joaa tiha Cohamacu yare yahu mahtariro cjiro —ni yahuha Paulo tinare.

⁴² To á ni yahuri baharo judio masa buheri wuhuru ti wijaari baharo, masa sehe tinare õ sehe ni siniha:

—Pa somanaru Sabado jichu säre ahrire buhega tjoa —ni siniha tina Paulore.

⁴³ Á yoa tí wuhuru jirina wijaa, judio masa payu, judio masa jieraina cãhu Paulo cãhu mehne wahaha. Judio masa jieraina sehe judio masa yare Cohamacu warore ti ño payoa tiare buheina jiha. Ti á wahachu Paulo, Bernabé mehne noano yahuha tinare: “Cohamacu musare cahina. Á jina tirere ño payoina, wacü tuaina á jirucuga masa”, ni buheha tina.

⁴⁴ Á yoa pa somanare Sabado jichu jipih-tina Jesu yare tuho duaina cahmachuha. ⁴⁵ Wiho mejeta judio masa sehe payu masare Jesu yare tuho duainare ñua pahsu tia wahaha. Á pahsu tia tina soro ni durucu, Paulore ñano quiti dojomehneha. “Musare to buhea potocã jierara”, niha tina. ⁴⁶ Ti á nichu tuhoa, Paulo, Bernabé mehne tinare quiti dojomehnerinare cuiro marieno õ sehe ni yahuha:

—Cohamacu to dutiro seheta musare buhe mahtamahi sä. Wiho mejeta masa sehe tíre cahmaera tuhsahre. Cohamacu catia mehne á catirucua cãhure cahmaera tuhsahre masa. Á jina sä sehe judio masa jieraina sehere buhe ducanahca. ⁴⁷ To joa dutiri cjiri mehne õ seheta dutiha Cohamacu säre:

“Masa judio masa jierainare buhena tinare yu yare noano masichu yoanahca masa.

Á jicu ahri yahpa mu sãro macainare masa buhechu, noano yuhure wacü tuaina sehere pichacaru wahaborinare yuhdoihca yuhu”,

ni yahu dutiha säre Cohamacu —ni yahuha Paulo, Bernabé mehne.

⁴⁸ Ti á nichu tuhoa judio masa jieraina sehe wahcheha. “Cohamacu ya sehe noaa jira”, niha tina. Tõpeina Cohamacu to cahmaina, to catia mehne á catirucuaire to wa duarina Jesure wacü tua ducaha. ⁴⁹ Á jia mari pahutoro Cristo yare tí yahpãre yahu site pahñoa. ⁵⁰ Ti á yahu site pahñochu ñua judio masa ji coeraha. Á jia tina Paulo cãhure ñano durucuha. Tõpu Cohamacure ño payoa numia, masa ti cua pisaro ñua numia jiha. Á jia judio masa Paulo cãhure ñano durucuha. Ti á ni durucuchu tuhoa tí numia Paulo mehne, Bernabé mehne cãhure suaha. Á yoa tí maca macaina pahtoa cãhu tina mehne suaha. Á suaa tó macaina ñano yoaha Paulo cãhure. Ti á yoari baharo Paulo cãhure ti ya yahpai jinare cohã wihoa. ⁵¹ Ti á yoachu ñua Paulo, Bernabé mehne ti dahpori macaã dihta pohcarire cjã site boro cãhu tí maca macaina ti ñaa yoari buhiri tiare ñoa. Á yoa tuhsu tina Iconiopu wahaa wahaha. ⁵² Á yoa tina Jesu yaina pjíro wahchea, Espíritu Santo dutiare yoaina jiha.

14

Paulo, Bernabé mehne Iconioi jiha

¹ Á yoa Iconiopu su, Paulo Bernabé mehne judio masa buheri wuhuru sä, Jesu yare noano durucu miñnia mehne yahuha. Á jia payu masa Jesure wacü tua ducaha, judio masa cãhu, judio masa jieraina cãhu. ² Wiho mejeta judio masa Jesure cahmaeraina cãhu tina mehne jiha. Tina judio masa jierainare Jesu yaina mehne ti suachu yoaha tjoa. Ti á yoachu judio masa jieraina ñano tuhotuha Jesu yainare. ³ Ti á tuhotuchu ñua Paulo, Bernabé mehne tõpu yoari pja jia, cuiro marieno mari pahutoro Jesu yare noano buheha. Cohamacu masare to cahiare buheha. Á buhea Cohamacu to tuaa mehne yoa ñoha tina, “Ahri buhea potocã tjira”, nia. ⁴ Wiho mejeta tí maca macaina dacho macai judio masa ya buheare cahmaina tjuaha. Dachõ macaihta Jesu ya buheare cahmaina cãhu tjuaha. Tina puã curua tjuaha. ⁵ Á jia judio masa jieraina, judio masa ti pahtoa mehne Jesu to cürinare ñano yoa duama, tãa mehne doca wajã duamaha tinare. ⁶ Ti á yoa duarire masia, Paulo Bernabé mehne Licaonia yahpãru duhti wahcãa wahaha. Ti yahpai

jia macaripũ Listra, ã yoa Derbepũ sũha. ⁷ Tõpũ sua, noaa buheare buheha tjoa tí macari macainare, tó cahai jiina cãhũre.

Listrai Paulore tãa mehne docaha

⁸ Æ yoa Listrai tini masierariro jiha. Tiro wahuma masa bajuaropũta tini masierariro jiro ne tinieraa tiha. ⁹⁻¹⁰ Æ jiro tiro Paulo to buhechũ tuhoha. To tuhoro watoi Paulo sehe tiro dihtare ñũha.

—Ahriro Jesure wacũ tuara. Æ jiro tiro noariro waha duara —ni tuhotuha.

Æ ni tuhuturo tuaro mehne durucutjiãhno õ sehe niha Paulo tirore:

—Wahcãrucaga —niha Paulo tirore.

To ã nichũ tuhorota tini masierariro sehe pu sũrucũ su, wahaa wahaha. ¹¹ Paulo to ã yoachũ ñua masa tí ya mehne, Licaonia ya mehne õ sehe ni sañurucuha:

—Ahrina cohamana, maa yoaro sehe bajuina mũanopũ jiina mari cahapũ duji tari jira —ni sañurucuha tina.

¹² Æ jia tina cohamanare ti ni pisua wamari mehne tinare ni wama pisuha. Tina Bernabẽre “Zeus”, ni pisuha. Æ yoa Paulo buhe muhtariro to jichũ ñua, “Hermes”, ni pisuha tina tirore. ¹³ Æ jiro Zeusre ño payoia ya wũhũ tí maca dũhtũ cahai jiha. Æ jiro Zeus yaina tí sacerdote sehe wachũare cohorĩ mehne macapũ sãa tari sopaca cahapũ na taha. Zeusre ño payo duaro to wachũare jũ mũono, Paulore, Bernabẽre wa duamaha tiro, to masa mehne. ¹⁴ Tĩ ã yoachũ ñua Paulo, Bernabẽ mehne tí basi tí ya suhtire tuhẽrocaha tí cahyaare masare ñoa. Tuhẽroca tuhsũ masa watoi mũrocaa, õ sehe ni sañurucu wahcãha tina:

¹⁵ —Mũsa õ sehe yoaena tjiga. Sã cãhũ mũsa yoaro seheta masa jija. Õ sehe mũsa yoaa ne yaba cjihti jierara. Æ jina mũsare buhena tahi mũsa õ sehe yoare duhu dutina tana. Ahri cohamana mũsa niare, mũsa yoaa, wiho jia masũri jira. Tĩ masũrine cohãga. Æ jina Cohamacũre catirore sehere ño payoga. Cohamacũ sehe mũanore, yahpare, pjiri mare, jipihtiare yoariro jira. ¹⁶ Panopũre tiro jipihtia macari macaina tí yoarire ã ñũnocaha. ¹⁷ Wiho mejeta tiro to jia tiare ñona masare. Tiro masare noaare yoa, coro tachũ yoa, dichare wa, masare chũare ã warucura. To ã wachũ masa wahchera. Tó seheta tiro to jia tiare ñona masare —niha Paulo, Bernabẽ mehne.

¹⁸ Wiho mejeta tí ã nichũ tuhopahta masa wachũare wajã jũ mũo tinare ño payo duamaha. Tó sehe tí ño payo duachũ ñua tinare ã yoa dutieraha Paulo cãhũ. Tĩ ã yoare duhu duaerapahta duhuha tó macaina sehe.

¹⁹ Æ yoa paina judio masa Antioquã macaina, Iconio macaina cãhũ Listrapũ

sũha. Tõpũ sua, Paulore ñano durucuha tjoa judio masa. Tĩ ã ni durucuchũ tuhoha masa tiro mehne suaaha. Æ suaa tãa mehne docaha tirore. Tãa mehne tirore doca tuhsũ “Ahriro yariaa wahara” nia, tí maca dũhtũ cahapũ tirore waja su cũnoca, wahaa wahaha. ²⁰ Tĩ ã yoari baharo Jesu yaina Paulore ñua wahaha. Tiro cahai tí cahmachurũcũ sachũ waro Paulo wahcãrucã, tina mehne macapũ wahaa wahaha. Æ yoa pa dachoi tiro Bernabẽ mehne Derbepũ wahaha.

²¹ Tõpũ su, tina noaa buheare tó macainare tí yahuri baharo, payũ masa Jesure wacũ tuaina jí dũcaha. Æ yoa baharo tina tí sua macaripe Listra, Iconio, Antioquãrũ majare tjuaa wahaha. ²² Tĩ macaripũ sua tí macari macainare Jesu yainare noaa buheare yahua, tinare noano yajeripohna tichũ yoaha. Æ Jesure wacũ tuarucu dutia õ sehe ni yahuha tinare:

—Cohamacũ to jiropure mari suhto pano, tuaro marine ñano yuhũro cahmana —ni yahuha.

²³ Æ jia macaripe macainare Jesu yainare tí puhtoa cjihtire cũha Paulo Bernabẽ mehne. Cũ tuhsũ, tí chũ duhuri baharo Cohamacũre õ sehe ni sini payoha:

—Puhtoro, ahrina mũ yainare ñũ wihboga —ni sini payoha tina Cohamacũre tí wacũ tuarirore.

Paulo Bernabẽ mehne Antioquãrũ tí jí muhtari macapũ tjuaa wahaha

²⁴ Tĩ ã yoari baharo tina Pisidia yahpãrũ jirina cjiiri wahaa wahaha Panfilia yahpãrũ. ²⁵ Tõpũ su, Pergepure tina buhe tuhsũ Atalia wama tiri macapũ wahaa wahaha. ²⁶ Tĩ macapũ su, Antioquãrũ tjuaa, dohoria mehne pahãa wahaha. Tĩ macaihta panopũ tí jisinchũ Jesu yaina Cohamacũ yare buhe dutia Paulo cãhũre warocaha. Æ warocaa:

—Cohamacũ mũ cahĩa mehne ahrinare ñũ wihboga —ni warocaha tina.

Æ tju sua tinare tí buhe dutirire buhe tuhsũha Paulo, Bernabẽ mehne. ²⁷ Antioquãrũ tí tju sũri baharo Jesu yaina mehne cahmachu, Cohamacũ to tuaa mehne tí yoarire yahu pahũoha tina. Judio masa jieraina cãhũ Cohamacũ yaina tí waharire yahuha tina. ²⁸ Æ jia Paulo cãhũ tõpũre Jesu yaina mehne yoari pja jiha.

15

Jerusalẽpũ Jesu yaina cahmachuha

¹ Æ yoa Judea yahpa macaina mahainacã Antioquãrũ sua, Jesu yainare õ sehe ni buhe dũcaha tina:

—Cohamacũ to dutiare Moise cjirore cũno õ sehe ni cũha. Jipihtina tí pjacũre mahari cahsarocãre tí yihsohtore yahu cũha

Moise cjirore. M̄sa t̄ire yoerach̄u Cohamac̄u m̄sare ȳhdosi —ni buheha tina tó macainare.

² Ti ā ni buhech̄u t̄uhoa Judea yahpa macaina sehe cahma sayoha Paulo c̄uh̄are Bernabé mehne. Ti ā cahma sayori baharo Jesu yaina sehe Paulore, Bernabére paina tó macaina c̄uh̄are Jerusalēp̄u warocaha. Judea yahpa macaina ti buherire Jesu to c̄urinare Jesu yaina p̄h̄toa c̄uh̄are sinitu ña dutia warocaha Paulo c̄uh̄are.

³ Ā jia Jesu yaina tinare ti warocach̄u waha, Fenicia yahpare s̄u, ȳhd̄u wahc̄ā, Samaria yahpar̄u s̄ha. Tí macarip̄u s̄ha, judio masa jieraina Cohamac̄u yare ti cahma d̄ucarire yahuha tina tó macainare. Ti ā yahuch̄u t̄uhoa tó macaina Jesu yaina tuaro wahcheha.

⁴ Ā yoa tina Jerusalēp̄u ti s̄uch̄u ñ̄a tó macaina Jesu yaina, Jesu to c̄urina, to yaina p̄h̄toa mehne wahchea mehne noano piti bocaha tinare. Ti ā piti bocach̄u Paulo, Bernabé mehne Cohamac̄u to tuaa mehne ti yoirire yahuha tina Jerusalē macainare. ⁵ Wiho mejeta tórp̄u fariseo curua macaina Jesu yaina mahainac̄ā jiha. Ā jia tina tórp̄u wahc̄ārc̄a, ō sehe ni yahuha:

—Tinare judio masa jierainare ti p̄jac̄ure mahari cahsaroc̄are ȳhsoro cahmana. “Cohamac̄u Moise cjirore to dutirire yoaga m̄sa c̄uh̄u”, nino cahmana tinare —niha tina fariseo curua macaina c̄uh̄u.

⁶ Ti ā nich̄u t̄uhoa Jesu to c̄urina, to yaina p̄h̄toa mehne ti ā nirire cahnoa taa, cahmachuha. ⁷ Ā cahmachua tina paȳu ti durucuri baharo Pedro wahc̄ārc̄a, ō sehe ni yahuha tinare:

—Coyea, panop̄u ȳh̄ure masa mehne jirirore Cohamac̄u ō sehe yoa dutiro ȳh̄ure c̄ure. Tiro ȳh̄ure noaa buheare judio masa jierainare yahu dutiro c̄ure. Tinare Jesure wac̄u tua dutiro ȳh̄ure tinare buhe dutire. ⁸ Cohamac̄u masa ti t̄uhotuare masina. Ā jiro tiro judio masa jierainare to yaina to yoirire ñono taro tiro Esp̄ritu Santore ware tinare, marine to yoiriro seheta. ⁹ Ā waro tiro marine tina c̄uh̄are c̄ano potori noano yoare. Tina tireto ti wac̄u t̄uchu ti ñaa buhirire bore tiro. ¹⁰ Mari sehe Cohamac̄u Moise cjirore to c̄uri dutiare c̄ano p̄jaeraja. Mari ñuch̄usama cjiri c̄uh̄u c̄ano p̄jaeraha. Ā mari c̄ano p̄jaerapach̄uta dohse yoana Jesu yainare judio masa jierainare t̄ire yoa duti duajari masa? Ā yoa dutina Cohamac̄u tinare to yoirire “Quih̄ono wahaerara”, nina nica masa. ¹¹ Wiho mejeta ō sehe s̄a t̄uhotuja. Mip̄ure judio masa jieraina yoaro seheta mari c̄uh̄are mari p̄h̄toro Jesu cah̄ia mehne Cohamac̄u ȳhdorohca. Dutiare mari yoa mehne marine ȳhdosi —niha Pedro tinare.

¹² To ā nich̄u t̄uhoa jipih̄tina dihta mariea wahaha. Ti ā dihta mariach̄u Paulo, Bernabé mehne judio masa jieraina watoi Cohamac̄u tuaa mehne ti yoa ñorire yahuha tinare. ¹³ Ā ti yahu tuhsari baharo Santiago ō sehe ni yahuha:

—Coyea, t̄uhoga ȳh̄ure. ¹⁴ Cohamac̄u judio masa jierainare to yaina cjihtire to coā yoirire yahu tuhsare Pedro. ¹⁵ Panop̄u macaina Cohamac̄u yare yahu m̄h̄taina cjiri ti yahuriro seheta ā wahare judio masa jierainare. ō sehe ni Cohamac̄u yare joaa tiha tina:

¹⁶ “Panop̄u Davi cjiro yare curua macaina ti p̄h̄toa jiri cjiri pihtia wahare. Baharo tjua taihca ȳh̄u.

Ā jic̄u pari turi to ya curua macarirore p̄h̄toro s̄ohca.

¹⁷ Ȳh̄u ā yoiri baharo jipih̄tina paina judio masa jieraina ȳh̄ure p̄h̄toro tiahca tina.

‘Ȳh̄u yaina jiga’, ȳh̄u ni p̄jirocarina sehe ȳh̄ure cahmaahca.

¹⁸ Āta nina mari p̄h̄toro.

Panop̄u tiro ahire masare yahua tiri jire”, ni joaa tiha Cohamac̄u yare yahu m̄h̄taina cjiri.

¹⁹ Ā jic̄u ō sehe ni t̄uhotuja ȳh̄u. Judio masa jierainare Cohamac̄u yare wahma cahma d̄ucainare paȳu yoa dutiena t̄jijihna mari. ²⁰ Wiho mejeta tinare joa, warocajihna mari. ō sehe ni joarocajihna: “Ñaa ch̄uare, ‘Cohamac̄u jira’, ti nia masurine ti waa ch̄uare ch̄uena t̄jiga. Tuhs̄u, numia mehne ñano yoena t̄jiga. Numia c̄uh̄u m̄a mehne ñano yoena t̄jiga. Ā yoa wama ti ñaha waj̄ainare wahiquinare ch̄uena t̄jiga. Dire sihniena t̄jiga”, ni yahu joarocajihna. ²¹ Yoari p̄ja judio masa buhea w̄h̄usep̄u Sabado jich̄u Cohamac̄u Moise cjirore to c̄uri dutiare buhea t̄ire masa. Ā yoa jipih̄tia macarip̄u Moise cjiro to yahuare buhea t̄ire. (Ā jina ȳh̄u niriro seheta judio masa jierainare Jesu yainare joarocajihna, judio masa sehe tina mehne “Suari”, nina) —niha Santiago.

²² Tí p̄jare Jesu to c̄urina, Jesu yaina p̄h̄toa, jipih̄tina Jesu yaina mehne p̄uaro tina mehne macainare beseha ti warocah̄tinare. Antioquíap̄u Paulo, Bernabé mehne ti wahach̄u wahahtinare tinare bese warocaha. Ā jia tina Judare, Sila mehne warocaha. Juda sehe Barsaba p̄uaro wama wama tiha. Ti coyea Jesu yaina tinare ño payoha. ²³ Tinare ti beseri baharo Jesu yaina joarocari p̄ure warocaha tina mehne. ō sehe ni joaha tina:

“Jesu to c̄urina, to yaina p̄h̄toa, masa coyea Jesu yaina mehne s̄a noa dutija m̄sare. Jipih̄tina judio masa jierainare Antioquíap̄u, Siriap̄u, Ciliciap̄u j̄inare

m̄sare Jesu yainare noa dutija s̄a. ²⁴ S̄a mehne macaina m̄sa cahapu s̄ua, m̄sare payu dutiare yoa dutiyuhti. Ā yoa m̄sare cariboyuhti. Tina Cohamacu dutiare Moise cjirore to cūri cjiropare, mahari cahsaroc̄are yihsoa c̄ahure yoa dutiyuhti. Wiho mejeta s̄a sehe tinare t̄ire buhe dutina warocaerahi. ²⁵⁻²⁶ Ā jina s̄a jipihtina c̄ano potori m̄sa cahapu warocahtinare s̄a besehi. Mari cah̄inare Paulo, Bernabé mehne Cristo Jesu mari puhtoro yare cuiro marieno ti buhechu payu tahari paina tinare waj̄amoñoha. Ti ā waj̄amoñochu mahanoc̄a mehne yuhduha tina. Tina mehne s̄a beserinare mipure warocaja. ²⁷ Ā jina Judare, Sila mehne m̄sa cahapu warocaja. S̄a joarocarire tina sehe m̄sare yahuahca. ²⁸ Esp̄ritu Santo to wacūno seheta s̄a c̄ahu tuhotuja. Ō sehe jira t̄i: Paye dutiapure c̄ueraja m̄sare. Ahri dutia dihtare c̄unahca m̄sare: ²⁹ N̄aa chuare, 'Cohamacu jira', ti nia mas̄rine ño payo ti duhu payoa chuare chuena tjiga. Dire sihniena tjiga. Wam̄ure ti ñaha waj̄ainare wahiquinare ch̄ena tjiga. Ā jina numia mehne ñano yoarena tjiga. Numia c̄ahu m̄aa mehne ñano yoarena tjiga. Ahri yu yoa dutierare yoerana noare yoana nica m̄sa. Tó puro tjira m̄sare s̄a yahu duaa", ni joarocaha Jesu yaina Jerusal̄epu jiina.

³⁰ Tí p̄ure joa tuhsu, waha Antioquiapu wahainare. Ti wari baharo waha, Antioquiapu s̄uha. Ti tópu suri baharo payu masare cahmachu duti, ti joari p̄ure waha tinare. ³¹ Tí p̄ure ti buheri baharo tina yajeri s̄aa, noano wahcheha. ³² Ā jia Juda, Sila mehne Cohamacu yare yahu muhtaina jia, yoari pja Jesu yainare Cohamacu yare yahuha. Ti ā yahuchu tuhoa, Jesu yaina sehe wahche, noano tuhotuha. ³³ Ā jia Juda, Sila mehne tópu mahaa dachoricā ti jiri baharo Jerusal̄epu ti tjuaa wahachu tó macainare ti coha sitichu, "Noano wahaga m̄sa", niha Antioquiá macaina. Ā jia Juda c̄ahure warocarinare noa dutirocaha. Ti ā niri baharo Juda sehe tjuaa wahaha. ³⁴ [Wiho mejeta Sila sehe tóputa tjuanocaha Antioquiaputa.] ³⁵ Ā jia Paulo Bernabé c̄ahu mahaa dachoricā tjuasiniha ti macai tjoa. Tóti tina paina payu mehne Jesu yare buheha.

Pari turi Paulo noaa buheare buhe tinino wahaha

³⁶ Ā yoa mahaa dachoricā baharo Paulo ō sehe ni yahuha Bernabére:

—Jipihtinare mari buhe ducarinare "¿Dohse jijari tina?" ni, ñuna wahajihna tjoa —niha Paulo c̄ahu ti basi.

³⁷ Ā ni tuhsu, Bernabé sehe João Marcore tina mehne naa duamaha. ³⁸ To ā naa duapchuta tó pano tiro tina mehne Panfiliaapu

suro tina mehne tjueraha. Ti yoare c̄ano pjaeraro tjuaa wahaha. Ā jiro Paulo pari turi tirore naa duaeraha. ³⁹ To naa duaerachu ñano Bernabé Paulo mehne puaro ti basi cahma durucu cahno masieraa, soro dihta wahaa wahaha. Bernabé sehe Chipre wama tiri nucopu Marcore na pahāa wahaha. ⁴⁰ Paulo sehe Silare piti ti wahcā wahaha. Ti buhea wahahto pano Jesu yaina tinare waroca, "Cohamacu m̄sare noano ñu wihbojaro", niha. Ti ā niri baharo Paulo Sila mehne wahaa wahaha. ⁴¹ Ā wahaa, Siria yahpapu, Cilicia yahpapu c̄ahure s̄ua, tópu Jesu yainare noano yajeripohna ti, Jesure wacū tua namochu yoaha tinare.

16

Timoteo Paulo mehne wahaha

¹ Ti ā yoari baharo Paulo c̄ahu Derbepu, Listrapu s̄ua, Timoteore boca s̄uha. Timoteo Jesu yairo jiro, judio masono macano jiha tiro. To pocoro c̄ahu Jesu yacorota jiha. To puaro sehe griego masano jiha. ² Ā jia Lистра macaina, Iconio macaina Jesu yaina, "Timoteo masa noariro jira", ni yahua tiha. ³ Ā jiro Paulo Timoteore naa duaha. Wiho mejeta ti yahpa macaina judio masa sehe Timoteo puaro griego masano to jichu masiha. Ā jiro Paulo judio masare "Suari" nino, Timoteo pjacure mahari cahsaroc̄a yihso naha. Judio masa ti dutia ti niriro seheta yoaha. ⁴ To ā yoari baharo tina ti s̄ua macari macainare ti joarocari p̄u macaare yahuha. Tí p̄u Jesu to c̄urina, to yaina puhtoa mehne Jerusal̄epu jiina ti joarocari p̄u jiha. Ā jia ti dutiare noano yahu turiaha tó macainare Jesu yainare. ⁵ Ti ā yahuchu tuhoa Jesu yaina sehe Jesure wacū tua namoha. Ā yoa Jesure wahma wacū tua ducaina dachoripe payu waha namoha.

Paulo cah̄anopu Macedonia macarirore ñuha

⁶⁻⁷ Ā yoa Asia yahpapu sehere noaa buheare buhe dutieraha Esp̄ritu Santo tinare. Ā jia tina Frigia yahpare yuhduu Galacia yahpare yuhduu, Misia yahpa duhtu cahai s̄uha. Tópu su, Bitinia yahpa sehe waha duamaha tina. Wiho mejeta Esp̄ritu Santo sehe tinare tópure waha dutieraha. ⁸ To ā niri baharo tina sehe Misia yahpare yuhduu, Tróadepu buhtu wihire. ⁹ Tópu ti buhtu wihiri baharo, ti ñamine ō sehe cah̄ari jire Paulo. Macedonia yahpa macariro to cahai ducuchu ñuri jire tiro. "S̄are Macedonia yahpa macainare yoadohoi taga" ni, pjiri jire tiro Paulore. ¹⁰ To cah̄ari baharo wahcā wihi, s̄a yare cahno tuhsu, Macedoniapu wahaa wahai s̄a. "Cohamacu ti

yahpapare noaa buheare buhe dutiro nina marine”, ni tuhoutu sã.

Paulo, Sila mehne Filipopu jiha

¹¹ Ā jina sã Tróaderu jiina dohoria mehne Somatracia wama tiri nucoru pahã sui sã. Ā yoa pa dachoi Neapolipu pahãa wahai sã. ¹² Tí macare yuhduana, Filipopu Roma macaina ya macapu sui sã. Tí maca Macedonia yahpai jiri maca jire. Wiho jiri maca jierare. Tópure mahaa dachoricã sã jii. ¹³ Tópu jina Sabado jichu sã tí maca duhtu cahapu, dia duhtu cahapu sui. Tói Cohamacu mehne tí durucuro jire. Tói dujina tói cahmachua numia mehne suhëdui sã. ¹⁴ Cãcoro sãre tuhoricoro Tiatira wama tiri maca macaricoro Lidia wama tiricoro jire. Ticoro noaa suhti wapa tia suhtire duaricoro, Cohamacare ño payoricoro jire. Ā jiro Paulo to yahuaire noano tuhochu yoare Cohamacu ticorore. ¹⁵ To quihõno tuhochu ñano ticorore to wuhu macaina mehne bautisare Paulo. To ā bautisari baharo õ sehe nire ticoro:

–“Jesu yacoro tjira muhu cãhu”, nina musa yuhure. Ā jina ya wuhui sãa tasinia musa. Yuhu mehne tjuasinia –nire ticoro sãre.

To ā nichu tuhona to wuhui tjuasinii sã.

¹⁶ Pa dacho Cohamacu mehne tí durucuropu sã wahachu watño to cohotaricoro piti bocare sãre. Ticoro paina cahamaciono jire. Ticoro watño yoadohoro mehne masare “Õ sehe waharohca musare”, ni yahuyuricoro jire. Ā yahuro pjiro wapatabasare to puhtoare. ¹⁷ Ā jiro Paulo mehne sã wahachu, sãre nuhu ti, sañurucure ticoro:

–Ahrina Cohamacu Jipihina Bui Jiriro to yoadohoina jira. Cohamacu marine to noano yuhdohtire yahura tina –ni sañurucure ticoro.

¹⁸ Payu dachori ā ni cariborucure Paulore. To ā ni sañurucuhu Paulo majare ñu, õ sehe nire watñore:

–Jesucristo tuaa mehne dutija muhure. Ticorore wijaaaha. Waharisa muhu –nire Paulo.

To ā nichuta watño sehe wahaa wahare.

¹⁹ To ā wahari baharo ticoro puhtoa sehe niñeru to wapataeraricoro to wahachu ñua, tina Paulore, Sila cãhure ñahare. Ñaha tuhsu, tinare naahre tí maca dacho macapu jiina puhtoa cahapu. ²⁰ Ā naa wahcã, buhiri tiare cahnoina cahapu tinare cüre tina.

–Ahrina judio masa mari ya macare cariboa nina. ²¹ Tina mari dutiare cohã dutia, paye buheare buhea nina. Mari ya dutiare yuhdurucachu yoa duaa nina. Mari Roma macaina jina ahrina ti yahua sehere yoa

masieraja mari. Ā jina ti buheare mari cahmaeraja –nire ticoro puhtoa buhiri tiare cahnoinare.

²² Tí ā nichu tuhoa masa payu Paulo cãhu mehne sua yuhduu wahare. Ā jia buhiri tiare cahnoina sehe Paulo cãhu suhtire tí tuhrë cohãri baharo, yucuri wasõri mehne tjana dutire tinare. ²³ Tuaro tjana tuhsu peresu yoare tinare. Tí ā peresu yoari baharo peresure cohtaritore noano ñu wihho dutiha tina. ²⁴ Tí ā dutiri baharo tinare cohtariro sehe tí wuhu puhicha macari tahtiapu tinare cü, taboa pahtari mehne tí dahporire biha dapoha.

²⁵ Ñami dacho macai Paulo, Sila mehne Cohamacare sini, tirore basa payoha. Tí ā basachu tuhoha paina peresupu jiina. ²⁶ Tí ā ni basachuta tí wuhu tuaro ñuhmiha. To ā ñuhmichu cãno potori jipihina sopa pahmari parí muu, peresupu jiiinare tí duhtea dari comaa dari nuhnu site boraa wahaha. ²⁷ To ā wahachu tí wuhure cohtariro sehe wahcã wihi, “Peresu jiina duhti tuhsuri jire”, ni tuhutumaha. Ā ni tuhuturo to ñosari pjine naroca, to basi ñosamaha. ²⁸ To ā yoachu ñuno Paulo tirore tuaro sañurucu õ sehe niha:

–Mu basi ñano yoai tjiga. Jipihina õre jija sã –niha tiro tinare cohtaritore.

²⁹ To ā nichu tuhoro tinare cohtariro sehe sihã buhria duti, tina cahapu muhoca wahcã Paulo, Sila tí dahpori cahapu tetere, caha saha tiro. ³⁰ Tuhsu, tiro tinare tí tahtiapu jiiinare na wijaa, sinituha tinare:

–¿Dohse yoacari yuhu Cohamacu yairo ji duacu, to yuhdohtiro ji duacu? –ni sinituha tiro.

³¹ –Jesucristore wacü tuaga muhu. Mu coyea cãhu tirore wacü tuajaro. Musã ā yoachu musare pichacapu wahaborinare Cohamacu yuhdorohca –ni yahuha tina.

³²⁻³³ Tí ā niri hora ñami dacho maca baharocã jiha. Tí ā niri baharo tinare cohtariro to ya wuhuru naaha tinare. To ya wuhuru na su tí camine cosaha tiro. To ā cosa tuhsuri baharo to coyea mehne Cohamacu yare buheha Paulo cãhu. Tí buheri baharo bautisaha tinare. ³⁴ Tí bautisa tuhsuri baharo tinare cohtariro cjiro Paulo cãhure chuare payoha. Ā jia tiro to coyea mehne noaa buheare tí tuhori baharo tuaro wahcheha, Cohamacure masi ducaa.

³⁵ Bohrea parí cahachu ñua puhtoa sehe surarare peresupu warocaha Paulo cãhure wio dutia. ³⁶ Tí ā wio dutiri baharo tí wuhure cohtariro Paulo cãhure yahuha:

–Puhtoa musare wio dutire. Ā jina cuienata wijaaaha –niha tiro Paulo cãhure.

³⁷ Tí ā wio duapachuta Paulo õ sehe ni yahuha surarare:

—Sã ñano yoaerahi. Æ jina sã ne buhiri cjaeraja. Wiho warota tina puhtoa sehe masa ti ñurocaroi yucari wasõri mehne tjanahre sãre, Roma macaina sã jipachuta. Tjana tuhsu peresu yoahre sãre. Æ jia mipu masa ti ñueraroi wio duara sãre, sãre ñano ti yoarire “Вuoro yuhdari”, nia. Puhtoa ti basita ta, wioa tajaro sãre —niha Paulo surarare.

³⁸ To ã nichu tuhoa surara sehe puhtoare yahua wahaha. Ti ã ni yahuri baharo Paulo, Sila mehne Roma macaina ti jichu masia puhtoa sehe cui niha. ³⁹ Æ jia tina Paulo cãhu cahai su, õ sehe niha:

—Ñano yoahiti sã musare. Ne pari turi ã yoasi —niha puhtoa Paulo cãhure.

Æ ni tuhsu puhtoa tinare peresupu jinare wio, tinare pa shepu waha dutiha. ⁴⁰ Ti ã niri baharo Paulo, Sila mehne peresupu jiina wijaa, Lidia wama tiricoro ya wuhupu wahaha. Ti wuhupu ti suri baharo Jesu yainare piti bocaha. Æ jia tina Jesu yainare noano buhea, noano yajeripohna tichu yoaha tinare. Ti ã yoari baharo Paulo, Sila mehne waha wahaha.

17

Tesalónica macaina suaha Jesu yaina mehne

¹ Æ yoa tina Anfipolipu su, yuhdua, Apoloniapu su, yuhdua, Tesalónicapu suha tina. Tói judio masa buheri wuhu jiha. ² Somanaripe to yoariro seheta Paulo buheri wuhupu wahaa tiha. Tõpu su, tia somana waro sabado dachoripe tiro panopu macaa ti joari cjirire Cohamacu yare masare buhe, tìre tina mehne suhdua tiha Paulo. ³ Æ yoaro tiro Cohamacu yare õ sehe ni yahuha:

—Judio masa, masa puhtoro masa cohtararo Cristo tari jire ñano yuhduhtiro. Cohamacu to ni cùriro cjiro seheta tiro yariaa wahaha masa mujano taro. Æ jiro ahriroro Jesu, yu yahuriro, tiro Cristo warota jira marine yuhdohtiro. Tirota jira musa cohtararo. Õ seheta nina Cohamacu yare ti joari pũ —ni yahuha Paulo.

⁴ To ã nichu tuhoa, cãina tói jiina “Potocã tjira”, niha. Æ jia tina Paulo cãhu mehne wahaha. Æ jia paina cãhu griego masa payu Cohamacure ño payoina sehe Paulore quihõno tuhoa, ã yoa tina mehne macaa numia cãhu payu puhtoa numia masa ti cua pisaro ñua numia cãhu tirore quihõno tuhoa Jesu yaina tjuaha. Æ jia tina cãhu Paulo cãhu mehne wahaha. ⁵ Wiho mejeta judio masa sehe ti ã wahachu ñua, pahsu tiha. Æ jia tina ñaina dahraerainare payu pji cahmachu õ sehe ni dutiha: “Ahrina ñano yoaa nina”, ni sañurucu dutiha tinare. Æ sañurucu jipihtina ti maca macainare suachu yoaha

Paulo cãhu mehne. Æ jia judio masa Jasõ ya wuhupu sãa, Paulo cãhure macamaha, tinare masapure waa taa. ⁶ Wiho mejeta tinare bocaeraha. Æ jia Jasõre, paina Jesu yaina cãhure ñaha, waja wijaa wahaha tinare. Puhtoa cahapu na su õ sehe ni yahusãha tina:

—Paulo cãhu masare jipihtipure caribobiara. Æ jia mipure tina mari ya macare wihi tuhsahre. ⁷ Æ jiro ahriroro Jasõ tinare to ya wuhupu sãa ta dutihre. Tina jipihtina mari bui puhtoro Roma macariro to dutiare yuhdurucara. “Pairo musa puhtoro jira. Jesu tirota jira” nia, mari puhtoro dutiare yuhdurucara tina —ni yahusãha judio masa sehe puhtoare.

⁸ Ti ã ni yahusãchu tuhoa, jipihtina masa, puhtoa cãhu sua, tuaro sañurucuha. ⁹ Wiho mejeta puhtoa Jasõre, tiro mehne macaina cãhure, niñureure wapa duti, wioha.

Paulo Sila mehne Bereapu suha

¹⁰ Ti pjata ñamipru Paulo cãhure Jesu yaina ñuo warocaha Bereapu. Tõpu sua tina judio masa buheri wuhupu sãa wahaha. ¹¹ Berea macaina sehe Tesalónica macaina yuhdoro Jesu yare noano tuhoina jiha. Æ jia tina Jesu yare ti tuhori baharo “¿Potocã tjijari?” ni masi duaa, dachoripe Cohamacu yare ti joari pũre ã buherucua tiha tina. ¹² Æ jia tina payu Jesure wacũ tua ducaha. Griego masa cãhu, musa, puhtoa numia mehne Jesure wacũ tuaina jiha. ¹³ Wiho mejeta Paulo Bereapu Cohamacu yare to buhechu cãhure tuhorocaa Tesalónica macaina judio masa tõpu suha. Tõpu sua, Berea macainare quiti dojomehnea, Paulo cãhu mehne suachu yoaha tina. ¹⁴ Ti ã yoachu ñua Jesu yaina Paulore soaro mehne pjiri ma duhtu cahapu warocaha. Wiho mejeta Sila, Timoteo mehne Bereapu tjuaha. ¹⁵ Paina sehe Paulore Atenapu na wahcã soha. Tirore so tuhsu majare tjuaa wahaha Bereapu tjoa.

—Soaro mehne waha, piti tina wahaga Paulore —ni yahuha Silare, Timoteo cãhure. Æ ni yahu dutiha Paulo tinare.

Paulo Atenai jiha

¹⁶ Æ jiro Paulo Atenapu cohtaroro niha Sila, Timoteo cãhure. Tinare cohtaroro Atena macaina ti “Cohamana jira”, ti nia masurine payu ti cjaachu ñano Paulo tuaro cahyaha tina mehne. ¹⁷ Æ cahyaro, judio masa buheri wuhupu judio masa mehne, ã yoa judio masa jieraina mehne cãhure durucuha tiro. Judio masa jieraina sehe Cohamacure ño payoina jiha. Æ yoa Paulo ti maca dacho macai dachoripe tiro cahapu ã tini majare sãaina mehne durucuha. ¹⁸ Paina Epicureo yare buheina, Estoico yare buheina cãhu Paulo mehne durucuha:

—¿Ahriro durucua pih-tierariro dohse ni durucuro nijari tiro? —niha tina.

Paulo Jesu yare, to masa mujarire to yahuchu tuhoa o sehe ni tuhutumaha masa: “Tiro paina cohamanare yahuro nica”, ni tuhutumaha tina. ¹⁹ Ti tuhori baharo tina Areopago wama tiropu Paulore naaha.

—Ahri buhea, wahma buheare mu mipu yahurire masi duaja sa. ²⁰ Mu buhea soro sehe jira. A jina sa tire masi duaja —niha tina Paulore.

²¹ Jipih-tina Atena macaina, a yoa paye yahpari macaina cahu Atenapu jiina dachoripe wahma buheare durucurucu duha. A jia Paulo to yahuare tuho duaha tina.

²² A jiro Paulo Areopago wama tiroi wahcaruca o sehe ni yahuha:

—Atena macaina, payu musa cohamanare musa tuaro no payoina musa jichu masija yuhu. ²³ Ahri maca musa ya macare cohamanare musa no payoa altarire nu tinihi yuhu. A nu tinicu yuhu cu altarpu, cohamanare no payona musa waare musa cunoi ahrire buhehi. “Cohamacu, mari masimahnoerariro ya altar jira”, ni joari jire musa tire musa cunoi. Musa tirore masierapanahta tirore no payori jire musa. Tiroreta musa masierarirore yahu potoi nija yuhu musare.

²⁴ Cohamacu jipih-tiri yahpare, jipih-tiare bajuamehneriro jira. Tiro manore, yahpape puhtoro jiro, tiro masa ti yoaa wuhusei jierara. ²⁵ A jiro tiro mari jiare, mari yajeri naare, jipih-tia marine paye barore wariro jiro, mari yoadohoare cahmaerara. Tiro pjacoriro jierara.

²⁶ Tiro cairo manore yoa ducaha. Tiro mehneta jipih-tia yahpari macaina cjih-tire masare yoaha. A masare yoaro jipih-tiro yahpape marine caha tiro. “O puro yoari pja opure jahca”, nino quih o caha marine. ²⁷ “Tina yuhure maca, bocaboca”, ni tuhutuha Cohamacu. Wiho mejeta Cohamacu yoaropu jierara. Mari mehneta jira. O sehe ni joaa tiha paina: ²⁸ “Marine jichu yoara tiro. Mari masapere catiina, nuhmiina jichu yoara tiro”, ni joaa tiha. Musa mehne macaina panopu macaina basaare noano joaina quiti yahuina cjiri ti joariro seheta ni nija. “Mari cahu Cohamacu pohna jija”, ni joaa tiha tina. ²⁹ A jina mari to pohna jina o sehe ni tuhutuena tjiga musa. Masarine, uru, plata, taah mehne musa mu soro musa yoari masarine “Cohamana jira”, ni tuhutuena tjiga musa. ³⁰ Panopu masa ti masieraina jisinicu ti naare yoapachuta Cohamacu a nuocasiniha. Wiho mejeta mipure jipih-tiri yahpa macainare ti naa yoari buhiri tiare masi, cahya dutira Cohamacu. ³¹ Baharo Cohamacu to quihori

dachoi jipih-tiri yahpa macainare potoca beserohca noaina, naanare. Tiro to bese duti to cuiriro Jesu sehe beserohca. Jesure yari-arirore masoha tiro. A masono “Ahriro yu cuiriro jira” ni, nono niha Cohamacu masare —ni yahuha Paulo Atena macainare.

³² To a nichu masa mujarire to durucuchu tuhoa paina tirore bujupaha. Wiho mejeta paina sehe o sehe niha:

—Pari turi ahrire mu yahuchu sa tuho duaja —niha tina Paulore.

³³ Ti a niri baharo Paulo wahaa wahaha.

³⁴ To a wahachu, caina tiro mehne waha, Jesure wacu tua ducaha. Dionisio Areopago macariro puhtoa mehne macariro Jesure wacu tua ducaha. A yoa Damari wama tiricoro cahu, paina mehne Jesure aha wacu tua ducaha.

18

Paulo Corinto wama tiri macai jija

¹ A yoa, Paulo Atenapu jiro waha, Corinto wama tiri macapu suha. ² Topu soro, judio masano Aquila wama tirirore boca suha tiro. Jipih-tina bui puhtoro Claudio wama tiro judio masare Romapu jiinare to cohachu Aquila sehe to namono Priscila mehne waha, Corintopu suha. Aquila sehe Ponto wama tiri yahpai masa bajariro jija. A jia tina Corinto ti jichu, Paulo tina cahapu suha. ³ Aquila cahu suhti wuhusere yoaina jija. Paulo cahu suhti wuhusere yoarirota jija. A jiro tiro tina mehne dahra, toi tjuaha. ⁴ A jiro Paulo sabado jichu somanaripe judio masa ti buheri wuhapu judio masare, judio masa jieraina cuhure Cohamacu yare yahuha. To a ni yahuchu tuhoa, “Potoca tjira”, niha tina caina.

⁵ A yoa Sila, Timoteo mehne Macedoniapu jiina, Paulo cahapu suha. Topu ti sari baharo Paulo sehe jipih-tia dachoripe judio masare noano buhea tiha.

—Jesu, Cristo masare yuhdohtiro mari cohtariro jira —ni yahuha tiha.

⁶ To a ni buhepachuta, judio masa sehe tirore tuho duaeraha. A jia tina nano ni quiti dojomehneha tirore. Ti a yoachu Paulo tinare to tuhtiboriro seheta, to suhti macaa mene cja siteroca caha.

—Musa ya buhiri pichacapu wahanahca. Cohamacu to dutiro seheta musare buhemahi yuhu. Wiho mejeta musa yuhure tuho duaerare. Mipure judio masa jieraina sehene buhei wahaitja —niha Paulo judio masare.

⁷ To a niri baharo tiro topu jiro waha, Ticio Justo wama tirore ya wuhapu suha. Justo Cohamacu no payoriro jija. To ya wahu sehe judio masa buheri wahu cahai jija. ⁸ A jia Crispo wama tirore buheri wahu puhtoro, to namono, ti pohna cahu Jesure

wacū tuaina jiha. Ā yoa paina Corinto macaina payu Cohamacu yare tuhoa, Jesure wacū tuaha. Ti ā wacū tuaina jichu tinare bautisaha. ⁹⁻¹⁰ Cū ñami Cohamacu cahānopu ō sehe ni yahuha Paulore:

—Muhu mehne jija. Ahri maca macaina yu yaina masa payu jira. Ā jia paina masa mūhare ñano yoa masierara. Ā jicu cuiecu tjiga mūhu. Wiho mejeta yu yare tuaro yahu namoga mūhu. Yahu duhuecu tjiga — ni yahuha Cohamacu Paulore.

¹¹ Ā yoa cū cahma noano, pa cahma dacho maca waroi Paulo Corintopu ji, tó macainare Cohamacu yare buheha tiha.

¹² To ā buhero watoi Galiō wama tiro Acaya yahpa macaina puhtoro to jichu, judio masa jipihina cāno potori Paulore yahusāa taa, tirore buhiri tiare cahnoina cahapu naaha tina.

¹³ —Ahriro Paulo masare Cohamacure ño payo dutiro ahri yahpa macaa dutia sehere cohā dutiro nina —ni yahusāha judio masa buhiri tiare cahnoinare.

¹⁴ Ti ā ni yahusāchu tuhoro Paulo sehe tinare yahu duamaha. Wiho mejeta Galiō sehe judio masare ō sehe ni yahuha:

—Ahriro sā Roma macaina ya dutiare yuhdugacariro to jichu, musare yuhtiboa yuhu. ¹⁵ Wiho mejeta musa judio masa ya dutia sehere ahriro yuhdugacariro to jichu musa basi ahrire cahnoga. Ahrire masieraja yuhu musa mehne —ni yahuha tiro judio masare.

¹⁶ Ā ninota tinare judio masa Paulore yahusāmarina cjirore to ya tahtiapu jijnare cohā wioha tiro. ¹⁷ To ā cohā wiori baharo jipihina ti wuhui jiina Sostenero judio masa buheri wuhu puhtoro Jesu yairore ñaha, buhiri tiare cahnoina cahapu cāha tirore. Ti ā cāchu ñano Galiō ā ñnocaha.

Paulo Antioquíapu tjuaa wahaha

¹⁸ Ā yoa Paulo Corintoi yoari pja jiriro cjiro “Wahai nija”, ni coha sitiha tiro Jesu yainare. To ā niri baharo tiro Priscila, Aquila mehne Siria yahpapu pahāa taa niha. Ti pahāto pano Cencrea wama tiri macapu su, tōpu jisninino Paulo Cohamacure “Ō sehe mūhare yoabasaitja”, to nirire yoa tuhsarirōpu jiha. Ā jiro tó sehe yoaina judio masa ti yoaruciriro sehetā to pjoarire wuha pahño dutiha. ¹⁹ Tíre to yoari baharo tina Efeso wama tiri macapu pahā su, Priscilare, Aquila cāhare cū, judio masa ti buheri wuhupu wahaha Paulo. Tí wuhupu su, Cohamacu yare yahuha. Ā yahuro judio masa mehne suhūduha. ²⁰ To ā suhūduri baharo tirore tina mehne tjuā dutimaha.

—Tjuaraja musa mehne. ²¹ Wiho mejeta Cohamacu cahmachu, pari turi tjuā taihtja —niha tinare Paulo.

Ā ni tuhsu, Efesopu jiriro cjiro pahāa wahaha tiro.

²² Pahāa, Cesareapu pahā su, yuhdu wahcā, Jerusalēpu suha. Tōpu su, tó macaina Jesu yainare “¿Ne jimajari musa?” ni, tinare ñu yuhdu Antioquíapu suha. ²³ Tó mahaa dachoricā jiha. Tó jiriro cjiro yuhduha. Galacia yahpai jia macaripu, Frigia yahpai jia macaripu pari turi su, ti macari macainare Jesu yainare buhero, Jesure wacū tua namo wahchechu yoaha tiro.

Apolo wama tiro Efesoi buheha

²⁴ Tí pjare, judio masano Apolo wama tiro, Alejandria macariro Efesopu suha. Tiro noano yahu mihniro jiha. Ā jiro tiro Cohamacu to joari cjirore noano masiha. ²⁵ Pairo tirore Cohamacu yare yahu tuhsu tiha. Ā jiro tiro João masare bautisariro to buheha dihtare masiha. Ā jiparota tiro tuaro wahchea mehne Cohamacu yare noano buheha. ²⁶ Ā jiro judio masa ti buheri wuhupu tiro cuiro marieno tinare buhe ducaha. To ā buhechu ti tuhori baharo Priscila, Aquila mehne tirore tina mehne naaha. Cohamacu yare to quihōno yahu pahñoerachu ñua quihōno yahu pahñoa tina tirore. ²⁷⁻²⁸ Ā jia tiro Apolo sehe Acaya yahpapu to waha duachu Jesu yaina tirore “Noano wahaga”, ni joa pūrino waha tirore. Tí pūri Acayapu jiina Jesu yainare Apolore noano piti boca dutia pūri jiha. Ā jiro Apolo tōpu suro, tó macainare noano yoadohoha. Tó macaina Cohamacu cahā mehne Jesure wacū tuaina jiha. Judio masare tí macai jijnare ō sehe ni yahuha:

—Cohamacu to warocariro musa cohtariro jira Jesu. Cristo waro jira tiro —ni yahuha Apolo judio masare paina masa ti ñarocaroi.

Cohamacu yare ti joari cjiro mehne to noano quihōno yahuchu tuhoa tina “Potocā jierara”, ni masieraha.

19

Paulo Efesopu wahaha

¹ Corintopu Apolo to jiro watoi, Paulo sehe tūyucapu mūja yuhdu, Efesopu suha. Tōpu suro cāina Jesu yainare bocaha. ² Tinare boca suro tiro tinare ō sehe ni sinitu ñaha:

—¿Musa Jesure wacū tuari baharo musa sehe Espiritu Santore cjuā ducari? —ni sinitu ñaha Paulo.

To ā nichu tuhoa tirore ō sehe ni yahuha tina:

—“Espiritu Santo jira”, ni yahuerare säre —ni yahuha tina.

³ Ti ā ni yahuri baharo Paulo tinare ō sehe ni sinitu ñaha tjoa:

—¿Noa ya buheare masa tūhori baharo bautisari masare? —niha tiro tjoa.

—João ya buheare sā tūhori baharo bautisahre sāre —ni yahuha tina.

⁴ Ti ā nichu tūhoro ō sehe niha Paulo:

—Masa ti űaa yoarire cahya, tīre ti duhuchu űuno bautisaha João. Ā jiro to bautisari cjiri sehe ti űaa yoarire ti duhurire masare ti űohti cjihti jira. Wiho mejeta paye baro cūhare yahu namoha João. “Yu baharo tariro sehere wacū tuaga masa”, ni yahuha tiro. Ā nino Jesure yahuro niha —ni yahuha Paulo tinare.

⁵ To ā nichu ti tūhori baharo, Jesu wama mehne to tuaa mehne bautisaha tinare. ⁶ Ā to bautisachu, Paulo tina cāina bui to wamomaca to duhu payochu, Espiritu Santo sehe wihiha tinapare. To ā wihihi baharo tina sehe tūhomahnoera duseri mehne durucu, Cohamacu yare yahuha. ⁷ Tina jipihtina doce ma jia jiboa.

⁸ Baharo Paulo judio masa ti buheri wūhupu sāa, tia sū waro cuiro marieno puhtoro Cohamacu to suho jiare yahu, durucuha tina mehne. Tirore ti ā tūhori baharo “Ahri potocā jira”, niha tina. ⁹ Wiho mejeta paina sehe tūho duaeraha. Ā jia tina masa ti tūhoro noaa buheare űano ni űoha. Ti ā nichu tūhoro Paulo sehe Jesu yainare pji wijaa, pa sehupu wahaha. Waha, Tirano wama tiro to buheri wūhupu dachoripe masare Cohamacu yare yahuha Paulo. ¹⁰ Pua cūhma waro buhea tiha tinare. To ā buhechu jipihtina Asia yahpa macaina judio masa, judio masa jieraina mehne mari puhtoro Jesu yare tūhoha. ¹¹ Ā yoa Cohamacu tuaa mehne Paulo masare űu cua yūhdūachu yoa barore yoa űoha. ¹² Masa sehe suhti cahsari Paulo to pjacure pihaa cahsari cjirire, ā yoa tirore pihaa suhti cūhare naa, dohatiinare pihoha masa. Tī suhtire dohatiinare ti pihochu noaa wahaha. Ā jichu watīa tinapare jirina cjiri wijaa wahaha, tī suhtire ti pihori baharo.

¹³ Wiho mejeta paina judio masa, ā tinircuina, watīare cohāina jiha. Ā yoa puhtoro Jesu wama pisuro mehne watīare cohā duamaha. Ā jia watīare ō sehe ni dutimaha tina:

—Paulo to yahuriro Jesu to wama mehne dutija masare. Wijaaaha. Ahriro mehne pari turi jiena tjiga —nimaha tina watīare warocaa.

¹⁴ Esceva wama tiro siete to pohna sehe āta yoamaha. Esceva sehe judio masuno sacerdotea puhtoro jiha. ¹⁵ To pohna watīno te wijaa dutiri baharo, watīno sehe ō sehe niha tinare:

—Jesure masija. Paulo cūhare masija. Ā masipacuta masa sehere masieraja —niha watīno tinare.

¹⁶ To ā nichuta watīno to cohtotariro sehe tuaro mehne tinare űaha maāa wahaha. Tinare űaha, űaabiario yoa, yūhdūacanocaha. To ā yochu Esceva pohna sehe suhti marieina, cami tiina maroca wijaa wahaha tina ti wūhare. ¹⁷ Ti ā yoiro baharo jipihtina Efeso macaina, judio masa, judio masa jieraina mehne tīre tūhoa, cui yūhdūaha tina. Ā jia puhtoro Jesu yare bujupero marieno durucuha masa sehe.

¹⁸ Ā yoa masa payu Jesure wacū tuaina ti űano yoiro buhirire yahu yūhdūa taha. ¹⁹ Tina mehne macaina payu yaya puti siteina jiha. Ā jia tina ti joaa tjurire yaya ti yoaare yahua tjurire tōpu na ta, masa ti űarocaroi tī tjurire jū cohānocaha tina. Tī tjuri ti wapa tirire tina ti quihōchu, jipihtia tjuri cincuenta mil tūri plata mehne ti yoa tūri posa waro wapa timaha tī tjuri. ²⁰ Ā jia Cohamacu yare cahmaina payu wahaha. Cohamacu tuaa mehne to yaina wahaha.

²¹ Ti ā wahari baharo Paulo ō sehe ni tūhotuha: “Macedonia yahpapu sū muhta, tī yahpare yūhdūa Acaya yahpare suihtja. Tī yahpare yū sūri baharo Jerusalēpu wahaihtja. Tī macare yū sūri baharo Romapu wahaihtja”, ni tūhotuha Paulo. ²² Pūaro tirore yoadohoinare to pano waroca muhtaha Macedonia yahpapu. Timoteo, Erasto cūhu jiha tina. Ā jiro Paulo sehe cūirota tjua nūnu tisinia Asia yahpapu.

Efeso masa sua, sañurucuha

²³ Tī pjare Efeso Jesu yare paina cahmaeraa, Paulo cūhare payu masa tuhti, sañurucuha. ²⁴ Cūiro platata dahrariro Demetrio wama tiro plata mehne cohamacu Artemisa wama tūricoro ya wūhu masuri yoiro jiha. Ā jiro tiro paina plata dahraina mehne tī masurine dua, pjiro wapataha tina. ²⁵ Ā jiro Demetrio paina plata dahrinare pji cahmachu ō sehe ni yahuha tinare:

—Tūhoga masa. Ahri dahraa mehne pjiro mari wapatarire masina masa. ²⁶ Ahriro Paulo to yoiro to buheri cūhare masina masa. Ō sehe ni buhera tiro: “Cohamana masuri masa ti yoiro catiina jierara”, ni yahua tīre tiro. To ā nichu tūhoa payu Efeso macaina, jipihtiroi paina Asia yahpa macaina cūhu tī buheare “Potocā tjira”, nia tīre. ²⁷ Ā nia mari dahraare masa űano durucuhto cua yūhdūara. Ā yoa masa mari cohamacu Artemisa ya wūhare “Wiho jiri wūhu jira”, ni cohāboca. Tī ā cohāchu ticoro jipihtina Asia yahpa macaina, jipihtiri yahpa macaina ti űo payoricoro to jipachuta to tuaa butiarohca. Ā jia masa baharopu jiina ticorore masieraboca —niha Demetrio tinare.

28 To ā nichu tūhoa tina sehe tuaro sua, sañurucuha:

—Artemisa Efeso macaina mari yacoro cohamaco tuaricoro jira —ni sañurucuha tina.

29 Ā jia Efeso macaina jipihtina sañurucu yuhduā, tuho masia pihtia wahaha. Ā waha, Gayore, Aristarco cūhure ñaha, masa ti cahmachunopu tinare waja wahcāha. Gayo, Aristarco mehne Macedonia macaina jia, Paulo mehne tiniina jia tiha. 30 Ā jia Paulore masa cahai to waha duachu, Jesu yaina sehe tirore waha dutieraha. 31 Ā jia paina ti yahpa macaina puhtoā, Paulo mehne macaina jia, ti cahamacare yahu dutiha Paulore:

—Masa ti cahmachunopu wahai tjiga —ni yahu dutiha puhtoā Paulore.

32 Ā jia tói cahmachuina mehne macaina sehe payu “¿Dohseana tana mari cahmachuna nijari?” ni masieraha. Ā jia tina sañurucu namoha. Ahrie sehepu jiina soro ni, sañurucuha. Paina cūhu soro ni sañurucuha. 33 Ā jia judio masa sehe Alejandro wama tirirore masare yahu dutimaha. Ā jiro Alejandro “Dihta mariaha”, nino to wamomaca mehne cjātuhā. “Ahrina säre judio masare tuhtia nina”, ni tuhoturo judio masare ducata duaro, durucumaha. 34 Wiho mejeta tiro judio masano to jichu ñua masa jipihtina cāno potori puā hora waro sañurucuha:

—Artemisa, Efeso macaina mari yacoro cohamaco tuaricoro jira —ni sañurucuha tina.

35 Ti ā ni sañurucuhu ñuano, Efeso macaina puhtoare yoadohoriro masare, “Dihta mariaha”, ni yahuha tinare.

—Musa Efeso macaina tūhoga. Efeso macaina tuaricoro cohamaco Artemisa ya wahu cohtaina mari jichu jipihtia yahpari macaina masina. Ā jia manopu bora tari masare ñu wihboina mari jichu cūhure masina masa. 36 Ā jia paina “Ahri potocā jierara”, ni masieraha. Ā jina suaena tjiga musa. Noano tuhotuga musa. 37 Ahrina musa ñaha taina mari cohamacore ñano ni durucuerare. Ā yoa tina cohamana wuhsepure sāa, yacaerare. Ā jina noano yoaga musa. 38 Ā jia Demetrio, plata dahraina mehne ahrinare musa ñahinare yahusā duaa, buhiri tiare cahnoina sehere yahusājaro tina. 39 Pari turi cahmachuna noano mehne cahmachuga. Musa yoiriro sehe yoena tjiga. 40 Michare musa sua, sañurucurire mari puhtoā tūhoa, “Marine cohāa nica”, ni tuhotuahca tina. Ā jina musa ni sañurucurire tinare noano potō yahu masieraja mari —niha puhtoare yoadohoriro masare.

41 Ā ni yahu tuhsu, “Tó puro tjira. Wahaga”, niha tiro masare.

20

Macedonia yahparu cūhure, Grecia yahparu cūhure Paulo suha

1 Ti ā wahari baharo, Paulo sehe Jesu yainare pji cahmachu yahu quihōha. Yahu quihō tuhsu, tinare wahchechu yoa, tinare coha sitiha. Coha siti tuhsu, Macedonia yahparu wahaā wahaha. 2 Tópu su buhe, tí yahpai jia macari macainare Jesu yainare wahchechu yoaha tiro. Tinare buhe tuhsu, Grecia yahparu suha tiro. 3 Tói tiro tia sū waro jiha. Tói jirucuma, Siria yahparu pahāa waha duamaha. Wiho mejeta judio masa cohtamaha tirore ñaha duaa. Ā jiro Paulo pa mahapu, Macedoniapu wahari mahapu mananoputa majare tjuaa wahaha tjoa.

4 Ā waharo Asiaputa suha. Tói Berea macariro Sópatro wama tiriro Pirro macano Paulore piti ti wahcāha. Ā yoa Tesalónica macaina Aristarco, Segundo cūhu tirore piti ti wahcāha. Tuhsu, Derbe macariro Gayo wama tiriro Timoteo cūhu tiro mehne waha. Asia macaina Tiquico, Trófito cūhu Asiapu tirore piti ti wahcāha. 5 Tiro mehne macaina to pano waha, Tróade wama tiri macapu tirore cohtari jire. 6 Ti ā cohtachu bucuaerari pāore ti chua bōse numari baharo sā sehe Filipoi jiina dohoria mehne waha, cinco dachori pahā, Tróadepu sā tinare mu sui. Siete dachori waro jii tópu.

Tróadepu Paulo tinino wahaha

7 Domingo jichu Jesu yaina cahmachu pāore duhu payore Santa Cena yoaa taa. Ti ā yoahito pano Paulo tinare buhere. Ā yaro Paulo pa dachoi wahahtiro jiro yoiri pja tiro buhere. Ñami dacho macapu buhe duhuro taro nimare. 8 Ā jina manano macari tahtiai payu poca sihāa poca jiri tahtiai cahmachui sā. 9 Paulore to tuhoro watōi, cāiro wahmano Eutico wama tiriro mahari sopaca cahai mūja pja dujire. Duji, Paulo tinare yoiri pja to buhe namochu wahmanore wūjo tare. Wūjo ta, tiro carī mūa, tia casario buipū dujiriro majare boraa wahare. Boraa waha, yaria yuhduā wahare. To yariari baharo tina tirore yariariro cjiropure na wahcō dapore. 10 Ti ā yoachu ñano Paulo dujia, wahmanore cjā suhure. To ā yoiri baharo Jesu yainare ō sehe ni yahure tiro:

—Yajeripohna ñaena tjiga. Yarierara ahriro. Catira —nire Paulo sehe.

11-12 To ā nichu wahmano yariariro cjiro masaa wahare. To ā masachu ñua tina wahche yuhduare. Ā wahchea manano macari tahtiapu mūja, pāore duhu payore

Santa Cena yoaa taa. Ti ã yoari baharo yoari pja Paulo tinare buhe namore tjoa. Pa bohreahto panocãpũ tinare buhe duhure. To buhe tuhsũchũ wahaa wakai sã.

Paulo Tróadeꝛũ jiro waha, Miletoꝛũ saha

¹³ Paulo pano dohoria mehne Asõꝛũ sã sehe sũ muhtai. Paulo sehe mahapũ waha duare. Paulo to niriro seheta Asõꝛũ tirore sã piti bocai. ¹⁴ Tirore sã piti bocachũ, sã mehne tiro samure dohoriapũ. Tia mehne waha, Mitileneꝛũ sã sui. ¹⁵ Tõꝛũre sũ yũhduũ pa dachoi Quło wama tiri nõcore yũhduũ sã. Pa dachoi Samoꝛũ sui sã. Pa nuũũ sehere Miletoꝛũ sui sã. ¹⁶ Paulo Pentecoste dacho waroi Jerusalẽꝛũ sũ duare. Æ jiro Asia yahpapũ yoari pja ji duaerare. Æ jiro Efesore potõ yũhduũ, Miletoꝛũ wahã sui sã.

Paulo Efeso macainare Jesu yainare puhtoare yahuha

¹⁷ Æ jiro Paulo Miletoꝛũ jiro, Efeso macainare Jesu yainare puhtoare pjirocare tiro. ¹⁸ Æ to pjirocari baharo tina Paulo cahapũ wihire. Ti wihichũ ñũno tinare Paulo õ sehe ni yahure:

—Asiapũ coã wihicuũ mũsa mehne yũ yoarire masina mũsa. ¹⁹ Mũsa mehne jicu ne soro nino marieno Jesu, mari puhtoro yare yoaa tii yũhũ. Æ yoacu mũsare pja ñũi. “Mũsare yũhduũcaja”, nierahi yũhũ. Judio masa yũhũre ñãno ti yoapachũta Cohamacũ yare yoaa tii yũhũ. ²⁰ Mũsa noano wahahtore cahmacũ mũsare buhe pahũonocai yũhũ. Masa ti ñũrocaroi, ã yoa mũsa wũhũseꝛũ cũhũre buhei yũhũ. ²¹ Æ yoa judio masare, judio masa jieraina cũhũre cãno potõri buhei yũhũ. “Musa ñãa yoari buhiri tiare masi, Cohamacũ mehne tjuaaaha. Æ yoa Jesu mari puhtoro wacũ tuaga”, ni yahui yũhũ. ²² Æ yoa miꝛũre Espõritu Santo to dutiꝛiro seheta Jerusalẽꝛũ wakai nija. Yũhũ tõꝛũ wahacu yũ dohse wahahtore masieraja yũhũ. ²³ Espõritu Santo to yahuri dihtare masija. Õ sehe nihre Espõritu Santo yũhũre: “Nohoi mũsũ macaripeꝛũ mũhũ ñãno yũhduũhca. Æ jia mũhũre peresu yoaaaha”, nihre Espõritu Santo yũhũre. ²⁴ To ã nipachũta noaa buheare, Cohamacũ masare to cahã buheare yahuhũtiro cjihto jija. Jesu mari puhtoro to yoa dutiꝛire yoa pahũõ duaaja. Ahrire yoariro jicu, yũ yariahtore cuieraja yũhũ.

²⁵ Mũsa mehne jicu puhtoro Cohamacũ to saho jiare yahua tii yũhũ mũsare. Miꝛũre ne mũsare pari turi ñũsi yũhũ. Ahrire masija yũhũ. ²⁶⁻²⁷ Æ masicu michare ahrire yahuja mũsare. Jipihtia Cohamacũ yare yahui yũhũ mũsare. Æ jiro jipihtina mũsa mehne

macaina Cohamacũ yare cahmaeraina ti jichũ ya buhiri jierara. ²⁸⁻²⁹ Mũsa basi noano yoaga. Æ jina Jesu yainare Espõritu Santo mũsare to ñũ wihbo dutiinare ñũ wihboga. Ovejare ñũ wihboina ovejare ti ñũ wihboro seheta Jesu yaina cãhũre ñũ wihboga mũsa. Cohamacũ macano to yariaro to di cohãno mehne Cohamacũ tinare to yaina cjihti yoare. Yũ õre wahari baharo paina ñãina sehe yairo ovejare to chu cohãno seheta Jesu yare mũsa yaborire dojomehneahca. Æ jina Jesu yainare noano ñũ wihboga. ³⁰ Baharopũre paina mũsa mehne macaina sehe Jesu yainare mahũõ, paye buheare tuho dutiaha. Ti ã dutichũ tina tuhohto cua yũhduũ. ³¹ Æ jina noano yoaga mũsa. Tia cũhma waro dachoripe, ñaminipe pja ñũa mehne buhei yũhũ mũsa jipihtinare. Tire noano wacũga mũsa.

³² Miꝛũre yũ wahari baharo, Cohamacũ mũsare ñũ wihborohca. Masare to cahã buheare mũsa basi cahma buhena, noano jinahca mũsa. Cohamacũ to buhea mehne mũsare wacũ tua namochũ yoarohca. Baharopũre to yainare “Noano yoaitja”, to niriro seheta mũsa cãhũre noano yoarohca. ³³ Mũsa ñiũerure, mũsa suhti cãhũre “Yũhũre waga”, nierahi mũsare. ³⁴ Yũ basi dahra wapatai yũ ya cjihtire. Æ yoa yũ cahmaare, yũhũ mehne macaina ti cahmaa cãhũre yũ dahraa wapatai mehne nahi. Yũ ã yoarire masina mũsa. ³⁵ Mari õ sehe tuaro dahrana paye baro cjuærainare yoadohoro cahmana marine. Ahrire mũsare yoa ñoi yũhũ. Jesu mari puhtoro to niri cjiꝛire wacũga mũsa. “To wachũ ñãhariro yũhdoro wariro sehe wahchera”, niri jire Jesu to basi —ni yahure Paulo Jesu yainare.

³⁶ Æ ni batõa Paulo tina mehne na tuhcuca caha sũ, Cohamacũre sinire. ³⁷ To ã sini batõachũ tina jipihtina Paulore cã suhsu, wahsupu wihmi, tiĩhũ. ³⁸ “Mũsare pari turi ñũsi yũhũ”, pano to nichũ tuhoa tuaro cahyare tina. Æ jia tirore tju nuũũ ti buhare pũ pitamahapũ. Tõꝛũ sãre ñũ nuũũ tire sã wahachũ.

21

Paulo Jerusalẽꝛũ pari turi wahaha

¹ Jesu yainare “Wahana nija” ni, dohoria mehne Cos wama tiri nõcoꝛũ potõ waha, pahã sui sã. Pa dachopũ Roda wama tiri nõcoꝛũ pahã sũ, yũhduũ, Pátara wama tiri macapũ sui sã. ² Pátarai jina, Feniapiũ wahahtaire, dohoriare bocai sã. Æ jina tia mehne wakai sã. ³ Æ wahana Chipre wama tiri nõcore potõ ñũ yũhduũ sã. Cõ buhũsehe sehe jire ti nõco. Ti nõcore yũhduũ, Siria wama tiri yahpapũ sui sã. Æ jina dohoria macaa pachere dohoria macariro Tiro

wama tiri macai to dure mochu, tói pah-sasinii. ⁴ Tói Jesu yainare ñuna, siete dachori waro tjuasinii sã tí macai. Æ jia tó macaina Jesu yainare Espiritu Santo to yahuriro seheta tina Paulore Jerusalēpu waha dutieramare. ⁵ Ti ã nipachuta tí macare siete dachori sã jiri baharo, wahaí sã. Sã wahahto panocã jipihtina Jesu yaina, ti namosãnumia mehne, ti pohna mehne, ti maca duhtu cahai sãre ñu tjuaa wahare. Æ jina jipihtina sã paduroi su, na tuhcuca caha su Cohamacare sinii. ⁶ Sã ã siniri baharo, “Wahana nija” ni, tinare cã suhsu batoa, wahaí sã. Sã wahachu ñu nũni ti, tina sehe majare majaa wahare ti ya wuhusepu.

⁷ Tiro wama tiri macai jiina wahana Tolemaidapu wahã sui sã. Tóihita pjiri mare waha batoai sã. Tí macai su, Jesu yainare “Coyea, ¿jijamajari?” ni, cã dacho sã tina mehne jisinii. ⁸ Æ yoa pa dachoi tjoa Cesarea wama tiri macapu sui sã. Tópu su, noaa buheare yahuriro Felipe wama tiriro ya wuhupu sui. Æ jina tiro mehne tjuai sã. Felipe Jesu yaina ti siete beseina mehne macariro jire. ⁹ Tuhsu, tiro pititiaro numia pũcuro jire. Tí numia sehe Cohamacu yare yahu numia jire. Nuhmia jire. ¹⁰ Tópu sã mahaa dachoricã sã jiri baharo, Agabo wama tiriro Cohamacu yare yahu tuririro Judeapu jiriro sãre ñuno wihire. ¹¹ Æ wihiro tiro Paulo ya dare tuã dihori dare na, to basi to dahporire, to wamomacarine duhte cayo ò sehe ni yahure:

—Ò sehe nire Espiritu Santo: “Ahri dare cjuariro Jerusalēpu to suchu, judio masa ãta duhteahca tire. Duhte tuhsu, judio masa jierainare waahca tina tire”, nire Espiritu Santo —ni yahure Agabo.

¹² To ã nichu ñahona, sã Cesarea macaina mehne Paulore tuaro cahii sã. Tirore Jerusalēpu waha dutieramai. ¹³ Sã ã nichu Paulo sehe ò sehe ni yuhtire:

—¿Dohse ni tiina nijari musa? Yuhu sehene cahyachu yoaca musa. Tina yuhure peresu ti yoachu noanohca. Yuhu Jerusalēpu Jesu mari puhtoro yare yu yoari buhiri yu yari-achu noanohca —nire Paulo sãre.

¹⁴ “Wahaeraja”, to nichu tuho duana nimai sã. To “Wahaihtja” to nichu, Æ tuhotunocahi sã. Ò sehe nii:

—Mari puhtoro to cahmano seheta yojaro —nii sã.

¹⁵ Tíre suhudu batoa, sã yare cahno, wahaah wahaí sã Jerusalēpu wahana. ¹⁶ Tópu sã wahachu mahainacã Cesarea macaina Jesu yaina sehe sã mehne wahare. Æ yoa tina mehne macariro Chiple macariro Mnasõ wama tiriro ya wuhupu sui sã. Tiro yoari pja Jesu buheriro jire. Æ jiro to ya wuhu sã carĩhti wuhu jire. Tí wuhui sã carĩni baharo, Jerusalēpu sui sã.

Paulo Santiagore ñuno wahaha

¹⁷ Jerusalēpu sã suchu, tó macaina Jesu yaina sehe “¿Wihimajari?” ni, wahchea mehne piti bocare sãre. ¹⁸ Pa namui Paulo sã mehne Santiagore ñuno sare. Sã tópu suchu tói jipihtina Jesu yaina puhtoa jire. ¹⁹ Tói ti jichu ñuno Paulo tinare to wamomaca ñahari baharo judio masa jierainare to buherire yahu pahñore Jesu yainare. Cohamacu to yoadohoa mehne to yoirire yahu pahñore. ²⁰ To ã ni yahuchu tuhoa, “Cohamacu noariro, tuariro jira”, ni ño payore tina sehe. Æ ni tuhsu tina Paulore ò sehe ni yahure:

—Coyeiro, mipure payu judio masa Jesure wacũ tuaina jira. Tíre masina muhu. Æ jia tina ò sehe ni tuhotura: “Cohamacu to dutiare, Moise cjioropu marine to cũrire marine yoa pahñore cahmana”, nia nina. ²¹ Ò sehe ni namona tina. “Pa sehepu jiiinare judio masa jieraina watoi jiiinare judio masare Cohamacu Moise cjioro to cũri cjirire cohã dutiha Paulo”, nimare ò macaina judio masa muhare. “Paulo judio masa pohmare mahari cahsarocãre yihso na dutierara”, nimare muhare tina. “Judio masa ti yoa tiare Paulo duhu dutira”, ni ahri cahure ni yahuwajara muhare. ²² Æ jia mu òre wihichu tuhoa tina cahmachuahca muhare tuhtia taa. Æ jicu ò sehe yoaro cahmana muhare. ²³ Muhare sã dutiro seheta yoaga. Mipure òre pititiaro mua Cohamacare wacũina “Ò sehe yoanahtja”, nina jira. ²⁴ Tina mehne wahaga. Æ jia Cohamacu Moise cjioro to dutiriro seheta ti basi Cohamacu yare yoa taa ti dutiare yuhdurũcaare cosaa nina. Muhu cãhu ãta yoaga. Æ yoacu ti ã yoahiti wapare wapaga muhu sehe. Mu ã wapari baharo ti pjoarire waha duti masina tina. Mu ã yoachu ñua masa muhare ti nia mahñori jichu masiahca jipihtina. Cohamacu Moise cjioro to cũri dutiare yoariro mu jichu masiahca tina. ²⁵ Wiho mejeta judio masa jieraina Jesu yaina sehene sã joari pũre waroca tuhsui. Ò sehe ni, joai sã. “ ‘Cohamacu jira’, ti nia masũine ño payo ti duhu payoa chware, dire, wamua ti ñaha wajãinare wahiquinare chuena tjiga musa. Æ jina numia mehne ñano yoarena tjiga. Numia cãhu mua mehne ñano yoarena tjiga”, ni yahu joahi sã joari pũpũre —nire tina Paulore.

Cohamacu wuhupu judio masa Paulore ñahaha

²⁶ Ti ã ni durucuri baharo pa dacho Paulo sehe pititiaro mua mehne ti basi Cohamacu yare yoa taa ti dutiare yuhdurũcaare cosaa taa, Cohamacu wuhupu sãa wahaha. Tí wuhupu sãa sũro, tinare yahuha Paulo: “Òpe dachori duhsara musa cosahto”, ni yahuha

tiro pitiarore. Ā jia ti cosa batoari dachoi tina caina Cohamacure wahiquinare ti wahti dacho jire.

²⁷ Ā yoa ti cosa pahñoboriro mahanocā duhsachū waro Cohamacū wuhūpū Paulo to jichū Asia yahpa macaina judio masa sehe ñuha tirore. Ā ñua Paulore quiti dojomehne, tí wuhūpū jina jipihtinare tiro mehne suachū yoaha tina. Ā suaa judio masa Paulore ñaha, ²⁸ ō sehe ni sañurucuha:

—Masa sā coyera Israe masa sāre yoadohona taga. Ahriro jira marine dojomehneriro. Ahriro Cohamacū Moise cjirore to cūri dutiare ahri wuhū cāhure “Wiho jia jira”, ni buhe sito tara jipihtinare. Ā yoa tiro Cohamacū wuhūpūre judio masa jieraina cāhure na sāre. Ā yoaro ahri wuhūre ñaa marieni wuhūre tiro dojomehneri —ni sañurucuha judio masa Asia yahpa macaina tó macainare.

²⁹ Tó pano Jerusalēi Paulo Tróximo wama tirore mehne to jichū judio masa ñua tiha. Tróximo sehe Efeso macariro judio masano jierariro jire. To ā jichū masia ō sehe ni tuhotuha tina: “Paulo Tróximore Cohamacū wuhūre na sāano nica”, ni tuhotumaha judio masa.

³⁰ Masare ā ni yahu ti sañurucuri baharo tí maca macaina payū tuaro suaha. Payū mūroca ta, Cohamacū wuhūi jirirore Paulore ñaha waja wijaa wahaha. Ā wijaa tuhsū, tí wuhū sopacarire bihaha tina. ³¹ Ā yoaa tina tirore wajāa taa nimaha. Ti ā yoachū ñua paina sehe “Jipihtina Jerusalē macaina sua, sañurucuha nire”, ni yahua wahaha surara puhtorore. ³² Ti ā nichū tuhororo surara puhtoro sehe to surarare, ti dutiina cāhure cahmachuroca, tina mehne Paulore wajā duaina cahapū mūroca wahcā, saha. Surara ti sūchū ñua Paulore cjāmaina cjā duhunocaha. ³³ Ā jiro surara puhtoro Paulo cahapū sū, tirore ñaha, pua da comaa dari mehne tirore duhte dutiha. Ti duhte tuhsūchū ñū, surara puhtoro Paulore cjāmainare sinitu ñaha:

—¿Diro baro jijari ahriro? ¿Yaba buhiri tirore ā yoari mūsa? —ni sinitu ñuha tirore tinare.

³⁴ To ā sinituchū tuhoa masa sehe “Ō sehe yoare tiro” ni, paina cūhū soro ni sañurucu, yahua surara puhtorore. Ā ni ti sañurucuchū surara puhtoro noano tuhoeraha. Ā jiro tiro surara ya wuhūpū Paulore naa dutiha. ³⁵ Ti wuhūpū sū, Paulo mūjari escadai to majano cahachū masa sehe tirore cjā duaa nimaha. Ti ā yoachū surara sehe tirore na waa, na mūjaa wahaha. ³⁶ Masa tinare payū nūnū ti, sañū nūnū tihaa:

—Tirore wajānocahga —ni sañurucuha tina Paulore.

Paulo “*Ne masare ñano yoaerajayuhū*”, ni yahuha

³⁷ Ā yoa Paulore tí wuhūpū ti peresu yoahito pano, Paulo sehe surara puhtorore ō sehe ni siniha:

—Yuhū mūhū mehne sañadu duaja —ni siniha Paulo.

—¿Muhū griego masa yare durucujari?

³⁸ ¿Sohō jiriro, Egipto macariro jierajari mūhū? Tiro masare ti puhtoare cohā dutiro, cuatro mil puhtoare cohā duaina sehere masa marienopū naari jire. ¿Tiro jierajari mūhū? —niha surara puhtoro Paulore.

³⁹ To ā nichū tuhororo Paulo ō sehe ni yahtiha:

—Tiro jieraja yuhū. Judio masano jija. Tarsoi Cilicia yahpai jiri macai masa bajuai yuhū. Wiho jiri maca macariro jieraja yuhū. Yuhū ahriina masa mehne durucu duaja yuhū —niha Paulo tirore.

⁴⁰ To ā nichū tuhororo surara puhtoro sehe tirore durucu dutiha masa mehne. Ā jiro Paulo mūjari escadai ducuro to wamomacari mehne “Dihta mariahga”, niha masare. To ā yoachū ñua, dihta mariea pihitia wahaha. Ti dihta marieachū ñū, Paulo judio masa ya mehne yahuha tinare.

22

¹—Yū coyera, yū yoarire yahuihtja mūsa-re. Yū yahuchū tuhoga mūsa —niha Paulo.

²To ā nichū Paulo judio masa ya mehne to durucuchū tuhoa masa sehe dihta marieina tjuaha. Ā jiro Paulo tinare ō sehe ni yahuha:

³—Yuhū judio masanota jija. Tarso wama tiri macai, Cilicia yahpai jiri macai masa bajuai yuhū. Wiho mejeta ahri maca Jerusalēihta būsai yuhū. Tuhsū, yuhūre Gamalie wama tirore buhe tire. Ā jicu yuhū mari ñuchūsuma cjiri dutiare noano buhei. Mipūre Cohamacure mūsa yoaro se-heta yuhū cūhū ño payoa timai. ⁴ Ā jicu Jesu yainare ñano yoaa ticūru yuhū. Caina tinare wajāa ticūru yuhū. Mūare, numia cāhure ñaha, peresu yoaa tii yuhū. ⁵ Sacerdotea bui puhtoro, judio masa būsana mehne yū tuahti pūri cjihtire Jesu yainare ñaha dutia pūrine yuhūre joabasare. Mari coyere Damasco macainare tí pūrine ñoi tai nimai Jesu yainare ñahai tai. Tinare ñaha, na ta peresu yoai tai nimai. Jerusalēpū tinare na ta duamai buhiri dahrei tai. Ō sehe yū nichū sacerdotea bui puhtoro, judio masa būsana cūhū noano masina —ni yahuha Paulo.

Paulo Jesu yairo to waha ducarire yahuha

(Hch 9.1-19; 26.12-18)

⁶ Ā ni tuhsū ō sehe ni yahu namoha:

—Ā yoa cohari pja jichu, Damascoru yu sui cahachu waro mʻanopu wacuenoca si siteroca boroa tire yuhare. ⁷To ā si siteroca borochuta yuhu yahparu bora caha sui yuhu. Yu bora caha suri baharo durucuro coa tare yuhare. “Saulo, Saulo zohseacu yuhare nʻano yoajari?” ni durucuro coa tare yuhare. ⁸“Puhtoro, zidiro baro jijari mʻahu?” ni sinitui yuhu. “Yuhu Jesu Nazare macariro, mʻnʻano yoariro jija yuhu”, ni yuhtire yuhare tiro. ⁹Yu ā wahachu yuhu mehne macaina buhriarore nʻure. Wiho mejeta yuhu mehne to durucuro tʻahoerare tina. ¹⁰“Puhtoro, zohse yoahcari yuhu?” ni sinitui Jesure. “Wahcārucaga. Damascoru wahaga. Tói mʻu wahachu, mʻuhare jipihia yu yoa dutihtire paio yahurohca mʻuhare”, nire tiro yuhare. ¹¹Tuaro to minoa siterocachu, yu capari wapoia wahare yuhare. Ā jia, yuhu mehne macaina yu wamomacare nʻaha, Damascoru tʻā wahcāre yuhare.

¹²Tói Anania wama tiriro, Cohamacure nʻo payoriro, marine Cohamacu dutiare yoa pahñoriro jire. Tó macaina judio masa jipihina ti nʻo payoriro jire. ¹³Ā jiro tiro yu cahi wihi taraca yuhare yahure. “Coyeiro Saulo, nʻuga pari turi tjoa”, nire tiro. To ā niri baharo pari turi nʻui yuhu. Ā nʻu dʻacacu tirore nʻui yuhu. ¹⁴Yu ā nʻuchu tiro Anania yuhare yahure: “Cohamacu to cahmaare noano masihtirore panopu bese tuhsuyhti mʻuhare. Ā jiro ‘Yu macu noarirore nʻu, tʻuhorohca’, ni yahuyhti mʻuhare Cohamacu panopu. Tiro jira mari nʻuchusuma mana ti nʻo payoriro. ¹⁵Ā jicu mʻu mʻu nʻurire, mʻu tʻuhorire yahuihca mʻu jipihinare. ¹⁶Ā jina mipare yoari pja jiena tjijihna. Wahcārucaga. Ā jicu bautisariro jiga. Jesure mʻu sinichu mʻu nʻaare yoari buhirire cohānohca”, nire yuhare tiro —niha Paulo.

Paulo judio masa jierainare to buherire yahuha

¹⁷Ā ni tuhsu Paulo ō sehe ni yahu namoha:

—Ā yoa tuhsu yuhu Jerusalēpu tja ta, Cohamacu wʻuhupu Cohamacure sinitui sui. ¹⁸Yu tói jichu Jesu yuhare bajua tire. Ā bajuaro yuhare yahure. “Jerusalē macaina yu yare mʻu yahuchu tʻuho duaerara. Ā jicu cjero pa seheru wahaga”, nire Jesu yuhare. ¹⁹To ā nichu tʻuhoca yahui tirore: “Puhtoro, mʻu yainare judio masa buhea wuhsei jinare yu nʻaha, cjárī cjirore masina Jerusalē macaina. ²⁰Ā jicu mʻuhare yahurirore Estebā sehere ti wajāchu nʻucu ‘Noano yoa wajāna’, nimai. Tirore ti wajāchu ti suhtire cjuabasai yuhu. Ti cūhare masina ahri maca macaina. Ā jia yu yahuchu tʻuhoboca yuhare”, ni yahui yuhu Jesure.

²¹Yu ā nichu tʻuhoro Jesu yuhare ō sehe ni yahure: “Yoaropu judio masa jierainare buhehtirore warocaihtja mʻuhare. Ā jicu wahaga mʻuhu”, nire yuhare yu puhtoro —niha Paulo masare.

Surara puhtoro Paulo mehne durucua

²²To yahu mʻuhari dihtare noano tʻuhomaha masa. Wiho mejeta judio masa jieraina cahi Jesu Paulore to warocahire to yahuchu tʻuho tina sañurucu dʻacaha tjoa:

—Ahriro mipu pinihtare yariawahnojaro —ni sañurucua tina.

²³Ā jia tina sañurucu namo, sua mehne ti suhtire wahba siteruca, dihta mehne docaha. ²⁴Surara puhtoro surara ya wʻuhupu Paulore na sāa dutiha to surarare. Ā jiro surara puhtoro “zohse yoa Paulo mehne sua ā nʻaca sañurucua nijari masa?” ni sinitu duamaha. Paulore tʻire sinituro taro, yuta dari mehne tjana dutimaha tirore. ²⁵Wiho mejeta tirore ti dʻahteri baharo, tiro cahi jirirore surara puhtoro ō sehe ni yahuha Paulo:

—Yuhu Roma macariro jija. Ā jina “Nʻano yoariro jira ahriro”, yuhare ni yahusā masierara masa. Ā yahusā masierana yuta dari mehne yuhare tjana masierara masa —niha Paulo tirore.

²⁶To ā nichu tʻuhoro surara puhtoro, to bui puhtoro ō sehe ni yahuro wahaha:

—Ahriro Roma macariro jira. Ā jicu noano yoaga tirore —ni yahuha tiro to puhtoro.

²⁷To ā niri baharo surara bui puhtoro sehe Paulore sinituro wahaha:

—zPotocāta mʻuhu Roma macariro jijari? Yahuga yuhare tʻire —niha tiro.

—Tiro tjija yuhu —ni yuhtihā Paulo.

²⁸To ā nichu tʻuhoro surara bui puhtoro sehe tirore ō sehe ni yahuha:

—Yuhu Roma macariro ji duacu niñeru pjiro wapai —niha tiro.

—Yuhu Roma yahpa macari macapu masa bajuai. Ā jicu Roma macariro jija —niha Paulo.

²⁹To ā nichu tʻuho tirore tjanaborina wahaha wahaha.

Ā jiro Paulo Roma macariro to jiro jichu masino, tirore comaa dari mehne ti dʻahteri cjirore wacūno, cui niha surara puhtoro sehe.

Paulo judio masa puhtoro yahuha

³⁰Ā yoa surara puhtoro judio masa Paulore ti yahusāre noano masi duaha. Ā masi duaro pa dachopu comaa dari tirore to pjā dutiri baharo, sacerdotea puhtoare, judio masa bucuna mehne cahmachu dutiha surara puhtoro. To ā cahmachu dutiri baharo tiro tópu Paulore na wahcā, ti pano duhu dapoha tirore.

23

¹ Ā jiro Paulo judio masa bꝯcꝯnare ñu piti boca, ð sehe ni yahuha:

—Coyea, Cohamacu to ñurocaroi jipih-tia dachoripe noano yoarucuja yuñu —niha Paulo.

² To ã nichu tuhoŕo jipihtina sacerdotea bui puhtoro jiro Anania sehe Paulo duserore cĵa dutiha. ³ To cahai ducuinare cĵa dutiha. Tirore ti cĵari baharo Paulo Ananiare tuhtiha:

—Masa ti ñurocaro dihtare noano yoiriro jira muñu. Masa ti baharo buñusehei ñano yoa cohtariro jira muñu. “Cohamacu dutiare yuñdꝯꝯcaí nina”, yuñare nipaihta yuñare cĵa dutira muñu. Ā cĵa duticu muñu sehe dutiare yuñdꝯꝯcaí nica —niha Paulo tirore.

⁴ To ã nichu tuhoa Paulo cahai ducuína ð sehe niha tirore:

—Cohamacu to beseriro sacerdotea bui puhtoro ñano durucui tĵiga muñu —niha tina Paulore.

⁵ Ti ã nichu tuhoŕo Paulo ð sehe ni namoha tjoa:

—Coyea, tiro to sacerdotea bui puhtoro to jiare masierahi yuñu. Ā jii ã nimacanocati yuñu. Cohamacu yare ti joari cjiri ð sehe ni yahura tirore: “Mu ya maca macaina puhtoro ñano ni, durucui tĵiga”, ni joaa tihā —niha Paulo tinare pĵano.

⁶ Ā yoa tói pua curua macaina jiha. Cā curua saduceo curua macaina jiha. Pa curua sehe fariseo curua macaina jiha. Pua curua ti jichu masino, Paulo judio masa bꝯcꝯnare tuaro sañurucu ð sehe ni yahuha:

—Coyea, yuñu fariseo curua macariro jija. Fariseo curua macariro macno tĵija yuñu cāñu. “Yariaina masa mujaahca”, yu ã niri buhiri yuñare ñano yoa duara masa —niha Paulo.

⁷ To ã nichu tuhoa fariseo curua macaina, saduceo curua macaina ti basi cahma tuhtiha. Ā jia ti basi pua curua tju waha.

⁸ Saduceo curua macaina ð sehe niina jiha: “Yariaina masa mujai. Espiritua, anjoa cāñu ne mariahna”, niina jiha. Wiho mejeta fariseo curua macaina sehe tina yoaro sehe nieraha. Ā jia Paulo “Yariaina masa mujaahca” to nichu tina ti basi cahma tuhtiha. ⁹ Ā cahma tuhtiha, tuaro sañurucuha. Ā yoa fariseo curua mehne macaina judio masa buheina wahcāruca, tuhti, ð sehe ni yahuha:

—Ahriro Paulo ñano yoaerare. Ā jiro espiritu o anjo, potocā tiro mehne duruciriro jiboca. [Ā jina ahrirore buhiri dahrena, Cohamacu ñu tuhtiina jiboca mari. Ā yoaina jiena tĵiga masa] —niha tina.

¹⁰ Ti ã niri baharo, tina jipihtina cahma tuhti, tuaro suaha. “Ti basi cahma sua sayo,

tirore wajāboca”, ni cuisāaha surara puhtoro sehe. Ā jiro Paulore, masa watoi ducurireore na wio, to ya wāñuŕu na ta dutiro warocaha to surarare.

¹¹ Pa ñamihī puhtoro Jesu Paulo cahai ducuro, ð sehe ni yahuha tirore:

—Wacū tuaga. Mipure ðre Jerusalēi yu ya buheare yahure muñu. Tó seheta Romapū cāñare yahui wahaiha muñu —niha puhtoro Jesu Paulore.

Judio masa Paulore wajā duamaha

¹²⁻¹³ Pa dacho bohrearoī judio masa cahmachu, ti basi ð sehe ni cahma durucuha:

—Ā sehe yoajihna. Paulore wajājihna. Cohamacu ð sehe ni yahu cūjihna. Ne mari sihisi. Ne chūsi, pu tirore mari wajāri baharopu. Tirore mari wajāerachu, mari sehere Cohamacu buhiri dahrejaro —niha tina ti basi.

Tina cuarenta bui curero judio masa jiha. ¹⁴ Ti ã niri baharo tina sacerdotea puhtoare, bꝯcꝯna cāñare yahua wahaha:

—Paulore sã wajāhto pano chware sã chueraja. “Tirore sã wajāerachu Cohamacu sã sehere buhiri dahrejaro”, nihi sã.

¹⁵ Ā jina masa, bꝯcꝯna mehne ð sehe ni pjirocaga. “Paulore pari turi sinitu duaja”, niga surara bui puhtoro. Masa ã niri baharo surara bui puhtoro na ta dutiga Paulore. Wiho mejeta Paulo to ðre to wihiro cahachu waro tirore wajānahca sã —niha tina sacerdotea puhtoare.

¹⁶ Wiho mejeta Paulo pĵacamacno ti ã ni durucuchu tuhoŕo. Ti ã nichu tuhoŕo waha, surara ya wāñuŕu Paulore yahuro sāaha. ¹⁷ To ã yahuri baharo Paulo sehe cāiro surarare pjiroca, ð sehe ni yahuha tirore:

—Ahriro wahmūnore puhtoro cahapu naaha. Ahriro mu puhtoro yahu duaro nina —niha Paulo.

¹⁸ To ã nichu tuhoŕo surara sehe Paulo pĵacamacno to puhtoro cahapu na su, ð sehe ni yahuha:

—Peresupu jiro Paulo sehe yuñare pjiroca, ahriro wahmūnore mu cahapu naa dutihre. Ahriro muñare yahuro taro niñre —niha surara to puhtoro.

¹⁹ To ã nichu tuhoŕo puhtoro sehe wahmūno to wamomacare ñaha tuā wahcā, masa marienopu tirore sinitu ñaha:

—¿Dohse nii tai niri muñu yuñare? —niha tiro Paulo pĵacamacno.

²⁰ To ã sinituchu tuhoŕo ð sehe ni yahuha:

—Judio masa cāno potori, “Ā sehe yoajihna” ni, ñamichapū judio masa bꝯcꝯna cahapu muñare Paulore naa dutiahca. “Bꝯcꝯna Paulore pari turi sinitu duara”, ni mahñoahca. ²¹ Wiho mejeta cuarenta bui curero mu tirore wajā duaina bꝯcꝯna caha duara. Tina tirore ti wajāhto pano

chũare chũsi. Ā yoa sihnisi. “Tirore mari wajærachũ, Cohamacũ mari sehere buhiri dahrejaro”, nire tina ti basi. Ā jia mipũ mũhare Paulore na ta dutia tina sehe duhti cohta tuhsũhre, Paulore wajãa taa. Ā jicũ ti yahua wihichũ tinare yũhtii tjiga mũhu –ni yahuha wahmũno surara puhtorore.

²² To ā nichũ tuhororo surara puhtoro ō sehe niha:

–Yũhare mũ yahurire painare yahui tjiga –ni yahuha wahmũnore.

Ā ni tuhsũ wahmũnore “Wahaga”, niha tiro.

Paulore puhtoro Feli wama tiro cahaũ warocaha

²³ Ā ni tuhsũ, surara puhtoro puaro to surarare pji wahcã, tinare ō sehe ni dutiha:

–Dos cientos surarare, setenta cawaloa bui pisinare, dos cientos doca yucũ cjuaina mehne ti yare cahno dutina wahaga. Micha ñami nueve jichũ Cesareapũ wahanahca musa. ²⁴ Paulore cawaloare to pisahinare cahnobasaga. Cesareapũ puhtoro Feli cahapũ, noano ñũ nũũ sogã tirore –niha surara puhtoro.

²⁵ Ā ni tuhsũ papera joaro, ō sehe ni joaha tiro:

²⁶ “Yũhũ Claudio Lisia mũhare tuariro puhtoro Felire noa dutija. ²⁷ Judio masa ahriro Paulore ñaha, wajãmare. Ā jicũ tiro Roma macariro to jichũ masicũ, yũ surara mehne tirore yoadohoi sũhi. ²⁸ Ā jicũ tirore ti yahusãrire masi duacũ judio masa bucũna cahai nahi tirore. ²⁹ Ā jicũ tiro judio masa ya dutia dihtare to yũhdũrucachũ mari ya dutiare to yũhdũrucærachũ ñũcũ, tirore perezupũ cũ duaerahi. Yaba buhiri yariario mariahna tirore. ³⁰ Ā jiro judio masa tirore wajã dua, ti bucũna cahachũ tuhororo paio yahure yũhare. To ā yahuri baharo Paulore mipũre mũ cahapũ warocai nija. Ā jicũ tirore yahusãrinare to ñaa yoarire mũhare yahu duti tuhsũhi yũhũ”, ni joaha surara puhtoro.

³¹ Ā yoa surara ti puhtoro to dutiriro se-heta yoaha. Ti ñamine Antipatri wama tiri macapũ Paulore na sũha. ³² Pa dachoi paina surara cawaloa bui pisaeraina ti macai tjua taha ti ya macapũ. Paina surara cawaloa bui pisaina dihta tirore na yũhdũ wahcãha. ³³ Pũ Cesareapũ na sũha Paulore. Ā jia surara puhtoro to warocari pũre puhtoro Felire waha. Ā jia Paulore na sũha puhtoro cahapũ. ³⁴ Ti ā wari baharo puhtoro ti pũre to ñũri baharo tiro painare sinitu ñũha:

–¿Di yahpa macariro jijari ahriro Paulo? –ni sinitu ñũha tiro.

–Cilicia yahpa macariro jira –ni yahuha tirore.

³⁵ Tinare sinitu tuhsũ, Feli Paulore ō sehe ni yahuha:

–Mũhare yahusãrina ōre ti wihichũ mũ yahuchũ tuhoihtja –niha Feli Paulore.

To ā niri baharo Herode ya wãhupũ tirore cũha. Ā jiro to mũare tirore cohta dutiha puhtoro.

24

Paulo “Ñano yoaerahi yũhũ”, ni yahuha Felire

¹ Cinco dachori baharo, Anania sacerdotea bui puhtoro, paina judio masa bucũna, dutiare mihñiriro Tértulo wama tirore mehne Cesareapũ sũha. Ā jia tina Paulore yahusã dua, puhtoro Feli cahapũ sũha. ² Ā jiro Paulore tópurẽ ti na sũri baharo Tértulo tirore yahusã dũcaha. Ā yahusã dũcaro ō sehe ni yahusãha Felire:

–Mũhũ noano masiriro, sã puhtoro mũ noano dutichũ sã ahri yahpa macaina noano jinocaja sã cahmacheno marieno. Mũ dutia mehne noaa sehere cohtotaro nina ahri yahpa. ³ Ā jina sã noano jinocahna wahcheja. Ā jina mũhũ mehne noano wahcheja. ⁴ Mipũre mahanocã mũhare cariboihtja yũhũ. Mahanocã mũhũ mehne sũhũdu duaja. Sãre tuhorocasina mũhũ. ⁵ Ahriro sãre caribobiara. Jipihtia yahpari macainare judio masare ti sua sañurucuchũ yoara ahriro. Ā jiro masa ti basi cahma tuhtichũ yoara ahriro. Ā jiro nazareno wama tiri curua puhtoro jira. ⁶ Ā jina Cohamacũ wũhare ñano to yoa duachu ñũna sã ñahahi ahrirore. [Sã ñahari baharo sã ya dutiare to yũhdũrucariro jichũ tirore buhiri dahre duamahi sã. ⁷ Wiho mejeta surara puhtoro Lisia wama tirore tirore sãre tuaro mehne manocahre. ⁸ Baharo tirore yahusãrinare mũ cahapũ waha dutihre Lisia. To ā nichũ tuhona tahi sã.] Mũhũ pinihta ahrirore sinitucũ, jipihtiare to ya buhirire masicũhca mũhũ –niha Tértulo Felire.

⁹ To ā niri baharo paina judio masa “Tértulo to niriro seheta potocã tjira”, niha tina cãhũ. ¹⁰ Ti ā ni yahusãri baharo puhtoro Feli Paulore yahu dutiha. ō sehe ni yahuha Paulo:

–Payũ cũhmari ahri yahpa macainare mũ dutirire masija yũhũ. Ā jicũ yũ yoarire mũhare yahucũ wahcheja. ¹¹ Doce dachorita wahara Jerusalẽpũ Cohamacũre yũ ño payori baharo. Mũhũ ahri potocã ti jichũ masi duacũ painare sinitu ñũga. ¹² Judio masa yũhare Cohamacũ wũhũpũre boca ti ñahachũ masare ñano ni sañurucũ nierahi. Ā yoa masare sua sañurucuchũ yoai nierahi. Ā yoa cã judio masa buhea wũhũsere, ti ya macã cãhure ne ti nino sehe ñano yoaerahi. ¹³ Ā jia yũhare yahusãrina sehe

ti yahusāri cjirire “Ō sehe yoare ahriro”, ni yahu masierara mūhare. ¹⁴ Mip̄re yu yoarire yahuihtja mūhare. Dóih̄ta sã ñchusama ti ño payorirore Cohamac̄are ño payoja yuh̄u cãh̄u. Ā jicu to yare yoaJa Jesu ya noaa buhea ti nino seheta. Ahrina “Jesu ya mah̄ñoepa jira”, ni durucura ahriina judio masa. Wiho mejeta Cohamac̄a dutia, Moise cjirop̄re to cūri cjirire ti cãh̄are ño payoja yuh̄u. Cohamac̄a yare yahu mūhtaina cjiri ti joari cãh̄are ño payoja yuh̄u. ¹⁵ Ahriina paina judio masa ti tūhoturo seheta Cohamac̄a jipihtina masare yariainare noaina, ñaina mehne ti masa majachu yorohca. Yuh̄u cãh̄u āta ni tūhotuja. ¹⁶ Ā jicu buhiri mariaja yuh̄u. Cohamac̄a yuh̄ure t̄ire masina. Ā yoa masa cãh̄u t̄ire masina. Ā jii potocãta yahuja yuh̄u mūhare. Ā jicu noano tūhotunocaja.

¹⁷⁻¹⁸ Paye cãh̄marine pa seh̄ep̄u tiniriro jicu Jerusalēne tju wihi, yu coyearre judio masa pjac̄uoinare niñerure wai tai nihi. Tju wihi Cohamac̄are ño payoi tai to ya wãh̄ap̄u sumahi. Ā jicu Cohamac̄u to cosa dutiriro seheta yu basi yu yãhd̄aḡcarire yu cosari baharo wahiquirore wa duama hi tirore ño payoi tai. Tõp̄u yu jich̄u ahriina judio masa yuh̄ure bocahre. Ti bocachu paina yuh̄u mehne mariahre. Sua, sañurucuina mariahre. ¹⁹ Wiho mejeta paina judio masa Asia yahpa macaina tõi jihre. Tina yu ñano yoach̄u ñ̄arina jia yahusã tajar. ²⁰ Ahriina õp̄u jiina sehe judio masa b̄uc̄ana mehne yu jich̄u ñ̄aina yu ñano yoarire masia, tina cãh̄u yahusãjaro. ²¹ Cãnocã pinihtare yuh̄ure tina yahusã masina: Pano tina mehne jicu õ sehe ni tuaro sañurucuhi yuh̄u: “Yariaina masa m̄jaahca”, yu niri buhiri, buhiri dahrera m̄sa”, nihi tinare —ni yahuha Paulo Felire.

²² To ã ni yahuri baharo Feli õ sehe ni yahuha Paulore:

—Mip̄re tó puro tjira. Surara puhtoro Lisia to wihiri baharo mūhare yu yoahtore masi-ihca yuh̄u —niha Feli Paulore.

Feli sehe Jesu yaina ti yoarire noano masi pah̄õroiro jiha.

²³ Ā ni tuhs̄u, Paulore cohtariro surarare Feli noano ñu nãh̄u dutiha “Peresup̄u jiriro duhtiri”, nino. Wiho mejeta mahanocã ware to tinihtore. Paulo mehne macainare tirore peresup̄u jirirore yoadoho dutiro ã dutiha Feli.

²⁴ Mahaa dachoricã baharo Feli to namono Drusila wama tiricoro mehne ta, Paulore pjaha. Feli namono sehe judio masono jiha. Paulore ti pjiri baharo, Jesucristore to wacū tuaare Paulo sehe yahuha tinare. ²⁵ Ā yahuro quihõno yoare, ñaare yoa duaparota yoeraare, pihtiri dacho jich̄u Cohamac̄a masare to buhiri dahrehtore yahuha Paulo. To ã ni yahuch̄u tūhoro Feli cuiro, Paulore õ sehe ni yahuha:

—Mip̄re waharisa. Baharo yuh̄ure dahraa mariach̄u mūhare pjiihtja tjoa —niha Paulore.

²⁶ Ā nino Paulo to niñeru wach̄u cahmamaha Feli. Ā jiro tiro niñerure cahmano, payu tahari Paulore pji, tiro mehne durucura timaha Feli. ²⁷ Pua cãh̄ma baharo Porcio Festo wama tiriro puhtoro Felire cohtotario jiha. Wiho mejeta Feli sehe judio masare tiro mehne wahchech̄u yoa duaha. Ā jiro puhtoro Feli to puhtoro wijaah̄to pano, tiro Paulore peresu ji dutisiniha.

25

Paulo Festore to yoarire yahuha

¹ Ā yoa Festo ti yahpap̄u tia dacho to jiri baharo, Cesareap̄u jiriro waha, Jerusalēp̄u sãha. ² Tõi to jich̄u sacerdotea puhtoa, judio masa puhtoa mehne Paulore ti yahusãrire yahuha Festore. ³ Paulo to mahap̄u wahach̄u tirore b̄uc̄na caha, wajã duaa nimaha tina. Ā jia tina Festore tuaro sinimaha:

—Paulore Jerusalēp̄u warocaga —ni sinimaha tina Festore.

⁴ Ti ã nich̄u tūhoro, Festo õ sehe ni yahuha tinare:

—Mip̄re Paulo Cesareap̄u peresu jira. Yuh̄u tõp̄u wahai tai nija. ⁵ Paulo to ñano yoariro jich̄u, masa puhtoa Cesareap̄u yuh̄u mehne waha, tirore yahusãga —niha Festo.

⁶ Ā jiro Festo ocho o diez dachori tina mehne to jiri baharo Cesareap̄u tjuaa wahaha. Pa dachoi tiro buhiri tiare cahnoru wãh̄ai dujuro, Paulore na ta dutiha. ⁷ Ā jia Paulo Festo cahap̄u to wihich̄u, judio masa Jerusalēp̄u tarina sehe Paulo cahai ducu, tirore tuaro mehne yahusã ducaha. Ā yahusãpahta “Ahriro to ñano yoach̄u ñ̄ahi”, ni yahu masieraha. ⁸ Ti ã ni yahusãri baharo Paulo to yoarire yahuha:

—Judio masa ti dutiare, Cohamac̄a wãh̄u macaa dutiare, Roma puhtoro to dutiare yãhd̄aḡcaerah̄i —niha Paulo.

⁹ Festo sehe judio masare wahchech̄u yoa duaro, Paulore õ sehe ni sinituha:

—¿Jerusalēp̄u waha duajari mūh̄u? M̄u yoarire yuh̄ure tõp̄u yahuihca mūh̄u —niha Festo Paulore.

¹⁰ To ã nich̄u tūhoro Paulo õ sehe ni yahuha:

—Jipihtina bui puhtoro César to ya wãh̄ai buhiri tiare cahnoru wãh̄ai jija mip̄re. Ahri wãh̄u baroi yu yoarire tūhoga. Judio masare yu ñano yoeararige noano masina mūh̄u. ¹¹ Dutiare yãhd̄aḡcarigo yu jich̄u, yuh̄ure wajãch̄u noaboa. Wiho mejeta ahriina ti yahusãri sehe mah̄ñoa ti jich̄u yuh̄ure yahusãrinare yuh̄ure wiho waro wia masierara mūh̄u. Yu yoarige jipihtina bui puhtorore Césarre yahu duaja. Tiro sehe

yū buhiri tiare to cahnochū cahmaja —niha Paulo.

¹² To ā nichū tūhoro Festo sehe noano masi yahuinare sinitu tuhsū, ō sehe ni yahuha Paulore:

—Mūhū jipihtina bui puhtorore mū yoarire mū yahu duachū, tiro cahapū warocanahtja sā mūhare —niha Festo Paulore.

Paulo puhtoro Agripare to yoarire yahuha

¹³ Baharopū puhtoro Agripa, Berenice wama tiricoro mehne Cesareapū Festore űna sūha.

—ĶNe, wiħimari mūhū cāhū? —niha tina Festore piti bocasinia.

¹⁴ Tōi payū dachori ti jiri baharo Festo ō sehe ni yahuha Agripare Paulore:

—Ōre Feli to peresu yoariro jira. ¹⁵ Ā jia Jerusalēpū yū wahachū judio masa ti sacerdotea puhto, ti bācūna mehne aħrīrore yahusāħre. “To ya buħirire wajāga tirore”, ni siniħre tina yūħare. ¹⁶ Ti ā nichū tuħocū yūhū tinare ō sehe ni yahuhi: “Roma macaina sehe peresu ti yoainare masare waerara. Ā jicū tirore waeraja mū sare. Sā űnahrīrore tirore yahusārinare to űħto pano tirore buħiri dahre masieraja sā. To basi to yoarire to yahuerasinichū tirore buħiri dahre masieraja sā”, nihi tinare. ¹⁷ Ā jicū tina ōre ti wiħichū űncū yoari pja yoaerahi yūhū. Wiħo mejeta pa dachoi buħiri tiare cahnori wūhūi dujicū, ti yahusārirore pjirocāhi. ¹⁸ Ā jia ti wūhūi to wiħichū űna tirore űn tuħtina wahcārūcare. Ti ā wahcārūcacū űncū “űbīaro ni yahusāħca”, ni tuħotumahi yūhū tinare. Tirore yahusā duapahta yahusā masierare tina. ¹⁹ Wiħo mejeta aħrīrore Cohamacū yare to yahuri buħiri judio masa tirore tuħtīħre. Jesu wama tirore yariariro cjiro to masa mūjarire to yahuri buħiri yahusāħre aħrīrore. Aħri dihtare yahusāħre. ²⁰ Aħrire masieracū tirore noano sinitu űhūi. “ĶJerusalēpū waha duajari yūhū mehne? Tōpū yahuga mū yoarire yūħare”, nimahi tirore. ²¹ Wiħo mejeta tiro waha duareare. “Yū yoarire jipihtina bui puhtorore Cēsare yahu duaja”, nire tiro yūħare. To ā niri baharo ōihta tirore cohta dutiħi jipihtina bui puhtoro cahai tirore yū warocaħto pano —niha Festo Agripare.

²² —Yū basi tuħo duaja tirore —niha Agripa Festore.

—űamīchacapū tirore tuħoga mūhū —ni yuħtīha Festo.

²³ Pa dachoi Agripa, Berenice mehne ti buħiri tiare cahnori wūhūpū sū, “Puħtoa jija sā”, nia cua pisaro yoa űħa tina, surara puħtoa, ti maca macaina puħtoa mehne. Tō

sehe yoa sāa tīħa tī wūhūpū sāa. Ti sāa sūri baharo Paulore pjirocāha Festo. ²⁴ Ā jiro Festo ō sehe ni yahuha:

—Puhtoro Agripa, mūsa jipihtina aħri wūhūre cahmachuina tuħoga. Ōre aħriro payū judio masa ti yahusāriro jira. Jerusalēpū, Cesareapū cāhūre tina tirore yahusāħre. “Tirore wajāga”, ā nirucua nina tina. ²⁵ Ti ā nipachūta ō sehe tuħotuja yūhū. Aħriro ne űnano yoariro jierara. ĶYaba buħiri wajābocari mari tirore? Ā jicū jipihtina bui puhtorore Cēsar Augustore aħriro to yoarire to yahu duachū jipihtina bui puhtoro cahapū warocaihtja tirore. ²⁶⁻²⁷ Ā jicū aħriro to yoarire noano masierasinija yūhū. Ā masierasinicū mari puhtorore yahu joa masieraja. Ā jicū mū sare to yahuchū tuħo dutiħi nija mīpūre. Puhtoro Agripa mīpū pinihtare aħriro jira mū sinitu űħtiro. Mū sinitu űn tuhsūchū mari masiri baharo aħrīrore ti yahusāriro noano yahu joaihtja. Aħriro to űnano yoarire yū masierapachūta mari puhtoro cahapū tirore yū warocachū noaerara. Ā jicū mīpūre ti yahusāriro noano masi duai nija —niha Festo tinare.

26

Paulo Agripare to yoarire yahuha

¹ To ā niri baharo Agripa Paulore ō sehe ni yahuha:

—Mū basita yahuga —niha tiro Paulore.

To ā niri baharo Paulo sehe, “Dihta mari-ahga”, nino to wamomacarine wahcārūca, to yoarire yahuha:

² —Puhtoro Agripa, yūħare judio masa ti yahusāriro, yū yoarire mūhare yahucū, mīpūre noano yajeripohna tija. ³ Mūhū judio masa sā yoaa tiare, sā buħea cāhūre mū noano masichū pinine wahcheja yūhū. Ā jicū mūhū yūħare noano tuħoga —ni dūcaha Paulo.

Paulo Jesu yairo to jīħto pano to jia tirire yahuha

⁴ Ā ni tuhsūro ō sehe ni namoha tiro:

—Wahmūno yū jia tia cjiħre jipihtina judio masa masina. Jipihtia dachoripe yū masa bajuari baharo yū ya dihtapūre, Jerusalēpū cāhūre yū jiri cjiħre masina tina.

⁵ Fariseo curua macaina paina yūħdoro sā dutiare yūħdūrcā dutieraina jira. Wahmanopūre fariseo curua macariro jima. Ā jicū fariseo curua macaina ti dutiare, ti yoaa barore yoa pahñoriro yū jichū tina masina. Tina mūhare yahu duaa, tīre yahu masina tina. ⁶ Aħri buħirita yūħare yahusā mūjana. Sā űnchūsumā cjiħre “Yariainare masoihtja”, Cohamacū to ni cūħire “Potocā tjiħa”, yū niri buħiri aħrina yūħare yahusā mūjana. ⁷ Yū coyea judio masa jipihtina doce curuari macaina Cohamacū masare to

masohtore wahche cohtarucura. Ā yoa Cohamacure ño payorucura. Ā cohtarucuina jia sã yoaro seheta yoara tina. Puhtoro Agripa, ā cãno potori yoaina sã jipachuta tina sehe to masohtore yu cohtari buhiri yuhure yahusã mujana judio masa. ⁸ ĶDohse yoana Cohamacu to masorire sã yahuchu tuho duaerajari msa judio masa? –ni yahuha Paulo.

Paulo Jesu yainare to ñano yoari cjirire yahuha

⁹ Ā ni tuhsu õ sehe ni yahu namoha:

–Jesure Nazare macarirore ñerasinicu, ñaa dihtare yoa duamai to yainare. ¹⁰ Ā jicu Jerusalẽpu ā yoaa timai yuhu. Sacerdotea puhtoa yuhure ti dutiri baharo payu Jesu yainare peresu yoaa tii. Ā jicu puhtoa tinare ti wajã dutichu, wajã dutii yuhu cãhu. ¹¹ Payu tahari jipihtia judio masa buhea wuhusei Jesu yainare ñano yoa dutia tii. Ā yoacu Jesu yaina Jesure ti cohãchu yoa duai nimai. Tina mehne tuaro suai yuhu. Ā jicu paina masa ya macaripu cãhure tinare ñano yoai sua tih yuhu –ni yahuha Paulo.

Paulo Jesu yairo to waharire yahuha

¹² Ā ni tuhsu õ sehe ni yahu namoha:

–Damascopu Jesu yainare ñano yoa duacu sumai. Tinare ñano yu yoa duachu ñua sacerdotea puhtoa yuhure waha dutire. ¹³ Ő sehe jire puhtoro Agripa: Cohari pja jichu waroi mahai yu wahachu muano macaa si sitea, sã dacho macariro yuhdoro, yuhure yuhu mehne wahaina cãhure si sitere. ¹⁴ Sã jipihtina yahrapu bora caha su, judio masa ya mehne yuhure to durucuchu tuhoi. “Saulo, Saulo, Ķdohseacu muhu yuhure ñano yoajari? Muhu yuhu mehne suacu yuhure yuhtieracu, mu basi ñano yuhdura”, nire yuhure. ¹⁵ “Puhtoro, Ķdiro baro jijari muhu?” ni sinitui. “Yuhu Jesu, mu ñano yoariro jija. ¹⁶ Wahcãrucaga muhu. Muhure yu cahamacano cjihto yoai tai mipu bajuaja yuhu. Michare yuhure mu ñurire, baharo muhare yu ñohti cãhure painare yahuihca muhu. ¹⁷ Judio masare judio masa jieraina cãhure muhare buhe duticu, warocaihtja. Ti cahai mu jichu, muhare ti ñu tuhtichu muhare yoadohoihtja. ¹⁸ Yu yare tinare masichu yoaga muhu. Ā jicu nahitianopu tiniina yoaro sehe jinare ti ñaare duhuchu yoaga. Buhriaropu tiniina yoaro sehe noaa sehere cohtotachu yoaga tinare. Watinore cahmaerachu yoaga muhu. Ā yoacu Cohamacu ya sehere yuhtichu yoaga muhu tinare. Mu ā yoachu tina yuhure wacu tuaahca. Ti ā wacu tuachu ñucu ti ñaa yoari buhirire boihca. Ā jia tina Cohamacu to beserina mehne macaina jiahca. To wahtire cjuahcina jiahca tina”, nire Jesu yuhure –ni yahuha Paulo.

Paulo to yoarire to dahraare yahuha

¹⁹ Ā ni tuhsu õ sehe ni yahu namoha:

–Puhtoro Agripa, muano macaa yu tuhoare yuhdurucaerahi. ²⁰ Damascoi buhe muhtai. Baharo Jerusalẽi buhei tjoa. Baharo Judea yahpai, judio masa jieraina cahapu cãhure masare “Ñano yoeraja sã”, ni ti tuhotumari cjirire tuhotu cohtota duti, Cohamacu yare cahma dutii. “Noaare msa yoachu ñua ‘Noaina jija sã’ ni, msa tuhotumari cjirire msa tuhotu cohtotarire paina masiahca” nicu, tinare noaare yoa duticu buhei. ²¹ Cohamacu yare wuhai yu jichu yu ā ni yahuri buhiri judio masa yuhure ñaha, wajã duamare. ²² Wiho mejeta dachoripe Cohamacu to yoadohoro mehne ā buherucuja. Ā jicu mipure msa jipihtina puhtoare wiho jiina cãhure to yare yahui nija. Panopu macaina Cohamacu yare yahu muhtaina cjiri, Moise cjiro mehne ti yahu muhtariro seheta yahuja yuhu cãhu. Ő sehe ni yahu muhtaa tiha tina: ²³ “Cristo Cohamacu warocariro sehe ñano yuhduruhca. Ā jiro yariaro masa muja muhtariro waharohca tiro. Ā jiro masare to yuhdohtore judio masare, judio masa jieraina cãhure masichu yoarohca”, ni yahu muhta joaa tiha panopu macaina cjiri. Yuhu cãhu ti yoaro seheta yahuja –ni yahuha Paulo Agripare.

Paulo Agripare Jesu yairo cjihto yoa duamaha

²⁴ To ā ni yahuri baharo Festo tirore tuaro sañurucu õ sehe ni durucuha:

–Paulo, muhu tuho masierariro jira. Muhu payu buhecu tuho masierariro wahara –ni sañurucuha tiro Paulore.

²⁵ To ā nichu tuhoro Paulo õ sehe ni yuhtihca Festore:

–Puhtoro tuho masierariro jieraja yuhu. Yu yahua potocã tjira. Ā jicu yuhu ahrire cua pisaro mehne nija. ²⁶ Puhtoro Agripa sehe, ahri yu yahurire noano masina. Ā jicu yuhu tirore cuuro marieno yahuja. Ahri yuhare jipihtina masa masina. Ā jicu jipihtia ahrire yu nirire puhtoro Agripa to masichu masija yuhu –niha Paulo Festore.

Ā ni tuhsu õ sehe niha Agripare:

²⁷ –Puhtoro Agripa, Cohamacu yare yahu muhtaina cjiri ti yahuri cjirire tuhora muhu. Ti yuhare mu tuhochu masija yuhu –niha Paulo Agripare.

²⁸ –ĶAhrire yuhure yahucu mahanocã mu yahua mehne Jesu yairo yu wahachu yoa duai nijari muhu? –niha Agripa Paulore.

To ā nichu Paulo õ sehe ni yuhtihca:

²⁹ –Mahanocã durucucu o yoari pja durucucu msa, jipihtinare “Yu jiro seheta Jesu yaina jijaro”, ni sini payoja Cohamacure. Wiho mejeta yu yoaro sehe peresupu msa

jichu cahmaeraja yuhu —niha Paulo Agripa-
pare.

³⁰⁻³¹ To ã niri baharo Agripa, Festo, Berenice jipihitina paina mehne wahcârûca, wijaa, ti basi õ sehe ni durucuha:

—Ahrira to yoari buhiri ne peresu yoa masieraja mari. ¿Ã jina mari yaba buhiri tire wajãbocari? —ni durucuha tina ti basi.

³²—Ahrira “Jipihitina bui puhtoro Césare yu yoarire yahu duaja”, to nierachu mari wioboa tire peresupu jirirore —niha Agripa Festore.

27

Paulo tire ti yahusãire Romapu yahuro wahaha

¹ Paulore Italiapu dohoría mehne warocaa taa, tire paina mehne ti peresu yoarina mehne Julio wama tirirore cûre tina. Julio cien surara puhtoro jiro, to ya curua “César yaina surara”, wama tire. ² Æ jina Adramitio wama tiro macaria dohoriai samui sã. Tia Asiapu wahahtia jire. Samu tuhsu, tia mehne wahai. Aristarco Tesalónica wama tiri maca macariro sã mehne wahare. Tesalónica Macedonia yahpai jira. ³ Pa dachoi sã Sidõpu sui. Tõpu suro Julio Paulore noano yoare. Æ yoaro Paulore tó mehne macaina cahapu ñuno waha dutire. Æ jiro Paulo mehne macaina tire to cahmaare ti wachu “Noanohca”, nire Julio. ⁴ Dohoria mehne sã pahãchu tuaro wihnono sãre pa sehepu wãroca pjohõre. Æ jina Chipre wama tiri nũco ducataroi poto buhusehei wahai sã. ⁵ Pu Ciliciare yuhdua, Panfilia cãhure yuhdua, Mira wama tiri macapu Licia yahpai jiri macapu wahã sui.

⁶ Tõpu suna, Alejandriapu tariare, Italiapu wahahtiare dohoriare bocai. Æ jiro sãre tiapu surara puhtoro naare. ⁷ Payu dachori pjoro dero waha, “Nu waruoca” ni, waha, Gnido wama tiri maca potoi sui sã. Tõpu su yuhdua, wihnono tuaro wã, sã waha duariroi sãre wãrocaerare. Æ jina sã cõ buhusehepu majare paa wahai. Æ jina Creta wama tiri nũco to ducataro pahre sehe sã pahãa waha, Salmo wama tiri ñoacare yuhduai sã. ⁸ Tõpu yuhdu, ti nũco duhtu cahai waha, “Nu waruoca” ni, waha, Noari Pitamaha wama tiropu wahã sui. Pitamaha Lasea wama tiri maca cahapu jira.

⁹ Tõpu yoari pja sã jiri baharo, sã wahahto sehe cuabiare. Æ jiro ti chu duhuri dacho bose numu yuhduri baharo, Paulo tinare õ sehe ni yahure:

¹⁰ —Tuhoga musa. Chu duhuri dacho bose numu baharo mari wahachu marine minihto cuabiara. Ahria dohoría, dohoría macaa, musa pache cãhu mari mehne

macaina cãhu mari butiboca wahana —nire Paulo.

¹¹ Wiho mejeta surara puhtoro dohoría puhtoro tuhorõ, oturiro cãhure tuhorõ, Paulo to yahua sehere tuho duaerare waha duaro. ¹² Ti pahsari pitamaha noari pitamaha puhiro jichu ti pahsari pitamaha jierare. To Æ jiri pitamaha jichu dohoría macaina payu waha dua, Fenicepu yoja duamare. Fenice Creta wama tiri nũco macari pitamaha jiro, wihnono to tariropu sã muja taro sehepu cõ buhusehepu, poto buhusehepu cãhure ñuroca, wihnono tachu noano ducataro maca jire. To Æ jiri pitamaha jichu masia tina tõpu cã puhiro ji duamare.

Pjiri mapu wihnono, coro pjoro taha

¹³ Æ yoa sur sehe pjiroca wihnono ta ducare. “Michare noari dacho mari wahahti dacho jira”, ni tuhutumaha tina. Æ ni tuhota tina comaa tañore tuã wahcõ, Creta nũco duhtu caha cahai yojai sã. ¹⁴ Wiho mejeta baharo curero wihnono noreste wama tiri wihnono tuaro wãre. ¹⁵ Æ jiro dohoriare wihnono tuaro wahã wihire. Wihnono to wãracarore waha masierana, majare paha, wihnono mehne wahai sã. ¹⁶ Cauda wama tiri nũcocã cahapu sur sehepu waha, ti nũcocã sãre mahanocã ducatare. “Marine nu waruoro wahara”, nina tóre pjiria dohoría macaria mahariacã busocare noano waja payo duhtei sã. ¹⁷ Tiare dohoriai sã waja payo duhtei baharo pjiria dohoriapu pjiri da mehne tina wahma ñaha payore. Sirte wama tiri padare “Dohoria doca wahã sari”, nia cui nire tina. Æ jia tina co turure ti duhu miori baharo dohoría dihtare wihnono wãrocare. ¹⁸ Wihnono, coro mehne tuaro tare. Pa dacho cãhure wihnono mananota tjoa to tachu ñua tina ti pachere diapu dureroca ño tuhsu pahãa wahai sã. ¹⁹ Pa dacho dohoría macaare diapu cohãre tina ti basi. ²⁰ Payu dachori ñichua dachori jichu, sã dacho macariro ñahpichoha poca cãhu ne bajúerare. Æ jiro tuaro wihnono tare. Æ jina “Minia wahaja mari. Æ jina yariaa wahanahca”, ni tuhutumai sã.

²¹ Æ jia tina yoari pja ti chu duhuri baharo Paulo ti pano ducu, õ sehe ni yahure tinare:

—Pano musare yu yahuchu tuhoerare musa. “Cretapu jiina mari wahachu cua nica”, yu nichu tuhoerare musa. Yuhure tuhona, ahria macaa jipihitiare boeraboa musa. ²² Wiho mejeta mipu musare yahuja. Cuiena tjiga. Jipihitina mari yuhduanahca. Ahria dohoría dihta marine wahtiabasarahca. ²³ Micha ñamine Cohamacu yairo anjo yuhure bajuahre. Cohamacu yairo jija yuhu. Æ jicu tire dachra cohtaroro jija yuhu. Anjo sehe yu cahai taro, õ sehe ni yahure: ²⁴ “Paulo,

cuiecu tjiga. Jipihtina bui pãhtorore ma yoari cjiirire mahure yahuro cahmana. Cohamacã noarimo jira. ²⁵ Æ jiro tirore ma siniriro seheta mipure muhu mehne macaina cãhure yoadohorohca", nihere yãhure anjo. ²⁵ Æ jina cuiena tjiga masa. Anjo yãhure to niriro seheta waharohca. Cohamacãre wacũ tuaja yãhu. Æ jicu to yahuriro seheta "Potocã tjira", ni tahotuja yãhu. ²⁶ Wiho mejeta marine nacopã wihono wãroca, cohãnohca —ni yahure Paulo tinare.

²⁷ Cũ ñami pua somana baharo pjiri ma Adriãtico wama tiri mai wihono sãre tuaro wãre. Tí pjare ñami dacho macai dohoria macaina maa sehe "Duhtu cahapũ jija mari", ni tahoture tina. ²⁸ Æ ni tahotua nacuri taño comaa tañore yuta da mehne duhte, duhuroca mio, quihõre. Treinta y seis metro waro cããre. Mahanocã waha, quihõre tjoa. Tí pjare veintisiete metro waro cããre. ²⁹ Æ jia tãare "Doca wahã suri", nia dohoria oturopũ pititia tañori comaa tañorine yuta dari mehne duhte, duhuroca miore diapũ. Æ jia "Cjero bohreaarjo" ni, tuaro sinire tina. ³⁰ Dohoria macaina maa sehe duhtimare. Tina mahariacãre dohoria macariare diapũ waja boro, dohoria quenoí comaa tañorine ti boroboriro seheta yoare tina mahariacãre "Marine ñuri", nia. ³¹ Wiho mejeta Paulo surara pãhtorore, to surara mehne yahure: —Ahrina maa mahariacã busocai ti wahachu maa yarianahca —nire Paulo.

³² To ã nichu tañoa surara sehe mahariacãre duhte darire yihso ta, tiare cohãre.

³³ Bohreahto panocã Paulo tinare tuaro chũ dutire.

—Pua somana waro ne chuerare masa.

³⁴ Æ jina mipure chũna taga. Tuaro musare chũ dutija. Maa cati duana chuga. Jipihtina maa yãhdãnahca —nire Paulo tinare.

³⁵ To ã niri baharo Paulo pãore na, jipihtina ti pano Cohamacãre "Noana" ni, duhu payo, tãre chũ ducare tiro. ³⁶ To ã chuchũ ñua tina cuiro marieina waha, jipihtina tina cãhu chũre. ³⁷ Sã jipihtina doscientos setenta y seis masa dohoriapũ jii sã. ³⁸ Tina jipihtina yapia waha "Ahrã dohoria nacũ nica" ni, payũ trigo chũare diapũ cohãre.

Dohoria paduropũ doca pja suha

³⁹ Bohreachũ dohoria macaina maa nacore ñua, "Õ sehe wama tiri nacũ jira ahri nacũ", ni ñu masierare. Wiho mejeta tina pari tucũ paduro jichũ ñua, "Mari tí tucũpũ wahana, tãpũre doca pja suboca paduroi", nire tina. ⁴⁰ Æ nia, comaa tañorine duhte darire yihso taroca mioha. Oturi pjã duhte dari cãhure yihso tanocare tina. Tí ã yoari baharo dohoria queno macari suhtirore wahcõ dapore poto wihono wãrocachũ

cahmaa. ⁴¹ Wiho mejeta dohoria queno sehe pa paduropũ caha su, ñaja masierare. Æ jiro oturore tuaro pahcõri cãã wahcõchũ tia oturo wahtia wahare. ⁴² To ã wahachu ñua õ sehe nire surara:

—Ahrã minichũ mari peresu yoaina duhtu cahapũ ba wahã su duhtinocaahca. Æ jina tinare wajã pahñonocajihna —nire surara.

⁴³ Wiho mejeta surara pãhtoro sehe Paulore wajã duaeraro, jipihtina peresu jiiinare wajã dutierare. Æ jiro jipihtina ba masiinare surara pãhtoro poto duhtu cahapũ ba wahã su dutire. ⁴⁴ Æ jia paina dohoria macaa pjini wahti sitea pjini mehne bora ñoja, tí pjini bui pisa ba ñujare. Sã to sehe yoana sã jipihtina duhtu cahai wahã sui.

28

Paulo Malta wama tiri nacũ jija

¹ Æ yoa tí nacopũ sã jipihtina maja surũcu suna tí nacũ wamare masii. Malta wama tiri nacũ jire. ² Tí nacũ macaina masa sãre noano yoare. Æ jina sã coro waari baharo yusua yuhduare sãre. Æ jia to macaina sehe pichaca wijã tuhsũ, sãre sohna dutire. ³ Paulo pichare na ta, na tiãre. To na tiãri baharo tí picha puhichapũ sãariro agã tuaro sichu tahoturo wijaa taro, Paulo wamomacai bahca wãha sãre yahawero marieno. ⁴ To bahca wahã suchũ ñua tí nacũ macaina ti basi õ sehe ni durucure:

—Ahriro masa wajãriro jiboca. Æ yoaro tuaricoro buhiri dahrerico maaano macaricoro tirore buhiri dahrero, cati dutierara. Tiro pjiri mapũ minino yãhdũ tuhsũri jimare. Mipure ticoro sehe tirore cati dutierara —nimare tina ti basi.

⁵ Wiho mejeta Paulo agãre pichacapũ wajã siterocare. Tirore agã purierare. ⁶ "Wipirohca" nia, cohtamare tina. Ne wipierare tirore. "Tiro yariaa waharohca" nia, tina cohtamare. Tirore purierare. Yoari pja baharo to wipierachũ ñua, to purierachũ ñua, soro tahoture tina. "Ahriro cohamaa mehne macariro jiboca", nimare tina.

⁷ Tí ba wahã suriro cahacãi Publio wama tirore ya weseri jire. Tiro tí nacũ macariro pãhtoro jire. Æ jina tiro sãre to noano yoachũ, tia dacho waro to ya wãhu jii sã. ⁸ Publio pãuro yoaro tí, juaro tirore jire. Æ jiro tiro camai coãre. Æ jiro Paulo dohatiriro ya tahtiapũ sãa, Cohamacãre sini, to wamomacarine tiro bui duhu payo, noariro wahachũ yoare tirore. ⁹ To noariro wahachũ ñua jipihtina paina tí nacũ macaina dohatiinare Paulo cahapũ na tare. Tí ã na tachũ ñuno Paulo noaina wahachũ yoare tina cãhure. ¹⁰ Baharo tina payũ sãre wapa marieno ware. Sã wahahto panocã jipihtina

sā cahmaare, sā wahana sā chũtĩre doho-riarũ dure sãare tina.

Paulo Romarũ sũha

¹¹ Tia sũ ti nũcorũ sã jiri baharo dohorĩa mehne wahai sã. Tia dohorĩa quenoĩ pũaro cohamana Cãstor, Põlux wama tina ti masũ ducure. Alejandrĩarũ taria jire tia. Puhĩro puro ti nũcorũ tia dohorĩa pahsare. ¹² Waha, Siracusa wama tiri macarũ suna, tia dacho waro ti macare jii sã. ¹³ Tĩ macare wijaa, waha, Regio wama tiri macarũ sã sũi. Pa dachoi surũ wihnono ta, sãre wãrocare. Pũa dacho baharo Puteoli wama tiri macarũ sũi. ¹⁴ Tõrũ Jesu yaina mahainacã sãre piti bocare.

—Cũ somana waro sã mehne tjuaga —nĩre tina sãre.

Ti ã nichũ tũhona cũ somana waro tina mehne tjuasinii. Baharo mahai maja, Romarũ sũi sã. ¹⁵ Tõ macaina Jesu yaina sehe Romarũ sã sũhtire tũhoa, Apio wama tiropũ pache duaropũ sãre piti bocare. Paina Jesu yaina Tia Wũhũ wama tiropũ sãre piti bocare. Ti ã piti bocachũ ñano Paulo wahchea mehne Cohamacũre “Noana” ni, noano yajeri sãa wahare. ¹⁶ Romarũ sã suri baharo ti peresu ti yoinare to macarĩrore peresu cohtaina puhtorore yahure. Wiho mejeta Paulo sehere cãirota cũre tõ macaina puhtoa. ã jiro tirore cãirota surara cohtare.

Paulo Romai buheha

¹⁷ Tia dacho baharo Paulo judio masa puhtoa mehne cahmachuno taro, tinare pjire. Ti cahmachuri baharo tiro tinare õ sehe ni yahure:

—Coyea, mari coyeare soro yoaerahi yũhũ. ã yoa mari ñũchũsũma cjiri ti yoa tirire, marine ti buheri cãhũre yũhdũrũcũaerahi yũhũ. ã yũ yũhdũrũcũaerapachũta Jerusalẽrũ yũhũre ñahahre judio masa. Ti ñahari baharo Roma macainare yũhũre peresu yoa dutihre tina. ¹⁸ Ti ã yoachũ Roma macaina yũhũre sinĩtu, yũ ñano yoaerariro yũ jichũ yũhũre “Buhiri tĩro jira”, ni masierare. “¿Ne yaba buhiri wajãbocarĩ mari tirore?” nihre yahure tina. ã jia yũhũre sinĩtuina sehe yũhũre wio duamahre. ¹⁹ Wiho mejeta judio masa sehe yũhũre wiochũ cahmaerare. Yũ coyeare judio masare yũhũre ti yoinare yahusã duaeraja. Wiho mejeta yũhũre ti wio duaerachũ ñũcũ, “Jipĩhtina bui puhtoro Cẽsare yũ yoinare poto yahu duaja yũhũ”, ni sinĩhi. ²⁰ ã jicũ musare ahrire yahu duacũ pijhi. Cristo marine yũhdõhtiro judio masa mari cohtarino to yare yũ yahuri buhiri yũhũ peresupũ jija. ã jicũ tĩre musare yahui tai pijhi —nĩre Paulo judio masa puhtoare.

²¹ To ã nichũ tũhoa tina sehe tirore õ sehe ni yahure:

—Judea yahpa macaina Judio masa mũhũre quiti yahua pũrine sãre ne waro caerare. ã yoa tõrũ tarina cãhũ mari coyea sãre mũ ã waharire yahuera tire. Tina “Tiro ñano yoinare jira” ni, mũhũre yahuera tire. ²² Wiho mejeta Jesu yare mũ yahuri curua macainare jipĩhtiropũ masa ñano ti durucuchũ sã masija. ã masina mũ buheare mũ yahuchũ tũho duaja sã —nĩre tina tirore.

²³ ã ni tuhsũ, “Pa dachopũ jijihna”, nire tina. Pa dachopũ Paulo mehne cahmachu mũhtaina yũhdoro masa payũ to jiropũ wihire. Ñami curerocã puhtoro Cohamacũ to sũho jiare noaa buheare tiro buhe dũca, pũ, ñamipũ Moise cjirore Cohamacũ to cũri dutiare, ã yoa Cohamacũ yare yahu mũhtaina cjiri ti joari cjiri cãhũre buhere. ã buhero, tinare Jesure “Tiro tũca mari cohtarino”, ni masichũ yoa duaro nimare Paulo. ²⁴ Cãina to buherire noano mehne tũhore. Wiho mejeta paina sehe tũho duaerare. ²⁵ ã jia tina ti basi pũa curua tju wa, wahaa taa nire. Ti wahahto pano Paulo Isaia cjiro to durucuri cjirore tinare yahure. Õ sehe nire tinare:

—Isaia Cohamacũ yare yahu mũhtarino cjiro to yahuri potocãta jira. Mari ñũchũsũma cjirire yahuro taro Espĩritu Santo Isaia cjirore õ sehe ni yahu joa dutiha: ²⁶⁻²⁷ “Ahrĩre ahrinare yahui wahaga: ‘Dapu bũtiina jira mũsa.

Yũ yare tũho duaerara mũsa. Cahmo copari susueraina yoaro seheta tũho duaerara mũsa.

ã jina yũ yare tũhõpanahta tũho ñahasi mũsa.

Mũsa ã jieraina jina, noano tũho ñahaboa mũsa.

ã jina yũhũre cahmaboa mũsa.

ã jicũ musare pichacarũ wahaborinare yũhdoboa yũhũ’, niha Cohamacũ Isaia cjiro to joari tjuupũ”

—nĩre Paulo tinare. ²⁸ ã ni tuhsũ, Paulo õ sehe ni yahu namore:

—Ahrĩre masiga mũsa. Cohamacũ ya buheare masare to noano yũhõdore judio masa jierinare buhenahca sã. Tina sehe tũhoahca —nĩre Paulo judio masare.

²⁹ [To ã nichũ tũhoa judio masa tĩre ti basi tuaro cahma sayo, wijaare.]

³⁰ Pũa cãhũma waro Paulo to ã waparucuri wũhũpũ jire. Tõ jiro, jipĩhtina to wũhũpũ wihĩinare wahchea mehne piti bocare tiro.

³¹ ã jiro tiro cuiro marieno puhtoro Cohamacũ to sũho jiare, puhtoro Jesucristo ya cãhũre buheare tire. To ã buhechũ ne paina tirore “Buhei tũga”, nierare.

Romanos

Paulo Roma macainare Jesu yainare joarocaha

¹ Yuhũ Paulo musare Roma macainare joarocaja. Yuhũ jija Jesucristo cahamacũno. Tiro yuhũre beseri jire. To ya noaa buheare buhe duti warocahtiro cjihtore yuhũre cũri jire tiro.

² Tĩ buheare noaa buheare panopũ Cohamacũ “Yahui tai nija”, nia tiha. To ă ni yahuriro seheta to yare yahu muhtaina cjiri panopũ macainare to yahurtire to ya pũ joa dutiha. ³ Tĩ buheata to macũnore yahua jira. Tiro masũno waro jiro taro, Davi cjiro panamino ji turariro jiha tiro. ⁴ Jesucristo mari puhtoro Cohamacũ macũno űaa buhiri mariერიro to jiare ō sehe űori jire Cohamacũ. To yariari baharo Cohamacũ to tuaa mehne tirore masa wijaachũ yoari jire. ă yoaro Jesucristo potocăta Cohamacũ macũno to jiare űori jire Cohamacũ masare. ⁵ Tirota săre pja űũno săre to yare buhe dutiro warocare jipihtina Jesucristore wacũ tua ti űo payohti cjihtire. ⁶ ă jiro musa căhũre Jesucristo yaina cjihtire beseha tiro.

⁷ Musare, Cohamacũ to cahĩnare, Roma macainare, to yaina cjihti yoare musare tiro. Musare jipihtinare ahri pũre joarocaja. ă jicu Cohamacũ mari Pũcu, mari puhtoro Jesucristo mehne musare noa dutija. Tina ti yoadohoa mehne noano jiga musa.

Paulo Romapũre űũno waha duaro nimaha

⁸ Ahrire yahu muhtaihtja musare: Jipihtia macari macaina Jesucristore musa wacũ tuarire masa yahuhre yuhũre. Ti ă ni yahuchũ tuhocu “Noana”, nija Cohamacũre. Jesucristo to yoadohoro mehne ă nija tirore. Cohamacũre sini payocu musa ya cjihti căhũre ă sini payorucuja. ⁹ Tiro yuhũre to dutichũ to macũno ya buheare noaa buheare tuaro buhesu to cahamacũnota jija yuhũ. ă jiro musa ya cjihtire Cohamacũre yũ ă sini payorucuchũ tiro masina. ¹⁰ ă sini payocu Cohamacũ cahmachũ mipũ pinihtare musa cahapũ yũ űũ wahahto cjihto căhũre sinija. Yoari pja musare űũ duacu yũ wahahtore cohtai yoanocamaja yuhũ. ¹¹ Espiritu Santo yuhũre to buheri cjirire musare buhe turia duaja Jesure musa wacũ tua namohto cjihto sehe. ă jicu musare tuaro űũ duaja yuhũ. ¹² Jesure wacũ tuaja mari. ă jicu musare űũ duaja Jesure mari wacũ tuaa mehne pũ buhũseheri mari cahma wahchechũ yoahito cjihto sehe.

¹³ Yũ coyea, ahrire musa masichũ cahmaja. Noaa buheare yũ buheri baharo paye

macari macaina musa coyea judio masa jieraina căhũ Jesure wacũ tuare. ă jicu payũ tahari musa cahapũ waha duamaha tina, Jesure ti wacũ tuariro seheta musa mehne macaina căhũ ti wacũ tuahto cjihto sehe. ă waha duapaihta waha masiera tihũ yuhũ. ¹⁴ Jipihtinare noaa buheare buhero jiro nina yuhũre. Buheinare, buhemahnoeraina căhũre, masiinare, masieraina căhũre buhehtiro cjihto jii nija yuhũ. ¹⁵ ă jiro jicu musare Roma macainare noaa buheare tuaro buhe duaja.

Noa buheare masa tãhoa Jesure wacũ tua dũcara

¹⁶ Noaa buheare tãhoa Jesure wacũ tua dũcara masa. ă jiro jipihtinare Jesure wacũ tuainare Cohamacũ to tuaa mehne pichacapũ wahaborinare yuhũdora. Ti ă yuhũdũchũ masichũ ahri buheare noaa buheare buo tiro marieno yahuja. Ahri buheare judio masa tãho muhtari jire. Ti baharo, judio masa jieraina căhũ tãho turari jire. ¹⁷ Ahri buhea ō sehe ni yahura: Jesure wacũ tuainare “űaa buhiri mariaina, noaina jira”, ni űũna Cohamacũ. Tirore wacũ tuaina dihtare ă ni űũna Cohamacũ. Ahri panopũ ti ni joariro seheta jira: “ ‘Noaina jira’, to ni űũina Cohamacũre wacũ tuaina dihta jira. ă wacũ tuaa, to ya catia mehne ă catirucuahca tina”, ni joaa tiha.

Masa ti űaa yoari buhirire yahuha Paulo

¹⁸ Cohamacũ muanopũ jirirore masa ti yuhũdũcarire, ti űaa yoari căhũre űũno, ti ă yoari buhiri tina mehne suara. Tó sehe jiina barore to buhiri dahrehtore masichũ yoara tiro. Masa ti űaa yoaa mehne painare noaa buheare tãhoerachũ yoara tina sehe. ¹⁹ Cohamacũ to basi to jia tiare masichũ yoaha. To ă yoachũ Cohamacũre masichũ nijoerara masare. ²⁰ Cohamacũre mari űũerapachuta muano macariro to jia tiare, tuariro to jia căhũre to basi masichũ yoara tiro. Ahri yahpare to bajamehneri baharo jipihtia to bajamehnerire űũna “Cohamacũ to yoari cjiri jira ahri” nia, Cohamacũ to jia tiare masina masa. ă jia masa Cohamacũre masipahta ă űaare yoarucua, buhiri tira. “Muũhũre masierahi. ă jicu űaare yoahi”, ni masisi Cohamacũre. ²¹ ă jia Cohamacũ to jia tiare masipahta tina tirore űo payoerara. ă jia tiro tinare to noano yoapachuta tina sehe “Noana”, nierara tirore. ă tãho masieraina jia, wiho jia macaare, űaa dihtare tuhoturucuina baro jira tina. ²² “Tãho masiina jija”, nipahta tãho masieraina wahara tina. ²³ ă wahaa Cohamacũre ă jirururoro tina űo payoerara. ă űo payoerara, ti űo payoboriro sehẽ cohtota, wiho jia masũri sehẽ “Cohamacũ jira”,

ti nia masari sehere ño payora. Wiho jia masari sehere yariahtina masa masarine, ã yoa minichahca masarine, chihchõina masarine, wahiquina masari cãhãre “Cohamacu jira”, ni ño payora tina.

²⁴ Ti ã yoachũ ñuno “Ti mũ sũro ñaare goa pja, yoawahnojaro”, nino Cohamacu cohãnocare tinare. To ã cohãri baharo tina ñabiario, pjĩro buoro wahachũ yoaare cahma yorarucura ti basi. ²⁵ Æ jia Cohamacu ya sehere cahmaeraa, mahñoa sehere noano tuhora tina. Cohamacu ya sehere mahñoa yoaro sehe jichũ yoara tina. Potocãta Cohamacu warore jipihtiare bajuamehnerirore jipihtia dachoripe noano ño payoro cahmana. Wiho mejeta tina sehe tirore ño payoerara. Æ tirore ño payoeraa, Cohamacu to bajuamehneri cjiri, wiho jia sehere ño payora tina.

²⁶ Ti ã ño payochũ ñuno “Ti mũ sũro goa pja, yoawahnojaro”, nino Cohamacu cohãnocare tinare. Æ jia tina numia mũa mehne manũ tiboina cohtota, ti basi numia dihta ñano yoara ti pjacuri mehne. ²⁷ Ti yoaro seheta jiina mũa cãhũ numia mehne namo tiboina jipahta, tire cohtota, mũa ti basita ti pjacuri mehne ñabiario yoara. Æ yoaa, ti basita ti ñano yoari buhiri ti pjacuri sehe ñano yuhdũra.

²⁸ Æ Cohamacure ti cahmaerari buhiri Cohamacu tinare cohãre. To ã cohãchũ tina sehe ñano wacũrucu, ñano yorarucura. ²⁹ Æ jia tina tuaro ñano yorarucura. Numia mehne ñano yorarucua, mũa mehne ñano yorarucua numia, ñaare goa pjarucua, paina yare tuaro cahmaina, painare ñano yorarucua, paina paye baro ti cjuachũ ñua goa pjaina, masare wajãina, cahma sayoina, mahñoina, masare ñũ tuhtiina, ñaa quiti dahreina, ³⁰ paina ti yoerapachũta ñano ni yahuwajaina, Cohamacure ñũ tuhtiina, painare purĩno yuhtiina, “Sã sehe masi yuhdũrucu sũja”, ni tuhotuina, painare ã ni yahuina, paye ñaare yoa dũcaina, ti pũcũsũmare yuhtieraina, ³¹ tuho masieraina, ti nino seheta yoeraina, masare ne cahieraina, ti basi cahma susini duhueraina, ne pja ñueraina jira tina. ³² Æ ñano yorarucuinare Cohamacu pichacaru cohãnohca. To ã cohãhtire masipahta tina ti ñaare ã yorarucura. Æ jia paina tinare ñũ cũ ti yoaro seheta ñano ti yoachũ ñua, “Mari yoaro seheta ñano yoara”, ni wahchera tina.

2

Masare buhiri dahre dutiro tire quihõno yorohca Cohamacu

¹ “Tina ñabiaina jira”, ni yahuwajaena tjiga painare. Mũa cãhũ ti yoaro seheta yoara. “Ñaare yoeraja sã. Æ jina buhiri

maeraja”, ni masierara mũsa. Mũsa yahu wajaina yoaro seheta ñaare yoana, mũsa cãhũ mũsa basita buhiri dahre dutina nica. ² Tõ sehe yoainare Cohamacu to buhiri dahrechũ potocãta quihõno to buhiri dahrechũ masija mari. ³ Painare “Buhiri tiaha”, ni yahu waja ti yoaro seheta mũsa yoachũ, mũsa cãhãre buhiri dahrerohca. Æ jina “Sãre buhiri dahresi”, ni tuhotuboca mũsa. Jierara. Mũsa cãhãre buhiri dahrerohca tiro. ⁴ Mũsa ñano yoapachũta Cohamacu mũsare pja ñuno, dõi waro buhiri dahrerara. Æ jina “Cohamacu yuhũ mehne suasi”, ni tuhotuboca mũsa. Jierara. Cohamacu mũsare pja ñuno, dõi waro buhiri dahrerara mũsa ñaa buhiri tiare cahyachũ ñũ duaro, tirore mũsa yuhtichũ cahmano. ⁵ Æ buhiri dahre dueraparota, mũsa Cohamacure yuhti duerachũ, mũsa ñaa buhiri tiare mũsa cahyaerachũ, buhiri dahrerohca mũsare. Tõ pano mũsare to buhiri dahreboriro yuhdoro tí to buhiri dahrehti dacho waropũre ñano, tuaro waro mũsare buhiri dahrerohca Cohamacu. Quihõno buhiri dahrerohca. ⁶ Cãinare ti yoa wapataro seheta yorohca Cohamacu. ⁷ Cãina noare yorarucua jira. Tina Cohamacure noano wahchechũ yoa duaina, jipihtia dachoripe Cohamacu mehne ji duaina jira. Tina pinihtare dachoripe tiro mehne jirucuchũ yorohca Cohamacu. ⁸ Wiho mejeta paina sehe tina yoaro sehe jierara. Tina ti mũ sũro jia ti, ñaare goa pja yorarucua baro jira. Cohamacu ya warore cahmaerara. Tina mehne Cohamacu tuaro sua, buhiri dahrerohca. ⁹ Jipihtina ñano yoaina ñano yuhdũahca. Judio masare ãta waha muhtanohca. Tuhsũ, judio masa jieraina cãhãre ãta waharohca. ¹⁰ Jipihtina noare yoaina sehere Cohamacu “Noana”, ninohca. Æ jia masa tinare ño payoahca. Æ jiro tinare noano jichũ yorohca Cohamacu. Judio masare ãta waha muhtanohca. Tuhsũ, judio masa jieraina cãhãre ãta waharohca.

¹¹ Cohamacu judio masare, ã jichũ judio masa jieraina cãhãre jipihtinare cãno sehe ñũna. Mari yoarire ñuno, quihõno besera jipihtinare, ñaina, noaina cãhãre. ¹² Paina Cohamacu Moise cjirore to dutia cjirire masieraina sehe buhiri tiare ti yoachũ, to dutiare ti masierapachũta tinare buhiri dahrerohca Cohamacu. Æ yoa tí dutiare masiina cãhãre buhiri tiare ti yoachũ, tí dutiare ti yuhdũracari buhiri buhiri dahrerohca Cohamacu. ¹³ Cohamacu dutiare tuhopahta yuhtierainare “Buhiri marieina, noaina jira ahriina”, ni ñuerara Cohamacu. To dutiare yoaina sehere “Noaina jira”, ni ñũna tinare Cohamacu. ¹⁴ Judio masa jieraina Cohamacu Moise cjirore to cũri dutia maerapahta, ti mũ

suro noaare yoaa, Cohamacu dutiare yoaa nina. Á yoaa Moise cjirore to dutiare joari püre cjuarapahta tina ti mu suro to dutiare masina. ¹⁵ Á jia to dutiare ti tuhotuapu potocáta cjuara tina. Á cjuaa ñaare yoaa dóicáta ti ñaa yoarire masina tina. Á jiro ñaare yoariro “¿Dohse jiro baro ñaare yoari yuhú?” ni tuhotura tiro. Á jiro noaare to basi to yoari cühure masina tiro. ¹⁶ Á jiro Cohamacu Jesucristore to waroachti dachoi masa ti yoarire ti yahu duaerare Jesucristo masi pahñono, tiro tinare beserohca noaina, ñaina cühure. Tó sehe yoarohca tiro noaa buhea to nino seheta. Ahrita jira masare yu buhea.

Cohamacu Moise cjirore to dutirire yahuha Paulo

¹⁷ Músa sehe judio masa jina, Cohamacu Moise cjirore to dutiare ño payoina jina, “Cohamacu to yaina jija”, ni tuhotumana músa. ¹⁸ Á jina Cohamacu dutiare masina jina, to cahmaare masina músa. Á masiina jina, “Noaare sá yoahtore bese masija sá”, ni tuhotumana músa. ¹⁹ Á ni tuhotuna ó sehe ni tuhotu namona músa: “Painare ne masierainare noano masichu yoaja sá. Tinare sá buherachu ne Cohamacure masieraboa tina. Á jia ñaare duheraboa”, ni tuhotumana músa. ²⁰ Á jina “Tuho masierainare noaare yoa dutina, macanacá cühure buheina jija sá”, ni tuhotumana músa. Á jina “Cohamacu dutiare cjuana, potocá jiare masi pahñoja sá”, ni tuhotumana músa. ²¹ ¿Á jina painare buheina jipanahta, dohse yoana músa sehe músa buheriro sehe yoerajari? ¿Painare yaca dutieraina jipanahta dohseana músa sehe yacajari? ²² ¿Pairo namono mehne ñano yoa dutieraina jipanahta dohseana músa sehe paio namono mehne ñano yoajari? “Cohamacu jira”, ti nia masurine ñu yabiina jira músa. ¿Á ñu yabiina jipanahta dohseana tí masurine ti ño payoa wuhusepu sáa yacajari músa? ²³ “Cohamacu Moise cjirore to dutiare cjuaja sá”, niina jipanahta to dutiare yuhdurucara músa. Á yuhdurucana Cohamacure ño payoerachu yoana nica músa painare. ²⁴ Áta nina Cohamacu yare ti joari püi: “Cohamacu dutiare músa yuhdurucari buhiri judio masa jieraina sehere Cohamacure ti ñano durucuchu yoara músa judio masa”, ni joaa tiha Cohamacu yare ti joari püi.

²⁵ “Cohamacu yaina jija”, ni tuhotura cáina judio masa mahanocá cahsarocäre yihsoina. Cohamacu yare ti yoachu judio masa ti jichu noa nina. To yare ti yoerachu judio masa ti jia tia yaba cjihti jierara. Yihsoina ti jia tia cühü yaba cjihti jier-

ara. ²⁶ Á jiro judio masa jieraina mahanocá cahsarocäre yihsoeraina ti jipachuta, Cohamacu dutiare ti yoachu ñano “Yu yaina masata jira”, ni ñana Cohamacu tinare. Judio masa sehere to á ni ñuboriro seheta judio masa jieraina sehere á ni ñana. ²⁷ Payu judio masa Cohamacu Moise cjirore to dutiare cjuapahta tíre yoerara tina. Á jia paina judio masa jieraina sehe mahanocá cahsarocäre yihsoeraina jipahta to dutiare yoara. Á yoaina jia judio masa ti ñano yoarire masichu yoaa nina. ²⁸ Mipure judio masuno waro to jiare yahuihtja musare. To pjacure mahanocá cahsarocäre yihsoiriro jiparota Cohamacure ño payoeraro potocáta judio masuno waro jierara. ²⁹ Cohamacu yairo Espiriture cjuariro tirere yuhtiriro tiro tjira judio masuno waro. Á yoa to pjacure mahanocá cahsarocäre to yihso coháiriro seheta to ñaa yoaare duhura tiro. To mu suro dutiare yoariro jieraparota Espiritu Santo to yoadohoa mehne to ñaa yoaare duhura. Tó sehe yoarirore “Noariro jira”, ni ñana Cohamacu sehe. Masa sehe tirere ti á niera-pachuta, á nina Cohamacu sehe.

3

¹ ¿Yu á nichu judio masa ti jia tia wiho waro jijari, músa tuhotuchu? Ne wiho waro jia nierara. ¿Cohamacu judio masare to dutiriro seheta ti pjacurire mahanocá cahsarocäre ti yihso coháa wiho waro jijari, músa tuhotuchu? Ne wiho waro jia nierara. ² Judio masa ti jia tia wiho waro jierara. Cohamacu yare ti joari püre judio masare cü muhtaha. Á jia judio masa ti jichu noa nina tinare. ³ Á jia cáina judio masa Cohamacure ti tuhoerapachuta to niri cjiri potocáta jira. Á jiro to ni cüriro seheta yoarohca tiro. ⁴ Áta jira. Jipihtina masa mahñoina ti jipachuta Cohamacu sehe ne mahñoerara. Panopu to yare yahu muhtariro cjiro to ni joariro seheta ne mahñoerara Cohamacu. Ó sehe ni joaa tiha:

“Potocá niriro jira muhu Cohamacu.

Muhure á jia masa ‘Cohamacu quihño yoerara’, ni masierara muhure”, ni joaa tiha panopu.

⁵ Ó sehe ni tuhotuboca masa: “Mari ñaare yoana Cohamacu noaare to yoariro jichu masichu yoaja. Á jiro ñaare mari yoachu noa nina. ¿To á noaa jipachuta dohsearo tiro mari ñaare yoari buhiri buhiri dahremacanocajari?” ni tuhotuboca masa. Masa ti tuhotuboriro seheta á nii nija. ⁶ Tó jierara ti á ni tuhotuchu. Mari ñaa yoari sehe noaa jichu Cohamacu mari ñaare yoari buhiri buhiri dahre masieraboa.

⁷ Masa sehe mahñoina jira. Cohamacu sehe ne mahñoerara. Á jina masa ti

mahñochu ñuna Cohamacu sehe ne mahñoerario to jichu noano ñu masija mari. Á jia masa mahñoa, Cohamacu to mahñoerario to jiare ñoa niboca tina. Áta ni tñhotumana cáina. Á ni tñhotua ò sehe ni tñhotu namomana tina: “Sá mahñoa mehne Cohamacu to mahñoerario jiare ñona nija. Á ñona noano yoana nija. Á jia sá mahñoa noa nina. ¿Sá mahñoa noa nichu dohse jiro baro sá mahñori buhiri säre buhiri dahremacanocabocari Cohamacu?” ni tñhotumana cáina masa. ⁸ Á jia ò sehe ni mahñoa cáina säre: “ ‘Ñano yoana Cohamacu to noariro jichu ñona nica. Á jina ñano yoajihna’, nihre Paulo cáhu”, ni mahño yahusána säre cáina. Ti á niri buhiri tinare Cohamacu buhiri dahrerohca. Áta yoaro cahmana tinare.

Jipihtina buhiri tiina jija mari

⁹ ¿Á yoa dohse ni tñhotujari musa? ¿Mari judio masa paina yñhdoro noaina jijari mari? Jieraja mari. Judio masa, judio masa jieraina cáhu ñaa buhiri tia çuaina dihta jija mari. Á jina jipihtina buhiri tiina jija mari. Áta jira. Jipihtinare yu buheriro seheta jira. ¹⁰ Panopu to ni joariro seheta jira ahri: Ó sehe ni joa tiha:

“Ne cáiro masuno noariro mariahna, Cohamacu to ñuchu.

¹¹ Jipihtina masa tñho ñahaeraina dihta jira. Tuhsu, jipihtina masa ne Cohamacure macaeraina jia, tirore wacü payoerara.

¹² Tina Cohamacu yare cohãa jipihtina ñaare yoaina wahare.

Ne cáiro noare yoariro pinihta mariahna.

¹³ Ti duseri masa copari ti pñdo daporio yoaro sehe jira.

Ti durucuhu, masa copari ñña wijaaro sehe mahñoa dihta ti duserire wijaara.

Á durucua agã duseroi to ñima puria wijaaro seheta purino ti durucua wijaara ti duserire.

¹⁴ Tina painare ñano durucuina, purino durucuina jira.

¹⁵ Á jia sua ñaina dóicãta masare wajãina jira.

¹⁶ Nohoi ti waharoi tina masare ñano yoa, ñano yñdchhu yoara tinare.

¹⁷ Tó sehe jia paina masa mehne tina noano jierara.

¹⁸ Á yoa Cohamacure ne ño payoerara”, ni joa tiha panopure.

¹⁹⁻²⁰ Cohamacu jipihtiare to joa na dutiri çjirire säre judio masare çuha. Á jiro tó sehe to ni joariro çjio mari çuhre dutisinina. “Buhiri mariahna säre”, ni masieraja mari. Á jina mari jipihitiro macaina judio masa, á jichu judio masa jieraina cáhu to buhiri

dahrehtina mari jia tiare masija mari. Á jina buhiri tiina mari jiare masina, “Noaina jija sã”, ni masieraja Cohamacure. Cohamacu to yoa dutia sehere ne mari yoaeraja. Á jiro to dutia sehe buhiri tiina mari jia tiare masichu yoara marine. Á masina, ò sehe ni masieraja mari: “Cohamacu dutiare yoa pahñohi. Á jiro Cohamacu marine ‘Noaina jira’, ni ñuna”, ne ni masieraja mari jipihitiro macaina.

Cohamacure noano mari wacü tuana to yaina wahaja mari

²¹ Wiho mejeta mipure Moise çjioore to dutiri çjirire yoa pahñono marieno masare ti ñaa buhirire to cohãire masichu yoara marine Cohamacu. Moise çjio to joari çjiri mehne, Cohamacu yare yahu muhtaina çjiri ti joari çjiri mehne yahu cü muhta tuhsuha ahrire. ²² Jipihtina Jesucristore wacü tuainare, tirore tñhoinare “Noaina jira”, ni ñuna Cohamacu. Tó sehe cáno potori ñuna tiro jipihtina dohse jiina Jesucristore wacü tuainare. ²³ Mari jipihtina ñaare yoaina buhiri tiina dihta jija. Á jina Cohamacu to cahmano sehe mari jiboriro dahsa yñhdara. ²⁴ Mari á jiina jipachuta Cohamacu marine pja ñuna. Á jiro Jesucristo sehe mari ñaa buhirire wapabasari jire. To á wapabasaro mehne “Buhiri marieina noaina jira”, ni ñuna Cohamacu marine. ²⁵ Panopu macaina çjiri buhiri tiina ti jipachuta Cohamacu dóicãta buhiri dahreraha tinare. Á buhiri dahreraha ti buhiri tiare wiho waro á tñhotunocano nieraha. Baharo tiro Jesucristore warocari jire mari ñaa buhiri yariahtiro çjihore, to di mehne mari ñaa yoarire wapabasahtiro çjihore. Jesucristore mari wacü tuachhu Cohamacu sehe mari ñaa yoari buhirire borohca. Ahrire yoaro, quihño yoariro to jia tiare masichu yoaro niha. ²⁶ Á yoa mipu çuhre quihño yoariro to jia tiare masa ti masichu cahmana tiro. Quihño yoariro jira tiro. Á jiro Jesure warocari jire masa ti ñaa buhiri yariahtiro çjihore. Á jiro Jesure wacü tuainare, “Buhiri marieina, noaina jira”, ni ñuno, quihño yoaro nica.

²⁷ ¿Mipure “Noaina jija mari”, ni masicari mari musa tñhotuchhu? Tíre ne ni masieraja mari. ¿Dohseana á ni masieracari mari? ¿Cohamacu to dutiare yoana, “Noaina jija”, ni masibocari mari? Jierara. Tí çuhre ni masieraja mari. Mari á ni masierapachuta Jesure mari wacü tuachhu “Noaina jira”, ni ñunohca marine Cohamacu. ²⁸ Ó sehe masija mari: Jesure mari wacü tuachhu ñuno marine ñu jicoara Cohamacu. Á jiro marine “Buhiri marieina, noaina jira”, ni ñuna tiro. To dutiare mari yoari wapa á

ni ñuerara. Tirore mari wacũ tuachũ ã ni ñũna.

²⁹ Tuhsũ, Cohamacũ judio masa pũtoto dihta jierara. Judio masa jieraina pũtoto cãhũ jira tiro. ³⁰ Æ jiro Cohamacũ cãirota jiriro jiro, jipihtina bui pũtoto jira. Æ jiriro jiro judio masare, ã jichũ judio masa jieraina cãhũre Jesure ti wacũ tuachũ, tinare cãno potori “Buhiri marieina, noaina jira”, ni ñũnohca Cohamacũ. ³¹ Æ jina Jesure wacũ tuana Cohamacũ Moise cjirore to dutiare cohãna nibocari mari? Cohãeraja mari tĩre. Jesure wacũ tuaina jina, Cohamacũ dutiare yoa pahñona nija mari.

4

Abrahã Cohamacũre to wacũ tuarire yahuha Paulo

¹ Mari ñũchũ cjiro panopũ macariro Abrahã cjirore Cohamacũ õ sehe yoaha: ² Abrahã cjiro noaare to yoapachũta “Noariro jira”, ni ñũeraha Cohamacũ tirore. Æ jiro noaare yoaparota ñariro jisnino “Yuhũ pini noariro jira”, ni masieraha Abrahã, Cohamacũ to ñũchũ. ³ Cohamacũ yare ti joari pũ õ sehe nina: “Abrahã Cohamacũ to nirire to quihõno tãho ñaha, tirore to wacũ tuachũ ñũno Cohamacũ tirore ‘Potocãta noariro jira’, ni ñũha”, ni yahura Cohamacũ yare ti joari pũ. ⁴ Pũtoto dahrainare waparõ, wiho waro to pja ñũna mehne waparõ nierara. Ti dahrari wapa tinare waparõ nina. ⁵ Wiho mejeta Cohamacũre wacũ tuainare dahrainare ti waparõ sehe yoerara Cohamacũ. Cohamacũre wacũ tuarirore “Noariro jira”, ni ñũna Cohamacũ. To ã ni ñũchũ ti noaa to yoari wapa jierara. Cohamacũ sehe tirore cahmaeraina cjirore tirore ti cahmachũ ñũno buhiri marieina, noaina wahachũ yoara. Æ jiro masũno Cohamacũre to wacũ tuachũ ñũno “Noariro jira”, ni ñũna Cohamacũ tirore. ⁶ Æta niha panopũ macariro Davi cjiro. Masũno noaare to yoapachũta Cohamacũ tirore “Noariro jira”, ni ñũeraca. Tirore to wacũ tuachũ ñũno pini Cohamacũ tirore “Noariro jira”, ni ñũna. Cohamacũ to ã ni ñũriro wahcheare yahuha Davi cjiro. Õ sehe niha:

⁷ “Cohamacũ ti ñaa yoirire to cohãchũ masina sehe tuaro wahchera.

⁸ “Noaina jira. Mũsa buhiri tiare wacũsi yuhũ”, to nichũ tãhoina tuaro wahchera”,

niha Davi cjiro.

⁹ ¿Judio masa ti pjacũre mahanocã cahsarocãre yihsorina dihtare ti ñaa yoirire boari Cohamacũ? Jierara. Judio masa jieraina yihsoraina cãhũre ti ñaa yoirire bora tiro. Parĩ turi Abrahãre wacũga mũsa. Tiro Cohamacũre to wacũ tuachũ ñũno

“Noariro jira”, ni ñũha Cohamacũ. ¹⁰ ¿Dohse jichũ ã yoari Abrahã, mũsa tãhotuchũ? To pjacũre mahanocã cahsarocãre to yihsoto panopũta tirore “Noariro jira”, ni ñũha Cohamacũ. Æ jiro yihsoro, to ñaa yoirire cohã tuhsũriropũ yihsoha. ¹¹ Æ jiro dõihã Cohamacũre wacũ tua mũhtaha Abrahã. To ã wacũ tuachũ ñũno “Noariro jira”, ni ñũha Cohamacũ tirore. Æ to wacũ tuare, to yairo to jiare to ñõto cjihtore Cohamacũ tirore to pjacũre mahanocã cahsarocãre yihsõ dũtiha. Æ jiro Abrahã to yihsoto pano Cohamacũ sehe “Noariro jira”, ni ñũ tuhsaha tirore. Tiro to yihsoto pano to ã ni ñũriro sehta jipihtina Cohamacũre wacũ tuainare judio masa jieraina yihsorainare “Noaina jira”, ni ñũna Cohamacũ. To ã ni ñũina ti jichũ Abrahã ti ñũchũno cjiro waro yoaro sehe wahara. ¹² Tĩ yoaro sehta masa, yihsõina Cohamacũre ti wacũ tuachũ ti ñũchũno cjiro waro jia tiha Abrahã. Tiro to yihsoto pano Cohamacũre wacũ tuaha. Æ jia tiro yoaro sehta wacũ tuaina judio masa Abrahã panamana ji turiaina jira.

Cohamacũ Abrahãre to ni cũirire “Potocã tjira”, niha Abrahã

¹³ Panopũ õ sehe niha Cohamacũ Abrahãre: “Ahri yahpare mũhũre, mũ panamana ji turianapũ cãhũre waitjta”, ni yahu cũha Cohamacũ Abrahãre. To dutiare to noano yoari wapa ã nieraha Cohamacũ tirore. Abrahã Cohamacũre to wacũ tuari wapa sehere ã niha Cohamacũ tirore, “Noariro jira”, tirore to ni ñũri baharo. ¹⁴ “Cohamacũ Moise cjirore to cũri dutia dihtare yoaro cahmana”, nina judio masa. Tõ sehe niina Cohamacũre wacũ tuaro marieno ahri yahpa jipihtirore na duara. Wacũ tuaro marieno ti nachũ mari sehe Cohamacũre mari wacũ tuua yaba cjihti jieraboa. Æ jiro Cohamacũ marine to ni cũri cjiro yaba cjihti jieraboa. ¹⁵ Moise cjirore to cũri dutia sehere yoerara masa. Æ jiro to dutiare ti yahdũrcari buhiri masare buhiri dahrerohca Cohamacũ. Wiho mejeta to dutia mariachũ to dutiare yahdũrcaro cãhũ mariaboa.

¹⁶ Æ yoa Cohamacũre wacũ tuaina dihta to wahtore naahca. Abrahã cjiro Cohamacũre wacũ tuaha. Æ jiro jipihtina tiro yoaro sehe Cohamacũre wacũ tuaina ti ñũchũno waro yoaro sehe tjaura Abrahã cjiro. Æ jiro “Ahrire mũsare waitjta”, Cohamacũ nino jipihtinare tirore wacũ tuaina pinihtare nino niha. Æ jia Cohamacũ Moise cjirore to dutiri cjirore yoaina Cohamacũre wacũ tuaina Cohamacũ to wahtore naahca. Tina dihta nasi. Jipihtina Abrahã cjiro yoaro sehe Cohamacũre wacũ tuaina cãhũ tinare to wahtore naahca. ¹⁷ Tĩre Abrahã

cjirore to niriro seheta joaa tiha panopure: “Payu macari macaina ti ñuchuno cjihto cūhi mahure”, ni cūa tiha Cohamacu Abrahā cjirore”, ni joaa tiha panopu. Ā jiro tiro Cohamacure wacū tuaa tiha. Ā to wacū tuachu mari ñuchu cjiro yoaa tiha Cohamacu tiro cjirore. Cohamacu sehe yariainare masoriro, jipihtinare, jipihtia cāhure ba-juamehneriro jira.

¹⁸ “Payu yahpari macaina mu panamana ji turaina jahca”, Cohamacu to ā ni cūchu Abrahā cjiro sehe pohna marieriro jiparota, “Potocāta jira”, ni tūhotua tiha. Ā ni tūhoturo payu yahpari macaina mari ñuchu cjiro yoaro sehe wahaha tiro Cohamacu tirore to ni cūriro seheta.

¹⁹ Ā jiro cien cūhmari cūvariro jiparota “Bucuro waro jija”, ni tūhotuparota, Sara to namono ne pohna marienicoro to jipachūta “Pohna ti masieraja sā”, ni tūhotueraa tiha Abrahā cjiro. Ā jiro Cohamacu to ni cūriro “Potocāta jira”, nia tiha Abrahā cjiro. ²⁰ “To niriro seheta yoeraboca”, ne ni tūhotueraa tiha Abrahā cjiro. Ā jiro tiro Cohamacu to ni cūriro noano tūhoa tiha. To ā niare tūhotjāhno “Cohamacu tuariro jira”, ni ño payoro nia tiha. Ā jiro Cohamacure wacū tua namoa tiha tiro. ²¹ “Cohamacu to niriro seheta noano bihorohca”, ni tūhotu noano masia tiha Abrahā cjiro. ²² To ā masichu Cohamacure to wacū tuachu Cohamacu sehe “Noariro jira”, ni ñua tiha Abrahā cjirore. Āta ni joaa tiha Cohamacu yare ti joari pūi.

²³ Ā yoa Abrahā cjiro dihtare ā ni joaeraa tiha. ²⁴ Tīre mari masihti cjihtire mari cāhure ā ni joaa tiha. Ā jiro Cohamacure mari wacū tuachu “Noaina jira”, ni ñunohca mari cāhure Cohamacu. Tiro pini mari puhtoro Jesu to yariachu masori jire tirore. ²⁵ Jesu sehe mari ñaa buhiri yariari jire. To yariari baharo masa wijaari jire tiro Cohamacu marine “Noaina jira”, to ni ñuhto cjihtore.

5

“Noaina jira”, Cohamacu to ni ñuchu ō sehe waharohca marine

¹ Jesucristore mari wacū tuachu ñuno “Buhiri marieina, noina jira”, ni ñuna marine Cohamacu. To ā ni ñuchu Cohamacu mehne macaina marine jichu yoara mari puhtoro Jesucristo. ² Ā jina mari tirore wacū tuachu ñuno Cohamacu marine cahño, pichacapu wahaborinare yūhdore tiro mehne mari jihto sehe. Cohamacu pinihta noa yūhdariro jira. Ā jiro tiro yoaro seheta jiina wahachu yoarohca marine tiro. To ā yoahiti cjihtire noano masi, wahcheja. ³ Ā yoa ñano yūhduna cāhu wahcheja mari. Ñano yūhduna, tīre cāno pja masija mari.

Ā cāno pjana, ñano yūhdūpanahta noano Cohamacure wacū tuaina waha namoja mari. Ā jina Cohamacu yare duhueraja mari. ⁴ Mari ā yoachu ñuno “Noana”, ni ñunohca Cohamacu marine. Ā jina marine to yūhdohore noano masi, wacū cohtana nija mari. ⁵ Ne wiho waro wacū cohtana nieraja. Cohamacu marine to Espiritu Santore warocare mari mehne jihtirore. Ā jiro Espiritu Santo sehe mari mehne jiro Cohamacu marine to ā cahruucare masichu yoara. To ā masichu yoachu marine to yūhdohito noano waro jiro nina. Potocāta yūhdūnahca mari.

⁶ Tó pano mari ñaa yoirire mari basi mari yūhdū masierachu ñuno, to quihōriro mu sūchu, Cohamacure cahmaeraina mari jipachūta, Cristo sehe mari ñaa buhirire yariabasaha. ⁷ Cūiro masano noariro jiparota yariahtiro to jichu pairo sehe to yariaborirore cohtota, to yariabasa duachu mijo yūhdūara. Noaa dihtare yoiriro yaro jiborirore pairo yariabasaboca pa tehe nino. ⁸ Wiho mejeta Cohamacu sehe ō sehe yoara. Buhiri tiina mari jisipachūta mari yaro jiborirore Cristo yariaha. To ā yoachu Cohamacu marine to tuaro cahiare masija mari. ⁹ Mari yaro jiborirore to ñano di wijaa, yariachu Cohamacu sehe marine “Buhiri marieina, noaina jira”, ni ñuna. To ā ni ñuri baharo mipu pinihtare marine pichacapu wahaborinare yūhdorohca Jesu. Marine to yaina wahachu to yoari baharo marine buhiri dahresi pichacapu Cohamacu. ¹⁰ Cohamacure ñu tuhtiina mari jipachūta, to macūno sehe yariaro, mari ñaa buhiri tiare cohāno, Cohamacure mari ñu tuhtirire duhuchu yoare. To ā yoaro mehne Cohamacu mari buhiri tiare bora. Tuhsu marine to yaina wahachu yoara. Mipu pinihtare ti yūhdo curero yoarohca marine. To yaina mari jichu Jesu to masa mujari mehne marine pichacapu wahaborinare noano yūhdorohca tiro. ¹¹ Ā jina baharopu mari yūhdūhtore masina wahcheja mari. Mipure ahri cāhure wahcheja. Mari puhtoro Jesucristo mari ñaa yoari buhirire to yariari baharo Cohamacu yaina jija mari. Ā jina wahcheja.

Adāore, Cristore yahuha Paulo Roma macainare

¹² Adāo cjiro Cohamacure to yūhdūrucari baharo ahri yahpare ñaa buhiri tia ji dūcaha. Ñaa buhiri tia ji dūcaro mehne masa yaria dūcaha. Jipihtina mari ñaare buhiri tiare yoaja. Ā jina jipihtina ñaina mari jiri buhiri yariaja. ¹³ Cohamacu to dutiare Moise cjirore to cūhto pano potocāta ahri yahpa macaina ñaa buhiri tiare yoaa tiha. Ti ā yoapachūta to dutia mariachu

to dutiare ti yuhdurucari buhiri buhiri dahre masieraha. ¹⁴ To ā buhiri dahre masierapachuta Adāo cjiro cāhu to baharo jiina cāhu ti dutia mariasinipachuta yariaa tiha. Moise cjiro to jihto pano ti dutia mariasinipachuta masa yariaa tiha. Paina űano yoa Adāo cjiro űano to yoiaro sehe waro yoaera timaha. Ā jipahta tina cāhu yariaa tiha. Ā jiro Adāo cjiro űaare to yoa ducariro seheta yoari pja baharopu ahri yahrapu tariro noaere yoa ducari jire.

¹⁵ Adāo cjiro to yuhdurucari Cohamacu masare to pja űua yoaro sehe jierara. Cohamacu to pja űua sehe noa yuhduara. Adāo cjiro cāirota jiparota űaare to yoa ducari buhiri payu masa yariaa tiha. Cohamacu sehe marine pja űano. Jesucristore warocari jire. To ā warocachu tiro cāirota jiro pichacapu wahaborinare masare payu yuhdora. ¹⁶ Ā jiro Cohamacu masare to pja űua Adāo cjiro to yuhdurucari yoaro seheta jierara. Adāo cjiro sehe cāirota jiro űaare to yoari buhiri jipihitina masa űaa buhiri tiina jira. Ā ti buhiri tiina jipachuta masa pjro ti űaare yoapachuta mipure masare pja űuno Cohamacu ti űaare bora. Ā boro “Noaina jira”, ni űana tiro tinare. ¹⁷ Adāo cjiro cāirota jiro űaare to yoa ducachu jipihitina masa yariarucara. Ti potocā tjira. To ā jipachuta ahri sehere wahchenahca mari. Mipure Cohamacu masare pja űuno Jesucristo cāirota jiro to yariaro mehne ti űaare boro, tinare “Noaina jira”, ni űana. Ā jia jipihitina to ā ni űaina manopu Cristo mehne puhtoa jiahca.

¹⁸ Adāo cjiro cāirota to jipachuta to yuhdurucari buhiri jipihitnapu buhiri tiina waha ducaha. Ā jia Cohamacu to buhiri dahrehtinapu tjuaha tina. Tó yoaro seheta Jesu cāhu cāirota jiparota noano yoaro jipihitina ti buhiri tiare cohā masina. Ti buhiri tiare to cohāchu, “Buhiri marieina, noaina jira”, ni űana tinare Cohamacu. Ā jia to ya catiare cjuaa, ā catirucuahca tina.

¹⁹ Adāo cjiro cāirota Cohamacure yuhdurucaha. To ā yuhdurucachu, payu masa űaa buhiri tiina wahaha. Tó yoaro seheta Jesu cāhu cāirota Cohamacure yuhtiha. Ā yuhti, payu masa ti buhiri tiare cohā masina tiro. To ā cohāchu “űaare ti yoari buhiri tia mariena, noaina jira”, ni űana Cohamacu tinare.

²⁰ Cohamacu to dutiare Moise cjirore cūa tiha ti mehne jipihitina masa ti űaa buhiri tiare ti noano masihtu cjihtore. Ā jia masa ti űaa buhiri tiare masia ti yuhdoro Cohamacu tinare tuaro to cahā tia cāhure masiahca. Tiro marine cahī yuhduara. ²¹ Buhiri tiina ti jiri buhiri masa yari-ahitina jira. Ti yariari baharo, picha-

capu wahaahca. Wiho mejeta Cohamacu masare cahī yuhduara. Ā tuaro cahīno, mari puhtoro Jesucristo masare to yariabasaro mehne masare “Buhiri marieina, noaina jira”, ni űana. To ā ni űaina sehe to ya catia mehne ā catirucuahca.

6

Yariaina cjiri ti űaare yoeraro seheta Cristo yaina cāhu űaare yoiarucera

¹ Ā Dohse yoanahcari mari mipure, masa tuhotuchu? Cāina ō sehe niboca: űaare mari yoachu űuno Cohamacu mari űaa buhirire borohca. Ā Cohamacu marire to cahī namochu űu duana űaare yoa namobocari mari? ² Jierara. űaare yoena tjijihna mari. Yariaina cjiri űaare ti yoeraro seheta Cristo yaina jina mari cāhu űaare yoiarucu masieraja mari. ³ Jesu yaina mari jia tiare masa ti űu masihtu cjihtore copu bautisare marine paina. Ā jina mari puhtoro Jesucristo to yariachu, mari cāhu tiro mehne yariaina seheta wahahi. Ā Tiro masierajari musa? ⁴ Ā bautisarina wahana Cristo pjacure masa copapu ti siō sāa payo cohāiro seheta pano mari űaa yoiare duhuja. Ā jina Cohamacu to tuua mehne Cristo to masa mujariro seheta mari cāhu to tuua mehne mari jia tia cāhure, mari tuhotua cāhure cohtotaja. Ā cohtotana to yare wahma yoiarucaina wahaja mari.

⁵ Cristo yaina jina, tiro mari puhtoro mehne yariaina seheta jina, to masa mujariro seheta mari cāhu masa mujanahca. Ti potocāta jira. ⁶ Cristo yaina ji ducana crusapu tiro mehne yariaina seheta wahai pari turi mari űaare yoiarucera sehe. Ā waharina jina űaare yoiarucina ji namo duasi mari. Tiro mari masija. ⁷ Yariariro cjiropure űaare goa pjaa mariaha. Ā jiro tiro cjiro űaare to yoa duhuriro seheta ti űaa sehe tirore to dutipe namoeraboro seheta ti űaare duhura tiro. ⁸ Cristo mehne yariaina yoaro sehe jina, to masa mujariro seheta mari cāhu masa mujanahca. “Ti potocā tjira”, ni tuhotuja mari. Ā jina tire mari masa mujahire wacu cohtaja mari. ⁹ Cristo to yaria masa mujari baharo ne pari turi yariasi. Ā catirucuro jira tiro. Tiro mari masija. ¹⁰ Ā jiro Cristo cā tahata yariaro, masa ti űaa yoari buhirire cohāno taro yariaha. To masa mujari baharo Cohamacu to cahmano seheta yoiarucuro jira tiro. ¹¹ Tiro yoaro seheta masa cāhu ō sehe ni tuhotuga: “Yariaina cjiri ti yoeraro seheta mari cāhu űaare yoa duaeraja. Jesu yaina jina Cohamacu to cahmano seheta yoiarucuro jiahtina jiahtina jina nija mari cāhu”, ni tuhotuga musa.

¹² Ä jina mäsä yariahtina jina ñaare yoarucucina jiena tjiga. Ä jina mäsä ñaa yoare goa pjapanahä tire ä tahotunocahga. ¹³ Ñaare yoaina jiena tjiga. Mäsare pichacaru waborinare Jesu to yuhdorina jira mäsä. To ä yoarina jina Cohamacu cahmaa dihtare yoaina jiga mäsä. Ä jina noaare yoaina jiga mäsä. ¹⁴ Mipure Cohamacu Moise cjirore to dutia mehne marine dutierara. Cohamacu marine cahño tiro sehe marine dutira. Ä jina to yoadohoro mehne ñaare yoa duasi mari.

Musa ñaare yoarucuchü tü ñaa mäsä puhtoro yoaro sehe jira

¹⁵ ¿Yu ä nichü dohse ni tahotujari mäsä? ¿Cohamacu sehere yuhtihina jina Moise cjirore to dutiare yuhtihina jierana, ñaare yoarucubocari mari? Jierara. ¹⁶ ¿Ahrire masierajari mäsä? Mäsä noano yuhtiriro mäsä puhtoro jira. Ä jina to cahamaca jira mäsä. Mäsä ä yuhti mäsä puhtoro tiro sehetä ñaare yoarucucina mäsä jichü tü ñaa yoa mäsä puhtoro yoaro sehe jira. Ä jina ñaare duhu masierara mäsä. Ä jina jina pichacaru wahahtina jira mäsä. Cohamacure noano ño payoina jina pinihta, to cahamaca jira mäsä. Ä jina to yaina noaina jira mäsä. ¿Tire masierajari mäsä? ¹⁷ Panoru ñaare yoarucucina mäsä jichü tü ñaa yoa mäsä puhtoro yoaro sehe jimare. Mipü sehere noaa buheare tuhona Jesure wacü tuana Cohamacure noano ño payoina wahare mäsä. Mäsä ä wahachu ñana Cohamacure “Noana”, nija. ¹⁸ Ä wahana mipure ñaa tü dutiriro cjiro sehetä yoaerara mäsä. Ä jina Cohamacu cahamaca jina noaa sehere yoara mäsä. ¹⁹ Cahamaca tü puhtore tü noano ño payoare masi pahñaona mäsä. Ä jicu tü mäsä masiri mehne tü mehne piti dahre buhehi mäsare ahri buheare noano masieraina mäsä jichü ñücu. Panoru ñaare yoarucucina jimare mäsä. Mäsä ä yoarucuriro sehetä mipü sehere noaare yoarucucina jiga mäsä. Ä jina Cohamacu cahmaa dihtare yoanahca mäsä.

²⁰ Panoru ñaa dihtare yoaina jina, noaa sehere yoara tire mäsä. ²¹ ¿Tü pjapure ñaa dihtare yoana dohse jirore wapatari mäsä? Tü mäsä ñaa yoarire wacüna mipure buo tica mäsä. Tü ñaare mäsä yoari buhiri pichacaru wahaboa mäsä. Ä jina ñaare yoana ne wapataerara. ²² Mipü sehere mäsä ñaa yoarire duhuna Cohamacu cahamaca wahare mäsä. Ä jina Cohamacu cahmaa dihtare yoaina jinahca. Ä jina jipihtia dachoripe Cohamacu mehne jirucunahca. ²³ Ñaare mari yoari buhiri pichacaru wahahtina jija jipihtina mari. Mari ä jipachuta mari puhtoro Jesucristore mari wacü tachü ñano, jipihtia dachoripe tiro mehne

marine jirucuchü yoarohca. Mari ä jirucuhore ä wanocanoahca.

7

Cohamacu Moise cjirore to dutiare yahu namoha Paulo tjoa

¹ Yu coyea, Cohamacu Moise cjirore to dutirire noano masina mäsä. Masuno to catisinichü tü dutiare yuhduraca dutierara. To yariari baharo pinihtare tü dutiare yoaro mariahna. Tü cühure masina mäsä. ² Ö sehe jira: Numinore to manuno to catiro puro tiro mehne dihta ji dutira Cohamacu Moise cjirore to dutiri sehe. To ä dutipachuta to manuno to yariari baharo ticoro sehe pairore manü tü masina. Ticoro tü dutia mehne ji namoerara. ³ Ä jiro to manuno to jipachuta ticoro pairore manü tiro, ñano yoaricoro jira. Wiho mejeta to manuno to yariari baharoru pairore manü tiro, Cohamacu dutiare yuhduracaerara ticoro ä yoaricoro. Ä yoaro ñano yoaricoro jierara ticoro.

⁴ Mäsä cähü yu coyea Jesu yaina wahana, Jesu to yariachü, mäsä cähü tiro mehne yariaina sehetä wahare. Ä jina yariaina cjirore dutia tü marieno sehetä Moise cjirore to dutia to cüri cjiro mäsä cühure mariahna. Tü dutia mäsare dutierara. To manuno to yariari baharo, pairore manü ticoro yoaro sehetä mäsä cähü panoru mäsare dutimarire duhu, Cristo mehne jira, ticoro paio mehne to jiro sehetä. Ä jina mipure to yaina jira mäsä. Tiro sehe to yariari baharo masa mejari jire Cohamacu cahmaare mari yoahto cjihtore. ⁵ Panoru ñaare mari mü syro yoa timai. Ä jina Cohamacu Moise cjirore to dutirire mari masiri baharo tü dutiare yuhduraca duamai. Tü dutia mariachü yuhduraca duaeraboa. Ä jina tü dutiare mari masiri baharo ñaare tuaro yoa-mari. Ä mari ñaare yoana mari pichacaru wahahtinata jia timai. ⁶ Ä waborina jipanahta Cristo yaina jina mipure tü dutia mehne jieraja mari. Ä jiro Espíritu Santo mari mehne jiriro marine noaa sehere cohtotachü yoara. To ä yoachü panoru macaa dutia muna dutia to joari cjiro tü mehne jieraja mari mipure.

To ñaa yoari cjirore yahuha Paulo

⁷ ¿Ä jina Cohamacu Moise cjirore to dutirire dohse nibocari mari? ¿Tü to dutia ñaa jicari, mäsä tahotuchü? Jierara. Tü yuhure to dutiri mehne ñaare masii. Ä jicu to dutia mariachü ñaare masieraboa yuhü. To dutia ö sehe jira. “Paina yapure tuaro cahmaena tjiga”, niha to dutia. Tü ä nierachü paina yapure tuaro tü cahmari tü ñaa jichü masieraboa yuhü. ⁸ Ä jicu tü dutiare yu masiri baharo paina yapure tuaro cahmaa tü yuhü.

Tí dutiare masierasinicu paina yapure tuaro yu cahmari ti ñaa jichu masieraboa yuhu. ⁹ To dutiare yu noano masihtu pano ã tuhutunocai. To dutiare yu masiri baharo pinihta tuaro ñaare yoa duamai. Æ jicu pichacaru yu wahahtore masia tii. ¹⁰ Æ jia Cohamacu dutiare yuhdurucaceraa masa tiro mehne noano jirucuboa. Æ jia tí dutia sehe noano jirucuchu yoabori dutia jipahta yu yuhdurucari buhiri yuhure pichacaru waha dutimare. ¹¹ Æ jicu ñaare yoacu Cohamacu Moise cjirore to dutiare yuhdurucaceraa duamai. Ñaare goa pjariro jicu noaare masierahi. Tí ñaa yuhure dojomehnera. Æ jicu noano masierahi. Æ masieracu Cohamacu dutiare yuhdurucacai. Æ jicu to dutiare yu masiri baharo yu ñaa buhirire pichacaru yu waha-borirore masii. To dutia mehne ã masii.

¹² Æ jia Moise cjirore Cohamacu to cūri dutia noaata jira. Æ jia quihōno jiata nina tí dutia. ¹³ Æ jipahta marine tí noaa dutia sehe pichacaru wahachu yoajari? Jierara. Tóru wahachu yoaerara. Mari ñaa yoa sehe marine pichacaru wahachu yoara. To dutiare mari masiri baharo tí dutiare yuhdurucacana ñaare yoana masija mari. Æ jina mari ñaina mari jiare masina mari pichacaru wahahto cāhure masija mari. Æ jina to dutiare masina mari yuhdurucarire tí ñaa yuhdca jichu masija mari.

¹⁴ Cohamacu to dutiare Moise cjirore cūha. Tí to cūha noaa tí jichu masija mari. Wiho mejeta yuhu sehe paina yoaro seheta ñariro jija. Æ jicuta ñaare yoarucuca yuhu. ¹⁵ ¿Dohse waharo nijari yuhure? Ne noano masieraja yu yoaare. Yu yoa dua sehere ne yoaera, yu tuaro yoa duaeraa sehere yoaja yuhu. ¹⁶ Ñaare yoa duaeraaipaihta ñaare yoaja yuhu. Tíre yoacu Cohamacu dutia noaa dutia tí jichu masija yuhu. ¹⁷ Æ jicu mipure yuhu waro tí ñaare yoaeramaja. Wiho mejeta yu tuhutuaru jia ñaa tí sehe yuhure ñaare yoachu yoara. ¹⁸ Noaare tuaro yoa duapaihta ne bihoeraja. Ñaa sehe yuhure dojomehne mujana. ¹⁹ Noaa yu yoa dua sehere yoaeraja yuhu. Ñaare yu yoa duaeraa sehere yoaja. ²⁰ Yu yoa duaeraare yoacu mipure yuhu waro tíre yoaeramaja. Yu tuhutuaru jia ñaa tí sehe yuhure ñaare yoachu yoara.

²¹ Æ jiro yuhure ñ sehe wahara: Noaare yu yoa duapachuta yu tuhutuaru ñaa jira. Æ jicu noaa sehere ne yoa masieraca. ²² Cohamacu Moise cjirore to dutirire yu tuhutua mehne tuaro cahma, quihōno yoa duamaja. ²³ Æ jicu yuhu ahrire yu basi masija: Yu tuhutua mehne noaare Cohamacu dutiare yoa du-

aja. Æ yoa duapaihta yu basi ñaare tuaro yoa duaca. Yu mu saro ñaare duhu masieraja yuhu.

²⁴ Æ ñaare duhu masieracu pjacuoriro jija yuhu. Ñaare yoacu pichacaru wahahtu yuhu. Cuenah. ¿Yuhure pichacaru waha dutia ñaare noa yuhure yuhdobasabocari? ²⁵ Jesucristore yu wacu tuachu tiro sehe ñaa yu yoari buhirire yuhdobasarohca. To ã yoachu Cohamacu "Noana", nija yuhu. Æ jicu mipure yuhu yu basi yu tuhutua mehne Cohamacu dutiare quihōno yoa duamaja. Æ yoa duariro jipacuta yu pjacu mehne yu mu saro ñaare duhu masieraja.

8

Espíritu Santore cjuaina ti jia tiare yahuha Paulo

¹ Mipure Jesucristo yainare tí buhiri tiboro mariaha. ² Æ jiro Jesucristo yairo yu jichu Espiritu Santo ã catirucuchu yoariro ñaare yuhdurucachu yoara yuhure. Ñaare yuhure yuhdurucachu yoaro yuhure pichacaru wahaorirore yuhdore tiro. ³ Cohamacu Moise cjirore to dutiare mari mu saro ne yoa pahfiosi. Æ yoa pahfoerana yuhdurucaina jia mari. Æ jina tí dutia yoa mehne ne yuhdusi mari. Mari ã jiina jipachuta ñ sehe Cohamacu marine yuhdorohca. To macnore mari yoaro seheta pjacu tihtirore warocaha, mari buhiri tiare buhiri tihtiro cjihtore, marine yariabasahtiro cjihtore. Æ jiro mari tuhutuaru jia ñaare tiro duhuchu yoari jire. ⁴ Æ yoaare Cohamacu dutiare to tuaa mehne mari bihohto cjihtore. To dutiare bihohtina jina mari mu saro jieraja. Espiritu Santo to yoadohoa mehne to dutiro seheta yoaja mari.

⁵ Ñaare yoa duaina, tí dihtare goa pjara. Espiritu Santo to dutiro seheta yoarucaina sehe tí to dutia dihtare wacu nnu, yoa duara tina. ⁶ Ñaa dihtare goa pja, wacu nnuina pichacaru wahaahca. Espiritu Santo to cahmano seheta tuaro yoa duaina sehe jipihitia dachoripe Cohamacu mehne ã catirucuahca. Æ jia tina Cohamacu mehne noano jinocaa. ⁷ Ñaa dihtare goa pja, wacu nnuina Cohamacu ñ tuhtira. Tina Cohamacu dutiare ne yuhtierara. To dutiare yuhti duarera. Yuhtia cāh bihoeraboa tina. ⁸ Æ jia tí mu saro yoaina Cohamacu wahchechu yoa masierara.

⁹ Wiho mejeta masa sehe masa tuhutuaru jia ñaare yoaerara. Espiritu Santo masa mehne to jichu to cahmano seheta yoara masa. Æ jia Espiritu Santore cjuainera sehe Cristo yaina jierara. ¹⁰ Masa sehe to yaina

jira. M̄sa ñaa buhirita m̄sa p̄jac̄uri yari-ara. Ā m̄sa p̄jac̄uri variahtina jipanahta Cristo m̄sa mehne to jich̄u tiro mehne to ya catia mehne ā catirucunahca m̄sa. Cohamac̄u m̄sare “Buhiri marieina, noaina jira”, to ni ñuch̄u m̄sa tiro mehne ā jirucunahca. ¹¹ Cohamac̄uta Jesure masori jire. Ā masoriro jiro Esp̄ritu Santo mari mehne to jirucuch̄u mari yariari baharo Cohamac̄u mari c̄ah̄ure masonohca. Ā masono wah-maa p̄jac̄uri wahach̄u yoarohca marine. Jesure to masoriro seheta masonohca mari c̄ah̄ure.

¹² Ȳu coyea, to ā yoach̄u ñana ñaa mari goa p̄jarire yoaena t̄jijihna. ¹³ Mari ñaare yoaena jina, p̄chacap̄u wahahtinata jinocanata nija. Esp̄ritu Santo to yoadohoa mehne ñaa yoaare duhuna, jip̄htia dachoripe Cohamac̄u mehne jirucunahca.

¹⁴ Jip̄htina Esp̄ritu Santore yuhtiina Cohamac̄u pohna jira. ¹⁵ Esp̄ritu Santo mari mehne to ji d̄ucach̄uta Cohamac̄u pohna ji d̄uc̄ai. Wiho mejeta tiro marine dutipe, dahrach̄u yoah̄tiro jierara. Ā jina panop̄u mari cuirop̄u sehe mip̄u sehere mari cui-eraja. To pohna jina, Esp̄ritu Santo to yoadohoa mehne mip̄ure “Ȳu P̄uc̄u”, nija mari Cohamac̄ure. ¹⁶ Ā jiro Esp̄ritu Santo mari wac̄lap̄u marine ō sehe ni masich̄u yoara: “Potoc̄ata Cohamac̄u pohna jija mari”, ni masich̄u yoara. ¹⁷ Ā jina to pohna jina, Cohamac̄u jip̄htiare to pohñare “Waihtja”, to nirire mari sehe c̄uanahca. Jesucristo c̄ah̄u c̄j̄a, mari c̄ah̄u c̄uanahca tire. Cristo yare mari yoari buhiri ñano yuhd̄uina jina mari tiro mehne m̄anop̄u noano wahchea mehne jinocanahca. Ā jina Cohamac̄u to pohñare to “Waihtja”, to nirire c̄uanahca mari Cristo mehne.

¹⁸ Mip̄ure ahri yahpai ñano yuhd̄usiniya mari. Baharop̄ure mari m̄anop̄u noano jinocanahca. Ā jina mip̄ure ñano yuhd̄una, p̄j̄ro cahya t̄hotuena t̄jijihna. Ahri mari ñano yuhd̄ua wiho waro jira. Baharo noano jinocanahca Cohamac̄u mehne. Ā jina tuaro wahchenahca. Ahri pini wiho waro jierara. ¹⁹ C̄u ñum̄u Cohamac̄u to pohñare cohtotarohca. Buhiri marieina, variaerahtina, noaina waro jich̄u yoarohca marine. Mari ā wahach̄u jip̄htia Cohamac̄u to bajuamehneri c̄j̄iri c̄ah̄u wahma dihta cohtota pihtia wahaahca. ²⁰ Jip̄htip̄ure to bajuamehneri noaa ti j̄iborire do-jomehneha mas̄ano ñano yoa d̄uc̄aro. Ti m̄u s̄uro ā wahaeraha. Mas̄ano Cohamac̄ure to yuhd̄ur̄uc̄aro mehne to bajuamehneri ā wahaha. Ā jiro Cohamac̄u to bajuamehneri c̄j̄irire āta ñano ji dutisiniha. Baharo to bajuamehneri c̄j̄irire noaa wahach̄u yoarohca t̄j̄oa tiro. ²¹ Ā jiro Cohamac̄u

to bajuamehneri c̄j̄irire baa p̄ihtiborire noaa wahach̄u yoarohca t̄j̄oa. Cohamac̄u pohñare noaina to wahach̄u yoariro seheta, tinare noano to yuhdoriro seheta noaa wahach̄u yoarohca Cohamac̄u to bajuamehneri c̄j̄irire c̄ah̄ure. ²² Jip̄htia Cohamac̄u to bajuamehneri c̄j̄iri ñano ti ji d̄uc̄ari baharo ñano yuhd̄ua tiha. Numino niji wahc̄ono to ñano yuhd̄uro seheta to bajuamehneri c̄ah̄u dachoripe ñano yuhd̄uruc̄ura. T̄ire mari masija. ²³ Ā yoa mari c̄ah̄u to bajuamehneri c̄j̄iri yoaro seheta ñano yuhd̄uja. To yaina mari wahach̄u, Cohamac̄u to yairo Esp̄ritu Santore d̄oihta ware marine. Ā jina “Waihtja”, to niriro seheta sohtori tirohca”, ni masija mari. Ā jina noaa sehere marine to cohtotahtore tuaro waro cohtaja. Ā yoa to pohna mari tiro mehne mari noano jihto c̄ah̄ure tuaro cohtaja mari. Tuhsu, wahma p̄jac̄ure marine to wahto c̄ah̄ure tuaro cohtaja. ²⁴ Mari ā cohtaina jich̄u, tirota marine p̄chacap̄u wahaorinare yuhdore. Tiro cahap̄u jirina jina tiro cahap̄ure mari wahahtore cohtaeraboa mari. Marine to yuhdo tuhsuri baharo t̄ire cohta namoeraboa. ²⁵ Ā jina to wahtire ñuerapanahta Cohamac̄u marine to yuhdohtore cohtana, noano mehne ā cohtarucuja.

²⁶ Ā yoa Cohamac̄ure wac̄u tuaera cureina to cahmaare noano masieraina jija mari Ā jina tirore quih̄ono siniina c̄ah̄u jieraja mari. Wiho mejeta mari ā jiina jip̄ach̄uta, Esp̄ritu Santo sehe marine yoadohora. Marine tuaro p̄ja ñano mari ya c̄j̄ihtire durucuro marieno to t̄hotua mehne tiro Cohamac̄ure tuaro sini payobasara. ²⁷ Cohamac̄u to cahmano seheta mari Jesu yaina ya c̄j̄ihtire sini payobasara tiro Esp̄ritu Santo. To ā sini payobasach̄u Cohamac̄u mari t̄hotuare masi pahñoriro jiro, Esp̄ritu Santo to sini payobasaare masina.

Cristo to tuaa mehne ñaa yoaare yuhd̄ur̄uc̄anahca mari

²⁸ Ahrire ȳu yahuhtire masija mari: Jip̄htina Jesure cah̄ina mari jich̄u to cahmaare yoah̄tinare besere marine tiro. Ā jiina mari jich̄u ñano Cohamac̄u ā yoadohoruc̄ura marine. Ā jina mari ñano yuhd̄ur̄uc̄anahca ñano yuhd̄uruc̄u dojoeraja. Ā jina Cohamac̄u yoadohoro mehne noano jinahca mari. ²⁹ Cohamac̄u marine to yaina c̄j̄ihtire d̄oipta masi, bese tuhsu. Ā besero to mac̄ano Jesu to yoaro seheta jihtina c̄j̄ihtire marine c̄uha, paȳu masa to mac̄anore mari wahmi tihto c̄j̄ihtore. ³⁰ Panop̄u to yaina to ji dutirina mari jich̄u, to pohna mari jihtina c̄j̄iht̄i c̄ah̄ure beseha marine. Ā jiro marine

to beserinare tiro “Buhiri marieina, noaina jira”, ni ñare. Marine to ã niinare tiro yoaro sehe jihtina cjihtire tiro mehne muanopu noano jichu yoarohca Cohamacu.

³¹ Tíre masina õ sehe tuhotuja mari: Cohamacu marine to cahĩnare ne paina ñu tuhtia bihosi. ³² Cohamacu mari ya buhirire yariahtirore to macunore warocaha. “Yu macare cahija. Æ jicu tirore warocae-aja”, nieraha tiro. Marine ã tuaro yoadohoriro jiro, jipihtia marine duhsarire wa pahñonohca. ³³ Cohamacu to beseina mari jichu, tiro marine “Ñaa buhiri marieina, noaina jira”, ni ñare. Mari ã jiina jichu paina marine “Ñaina jira”, ne ni yahusã masierara. ³⁴ Cristo mari ya buhirire yaria masa mujaha. Mipure Cohamacu poto buhusehe sehei jira puhtoro jiro. Æ jiro tiro mari ya cjihtire potocãta sini payoro nina Cohamacare. Æ jia paina sehe marine ne buhiri dahre duti masierara Cohamacare. ³⁵ Cristo marine to tuaro cahichu paina tirore “Cahĩ tjia”, ne ni masierara. Cahĩ duhosi tiro. Mari ñano yuhdupachuta, mari cuipachuta, paina marine ti ñano yoapachuta, mari jusa baapachuta, suhti marieina mari jipachuta, nu cuaro mari jipachuta, marine ti wajãpachuta Cristo marine ã cahĩrucurohca. ³⁶ Cohamacu yare ti joari pui mari ñano yuhduhtore yahuro, õ sehe nina:

“Mu yaina sã jichu masa ñu jicoaeraa, ti wajãhtina ã jirucunata nija.

Oveja ti wajãhtina ti jiriro seheta sã cahure ã wahara”,

ni joaa tiha Cohamacu yare ti joari pui.

³⁷ Æ jina mari ñano yuhdupanahta Cristo marine cahĩrore to yoadohoro mehne ti jipihtiare yuhdu witinahca. Æ yuhduña to yare ne duhosi mari. ³⁸⁻³⁹ Jesucristo yaina mari jichu ñano Cohamacu sehe marine tuaro cahina. Æ jiro tiro marine ne cahĩ duhosi. Mari yariachu cahure, mari catichu cahure, mipure, baharopu cahure, tiro marine cahĩ duhosi. Æ yoa anjoa, watia puhtoã, ahri yahpa macaina puhtoã, muanu macaina, ahri yahpa macaina cuhu marine Cohamacare “Mu yainare cahĩ tjia”, nia bihosi tina. Cohamacu to bajuamehneri cjihipure tirore marine ne cahĩ duhuchu yoaa mariahna. Marine ne tiro cahĩ duhosi.

9

Israe masa Cohamacu to beserina jira

¹⁻² Yu coyea Israe masare wacũcu tuaro cahyaja. Cristore cahmaerara tina. Æ jicu ñano cahya yajeripohna tija yuhu. Ti yu ã ni yahua potocãta jira. Yuhu Cristo yairo tjija. Æ jicu masare “Cahyaja”, yu nia sehe potocãta jira. Masare ã nicu mahñoi

nieraja. Espiritu Santo yu ã mahñoeachu masino, yuhure “Quihõno mu cahyare yahure mahu” ni, yuhure masichu yoare. ³ Israe masa yu coyea yu ya yahpa macaina pichacapu wahaahca. Cohamacare tinare yuhdo duti duacu õ sehe ni duamacu yahu sehe: “Ti ya buhirire yuhu sehe pichacapu wahaitja. Æ jiro ti yaro jiborirore yahu sehere buhiri dahrejaro Cristo”, ni duamacu yuhu. ⁴ Tina yu coyea Israe cjiro panamana ji turiaina jira. Tinare to pohna cjihtire cüha Cohamacu. Tuhsu, to si sitea mehne ti watoi jia tiha. Tinare jipihtinare to noano wahachu yoaa cahure yahu cü muhtaa tiha. Tuhsu, Moise cjirore to duti cahure doiputa tinare Israe masareta cü muhtaa tiha. Tirore ti ño payohti macaa cahure tinareta cü muhtaa tiha. Tuhsu, masare to yuhdohto cahure yahu cüa tiha tinare Cohamacu. ⁵ Sã ya curuari waro doce curuari waro jira. Sã ñuchusama ji muhtarina cjihipu ti panamana jia tiha. Ti panamana ji turiainapu jija sã Israe masa. Æ jiro mari yoaro sehe pjacu tiriro taro, sã coyeiro Israe masano waro jire Cristo. Tiro Cohamacuta jira. Æ jiro tiro jipihtina bui puhtoro jira. Jipihtia dachoripe tirore noano ño payojihna mari. Æ ño payorucujihna.

⁶ Paina Israe cjiro panamana ji turiaina jipahta Cohamacu yaina waro jierara. Æ jina tina to yaina ti jierachu ñuna õ sehe ni tuhotuboca musa: “Israe masare yu yaina jichu yoahitja”, niparota cãinare Cohamacu to niriro seheta yoaerara”, ni tuhotuboca musa. Æ ni tuhotuena tjiga. ⁷ Õ sehe jira: Paina Abrahã panamana ji turiaina ti jipachuta “Abrahã panamana ji turiaina waro jira”, ni ñuerara Cohamacu tinare. Æ jiro õ sehe nia tiha Cohamacu: “Mu macu Isaa panamana ji turiaina tina pinihta potocãta mu panamana ji turiaina waro jia-ahca”, ni yahu cüa tiha Cohamacu Abrahãre. ⁸ To ã ni yahu cüchu ahrire masinahca mari: Abrahã cjiro panamana jipihtina waro Cohamacu pohna jieraca. Cohamacu to ni cürire noano tuhoina tirore wacü tuaina sehe tinata jica Cohamacu pohna. Æ jia tinata jira Abrahã cjiro panamana ji turiaina waro.

⁹ Õ sehe nia Cohamacu Abrahã cjirore: “Pa cahma ahri pja baroihta yu tjua tachu mu namo Sara wihãrirocãre cjuarohca mu macare”, nia tiha Cohamacu Abrahã cjirore. Æ nino Cohamacu Abrahã cjiro macano to masa bajuahtore yahu cüyro nia tiha.

¹⁰ Baharo Isaa cjiro namono Rebeca wama tiricoro puaro pohna tia tiha. Ti puaro Isaa sã ñuchu cjiro jia tiha. ¹¹⁻¹² Æ jia ti pohna ti masa bajuerasinipachuta, noare, ñaa cahure ti yoerasinipachuta

Cohamacu ti pocoro cjihtore ò sehe nia tiha: “To bahuro sehe to wahminore dutirohca. Ā jiro to puhtoro jirohca”, nia tiha ticorore. Cohamacu to cahmano seheta besera tiro. Ā jiriro jiro cāirocāre besero ticorore āta ni yahua tiha. Ā jiro masa ti yoaare ñeraparota to cahmano seheta tiro to yaina cjihtire besera. ¹³ Āta ni joaa tiha to yare ti joari pūi: “ Jacobo sehene cahña tihī. Esaú sehene cahñera tihī”, ni joaa tiha panopu.

¹⁴ ĶTire wacūna dohse ni tuhotubocari mari? ĶTi yoahdire ñeraparota cāirore ā besero Cohamacu quihōno yoaro nierabocari, msa tuhotuchu? Jierara. ¹⁵ Ō sehe nia tiha Cohamacu Moise cjirore: “Diro yu pja ñu duarirore pja ñuhtja”, nia tiha tiro Moise cjirore. Ā jiro cāirore ā besero quihōno yoaro niha Cohamacu. ¹⁶ Ā jina mari mu suro mari cahmano sehe Cohamacu marine pja ñuchu yoeraja mari. Tuhsu, ne mari noaare mari yoari wapa cāhure marine pja ñerara tiro. To mu suro to pja ñu duaina sehere pja ñuna. ¹⁷ Egipto macaina puhtoro faraō cāhure to cahmano seheta yoaa tiha tiro. Ō sehe nia tiha Cohamacu faraōre: “Egipto macaina puhtoro cjihtore cūi nii mūhure yu tuare jipihtinare yu ñohto cjihtore. Tuhsu, jipihitia yahpari macaina yūhure ti masihto cjihtore puhtoro sōi nii yūhu mūhure”, nia tiha Cohamacu faraōre. Tó seheta nina Cohamacu yare ti joari pūi. ¹⁸ Ā jiro to pja ñu duainare to mu suro pja ñuna tiro. Tuhsu, paina sehene to mu suro yuhtierachu yoara tiro. To cahmano seheta yoara tiro.

¹⁹ To ā yoariro jichu ñuna yūhu sehene ò sehe niboca msa: “Cohamacu marine to cahmano seheta to yoachu mari sehe tirore yuhdurucana bihosi. ĶMari ā yuhdurucana bihoerapachuta dohse jiro baro marine buhiri dahre duajari tiro?” ni susini sinituboca msa yūhure. ²⁰ Tīre ò sehe ni yuhtija msare: ĶMasa wiho jiina jipanahta Cohamacu retijitari msa? Dihī biato dahrerirore “ĶDohseacu yūhure ò sehe jiri biato yoari mūhu?” tí biato to ni sinituboriro seheta nina nica msa Cohamacu. Tó sehe ni masierara msa. ²¹ Dihī biato dahreriro dihi mehne to yoa duaro seheta yoara. Ā yoaro cāria dihica mehne noaare cūhti biatore yoa masina tiro. Tia dihica mehneta wiho jare cūhti biato cāhure yoa masina tiro. Tiro yoaro seheta Cohamacu cāhu to yoa duaro seheta yoara.

²² Ā jiro Cohamacu pichacapu to cohāhtinare ti ñaa yoarire to ñu yabiare, to tuaa cāhure ñono taro, tinare dōi buhiri dahre duamaha. Ā dōi buhiri dahre duaparota, yoari pja ti ñaa yoaare

ā ñnocasiniha. Ā jiro tinare buhiri dahrerasiniha. ²³ Āta yoaha Cohamacu noabiaro to jiare, to tuaa cāhure mari masihto cjihtore. Panopu marine to pja ñuina cjihtire tiro beseri jire jipihitia to tuare to noaa cāhure mari cūahto cjihto sehe. ²⁴ Ā jina mari sehe to beserina jinata nija. Ā jia to beserina sehe cāina judio masa dihta jierara. Cāina judio masa jieraina cāhu jira to beserina. ²⁵ Āta nina judio masa jierinare Cohamacu yare Osea cjiro to joariro seheta:

“Pano yu yaina jieraina cjiri cāhure baharopu tinare ‘Yu yaina jira’, nihtja.

Ā yoa pano yu cahñeraina cjiri cāhure baharopu tinare ‘Yu cahñina jira msa’, nihtja”, nia tiha Cohamacu.

²⁶ “ ‘Yu yaina jierara msa’, Cohamacu to nia yahpari macaina tina Cohamacu catiriro pohnata jahca”,

ni joaa tiha Osea cjiro panopu. ²⁷ Tuhsu, panopu macariro Isaia cjiro cāhu Israe masare ò sehe ni yahua tiha: “Pjiri ma macaa padu yapariāre mari quihōna bihoeraja. Israe masa ti yapariāre peri payu ti jiro sehe jiina ti jipachuta mahainacā Cohamacu yuhdorohca tinare. ²⁸ Cohamacu ahri yahpa macainare payu masare to nino seheta cjero mehne potocāta buhiri dahre bahrañonohca”, nia tiha Isaia cjiro. ²⁹ Ā yoa pari turita Isaia cjiro ò sehe ni joaa tiha tjoa: “Mari puhtoro jipihtina bui puhtoro mahainacā mari mehne macainare yuhdoeraro, marine judio masare jipihtinare butichu yoaboa tiro.

Sodoma macainare, Gomorra macaina cāhure to butichu yoariro seheta mari cāhure butichu yoaboa tiro”, ni joaa tiha Isaia cjiro yu coyea Israe masare.

Judio masa noaa buheare cahmaeraha

³⁰ Ā tjira. Ā jina ahrire masi namoga msa: Judio masa jieraina Cohamacu macaerapahta tirore bocare. Jesucristore ti wacū tuachu ñuno, “Buhiri marieina, noaina jira”, ni ñure tinare Cohamacu. ³¹ Wiho mejeta judio masa sehe “Cohamacu dutiare mari yoachu tiro marine yuhdorohca”, nia Cohamacu Moise cjirore to dutiare yoapahta, bihoerare. Tí ā bihoerachu ñuno, Cohamacu “Noaina jira”, ni ñerare tinare. Ā jia noaina ji duapahta bihoerare. ³² Ō sehe yoaa, tina bihoerare: Tina Cohamacu wacū tuaro marieno ti mu suro Moise cjirore to dutirire yoa duamare, to yaina ji duaa. Mari piti dahre buhechu Cristo tāca yoaro sehe jiriro jira. Ti mu suro yoainare Cristo puha tu borachu yoari tāca yoaro sehe jiriro jira. Muroca wahcāri sehe tācapu puha tu, bora su caharo to wacū

wahcānopure ne s̄uerara. (P̄uha tu borariro yoaro seheta tina Cristore t̄aca yoaro sehe jirirore cahmaeraina Cohamacu cahapu ne susi.)³³ Āta ni joaa tiha Cohamacu yare ti joari p̄ui:

“Jerusalē wama tiri macai p̄uha tu borachu yoari t̄aca yoaro sehe jirirore c̄uja.

Mari piti dahre buhechu ō sehe jira: Muroca wahcāriro t̄acapu doca wahā s̄u bora s̄u caharo to wacū wahcānore s̄uerara.

T̄aca yoaro sehe jirirore cahmaeraina sehe tiare p̄uha tu bora, ti wacū wahcānopure ti s̄ueraro seheta Cohamacu cahapu susi.

Wiho mejeta tirore wacū tuaina sehe tiro mehne ā wahcherucuahca”, ni joaa tiha.

10

¹ Ȳu coyea, Israe masare pichacapu wahaborinare Cohamacu to ȳhdohtore, tuaro yu yajeripohna mehne cahmasāmaja ȳuhu. Ā jicu Cohamacu tinare to ȳhdohto cijhtore sini payoja ȳuhu. ² Potocāta tina Cohamacu cahmaere tuaro yoa duamana. Ā yoa duapahta to cahmaa warore masierara. ³ Tuhsu, tinare Cohamacu to noaina wahachu yoaborire tina tuho űahaerare. Ā tuho űahaerara, ti mu s̄uro noaare yoa duapahta bihoerare. Ti ā yoachu tinare Cohamacu to wacū tua dutiriro seheta ti yoerachu űano, tiro sehe tinare “Noaina jira”, ni űerare. ⁴ Wiho mejeta Cristore wacū tuaina sehene “Noaina jira”, ni űuna Cohamacu. Ā jina dutia yoa mehne ȳhd̄eraja mari. Cristo mehne ȳhd̄uja.

⁵ Moise cjiro panopu macariro ō sehe ni joaa tiha: “Cohamacu to dutirire ne cāno d̄hsaro marieno mari yoa pah̄ochu Cohamacu ȳhdorohca marine”, ni joaa tiha tiro. ⁶⁻⁷ To ā ni joapachuta mipure masa Cristore ti wacū tuachu űano Cohamacu tinare “Noaina jira”, ni űuna. T̄i buhea noaina ti wahachu yoari buhea ō sehe ni yahura: Cristo to basi ahri yahp̄apu wihi tuhs̄ari jire. Tuhsu, masa m̄uja tuhs̄ari jire. Ā jina ō sehe ni tuhoutuena tjiga m̄usa: “¿Diro sehe m̄anopu Cristore na tabasaro wahabocari marine to ȳhdohto sehe? ¿Diro sehe yariaina cahapu Cristore masobasa na tabocari? Tirore na taboriro mariahna”, ni tuhoutuena tjiga m̄usa. ⁸ Ō sehe ni yahura Cohamacu yare ti joari p̄ui: “Cohamacu ya buheare mari macachu to buhea ōi jira. To buheare masi tuhs̄ara m̄usa. Ā yoa to buheareta durucua t̄ire m̄usa”, ni joaa tiha. T̄i buheare Cristore wacū tuaa buheare masare yahuja s̄a. ⁹ T̄i buhea ō sehe ni yahura: “Jesu mari p̄htoro jira”, ni mari yahuch̄u, “Cohamacu Jesure yariariro

cjirore potocāta masore”, ni mari wacū tuachu, Cohamacu marine pichacapu wahaborinare ȳhdorohca. ¹⁰ Jesure mari wacū tuachu Cohamacu sehe marine “Noaina jira”, ni űnohca. Jesure mari wacū tuare painare mari yahuch̄u tiro marine pichacapu wahaborinare ȳhdorohca.

¹¹ Ō sehe nina Cohamacu yare ti joari p̄ui: “Cohamacure wacū tuaina tirore ti wacū tuaa mehne ne cahyasi”, niha Cohamacu yare ti joari p̄ui. ¹² Judio masare, judio masa jieraina c̄uhure Cohamacu cāno potorita yoadohora. Mari p̄htoro jipihtina bui p̄htoro jira tiro. Ā jiro tirore to yoadohoare siniinare jipihtinare noano waro yoadohorohca tiro tinare. ¹³ Ō sehe ni joaa tiha panopure: “ ‘Ȳu buhiri tiare cohābasa, ȳuhure ȳhdoga’, ni mari p̄htoro masa ti sinichu tinare pichacapu wahaborinare mari p̄htoro ȳhdorohca”, ni joaa tiha Cohamacu yare. ¹⁴ Wiho mejeta masa sehe Cristore wacū tuaraa, tirore ā ni sini masierara tina. Tuhsu, to buhea c̄uhure t̄ihoeraa, tirore wacū tua masierara. Ā yoa to buheare yahuriro mariachu c̄uhure t̄ire tina masisi. ¹⁵ Tuhsu, to buheare yahuhtinare Cohamacu sehe to warocaerachu to buheare yahu masierara. Ā ni joaa tiha Cohamacu yare ti joari p̄ui: “Noa buheare yahuhtina ti tach̄u noano wahcheja mari”, ni joaa tiha panopure.

¹⁶ T̄i ā ni joari jipachuta masa payu noaa buheare tuho duaerara. Āta ni joaa tiha Isaia cjiro: “Ȳu p̄htoro, tinare mari yahurire tina ne tuho duaerare”, ni yahua tiha Isaia cjiro Cohamacure. ¹⁷ Ā jia masa noaa buheare tuhoa Cristore wacū tuare. T̄i tuhoa sehe noaa buhea sehe Cristo ya buhea waro jira.

¹⁸ Ā jicu ahrire ō sehe ni sinitu űu duaja masare: ¿Israe masa Cohamacu yare t̄ihoerari, m̄usa tuhoutuenu? Potocāta tina tuhoa waro tuhomare. Āta nina Cohamacu yare ti joari p̄ui c̄uhure:

“Cohamacu noa putiariro to jia tiare yahuina jipihtiroru yahu sitea wahare.

Ā jia jipihtiro macainapu to yare tuho sahseare”,

ni joaa tiha panopure. ¹⁹ Pari turi masare ō sehe ni sinitu űu duaja tjoa: ¿Israe masa t̄h̄opahata noano masierari tina, m̄usa tuhoutuenu? Masia timaha tina. Ahrire yahu namocu Moise cjiro to nirire yahu m̄uhtaitjia. Ō sehe ni joaa tiha tiro:

“Ō sehe ni yahura Cohamacu Israe masare: ‘Tuho masieraina, űaina jira’, ni m̄usa űuna sehene yu yaina cijhti wahachu yoaitjia.

Yu ā yoachu m̄usa sehe tina mehne sua, tinare űu tuhtinahca.

Ā yoacu masare suachu yoaihtja yuhū', ni yahure Cohamacu Israe masare Israe masa jierainare to yaina jichu yoaro taro",

ni joaa tiha Moise cjiro. ²⁰ Tuhsu, Isaia cjiro cāhu cuiro marieno ō sehe nia tiha:

“Ō sehe nina Cohamacu: ‘Yuhūre macaeraina sehe yuhūre bocahre.

Ā jicu yuhūre cahmaerainare tinare yuhūre masichu yoahi yuhū', nire Cohamacu”,

ni joaa tiha Isaia cjiro judio masa jierainare.

²¹ Tuhsu, Israe masa sehere ō sehe ni joaa tiha Isaia cjiro: “Ō sehe nina Cohamacu: ‘Tina yuhūre yuhūrucaina, yuhūre cahmaeraina jira. Ā jicu tinare ti űaare cahya duticu “Yu yaina wahaga”, ā nirucumai tinare. Wiho mejeta tina sehe yuhūre ne yuhti duarere', nire Cohamacu”, ni joaa tiha Isaia cjiro.

11

*Mahainacā Israe masare pichacapu waha-
borinare yuhdorohca Cohamacu*

¹ Ā jiro Israe masare Cohamacu to beseina cjirire cohāno niri tiro, msa tūhotuchu? Jierara. Tinare cohāerare tiro. Yuhū cūhu Israe masano, Abrahā panamino ji turiariporu jija. Benjami ya curua macariro jija yuhū. ² Panopure Israe masare to ya curua macaina cijitire Cohamacu besea tiha. To ā beserinare cohāerare. Cohamacu yare ti joari pūi Elia cjiro ya quitire yahura. Ā Elia cjiro Cohamacu sinino, Israe masare to yahusārire masierajari msa? Ō sehe ni yahusāha tiro: ³ “Yu pūhtoro Cohamacu, tina Israe masa mū yare yahu mūhtainare wajāre. Tuhsu, tinata paina mūhure űo payoa taa, wahiquinare wajā jū mūoa tuhuri cūhure cohāre. Ā jicu yuhū dihta mū yairo dahsaja mipure. Yu ā jichu tuhoa yuhū cūhure wajā duara tjoa, mipure”, niha Elia cjiro Cohamacu. ⁴ To ā nichu tūhoro Cohamacu sehe ō sehe ni yuhtiha Elia cjirore: “Siete mil waro msa yu yaina jira mipure. Tinare wihto yuhū. Tina yu yaina sehe Baal wama tiri masare ne űo payoera tire tina. Ā jicu cui tĵiga mūhu”, nia tiha Cohamacu Elia cjirore panopure. ⁵ Ti pjare Elia cjiro to jia tiri pjāpāre to yaina masare to beseriro seheta mipu cūhure mahainacā Israe masare to yaina cijitire besere Cohamacu. Cohamacu tinare cahmano tinare pja űuno besere. ⁶ Noaare ti yoari wapa tinare besero nierare. Tinare ā cahmano, pja űuno besere. “Noaare msa yoari wapa masare beseihtja” nino, tiro tinare potocāta pja űuno nieraboa.

⁷ Ā yoa ō sehe jira: Israe masa Cohamacu tinare “Noaina jira”, to ni űuchū yoa duapahta tina cāno pjaerare. Wiho mejeta Cohamacu to basi to beserina sehe noaina to yaina wahare. Tirore cāno pjaeraina sehe to yare tuho duarere. ⁸ Āta nia tiha Cohamacu yare ti joari pūi:

“Cohamacu tirore cahmaerainare to yare tuho űahaerachu yoare.

Ā jiro potocā jiare ti tūhopachūta tinare ne noano tuho űahaerachu yoare Cohamacu.

Āta jirucura tina mipu cūhure”,

ni joaa tiha panopure. ⁹ Ā yoa panopu macariro Davi cjiro Israe masa Cohamacu ti cahmaerari buhiri ō sehe nia tiha Cohamacu:

“Tina Israe masa ti bose nūmari, ti wahchea nūmari ti yuhdoro wato, yurica űahūriro to űano yuhdoro seheta tina cūhure űano yuhdūchu yoaga.

Tō sehe yoainare tinare űano buhiri dahrega mūhu.

¹⁰ Tuhsu, mū yahuaere tinare ne tuho űahaerachu yoaga mūhu.

Ā buhiri tirucuina ji, ā cahyarucuina jijaro tina”,

nia tiha Davi cjiro Cohamacu.

*Judio masa jierainare pichacapu waha-
borinare yuhdorohca Cohamacu*

¹¹ Ā Judio masa Cristore ti cahmaerachu űuno, Cohamacu tinare cohāno warota űibocari, msa tūhotuchu? Cohāsi tinare. Ā cohāeraparota tina Cristore ti cahmaerachu mipure judio masa jieraina sehere Cohamacu yuhdorohca. Mipure tinare to yaina jichu yoare Cohamacu. To ā yoachu űua cāina judio masa sehe tina mehne sua sayo, Cohamacu yainata ji duaahca. ¹² Judio masa ti yuhdūrucachu ti noano yoerachu paina sehere ahri yahpa macainare cāinare Cohamacu yuhdore. To ā yuhdochū tina sehere noano wahare. To ā yoariro yuhdoro, baharo judio masa sehe Cristore ti noano wacū tua dūcachū pinihtare ahri yahpa macainare jipihtirōpore noarputiaro waharohca.

¹³ Mipure masare judio masa jierainare yahui tai nija. Cristo cūre yuhūre judio masa jierainare buhehtiro cijhtore. Ā jia yu dahraa sehe wiho jia jierara. ¹⁴ To cūriro seheta yuhū masare buheja, yu coyea judio masa sehere masare ti űu cūchu yoa duacu. Cohamacu yuhdorina msa jichū űua tina cūhu Cristore cahmaa, to yuhdoina wahaboca. ¹⁵ Judio masare cohābo curero, judio masa jieraina sehere noaa buheare Cohamacu yahu dutire. Tī buheare ti tūhori baharo Jesure ti wacū tuari baharo cāina judio masa jieraina, jipihtiro

ahri dacho macaina Cohamacu yaina wahare. Ā jiro judio masare to cohābo curechu noano wahare paye yahpari macaina sehere. To ā yoariro yuhdoro judio masa to cohābo cureina cjiire pari turi to yaina cjihti to yoachu pinihtare jipihtinapure ahri yahpa macainare noaputiaro waharohca. To yaina cjihti pari turi ti wahachu, jipihtinapu to yaina yariaina cjiri sehe pari turi ti masaboro seheta jirohca.

¹⁶ Ō sehe jira: Trigo yabu mehne wahma pāoca ti yolaria Cohamacu yaria cjihto Cohamacure ti wachu, tiare ti yoa dahari yabu cahu to yariata jira. Tuhsu, yucacu nuhcori cahu Cohamacu ya nuhcori cjihti jia, ta dapuri cahu Cohamacu yata jira. Ō sehe mari ni piti dahre buhechu Abrahā sā űuchu cjiro Cohamacu yairo to jiriro seheta to panamana ji turiainaru cahu Cohamacu yaina jahca Cristore wacu tuaina jia. Yoa dahari yabu cahu to yariata jica. Tuhsu yucacu nuhcori cahu Cohamacu ya nuhcori cjihti jia, ta dapuri cahu Cohamacu yata jica. Ō sehe mari ni piti dahre buhechu, Abrahā sā űuchu cjiro Cohamacu yairo to jiriro seheta to panamana ji turiainaru cahu Cohamacu yaina jira, Cristore wacu tuaina jia.

¹⁷ Ti ā jihtina jipachata cāinare ti coyeya sehere judio masare Cohamacu cohāre. Olivo wama tidu dapurire cāa dapurire to dute cohāboro seheta cāina judio masa sehere Cohamacu cohāre. Ā yucacu dapurire cohāno to cohāri dapuri jiriro cjiroi paye dapurire nucu macadu olivocu dapurire cohtota duhu ōhre. Tó yoaro seheta Cohamacu musare judio masa jierainare Abrahā panamana ji turiaina cohtotare musare, musa cāhare yuhdoro taro. ¹⁸ Musare to ā cūchu “Judio masa yuhdoro noaina jija sā”, ni tahotuena tjiga. Ahrire yu yahuhtire wacūga musa: Judio masa sehere bese muhtaha Cohamacu. Ā besero ti coyero cjihtore cūha Cristore, musare yuhdoro taro. Ā jina “Judio masa yuhdoro noaina jija”, ni tahotuena tjiga musa.

¹⁹ Musa judio masa jieraina sehe ō sehe niboca: “Cāa űaa dapurire to cohāboro seheta Cohamacu cāina judio masare cohāre. Paye dapurire cohtota to ōno seheta to yaina marine cūno taro ā cohāre tinare”, niboca musa judio masare yuhdaruca duana. ²⁰ Tí musa nia potocāta jira. To ā jipachata tina Jesure ti wacu tuaerari buhiri Cohamacu cohāre tinare. Ā jiro musa cāhare Jesure musa wacu tuaerachu to yaina cjihti musare cūeraboa. Ā jina “Judio masa yuhdoro noaina jija sā”, niena tjiga musa. Ā nieranata “Cohamacu cua pisariro jira”, ni tahotuga musa. ²¹ Olivocu ji muhtaa dapuri waro yoaro sehe judio masa sehe

Cohamacu yaina ji muhtaha. To cohtotaa dapurire to ōboro seheta Cohamacu to yaina musa sehere cohtota cūha. Wiho mejeta to yaina ji muhtaina judio masa tirore ti wacu tuaerachu, cāinare cohāre. Tinare to cohāriro seheta musa cāhare cohānohca, tirore musa wacu tuaerachu. ²² Cohamacu musare noano yoariro to jichu masiga musa. Tuhsu, cua pisaro mehne buhiri dahreriro to jichu cāhare masiga musa. Tirore űo payoerainare tiro buhiri dahrerohca. Ā jiro tirore musa űo payoerachu olivocu dapuri warore to cohāriro cjiro seheta musa cāhare cohānohca Cohamacu. ²³ Ā yoa judio masa to cohābo curerina cjiro Cristore ti wacu tua ducachu űuno, olivocu dapuri warore pari turi to duhu ōno seheta Cohamacu to yaina cjihti yoarohca tinare. Cohamacu to ā yoa masihti cjihtireta tuaare cūara tiro. Ā jiro tiro tinare cāinare to yaina cjihti yoarohca. ²⁴ Musa judio masa jieraina jina, nucu macadu olivocu dapuri yoaro sehe jira musa. Ā jina musa jipachu olivocu toadui nucu macaa dapurire to na ta ōboro seheta, Cohamacu musare to yaina cjihti yoahre. To ā yoachu, ne mijoerare tirore. Judio masa Cohamacu to bese muhtarina jira. Olivocu toadu dapuri waro yoaro sehe jira tina. Ā jiro ti jidu waro cjiropure pari turi to duhu ōboro seheta to yaina cjihti pari turi judio masare to yoachu, ne mijoerara tirore.

Baharo judio masare pichacaru wahaborinare yuhdorohca Cohamacu

²⁵ Yu coyeya, ahrire masa ti masieraare musare yahuhtija. “Mipure sā dihtare besere Cohamacu. Cohamacu sā masi yuhdarucu sachu űuno, tiro sāre besere”, musa ni tahotuerahto sehe ahrire yahuhtija musare. Ō sehe jira: Mipure payu judio masa Cohamacure tuho duasi. Wiho mejeta payu judio masa jierainare Cohamacu to quihōriro puro to yaina to yoari baharo judio masa cāhu tirore cahma dūcaahca. ²⁶ Ti ā cahmachu judio masa payu warore pichacaru wahaborinare Cohamacu yuhdorohca. Cohamacu yare ti joari pūi āta ni yahu joaa tih:

“Jerusalē wama tiri macai judio masa ya macai tinare yuhdohtiro tarohca.

Jacobo panamana ji turiainare ti űaa yoari buhirire tiro cohānohca.

²⁷ Tinare yuhdocu panopu tinare yu ni cūriro seheta yoai nija’, nire Cohamacu”,

ni joaa tih Cohamacu yare ti joari pūi.

²⁸ Mipure tina judio masa Cristo yare űo payoeraina Cohamacure űu tuhtira. Ti ā yoachu mipure musa sehe judio masa jieraina Cristore wacu tua ducare. Judio masa sehere Cohamacu bese muhtari jire. Judio masa űuchusuma cjiro to beserina

ti jichu mipu jiina judio masa cãhure tiro cahina. ²⁹ Cohamacu to ni cãriro seheta tinare to beseriro seheta quihõno yoarohca tiro. To nirire ne bosu tiro. ³⁰ Panopure musa cãhu Cohamacure yãhdurucari jire. Mipure judio masa Cohamacure ti yãhdurucachu ñano tiro musa sehere pja ñano yãhdore. ³¹ Mipure judio masa tirore yãhdurucare. Ti ã yoapachuta Cohamacu musare to pja ñãriro seheta tina cãhure baharopure pja ñãnohca. ³² Õ sehe jira: Jipihitina masare “Yãhure yãhdurucaina jira”, nina Cohamacu. ã jiro jipihitina tirore yãhdurucaina ti jichu ñano jipihitinare pja ñu masina tiro.

³³ Cohamacu tua yãhdurucu sãriro jira. Noano masi pahãriro jira tiro. ã jiro to tãhotuare, to yoirire marine noano masihto basioerara. ³⁴ Õ sehe ni joaa tiha Cohamacu yare: “Cohamacu mari pãhtoro to tãhotuare ne masa noano masierara. ã jia masa tirore ‘Õ sehe yoaga’, ni masierara. ³⁵ ã jia masa Cohamacure paye barore ti wari baharo ‘Tiro marine wapamona’, ni masierara masa”, ni joaa tiha panopure. ³⁶ Cohamacu jipihitiare yoaa tiha. Tuhsu, to tuaa mehne jipihitiare jisnichu yoara tiro. ã jia jipihitia to ya jira. To ã jiriro jichu jipihitia dachoripe tirore ño payojihna mari. ãta yoirucujihna.

12

Cohamacu cahmaare marine yoirucu dutiha Paulo

¹ Cohamacu marine tuaro pja ñure. To ã pja ñãriro to jichu ñuna, yu coyea, musa sehe oveja noarirore ti jã wa mworiro seheta Cohamacure ti ño payoriro seheta musa cãhu tirore ño payorucuga, to yare musa noano yoirucuheto sehe. Musã ã yoachu, tiro wahcherohca. ãta yoaro cahmana marine, Cohamacure quihõno ño payona tana. ã jicu musare tãre tuaro yoa dutija. ² Ahri yahpa macaina ñaare yoina yoaro sehe yoana tjiga musa. ã yoa musa tãhotuapure Cohamacu noaa tãhotua sehere to cohtota, cãhu, yãhtiga musa. ã yãhtina, noaa sehere tãho cohtotarina jinahca musa. ã yoana noaare, Cohamacu cahmaare, ñaa mariare, potocã jiare masinahca musa.

³ Cohamacu yãhure to yare yoa masichu yoiriro buhe dutiro beseri jire yãhure. ã jicu jipihitina musare õ sehe ni tãhotu dutieraja yãhu. “Noabiaina ji yãhdurucaja sã”, ni tãhotuena tjiga. ã tãhotunocahga. Jesure musa wacũ tuari baharo, Cohamacu musa cãinare noaare yoa masihtire to cãhu, “To yoadohoro mehne ahri noaare yoaja”, ni tãhotuina jiga musa.

⁴ Õ sehe ni yahu namoihtja yãhu musare. Mari wamomacari, mari dahpori, mari capari jipihitiro mari pjacu jia payu jira. Mari pjacu jia cã pjacu jiparota soro jia dahraa cãhara. ⁵ Ti jiro seheta soro sehe jia dahraare cãna Cohamacu marine. ã jina payu masa jipanahta Cristore wacũ tuaina jina, to pjacu cã pjacu yoaro seheta cã curuata jija mari.

⁶ Cohamacu marine to yoadohoro purota to tuaa mehne yoa dutira. ã yoaro marine cãinare soro jia mari yoahitire cãna tiro. To ã yoachu marine to cãriro mari sehe noano yoajihna. ã jia Jesu yaina õ sehe yoajaro. Cãinare Cohamacu to yare yãhutinare cãna. ã jia tina Cristore ti wacũ tuaro puro to yare noano yãhujaro. ⁷ Cãinare Cohamacu musare yoadohohtinare cãna. ã jia tina musare noano mehne yoadohojaro. Cãinare Cohamacu musare buhehtinare cãna. ã jia tina musare noano buhejaro. ⁸ ã yoa paina cãhu musare suho wahchechu yoahitina jia, musare noano suho wahchechu yoajaro. Tuhsu, paye barore wahtina jia, ti wahtire noano mehne yajeripohna ti, wajaro. ã yoa paina cãhu musare suho ji mãhtãhtina jia, noano mehne suho jijaro. ã yoa pjacuoinare yoadohohtina jia, wahchea mehne yoadohojaro.

Jesu yaina jina õ sehe yoina jiga

⁹ “Sã basi cahma cahija”, ni mahõno marieno musa basi cahma cahiga. ã yoana ñaare ñu yabiina jiga musa. Tuhsu, noaa sehere ã cahmarucuga. ¹⁰ Tuhsu musa bahana warore musa cahino seheta Jesu yainare musa mehne macainare cahiga. ã yoana musa basi noano cahma ño payoga musa.

¹¹ Cohamacu cahmaare yoana, ne caparo marieno yoaga. ã yoana mari pãhtoro to dutiro seheta noano wahchea mehne yoaga.

¹² Cohamacu musare pichacapu wahaborinare to yãhdorinapu jira musa. ã jiro musa wahahto noaputiaro jira. Tãre masina wahcheha musa. ã yoa ñano yãhduna, cãno pjaga “Cristo yare duhuri”, nina. Tuhsu, Cohamacure ã sinirucuga.

¹³ Paye baro Jesu yainare dahsachu waga tinare. ã yoa musa ya wãhusepu cãhure masa ti suchu noano yajeripohna tiro mehne tinare piti bocaga.

¹⁴ Musare ñano yoinare “Noano wahajaro tinare”, ni sini payoga. Tinare ã sini payona, “Tina ñano yãhduwahojaro”, niena tjiga.

¹⁵ ã yoa paina wahcheina mehne jina, musa cãhu tina mehne wahcheha. Tuhsu paina ñano cahyaro mehne tiina mehne jina, musa cãhu cahya, tiidohoga tinare.

¹⁶ Musa mehne macaina mehne noano jiga musa. Á jina “Paina yuhdoro noaina jija”, ni tuhoutuena tjiga. Ó sehe ni tuhoutuena: “Wiho jiina jija”, ni tuhoutuena. Á jina “Masi yuhdurucaina jija sã”, ni tuhoutuena tjiga.

¹⁷ Paina musare ti ñano yoapachuta, tinare ñano yoa cahmaena tjiga. Noaa sehere yoaga, noaina musa jia tiare jipihntina masa ti masihtí cjihtire. ¹⁸ Musa bihoro puro jipihntina mehne noano jinocahga musa. ¹⁹ Musa yu cahína, yu coyea paina musare ti ñano yoapachuta tina yoaro sehe ñano yoa cahmaena tjiga. Cohamacu sehe musare ti ñano yoari buhiri dahrejaro tinare. Cohamacu yare ti joari pui áta ni joaa tiha: “Yuhu sehe musare ti ñano yoari buhiri buhiri dahreriro jija. Á jicu potocãta buhiri dahrehtja”, nina mari puhtoro”, ni joaa tiha panopure. ²⁰ Á jina ó sehe yoaga musa: Musare ñu tuhtiriro to júca baachú ñuna nuga tirore. To ñahma yapiochú cáhure ñana tirore sihõga. Musa á yoachú ñano musare to ñano yoari buhiri buho tirohca. ²¹ Á jina paina musare ti ñano yoapachuta musa sehe tinare ñano yoa cahmaena tjiga. Tinare noaa sehere yoaga musa. Á yoana ñaa sehere cahmaerana nica musa.

13

¹ Jipihntina musa bui puhtoac cjihtire Cohamacu dihta bese cûna. Ne cáiro puhtoro Cohamacu to bese cûerariro mariahna. To á cûrina ti jichú ñana jipihntina musa tinare noano yuhtiga. ² Mari puhtoare noano yuhtierana Cohamacu to bese cûrinare yuhdurucana nija mari. Á yuhdurucainare Cohamacu sehe buhiri dahrerohca. ³ Noainare cuichú yoahntina jierara puhtoa. Ñaare yoaina sehere cuichú yoahntina jira tina. Noaare yoaga musa puhtoare musa cuierahto cjihto sehe. Á yoana cuisí musa. Noaare musa yoachú puhtoro sehe “Noaare yoare musa”, musare ni ñanohca. ⁴ Musa puhtoa Cohamacu to cûno seheta musare yoadohohtinata jira musa noano jinocahto cjihto sehe. Wiho mejeta musa ñaare yoana pini tinare cuiga. Tina musare buhiri dahrehtina cjihtita jira. Jipihntina ñaare yoainare buhiri dahrehtiro Cohamacu tinare besere. ⁵ Ti á buhiri dahrehtina ti jichú ñaare yoana musa puhtoare cuiga. Á jina ño payoa mehne “Noaare yoaro cahmana yuhure”, ni tuhoutuero mehne noano yuhtijihna. ⁶ Musa puhtoa ti dahrahti cjihtire Cohamacu cûre. Á jina ti dahraare ti yoachú ñana musa puhtoare wapa nabasainare wapara musa.

⁷ Jipihntinare musa puhtoare noano yuhtiga. Tuhsu, puhtoare wapa nabasaina cáhure wapaga musa. Á yoa puhtoa sehe

payere ti wapa dutichú cáhure wapaga. Á jina jipihntina puhtoare noano ño payoga. ⁸ Tuhsu, paina masare wapamoena tjiga. Tinare cahino cahmana. To cahai jinare cahíriro Cohamacu dutiare yoa pahño tuhsariro jira. Á jina musa cahai jiina cáhure cahíga. ⁹ Ó sehe nina Cohamacu dutia: “Pairo namonore wuana tiena tjiga. Numia cáhu pacoro manonore wuana tiena tjiga. Masare wajãena tjiga. Yacaena tjiga. Paina yare goa pjaena tjiga”, ni yahura to dutia. Paye dutia cáhu jira. Ti á jipachuta cáno dutiare musare yahui tai nija. Ti dutia cáno dutia to jipachuta tí dutiare yoana Cohamacu dutiare yoa pahñona nija mari. Tí dutia ó sehe nina: “Mu basi mu cahino seheta mu cahai jiina cáhure cahíga”, nina. Tí dutiare yoana Cohamacu dutiare yoa pahñoinata jira musa.

¹¹ Á jina carína yoaro sehe jiena tjiga musa. Noano wacú masiga. Jesure noano wacú cohtaga. Jesu marine to tjua ta naahto mahanocã dahsatjãna. Tirore mari coã wacú tua ducachú Jesu marine to yuhdoro tahto mahanocã dahsamare. Mipú pinihtare cahacã waro jira to tahto. Ahri yu nirire masina musa. ¹² Mipure ñaina ya dacho jira. To tahto mahanocã dahsara. Tire masina, buhiri tichú yoare, nahitiano yoaro sehe jiare duhu pahñojihna mari. Á jina Cohamacu cahmaa sehere yoajihna mari. Á Cohamacu yare yoana, ñaare duhu pahñonahca mari. Ahri dachore payú ñaa baro jichú, ñami yoaro sehe jira. Wiho mejeta Cristo to tachú, ñami yoaro sehe jiro pihntia waha, pa dacho, buhria muja taro yoaro sehe waharohca. Surara coma suhtiro to sãa ducataro seheta Cohamacu ñaare to ducataare noano cjua pahñojihna mari. Á tíre cjua ñaare duhu, Cohamacu cahmaa sehere mari yoajihna. ¹³ Á jina Jesu to tahtore wacú cohtaina jina, noaa sehere yoajihna. Bose numarine yoana ñano yoana tjijihna. Tuhsu, cahaena tjijihna. Á jina numia mehne ñano yoaina, paina mehne ñano yoaina, cahma sayoina jiena tjijihna. Musa numia cáhu musa mehne ñano yoana tjiga. ¹⁴ Wiho mejeta Jesucristore puhtoro tina, tirore yuhtiga musa. Á yuhtina to jiro seheta jiga musa. Á jina ñaare musa goa pjae sehere yoana tjiga.

14

Musa coyeare Jesu yainare “Ñano yoana nina”, ni yahuwajaena tjiga

¹ Jesure wacú tuariroro to noano wacú tuaro dahsasinchú ñana tirore ji coaro

mehne cahmaga. To ã jiri jichu ñana “Ne masierara mñhu” ni, tiro mehne cahmasayoena tjiga. ² “Jipihtiare chu masija yñhu”, ni tñhotura paina. Paina sehe Jesu yare noano masierasinia wahiquinare chueraina, toa dicha dihtare chñra. ³ Jipihtiare chuina sehe toaa dicha dihtare chñinare ñu tuhtiea tjijaro. Á yoa toaa dicha dihtare chuina cñhu jipihtiare chñinare “Ñano yoaa nina”, ni cahma yahuwajaea tjijaro. Jipihtiare chñina sehe Jesure wacũ tuaina ti jichu Cohamacu tinare to yaina yoa tuhsure. To yaina ti jichu ñna wahiquinare chueraina sehe tinare yahuwajaea tjijaro. ⁴ Jesure wacũ tuaina Cohamacure dahra cohtaina dihta jira. Ti ã jichu ñana musa tinare yahuwaja masierara. Jesure wacũ tuaina to cahmano sehe ti quihõno yoaerachu ñano tiro dihta ti puhtoro jiro, tñre yahu potomasina. To cahmaare quihõno ti yoachu cñhure tñre yahu masina tiro. Á jiro tiro sehe to yainare “Ñano yoare mñhu”, ni yahuhtiro jirohca. Á jiro tirore dahra cohtainare noaa dihtare yorucu masichu yoariro jira Cohamacu.

⁵ Cãina cãa dachori cua pisaro mehne Cohamacure ti ño payohti dachori cijhtire cñara. Paina sehe, “Dohse jiri dachore Cohamacure ño payochu, noana”, ni tuhotu, ño payoia jira. Tina cãno potori ã yoaeraina jipahta jipihtina õ sehe ni tuhotujaro: “Jesu to cahmano seheta noano yoana nija”, ni tuhotu masijaro. ⁶ Cãiro cãa dachori cua pisaro mehne Cohamacure ti ño payoa dachorihi Cohamacure ño payoro, tiro cñhu quihõno ño payoro nina. Tuhsu jipihtiare chñiro chñrota, Cohamacure “Noana”, ni wahche payora tiro. Á jiro tiro cñhu Cohamacure ño payorota nina. Á yoa pairo sehe cãa chñare chñerara, Cohamacure ño payoro. Tiro cñhu Cohamacure “Noana”, ni wahche payora.

⁷ Tuhsu, mari cahmaa dihtare yoaina ne jii masieraja mari. Cristo jira mari puhtoro. Á jiro mari catichu mari yariachu cñhure mari puhtorota jira. ⁸ Mipure mari catisinino puro Cristo yare yoantina jija mari. To yaina jija. Mari yariari baharoru cñhure to yainata jinahca. Á jiro mari catichu mari yariachu cñhure Cristo mari puhtoro jira. ⁹ Áta jira. Cristo yaria masa mujaha catinane, ã jichu yariaina cñhure ti puhtoro jiro taro.

¹⁰ ¿Dohseana tana musa coyeirore Jesu yairore “Ñano yoaro nina”, ni yahuwaja duajari musa? ¿Dohseana tana musa coyeirore tu diho cũ duajari musa? Mari jipihtina Cristo panoi mari ducuchu tiro sehe mari yoirire masi pahñonoriro jiro, marine beserohca noainare, ñainare. To ã besetiroti to jichu musa coyeirore “Ñariro jira”, ni

yahuwajaina tjiga. ¹¹ Cohamacu yare ti joari pũi õ sehe ni joaa tiha:

“Õ sehe nire mari puhtoro: ‘Yñhu catiriro jija.

Á jichu õ sehe ni quihõno warota yahuja musare.

Jipihtina yu panoi na tuhcuca caha saahca.

Á na tuhcuca caha su, “Noariro, tuariro jira mñhu” ni, yñhure ño payoahca’, nire mari puhtoro”,

ni joaa tiha. ¹² Á jiro jipihtina mari yoirire Cohamacu siniturohca marine. “¿Dohse yoana ã yoari?” ni siniturohca. To ã sinituchu yuhtiro jica marine.

Musa coyeirore ñano yoachu yoaina tjiga musa

¹³ Á jina mari mehne macainare “Ñaina jira musa”, ni cahma yahuwajaina tjijihna. Á yoana mari coyeirore Jesu yairore dojomehna tjijihna “Jesure wacũ tua duhuri”, nina. ¹⁴ Yñhu Jesucristo yairo jicu, ahri yu nihtire noano masija yñhu. Yñhu sehe jipihtia chñare yu chuchu yu chñri buhiri, buhiri mariahna. Wiho mejeta pairo sehe “Ahri chñare chñacu buhiri tii nica yñhu”, ni tuhoturo sehe churo, potocãta buhiri tiro jira. ¹⁵ Tí potocã tjira. Paina ti sio, chñera barore musa chuchu ñano, musa coyeiro ñu cũ churo, “Cue, ñano yoai nica yñhu”, ni pjiro tuhotuboca tiro. Tirore ã ñu cũ chuchu yoana, tirore cahña nieraca musa. To sio, chñera barore musa chuchu, tiro cñhu ñu cũ chuboca. Á churo “Ñano yoai nija”, ni tuhoturo Cristore duhuboca. Musa coyeiro yaro jiboriro cñhure yariari jire Cristo. Á jina “Cristore duhuri”, nina tirore ñu cũ chuchu yoaina tjiga. ¹⁶ Á jia “Ahri sã yoari noa nica”, musa ni tuhotuchu paina musare yahuwajaboca. Ti ã yahuwajachu ñana musa ã yoirire yoa namoena tjiga, “Yahuwaja namori”, nina. ¹⁷ Cohamacu sehe mari puhtoro jira. To ã jichu mari chña, mari sihnia cñhu ã jinocaa nina. Wiho warota jira. Á jia mari puhtoro to dutiare, noaa cñhure mari yoachu ti waro jia nina. Paina mehne mari noano jinocachu cñhure noaa waro jia nina. Tuhsu, Espiritu Santo yoadohoa mehne mari wahchechu noaa waro jia nina. ¹⁸ Tó seheta Cristo yare yoirirore ñna Cohamacu, masa cñhu “Noano yoare mñhu”, niahca.

¹⁹ Tó seheta yoajihna mari pinihta noano mari jinocahto cijhtore, mari basi mari cahma yoadohohto cijhtore. Á yoana Jesure wacũ tua namonahca. ²⁰ Pairo Jesu yairo to chu dutierari cijirire musa chuchu ñano tiro sehe ñu ji coaeraro Cohamacu yare cohãboca. Á jina tñre chñena tjiga. Potocãta jipihtia chña noaa chuata jira. Tí ã jipachuta paye barore mari chuchu pairo

“Ñaa chaa jica ahri”, niriro jiparota ñu cū chaboca. Ā churo ñano yoaro nica tiro. Ā jina marine to ñu cū chuchū, mari cāhu ñano yoana nija. ²¹ Wahiquina dihire mūsa chuchū ñano, vinoare mūsa sihnichū ñano, pairo Jesu yairo “Tíre chūcū ñano yoai nica yuhū”, ni tūhoturiro jiparota tiro cāhu ñu cū, chū sihñiboca. Ā ni tūhoturiro pinihta chū sihñino ñano yoaro nina. Ā jina tiro to ñano yoerahto sehe Jesure to wacū tua duherahto sehe wahiquina dihire, vino cāhure mūsa sehe mūsa duhuchū noa nina. ²² “Jipihtiare chū masija”, ni tūhotuna, tíre Cohamacū dihtare yahuga. Ñaare yoerariro, “Noano yoai nica yuhū”, ni tūhoturiro wahcheriro jira. ²³ Pairo sehe “Ahri chūare chūcū ñano yoai niboca yuhū”, ni tūhoturiro jiparota ti chūare chūro, buhiri tiriro jira tiro. “Ahrire chūcū potocāta noaare yoai nija”, ni tūhotuerara tiro. Ā ni tūhotueraro tíre chūro, to chūri buhiri buhiri tira tiro. “Noaare yoai nija”, ni tūhotueraro tíre yoaro, buhiri tira tiro.

15

Mari cahai jīnare noano yoajihna

¹ Mari Cohamacūre noano wacū tuaina sehe wacū tuara cureinare yoadohojihna. Ā yoana mari ya cjihti dihtare yoaena tjijihna. ² Ā jina mari cahai jīnare Jesu yainare noano yoajihna ti noano jinochahto cjihtore, Cohamacūre ti noano wacū tua namohto cjihtore. ³ Cristo sehe to ya dihtare yoaeraha. Āta nina Cohamacū yare ti joari pūi. Ō sehe ni joaa tiha: “Cristo ō sehe nire Cohamacūre: ‘Mūhū sehere ñano durucuborina yuhū sehere ñano durucure’, nire Cristo Cohamacūre”, ni joaa tiha panopūre. Ā ñano ti durucuriro jiro Cristo to Pūcūro ya sehere yoaro niha. ⁴ Panopū Cohamacū yare ti joari pūi tina joaa tiha mari noano buhehto cjihtore. Ā jina tí pūre buhena wahcheja. Ā buhena mari ñano yuhdāna cāno pjana, noano mari yuhdāhtore cohtanahca. ⁵ Cohamacū mūsaare tuachū yoariro wahchechū yoariro mūsaare jipihinare cāno potori noano jichū yoajaro, Cristo to cahmano seheta. ⁶ Āta yoajaro tiro mūsa jipihina cāno potori Cohamacūre mari pūhtoro Jesucristo Pūcūrore “Noariro, tuariro jira”, ni mūsa ño payohto cjihtore.

Judio masa jierainare noaa buheare yahu dūcaha

⁷ Cristo marine to yoariro seheta mūsa mehne macainare noano cahma piti bocaga. Mūsa ā yoachū ñua “Potocāta Cohamacū noariro jira”, ni ñuahca masa sehe. ⁸ Mūsaare ahrire niita nija: Judio masare yoadohotiro cjihto taha Cristo.

Cohamacū tirore warocaro judio masa sā ñuchūsama cjiropūre to ni yahuriro cjiro seheta yoaro niha. Tíre to yoari cjiirire masare masichū yoahrtiro cjihto taha Cristo. ⁹ Masare Cristo to yoadohochū Cohamacū pja ñano nire tinare. To ā pja ñuchū judio masa jieraina cāhu Cohamacūre “Noariro, tuariro jira” ni, ño payora mipūre. Tina cāhure to yaina jichū yoaro taha Cristo. Cohamacū yare ti joari pūi āta ni joaa tiha: “Cristo ō sehe niha Cohamacūre: ‘Judio masa jieraina cahai mūhure “Cohamacū noariro, tuariro jira”, ni ño payoihtja.

Ā jicu tina cahai basacū mū ya cjihtire basaihtja’, niha Cristo Cohamacūre”,

ni joaa tiha panopūre. ¹⁰ Tuhsū, ō sehe ni joaa tiha tjoo:

“Cohamacū to beserina judio masa mehne cahma wahchega mūsa cāhu judio masa jieraina”,

ni joaa tiha panopūre. ¹¹ Tuhsū, ō sehe ni joaa tiha tjoo:

“Judio masa jieraina jipihtina Cohamacūre ño payojarō.

Ā jia jipihtiromo macaina tirore ‘Noariro, tuariro jira’, ni ño payojarō”,

ni joaa tiha. ¹² Ā yoa Isaia cjiro cāhu ō sehe ni joaa tiha:

“Jesé panamino ji turiariro tarohca.

Ā taro judio masa jieraina bui pūhtoro jirohca tiro.

Ā jia tina sehe tirore wacū tuaa, tinare pichacūwahaborinare to yuhdohtore masiahca tina”,

ni joaa tiha panopūre.

¹³ Cohamacū marine baharopū to yuhdohtore wacū cohtachū yoariro noano mūsaare wahchechū yoajaro. Tuhsū, masare Jesure wacū tuainare noano jinocachū yoajaro tiro. Mūsaare to ā yoachū mūsaare to yuhdohtore Espiritu Santo to tuaa mehne wahcheha mehne wacū cohta namochū yoajaro.

¹⁴ Ahrire mūsaare yū yahūhtire noano masija. Mūsa sehe noaina jira. Tuhsū, Jesu yare noano masina mūsa. Ā masina mūsa basi noano cahma yahu, buhe masina mūsa. ¹⁵ Mūsa ā masiina mūsa jipachuta cāa tahari ahri pūpūre mūsaare cuiro marieno noano yahu pahñō joahi tíre mūsa boerahto sehe. Cohamacū yūhure cahñō mūsaare buhe dutiro cūre yūhure. Ā jicu to cūriro seheta yoaja, mūsa tíre boerahto sehe. ¹⁶ Yūhure to ā cūchū, sacerdotē to yoaro sehe yoaja yuhū. Ā yoacu, Jesucristo yare noaa buheare judio masa jierainare buheja yuhū. Yū ā buhechū tūhoa, tina Jesure wacū tuara. Tina Jesure wacū tuainare yuhū sehe sacerdotē wahiquinare wajā jū mūo Cohamacūre yū waboriro seheta,

tinare “M^u yaina jira”, nija Cohamac^ure. Y^u ã niinare Espiritu Santo sehe tinare Cohamac^u yaina cjihti jich^u yoara. Ti ã jiina jich^u ñuno, Cohamac^u sehe ji coaro mehne tinare ñahanohca.

¹⁷ Cohamac^u to buhe duti cūriro jicu Jesucristo to yoadohoa mehne y^u yoari cjirire wahchea mehne yahuja musare. ¹⁸⁻¹⁹ Tuhs^u, ahri pinihtare musare pototi yahu duahi. Y^u yahua y^u m^u suro y^u yahua ne jierara. Paina judio masa jierainare Cristo to yoadohoa mehne tinare y^u buhech^u tuhoa, y^u yoarire ñua, ã jia Jesu tuaa mehne y^u yoa ñorire ñua, Espiritu Santo to tuaa mehne tina Cristore wacū tuare. Jerusalēp^u wahma y^u buhe ducari baharo jipihita macaripēp^u buhe wahcāhi. P^u Ilirico yahpar^u cūhure Cristo ya buhea noaa buheare buhei sui. ²⁰ Cristo yare masieraina dihtare noaa buheare tuaro buhe duahi, y^uh^u mehne macaina ti buherinapare buhe duaeracu. ²¹ Āta ni joaa tiha Cohamac^u yare ti joari pūi: “Panop^u tirore ne tuhoeraina cjiri tirore masiahca.

Ā yoa tirore ne tuhoeraina cjiri to yare noano tuhoahca”, ni joaa tiha Cohamac^u yare ti joari pūi.

Paulo Romap^u to wahahtore yahuha

²² Ā jicu jipihitiro macainare buheriro jicu pay^u tahari musa cahai waha duapaihta waha masiera tihi. ²³ Mip^u pinihtare ahri yahparipare y^u dahraa pihtia wahahre. Ā jicu pay^u cūhmari musa cahar^u waha duariro jicu musa cahar^u wahaihtja. ²⁴ España^u wahacu, musare tōi ñu yuhduaihtja. Ā yoc^u musa mehne wahcheihtja. Tuhs^u, musa mehne mahanocā y^u jiri baharo yūhure musa yoadohoa mehne España^u yuhdu wahcāihtja. ²⁵ Mip^ure Jerusalēp^u wahasinii tai nija. Tō macainare Jesu yainare y^u coyeare niñerure naasinii wahai nija. ²⁶ Macedonia yahpa macaina, Acaya yahpa macaina cūh^u noano mehne Jesu yainare Jerusalēp^u jainare pjacoinare niñerure warocahre tinare yoadohoa. Ā jicu tinare tīre wai wahai nija. ²⁷ Ti niñerure waa, noano mehne wahre tina. Ti ã yoach^u noa nina, y^u tuhotuch^u. Tinare judio masa jierainare judio masa sehe Cohamac^u yare buhe mūhtare. Ā jia tinare to yuhdohto cūhure buhe mūhtare judio masa. Ti ã buhech^u ñuc^u Macedonia macaina Acaya macaina mehne judio masare ti yoadohoch^u noa nina yūhure. Tinare ti buheri wapa yoaro sehe jira tī, y^u tuhotuch^u. ²⁸ Ā jicu Jerusalē macainare tī niñerure wa tuhsuc^u España^u wahaihtja. Tōp^u wahacu musare ñu yuhduaihtja. ²⁹ Ā yoa musa cahar^u y^u wahach^u Cristo yare musare y^u

buhech^u tiro musare noano yajeripohna tich^u yoarohca.

³⁰ Y^u coyey^u, mari pūhtoro Jesucristore wacū tuara musa. Ā yoa Espiritu Santo to tuaa mehne painare cahina musa. Ā jiina jina yūh^u cūhure tuaro sini payoga Cohamac^ure. ³¹ Ō sehe ni sini payoga: Judea yahpa macaina Jesure ño payoeraina yūhure ti ñano yoa duach^u Cohamac^u yūhure to ñu wihbohto sehe sini payoga. Tuhs^u, Jerusalē macaina Jesu yainare niñerure y^u wabasach^u tina tīre wahchea mehne ti ñahahto sehe sini payoga. ³² Musa ã sinich^u Cohamac^u cahmach^u wahchea mehne musa cahar^u wahaihtja. Ā jicu musa mehne jicu wahchea mehne soihtja. ³³ Cohamac^u marine noano jinocach^u yoariro musa mehne jirucujaro.

16

Paulo noa dutiha

¹ Mari coyecoro Febe wama tiricoro musa cahar^u waharo taro nina. Ticoro Cencrea wama tiri macai Jesu yainare cahmachuinare yoadohoricoro jira. ² Ā jiro payare yoadohoricoro yūh^u cūhure yoadohoricoro jihre ticoro. Tuhs^u, mari pūhtoro Jesu yacoro jira. Ā jina ticorore noano mehne musa mehne ji dutiga. Tō seheta yoaro cahmana marine Jesu yainare. Ā yoana ticorore paye baro to maerach^u ñuna ticorore waga musa.

³ Aquila, to namono Priscila cūh^u noajaro. Jesucristo yare y^u buhech^u tina cūh^u yūh^u mehne dahrare. ⁴ Tinare mahano wajāmoñore paina yūhure ti wajā duach^u ti yoadohori buhiri. Ā jicu tina mehne wahcheja yūh^u. Tuhs^u, judio masa jieraina Jesu yaina jipihitina tina cūh^u tina mehne wahchera. ⁵ Aquila ya wūh^u cahmachuina cūh^u Jesu yaina noajaro. Y^u cahīro Epeneto cūh^u noajaro. Tiro Asia yahpa macariro tōi jiro Cristore wacū tua mūhtariro jire. ⁶ María cūh^u noajaro. Ticoro musa mehne tuaro dahrahe. ⁷ Y^u coyey Andrónico, Junia cūh^u noajaro. Peresui y^u jich^u tinata yūhure piti tina jihre. Ā jia y^u pano Cristore wacū tua mūhtare tina sehe. Paina Jesu to cūrina sehe tinare “Potocāta noaina jira”, ni durucura.

⁸ Ampliato cūh^u y^u cahīro Jesu yairo jira. Tiro noajaro. ⁹ Urbano cūh^u noajaro. Tiro cūh^u mari mehne Cristo yare dahrahe. Ā yoa y^u cahīro Estaqui noajaro. ¹⁰ Apele cūh^u noajaro. Tiro potocāta noano Jesure wacū tuara. To yoarire ñuna tīre masija mari. Tuhs^u, Aristóbulo ya wūh^u macaina jipihitina to namono to pohna cūh^u noajaro. ¹¹ Y^u coyey Herodiō noajaro. Ā yoa Narciso ya wūh^u macaina Jesu yaina

noa pihntinocajaro. ¹² Ā yoa Trifena, Trifosa cāhū noajaro. Tí numia mari puhtoro Jesu ya dahraare yoara. Mari cahīricoro Pérside cāhū noajaro. Ticoro mari puhtoro yare tuaro yoara. ¹³ Rufo mari puhtoro Jesure noano wacū tuariro, to yare noano yoariro noajaro. To pocoro cāhū noajaro. Ticoro yū poco yoaro sehe jiricoro jira. ¹⁴ Asíncrito, Flegonte, Herme, Patroba, Herma, paina Jesu yaina tina mehne macaina cāhū noajaro. ¹⁵ Tuhsū, Filólogo, Julia, Nereo, to bahoro cāhū, Olimpa, paina tina mehne macaina cāhū Jesu yaina noajaro.

¹⁶ Ā yoa mūsa mehne macainare piti bocana, noano mehne piti bocaga. Jipihtina Jesu yaina jipihtiro macaina mū sare noa dutira.

¹⁷ Yū coyea, mūsa mehne macaina cāina mū sare cahma űu tuhti, cahma tju wachū yoaina jira. Ā jia mū sare Jesu ya buheare dojomehna. Ā jina tó sehe yoainare űūna noano yoanohbū, “Dojomehneri”, nina. Ā yoainare piti tiena tjiga. ¹⁸ Tó sehe yoaina mari puhtoro Jesucristo yare yo aerara. űaare ti goa pjaā dihtare yoara. Tuhsū, noano tūho ji coaro dero mahño buhera noano masierainare. Ti ā mahñochū tinare noano tūhora. Ā jina ā yoainare piti tiena tjiga mūsa. ¹⁹ Mūsa sehe Jesure noano yūhtiina jira. Tíre jipihtina masina. Ā noano yūhtiina mūsa jichū wahcheja yūhū. Ā jicū noano mūsa yoahtore mūsa masichū cahmaja yūhū. Ā yoa ne űaare yo aeraina mūsa jichū cāhūre cahmaja yūhū. ²⁰ Ā jiro Cohamacū marine noano jinocachū yoariro mahanocā baharo watīno Satanare yūhdūrcachū yoarohca mū sare. Ā yoa mari puhtoro Jesucristo mū sare noano wahachū yoajaro.

²¹ Timoteo yū piti mū sare noa dutira. Yū coyea judio masa cāhū, Lucio, Jasō, Sosípatro mū sare noa dutira.

²² Yūhū Tercio ahri pūre Paulore joabasariro jija. Yūhū Jesu yairo jicū mū sare Jesu yainare noa dutija.

²³ Gayo ya wūhūi jinocai nija yūhū Paulo. To ya wūhūi Jesu yaina cahmachuna. Tiro cāhū mū sare noa dutira. Ā yoa Erasto ahri maca macaina puhtoare niñerure űū wihbobasariro mū sare noa dutira. Mari coyeiro Jesu yairo Cuarto cāhū mū sare noa dutira.

²⁴ [Yū coyea mari puhtoro Jesucristo mū sare jipihtinare to cahīa mehne noano yoajaro. Āta yoajaro.]

Paulo Cohamacūre űo payoro joa ba-toara

²⁵⁻²⁷ Mari puhtoro Jesucristo ya buhea mehne noaa buhea mehne Cohamacū mū sare tirore wacū tua namochū yoa

masina. Panopūre tí buhea noaa buhea ne masare yahuerari buhea jimaha. Mipūre Cohamacū yare yahu muhtaina cjiri ti joari cjiri mehne tí buheare yahua jira. Yūhū cāhū tíreta buheja. Tí buheare Cohamacū ā jirucuriro to yahu site dutiro seheta jipihtiro macainapū mipūre masina. Tí buheare tirota yahu dutiha masa tirore yūhti, ti wacū tuahto cjihto sehe. Ā jina tirore “Potocāta noariro, tuariro jira mūhū”, ni wahche payojihna. Tiro cāirota Cohamacū dihta noano masi pahñoriro jira. Jesucristo to yoadohoa mehne Cohamacūre ā űo payorucujihna mari. Āta yoarucujihna.

1 Corintios

Paulo Cohamacu yainare Corinto macainare joarocaha

¹⁻² Yuhu Paulo, Jesucristo yare buhe duti to cūriro jija. Cohamacu to cahmano seheta Jesu to cūhtiro cjihtore beseri jire yuhare tiro. Sostene wama tirio mehne musare Cohamacu yainare Corinto macainare joarocaja sā. Ahriro cūhu mari coyeiro Jesu yairo jira. Jesucristo mehne macaina musa jichu Cohamacu yaina cjihti beseri jire Jesu musare. Ā yoa jipihtina paina mari puhtoro Jesucristore siniina jia, tina cūhu Cohamacu yainata jira. Ti ā jichu Jesucristo sehe mari jipihtina puhtoro jira. Ā jina musare jipihtinare joarocaja sā. ³ Ā yoa Cohamacu mari Pucū mehne, mari puhtoro Jesucristo mehne musare noa dutija. Cohamacu to yoadohoa mehne noano jiga musa.

Jesucristo sehe musare noano yoabasaha Cohacare

⁴ Jesucristo yaina musa jiri baharo tiro sehe musare noano yoabasari jire Cohacare. To ā yoabasachu űucu, Cohacare “Noana”, nirucuja yuhu dachoripe. ⁵ Cristo yaina musa jichu űuno Cohamacu sehe musare noano jichu yoari jire. Tuhsu, to yare musare painare noano yahuhtina cjihtire yoari jire tiro. Ā jiro tiro to yare noano masichu yoari jire musare. ⁶ Cristo yare musare sā buheriro seheta ā yoari jire musare, Cristo yaina musa wahachu. ⁷ Ā yoa Cohamacu musare noano yoadoho pahűonocanhca. Mari puhtoro Jesucristo ahri yahpau to tjua tahtore musa cohtaro watoi Cohamacu musare ā yoadohorucurohca. ⁸ Cohamacu musare yoadohorohca to yare musa ne duhuerahito sehe. To ā yoachu musa sehe dachoripe, ahri dacho pihtichuru cūhure űaa buhiri marieina jirucunahca, Cohamacu to űuchu. Ā jina Jesucristo mari puhtoro to tjua tachupure űaa buhiri marieina jinahca musa. ⁹ Tīre Cohamacu to niriro seheta tiro yoara. Tiro to macano mari puhtoro Jesucristo yaina cjihtire marine beseri jire. To ā beserinare Jesu yaina jichu yoare marine.

Jesu yaina Corinto macaina cahmachua cahma sayoha ti basi

¹⁰ Yu coyea, mari puhtoro Jesucristo to dutiro mehne musare tuaro mehne yahui tai nija ahrire: Musā basi cahma sayoena tjiga. Ā yoa musa basi cahma tju wa dapo jiena tjiga. Cū curuaihta jiga musa. Ā jina jiape ni durucuena tjiga musa basi. Ā yoana musa yoahito cjihtore tuhotuna, cāno

potorita yoaga musa. ¹¹ Yu coyea, musa basi cahma sayona niyuhca musa. Ā ni yahure cāina Cloé ya wūhu macaina yuhure.

¹² Cāina musa mehne macaina ō sehe ni cahma sayoyuhca: “Paulo ya curua macaina jija sā”, ni cahma sayoyuhca cāina musa. Ā yoa paina “Apolo ya curua macaina jija sā”, niyuhca tina cūhu. Paina sehe tjoa “Pedro ya curua macaina jija sā”, niyuhca tina cūhu. Paina sehe tjoa “Cristo ya curua macaina jija sā”, niyuhca tina cūhu. ¹³ Musā ā nipachuta Cristo yaina cū curuaihta jija mari. Mari basi cahma tju wa dapo masieraja mari. Cū curuaihta jija mari. Yuhu Cristo jieraja. Tiro yoare sehe musa ya buhirire crusapu yariariro cjiro jieraja. Tuua maeraja. Ā jicu wiho jiriro jija. Ā yoa musare pairo bautisaro, Cristo yaina musa jichu musare bautisari jire. Yu yaina musa jichu sehere musare bautisaerari jire. (Ā jina yuhu sehere űu wahāena tjiga musa.)

¹⁴ Musare, musa mehne macaina cūhure bautisaerahi yuhu. Crispore, Gayo cūhure tina dihtare bautisahi. Paina sehere bautisaerariro yu jichu noana, yu tuhotuchū. ¹⁵ Payu masare bautisariro yu jichu “Paul yaina sā jichu bautisare sāre”, ni űu wahāboa musa yuhure. Ā jicu tīre musa yoachu cahmaeraja. ¹⁶ Estéfana ya wūhu macaina cūhure bautisahi yuhu. Tōpeinata bautisahi yuhu. Yu bautisarinare painare wacūeraja yuhu. ¹⁷ Cristo yuhare warocarō, masare bautisahtirore cūerare yuhare tiro. Noaa buheare buhehtiro sehere yuhare cūre. Cristo crusapu to yariarire mari buhechu tí buhea marine noaina wahachu yoara. To ā yoapachuta noaa buheare yu mu sūro yu buhechu yuhu sehere űu wahāboa musa. Musā ā űu wahāna noaa buhea sehere űo payoeraboa musa. Tuhsu noaina wahaeraboa. Ā jicu Jesu ya buheare buhechu yu mu sūro yu masia mehne buheraja yuhu.

Cohamacu to tuua cūhure to masia cūhure cjuariro jira Cristo

¹⁸ Pichacapu butihtina sehe Cristo crusapu to yariarire mari yahuri buheare “Tuho masieraina ya buhea jira tí”, ni mana butihtina sehe. Mari sehe Cristo to yuhduchu yoahitina cjihti jina ō sehe nija: “Crusapu to yariarire mari yahuri buhea tí waro jia nina. Tí buhea Cohamacu to tuare yahura marine”, nija mari. ¹⁹ Cohamacu sehe to yare ti joari pūi ō sehe nina:

“Ahri yahpa macainare ‘Noano masiina jira’, ti niinare ti masia yaba cjihti jierachu yoaihca yuhu”,

nia tiha Cohamacu to yare ti joari pūi.

²⁰ Ā jia ahri yahpa macaina noano masiina ti masia yaba cjihti jierara. Sā coyea judio masare buheina cūhu ti masia yaba cji-

hti jierara. Mipure ahri yahpa macaare durucu sayo mihniina cūhu ti masia yaba cjihti jierara. Ahri yahpa macaina noano masiina ti jipachata quihōno masieraina ti jirire masichu yoare Cohamacu. ²¹ Cohamacu pinihta noano masiro jira. To ā jichu ahri yahpa macaina ti ya masia mehne Cohamacure ne masierara tina. Cohamacu to masi dutieraro seheta ā wahare tinare. Cohamacure cahmaeraina sehe ō sehe nina noaa buhea warore: “Tuho masieraina ya buhea jira”, nimana. Ā jia noaa buheare “Tuho masieraa buhea”, ti nia buheare tuhoa Cristore masi dacara masa. Ti ā masi ducachu Cristore ti wacu tuachu űuno tinare pichacapu wahaborinare yuhdachu yoara Cohamacu.

²² Judio masa Cohamacu to tuaa mehne to yoa űorire űu duaa nina. Ā yoa griego masa judio masa jieraina sehe noano ti masihti cjihtire macaa nina. ²³ Mari sehe Cristo crusapu to yariarire yahuri buheare buheja mari. Ti buheare judio masa sehe űu yabira. Ā yoa ti buheare judio masa jieraina sehe “Tuho masieraina ya buhea jira”, ni tuhotura. ²⁴ Ti ā ni tuhotupachata Cohamacu to yaina cjihti to beserina sehe ti buheare ō sehe nina. “Cristo ya buhea Cohamacu to tuaare, to noano masiare masichu yoara marine”, nina tina ahri buheare. Tina judio masa, judio masa jieraina jipahta, ā nina Jesu yaina. ²⁵ Cohamacu masi pahűoriro jira. “Tiro tuho masierariro jira”, masa ti ni tuhotupachata ahri yahpa macaina yuhdoro noano masi pahűoriro jira tiro. Tuhsu Cohamacure “Tuaerariro jira”, masa ti ni tuhotupachata ti bui tua yuhdurucu sūriro jira tiro.

²⁶ Yu coyea, Cohamacu musare to yaina yoachū masa payu wiho jiina masa jirire wacūga masa. Ahri yahpa macainare “Noano masiina”, ti niinare mahainacā Jesu yaina cjihtire beseri jire Cohamacu. Tuhsu pūtoaa cūhure mahainacā Jesu yaina cjihtire beseri jire tiro. Ā yoa pūtoaa pohna cūhure pache pua pohna cūhure mahainacā Jesu yaina cjihtire beseri jire tiro. ²⁷ “Tuho masieraina jira”, ti niinare Cohamacu beseri jire “Noano masiina jira”, ti niina ti buoro wahahto cjihto sehe. Tuhsu “Yaba cjihti jierara”, ti niinare Cohamacu beseri jire, “Wiho jiina jierara”, ti niina ti buoro wahahto cjihto sehe. ²⁸ Masa ti űu yabiinare “Yaba cjihti jierara”, nina masa. Ti ā nirinare Cohamacu to yaina cjihtire beseri jire tinare. Ā besero “Pūtoaa waro jira”, ti niinare wiho jiina ti jiare masichu yoari jire Cohamacu tinare. ²⁹ To ā yoachū űua ahri yahpa macaina ne cāiro “Tuariro, noano masiro jija”, ne ni yuhduruca masierara, Cohamacu to űuchū.

³⁰ Cohamacu sehe marine Jesu yaina jichu yoare. To yaina jina marine to yuhdachu yoari baharo jipihitia dachoripe Cohamacu mehne jirucunahca mari. Jesucristo sehe Cohamacu yare noano masichu yoara marine. Tuhsu mari űaa buhirire cohāna. Ā yoaro mari űaa yoari buhirire cosaro, marine “Noaina jira”, to ni űuchū yoara Cristo Cohamacure. Ā yoaro marine pichacapu wahaborinare yuhdachu yoara. ³¹ To ā yoachū Cohamacu yare ti joari pūi to ni joariro seheta ā wahara: “Yu mu sūro masi pahűoriro jija”, niriro tīre nieno tjijaro. Ō sehe nijaro: ‘Mari pūtoro Cristo sehe marine yuhdachu yoariro jira’, nijaro tiro’, nina Cohamacu yare ti joari pūi.

2

Cristo crusapu to yariarire sā yahuri buhea jira ahri

¹ Yu coyea, musa cahapu sūcu “Noano masi pahűoja”, musare ni buherahi. Cohamacu yare musare buhecu, to sehe ni buhecu nierahi. ² “Ō sehe ni buheihitja”, nicu musa mehne jicu Jesucristo ya dihtare crusapu to yariari dihtare wacūcu, ti buheare buhei yūhu. ³ Tuhsu, musa mehne jicu wiho jiriro yoaro sehe jii yūhu. Ā jicu Cohamacu yare quihōno buhe duariro jicu cuiriro tetereriro yoaro sehe jii yūhu. ⁴ Ā jicu Cohamacu yare buhecu, “Masi pahűoja”, ni buherahi. Mijoa durucua mehne yu mu sūro buherahi. To yare yu buhechu Espiritu Santo to tuaa mehne yu buhechu űure musa. ⁵ Ō seheta ni buhei yūhu musare masa ti mu sūro ti buhea sehere musa cahmaerahto sehe. Cohamacu sehere musa wacū tuahtore ā ni buhei yūhu.

Espiritu Santo sehe Cohamacu to jia tiare buhera marine

⁶ Ā jina Cohamacu ya buheare musare Jesure noano masiinare yahuja sā. Masa ti mu sūro ti buhea yoaro sehe jierara ahri musare sā buhea. Ti pūtoaa ya buhea cūhu jierara. Tina sehe pihtia wahaahca. ⁷ Paina ti masierari cjirire Cohamacu ya durucua cjirire yahuja sā sehe. Panopure ahri buheare Cohamacu yaina cjiri noano masi pahűoerari jire. Ahri yahpa to jihto pano ahri buhea ti niriro seheta “Āta wahajaro”, ni tuhsua tiri jire Cohamacu. Marine pichacapu wahaborinare to yuhdachu yoalto cjihtore, tiro mehne mari jirucuhito cjihtore, tiro yoaro seheta mari wahahto cjihto cūhure. “Āta wahajaro”, nia tiri jire tiro. ⁸ To ā nichū Cohamacure cahmaeraina pūtoaa ne to buheare tuho duareaa, masierari jire. Tīre noano masia, mari pūtorore Cohamacu macūno warore crusapu cā puha wajāeraboa tina. ⁹ Cohamacu yare ti joari tjui ō sehe nina:

“Jipihtina Cohamacure cahīna ya cjihtire Cohamacu noano cahnobasa tuhsuha.

Noa yuhduara tí to cahnobasari.

Tí to cahnobasarire mari ne ñuerana, tuhoerahi.

Ā jina ‘Ō sehe yoarohca Cohamacu’ ni, dohse masiyu pahñohto basioerara marine”,

nina Cohamacu yare ti joari pūi. ¹⁰ To ā nipachuta Espiritu Santo Cohamacu yare masichu yoare marine. Jipihtia Cohamacu yare Espiritu Santo masi pahñona. Ā masino tiro marine tíre masichu yoara.

¹¹ Ne paina sehe masano to masiare masierara. Wiho mejeta masano sehe to basi to wacūapu to tuhotuare masina. Tó seheta paina Cohamacu to masiare ne masierara. Cohamacu to Espiritu Santo dihta to masiare masina, masano to basi to tuhotuare to masino seheta. ¹² Ā yoa mari sehe Jesu yaina jina masa ti mu sūro ti buheare cjaeraja. Cohamacu to Espiriture ware marine masichu yoaro taro. Tiro marine to noano yoahatore masichu yoara Espiritu Santo sehe. ¹³ Cohamacu yare musare buhena, masa ya masia mehne sā mu sūro buheraja sā. Espiritu Santo to buhea sehere musare buheja. Ā buhena Espiritu Santore cjuainare Cohamacu yare noano buheja sā.

¹⁴ Espiritu Santore cjaeraina sehe Espiritu Santo yare ne cahmaerara. “To ya wiho warota jira”, nimana tina. Espiritu Santo to yoadohoro marieno ne to yare masihto basioerara masare. Ā jia tina to yare ne masierara. ¹⁵ Espiritu Santore cjuaina sehe Cohamacu yare noano masina. Ā jia jipihtiare noano bese masina. Paina sehe tinare “Noaina jira. Ñaina jira”, ni bese masierara Espiritu Santore cjuainare. ¹⁶ Ō sehe nina Cohamacu yare ti joari pūi: “Mari puhtoro Cristo to tuhotuare masiina ne mariaha. Ā yoa tirore masa ne ‘Ō sehe yoaga’, ni masierara”, nina to yare ti joari pūi. Mari sehe Cristo yaina jina, Cristo yoaro seheta masija mari.

3

Jesu yaina cāno potori Cohamacure dahra cohtaina jira

¹⁻² Yu coyea, musare buhecu Espiritu Santore noano yahtiinare yu buheriro seheta buhe masierahi musa sehere. Cristo yaina jipanahta, wihānacā ti wahiquiro dihirore ti chu masierariro seheta Cohamacu yare noano masierare musa. Mipu cāhure noano masierasiniyuhca musa. Ā jina wihānacā pēchore ti pūno seheta mijoera curea buhea dihtare tuhojuhca

musa. Ā jicu tó sehe jia buhea dihtare buhei musare. Cristo yaina jipanahta wihānacā ti chu masierariro seheta Cristo yare noano masierayuhca musa. ³ Musa sehe musa mehne macainare ti noano wahachu ñuna ñu tuhtina, cahmachena, musa basi cāa curuari tju warucu sana, Espiritu Santore cjaeraina yoaro sehe yoana niyuhca musa. Ā yoana ahri yahpa macaina Cristore cahmaeraina yoaro sehe yoayuhca musa.

⁴ Ō sehe niyuhca musa: “Paulo mehne macaina jija sā”, niyuhca cāina musa. Ā jia paina musa mehne macaina sehe “Apolo mehne macaina jija sā”, niyuhca. Musa ā ni durucuna Espiritu Santore cjaeraina yoaro sehe ni durucuna nica musa.

⁵ Ÿyuh Paulo, Apolo mehne dohse yoahina cjihti jijari sā, musa tuhotuchu? Ō sehe yoahina jina nija sā: Cohamacu to dutiriro seheta tirore dahra cohtaina wiho jiina jija sā. Ā jina musare sā buhechu tuhona Jesucristore wacu tua ducare musa. ⁶ Noaa buheare buheina wesepu dahraina yoaro sehe jira mari piti dahre buhechu. Wese puro to toa muhtariro seheta yuhu cāhu musare buhe muhtahi. Tuhsu, paio wesere to cure nūnu tirore seheta Apolo sehe yu baharo musare buhe namo nūnu tire. Sā ā buhepachuta wese macaa toaare bucua namochu to yoariro seheta Cohamacu sehe musare to yare masi namochu yoahre. ⁷ Ā jicu yuhu buhe muhtariro jipaihta wiho jiriro jija. Ā jiro Apolo yu baharo buhe nūnu tirore cāhu wiho jirota jira. Cohamacu pinihta toaare to bucua namochu yoariro seheta to yainare tirore masi namochu yoara. Ā jiro Cohamacu sehe wiho jiriro jierara. ⁸ Toa muhtariro, baharo cure nūnu tirore cāno potori dahra cohtaina wiho jiinata jimana tina. Ā jia ti dahrariro purota wapatarata tina. Tó seheta jija sā, Apolo mehne. ⁹ Ā jina sā Cohamacu yare dahra cohtaina jija. Ā yoa Apolo yu piti jira. Sā ā jichu musa sehe Cohamacu ya wese yoaro seheta jira. Musa ā jichu Cohamacu wese macaa toaare to bucua namochu yoariro seheta musare to yare masi namochu yoarohca tiro.

Ā yoa Cohamacu musare to yainare noari curua yoaro nina. Ā jina tāa mehne ti yoari wahu yoaro sehe jira musa to ya curua macaina mari piti dahre buhechu. ¹⁰ Musa ā jichu Cohamacu yuhare to dutiriro seheta yuhu sehe wahu dahre mihniro tāare to cū muhtariro seheta Jesucristore yare musare buhe muhtai. Ā jiro tí tāa bui paio to yoa namo mujariro seheta paio yu baharo buhe namo nūnu tiro nina. Ā buhe namono noano yoaro cahmana. Ne papero marieno noano buhejaro tiro. Cristo ya

dihtare buhejaro tiro. ¹¹ Wuhure ti dahre dũca ti cũ muhtarari tãa yoaro sehe Cristo jira. Æ jina ti tãare sã noano cũ muhtararo seheta Cristo yare buhe tuhsui. Pairo ya buhea sehere mari buhechũ tó wahaerara. ¹²⁻¹⁵ Uru mehne, plata mehne, wapa bujũa tãa mehne mari yoari wuhure mari jũ ñuchũ jũerara. Tó seheta Jesucristo yare mari noano yoari baharo pihtiri dacho jichũ Cohamacũ mari yoarire to jũ ñuno seheta yoarohca mari yoarire masino taro. Tó sehe to yoachũ noari wuhũ to jũerariro seheta mari yoarire ti noaa jichũ masinohca. Æ yoaro mari noano yoarina mari jichũ masichũ yoarohca tiro. Noaare mari yoari wapa noano yoarohca marine. Yucari mehne, tja mehne, ñaia pũri mehne mari yoari wuhure mari jũ ñuchũ jũa waharohca. Tó seheta Jesucristo yare mari noano yoerari baharo pihtiri dacho jichũ, Cohamacũ mari yoarire jũ ñuno sehe yoarohca mari yoarire masino taro. Tó sehe to yoachũ ñari wuhũ to jũa wahariro seheta mari yoarire ñaa ti jichũ tiro masinohca. Æ yoaro mari noano yoeraina mari jichũ marine masichũ yoarohca tiro. Noano yoeraina mari jichũ ñuno noaare mari yoamari wapore noano yoasi. Tó sehe jinare Cohamacũ yuhdũchũ yoarohca. To Æ yuhdũchũ yoarochũ tó sehe noano yoeraina manahocã cohõbo cure yuhdũahca.

¹⁶ Mũsa sehe Jesu yaina Cohamacũ ya wuhũ yoaro sehe jira. Mũsa Æ jichũ ñuno ti wuhũ to jiboro seheta Espiritu Santo sehe mũsa mehne jira. ¿Tĩre masierari mũsa? ¹⁷ Cohamacũ ya wuhũ ñaa marieni wuhũ jira. Æ jina mũsa cãhũ ti wuhũ yoaro sehe jina to yaina warota jira. Æ jiro to yainare cãiro to dojomehnechũ Cohamacũ pichacaru cohãnhca tiro sehere.

¹⁸ Mahñoare tuhutuena tjiga mũsa. “Mĩpu macaina ya masiare noano masija”, ni tuhuturiro mũsa mehne macariro jiro Jesu ya sehere noano masijaro. To Æ masichũ ñua paina tirore “Tũho masierariro jira”, ñahca. Æ jiro Jesu yare masino, potocãta noano masiriro waharohca. ¹⁹ Masa ti mũ sũro ti basi ti masiare “Wiho warota jira”, ni tuhutura Cohamacũ. Æta nina Cohamacũ yare ti joari pũ: “Ti mũ sũro masiina ti masia yaba cjihti jierara Cohamacũ to ñuchũ. Æ jiro ti yoa duaare dũcatara tinare”, nina Cohamacũ yare ti joari pũ. ²⁰ Æ yoa pa pũpũ õ sehe nina: “Masa ti mũ sũro masi pahñoina ti tuhota yaba cjihti ti jierachũ masina mari puhtoro Cohamacũ sehe”, nina Cohamacũ yare ti joari pũ. ²¹⁻²² Æ jina “Sã mũ sũro yoahi”, ni masieraja mari masa jina. Æ jina yuhũ Paulo, Apolo, Pedro mehne sã jipihtina Cohamacũ mũsare to yoadoho dutiina

jina, mũsare dahra cohtaina jija sã. Jipihtia mũsa ya jira. Cohamacũ to bajuamehnerire, catia cãhure ware mũsare. Tuhsũ, pichacaru wahaerachũ yoarohca mũsare. Mĩpu jiare baharopũ jikti cãhure mũsare warohca. Æ jia jipihtia mũsa ya jira. ²³ Æ yoa mũsa sehe Cristo yaina jira. Cristo sehe Cohamacũ yairo jira.

4

Cristo to yare buhe duti to cũrina ti dahraare yahuha Paulo

¹ Õ sehe ni tuhutuga mũsa yuhũre Apolo cãhure: “Tina sehe Cristore dahra cohtaina jira. Æ jia masa ti masierari cjiire Cohamacũ yare buheina jira”, ni tuhutuga mũsa sãre. ² Dahra cohtaina ti puhtoro to dutiro seheta yoa cohtara. ³ Wiho mejeta yuhũre mũsa yahuwajapachũta Æ tuhutunocaja yuhũ. Paina puhtoa yuhũre ti yahuwajachũ cãhure Æ tuhutunocaja yuhũ. Yũ yoaare ñua “Ahri noaa jira. Ahri ñaa jira”, ni masierara mũsa. Yuhũ cãhũ masunota jija. Æ jicu yũ yoaare noano masi pahñoraja yuhũ cãhũ. ⁴ “Cristo yare yũ yuhdũrcari yuhũre mariahna”, ni tuhutumaja yuhũ. Yũ õ sehe ni tuhutupachũta buhiri tia jisibocã yuhũre. Mari puhtoro Cristo dihta yũ yoaare ñuno, noano masina. ⁵ Æ jina mari puhtoro to tjua tahto pano masare ñano ni yahuwajaena tjiga mũsa. Tiro tjua taro masa ti yoarire, panopũ paina ti masierari cjiire Cristo masichũ yoarohca. Æ jiro mari yoa duarire, mari tuhutuare tiro masichũ yoarohca. Æ yoaro to yare yoinare Cohamacũ “Noano yoaare mũsa”, ñinhca.

⁶ Yũ coyee, yuhũ Apolo mehne sã buheri cjiire yahuhi yuhũ mũsare buhecu tacu, sãre mũsa ñũ cũhto sehe. Æ yahuhi yuhũ Cohamacũ to yare ti joari pũ to niriro seheta quihõno mũsa yoarucuhto sehe. Æ yoana mũsa mehne macainare cãno potori ño payoga. Cãiroreta ño payoena tjiga. ⁷ Mũsa sehe paina yuhdoro noaina jierara. Masi yuhdũrcaina jierara mũsa. Cohamacũ mũsare to wari cjiire dihtare cjuara mũsa. Æ cjuana mũsare to yahuri cjiire dihtare masina mũsa. ¿Mũsa mũ sũro cjuaina, mũsa mũ sũro masiina jierapanahca, dohse yoana “Masi pahñoina jija”, nijari mũsa? Æ nina “Sã mũ sũro masija sã”, niborina seheta yoara mũsa.

⁸ Mũsa sehe “Cohamacũ yare masi pahñoja sã. Sãre yaba waro dũhsaerara”, nimana mũsa. Tuhsũ, mũsa cãhai sã jierachũ mũsa õ sehe ni tuhutumana: “Puhtoa yoaro sehe masiina jija sã”, ni tuhutumana mũsa. Potocãta Cohamacũre masi pahñoina puhtoa yoaro sehe masiina

musa jichu musare noabiaboa. Musa ã jichu musa mehne sã cãhu puhtoã yoaro sehe masiina jiboa.

⁹ Õ sehe ni tuhotuja yuhu pinihta: Sãre Jesu to yare buhe dutiro cõno, masape doca macari curua cõre sãre. Paina ti wajãhtina yoaro sehe ñana masa sãre. Ahri yahpa macaina masa, anjoã cãhu wapanañoina yoaro sehe ñana sãre. ¹⁰ Cristo yare sã buhechu ñua “Tuho masieraina jira”, ni ñana masa sãre. Æ jia Cristo yare sã yoachu ñua, sãre ñu tuhtira. Musa sehere ñua, “Noano masiina jira”, ni tuhotumana masa. “Cohamacure wacũ tuaineraina jira”, ni tuhotumana masa sãre. Musa sehere ñua, “Noano wacũ tuaina jira”, ni tuhotumana tina. Musa sehere masa ño payora. Sã sehere tina ne ño payoerara. ¹¹ Sã sehe mipãre ñano yuhduina, juca baaina, ñahma yapoiina, ñano suhti maeraina, wuhuse maeraina jija. Tuhsu, paina sãre ño payoeraa, sãre ñano yoara. ¹² Æ yoa sã tuaro dahraja. Tuhsu, paina sãre ñano ni ti durucupachuta sã sehe tinare “Noano jiga”, nija sã. Æ yoana paina sãre ñano ti yoapachuta ã tuhotunocaja sã. ¹³ “Ñano yoaina jira”, sãre ti nipachuta sã sehe noano mehne tinare yoaja. Panopu, mipu cãhure ñaa wete tiina yoaro sehe masape curuari doca macari curua yoaro sehe ñana masa sãre.

¹⁴⁻¹⁵ Musare noaa buheare buhe muhtacu musa pucu yoaro sehetã wahaï yuhu. Payu musare Cristo yare buheina ti jipachuta musare buhe muhtariro cãirota jija yuhu. Æ jiriro jicu musare buo tichu yoai tai ahrire joai nieraja yuhu. Yu pohna warore, yu cahũnare yu dutiboriro sehetã musare noano mehne duticu tacu ahrire joaja yuhu. ¹⁶ Æ jicu ahrire musare tuaro mehne dutii tai nija yuhu. Yuhure ñu cõga musa.

¹⁷ Ahrire yoa duticu tacu musa cahai Timoteore warocahi. Tiro yu cahũriro mari puhtoro Jesu yairo jira. Æ jiro Cristo yare yoarucura tiro. Cristo yare mari yoahure jipihina Jesu yaina cahapu buhei yuhu. Timoteo tãre musare wacũrucuhu yoarohca. Æ jicu Cristo yare yu yoariro sehetã musa ñu cũto sehe Timoteore warocahi yuhu. ¹⁸ Timoteore yu warocachu cãina musa mehne macaina puhtoã ji duaina õ sehe nimana: “Paulo marine cuiro, mari cahapu tasi”, ni tuhotumana tina. ¹⁹ Cohamacu cahmachu musa cahapu michapucacãta suihca. Æ sãcu puhtoã ji duinare musa mehne macinare ti durucua quihõno jichu masihtja yuhu. Æ yoa Cohamacu tuaare potocãta ti cjuachu cãhure masihtja yuhu. ²⁰ “Cohamacu sã puhtoro jira”, mari ni yahupachuta to yare mari yoerachu ti mari ã nimari cjiri yaba cijhti jierara.

Cohamacu to tuaa mehne to cahmano sehe yoa masija. Ti pinihta wiho waro jierara. ²¹ ¿Musa cahapu musare buhiri dahrehtiro musare tuhtihitiro yu wahachu cahmajari musa yuhure? ¿O musare cahũriro musare wahchehtiro yu wahachu cahmajari musa yuhure? ¿Dohse jiriro yu wahachu cahmajari musa?

5

Corinto macaina ti wuana tirire yahua Paulo

¹ Potocãta õ sehe quiti tira sãre paina: Cãiro musa mehne macariro to pucuro namonore wuana tiyuhca. Æta ni yahua masa sãre. Paina Cohamacure cahmaeraina jipahta tina sehe tã sehe yoaina jierara. ² Musa mehne macariro to ã yoapachuta musa sehe “Quihõno yoana nija sã”, ni tuhotumana. ¿Dohse yoana to ñaa yoarire masipanahta cahyaerajari musa? Æ jina ã ñano yoarirore musa mehne Jesu yaina mehne jirirore cohã wioboa musa. ³ Yuhu musa mehne jierapaihta yu wacũaru musa mehneta jija yuhu. Æ jicu musa mehne jicu yu niboriro sehetã ñano yoarirore to ã ñano yoari buhiri buhiri dahre duti tuhsuja yuhu. ⁴ Jesu to dutiro mehneta ã yoa dutija. Æ jina musa cahmachuna yu wacũa mehnepu musa mehne yu jichu to pucuro namono mehne ñano yoarirore cohã wiona, mari puhtoro Jesu to tuaa mehne õ sehe niga ñano yoarirore: ⁵ “Watõno to cahmano sehetã muhare yoawahnojaro”, niga tireore. Æta niga tireore ñaare to goa pjari cjirire to duhuhto sehe. Musa ã cohãchu tiro ñano yuhdurohca. Mari puhtoro Jesu to tjua tari dachoi ñano yoarirore cjiro Jesu mehne to noano yuhduhto sehe mipãre tireore ã niga.

⁶ “Quihõno yoana nija sã”, nipanahita ñano yoana nica musa. Ñano yoarirore musa ã ñanocahna, ti ñaare musa jipihina piha pihta wahanahca. Pão bucuro trigore to noano sãarucu sariro sehetã ti ñaa musare piha, noano sãarucu sãa waharohca. ¿Tãre masierajari musa? ⁷ Yu coyea judio masa pascua jichu ovejare wajã, jũ muo, Cohamacure ño payora. Tã sehetã oveja to yariariro sehetã Cristo mari ñaa buhirire yariari jire. To ã waharire masina, musa sehe ñano yoarirore musa mehne macarirore cohã wioga ti ñaa musare to pihaerahto sehe. Musa ñaa yoari buhirire cohã tuhsure Cristo. Æ jina ñano yoarirore cohã wioga “Ti ñaare pihari”, nina. ⁸ Pão bucuro trigore to sãarucu sariro sehetã panopu ñaare ñu cõ yoa pihtuina jimai mari. Æ jina pascua bose namurihi pão bucuro marieno pãore ti chũriro sehetã mari cãhu ñaare goa pjaro marieno ñano yoaro marieno jijihna. Panopu mari ñaare

mari yoaa tiro sehe yoaena tjijihna. ⁷ Ā yoana potocā noano tūhotua mehne, noano yoaina jijihna.

⁹ Mūsare yu joarocari pūpūre Jesu yairo jiparota ā wuana tirucurirore ne piti ti dutieramahi. ¹⁰ Ā nicu numia mehne űano yoainare, mūa mehne űano yoaa numiare, paina yare goa pjainare, yacainare, “Cohamacu jira”, ti nia masurine űo payoinare Jesu yaina ti jierachu “Tina mehne jiena tjiga”, nieraja. Ahri yahpai tō sehe jina marieno Jesure cahmaeraina marieno mari dihta ji masieraja. Jipihtiropu jira tina sehe. ¹¹ Ā jicu mūsare joarocacu ō sehe yoa dutimahi: Mūsa mehne macariro “Jesu yairo”, ti niriro to jipachuta numino mehne űano yoiriro, paye barore goa pjariro, “Cohamacu jira”, ti nia masurine űo payoriro, űano quiti dahrerucuriro, cahariro, yacariro to jichu tirore piti tiena tjiga. Ā jina tō sehe yoiriro mehne pinihtare chuena tjiga. ¹² Jesu yaina jierainare ti űaa yoari buhirire ne buhiri dahre dutiriro jieraja yūhu. Tō sehe buhiri dahre dutiriro jira Cohamacu sehe. Yu ā nipachuta mūsa mehne cahmachuina Jesu yaina mūsa basi mūsa yoirire űana masino cahmana mūsa sehere. Ā tūhotunocaeraro cahmana. Ā jina mūsa sehe tina ti űano yoachū űana buhiri dahrega tinare. ¹³ Jesu yaina jieraina sehere Cohamacu sehe buhiri dahrerohca. Ā jina mūsa sehe mūsa mehne macarirore űano yoirirore cohā wioga.

6

Jesu yainare ti basi ti yahusārire yahuha Paulo

¹ Ā Mūsa basi cahma űu tuhti yahusā duana dohse jiro baro Jesu yaina jieraina cahapu mūsa coyeare Jesu yainare yahusāna wahajari? Jesu yainare mūsa mehne macainare yahusā duana paina Jesu yaina sehere tīre yahuro cahmana mūsare. Ā jia Jesu yainapu besejaro. ² Pihtiri dacho jichu mari Jesu yaina sehe masa jipihtina ti yoirire űana “Ahri űaa jira. Ahri noaa jira”, besenahca mari tinare. Ā tīre masierajari mūsa? Ā jina pihtiri dacho jichu masa jipihtinare besehtina jina, mipu cāhure bese masija mari. Ā jina mipure wiho jiacā buhiri cāhure bese masija mari. ³ Anjoa ti yoirire űana tina cāhure besenahca mari. Ā tīre masierajari mūsa? Mari ā besehtina jina potocāta ti yuhdoro mipu cāhure Jesu yaina ti yoirire űana bese masija mari. ⁴ Ā jina dohse yoana mūsa mehne macainare yahusā duana mari mehne jieraina cahapu Jesu yainare yahusāna wahajari mūsa? ⁵ Ahrire nii nija mūsa

quihōno yoaerarire mūsa cahyahto cjihtore. Ā Mūsa mehne macainare mūsa cahma sayochu mūsare yahutiuro mūsa mehne macariro noano masiriro mariajari? Jira. ⁶ To ā jipachuta mūsa mehne macariro Jesu yairo pairō Jesu yoirire yahusā duaro Jesure cahmaerainare yahusāno wahara.

⁷ Masare beseina pūhtoare mūsa mehne macainare yahusāna Jesu yaina jipanahta quihōno yoaerara mūsa. Pairo mūsa mehne macariro mūsare űano to yoachū ā űuocaboa mūsa. Jesure cahmaerainare mūsa yahusāhto pano mūsa coyeirore mūsa ā űuocachu noabiaboa. Jesu yairo mūsare to yacachu tirore mūsa yahusāhto pano tiro to yacarire mūsa ā űuocachu noabiaboa. ⁸ Ā yoaborina jipanahta paina mūsa mehne macaina Jesu yaina ti jipachuta tinare űano yoaina, yacaina jira mūsa.

⁹⁻¹⁰ Tō sehe yoaina pūhtoro Cohamacu to suho jirōpūre mūanopūre waha masierara. Ā tīre masierajari mūsa? Mahūoare tūhotuena tjiga mūsa: Wuana tiina, “Cohamacu jira”, ti nia masurine űo payoina, numia mehne űano yoaina, mūa mehne űano yoaa numia, mūa sahsero ti pjacuri mehne űano yoaina, numia sahsero ti pjacuri mehne űano yoaa numia, yacaina, paina yare goa pjaina, cahaina, masare űano tuhtipeina, masa ti cjuare maina baro ne pūhtoro Cohamacu to suho jirōpūre mūanopūre waha masierara. ¹¹ Panopūre mūsa cāhu tō sehe yoaina tīmahre. Ā yoamarina mūsa jipachuta mipure mūsa űano yoari buhirire cosa tuhsari jire Jesucristo sehe. Ā to cosarina mūsa jichu to yaina cjihtire yoare Cohamacu mūsare. Ā yoaro “Noaina jira”, ni űana mūsare tiro. Āta yoare mūsare mari pūhtoro Jesucristo, Espiritu Santo cāhu ti tuaa mehne.

Mari pjacuri Cristo ya pjacuri jia nina

¹² “Yu cahmano sehe yoa masija yūhu”, niyuhca cāina mūsa. Tī potocā to jipachuta tīre yoacu noano jieraboca yūhu. Yu cahmano sehe yoa masija. Ā yoa masipaihta cāa tahari ā yoiriro jicu tīre duhu masieraboca yūhu. Ā jicu tīre pari turi yoasi yūhu, “Tīre duhu masieraboca”, nicu. ¹³ Ō sehe nina mūsa: “Jipihtia chūa mari pjaro macaa cjihti jira. Tuhsu mari pjaro chūa posa tihti pjaro jira”, nina mūsa. Tī potocā tjira. Ā jiparota baharo Cohamacu sehe mari chūare mari pjaro cāhure ti pihtia wahachu yoarohca. Ā jia mari chūa wiho warota jia nina. Chūa mari pjaro macaa cjihti jira. Ā jiparota mari pjacuri numino mehne űano yoahiti pjacuri jierara. Mari pjacuri sehe mari pūhtoro Cristo ya pjacuri cjihti jia nina. Ā jiro mari pūhtoro sehe mari pjacurire noano yoahitiro cjihto jira. ¹⁴ Cohamacu to

tuaa mehne mari puhtoro Cristore masori jire. Á to yoariro seheta mari cáhure ma-sonohca tiro.

¹⁵ ¿Á jina msa pjacari Cristo ya pjacari ti jichu masierajari msa? ¿Ti á jichu Cristo ya pjacu mehne nãno yoaricoro mehne mari ñano yoachu noajari, msa tãhotuchu? Noerara. ¹⁶ Ñano yoaricorore ñahariro to pjacu sehe ticoro ya pjacu mehne jiro, cã pjacu yoaro seheta jira. ¿Tire masierajari msa? Áta ni joaa tiri jire Cohamacu yare ti joari tju: “Tina puaro jipahta cã pjacu yoaro sehe wahara”, ni joaa tiri jire. ¹⁷ Mari puhtoro to yaina mehne jira. Á jiro Jesu yairo Jesu mehne puaro jipahta cãno potori tãhotuina cáirota ti jiboro seheta jira.

¹⁸ Á jina numia mehne ñano yoare, msa mehne ñano yoare goa pjaena tjiga. Tire msa yabiro seheta tire yoena tjiga. Paye ñaare mari yoana mari pjacure dojomehneraja. Numino mehne ñano yoariro sehe to pjacure ñano dojomehnera. ¹⁹ Espiritu Santore marine ware Cohamacu. Á jiro mari mehne jiro nina Espiritu Santo sehe. ¿Tire masierajari msa? Á jina msa pjacari msa catia cãhu msa ya cãhti waro jierara. Cohamacu yaina cãhti waro jira msa. ²⁰ Msa ñaa buhirire buhiri dahre tuhsare Cristore. Á jina to yaina cãhti waro jira msa. To yaina jina msa pjacari mehne Cohamacu to cahmano sehe yoaga. Á yoana Cohacure ño payona nina msa.

7

Namo tiare yahuha Paulo

¹ Mipure yãhure msa sinitu msa joaricari cjirire yãhu yãhti cahmai tai nija: Masuno namo tierachu cáhure, noanocahna, yã tãhotuchu. ² Tí á jipachata msa sehe namo tijaro paina numia mehne ti ñano yoerahto sehe. Á jina numia cãhu manũ tijaro paina msa mehne ti ñano yoerahto sehe. ³⁻⁴ Manũ tiricoro to pjacu to ya pjacu dihta jierara. To manũno ya pjacu cãhu jira. To manũno cãhu to pjacu to ya pjacu dihta jierara. To namono ya pjacu cãhu jira. Á jina msa msa sehe msa namosãnumiare noano cãuaga. Á yoa msa numia cãhu msa manusumare “Yũ pjacure pihacũ tjiga”, niena tjiga. ⁵ Wiho mejeta Cohacure puaro msa sini duana “Mahaa dachoricã mari basi jiena tjijihna. Cohacure sinijihna”, cãno potori á nina, msa basi wahã duhu masina msa. Msa á duhuri baharo msa jiro seheta jirucuga tjoa, Satana ñano msare to yoa dutierahto sehe. “Paina mehne ñano yoaboca” nina, msa basi piti ti duhuena tjiga. Msa jiriro seheta jirucuga tjoa.

⁶ Ahrire msare mipũ yũ niri cjirire yahucũ msare dutia waro mehne nieraja. Á yahuta nija msa yoahore msa masihto sehe. ⁷ Jipihtina msa yũ yoaro seheta namo tieraina msa jichu noaboa yãhure. Á ji duapanahta mari jipihtina cãno potori jieraja. Cãinare marine namo ti dutira Cohamacu. Cãinare namo ti dutierara.

⁸ Á yoa namo marieinare, manũ marieinare, wapewahya cáhure õ sehe nija: Namu marieina, manũ marieina ji masina, áta jinocahga msa yũ yoaro seheta. ⁹ Á ji masierana tuaro ñaare goa pjana, potota namo tiga. Á yoa numia cãhu manũ tiga. Ñaare msa goa pjachũ noeraputiara msare. Msa á goa pjana msa namo tichũ pinihta noa nina. Á yoa msa manũ tichũ cáhure noana.

¹⁰ Msa namo tiinare, manũ tia numiare õ sehe dutija. Yũ á nipachata ya dutia waro jierara ahri. Mari puhtoro Cristo ahrire dutira: Msa numia sehe msa manusumare cohãena tjiga. ¹¹ Msa manusumare cohãna, manũ marieina numia sehe tjuaga. Á tjuaerana pari turi tjoa msa manusuma mehne noano jiga tjoa. Á yoa msa cãhu msa msa namosãnumiare cohãena tjiga.

¹² Á yoa msa cáhure painare õ sehe nija yũhu. Mari puhtoro to dutia jierara ahri. Yũhu sehe õ sehe nija msare: Cãina msa mehne macaina Jesu yaina sehe Jesure cahmaeraa numiare namo tina jira. Á jina msa namosãnumia msa mehne ti tjua duachũ tí numiare cohãena tjiga. ¹³ Á yoa cãina msa mehne macaa numia Jesu yaina numia Jesure cahmaerainare manũ tia numia jira. Á jina msa manusuma msa mehne ti tjua duachũ tinare cohãena tjiga. ¹⁴ Msa manusuma Jesure cahmaeraina jipahta Jesu yaina numiare ti namo tichũ, Cohamacu noaina yoaro sehe ñana tinare.

Á yoa msa msa sehe Jesu yaina msa jichũ msa namosãnumia Jesure cahmaeraa numia jiboca. Tí á jipachata msa mehne tí numia manũ tichũ Cohamacu noaa numia yoaro sehe ñana tí numia cáhure. To á ñuerachũ msa pohna Jesure cahmaeraina pohna yoaro sehe ñaboa Cohamacu. Wiho mejeta tí pohna cáhure noaina yoaro sehe ñana Cohamacu. ¹⁵ Á yoa msa msa sehere msa namosãnumia Jesure cahmaeraa numia msare cohã duaa, áta yoajaro. Msa manusuma cãhu á cohã duaa, áta yoajaro. Noano mari jichũ cahmana Cohamacu. Á jiro tí numia msare tí cohã duachũ “Tí numia mehne jisniga”, ni dutierara Cohamacu. ¹⁶ Tí namosãnumia Jesu yaina numia sehe noano ti yoachũ ñaa baharopũ ti manusuma sehe Jesure cahmaboca. Á ti cahmachũ Cohamacu tinare pichacaru

wahaborinare yuhduchu yoarohca. Á yoa ti manushma Jesu yaina sehe noano ti yoachu ñaa baharopu ti namosãnumia Jesure cahmaboca. Ti á cahmachu Cohamacu ti numiare pichacapu wahabori numiare yuhduchu yoarohca. Á Jesure cahmaborina ti jipachuta potota Jesure ti cahmatare masiyuhto basioerara musare.

17 Á jina jipihtina musa mari puhtoro Cristo musare to ji dutiriro seheta yoaga. Á yoana Cohamacu musare to cûri cjirire yoaga musa. Tire jipihtina Jesu yainare á yoa dutirucuja yuhu. 18 Jesu yaina musa jihto pano circuncisiõre yoarina cjiri jina, áta jirucuga. Tuhsu, Jesu yaina musa jihto pano circuncisiõre yoeraina cjiri jina mipu cãhure áta jirucuga. 19 Mipure circuncisiõre yoarina musa jichu yaba cjihti jierara. Tire yoeraina musa jichu cãhure yaba cjihti jierara. Wiho mejeta Cohamacu dutiare mari yoachu ti pini wiho waro jierara. 20 Á yoana Cohamacu Jesu yaina musare to cûri pja musa jiriro seheta tjuaga. 21 Jesu yairo mu ji dũcahto pano masnõre dahra cohtariro mu jichu noanohca. Áta tjuasiniga. Mu puhtoro mũhure to wio duachu sehere wijaga mũhu. Mu wijachu noanohca mũhure. 22 Mari puhtoro Jesu yairo cãiro jiro masnõre dahra cohtariro jiparota Jesu to yuhduchu yoariro jira. Áta paio mari puhtoro Jesu yairo jiro, masnõre dahra cohtariro jieraparota Jesure dahra cohtariro jira tiro cãhu. 23 Mari ñaa buhirire buhiri ti tuhsuri jire Cristo. Á jina tiro dihtare “Yu puhtoro waro jira”, ni tuhõtuga musa. Paina musare tire ti á ni tuhõtu dutierachu tinare tuhõena tjiga. 24 Á jina yu coyea, Jesu yaina cjihti Cohamacu musare to cûri pja musa jiriro seheta tjuaga. Á tjuana Cohamacu mehne macaina jiga.

25 Mipure namo marieinare, manũ maria numia cãhure yahu duaja musare. Mari puhtoro ahrire “Õ sehe niga”, nierare yuhure. Yuhure to pja ñuchu yuhure to yoadõhochu to cahmano seheta yoaruciriro jija yuhu. Á jiriro jicu ahrire noano yahuihtja musare. 26 Mipure musa ñano yuhduna nica. Á jiomahchu musa namo marieina cãhu manũ maria numia cãhu musa tjuachu noanohca, yu tuhõtuchu. 27 Namõ tiina, manũ tia numia musa jina áta tjuaga. Á yoa namo marieina, manũ maria numia musa jina áta tjuaga. 28 Namõ tina ñano yoerara musa. Á yoa musa nuhmia manũ tina ñano yoerara musa cãhu. Wiho mejeta namõ tiina, manũ tia numia musare wapõoro tjuarõhca ahri yahpahi masa ti ñano yuhduro seheta musa ñano yuhduchu. Á jicu musare “Á wapũ tiri” nicu, “Namo marieina, manũ maria numia tjuaga”, nihi

yuhu.

29 Yu coyea, ahrire musare yahui nija. Cristo ahri yahpapu to tjua tahto mahanocã dahsara. Á jia mipure namo marieina Cohamacu to cahmano sehe ti noano yoa masino seheta noano yoaro cahmana namo tiina cãhure. Á yoa manũ tia numia cãhure áta Cohamacu to cahmano sehe noano yoaro cahmana. 30-31 Ahri yahpa to mipu jiro seheta baharocãta pihtia waharõhca. Á pihtiti yahpa to jichu mipure mari ñahacaha tia, mari wahchea, mari cjuaa pihtia wahaahca. Á jia ti wiho waro jira. Cohamacu yare yoaa sehe wiho waro jierara. Á jia ahri yahpa macaare cjuaina, cjueraina yoaro sehe jijaro. Ahri yahpa macaare pjiro tuhõtuea tjijaro. Ahri yahpa to mipu jiro seheta baharocãta pihtia waharõhca.

32 Musã ñano yuhduerachu cahmaja yuhu. Pjiro musa tuhõtuerachu cãhure cahmaja. Namõ marieriro Jesu yairo jiro Jesu yare wacũrucura. Á wacũrucuro Jesu cahmaare tuaro yoa duara. 33 Namõ tiro sehe to namono cahmaa sehere tuaro yoa duara. Á jiro ahri yahpa macaare pjiro tuhõtura. 34 Á jiro tiro puaro macaare yoa duara. Jesu cahmaa cãhure, to namono cahmaa cãhure tiro yoa duara. Á yoa bucõro manũ marienicõro jiro, ticõro mari puhtoro Jesu cahmaare tuaro yoa duara. Nuhmino cãhu áta yoa duara. Á yoa duaro to pjacu mehne, to wacũta mehne cãhure ticõro tuaro Cohamacu yacõro ji duara. Manũ tiricõro sehe ahri yahpa macaa sehere to manũno cahmaa sehere tuaro yoa duara. Á jiro ahri yahpa macaare pjiro tuhõtura.

35 Ahrire musare nii nija musare yoadõhocu tacu. Wapõoa dutiare musare cũ duaeraja. Á cũ duaerapaihta noano musa yoachu cahmaja. Jesu mari puhtoro yare musa tuaro yoa duachu cahmaja yuhu.

36 Musã mehne macariro to sũhũdicõro to bucõro curero to wahachu ñũno namo tijaro tiro ticõrore. “Áta yoaro cahmana ticõrore”, ni tuhõturo to niriro seheta yoajaro tiro ticõrore. Ticõrore namo ti masina. Á yoaro tiro ñano yoerara. 37 Pairo sehe to sũhũdicõrore namo ti duaeraro, to cahmano seheta yoajaro tiro ticõrore. “Ticõrore namo tieraja yuhu”, ni tuhõturo to cahmano seheta yoa duaro, tõ seheta yoajaro. Á yoariro noano yoara. 38 Á yoa to sũhũdicõrore namo tiriro cãhu noano yoara. Tuhsu, to sũhũdicõrore mipure namo tierariro sehe paio yuhdoro noano yoaro nina.

39 Manũ tiricõrore to manũno to cohã dutierara Cohamacu. To á cohã dutierapachuta to manũno to yariari baharo ticõro

pairo mehne to cahmariro mehne manũ ti masina. Ticoro to manũ tirirore Jesu yairo jiro cahmana tirore. ⁴⁰ Ticoro manũ marienicoro tjuaro, manũ tiricoro yũhdoro noano wahchericoro jirohca ticoro. Āta ni tũhotuja yũhũ sehe. Cohamacũ to Espĩritu Santore cjuariro jija. (Yũ Ā jiriro jichũ masina ahri yũ yahurire masiga musa.)

8

“Cohamacũ jira”, ti nia masũrine ño payo ti duhu payoa chũare yahuha Paulo

¹ Mĩpũre “Cohamacũ jira”, ti nia masũrine ño payo ti duhu payoa chũare yahuha duaja. Jĩpihtina musa ti barore “Masija”, ni tũhotura musa. Ā ni tũhotuna “Painare masi yũhdũrũcãja”, ni tũhotumana cãina. Ā ni tũhotua painare yoadohoerara tina. Painare cahĩa tinare yoadohora. Ā yoa masia yũhdoro painare cahĩa sehe wiho waro jierara. ² “Masi pahũonocaja”, ti mũ sũro niina jia, Cohamacũ noare to masi dutiare masierasĩnica tina. ³ Wiho mejeta Cohamacũre ti cahĩchũ tinare masina tiro. (Ā jia to yaina jira tina.)

⁴ Ā yoa “Cohamacũ jira”, ti nia masũrine ño payo ti duhu payoa chũare ahrireta yahũihtja: Tĩ masũri ne yaba cjihti jierara. Potocãta ti masũri yajeripohna mariahna. Cohamacũ sehe cãirota jira. Paina cohamana mariahna. Ahrire mari masija. ⁵⁻⁶ “Payũ cohamana jira. Tina mari pũhtoa jira”, ni tũhotumana masia. Ā yoa mũanopũ, ahri yahpãpũ cũhũre “Cohamana”, ti niina jipachũta mari sehere cãirota jira Cohamacũ. Tiro mari Pũcũ jĩpihtiare bajumehneriro jira. Ā yoaro to yaina cjihti yoari jire tiro marine. Ā jiro mari pũhtoro Jesucristo cãirota jira. Tiro jĩpihtiare mari Pũcũre yoabasariro jira. To yaina cjihtire yoari jire tiro marine. Ā jina tiro mehne Ā jĩrucunahca mari.

⁷ Yũ niriro sehe Ā jipachũta paina Jesu yaina tĩre masierara. Panopũ tina “Cohamacũ jira”, ti nia masũrine “Catiina jira”, ni tũhoturucumaha. Tĩ pjarũre Ā yoarina jia mĩpũ cũhũre tĩ masũrine ño payo ti duhu payoa chũare “Cohamana ya chũa jira”, ni tũhotumana. Ā yoaa tĩ chũare chũa, “Mari ñano yoana nija cohamana ya chũare chũna”, ni tũhotumana. Tĩre tĩ yoarire noano masierara, Ā ni tũhotumana. Ā jia tina ñano yoaa nina, ti tũhotuchũ. ⁸ Tĩ chũare mari chũchũ mari chũerachũ cũhũre Cohamacũ marine “Noaina jira”, ni ñũerara. Ā yoa tĩ chũare mari chũchũ wiho warota jinocahno nina tĩ chũa. Mari tĩre chũna ñano yoeraja. Tĩ chũare mari chũerachũ cũhũre wiho warota jinocahno nina. Tĩ duhu payoa chũare mari chũerana paina yũhdoro

noaina jieraja mari cãhũ. ⁹⁻¹⁰ Wiho mejeta noano yoaga musa. Tĩ chũare chũrina cjihti musa jichũ paina musare, “Masija” niinare, ñũ cũ chũboca. Ā ñũ cũ chũa tĩ yoarire noano masierara, “Ñano yoana nija mari”, ni tũhotuahca tina cãhũ. Tĩ Ā ni tũhotuchũ tina sehere ñano yochũ yoana nica musa. Ā jina noano yoaga musa. ¹¹ “Mari tĩ chũare mari chũchũ noanohca marine”, musa ni tũhotuina jina paina noano masierana cjihtire ñano yochũ yoaboca musa, musare tĩ ñũ cũchũ. Tina ya cjihti cũhũre yariari jire Cristo. Ā yoana Cristo yainare musa coyeare ñano yochũ yoana niboca musa. ¹² Noano masierainare Cristo yainare musa ñano yochũ yoana, Cristo cũhũre ñano yoana nica musa. ¹³ Ā jicu tĩ masũrine ño payo ti duhu payoa chũare yũhũ chũcũ Cristo yainare ñano yochũ yoai niboca yũhũ. Cristo yaina tĩ ñano yochũ cahmaeraja. Ā jicu “Yũhũ tinare ñano yochũ yoari” nĩcũ, tĩ chũare ne pari turi chũsi yũhũ.

9

Paulo Jesu to cũriro to jia tiare yahuha

¹ Jesu to yare buhe dutiro to cũriro jija. Ā jicu paina to cũrina tĩ yoaro seheta yoa masija yũhũ cãhũ. Mari pũhtoro Jesure ñũriro tjiija yũhũ cãhũ. Ā jina Jesu yare yũ buhechũ musa sehe tĩre noano tũhorina jina to yaina wahare musa. Ā to yaina waharina jina Jesu to cũriro yũ jichũ masi tuhsura musa. ² Paina yũhũre yahuwajaa “Tiro Jesu to cũriro jierara”, niboca. Tĩ Ā nipachũta musare yũ buheri baharo Jesu yaina wahana, “Jesu to cũriro jira” ni, yũhũre masi tuhsura musa. Ā jina paina tĩ yahuwajapachũta musa sehe to cũriro yũ jia tiare masina.

³ Yũhũre yahuwajainare õ seheta ni yũhtĩhtja: ⁴ Musare yũ buheri baharo yũ chũhtire yũ sihnihti cũhũre yũhũre waboa musa yũ buheri wapa. ⁵ Ā jicu namo tiriro jicu yũ namo Jesu yacoro to jichũ ticoro mehne tĩni masiboa yũhũ. Paina Jesu to cũrina, Jesu bahana, Pedro cãhũ ti namosãnũmia mehne tĩ tiniriro seheta yũhũ cãhũ tĩni masiboa. ⁶ Yũhũ Bernabé mehne musare noaa buheare sã buhepachũta sãre ne paye barocã waerare musa. Ā jina sã basita sã chũhti cjihtire dahra wapatã sã. ¿Sã dihtare wapatãro marieno buhero cahmajari, musa tũhotuchũ? ⁷ Ahriina yũ yahũhtina sehe tĩ dahrari wapa wapatara. Cãiro surara to dahrachũ to pũhtoa tirore wapara. To basi wapaerara. Chũare toariro cãhũ to toari dichũ tĩreta chũ masina. Ā yoa ovejare ñũ wihboriro to nuina pẽchore sihni masina tiro. ⁸ “Tĩ

dahrari wapare waparo cahamana”, nica masa ti dutia dihtare musare yahueraja. Cohamacu to dutiapu to niri cjiri cahure musare yahui nija. ⁹ Moise cjirone to cūri dutiare to yare ti joari pūi ō sehe ni yahura: “Wachu trigo yaparire to dahpori mehne suhtiwirirore to chu duachu to duserore ducataena tjiga”, nia tiri jire Cohamacu dutia. ¹⁰ Ā dutiro wachuare nino nierari jire. Ā dutiro marine nino niri jire marine buhero taro. Wesere saharo cahu ti dichare narina cahu ti dahrari baharo dichu tiri pja jichu ti wapatahtore cohtara tina. (Ā jina dahrinare ti dahrari wapare waro cahmana marine.)

¹¹ Musare Cohamacu yare noaa buheare buhei sā. Ā sā ā buhechu masa sehe sare chuare waeraro cahmajari, masa tuhochu? Waro cahmana. Masa wachu noaboa sare. ¹² Ā waerarina jipanahta paina chuare musare ti sinichu masa tina sehere wara. Tina musare ti chuare sinichu sā sehe tina yuhdoro musare chuare siniborina jimaja.

Ā wa dutiborina jipanahta sā sehe “Sāre waga”, ne nierahi. “Cristo ya buheare masapu cahmaeraboca” nina, sare chu mariapachuta musare ne sinierahi. ¹³ Cohamacu wahu dahraina ti wahuhta ti chuare nana. Ā yoa Cohamacu ti űo payori mesai cohtaina wahiquirore ti jarirore mahanoā na chura tina cahu. Ā Tīre masierari masa? ¹⁴ Tō sehetā ti yoiriro sehetā noaa buheare buheinare ti buheri wapare ti chūhtire tinare waro cahmana musare. Āta yoa dutire mari puhtoro Jesu. ¹⁵ Ā jicu musare siniboriro jipaihta yuhu ne paye barore sinierahi musare. Ā jicu ahrire mipare joacu paye barore wapa cahmai tai joai nieraja. Musare ne wapa cahma duaeraja. Yariahtiro jipaihta ne wapa cahmasi yuhu musare. Wapa marieno buhecu ji coa yuhduaja. Ā jicu musare yu buheri wapa ne wapata chusi.

¹⁶ Noaa buheare buhe dutiro yuhare cūre Cohamacu. Tīre buheri masu nojinocaihta nija yuhu. Noaa buheare buheracu pjacuroro jiboa yuhu. Ā jicu ti buheare buhecu “Painare masi yuhdurucaja”, niboriro jieraja yuhu. ¹⁷ Noaa buheare yu mu soro buhecu yu buheri wapa wapaa naboa yuhu. Cohamacu yuhare to yare buhe dutiro cūre yuhare. Ā jicu yu mu soro buheraja. ¹⁸ Ā To yare ā buhecu yaba barore wapatajari yuhu? Ō sehe jira yu wapataa: Noaa buheare buhecu musare ne paye barore sinieracu wapa marieno ti buheare buheja musare. Yu ā nirire masicu wahcheja. Yu wahcheata jira yu wapataa.

¹⁹ Ne masare dahra cohtariro jierapaihta

jipihtinare dahra cohtariro yoaro sehe jija yuhu payu paina masa Jesu yaina ti wahahto sehe. ²⁰ Ā jicu yu coyea judio masa mehne jicu, ti yoaro sehetā yoaja yuhu Jesu yaina ti wahahto sehe. Cohamacu to dutia cjirire Moise cjirone to cūri cjirire űo payoriro jierapaihta, ti dutia dihtare űo payoina mehne jicu ti dutiare űo payoriro baro yoaro sehetā jija yuhu. Āta yoaja yuhu tina Jesu yaina ti wahahto sehe. ²¹ Ā jicu Cristo yairo jicu Cohamacu dutiare Moise cjirone to cūri cjirire yuhduruca duaeraja. Tī dutiare yuhduruca duaerapaihta ti dutia marieina mehne jicu ti dutia marieriro yoaro sehetā jija. Āta yoaja yuhu tina cahu Jesu yaina ti wahahto sehe. ²² Jesure noano masieraina mehne jicu ti yoaro sehetā jija. “Masi pahūoriro jija”, nieraja yuhu. Āta yoaja yuhu tina cahu Jesu yaina ti wahahto sehe. Ā jicu jipihtina masa ti jiriro sehetā jija yuhu caina tina Jesu yaina to yuhduchu yoaina ti wahahto sehe. ²³ Ahrire yoaja noaa buheare jipihtina ti tuhoto cjihtore. Yu ā yoachu űano Jesu to buheriro sehetā tiro yuhu chūhare noano yoara. (Ā jicu masa ti jia tiro sehetā jija.)

²⁴ Ō sehetā jira mari piti dahre buhechu. Murocapeina muroca tina jipihtina murocara. Ti ā muroca pihitipachuta muroca yuhduruocariro su muhtana. Ā su muhtariro wapataa. Ā jina ti murocariro sehetā masa cahu Cohamacu cahmaare yoaga masa wapatahto sehe. ²⁵ Jipihtina murocaina ti pjacure dojomehneare duhunoca noano murocapora ti muroca tuahto sehe. Tuhsu, ti noano murocahto cjihtore quihōno chaa, quihōno carīa, noano yoara tina. Āta yoara tina muroca su, ti wapatahto sehe. Ā jia ti ā yoa wapataa pūri mehne ti yoari soro jira. Tī soro űaco baaerara. Mari sehe Cohamacu yare noano buheja to yare mari wapatahto sehe. Tī wapataa pinihta ne baaerara. ²⁶ Ā jicu yuhu pa sehe murocariro yoaro sehe yoeraja. Potori da murocariro yoaro sehe yoaja yuhu. Tuhsu, cahmacheperiro pa sehe dota moñoroca mujariro yoaro sehe yoeraja. Ā yoa duaeracu Cristo yare quihōno yoa duaja. ²⁷ Ā jicu murocapeina, cahmachepeina cahu ti pjacurire ti buheriro sehetā ti noano quihōno ti yoariro sehetā yuhu cahu yu pjacu mehne noaa dihtare yoapoja. Ā yoeracu painare buheriro jipaihta yaba cjihti jieraboa yuhu sehe.

10

“Cohamacu jira”, ti nia masurine űo payo dutieraha Paulo

¹ Ā yoa yu coyea, ahrire masiga masa. Sā Israe masa űuchusuma cjiri panopu

macaina jipihitina Cohamacu to me curuare ñu ñanu ti wahcãa, wahaa tiri jire. Å wahaa sohãri mare co watoi jiri mahai waa cahari mahai pahã tinia wahari jire. ² Å wahaa tina jipihitina me curua mehne sohãri ma macaa co mehne bautisarina yoaro sehe wahari jire. Bautisarina wahana Cristo yaina mari jiare ñona nija. Tó sehetã tina sohãri mare bautisarina yoaro sehe wahaa, Moise cjiro yaina ti jiare ñoa nia tiri jire. ³ Å yoa tina jipihitina mæano macaa chæare chæa tiri jire Cohamacu to waare. ⁴ Å chæa tina jipihitina Cohamacu to waa co cæhære sihnia tiri jire. Tí pjarære tí core Cohamacu to cûri tâcai wijaa core sihnia tiri jire tina. Tia tâca yoaro sehe jiriro, tinare co wariro Cristo jiri jire. ⁵ Tina å waharina ti jipacheta paina tina mehne macaina ñano ti yoachu ñano Cohamacu sehe payu tina mehne macainare ñu ji coærari jire. Å jiro tinare masa marienopu yariachu yoari jire Cohamacu. Å yoaro masa marienopu ti pjacurire cohã sitea wahari jire.

⁶ Åta yoari jire Cohamacu tinare marine buhero taro. Å jiro tinare ñu cû ñaare mari goa pjaerahto cjihtore Cohamacu å yoari jire tinare. ⁷ Å jina “Cohamacu jira”, ti nia masurine ti ño payoriro sehetã yoæna tjiga masa sehe. Tí masurine ti ño payorire Cohamacu yare ti joari pûi yahuro õ sehe nina: “Tina chu duji sihni tuhsu, wahcãrucu su, bose namu yoa dæcari jire wachu masure ño payoa taa”, ni joaa tiri jire panopu. ⁸ Baharo paina sehe Israe masa numia mehne ñano yoari jire. Ti yoariro sehetã yoæro cahmana marine. Tina ti ñano yoari baharo cû dachoihta tina veintitrés mil masa yariaa wahari jire. ⁹ Ti å wahari baharo pari turi paina Israe masa sehe Cohamacure tina mehne suachu yoari jire. “Marine buhiri dahresi”, nia ñaa warore yoari jire. Å yoaa tirore suachu yoari jire. Ti å yoari buhiri Cohamacu agãa mehne bahca wajãri jire tinare tjoa. Å jina tina yoaro sehe Cristore yoæna tjiga masa “Marine buhiri dahresi”, nina. ¹⁰ Pa tehe tjoa paina ñaa quití dahre ti tuhtichu anjo masare wajãriro tinare wajãri jire. Å jina tina yoaro sehe yoæna tjiga.

¹¹ Å wajã dutiri jire tinare Cohamacu marine buhero taro. Mari sehe pihtiri dacho panocã jiina jija. Mari å jiina jichu panopu macaina ti å waharire Cohamacu joa dutiri jire marine noano buhero taro. ¹² Å jina “Noaina jija sã, Cohamacu to ñuchu”, ni tahotuina jina, noano yoaga masa “Ñaaare yoari”, nina. ¹³ Mari jipihitina cûiro dahsaro marieno cãa tahari ñaare wacûja. Å wacûna tí ñaare yoa duaja. Mari å yoa duapacheta Cohamacu marine yoadohoruciruro jira. Å

jiro tí ñaa wacûare masa bo masierachu tiro sehe musare yoadohorohca. Å jiro tí ñaare masa yoa duachu ñano Cohamacu tí ñaare musare yoa duaerachu yoarohca. To å yoachu tí ñaare yoa duasi masa.

¹⁴ Å jina yu cahûina yuhære tuhoga. “Cohamacu jira”, ti nia masurine ne ño payoæna tjiga. ¹⁵ Musa noano masiina jichu musare yahuja. Å jina yu nihti cjihtire quihõno ti jichu masiga masa basi. ¹⁶ Cristore tí ñahari ñamine vinore to sihnihto pano Cohamacure “Noana”, niri jire. To niro sehetã mari cæhu tí core sihnia Cohamacure “Noana” nina, mari ya buhiri Cristo to yariarire masichu yoana nija. To di wijaarire masichu yoana nija. Tuhsu, to yaina mari jia tia cæhære masichu yoana nija mari. Å yoa pæore mari Cristo yaina nuha, chæna, mari ya cjihtire to pjacu crusapu to yariarire masichu yoana nija. Tuhsu, to yaina mari jia tia cæhære masichu yoana nija. ¹⁷ Å jina payu masa jipanahta cû curi pão curire chæna jipihitina mari Cristo yaina cû curuata jija.

¹⁸ Israe masa ti yoarire wacûga masa: Tina wahiquire waja, jû muo waa, Cohamacure ño payora. Å ti wari baharo cû curuaita ti wariro cjirore chæra. Å chæa Cohamacure ti ño payoære masichu yoara tina. ¹⁹ Cohamacure ti waa chæare yahucu “ ‘Cohamana jira’”, ti nia masurine ti waa chæa sehe tí waro jira”, ni nieraja. Tí chæa pinihta wiho waro jia nina. Tí masari cæhu wiho waro jia nina. ²⁰ Tí chæa ti yaba cjihti jierapacheta tí chæare chæeraro cahmana. Ó sehe jira tí. Cohamacure cahmaeraina wahiquire waja, jû muo, Cohamacure ño payoa nierara. Å yoaa watia sehere ño payora tina. Tí å ño payoina jichu tina mehne chæna watino yaina yoaro sehe yoana nica masa cæhu. Musa å yoachu pinihtare ne cahmaeraja. ²¹ Santa Cenare mari yoari dachoi mari pæhtoro Jesure wacûna tana sihniha. Mari å sihniina jina, watia sehere ño payo masieraja mari. Å yoa Jesure wacûna tana pæore chæa. Mari å chæna jina, watia sehere ño payo masieraja mari. ²² ¿Jesure masa mehne suachu yoa duajari masa, pæarore masa ño payona? ¿Tiro yuhdoro tuaina jijari masa? Jierara. (Å jina noano yoaga masa.)

Cohamacu to cahmaa dihtare yoaga

²³ Ó sehe nina cãina: “Sã cahmano sehetã yoa masija sã”, nina. Musa yoari cjiri ñaa ti jierapacheta tíre yoana painare yoadohoeraboca masa. Tuhsu, tíre yoana Jesure wacû tua namochu yoæraboca masa painare. ²⁴ Musa cahmaa dihtare yoæna tjiga. Paina sehere noano yoadohoga masa. ²⁵⁻²⁶ Chæa duaropære chæare nuchæna “¿Ahri chæa masurine ti duhu payoa chæa jijari?” ni sinitu ñæna tjiga. “Ñaaare yoari”

nina, sinitu ñaboca musa. Á ni sinitu ñaena tjiga. Ahri yahpa, ahri yahpai jia cãhu Cohamacu ya jira. Á jina tí chũare “¿Ñaa chũa jijari?” niena tjiga.

²⁷ Jesure cahmaerariro musare chu dutiro to pjirocachu waha duana wahaga. Á wahanamusare to duhu payoare chuga. “¿Ahri chũa masarine ti duhu payoa chũa jijari?” ni sinitu ñaena tjiga. ²⁸ Á jina paio Jesu yairo “Ahri chũa masarine ti duhu payoa chũa jira”, musare to ni yahuchũ tí chũa pinihtare chũena tjiga. Musare ã ni yahuriro “Ñaa chũare chũra ahrina”, musare to ni tuhouterahito sehe chũena tjiga musa. Musa cãhu ã ni tuhutori nina tí chũare chũena tjiga. ²⁹ Á chu dutieracu musa ya cjihtire ã nierahi. Musare ahrire yahuriro ya cjihti sehere ti chũare chu dutieraja. Tiropu musare “Ñaa chũare chũra ahrina”, niboca. “Á niri” nina, tí chũare chũena tjiga.

“Chũena tjiga”, yu nichũ õ sehe ni sinitu yuhtiboca musa yũhure: “¿Dohse jiro baro paiore ‘Soro tuhutori’ nina, chũerabocari sã? ³⁰ ¿Cohamacure ‘Noana’, sã niri baharo sã chũchu dohsearo tĩre sã chũri buhiri paio sãre yahuwajabocari?” ni sinitu yuhtiboca musa yũhure. ³¹ Ahri jipihtiare yahuchũ õ sehe ni nija musare: Dachoripe Cohamacu to dutiriro seheta wahchea mehne chũ, sihnija, Cohamacure masa ti ño payohto sehe. Á jina jipihtiare noano yoarucuga Cohamacure masa ti ño payohto sehe. ³² Ne judio masare, judio masa jierainare, Cohamacu yaina cãhure ñano yoachũ yoarena tjiga musa tinare. ³³ Ó seheta yoaja yũhũ sehe. Masa jipihtinare yoadoho duaja. Á yoacu ya cjihti waro sehere pjiro tuhouteraja. Yu ñano yuhduchũ noanohca. Payu masa sehere yoadohoja tinare pichacaru wahaborinare Cohamacu to yuhduchũ yoahito sehe.

11

¹ Á jina Cristore yu ñu cũrire yu yoachũ musa cãhu yũhure ñu cũga.

Corinto macaina ti cahmachunoi numia ti yoahitore yahuha

² Musare yu buhe turiari cjiire yu yoari cãhure wacũ pahñoyuhca musa. Á wacũna musare yu yoa dutiriro seheta yoayuhca musa. Á yoana noano yoara musa. ³ Á yoaina musa jipachuta ahri cãhure musa masichũ cahmaja: Jipihitina maa ti puhtoro, Cristo jira. Tuhsu, to namono puhtoro to manũno jira. Á jichũ, Cristo puhtoro to Pucuro jira. ⁴ Cohamacure siniriro to dapure mohariro sinino, to puhtoro Cristore ño payoeraro seheta yoaro nina. Cohamacu yare yahuriro cãhu to dapure mohano áta

yoaro nina tiro cãhu. ⁵ Tuhsu, to dapure mohararicoro Cohamacure sinino, to manũnore ño payoeraro seheta yoaro nina. Cohamacu yare yahuricoro cãhu to dapure moharero áta yoaro nina ticoro cãhu. Á yoaro to pjoarire waha pahñoricoro yoaro seheta yoara ticoro. ⁶ To dapure moha du-aeraro ticoro to pjoarire saa pahño dutijaro. To á yoari baharo to dapure buo tiro, ticoro mohajaro to dapure. ⁷ Musa sehe Cohamacu noariro, tuariro to jia tiare ñona tina sehe. Á jia ti dapupure moharero cahmana tinare. Numia sehe maa ti puhtoa jia tiare ñona. Á jia tina numia sehe ti dapupure mohajaro. ⁸ Cohamacu manore yoaro, numino ya pjacu macano mehne manore yoerari jire. Numino sehere yoaro, muno ya pjacu macano mehne ticorore yoari jire. ⁹ Tuhsu, manore yoaro, numino yairo cjihtore yoerari jire. Numino sehere yoaro muno yacoro cjihtore yoari jire Cohamacu ticorore. ¹⁰ Á jia numia ti dapupure mohajaro anjoa cãhu maa ti puhtoa ti jirire ti masihto sehe. ¹¹⁻¹² Cohamacu numinore yoaro, muno pjacu macano mehne yoari jire. Áta mipure muno masa bajuaro, numino pjacu macano mehne yoari jire. Tuhsu, jipihitine Cohamacu sehe yoari jire. Á jiro muno to ji muhtaerachũ numino mariaboa. Á yoa numino to mariachũ muno cãhu mariaboa.

¹³ ¿Musa basi dohse tuhutujari? ¿Numino to dapu mohararicoro, Cohamacure to sinichũ noajari, musa tuhutuchũ? Noaeraputiara. ¹⁴ Tuhsu, muno pjoa nahmo mariro to jichũ ñaa nica. Jipihitina masa ti mu saro tĩre masina. ¹⁵ Á yoa numino to pjoa nahmo to dapure mohari cahsaro yoaro sehe jira. Ticoro pjoa nahmo maricoro jiro noaricoro bajura ticoro. Tĩ cãhure jipihitina masina. ¹⁶ Musa mehne macariro ahrire yu yahurire to tũho duaerachũ, õ sehe ni yahuihtja tĩrore: “Yu ni yahuriro seheta mari yoa tia jira. Paina Jesu yaina cãhu áta yoarucura tina cãhu. Sã á yoarina jichũ ñũcu yu ni yahuriro seheta yoaga muhũ cãhu”, ni yahuihtja yu yahurire tũho duaerarirore.

Santa Cenare ti chũro watoi dojomehneha Corinto macaina

¹⁷ Mipure musare ahrire yahui tai, “Noano yoaina jira”, nieraja yũhũ musare. Musa cahmachuna noano yoerara. Ñano yoara musa. ¹⁸ Ó sehe ni yahu muhtaithtja musare: Musa cahmachunopũ cahma sayona musa basi cãa curuari tju wayuhca musa. Paina tĩre yũhure ti yahuchũ “Potocã tjica”, ni tuhutu cureja yũhũ. ¹⁹ Áta yoayuhca musa. Musa ã tju warina musa jichũ ñũna baharo Jesu yaina waro jiina sehere masinahca mari. ²⁰ Musa basi ã

ñu tuhtiina jina m̄sa c̄noi cahmachu ch̄chu tó wahaerara. Potoc̄ata Santa Cena waro yoana nierayuhca. ²¹ M̄sa cahmachuna c̄aina m̄sa sahsero chu m̄hcona, paina sehere j̄ca baach̄u yoana niyuhca m̄sa. Tuhs̄u, sihni m̄htaina sehe cahaa wahayuhca. ²² ¿M̄sare m̄sa w̄h̄use mariajari? M̄sa w̄h̄useputa chu, sihniiga. M̄p̄re Cohamac̄u yaina ti cahmachunore dojomehna niyuhca m̄sa to yaba c̄ihti j̄eraboro seheta. Tuhs̄u, paina Jesu yaina p̄j̄ac̄oinare ch̄u maeraina sehere m̄sa sehe b̄uro ȳhd̄chu yoayuhca. ¿Dohse ni yahuihcari ȳh̄ m̄sare? “Noano yoana nina m̄sa”, nieraja ȳh̄.

Santa Cenare yoaa taa, ti ch̄urire yahuha Paulo

(Mt 26.26-29; Mr 14.22-25; Lc 22.14-20)

²³ Mari puhtoro Jesu to ch̄u batoarire yahure ȳh̄. Á to yahuri baharo ȳh̄ sehe m̄sare tíre yahu turiahi. Tí ò sehe jira: Tirore ñu tuhtinare Juda to ñohti ñamihni mari puhtoro Jesucristo p̄ore na, Cohamac̄u “Noana”, niyuhti. ²⁴ To ñ niri baharo tí p̄ore nuha, to buheinare witiyuhti. Á witiro ò sehe niyuhti: “Ahrire ch̄uga. Ahri ȳ p̄j̄ac̄u jira. M̄sa yaro j̄iborirore yariaihca. Ȳh̄re m̄sa wac̄uhti c̄ijhtire ahrire ch̄uga”, niyuhti Jesu mari puhtoro. ²⁵ Á ti ch̄uri baharo tiro sihniro wahware na wahc̄ano ò sehe niyuhti: “M̄sa ñaa yoari buhirire coh̄ca tac̄u yariaihca. Á yoacu ȳ dire coh̄ihca. Cohamac̄u ‘M̄sare ȳhd̄chu yoaihtja’, to niriro m̄ such̄u ȳ yariaro mehne to niriro sohtori tiarohca. Ahri wahwai posa tiare sihniro, ȳ di coh̄ire wac̄inahca. Ahrire sihniro, ȳh̄re m̄sa wac̄uhti c̄ijhtire sihniro”, niyuhti Jesu. ²⁶ Á yoa Santa Cena mac̄a p̄ore m̄sa ch̄una, sihniare sihniro, Jesu mari puhtoro mari ya buhirire to yariarire ñona nina m̄sa. Á ñorucnahca m̄sa p̄ ahri yahpap̄u to tjua tach̄u.

“Santa Cenare ch̄u sihniro ò sehe yoaga”, ni yahuha Paulo

²⁷ Santa Cenare ch̄u, sihniro, Jesure ño payoro marieno yoana, cua pisaro yoerana, to p̄j̄ac̄ure to di coh̄iri c̄h̄ure b̄j̄upero sehe yoana nija mari. Á yoana Jesure b̄j̄upena nija mari. Tó sehe yoaina buhiri tiina jira. ²⁸ Á jina mari yoarire, mari jia tiare noano wac̄j̄ihna. Á wac̄ina Santa Cenare ch̄u, sihni masija mari. ²⁹ Mari puhtoro mari ya c̄ijhtire to p̄j̄ac̄u to yariarire wac̄ino marieno Santa Cenare ch̄u, sihniro mari buhiri tina. ³⁰ Ó sehe dihta yoayuhca paȳ m̄sa mehne mac̄aina. Á yoaa tina c̄aina tuaeraina, dohatina wahayuhti. Tuhs̄u, paina ti ñ yoari buhiri yariiaa wahayuhti. ³¹ Wiho mejeta Santa

Cenare mari ch̄u, sihniro, mari yoarire, mari jia tiare noano wac̄ina, mari ñaa yoarire duhuna tí buhirire buhiri tisi mari. ³² Mari puhtoro sehe marine tuhtira, tí buhirire marine buhiri ti dutiaro. Paina ñaina Jesure ño payoeraina buhiri tihtina dihta jira. Tina yoaro sehe marine buhiri tich̄u cahmas̄aerara mari puhtoro.

³³ Á jina ȳ coyera, Santa Cenare ch̄una tana cahmachuna, cohtasiniga m̄sa coyera. ³⁴ Tuhs̄u, m̄sa mehne mac̄aina j̄ca baa, ti ya w̄h̄usep̄u ch̄usinijaro. Á yoana Santa Cenare ch̄una tana cahmachuna, cua pisaro yoeraina ya buhiri buhiri tisi m̄sa. Paye barore yahu duamaha m̄sare. Baharo ȳ basi s̄ip̄u m̄sare yahuihtja tíre.

12

Cohamac̄u yare mari yoahore c̄uno marine yoa masich̄u yoara Esp̄ritu Santo

¹ Ȳ coyera, ahrire yahu duaja m̄sare. Cohamac̄u yare mari yoahore c̄uno marine j̄ip̄htinare yoa masich̄u yoara Esp̄ritu Santo. Á j̄ca tíre m̄sa noano masich̄u cahmaja.

² Jesu yaina j̄erasinina soro jia buheare tuho n̄n̄ina jina, m̄sa sehe “Cohamac̄u jira”, ti nia mas̄rine, durucuera mas̄rine ño payosinimare. Tíre masina m̄sa. ³ Á j̄ina m̄sa jirina c̄jiri jich̄u m̄p̄re ò sehe ni yahuihtja m̄sare: “Jesu ñano wahajaro”, niina Cohamac̄u yairo Esp̄ritu to tuaa mehne ñ nia nierara. Esp̄ritu Santo warore c̄juaerara tina. Tuhs̄u, “Jesu mari puhtoro jira”, niina Esp̄ritu Santo to tuaa mehne ñ niina jira tina.

⁴ Cohamac̄u yare yoa masia paȳ jira. Ti ñ j̄ipach̄ata marine yoa masich̄u yoariro sehe c̄airota jira. Tiro Esp̄ritu Santo jira. ⁵ Á yoa Cohamac̄u yare yoahina paȳ jina, to yare soro sehe mari yoahiti c̄h̄u paȳ jira. Tí ñ j̄ipach̄ata mari puhtoro Jesu sehe c̄airota jira. ⁶ Á yoa Cohamac̄u yare yoaa c̄h̄u paȳ jira. Ti ñ j̄ipach̄ata Cohamac̄u marine yoa masich̄u yoariro sehe c̄airota jira. ⁷ Marine Jesu yainare Esp̄ritu Santo yoadohoro Cohamac̄u tuaare ñono nina. Ó seheta yoadohora tiro Jesu yainare j̄ip̄htinare mari noano yoadohohto sehe. ⁸ C̄ainare noano masi, yahuch̄u yoara Esp̄ritu Santo. Tuhs̄u, painare Cohamac̄u yare noano buhe masich̄u yoara tiro Esp̄ritu Santo pinihta. ⁹ Á yoa painare Cohamac̄u noano wac̄u tuach̄u yoara tiro. Á yoaro painare Cohamac̄u tuaare wara tiro. Tí tuaa mehne tina sehe dohatinare noaina wahach̄u yoara. Esp̄ritu Santo c̄airota jiriro ti tuaare wara. ¹⁰ Tuhs̄u, tiro painare Cohamac̄u tuaa mehne yoa masich̄u yoara tiro. Á

yoaro painare Cohamacu yare noano yahu masichu yoara tiro tinare. Á yoaro paina Jesu yainare buheare noano bese masichu yoara tiro. Á masia watino ya buhea ti jichu masina tina. Espiritu Santo waro ya buhea cahure ti jichu masina tina. Tuhsu, painare tuhomañoeraa duserire ti durucu masichu yoara tiro. Á yoa tuhomañoeraa duserire durucuina ti nino seheta yahu yuhdo masichu yoara tiro painare. ¹¹ Espiritu Santo cairota jiriro to cahmano seheta marine canare ahri jipihtiare yu yahuriro seheta yoa masichu yoara. Canare soro yoa masichu yoara. Paina cahure soro yoa masichu yoara.

Cristo yaina jina cu curuata jija mari

¹² Ó sehe jira ahri mehne mari piti dahre yahuchu: Mari pjacu cu pjacu to jipachuta wamacari, capari, dahpori, cahmori ti pinihta payu jira mari pjacu jia. Ata jija mari Cristo yaina canu. Cristo yaina to pjacu yoaro sehe cu curuata jira. ¹³ Á jina Cristo yaina jina, to pjacu yoaro sehe cu curuata jija mari. Judio masa, judio masa jieraina, dahra cohtaina, dahra cohtaina jieraina, payu curuari jipanahta cairota jiriro to pjacu yoaro sehe cu curuata jija mari. Espiritu Santo cairota jiriro to tuua mehne bautisarina jija mari. Á jina cairoreta Espiritu Santore cjuaja mari, Cristo ya curua macaina jina.

¹⁴ Mari pjacu cu pjacu to jipachuta wamacari, capari, dahpori, cahmori ti mari pjacu jia payu jira. ¹⁵ Mu dahporo durucuri dahporo jiro, ó sehe niboa muhare soro ni duaro: “Wamomaca jieraja yuhu. Á jicu pjacu macariro jieraja yuhu”, niboa. Mu dahporo á niparota pjacu macano jirota nina. ¹⁶ Mu cahmono durucuri cahmono jiro ó sehe niboa muhare soro ni duaro: “Capariaca jieraja yuhu. Á jicu pjacu macariro jieraja yuhu”, niboa. Mu cahmono á niparota pjacu macano jirota nina. ¹⁷ ¿Mari pjacu capariaca dihta jichu dohse tuhobocari mari? Basioeraboa. ¿Á jina mari pjacu cahmono dihta jichu dohse wiji tuhobocari mari? Basioeraboa. ¹⁸ Tó sehe jierara mari pjacu. Ó sehe jira. Mari pjacu jiare Cohamacu to cahmano seheta cūri jire mari pjacure. ¹⁹ ¿Mari pjacu jia mariachu dohse wahaboari mari pjacu? ²⁰ Mari pjacu ó seheta jira: Cū pjacu to jipachuta mari pjacu jia payu jira.

²¹ “Mu yoadohochu cahmaeraja”, mu capariaca ni masierara mu wamacare. Á jichu, mu dapu mu dahporire “Mu yoadohochu cahmaeraja”, ni masierara. ²² Paye mari pjacu jiare “Wiho jia curea jira”, mari nia sehene pototi cahmaja mari paye mari pjacu jia yuhdoro. ²³ Paye mari pjacu

jia “Soro jira”, mari ni tuhupanahta tīre mari pjacu jiare noano yoaja. Tuhsu, paye mari pjacu jiare mari buo tiare suhti mehne nuoja mari. ²⁴ Paye mari pjacu jiare nueraa mari. Tí pinine ñona, buo tieraja. Ó sehe jī dutiri jire Cohamacu mari pjacure. Mari ñoeraare mari pjacu jiare mari noano ño payoa mehne cjuaja. Áta yoa dutiri jire Cohamacu. ²⁵ Á jia mari pjacu jia ti basi cahma yoadohora, cū pjacuta to noano jihto sehe. ²⁶ Á jia mari capari ñano yuhdachu paye mari pjacu jia cūhu ñano yuhdura. Tuhsu, mari capari noa wahachu mari pjacu jia cūhu wahcheina masa yoaro seheta noano tuhutura.

²⁷ Á jicu ó sehe ni nija masare: Musa sehe Cristo to pjacu yoaro sehe cū curuata jira. Á jina jipihtina musa to pjacu jia yoaro sehe to yaina jira. ²⁸ Á jiro Jesu yainare mari yoadohoti cjihtire cūri jire Cohamacu marine. Ó sehe cūri jire tiro marine. Canare marine buhe dutiro to cū muhtainare cūri jire tiro. Painare to yare yahuhtinare cūri jire. Painare masare buhehtinare, painare Cohamacu tuua mehne yohtinare, painare dohatiinare ti yuhdachu yohtinare, painare masare yoadohoitinare, painare masa puhtoa jihtinare, painare tuhomañoeraa duserire durucuhtinare cūri jire Cohamacu marine. ²⁹ Á to cūchu jipihtina cano potori to cūrina jieraja mari. Paina Cohamacu yare yahuhtina jierara. Paina Cohamacu buhe dutiro to cūrina jierara. Tuhsu, paina masare buheina jierara. Paina Cohamacu tuua mehne yoina jierara. ³⁰ Tuhsu, paina dohatiinare yuhdachu yoina jierara. Paina sehe tuhomañoeraa duserire durucuina jierara. Tuhsu, paina tuhomañoeraa duseri durucuare yahu yuhdoina jierara. Á jiro canare mari yoactire cūri jire tiro. ³¹ Wiho mejeta Cohamacu yare yoa masi duana noa yuhdua sehene tuaro cahmaga musa. Jipihtia ahri yu niri yuhdoro musa cahmahti cjihtire mipure yahuihtja musare yuhu.

13

Painare noano ti cahitire yahuha Paulo

¹ Masa ya duserire durucu masipanahta, anjoa ya duserire durucu masipanahta, painare caherana yaba cjihti jieraja mari. Mari durucua canu yaba cjihti jierara. Painare caherana mari durucuna, wiho waro durucuna nija. ² Cohamacu yare noano yahu masipanahta, masa ti masierari cjirire Cohamacu yare ti buheri cjiri cahure masi pahñopanahta, painare caherana yaba cjihti jieraja mari. “Ahdū tācu pa sehenu wahajaro”, mari nichu,

“Potocāta mari siniriro seheta Cohamacu yoarohca”, ni mari tūhotuchū āta yoarohca. Cohamacare ā ni tūhotuina jipanahta painare cahierana, yaba cjihti jieraja mari. ³ Jipihtia mari yare pjacuoinare wapanahahta painare mari cahierachū ti mari wari yaba cjihti jierara. Tuhsu, Cohamacu yare yoana tana mari pjacure mari jū dutipachuta, painare mari cahierachū marine yaba cjihti jierara.

⁴ Suaeraja painare cahina. Tinare cahina noano yoaja tinare. Tuhsu, painare cahina tinare pahu tieraja. Mari cahiriro mehne jina “Mū yūhdoro jiriro jija”, niina jieraja mari. Painare cahina “Musare masi yūhdurucaja”, ni tūhotueraja mari tinare.

⁵ Ā yoa painare cahina tinare űo payoro mehne yoaja mari. Painare cahina “Sā cahmano sehe yoaja. Mūsa cahmano sehe yoeraja”, nieraja mari. Tuhsu, tinare cahina suaeraja mari tina mehne. Painare cahina marine űano ti yoachū cūhare tina mehne ā suarucueraja mari. ⁶ Painare cahina űaare ti yoachū űūna wahcheraja mari. Noaa sehere quihōno ti yoachū űūna tuaro wahcheja. ⁷ Painare cahina ti ya buhiri űano yūhdūpanahahta tinare ā cahirucuja mari. Painare cahina paina sehe tinare ti yahuwajachū tūhōpanahahta tīre tūho duaeraja mari. Painare cahina “Tina űaare yoasi”, ni tūhotuja mari tinare. Painare cahina űano yūhdūpanahahta tinare cahī duhusi mari.

⁸ Painare cahma cahī ne pihtisi. Cohamacu yare masa mari yahua sehe baharo pihtia wahaahca. Tūhomahnoeraa duserire durucua cūhu baharo pihtia wahaahca. Cohamacu yare masa ti buheri cjiiri cūhu baharo pihtia wahaahca. Painare cahma cahī sehe ne pihtisi. ⁹ Mipure Cohamacu yare mari masi pahño masieraja. Ā jina to yare yahuna mari yahu pahño masieraja. Mari masi pahñohto dūhsasinina mini. ¹⁰ Ā jina Cristo űaa marieriro to tjua tari baharo mari masi pahñoahca. “Masieraja”, ni namosi.

¹¹ Mari masi pahñohto ō sehe jira: Nijinocā jicu nijinocā yoaro sehe durucumai yūhu. Nijinocā to yoaro sehe tūhoturucumai. Bucuro wahaipū nijinocā to yoariro seheta duhunocai. (Tō seheta mari mipure “Masi pahñoeraja”, nipanahta baharopure masi pahñoahca.) ¹² űōno to noano masū bajueraro seheta mipure noano masi pahñoerasinija mari. Baharo pairoro noano mari űū masino seheta mari masi pahñoahca. Mipure mari masi pahñohto marine dūhsasinina mini. Cohamacu marine to noano masi pahñoeriro seheta baharo mari cūhu noano masi pahñoahca. ¹³ Ā yoana tiarore mari yoa

masija mipure. Cohamacare wacū tua masija. Ā yoa marine to yūhdachū yoahitore masina, mari noano cohta masija. Ā yoa painare cahma cahī masija. Ahri tiaro jira pototi mari yoahiti. Tuhsu, painare cahma cahina, ahri pūaro yūhdoro yoana nija. Wacū tuua, to yūhdachū yoahitore cohta yūhdoro jira cahma cahī sehe.

14

Tūhomahnoeraa duseri durucuarē yahuha Paulo

¹ Ā jina painare cahma cahina jiga mūsa. Ā yoa Cohamacu yare mūsa noano yoa masihtore cahmaga mūsa. Cohamacu yare mūsa yahuhti pinihtare tuaro cahmaga mūsa. ² Tūhomahnoerari duserore durucuro Cohamacu mehne dihta durucura. Ā ni durucuro masa mehne durucuro nierara tiro. To ā ni durucuchū tūhoā masa sehe ne tūho űahaerara tirore. Masa ti masierare Espiritu Santo to tuaa mehne durucuro nina tiro. ³ Cohamacu yare yahuriro sehe masa sehere yahura. Ā yahuro tiro masare yoadohoro nina. Tinare buhero nina tiro. Tuhsu, ti űano yūhdachū tiro tinare wahchēchū yoara. ⁴ Tūhomahnoerari duserore durucuro cāirota buhera. Painare buherara. Cohamacu yare yahuriro sehe painare Jesu yainare buhero, yoadohora tiro.

⁵ Tūhomahnoeraa duserire jipihtina mūsa durucuchū noaboa, yū tūhotuchū. Wiho mejeta Cohamacu yare mūsa yachū pinihtare tuaro cahmaga. Cohamacu yare yahuriro pinihta tūhomahnoerari duserore durucuro yūhdoro painare yoadohora. Ā jipachūta tūhomahnoerari duserore durucuro to durucure pairo to yahu yūhdochū ti sehe pototi painare yoadohora. To durucuarē yahu yūhdoriro jiro tiro sehe painare Jesu yainare buhero nina. ⁶ Tūhomahnoerari duserore mūsa mehne durucucū pairo mūsa to yahu yūhdorachū mūsa yoadohoraboca yūhu. Ā jicu Cohamacu yūhure to yahurire yahucū, to yare yū masiare yahucū, payere to yare yahucū mūsa yoadohoi nija. Tīre mūsa tūhohto sehe mūsa buhecū mūsa noano yoadohoi nija yūhu.

⁷ Tūhomahnoerari duserore durucuro to durucua ti putipea ti buaputēa yoaro sehe jira. Carisure putina, arpere buaputēna tīre mari quihōno yoerachū ti basaare painare masihto basioerara. ⁸ Ā yoa cornetare putiriro surara jiro ti cahma wajāhto panore quihōno to putierachū paina surara sehe ti cahma wajāhtore masisi. Ā jia ti cahma wajāhto pano ti wajāhtire wamoare cahnyueraina jiaha tina. ⁹ Tō seheta mūsa cūhare tūhomahnoerari duserore

musa durucucha tūhoa, yahu yūhdoriro mariachū paina tīre ne masisi. Tí ā masierachū musa durucua yaba cjihti jierara. ¹⁰ Ahri yahpai payū dūseri durucua jica. Ā jia tí dūserire durucua ti basi tí ā durucuae noano tūhora. ¹¹ To ya dūserore yū tūhoerachū nūno tīre durucuriro sehe “Pa dihta macariro jira”, ni tūhoturohca yūhāre. Ā jicu yūhū cāhū āta ni tūhotuihca tīrore. ¹² Āta jire musa cāhū tūhomahnoerari dūserore durucuna. Espiritu Santo to tuaa mehne tuaro yoa duamana musa. To tuaa mehne ā yoa duana paina Jesu yainare musa buhehti sehere tinare musa yoadohohti sehere tuaro cahmaga musa.

¹³ Ā jiro tūhomahnoerari dūserore durucuriro to durucuae to noano yahu yūhdohto cjihtore Cohamacūre sinijaro tiro. ¹⁴ Tūhomahnoerari dūsero mehne Cohamacūre sinicu Espiritu Santo mehne sinii nija. Ā sinicu yū tūhotuare masi namochū yoeraja. ¹⁵ Ahrire masina, ō sehe yoanahca mari: Espiritu Santo to tuaa mehne tūhomahnoerari dūsero mehne Cohamacūre sininahca. Tuhsū, pa tehe noano masi tūhotu paina ti noano tūhohto sehe tí ya durucua mehne Cohamacūre sinina, tí cāhūre sininahca tjoa. Espiritu Santo to tuaa mehne tūhomahnoerari dūsero mehne Cohamacū yare basanahca. Tuhsū, pa tehe noano masi tūhotu paina ti noano tūhohto sehe tí ya durucua mehne Cohamacū yare basana, tí cāhūre basanahca tjoa. ¹⁶ Mari ā yoerachū tūhomahnoera dūseri mehne Espiritu Santo tuaa mehne Cohamacūre “Noariro, tuariro jira”, mari nipachūta paina ne tūhoerara. Ā tūhoeraa “Tóihca jira”, ni masierara. ¹⁷ Tūhomahnoera dūseri mehne Cohamacūre “Noana”, ni masija mari. Mari ā nia noaa jipachūta tīre yahu yūhdoerana painare buheraja mari. Ā jina tinare yoadohoerari tjoa. ¹⁸ Jipihtina musa yūhdoro yūhū sehe tūhomahnoeraa dūserire durucua. Ā jicu Cohamacū yūhūre ā durucu masichū to yochū tīrore “Noana”, nija yūhū. ¹⁹ Ā durucuriro yū jipachūta Jesu yaina cahmachuina watoi yū jichū, tūhomahnoerari dūsero mehne payū dūserire yū nipachūta yaba cjihti jierara. Tí yūhdoro masa ti noano tūhohto sehe mahaa dūsericā yū yahupachūta noa nina, yū tūhotuchū.

²⁰ Yū coyea, macanacā tūho masieraina ti jiro sehe jiena tjiga musa. Wahma masa bajuaina nāa yoare ti masieraro seheta jiga musa cāhū. Tuhsū, būsana tūho masiina ti jiro sehe jiga musa. ²¹ Cohamacū yare ti joari pūi ō sehe nina: “Tūhomahnoeraa dūserire durucuarine ahrina masare yā yare yahu dutiitjā. Ā yoa pa dihta macaina

ya durucua mehne yū yare yahu dutiitjā ahrina masare. Tinare tí ā yahupachūta ahrina yū yahuaire tūhosi’, nina Cohamacū mari pūhtoro”, nina Cohamacū yare tí joari pūi. ²² Tūhomahnoeraa dūserire durucua Jesu yainare Cohamacū tuare masichū yoahiti cjihti jierara. Tí durucua Jesure cahmaeraina sehere Cohamacū tuare masichū yoahiti cjihti jira. Ā yoa Cohamacū yare yahua Jesure cahmaerainare Cohamacū tuare masichū yoahiti cjihti jierara. Cohamacū yare yahua Jesu yaina sehere Cohamacū tuare masichū yoahiti cjihti jira. ²³ Ā yoa jipihtina musa Jesu yaina cahmachuchū tūhomahnoeraa dūserire musa durucuchū tīre masieraina, paina Jesure cahmaeraina cāhū sāa ta tūhoboca. Ā tūhoa “Tina tūho masieraina jira”, niboca musare tina. ²⁴ Jipihtina musa Cohamacū yare musa yahuchū pinihta tīre masierariro, Jesure cahmaerariro sāa ta tūhoro, to nāa yoari buhirire masiboca tiro. Ā masino to nāa yoarire cahyaboca tiro. ²⁵ Ā jiro potocā to jia tiare to tūhotua cāhūre masiboca tiro. Ā yaro Cohamacū panoi na tūhca caha sūro, tīrore nō payorohca. Tuhsū, “Cohamacū potocāta musa mehne jira”, ninohca tiro musare.

Musa cahmachuna noano yoaga dojomehnenno marieno

²⁶ Ā jicu yū coyea, musare ahrire nii nija: Musā Jesu yaina cahmachuna cāina musa mehne macaina Cohamacū yare basa duara. Ā yoa paina musa buhe duara. Tuhsū, paina musa Cohamacū musare to buheri cjirire yahu duara. Paina musa tūhomahnoerari dūserore durucu duara. Tuhsū, paina musa tí dūseri durucuaire yahu yūhdo duara. Tí jipihtiare ā yoana musare tūhoina tí noano masihto sehe tīre yoaga. ²⁷ Ā jina tūhomahnoerari dūserore musa durucuna pūaro, tiaro tópeinata durucuga musa. Ā yoana cāinata durucuga. Musā ā durucuchū, cāiro musa mehne macariro musa durucuaire painare yahu yūhdojaro. ²⁸ Musā durucuaire yahu yūhdoriro mariachū musa cahmachuna jipihtina musa tūhomahnoeraa dūserire durucu dauina durucua tjiga. Ā jina masa marienoi Cohamacū mehne durucuga musa. ²⁹ Ā yoa Cohamacū yare yahu duana pūaro, tiaro tópeinata yahuga musa. Musā ā yahuchū paina musare tūhoina musa yahurire Cohamacū ya to jichū noano masijaro. Cohamacū ya to jierachū cāhūre noano masijaro. ³⁰ Ā yoa Espiritu Santo Cohamacū yare pairore tói dujirirore to yahu dūcachū tiro cāhū Jesu yainare yahu duara. Ā jiro Cohamacū yare yahu mūhtariro sehe dihta mariajaro. ³¹ Ā jina

jipihtina m̄sa Cohamac̄u yare yahuna, c̄ainata yahuga m̄sa jipihtina paina ti noano t̄ahohto sehe, ti noano wahchehto sehe. ³² Ā jina Cohamac̄u yare yahuina jina, noano t̄aho masi, noano t̄ahotu dapo, durucuina jiga. ³³ Cohamac̄u to yaina ti cahmachunop̄n ti cahma wisiach̄u cahmaerara tiro. Dojomehnenno marieno ti noano jich̄u cahmana tiro.

Jipihtirop̄n Jesu yaina cahmachua, ò sehe yoara tina: ³⁴ Ti cahmachunoi numiare masa panoi yahu dutierara. Tí numiare mari sehe durucu dutieraja. Cohamac̄u to joari p̄ to niriro seheta numiare m̄sare noano yahtia numia jiro cahmana. Ā jia cahmachunoi numia durucuea tjijaro. ³⁵ Jesu yaina ti cahmachunoi numia ti durucuch̄u ñaa nina. Ā jiro paye barore masi duaro numino to ya wahup̄uta to man̄nore sinitujaro.

³⁶ Ahri yu yahutire noano masiga m̄sa. Cohamac̄u durucuaru yahu d̄ucaina jierara m̄sa. Tuhs̄u, to yare t̄ahorina m̄sa dihta jierara. Paina c̄ahu to ya buheare c̄uara. ³⁷ M̄sa mehne macariro “Yuh̄u Cohamac̄u yare yahuriro jija”, ni t̄ahotiriro jiro ahri m̄sare yu joari cjiri Cohamac̄u to dutia jich̄u masijaro tiro. Tuhs̄u, paio “Espiritu Santo to tuaa mehne yoa masija”, ni t̄ahoturiro jiro tiro c̄ahu ahri yu joari cjiri Cohamac̄u to dutia jich̄u masijaro tiro. ³⁸ T̄ire to masi duaerach̄u yu joari cjirire “Potoc̄a jierara”, to nich̄u tire duhunocahga. T̄ahoena tjiga tire.

³⁹ Ā jina yu coyea, Cohamac̄u yare yahuina m̄sa j̄htore tuaro cahmaga m̄sa. Tuhs̄u, m̄sa mehne macaina m̄sa cahmachunoi t̄ahomahnoera d̄aserire ti durucu duach̄u ā durucu dutiga tinare. ⁴⁰ Ā cahmachuna noano, cahma dojomehnenno marieno yoaga m̄sa.

15

Cristo to masa m̄jarine yahuha Paulo

¹ M̄p̄ure yu coyea, noa buheare m̄sare yu yahurire m̄sare wac̄uch̄u yoa duaja. Tí buheare noano cahmare m̄sa. Ā cahmana tí buheare ā yahtirucure m̄sa. ² M̄sa ā cahmach̄u t̄ire m̄sa ā yahtirucuch̄u Cristo m̄sare pichacap̄u wahaborinare yahd̄uch̄u yoa tuhs̄ure. M̄sa ā t̄ahori baharo Cristo yare m̄sa duhunocach̄u tí m̄sa t̄ahori cjiri yaba c̄ihti jierara.

³ Ò sehe ni yahu mahtaihtja m̄sare. Ahri wiho waro jierara. M̄sare buhecu yuh̄are Cristo to yahuri cjirire m̄sare ò sehe ni yahui: Cohamac̄u yare ti joariro seheta mari ñaa buhirire Cristo yariari jire. ⁴ Ā yoa Cohamac̄u yare ti joariro seheta Cristo to yariari baharo paina to p̄jac̄u c̄jire cop̄are ti duhu payori baharo tia dacho

jiboro tiro masa wijaari jire. ⁵ Tiro to ā masa wijaari baharo Pedrore bajuari jire. To ā bajuari baharo to buheinare bajuari jire t̄joa. ⁶ To ā bajuari baharo c̄a tahata quiniento bui j̄inare to yainare tiro bajuari jire t̄joa. C̄aina tire ñurina cjiri m̄p̄ure yariarina cjiri jira. Tí ā jipach̄uta payu tina mehne macaina cjiri m̄p̄ure jisina. ⁷ Baharo Cristo Santiagore bajuari jire t̄joa. Ā to bajuari baharo jipihtina to buhe duti to c̄irinare bajuari jire t̄joa.

⁸ Jipihtina painare to bajuari baharo yuh̄u c̄uh̄are bajuare t̄joa. Wih̄aroc̄a to quih̄ori dachoi masa bajueraroc̄a to masa baja n̄n̄u tiriro seheta yuh̄u c̄ahu Jesure wac̄u tua n̄n̄u tiriro jija. Yu ā jiriro jich̄u ti baharop̄u bajuare Jesu yuh̄u c̄uh̄are t̄joa. Yuh̄are tiro baja batoare juna. ⁹ Panop̄ure Jesu yainare ñano yoamai. Ā yoariro c̄jiro jic̄u paina Jesu to c̄irina jipihtina ti docap̄u waro jija yuh̄u. Ā jic̄u m̄p̄u c̄uh̄are Jesu buhe duti to c̄uboriro jieramaja yuh̄u, yu t̄ahotuch̄u. ¹⁰ Ā jipaihta Cohamac̄u yuh̄are to cahich̄u m̄p̄ure Jesu to c̄iriro jija yuh̄u. Ā jic̄u tiro yuh̄are to cahich̄u m̄p̄ure to cahmaare yoa pah̄oja. Ā jic̄u yuh̄are to cahich̄u to yairo ā jinocai nieraja. Jipihtina paina to c̄irina yahdoro yuh̄u sehe tuaro buhei. Ā buhecu yu m̄u suro buherahi. Cohamac̄u yuh̄are cah̄ino yuh̄are yoadohore. ¹¹ Yuh̄u sehe ahri buheare yu buhech̄u t̄ahorina jiboca m̄sa. O paina sehere t̄ahorina jiboca m̄sa. Ā jipach̄uta yuh̄u, yuh̄u mehne macaina c̄ahu c̄ano potori ahri buheare buheja s̄a jipihtina Jesu to c̄irina. Ā s̄a buhech̄u t̄ahona m̄sa sehe ahri buheare noano t̄ahore.

Yariarina cjiri ti masa m̄jarine yahuha Paulo

¹² Cristo to yariari baharo to masa m̄jarine s̄a buhepach̄uta “Yariarina cjiri ne masa m̄jaerara”, nina m̄sa mehne macaina c̄aina. ¿Dohse jiro baro ā nijari tina t̄ire? ¹³ Ā jiro yariarina cjiri ti masa m̄jaerach̄u Cristo c̄ahu ne masa m̄jaeraboa. ¹⁴ Ā yoa Cristo to masa m̄jaerach̄u noa buheare s̄a yahuri cjiri ne yaba c̄ihti jieraboa. To masa m̄jaerach̄u tire m̄sa wac̄u tuaa c̄ahu yaba c̄ihti jieraboa. ¹⁵ Masa m̄jano mariach̄u s̄a sehe Cohamac̄u yare mah̄ona nibo. Yariarina cjiri ti masa m̄jaerach̄u Cohamac̄u sehe Cristore masa m̄jach̄u yoeraboa. To ā yoerach̄u “Cohamac̄u Cristore masa m̄jach̄u yoari jire”, s̄a nina mah̄oina jiboa s̄a. ¹⁶ Yariarina cjirire Cohamac̄u masoeraro, Cristo c̄uh̄are tiro masoeraboa. ¹⁷ Ā jiro Cristo to masa m̄jaerach̄u tire m̄sa wac̄u tuaa yaba c̄ihti jieraboa. Ā yoa m̄sa ñaa yoari buhiri buhiri tiina jisinihoa

musa. ¹⁸ Masa mujano mariachu Cristo yaina cjiri yaria muhtaina cjiri pichacapu waha tuhsu. ¹⁹ Cristore mari wacu tuari baharo mari yariana masa muja masierana jipihntina paina masa yuhdoro pjacuoina jiboa mari sehe.

²⁰ Potocata Cohamacu Cristore masa mujachu yoari jire. Cristo to masa mujari baharo mari cahu yarianapu masa mujahtina tjija. Tiro a masa mujano, marine suho masa muja muhtariro jira. ²¹ O seheta jira ahri: Adao mehne masa yaria ducaha. To sehe Jesu mehne yariarina cjiri masa mujaahca. ²² Adao yaina ji nupu tiinapu mari jipihntina yarianahca. To seheta Cristo yaina mari jichu mari yariari baharo marine masa mujachu yorohca Cohamacu. ²³ Caa curuari Cohamacu to quihoriro muschu masa mujaahca. Cristo marine suho ji muhtariro masa muja muhtari jire. Baharo tiro ahri yahpapu to tjua tachu mari to yaina cahu masa mujanahca. ²⁴ Ti pjata pihtiri dacho jirohca. A jiro jipihntina naina puhtoare, dutiinare, tuainare cohano Cristo yuhduracarohca. To a yoari baharo jipihntina bui to puhtoro to jirire Cristo wiarohca Cohamacu to Pacarore. ²⁵ To wiahto pano to Pacuro Cristore nu tuhtiinare to yuhduraca pahhohto pano Cristo pinihta jipihntina bui puhtoro jirohca. A jiroto jiro cahmare tirore. ²⁶ Tirore nu tuhtiinare to yuhduracari baharo, yariaro cahure cohatoarohca tiro. Yariaro pihtia wahaohca. Pari turi yariasi masa. ²⁷ Jipihntina bui dutihtiro cjihtore curi jire Cohamacu Cristore. Jipihntia puro cahure curi jire tirore. Ata nina Cohamacu yare ti joari pu. Cohamacu sehe tirore curo jira. A jiro "Jipihntina bui dutihtiro cjihtore curi jire tirore" nino, "Cohamacu bui dutiriro jira tiro", nino nierari jire to yare ti joari pu. ²⁸ Jipihntina bui dutiriro Cristo Cohamacu macano to jichu Cohamacu tirore curo sehe to macano bui dutiriro jirohca. A jiro Cohamacu sehe jipihntina bui puhtoro waro jira. Jipihntia puro cahu jira.

²⁹ Masa mujano mariapachuta dohse yoa paina masa yariarina cjiri ya cjihtire ti bautisarina jijari? Yariarina cjiri masa mujaerachu ti ya cjihtire paina bautisarina ti jichu ti yaba cjihti jieraboa.

³⁰ Sa sehere sa buheri buhiri dachoripe paina sare ti niano yoa duachu cua nina sa cahure. Sare a cuapachuta masa mujano to jichu masina a buherucuja sa. ³¹ Yu coyea, mari puhtoro Jesucristo yaina masa jichu tirore wacu tua namoina musa wahachu yuhu sehe tuaro wahche tuhotuja musare. Ti potocata jira. A yoa, "Dohse jiri namu yuhure yariahto cua nina", yu nichu ti cahu potocata jira. ³² Efeso macaina suaina noaa

buheare yu buheri buhiri yuhure tuhti, cjahre. Masa mujano mariachu Jesu yairo yu jierachu, yu a niano yuhduri yaba cjihti jieraboa. Wiho waro niano yuhduri nibo yuhu. Yariarina cjiri ti masa mujaerachu o sehe nibo mari: "Baharo curore yarianahca. Dohse wahasi mari. A jina chu sihniyhna. Mari mu soro yojihna", nibo mari.

³³ Mahnoare tuhotuena tjiga musa. "Nainare piti tina, noaa musa yoa tiare duhunahca musa", nina masa. Ti potocata jira. ³⁴ Noaa tuhotuina jiga musa. Tuhsu, noaa yoa jiga tjoa. A yoa naare yoa namoena tjiga tjoa. Caina musa mehne macaina sehe ne Cohamacu masierara. Masa buo tihto sehe musare a nija.

Yariarina cjiri masa mujaina ti pjacuri cjihtire yahu namoha Paulo

³⁵ A yoa musa mehne macariro o sehe ni sinituboca yuhure: "¿Dohse yoa yariarina cjiri masa mujaahcari? ¿Dohse jia pjacuri masa mujaahcari?" ni sinituboca. ³⁶ A sinituriro tuho masierariro seheta bisiro coa tara. Toari yapare mari toari baharo ti yapa baro cahachu waro dura. To sehe wahaeraro ne dusi. Tiro masina musa. ³⁷ Bucu yucupure toaeraja mari. Pja yapari dihtare toaja mari. Ti yapari trigo yapari jia ji, o paye yapari baro jia jiboca. ³⁸ Ti yaparire mari toari baharo Cohamacu to cahmariro seheta ti yaparire bucu mujachu yoara. A yoaro mostaza yaparire mostaza yucu wahachu yoara tiro. Trigo yaparire trigo yucu wahachu yoara. Ata du dutira Cohamacu. ³⁹ Jipihntina pjacuri cano potori bajuerara. Masa pjacuri sehe curo sehe jira. Wahiquina pjacuri cahu soro sehe bajura. Minichahca pjacuri cahu soro sehe bajura. Wahi cahu soro sehe pjacuri tira.

⁴⁰ A yoa muano macaa poca cahu soro sehe bajura. Tuhsu, ahri yahpa macaina cahu pjacu tira. A yoa muano macaina pjacuri soro sehe bajura. A jia ahri yahpa macaa muano macaa yoaro sehe jierara. ⁴¹ O seheta jira. Sa dacho macariro si sitera. A yoa nani macariro cahu soro jira. Potota buhriara. Tuhsu, nahpichoha poca cahu soro sehe bajua si sitea cuara. Nahpichoha poca peri cahure mari nuchu caa poca pjiroca sia poca bajura. A yoa paye poca tuaro sia poca bajura. ⁴² To seheta jira yariarina cjiri ti masa mujachu. Masano to pjacure mari yari baharo to pjacu baa wahaohca. Baharo pa pjacu soro jiri pjacu jipihntia dachoripe catihti pjacu masa mujanohca. ⁴³ To pjacure mari yachu yariariro cjiro pjacu nina. Cohamacu tirore to masochu to pjacu noa yuhduri pjacu jira. Tuhsu, to pjacu mari yari pjacu wiho jiri pjacu jira. Cohamacu

tirore to masochu pinihtare to pjacu wiho jiri pjacu jieraro, tua yuhduara. ⁴⁴ Ahri yahpa macari pjacure mari yachu tiro yari-ariro cjiro to masa mujachu to pjacu muano macari pjacu jirohca. Ahri yahpa macari pjacure mari cjuana, muano macari pjacu cahure cjuanahca, masa mujana.

⁴⁵ Ō sehe ni yahura Cohamacu yare ti joari pui: "Ahri yahpai ji muhtariro Adão wama tiro catiriro wahaa tiha", ni joaa tiha. To ā jipachuta Adão yoaro sehe jiriro bato tiriro Cristo sehe catiare waro tari jire. ⁴⁶ Ahri yahpa macari pjacu ji muhtari pjacu jira. Baharopu muano macari pjacu jirohca. ⁴⁷ Ō sehetā jira: Ji muhtariro Adão sehe ahri yahpa macariro dihta mehne to yoari pjacure pjacu tiri jire. To baharo tariro, Cristo sehe muanopu tari jire. ⁴⁸ Dihta mehne ti yoari pjacu ti muhtariro to jiriro sehetā jipihtina paina dihta mehne to yoari pjacu tiina jija mari. Ā yoa muanopu tariro yoaro sehetā to yaina jipihtina to yoaro sehe pjacu tiina jinahca mari. ⁴⁹ Dihta mehne to yoari pjacu tiriro Adão yoaro sehe bajuja mari. Baharo muano macariro Cristo yoaro sehe bajunahca mari.

⁵⁰ Yu coyea, musare ahrire yahu du-aja: Ahri yahpa macari pjacu di mehne, dihi mehne jiri pjacu puhtoro Cohamacu to suho jiropure muanopure ne wahasi. Mari pjacuri baahiti pjacuri jira. Ā jia muanopu jipihtia dachoripe mari jiptopure ahri pjacuri wahasi. ⁵¹ Panopure masa ti masierari cjirore mipure musare yahu du-aja: Mari mehne macaina caina yariasi. Ā jina dōicāta, mari pjacurire cohtotaina jinahca. ⁵² Corneta to puti batoari dachoi āta waharohca marine. Dōicāta, mari capari wihmitjā mari űu p̄ōorocarō sehe ō sehe waharohca. Corneta to bisiri baharo yariarina cjirore Cohamacu masonohca jipihtia dachoripe mari jihtina cjihtire. Tuhsu, mari pjacurire cohtotaina jinahca mari cūhu. ⁵³ Mari pjacurire to cohtotachu to pano mari baahiti pjacuri ti jipachuta mari cohtotari baharo ne baasi. Ā yoa mari pjacuri ti cohtotachu to pano mari yari-ahiti pjacuri ti jipachuta ne yariasi. ⁵⁴ Mari bahti pjacuri ne baerahiti pjacurire cohtotarohca. Ā yoa mari yariahiti pjacuri ā jiru-cuhti pjacurire cohtotarohca. Marine to ā cohtotachu panopu to joariro sehetā ā waharohca: "Naina mari jiri buhiri tiare Cristo to cohā pahñori baharo, Cohamacu yari-arore cohāncari jire. ⁵⁵ Ne pari turi mari yariasi. Ā jina yariaro mehne pari turi űano yuhdusi mari", ni joaa tiri jire panopure. ⁵⁶ Mari űaa buhiri jichu pinihta yariaropu űano yuhdunahca. Ā yoa Cohamacu dutia Moise cjirore to cūri cjirore mari masiri ba-

haro, buhiri tija mari. Ā jiro marine pichacapu waha dutira Cohamacu dutia. ⁵⁷ To ā dutipachuta mari puhtoro Jesucristo sehe marine pichacapu wahaerachu yoara. To ā yoariro jichu masina Cohamacu mehne wahche "Noana", nija mari.

⁵⁸ Ā jina yu coyea, yu cahina, Cristore wacu tua duhuena tjiga. Ā yoana paina musare noaa buheare ti cohā dutichu, ne cohāena tjiga tīre. Ā yoa dachoripe mari puhtoro Jesucristo to yoa dutirire noano yoarucuga musa. Mari puhtoro Jesucristo yare mari yoachū, ahri wiho waro jierara. Ahrire masina to yoa dutirire noano yoarucuga musa.

16

Painare Jesu yainare Corinto macaina niñeru ti wahtire yahuha Paulo

¹ Mipure painare Jesu yainare musa niñeru wahtire yahu duaja musare. Galacia yahpa macainare Jesu yainare yu dutiriro sehetā musa cūhu yoaga. ² Somanaripe domingo jichu jipihtina musa Jesu yainare wahti cjihti niñerure mahanocā waga. Mahanocā cjuana mahanocā waga. Ā yoa pji curero cjuana pji curero waga. Somanaripe musa ā yoachū musa cahapu yu suchu musa warocahti cjihti niñeru ji tuhsurohca. ³ Musa wahtire, musa warocahtina cahure yahuri pūre joaihtja. Ā jicu musa cahapu suchu ti pūre Jerusalēpu wahahtinare musa beserinare wahtja. Ā wa tuhsucu Jesu yainare musa warocari niñerure nahtina cjihtire tinare warocaihtja Jerusalēpu. ⁴ Ti macapure yu yoahiti jichu yūhu cūhu wahaihca. Yu ā wahachu yūhu mehnetā tina wahaahca.

To tinihto cjihtore yahuha Paulo

⁵ Macedonia yahpa macainare masa boca yuhduihca yūhu tinare. Yuhdu wahcā, musa cahai Corintopu sūihca. ⁶ Tōpu suchu musa mehne mahaa dachoricā jiboca yūhu pa tehe nicu. Yoa cureri pja puhuro puro musa mehne jiboca yūhu. Ā jina pa sehepu yu wahachu musa cūhu yūhure yoadohoroca masina. ⁷ Mahaa numricā ji dueraja yūhu musa mehne. Ā jicu Cohamacu cahmachu yoa cureri pja musa mehne jiihtja yūhu. ⁸ Ā ji duapaihtā Pentecoste bose numari jichupu Efesoi jisiniihca yūhu. ⁹ Ōi Efesoi mipure mari puhtoro Jesu yare tuho duaina payu jira. Ti ā tuho duachu tinare yahuja. Yu ā yahuchū yūhure űu yabiina payu jira.

¹⁰ Timoteo yu yoaro sehetā mari puhtoro yare yoara. To ā yoariro jichu musa cahapu to suchu noano mehne tirore piti boca, tiro mehne noano wahchea mehne jiga musa. ¹¹ Ā yoana tirore űu yabiro marieno noano mehne piti bocaga musa. Tuhsu, to coha

sitichu noano mehne tirore yoadohorocaga yu cahapu to tjua tachu. Tiro paina Jesu yaina mehne ti tahtore cohtana nija sa. A jina noano mehne yoadohorocaga tinare.

¹² Apolo mari coyeiro Jesu yairo musare to nuano wahachu tuaro cahmamahi. A jicu tirore waha dutimahi paina Jesu yaina mehne to wahahto cijhtore. Yu a waha dutipachuta mipure tiro waha duaerare. A jiro baharo tirore yoaa mariachu musa cahapu waharohca tiro.

Paulo noa duti batoaha

¹³ Noano wacu masiga musa. Cristore wacu tua duhuena tjiga musa. Ne cuieraina jirucuga musa. A yoa Cohamacu tua mehne wacu tuaina jirucuga musa.

¹⁴ Dohse jiare musa yoana, painare cahia mehne tire yoaga musa.

¹⁵ Mipure yu coyea musare ahrire yahu duaja: Estefana ya wuhu macaina Acaya yahpa macaina noaa buheare tuho muhtaina, ti ya yahpai Cristore wacu tua muhtaina jire tina sehe. Tuhsu, painare mari coyeare Jesu yainare noano yoadohorucure tina. Tire musa masina.

¹⁶ Tina yoaro sehe jinare, paina Cristo yare yoadohoinare musa noano yuhtichu cahmaja yuhu.

¹⁷ Estefana, Fortunato, Acaico cahu yu cahapu wihi tuhsahre. Oi ti jichu pjiro mehne wahcheja yuhu. Musa mariachu musare tuaro wacui nimahi yuhu. A jicu tina ti wihichu wahcheja yuhu.

¹⁸ Tina mehne jicu noano yajeripohna tiriro wahahi yuhu musa cahu tina mehne musa wahcheriro sehetu. Tinare noano no payoa mehne tuhoga musa. A yoa paina tina yoaro sehe jiina cahure no payoa mehne tuhoga.

¹⁹ Asia yahpa macaina Jesu yaina musare noa dutira. A yoa Aquila, Priscila, ti ya wuhui cahmachuina mehne Cristo to cahia mehne musare pjiro noa dutira. ²⁰ O macaina Jesu yaina jipihtina musare noa dutira. Musu mehne macainare noano mehne piti bocasinia.

²¹ Yuhu, Paulo yu basi ahri dihtare joaja. Musare noa dutija.

²² Mari puhtoro Jesucristore paio to cahierachu, Cohamacu tirore buhiri dahre-jaro. Mari puhtoro cjero tjua tajaro.

²³ Yu coyea mari puhtoro Jesucristo musare jipihtinare to cahia mehne noano yoajaro. ²⁴ Yuhu Jesucristo yairo jicu, to yaina musa cahu musa jichu musare tuaro cahija.

2 Corintios

Õ sehe ni joarocaha Paulo Corinto macainare

¹ Yuhũ Paulo Jesucristo buhe dutiro to cūriro jija. Cohamacũ to cahmariro seheta cūre yuhũre Jesu. Yuhũ, mari coyeiro Jesu yairo Timoteo mehne musare Cohamacũ yainare, Corinto macainare joarocaja tjoa. Jipihtina Cohamacũ yainare Acaya macainare musa cūhũre joarocaja. ² Ā jina Cohamacũ mari Pũcũ, mari pũhtoro Jesucristo mehne musare noa dutija. Cohamacũ to cahĩa mehne to yoadohoa mehne noano jiga musa.

Paulo to ñano yuhdũrĩre õ sehe ni yahuha

³ Mari pũhtoro Jesucristo Pũcũro Cohamacũ marine pja ñana. Ā jiro tiro marine ã yoadohorucura. “Noa yuhdũrĩro jira tiro”, nijihna mari. ⁴ Mari ñano yuhdũchũ ñano jipihtinare marine to yainare yoadohora tiro painare mari yoadohohto sehe. Cohamacũ marine to yoadohoa mehne mari cūhũ paina cūhũre yoadohonahca. ⁵ Cristo yaina mari jiri buhiri mari ñano yuhdũchũ tiro tuaro yoadohorohca marine. ⁶ Sã sehe musare yoadohona ñano yuhdũja. Cristo mehne musa yuhdũhto sehe musare sã yahuri buhiri ñano yuhdũja. Ā yoa Cristo sãre to yoadohochũ sã sehe musa cūhũre yoadoho masija. Ā jina sã ñano yuhdũrĩro seheta musa cūhũ ñano yuhdũna, noano mehne cãno pjanahca musa. ⁷ Noano mehne musa cãno pjahtore sã masija. Sã ñano yuhdũrĩro seheta ñano yuhdũre musa cūhũ. Ā jina Cohamacũ to yoadohoa mehne wahche, sã cãno pjariro seheta musa cūhũ wahchena, cãno pjanahca.

⁸ Sã coyea, mipũre ahri yũ yahuhtire musa noano masichũ sã cahmaja. Asia yahpai ñabiaro yuhdũi sã. Ā sehe ni tũhotumai sã: “Ne bihosi mari. Ne cãno pjasi. Ā jina mari yarianahca”, ni tũhotumai sã. ⁹ “Marine wajãnocahca”, ni tũhotumai sã. Ā ñano yuhdũna Cohamacũ dihtare tuaro sã wacũ tua namoi. Sãre ti ñano yoachũ cahmaha Cohamacũ tirore sã wacũ tua namohto sehe. Tiro sehe yariainare masoriro jira. Ā tirore wacũ tuana sã mũ sũro sã cãno pjaerarire masija. Cohamacũ sehe marine yoadohora. ¹⁰⁻¹¹ Sãre cuabiaro jipachũta to yoadohoro mehne sã yuhdũi. Baharopũ cūhũre pari turi sãre yuhdorohca. Sãre Cohamacũre musa sini payochũ tiro sãre yoadohorohca. Sãre to yoadohohtore masija sã. Ā jina sãre to yoadohochũ ñana, tirore “Noana”, ninahca musa. Payũ musa sini payorire to yũhtichũ

ñana wahche, “Noana”, ninahca musa Cohamacũre. Payũ paina cūhũ ãta niahca.

Paulo Corintopũ to waha duamarire yahuha

¹² Musa mehne sã jirire wacũna wahchea mehne õ sehe tũhotuja sã: Ahri yahpai Cohamacũ to yoadohoa mehne mahũono marieno noano mehne masare piti ti buhehi. Musa pinihtare noano piti ti buhei. Ā sehe yoana sã mũ sũro sã masia mehne yoerahi. Cohamacũ cahĩa mehne to tuua mehne ã yoahi. ¹³⁻¹⁴ Ā yoana noano yahu joarocahi musare, noano musa masihto sehe. Mipũ sãre musa masi pahũohto dũhsasinina mini. Sã jia tiare musa noano masichũ tuaro cahmaja sã. Ā sãre noano masina, mari pũhtoro Jesu to tjua tachũ sã mehne wahchenahca musa. Musa mehne sã wahcheriro seheta musa cūhũ sã mehne wahchenahca.

¹⁵⁻¹⁶ Ā sehe nicũ Macedonia yahparũ waha duamaja yuhũ. Ā wahacũ musare ñũ yuhdũ wahcã duamaja yuhũ. Ā jicũ tũpũre suricũ tjua tacũ pari turi musa mehne mahaa numũricã jiboca yuhũ. Ā jina pũa taha musa mehne yũ jichũ ñana pjiro yuhũ mehne musa wahcheboca. Baharo musa cahapũ jiricũ Judea yahparũ yũ wahachũ ñana yuhũre yoadohoboca musa. ¹⁷ “Wahaihtja”, yũ nichũ tũhorina jina musa cahapũ yũ sũerachũ ñana “Paulo mahũono niri jira”, ĩni tũhotujari musa? “Wahaihtja”, nicũ yũ mũ sũro ã nicũ nieraja yuhũ. “To niriro seheta yoerara”, ĩyuhũre ni tũhotujari musa? ¹⁸ Ā sehe ni mahũoriro jieramaja yuhũ. Ā jicũ “Yoaihtja”, nicũ yũ niriro seheta yoaja yuhũ. Tĩre masina Cohamacũ. ¹⁹ Yuhũ, Sila, Timoteo mehne Jesucristo Cohamacũ macũno yare musare yahui sã. Cristo sehe “Yoaihtja” nino, quihũno yoiriro jiro nina. Cohamacũ to niriro seheta Cristo yoara. ²⁰ Jipihtiare Cohamacũ to yahurire Cristo yoa pahũoha. To ã yoiriro jichũ ñana Jesu yoadohoro mehne to yare sã painare “Ā tjira”, ni yahuja Cohamacũre ti ño payohto sehe. ²¹ Cristo yaina marine jirucuchũ yoiriro Cohamacũta jira. Ā jiro to yare yahuhtinare sãre besere tiro. ²² Ā yoa to yaina mari jiare ñano tĩre marine masichũ yoara tiro. Ā yoaro, Espĩritu Santore mari mehne ji dutire tiro. Mari mehne jiro tirota marine Cohamacũ to yuhdohtore masichũ yoara.

²³ Mipũre poto yahuihtja musare. Poto yũ yahuerachũ Cohamacũ sehe musare poto yahujaro. Tirota yũ tũhotuare masina. Musare tuhti duaeracũ musa cahapũ waherahi. “Musare cahyachũ yoari”, nicũ musa cahapũre Corintopũ wahaerahi. ²⁴ Ā jina “Musare wacũ tua dutiina jija sã”, nina

nieraja. Cristore noano wacū tua tuhsare mäsä. Ä jina “Ö sehe Cristore wacū tuaro cahmana müsare”, nina nieraja sä. Müsare yoadoho duaja sä müsä noano wahchehto sehe.

2

¹ Ä jicū ö sehe ni tühotuhi: “Pari turi tinare cahyachū yoa duaeraja. Ä jicū mipäre wahaeraja”, ni tühotuhi. ² Müsare cahyachū yoa duaeraja. Müsā cahyachū ñicū yuhū sehe müsare wahcheraboa. Ä jina yühäre wahchechū yoahntina jieraboa müsā sehe. ³ Ä jicū müsā cahapū wahaerahi. Wiho mejeta müsare wiho joaroca bahrañohi. Müsā yühäre wahchechū yoahntina jipanahta yühäre cahyachū yoaboa müsā, müsā cahapū yū sūchū. Müsā mehne yū wahchechū, müsā cūhū wahchenahca. Tīre masija yuhū. Ä jicū mipäre müsā mehne cahya duaeracū wahaerahi müsā cahapū. ⁴ Pjīro tühotucū, ñāno yajeripohna tīcū, tuaro yahco mehne müsare joarocapacūta müsare cahyachū yoa duaerahi. Müsare tuaro yū cahīrire müsare masichū yoa duacu müsare joarocahi.

Tina mehne macariro to ñāno yoarire bo dutiha Paulo Jesu yainare

⁵ Cäiro müsā mehne macariro yühäre cahyachū yoariro jire. Wiho mejeta müsare to tuaro cahyachū yoariro seheta yuhū sehēre pjīro cahyachū yoerare tiro. Ä ñāno yoariro cāina müsā sehēre tua curero cahyachū yoayuhiti. “Tua curero”, nija yuhdo curero yahu duaeracū. ⁶ Payū müsā mehne macaina tirore buhiri dahre tuhsayuhiti. Tó purota buhiri dahre duhuro cahmana tirore. ⁷ Tirore müsā buhiri dahrerucuchū tuaro cahyaboca tiro. Ä jiro Cristo yare duhuboca. Ä jina to ñāa yoarire boga müsā. Tirore yoadohoga to wahchehto sehe. ⁸ Tuhsū, tirore noano yoaga müsā tirore müsā cahīrire to masihto sehe. Müsā ä yoachū tuaro cahmaja yuhū. ⁹ Tó pano müsare joarocacū “¿Potocāta yühäre yuhtiahcari?” nicū ä ni yahu joarocahi müsare. Yühäre müsā yuhtichū ñū duacu müsare ä ni joarocahi. ¹⁰ Mipüre to ñāa yoarire müsā bochū ñicū yuhū cūhū tīre boihtja. Yühäre ñāno yoareri jire tiro. Müsā sehēre ñāno yoayuhiti. To ä jiriro jipachūta to ñāa yoarire boja yuhū cūhū. Müsare noano yoadoho duacu Cristo to ñurocaroi to ñāa yoarire boja. ¹¹ Tīre boja Satana marine to yuhdūrcāerahto sehe. Tiro marine ñāare yoachū cahmana. Tīre noano masija mari. Ä jina Jesu yaina ti ñāa yoarire wacūrueraja mari, “Tinapū Satana yare cahmari”, nina.

Tróade wama tiri macai jiro Titore bo-caeraro pjīro cahya tühotuha Paulo

¹² Ä yoa Tróade wama tiri macapū sui Cristo yare buhe duacu. Tórn yū jichū payū masa noaa buheare tūho duaina jire. Mari puhtoro to yoadohoa mehne to yare yū buhehtina payū masa jire. ¹³ Ä jipachūta mari coyeyirore Titore bocaeracū pjīro cahya tühotuhi. Ä jicū tó macainare coha siti tuhsucū Macedonia yahpapū wahai.

Cristo to yoadohoa mehne ñāare yoarucueraja mari

¹⁴ Ä yoa Cohamacū Satanare to yuhdūrcarū baharo mari cūhäre tirore yuhdūrcachū yoara, Cristo mehne ñāa yoare marine duhuchū yoaro. Surara mahapū pari pohna wahaga ti yuhdūrcarire ti yoa ñono seheta mari cūhū Cohamacū mehne Satanare mari yuhdūrcarire yoa ñona nija Cohamacū mehne. Ä jina “Noana”, nija tirore. Ä jina Cohamacū marine to dutichū masina jipihtiropū Cristore masare masichū yoaja mari. Ä tirore masia tina noano wahchera me sitiare ti wahcheriro seheta. ¹⁵ Cristo yaina jina, Cohamacū sehēre wahchechū yoaja mari, me sitiare mari wahcheriro seheta. Ä jia Cristo yaina mari jia tiare ñū masina paina Cohamacū to yuhdohtina. Paina ti ñāa buhiri pichacapū wahahtina cūhū Cristo yaina mari jia tiare ñū masina. ¹⁶ Cristo yaina mari jichū ñūa, ti ñāa buhiri pichacapū wahahtina sehēre pichacapū ti wahahtore masina. Cohamacū to yuhdohtina sehēre marine Jesu yainare ñūa jipihtia dachoripe tiro mehne ti jiltore masina. Ä jia Cristo ya wiho jia buhea jierara. Ä jiro ahrire Cristo yare to mü sūro buhe sohtori tiriro ne mariahna. ¹⁷ Payū paina Cohamacū yare buhemana ñiferure wapata duaa. Sä sehē tina yoaro sehē yoeraja. Mahñono marieno Cristo to tuaa mehne to yare buheja sä. Cohamacū säre to cūchū to ñurocaroi noano buheja sä.

3

¹ ¿Pari turi sä jia tiare müsare yahuna nijari sä, müsā tühotuchū? Paina müsare ti buhehto pano ti jia tiare masi duana ti joari pūre cahma mühtare müsā. Säre masi tuhsara müsā. ¿Säre masipanahta tí pū barore cahmajari müsā? ¿O paina cahapū sä buhena wahana ti pū barore säre nano cahmajari, müsā tühotuchū? ² Tí pū barore cahmaeraja sä. Müsā sehēre jipihtina paina ñūa müsare sä noano buherire masiahca. Müsare sä buhechū Cristo yaina jia dūcare müsā. ³ Ä jina tí pū baro yoaro sehē jira müsā sehē. Cristo painare to joarocari pū yoaro sehē jira müsā. Tí pūre tiro to joarocaboro seheta, Espiritu Santo tuaa mehne

musa jia tiare noano cohtotachu yoari jire Cristo, painare to tuaare ñono taro. Potota tinta mehne to joarocari pũ yoaro sehe jierara musa. Cohamacu catiriro waro to Espiritu Santo mehne musare cohtotachu yoaro, joarocari pũ painare to joaroca ñono seheta, musa sehe Cristo yaina wahana, to yare masare sã quihõno buherire noano ñona painare. ⁴ Ahrire jipihitiare michapucacã yũ ni joarire tuhutuja sã Cohamacure noano wacũ tuana. Cristo to yoadohoa mehne ã wacũ tuarucuja sã. ⁵ “Sã mũ sũro ahri dahraare yoaja sã”, ni masieraja sã. Cohamacu to yoadohoa mehne bihoja sã.

⁶ Mipure to yahuare noaa buheare Cohamacu sehe noano sãre buhe masichu yoara. Ahri buhea panopũ to dutia to joari cjiri yoaro sehe jierara. Noaa buhea sehere buheja sã. Panopũ to dutirire mari mũ sũro ne bihoeraja. ã mari bihoerari buhiri pichacapũ wahaboa mari. Noaa buhea sehere tuhona Espiritu Santo to yoadohoa mehne Cristore wacũ tuaja. ã wacũ tuana jipihitia dachoripe Cohamacu mehne jirucunahca mari.

⁷ Cohamacu to dutiare cũno tãa pjĩnipũ joa õ tuhsũ, Moise cjirore cũri jire. To ã cũri baharo to si sitea bajuari jire. Moise cjiro wuhdua si siteri jire. Minoa yuhduari jire. Baharo ti si sitea pihitia wahari jire. Baharo to si sitea to pihitia wahahto to jipachuta wahanore to wuhduare masa ne ñuroca õa bihoerari jire. Tĩ dutiare masa ti yoa pahũoerari buhiri pichacapũ wahahtina jia tiri jire. ã jia ti dutia masare pichacapũ waha dutipahta, tuaro si sitea mehne ji ducari jire ti dutia. ⁸ Tĩ dutia yuhdoro noaa buhea sehe noa yuhduara. Ahri buheare painare mari buhechũ ti noano tuhochũ Espiritu Santo tina mehne jirohca. ã jia panopũ macaa dutia yuhdoro Cristo ya sehe noa yuhduara. ⁹ Cohamacu dutia panopũ macaa masare pichacapũ waha dutiri jire. ã dutipahta Cohamacu tuaa mehne to si sitea mehne ji ducari jire. Tĩ yuhdoro noaa buhea sehe Cohamacu to tuaa mehne jira. Tĩ buhea mehne noaina wahara masa Cohamacu to ñuchũ. ¹⁰ Panopũ Cohamacu to dutiri cjiri sehe wiho jia dutia yoaro sehe tjuanocahna mipure noaa buhea mehne mari ñũ piti bocachũ. Noaa buhea sehe noa yuhduara. ¹¹ Panopũre to dutia yoa cureri pja si sitea jirucuma, pihitia wahaha. Tĩ dutia yuhdoro noaa buhea sehe noa yuhduara. Tĩ buheare noano tuhona, Cohamacu mehne ã jirucunahca.

¹²⁻¹³ Mari ã jirucutore masina, cuiro marieno noaa buheare noano yahu pahũonocaja sã. Moise cjiro sehe sã yoaro sehe yoarerari jire. “Cohamacu to si sitea pihitiro nina”, Israe masa ni ñuri”, nino

to wuhduare ducatarari jire Moise cjiro. Sã sehe tiro yoaro sehe yoeraja. Cuiro marieno, ducataro marieno to yare noaa buheare buheja sã. ¹⁴ Tĩ pjapũ macaina Israe masa sehe ne masiera tiri jire. Mipũ cãhũre Cohamacu yare panopũ to joaa pũrine tina buhea, ne masierara. Moise cjiro to wuhduare to ducatachũ Cohamacu to si siteare ti ñuroca õerariro seheta tina noaa buheare noano masierara. Cristore cahmaeraa, masisi tina. Tirore noano wacũ tuaa, ti pja pinihta to yare masiahca. ¹⁵ Mipũ cãhũre Israe masa Cohamacu dutia Moise cjirore to cũrire buhea, tinare ducataro seheta noaa buheare ti tuhoborore ducataro. ¹⁶ Mari sehe mari puhtorore mari cahmachũ tirota marine masichũ yoara. Moise cjiro to wuhdua ducatarore to nanocaboriro seheta mari puhtoro marine to yare noano masichũ yoara. ¹⁷ “Mari puhtoro” nicũ, Espiritu Santore nii nija. Cohamacu to Espiritu Santo mari mehne to jichũ pichacapũ wahaborinare to yuhdoina jija. ã jina “Panopũ macaa dutia mehne mari yuhdunahca”, nieraja mari. ã jina ti dutiare duhuna, Espiritu Santo to cahmano seheta yoaja mari. ¹⁸ ã jina Jesu yaina jina, Cohamacu yahuare masija mari. Ti wuhdua pocare ducataro marieina yoaro seheta Cristo to tuaare ñona nija mari. ã jiro mari puhtoro Espiritu Santo marine noaa sehere cohtotachu yoaro nina. To ã yoachũ Cristo noa yuhduariro to jiro seheta wahana nija mari.

4

¹ ã yoa Cohamacu sãre pja ñũno, noaa buheare yahuhtinare cũre sãre. To ã cũrina sã jiare masina, to yare buhena pomerana, bujua witi tuhutueraja. ² To yare buhena mahũo cure buheraja. Tuhsũ, sã tĩre cohtotaeraja. Soro curero buhena buoro yuhduaboa. ã jina tó sehe yoare cahmaeraja sã. Cohamacu to ñurocaroi jija sã. ã jina noaa buheare noano quihõno buheja sã. Sã ã buhechũ ñua tĩre noano masina sãre tuhoina. ³ Sã ya buheare noaa buheare buheja sã. Sã tĩre buhepachuta paina ne noano tuhooerara tĩre tinare ducataro seheta. ã tuhooeraina pichacapũ wahahtina jira. ⁴ Satana ñariro ahri yahpa macaina bui puhtoro tinare masierachũ yoara. Capari ñueraina ti ñũ masieraro seheta masierachũ yoara tinare. Noaa buheare Cristo tua yuhduarũ sũriro ya buheare ti masierachũ yoara tiro. Cristo sehe Cohamacu to jia tiare marine masichũ yoara. Tiro Cristo Cohamacu waro jira. ⁵ Sã buhena “Sã sehere ño payoga”, ni buheraja. Õ sehe ni buheja sã: “Jesucristo sehe jira mari puhtoro”, ni buheja sã. Sã sehe Jesure yuhtina jina,

m̄sare dahra cohtaina yoaro sehe jina, to yare m̄sare buheja s̄a. ⁶ Panop̄ ō sehe niha Cohamac̄u: “Nahitianop̄re buhriaro jiga”, ni dutiha tiro. Mip̄re tirota jira marine to tuaare masich̄u yoariro. Buhriarocarō marine to noano bajuch̄u yoaro sehta, tiro to tuaare marine masich̄u yoara. Cristo Cohamac̄u tuaare, to jia tia c̄uh̄re marine masich̄u yoara.

Cristo to tuaa mehne mari jija

⁷ Ā masiina jina, to tuaare, noa buhea c̄uh̄re painare masich̄u yoaja. Ā yoaina jipanahta wiho jiina jija s̄a. Dihi biato d̄oihta to wahtiro yoaro sehta s̄a c̄uh̄ wiho jina jija. Ā jipanahta Cohamac̄u to tuaare, noa buhea c̄uh̄re painare buheja s̄a. S̄a ā buhech̄u ñ̄ua, wiho jiina s̄a jich̄u ñ̄ua, s̄are tuhoina ō sehe ni, masiahca. “Ti m̄suro ahri buheare masierara. Cohamac̄u sehe tua yuh̄duariro tinare masich̄u yoara”, ni masiahca paina s̄are. ⁸ Jipihtina paina s̄are ñ̄ano yoapahta Cohamac̄u s̄are to yoadoch̄u tina s̄are yuh̄dur̄ucaerara. Ā jina “Ñ̄ano yuh̄d̄una nija”, ni tuh̄otupanahta, Cohamac̄u yare ne duhueraja. ⁹ S̄are ti ñ̄ano yoarucupach̄uta Cohamac̄u s̄are ā yoadohorucura. S̄are ti c̄j̄aroca c̄u mujapach̄uta to yoadohoa mehne yarieraja s̄a. ¹⁰ Ti waj̄ähtina jinocanata nija s̄a, Cristo ahri yahpai to ñ̄ano yuh̄dur̄i sehta. Ā ti waj̄ähtina jinata nija s̄a Cristo catiare wariro to jiare masa ti masihto sehe. S̄a ā ñ̄ano yuh̄d̄uch̄u ñ̄ua t̄ire masiahca masa. ¹¹ Ā yoa dachoripe s̄are paina nu waj̄ähto cuara Cristo yaina s̄a jiri buhiri. Ō sehta ñ̄ano yuh̄d̄uja s̄a Cristo to catiare wariro to jiare paina ti masihto sehe. S̄a pjac̄uri baharo yariaa wahaahca. S̄a ā wahahtina jipanahta Cristore catiare warirore masich̄u yoaja s̄a painare. ¹² Ā jia m̄sare s̄a buheri buhiri s̄a sehene paina nu waj̄ähto cuara. S̄a buheare m̄sa tuh̄ori baharo jipihtia dachoripe Cohamac̄u mehne jirucuh̄tina jira m̄sa.

¹³ Cohamac̄u yare ti joari p̄i ō sehe nina: “Cohamac̄ure wac̄u tuac̄u, to yare yahuhi”, ni joaa tiha panop̄u macariro. S̄a c̄uh̄ t̄o sehta yoaja. Cohamac̄ure wac̄u tuana, to yare yahuja. ¹⁴ Ā buheja s̄a ahri yu nihtire noano masina: Cristo to yariari baharo Cohamac̄u tirore masori jire. Ā jiro Cristo yaina mari jich̄u ñ̄ano tiro mari c̄uh̄re masonohca. To ā masori baharo to cahap̄u naanohca marine. ¹⁵ Ā jina m̄sare yoadohona, ñ̄ano yuh̄d̄uja s̄a. Ā jina Cristo yaina m̄sa payu wahana, payu m̄sa Cohamac̄ure wahchea mehne ñ̄o payonahca. Tirore “Noana”, ninahca.

¹⁶ Musa ā wahachu ñ̄ana, s̄a ñ̄ano yuh̄dupanahta cahyaeraja. Ā jina Cristo

yare buhe duhueraja. Dachoripe wahyarucupanahta dachoripe wahcheina jirucuja s̄a. ¹⁷ Mip̄re ñ̄ano yuh̄dupanahta ñ̄ano yuh̄du dojoeraja. Tí mari ñ̄ano yuh̄d̄ua pihtia wahaahca. Ā jina marine mahanoc̄a ñ̄ano yuh̄d̄uro cahmana. Ā mari ñ̄ano yuh̄dur̄ina c̄jiri jina, baharop̄re pj̄iro wahchea mehne jirucunahca Cohamac̄u mehne. Ā jina mari ñ̄ano yuh̄dur̄i yuh̄d̄oro pj̄iro wahchea mehne jirucunahca. ¹⁸ Mari ñ̄ari c̄jiri baa pihtia wahaahca. Mari ñ̄erari sehe ā jirucuahca. Ā jina mari ñ̄eraare Cohamac̄u yare ā wac̄urucuja mari. Ā wac̄urucuna baharop̄u mari noano jihtore wahcheja.

5

¹ Wuh̄re to coh̄aboriro sehta baharo mari pjac̄uri sehe butia wahaahca. Ā jiro wahma wuh̄re to yoaboro sehta Cohamac̄u wahmaa pjac̄urire yoarohca. Ā yoaro tí pjac̄urire marine warohca. Tí pjac̄uri masa ti yoa pjac̄uri jierara. Ā jina m̄uanop̄u ā jirucunahca tí pjac̄uri mehne. T̄ire mari masija. ² Ā jina tí pjac̄urire m̄uano macaa pjac̄urire tuaro cahmana, mari ā cohtarucuna nija. ³ Tí pjac̄urire tuaro cahmaja, mari yariari baharo suhti marieina mari jiboro sehta pjac̄uri marieina ji du-aerana. ⁴ Mip̄re ahri pjac̄urire coh̄a duerapanahta wahmaa pjac̄uri sehene tuaro cohtaja mari. Mip̄re mari pjac̄urire coh̄a duerapanahta jipihtia dachoripe Cohamac̄u mehne mari jihtore tuaro cahmaja mari. Ā jina ahri mari pjac̄uri yariahti pjac̄uri ti jich̄u masina, wahmaa pjac̄uri mehne Cohamac̄u mehne ā jirucu duaja mari. ⁵ Mari ā jirucuh̄tore cahnore Cohamac̄u sehe. Ā cahnono Esp̄iritu Santore ware marine. Ā jiro Esp̄iritu Santo mari mehne jiro, marine Cohamac̄u to yoahtore “Potoc̄a tjira” nino, marine masich̄u yoara tiro.

⁶ Ā jina Cohamac̄ure wac̄u tuarucuja mari. Cuiro marieno jija mari. Ahri mari ji m̄uhtari pjac̄uri jina, mari puhtoro mehne jierasinija. ⁷ M̄uano macaare Cohamac̄u c̄uh̄re mari ñ̄erapanahta “Tí potoc̄ata jira”, ni tuh̄otuja mari. Ā jina tirore wac̄u tuaja mari. ⁸ Ā jina mari cuieraja. Mari pjac̄urire ahri yahpai coh̄ana mari puhtoro mehne m̄uanop̄u jirucunahca mari. Ā yoa mari yariach̄u noa nina marine. ⁹⁻¹⁰ Ā jina Cristore wahchech̄u yoa duaja mari. Ahri yahpa macari pjac̄u mehne jisina tirore wahchech̄u yoa duaja. M̄uanop̄u c̄uh̄re tirore wahchech̄u yoa duaja.

Jipihtina Cristo cahap̄u mari wahachu ñ̄ano tiro mari yoirire ñ̄ano marine beserohca. Ñ̄ano mari yoirire masinohca tiro. Ā masino wapa marieno to waborire marine

wasi tiro. Noare mari yoari cãhãre masinohca. Å masino wahchero marine noano yoarohca. To å masiro jichũ ñna tireo wahchechũ yoa duaja mari.

Cohamacũ marine to ñũ tuhtichũ ñno Cristo marine yahura

¹¹ Å jina cua pisaro mehne Cristore ño payoro cahmana marine. Ahrire masina, Cristo yare masichũ yoaja sã masare. Tinare cuisãana, tireo wacũ tuachũ yoa duaja sã tinare. Noano mehne sã tãre sã buherire Cohamacũ noano masina. Sã å buherire musa cãhãre noano musa masichũ cahmaja yuhũ. ¹² Pari turi noaina sã jia tiare musare yahuna nieraja. “Painare yuhduracaja”, niinare musa yahuhto sehe noano mehne sã buherire yahuna nija sã musare. Tina sehe ti tuhotaupũ ñaina jipahta masa ti ñurocaro dihta noaina yoaro sehe yoa ñomana. Å jina sã mehne musa wahchehto sehe ahri jipihtiare musare yahu joana nija. “Paulo cãhũ sãre noano mehne buhere”, sãre painare musa ni dacataho sehe ahri jipihtiare musare yahu joana nija. ¹³ ¿Sã õ sehe ni yahuna tuho masieraina jijari sã, musa tuhotauchũ? Masa sãre ñua, tuho masieraina yoaro sehe ñua sãre. Cohamacũ yare sã yoachũ ñua å ni ñuboca sãre. Ti å ñuborina jipanahta å jiina jieraja sã musare yoadoho namona tana. ¹⁴ Cristo marine to cahĩchũ ñna musare å yoadohoja. To å cahĩchũ ñna to yare å yahurucoja sã. Cãirota Cristo jipihtina mari ñaa buhirire yariari jire. To å yariari baharo mari sehe jipihtina mari ñaa buhirire yariarina yoaro sehe jina, ñaare yoa namo duaeraja. ¹⁵ Jipihtina mari ñaa buhiri yariari jire tiro Cohamacũ ya dihtare mari yoahto sehe. Mari mũ sũro yoa dutieraro, to cahmaa sehẽre marine yoa dutiro yariari jire tiro. Tiro sehe mari yoa jiborirore yariaro, masa mũjari jire. ¹⁶ Å jina mipũre sã mũ sũro masare “Noaina jira. Ñaina jira”, ni ñueraja sã. Panopũ sã mũ sũro yoa timai. Å jina Cristore masierahi. ¹⁷ Å jina Cristo yaina wahana wahma masa bajuaina yoaro sehe wahaja mari. Panopũre mari mũ sũro mari tuhotaumarire, mari yoamarire duhunocaja mari. Mipũre wahma masa bajuaina yoaro sehe jina, noaa sehẽre cohtotana, Cohamacũ ya dihtare yoa duaja mari.

¹⁸ Cohamacũ sehe marine noaa sehẽre cohtotachũ yoare. Cohamacũre ñũ tuhtiina mari jichũ ñno Cristo sehe mari ñaa buhiri tiare cohãre. Å cohãno mari ñũ tuhtirire duhuchũ yoare tiro. Å yoachũ yoare Cohamacũ Cristore. Å yoaro sãre to yare buhe dutiro cũre. Å buhena, painare Cohamacũ mehne ti ñũ tuhtirire duhuchũ yoaja sã

cãhũ. ¹⁹ Õ sehe masare yahu dutire Cohamacũ sãre: “Cristore mari wacũ tuachũ ñno mari ñaa buhirire buhiri dahrerara Cohamacũ marine. Å yoaro marine ñũ tuhtiriro cjiro jiparota tiro marine to yaina jichũ yoara”, ni yahu dutire Cohamacũ sãre. ²⁰ Å jina Cristo yare buhehtina to cũrina jija sã. Cohamacũ musare to yahuboriro seheta sã sehe õ sehe ni musare yahuja: Cristore yahubasana nija. Å jina musare bosaja. Cohamacũre musa ñũ tuhtiare tó purota duhuga. ²¹ Cristo ñaare to yoaerapachuta Cohamacũ sehe tireore mari ñaa buhirire yaria dutiri jire. Å yoaro mari ñaa buhirire buhiri dahrerari jire Cohamacũ tireore. Å jiro Cristo yaina mari wahachũ Cohamacũ yoaro sehe noaina jichũ yoare tiro marine.

6

¹ Cohamacũ yare buhedohoina jija sã. Å jina ahrire tuaro musare yoa dutija sã. Cohamacũ yare noaa buheare musa tuhoriro seheta yoaga musa. Musã tuhoriro sehe musa yoaerachũ ti musa tuhori yaba cjihti jierara. ² Õ sehe nina Cohamacũ:

“Yũ quihõri pjare, musare yũ noano yoahiti pjare musa siniare tuho, yuhtihĩ.

Å yoacũ musare yũ yuhdohti dachore musare yoadohohĩ”,

nina tiro. Tuhoga musa. Mipũre Cohamacũ musare to noano yoahiti pja jira. Mipũre Cohamacũ musare to yuhdohti dacho jira.

³ Ne mahanocã painare ñano yoaeraja sã. Painare ne ñano ni durucueraja, “Noaa buheare musare sã buheare cahmaerari”, nina. ⁴ Å jina Cohamacũre dahra cohtaina sã jiare musare masichũ yoa duaja. Õ sehe jija sã: Ñano yuhdũna, paina ti ñano yoarina jina cãhũ å tuhotaunocaja. Sãre ti ñano yoapachuta suaro marieno jija. ⁵ Õ seheta ñano yuhdũi sã: Masa sãre cjãchũ, peresu ti yoachũ, payũ masa sãre wajã dua ti sañurucuchũ, ñano yuhdũi sã. Sã tuaro dahra wahyana, wũjo purĩpachuta carĩerana, jũca baana ñano yuhdũi. ⁶ Numiare å ñũnocai. Å jina ne ñano yoaerahi. Å yoa Cohamacũre yare noano masi buhei musare.

Tuhsũ, ne suaerahi sã. Å yoa noano niji siaro mehne yoai sã musare. Å yoana Cohamacũre dahra cohtaina sã jiare masichũ yoana nii sã musare. Espĩritu Santo to yoadohoa mehne Cohamacũre dahra cohtaina sã jiare masichũ yoana nii musare. Potocã musare sã cahĩchũ ñna, tireo dahra cohtaina sã jiare masina musa. ⁷ Å jina noaa buheare musare quihõno sã buhechũ ñna, Cohamacũ tuaa mehne sã yoachũ ñna tireo dahra cohtaina sã jiare masina musa. Noaa sehe jipihtia sã yoari cjiri sã wamoa yoaro sehe jira noano sã dacataho

sehe. Tí noaare yoana wafinore sã ducata nija. Á yoana tí noaare sã yoari mehne tirore sã yuhdurucaja. ⁸ Paina sãre ño payora. Paina sehe sãre ño payoerara. Paina noano ni durucura sãre. Quihõno sã buhepachuta “Mahñoina jira”, ni yahusãna paina sehe sãre. ⁹ Paina sãre ñu masina jipahta sãre ñu masieraina yoaro sehe yoara. Sãre ti wajã duapachuta catisinija sã. Ñuga sãre. Potocã tjira. Sãre buhiri dahre ti cãchũ, yarierasinja sã. ¹⁰ Sã cãa tahari cahyaina jipanahta, ã wahcherucuja. Pjacõoina jipanahta painare noaa buheare buhena tinare pjïro pachere sã waboro seheta yoana nija tinare. Paye baro cãaeraina jipanahta, potocãta Cohamacu yare cãa pahñonocaja sã.

¹¹ Ne Corinto macaina yu coyea musare noano mehne yahu pahño joahi sã musare. Musare tuaro cahina, ã yahuhi musare. ¹² Sã sehe musare cahĩ duheraja. Musa sehe sãre cahiera curera. ¹³ Á yoa pohna ticu yu pohnare yu yuhuboro seheta musare yahuihtja: Musare sã tuhoturiro seheta musa cãhu ãta noano tuhutuga sãre. Á jina sãre cahiga musa cãhu.

Cristore cahmaerainare piti ti dutieraha Paulo

¹⁴ Á yoana Cristore cahmaeraina mehne ã piti tirucuenta tjiga. Tina mehne macaina jiena tjiga. Cãno potori jierara musa. Noaare yoariro ñaare yoariro mehne noano ji masierara. Cohamacure cahmaina Cohamacure cahmaeraina mehne noano cahma piti ti masierara, buhriaro nahitiano mehne to ji masieraro seheta. ¹⁵ Á jia Cristo wafino mehne cãno potori tuhoturera. Á yoa Cristo yairo, Cristore cahmaerariro mehne noano cahma piti ti masierara. ¹⁶ Cohamacu wãhui “Cohamacu jira”, ti nia masurine mari cãachũ ñaa nina. To ya wãhui tí masurine mari cãchũ tó wahaerara. Tó seheta Cristo yaina Cristore cahmaeraina mehne mari piti tirucuchũ cãhure ñaa nina. Tina pãa curua cãno mehne ji masierara. Cohamacu catiriro to wãhu yoaro seheta jija mari. To wãhui to jiro seheta mari mehne jira tiro. Ó seheta nina Cohamacu:

“Tina mehne jiihtja yũhũ.

Ti watoi ã jirucuihtja.

Yũhũ Cohamacu ti pãhutoro jiihtja.

Á jia tina sehe yu yaina masa jahca”, nina tiro.

¹⁷ Á yoa õ sehe ni namona tiro mari pãhutoro:

“Ñaina mehne tjuaena tjiga.

Tinare piti tienã tjiga.

Cristore cahmaeraina ti ñaa yoaare ñu cãena tjiga.

Musa ã yãhure yãhtichũ ñũcũ, yãhu sehe musare piti tiihtja.

¹⁸ Á jicu musa Pucũ jiihtja.

Musa sehe yu pohna jinahca”, nina Cohamacu mari pãhutoro tua yuhduariro.

7

¹ Yu coyea, yu cahina, ahri jipihtiare Cohamacu to ã ni yahuchũ tuhona jipihtiare ñaa yoaare duhujihna mari. Ñaa wacãa cãhure duhujihna mari. Cohamacure noano ño payoa mehne ñaa buhiri tia marieno jijihna mari.

Paulo wahchea mehne yahuha Corinto macainare

² Noano mehne jiga musa sã mehne. Ne mahanocã mehne ñano yoaerahi sã musare. Á yoa tuhsũ, musare buhena, ne musare dojomehnerahi. Ne cãiro musa mehne macarirore mahñoa mehne wapa cahmaerahi. ³ Á nicu musare tuhtii nieraja. Musare yahu tuhsũhi. Sã yajeripohnari mehne tuaro cahija sã musare. Catisinina musare ã cahirucunahca. Mari yariari baharopũ cãhure musare ã cahirucunahca. ⁴ Yu niriro seheta musa yoarire, musa yoahiti cãhure masija yũhũ. Á jicu musare wacũrocacu wahcheja. Sã ñano yuhduaro watoi musa sehe yuhure pjïro wahchechũ yoara.

⁵ Á yoa Macedonia yahpapũ sã suri baharo tãpũ jina, ne soerahi sã. Tãpũre ñano yãhdũhi sã. Paina sã mehne cahma sayo yuhdurucahre. Á jina “Cristo yare duhuri”, nina Cristo yaina sehene cuisãahi sã. ⁶ Sã ã ñano yuhdupachuta Cohamacu sãre wahchechũ yoahre. Tiro cahyainare wahchechũ yoariro jira. Á jiro Tito sã cahapũ to wihiro mehne sãre wahchechũ yoahre Cohamacu. ⁷ Tito to wiichũ ñana wahchehi. Tirore musa wahchechũ yoarire sãre to yahuchũ wahchehi. Ahri cãhure wahchehi. Musare to quiti yahuchũ cãhure tuaro wahchehi sã. Yuhure musa ñu duarire yahuhre sãre. Yuhure musa cahya musa pjïro tuhoturiro cãhure yahuhre tiro. To ã ni yahuchũ tuhocũ pjïro wahchehi yũhũ.

⁸ Tó pano yu joarocari pũ mehne musare cahyachũ yoamahi. Á yoaricũ jipaihta cahyaeraja yũhũ sehe. Tí pũre musa buheri baharo cahyayuhiti musa. Tuhsũ, mahanocãta cahya duhuyuhiti musa. Á jicu wahma joaroca mũhtacu cahyapaihta mipũre cahyaeraja. ⁹ Mipũ pinihtare wahcheja yũhũ. Musa cahyachũ tuhocũ wahcheraja. Wiho mejeta ã cahyana, musa ñaare tuhutumarire cohtotayuhiti musa. Á musa cahyachũ ñũno, Cohamacu sehe to cahmano seheta musa ñaare tuhutumarire cohtotachũ yoari jira. Á jina musare

cahyachũ yoana, ñano yoa dojomehna nierahe sã musare. ¹⁰ Æ jina Cohamacũ to cahmano seheta cahyana, mari ñaare tũhotumarire cahyanahca. Cohamacũ to cahmano seheta cohtotanahca. Tõ sehe mari cahyachũ ñano marine pichacapũ wahaborinare yũhdora Cohamacũ. Mari Æ cahyachũ noa nina marine. Cristore cahmaeraina sehe ti ñaare tũhotumarire cahyaerapahta, Æ cahyamacanocaa, pichacapũ wahahtina jisina. ¹¹ Musa sehe Cohamacũ to cahmano seheta cahyayuhti. Musa Æ cahyana õ sehe yoayuhti musa: Mipũre ñaare yoainare Æ ñuocaerayuhti musa. Tinare duhu dutiyuhti musa. Æ jina ti ñaa yoare cuiyuhti musa “Tina yoaro sehe sã yoari”, nina. Æ yoana yũhũre ñũ duayuhti musa. Tuhsũ, ñaare yoarire buhiri dahre duayuhti musa. Tĩ jipĩtiare musa yoana mipũre quihõno yoaina musa jirire masichũ yoahre musa sãre. ¹² Panopũ ñano yoarire musare yahu joarocapaihta tirore yoadohocũ tacũ Æ ni yahu joarocaerahi. To ñano yoa payoriro cãhũre yoadohocũ tacũ Æ ni joarocaerahi. Musa sehere yoadohocũ tacũ ti pũre joarocahi. Sãre noano ño payora musa Cohamacũ to ñũrocaroi. Tĩre musa ño payorire noano musa masihto sehe ti pũre joarocahi musare. Cohamacũ tĩre musare masichũ cahmare. ¹³ Æ jina Tito musa yoarire to quiti yahuchũ tũhona tuaro wahchehi sã.

Tito cãhũ tuaro wahchere. Tirore musa noano mehne musa piti bocachũ tũhona, musa mehne to wahcherire tũhona sã cãhũ noano wahchehi. ¹⁴ Wahmanopũ musa cahapũ to wahahto pano musa mehne yũ wahcherire, noaina musa jirire yahuhi tirore. Yũ Æ yahuchũ yũ niriro seheta noano yoayuhti musa tirore. Æ jicu tirore yũ nirire buo tieraja. Musare quihõno Æ yahurucuja sã. Tõ seheta Tito cãhũre quihõno sã yahuhi musare to ñũriro seheta. ¹⁵ Musa cahapũ to suchũ ño payoa mehne tirore piti bocayuhti musa. Musa Æ piti bocachũ, noano yũtiina, yũhdũrcaro marieina musa jichũ ñũyuhti tiro. Æ jiro musare cahĩ namono nina tiro. ¹⁶ Mipũre noano yũtiina, Cohamacũ to cahmano seheta musa noano yoa pahũoina musa jichũ noano masija yũhũ. Æ masichũ tuaro wahcheja.

8

Cristo yaina jina, painare Æ wanocano cahmana marine

¹ Sã coyeyã, ahri yũ yahũhtire musare masichũ cahmaja sã. Cristo yaina Macedonia yahpa macaina Cohamacũ cahĩ mehne to pja ñaa mehne ti yoarire musare

yahũhtija. ² Tina ñano yũhdũpahta, niñeru maeraina jipahta niñerure cahĩno marieno Æ wanocahre pjacũoinare Jesu yainare. Cristo mehne tuaro wahcheina jia, tina Judea yahpa macainare noano mehne ti cjuare Æ wanocahre. ³ Musare niita nija. Tina ti cjuaro puro wahre. Jierara. Bui curero wahre. Sã sinibasaerapachũta pjacũoinare wahre tina. ⁴ Cohamacũ yainare pjacũoinare tuaro yoadoho dua, “Macedonia macainare tuaro wa duaja sã”, nire tina sãre. ⁵ “Õ puro waahca”, tinare sã ni tũhoturiro bui curero wahre tina. Õ sehe yoahre tina: Wahmanore niñerure ti wahto pano mari puhtoro Cristo to cahmano seheta yoa pahũori jihre tina. Æ yoa tuhsũ, Cohamacũ to cahmano seheta sã cãhũre ño payoa mehne yũhtiri jihre. Æ yoaina jia tina niñerure wahre. ⁶ Ti Æ wa tuhsuchũ ñũna Titore sã sehe õ sehe nihi: “Corinto macainare mũ buhe dũcariro seheta noano mehne pjacũoinare ti wahtore buhe pahũoga”, nihi sã tirore. Musa cãhũ painare pja ñũna, musa yoadohohto sehe Æ nihi tirore. ⁷ Musa sehe jipĩtiare noano yoaina ji tuhsũra: Cristore potocãta noano wacũ tuara musa. Æ jina to yare noano yahura musa. Æ yoa Cohamacũ yare noano masina musa. Æ masina, Cohamacũ to cahmano seheta tuaro yoa duara musa. Æ yoa sãre cahĩna musa. Õ seheta noano yoaina ji tuhsũra musa. Musa Æ noaina jipachuta mahanocã dũhsasinina mini musare. Pjacũoina pinihtare musa pja ñũchũ cahmaja sã. Æ jina jiape nino marieno tinare noano mehne musa pjĩro wachũ cahmaja sã.

⁸ Æ nicũ musare dutii waro nieraja. Æ ni yahũita nija musare. Paina pjacũoinare ti tuaro yoadohorire musare yahui nija. “¿Potocãta pja ñũina jijari musa?” ni masi duai nija. ⁹ Mari puhtoro Jesucristo sehe marine to pja ñũrire masina musa. Tĩ to pja ñũri potocã tũira. Tiro mũnanopũ pjĩro cjuariro jiparota ahri yahpapũ taro pjacũoriro wahari jire. Æ yoaro mari yaro jiborirore yariaro pjacũoriro wahari jire. Õ sehe wahari jire tiro mari sehe to yare pjĩro mari cjuahito sehe, tiro mehne mari Æ jirucuhto sehe.

¹⁰ Musare Æ yahũita nija noaere musa masihto sehe. Õ sehe ni tũhotuja yũhũ sehe pja cjuoinare musa wahtire: Cũ cãhũa wahara pja cjuoinare musa wahtire musa wi-hbori baharo. Tĩ yũhdoro noano yoayuhti musa. Paina ti wa duahto pano musa sehe pjacũoinare wa dua mũhtayuhti. ¹¹ Æ jina musa wa dua mũhtariro seheta mipũre noano waga tinare. Æ yoana pjĩro cjuaina jina, pjĩro waga. Mahanocã cjuaina jina, mahanocã waga. ¹² Tuaro musa wa du-

achũ tíre m̄sa warire Cohamacũ wahchero-hca. Ā jina noho m̄sa wa duaro puro waga. M̄sa wariro purota m̄sa wachũ wahchero-hca Cohamacũ. “Pjac̄oinare wa yũhdoga”, m̄sare nino nierara tiro.

¹³ “Pjac̄oinare waga”, nicũ tinare pj̄iro c̄jua duticũ nieraja. Ā jicũ m̄sa sehere pjac̄oina jichũ yoa duaeraja.

M̄sare c̄no potori c̄jua duticũ Ā nũ nija. ¹⁴ M̄p̄are m̄sa sehe pj̄iro c̄jua. Ā c̄jua paye baro maerainare wa masina m̄sa. Baharo m̄sare paye baro maerachũ tina c̄hũ wa masina m̄sare. M̄sa Ā cahma wana c̄no potori c̄jua nahca jipih̄tina Cristo yaina. ¹⁵ Ō sehe nina Cohamacũ yare ti joari p̄i: “Pj̄iro nariro c̄hũ paina bui curero c̄juaerare. Mahanoc̄a nariro c̄hũ ne mahano-c̄a dahsaerare”, nina Cohamacũ yare ti joari p̄i.

Tito tó mehne macaina mehne Corintopũ wahaha

¹⁶ Ā yoa m̄sare yũ yoadohiro seheta Tito c̄hũ m̄sare yoadoho duara. Cohamacũ sehe m̄sare to yoadoho duachũ yoahre tirore. To Ā yoachũ ñicũ “Noana”, nija Cohamac̄ure. ¹⁷ Titore m̄sa cahapũ s̄a waha dutichũ tiro noano mehne yũhtihre. Tirore s̄a waha dutihto panop̄ta to basita m̄sa cahapũ tuaro waha dua tuhs̄iro jire.

¹⁸ Tirore paio Jesu yairo mehne piti dahrerocahi s̄a tirore. Tito pitire jipih̄tina paina Jesu yaina noano ño payora. Noaa buheare to noano yahuriro jichũ ñua tirore noano ño payora. ¹⁹ Ā jia Jesu yaina tirore cahmahre s̄a mehne to tinino wahahto sehe. Tí niñerure pjac̄oina cahapũ s̄a naachũ s̄a mehne wahahtirore cahmahre tirore. Ā jia tí niñerure s̄a wabasachũ ñua “Marire yoadohiro jira”, niahca masa Cohamac̄ure. S̄a Ā wabasana tinare tuaro mari yoadoho duarire masichũ yoanahca tinare.

²⁰ Ā jina ahri niñerure, pj̄iro Jesu yaina ti warire naabasana, noano ñũ wihbonahca ti warocarire, “S̄are yahus̄ari”, nina. ²¹ Mari puhtoro to ñurocaroi quih̄no, noano yoa dua ja s̄a. Masa ti ñurocaro c̄hũre quih̄no yoa dua ja.

²² Ā yoana tana paireore mari coyeirore warocanahca Tito c̄hũ mehne. S̄a piti dahrerocarirore payũ tahari painare to noano yoadohochũ ñũhi s̄a. Ā jiro m̄p̄are m̄sa sehe painare m̄sa yoadoho duachũ ñũno tiro tó pano to yoariro yũhdoro noano m̄sare yoadoho duara. ²³ Tito sehere m̄sare yahuihtja. Tiro yũ piti jira. M̄sare yũ yoadohochũ tiro yũhũ mehne dahrariro jira. Paina tiro mehne wahahtina Jesu yaina ti beserina ti warocarina jira. Tina Cristo yare yoara paina tirore ti ño payohto sehe. ²⁴ Ā jina cah̄a mehne noano mehne

tinare piti bocaga m̄sa. M̄sa Ā yoachũ ñua paina Jesu yaina sehe m̄sa cah̄are masiahca. “Noano piti bocaahca Corinto macaina”, ni yahu tuhs̄hi painare. M̄sa Ā noano piti bocachũ ñua ti s̄a yahuri cjiri quih̄no ti jichũ masiahca paina Jesu yaina.

9

Jesu yainare pjac̄oinare ti wahtore yahuha Paulo

¹ Ā yoana Cohamacũ yainare m̄sa yoadohore m̄sa wahtore masi tuhs̄ra m̄sa. ² Painare m̄sa yoadoho duaare masija yũhũ. Ā masicũ Macedonia yahpa macainare ō sehe ni yahui: “Corinto macaina, ti ya yahpa Acaya yahpa macaina c̄hũ Jesu yaina sehe painare yoadoho dua tuhs̄hre. Cũ c̄hũma yũhdara ti yoadoho duariro”, ni yahu tuhs̄hi tinare m̄sare. M̄sa Ā yoadoho duachũ tuhoa payũ tina c̄hũ pjac̄oinare yoadoho duahre.

³ M̄sare Ā ni yahuriro jicũ m̄p̄are ahrinare mari coyeare m̄sa cahapũ warocai tai nija, Macedonia yahpa macainare yũ yahuriro seheta m̄sa yoalto sehe. Ā jicũ pjac̄oinare m̄sa wahtore m̄sa cahmachu m̄sa c̄jua yuhto sehe ahrinare warocai nija. ⁴ Tinare warocaeracũ Macedonia yahpa macaina mehne m̄sa cahapũ s̄icũ, m̄sa wahtire m̄sa c̄juaerachũ ñicũ buo tis̄boa yũhũ m̄sare. “Pjac̄oinare waahca”, m̄sare yũ ni tuhoturi baharo m̄sa waerachũ ñicũ buo tis̄boa yũhũ. M̄sa c̄hũ buoro yũhduboa. ⁵ Ā jicũ m̄sa cahap̄re yũ suhto pano tinare mari coyeare waroca muhtai nija. “Pjac̄oinare wanahca”, pano m̄sa nirire m̄sa c̄jua yuhto sehe tinare waroca muhtai nija. M̄sa wahtire m̄sa cahmachuchũ tina sehe m̄sare yahu quih̄ohca. M̄sa wahtire m̄sa c̄jua yu tuhs̄chũ wahchea mehne m̄sa wa duarire masiahca jipih̄tina. M̄sare s̄a wa dutiri jisi tí. M̄sa m̄ s̄aro m̄sa wari jahca.

⁶ Ā jina ahrire wacũga m̄sa: Mahaa yaparic̄a toariro mahaa pocac̄a nanohca. Payũ yapari toariro payũ poca nanohca. (Tó sehe jira pjac̄oinare mari wachũ. Mahanoc̄a mari wachũ, Cohamacũ mahanoc̄a warohca marine. Pj̄iro mari wachũ, pj̄iro marine warohca.) ⁷ Ā jina c̄aina m̄sa “Ō puro wahahtja”, ni waga. Niñerure cah̄no marieno waga. “Marine wa dutire”, nino marieno waga. Wahchea mehne wainare cah̄na Cohamacũ. ⁸ Tiro sehe m̄sa cahmano yũhdoro m̄sare warohca. Ā jina jipih̄tia m̄sa cahmarire dahsaro marieno c̄jua pah̄onahca. Ā jia painare m̄sa wachũ c̄hũre noano m̄ s̄ahca m̄sa c̄jua. ⁹ Ō sehe nina Cohamacũ yare ti joari p̄i: “Pjac̄oinare pj̄iro wara Cohamacũ.

Noano mehne masare ã yoarucura tiro”, nina to yare ti joari pũ. ¹⁰ Æ jiro toaa dicha tiri baharo toariro to toahti capare wara Cohamacu. Baharo to toarire dicha tichu yoara to chuhtire. Pjacuoinare musa pjiro wachu toariro to wariro seheta musa cãhure pjiro warohca Cohamacu. Tô sehe dihta musare warohca pjacuoinare musa wa namohto sehe. ¹¹ Æ tjira. Pjiro warohca musare painare pjiro musa ã waruculto sehe. Æ jia musa warocari niñerure pjacuoinare sã wachu payu tina sehe Cohamacure wahchea mehne “Noana”, niahca. ¹² Æ yoana pjacuoinare Cohamacu yainare wana, tinare yoadohora musa. Æ yoadohona wahchea mehne Cohamacure “Noana”, ti nichu yoanahca musa. ¹³ Æ painare musa yoadohochu ñna, Cohamacure ño payoa mehne durucuahca masa. Tinare paina cãhure pjiro musa wachu ñna Cohamacure “Noa yuhduariro jira”, niahca masa. Ô seheta niahca Cristo ya buhea noaa buhea ti niriro seheta musa yoachu ñna tinare musa wachu ñna. ¹⁴ Æ jia Cohamacu musare tinare to wa dutichu musa sehe tinare musa pja ñychu tina sehe musare cahã mehne sini payoahca Cohamacure. ¹⁵ Cohamacu marine noa yuhduaro yoara. To ã yoarire masina “Noa yuhduaro yoara”, nijihna mari tirore.

10

Jesu buhe duti to cũriro to jiare yahuha Paulo

¹ Mipure yuhu Paulo, musare yahuihtja. Cãina musa mehne macaina ô sehe nina yuhure: “Mari mehne jiro painare yuhduarica duaerario, wiho jiriro yoaro sehe jira. Æ jiparota pa seheru jiro marine cuiro marieno tuhtirocara”, nina musa cãina yuhure. Cristo sehe ne suaerario, masare noano yoariro jira. Tiro yoaro seheta yuhu cãhu ji duaja. ² Æ jicu musare ahrire tuaro mehne yahuihtja: Musa caharu yu suchu noano yoaga musa “Paulo sãre tuhtiri”, nina. Cãina yuhure ô sehe nina: “Tiro to mu saro, Cohamacu to dutiro marieno yoara”, nina yuhure cãina. Tô sehe niina pinihtare tuhtiboca yuhu. ³ Sã cãhu ahri yahpa macainata jina nija. Æ jipanahta ahri yahpa macaina ti mu saro ti yoaro sehe yoajeraja sã, Cohamacu dutiare yoana. ⁴ Surara cahma wajã ti yuhduaricario seheta sã sehe ñaare yuhduarica duaja. Tí ñaare yoa duaeraja. Sã ã yoachu sã wamoa ahri yahpa macaina ti wamoa yoaro sehe jierara. Surara ti wamoa ti cãaro seheta sã sehe Cohamacu to tuaare cãaja. Tí tuua mehne Cohamacure cahma dutierainare cohãja sã. Masa ti mu saro

ti masiare ti yaba cjihti jierachu masichu yoaja sã tí tuua mehne. ⁵ Tuhsu, jipihtina yuhduarica duainare, ti musaro tuhutuinare, Cohamacure masi dutieraina sehene duhuchu yoaja sã. Æ yoa tí tuua mehne Cohamacure cahmaerainare Cristore noano yuhtiina ti jichu yoaja sã. Cristo to cahmano seheta tinare tuhutuchu yoaja sã. ⁶ Æ yoa, paina musa mehne macaina Cristore ti yuhduaricachu ñna tinare buhiri dahrenahca sã. Musa sehe musa noano yuhtiri baharo Cristore yuhduaricainare ã buhiri dahrehtinata jinahca sã.

⁷ Yu pjacu dihtare masina musa. Yu jia tia sehene ne masierara musa. “Cristo yaina jija”, niina jina, ô sehe masiga musa: Sã cãhu musa yoaro sehe Cristo yaina tjija. ⁸ “Mari puhtoro ya buheare noaa buheare buhe dutiro, cãre sãre”, nicu payu tahari musare ã ni yahupaihta buo tieraja yuhu. Sãre ã buhe dutiro musare yoadohutinare cãre sãre. Musare dojomehnehtinare cãno nierare sãre. ⁹ Ô seheta poto ni yahuja musare “Cuiiri”, nicu. Ahri yu joarocari pãre ñna musa ñu cuachu cahmaeraja. ¹⁰ Cãina musa mehne macaina ô sehe nina: “Paulo joarocaro tuhtiriro yoaro seheta joaroca mujana marine. Æ jiriro jiparota mari mehne jiro ne ã jica nierariro jira. Pjacuoriro yoaro sehe jira. Æ jia, marine to durucua yaba cjihti jierara”, nina cãina. ¹¹ Tô sehe niinare ô sehe ni yahuihtja: “Ô seheta yoanahca”, sã ni joarocario seheta tô seheta yoanahca sã, musa cahai jina.

¹² Cãina musa mehne macaina “Noano masi pahñoina jija”, ni durucura ti basi. Cuenah, noacaro masiina jijari tina ã ni durucua. Sã sehe ti yoaro sehe ne ã ni durucusi. Tí basi cahma ñu piti boca “Mari sehe noa yuhduaricaina jija”, nina tina ti basi. Tũho masieraina jira tina. ¹³ Sã sehe tina yoaro sehe yoasi. Cohamacu sãre buhe dutiro to cãri dihtare yahuja sã sehe musare. Paina ya dahraare “Yoahi”, nina nieraja. Tiro musare buhe dutiro sãre cãre. ¹⁴ Ô sehe nina, mahñona nieraja sã. Noaa buheare Cristo yare musare buhe muhtana suhi sã. Æ jina Cohamacu sãre buhe dutiro to cãri dihtare buhena nija musare. ¹⁵ Æ jina paina ya dahraare “Sã sehe tire yoahi”, ne nieraja sã. Wiho mejeta Cristore musa wacũ tua namochu cahmaja sã. Æ cahmana musare buhe namo duaja sã. Æ buhena Cohamacu to dutiriro purota buhe duaja musare. ¹⁶ Æ yoa musa ya yahpa yuhduaropu noaa buheare yahuna wahanahca. Æ wahanana paina ti buheri baharo suna, “Sã buhehi”, nisi sã.

¹⁷ Mari yoare “Sãta yoaja”, nieraro cahmana. Mari puhtoro Jesu to yoaa sehene ñna wahchero cahmana. Tí se-

here painare yahuro cahmana. ¹⁸ Masa ti basi “Sã sehe yoahi”, ti nichu ji coarera Cohamacu. Mari puhtoro Cristo “Ahrina noano yoare”, to niina sehere ji coara Cohamacu.

11

“Jesu to cūrina jija sã”, ni mahñoinare yahuha Paulo

¹ Yu jia tiare yahucu tuho masierariro yoaro sehe yahui nija. Å yahuriro yu jipachuta yuhare tuhosiniga masa mipare. ² Cohamacu musare to cahño seheta tuaro cahija yuhu cūhu musare. Cristo yare musare yu buhechu tuhona tiore wacū tua ducare masa. Å jicu ahrire nija musare: Manu tihticoro to manano cjihto dihtare to cahño seheta, Cristo sehere tuaro cahiga painare masa cahiro yuhdoro. Tó sehe yoaina ñaa buhiri tia marieina masa jichu musare Cristore wa duaja to yaina cjihtire. Tó sehe jijnare, “Tinare mahure waihtja”, nihi Cristore. ³ Paina ñaina musare mahñoa, soro jia buheare cahmachu yoaboca musare. Agã Evare mahñoa to masia mehne ticorore Cohamacare to yuhduracachu yoari jire panopare. To å yoariro seheta mipare ñaina musare mahñoa, Cristore musare noano ño payoerachu yoaboca. Å jicu musare cuisaja. ⁴ Tina “Õ sehe jiriro jira Jesu”, ti mu soro soro ni ti mahño buhepachuta tuhoyuhca masa. Musare sã buheriro sehe jierapachuta musare mahño buheinare tuhoyuhca masa. Tuhsu, “Õ sehe jiriro jira Espiritu Santo”, ti mu soro soro ni ti mahño buhepachuta tuhoyuhca masa. Musare sã buheriro Espiritu Santo waro jira. Tiro sehere quihõno ti yahuerapachuta musare mahño buheinare tuhoyuhca masa. Tina soro jia buheare ti mahño buhechu noaa buheare ti buherapachuta tīre tuhoyuhca masa. ⁵ Masa mehne macaina “Jesu to cūrina jija”, nimarina yuhare masi yuhduracaerara. Tinare docaracaeraja yuhu. ⁶ Noano yahu mihniro jieraboca yuhu. Noano yahu mihnierapaihta Cohamacu yare noano masija. Yu å masiare payu tahari musare noano masichu yoahi.

⁷ Noaa buheare Cohamacu yare musare buhecu ne wapa cahmaerahi. Musare yoadoho duacu wapa cahmaerahi. Wiho jiriro yoaro sehe jii yuhu. ¿Yu å wapa cahmaerachu noajerari, masa tuhotuchu? ⁸ Musare yu buhechu paye macari macaina Jesu yaina yuhare niñerure ware. Ti å wachu ti niñerure ñahai sinino marieno musare buhei tai. Masa sehe yuhare masa waborirore tina sehe yuhare ware. ⁹ Masa mehne jicu paye baro yuhare duhsapachuta musare niñerure

ne sinierahi. Mari coyea Macedonia yahpa macaina Jesu yaina jipihtia yu cahmarire na wihire yuhare. Panopare musare ne cariboerahi yuhu. Baharopu cūhure musare ne caribosi. ¹⁰ Cristo potocāta to yahuriro seheta yuhu cūhu mipare musare potocāta yahui nija. Jipihtiro Acaya yahpai jijnare ahri musare yu sinierari cjiire å yahurucuihtja. ¹¹ ¿Musare yu sinierari cjiire painare yu å yahurucuhu tuhona, dohse ni tuhotujari masa? “Paulo å ni yahuro sãre cahieraro nina”, ¿ni tuhotujari masa? Jierara. Musare cahija. Musare yu cahiare Cohamacu masina.

¹² Wapa cahmano marieno musare yu buhe ducariro seheta sohtori tihtja. Yu buheri wapa yu wapa nachu ñaa tina “Jesu to cūrina jija”, ni mahñoina õ sehe niboca: “Paulo noaa buheare buhero, wapa nana. Å jina sã cūhu to yoaro seheta yoaja”, niboca tina “Paulo yoaro sehe yoaja sã”, ni dua. “Å niri” nicu, wapa cahmano marieno buheihtja musare. ¹³ Tina potocāta Jesu to cūrina waro jierara. Tinare ne cūerare tiro. “Jesu to cūrina jija”, ni mahñoa, sã yoaro seheta jimana. ¹⁴ Ti å mahñoina jichu masi tuhsuja yuhu. Satana cūhu noariro yoaro sehe cohtota mujana. Tiro anjo si siteriro yoaro sehe ji duaro cohtotamana. ¹⁵ To å yoariro jichu masicu Satana yaina “Jesu to cūrina jija”, ni mahñoina Cohamacare yoadohoina yoaro sehe ti mahñoina jichu ñacu, mahñoina ti jiare masi tuhsuja yuhu. Å mahñoina ti jichu ñano, pihtiri dacho jichu jipihtia ti ñano yoari buhirire buhiri dahrehocah Cohamacu tinare.

To ñano yuhdurire yahuha Paulo

¹⁶ Pari turi ahrire musare yahuihtja. Ne “Tuho masierariro jira”, yuhare niena tjiga. Yu å ni dutierapachuta yuhare masa å ni tuhotuchu noanohca yuhare. “Tuho masierariro jira”, yuhare ni tuhotupanahta tuhosiniga masa yuhare. Mahanocã yu jia tiare yu yahucha tuhoga masa. ¹⁷ Musare å yahucu tuho masierariro yoaro sehe yoai nija. Mari puhtoro Jesu yuhare “Mu basi mu jia tiare yahuga”, nierare yuhare. ¹⁸ To å nierapachuta ahrire yahuihtja musare. Ti mu soro “Noaina jija”, niina payu paina ti jichu ñacu yuhu cūhu yu jia tiare musare yahuihtja. ¹⁹ Masa sehe tuho masierainare tuhona wahchea mehne ñuyuhca masa tinare. Noacar masiina jijari masa sehe å tuhona. ²⁰ Musare cahamaca ti dahrechū, musare ti wapa cahmachu, masa yare ti machu, å ñnocahna masa. Å yoa musare ti doca dahrechū, masa wahsupurire ti cjachu, å tuhotunocahna masa. ²¹ Noacar yoajari musare tina. Cue, masare yuhduracaina jijari tina. Sã sehe tina yoaro sehe yuhduracaina jieraja.

Ā jina tina yoaro sehe yoaeraja. Tina yoaro sehe jierapaihta tina “Ō sehe jina jija”, ti nichu tuhocu yuhu cūhu āta ni yahuboca. Pari turi tuho masierariro yoaro sehe yoacu, ō sehe ni yahuihtja musare tjoa. ²² Tina “Hebreo masa jija”, nina painare yuhduruca duaa. Hebreo masanota jimaja yuhu cūhu. “Israe masa Cohamacu to bese-rina jija”, nina tina tjoa. Ti yoaro seheta to beserirota jimaja yuhu cūhu. “Abrahā cjiro panamana ji turaina jija”, nina tina tjoa painare yuhduruca duaa. Ti yoaro seheta Abrahā panaminota jimaja yuhu cūhu. ²³ “Cristo cahamaca jija”, nina tina tjoa. Yuhu cūhu Cristo cahamacnota jija. Tina yuhdoro Cristo yare noano yoaja yuhu. Cuenah, ā nicu tuho masierariro yoaro sehe durucui nija. Tina yuhdoro tuaro mehne dahrai yuhu Cristo yare yoacu. Payu tahari tina yuhdoro Cristo yairo yu jiri buhiri peresu yoare paina yuhare. Tina yuhdoro payu tahari tjanare yuhare masa. Tina yuhdoro Cristo yairo yu jiri buhiri payu tahari masa yuhare wajā duamare. Ti ā wajā duachu mahanočā yuhdi yuhu ti wajāboriro. ²⁴ Cinco tahari judio masa yuhare űahare. Yuhare ti űahape tahari treinta y nueve tahari yuhare tjanare. ²⁵ Tia taha paina yuhare űahare. Ā űahaa tina pinihta yuhare űano yucuri mehne cĵare. Pa tehe yuhare paina tĵa mehne docare. Tia taha dohoriah mehne tĵacaru doca wahā su, minii. Ā jicu cĵa dacho, cĵa űami pjiri ma dacho macapure ba pahai. ²⁶ Payu tahari macaripure buhe tiniu sui. Yu ā buhe tinichu cua yuhduare yuhare. Yuhare nu miniiho cua nire. Yuhare yacahto cua nire. Yu ya dihta macaina judio masa, judio masa jieraina cūhu yuhare űano yoahito cua nire. Macaripu, masa marienopu, pjiri mapu cūhure yuhare nu yariahto cua nire. “Mañu mehne macaina jija”, ni mahñoina cūhu yuhare űano yoahito cua nire. ²⁷ Cristo yare yoacu tuaro dahraa tii. Ā dahracu űano wahyaa tii. Payu tahari yuhare wajo űano puripachuta ā dahrarucua tii. űano jua baa tii. Ā yoa űahma yapioro jia tire yuhare. Payu tahari chua bocaeraa tii. Yu suhti sābooa cūhu ne mariea tire yuhare. Ā yoa yuhare yusua yuhdua tire.

²⁸ Ō sehe űano yuhdupaihta dachoripe jipihitna paina Cristo yainare, musa cūhure pjiro wacū tuhoutuja. ²⁹ Ā jicu cūiro Cristo yairo to ā jinocariro to jichu űacu cahyaja. Paina Cristo yairore űano yoa dutiboca. Ti ā yoachu űacu Cristo yairore cuisāacu, tina űaina mehne suaja. ³⁰ Yahu duagarapaihta yu jia tiare yahui tacu, yu mu saro wiho jiriyo yu jia tiare musare wahchea mehne yahuja. ³¹ Cohamacu mari puhtoro Jesu pucuro dachoripe mari űo payohtiro tirota musare

yu mahñoerachu masina. Ahrire musare quihōno yahuihtja. ³² Damasco wama tiri macapu yu jichu űano, cūiro puhtoro yuhare űaha duamare. Jipihitna masa bui puhtoro Areta wama tiroto docai jiriyo puhtoro pinihta yuhare űaha duamare. Ā űaha duaro ti maca macari sahrino, tĵa mehne ti yoari sahrino macaa sopacaripe surarare cohta dutiri jire. ³³ Ti ā cohtaro watoihita yuhu mehne macaina pjiri puharopu yuhare duhu sāa, ti sahrino macari sopacacāpu yuhare duhu borore. Ti sahrino baharo bahusehepu yuhare duhu borore. Ti ā duhu borori baharo duhti wahcāa wahai.

12

Cristo Paulore to űorire yahuha Paulo

¹ Yu jia tiare wahchea mehne yu yahuchu yaba cjihti jierara. To ā jipachuta yu jia tiare yahu namoihtja musare. Mari puhtoro Jesu yuhare to űorire to masichu yoarire yahuihtja musare. ² Ō sehe űo ducare tiro yuhare: Catorce cahmari waro wahara yuhare Cristo yairore muanopu to naa mĵari baharo. Muanopu űahpichoha buiru yuhare naa mĵare. Yu tuhoutua dihtare to naachu masieraja yuhu. O yu pjacu cūhure to naachu ne masieraja. Cohamacu dihta tĵe masina. ³⁻⁴ Ā jiro paraiso wama tiropu naa mĵare yuhare. Yu tuhoutua dihtare to naachu masieraja yuhu. O yu pjacu cūhure to naachu masieraja. Cohamacu dihta tĵe masina. To ā naa mĵachu sucu tōpate to yahuare tuhoi. Ti yu tuhorene masa ne masierara. Ti to yahirire marine yahu dutierara. ⁵ Tō sehe yuhare to űorine musare yahucu, “Yuhu cūirota painare yuhdurucariro jija”, nibo yuhu. Ā nieraja yuhu. Yu mu saro masierariro yu jiare űano yuhdaro, wiho jiriyo yu jiare wahchecu musare yahuihtja. Ti dihtare wahchecu musare yahuihtja. ⁶ “Painare yuhdurucaja”, musare ni yu yahu duachu yu niri cjiri potocā tĵiboa. Tō sehe ni yahucu tuho masierariro jieraboa yuhu. Wiho mejeta “Ō sehe painare yuhdurucaja”, ni yahusi yuhu musare, “Cua pisaro choro yuhare űari”, nicu. Yuhare űu masina űo payora musa. Musa ā űo payopachuta ti yuhdoro yuhare musa űo payochu cahmaeraja. Yu yoarire űano, yu niriűe tuhona quihōno musa űo payoriro yuhdoro yuhare musa űo payochu cahmasāeraja musare.

⁷ Cristo noa yuhduare muanore yuhare to űochu űuriro jicu, “Painare yuhdurucaja”, niboca yuhu sehe. Ā yu nierahito sehe Satana yu pjacure to duti dahrechū űano “Noanohca”, niri jire Cohamacu. Yuhare duti dahreri jire Satana yuhare űano wahachu yoaro. Ahri dohatiűo potaca sāano

to purino seheta yuhare purina. ⁸ Ō yu dohatirore yuhare yuhdo dutica sinia timai Cristore mari puhtorore. Tia taha sinia timai. ⁹ Ō sehe ni yuhitia tire yuhare tiro: “Ō mu dohatiro pinihtare muhare yuhduchu yoasi yuhu. Ā muhare yuhdoerapaihita muhare cahija. Yu cahia mehne noano jihca muhu. Dohaticu nāno yuhdariro, wiho jiriro jicu yu tuare noano masichu yoaihca muhu. Tuaina yuhdoro muhu sehe yu tuare masare masichu yoaihca”, ni yuhitia tire tiro yuhare. To ā nichu tuhocu nāno yuhdariro, wiho jiriro yu jiri cjirire masichu wahcheja. Ā jicu nāno yuhdariro, wiho jiriro yu jiare musare wahchea mehne yahuihca. Ō seheta ni yahuihca Cristo to tuua mehne yu noano jiare musa noano nu masihtu sehe. ¹⁰ Ā jicu Cristo yairo yu jiri buhiri yuhare purichu wahcheja. Paina nāno yuhare ti ni durucuchu, nabiario yuhduchu wahcheja. Yuhare ti nāno yoarucuchu, nāno yuhduca Cristo tuua mehne cāno pjaja tirore wacu tuacu. Ā jicu wahcheja.

Corinto macainare Cristo yainare pjiro cahya tuhoutuha Paulo

¹¹ Yu jia tiare yahucu taho masierariro yoaro sehe yoahi yuhu. Yu ā yahupachuta ti musa ya buhiri jira. Musa sehe yu jia tiare painare noano yahuboa. Yuhu yu mu suro jicu yaba cjilhti jieraboa yuhu. Ā jiboriro jipaihta “Jesu to cūrina, masi pahñoina jija”, ni mahñoinare docaracaeraja yuhu. ¹² Potocāta nāno yuhdariro jipaihta Cohamacu tuua mehne yoa nōmai musare. Ā nocu Jesu to cūriro yu jiare nōi nimai musare. ¹³ Ō seheta yoamai. Paye macari macainare Jesu yainare musa cūhare cāno potori yoaa timai yuhu. Wiho mejeta musa dihtare cariboerahi. Musā dihtare paye barore sinierahi. ĆYu ā sinierachu nāa nijari, musa tuhotuchu? Tī nāa jichu ti nāare boga musa yuhare.

¹⁴ Pua taha musa cahapu yu suri baharo pari turi waha duaja tjoa. Tōpu sacu musare caribosi yuhu. Paye barore sinisi yuhu musare. Musā yare cahmaeraja. Cristo ya sehere musa yuhitiina jichu cahmasāja yuhu. Masa pohna sehe ti pucsumare ti cahmaare waerara. Ti pucsuma sehe ti pohna cahmaa sehere wara. (Tō seheta musa yu pohna yoaro sehe jiina yu cahmaa sehere wasi musa.) ¹⁵ Ā jicu yuhu pinihta yu cjuua sehere wa duaja musare yoadohocu tacu. Musā cahamacu no yoaro sehe ji duaja musare yoadohocu tacu. Musā sehere yu ā tuaro cahipachuta yuhare musa sehe pjiroca cahina, yu tuhotuchu.

¹⁶ Ā jicu musa mehne jicu musare cariboerahi. ĆPotocā tjjjarita, musa tuhotuchu? Wiho mejeta cāina musa mehne macaina ō

sehē niboca: “Paulo paye baro marine na duaro mahñore marine”, niboca. ¹⁷ ĆMusa ā niriro seheta yoariro jicu, dohse tīre yoari yuhu, musa nūchu? ĆMusa cahapu yu warocarina yaba barore yuhare mahño mabasari tina musare, musa nūchu? Mahño maerari jire tina. ¹⁸ Sohō jiri pjapu musa cahapu Titore waha duti tuhsahi tirore. Ā jicu pairore Cristo yairore tiro mehne piti dahre warocahi. ĆTito paye barore musare mahño mari, musa nūchu? Mahño maerari jire. Tiro yu yoaro seheta Cohamacu to cahmano seheta yoariro jira. ĆĀ jiro yu yoaro sehe yoareri tiro, musa nūchu? Yu yoaro seheta yoari jire.

¹⁹ “Nāno yoaeraja sā”, ni ducātana nieraja sā. Cristo yaina jija. Ā jina Cohamacu to nūrocaroi musare yahuna nija. Yu coyea, yu cahina, musare yahui musa sehere yoadoho duana. Musare yahuna, sā sehere musare cahmachu yoana nierahi. ²⁰ Tōpu yu sachu yu cahmano sehe yoaina jieraboca musa. Ā jicu musare tuaro cuisāaja. Ā yoa musa cahmano sehe yoariro jieraboca yuhu cūhu, tōpu sacu. Soro musa yoachu nūcu yahuihca musare. Tōpu yu sachu musa sehe cahma sayoina, painare pahsu tiina, nāco suainerina, musa mu suro painare yuhduraca duaina, painare nāno durucuina, nāa quiti dahreina, “Painare yuhduracaja” niina, musa cahmachunore dojomehneina jiboca musa. Ā jina musa jirore dojomehneina niboca musa. “Tīre yoari” nicu, cuisāaja yuhu musare. ²¹ Tōpu yu sachu musare yuhare buo tisāachu yoaboca Cohamacu. Jipihitnare panopu nāno yoinare, ti nāare cahyaerainare nūcu tuaro cahyaihca yuhu. Numia mehne nāno yoinare, muā mehne nāno yoaa numiare, wuana tiinare, nāare goa pjainare nūcu cahyaihca yuhu.

13

Paulo yahu batoaha

¹ Mipure musa cahapu wahacu tia taha suihca tōpure. Pua taha tōpure su tuhsui. Ō sehe nina Cohamacu yare ti joari pūi: “Cūirore mari buhiri dahrehto panio tiaro tirore yahusāno cahmana. Tiaro mariachu pūaro tirore yahusāno cahmana. Ti ā yahusāri baharo buhiri dahre masija mari”, nina Cohamacu yare ti joari pūi. ² Panopure nāno yoaina cjiri musa jichu musare, jipihitina paina cūhare ahrire cuaro mehne yahui. Cū taha musa cahai pari turi sacu musare ahrire yahui. Mipure musa mehne jieracu pari turi musare ahrire yahuro-caihtja tjoa: Mipure musa cahapure sacu, panopu nāno yoinare paina cūhare potocāta buhiri dahreihitja yuhu. ³ Yu ā yoachu

ñuna, Cristo to cūriro yu jia tiare to tuaa mehne yu buherire masinahca mūsa, mūsa masi duariro seheta. Cristo sehe mū sare dutiriro tua yuhduracu sūriro jira. Ā jiro to tuaare ñona mū sare. ⁴ Mari yoaro sehe piacu tiro, to tuaare ñoaeraro tiro wiho jiriro yoaro sehe crusapu yariari jire. Ā yariaparota Cohamacu to tuaa mehne catiriro jira tiro mipare. Tiro crusapu jiro wiho jiriro to jiriro seheta sā cūhu wiho jiina jija. Ā jipanahta Cohamacu tuaa mehne jinahca mū sare yoadohona tana.

⁵ Ā yoa mūsa sehe cāina mūsa basi ō sehe ni tuhotuga: “¿Potocāta Cristore wacū tuajari yuhu?” ni tuhotuga mūsa cāina. “¿Potocāta Cristo to cahmano seheta jijari yuhu?” ni tuhotuga mūsa cāina. Mūsa ā jierana to yaina waro jierara mūsa. To yaina waro mūsa jichu Cristo mūsa mehne jiro nina. ¿Tíre masierajari mūsa? ⁶ Sā sehe “Jesu yaina, to yare yahu duti to cūrina jija”, ni mahñoina jieraja. To yaina, to cūrina waro jija sā. Tíre mūsa masichu cahmaja yuhu. ⁷ Ā jicu mūsa ñano yoerahto sehe Cohamacure sini payoja mū sare. Āta sini payoja sā noaare, Cristo yare mūsa yoahito sehe. Mūsa ā yoachū ñuna sā ō sehe niboca: “Corinto macainare buhena, quihōno buhei sā”, niboca sā painare sāre ño payo dutina. Ā ño payo dutieraja sā. Tí yaba cjihti jierara. Ā jina Cohamacure sini payona, mūsa ya cjihtire sini payona nija. Paina sāre “Mahñoina jira”, ti nipachuta noaare, Cristo yare quihōno mūsa yoachū pinihtare cahma yuhduaja sā. ⁸ Ō sehe dihta mūsa noaare yoachū cahmasāja sā. Cristo yare, potocā jiare soro ni yahu masieraja sā. ⁹ “Cristo cahmaare yoerara mūsa”, ni mū sare yahusā masierana, wiho jiina yoaro sehe jiboca sā, mūsa ñuchū. Noanohca. Noaare, Cristo yare yoana mūsa sehe wiho jiina jierara. Mūsa ā jichū ñuna wiho jiina yoaro sehe sā jipanahta wahcheja. Ā jina Cristore wacū tuaina, noano yuhtiina mūsa wahahtore Cohamacure sini payona nija sā mū sare. ¹⁰ Ā jicu mūsa mehne jieracu mū sare ahri tjure joarocayui nija. Mūsa cahapu sūcu, ñano yoaina mūsa jichū ñucu mū sare buhiri dahrehtja. Cristo yuhure to dutiriro seheta mū sare buhiri dahrehtja. Yu ā buhiri dahrehta sehe ahri tjure mū sare joarocayui nija. Cristo yuhure to dutiriro seheta mū sare yoadohotirota jija. Mū sare dojomehnehtiro jieraja.

¹¹ Mipare yu coyea, ahrire yahu batohitja mū sare. Noano wahcheina jirucuga mūsa. Cristore wacū tua namoga. Ā yoana noaina, tirore yuhtiina jiga. Mūsa mehne macaina mehne cāno mehne jiga. Mūsa basi noano mehne jiga. Mūsa ā jichū ñano

mūsa mehne Cohamacu jirohca. Tiro marine cahma cahichu yoariro, marine noano mehne jichu yoariro jira. ¹² Ā yoana mūsa mehne macainare noano mehne piti bocasiniga. ¹³ Jipihtina ō macaina Cohamacu yaina mū sare noa dutira.

¹⁴ Mari puhtoro Jesucristo mū sare to cahña mehne, Cohamacu cūhu mū sare to cahña mehne Espiritu Santo mūsa mehne jirucuriro to yoadohoa mehne noano jiga mūsa.

Gálatas

Galacia wama tiri yahpa macainare Jesu yainare joarocaha Paulo

¹ Yuhna Paulo, Cristo yare buhe dutiro to cūriro jija. Masa ti cūriro jieraja yuhna. Á yoa masa sehe yuhare Cristo buhe dutiro to cūhtore yuhare yahuerare. Cohamacu Jesu Pucuro sehe Jesure yariarore masoriro yuhare cūre to yare buhehtirore. Jesucristo cāhu yuhare cūre. Ti ā cūriro jicu ahrire joarocaja musare. ² Yuhna musare Jesu yainare Galacia yahpa macainare noa dutija. Yuhna mehne macaina Jesu yaina cāhu musare noa dutira. ³ Cohamacu mari Pucu, mari puhtoro Jesucristo mehne musare noa dutija. Cohamacu to yoadohoa mehne noano jiga musa. ⁴ Tiro Jesucristo sehe mari űaare yoari buhirire yariari jire. Mipure masa ti űaare yoari dacho jira. Á jiro ahri dacho barolhta tiro yariari jire Cohamacu mari Pucu to cahmariro seheta marine yuhduchhu yoaro taro. Á to yuhduchhu yoachhu űaare mipure ti yoariro seheta yoa duasi mari. ⁵ Á yoa jipihitia dachoripe tirore mari Pucure űo payojihna. Áta yoajihna.

Cohamacu masare to yuhduchhu yoahiti buheha cānota jira. Paye buheapu mariahna

⁶ Cristo musare cahino to yaina cjihtire musare cūre. Á jicu musare cūriro yare cohāna, soro jia buheha sehere dói musa cahmachhu űu caaa wahaja yuhna. ⁷ Paye buheha noaa buheha yoaro sehe jia buheha waro jierara. Ti ā jierapachuta cāina musa cahai jiina musare cariboa, soro jia buheare buheha, noaa buheare ni dojomehne duara.

⁸ Á yoa musare sā buhe mahtari cjirire mari cohāchhu soro jia buheha sehere mari buhechhu Cohamacu marine buhiri dahre-jaro. Tuhsu, anjo musano macariro ā to buhechhu tiro cāhure buhiri dahre-jaro Cohamacu. ⁹ Pano sā niriro seheta mipure pari turi nihtja tjoa: Cāiro musare sā buherire cohāno, soro jia buheare to buhechhu Cohamacu tirore buhiri dahre-jaro.

¹⁰ Á nicu “Tiro dihta noano buheriro jira”, yuhare ni dutii nieraja. Cohamacu sehe yuhare “Noano buhere mahhu”, to nichu cahmaja. Masare wahchechhu yoacu tacu soro jia buheare buheboa yuhna. Á buhecu ne Cristo cahamacano jieraboa yuhna.

Paulo Cristo to buhe duti to cūriro to ji ducarire yahuha

¹¹ Yuhna coyey, ahrire musa masichhu cahmaja yuhna: Noaa buheare yu buheri cjiri masa ya buheha jierara. ¹² Tí buheha masanore yu tuhori jierara. Á jia paina masa yuhare ti

buheare yahuerare. Jesucristo sehe yuhare ti buheare masichhu yoare.

¹³ Panopure yu coyey judio masa ti yoa tiro sehe yu yoariro jichhu masina musa. Ō sehe yoa tii yuhna: Jesu yainare tuaro űano yoacu tinare noano wajā pahñonoca duamai. ¹⁴ Sā űuchusuma ti buherire tuabiaro yoa duacu yu coyey yu cāno potori bucuarina yuhdoro yoa mahtariro jia timai yuhna. ¹⁵ Yu ā jiriro jipachuta yu masa bapuahto pano Cohamacu yuhare bese tuhsari jire. Á jiro yuhare cahino tiro to yairo cjihto, to cahamacano cjihto cūre yuhare.

¹⁶ Á yoa to cahmano seheta to macunore yuhare masichhu yoare to yare noaa buheare judio masa jierainare yu buhehti cjihtire. To ā yoachhu “¿Dohse ni buhero cahmacari yuhare?” ni masare sinitu űuerahi yuhna. ¹⁷ Á yoa Cristo to cūrina yu pano jirina cahapure Jerusalēpure sinitu űui wahaerahi. Arabia yahparu wahai yuhna. Á jicu Damas-coru majare wihii tjoa.

¹⁸ Tia cūhma baharo Pedrore űucu wahai yuhna Jerusalēpu. Tópure puha somana waro jii. ¹⁹ Á yoacu painare Cristo to cūrinare űuerahi. Santiago dihtare mari puhtoro baharore űui. ²⁰ Ō sehe ni joarocacu Cohamacu mehne ne mahñope joaeraja.

²¹ Baharo Siria yahparu, Cilicia yahparu cāhure wahai. ²² Tópure yu sūchhu tí pjare Judea yahparu jiina Jesu yaina yuhare ne űu masierasinire. ²³ Á jia ahri dihtare yuhare masi ducare tina: “Panopure marine űano yoariro mipure noaa buheare to cohā duari buheare buhero nina”, ni masi ducare tina. ²⁴ Yuhare ā masia Cohamacure “Noa yuhduariro jira”, nire tina.

2

Paina Cristo to cūrina Paulore piti boca doihita cahmana

¹ Catorce cahmari baharo pari turi Jerusalēpu wahacu Bernabé mehne wahai. Tito cāhu wahare yuhna mehne. ² Cohamacu yuhare to waha dutichhu tópure wahai. Jerusalēi jicu Jesu yaina puhtoa ti sahsero ti cahmachuchhu űucu noaa buheare judio masa jierainare yu buherire yahui tinare. “¿Judio masa jierainare noaa buheare yu buhechhu noajari, musa tuhotchhu?” nicu, ā ni yahui tinare. Á ni yahui tinare panopu yu buherire mipure yu buheri cāhure ti noano masihto cjihtore, tíre “Noana”, ti nihto cjihtore. Ti ā nierachhu yu buheri cjiri yaba cjihti jieraboa. ³ Yuhna mehne macariro Tito judio masano jierariro jiro, circuncisiōre yoareriro jira. To ā yoamahnoerario to jipachuta Jesu yaina puhtoa “Mahhu cāhu circuncisiōre yoaga”, nierare tirore. ⁴ Ti ā nierapachuta cāina

“Jesu yaina jija”, ni mahñoina wacūenoca sã mehne sãa, tirore circuncisiõre ti yoachu cahmamare tina. Jesu yaina mari jina “Panopu macaare ti dutiriro sehe yoana ti mehne yuhdasi”, ni tuhoutuja mari. Mari ã ni tuhoutuina jichu mari yoaare ñu duaa tina sehe sã mehne mahño sãare. Æ yoaa sã ñuchusuma ya dutiare yoa duti duaa, ti dutiare ño payorucuina jichu yoa duamare sãre tina.⁵ Ti ã yoa duapachuta noaa buheare quihõno musa noano masihtu cjihtore ne mahanocã mehne tuho duaerahi sã tinare.

⁶ Æ yoa Jesu yaina puhtoaa noaa buheare yu buherire ti tuhori baharo “Õ sehe ni yahu namoga judio masa jierainare”, ni yahu quihõerare tina yuhare. Jesu yaina puhtoare wiho jiina yoaro seheta tuhoutuja tinare. Cohamacu sehe jipihtinare cãno potori tuhutura. Æ jicu ãta tuhoutuja yuhu cãhu. Tina sehe yu buheriro sohtoare buhedoho masierare.⁷ Æ jia judio masa jierainare yu buhehtire Cohamacu yuhare to cūrire tuhoa, “Tõihtu jira”, nire tina. Judio masare buheare Cohamacu Pedrore to cūriro seheta tó seheta yuhu cūhure cūre judio masa jierainare yu buhehtiro cjihtore.⁸ Judio masare Pedrore buhe dutirirota yuhu cūhure tirota buhe dutire judio masa jierainare.

⁹ Æ jia Santiago, Pedro, João mehne “Jesu yaina puhtoaa”, ti niina noaa buheare buherire Cohamacu yuhare to cūrire tuhoa “Tõihtu jira”, nire tina. Æ niata yuhare Bernabé mehne noano wahchea mehne wamomaca ñahare sãre piti tia. Æ jina judio masa jierainare buheina jija sã. Santiago cãhu sehe judio masare buheina jira. “Ãta wahajaro”, nii sã sã basi.¹⁰ Æ nipahta tina judio masare pjacuoinare yoadoho dutire sãre. Pjacuoinare yoadohohtiro jiita nija yuhu.

Antioquiái Paulo Pedrore tuhtihã

¹¹ Æ yoa Pedrore Antioquiápu to suri baharo quihõno to yoerari buhiri tuhtii tirore.¹² Õ sehe yoare tiro: Santiago to warocaina Antioquiápu ti suhto panocã, Pedro sehe judio masa jieraina mehne churo nire. Santiago warocaina judio masa jierainare “Circuncisiõre yoaga” niina, judio masa panopu macaina ya dutiare yoa dutiina jire. To ã churo watoi tina sure. Æ chūriro jiparota tina to cahapu ti sūchu ñuno, tinare cuuro, Pedro judio masa jierainare duhunoca, pari turi tina mehne churo wahaerare. “Mipure wihiiina yuhare tuhtiri” nino, judio masa jieraina mehne chu namoerare.¹³ To ã mahño cureriro seheta to yoachu ñua, paina judio masa cãhu tirore ñu cū, tina cãhu tó seheta yoare. Æ jiro

Bernabé masa noariro jiparota tina yoaro seheta yoare tiro cãhu.¹⁴ Æ jicu judio masa jierainare ti duhuri buhiri noaa buhea ti niriro seheta tina ti yoerachu ñuchu, jipihitina Jesu yaina panoi Pedrore yahui: “Judio masa ya dutiare yoa dutiina ti ñuocaroi judio masa jieraina mehne mu chu duaerachu ñua õ sehe ni tuhutuboca tina judio masa jieraina: “Jesu yaina dihta jina judio masa yoaro sehe yoajihna mari cãhu”, ni tuhutuboca. Æ ni tuhutuchu yoara mūhu tinare. ¿Dohseacu tinare judio masare ñu cūchu yoa duajari mūhu ã piti ti duhucu? Judio masano jipaihta judio masa jieraina yoaro sehe yoamare mūhu. Æ yoacu judio masa yoaro sehe yoerare mūhu. ¿Æ yoariro cjiro jipaihta dohseacu judio masa jierainare judio masare ñu cūchu yoa duajari mūhu?” nii tirore.

Judio masare paina masa yoaro seheta Jesure wacū tua dutiha Cohamacu

¹⁵ Sã sehe judio masa masa bajuana, paina ñano yoaina judio masa jieraina yoaro sehe jieraja sã.¹⁶ Æ jiina sã jipachuta Cohamacu dutiare Moise cjirore to cūrire yoarina sã jichu “Noaina jira”, ni ñueraboa Cohamacu sãre. Tíre mari masija. Æ yoa Jesucristore mari wacū tuachu Cohamacu marine “Noaina jira”, ni ñunohca. Tíre masina, sã cūhu Jesucristore wacū tuaja tirore sã wacū tuari mehne sãre “Noaina jira”, Cohamacu to ni ñuhto cjihtore. To dutia cjirore sã yoarina jichu “Noaina jira”, ni ñueraboa Cohamacu sãre. Ne ti dutia yoaa mehne noaina jierara masa, Cohamacu to ñuchu.

¹⁷ Wiho mejeta Cristore mari wacū tuaa mehne noaina Cohamacu yaina mari waha duachu, ñaina mari jiare masichu yoarohca Cristo. ¿Cristo mari ñaare marine masichu yoaro ñaina marine jichu yoajari tiro, musa tuhutuchu? Ne mahanocã mehne yoerara.¹⁸ Sã dutia yoaa mehne yuhdu duamarina cjiro jipanahta ti buheare cohã. Æ cohãpanahta pari turi ti buheare yoana ti dutiare sã yoa pahñoerari buhiri potocãta buhiri tinahca sã.¹⁹ Cohamacu dutiare Moise cjirore to cūrire cãno pjaeraja mari. Æ jia, ti dutia marine duti namoerara. Cohamacu to tuaa mehne to yaina jija mari. Cristo mehne crusai yariaina yoaro sehe jija mari.²⁰ Æ jina yariariro to mu sūro to yoerariro seheta mari mu sūro yoeraja mari. Cristo ya tuaa mehne yoaja. Æ yoa mipure Cohamacu macunore wacū tuaa mehne jirucuja mari. Tiro Cohamacu macunore marine cahire. Æ jiro mari ya buhirire yariare.²¹ To dutia yoaa mehne noaina Cohamacu yaina mari wahachu Cristo to yariari sehe ne yaba cjihti jieraboa. Cohamacu marine

to cahĩre, Cristo to yariarire wiho jia yoaro sehe jichũ yoa duaeraja yuhũ sehe. Á jichũ “Dutia mehne yuhdũihca”, ne nieraja yuhũ.

3

Cohamacũ dutia Moise cjirore to cĩrre, wacũ tuaa cãhũre yahuha Paulo

¹ Yũ coyea, mũa Galacia macaina tuho masieraina ji wama tira mũa. Jesucristo crusai to yariari buheare jipihĩtina ti ñũrocaroi mũsare yahui. ¿Á jina mipũre to yare mũa yuhdũrucachore paina mũsare ti dojomehnechũ dohse yoana tinare yuhĩri mũa? ² Ahrireta yahu duaja mũsare: Dutiare mũa yoaa mehne Espĩritu Santore cjuarera mũa. Noaa buhea sehere tuhona Cristore mũa wacũ tuaa mehne Espĩritu Santore cjuara mũa. ³ Espĩritu Santo mehne mũa Cristo yaina ji dũcana mipũre mũa mũ sũro mũa yoaa mehne Cohamacũ caharũ mũa waha duachũ ña nina. Tuho masieraina jira mũa, á yoana. ⁴ ¿Noaa buheare mũa yoari buhiri payũ tahari mũa ñano yuhdũna wiho warota ñano yuhdũnocana niri mũa, á wahana? Wiho waro jierara mũa á wahari. ⁵ ¿Dohse mũa yoari wapa Espĩritu Santore mũsare wari Cohamacũ, mũa tuhotchũ? To dutiare mũa yoari wapa waerare tiro. To buheare noano mũa tuhochũ ñũno tirore mũa wacũ tuari baharopũ Espĩritu Santore ware tiro. ¿Cohamacũ mũa watoi to tuaa mehne yoa ñono dohse jiro baro á yoa ñojari tiro, mũa tuhotchũ? To dutiare mũa yoari wapa á yoa ñoerare tiro. To buheare noano mũa tuhochũ ñũno tirore mũa wacũ tuari baharopũ á yoa ñore tiro.

⁶ Abrahã cjiro Cohamacũre wacũ tuaa tiri jire. To á yoachũ tirore Cohamacũ “Noariro jira”, ni ñũna tiha. ⁷ Á jina ahri yũ nihtire masiga mũa: Cohamacũre wacũ tuainata potocãta Abrahã cjiro panamana ji turiaina waro pa turu macaina yoaro sehe jira. ⁸ Panopũ Cohamacũ yare ti joari pũi õ sehe ni yahua tiha: Judio masa jieraina Cohamacũre ti wacũ tuachũ ñũno “Noaina jira”, ni ñũna Cohamacũ. To á ni ñũhtore Cohamacũ pano masiyuro, tiro noaa buheare Abrahãre pano yahu muhta tuhsua tiha. “Mũhũ mehne ahri yahpa macainare jipihĩtinare noano yoaihĩta”, nia tiha Cohamacũ Abrahãre. ⁹ Á jiro Abrahã cjiro Cohamacũre noano tuho wacũ tuaa tiha. To á wacũ tuachũ ñũno Cohamacũ tirore noano yoaa tiha. Á yoa paina masa Cohamacũre ti wacũ tuachũ, tina cãhũre noano yoarohca Cohamacũ, Abrahã cjirore to yoariro seheta.

¹⁰ “Moise cjirore to cũri dutia mehne Cohamacũ yaina wahanahca”, ni tuhotuina buhiri tiina jira. To joari pũi áta nina:

“Cohamacũ dutiare to ya tjui ti joarire yoa pahũoeraina buhiri tiina jira tina jipihĩtina”, ni joaa tiha. ¹¹ Cohamacũ yare ti joari pũi õ sehe nina: “Cohamacũre wacũ tuainare ‘Noaina jira’, ni ñũna Cohamacũ. Á wacũ tuaa jipihĩtia dachoripe Cohamacũ mehne á jirucuahca”, nina Cohamacũ yare ti joari pũi. To á nichũ ahri yũ nihtire mari noano masija: To dutiare ti yoaa mehne masa noaina wahaerara, Cohamacũ to ñũchũ. ¹² Dutia yoaa mehne Cohamacũ caharũ waha duaina Cohamacũre wacũ tuarera. Ó sehe nina Cohamacũ yare ti joari pũi: “Dutiare yoaa mehne noaina waha duainare ti dutiare yoa pahũono cahmana tinare, duhsaro marieno”, nina Cohamacũ yare ti joari pũi. Wiho mejeta to dutiare yoa pahũoeraina jira masa. Á jia Cohamacũ ñũrocaroi noaina waha masierara.

¹³ Á jia tí dutia marine buhiri tichũ yoara. Mari á buhiri tichũ ñũno Cristo sehe to basi mari yaro jiborirore buhiri tiriro waharo, mari buhiri tiborirore tiro sehe cohãbasare marine. Cristo to buhiri tihore yahuro õ seheta ni joaa tiha panopure: “Jipihĩtina yucũcũpũ ti duhu õina buhiri tiina jira”, ni joaa tiha panopure. ¹⁴ To á ni yahu joariro seheta á yoari jire Cristore. Cohamacũ Abrahã cjirore “Ahri yahpa macainare noano yoaihĩta”, to niriro seheta yoaro niri jire masare. Á yoari jire Cristo mehne. Tiro yariari jire Cohamacũ judio masa jierainare noano to yoahito cjihĩtore. Á yoaro Jesucristo mehne Cohamacũ Abrahãre to niriro seheta tuhsuri jire. Á yoari jire tiro tirore mari wacũ tuari baharo Espĩritu Santore mari cjuahito cjihĩtore.

To buherire quitu mehne yahu namoha Paulo

¹⁵ Yũ coyea, masa ya quitu mehne tí yũ nirire yahuihĩta mũsare: Cũiro paio mehne “Ó sehe yoajihna mari”, ni cãno mehne ti joa cũpachuta paio ti pũre soro ni dojomehne joa namo masierara. Á yoa tuhsũ, tí pũre “Quihõno jierara”, ni masierara tiro. ¹⁶ Tí pũre cãno potori ti joa cũrĩro seheta “Mũsare noano yoaihĩta”, Cohamacũ nino, Abrahãre to panamino ji turiariro cãhũre ni yahu cũno nia tiha. Á ni yahu cũno paina to panamana ji turiaipapare ni yahu cũno niera tiha. Cãiroreta to panamino ji turiariro dihtare ni yahu cũno nia tiha Cohamacũ. Tiro Abrahã panamino Cristo jira. ¹⁷ Mipũre noano yahuihĩta mũsare: Abrahã cãhũre Cohamacũ “Mũsare noano yoaihĩta”, to ni cũri baharo cuatrocientos treinta cãhmari yuhdũri baharo to dutiare Moise cjirore cũa tiha. Á cũno Abrahã cãhũre Cohamacũ “Mũsare noano yoaihĩta”, to yahu cũri cjirore boro taro

niera tiha. ¹⁸ Cohamacu marine yuhdachu yoaro, dutiare mari yoaa mehne marine yuhdachu yoarerara. Dutiare yoaa mehne mari yuhdachu Cohamacu “Musare noano yoahtja”, to ni yahu cūri sehe yaba cjihti jieraboa. Wiho mejeta to dutia mari-
asinichu Abrahãre ã ni cū mahtaa tiha.

¹⁹ ¿Ã jiro dohse jiro baro to dutiare cūri Cohamacu? To dutiare cūha tí dutiare mari yuhdachu carire mari noano masihto sehe. Ã jiro panopure Cohamacu “Mh panami mehne masare noano yoahtja”, Abrahãre to niriro to wihito pano Cohamacu to dutiare cūha timaha masa. Cohamacu to dutiare to cūchu to anjoo sehe tíre duti turiaa tiha. Å yoa Moise cjirore ti cūchu, tiro sehe masare cū turiaa tiha tjoa. ²⁰ To dutiare Moise cjiro to cū turiachu Cohamacu to basita masare cūera tiha. Å cūeraparota Cohamacu “Muhure noano yoahtja”, Abrahã sehere ni yahu cūno, to basita ã ni yahu cūa tiha.

²¹ Cohamacu Moise cjirore to dutiare cūno, tó pano Abrahãre to ni yahu cūire “Yh niriro sehe yoah yuh”, nino niera tiha tiro. Abrahãre to niriro seheta yoaro taro nia tiha. To dutia yoaa mehne Cohamacu yaina wahana tí pja pinihta dutiare mari yoaa mehne noaina wahaboa mari. ²² Wiho mejeta Cohamacu to yare ti joari pū sehe jipihtina ñaa buhiri tiina, ñaare duhu masieraina ti jirire yahua tiha. Å ni yahua tiha Cohamacu “Musare noano yoahtja”, pano to niriro seheta to yoahto cjihtore. Å yoaro Jesucristore wacū tuainare noano yoara tiro pano to niriro seheta.

²³ Jesucristo ya buheare mari tūhohto pano, tirore mari wacū tuahto pano Cohamacu Moise cjirore to cūri dutia dihtare masimahi mari. Å masimarina jina ñaa buhiri tiina, peresupu jiina yoaro sehe tí ñaare duhu masieraina jina, dutia dihtare masina jimahi mari. ²⁴ Å jia Cristo to wihito pano Cohamacu dutia sehe marine yahure dahra cohtariro to pūhtoro pohñare to yahuriro seheta. Å yahure marine baharo Cristore mari wacū tuaa mehne Cohamacu “Noaina jira”, marine to ni ñuhto cjihtore. ²⁵ Mipū pinihtare Cristore mari wacū tuari pja jira. To ã jichu dahra cohtariro yoaro sehe to dutia sehe marine yahu namoerara. Marine dutirucu namoerara. ²⁶ Å jina Cristo Jesure wacū tuaina jina Cohamacu pohña jira musa. ²⁷ Jipihtina musa co mehne bautisarina jira Cristo yaina musa jiare ñona tana. Å yoana to yaina jina, Cristo yoaro sehe jiina wahana nina musa. ²⁸ Mipure pua curua jierara musa. Judio masa jieraina, judio masa mehne pua curua jierara musa. Dahra cohtaina,

dahra cohtaina jieraina mehne pua curua jierara musa. Mha, numia mehne pua curua jierara musa. Jipihtina musa Cristo yaina jina, cū curuata jira musa. ²⁹ Cristo yaina jina, Abrahã Cohamacure to wacū tuariro seheta yoaina jina, Abrahã panamana waro jira musa. Musa ã jiina jichu Cohamacu Abrahãre “Musare noano yoahtja”, to ni yahu cūriro seheta musa cūhure noano yoarohca tiro. Cristo yaina musa jichu ñano musare noano yoarohca.

4

¹ Õ sehe jira ahri quiti mehne yu yahu namochu: To pūcuro baharo to yare nahtiro wahma bucuariro jiropu jipihtia to ya jipacheta dahra cohtariro yoaro seheta ne paye baro maerariro yoaro seheta jira tiro. ² Å jia tiro wahma bucuariro to jichu tirore ñu wihboina to yare ñu wihbora. Å yoa to pūcuro to quihōri pja mu sūchupu to pūcuro yare cūarohca to macūno. ³ Õ seheta wahma bucuariro yoaro seheta jimai mari cūhu. Å jiina mari jisinchu dahra cohtainare ti dutiriro seheta Moise cjirore to cūri dutia, mari ñuchusuma panopu macaina tí cūri dutia cūhu marine dutisinimare. ⁴ Mari ã jiina jipacheta to quihōri pja mu sūchu Cohamacu to macūnore warocari jire. Å to warocachu to macūno cūcoro numino mehne masa bajuari jire. Å jiro tiro judio masūno masa bajuaro Cohamacu dutia Moise cjirore to cūri cjiire yoarucuriro jiri jimare. ⁵ Mari cūhure tí dutiata dutisiniri jimare. Å jiro marine yuhdachu yoahtiro cjihtore warocari jire Cohamacu to macūnore, to pohña waro mari wahahto cjihtore.

⁶ Å jiro to pohña musa jichu ñūno, Cohamacu macūno to yairo Espiritu Santore musa mehne jiltirore warocari jire Cohamacu. To yairo Espiritu sehe Cohamacure “Mai”, niriro jira. ⁷ Å jina musa Cohamacu to yoadohoa mehne dahra cohtaina jierara musa mipure. To pohña jira musa. Å jina to pohña jina, Cohamacu to wahire cūanahca musa.

Paulo Galacia macainare Jesu yainare cuisāha

⁸ Panopu Cohamacure musa masierasiniina jina “Cohamacu jira”, musa nia masarine ño payona tí masarine dahra cohtaina jiri jimare musa. Musa ã ño payoina potocāta cohamana waro jierari jire. ⁹ Å jirina cjiro jipanahta mipure Cohamacu warore masina musa. Jierara. Tiro pinihta musa sehere masina. ¿To ã masipacheta dohse yoana ahri yahpa macaina ya buhea sehere cahmajari musa tjoa? Tí ya buhea mehne noano yuhdu

duapanahta ne yuhdusi mäsä. Ä yoa baharo Cohamacu jipihtia dachoripe müsare to wahtire cjuasi mäsä. Ä yoana tí buhea mehne yuhdu duana, pari turi ti ya dutiare dahra cohtaina yoaro sehe wahana nica mäsä. ¹⁰ Cäa dachorire, cäa särine, cäa puhibäcare, cäa cahmarine bose namarine dahre dutira mäsä. “Mari ä yoaa mehne dutia mehne yuhdunahca”, ni tuhutumana mäsä. ¹¹ Mäsä ä ni tuhotuchü müsare tuaro yu buheri cjiri yaba cjhti jieraboca, yu tuhotuchü.

¹² Yu coyea ahrire tuaro dutihtja müsare: Cristore yu tuhotururo sehetä mäsä cähu tirore tuhotuga. Panopü dutia yoaa mehne yuhdu duaina jierari jimare mäsä judio masa jieraina jina. Mipü sehene yuhü cähu mäsä yoaro sehetä wahai dutia yoaa mehne yuhdu duaeracu. Ä jina Cristore yu tuhotururo sehetä mäsä cähu äta tirore tuhotuga. Mäsä mehne yu jichü ne ñano yoerare mäsä yuhure. ¹³ Ahrire masina mäsä. Töpu dohatiriro jicu, pa sehepu waha masieracu noaa buheare müsare buhe ducäi. ¹⁴ Yu ä dohatiriro jipachüta, yuhure pumeborina mäsä jipanahta, yuhure yabierare mäsä. Ä jina yuhure “Waharisa”, nierare mäsä. Ä jina Cohamacu yairo anjore, Jesucristo cähu mäsä piti bocaboriro sehetä yuhure noano piti bocare mäsä. ¹⁵ ¿Mipure dohse wahari yuhü mehne mäsä wahchea? Müsare ahrire nihtja: Cäno pjana mäsä caparire orewe na yuhure waboa mäsä. ¹⁶ ¿Yuhü mehne macaina jipanahta mipure quihöno müsare yu yahuchü ñu tuhtijari mäsä yuhure?

¹⁷ Sohö jiina soro ni buheina müsare tuaro cahmasäana. Ti tuhotua soro jira. Noaa jierara. Tina müsare yuhure yuhdunacachu cahmana, tina sehene mäsä cahmahto sehe. ¹⁸ Noano mehne mäsä noano wahahto sehe müsare ti cahmasächü noa niboa. Ä yoa töpäre yu mariachü cähu ti ä cahmasächü noa niboa. ¹⁹ Yu pohna, niji wahcöricoro to ñano yuhduro sehetä müsare ñano wacü tuhoutuja yuhü. Pu Cristo yoaro sehe mäsä jichüpu müsare wacü duhuihca. ²⁰ Michapucacä mäsä mehne jicu tuhtiro marieno wahchea mehne mäsä mehne yu suhduchü noaboa yuhure. Müsare pjiro tuhotui nija yuhü.

Agar Sara mehne ti jiri cjirire yahuha Paulo

²¹ Tuhoga mäsä yuhure. Cohamacu to dutiare yoaa mehne yuhdu duaina jipanahta to dutia sehene noano masierara mäsä. ²² Ö sehe nia tiha Cohamacu yare ti joari pü: Abrahä puaro pucaro jia tiha. Tirore dahra cohtaricoro Agar wama tiricoro mehne cäiro pohna tia tiha. Ä yoa to namono poto

Sara wama tiricoro mehne cäiro pohna tia tiha. ²³ Wiho mejeta tirore dahra cohtaricoro macüno masa mari yoaro sehetä masa bajuaa tiha tiro. To namono poto macüno sehe Cohamacu “Cäirocä pohna tinahca mäsä”, to niriro sehetä masa bajuaa tiha tiro sehe. ²⁴ Ahri quiti marine noano piti dahre yahura: Cohamacu puaha taha masare “Müsare yoadohoihtja”, to nia yoaro sehetä jira ahri numia puaro numia. Cäcoro Sinaí wama tidüpu to dutiare wari yoaro sehe jira. Ticoro Agar jira. Ticoro mehne mari piti dahre buhechü judio masa cähu dutiare yorucua mehnetä yuhdu duaina ticoro yoaro sehe jira. Tina dahra cohtaina yoaro sehe jira. ²⁵ Ticoro Sinaí wama tidü Arabiapü jidü yoaro sehe jiricoro jira. Mipure Jerusalé macaina judio masa dutia yoaa mehne yuhdu duaina dutiare dahra cohtaina yoaro sehe jira. Ä jia mari piti dahre buhechü tina ticoro yoaro sehe jira dahra cohtaricoro to jia tiro sehe. Tina Cohamacu pohna jierara. ²⁶ Pacoro sehe Abrahä namono poto müanopü jiri maca Jerusalé wama tiri maca yoaro sehe jira, mari piti dahre buhechü. Ticoro dahra cohtaricoro jieraro, to macüno cähu dahra cohtariro jierari jire. (Ä yoa Jesucristore wacü tuaina mari jina, Sara macüno yoaro sehe jija. Mari cähu Cohamacu Moise cjiroro to cüri dutia mehne yuhdu duaina jieraina jina, dahra cohtaina yoaro sehe jieraja.) ²⁷ Cohamacu yare ti joari pü ö sehe ni joaa tiha Cohamacu pohna warore, Sara yoaro sehe jiricorore yahuro:

“Pohna marienicoro, wahchega.

Ä yoa wahchea mehne sañurucuga, niji wahcöno purinore masieraricoro jico.

Muhü sehe manü tiricoro yuhdoro payü pohna ticohca.

Ä jico wahchega”,

ni joaa tiha panopure to pohna tihto pano Sara yoaro sehe jiricorore yahuro.

²⁸ Yu coyea, Cohamacu to niriro sehetä Isaa masa bajuaa tiha. Mari cähu tiro yoaro sehe Cohamacu to niriro sehetä to pohna jija mari. ²⁹ Wiho mejeta tí pjapure masa yoaro sehe masa bajuariro ñano yoaa tiha pairoro Espiritu Santo to niriro sehetä masa bajuariroro. Mipü cähu äta jira to jiriro sehetä. ³⁰ Wiho mejeta ö sehe nina Cohamacu yare ti joari pü: “Dahra cohtaricoro macüno to pucaro yare cju masierara. To namono poto macüno sehe to pucaro yare cju masina. Ä yoa ticorore dahra cohtaricoro cjiroro to macüno mehnetä cohänocahga”, ni joaa tiha. ³¹ Yu coyea, ne dahra cohtaricoro pohna yoaro sehe jieraja mari. Wiho mejeta to namono poto pohna yoaro sehe jija mari.

5

Jesucristo yare noano taho ñahana, tíre duhuena tjiga

¹ Dutia yoaa mehne yuhdu duaina ti dutiare dahra cohtaina ti dutipeina yoaro sehe jira. Cristo yaina wahana ti dutipeina mari jiare wijaana, Cristo mehne yuhduja mari. Á to yuhduchu yoarina jina, to yare á yoarucuga, “Tí dutia yoaa mehne yuhduhahca”, ni tūhoturo marieno.

² Mipare yuhu Paulo ahrire yahuihtja musare: “Circuncisiōre mari yoari mehne yuhduhahca”, musa ni tūhotuna, Cristo musare to yoadohorire yaba cjihti jierachu yoana nina musa. ³ Jipihtina circuncisiōre musa yoari mehne yuhdu duainare pari turi ō sehe ni yahuihtja yuhu: Circuncisiōre musa yoari mehne yuhdu duana, paye Cohamacu dutiare yoa pahñoerana, yuhdusi musa. ⁴ Dutia yoaa mehne yuhdu duaina jina Cristo sehere cohāre musa. Á yoaina jina, Cohamacu musare to cahīrire, musare to yuhduchu yoa duarire cahmaerara musa. ⁵ Wiho mejeta mari sehe Espiritu Santo to tuaa mehne Cohamacure wacū tuaja. Mari ā wacū tuachu “Noaina, ñaa buhiri marieina jira”, ni ñana Cohamacu marine. To ā ni ñachu marine to yuhduchu yoahure masija mari. ⁶ Cristo Jesu yaina jina circuncisiōre mari yoachu ne yaba cjihti jierara. Circuncisiōre mari yoerachu cahure ne yaba cjihti jierara. Wiho mejeta Cristo pinire wacū tuana painare cahīnahca mari. Tí wacū tuaa sehe wiho waro jia nierara. Tí waro jia nina.

⁷ Musa Cristore noano wacū tuasinimare. ¿Diina baro noaa buheare yuhduhahca dutiari musare? ⁸ Tí ya buhea Cohamacu musare to pohñare cūriro to ya buhea jierara. ⁹ Ahri yu nihtire wacūga musa: Mahanocā pāo bucuaro trigo yuhure noano sahserucu sara. (To ā sahserucu sūriro seheta yu coyea judio masa ya buhea sehere musa cahmarucuchū ñaa payu masa musa mehne macaina cāhu ti buheare cahmaboca tina cāhu.) ¹⁰ Mari puhtoro Cristore wacū tuaja mari. Á jicu ahri yu nihtire masija yuhu. Cristo to yoadohoa mehne paye buheare baharopure cahmasi musa. Tíre masija yuhu. Musare dojomehne cohtaina dohse jiina jica. Tinare Cohamacupā buhiri dahrerohca.

¹¹ Yu coyea, “Dutia yoaa mehne yuhduhahca”, ti nia buheare yu buheriro jichū judio masa yuhure ñano yoeraboa. Cristo crusai to yariari buheare yu buheri buhiri tina ñano yoara yuhure. Cristo ya buhea mehne judio masa ya buheare yu buhe morechu yuhure ñano yoeraboa tina. ¹² Musare dojomehne cohtaina musare mahanocā musa pjacu macari cahsarocāre yihsō dutiina ti basi dihta yihsojaro.

¹³ Yu coyea, “Dutia mehne yuhduhahca”, ni tūhotu dutierara Cohamacu musare. Wiho mejeta “Dutia mehne yuhduhahca”, ni tūhotuina jierapanahta “To dutiare yuhduhahcajihnā”, ni wacūena tjiga. Á yoa musa mehne macainare cahma cahīna, tinare dahra cohtaina yoaro seheta yoadohoga tinare. ¹⁴ Cānota dutiare noano yoana, Cohamacu dutiare yoa pahñona nija mari. Ō sehe jira tí dutia: “Mu basi mu cahīno seheta mu cahai jiina cāhure cahīga”, ni dutia tiha. ¹⁵ Á jina wahiquina suaina yoaro sehe musa basi cahma sayoena tjiga. Tuhsu, cahmachena tjiga. Musa mehne macaina jipihntinare “Dojomehneri”, nina noano yoaga musa.

Masa ñaare ti goa pjaare, Espiritu Santo to cahmaa cāhure yahuha Paulo

¹⁶ Espiritu Santo to cahmariro seheta jirucuga musa. Á jina musa ñaare musa goa pjaare yoaena tjiga. ¹⁷ Ñaare musa goa pjachu tíre musa yoachu, Espiritu Santo ñu yabira. To ā ñu yabichū tí ñaare duhunahca musa. Á jina ñaare musa goa pjana, tíre yoana, Espiritu Santore ñu tuhtira musa. Á ñu tuhtina to cahmano sehe yoerara musa. Á jina musa goa pjaare musa yoa duaro seheta yoa masierara musa. ¹⁸ Á yoa Espiritu Santo to cahmaare yoaina jina “Dutia mehne mari yuhduhahca”, ni tūhotuerara musa.

¹⁹ Masa ñaare ti yoare mari noano masi tuhsuja. Ō sehe jira tí: Numino mehne ñano yoaa, muno mehne ñano yoaa, wuana tia, tó sehe jia ñaare buo tiro marieno yoaa, ²⁰⁻²¹ “Cohamacu jira” ti nia masarine ño payoa, puti sitea, paye yaya ti yoaa, ñu tuhtia, cahma sayoa, doaa, suaa, to basi dihta cjuā duaa, ñu tuhti cahma tju waa, cū curua macaina pa curuare ñu tuhtia, paina yare tuaro cahmaa, cahaa, cahaa bose numurine dahrea, tó sehe jia jira ñaare yoaa. Panopu musare cuaro mehne yu niriro seheta mipu cāhure nihtja: Tí barore yoaina puhtoro Cohamacu to sūho jiropure muanopure ne sūsi.

²²⁻²³ Espiritu Santo sehe marine ō sehe yoaina jichū yoara: Masare cahīina, wahcheina, cuiro marieina, so sueraina, painare noano yoaina, noaina, duhuo marieno Cohamacu cahmaare yoaina, painare yuhduhahca duaeraina, noano mehne yoaina, ti ñaa goa pjaare yoeraina jichū yoara marine tiro. Tó sehe yoinare “Á yoaena tjiga”, ne cāiro nierara. ²⁴ Cristo Jesu yaina jina mari ñaa goa pjaare yoa namoeraja. ²⁵ Espiritu Santo marine Cohamacu mehne ā jirucuchū yoarohca. Á jina to cahmano seheta yoarucina jijihna mari.

²⁶ “Painare masi yúhdurácaja sã”, ni túhotuina jiena tjijihna mari. Á jina mari mehne suachú yoaena tjijihna painare. Á yoana mari mehne macaina noano tí wahachú ñana tinare sua túhotuena tjijihna.

6

Musa mehne macainare yoadohoga

¹ Yú coyea, cáiro musa mehne macariro to ñaare yoachú ñana, Cristore noano wacú tuaina jina niji siaroca dero tirore yoadohoga noaare pari turi to yoahito cjihto sehe. Á yoana musa cáhu “Ñaare goa pjari”, nina noano yoaga. ² Musa mehne macaina tí ñano yúhdúchú cáhare yoadohoga tinare. Musa á yoana Cristo to dutiro seheta yoana nina musa.

³ Cáiro wiho jiriro jiparota “Painare yúhdurácaja”, ni túhoturo, to basi mahñoa dihtare túhoturiro jira. ⁴ Cáina musa sahsero musa yoarire “Ahri noaa jira. Ahri ñaa jira”, ni masiga. Á masina musa yoari noaa jichú musa basi wahchenahca. Á jina “Painare yúhdurácaja”, nisi musa. Á nierana painare musa yúhdurácarí mehne wahchesi musa. ⁵ Á jiro Jesu yairo to musaro Cohamacú yare yoara. Pairo masuno tirore tíre yoadoho maslerara.

⁶ Á jina noaa buheare buherirore paye baro musa cjuare tirore waga musa to yahuare túhoina.

⁷ Toari masuno ñaa yaparire toaro ñaa dichare cjuarohca. Noaa yaparire toaro noaa dichare cjuarohca. (Tó seheta mari cáhu ñaare yoana ñaare cjuanahca. Á jiro mari ñari buhiri buhiri dahrerohca. Noaare yoana noaare cjuanahca. Á jina noano jinahca.) Á jina “Sã ñaare yoachú Cohamacú sãre buhiri dahresi”, ni túhotuena tjiga. Ñaare yoina Cohamacúre bújpeina jira. Cohamacúre bújpeinare buhiri dahrerohca tiro. ⁸ Mari ñaare goa pjana, tíre yoana, tí mehneta yarianahca. Á jina pichacapú wahanahca. Espíritu Santo sehe to cahmaare mari yoachú tiro marine jipihtia dachoripe manopú jirucuchú yorohca. ⁹ Á jina noaare yoana tíre pumena tjijihna mari. Cohamacú to quihõri pja jichú noaare cjuanahca mari pumerana. ¹⁰ Á jina jipihtinare mari ñuinape noano yojihna mari. Mari coyea Jesu yaina pinihtare paina yúhgoro noano yojihna.

Paulo yahu batoaro, noa duti batoaha

¹¹ Bújua letrari mehne yú wamomaca waro mehne musare yú joarocarire ñuga musa. ¹² Musare circuncisiõre yoa dutiina masa tinare ño payochú cahmana. Cristo crusai to yariari buheare mari buheri

buhiri masa ñano yoara marine. Tí á yoachú ñua ahriina musare circuncisiõre yoa dutira “Judio masa ya buhea sehere yoaja”, nia. Á tí yoa dutichú judio masa tinare ñano yoeraboca. Á jia circuncisiõre yoa dutira. ¹³ Musare circuncisiõre yoa dutiina sehe Cohamacú to dutiri cjirire yoa pahñoerara. Á jia circuncisiõre musare tí yoa dutiri baharo musa yúhtichú ñua, judio masa tinare musare dutiinare ño payoboca. Tí á ño payohti cjihtire musare circuncisiõre yoa dutira tina. ¹⁴ Mari puhtoro Jesucristo crusai yariariro ya buhea dihtare jipihtinare wahchea mehne yahu duaja. Ne paye buheare á ní yahu duaeraja. Á crusai to yariachú ahri yahpa macaa ñaare wáino yúhure yoa dutiro bihoerara. Á yariaro tí ñaare yúhure cahmaerachú yoare tiro. ¹⁵ To á yoachú Cristo Jesu yaina mari jichú circuncisiõre mari yoachú ne yaba cjihti jierara. Circuncisiõre mari yoerachú cáhare ne yaba cjihti jierara marine. Wiho mejeta pari turi masa bajuaina yoaro sehe, Cohamacú cahmano seheta yoina, marine to cohtotachú pinihta wiho waro jierara. ¹⁶ Jipihtina ahri yú buherire yoina, Cohamacú yaina waro jina, cuiro marieno noano jiga musa. Á jina Cohamacú to pja ñua mehne jiga musa.

¹⁷ Mari puhtoro Jesure dahra cohtariro yú jiri buhiri yú pjacure camí tija yúhu. Yú á jiriro jichú mipare paina yúhure cariboea tjijaro.

¹⁸ Yú coyea mari puhtoro Jesucristo musare jipihtinare to cahia mehne noano yojaro. Áta yojaro.

Efesios

Efeso macainare joarocaha Paulo

¹ Yũhu Paulo musare Efeso macainare joarocaja. Yũhu Jesucristo yare buhe dutiro to cũriro jija. Cohamacu to cahmano seheta Jesu yũhare to yare buhehtirore cũre. Ā jicu musare Cohamacu yainare Jesucristore ā wacũ tuarucuinare joarocaja yũhu. ² Ā joarocacu yũhu musare noa dutija. Cohamacu mari Pucũ, ā yoa mari puhtoro Jesucristo cũhu musare noano yoa, noano jichũ yoajaro.

Cristo yaina mari jichũ ñũno Cohamacu noano yoara marine

³ Cohamacu, mari puhtoro Jesucristo Pucũro marine noano yoarucura Cristo yaina mari jichũ ñũno. Jipihitia to ya mũano macaa noa mehne tiro marine noano yoarucura. Espĩritu Santo mehne marine ā noano yoarucura. To ā yoariro jichũ ñũna noano ño payoa mehne tirore noano wahche payojihna. ⁴ Ő sehe yoaa tiri jire tiro marine to yainare: Ahri yahpare to bajuamehnehto pano mipure to yaina jihtinare beseyu tuhsaa tiri jire tiro marine. Ā besea tiri jire marine ñaa buhiri marieina mari jhto sehe. Ā yoana ñaa buhiri marieina jija mari, Cohamacu to ñũchu. Ā jiro marine “Ñaa buhiri tiina jira”, nisi tiro. ⁵ Panopũ ō sehe nia tiri jire tiro marine: “Yũ macũ Cristo tinare to yoabasari mehne tina yũ pohna jiahca”, ni cũa tiri jire marine panopũ. To ji coariro seheta to cahmariro seheta ā wahachu yoaa tiri jire tiro marine. ⁶ Wiho jiina mari jipacheta marine to ā noano yoachũ ñũna ño payoa mehne tirore noano durucujihna. To macũno to cahĩriro yaina mari jichũ ñũno noano marine yoara tiro. Ā jina tirore noano durucujihna. ⁷⁻⁸ Cristota jira marine pichacapũ wahaborinare yũhdũchu yoariro. Cristo mari ñaa buhirire yariabasaro, to dire cohã, mari ñaa yoari buhirire cohãri jire. Mari ñaa yoari buhirire to cohãchu ñũno, Cohamacu sehe mari ñaa buhirire bonocahna. Marine ñaa dihtare yoaborinare ā cahmano marine noaputiaro yoari jire Cohamacu. Ā yoa marine to ā yoinare noano waro tuho masiina wahachu yoari jire. ⁹⁻¹⁰ Tuho masiina wahachu yoa, baharopũ to yoahtere marine masichũ yoare. Panopũ painare tĩre masichũ yoerari jire tiro. Ő sehe jira baharopũ to yoahto: Tiro to cahmariro seheta to tuhoturiro seheta jipihitinare cũ curuata Cristo yaina jichũ yoarohca. Ā jiro jipihitiare to ya jichũ yoarohca. To quihõri

pja mũ sachũ mũano macainare, ahri yahpa macaina cũhare, cũ curuata to yaina jichũ yoarohca tiro. Ā yoa mũano macaare, ahri yahpa macaa cũhare to ya jichũ yoarohca. Ā jiro Cristo sehe jipihitina bui puhtoro jirohca. Ā yoa jipihitia pũro jirohca. Ā jihitiro ji dutia tiha Cohamacu tirore.

¹¹ Ā yoro Cristo yaina mari jhtore masino panopũ Cohamacu marine besa tuhsaa tiha to yaina mari jhtinare. Ahri jipihitiare to yoarire, baharopũ to yoahto cũhare, “Ā waharohca”, ni cũyua tiha tiro to tuhoturiro seheta, to cahmariro seheta yoaro taro. Ā yoaa tiha tiro to yare sã yoahto cjihore. ¹² Sã sehe judio masa Cristore cahna muhtaina jina sãre to yũhdũchu yoahtere cohta muhtaina jija. Cohamacu sãre besea tiha to yare sã yoahto cjihore. Cohamacu yare sã ā yoachũ ñaa, paina tirore ño payo, “Tuariro jira”, ti nihto sehe Cohamacu sãre besea tiha. ¹³ Mũsa cũhũ quihõno durucuareta noaa buheare tuhore. Ti buhea “Cohamacu cahapũ mũsa waha duichũ, ō sehe jira”, ni yahura marine. Tĩre tuhona tirore wacũ tua, noano tuhona to yaina wahare mũsa. To yainare ō sehe niri jire Cristo: “Mũsare Espĩritu Santore warocaihtja”, ni yahu cũri jire. ¹⁴ Ā jiro tirore mũsa wacũ tua, noano tuhochũ ñũno to yairo Espĩritu Santore ware musare. Ā jiro Espĩritu Santo mari mehne jiro Cohamacu yaina mari jia tiare masichũ yoara tiro sehe. Ā yoa Espĩritu Santo parore masichũ yoara. Cohamacu mari ñaa buhirire bore marine yũhdũchu yoaro. Ā jiro baharo to cahapũ naanohca marine to yainare. Marine to naahto pano Espĩritu Santo sehe Cohamacu cahapũ mari sũri baharo to yare mari cjuahtere masichũ yoara marine. Cohamacu marine ā yoara tirore ño payoa mehne “Noariro jira”, mari nihto cjihore.

Paulo Cohamacure sini payoha Jesu yainare

¹⁵⁻¹⁶ Cristore wacũ tuaina mũsa jichũ tuhorocacu Cohamacure ā sini payorucuja musare. Mari puhtoro Jesucristore mũsa wacũ tuarire, jipihitina to yainare mũsa cahĩrire tuhorocacu Cohamacure “Noana”, nija. ¹⁷ Ő seheta tirore sini payoja musare: Cohamacu mũano macariro mari puhtoro Jesucristo Pucũro, noa yũhduariro to yare mũsa noano masihto sehe sini payoja. Ā yoaro tirore mũsa noano masihto sehe sini payoja musare. ¹⁸ Ā jicu paye yũ nihti cũhare mũsa noano masihto sehe musare sini payoja Cohamacure. Tiro musare yũhdũchu yoaro, to yaina cjihitire yoare. To ā yoachũ noa yũhduara marine. Tĩre mũsa masihto sehe sini payoja musare Cohamacure.

Ā yoa marine to wahtire noa yuhdāa tí waro ti jichu cāhure mūsa masiyuhto sehe sini payoja mūsare Cohamacāre. ¹⁹ Ō sehe cāhure mūsa masihto sehe sini payoja mūsare Cohamacāre. Cohamacāre wacū tuaina mari jichu űno to tuaa mehne marine yoadohora tiro. Tiro sehe paina bui tua yuhdāariro jira. Tí cāhure mūsa masihto sehe sini payoja Cohamacāre. ²⁰ Tí to masia mehne, to tuaa mehne tiro Cristo yariarirore masori jire. Ā maso tuhsuro, mūanopu to poto buhūsehei Cristore dujichu yoari jire Cohamacu, jipihtinare dutihtiro to jihto sehe. ²¹ Tóí dujiro jipihtina mūano macaina puhtoā bui, ā yoa jipihtina ahri yahpa macaina dutiina bui jiriro jira Cristo. Mipure jipihtina ahri dacho macaina bui puhtoro jira. Baharopu jipihtina pa tjuru macaina cāhure ti bui puhtoro jihtiro cjih-tota jira tiro. ²² Ā yoa jipihtina bui cūri jire Cohamacu Cristore. Ā yoaro jipihtiare pu tichu yoari jire tirore. Ā jiro Cristo yaina cū curua jiina bui puhtoro sōri jire tirore. Tí dapu jira tiro sehe. ²³ Cristo yaina cū curuata jina, to pjacu yoaro sehe jija mari. Cristo jipihtiroru ā jirucura. Ā jina mari to yaina mehne to jirucuchu, to jiro seheta wahana nija. Ā wahana to jia tiare űnā nija.

2

Cohamacu marine cahino, pja űno yuhdāchu yoaha marine

¹ Cohamacu yuhdārcaina, űāa buhiri tina yariaina cjiro yoaro sehe jiri jimare mūsa, Cohamacu to űuchu. ² Panopure ahri yahpa macaina Cohamacāre yuhdārcaina yoaro sehe yoarucuri jimare mūsa cāhu. Ā yoana watino to dutiro seheta yoarucuri jimare mūsa. Tiro watino ahri yahpai duti-ro Cohamacāre yuhdārcaina puhtoro jira. Watia puhtoro cāhu jira tiro. ³ Panopure jipihtina mari ā dihta yoarina jimai. Mari űāa dihtare goa pjamai. Mari mu saro, mari tuhotu, mari cahmano seheta yoa-mai. Ā yoina jina jipihtina paina yoaro se-heta, mari cāhu űāa buhiri tiina jirucumai. Mari ā jiina jiri buhiri, Cohamacu to buhiri dahreborina jimai. ⁴ Mari ā jiina jipachuta, Cohamacu marine tuaro pja űno, noano cahiri jire marine. ⁵ Ā yahri yuhdāro, Cohamacāre yuhdārcaina, yariaina yoaro se-heta mari jipachuta Cristo mehne marine catichu yoari jire. ⁶ Ā jiro Cristo yaina mari wahachu, Cohamacu Cristo mehne marine maso, ā yoa mūanopu Cristo mehne duj-ihtinare marine sō daporu jire, tiro mehne dutihtina cjihti mari jihto sehe. Cristo yaina jina, āta wahaina baro jija mari, Cohamacu to űuchu. ⁷ Ō seheta noano yoara tiro

marine to pja űarire, to tuaro cahiri-re baharopu jihtinare masichu yoaro taro. Cristo yaina mari jichu űno ā yuhdāchu yoara tiro marine. ⁸ Cristore wacū tua, mari noano tuhochu űno Cohamacu marine pichacaru wahaborinare yuhdāchu yoara. Marine pja űno, marine cahino marine yuhdāchu yoara. Mari mu saro mari noano yoa mehne Cohamacu caharu waha masieraja mari. Cohamacu sehe marine yuhdāchu yoara. Ā jiro tiro mehne mari ā jirucuh-tore cūna marine. ⁹ To ā cūchu mari mu saro noaare mari yoari wapa jierara tí.

“Sā mu saro yuhdāhi, niboca”, nino ō sehe dutiri jire tiro: Mari mu saro yuhdā dutierara marine. ¹⁰ Cristo yaina jichu yoare marine Cohamacu sehe noaa dihtare yoah-tina mari jihto sehe. Panopu noaare mari yoah-tire cū tuhsua tiri jire tiro marine.

Cristore cjuana mari noano jija

¹¹ Ā jina panopu mūsa jia tirire mipu cāhure wacūga mūsa. Cristo yaina jierasina judio masa jieraina jina mūsa coyea yoaro sehe yoarina jiri jimare mūsa. Circuncisiōre yoeraina jire mūsa mipu mūsa jiro seheta. Mūsa ā yoeraina jichu űna sā judio masa sehe circuncisiō yoaina sehe mūsare ō sehe nia tii. “Circuncisiōre yoeraina jia, Cohamacu yaina jierara”, nia tii mūsare. Circuncisiōre yoaina mūa pjacurire mahanocā cahsarocāre yiho narina jira. ¹² Panopu Cristo yaina jierari jimare mūsa. Sā judio masa sehe Cohamacu to beseina jia tii. Sā ā jichu “Mūsare yuhdāchu yoaihtja”, ni cūa tiha Cohamacu sāre. Mūsa sehe to ā ni cūrina jierari jimare. Ā yoa Cohamacu to beserinare űu tuhtiina jisiniri jimare mūsa. Mūsa űāa buhirire pichacaru wahah-tina jiri jimare mūsa. Cohamacu maeraina jina pichacaru butiborina jia tiri jimare mūsa. ¹³ Mipuru sehere Cristo Jesu yaina jira mūsa. Panopu Cohamacāre űu tuhtiina jipanahta, mipure to yaina jira mūsa. Cristo mūsa űāa buhiri crusaru to di cohāri mehne Cohamacu yaina jichu yoare mūsare. ¹⁴ Sā judio masare cahma űu tuhtiina mūsa jichu űno Cristo marine “Mūsa basi cahma űu tuhtiena tjiga”, ni yahure. Masare noano yahuriro jira tiro. Sā judio masa, judio masa jieraina mehne puā curua mari jichu űno, tiro cū curuata yoare marine. Ducatari sahrinore ti tju site cohāno yoaro sehe mari cahma űu tuhtirire duhuchu yoare tiro. ¹⁵⁻¹⁶ Ō sehe tīre yoare tiro: Mari űāa buhirire crusaru yariaro marine pichacaru wahaborinare yuhdāchu yoare. Ā yuhdāchu yoaro to yaina jichu yoare marine. Ā yoaro puā curua mari jimarirore cū curuata wahma curua jichu yoare marine. Ā yoaro panopu mari cahma

ñu tuhtiina mari jimaritore marine cānoi noano jichu yoare. Ā yoaro judio masa sã dutia cjrيره cohāre tiro. Tĩ dutia marine pua curua jĩ dutiri jimare. Mipure cū curuata jija mari. Cristo Cohamacu yaina jichu yoare marine.

¹⁷ Ā yoa Cristo noaa buheare marine yahuro tari jire. Mūsa judio masa jieraina Cohamacu yare cjaeraina jiri jimare. Mūsa ā jichu ñano mū sare yahuro tari jire tiro. Sã judio masa sehe Cohamacu yare cjaai. Sã cāhure yahuro tari jire. Ā yahuro taro jipihitina marine cū curuata noano mehne jĩ dutiro tari jire tiro. ¹⁸ Mipure jipihitina mari judio masa, judio masa jieraina cāhu Cohamacu mari Pucu mehne noano jĩ masija mari. Espiritu Santo to yoadohoa mehne mari Pucu mehne noano jĩ masija mari. Cristo sehe marine ā noano jichu yoari jire. ¹⁹ Ā jina mipure pa dihta macaina yoaro sehe jierara mūsa. Mipure Cohamacu yainare ñu tuhtiina jierara mūsa. Cohamacu yaina mehne macaina jira mūsa. To ya curua macaina jira mūsa. ²⁰ Cohamacu ya durucua yahu turiaina, sã cāhu to yare buhe dutiro to cūrina jina to ya durucua mū sare yahu dūcai sã, wahma wūhure Cohamacu ya wūhure ti dahre dūcariro seheta. Tĩ wūhūi ti cū mūhtari tāca yoaro sehe jiriro Cristo sehe marine yūhdūchu yoariro mari-achu mari ne yūhdūeraboa. ²¹ Ā jiro to tuaa mehne marine to yainare cū curuata jichu yoare tiro, Cohamacu wūhure ñaa marieni wūhure ti dahreboriro seheta. To ā yoachū to tuaa mehne noaina wahaja mari, Cohamacu to ñūchu. Mari ā jichu ñano, tirota mari mehne jirucura. ²² Ā jina Cristo yaina jina jipihitina paina to yaina mehne cū curua wahare mūsa cāhu. Mūsa ā wahachu Cohamacu to Espiritu Santo mūsa mehne jiro nina, Cohamacu ya wūhūi to jiboro seheta.

3

Judio masa jierainare noaa buheare yahuro jija Paulo

¹ Ā to ya curua macaina mūsa jichu ñūcu yūhū Paulo mū sare sini payoja Cohamacure. Cristo Jesu yare mū sare jipihitina judio masa jierainare yū yahuri buhiri peresupū jija yūhū. ² Cohamacu wiho jiina mari jipachata, marine cahīno, noaa buheare mū sare judio masa jierainare yūhure yahu dutiro cūre. Tīre masi tuhsare mūsa. ³ Panopū masare to yahuerari cjrيره Cohamacu baharopūre yūhure masichū yoare. Ahrire mahānocā yahu mū sare joaroca tuhsūhi. ⁴ Yū ā joarocarire buhena Cristo to yare yūhure to masichū yoarire masinahca mūsa. ⁵ Tĩ to yahuri cjrيره panopū macainare tiro yahuera tiha. Mipū sehēre sāre Jesu to cūrinare Cohamacu yare yahu mūhtaina

cāhure sã jipihitina tirore dahra cohtainare to yahuri cjrيره masichū yoare Cohamacu. To yairo Espiritu Santo sehe sāre masichū yoabasare Cohamacure. ⁶ Ō sehe jira to yahuri cjrيره: Sã judio masa dihtare Cohamacu yūhdūchu yoarerara. Judio masa jieraina cāhure yūhdūchu yoarohca tiro. Ā jina sã judio masa, mūsa judio masa jieraina mehne Cristo yaina jina, cū pjacu yoaro sehe cū curuata jija mari. Ā jina mari jipihitina Cristo Jesu yaina jina cāno potori Cohamacu “Mū sare yūhdūchu yoaihtjā”, ni to yūhdūchu yoaina jija mari.

⁷ Cohamacu yūhure pja ñūno, yūhure cahīno ahri noaa buheare yahuhtirore yūhure cūre. To tuaa mehne ā cūre yūhure tiro. ⁸ Jipihitina Jesu yaina ti doca macariro waro jija yūhū. Yū ā jipachata judio masa jierainare noaa buheare yahuhtirore cūre Cohamacu yūhure. Tĩ buhea Cristo noa yūhdūariro to jiare, noa yūhdūa to cjaare to wahtire yahura marine. ⁹ Yūhure ā cūno Cohamacu “Ō sehe yūhdūchu yoaihtjā masare”, nino to yūhdūchu yoachtore noano yahu pahñōhtirore cūre yūhure tiro. Ā jiro panopū macainare ti buheare ne yahu pahñōerasinia tiha Cohamacu. Jipihitiare bajuamehneriro jira tiro. ¹⁰ Mipūre noaa buheare yahu dutiro cūre marine to yainare tiro to noano masi pahñōare masichū yoaro taro. Masi pahñōiro to jia tiare mūano macaina pūhtore masichū yoa duari jire. Ā yoaro taro noaa buheare buhe dutire marine Jesu yainare. ¹¹ Ahri yahpa to jihito panopūta “Masare pichacapū wahaborinare yūhdūchu yoaihtjā”, nia tiha Cohamacu. Ā niriro jiro mipūre mari pūhtoro Cristo Jesu yaria to masa mūjano mehne to niriro seheta marine yūhdūchu yoara Cohamacu. ¹² To ā yūhdūchu yoachū mipūre Cristore wacū tuana to yaina wahaja mari. To yaina jina wacū tuaa mehne, cuiro marieno Cohamacu mehne durucu masija mari. ¹³ Noaa buheare mū sare yū buhiri buhiri mipūre peresupū jicu yū ñano yūhdūchu ñūna cahyaena tjiga. Noaa buheare yū yahuchū tuhona Cohamacu yaina wahare mūsa. Yū ā yoari buhiri peresū jija. Ā jicu mū sare yū yoadohori buhiri ñano yūhdūi nija. Mūsa noano yūhdūhto sehe ā wahaja yūhū. Tīre masina wahchega mūsa. Tīre tuaro wahche dutija mū sare.

Cristo masare tuaro cahīna

¹⁴ Ā jicu ahri jipihitina Cohamacu mari Pucu to yoarire wacūcu tiro pano na tuhcuca caha sūcu sini payoja mū sare. ¹⁵ Tiro jipihitia curuari macaina mūanopū jiina, ahri yahpai jiina cāhu ti Pucuro jira. Jipihitiare bajuamehneriro jira tiro. ¹⁶ Tirore ō sehe

ni sini payoja musare: Tiro masi pahñoriro jira. Túa yuhduariro jira. Á jicu to tuaa mehne musare noano to wacü tuachü yoahito sehe sini payoja. Espiritu Santo to yoadohoa mehne á yoarohca. ¹⁷ Á sini payocu Cristore musa wacü tua namohto sehe tiro musa mehne to noano jihto sehe sini payoja musare. Á jicu painare noano cahñina musa jihto sehe sini payoja musare. ¹⁸⁻¹⁹ Jipihtina paina Cohamacu yaina cühu musa mehne Cristo masare to tuaro cahñare musa masihto sehe sini payoja. Tiro jipihtina masare cahñi yuhduariro jira. To á cahñi yuhduarire noano masi pahñohto basioerara. Á jipachuta to á cahñiro to jia tiare musa noano masihto sehe sini payoja musare. Á yoa to cahñare musa masichü cahmaja Cohamacu musa mehne to noano jihto sehe. Noa yuhduariro, ñaa marieriro to jiro seheta musa wahahto sehe to cahñare musa masichü cahmaja. Á jicu to cahñare musa masihto sehe sini payoja musare Cohamacare.

²⁰⁻²¹ Á yoa Cohamacare pjíro ño payoa mehne “Tiro tuariro jira”, nijihna. To tuaa mehne noaa sehene cohtota masina marine tiro. Marine noaina jichü yoa masina. Mari siniri yuhdoro yoa masina tiro. Mari cahmaare mari tuhaturi yuhdoro yoa masina tiro. Cristo Jesu yaina to ya curua macaina jina jipihtia dachoripe jipihtina Cohamacare ño payojihna. Áta yoajihna.

4

Cristo yaina jina cü curuata jija mari

¹ Á jicu yuhü, mari puhtoro Cristo to cahmaare yu yoari buhiri peresupu jiriro jicu, musare ó sehe ni tuaro dutija: Cohamacu to yaina cjihtire musare besea tiri jire. Á to beserina jina to cahmano seheta yoaina jiga musa. ² “Sã pinihta masi yuhduarucaina jija”, ni tuhoutuina jiena tjiga. Painare noano mehne yoaga suaro marieno. Musa mehne macaina musare ti ñano yoapachuta tinare cahña mehne noano yoaga. ³ Á jina Espiritu Santo to yoadohoa mehne noano mehne cãno mehne jirucuga musa. Á yoana cahmachea marieno jinahca musa. ⁴ Cü pjacu yoaro seheta cü curuaihta jija mari. Á yoa Espiritu Santo cãirota jira. Cohamacu to yaina cjihti musare besea tiha musare yuhduchü yoaro taro. Á jina to yuhduchü yoahore cohtasinina musa. Cãnota jira musa cohtoro. ⁵ Mari puhtoro Cristo cãirota jira. To yahua, mari wacü tuaa cãhu cãnota jira. To yainare bautisarire yahua cãhu cãnota jira. ⁶ Á jiro Cohamacu cãirota jira. Tiro jipihtina Pucuro jira. Á jiro jipihtina mari puhtoro jira. Jipihtinare marine to

cahmano seheta yoachü yoa masina tiro. Jipihtina mari mehne jira. Á yoa jipihtiropu jira tiro.

⁷ Cü curua mari jipachuta jipihtina marine cãinare mari yoa masihtire cüre marine Cristo. Tiro to cüriro seheta yoa masija mari. Tiro marine á cüno paye barore to á wanocaboriro seheta yoaro nire tiro. ⁸ Áta nina Cohamacu yare ti joari püpu:

“Cohamacare ñu tuhtinare to yuhduarucari baharo tiro tinare naa mujaa wahare.

Á naa mujano tiro payu á wanocare ahri yahpa macaina sehene”,

ni joaa tiha panopure.

⁹ “Tiro mujaa wahare”, to nichü wamanore muanopu jiriro ahri yahpapure to tari cãhure mari masija. Ahri yahpapure to duji tarire mari masija. ¹⁰ Á jiro õpüre duji tariro tirota jira mujaa wahariro. Jipihtiro bui mujaa wahari jire tiro, jipihtiropu jiro taro. ¹¹ Tiro jira “Ahri yahpa macainare payu á wanocariro”, ti niriro. Masare to á wanocano seheta tiro payu ti yoa masihtire cüri jire masare. Ó sehe cüri jire tiro: Cãinare Cristo to yare yahu dütí to warocahtinare cüri jire. Painare Cohamacu ya durucuare yahu turiahtinare cüri jire. Noaa buheare buhe tinihtinare painare cüri jire. Cristo yaina cahmachuinare ñu wihboina cjihtire, noano buhehtina cjihtire cüri jire painare. ¹² Tó sehe yoa, dahrahtina cjihtire cüri jire marine painare to yainare mari yoadohohto sehe Cohamacare mari masi noano namohto sehe. Á cüri jire marine to yainare tirore mari wacü tua namohto sehe. ¹³ Á jina mari jipihtina noano mehne cãno mehne jinahca. Áta jiro cahmana marine Cristore wacü tuaina jina. Á jina mari jipihtina Cohamacu macanore noano masinahca. Á yoana Cristo tuariro, noano masiriro to jiriro seheta mari cãhu noano masiina, Cohamacare noano wacü tuaina wahanahca.

¹⁴ Mari á wahana macanacã yoaro sehe jisi mari. Macanacã noano tuho masierasínica. Paina ti buhechü “Ahri potocã jira”, ni ti mahño miñnia mehne ti mahñocheü tinacã yoaro sehe jiina soro jia buheare cahmana. Á yoa paina ti soro buhechü ti buhea sehene cahmana tjoa. Pjiri ma macaa pahcõri ti á cohtotarucuro seheta tó sehe á cohtotarucuína jira tinacã yoaro sehe jiina. Tina yoaro sehe jisi mari. ¹⁵ Ó seheta yoanahca mari: Mari mehne macainare cahma cahña, potocã noaa buheare cahma yahunahca mari basi. Á yoana macanacã bucua tuho masiina ti wahariro seheta mari cãhu tuaina, Cohamacu yare noano masiina wahanahca. Cristo to jiro sehe wahanahca. Tiro jira mari

dapu. ¹⁶ To yaina jina to pjacu yoaro sehe cū curuaihta jija mari. Ā jina mari capari, mari cahmori, mari dahpori cū pjacui ti noano jiro seheta mari cūhu payu jipanahta cāno potori noano jija. Mari ā cāno potori mari jihto sehe Cristo yoadohora. Ā jina mari wamomaca mari pjacure to noano yoadohoro seheta mari noano yoadohoja paina Cristo yainare. Mari mehne macainare Cristo yainare noano cahīna, tinare noano yoadohona, tuaina Cristore wacū tua namoina wahanahca mari.

Cristo yaina wahana mari űaa yoaare duhu, noaa sehere cohtotaja mari

¹⁷ Ā yoa mari puhtoro Cristo to dutiro mehne ō sehe nihtja musare: Cohamacure cahmaeraina waro yoaro sehe yoena tjiga musa. Tina ti tuhotua sehe űaa dihta jira. Ā jia ti tuhotua yaba cjihiti jierara. ¹⁸ Ā jia nahitianoi ti űu masieraro seheta tina Cohamacu yare ne masieraputiara. To yare ne tuhoeraputiara. Tuho duaerara tina. Ā jia Cohamacu to noano ji dutirio seheta jierara tina. ¹⁹ Ā jia tina űaare yoaa ne buo tieraputiara. Ā yoa ne cahyaerara. űaare ti goa pjaa dihtare yoarucura. Jipihitia ti űaare yoaare duhu duaerara. ²⁰ Musa sehe ā yoerare, Jesure masi ducana. ²¹ Potocā to yare tuhoina musa jichu, Jesu yare noano masina musa jichu musa sehere tina yoaro sehe yoa dutierara tiro. ²² Ā jina űano wete tia suhtire musa tjewe cohāno seheta panopu musa yoari cjirire duhunocahga. Ti pjare űaare yoarucuina musa jichu ti űaa sehe musare dojomehmeno niri jimare. “űaare yoana, noano wahchenahca”, ni tuhotuina jipanahta ne potocā wahcherare musa. ²³ Ā yoa musa tuhotuare noaa sehere Cohamacu to cahmano seheta cohtotaro cahmana musare. ²⁴ Ā jina noaa sehere cohtotaina jiga musa. Tō sehe jiina Cohamacu yoaro seheta jira. Musa ā jiina jina, noaare yoarucunahca. Ā yoana űaare űu yabinahca.

²⁵ Ā jina mahño namoena tjiga musa. Musa mehne macainare quihōno yahuga, mahñono marieno. Mari cū pjacu yoaro sehe cū curua macainata jina nija. Ā jina musa mehne macainare mahñoenā tjiga.

²⁶ Paina mehne suana, űaano yoena tjiga. Ā jina suana, cū dacho waro noano suarucena tjiga. ²⁷ Yoari pja suana, watino to cahmano sehe yoana nica. Ā yoena tjiga watino musare “Dojomehneri”, nina.

²⁸ Musa mehne macaina Jesu yaina musa jihto pano yacaina jirina cjiri pari turi yacaena tjiga. Ā yoana mipu sehere noano

dahraga musa wapataa mehne pjacuoinare musa yoadohohto sehe.

²⁹ Ne űano durucena tjiga “Painare dojomehneri”, nina. Noaare durucuna painare yoadohora Cohamacu cahmaare musa masi namohto sehe. Ā jina noaa dihtare durucuga. ³⁰ űaare yoana Espiritu Santore cahyachu yoana nica musa. Ā yoena tjiga. Mipure pihitiri dacho pano Cristo marine to naahto pano Cohamacu to Espiritu Santo marine űu wihbora űaare mari yoerahto sehe. Ā jiro Cohamacu yaina mari jiare masichu yoara tiro marine. Ā jina tirore cahyachu yoena tjiga.

³¹ Ā jina ne painare űano yoa namoena tjiga. Cahma sayo namoena tjiga. Painare sua, űano ni saűurucu namoena tjiga. Painare űano quiti dahre namoena tjiga. Ne painare űano ni tuhotu namoena tjiga. ³² Ā yoa musa mehne macainare noano mehne noano yoaga. Cristo yaina musa jichu űuno musa űaa buhirire bonocahre Cohamacu. Tō seheta musa cūhu paina musare ti űano yoachu űuna ti űaa yoarire bonocahga.

5

“Cohamacu pohmare ō sehe jiro cahmana”, ni yahuha Paulo

¹ Ā yoa Cohamacu pohna to cahīna jina Cohamacu to jiro sehe jiga musa. ² Ā jina painare ā cahīrucuga. Cristo marine cahīno, mari űaa buhiri yariari jire. Ā yariaro Cohamacure ji coachu yoari jire tiro. Ā jina marine to cahīriro seheta musa cūhu painare cahīga.

³ Ā jina Cohamacu yaina jina ne numia mehne űano yoena tjiga. Numia cūhu musa mehne űano yoena tjiga. Paye űaare tō sehe jia űaare yoena tjiga. Paye barore cahma yuhdarucaena tjiga. Ne ā yoeraro cahmana musare, Cohamacu yaina jina. ⁴ Ā yoana buoro durucueraro cahmana musare. Tuho masieraina yoaro sehe durucueraro cahmana musare. Ā jina űano ni bujuperaro cahmana musare. Ahri sehere yoaro cahmana musare. Cohamacu mehne durucuga musa. Ā durucuna tirore “Noano yoahre muhu sare”, nino cahmana. ⁵ Paye barore goa pjana, tīre tuaro cahmana, “Cohamacu jira”, ti nia masarine ti űo payoro seheta yoana nija mari tīre. Ā yoa numia mehne űano yoaina, űaa dihtare tuhotuina, paye barore goa pjaina Cohamacu Cristo mehne puhtoro ti saho jiropu ne wahasi tina. Tīre noano masija mari. ⁶ Ō sehe yoaina ti yoari buhiri buhiri dahrerohca Cohamacu tirore yuhdarucainare. Ā jina paina musare “Ahri űaa jierara”, ti ni mahñochu tuhoena tjiga.

7 ⁷ Ā jina tó sehe yoa yǘhdǘracainare ne piti tiena tjiga.

⁸ Cristo yaina mǘsa jihto pano ā jirina cǘrirta jire mǘsa cǘhu nahitianoi jiina yoaro seheta. Mipǘ sehere to yaina jina buhriaroi jiina ti űu masino seheta, Cohamacǘre noano masina mǘsa. Cohamacǘ yaina noaare yoara. Ā jina tó seheta yoaga mǘsa cǘhu. ⁹ Ā jina Cristo yaina jina buhriaroi jiina yoaro seheta noaare, Cohamacǘ cahmaare, mahűono marieno yoarucunahca mǘsa. ¹⁰ Noaare mari yoachǘ űuno mari pǘhtoro Cristo wahchera. Tó sehe jiare, mari pǘhtorore wahchechǘ yoaa sehere masi wahcǘga mǘsa. Ā masina tǘre yoaga. ¹¹ Cristore cahmaeraina nahitianoi jiina yoaro seheta űaa ti yoaa, űaa waro jira. Ā jina tina yoaro seheta mǘsa sehe yoaena tjiga. Noaa buheare Cristo yare yahuga tinare. Ā yoa ti űaa yoaare tinare masichǘ yoaga buhriaroi mari űu masino seheta. ¹² Masa ti űuenoi tina űano yoa cohtara. Ti ā yoarire durucua mari buo tiboaa. Ā yoaa űaputire yoara tina. ¹³ Ā jina tinare noaa buheare mari yahuna űaputiina ti jia tiare masichǘ yoana nija mari tinare buhriaroi mari űu masino seheta. ¹⁴ Tó seheta noaa buheare tinare yahuna, űaina ti jia tiare masi pahűochǘ yoana nija tinare. Ā jia ō sehe ni yahura paina:

“Ne, carűina ti tuhoeraro seheta yǘhǘre tuho duaeraina, tuhoga mǘsa carűina ti wahcǘno seheta.

Ā yoana yariaina tuhoeraina ti jiro seheta Cohamacǘ yare tuhoeraina ji namoena tjiga.

Mǘsa ā yoachǘ űuno, Cristo buhriaro yoaro sehe jiriro mǘsare noano masichǘ yoarohca”,

ni yahura.

¹⁵ Ā jina dachoripe noano yoaga mǘsa. Tuho masieraina yoaro sehe jiena tjiga. Tuho masiina jiga. ¹⁶ Mipǘ macaina masa űabiaro yoarucura. Ā jina mǘsa sehe noaare, Cristo yare mǘsa yoa masino seheta ā yoarucuga mǘsa. ¹⁷ Ā yoana tuho masieraina jiena tjiga. Cohamacǘ to cahmaa sehere noano masiga. Ā masina tǘre yoaga. ¹⁸ Ā yoa cahaena tjiga. Cahainare űano wahahto cua yǘhdǘara. Ā jina pahmoa core pjiro cahmaena tjiga. Espǘritu Santo sehere pjiro cahmaga mǘsa mehne to noano jihto sehe. Tirore noano yahtiina jiga. ¹⁹ Mǘsa basi Cohamacǘre űo payoa basaare cahma durucuga. Ā yoa Salmore Cohamacǘ yare basaare, paye tirore űo payoa basaa cǘhǘre tirore basa payoga mǘsa. Noano wacǘ űo payoa mehne basa payoga. Ā yoana mari pǘhtoro Cristore wahche payoga. ²⁰ Cohamacǘ mari Pǘs

jiptiatiare mǘsare to warire, to yoari cǘhǘre wahchena, “Noana”, ā nirucuga mǘsa tirore. Mari pǘhtoro Jesucristo yaina jina mari Pǘcǘre “Noana”, ā nirucuga mǘsa.

“Mǘsa cǘhu wǘhu macaina Jesu yaina jina, ō sehe yoaga”, ni yahuha Paulo

²¹ Ā yoa mǘsa mehne macainare noano űo payoa mehne cahma yahtiina jiga Cristore noano űo payoia jina.

²² Mǘsa namosǘnumiare yahuihtja mipǘre. Mari pǘhtoro Cristore mari yahtiriro seheta mǘsa manǘsumare noano mehne yahtia numia jiga. ²³ Jesucristo marine yǘhdǘchǘ yoare to pjacǘ yoaro sehe jiina to ya curua macaina mari jihto sehe. Ā yoa mari to ya curua macaina mari pǘhtoro to jiro seheta mǘsa manǘsuma mǘsa namosǘnumia bui pǘhtoa jira. ²⁴ Cristo yaina jina tirore ā yahtirucuja mari. Tó seheta mǘsa manǘ tia numia mǘsa manǘsumare noano yahtirucua numia jiga.

²⁵ Mǘsa manǘsumare yahuihtja tjoa mipǘre. Cristo marine to yaina jichǘ yoaro taro, mari jine cahűno, mari yaro jiborirore yariari jire. Ā jina marine to cahűiro seheta mǘsa cǘhu mǘsa namosǘnumiare noano cahűrucuga. ²⁶ Cristo ya buheare tuhona Cohamacǘ yaina wahahi mari. Ā jina to ya buheare “Quihűono jira”, ni mari tuhoturi baharo, mari űaa buhirire cosawere ti buhea mehne. Co mehne marine ti bautisachǘ cǘhǘre mari űaa buhirire Cristo to cosawerire űona nija mari. ²⁷ Ā cosawere tiro marine to yaina cǘhti yoaro taro. To ā cosawechǘ ne űaa buhiri marieina jinahca, Cohamacǘ to űuchǘ. ²⁸ Mǘsa namosǘnumiare cahűina, mǘsa basi mǘsa pjacǘrere mǘsa cahűno seheta ti numiare cahűiga. Mari namore cahűina jina mari pjacǘre cahűina jiga. ²⁹⁻³⁰ Ne mari pjacǘrere űano wahachǘ cahmaeraja. Mari chuare chuna noano yoana nija mari pjacǘrere. Cristo yaina jina to pjacǘ yoaro sehe to ya curua macaina jija mari. Ā jiro marine noano yoara tiro. Cristo marine to noano yoariro seheta mari cǘhu mari pjacǘre noano yoaja. (Ā jina mari namosǘnumia cǘhǘre āta noano yoaro cahmana marine.) ³¹ Āta nina Cohamacǘ yare ti joari pǘi: “Ā yoa mǘno to pǘcǘsumare wijaaro to namono mehne jirohca. Ā jia tina puaro jipahca cǘiro yoaro sehe jiahca”, ni joaa tiri jire panopǘre. ³² Ahri to joari cǘrere paina noano tuhoerari jire. Tǘre ō sehe ni yahuihtja mǘsare. Ō sehe ni yahuro nica: “Cristo to yaina mehne cǘ pjacǘ yoaro seheta cǘ curuata jira”, ni yahuro nica. ³³ Ā jicu mǘsare ō sehe ni yahu namoihtja tjoa: Mǘsa pjacǘrere mǘsa cahűno seheta mǘsa namosǘnumiare cahűiga. Ā yoa mǘsa manǘsumare noano űo payoga mǘsa.

6

¹ Mipure msa pohna yahuihtja. Mari puhtoro Cristo yaina jina msa pucsumare noano yuhtiina jiga. Msa a yoana, quihono yoana nina. ²⁻³ O sehe nia tiri jire Cohamacu dutia: "Msa pucsumare noano no payoga", ni dutia tiri jire tiro. Ahri dutia mehne Cohamacu yahu namoa tiri jire. O sehe nia tiri jire: "Msa pucsumare no payona, ahri yahpau yoari pja wahchea mehne jinahca msa", ni yahua tiri jire. A ni yahuro ahri dutiare mari yuhtichu mari noano wahahtore coa cuno nia tiri jire. A jina to niriro seheta msa pucsumare no payoga.

⁴ Mipure ti pucsumare yahuihtja: Msa pohna a tuhtirucuenta tjiga, "Suachu yoari", nina. Mari puhtoro Cristo to cahia mehne to yoadohoa mehne tinare noano bucnoaga. A yoa quihono ti yoerachu nuna tinare noano yahuga.

⁵ Mipure dahra cohtainare yahuihtja: Cua pisaro mehne, no payoa mehne ahri yahpa macainare msa puhtoare, musare dahra dutiinare noano yuhtiina jiga. Mahono marieno noano yuhtiina jiga. Cristore msa yuhtiro seheta tinare yuhtiga msa.

⁶ Ti nuocaró dihtare yuhtiina jiena tjiga. To sehe yoaina masa dihtare tinare nu jicoachu cahmana. Msa sehe Cristore dahra cohtaina msa jiro seheta msa puhtoa cahure a yuhtirucuga. Cohamacu to cahmano seheta noano wahchea mehne yuhtiina jiga. ⁷ A jina Cristore yuhtiina msa jiro seheta wahchea mehne yuhtiga msa puhtoa cahure. Masa dihtare yuhtiina jierara msa. ⁸ A yoana ahrire wacuga msa: Mari jipihtina noare mari yochu nuano mari puhtoro Cristo noano yoarohca marine. Dahra cohtainare, dahra cohtaina jieraina cahure noano yoarohca.

⁹ Mipure puhtoare dahra dutiinare yahuihtja: Musare dahra cohtainare noano yoaga. Tinare noano yu yoa dutiriro seheta yoaga msa chu tinare. Tinare noano mehne dutiga, tuhtiro marieno. Muno macariro Cohamacu potocata ti puhtoro jira. Msa yairo puhtoro jira tiro chu. A jina jipihtina msa tirore dahra cohtaina dihta jira. A jiro tiro cano potori nuna musare jipihtinare. A jina musare dahra cohtainare noano mehne dutiga, tuhtiro marieno.

Cristo yaina watnore ti ducataare yahua Paulo

¹⁰ Ahrire yahu batoihtja musare: Cristore noano wacu tuaina jiga msa. Mari puhtoro Cristo msa mehne jira. A jina tua yuhariro to jia mehne wacu tuaina jiga. ¹¹ Watno marine mahono, nano yoa dutira

marine. Cohamacu marine ducatare naare mari yoerahto sehe. Marine to ducataa surara to ducataro suhtiro, comaa suhtiro yoaro sehe jira. A jina ti suhtirore noano sano seheta Cohamacu to ducataare noano chu pahnoaga. ¹² Jesu yaina mari jichu, marine nu tuhtiina masa waro jierara. Muno macaina naina, tuaina, tina sehe jira marine nu tuhtiina. Watia ahri yahpa macaina puhtoa jira. A jia tina chu jira marine Jesu yainare nu tuhtiina. ¹³ A jina mipure ducataro suhtirore msa sano seheta Cohamacu musare to ducatahto sehe to yare noano chu pahnoaga. A yoana watno musare to nano yoa dutichu, musare to nano yoa duachu, tirore ducatanahca. A yoa tirore yuhduranahca. ¹⁴ A yoana tuaina jiga. Cohamacu musare to ducatahto cjihtore o sehe yoaga msa: Surara to comaa suhtirore to ta dihuri dare sari dare noano ta diho to ducataro seheta, Cohamacu yare potoca yahua noano wacuga msa, watnore msa ducatahto sehe. A yoa, surara to comaa suhtiro mehne to yajeripohna to ducataro seheta Cristo to yoadohoa mehne quihono yoaina jiga msa, watnore msa noano ducatahto sehe. ¹⁵ Surara to dahpo suhti mehne to dahporire to noano ducataro seheta noaa buheare noano masiga msa, watnore noano ducatahto sehe. Ti buhea marine noano jichu yoara. ¹⁶ Surara to ducataro tu mehne to ducataro seheta Cristore noano wacu tuarucuga msa, watnore msa ducatahto sehe. Buea yucu mehne musare to buaboro seheta watno musare nano yochu yoa duara. A jina Cristore noano wacu tuana, watnore ducatanahca msa. ¹⁷ Surara to comaa chapea mehne to dapure to ducataro seheta musare pichacapu wahaborinare Cristo to yuhdachu yoarina jiga msa, watnore msa ducatahto sehe. Surara to nosari pji mehne to ducataro seheta Cohamacu ya buheare noano masiga msa, noano msa ducatahto sehe. A jina painare noano yahuga to yare. Ti Cohamacu ya buheare Espiritu Santo marine yahua. ¹⁸ A watnore msa ducatare Cohamacu dachoripe a sinirucuga. Espiritu Santo to yoadohoa mehne a sinirucuga. A yoana noano wacu masiga. A sinina, pumena tjiga. Jipihtina Cohamacu yainare a sini payorucuga. ¹⁹ A yoana yuhu cahure sini payoga Cohamacu. O sehe ni sini payoga: Noaa buheare, panopu ti masierari cjiire noano yu yahuhito sehe sini payoga yuhare. A jina cuiro marieno yu yahuhito sehe sini payoga yuhare. ²⁰ Cristo to yare yahu dutiro yuhare warocare. Yu a yahuri

buhiri peresup_u jija mi_ure. Ōi jipac_uta cuiro marieno to yare y_u yahuhto sehe sini payoga y_uh_ure. To yare yahuhtiro jiita nija y_uh_u.

Paulo noa duti batoaha

²¹ Mi_ure Tiquico m_usa cahap_u s_uro y_u jia tiare m_usare yahu pah_unonohca. Tiro mari coyeiro mari cah_uiro jira. Ā jiro mari puhtoro Cristore dahra cohtariro ā jirucura.

²² Sā jia tiare m_usare yahu dutic_u tirore warocai nija m_usa noano wahchehto sehe.

²³ Cohamac_u mari P_ucu mari puhtoro Jesucristo c_uh_u m_usare Jesu yainare tirore wac_u tuainare noano jich_u yoajaro. Ā jiro m_usare noano cahma cah_uch_u yoajaro.

²⁴ Jipih_utina mari puhtoro Jesucristore cohtotaro marieno cah_uruuinare m_usare noano jich_u yoajaro.

Filipenses

Peresupn jiriro ahri tjure joarocaha Paulo

¹ Yuhñ Paulo, Timoteo mehne Jesucristo dahren cohtaina jija sã. Æ jina jipihinare musare Jesucristo to noaina wahachñ yoainare Filipo macainare joarocaja sã. Musa puhtoã cãhure, musare yoadohoina cãhure joarocaja. ² Cohamacñ mari Pucñ, mari puhtoro Jesucristo mehne musare noa dutija. Cohamacñ to yoadohoa mehne noano jiga musa.

Paulo Jesu yainare Cohamacñre sini payoha

³⁻⁶ Cohamacñ musare noaa sehere cohtotachñ yoaro nina. Æ jiro musare to Æ yoa ducariro seheta sohtori dahrerohca tiro. Æ jina Jesucristo ahri yahpãpãre to wihichupãre ñaa marieina jinahca musa. Wahmanopãre Jesu yaina musa jiri baharo, mipã cãhure yoadohora musa yuhñre noaa buheare yu buhechu. Musa Æ yoaina jichuta Cohamacñre “Noana”, nija yuhñ. Musare wacũcũ õ sehe dihta nija yuhñ. Musare Cohamacñre sini payocñ, wahchea mehne sini payoja. ⁷ Musare yu Æ tuhotuchñ noa nina. Noaa buheare “Potocã tjira”, puhtoare yu ni tua yuhdũrucachñ musa yuhñre yoadohore. Tí buheare potocã ti jiare tinare yu yahuchñ yoadohore musa. Peresui yu jichñ cãhure musa yuhñre yoadohore. Cohamacñ marine noano yoaro, to yare cũre marine. Musa yuhñre yoadohore. Æ jina to cũire mari cõno potori yoana nija. Æ jicñ yu yajeripohna mehne tuaro wacũja yuhñ musare. ⁸ Jesucristo to cahña mehne tuaro musare wacũja yuhñ. Yu Æ wacũchñ Cohamacñ tĩre masina. ⁹ Musare õ sehe ni sini payoja yuhñ Cohamacñre: Cohamacñ yare noano masia mehne, tuho masi pahñaõ mehne painare musa cahñ namohto cjihstore sini payoja yuhñ musare Cohamacñre. ¹⁰ Noa yuhdũre musa masichñ cãhure sini payoja musare. Musa Æ masina Cristo ahri yahpãpã to tjua tachñ noaare yoaina, ñaa buhiri marieina jinahca musa. ¹¹ Æ jina jina noaare, Cohamacñ cahmaare yoanahca musa. Musare Æ yoachñ yoarohca Jesucristo sehe. Cohamacñ noabirariro tuariro to jiare ñono taro, jipihtina tire to ti ño payohto cjihstore to cahmaare musare yoachñ yoarohca.

Paulo Cristo yairo to jia tiare yahuha

¹² Yu coyea, ahrire musa noano masichñ cahmaja yuhñ. Mipãre peresui jiriro yu jiro watoí noaa buhea sehe Æ mñ tárucuro nina. Paina masa tí buheare cahmaina

waha namoa nina. ¹³ Æ yoa Cristo yairo yu jiri buhiri peresui yu jire masi pihtira puhtoro ya wuhñ macaina surara. Jipihtina paina cãhñ õi jina tĩre masina. ¹⁴ Æ jia peresui yu jichñ ñaa, payu mari coyea Jesu yaina mari puhtoro Jesure wacũ tua namoa nina. Æ wacũ tuua, cuiro marieno noaa buheare painare buhera tina.

¹⁵ Cãina Cristo yare buheraborina jipahta yuhñre ñu tuhtia, Cristo yare buhera paina tina sehere ñu wahãchñ cahmaa. Paina sehe noano mehne Cristo yare buhera. ¹⁶ Noaa buheare yu ni tua ducatahti cjihstore Cohamacñ yuhñre to cũrĩre noano masina ah-rina sehe. Æ masia tina cahña mehne Cristo yare buhera. ¹⁷ Paina sehe yuhñre ñu tuhtia, masa tina sehere tí ñu wahãchñ cahmaa, Cristo yare buhera. Æ yoaa peresui yu jichñ tina yuhñre ñano yuhdũchñ yoa duara. ¹⁸ Noanohca. Cristo yareta buhea nina. Tina Cristore potocã cahñrapahta Cristo yareta buhera. Paina sehe noano mehne buhera. Jipihtina tina to yare tí buhechñ wahcheja. Æ jicñ wahche namoihca yuhñ.

¹⁹ Cohamacñre musa sini payori mehne Jesucristo Espiritu to yoadohoa mehne Cohamacñ to woriuro jiihca yuhñ peresupn jiriro. Tĩre masija. Æ jicñ Æ wahcherucihca yuhñ. ²⁰ Õ seheta yoaihca yuhñ. Dachoripe yu yoariro seheta mipã cãhure cuiro marieno Cristo yare buheja masa tireno noano tí ño payohto sehe. Õ seheta yoa duaja yu yoarire yu buheri cãhure yu buoro yuhdũerahto sehe. Catisinicñ waro õ seheta yoa duaja. Tina yuhñre tí wajã duapachuta õ seheta yoa duaja. ²¹ Catisinicñ Cristo yare yoasiniihca. Yariacupñ pinihta tí yuhdoro noano tjuaihca yuhñ. ²² Æ nipacũta catisinicñ Cristo yare yu yoa namohto sehe cati namosini duaja. Æ nipaihta yariaa cãhure cahmaja. ¿Di baro sehere yuhñ cahmabocari? Masiraja yuhñ. ²³ Yu õ sehe ni durucuchñ mijo nina yuhñre. Cristo mehne tuaro ji duaja. Æ jicñ mipãre tiro cahpã waha duaja. Catia yuhdoro ahri sehe noa yuhdũrucara. ²⁴ To Æ jipachũta musare yu yoadohohto cjihstore sehe catisinino cahmana yuhñre. ²⁵ Tĩre masicũ õi musa mehne yu jisinihtore masija yuhñ. Æ jisinihca musa Cristore wacũ tua namohto cjihstore tí wacũ tuua mehne musa wahchehto cjihstore. ²⁶ Ahri yahpai jisinicñ musa cahpã pari turi yu wahachñ musa wahchenahca. Cristo Jesu yuhñre to yoadohochñ masina, “Tuariro jira tiro”, ni ño payonahca musa tireno.

²⁷ Mipãre ahri dihtare yahuihtja musare. Cristo ya buhea tí niriro seheta jirucuga musa. Wacũ tuaina jiga. Æ yoa cahma

tju waro marieno noaa buheare ni tuaga. Ó seheta yu mariachu cūhare yu jichu cūhare musa yoachu cahmaja. Á jina musa jichu tuhoroca duaja yuhu. ²⁸ Musare nu tuhtiinare cuena tjiga. Musa á cuierachu nu Cohamacu yaina musa jichu masiahca tina. Á masia tina pichacapu ti wahalto cūhare masiahca. Cohamacu musare to yuhduchu yoahito cūhare masiahca. Ó seheta masichu yoara Cohamacu masare. ²⁹ Cristore musa wacu tuatore Cohamacu cūha musare. Ahri cūhare cūha tiro. Cristo yare musa yoari buhiri musa nāno yuhduhito cjihto cūhare cūha Cohamacu. ³⁰ Ó sehe jira tí. Cristo yaina musa jiri buhiri paina musare nāno yoara. Musare ti yoariro seheta yuhu cūhare nāno yoara tina. Musa mehne yu jichu yuhare ti á yoachu nūre musa. Mipu cūhare yuhare ti á yoachu tuhorocayuhiti musa. Á jina mari cāno potori nāno yuhduja.

2

Cristo wiho jiriro to sāari baharo, jipitina bui puhtoro cjihto wahaha

¹⁻² Cristo musare noano yajeripohna tichu to yoachu Cristo to cahia mehne musa wahchena, yuhare noano wahchechu yoaga musa. Á yoa Espiritu Santo jipitina musa mehne to jichu painare cahina, pja nuina jina, yuhare noano wahchechu yoaga musa. Ahri yu nihtire musa yoachu wahcheihca: Cāno potori noano yajeripohna tiga musa. Tuhsu, cāno potori tuhotuina ji, musa basi cahma cahiga. Á yoa cāno mehne noano jiga. ³ Musa ya dihtare tuhotuina, painare yuhduca duaina jiena tjiga. Á tuhotuocaina jiga musa. Á jina painare noano nō payo, ó sehe ni tuhotuga: “Tina sehe yu yuhdoro noaina jira”, ni tuhotuga. ⁴ Cāno painare yoadoho duaeraboca. To ya cjihti dihtare tuhoturiro jiboca. Tiro yoaro sehe yoarena tjiga. Paina cūhare yoadohoga.

⁵ Cristo Jesu painare yuhduca duaerariro to jiriro seheta musa cūhu painare yuhduca duaeraina jiga. ⁶ Tiro sehe Cohamacu waro jiparota “Cohamacu mehne cāno potori yu jiare ne wijaasi yuhu”, ni tuhotuerari jire tiro. ⁷ Á ni tuhotueraro tiro Cohamacu mehne cāno potori to jiare wijaa, opu taro, masunota masa bajuaro, tiro dahra cohtariro yoaro sehe ji ducari jire. ⁸ Á jiro tiro masuno cāno potori pjacu tiriro jiro, wiho jiriro waro sāari jire. Á sāano “Crusapu wajāga tirore”, ti nichu tiro yuhducaerari jire. Crusaputa variahtiro jiparota tiro yuhducaerari jire. ⁹ Á jiro Cohamacu jipitina ti nō payohtiroro cūri jire Jesure. Á jiro jipitina bui puhtoro sōri jire Cohamacu tirore, ¹⁰ jipitina mūano

macaina, ahri yahpa macaina, yariaina cjiri yahpa puhichapu jina cūhu Jesu wamare tuhoina ti na tuhcuca caha su ti nō payohto sehe. ¹¹ Á puhtoro sōri jire tirore Cohamacu jipitina “Jesucristo mari puhtoro jira”, ti nihtiro cjihtore. Á nia Cohamacure mari Pacure nō payoa nina.

Cristo yaina buhriaro yoaro sehe jia, noaare masare yahu, masichu yoara

¹² Á jina yu cahina yu coyega Jesu yaina musa mehne yu jichu musa yuhitucuriro seheta, mipu yu yoaropu jichu cūhare pano musa yuhituro yuhdoro yuhitiga yuhare. Á jina pichacapu wahaborina to yuhduchu yoarina jina, Cristo yoaro sehe wahana tana, Cristo to yoadohoro mehne nāa marieina jiga. Á jina nō payoa mehne papero marieno Cohamacu yare yoaga. ¹³ Cohamacu noaa sehere musare cahmachu yoaro nina to cahmano seheta musa yoahito sehe. Á jiro tīre musa yoahitore yoadohoro nina Cohamacu. (To á yoachu tí yu niriro seheta Cohamacu yare yoaga musa.)

¹⁴ Jipitiare yoana nureno marieno, musa basi jiape ni durucuro marieno yoaga. ¹⁵ Cohamacu pohna jira musa. Á jina nureno marieno jipitiare yoaga musa nāa buhiri marieina, nāare yoeraina musa jihto cjihto sehe. Á yoaga musa masa mahnoina, naina watoi dojomeheno marieno musa jihto cjihto sehe. Tina naina watoi jina buhriaro to nu masichu yoaro seheta noaa buheare buhena masichu yoara musa ahri yahpa macainare. ¹⁶ Tí buheare musa tuho nāhari baharo Cohamacu mehne á jirucuhitina wahare musa. Tí buheare ahri yahpa macainare musa á buhechu nuca musa mehne wahcheihca. Á jicu musare yu buherire “Wiho waro buherari jica yuhu”, niha yuhu. Á jicu Cristo ahri yahpapu to tjua tachu musa mehne wahcheihca. Á jicu buoro yuhdusi yuhu. ¹⁷⁻¹⁸ Cristore musa wacu tuachu Cohamacu musare nu jicoarohca. To á nu jicoachu masicu musare Cristo yare yu buheri buhiri yuhare ti wajā duapachuta wahcheihtja. Á jina mari jipitina cāno potori wahchenahca. Tó seheta musa cūhare cahyaro marieno wahchero cahmana yuhu mehne, yu yariari baharo.

Timoteore, Epafrodito cūhare yahuha Paulo

¹⁹ Mari puhtoro Jesu to cahmachu soaro mehne Timoteore musa cahapu waroca duaja yuhu musa jia tiare masicu tacu. Á masiputa wahcheihca. ²⁰ Tiro Timoteo yu yoaro seheta musa noano jihto cjihtore potocāta pjiro tuhotura musare. Pairo to yoaro sehe jiriro mariahna yuhu mehne. ²¹ Paina sehe jipitina ti cahmaa dihtare

yoa duaa, Cristo Jesu to cahmaa sehere yoa duarerara. ²² Timoteo sehe noano yoariro to jiare masina musa. Yu macu yoaro seheta tiro yuhu mehne noaa buheare yahua tihre. ²³ A jicu puhtoia yuhare ti dohse yoahore masicuta, Timoteore musa cahapu waroca duaja. ²⁴ A yoacu mari puhtoro Jesu to yoad-ohoa mehne soaro mehne yuhu cuhu musa cahapu wahaihtja.

²⁵⁻²⁶ Yuhare yoadoho dutina musa Epafroditore warocari jire yu cahapu. Tiro yu coyeiro Jesu yairo yuhu mehne dahrariro, yu piti, Cohamacu yare buhe tuariro jira. Tiro musare tuaro wacurocara. A jiro to dohatirire musa tuhochu masino tiro sehe pjiro cahya tuhohure. A pjiro to tuhotuchu nucu "Tirore musa cahapu waroca tjuro cahmana yuhare", ni tuhoutuja yuhu mipure. ²⁷ Potocata tiro tuaro dohatihre. Mahano yariabiho yuhdure. To a tuaro dohatipachuta Cohamacu tirore pja nuno, yuhdachu yoahre. Tiro to yariachu yuhu sehe pano yu cahyariro yuhdoro tuaro cahyaboa. A jiro Cohamacu yuhu cuhare pja nure tirore yuhdachu yoaro. ²⁸ A jicu mipu pinihtare soaro mehne tirore musa cahapu waroca duaja pari turi musa tirore nu, musa yajeri sahto sehe. Musa a wahchechu nucu yuhu cuhu wahcheihtja. ²⁹ A jina tirore Epafroditore mari puhtoro yairore mari coyeirore noano wahchea mehne piti bocaga. A yoana painare tiro yoaro sehe jinarere no payoa mehne nuga. ³⁰ Tiro Cristo yare yoadohomahno mahano yariabiho yuhdure. Musa sehe yuhare yoadoho masierachu tiro sehe yuhare yoadohomahre. A yoaro yariamahre tiro.

3

Noano yoaa warore yahuha Paulo

¹ Mipu pinihtare ahrire yahu batoihtja. Mari puhtoro yaina musa jina wahchega. Ahri buheare pano yu yahurire pari turi musare yahu joarocacu ji coaja yuhu. A jicu musare ahrire yahucu yoadohoi nija musare. ² Noano yoaga musa. Naare yoarcuina, dieya yoaro sehe jina naina circuncisiore yoa dutia, musa pjacurire yihso duara. Noano yoaga musa a yoa dutina sehe "Soro ni buheri", nina. ³ Tina circuncisiore yoapahta Cohamacu dutiare noano yoarerara. Mari sehe potocata Cohamacu dutiare noano yoina jija mari. Espiritu Santo to yoadohoa mehne Cohamacure no payoja mari. A jina Jesu yaina mari jiare wahchea mehne painare mari yahuja. "Sa mu saro Cohamacu dutiare bihoja", ne ni tuhouteraja. ⁴ A ni tuhouterariro jipaihta "Tinare doca dahrenocaja", ti yoaro sehe niriro jicu a tjiboa yuhu cuhu. Pairo

"Tinare doca dahrenocaja", ni yuhduraca duara. Yuhu sehe tiro yuhdoro a niboa yuhu. ⁵ O sehe yoariro jimai yuhu: Ocho dachori yu masa bajuari baharo circuncisiore yoari jire yuhare. Israe masuno jicu Benjami ya curua macariro jija yuhu. Yu pucusama hebreo masa ti jichu potocata hebreo masuno warota masa bajuai. Cohamacu dutiare quihono pahno duacu fariseo curua mehne saamai yuhu. ⁶ "Cohamacu ya jipucu", nucu noano yoamai. A yoacu Jesu yaina sehere nuno yoaa timai yuhu. Potocata Cohamacu dutiare yoacu tire yuhduracaro marieno yoa pahnoi. ⁷ Panopure "Ti noaa jipucu", ni tuhutumai. "Ti yu a ni tuhoturijiri panopu yu jia tiri yaba cjihti jierari jira", ni tuhoutuja mipure. O seheta ni tuhoutu ducal yuhu Cristore wacu tuacu tacu. ⁸ Cristo Jesu yu puhtore yu masichu pinihta noa yuhduara. A jicu paye sehere masa "Noaa jira", ti nirire "Ti jipihitia yaba cjihti jierari jira", ni tuhoutuja yuhu. Ti jipihitiare duhunocai Cristo ya sehere yoai tai. A jicu tire yu duhurire "Wiho jia waro jiri jira", ni tuhoutu Cristore noano masicu tacu tiro mehne macariro jicu tacu. ⁹ A jiro yu musaro noano yu yoari wapa "Noariro jira", ni nuerara Cohamacu yuhare. A jiro Cohamacu dutia Moise cjirore to curire yu yoari wapa cuhare "Noariro jira", ni nuerara. Cristore yu wacu tuari baharo "Noariro jira", ni nuna tiro yuhare. Cohamacu sehe marine buhiri marieina jichu yoara, tirore mari wacu tuachu. ¹⁰ A jicu pano yu ni tuhoutu muhtamari cjirore duhunocaja Cristore noano masicu tacu. Cohamacu tuaa mehne Cristo masa mujari jire. Ti tuaa mehne ji duaja. A yoa ti tuaa mehne noaare yoa duaja. Cristo crusapu yariari jire mari naa yoari buhirire cohano taro. A jicu to yare yu yoari buhiri tiro yoaro seheta nuno yuhdu duaja yuhu cuhu. ¹¹ A jicu Cristo to masa mujariro seheta masa mujahrtiro jiihca yuhu cuhu. Cristo yuhare to a masa mujachu yoahore wacu chohtaja yuhu.

¹² Ahri jipihitiare a nucu, "Cristo yare yoa pahnonocaja yuhu", ni tuhouteraja. Yu a ni tuhouterapachuta Cristo sehe to yairo yoa tuhsure yuhare. A jicu to yare tiro cuhare noano masi namo duacu tuaro mehne to yare yoaja yuhu. A yoahrtiro cjihtore besere tiro yuhare. ¹³ Yu coyea, "Cristo yare noano yoa pahnonocaja", ni tuhouteraja. A tuhouterapahita ahri pinihtare yoaja: Pano yu yoari cjirore a nunocaja. Tire pjiro tuhouteraja. A yoacu Cristo yare noano yoa pahnonoca duacu, tire tuaro yoaja mipure. ¹⁴ Murocaperiro to wapata duariro seheta Cristo yare tuaro yoaja yuhu yu wapatahore yu nahahto sehe. Cristo yairo yu jichu

ñano Cohamacu tí yu wapatahtore yuhare waro taro muanopu pjirocara yuhare to catia mehne yu catirucuhto sehe.

¹⁵ Õ sehe yu tūhotururo seheta tūhotuga mūsa cūhu Cristore noano masiina jina. Wiho mejeta, ahri mū sare yu yahurire mūsa tūho duaerachū, soro mūsa tūhotuchū Cohamacu mū sare noano masichū yorohca. ¹⁶ Ā jina to yare mari masirire noano yoa sohtori tijihna.

¹⁷ Yu coyea, mūsa jipihtina yuhare ñu cūga. Ā jina paina sā yoaro sehe yoanare noano ñuga mūsa tinare mūsa ñu cūhto sehe. ¹⁸ Payu tahari painare yahui yuhū mū sare. Mipū cūhure tuaro cahyacu tinareta yahuja mū sare. Payu tina Cristo crusai to yariari buheare ñu yabiina jira. ¹⁹ Tina pichacapū wahahtina jira. Ti ñaa goa pjaā sehere tuaro cahmana tina. Tuhsu, ti buo tiboare yoaa, tīre “Noaa jira”, nina tina. Ahri yahpa macaa dihtare noano tūhotura tina. ²⁰ Mari sehere mari ya maca muanopu jira. Ā jiro tōputa marine yuhdūchū yoah tiro, mari puhtoro Jesucristo tarohca. Ā jina to tah-tore cohtana nija mari. ²¹ Tiro taro mari pjacurire wiho jia pjacurire soro sehe jia pjacuri dihta cohtotarohca tiro. Ā yoaro to ya pjacu yoaro sehe noa yuhdūari pjacure si siteri pjacure warohca marine to tuaa mehne. Jipihtina bui puhtoro sāari jire tiro tí to tuaa mehne. Ā jiro jipihtia pūro jira tiro tí to tuaa mehne.

4

Dachoripe mari puhtoro mehne wahchega

¹ Ā jina yu coyea, yu cahīina, tuaro yu wacūina, yuhare wahchechū yoaina, pano mūsa wacū tuaruro seheta mipure mū sare yu yahu joaruro seheta mari puhtoro Jesure tuaro wacū tuana, to yare ne duhuena tjiga mūsa.

² Ahrire yahuihtja mū sare Evodiare, Sintique cūhure: Jesu yaina numia jira mūsa. Ā jina cahma sayoro marieno noano mehne jirucuga mūsa. ³ Mūhu sehe potocāta yu piti warota jira. Mūhu cūhure yahuihtja: Tí numia yuhū mehne, Clemente mehne, paina yu piti tiina mehne dahrare noaa buheare sā buhechū. Cohamacu tina jipihtina wamare joa ōha to ya tjui. Jipihtia dachoripe catiare to warina wamare to joa ōri tjui joa ōha. Ā jicu tí numiare “Cāno mehne noano jiga”, ni yahuga mūhu.

⁴ Dachoripe mari puhtoro mehne wahchega. Pari turita yahuihtja tjoa: Wahchega. ⁵ Noano yoaga jipihtinare masa yoaro seheta. Mari puhtoro Cristo to tahto mahanocā dūhsara.

⁶ Ne cahya pjiro tūhotuena tjiga. Cohamacure noano yahu pahñoga. Ā yoana tirore siniga. Ā sinina, “Noana”, niga tirore. ⁷ Mūsa ā yoachū noano jichū yorohca mū sare Cohamacu. To ā yoachū noa yuhdūara. Ahri mari noano jia noa yuhdūara. Masa jina, marine to ā noano jichū yorare noano tūho ñaha masieraja mari. Cristo Jesu yaina mari jichū marine noano jichū yoaro, Cohamacu marine noano yajeripohna tichū yorohca. Ā yoaro cahya tūhotuerachū yorohca marine.

Noaare tūhotuga

⁸ Ahrire yahu batōi tai nija mū sare, yu coyea. Quihōno jiare, masa ti ño payoare, noano yoare, ñaa mariare, ji coare, masa “Noaa jira”, ti niare tūhotuga mūsa. Noa yuhdūa ti jichū tīreta tūhotuga. Masa noaare ñua ti wahchea sehere mūsa cūhu wahche tūhotuga.

⁹ Mū sare yu buheriro seheta ā yoarucuga mūsa. Ā yoana, yuhare ñu cūga mūsa. Mūsa ā yoachū Cohamacu mū sare noano jichū yoaruro mūsa mehne jirohca.

Filipo macaina Paulore ti wari cjirire yahuha tiro

¹⁰ Mipū pinihta yoari pja baharo mūsa pari turi yuhare wacūina mūsa yoadohoare wahcheja. Ā wahchecu mari puhtoro Cristore “Noana”, nija. “Yuhare boaa wahare mūsa”, nieraja yuhū. Panopure yuhare yoadoho duapanahata yoadoho masierare mūsa. ¹¹ Yuhare mūsa yoadohorire yahucu yuhare dūhsarire mū sare yahui tai nieraja. Mū sare paye barore cahmacu ā nii nieraja. Yu cjuaa mehne ji masija yuhū. ¹² Paye baro cjueracu cūhu noano ji masija yuhū. Ā yoa pjiro cjuacu cūhu noano ji masija. Dachoripe jaca baacu cūhu jipoaja. Yapiriro jicu cūhu jipoaja. Pjiro cjuacu cūhu jipoaja. Yuhare paye baro mariachū cūhure jipoaja. ¹³ Cristo yuhare tuachū yoaruro mehne jipihtiare Cohamacu to cahmaare yoa masi pahñoja yuhū. ¹⁴ Yu ā jipoaruro yu jipachūta yu ñano yuhdūchū mūsa yoadohona yuhare noano yoare mūsa.

¹⁵ Noaa buheare yu buhe dūchū Macedonia yahpai jiriro cjiro yu wahachū mūsa dihta yuhare yoadohore. Tīre masina mūsa. ¹⁶ Ā yoa Tesalōnicai yu jisinchū ñana yuhare yoadohona cāa tahari warocari jire mūsa. ¹⁷ Paye barore sinicu ā nicū nieraja. Painare mūsa yoadohochū Cohamacu mū sare noano yorohca. Mūsa ā yoadohori wapa Cohamacu mū sare to noano yoachū cahmaja yuhū. ¹⁸ Mipure yuhare noano wa pahñohre mūsa. Yu cahmari yuhdoro wahre mūsa yuhare. Yuhare Epafrodito mehne mūsa warocari baharo paye baro ne dūhsaerara yuhare. Cohamacu wūhūpu incinsore jū

mno Cohamacre ti noano ji coachu yoariro seheta yuhre musa wari cahu Cohamacre noano ji coachu yoara. ¹⁹ Cristo yaina jira musa. A jiro jiphtiare musare dahsarire warohca Cohamacu musare, noa yuhduu to cjuuare. ²⁰ Jiphtia dachoripe mari Pucare Cohamacre no payojihna. Ata yoajihna.

Paulo noa dutiha

²¹ Jiphtina Cohamacu yaina, toru jiina, Jesucristo yaina noajaro. Mari coyea cahu Jesu yaina yahu mehne macaina musare noa dutira. ²² Jiphtina Cohamacu yaina, o macaina, Jesu yaina noa dutira. Roma macaina bui puhtoro ya wahu macaina pinihta tuaro noa dutira.

²³ Mari puhtoro Jesucristo musare to cahia mehne noano yoajaro.

Colosenses

Colosa macainare joarocaha Paulo cãhu
 1-2 Yũhu Paulo mari coyeyro Timoteo mehne musare Colosa macainare joarocaja sã. Yũhu Jesucristo to yare buhe dutiro to cũriro jija. Cohamacu to cahmano seheta Jesu yũhare to yare buhehtirore cũre. Á jina musare sã coyey Cristore wacũ tuarucuinare joarocaja. Á jina Cohamacu mari Pucũ mehne musare noa dutija. Á jina tiro mehne noano jiga musa.

Jesu yainare Paulo sini payoha Cohamacure

³ Musa ya cjihtire Cohamacure sini payona “Noana”, ã nirucuja sã. Tiro sehe mari puhtoro Jesucristo Pucũro jira. ⁴⁻⁵ Tirore “Noana”, nirucuja sã musa jia tiare tuhorocana. To ya buhea potocã jia buheare musa tuhoriro seheta jipihtia dachoripe muanoru musare jichu yoarohca Cristo sehe. To ã yoahrtiro jichu tũre musa ã cohtarucu wama tira. Á jina Cristo Jesure wacũ tua wama tira musa. Tuhsu, to yainare cahũ wama tira musa. Musa ã jiina jichu Cohamacu mehne wahche tirore “Noana”, nija sã. ⁶ Jipihtiorũre Jesu yaina potocã jia buheare noaa buheare ti yahuchũ tuhoa masa Cohamacu yare cahmaa, noaa sehẽre cohtota namoa nina. Musa cãhu noaa buheare Cohamacu musare to cahiare quihõno musa tuho dũcari baharo tina yoaro sehe Cohamacu yare cahmana, noaa sehẽre cohtota wama tira musa. ⁷ Ahrireta musa cãhure Epafra noaa buheare yahuri jire. Tiro sã tuaro cahĩriro sã mehne Cristore dahra cohtariro, Cristo yare ne duhuerariro jira. Musare sã buhe masierachu tiro sehe sãre cohtotariro jiro, musare buheri jire. ⁸ Tiro jira musa jia tiare sãre yahuriro. Espĩritu Santo to yoadohoa mehne Jesu yainare musa cahĩrire yahure sãre.

⁹ Á jina musare tuhorocana musare sã tuhorocari dachoihta dõihta ã sini payorucuja sã Cohamacure. Cohamacu to cahmaare musa masi pahõnohto sehe tirore sini payoja sã. Espĩritu Santo yoadohoro mehne Cohamacu yare noano masiina musa jihto sehe sini payoja sã. ¹⁰ Õ seheta sini payoja sã mari puhtoro Cristo to cahmano seheta noano musa yoahiti cjihtire. Musa ã yoachũ ñũno tiro wahcherohca. Á jina jipihitia noaare musa yoahito sehe sini payoja. Cohamacure musa masi namohto sehe sini payoja. ¹¹ Ahri yu yahuhti cãhure sini payoja sã. Cohamacu ya tuaa noa yuhũara. Cohamacu ti tuaa mehne musa tuahtore musare sini payoja. Õ seheta sini payoja

musa ñano yuhũpanahta wahchea mehne musa cãno pjahto sehe. ¹² Cohamacu to yaina cjihtire marine jichu yoari jire. Á yoaro to waare cjuahitina cãhure yoari jire marine tiro. To jiropu buhriaroru mari cjuahitire warohca tiro. To ã yoachũ ñũna tirore musa “Noana”, nihto cjihtore sini payoja sã musare. ¹³ Tirota marine pichacaru wahaborinare yuhũchũ yoari jire. Tõ panore ñaare yoa duhu masieramai mari. Ñariro sehe nahitianoj jiriro marine dutiriro jisiniri jimare. Cohamacu sehe to macũnore to cahĩrirore puhtoro sõno muanoru marine jichu yoari jire. Á jina to macũno mehne jinahca. ¹⁴ To macũno mehne marine yuhũdora Cohamacu. To macũno to yariaro mehne mari ñaa yoari buhirire bori jire Cohamacu.

Masa Cohamacu mehne ti cahma ti pu buhũseheri ti ñũ tuhtichũ ñũno Cristo bosaha

¹⁵ Jesu Pucũrore ñũmahnoerara. To macũno sehe to Pucũro to dohse jia tiare ñona masare. Tiro to macũno jipihtina pano jipihtia pano ji tuhsũri jire. Á jiro jipihtia puõ, jipihtina bui puhtoro jira tiro. ¹⁶ Cohamacu to dutichũ to macũno sehe to Pucũro mehne jipihtinare, jipihtiare bajuamehneri jire. Muanoõ jiare ahri yahrapu jia cãhure bajuamehneri jire. Mari ñũrire mari ñũerari cãhure bajuamehneri jire. Muano macaina ñũmahnoerainare puhtoare, dutiinare, jipihtinare bajuamehneri jire. Á jia jipihtina to yaina cjihti jimari jire. Jipihtia cãhu to ya cjihti jimari jire. ¹⁷ Jipihtina pano jipihtia pano Cristo ji tuhsũri jire. Á yoa to tuaa mehne jipihtia cãhu jipihtina cãhu mipũre jia nina. ¹⁸ Mari to yaina jipihtina to pjacu yoaro seheta to ya curua macaina jija. Á jiro tiro mari dapu mari puhtoro jira. Tiro yariaro masa maja muhtariro jira jipihtina bui puhtoro, jipihtia puõ jiro taro. ¹⁹ Cristo to Pucũro mehne cãno potori to jiro seheta jira. To ã jichũta cahmana Cohamacu sehe. ²⁰ Jipihtina to Pucũrore cahma ñũ tuhtia tiri jire. Á ti cahma ñũ tuhtichũ ñũno Cristo tinare “Ñũ tuhtiena tjiga”, ni yahuri jire. Muano macainare ahri yahpa macaina cãhure to Pucũrore “Ñũ tuhtiena tjiga”, ni yahuri jire Cristo. Á yoa muano macaa ahri yahpa macaa cãhu noano ti jichũ cahmari jire tiro. Á mari ñũ tuhtirire duhuchũ yoa duari jire tiro crusaru yariaro to di cohãno. To Pucũro to cahmariro seheta ã yoari jire Cristo.

²¹ Musa cãhure ãta yoari jire tiro. To Pucũrore ñũ tuhtiina tiro mehne jieraina jimari jire musa cãhu. Ñaare yoari jimare musa. ²² Á jimarina musa jipachũta tiro

to yariaro mehne to Pucurore musare ñu tuhtierachu yoari jire tiro. Á yoari jire tiro noaina ñaa buhiri marieina musare to yoahto cjihtore. Musa á jichu tiro musare to sehe jinanpüre to Pucurore warohca. ²³ Áta warohca tiro musa tirore wacü turarucuhu. Áta yorarohca tiro noaa buheare musa tuhorire musa boerachu ti buheare musa á yuhtirucuhu. Ti buheare noaa buheare jipihtina ahri yahpüre jina tuhori jire. Á jicu yuhu cahu Paulo Cristore dahra cohtariro jicu, ti buheareta yahuriro jija.

Jesu yainare tina mehne macainare yoadohohtinare cüha Paulo

²⁴ Cristo mari ñano yoari buhirire ñano yuhduri jire. Á jicu yuhu cahu musare yu buheri buhiri ñano yuhducu wahcheja. Á ñano yuhducu Cristo marine to cüreire yoa sohtori ti nija. Á jicu wahcheja. Cristo yare mari yoari buhiri mari ñano yuhdu namohto dushasinina mini. Á jicu tirore musa wacü tuajtore ñano yuhducu, wahcheja yuhu. To pjacu yoaro sehe jina to ya curua macaina jira musa. ²⁵ Jesu yainare yoadohohtirore cüre Cohamacu yuhure. Musa ya cjihtire yoahtirore yuhure cüre tiro. To yare jipihtiropüre yahu pahñohitirore cüre yuhure. ²⁶ Ti to yare panopüre payu tjururi macainare yahu pahñocera tiri jire Cohamacu. Mipüre ahri tjuru macainare to yainare tire noano yahu pahñonocare juna. ²⁷ “Judío masa jieraina ya cjihtire yu ya buhea noa yuhduara”, ni to yainare tire yahuri jire. Pano to yahuerari cjiire yahuri jire. Ó sehe jira to ya: Cristo to yaina mehne jira. To á jichu to yaina manopu Cohamacu cahapu noa yuhduaropu jahca. Ti jira panopu ti masierari cjiro Cohamacu ya.

²⁸ Cristoreta yahuja. Jipihtinare cuisāana tinare buheja sā. Noano masia mehne buheja sā noano Cristore masare masichu yoana tana. Á buheja sā to yare noano yoaina ñaa buhiri marieina tinare jichu yoana tana. ²⁹ Ahri jira yu dahraa. Cohamacu to ya tuaa mehne yuhure to wari tuaa mehne tuaro dahraja yuhu, to yare buheca.

2

¹ Ahrire musa masichu cahmaja yuhu. Musa ya cjihtire, Laodicea macaina ya cjihtire, jipihtina paina ya cjihti cühure tuaro dahraja yuhu. Jipihtina musa yuhure ñueraina ya cjihti cühure tuaro dahraja musare tuaro yoadohoja yuhu. ² Ó sehetä musare yoadohoja yuhu musa noano yajeripohna tihto cjihtore. Musa mehne macainare musa cahma cahñto cjihto cühure á musare yoadohoja yuhu.

Cohamacu ya panopu to yahuerari cjiro Cristore masichu yoaa jira. To yare musa masichu noa yuhduara. Cristore musa noano masihto cjihtore, tiro mehne musa noano jihto cjihto cühure tuaro yoadohoja musare. ³ Paina ti masierari cjiire, noa yuhduare Cohamacu to masiare Cristo dihta noano masichu yoara marine. ⁴ Ahrire nija musare “Paina musare tuho wisiachu yoaa durucua mehne mahñori”, ni. ⁵ Yuhu musa watoi jierapacuta yu wacüno mehne musa watoi jiriro yoaro sehetä tuhotuja. Á jicu Cristore musa noano wacü tuarucurire, quihöno musa yoari cühare masicu wahcheja yuhu.

⁶ Á jina Cristore musa wacü tua ducariro sehetä áta tirore wacü tuaa mehne dachoripe noano jirucuga. ⁷ Tirore noano masina jiga musa. Á yoa dachoripe tirore masi namoga pano musare paina ti buheriro sehetä. Á yoa Cristore wahche, “Noana”, nirucuina jiga musa.

Cristo yaina jina noaa sehere cahmaja mari

⁸⁻¹⁰ Noano yoaga musa. Masa ti mu suro ti mahño buheare tuhoena tjiga musa. Tina panopu macaina ti mu suro ti niare buhera. Ti á nia yaba cjihti jierara. Ahri yahpa macaina ti mu suro ti tuhotuare buhe, Cristo ya sehere buherara. Cristo Cohamacu to jiro sehetä jiriro jiro, ahri yahpapu pjacu tiro, Cohamacu warota jirota nina. To yaina jina Cohamacu mehne noano jija mari. Tirota jira jipihtina anjoa pahtoa bui paina bajueraina bui pahoro jiriro. Tire masina mahñoare buheinare tuhoena tjiga. ¹¹ Circuncisiöre ti yoari sehetä mahancä pjacu cahsarocäre ti yihso cohäriro sehetä Cristo ñaa buhiri tiina musa jia tiare cohä, duhuchu yoari jire. Ahri circuncisiö masa ti pjacurire mahancä cahsarocäre ti cohäri jierara. Ahri circuncisiö yoaro sehe yoaro, Cohamacu sehe ñaa buhiri tiina mari jia tiare cohäna Cristore mari wacü tuachu ñano. ¹² To yaina jina bautisarina wahari jire musa. To bautisarina wahana ó sehe ñona niri jire musa: Panopu macaa musa ñaa yoiare musa duhurire ñona niri jire musa. Ti musa ñaa yoari buhirire musa ya cüboro sehetä tire duhuri jire musa. Cristo masa majano noanopu wahari jire. To á waharo sehetä Cohamacu wacü tuana “Tiro tuariro jira”, niina jina noaa sehere cohtotari jire musa. Tiro Cohamacu sehe Cristore masioriro jira. To bautisarina wahana noaa sehere musa cohtotarire ñona nina musa. ¹³ Panopüre ñaa buhiri cjuarina musa jiri buhiri pichacapu wahaborina jimari jire musa. Á wahaborina jimari jire musa Cohamacu yaina jierasina. To dutiare cjuaraina jimari jire musa.

Mipäre Cohamacu marine tiro mehne ã jirucuhinare yoari jire. Cristo to yariaro mehne ã yoari jire tiro marine. Æ yoaro jipihitina mari ñaa yoari buhirire bonocari jire tiro. ¹⁴ Cohamacu to dutiare ti joari cjiřire yuħdurucaina mari jipachuta Cristore mari wacu tuachu ñuno tiro marine buhiri ti dutiare. Cristo crusapu to yariaro mehne Cohamacu sehe mari ñaa buhirire cohãnocahna panopu to dutiare, marine buhiri ti dutiare to cohãnocaboriro seheta. Crusapu yariaro ti tañoru panopu macaa dutiare ti joari pũre to cja puha õboro seheta ti dutiare cohãnocahna. ¹⁵ Masa ti ñurocaroi wafia puhtoare Cohamacu yuħdurucari jire. Wiho jiina, tuaeraina tjuanocari jire tina sehe. Æ yoaro tinare buoro wahachu yoari jire, surara ti yuħdurucainare masare ti naa ño ti buoro wahachu yoaro seheta. Crusapu yariaro Cristo wafiare yuħdurucari jire.

Muano macaare Cohamacu yare cahmaga

¹⁶ Æ yoa paina musa chũare musa sihnia cũhare ñaa musare “Buhiri tiina jira”, ni ñuboca. Ti ã ni ñuchu ã ñunocahga tinare. Sũripe jia dachorire, somanaripe jia dachorire, bose numuri musa yuħdoerachu ñaa musare “Buhiri tiina jira”, ni ñuboca tina. Ti ã ni ñuchu ã ñunocahga tinare. ¹⁷ Panopu ti chua dutiare, bose numurine yuħdo dutiare, paye dutia cũhare cũri jire Cohamacu marine buhero taro. Ti dutia mehne baharopu to dohse yoahtere Cohamacu yoa ñono niri jire. Cristo to jia tia cjihtire yoa ño curero niri jire masare. “Tiro õ sehe waharohca”, nino ã yoa ñono niri jire. Æ yoa ñohti cjiiti jiri jimare ti dutia. ¹⁸ Õ sehe nimana ti dutiare yoa dutiina. “Soro jiare bajuachu ñuhi sã” nia, tina Cohamacu ti ño payoboro sehe anjoare ño payomana. Æ jiina jia “Masi pahñonocaja sã”, ni tuhotumana tina masa ti mu sũro ti tuhoturiro seheta. Æ jia tina painare yuħdurucarina, noaina yoaro sehe yoa ñomana musare. Æ yoa “Quihõno yoaerara musa”, ni yahasãna musare. Ti ã ni yahusãchu, tinare ã ñunocahga. ¹⁹ Tõ sehe yoapahta musare yahusãina Cristo to dutiro sehe yoa nierara. Cristo sehe to yaina dapu ti puhtoro jira. To yaina sehe to pjacu yoaro sehe jiina to ya curua macaina jira. Mari cohãri dohsaa mari wa dari cãhu mari pjacure cã pjacu jichu yoara. Tõ seheta Cristo sehe to yainare cãnoi noano mehne jichu yoara. Æ yoa marine yoadohora Cohamacu cahmaare mari noano yoahto sehe.

²⁰ Æ yoa Cristo yaina jina tiro mehne yariarina yoaro sehe jira musa, Cohamacu to ñuchu. Æ jina ñaare musa yoarire duherina jira musa. Æ jina ahri yahpa macaa

ñaa buheare, masa ti mu sũro ti buheare cahmaeraborina jira musa. ¿Æ jiborina jipanahta dohse yoana masa ti mu sũro ti dutiare yuhtijari musa? ²¹ Õ sehe ni dutira ti mu sũro dutiina: Ahri barore chuena tjiga. Ahri barore ne chu ñuena tjiga. Ahri barore pihaena tjiga. Tõ sehe ni dutira tina. ²² Mari paye barore chũchu dõi pihtia wahara. Tõ sehe jia barore pihtia barore tuhotua nina ã dutiina. Ti ã dutichu ahri yahpa macaa dutia dihta jira ti dutia. Masa ti mu sũro ti buhea dihta jira ahri buhea. Æ jia yaba cjihti jierara. ²³ Ti dutiare yoaina Cohamacu ño payoina yoaro sehe jimana. Æ yoa painare yuħdurucarina yoaro sehe yoa ñomana. Ti pjacurire ñano yoa Cohamacu ño payoina seheta yoa ñomana tina. Ti ã yoachu ti ya dutia sehe masi pahñoina ya dutia yoaro sehe jimana. Æ jierara. Ti dutiare yoapahta ti ñaare goa pjaare duherara. Æ jia ti dutia sehe yaba cjihti jierara.

3

¹ Æ yoa Cristo yaina jira musa. Æ jina Cohamacu tuua mehne Cristo to masa mujariro seheta ti tuua mehne pano musa ñaa yoarire duhu, noaa sehere cohtotare musa. Æ cohtotaina jina muano macaare Cristo yare cahmaga musa. Tõpũre muanopu Cohamacu poto buhusehei dujira tiro. ² Muano macaa Cohamacu yare noano tuhotuga musa. Ahri yahpa macaare ne wacu nuñuena tjiga musa. ³ Cristo yaina jina tiro mehne yariaborina seheta musa wahana ahri yahpa macaare pjiro tuhotuena tjiga. Æ jiro Cristo mehne musa jirucuhitore cahno tuhsuri jire Cohamacu. ⁴ Æ yoa Cristo muanopu marine ã jirucuhinare yoariro si sitea mehne to tachu tiro mehne wahanahca mari. Æ wahana tiro mehne muanopu Cohamacu yare cjuanhca.

Cristo yaina jierasinina ñaare yoamai mari

⁵ Æ yoa ahri yahpa macaa ñaa musa yoare duhunocahga musa: Numino mehne ñano yoare, muño mehne ñano yoare, ñaa yuħdurũro yoare, pairõ namonore goa pjaare, pacoro manũnore goa pjaare, ñaa goa pjaare duhunocahga musa. Paye barore tuaro cahmaina jiena tjiga. Paye barore cõna, tire tuaro cahmana “Cohamacu jira”, ti nia masurine ti ño payoro seheta yoana nija mari tire. ⁶ Ti ñaare yoaina Cohamacu yuħdurucaina jira. Ti ã yoa yuħdurucachu ñuno tinare buhiri dahrerohca. ⁷ Panopure musa sehe ti ñaare yoarina jina tina mehne macaina jiri jimare musa. ⁸ Wiho mejeta mipäre ahri ñaare duhu pihtinocahga

musa: Suaare, sua yuhduare, painare ñano ni tuhotuare, painare ñano quiti dahreare, ñano durucuare ti jipihtiare duhunocahga. ⁹⁻¹⁰ Musa sehe Jesu yaina wahana ti ñaa yoare duhu tuhsuri jire. Á jina musa tuhotuare cohtotaina jira musa. Musare noaa sehere cahmachu yoaro nina Cohamacu to yoaro sehe musa jihto sehe. Ó seheta yoara tiro noano tirore musa masi namohto sehe. Á jiina jina musa mehne macainare mahñoena tjiga. ¹¹ Cristo yaina jina judio masa, judio masa jieraina cãhu cãno potorita jira musa, Cohamacu to ñuchu. Circuncisiõre yoaina, yoaraina cãhu Cristo yaina jia cãno potorita jira, Cohamacu to ñuchu. Pa yahpa macaina, masieraina, musa ya yahpa macaina cãhu Cristo yaina jia cãno potorita jira, Cohamacu to ñuchu. Dahra cohtaina, dahra cohtaina jieraina cãhu Cristo yaina jia cãno potorita jira, Cohamacu to ñuchu. Jesu jipihtina to yaina mehne jira. Wiho jiro jierara tiro, to yaina ti ñuchu.

¹² Á yoa Cohamacu to beserina, noaina, to cahña jina õ sehe jiga musa: Painare pja ñuina, painare noano yoaina, painare yuhduaca duaeraina, painare niji siaro dero yoaina, musare ti ñano yoapachuta ã tuhotunocaina jiga musa. ¹³ Musa mehne macaina mehne suana, dóihta musa basi musa suarire pjãga. Mari puhtoro musa ñaa yoari buhirire bohre. Á to boriro seheta musa cãhu musa mehne macaina musare ti ñaa yoarire boga. ¹⁴ Ahri dutia mehne õ sehe ni dutija musare: Painare cahña. Musa ã yoana noano jipihtina mehne cãno mehne jinahca. ¹⁵ Cristo marine noano jichu yoara jiape ni durucueraina mari jilto sehe. To ã yoachu noano jiga musa, musa basi. Ó seheta jihtina cjihtire to yaina cjihtire bese cãri jire Cohamacu musare. Á jina to pjacu yoaro seheta cã curuata jira musa. Á yoa Cohamacure “Noana”, ni wahcheina jiga musa Cohamacu mehne.

¹⁶ Cristo ya buheare noano wacũrucuga musa. Noano masi buhega to yare. Cua pisaro mehne tãre yahuga. Á yoa tuhsu, Salmore, Cohamacu yare basaare, paye tirore ño payoa basaare tirore basa payoga. Noano wacũ ño payoa mehne basa payoga. Á basana to yare noano wacũga musa. Á yoana Cohamacure “Noana”, ni wahcheina jiga musa Cohamacu mehne. ¹⁷ Jipihtia dohse jia musa yoare noano yajeripohna ti yoaga mari puhtoro Jesu to wahchehto sehe. Cristore ño payora musa. Á yoa tirore ño payoa mehne noaa dihtare durucuga. Á yoana Cristo to yoadohoa mehne Cohamacu mari Cũcure “Noana”, ni wahche payo siniga tirore.

Jesu yainare noano mehne ti jihti dutia õ sehe jira

¹⁸ Musa manu tia numia, musa manusumare noano yuhtiga musa. Áta yoaro cahmana mari puhtoro Cristo ya numia jina. ¹⁹ Musa namo tiina sehe, musa namosãnumiare cahña. Á yoa ti numiare ne tuhtiena tjiga. ²⁰ Musa ti pohna cãhu, musa pũcusumare yuhduacaeraina jiga. Musa ã yoachu ñano mari puhtoro noano ji coara. ²¹ Musa ti pũcusuma cãhu musa pohñare suachu yoarena tjiga “Cahyachu yoari”, nina. ²² Musa tinare dahra cohtaina, musa puhtoare ahri yahpa macainare noano yuhtirucuga. Ti ñurocaro dihtare yuhtiina jiena tjiga. Ti mariachu cãhare yuhtiina jiga. Mari puhtoro Cristore cua pisaro musa ñũriro seheta noano mehne yuhtiga musa puhtoa cãhare. ²³ Potocãta Cristo yaina jina noano yuhtira musa tirore. Á jina musa puhtoare ahri yahpa macainare yuhtina, tina dihtare yuhtina nierara. Cristo cãhare musa yuhtiboro sehe yuhtinata nina musa. Á yoana musa puhtoa ti dutiro seheta tuaro mehne dahraga, Cristo ya dutia ti jiboriro seheta. ²⁴ Musa ã yoachu Cristo musare noano yoarohca. “Musare waihtja”, to niare musare warohca mari puhtoro. Tãre masina musa. Mari puhtoro Cristore dahra cohtaina jira musa. Á jiro tiro sehe musa puhtoro waro jira. ²⁵ Ñaare yoainare buhiri dahrerohca mari puhtoro. Á yoainare cãiro dũsaro marieno cãno potori buhiri dahrerohca tiro.

4

¹ Musa puhtoa sehe, musare dahra cohtainare potocãta noano yoaga tinare. Musa cãhu puhtoro cjuara. Musa puhtoro musa cjuariro sehe muano macariro jira.

² Dachoripe Cohamacure siniga musa. Noano wacũ tuhotu siniga. Á yoana “Noana”, niga Cohamacure. ³ Sã ya cjihti cãhare sini payoga tjoa. Cristo yare paina pano ti masierari cijire buhena nija sã. Tinare sã noano masichu yoahito sehe sini payoga Cohamacure. Cristo yare yu buheri buhiri yuhũ mipũre peresupũ jija. ⁴ Á jicu musa ã sini payochu cahmaja to yare yu noano yahuhto cjihto sehe. Cristo to dutiro seheta yu yahuhto cjihto sehe sini payoga.

⁵ Jesu yaina jieraina mehne jina noano yoaga musa. Cristo yare yahuga tinare. Tina mehne musa jiro puro ãta noano yoaga. ⁶ Paina mehne suhũduna noano ji coaro mehne suhũduga. Noaa dihtare durucuga. Paina musare ti sinituchu noano masi yuhtiga tinare.

Noa duti batoaha Paulo

⁷ Tíquico mari coyeiro Jesu yairo jira. Tiro mari cahīriro, Cristo yare buhero, sã mehne dahrariro jira. Ā jiro Cristo yare ne duhuerara tiro. Tiro yu jia tiare musare yahurohca. ⁸ Musa cahapu tirore warocai nija yuhu sã jia tiare musa masihtosehe, musare wahchechu yoah tiro cjihtore. ⁹ Onésimo mari coyeiro mari cahīriro mehne piti dahre warocai nija. Tiro cahu Cristo yare ne duhuerara. Musa mehne macariro jira. Tina puaro sã ore dohse sã yuhdare yahuahca musare.

¹⁰ Aristarco peresupu jiro yuhu mehne macariro musare noa dutira. Marco cahu noa dutira. Tiro Bernabé tañano jira. Tirore yahuroca tuhsu musare. Musa cahapu to sachu ñana noano mehne tirore piti bocaga. ¹¹ Jesu "Justo" ti ni pisuriro cahu noa dutira musare. Ahrina tiarota yuhu mehne dahraina judio masa waro jira. Judio masa waro tina dihta Cohamacu yare yuhu mehne buhera. Ō sehe buheja sã Cohamacu yaina masa ti wahahto sehe, Cohamacu ti puhtoro to jihto sehe. Tina yuhare noano yoadohoina jira. ¹² Epafra musa mehne jiro cjiro musare noa dutira. Tiro Cristore dahra cohtariro jira. Cohamacure sinino, musa ya cjihtire tuaro sini payorucura tiro. Cohamacure noano wacu tuarucuhtina, to cahmano sehe yoah tina musa jihto sehe ā sini payorucura tiro Cohamacure. ¹³ Tiro musa ya cjihtire tuaro sini payore musare pjiro tuhoturo. Laodicea macaina ya cjihtire, Hierapoli macaina ya cjihti cahuare tiro tuaro sini payore. To ā yoariro jichu ñacu musare yahurocai nija. ¹⁴ Duhturu Luca mari cahīriro musare noa dutira. Dema cahu noa dutira.

¹⁵ Noajaro mari coyea Jesu yaina Laodicea macaina. Ninfa cahu noajaro. Jesu yaina ticoro ya wuhai cahmachuina cahu noajaro. ¹⁶ Ahri pure yu joarocari pure musa mehne macainare musa buhe tuhsari baharo Laodicea macaina cahuare warocaga. Ā yoa tinare Laodicea macainare yu joarocari pure musa cahu buhega. ¹⁷ Ā yoa ō sehe niga Arquipore: "Mari puhtoro Jesu yairo mu jichu to yare buhehtiro cure muhare. To ā cūchu noano buhe sohtori tiga muhu", niga tirore.

¹⁸ Yuhu Paulo, yu wamomaca mehne ahrire joaja. Musare noa dutija yuhu. Peresui yu jiare wacu, sini payoga musa Cohamacure. Noano jiga musa. Cohamacu to cahia mehne musare noano yoajaro. Āta yoajaro.

1 Tesalonicenses

Paulo cāhñ joarocaha Jesu yainare Tesalónica macainare

¹ Yuhñ Paulo, Silvano, Timoteo sã tiaro ahri pũ mehne musare noa dutija. Mũsa sehe Tesalónica macaina mari Pũcũ Cohamacũ yaina jira. Mari pũhtoro Jesucristo yaina cũhñ jira mũsa. Á jina Cohamacũ mari Pũcũ, mari pũhtoro Jesucristo ti cahñ mehne musare noa dutija. Cohamacũ yoad-ohoa mehne noano jiga mũsa.

Jesu yaina Tesalónica macaina sehe Jesure noano wacũ tuaha

² Cohamacũre sinina, jipihtina Jesure mũsa wacũ tuare wacũna “Noabiara sãre”, nirucuja sã musare. Cohamacũre sinina, mũsa ya cjihtire á sini payorucuna nija sã. ³ Mũsa sehe Jesucristore noano wacũ tuyuhca. Á wacũ tuana, Jesu yare yoayuhca mũsa. Jesucristore, paina cũhñre cahñyuhca mũsa. Á cahñna, Jesu yare tuaro yoana niyuhca mũsa. Jesucristore mari pũhtore wacũ tuarucuyuhca mũsa. Á wacũ tuarucuna musare to yuhdohtore masina, tíre cohtana niyuhca mũsa. Á yoa tíre wacũ tua duhuerayuhca mũsa ñano yuhdũpanahta. Cohamacũ mari Pũcũre sinina, tíre mũsa á yoarire wacũja sã. ⁴⁻⁵ Sã coyey, Cohamacũ to cahñna jira mũsa. Musare to beserire masija sã. Sohõ jiri pja musare noaa buheare buhena á yahunocana nierahi musare. Espíritu Santo to tuaa mehne noaa buheare buhena nii musare. Á buhena tí buhea quihõno jichũ noano masii sã. Á jina mũsa watoi sã jina, sã yoarire masina mũsa. Musare yoadohona á yoi sã. Musare buheina jina Cohamacũ to beserina mũsa jichũ masija sã.

⁶ Sohõ jiri pjarũre mũsa ñano yuhdũina jina, noaa buheare cahmare mũsa. Mũsa á cahmachũ, Espíritu Santo sehe musare noano wahchechũ yoare. To á yoachũ mũsa sehe sãre ñũ cũ, sã yoariro seheta yoare. Á yoana Jesu cãhñre ñũ cũre mũsa. ⁷ Á jia Jesu yaina Macedonia yahpa macaina, Acaya yahpa macaina cãhñ Jesu yare mũsa yoarire masire. Á masia tina cãhñ musare ñũ cũ, mũsa yoariro seheta yoara. ⁸ Macedonia yahpa macaina Acaya yahpa macaina cãhñ mari pũhtoro yare mũsa buhechũ tũhorocare. Cohamacũre mũsa wacũ tuare tũhorina sehe tina dihta jierare. Jipihtiro macaina mũsa wacũ tuarire tũhoyuhti. Á jia sã tinare yahuerapachũta tíre masi tuhsare tina. ⁹ Á jia mũsa cahai sã tinirire, sãre mũsa noano piti bocarire yahure tina jipihtiro macainare. Á yoa

Cohamacũ sehere wacũ tuana, “Cohamacũ jira”, mũsa nia masrine mũsa cohãnocarire, Cohamacũ ya sehere mũsa yoarire yahure tina jipihtiro macainare. Tiro Cohamacũ sehe catiriro, Cohamacũ waro jira. ¹⁰ Á yoa “Cohamacũ macũnore mũanopũ tahtirore Tesalónica macaina cohta nina”, ni yahura masa musare. To macũnore yariariro cjirore Cohamacũ masori jire. To á masochũ to macũno Jesu sehe marine ñabiaro to buhiri dahreborinare yuhdori jire.

2

Tesalónica wama tiri macapũ to dahrarire yahuha Paulo

¹ Mũsa cahai jina sã á jinocana niera tii. Musare noano yoadohoina jia tii sã. Tíre noano masina mũsa, sã coyey. ² Á yoa Filipoi jina ñano sã yuhdũirire, sãre ñano ti yoarire potocãta masina mũsa. Sãre ti á yoapachũta Cohamacũ to yoadohoa mehne cuiro marieno Cohamacũ yare noaa buheare buhei sã mũsa cãhñre. Sãre masa payũ ti ñũ tuhtipachũta noaa buheare buhei sã musare. ³ Musare buhena noano sã masirire buhei sã musare. Á buhena musare dojomehne duana nierahi. Á yoa mahñoerahi. ⁴ Cohamacũ to cahmano seheta buheja sã. Noa buheare buhehtina cjihtire Cohamacũ besere sãre. To á beserina sã jichũ to ya buheare sã buhechũ noa nina, Cohamacũ to ñũchũ. Á jina õ seheta buheja sã. Masa ti tũho ji cohtire buhena nieraja sã. Cohamacũ sehe sãre to ñũ ji cohto cjihtore to yare buheja sã. Tiro sehe mari tũhotuare, dohse mari yoa duare noano masina. ⁵ Noa buheare buhena tũho ji coaa dũseri mehne buhena nierahi. Ahrire masina mũsa. Á yoa sã buhena, musare paye barore wapa cahmana nierahi sã. Ahrire Cohamacũ masina. Potocã nii nija. ⁶ Á buhena masa sãre ti ñũ wahãhti cjihtire yoana nierahi sã. Musare paina cãhñre sãre ñũ wahã dutina tana nierahi. ⁷ Á ñũ wahã dutierapanahta Cristo to cũrina jija. Á jina musare wapa cahmaboa sã. Á yoa pũhtoa yoaro sehe musare dutiina jiboa sã. Wiho mejeta numino wihãrirocãre to noano bucũoriro seheta noano niji siaroca dero yoi sã musare. ⁸ Á jina musare noano cahmana, Cohamacũ yare noaa buheare buhei sã musare. Á yoana tí dihtare yoeraí musare. Musare noano yoadohoi sã catisina waro. Sã cahñna mũsa jichũ musare á yoadohoi sã. ⁹ Á musare cahñna tuaro yoadohoi sã musare. Tíre wacũna mũsa, sã coyey. Cohamacũ yare noaa buheare buhena masa cjuare sini cariboeraí musare. Á jina dachopũ, ñamipũ cãhñre dahrai sã.

¹⁰ Noano, musare ñano papero marieno, mahñono marieno musare Jesu yainare sã yoarire masina musa. Cohamacu cãhu tãre masina. ¹¹ Æ jina ti pucuro to pohñare to noano yahu to wahchechu yoariro se-heta musa cãhure yahuna wahchechu yoai musare. Tãre masina musa. ¹² Puhtoro Cohamacu to suho jiropu, noa yuhduaropu musare pjirocãre. Æ jina to yaina musa jichu Cohamacu to cahmariro sehta musare ji dutii sã.

¹³ Cohamacu yare musare sã yahuri cjiirire musa tuhona, õ sehe ni tuhature musa: “Masa ti mu suro ti buhea jierara. Cohamacu ya buheata jira”, ni tuhature musa. Tãre musa tuhutuchu masina wahcheja sã. Æ jina Cohamacure sinina “Noana”, nirucuja sã tirore. Tõihtã jira. Musare sã buhea Cohamacu durucua potocã jiata nina. Æ jiro Cohamacu musa Jesure wacũ tuaina jichu to ya buhea mehne musare noaa sehere cohtotachu yoaro nina. ¹⁴ Jesucristore wacũ tuainare Judea yahpa macainare ti yoariro sehta musa cãhure yoare paina. Judea yahpa macainare Jesu yaina sehere judio masa ñano yuhduchu yoare. Musa cãhure musa ya dihta macaina ãta ñano yuhduchu yoare. ¹⁵⁻¹⁶ Judio masa sehe Cohamacu yare yahu muhtaina cjiirire panopu macainare wajãã tiri jire. Æ jia mari puhtoro Jesu cãhure wajãri jire tina. Tuhsu, tina sãre cohãre. Cohamacure tina cahyachu yoahre. Æ yoaina jia, payu masare ñu tuhtira tina. Judio masa jierainare Cohamacu yare sã yahu duamai tina cãhure pichacapu wahaborinare “Cohamacu yuhdojaro”, nina. Sã ã yahu duapachuta judio masa sehe sãre ne Cohamacu yare painare yahu dutierare. Æ yahu dutieraa pjãro buhiri ti namoa nina tina. Mipure tinare tuaro Cohamacu buhiri dahrerohca juna.

Paulo Tesalõnica macaina cahapu pari turi tini duamaha

¹⁷ Sã coyea, mipure mahanocã musa mehne jierana musare wacũna nija. Æ jina musare tuaro ñu duana, musa cahai waha duamai. ¹⁸⁻¹⁹ Cãã tahari yuhu Paulo musare ñui waha duamai. Yu ã waha duapachuta Satana sehe sã wahaborirore ducatare. Æ jina wahaerahi sã. Sãre wahchechu yoaina musa jichu musare ñu duamai. Mari puhtoro Jesu ahri yahparu to tjua tachu musa sehe sãre wahchechu yoanahca. Æ jina wahchea mehne musa mehne Jesu panoi ducunahca. ²⁰ Æta jira. Musare ñuno Jesu sehe “Noano buheri jira musa”, ninohca sãre. Æ jina noano wahcheja sã.

3

¹⁻² Æ yoa musare yoari pja ñuerana musare tuaro tuho duana tãre wacũna, Timoteore musa cahapu warocai. Tiro mari coyeiro Jesu yairo Cohamacure dahra cohtariro jiro, sã mehne noaa buheare buheriro jira. Æ jina tirore warocai Jesucristore noano musa wacũ tuahti cjihtire, musa wahchehti cjihti cãhure. Tirore warocana sã sahsero Atena wama tiri macai tjuai. ³ Musa ñano yuhdupanahta Jesu yare musa cohãerahto cjihtore warocai sã Timoteore. Jesu yaina jina ñano yuhduahca mari. Tãre masina musa. ⁴ Musa mehne tã panopure jisinina mari ñano yuhduhtoreta yahu tuhsu musare. Æ jina sã niriro sehta mari ñano yuhdui. Tãre musa noano masina. ⁵ Æ jicu musare yoari pja ñueracu musare tuaro tuho duai. Æ jicu Jesure musa wacũ tuarire masii tai Timoteore warocai yuhu. “Watino musare ñano yoa dutiri” nicu, “Musare sã buheri cjiirire musapu duhuri” nicu, tirore warocai yuhu.

⁶ Æ yoa mipure Timoteo musa cahapu jiro sã cahapu tju wihire. Æ tju wihiro noaa quitire sãre yahure tiro. Jesure musa noano wacũ tuaare, painare musa cahãã cãhure tiro yahure sãre. Æ ni tuhsu sãre musa noano wacũrãre, musare sã ñu duariro sehta musa cãhu tuaro sãre musa ñu duarire yahure sãre tiro. ⁷ Æ jina sã coyea, mipure sã ñano yuhdupanahta musa Jesure noano wacũ tuachu tuhona sã wahcheja. ⁸ Jesure musa noano wacũ tuarãre to yare musa cohãerarãre tuhona noano yajeri sãaja sã. ⁹ Musare ã ni tuhutuna, Cohamacu to ñurocaroi sã tuaro wahcheja. Æ wahchena Cohamacure “Noana”, nija sã. ¹⁰ Dachõ cãhure, ñamipũ cãhure Cohamacure sinija sã musare sã ñuhti cjihtire. Jesu yare musa noano masi pahñochu yoa duaja sã noano musa tirore wacũ tua namohto sehe.

¹¹ Cohamacu mari Pucu to basi, mari puhtoro Jesu cãhu sãre ti yoadohochu cahmaja sã musa cahapu sã wahahto sehe. ¹² Æ yoa mari puhtoro Jesu jipihina musa mehne macainare, jipihina paina cãhure cahã namochu yoajaro musare. Musare sã cahãriro sehta tuaro cahã namochu yoajaro musare. ¹³ Musare noano to yoadohochu, buhiri marieina, ñaa marieina jinahca musa, Cohamacu mari Pucu to ñuchu. Mari puhtoro Jesu jipihina to yaina buhiri marieina mehne ahri yahparu tjua taro ã jiina jichu yoajaro musare.

4

“Cohamacure ji coachu yoa duana õ sehe

yoaga”, ni yahuha Paulo

¹ Mipure Jesu mari puhtoro to dutiro mehne musare õ sehe ni yahu batoaja: “Cohamacure ji coachu yoa duana õ sehe yoaga”, ni buhei sã musare. Sã ã buheri baharo sã buheriro seheta yoayuhti musa. Musa ã yoariro seheta yoa namoga. Tíre tuaro yoa dutija musare.

² Jesu mari puhtoro to buhe dutiro mehne musare sã buherire noano masina musa.

³ Ahrire musare yahu namoihtja: Musa õ sehe jichu cahmana Cohamacu: Ñaare yoeraina, Cohamacu yare yoaina jiga. Á jina numia mehne ñano yoena tjiga. Musa cãhu numia mua mehne ñano yoena tjiga.

⁴ Ñano yoapero marieno, ño payoro mehne musa namosãnumiare cjuaga. Cohamacu musa tíre masichu cahmana. ⁵ Cohamacure cahmaeraina Cohamacure masieraina ñaare goa pja, numia mehne ñano ti yoariro seheta yoena tjiga musa cãhu.

⁶ Musa ã yoachu cahmaerara Cohamacu to yaireore musa coyeirote musa ñano yoerahto sehe. Musa ã ñano yoana musa coyeirote yuhdurucana nica. Mari puhtoro Cohamacu tí ñaare ti yoachu ñano buhiri dahrehtiro jinocanota nina. Á jina tíre yahu tuhsã musare “Tí buhirire buhiri tiri”, nina. ⁷ Ñaare yoahina cjihtire beserari jire marine Cohamacu. Ñaare yoeraina cjihtire beseri jire marine. ⁸ Á jina jipihtina musa ahri sã buherire yuhdurucana, masa ya buhea sehere yuhdurucana nierara musa. Cohamacu ya sehere yuhdurucana nina. Tiro musare Espiritu Santore wariro jira.

⁹⁻¹⁰ Musa coyeare Jesu yainare musa cahĩhtire Cohamacu musare buhe tuhsãri jire. To ã buhechu potocãta Jesu yainare Macedonia macainare jipihtinare noano cahina musa. Musa ã cahĩchu ñuna “Musa coyeare cahĩga”, ni buheraja musare. Tinare cahĩ tuhsãra musa. Á ni buhe namoerapanahta ahri sehere musare dutija. Mipure painare musa cahino seheta cahĩ namoga musa. ¹¹ Á yoa musa basi cahma ñu tuhtiro marieno jiga musa. Painare soro ni durucuena tjiga. Á ñunocahga tinare. Á jina musa ya dahraa sehere noano dahraga. Panoputa musare ã yoa dutii. ¹² Áta yoaga musa, paina musare ti ño payohto sehe, paina yare musa cariboerahto sehe.

Ahri yahpapure Jesu to tjua tahtore yahuha Paulo

¹³ Coeya, mipure yariarina cjirire yahuihtja musare: Jesure cahmaeraina Cohamacu cahapu wahasi. Á jia tina mehne macaina ti yariachu ñuna tuaro cahyara. Yariarina cjiri ti wahahtore quihõno noano musa masichu cahmaja sã,

paina ti cahyariro seheta musa cahyaerahto sehe. ¹⁴ Jesu to yariari baharo masa mujari jire. “Tí potocãta jira”, nija mari. Á niina jina ahri cãhure “Potocãta jira”, nija mari. Cohamacu sehe to yaina cjirire yariarina cjirire masa mujachu yoaro, baharopu Jesu mehne na tarohca. Tí cãhure “Potocãta jira”, nija mari.

¹⁵ Jesu to tjua tachu to yaina yariarina cjiri catiina pano masa muja muhtaahca. Mari puhtoro Cohamacu ya yahua tjira ahri.

¹⁶ Ó sehe jirohca Jesu to tjua tachu: Mari puhtoro to basi tuaro sañurucu muhtanoahca. Á jiro to anjao puhtoro tuaro pisurohca. Á to pisuchu Cohamacu to corneta bisiro coa tarohca. Tí ã yoachu Jesu yaina yariarina cjiri masa muja muhtaahca. ¹⁷ Baharo catiinare, yariarina cjiri mehne Cohamacu manopu me yehsea cururipu mujachu yoarohca. To ã yoachu mari puhtoro Jesure piti bocanahca mari. Á piti bocana jipihtia dachoripe mari puhtoro Jesu mehne jirucunahca mari. ¹⁸ Ahri yu yahurire musa mehne macainare yahuga. Á ni yahuna wahchenahca musa jipihtina.

5

¹ Yu coeya, Jesu to tjua tahti dachore “Ahri dachoi tjua tarohca” ni, musare yahu joarocar cahmaerara. ² Mipu musa masino seheta to tjua tahti dachore marine masihto basioerara. Yacariro ñamipu wacũenoca to yacaro taro seheta ahri yahpapure mari puhtoro wacũenoca tjua tarohca. Ahrire musa basita noano masina. ³ “Mipure mari noano jinocaja. Cuaro mariahna marine”, masa tí ni wacũchu dóicãta ñano waharohca tinare. To ã wahachu tina duhti masisi. Niji wahcõricoro wacũenoca to purino tuhturo seheta wacũenoca ã waharohca masare. ⁴ Yu coeya, musa sehere ã wahasi. Yacariro wuhu purore to curiro seheta musa sehere ã wahasi. Jesu taro musare cuosi. Nahitianoí jiina tí ñu masieraro seheta paina Jesure ne masierara. Musa sehe tina yoaro sehe jierara. ⁵ Musa jipihtina Jesu yaina jira. Á jina buhriaroi tí ñu masino seheta Jesu to tahtore masina musa. Paina nahitianoí jiina seheta tirore masieraina yoaro sehe jieraja mari. ⁶ Á jina carina yoaro sehe Cohamacure tãho nanueraina jiina tji-jihna mari. Paina ãta yoara. Tina yoaro sehe yoena tjijihna mari. Carieraina yoaro sehe quihõno yoaina, noano wacũ masiina jijihna mari. ⁷ Carina ñamipu carina. Á jia cahaina ñamipu cahara. ⁸ Mari sehe buhriaroi jiina yoaro sehe Jesure masiina jina, noano wacũ masiina jijihna. Á yoa surara comaa suhtiro mehne to cutirote to sã ducatariro seheta Cohamacure wacũ tuaga musa, wafinore to ducatahto sehe. Á

yoana Cohamacure, paina cãhure cahãga. Mûsa ã yoachũta Cohamacũ musare ñũ wihborohca. Æ jina musare pichacapurũ waha-
borinare Jesu to yũhdohtore “Potocã tjira”,
niga mûsa. Mûsa ã niina jichũ surara
to dapure comaa chapea mehne to pisa
dũcatario seheta wafino musare to ñano
yoa duachũ Cohamacũ tirore dũcatarohca.
⁹ To buhiri dahrehtinare marine beserari
jire Cohamacũ. Jesucristo mari puhtoro
pichacapurũ wahaborinare to yũhdohtina cji-
htire marine beseri jire tiro. ¹⁰ Jesu mari ya
cjhirtireta yariari jire tiro mehne mari jilto
sehe. Catiina, yariaina cãhũ tiro mehneta
jiahca. Æ jina jipihntina tiro mehne jinahca
mari to yaina jina. ¹¹ Æ jina mûsa mehne
macainare mipũ mûsa wahchechũ yoariro
seheta mûsa basita wahchechũ yoaga tjoa.
Æ yoana mûsa basita Cohamacure wacũ tua
namochũ yoaga mûsa mehne macainare.

Jesu yainare Paulo yahu batoaha

¹² Mûsare buheinare, Cohamacũ dutiare
mûsare yahuhtinare mari puhtoro buhe du-
tiro taro beseri jire. To ã ni beserinare
noano ño payoga mûsa. Mûsa ã ño pay-
ochũ cahmacũ tuaro dutija mûsare. ¹³ Ti
dahraare ti yoachũ tinare cahã mehne
noano ño payoga. Æ yoa mûsa mehne
macaina mehne cahmacheno marieno jiga.

¹⁴ Mûsare sã coyeare, ahrire tuaro du-
tija: Dahra duaerainare dahra dutiga mûsa.
Cahyainare wahchechũ yoaga mûsa. Jesure
wacũ tuaera cureinare yoadohoga. Tina
jipihntina mehne noano suaro marieno ji
coaro jiga mûsa.

¹⁵ Cãiro musare to ñano yoachũ ñũna
tirore ñano yoa cahmaena tjiga. Æ jina mûsa
mehne macainare, jipihntina paina cãhure
noano yoaga.

¹⁶ Æ yoana dachoripe ã wahcherucuga
mûsa. ¹⁷ Æ jina Cohamacure ã sinirucuga
dachoripe. ¹⁸ Mûsa ñano yũhdũpanahta Co-
hamacure wahche, “Noana”, niga. Mûsa
noano yũhdari pja cãhure “Noana”, niga
tirore. Æ nina Cohamacũ to cahmano seheta
yoana nica mûsa. Cristo Jesu yaina mûsa
jichũ ñũno mûsa ã nichũ cahmana tiro.

¹⁹ Espiritu Santore yũhti duaeraina jiena
tjiga. ²⁰ Espiritu Santo to masia mehne
paina sehe mûsare buhera. Ti ã buhechũ tí
buheare cahmaeraina jiena tjiga. ²¹ Paina
mûsare soro ti ni buhechũ tí Cohamacũ ya
jierachũ masiga mûsa. Æ jina Cohamacũ
ya buhea ti jichũ cãhure masiga mûsa. Æ
masina noaa buhea dihtare cahmaga. ²² Æ
yoana jipihntia ñaare cahmaena tjiga mûsa.

²³ Cohamacũ marine noano jichũ yoariro
jira. Tiro to basi musare to yainare
noaina ñaa marieina jichũ yoa namojaro
mûsare. Mûsa pjacuri cãhure mûsa catia

cãhure noano ñũ wihbojaro. Mari puhtoro
Jesucristo ahri yahparure to tjua tahto pano
mûsare Cohamacũ noano ñũ wihbojaro
ñaare mûsa yoerahto sehe. To ã yoachũ
Cristo to tachũ ñaa marieina jinahca mûsa.
²⁴ Æta jichũ yoarohca Cohamacũ. Tiro
mûsare beseriro to niriro seheta yoara.

Paulo cãhũ noa dutirocaha

²⁵ Sã ya cjhirtire Cohamacure sini payoga
mûsa, sã coyea.

²⁶ Mûsa mehne macainare noano mehne
piti bocasiniga.

²⁷ Jipihntina Jesu yainare ahri tjure buhega
mûsa. Jesu mari puhtoro to dutia mehne
ahrire musare dutija yũhũ.

²⁸ Jesucristo mari puhtoro to cahã mehne
mûsare noano yoajaro.

2 Tesalonicenses

Paulo cāhu joarocaha Jesu yainare Tesalónica macainare

¹ Yūhu Paulo, Silvano, Timoteo cāhu ahrire mūsare joarocaja tjoa. Musa sehe Tesalónica macaina mari Pucu Cohamacu yaina jira. Mari puhtoro Jesucristo yaina cāhu jira musa. ² Ā jina Cohamacu mari Pucu, mari puhtoro Jesucristo mehne mūsare noa dutija. Cohamacu yoadohoa mehne noano jiga musa.

Ahri yahpapure Cristo tjua taro buhiri dahrerohca

³ Cohamacure sinina Jesure musa wacū tuaare wacūna “Noabiara sāre”, nirucuja sā Cohamacure. Sā ā nichu noa nina. Dachoripe Cohamacure musa noano wacū tua namona niyuhca. Ā yoana dachoripe musa mehne macainare cahī namona niyuhca musa. Ā jichu Cohamacure “Noabiara sāre”, sā nichu noa nina. ⁴ Paina mūsare űano ti yoapachuta Jesure wacū tuarucuyuhca musa mipu cāhure. Ā yoa tirore wacū duhuerayuhca. Musa ā yoachu űana tīre musa yoirire paina Cohamacu yainare wahchea mehne yahuja sā. ⁵ Ā wacū tuarucuna Cohamacu mari puhtoro yaina musa jiri buhiri űano yūhdana niyuhca musa. Ā jiro puhtoro Cohamacu to suho jiropure waha dutira mūsare. To ā dutichu to quihōno yoiriro jichu masija mari.

⁶ Ā yoa Cohamacu quihōno yoiriro jira. Ā jiro mūsare űano yūhdachu yoaina sehene űano yūhdachu yorohca tiro. ⁷ Ā yoaro musa űano yūhdarına cjiri jichu tiro mūsare noano jichu yorohca. Sā cāhure noano jichu yorohca. Mari puhtoro Jesu to yaina anjoa tuaina mehne, picha pohna mehne muanopu bajuaro noano jichu yorohca marine, űano yūhdarına cjirire. ⁸ Ā yoa Cohamacure masierainare, mari puhtoro Jesu to buheare noa buheare yūhdarınarine Cohamacu buhiri dahrerohca. ⁹ Cohamacu tinare ō sehe buhiri dahrerohca: Pichacapu tina űano yūhdarucuahca. Ā jia tina tariri mari puhtoro Jesu cahai ne ji masierara. Ā jia tua yūhdariro to jiare űusi tina. ¹⁰ Āta waharohca tí dachoi Jesu to tjua tahti dachoi. Tí dachoihta tiro tarohca noaina tirore wacū tuaina “Noariro, tuariro jira Jesu”, ni wahchea mehne ti űo payohto cjihtore. Mūsare sā buherire musa noano tūhore. (Ā jina musa cāhu tiro mehne jinahca.)

¹¹ Ā jina Cohamacure ā sini payorucuja sā musa ya cjihtire. Ō sehe ni Cohamacure sini

payoja sā: To cahmano seheta yoahinare mūsare to cūriro seheta musa jihtina cjihtire sini payorucuja sā mūsare. Musa noaina ji duanata niyuhca. Ā jina Cohamacu to tuaa mehne noaina musa ji duariro seheta musa jihti cjihtire sini payorucuja sā. Musa Cohamacure wacū tuyuhca. Ā wacū tuana to yare yoayuhca musa. Tīre musa noano yoa namohti cjihtire Cohamacure sini payorucuja sā mūsare. ¹² Ā yoana mari puhtoro Jesucristore painare űo payochu yoanahca musa. Musa ā yoachu Jesucristo yaina musa jichu űana paina űo payoahca mūsare. Cohamacu to cahīa mehne, mari puhtoro Jesucristo cāhu to cahīa mehne ā waharohca.

2

űano yorarucurirore yahuha Paulo

¹ Mipure mari puhtoro Jesucristo ahri yahpapure to tjua tahtore, tirore mari cahmachu mari piti bocahtore yahu namo duaja yūhu. Ō seheta tuaro yahu duaja mūsare, sā coyea: ² Paina mūsare ō sehe niboca: “Mari puhtoro to tjua tahti dacho, pihtiri dacho jiropu nina”, niboca mūsare. Tí ā nichu tūhona, tūho caena tjiga. Ā yoa tūho wisiena tjiga. “Cohamacu yūhure āta niri jire”, niboca mūsare paio. Pairo cāhu mūsare buhero āta niboca. Pairo cāhu āta ni joarocaboca, “Yūhu Paulo tjija”, ni mahño joarocarō. ³ Paina mūsare tí ā mahñochu tūhoena tjiga musa. Tí dachoi ahri yahpa to pihtihto panocā payu masa Cohamacure duhuahca. Ā jiro tí dachoi űano yorarucuriro pichacapu wahahtiro bajuarohca jipihtina tí űahtiro cjihtore. ⁴ Tiro Cohamacu warore, paina bajueraına masa tí űo payoına cāhure jipihtina masare űo payo dutisi űano yorarucuriro. Tiro ō sehe ni tūhoturohca. “Ah-rina jipihtina bui puhtoro jija yūhu”, ni tūhoturohca. Ā jiro Cohamacu wūhūi dujiro “Yūhu sehe Cohamacu jija”, ninohca.

⁵ Musa mehne jisinicu tīreta yahui. ĆTīre wacūerajari musa? ⁶ Mipure paio sehe űano yorarucurirore ne ji dutierasinina. Ā yoa tirore ji dutierarirore masina musa. Tiro sehe to dutichu to quihōri dacho jichu űano yorarucuriro bajuarohca. ⁷ Mipure masa tí űuenoi tiro yoaro seheta paina űaare yoa tuhsura. Tí ā yoapachuta űaare yoa dutierariro to wahahto pano tiro űano yorarucuriro sehe jisi. ⁸ To wahari baharo pinihtare űano yorarucurirota bajuarohca. Baharo mari puhtoro Jesucristo tirore yūhdarucarohca. Ahri yahpapu to si sitea mehne tjua taro, to dusero mehne putirocaro, tirore wajā boarohca. ⁹ űano yorarucuriro sehe watīno tuaa mehne taro, payu bajuamehnerire, mahñoa bajuamehnerire yoa űonohca. ¹⁰ Payu űaa to yoa űoa mehne to ā mahñochu pichacapu

wahahtina sehe tirore tũhoahca. Tina sehe noaa buheare cahmaerare. Ti ă cahmaerachũ Cohamacũ tinare pichacapũ wahahtinare yũhdosi. Tina pinihta ńano yoarucuriro mahńoriro to yoarire “Potocă tjira”, niahca. ¹¹ ă jiro noaa buheare ti cahmaerari buhiri Cohamacũ tinare wisiomehnenohca. ă wisiaa mahńoare cahmaahca tina. ¹² ă jiro jipihtina noaa buheare tũho duerainare, ńaa dihtare yoa ji coainare tirota buhiri dahrerohca.

“Cohamacũ musare beseha to yaina jichũ yoaro taro”, ni yahuha Paulo

¹³ Mũsa sã coyeya, mari puhtoro Jesu to cahĩna jira mũsa. Dõipũta wahmanopũreta musare pichacapũ wahaborinare to yũhdohtina cjihtire Cohamacũ beseri jire musare. Musare beseri jire Espĩritu Santo to tuaa mehne to yaina ńaa marieina musare jichũ yoaro taro. ă jiro noaa buheare “Potocă tjira”, nihtina mũsa jichũ ńũno musare beseri jire. To ă beserina mũsa jichũ ńũna Cohamacũre wahche, “Noana”, nirucuja sã. ¹⁴ Noa buheare musare sã buhechũ Cohamacũ musare beseri jire mari puhtoro Jesucristo to masa mũjariro seheta mũsa cũhũ mũsa masa mũjahto cjihtore.

¹⁵ ă jina yũ coyeya, noano wacũ tuaina jiga mũsa. ă jina sã durucua mehne sã joarocaa pũri mehne musare sã buherire noano wacũga mũsa. ă yoa ti buheare yũhdũrũcaena tjiga. ¹⁶ Mari puhtoro Jesucristo to basi, Cohamacũ mari Pũcũ cũhũ marine cahĩa, jipihtia dachoripe marine wahchechũ yoare. Marine cahĩa marine pichacapũ wahaborinare yũhdoahca. ă jina Cohamacũ to yũhdohtore noano masina wahcheja mari. ¹⁷ Jesucristo, mari Pũcũ mehne musare noano yoajaro pjiro mũsa wahchehto sehe. ă yoa jipihtia noaare mũsa yoahto sehe, mũsa noano durucuhto sehe Cohamacũre musare sini payoga.

3

“Sã ya cjihtire Cohamacũre sini payoga”, ni joaha Paulo cãhũ

¹ Mipũ sã coyeya, sã ya cjihtire Cohamacũre sini payoga mari puhtoro Jesu to buhea payũ masare sã buhehto sehe. To buheare mũsa noano cahmariro seheta paina cãhũ ti buheare ńo payoa mehne ti cahmahto sehe sini payoga mũsa Cohamacũre. ² Cãinata Jesure wacũ tuara. Paina sehe to yare tũho dueraa, Jesure wacũ tuaerara. ă jina ńaina masa sãre ti ńano yoa duachũ Cohamacũre sini payoga mũsa sãre to yoadohohto sehe. ³ Mari puhtoro Jesu to niriro seheta yoariro jira. ă jiro musare tirore wacũ tuachũ yoarohca. ă yoa tuhũ, watĩno musare to

ńano yoa dutichũ tiro musare yoadohoro-hca. ⁴ Cohamacũ musare to yoadohorire masija sã. ă jina musare sã dutiro se-heta mũsa yoachũ cãhũre masija sã. ă yoa ăta yoarucunahca mũsa. Ti cãhũre masija sã. ⁵ Cohamacũ musare to cahĩare musare masichũ yoajaro. ă jina Cristo yoaro sehe ńano yũhdũpanahta cãno pjaina jichũ yoajaro musare mari puhtoro.

Marine tuaro dahraro cahmana

⁶ Jesucristo mari puhtoro to dutiro mehne õ sehe ni dutija musare: Jesu yainare dahra duerainare, musare sã buheriro se-heta yoerainare, tinare piti tiena tjiga. ă ńũnocahga tinare. ⁷ Sohõ jiri pja mũsa mehne sã jichũ tuaro sã dahrachũ ńũre mũsa. ă jina sã yoariro seheta mũsa cãhũre dahraro cahmana. Tĩre noano masina mũsa. ⁸ ă jina mũsa chũare wapa marieno chũerahi sã. ă yoa dachopũre, ńamipũ cãhũre tuaro dahrai sã “Mũsa chũare sã siniri”, nina. ⁹ Sã buheri wapa musare wapa cahmaboa sã. ă wapa cahmaborina jipanahta wapa cahmaerana tuaro dahrai sã, mũsa sehe sãre mũsa ńũ cũhto sehe. ¹⁰ Mũsa mehne jina, õ sehe ni buhei musare: “Dahraeraina chũea tjijaro”, ni buhei sã musare. ¹¹ Cãina mũsa mehne macaina ne dahra duerayuhca. ă dahra dueraa, painare ă yahu wajamacanoca, caribobiaro yoayuhca tina. ¹² Mari puhtoro Jesucristo to dutiro mehne ă dahra duerainare õ sehe nija: Noano wahchea mehne dahrajaro tina ti noano jilto sehe, ti ya chũare ti chũhto sehe.

¹³ Sã coyeya, mũsa sehe noaare yoarucuna pumena tjiga. ¹⁴ Cãina tó macaina ahrire sã joarocarire yũhdũrũcaboca. Ti ă yoachũ ti yoarire noano ńũga. ă ńũna tinare piti tiena tjiga ti buoro wahahto sehe. ¹⁵ ă piti ti duhupanahata tinare ńũ tuhtiena tjiga. Tina mũsa coyeya, Jesu yaina tjira. Ti ă jichũ ti yũhdũrũcarire yahuga tinare tĩre ti yoer-ahto sehe.

Paulo tinare noa duti batoaha

¹⁶ Mari puhtoro Jesu marine noano jichũ yoariro mehne dachoripe noano jirucuga mũsa. ă jicũ “Mari puhtoro mũsa jipihtina mehne jirucujaro”, nicũ musare noa dutija.

¹⁷ Yũhũ Paulo, yũ wamomaca mehneta mipũre yũ basita joa batoai nija: ă joacu musare noa dutija. Jipihtia yũ joarocaa pũrine õ sehe dihta yũ wamomaca mehne joa batoaja yũhũ. Yũ õ sehe dihta yũ joa batoachũ ńũna yũ joarocari pũ to jichũ masinahca mũsa. ¹⁸ Mari puhtoro Jesucristo to cahĩa mehne noano yoajaro musare jipihtinare.

1 Timoteo

Paulo Timoteore joarocaha

¹⁻² Yuhũ Paulo ahrire muhare Timoteore joarocaja. Cohamacu marine pichacapu wahaborinare yuhdoriro jira. Jesucristo yare buhe dutiro to cūriro jija yuhũ. To Pucaro, to Macano Jesu mehne ti dutiriro seheta ti cūriro jija yuhũ. Jesuta marine yuhdora. Ā jina marine to yuhdohtore masina, tíre cohtaja mari. Muhare Timoteore Jesu yare buhei. Yu ā ni buhechu tuhocu Jesure wacū tua ducare muhu. Ā jicu muhu potocāta yu macu yoaro sehe jicuta nina. Cohamacu mari Pucu mehne, mari puhtoro Jesucristo mehne muhare noa dutija. Ā yoa muhare cahia, pja űna ti yoadohoa mehne noano jiga muhu.

Paulo mahñoa buheare buhe dutieraha

³ Sohõ jiri pjare Macedonia yahpapu wahacu muhare Efesoi cū yuhdu wahcāi. Tõi cāina ti ya buheare mahñoa buheare buheina jire. Tí buheare mu buhe dutierahtiro cjihtore cūi yuhũ muhare. ⁴ Tina ti mu sũro ā buhemacanocahna. Ā yoa ti coyera panopu macaina cjiri ti mu sũro ti buherire ā buherucura. Tí buhea mehne paina mehne cahma sayorucura. Cohamacu marine to dutirire noano yoachu yoarerara tina ā buhea. Cohamacu ya sehene yoana tirore wacū tuaja. Ā jicu ti mu sũro ti buherire buhe dutierahtiro cjihtore cūi muhare.

⁵ Ā cūi muhare Jesu yaina painare ti cahĩhti cjihtire. űaa buhiri mariea mehne, noaa wacūa mehne, potocā Cohamacure wacū tuaa mehne painare ti cahĩhti cjihtire ā cūi muhare. ⁶ Cāina ahri noaa buheare cohā tuhsu paye buhea sehene cahmana tjoa. Ā ti cahmachu, ti buhea sehene ti cahma sayochu tó wahaerara. Tí buheare ti cahma sayoa yaba cjihti jierara. ⁷ Tina Cohamacu dutiare buheina ji duamana. Ā buhe duapahta tí buheare tina ti basi noano masierara. Tí buheare masiina yoaro sehe buhepahta tí buheare ne masierara tina.

⁸ Cohamacu dutiare Moise cjiro marine to cūri cjirire quihõno mari buhechu noaa dutia jira. Tíre mari noano masija. ⁹⁻¹⁰ Tí dutiare buhena ahrire masino cahmana: Tí dutia noaare yoainare ti buhehti cjihti jierara. Ahriina sehene ti buhehti cjihti jira. Puhtoare cohā duainare, dutiare yuhdurucainare, űaa dihtare yoainare, űano buhiri tiinare, Cohamacure ño payoerainare, Cohamacu yare cahmaerainare, ti pucusumare wajāinare, ti pocosānumia cāhure wajāinare, paina masare wajāinare,

numia mehne űano yoainare, muu mehne űano yoaa numiare, cahma numia mehne ti űano yoariro seheta muu sahsero o numia sahsero jipahta ti pjacari mehne űano yoainare, masa pohnare paina cāhure duhti yacainare, mahñoinare, painare mahñoa mehne yahusāinare Cohamacu dutia Moise cjiro marine to cūri cjiri sehe tinare buhehti cjihti jira. Ā yoa paina jipihtinare noaa buheare yuhdurucainare buhehti cjihti jira Cohamacu to dutia. ¹¹ Tí buhea noaa buhea sehe noariro Cohamacu to ya buheata jira. Tí buhea sehene yuhure Cohamacu buhe dutire.

Cohamacu Paulore to pja űnare yahuha tiro

¹² Ā yu buhechu Jesucristo mari puhtoro yuhure tuare waro yuhure yoadohora. “Paulo noano buherohca yu yare”, ni tuhature Jesu yuhure. Ā jiro yuhure besero tirore yoadohohtiro cjihtore cūre yuhure. To ā yoachu “Noana”, nija yuhũ tirore. ¹³ Tõ panopure Cristore yu űano durucupachuta, to yainare űano yu yoapachuta, tiro yuhure beseri jire. Tirore masierasinicu tirore űano yoacu “űano yoai nica yuhũ”, ni tuhoturacuru. Yu ā masierasinicu űano tiro pja űnare yuhure. ¹⁴ Ā pja űno, Cohamacu mari puhtoro yuhure tuaro cahĩno, noano yoare yuhure. Ā yoa Cristo Jesure wacū tuachu yoare yuhure tiro. Ā yoaro painare cahĩchu yoare yuhure Cohamacu.

¹⁵ Yuhũ sehe paina yuhdoro űaa yuhduariro jimai. űaina mari jipachuta Jesucristo ahri yahpapu tari jire űainare pichacapu wahaborinare yuhdohtiro cjihti. Tí potocā tjira. To ā jiriro jichu jipihtina tíre masijaro. ¹⁶ űaa yuhduariro yu jipachuta tiro yuhure pja űnare. Ā pja űno Jesucristo suaro marieno yuhure to noano yoarire masichu yoaro nire painare baharo tirore wacū tuahtinare masichu yoaro taro. Ā wacū tuahtina muanopu ā jirucuahca. ¹⁷ Cohamacu jipihtia dachoripe masa bui puhtoro jira. Tiro ne yariaerara. Mari mehne to jipachuta tirore űneraja mari. Tiro dihta Cohamacu waro jira. “Potocāta noariro, tuariro jira tiro”, nijihna tirore. Jipihtia dachoripe tirore ño payojihna. Āta yoajihna.

¹⁸ Timoteo, yu macu yoaro sehe jira muhu. Ā jicu mipure ahrire muhare dutija: Mari coyera Jesu yaina Cohamacu yare yahu muhtaina baharo mu yoahure ti ni muhtariro seheta muhare dutija. Cristo yare noano yahurucuga. Ā yoa űano yuhdupaihta tirore wacū tua duhui tjiga muhu. Tuhsu, to yare quihõno buherainare poto yahuga duhuro marieno. ¹⁹ Jesure

ã wacũ tuarucuga. Ñaa buhiri marieriro jiga. Noaa dihtare yoaga. Cãina tĩre yoaeraa Jesu yare cohãna. Æ cohãna tĩre wacũ tua duhure. ²⁰ Æta yoare Himeneo, Alejandro mehne. “Watĩno to cahmano seheta yoawahnojaro m̄sare”, ni cũi tĩnare, ñano Cohamacũre ti durucu namoerah̄to sehe.

2

Cohamacũre sini payoare yahuha Paulo

¹ Mĩpũre õ sehe ni dutija m̄sare. Ahri wiho waro jierara: Jĩpihtina ya cjihtire Cohamacũre sini payoga. Æ sini payona “Noana. Wahcheja”, nĩga Cohamacũre. ² Pũh̄toa, paina masa bui dutiina cãhu ti ya cjihti cãhũre Cohamacũre sini payoga, cahmacheno marieno Cohamacũre ño payoina mari noano jĩhto cjihtore. Æ sini payona mari Cohamacũ cahmaare, quihõno yoaina noano ji masija. ³⁻⁴ Tõ sehe paina ya cjihtire mari sini payochũ noa nina. Tĩre mari yoachũ ñano Cohamacũ marine yuhdohtiro sehe marine noano ñu jicoara. Jĩpihtina pichacaru wahaborinare to yuhdoina jichũ cahmana Cohamacũ. Æ yoa noaa buheare ti masichũ cahmana tiro. Æ jiro paina ya cjihtire mari sini payochũ wahchera tiro. ⁵ Cãirota jira Cohamacũ. Æ yoa Cohamacũre mari ñu tuhtichũ Cohamacũ cãhu marine to ñu tuhtichũ bosariro cãirota jira. Tiro masunota jiriro, Jesucristota jira. ⁶ Wapamonore waparo seheta jĩpihtina ti ñaa yoari buhirire yariari jire tiro. Cohamacũ to quihõri p̄jai tĩre masare masichũ yoari jire. ⁷ Tĩre yahuhtiro cjihtore, Jesu to cũhtiro cjihtore tiro yũhure beseri jire. Judio masa jierainare Jesure wacũ tuaare, noaa buheare buhehtiro cjihtore beseri jire yũhure. Potocãta m̄sare yahui nija yũhu. Mahñoeraja.

⁸ Cohamacũ yare noano yoaina jĩpihtiro macaina sehe Cohamacũre ti sinichũ cahmaja. Æ yoa tina suaro marieno, cahma sayoro marieno tiro mehne ti durucuchũ cahmaja. ⁹ Æ yoa, numia sehene carera numia yoaro seheta ti suhti tina jichũ cahmaja. Æ jia soro bajua p̄joari ti p̄joarire yoaea t̄jijaro. Uru dari busaa darire perla yapari dari cãhure busaea t̄jijaro tĩ numia painare “Goa pjachũ yoari”, nia. Æ yoa wara bujũa suhtire sãaea t̄jijaro tina Jesu ya numia. Painare goa pjachũ yoaa numia jiea t̄jijaro. ¹⁰ Æ yoa tĩ numia noaa sehene yoajaro. Æta yoaro cahmana “Cohamacũ ya numia jija”, nia numiare. ¹¹ Dihta marieno ño payoa mehne buheare tãhojaro tĩ numia. ¹²⁻¹⁴ Æ jia numia m̄sare buhea t̄jijaro. Æ yoa m̄sare dutiea t̄jijaro. Tĩ numia sehe dihta mariea numia jijaro. Adãore Cohamacũ bajuamehne m̄htari jire. To

baharo Evare bajuamehneri jire. Æ yoa watĩno to mahñochu tãhoriro Adão jierari jire. To mahñochu tãhoricoro sehe Eva jiri jire. Æ to mahñochu tãhoro, Cohamacũre yuhdũrucaricoro wahari jire ticoro. Æ jia numia sehe m̄sare dutiea t̄jijaro. ¹⁵ Numino ji m̄htaricoro to yuhdũrũcapachata numia ti pohna tichũ ñano tĩnare Cohamacũ yoadohorohca. Tĩ numia pohna tia numia sehe Cohamacũre ti wacũ tuarucuchũ tiro yoadohorohca tĩnare. Æ yoa masare, Cohamacũ cãhure ti cahĩrucuchũ, noaa numia ti jirucuchũ, quihõno yoaa numia ti jichũ Cohamacũ tĩnare yoadohorohca.

3

Jesu yaina pũh̄toa ti yoahtire yahuha Paulo

¹ Masa Jesu yaina pũh̄toa ji duaa, noaare yoa duaa nica tina. Tĩ potocãta jira. ² Jesu yaina pũh̄toare besecu õ sehe jĩinare besega: Buhiri marieinare besega “Paina tĩnare ñano ni yahusãri”, nica. Æ yoa cãa numiata namo tĩnare, noano tãho masiinare, quihõno yoainare, paina ti ño payoina, masare wahchea mehne ti wũhure sãa ta dutiinare, painare noano buhe mihniinare besega mũhu. ³ Æ besecu caherainare, cahmacherainare, masare noano yoainare, cahma sayoerainare, niñerure cahĩerainare besega mũhu. ⁴ Æ yoa mũ besaina ti ya wũhũ macainare noano yahuina, ti pohna noano ño payoa mehne yũhtichũ yoaina, noano yahuina jijaro. ⁵ Tĩnare yũhtichũ yoa masieraa, noano yahu masieraa, Jesu yaina cãhure noano yahu, yũhtichũ yoa masieraboca tina. ⁶ Jesu yaina pũh̄toa ji duaina Jesu yaina wahma sãaina jia, tina pũh̄toa ji masierara. Wahma sãainare Jesu yaina pũh̄toa masa cũchu tina “Noa yuhdũwaina jija”, ni tãhotuboca. Tĩ ñi ni tãhotuchũ Cohamacũ tĩnare buhiri dahre dutirohca watĩnore to yoariro seheta. Watĩno cãhu Æta ni tãhotua timaha Cohamacũre yuhdũrũca duaro. ⁷ Æ yoa pũh̄toa ji duaina Jesu yaina jieraina ti ño payoina jiro cahmana tĩnare. Noano yoaina ti jichũ ñua paina ño payoahca tĩnare. Æ jia masa tĩnare ñano quiti dahresi. Æ jiro watĩno tĩnare dojomehne masisi.

Jesu yainare yoadohoina ti yoahtire yahuha Paulo

⁸ Æ yoa Jesu yainare yoadohoitina sehene besecu õ sehe jĩinare besega: Tina masa ti ño payoinare, noano potocãta durucuinare, caherainare, niñerure cahĩerainare, mahñoa mehne wapata duaerainare, ⁹ Cohamacũ to yahuri buhea to nino seheta yoainare, ñaa buhiri marieinare besega mũhu. ¹⁰ Tĩnare mũ besehto pano Jesu

yainare yoadohoina ji duainare ti yoirire ñyga mañu. Tinare mu ã ñuri baharo tina sehe ñaa buhiri marieina, ñaare yoeraina jia, Jesu yainare yoadohoina sãajaro tina.

¹¹ Á yoa ti namosãnumia õ sehe ti jichu cahmaja mari. Masa ti ño payoa numia, masa noaa numia, ñano quiti dahrera numia, tuho masia numia, jipihtiare noaare yoarucua numia ti jichu cahmaja mari. ¹² Jesu yainare yoadohohtinare besecu cãa numiata namo tiinare, ti pohnare paina ti wahu macaina cãhure noano yuhtichu yoirine besega. ¹³ Á jia mu beseina Jesu yainare ti yoadohochu paina tinare noano ñu ji coahca. Á jia tina yoadohoina sehe noaa buheare, Jesucristore ti wacũ tuua cãhure cuiro marieno buheahca tina.

Cohamacu ya buheare yahuha Paulo

¹⁴⁻¹⁵ Mipare mu cahapu waha duai ni-maja. Á waha duapaihta mipare wahaerasinicu ahri pũ yahu, muhare joarocai nija. Jesu yaina cahmachuina watoi masa dohse yoahtere muhare yahu joarocai nija, “Michapucaca yahu wahaerasiniboca”, nicu. Jesu yaina Cohamacu catiriro yaina jira. To yaina potocã jia buheare Cohamacu ya buheare cjuara. Á cjuaa, tire buherucura. ¹⁶ Ahri potocã tjira. Marine Cohamacu to buheri cjiri, panopu mari noano masierari cjiri noa yuhduã buhea jira. Ahri buhea õ sehe jira:

Tiro Cristo mari pjacu seheta pjacu tiriro masa bajuari jire.

Noariro, ñaa marieriro to jichu ñore Espiritu Santo sehe.

Anjoa cãhu tirore ñuri jire.

Á yoa buhe duti to cürina paye yahpari macainare to yare buhei sã.

Á jia ahri yahpai masa payu tirore wacũ tuare.

Baharo muanopu Cohamacu naahre tirore. Ti jira noaa buhea.

4

Noa buheare cohãrina cjirire yahuha Paulo Timoteore

¹ Espiritu Santo ahrire noano yahura: Pihitiri dacho panocã cãina masa Jesu ya buheare cohãhca. Á cohãa mahñoa buheare watã ya buhea sehete tuho nuñahca tina. ² Ti buheare mahñorucina yahuahca masare. Tina mahñorucina sehe “Ñaa buhiri mariahna sãre”, ni tuhutuina jira. Á jia tina ti ñaa yoare ne tuhutuera. ³ Ó sehe ni buheahca tina: “Namo tienã tjiga. Ahri chuare chuena tjiga”, ni buheahca tina. Ti ã chu dutierapachuta Cohamacu chuare bajuamehnenno mari chuhti cjihtire noaare cüri jire tiro. Mari Cristore wacũ tuaina jichu noaa buheare

mari masiina jichu, mari ya cjihtire ti chuare bajuamehnea tiri jire tiro. Ti chuare cjuana tirore “Noana”, mari nichu cahmana tiro. ⁴ Jipihtia Cohamacu to bajuamehneri cjiri noaa jira. Á jina to bajuamehneri chuare nana, Cohamacure “Noana” nina, tire marine cohãeraro cahmana. Tire marine chu ji coaro cahmana. Á jicu paina ti chu dutierachu tuhoccu tjiga tinare. ⁵ To bajuamehnea noaa ti jichu yahu tuhsu tiri jire Cohamacu. Á jia tirore “Noana”, mari ni wahcheri baharo ti chuã to yoari chuã noaa waro jia nina.

Jesucristore dahra cohtarirore noarirore yahuha Paulo Timoteore

⁶ Ahri yu yahurire Jesu yainare mari coyeare buhecu Jesucristore dahra cohtariro noariro jira mañu. Á buhecu noaa buheare, quihõno mu tuhori cjirire muhare ti yahuriro seheta noano mu masirire yahuriro jiihca mañu. ⁷ Á jicu ti mu suro ti buherire, Cohamacu ya jieraare tuhoi tjiga. Cohamacu cahmaa sehete yoaporiro jiga mañu. ⁸ Mu murocapochu noa curera. Mu murocaporiro yuhdoro Cohamacu cahmaare mu yoapochu noa yuhduara muhare. Cohamacu cahmaare yoapocu mipare noano jiihca mañu. Mu yariari baharopu cãhure masa mujacu noano jiihca mañu. ⁹ Ti potocãta jira. Jipihtina tire yu nirire masiinare “Potocãta jira”, nino cahmana tinare. ¹⁰ Jipihtina tire ti nihti cjihtire Cohamacu cahmaare ti yohti cjihtire mari tuaro dahraja. Á jina ñano yuhduja mari, paina marine ñano ti yoachu. Cohamacu catiriro, jipihtinare pichacapu wahaborinare yuhdoriro jira. Tirore wacũ tuaina pinihtare tiro yuhdorohca. Á jina to yuhdohto cjihtore masina, cohtaja mari.

¹¹ Ahri jipihtia yu nirire dutiga Jesu yainare. Á yoa tire buhega mañu.

¹² Wahmuno mu jichu ñua paina Jesu yaina muhare yuhduaruca duaboca. Ti ã yoerahto sehe õ sehe yoa ñoga tinare. Masare cahãga. Á yoa Jesure wacũ tuarucu, buhiri marieriro jiga. Wahmuno jipaihta mu ã yoachu ñua muhare yuhduarucasi tina. Á jia mu durucurire tuhõa, mu yoirire ñua muhare ñu cãhca. ¹³ Á jicu mu cahapu yu suhto pano Jesu yainare Cohamacu yare ti joari pũre buhe tuhsu, msa cahmachupe tahari tinare ã yahurucuga. ¹⁴ Jesu yaina mehne macaina puhto Cohamacu yare yahu tuhsu mu bui ti wamomacarine duhu payore. Ti ã duhu payochu Cohamacu ya cjihtire mu yoa masihto sehe cüre muhare Cohamacu. To ã cüre boecu tjiga. Á yoa tire ã yoarucuga.

¹⁵ Ahri dutiare tuaro cahmaga. Á cahmacu ahri dutiare ã yoarucuga mañu. Mu ã

yoari baharo noaare mu yoa namochu jip-
ihtina nuahca. ¹⁶ Muhu sehe noano yoaga,
“Soro yoari”, nica. A yoa noano buhega
muhu, “Soro buheri”, nica. A jicu mu basita
pichacaru wahaboriro yuhdoriro jiihca. A
jia mure tuhoro cahu pichacaru waha-
borina yuhdurina jiahca.

5

*“Paina Jesu yainare o sehe yoaga muhu”,
niha Paulo Timoteore*

¹ Ne bucurore tuhtiecu tjiga. Mu pucure
mu noano yoariro sehetu bucuro cature
noano mehne yahuga. A yoa mu bahanare
mu noano yoariro sehetu wahma yapia
cature noano no payoro mehne tinare
yahuga. ² A yocu mu pocore mu noano
yoariro sehetu bucuro numia cature noano no
payoa mehne yahuga. Mu bahana numi-
are mu noano no payoriro sehetu numia
cature nano goa pjaro marieno, noano no
payoa mehne yahuga tina numiare.

³ A jicu wapewahyaa numiare potocata
pjacuoa numiare no payoa mehne yoado-
hoga ti numiare. ⁴ Wapewahyoro pohna
tiricoro to jichu, o panamana tiricoro to
jichu cature tina sehe ticorore yoadohojaro.
A yoadohoa Cohamacu masare ti coyeare
to yoa dutirire yoa nina tina. A yoa
tina ticorore ti wapamonore wapaa nica
ticoro to bucuro wapa. Ti a yoachu nu
Cohamacu noano wahchera. ⁵ Pjacuoricoro,
wapewahyoro coyea marienico jiro,
Cohamacu ticorore to yoadohohto cjihtore
cohtara ticoro. A jiro naminipe, dachoripe
ticoro Cohamacu mehne a durucuru-
cura. ⁶ Pacoro sehe wapewahyoro a
yoamacanocaricoro carericoro jiro, ticoro
catiricoro jiparota pichacaru butihticoro
ji tuhsara. ⁷ Ahri jipihitia yu yahurire Jesu
yaina cature yoa dutiga muhu, noa dihtare
ti yohti cjihtire. Ti a yoachu nu paina
tinare “Nano yoa nina”, ni masierara.
⁸ Curo to coyeare nu wihboeraro, to pohna,
ti pocoro cature noano nu wihboeraro
“Jesu yairo jija”, ni masierara. A jiro Jesure
cahmaeraina yuhdoro na yuhduraro jira
tiro.

⁹ Wapewahyaa numiare yoadohonahca
musa. O sehe besega musa yoadohohti nu-
miare. Ti wamare joa ohti pu joai tai o
sehe besega ti numiare: Sesenta cuhmari
suaricorore to wamare joa oi tjiga. Tuhsu,
to pano puaro cjirore manu tiricoro wape
wahyoro to wamare joa oi tjiga. Curoto
manu tiricoro wapewahyoro wamare joa
oga. ¹⁰ Ti numiare, “Noaare yoa numia
jira”, masa ti nia numiare, ti pohmare noano
bucuro numiare besega. A yoa tuhsu, ti

wahusei painare noano sa ta dutia numi-
are, dahra cohtaina yoaro sehe Jesu yainare
yoadohoa numiare, nano yuhdurinare yoad-
ohoa numiare, noa dihtare yoa numiare
besega. Ti numiare musa yoadohohti numi-
are bese tuhsu, ti wamare joa oga muhu.

¹¹ Wiho mejeta wapewahya numia nuh-
mia curero ti jichu ti numia sehere besei
tjiga. A jicu ti pu ti wamare joa oi tjiga.
Baharo tina mare goa pja, Cristore cohā,
pari turi manu tiboca. ¹² Tina Cristore
“Pari turi manu tisi sa. Mu yainare yoad-
ohonahca”, niri numia jipahca baharopure
ti niriro sehetu yoeraboca ti numia. Ti a
yoerari buhiri buhiri tiahca. ¹³ Ti numia
o sehe yoa numia jira: Dahraera numia
jipora. A jia paina ya wahusepu waharucu,
naa quiti dahre, ti numiare mari sinituera-
pachata ti mu suro mari jia tiare a yahuru-
cura. Tuhsu, ti yahu dutierari cjirore yahura
ti numia. ¹⁴ A jicu ti o sehe yoachu cahmaja
yahu: Wapewahya numia numia curero
jia numia manu tijaro. A manu tia, pohna
tijaro. Ti ya wahu macainare noano nu
wihbojaro. Mari ya numia wapewahyaa
numia ti a yoachu marine nu tuhtina ma-
rine “Naare yoa nina”, ni tuhti masierara.

¹⁵ Mipu pinihtare caa numia wapewahya
numia Cristo yare duhu, watino cahmaa se-
here yoa tuhsara. A jicu a ni yahuja mure.

¹⁶ Jesu yaina ti coyeacoro wapewahyoro
to jichu tina to coyea ticorore yoadohojaro.
Paina Jesu yaina sehe ticorore yoadohoea
tjijaro. A jia tina paina Jesu yaina ticorore
coyea cuaricorore yoadohoea, paye nu-
mia wapewahya numia coyea mariea nu-
mia sehere yoadoho masina.

¹⁷ Jesu yaina puhto musare ti noano
buhechu ti dahraare ti noano yoachu nu
naa ji coaro mehne nu tinare. A yoa noano
wapaga tinare. Caina tina mehne macaina
Cohamacu yare yahuina, musare buheina
cahu jira. Tina pinihtare paina yuhdoro ji
coaro mehne nu tinare. ¹⁸ Cohamacu yare ti
joari pu o sehe nina, dahrarire to wapah-
tore yahuro: “Wachu trigo yaparire to dah-
pori mehne suhti werire to chu duachu to
duserore dacataena tjiga”, ni joa tiri jire.
A yoa pa pu o sehe nina: “Dahrarire to
dahri wapare waro cahmana”, nina
Cohamacu yare ti joari pu. (To a nichu
tuhona Jesu yaina puhtoare ji coaro mehne
nu, noano wapaga tinare.)

¹⁹ Jesu yaina puhtore to nano yoachu
nu cuurota paina Jesu yaina cah-
machuinares yahusa masierara. Puhtore to
naare yahusahtina tiaro jia, tirore yahusa
masina. Tiaro mariachu puaro yahusa
masina. ²⁰ A yoa naare yoarucurire
jipihitia musa watoi to jichu tirore tuhtiga,

cua, paina ñaare ti yoerahto cjihtore. ²¹ Ā jicu Cohamacu, Jesucristo, to beserina anjoa cahu ti ñurocaroi ahrire dutija mahure: Mipu mahure yu dutiri cjiire yoa pahñoga. Ā yoariro jicu jipihinare Jesu yainare cāno potori yoaga. Pairore soro, pairore soro yoai tjiga. ²² Painare Cohamacu dahraare mu cūhti cjihtire ti bui mu wamomacarine mu duhu payohto pano soaro marieno noano tuhotu pahño, tinare besega. Tina ñaina jiboca. Ā jinare Cohamacu dahraare cūi tjiga. Ā cūcu muhu cahu mu beseina ti ñaare yoaro seheta yoai nica. Tó sehe yoai tjiga. Ā yoa ñaa marieriro jiga muhu.

²³ Suroca pjaro cariro jira muhu. Mipure co dihtare sihnimana muhu. Ā jicu mahano cā vino cahure sihniga muhu. Co jira ti.

²⁴ Cāina ti ñaare yoachu mari ñuja. Ā jina Cohamacu tinare to buhiri dahrehtore masija mari. Paina sehere ti ñaa yoarire mari masieraja. Ti ñaa yoarire baharo masinahca. ²⁵ Tó seheta cāina noaare ti yoachu tīre mari masija. Paye ti noaa ti yoerarire mari masierapanahca baharo masinahca mari. Tīre ñohto basierara.

6

¹ Dahra cohtaina Jesu yaina sehe ti puhtoare noano ño payojaro. Ti ño payochu ñaa paina Cohamacure, mari buhea cahure ne ni dojomehne masierara. ² Ti puhtoa Jesu yaina ti jichu ñaa tinare dahra cohtaina sehe Jesu yaina jia, tinare ñuhoa ño payoeraboca. Ā yoarero cahmana. Ti puhtoa Jesu yaina ti jichu pinihtare tinare dahra cohtaina noano ño payojaro tinare. Ā ño payoa dahra cohtaina sehe Jesu yainare, ti cahñinare ti coyeare yoadohoa nina. Ti puhtoare Jesu yainare dahra cohtaina jia, Jesure cahmaerainare ti ño payoriro yuhdoro Jesu yaina sehere ño payojaro puhtoa ti cahñina ti jichu. Ahri yu yahurire buhega. Ā jicu ahrire dutiga.

Cohamacure ño payoa cahure noano jia cahure yahuha Paulo

³ Soro jia buheare buheriro mari puhtoro Jesucristo ya buheare noaa buheare “Potocā tjira”, ni tuho duaerara. Ā tuho duaeraro, mari ya buheare Cohamacure ño payoa buheare cahmaerara. ⁴ Ā jiro tiro “Masi pahñoriro jija”, niparota tīre ne masierara. Ā masieraro, tuho masierariro yoaro seheta tuaro cahma sayo duara tiro. Ā yoa Cohamacu yare ña nīmacanoca sayorucuriro tjira. Masa tiro yoaro sehe jina cahma sayoa, paina ti noano wahachu ñu tuhtia, cahma ñu duaeraa, noano mehne jierara. Tuhsu, painare ñano quitu dahre, masierapahta masare ñano ni tuhotura tina. ⁵ Tina ñaa dihtare tuhotuina, potocā jiare

ne masieraina ña cahma sayorucuina jira. Ā yoa “Cohamacu yare buhena niñerure wapatanahca mari”, ni tuhotura tina. ⁶ Mari ya mahanocā mari cjuaa mehne wahchena, Cohamacure ño payona, to cahmano seheta yoana, potocāta noano jina nija. ⁷ Ahri yahpapure masa bajuana ne paye barore na taerahi mari. Ā yoa mari yariari baharo wahana ne paye barore naa masieraja mari. ⁸ Ā jina mari chuare mari suhti cahure cjuana payere cahma namoena tji-jihna. Mari cjuaro purota wahchejihna mari. ⁹ Pache puu ji duainare wafino ñaare to yoa dutichu tina sehe jiape ñaare yoarucuina jiboca. Ā yoaa tina payu tahari tuho masieraina seheta paye barore tuaro cahmaa, ñaa yoare duhueraa, ti basita ñano yuhdura. Ā duhueraa pichacapu wahaahca tina. ¹⁰ Niñerure tuaro cahmaa, jiape ñaare yoa ducara masa. Cāina niñerure cahña, tuaro cahmaa, Jesure wacū tua duhua, payu tahari ñano yuhdura tina.

Cohamacu yare yoana ñaare duhuga

¹¹ Muhu pini Cohamacu yairota jira. Ā jicu ahri ñaare yoai tjiga. Noaa sehere cahmaga. Cohamacu yare yoaga. Ā yoacu Jesure wacū tuaga. Painare cahña. Ñano yuhdūpaihta cāno pjaga. Ā yoa painare noano dero yoaga. ¹² Surara cahmachero tuaro to yoariro seheta, muhu cahu Cohamacure wacū tuacu to yare tuaro yoaga. Muanopu ña jirucutiho cjihtore Cohamacu beseri jire mahure. Ā jicu Cohamacure mu wacū tuaare payu masare noano yahuhre muhu. Ā jicu ñano yuhdūpaihta tirore wacū tua duhui tjiga. Muanopu ña jirucutiho jiga. ¹³ Cohamacu jipihinare, jipihitare jichu yoariro jira. Jesucristo sehe Poncio Pilatore Cohamacu yare noano yahuriro jira. Ā jicu tina Cohamacu, Jesucristo cahu ti ñurocaroi ahrire mahure yoa dutiitja: ¹⁴ Mahure Cohamacu to dutirire yoa pahñonocahga. Jesucristo to tjua tahto pano masa mahure ñaare ti ne yahusāerahto cjihtore to dutirireta yoarucuga. ¹⁵ To quihōrioihta Cohamacu Cristore tjua tachu yoarohca. Cohamacu noariro, tiro dihta masare dutiriro jira. Ā jiro jipihina paina puhtoa ti bui puhtoro jiriro jira tiro. ¹⁶ Tiro dihta ne yariaeriro jira. To si sitea mehne jiriro jira. To si sitea cahapu waha masierara masa. Ā yoa tirore masa ne ñuerare. Mipu cahure tirore ñuerara. Tiro sehere ño payojihna. Ā jina “Jipihitia dachoripe tuariro jira tiro”, nijihna tirore. Āta yoajihna.

¹⁷ Ahri yahpa macaina pache puare o sehe ni dutiga muhu: “Painare yuhdūrucaja”, ni ti basi tuhotuea tjijaro tina. Ti pache ti cjuaa pihitia wahaahca. Ā jia ti cjuaa dihtare

wahchea tjjaro. Cohamacu sehere tuaro wahchejaro. Jipihitia pototi mari cahmaare wariro jira tiro. Tiro sehere wacū tuajaro tina pache pua. ¹⁸ Ā jia tina noaa sehere yoajaro pjiro noaare yoaina ti jilhto sehe. Ā yoa ti cjaare waina jijaro. ¹⁹ Ti ā yoachu muanopu Cohamacu cahai ti ya jahca. Ti ya tópu jia, ne butisi. Ā jia tópu ā jirucuahca tina.

Paulo Timoteore duti batoaha

²⁰ Timoteo, mūhare Cohamacu to cūrire to buhe dutirire noano yoanohbu. Boi ninohbu mūhu. Cāina masa Cohamacure cahmaeraina yoaro seheta mahñoare, tuho masieraina ya buheare durucurucura. Ā durucua “Noano masiina ya buhea jira”, nimana tina. Ā ti ni durucuaare tuho nūni tjiga. ²¹ Cāina tí durucuaare tuho nūniina Cristo yare cohānocare. Cohamacu to cahīa mehne masare noano yoajaro.

2 Timoteo

Paulo Timoteore pari turi joarocaha

¹ Yuhñ Paulo, ahrire mähure Timoteore joarocaja tjoa. “Jipihtina Jesucristore wacü tuaina manopñ ã jirucuahca” ni, cüre marine Cohamacñ marine yuhdñchñ yoariro. To ã ni cüreire yahuhtiro cjihtore yuhñre bese cüre Jesu. Æ cño Cohamacñ to cahmano seheta yoaro nire yuhñre. ² Mñññ Timoteo yñ cahñiro jira. Mñññre Jesu yare yñ buhechñ tuhocñ tirore noano wacü tua dñcare mñññ. Æ jicñ yñ macñ yoaro bese jira mñññ. Æ jicñ Cohamacñ mari Pñchñ, mari pñhtoro Jesucristo mehne mñññre noa dutija. Æ yoa mñññre pja ñña, cahña tina ti yoadohoa mehne noano jiga mñññ.

Masare Cristo yare ti yahurire yahuha

Paulo

³ Ñamipñ dachopñ cñññre Cohamacñ mehne durucucñ mñ yñ cjihtire sini payocñ mñññ mehne wahcheja. Æ wahchecñ Cohamacñre “Noana”, nija yñññ. Panopñ macaina yñ coyea Cohamacñ yare ti yoariro seheta yñññ cñññ “Buhiri tija”, ni tuhóturo marieno mipñre to yare yoaja. ⁴ Sohñ jiri pjare yñ wahachñ mñ tii nñññ tirire wacñcñ mñññre tuaro ññ duaja mñññ mehne noano wahche duacñ. ⁵ Æ jicñ Jesure potocñta mñ wacñ tuarire wacñja yñññ. Mñ ññchocoro Loida, mñ poco Eunice cñññ Jesure wacñ tua mñhtare mñ pano. Æ yoa mipñre mñññ cñññ tirore mñ wacñ tuachñ noano masija yñññ.

⁶ Æ jicñ ahrire mñññre wacñchñ yoa duaja. Mñ bui yñ wamomacarine yñ duhu payochñ Cohamacñ yare mñ yoahñ cjihtire tuaare ware mñññre. Tí tuaa mehne yoa namoga mñññ. ⁷ Cohamacñ marine Espñritu Santore wari jire. Æ jiro masare marine cuierachñ yoara Espñritu Santo. Æ yoaro tuaina, masare cahñina, tuhñ masina marine jichñ yoara tiro. ⁸ Æ jicñ mari pñhtoro ya cjihtire painare yahucñ, bñ tiecñ tjiga mñññ. Yñññ to yare yñ yoari buhiri peresui jiriro jija. Peresui yñ jichñ yñññre bñ tisñai tjiga mñññ. Wiho mejeta noaa buheare mñ buheri buhiri ñño yuhdñcñ “Noanohca”, niga mñññ cñññ. Mñ ã ñño yuhdñchñ Cohamacñ mñññre yoadohorohca. ⁹ Cohamacñ sehe marine pichacapñ wahaborinare yuhdñchñ yoare. Æ yoa noaina to yaina jihtina cjihtire tiro besea tiri jire marine. Mari noano yoari mehne besera tiri jire marine Cohamacñ. To mñ surñ to cahmariro seheta yoaro ahri yahpare to bajuamehnehto pano marine cahñno, tiro marine besea tiri jire. Marine

ã cahñno marine yuhdñchñ yoahñtirore Jesucristore warocari jire Cohamacñ. ¹⁰ Mipñre Jesucristore marine yuhdñchñ yoahñtirore warocaro, marine potocñta to cahñre noano masichñ yoaro niri jire Cohamacñ. Jesu marine to yainare pichacapñ wahaerachñ yoare. Æ yoaro “Yuhñre wacñ tuana Cohamacñ mehne ã jirucunahca” nino, buhñro marine to ññ masichñ yoaro seheta noaa buheare marine masichñ yoaro tari jire tiro.

¹¹ Tí buhea noaa buheare yahuhtiro cjihtore to cñhtiro cjihtore besea tiri jire yuhñre. ¹² Æ to beseriro jicñ mipñre ñño yuhdñja yñññ. Æ sehe ñño yuhdñpacñta yñññ bño tieraja. Yñ wacñ tuariroro Jesure masija yñññ. Tuariro jira tiro. Æ jiro yñññre to yare buhe duti cño noano yoadohorohca yñññre. Æ yoa ahri yahparñ to tjua tahto pano, “Mñññre yuhdñchñ yoahñtja”, to niriro seheta sohtori tiarohca yñññre. Yñññre yuhdñchñ yoarohca tiro. Tñre noano masija.

¹³ Mñññre noano yñ yahurire yoa pahñoga. Cristo Jesu yaina jina tirore noano wacñ tuaja mari. Æ yoa painare noano cahñja. Æ jicñ tirore ã wacñ tuarucuga mñññ. Tuhsñ, painare noano cahñrucuga. ¹⁴ Espñritu Santo mari mehne jiriro to yoadohoro mehne noaa buheare noano yoaga. Quihñno buhega. Soro ni buhecñ tjiga.

¹⁵ Jipihtina Asia yahpa macaina Jesu yaina yñññre yoadoho duaeraa cohñ wahcña wahare. Tina mehne macaina pñaro Figelo, Hermógenes ãta yoare tina cñññ. Tí ã cohñ wahcñire masi tuhsara mñññ. ¹⁶⁻¹⁷ Tí ã cohñpachñta Onesiforo sehe payñ tahari yñññre yoadohoro noano yajeri sñachñ yoare. Æ yoaro peresui yñ jichñ tiro yñññre bño tisñæerare. Æ jiro Romai yñ jichñ ã macarucuri jire yñññre. Æ macarucuro yñññre bocare. Æ jiro tirore, jipihtina to ya wñññ macaina cñññre pja ññnohca Jesu mari pñhtoro. To ã yoahñto sehe tirore sini payoja. ¹⁸ Æ yoa ahri yahparñ Jesu mari pñhtoro to tjua tahti dachoi tirore pja ññnohca. To ã yoahñto sehe tirore sini payoja. Efesoi payñ tahari yñññre to yoadohorire noano masina mñññ.

2

Ñño yuhdñparota Jesu yairore cñño pjaro cahmana

¹ Mñññ sehe yñ macñ yoaro sehe jiriro, Jesucristo marine noano yoariro to yoadohoro mehne tirore wacñ tuarucuga. ² Æ yoacñ payñ masare yñ buherire mñ tuhñre paina cñññre buhega mñññ. Tina mñ buheina Cohamacñ yare yoarucuína jijaro. Æ jia painare buhe turiaina jijaro.

³ Surara ñano yuhduparota to cāno pjariro seheta muñu cāhu Jesu yairo jicu ñano yuhducā cāno pjaga muñu. ⁴ Surara to puhtoro dutia sehete yoara tirote wahchechu yoaro taro. Ā yoaro tiro surara jieraina yoaro sehe wiho jiare yoerara tiro. (Muñu cāhu tó seheta Cohamacu dutia dihtare yoaga.) ⁵ Murocaperiro muroca dutiina ti dutiare quihōno yoeraro to muroca yuhduri wapare na masierara. (Ā jicu murocaperiro ti dutiare quihōno to yoariro seheta Cohamacu dutiare quihōno yoa pahñoga muñu.) ⁶ Ā yoa wese dahrariro wapu tiro mehne noano dahrariro sehe tí wese maca dichare noano na mahta, noano wapatarā. (Ā jicu muñu cāhu tiro yoaro sehe Cohamacu yare mu noano yoachu tiro muhare noano yoarohca.) ⁷ Jipihitiare noano masichu yoarohca Jesu mari puhtoro muhare. Ā jicu mipure muhare yu nirire noano wacu tuhotuga.

⁸ Ā jicu Jesucristore wacuga. Tiro puhtoro Davi cjiro panopu macariro to panamino ji turiariro jia tiri jire. Ā jiro yariaro masa mujari jire tiro. Noaa buheare buhecu to ā waharireta buhei nija. ⁹ To yare buhecu ñano yuhduja yuhu. Ā jicu tite yu buheri buhiri ñaare yoariro yoaro sehe peresupu jija yuhu. Yu ā jipachuta Cohamacu ya durucuarē buhe duhuchu yoa masierara masa. ¹⁰ Ā yoa Cohamacu to beserinare buhecu payu tahari ñano yuhduja yuhu, tina cāhu Jesucristo yaina ti jihti cjihtire. To yaina jia tina pichacapu wahaborina sehe to yuhduchu yoahitina jiahca. Ā jia tina Cohamacu mehne ā jirucuahca.

¹¹ Ahri yu yahuhti potocā tjira: Cristo crusapu to yariariro seheta wahana, yariaina ti yoare ti duhuriro seheta mari ñaa yoarire mari duhuna, Cristo mari mehne macariro ā jirucurohca.

¹² Ā yoa to yare mari yoari buhiri ñano yuhdupanahta cāno pjana puhtoro to suho jiropure tiro mehne puhtoata jinahca mari cāhu.

“Cristore sā masieraja”, mari nichu, tiro cāhu marine āta ninohca.

¹³ Tirote mari yuhduwacachu ñano to niriro seheta marine yoarohca.

To niriro seheta yoariro jira tiro. Ne mahñoerara tiro.

Cohamacu to ñu ji coinare, to yare buheinare yahuha Paulo Timoteore

¹⁴ Ahrire muñu mehne macainare wacūchu yoaga. Ti mu suro durucu ti yuhduwacaa yaba cjihti jierara. Ā jia tinare tuhoinare ñano yoachu yoaa, tinare dojomehna. Ā jicu mari puhtoro to ñurocaroi ō sehe ni yahuga tinare. “Ā ni durucuena tjiga masa”, niga tinare. ¹⁵ Muñu

sehe Cohamacu yare noano buhega. Ā yoa Cohamacu yare tuaro yoaga. Mu ā yoachu ñano “Noano yoare muñu”, ninohca Cohamacu muhare. Ā jicu mu buherire to ñuchu buo tisi muñu. Ā jicu to buheare noano masiga muñu. Tite quihōno buhega. ¹⁶ Ti mu suro durucu yuhduwacaina ñaare ā yoarucu, Cohamacu yare yoerara. Ā jicu ti ā ni durucuarē ā ñunocahga. Tinare tūhoi tjiga muñu. ¹⁷ Tina ti durucua sehe camino to ñano baa mujano yoaro sehe jira. Camino to ñano baa mujano seheta ti durucua cāhu paina Jesu yainare ñaina wahachu yoahca. Ā durucuina mehne macaina Himeneo, Fileto cāhu jira. ¹⁸ Tina “Jesu yaina masa mujā tuhsuhre”, ni buhea, noaa buheare duhunocahre tina. Ā soro buhea cāina Jesu yainare tirote wacu tua duhuchu yoahre tina. ¹⁹ Ti ā ñano buhepachuta Cohamacu ya buhea sehe ne cohtotaerara. Ō sehe nina to buhea: “Mari puhtoro Jesu to yainare masina”, nina. Ā yoa ō cāhure nina: “Jipihitina, ‘Jesu yaina jija’, niina ñaare duhunocajaro”, ni yahura Cohamacu ya buhea.

²⁰ Mari piti dahre buhechu masa pja wahwari yoaro sehe jira. Pjiri wahuu uru, plata mehne ti yoaa wahwari jira. Tuhsu, ti wahuu paye wahwari yucacu mehne, dihi mehne ti yoaa wahwari jira. Uru, plata mehne ti yoaa wahwari noaare ti posahti jira. Paye wahwari wiho jiare ti posahti jira. ²¹ Ā yoa ñaare yoerariro uru wahwa noari wahwa yoaro sehe jirohca. Ā jiro tiro sehe Jesu ya dihtare yoarucuriro jirohca. Wuhu puro noari wahwa mehne noaare to yoariro seheta, ñaare yoerariro Jesu ya cjihtire noaare yoarohca.

²² Wahmāno jira muñu. Ā jicu wahma yapia ñaare goa pja ti yoariro seheta yoi tjiga muñu. Ā jicu noaare yoaga. Jesure wacu tuarucuga. Tuhsu, tirote, masa cāhure cahga. Ā yoa muñu mehne macaina Jesu yaina mehne jicu cahmāchero marieno noano jiga muñu. Tina Cohamacure yuhtiina tirote sinirucuina cāhu āta yoajaro. ²³ Ā jicu tuhotoero marieno ti durucu yuhduwacaa muñu cāhu tuho nuñu tjiga. Tuhsu, muñu cāhu durucu yuhduwacai tjiga. Ā durucu yuhduwacaa masa ti basi cahma suara. ²⁴ Cohamacure dahra cohtariroro durucu yuhduwacaaeraro cahmana. Ā yoa jipihitinare noano yoariro, buhe mihniro, dōicāta suerariro tirote jiro cahmana. ²⁵ Ā jiro paina tiro mehne ti durucu yuhduwacachu tiro tinare yahuro noano mehne suaro marieno yuhtiro cahmana tirote. To ā yuhtichu ñua Cohamacu to yoadohoa mehne tina sehe ti ñaa yoare cahyaboca. Ā jia noaa buheare

masi ducaboca. ²⁶ Tinare watino sehe peresu yoaro sehe jinare cjamare to cahmaare yoachtina cjihtire. Á jia quihõno ti tuhoturi baharo noaa buheare masia, watinore cohãnocaahca.

3

Pihtiri dacho cjihtore yahuha Paulo Timoteore

¹ Pihtiri dacho panocãre ñano yuhduahca masa. Tíre noano masiga mũhu. ² Tí pjare masa painare wacũ payoeraina, niñerure cahma yuhduacaina, "Painare yuhduacaja", ni ti basi tuhotuina, tíre painare á ni yahurucuina, Cohamacũre ñano durucuina, ti pũcsũmare yuhduacaina, ti wapachũta "Noana", nieraina, Cohamacũre ño payoeraina jiaha. ³⁻⁴ Á jia masare cahieraina, paina mehne sua, tíre bo duaeraina, ñaa quiti dahreina, ti mũ sũro ñano yorucuina, masare á cjárucuina, noaare ñũ yabiina, tina mehne macainare ñano yoina, tuhotua marieina, "Masi pahõnoia jija", ni tuhotuina jiaha masa. Tina ñaare ti goa pjaare yoa ji coaina jia Cohamacũ sehere cahmaeraina jiaha. ⁵ Á jia tina masa ti ñurocaroi Cohamacũre ño payopahta "Cohamacũ wiho jiriro jira", ni tuhotumana tina. Á niinare piti tii tjiga mũhu.

⁶ Tina mehne macaina tuho masieraa numia ya wãhusei sãa, tí numiare mahõõore buhera. Tí numia sehe á ñaare yorucua numia, tuaro ñaare yoa duara. ⁷ Tí numia wiho jia buheare á buherucua numia jia, soro jia buheare tuhoa numia jia, Cohamacũ ya buhea sehere ne masierara. ⁸ Panopũ Jane, Jambre yaya jirina Moise cjirore ti ñũ tuhtiriro seheta pihtiri dacho panocã jiina masa noaa buhea sehere ñũ yabiahca. Tina ñaa dihtare tuhotuina jiaha. Á jia Jesure wacũ tuaina waro jierara. ⁹ Tõ sehe yoina mahõõa bihosi. Baharo ti mahõõore tuho masieraina ti jia cãhure jipihina masiaha. Jane, Jambre mehne ti mahõõore panopũ masa ti masiriro seheta áta masiaha pihtiri dacho panocã jiina ti mahõõore.

Paulo Timoteore duti batoaha

¹⁰ Yũ buheare, yũ yoaa tiare, yũ jia tiare, Jesure yũ wacũ tuaare masina mũhu. Yũ á jiriro jichũ, suaro marieno yoariro yũ jichũ, masare cahiriro yũ jichũ, ñano yuhdupaihta yũ cãno pjachũ masina mũhu. ¹¹ Á yoa yãhure ti ñano yoaa, yũ ñano yuhduare masina mũhu. Antioquiã, Iconioi, Listrai yãhure ñabiaro ti yoari cãhure masina mũhu. Yũ á wahachũ ñano mari puhtoro Jesu sehe yãhure yoadohore. ¹² Jipihina Jesucristo yaina ti ji duachũ Cohamacũ to dutiriro seheta ti yorucu duachũ paina tinare ñano

yoaahca. Tí potocã tjira. ¹³ Ñaina sehe mahõõ buheina cãhũ ñabiaina wahaahca. Painare mahõõa, ti basi cãhũ mahõõore tuhoa, áta ñabiaina wahaahca.

¹⁴ Mũhu sehe mũhure yũ buherire, noano mũ tuhorire á wacũrucuga. Á jicũ yũ buheriro seheta yoaga. Mũhure buherinare masina mũhu. ¹⁵ Mũhu wihãriro jicũputa Cohamacũ yare ti joari pũre masi dũcari jire. To yare ti joari pũi õ sehe ni yahura mũhure: "Jesucristore wacũ tuaina dihtare pichacapũ wahaborinare yuhduchũ yoara Cohamacũ", ni yahura mũhure. ¹⁶ Cohamacũ yare ti joari pũi jipihitiare Cohamacũ sehe jia dutia tiri jire. Á jina tí pũre buhena mari masi namoja. Tí pũre buhena Cohamacũ dutiare mari yoachtire masija. Á buhena mari ñaa yoarire "Ahri ñaa jica", ni tuhotuja mari. Á jiro tí pũ marine noaa sehere cohtota dutira. Á jiro dachoripe mari noaare yorucuhti cjihtire yahura tí pũ. ¹⁷ Cohamacũ yairo to ya pũre buhero, masi pahõõohca. Á masino jipihitia noaare yoa masinohca tiro.

4

¹ Jesucristo jipihitina bui puhtoro, tjua tahtiro, catinare, yariaina cãhure buhiri dahre dutihtiro to ñurocaroi mũhure õ sehe ni yahuihtja. Cohamacũ cãhũ to ñurocaroi õ sehe ni yahuihtja mũhure. ² Dachoripe masa ti tuho duachũ ti tuho duaerachũ cãhure Cohamacũ yare yahuga. Á yahucũ masa ti ñaa yoari buhirire masichũ yoaga tinare. Á yoa ti ñaa yoarire "Yoa namoena tjiga", ni yahuga tinare. Noaa sehere yoa dutiga. Á buhecũ ne suaerario, pumerariro jiga mũhu. Á jicũ ne painare buhe duhui tjiga. ³⁻⁴ Baharo, pa tehepũre masa noaa buheare tuho duasi. Á tuho duaeraa ti cahmano seheta yoa, ti tuho ji coaa dihtare buheinare cahmaahca tina. Á jia mahõõa buheare payũ buheinare cãuaahca. Tina á yoaa noaa buhea sehere cohã, á ti buhemacanocarire tuho mũnaahca. Á jicũ noaa buheare buhe duhui tjiga mũhu. ⁵ Mũhu cãhũ á jicũ dachoripe tuho masiriro jiga. Ñano yuhdupaihta cãno pjaga. Á yoacũ noaa buheare á buherucuga. Cohamacũ mũhure to yoa dutirire yoa pahõõocahga mũhu.

⁶ Yũhu Cohamacũ yare yũ yoari buhiri yũ yariahto mahanocã duhsara. Á jicũ mahaa dachoricã catisinihca. Á jicũ mipũre mũhure dutija. ⁷ Yũ yariahto panocã ahrire yahuihtja: Jesu noaa buheare yãhure buhe dutiro to cũrre noano buhe sohtori tihĩ. To dutiare noano yoa pahõõocahi. Á jicũ ñano yuhdupaihta tĩrore ne wacũ tua duhuerahi. ⁸ Mipũre Cohamacũ yare yũ yoari wapare

muanopu wihboro nica. Ā jiro mari puhtoro buhiri dahre dutiro quihono yahuriro to tjua tahti dachoi to yare yu yoari wapare warohca yuhare puhtoro to pisari soro uru mehne ti yoari sorore yuhare to waboriro seheta. Paina cahure to tjua tahtore cohtainare tirore cahinare to yare ti yoari wapare warohca Jesu.

Paulo yahu namoha Timoteore

⁹ Yu cahapu cjero nuhi taga mahu. ¹⁰ Dema ahri yahpa macaa jipihtiare tuaro cahmano yuhare yoadoho duaeraro yuhare cohā wahcāa wahahre Tesalónicapu. Crescente cāhu Galacia yahpapu wahahre. Ā yoa Tito Dalmaciapu wahahre. ¹¹ Luca dihta yuhu mehne jira. Marco yuhare noano yoadohohtiro jira Cristo yare yu buhechu. Ā jicu tirore na tahga mahu. ¹² Ā yoa Tiquicore Efesopu warocahi. ¹³ Ōpu tacu, yu bui sāari suhtirore, Troai Carpo ya wuhui yu cūri suhtirore na tahga. Ā yoa sohō jia tjuri joaa tjuri cāhure na tahga. Sohō jia cahsari joaa cahsari pinihtare tuaro cahmaja yuhu. Ā jicu ti cahsari cāhure na tahga.

¹⁴ Alejandro comaare dahrariro yuhare nabiaro yoare. Ā jiro to ā yoari buhiri Cohamacu tirore buhiri dahrerohca. ¹⁵ Tiro Alejandro mari buheare tuaro nuh yabire. Ā jicu tiro mahure “Ñano yoari” nica, tirore nucu noano wacū masiga.

¹⁶ Masare beserirore peresu yoa dutirore yu yoarire, yu buheri cāhure tirore yu coā yahuchu ne cāiro baro Jesu yairo yuhare yoadohoerare. Jipihtina yuhare yoadohoeraa cohā wahcāa wahahre. Ti ā cohāpachata yuhare ti cohāri buhiri Cohamacu buhiri dahrero tjiaro. ¹⁷ Yu ā wahapachata Cohamacu yuhare yoadohohre. Ā jiro to buheare yu noano yahuhti cjihtire to tuaare wahre yuhare, jipihtina judio masa jieraina ti buheare ti tuhohiti cjihtire. Ā jiro yuhare nāno ti yoa duapachata yuhare ti wajāborirore yuhduchu yoare mari puhtoro suaina yayare yuhare to yuhduchu yoaboriro seheta. ¹⁸ Jipihtina yuhare nāno yoinare yuhducaro, yuhare yoadohorohca mari puhtoro. Ā jiro muanopu puhtoro to suho jiropu yuhare ji dutiro yuhare yuhduchu yoarohca tiro. Ā jina “Tiro noa yuhduariro, tua yuhduariro jira”, nijihna mari jipihtia dachoripe. Āta nijihna.

Paulo noa dutiha Timoteo cahai jijnare

¹⁹ Prisca, Aquila, Onesiforo ya wuhu macaina cāhu noajaro. ²⁰ Erasto Corintoi tjuahre. Trófito Miletoi dohatia wahahre. Ā jicu tirore tói cūhi yuhu. ²¹ Puhiro pano cjero taga mahu. Eubulo, Pudente, Lino,

Claudia cāhu, jipihtina paina Jesu yaina mehne mahure noa dutira.

²² Mari puhtoro Jesucristo mahu mehne jirohca. Ā jiro Cohamacu to cahia mehne musare jipihtinare noano yoajaro.

Tito

Paulo Titore joarocaha

¹ Yuhũ Paulo Cohamacũre dahra cohtariro, Jesucristo yare buhe dutiro to cũriro jija. Cohamacũ to beserina Jesure ti wacũ tuahti cjihtire noaa buheare ti masihti cjihtire Jesu buhe dutiro yuhũre cũre. Ti buhea Cohamacũ to dutiro seheta mari yoahtire yahura. ² Ā jicu jipihtia dachoriye Cohamacũ yaina wãnanopũ ti jirucuhto cãhũre buheja tinare. Cohamacũ ne mahũõa marieriro ahri yahpare to bajuamehnehto pano õ sehe ni cãa tiri jire marine: “Mũnanopũ ã jirucunahca”, ni cãa tiri jire marine. ³ Ā jiro to quihõri pjai Cohamacũ to ni cũrire yahu dutire masare. Tõ seheta yuhũre ni yahu dutire tiro. Marine pichacapũ wahaborinare yuhdoriro jira tiro. ⁴ Mũhũre Titore Jesu yare buhei. Yu ã buhechũ tuhocu Jesure wacũ tua dũcare mũhũ. Ā jicu mũhũ potocãta yũ macũ yoaro sehe jicũta nina. Mũhũre ahriye joarocai nija. Cohamacũ mari Pũcũ mehne, Jesucristo marine yuhdoriro mehne mũhũre noa dutija. Mũhũre pja ñaa, cahĩa ti yoadohoa mehne noano jiga mũhũ.

Creta wama tiri nũcoi Tito to yoahtire yahu quihõha Paulo

⁵ Creta wama tiri nũcoi mũhũre yũ cũchũ Jesu yaina ti buhehto cjihto dũhsasinire ti pjare. Ā jicu ti yoahtire yahuhtiro cjihtore cũi yuhũ mũhũre. Ā yoa macaripe macaina Jesu yaina pũthoa cjihtire bese duticũ cũi mũhũre. ⁶⁻⁸ Tina pũthoa Cohamacũre dahra cohtaina jira. Ā jicu tinare besecũ noainare besega soro yoaerainare. Ā besecũ, cãa numiata namo tiinare, “Painare yuhdũrucaja”, ni tuhotuerainare, suaerainare, cahaerainare, cahmacherainare, paina yare mahũõa mehne tuaro na duaerainare besega. Ā besecũ ti wãhũsere sãa sũinare noano ñũ wihboinare, noaa sehene noano ji coainare, tuhõ masiinare, noaare yoarucũinare, ñaa marieinare, ñaare yoaerainare, caparo marieno dahrainare besega. Ā yoa mũ besehtina pohnare õ sehe jiina jiro cahmana: Jesure wacũ tuaina, noano yoarucũina, jipihtinare noano yuhũtiina jiro cahmana pũthoa pohnare. ⁹⁻¹⁰ Ā yoa noaa buheare quihõno mari buherucũiro seheta ne duheraina jijaro pũthoa mũ besehtina. Ā jia tina noaa buheare yahuina jahca paina ti buhea mehne ti wahchehto sehe. Ā yoa noaa buheare ñũ yabiinare buhea, ti ya mahũõa ti jichũ masichũ yoahca tina.

Ā jicu noano besega Jesu yaina bui pũthoa jihtinare.

Payũ ti pũthoare yuhdũrucaina, noano tuhõtu durucueraina, mahũõina jira mipũre. Ā yoaina judio masa pinihta ñabiaro yoa nina. Ti ya buhea ti potocã jierachũ tinare masichũ yoaro cahmana. ¹¹ Tina judio masa sehe niñerure wapata duaa mahũõ buhera. Ā yoaeraro cahmana tinare. Ā buhea cãa wãhũse macainare jipihtinare Cohamacũ ya sehene cohãchũ yoa nica tinare. Ti ã yoachũ tinare ã yoa dutieraro cahmana.

¹² Ti yare panopũ yahuriro tina mehne macariro jiparota õ sehe ni yahuri jire: “Creta nũco macaina ã mahũõrucũina jira. Tina nũcũ macaina wahiquina yoaro sehe suaina jira. Ā yoa ã chũrucũina jia ne dahra duaeraa, capa bujũina jira”, niri jire tiro to ya nũco macainare. ¹³ Tõ ã nia potocã tjira. Ti ã jichũ ñacũ tinare tuaro tuhtiga Jesu ya buhea sehene noano ti masihto cjihtore. ¹⁴ Ā jicu judio masa panopũ macaina ti mũ sũro ti nimacanocari cjiire, Jesu yare potocã jiare cahmaeraina ti dutia cãhũre Creto macaina ti tuhõ nũnerahto cjihtore tuhtiga tinare.

¹⁵ Buhiri marieina noa dihtare tuhõtura. Ñaare yoarucũina, Jesure wacũ tuaeraina sehe ñaa dihtare tuhõtura. Tina ti tuhõtua sehe ñaa yuhdũara. Ā jia noa sehene bese masierara.

¹⁶ Tina “Cohamacũre masija sã” nipahta, ñaare yoara. Ā yoaina ti jichũ ñũna Cohamacũre masieraina ti jichũ masija mari. Ā jia tina ñaa yuhdũaina, Cohamacũ yare yuhdũrucaina jira. Ne noaare yoa masierara.

2

Noa buheare quihõno yahu dutiha Paulo Titore

¹ Mũhũ sehe buhecũ noaa buhea ti nino seheta noano buhega. ² Bũcũnare õ sehe ni yahuga: Cua pisaina, masa ti ño payoina, tuhõ masiina, Jesure noano wacũ tuaina, Jesure, masa cãhũre cahĩina, ñano yuhdũpahta cãno pjaina jijaro tina. ³ Bũcũ numia cãhũre ãta ni yahuga: Cua pisaa numia, Cohamacũre ño payoa numia, ñaa quiti dahrera numia, cahaera numia jijaro ti numia cãhũ. Ā jia numia jia, noaare buhejaro paye numiare. ⁴⁻⁵ Paye numiare õ sehe ni buhejaro bũcũ numia: Ti manũsumare, ti pohna cãhũre ti cahĩhtore, tuhõ masia numia, paina mũa mehne ñano yoaeraa numia, cũ wãhũ macaina jiina noano ñũ wihboa numia, masa noaa numia, ti manũsumare noano yuhũtia numia ti jihtore buhejaro ti numia Cohamacũ ya buheare paina ti dojomehnerahto sehe.

⁶ Á yoa wahma yapia cãhure õ sehe ni yahuga: Tuho masiina jijaro tina. ⁷ Mũhũ sehe noaa dihtare yoarucuga mũhũre ti ñũ cũhto sehe. Buhecu ne mahũono marieno buhega. Á buhecu cua pisaro mehne buhega mũhũ. ⁸ Á buhecu noano tuho masino mehne noano buhega ne paina “Ahriro ñano yoa nina” ni, mũhũre ti yahusãerahto sehe. Mũ ã buhechu ñua marine ñũ tuhtiina jipahta marine wiho warota yahusã masierara. Marine wiho waro ã yahusãmacanoca buoro wahaahca tina.

⁹ Á yoa dahra cohtainare õ sehe ni yahuga: Ti pũhtoare noano yuhtiina jijaro. Á jia ti pũhtoare noano wahchechu yojaro. Á dihta yojaro. Á jia ti pũhtoare purĩno yuhtiea tjijaro. ¹⁰ Á yoa ti pũhtoa yare yacaea tjijaro. Tuhsũ, noaina, ti pũhtoa dutiare quihõno yaruucuina jijaro. Á noano yuhtiina ti jichũ ñua Cohamacũ marine yuħdoriro to buheare tuho ji coahca paina.

¹¹ Masare to cahĩare Cohamacũ masare ño tuhsũre. Á cahĩno jipihtina pichacaru wahaborinare Cohamacũ tuaro yuħdo duara. ¹²⁻¹³ Masare ã cahĩno Cohamacũ marine õ sehe ni buhara: Cohamacũre ñũ yabiare, ñaa goa pjaare duhunoca dutira marine. Cohamacũ tuariro, Jesucristo marine yuħdoriro to si siteare mari ñũhti dachore, noari dachore mari cohtana nija. Á jiro mari cohtari dacho panoi tuho masiina, noaare yoarucuina, Cohamacũ cahmaare yoarucuina, marine ji dutira Cohamacũ. ¹⁴ Tiro Jesucristo mari ya cjihtireta yariari jire jipihtia mari ñaa yoaare duhuchũ yoaaro taro marine to yaina wahachu yoaaro taro. Mari ñaa yoiari cjiirire to ã cohãchu mari ñaa yoiari buhiri marieina jinahca. Á jina tuaro noaare yoa duaina jinahca.

¹⁵ Ahri jipihtiare ti nũco macainare Jesu yainare buhega mũhũ. Ti pũhtoro jinocaita nina mũhũ. Á jicu tinare yahuga. Ti ñaaare yoachũ ñũcu yahuga tinare. Jipihtina paina mũhũre ño payoa mehne yuhtijaro.

3

Jesuyaina tiyoahti cjihtire yahuha Paulo

¹ Ó sehe ni yahuga tó macaina Jesu yainare: Ti pũhtoare paina tinare dutiina cãhure noano yuhtiina jijaro. Jipihtia noaare yoahtina jijaro. ² Á yoa painare ne ñano quiti dahrea tjijaro. Á jia masa noaina, jipihtinare ño payoia jijaro.

³ Panopũre mari cãhũ tuho masieraina, yuħdurucaina, mahũoare tuho nũnũina, ñaaare yoa ji coaina, tíre goa pja duhu masieraina, dachoripe ñaaare yoarucuina, paina ti cjuare cjoina jia timai mari cãhũ. Á yoa marine paina ñũ tuhtire. Mari cãhũ

tinare ñũ tuhtimai. ⁴⁻⁵ Á jirina cjiiri mari jipachũta Cohamacũ marine pichacaru wahaborinare yuħduchu yoare. Á yuħduchu yoaro to noariro jiare, masare to cahĩa cãhure marine ñono nire tiro. Noano mari yoiari mehne yuħduchu yoerare marine. Marine pja ñano mari ñaa yoiari buhirire cosaro, Espĩritu Santo mehne marine yuħduchu yoare. Á yoaaro marine to pohna wahachu yoare. Á to yoachũ Espĩritu Santo sehe noaina mari jihtina cjihtire cohtotachu yoare marine. ⁶ Jesucristo marine yuħduchu yoiariro to yaria masa mũjaa mehne Cohamacũ to yairo Espĩritu Santore ware marine pjiro to tuaa mehne marine yuħduchu yoahtiro cjihto. ⁷ Marine cahĩno, marine noano yoa duare. Á yoa duaro tiro to yairo Espĩritu Santore marine ware ñaa buhiri marieina mari jihto cjihtore, mũanopũ mari ã jirucũto cjihtore. Mari ã jirucũtore masina, tíre cohtana nija.

⁸ Tí yũ niri potocãta jira. Á jicu tíre yũ ni joariro seheta masare buhecu tí dutiare yoa pahũno dutiga mũhũ. Á jicu Cohamacũre wacũ tuainare tíre buhega noaare ti noano yoahto cjihtore. Ahri yũ ni buheri noaa buhea jira. Á jia jipihtina masa ahri buheare ti tuho nũnũchu wiho waro jierara. ⁹ Paina ti durucua sehe yaba cjihti jierara. Á jia masierapahta ti ni yuħdurũcaare mũ tuho nũnũchu yaba cjihti jierara. Á jia ti coyea panopũ macaina ti jia tiare ti ni yuħdurũcaare, Cohamacũ Moise cjirore to dutirire ti ni yuħdurũcaare tí jipihtiare noano mũ tuho nũnũchu yaba cjihti jierara. Á jicu tíre tuho nũnũ tjiga.

¹⁰ Mũsa mehne macariro ã ni yuħdurũcariro mũsare cahma tju wachu to yoachũ ñũcu “Yoiari tjiga”, niga tirore. Pua taha tíre tirore mũ yoa dutierari baharo to yuhtierachu ñũcu tirore piti tiecu tjiga. ¹¹ Tó sehe yoiariro ñaa dihtare goa pjarucuriro jira. To ã jichũ ñũna to ñariro to jichũ masija mari.

Paulo duti batoaha

¹² Nicopolipũ puhuro puro jii tai nija. Á jicu Artemare o Tiquicore mũ caharu yũ waroca mũhtachu yũ warocahtiro tópure to sũchu, Nicopolipũ yuħure piti bocaga mũhũ tiro mehne. ¹³ Á yoa dutiare noano miħnirirore Zena wama tirirore, Apolo cãhure noano yoadohoga ti wahahto cjihtore. Á yoacu tí cahmaare jipihtiro tinare waga “Paye baro dũsari”, nicũ. ¹⁴ Á jia Jesu yaina mari mehne macaina noaare yoaopojaro paye barore dũsainare ti yoadohogho sehe noaare yoarucuina ti jihto sehe.

Paulo noa dutirocaha Jesu yainare

¹⁵ Jipihina yaha mehne macaina mähare
noa dutira. Tói jiina Jesu yaina sãre cahĩna
noajaro. Cohamacu to cahĩa mehne musare
jipihinare noano yoajaro.

Filemón

Paulo Filemo wama tiriore joarocaha

¹ Yuhú Paulo, Jesucristo yairo yu jiri buhiri peresupú jija. Yuhú, mari coyeiro Jesu yairo Timoteo mehne mähare Filemore joarocaja sã. Mähú sã cahĩro Cristo yare sã mehne dahradohoro jira mähú. ² Ā jina Jesu yaina mu ya wuhũ cahmachuina cãhure joarocaja sã. Mari coyeacoro Jesu yacoro Apia cãhure joarocaja sã. Arquipo cãhure joarocaja sã. Arquipo sehe sã yoaro sehe Cristo yare yahuro jira. ³ Ā jina Cohamacu mari Pacu, mari puhtoro Jesucristo mehne musare noa dutija. Cohamacu to macano mehne ti cahĩa mehne, ti yoadoho mehne noano jiga musa.

Filemo painare to cahĩare, Cristore to wacũ tuaare yahuha Paulo

⁴⁻⁵ Yu coyeiro Jesu yairo Filemo, Cohamacu mähare sini payocu mähare wacũca “Noana”, nija tiriore. Cristore mu cahĩchu, tiriore mu wacũ tuachu, paina Cohamacu yainare mu cahĩchu tuhrocachi yuhú. Ā jicu Cohamacu “Noana”, ni wahcheja. ⁶ Cristore mari wacũ tuana cano potori to yaina jina nija mari. Ā wacũ tuaina jina, Cristore mari noano cahĩna, pjĩro noaare cjuannahca mari. Tĩre musa noano masihtu sehe sini payoja Cohamacu. ⁷ Coyeiro, mipure painare mu cahĩchu tuhocu wahcheja yuhú. Jipihina Cohamacu yainare noano wahchechu yoayuhti mähú. Mu ā yoachu tuhocu wahcheja yuhú.

Paulo Onésimo ya cjihtire sini payoha Filemore

⁸⁻¹⁰ Ā jicu mipure Onésimore mähare dahra cohtarirone mu yoahire mähare sini payo duaja. Peresupú yuhú mehne to jichu Cristo yare yahuhi yuhú tiriore. Tĩre tuhoro Cristore cahmahre tiro. Ā yoaro tiro Cohamacu yairo wahahre. Ā waharo yu macu yoaro sehe jiriro jira. Ā jicu yuhú Paulo bucuro jicu Cristo yare yu buheri buhiri peresui jicu mähare yahurocaihtja Onesimore mu yoahire. Cristo buhe dutiro to cũriro jija yuhú. Ā jiriro jicu tiriore mu yoahire dutiboa yuhú. Ā jiriro jipaihta mähare dutisi yuhú. Cahĩa mehne mähare yahurocaihtja tó purota.

¹¹ Cristo yairo to jhto pano Onésimo mähare dahra cohtariro jiro yaba cjihti jierasini jire. Mähare noano yoadoho masierasini jire. Mipú pinihtare tiro mähare, yuhú cãhure noano yoadoho masiriro jirohca. Mipure Cristo yairo jiro wiho jiriro waro jierara. ¹² Ā jicu mipure

tiriore mähare waroca tjuí nija. Ā jicu tiriore noano piti bocaga mähú. Tiriore tuaro cahĩa. ¹³ Noaa buheare yu buheri buhiri peresupú yu jiro watoi tiriore yuhare yoadoho dutiboa yuhú tiriore warocaeracu. Yuhú mehne tjuá dutiboa yuhú. Mähú sehe yuhare mu yoadoho masierachu tiro sehe yuhare yoadohoro tjuaboa, tiriore warocaeracu. ¹⁴ Yuhare yoadohoboro to jipachuta tiriore mähare waroca tjuja. Mähú sehe tiriore “Paulo mehne tjuasiniga”, mu nichu masicu yuhú mehne tiriore tjuá dutiboa yuhú. Yuhú sehe “Yuhú mehne cũga tiriore”, ni duaeraja mähare. Ā jicu tiriore waroca tjuí nija. ¹⁵ Tiro Onésimo mahaa numaricã mähare to duhti wahcãri baharo pari turi mähú mehne jira. Cohamacu to cahmaro sehta mähare duhti wahcãri jire tiro Cohamacu yairo to wahahto sehe, yu tuhutchu. Ā jiro pari turi mähú mehne jiro ā jirucuhca mähú mehne. ¹⁶ Ā jiro tiro mipure dahra cohtariro jierara. Dahra cohtariro bui curero jiriro jira tiro, yu ñachu. Mipure tiro mu coyeiro Jesu yairo jira. Ā jicu tiriore tuaro cahĩa. Mähú sehe yu yuhoro tiriore cahĩhca. Mu ā cahĩro jiro dahra cohtariro jisniparota mipure dahra cohtariro to jiriro sehe jierara tiro. Tiro mu coyeiro Jesucristo yairo jira.

¹⁷ Ā jicu yuhare mu piti bocaboriro sehta Onésimo cãhure noano piti bocaga. Mähú mehne macariro yu jichu tuhutuca tiro cãhure noano piti bocaga mähú. ¹⁸ Ā jicu mähare soro to yoariro jichu mähare to wapamoro jichu yuhú sehe tĩre wapaihtja. ¹⁹ Yuhú Paulo yu basi ahire mähare yahu joaihtja: Yuhú sehe wapaihtja mähare. Mähare yu buheri baharo Cristo yairo wahacu jipihina dachoripe Cohamacu mehne jirucuhitiro jira mähú. Mähare yu ā buheri baharo mähú cãhú yuhare pjĩro wapamoro jiboca. Mu ā jipachuta mähare wapaihtja to wapamonore. ²⁰ Yu coyeiro yu cahĩro mari puhtoro Cristo yairo jira mähú. Cristo yairo jicu yu coyeiro jira mähú. Ā jiriro jicu yuhare noano wahchechu yoaga. (Ā jiriro jicu Onesimore noano piti bocaga.)

²¹ Ahri yu yahurire noano yoaihca mähú. Yu yahuri yuhoro yoaihca mähú. Tĩre masicu mähare joarocai nija. ²² Ahri cãhure yahuihtja mähare. Musa caharu yu wahahto sehe Cohamacu sini payoyuhti musa yuhare. Musa ā jini payorice tiro yuhtiboca. “Jai” to nichu cahmaja yuhú. Ā jicu musa caharu yu suhti tahtiare cahnoyuga mähú.

Paulo noa duti batoaha Filemore

²³ Epafra mähare noa dutira. Tiro sehe Cristo yare to yoari buhiri yuhú mehne peresupú jiriro jira. ²⁴ Ā jia Marco,

Aristarco, Dema, Luca mehne mähare noa dutira. Cristo yare y_u buhech_u tina sehe y_u mehne buheina jira.

²⁵ Mari puhtoro Jesucristo to cahña mehne masare noano yoajaro.

Hebreos

Cohamacu macyno to Pucurore yahubasaha masare

¹ Panopy Cohamacu payu tahari mari coyeare panopy macaina cjrيره to yare yahua tiri jire. Payu to beserina to yare yahu turiaa tiri jire. To yare yahu muhtaina cjrيره yahu dutiro, a yahua tiri jire tiro mari coyeare. ² Mipure pihtiri dacho panocai jia dachorire to macanore to yare to yahu dutichu tiro sehe marine yahua tire. Tiro to Pucuro to yoa dutiro mehne ahri yahpare, muano cahuare yoariro jira. To Pucuro sehe pihtiri dacho panocai jipih-tiare cjahtirore cua tiri jire tirore. ³ A jiro to macyno sehe to Pucuro si siteare cjariro jiro, cano potori to Pucuro yoaro seheta jiro, to Pucuro to jia tiare marine nona. A yoa to macyno to tuaa mehne to dutichu ahri yahpa, muano cahu a jirucura. A yoa mari nono yoari buhirire to cosari baharo muanopy to Pucuro tua yuhduariro pototo buhusehei dujiri jire tiro, to puhtoro jiare nono.

Cohamacu macyno anjoa bui jira

⁴ Tiro Cohamacu macyno wama tira. Ti wamare curi jire Cohamacu tirore. A wama tiro paina bui puhtoro jira. A jiro tiro anjoa yuhdoro tua yuhdurucariro jira. ⁵ To yaina anjoa sehere Cohamacu ne o sehe ni yahuerari jire:

“Yu macu jira muhu.

Michare un macu mu jiare masichu yoai-hca”,

niri jire Cohamacu to macanore. Anjoa sehere ne o sehe ni yahuerari jire. Tinare ahri cahure ne yahuerari jire:

“To pucuro jija yahu.

A yoa tiro un macu jira”,

niri jire Cohamacu to macanore. Anjoa sehere ne o sehe ni yahuerari jire. (A jiro to macyno tina yuhdoro tua yuhdurucariro jira.) ⁶ Pa tehe to macanore wahma masa bajuarirore ahri yahpai cuno o sehe niri jire Cohamacu tirore:

“Jipih-tina un yaina anjoa na tuhcuca caha su, nono payoahca tina un macure”,

niri jire tiro. ⁷ A yoa to yaina anjoa sehere yahuro taro o sehe niri jire tiro:

“Yu yaina anjoare wihnono yoaro sehe pjacu tichu yoaja yahu.

Tina yahure dahra cohtaina jira.

Tinare pichaca yoaro sehe pjacu tichu yoaja yuhu”,

ni yahuri jire Cohamacu. ⁸ Tinare a niparota to macyno sehere o sehe niri jire:

“Muhu Cohamacu jipih-tina bui puhtoro a jirucuihca.

Quihono dutihca muhu mu yainare.

⁹ Mahnono marieno yoaare, noano yoaare tuaro cahmana muhu.

A jicu naa yoaare nu yabira muhu.

Mu a jiro jichu nucu yahu mu Pucu jipih-tina paina yuhdoro muhare wahchechu yoahi”,

niri jire Cohamacu to macanore. ¹⁰ Ahri cahure niri jire tiro to macanore “Puhtoro”, ni pisuro:

“Puhtoro, wahmanopure ahri yahpare, muano cahure bajuamehnere muhu mu basi.

¹¹ Ti jipih-tia cohtota pih-tia wahaahca.

Muhu sehe ne cohtotasi.

A jirucuihca muhu.

Ti jipih-tia suhtiro to baa boraro seheta pih-tia wahaahca.

¹² Ti jipih-tia muanore ahri yahpa cahure cohtotachu yoaihca muhu.

Muanano suhtirore mu cohaboro seheta ti jipih-tiare cohtotachu yoaihca muhu.

Suhtirore tjuwe na mu cohtotaro seheta ti jipih-tia cohtotahca.

Muhu sehe ne cohtotasi.

A jirucuihca muhu”,

niri jire Cohamacu to macanore. ¹³ Ne anjoa sehere ahrire yahuerari jire Cohamacu:

“Yu pototo buhusehei dujiga muhu.

Puhtoro jira muhu.

A jicu muhare nu tuhtiinare doca dahre, yuhdurucabasaitja.

Tina bui puhtoro jihca muhu”,

niri jire Cohamacu to macanore. ¹⁴ Jipih-tina anjoa sehe Cohamacure dahra cohtaina jira.

A jiro Cohamacu warocara tinare to yaina anjoare Cristo to yuhdachu yoah-tinare yoadoho dutiro.

2

Cohamacu yare noaa buheare marine a tuhutonocano cahmaerara

¹ A yoa Cohamacu macyno waro marine yahuro to jichu masina to yahuaire mari tuhore noano wacuno cahmana marine, “Tire bori”, nina. ² Anjoa masare Cohamacu dutia cjrيره ti yahu cu turiaro seheta ti dutiare yuhduraca dutierari jire. A jia masa sehe anjoa ti yahurire ti yuhduracachu nono Cohamacu tinare quihono buhiri dahreri jire. ³ Anjoa ti yahurire mari yuhtiri yuhdoro Cristo sehere yuhtiro cahmana.

Tiro mari puhtoro marine to yuhdachu yoah-tore yahu muhtari jire. A jia tirore tuhorina sehe to yahurire marine yahu turiare marine noano masichu yoaa taa. A jiro ti buheare marine to yuhdachu yoah-ti buheare mari a tuhutonocachu Cohamacu tuaro marine buhiri dahrerohca. Tire duhti

masieraja mari. ⁴Ti buheare taho mahtaina painare ti buhero watoi Cohamacu sehe ti buhea quihõnota ti jichu ñono nire. To tuaa mehne ñono nire. A yoa payu tahari to tuaa mehne yoa ñono, ti buheare quihõno ti jichu ñono nire. A yoaro to yainare ti yoachtire to cahmano seheta cûri jire to buhea quihõno ti jiare ti masihti. Espiritu Santo sehe jira marine a yoa masichu yoariro.

Jesucristo mari yoaro seheta pjacu tiroiro masa bajuaha

⁵ Pihtiri dacho baharoi jiina Cohamacu cahai jiina michapucacã yu yahurina cjiri bui puhtoa jisi anjoa sehe. Tina anjoare puhtoa sõsi Cohamacu. ⁶ Wiho mejeta cãiro Cohamacure to durucurire õ sehe ni joari jire panopu:

“Masa wiho jiina ti jipachata tinare wacûna muhu. Masare noano yoara muhu.

⁷ Mahaa numaricã anjoa docai masare cûri jire muhu.

Ã cûpacata mipure tinare tuaare wacu puhtoa sõri jire muhu.

⁸ Mu a sõchu ahri yahpa macaa bui jipihtia bui jira masa”,

niri jire panopu macariro Cohamacure. A cûno ahri yahpa macaina wahiquina jipihtina bui, jipihtia bui cûri jire Cohamacu. Masare to a puhtoa sõpachata jipihtina ahri yahpa macaina, ahri yahpa macaa bui jierasínica masa. ⁹ A tina bui jierasini-panahta, Jesu sehene masija mari. Mahaa numaricã anjoa docai Cohamacu to macano cahure cûri jire, mari yaro jiboriroro yari-ah-ti-rore. Cohamacu marine cahno Jesure mari yariaboriroro to yariachu cahmari jire. A jiro to a yariachu ñano ti-rore tuaare waro, puhtoro sõri jire ti-rore.

¹⁰ Cohamacu jipihtiare bajuamehneriro jira. A yoa jipihtia to ya dihta jira. A jiro Jesure to yaria dutichu, tiro sehe mari ñaa yoari buhirire cohãri jire. A cohãri jire tiro masa payu to yaina jihtinare muanopu naano taro. Jesu to ñano yuhdachu masare yuhdachu yoachtiro Cohamacu to waha duti-ro seheta yoaro niri jire ti-rore. To a yochu pinihta noa nina. A jiro Jesu sehe marine yuhdachu yoariro waro, mari puhtorota jira. ¹¹ Jipihtina masare ti ñaa yoari buhirire Jesu, to cosawerina mehne pucu tira Cohamacure. A jiro mari Pucu cãirota jira. Mari Pucu to jichu Jesu marine to yainare to cosawerinare “Yu coyea jira”, ni pisuro ne buo tierara. To a ni pisurire masare yahuihtja. ¹² O sehe nino niri jire tiro:

“Cohamacu, mu jia tiare yahuihtja yu coyeapure.

Jipihtina yu yaina panoi mahure ño payocu ‘Tuariro jira’, ni yahuihtja yuhu tinare”,

niri jire tiro to Pucarore. ¹³ Ahri cahure niri jire tiro:

“Cohamacure wacû tuaihca yuhu”, niri jire tiro. Ahri cahure niri jire tiro:

“Õi jija yuhu.

Cohamacu pohna mehne õi jija.

Yuhure to cûrina yu coyea mehne õi jija’, niri jire tiro to yainare ‘Yu coyea’”, ni pisuro.

¹⁴ “Cohamacu pohna”, to niina pjacu tiina mari jichu ñano, Jesu sehe mari ya pjacu yoaro sehe jiri-ro tari jire. A jiri-ro tari jire tiro crusapu yariaro taro, watñore butichu yoaro taro. Tiro watño sehe yari-achu yoariro jira. ¹⁵ A yoa watñore butichu yoaro, marine yuhdachu yoare. Mari sehe dachoripe mari yariahtore cuimai. A cuina jina pichacapu wahaborina jimai mari. A jiina mari jichu ñano tiro marine yuhdachu yoare. ¹⁶ A yuhdachu yoaro anjoa sehene yoadohoro taerari jire tiro. Abrahã panamanare Cohamacu yainare mari sehere yoadohoro tari jire. ¹⁷ A taro tiro mari coyeiro warota tari jire. Cãno potori mari yoaro sehe pjacu tiri-ro tari jire. A taro mari yuhdachtire mari ñaa yoari buhirire Cohamacure cohã dutiro taro niri jire. A yoaro mari sacerdotea puhtoa bui puhtoro to yoariro sehe yoaro taro niri jire. Mari yoaro sehe jiro marine noano pja ñana. A yoa marine noano yoadohora. A jiro tiro mari sacerdotea puhtoa ti bui puhtoro jiro nina Cohamacure dahra cohtariro jiro.

¹⁸ Tiro ñano yuhdari jire. A jiro watño ti-rore ñano yoa dutimari jire. Yoerari jire tiro. A ñaare yoerari-ro jiro, tiro sehe mari cahure ñaare yoerachu yoa masina. Watño to ñaare to yoa dutichu ñano marine ñaare yoerachu yoa masina Jesu.

3

Jesu Moise cjiro bui jiro jira

¹ Jesu to a jiri-ro jichu ñana ti-rore noano wacûga musa. Yu coyea Jesu yaina, Cohamacu to beseina jira musa. Tiro Jesu sehe Cohamacu to warocariro jiro mari sacerdotea puhtoa ti bui puhtoro jira. To buheare noaa buheare mari quihõno taho, buheja. Tiro sehe Cohamacu warocariro, mari sacerdotea bui puhtoro to jia tiare noano wacûga musa. ² Cohamacu ti-rore marine to yuhdachu yoachtore to cûchu tiro sehe to cûri-ro seheta yoari jire. Ne yuhduracaerari jire. Moise cjiro cãhu Cohamacu yaina Israe masare yoadohoro ne yuhduracaerari jire. Ata yoari jire Jesu cãhu. ³ Moise cjiroro ti ño payoriro yuhdoro Jesu sehene ño payoro cahmana marine. O sehe jira ti mari piti dahre buhechu: Wuhure mari ño payoriro yuhdoro wahu dahreriro sehene ño payoro

cahmana marine. Ā jiro Jesu sehe wuhū dahreriro yoaro sehe jiro to jichū Moise cjirore mari ño payoriro yuhdoro tiro sehere ño payoro cahmana marine. ⁴⁻⁶ Ō sehe jira ti: Mari Cristo yaina Cohamacū ya curua macaina jija. Cristo sehe wuhūre to cūborio seheta marine to ya curua macaina cjihtire cūno nina. Masa sehe wuhūse yoaina jira. Cohamacū sehe jipihtiare yoariro jira. Moise cjiro sehe Cohamacū ya curua macainare yoadhorucuro jiro, baharopū Cohamacū to yahuhore yahua tiri jire masare. Cristo sehe Cohamacū macūno jiro, Cohamacū yare yoarucuro jiro, Cohamacū ya curua macaina bui pūhoro jira. To ā jiriro jichū ñūna Moise cjirore mari ño payoriro yuhdoro Cristo sehere ño payoro cahmana marine. Ā jina mari sehe Cristore wacū tua duhuerana, marine to yuhdūchū yoahore ā wahcherucuna to ya curua macaina jija mari.

Cohamacū to yainare tiro mehne ti noano sochū cahmana

⁷ Ā jina Cristore mari wacū tua duhuerahore ō sehe yoaro cahmana marine. Ō sehe nina Espiritu Santo:

“Michare yuhū Cohamacū mūsare yū yahuchū, yuhti duaeraina jiena tjiga.

⁸ Noano yuhtiga mūsa yuhūre.

Panopū Israe masa masa marienopū jia, āta yuhdūrcarucure yuhūre.

Ā jina tina yoaro sehe yoarena tjiga mūsa yuhūre.

⁹ Tópūre cuarenta cūhmari waro tinare yū tuaa mehne yoa ñomai.

Yū ā yoa ñopachūta tina sehe ō sehe ni tūhotua timare: ‘¿Ñare mari yoachū ñūno Cohamacū marine buhiri dahrebocari?’ ni tūhotua timare.

Ā ni tūhotua ñano yoa ñua tire.

¹⁰ Ti ā yoachū ñūcu tina mehne suai.

Ā suacu ō sehe nii: ‘Tina yū durucuaire tūho duaeraa, soro jia buheare ā wacūmacarucua nina.

Ya sehere ne yuhti duaerara’, nii tinare.

¹¹ Ā jicu tina mehne suacu ō sehe ni yahui: ‘Tina yuhū mehne macaina ne jisi.

Ā jia wapū tiro marieno jisi tina’, ni yahuri jire Cohamacū’,

niri jire Espiritu Santo sehe.

¹² Ā jina yū soeya, noano yoaga mūsa, “Cohamacūre cohāri”, nina. Mūsa ñaare tūhotuna, Cohamacūre catirirore wacū tuaerana, tirore cohāboca mūsa. Ne cāiro mūsa mehne macariro ā yoaero tjijaro.

¹³ Ā jina ahri sehere yoaro cahmana mūsare: Mūsa mehne macainare dachoripe Cohamacū yare mūsa basi cahma durucuga “Ñare yoari”, nina. Ñaare yoana, “Tí mehne wahcheja” nina, mahñoare tūhotuna nija

mari. Ā ni tūhotuena tjiga. Ñaare yoarucuna Cohamacū ya sehere ji coeraja mari. Ā yoana ñaare duhu duaeraja. “Ā yoari” nina, mūsa mehne macainare Cohamacū yare mūsa basi cahma durucuga. Cristo to tahto pano dachoripe tire ā cahma durucurucuga. ¹⁴ Wahmanore Cristore mari wacū tua dūcario seheta tó seheta mari wacū tuarucuna, mari catiro puro to yare duhuerana, tiro mehne macaina jija.

¹⁵ Ō sehe nina Cohamacū yare ti joari pūi: “Michare yuhū Cohamacū mūsare yū dutichū noano yuhtiga mūsa yuhūre.

Panopū macaina Israe masa yū yahupachūta ño payo duaeraa, yuhūre yuhti duaerare.

Ā jina tina yoaro sehe yoarena tjiga mūsa, niri jire Cohamacū’,

ni joaa tiri jire panopūre. ¹⁶ Ā yoa Cohamacū to yahurire tūhmarina jipahta tina tirore yuhtierari jire. Tina jipihtina Egiptopū jina Moise to na wiorina jipahta tirore ne yuhtierari jire. ¹⁷ Ā jia ā ñano yoarucua, cuarenta cūhmari waro Cohamacūre suachū yoa mūjaa tiri jire. Ti ā yoari buhiri masa marienopū yariari jire tina. ¹⁸ Tirore ti ā yuhti duaerachū ñūno ō sehe cua pisaro mehne niri jire tiro: “Tina yuhū mehne macaina ne jisi. Ā jia wapū tiro marieno ne jisi tina”, niri jire tiro. ¹⁹ To ā nichū tūhona ahri sehere masinahca mari: Tina Cohamacūre ti wacū tuaerari buhiri tiro mehne macaina ji masierari jire. Ā jia tiro mehne noano so masierari jire.

4

¹ Ā jiro panopū macainare tiro mehne ti noano sohtore cahmano, tinare “Yuhū mehne wapū tiro marieno sonahca”, ni cūri jire Cohamacū. Mari cūhure āta ni cūri jire tiro. Ā jina cuaro mehne Cohamacūre yuhdūrcacaena tjijihna mari, “Cohamacū yare yoa moñori”, nina. Ā yoa moñona tiro mehne noano sosi mari. ² Panopū macaina cjiro Cohamacū yare ti tūhorigo seheta mari cūhū noaa buheare tūhohi. Tina tūho mūhtaina cjiro sehe tūhoa, “Cohamacū ya waro jira”, ni tūhotuerari jire. Ā jia ti tūhori cjiro yaba cjihti jierari jire. ³ Mari sehe tirore wacū tuana Cohamacū mehne macaina jija. Ā jina tiro mehne noano jinocahna, tiro mehne sonahca. Wapū tiro marieno jinahca. Cohamacū to nirigo seheta jira ti. Ō sehe niri jire tiro tirore yuhtieraina cjirore:

“Tina mehne suacu cuaro mehne ō sehe ni yahui: ‘Tina yuhū mehne macaina ne jisi.

Ā jia wapū tiro marieno ne jisi’, ni yahui”,

niri jire Cohamacu yare ti joari pui. Ahri yahpare to yoari baharo dahra duhusiniri jire tiro. Yoari pja dahra duhuparota tina sehere tiro mehne so dutierari jire tiro. ⁴ Ahrire mari masija. Seis dachori ahri yahpare to yoari baharo to dahra duhurire yahuro o sehe niri jire Cohamacu ya durucua ti joari pui:

“Seis dachori baharo jipihtiare to dahraare pahono, Cohamacu dahra duhuri jire”,

niri jire to yare ti joari pui. ⁵ A yoa pari turi Cohamacu yare ti joari pui o sehe ni yahura tiro mehne noano jierainare:

“Tina yuhu mehne macaina ne jisi.

A jia wapu tiro marieno ne jisi, niri jire Cohamacu”,

nina to yare ti joari pui. ⁶ Noaa buheare tuho muhtaina tirore ti yuhduhucari buhiri tiro mehne macaina jisi tina. A jia tiro mehne wapu tiro marieno jisi tina. Paina sehe tiro mehne macaina jiahca. A jia tiro mehne wapu tiro marieno soina jiahca. ⁷ A jiro masare to yuhduchu yoahiti dachori paye dachorire curi jire pari turi Cohamacu. Ti dachorita mipure jira. Payu cuhmari baharo Israe masa cjiri Cohamacu ti tuho muhtari baharo ti dachorire yahuri jire Davi cjiro sehe. Cohamacu tirore to yahu dutichu yahuri jire tiro. Cohamacu ya durucua ti joarire masare yu yahua dachorire o sehe ni joari jire Davi cjiro:

“Ahri dachorire yuhu Cohamacu masare yu yahuchu yuhduhucaro marieno noano yuhtiga musa yuhare”,

ni joari jire panopure. ⁸ Ti pjarure Josue cjiro Israe masare Cohamacu to wari yahpai na suri jire. “Yuhu mehne wapu tiro marieno soina jiahca” nino, ti yahpai ti sohore nino nierari jire Cohamacu. Ti yahpai so dutiro, paye dachori to yuhduchu yoahiti dachorire cueraboa tiro. ⁹ Wiho mejeta seis dachori baharo ahri yahpare to yoari baharo Cohamacu to dahra duhuriro seheta mari to yaina cahu tiro mehne wapu tiro marieno mari sohito jirohca. Tiro mehne mari noano jihto jirohca. ¹⁰ Cohamacu sehe to dahrarire duhunocasiniri jire. To seheta tiro mehne soina cahu mari wapu tirire duhunocanahca. ¹¹ A jina mari to yaina noano yoajihna. Cohamacu yare noano yuhtijihna tiro mehne mari noano sohito sehe. Panopu macaina mari coyea cjiri ti yuhduhucari baharo Cohamacu mehne macaina ji masierari jire tina. Tina yoaro sehe yoena tjijihna mari.

¹² Cohamacu ya durucua marine catichu yoara. Noaa sehere marine cohtotachu yoara. A jia to ya durucua wiho jia jierara. A yoa nosari pij pu buhuseheri siori pij mehne dihirore ti yihso nu ti masiriro

seheta to ya durucua cahu mari jia tiare noano masichu yoara. To durucua mari tuhochu, tire mari buhechu mari jia tiare, mari tuhutua chure noano masi pahochu yoara marine. ¹³ Ne Cohamacu mari jia tiare mari dohse yoarire nu masieraja mari. Jipihtiare to bajuamehnerire, to bajuamehnerina chure nu tiro. A jina mari yoarire tirore yahu yuhduro cahmana marine.

Jesu tuariro mari sacerdotea puhto bui puhtoro jira

¹⁴ Jesu Cohamacu macano to Pacuro cahapu tjuariro jira. Tiro tuariro mari sacerdotea puhto bui puhtoro jira. A jiro marine Cohamacu sini payora. To a jiro jichu nu mari sehe to yare noano yuhtijihna. Tirore noano wacu tuarucujihna. ¹⁵ Tiro mari sacerdotea puhto bui puhtoro mari nuano yuhduchu nu noano pja nuariro jira. Mari nu goa pjaare masina tiro. Watino jipihtiare nuare marine to yoa dutiriro seheta tiro chure nuare yoa dutimari jire. To a yoa dutipachuta tiro nuare yoareri jire. A nuare to yoa dutimari jiro, marine pja nuano tiro yoadoho masina marine. ¹⁶ A jina cuiro marieno Cohamacu sinijihna. Tiro marine cahna. A jiro tirore mari sinichu tiro sehe pja nuano, marine yoadohorohca. Watino marine to nuare yoa dutichu, mari nuano yuhduchu chure tiro marine yoadohorohca.

5

¹ Sacerdotea puhto bui puhtoro besero, masnore besera Cohamacu. A to beseriro jiro sacerdotea puhto bui puhtoro sehe tiro mehne macainare yoadohoro taro, Cohamacu dahra cohtariro jira. A jiro ti nuare ti yoari buhiri Cohamacu sinibasara tiro mehne macainare. Wahiquore waja ju nuono, Cohamacu sinibasara. ² Sacerdotea puhto bui puhtoro paina masa yoaro sehe noano masi pahnoerariro jira. A masi pahnoerariro jiro paina masierainare yoadoho masina. A jiro noano yoaraina chure noano yoadoho masina. ³ A jia sacerdotea noano yoa pahnoeraina jia nu buhiri tiina jira tina cahu. A jia ti basi ti nuare ti yoari buhiri wahiquore waja ju nuono, Cohamacu sinina. Paina masare yoadohoa taa, ti nu buhiri ti sinibasariro seheta ti basi ti nu buhiri chure sinina Cohamacu.

⁴ To basi to mu suru sacerdotea puhto bui puhtoro saerara. Cohamacu sehe tirore besero, sacerdotea puhto bui puhtoro sona. Panopu macariro Aaro cjirore to curiro seheta paina sacerdotea puhto bui puhtoro

cāhure cūna tiro. ⁵ Tó seheta Cristo cāhū to basi to mū sūro sacerdotea puhtoa bui puhtoro sāerari jire. Cohamacū sehe tirore puhto sōno, ō sehe niri jire:

“Yū macū jira mūhū.

Michare yū macū mū jiare masichū yoai-hca”,

niri jire Cohamacū. ⁶ Pa tehe ō sehe niri jire Cohamacū Cristore:

“Jipihtia dachoripe sacerdote jirucuihca mūhū.

Melquisede to jiriro seheta sacerdote jirucuihca mūhū”,

niri jire to macanore. ⁷ Cristo ahri yahpai jiro sañurucua mehne, yahco mehne Cohamacure tuaro siniri jire tiro “Yuhure masoga”, nino. Cohamacū sehe tirore yariarore maso masiriro jira. To ā sinichū Cohamacū tūhori jire tirore. Cohamacū cahmaa dihtare to yoachū ñano Cohamacū sehe to sinirire tūhoro, tirore yūhtiri jire.

⁸ Cristo Cohamacū macūno jiparota ñano yūhdūri jire tiro. Ā ñano yūhdūro yūhtiri jire Cohamacure. Ā yūhtiro noano yūhtiare masiri jire. ⁹ Ā ñano yūhdūro, crusapū yariaro jipihtina tirore yūhtitinare yūhdūchū yoahūro wahari jire. ¹⁰ Ā jiro Cohamacū sehe tirore sacerdotea puhtoa bui puhtoro cūri jire. Ā jiro Melquisede sacerdotea puhtoro to jiriro seheta jira Cristo.

Cristo yaina tirore wacū tua duhuchū cua nina

¹¹ Payū ō sehe jiare masare yahu namo duaja sā. Sā ā yahu namo duapachūta mūsa sehe dapu butiina jira. Ā jina masare sā yahuchū mijo nina sāre. ¹² Yoari pja Cristo yaina jimana mūsa. Ā jina mipūre painare buheinapū ji tuhsūboā mūsa. Mūsa ā jīnapū jiborina jipachūta paina mūsa sehere buheahca tjoa. Cohamacū yare mijoera cūrea buhea dihtare tūhora mūsa. Wihāinacā pēcho dihtare ti sihni masino seheta mūsa cāhū mijoera cūrea dihtare noano tūhora. Wahma buhe dūcaina yoaro sehe jira mūsa. ¹³ Pēcho sihniina wihāinacā jisnina. Tina yoaro seheta mūsa cūhū jira mijo cureare tūhoerana. “Ahri ñaa jira. Ahri noaa jira”, ni bese masierara mūsa. ¹⁴ Chūare chūina sehe bēcūna jira. Tina yoaro sehe jina noano tūho masina noano buheina jira. “Ahri ñaa jira. Ahri noaa jira”, ni bese masina tina sehe.

6

¹⁻² Ā jina Cohamacū yare noano masina, noano yūhtiina jijiina. Cristo yare wahmanore mari buhe dūcana ō sehe masi dūcai: Mari mū sūro mari yoaa yaba cjihti jierara. Mari noano yoaa mehne yūhdūsi mari. Cohamacure wacū tuaro cahmana marine. Ahrire wahmanopūre buhe dūcare

marine. Ā jia bautisaare, wamomacarire marine ti duhu payoare, yariaina ti masa mūjaare, ahri dacho to pihtiri baharo Cohamacū to buhiri dahrehtore, to buhiri dahrehtina ti ñano yūhdūrucuho cāhure ahri cāhure wahmanopūre marine buhe dūcare. Ō sehe jia buheare masi tuhsū, paye sehere noano buhe namojihna tjoa. ³ Ā jina Cohamacū to cahmachū āta yoanahca mari.

⁴ Mari ā yoaerana Cohamacū yare duhuboca mari. Cohamacū yare masina jipahta tīre duhuinare ne pari turi pano ti ñaa tūhotumarire cohtotachū yoa masierara. Tó sehe jina Cohamacū tinare to noano yoahore masia, Espiritu Santo to yoaa tiare mahanocā masimare. ⁵ Ā yoa Cohamacū ya durucūare tūhoa noaa durucua ti jichū masimare. Tuhsū, pihtiri dacho baharopū Cohamacū to tuaa mehne mari ā jirucūto, masare to buhiri dahrehto cāhure tina masimare. ⁶ Ā jīnapure Cristo yare duhurinare pari turi ti ñaa tūhotumarire tinare cohtotachū yoa masierara. Tó sehe yoaina Cohamacū macūnore pari turi crusapū ti cĵā puharo seheta tirore yoaa nina. Ti ā yoachū ñaa paina masa Cristore bujūpera. Ti ā yoachū tinare ti ñaa tūhotumarire tinare cohtotachū yoa masierara. ⁷ Ō sehe jira tí mari piti dahre buhechū: Noari yahpare pĵiro coro tachū tí toaa noano du, dīcha tira. Ā jiro tí wese pūro dichare cĵuara to chūhtire. Tí yahpa Cohamacū noano to yoari yahpa jira. (Tó seheta noano yoara tiro to yaina cāhure.) ⁸ Wiho mejeta agā pota mehne, tja mehne tí yahpa diaro yaba cjihti jierara. Ā jiri yahpa Cohamacū to jā cohāhti yahpa jira. Ā jiro tí yahpare jūnocanohca. (Tó seheta yoara tiro tirore duhuinare.)

Cristore ā ño payorucūinare yūhdūchū yoara Cohamacū

⁹ Yū cahīina, masare ā ni yahpaihta mūsa sehere “Cristore duhuina jira”, nii nieraja. Mūsa sehe Cristo to yūhdūchū yoaina jira. Ā jina noare yoana nica mūsa. Tīre masija yūhū. ¹⁰ Noano mari yoari wapa quihōno marine noano yoariro jira Cohamacū. Ā jiro to yare mūsa tuaro dahrari wapare bosī tiro. Tirore cahīna noano yoadohore mūsa tirore. Paina Cristo yaina cāhure yoadohore mūsa. Ā yoa tinare yoadohosinina nica mūsa. Ā yoaina mūsa jichū ñano bosī tiro. ¹¹ Mūsa catisinino puro painare mūsa cahīrucūhū, mūsa yoadohorucūhū cāhure cahmaja sā, baharopū Cohamacū yare mūsa duhuri nina. Mūsa ā noano yoachū ñano noano yorohca Cohamacū mūsa. ¹² Ā jina mūsa capa bujūina mūsa jichū cahmaeraja sā. Paina Cristo yaina ñano yūhdūpahta

to yare ne duhuerara. Ti ā yoachu ñno Cohamacu “Musare waihtja”, to niriire tinare wa pahñonohca. Ā jina masa cāhu tina yoaro seheta yoarucuga.

¹³⁻¹⁴ Panopu Cohamacu Abrahā cjirore ō sehe ni cūa tiri jire: “Yu wama mehne ahrire potocā nii nija mūhare. Mūhare noano yoaihtja. Ā yoacu mū panamana ji turiainarere payu masa jichu yoaihtja”, ni yahu cūa tiri jire Cohamacu Abrahā cjirore. Ā ni yahu cūno to ya wama mehne ā ni yahuro niri jire. Pairo tiro bui jiriro ne mariachu to ya wama mehne to basita ā ni yahua tiri jire. ¹⁵ “Mūhare noano yoaihtja”, Cohamacu to ni cūire Abrahā cjiro sehere noano to cohtachu ñno to niriro seheta tirore noano yoaa tiri jire. ¹⁶ “Cohamacu mehne potocā nina nija”, masa sehe nia, tina ti bui jiriro wama mehne ā ni yahua nina. “Cohamacu mehne potocā nii nija”, cāiro to nichu tūhoro tiro pairo mehne cahma sayoriro “Potocā tjira”, ninohca. Ā jia cahma sayo duhuahca tina. ¹⁷ Cohamacu Abrahāre “Mūhare noano yoaihtja”, ni cūno to ya wama mehne ā ni yahua tiri jire. To ā ni yahurire tūhona “Potocā tjira tí. Ā yoa to niri ne cohtotasi” ni, masija mari. Tíre mari masihtō sehe to ni cūri mehne “Yu wama mehne potocā nii nija”, ni yahua tiri jire Cohamacu. ¹⁸ Ā jiro puaro to ni durucuri mehne potocāto to niriire masichu yoari jire Cohamacu marine: To ni cūri cāhu “Yu wama mehne potocā nii nija”, to ni yahuri cāhu tí puaro mehne to ni durucurire yahua tiri jire tiro. To ni cūri cāhu, “Yu wama mehne potocā nii nija”, to ni yahuri cāhu ne cohtotaerara. Cohamacu ne mahñoerara. To ā jiriro jichu masina, marine to yoadohohtore macana, tirore noano wacū tuana, wahchea mehne marine to yuhduchu yoah-tore cohtanahca mari. ¹⁹⁻²⁰ Ā to yuhduchu yoah-tore cohtana, wacū tuaina jija mari. Ā jina cuieraja. Sacerdotea puhto bui puhtoro Cohamacu to jiri tahtia waropu sāano, ducataru suhtirore yuhdu sāahna. Ā sāano masa ya cjihtire sini payobasara Cohamacure. To ā yoariro seheta Jesu cāhu baharo mari wahahto seheta muanopu Cohamacu cahapu waharo, mari ya cjihtire sini payobasara Cohamacure. Tōpu mari wahahto pano tiro sehe wahari jire. Ā jiro jipihtia dachoripe sacerdotea puhto bui puhtoro jira tiro. Melquisede sacerdote to jiriro seheta sacerdotea puhtoro jirucura tiro cāhu.

7

Melquisede sacerdote to jiriro seheta Jesu sacerdote jira

¹ Melquisede cjiro sehe Salē wama tiri maca macaina bui puhtoro jia tiri jire. Sacerdote jiro Cohamacu tuariroro, mūano macarirore sini payobasariro jia tiri jire. Ā jiro paina puhtoare Abrahā cjiro cahma wajā yuhduraca tuhsu, to tjua tachu waro Melquisede cjiro to ya macai jiriro Abrahā cjirore piti bocaro sua tiri jire. Ā piti bocaro tirore sini payobasaa tiri jire Cohamacure: “Noano yoaga ahrirore”, ni sini payobasaa tiri jire Cohamacure Abrahā cjirore. ² To ā piti bocahto pano Abrahā cjiro sehe tirore ñu tuhtinare wajā tuhsu to wajārina cjiro puhto yare naa tiri jire. To ā nari cjirore mahanocā waa tiri jire Melquisede cjirore. Cohamacu to dutiriro purocāta mahanocā waa tiri jire Melquisede cjirore. Melquisede cjiro to wama sehe “Bui puhtoro noano yoariro jira”, nino nina. Tiro cjiro Salē wama tiri maca macaina puhtoro to jichu to wama ō sehe nino nina: “Bui puhtoro noano jichu yoariro”, nino nina. “Salē” nino, “Noano jia”, nino nina. ³ Ne Melquisede cjiro pucsumare, to pano ji muhtainare to coyeare ti yahu joa ōri mariahna. To masa bajuarire, to yariari cāhare yahu joa ōri mariahna. Ā jiro ā jirucuriro yoaro sehe jira tiro cjiro. To ā jiriro jichu Cohamacu tiro mehne marine piti dahre buhera. Cohamacu to macno to sacerdote to jiriire marine buhera. Melquisede cjiro sacerdote ā jirucuriro yoaro sehe jira. Tiro yoaro seheta Cristo cāhu sacerdote ā jirucuriro jira.

⁴ Ā jiro Melquisede ne wiho jiriro jiera tiri jire. Abrahā mari ñachu cjiro puhtoro waro jiparota mahanocā to tjua narire tiro sehere waa tiri jire. Mahanocā waa tiri jire Melquisedere. ⁵ Ā jia Cohamacu dutia Moise cjirore to cūri dutia jipihtina paina Israe masare tó purota wapa dutira. Ā dutiro Leví panamana ji turiainare ti coyea waparire ñaha dutiro, cūa tiri jire. Leví panamana sacerdotea wahaa tiri jire. Ā jia Israe masa Abrahā panamana ji turiaina jipahta ti sacerdoteare wapa tiri jire. ⁶ Melquisede sehe Leví panamino ji turiariro jieraparota wapa naa tiri jire Abrahāre. Cohamacu “Mūhare noano yoaihtja”, to ni cūriro jiparota Abrahā sehe Melquisedere wapa tiri jire. Ā jiro Melquisede sehe Cohamacure Abrahāre sini payobasaro noano yoa dutia tiri jire. ⁷ Noano yoa dutiriro Melquisede cjiro sehe to noano yoa dutiriro bui Abrahā bui jira. Tíre mari noano masija. ⁸ Mari mehne macaina sacerdotea marine mahanocā wapa naina mari yoaro seheta masa jira. Ā jia yariahtinata jira tina cāhu. Ahriro Melquisede sehe Abrahāre mahanocā wapa nariro cjiro ā catirucuriro

yoaro sehe jira, mari piti dahre buhech_u. To yariarore yahueraro, äta nino nia tiri jire Cohamac_u yare ti joari püi. ⁹ Mip_u macaina Leví panamana ji turiaina sacerdotea jia, mahanocã wapa nana. Ä jiina ti jipach_uta Abrahamã Melquisedere mahanocã waparo jipihitina Leví panamana ji turiaina ya cjihti cãhure wabasaro sehe yoaro nia tiri jire. Ä jia tina cãh_u Melquisedere mahanocã wapaina yoaro sehe jira. ¹⁰ Melquisedere Abrahamã to wapari pjare Leví sehe masa bajuerasinia tiri jire. Ä masa bajuerasiniparota to ñuch_uno cjiro Abrahamã pjac_upa to jiboriro seheta Leví sehe ji tuhs_uro nia tiri jire. Ä jiro Melquisede Abrahamã to piti bocach_u Leví cãh_u to ñuch_uno cjiro mehne jiro sehe jiro nia tiri jire. Ä jia Leví, to panamana ji turiaina mehne Melquisedere mahanocã wapaina yoaro sehe jia, tina to docai jia nia tiri jire.

¹¹ To dutiare cüno Cohamac_u Levíre to coyea cãhure sacerdotea ji dutia tiri jire. Ä jia to dutia ti niriro seheta tina sacerdotea wahiquinare wajã ju m_uo, sinibasaa tiri jire Cohamac_ure masa ya cjihtire. Ti ä yoari mehne mari yãhd_una, paio sacerdotere soro sehe jiro sacerdotere cahma namoeraboa mari. Ä jina paio sacerdotere cahmaja mari mip_ure, Melquisede yoaro sehe jirirore. Leví ya curua macariro Aarõ cjiro yoaro sehe jiina sacerdoteara mip_ure mari cahmaeraja. ¹² Ä jina sacerdotere mari cohtotana, marine dutia cãhure cohtotaro cahmana marine. (Sacerdotea ti yoadohoa mehne mari yãhd_ueraro seheta ti dutia mehne mari yãhd_ueraja. Ä yoana ti dutiare cohtota pah_uono cahmana marine.) ¹³ Aarõ, Leví cãh_u ti ya curua macaina dihtare sacerdotea säa duti mãhtaa tiri jimare Cohamac_u to dutiare cüno. To ä dutipach_uta mip_ure mari pãhtoro sacerdotea to sõriro pa curua macariro jira. Ti curua macariro ne sacerdotea jierasinare. ¹⁴ Tiro Cristo Juda ya curua macariro masa bajuari jire. Tíre mari noano masija. Moise cjiro sehe sacerdotea sõno, Juda ya curua macainare ne cãiro sacerdotea sõera tiri jire.

¹⁵ Ahrire masina, õ sehe mari noano masija: Mip_ure wahma to sõriro sacerdotea Cristo Melquisede yoaro sehe jiro jira. ¹⁶ Panop_u macaa dutia ti niriro seheta Leví ya curua macaina dihta sacerdotea säari jire. Mip_ure to sõriro sacerdotea ti yoaro sehe jiro sacerdotea säerari jire. Tiro Cohamac_u tuua mehne jipihitia dachoripe jiro jira. Ä jiro ti tuua mehne sacerdotea säari jire tiro. ¹⁷ Ö sehe nina Cohamac_u yare ti joari püi:

“Jipihitia dachoripe sacerdotea jirucuihca mãh_u.

Melquisede sacerdotea to jiro seheta sacerdotea jirucuihca mãh_u, nia tiri jire Cohamac_u to mac_unore”,

ni joaa tiri jire panop_u. ¹⁸ To dutia to cü mãhtari dutiare masa ti bihoerach_u yaba cjihti jierari jire. Ä jiro ti dutiare duti namoerari jire Cohamac_u. ¹⁹ Moise cjirore to cüri dutia mehne ne yãhd_uerara masa. Ä jiro mip_u sehere Cohamac_u marine to yãhd_uch_u yoahrtore marine cüre. To ä yoach_u mip_ure tiro cahap_u waha masija mari. Ä yoa tiro mehne durucu masija.

²⁰ Ä yoa Cristore sacerdotea sõno, “Y_u wama mehne potocã nii nija”, nino tirore sõri jire to P_uc_uro. Paina sacerdoteara tirore to yoariro sehe wama payo sõerari jire. ²¹ Cristo sehe Cohamac_u tuaro to yahuri mehne sacerdotea säari jire. Ö sehe nia tiri jire to P_uc_uro Cristore:

“Y_uh_u mã pãhtoro y_u wama mehne mãhure potocã yahuihtja.

Ahrire ne duhu cüno marieno yahuja mãhure.

Jipihitia dachoripe sacerdotea jirucuihca mãh_u”,

ni cüa tiri jire Cohamac_u to mac_unore. ²² Ä “Y_u wama mehne potocã nii nija”, to nino mehne cüno, wahma buheare noaa buheare marine cüno, marine to yãhd_uch_u yoahrtore cüno nia tiri jire. Panop_u macaa dutia yãhdoro mari noano jihtore cüno nia tiri jire. Ä cüno Cohamac_u “M_usare yãhd_uch_u yoaihtja”, to niriro seheta yoaro taro, Jesure warocari jire marine yãhd_uch_u yoahrtiro cjihtore. ²³ Ji mãhtaina sacerdotea ti yariach_u ñ_ua paina cohtota säana tjoa. Ä jia tina pay_u sacerdotea wahara. ²⁴ Jesu sehe ä jirucura. Ä jia tirore cohtotaina mari-ahna sacerdotea. ²⁵ Ä jiro tiro ä jirucuro, Cohamac_ure ä sini payobasarucura to yaina ya cjihtire. Ä yoa Cohamac_u mehne ti ä jirucuito sehe masare yãhd_uch_u yoa masina tiro. Jipihitina tirore wacü tuaina Cohamac_u cahap_u wahaahca. Ä jiro Jesu jira pototi tinare yãhd_uch_u yoariro.

²⁶ Ä jiro Jesu jira mari sacerdotea pãhtoa bui pãhtoro. Tiro pinihtare tuaro cahmaja mari. Ne ñaa buhiri marieriro jira tiro. Masa yoaro sehe ne ñaare yoaerare. Ä jiro Cohamac_u tirore ñaina cahai jirirore naahno, mãanop_u cü, jipihitina paina bui pãhtoro sõri jire. ²⁷ Paina sacerdotea yoaro sehe jierara tiro. Tina sehe dachoripe wahiquinare wajã, ju m_uo, Cohamac_ure sinia tihre. Ti basi ti ñaa yoari buhirire sini mãhtaa tihre. Baharo paina masa ti ñaa buhiri cãhure sinibasaa tihre tina. Ä jia pay_u tahari tina Cohamac_ure sinia tihre. Jesu sehe sacerdotea jiro, cã tahata to yariaa mehne siniri jire Cohamac_ure

masa ti ñaa buhirire cohãno taro. Á yariaro to basi to pjacure to catia cãhure Cohamacure to waboriro seheta yoaro niri jire. ²⁸ Cohamacu dutia Moise cjirore to cûri cjiri sacerdotea puhtoare sãa dutira. Á sãapahta ñaa marieina jierara ã sacerdotea sãa. Tí dutia baharo jia buhea mehne Cohamacu “Yũ wama mehne potocã nii nija”, to nino mehne to yahuri buhea mehne to macano sacerdotea puhtoro sãari jire. Tiro sehe ñaa marieriro á jirucura.

8

Cohamacu “Musare yuhduchu yoahtja”, ni cãha tjoa Moise cjirore to cûrire cohtotaro. Tíre yahubasariro jira Jesu

¹ Tí jipihtiare yahuna, ahri pinihtare musare yahuna nija: Musare sã yahuriro sacerdotea puhtoa bui puhtoro tiro pini mari yairo waro jira. Muanopu Cohamacu tua yuhduariro to puhtoro dujiro cahai to poto buhusehei dujira Cristo mari sacerdotea puhtoro. ² Á jiro ahri yahpa macari wuhui, masa ti yoari wuhui sacerdotea dahraare yoerara tiro. Muanopu jiri wuhupure mari puhtoro to yoari wuhupure sacerdotea dahraare yoara tiro. Tí wuhui pinihta Cohamacu waro ya wuhui jira.

³ Jipihtina ahri yahpa macaina sacerdotea puhtoa wahiquinare wajã ju muoa, wara, Cohamacure ño payoa. Áta yoa dutia tiri jire tinare. Mari yairo sacerdotea cãhure wa dutia tiri jire Cohamacure mari ño payohto sehe. Mari ñaa buhirire tirore wa dutia tiri jire. Á jiro Cristo mari ñaa buhiri yariaro wahchechu yoari jire Cohamacure sacerdotea puhtoa Cohamacure waa ti wahcheriro seheta. ⁴ Mari judio masa mari dutia ti niriro seheta ahri yahpapu sacerdotea masa ti ñaa buhirire wara Cohamacure sinia. Ahri yahpapu sacerdotea ji tuhsara. Á jiro Jesu sehe mari yairo sacerdotea ahri yahpapu jisinino, sacerdotea jieraboa tiro sehe. ⁵ Ahri yahpa macaina sacerdotea ti dahraare ahri yahpa macari wuhuihta dahrara. Tí wuhui Cohamacure ti ño payogire ñana muano macari wuhupure tirore mari ño payohtore masi cureja. “Tí wuhui yoaro sehe jira”, nino nia tiri jire Cohamacu tãcui Moise cjirore to wuhure dahre dutiro. To á dahrehto panocã Cohamacu ô sehe nia tiri jire tirore: “Tãcui wuhure yũ ñoriro seheta ti wuhui to jiriro seheta yũ ya wuhure quihõno dahrega”, nia tiri jire Cohamacu tirore. ⁶ Mipure sehere Jesu sacerdotea jiro to dahraa paina sacerdotea ya dahraa yuhdoro jira. Wiho waro jierara. Cohamacu marine “Musare yuhduchu yoahtja”, to ni yahuri cjiri panopu macaa dutia Moise cjirore to cûri dutia yuhdoro jira. Marine to yahuri cjiri tí dutia yuhdoro marine

noano jichu yoaahca. Á jiro marine Cohamacure yuhduchu yoabasariro jiro, Cristo sehe paina sacerdotea yuhdoro jira.

⁷ Wahmanopure to dutiri cjiri mehne mari yuhdueraja. Tí dutia mehne mari yuhduchu, paye buheare cûeraboa Cohamacu. ⁸ Wiho mejeta tí dutiare ti yoa pahño masieraire yahuro ô sehe nia tiri jire to yainare Israe masare:

“Ô sehe nina mari puhtoro: ‘Noano tuhoga. Baharopu paye buheare “Ô sehe yoadohoihtja musare”, ni yahuihtja yũ yainare Israe masare, Juda ya curua macaina cãhure.

⁹ Tí buhea ti ñuchusuma cjirore yũ yahu cûri cjiri yoaro sehe ne jisi.

Yũ basi tinare Egipto yahpai jünare na wiocu tinare yahumai.

Yũ ã ni yahurire yuhduerare tina.

Tí ã yoaichu ñucsi tinare ã ñunocahi.

¹⁰ Á jicu baharopu Israe masare ô sehe ni yahuihtja: Yũ dutiare tinare wacũchu yoahtja.

Á jia yũ dutiare yuhtiahca.

Á jicu yũhu Cohamacu ti puhtoro, tinare ñu wihboriro jiihtja.

Tina sehe yũ yaina masa jiahca.

¹¹ Á jia tí pjare tina mehne macainare ne tina ô sehe cahma nisi: “Mari puhtorore Cohamacure masiga musa”, ne ni cahma buhesi.

Tina jipihtina yuhure masi tuhsahca.

Wihãinacã, bucuna cãhu yuhure masiina dihta jiahca.

¹² Á jicu ti ñaa yoari buhirire boihca yũhu.

Tinare buhiri dahresi yũhu.

Tí ñaa yoari buhirire pari turi wacũsi yũhu’, nia tiri jire mari puhtoro”,

nina Cohamacu yare ti joari pũ. ¹³ Mipure marine wahma buheare cûno, panopu macaa dutiare duhuro nire. Á yoa muana dutia cjirore mahanocã to duhuri baharo tí dutia cjiri cohtotaa wahara.

9

Ahri yahpa macari tahtiare muano macari tahtia cãhure Cohamacure ño payori tahtiare yahuha

¹ Wahmanore Cohamacu to dutiare Moise cjirore cûno masa tirore dohse ti ño payohto cãhure cãa tiri jire. Á yoa Cohamacure ti ño payohti wuhui cãhure yoa dutiro cãa tiri jire. ² Tí wuhui wahiquina cahsari wuhui jia tiri jire. Pua tahtia cãaa tiri jire. Pjiwacũri tahtia ti sãa su muhtari tahtia Cohamacu ya tahtia wama tia tiri jire. Tí tahtiai ti sihã buhriadu jia tiri jire. Á jiro mesa cãhu jia tiri jire. Tí mesa bui Cohamacure ti wari pão pisaa tiri jire. ³ Pa tahtia suhti cahsari mehne ti ducatarí tahtia jia tiri jire. Tí tahtia

Cohamacu to jiri tahtia waro wama tia tiri jire. ⁴ Tí tahtiai uru mehne ti yoari altar, inciensore ti jü mæori altar jia tiri jire. Á yoa uru noaa mehne ti duhu ðri caro tói coãa tiri jire. Tí caro puhichapu uru wahwa maná wama tia chua posa tiri wahwa jia tiri jire. Á jiro tí caro puhichapu Aarð to tjuadu cjiro pûri tidu jia tiri jire. Á yoa pua pjî tãa pjîni Cohamacu to dutiare to joa ða pjîni cãhu tí caro puhichapu sãa tiri jire. ⁵ Tí caro bui pua ro anjoa masu jia tiri jire. Tí masu Cohamacu to si siteare, tí tahtiai to jiare ñoa nia tiri jire. Tí caro mohano bui ti wua dæpuri mehne mohaa tiri jire. Tí caro mohano bui masa ñaa buhirire ti warire wajã site payoa tia tiri jire sacerdotea puhtoro. Tó purota yahuihtja ahri wahu macaare mipare.

⁶ Á yoa tí wuhare ti noano cahnoru baharo sacerdotea dachoripe ti sãa su muhtari tahtiai sãa su, ti dahraare yoaa tia tiri jire. ⁷ Sacerdotea puhtoa bui puhtoro dihta pa tahtiapu sãa tiri jire. Cahmaripe cã tahata to sãari dacho baroihta sãa tiri jire tiro. Á sãano ti wajãriro wahiquiro tí wariro dire na sãano, Cohamacure ño payoa tiri jire. Di marieno ne sãaera tiri jire. To basi wacuenoca to yoari buhirire, to ñaa buhirire, jipihtina paina Israe masa wacuenoca ti yoari buhirire, ti ñaa buhirire dire na sãa tiri jire tiro Cohamacure sini payoro taro. ⁸ Jipihtia ahri mehne Espiritu Santo õ sehe ni marine buhero nina: Tí wuhai Moise cjirore to cûri wuhai mari ño payosinina, to cûri dutiare yoahntina jisinina, wiho jiina Cohamacure ño payona wahaeraboa mari. Sacerdotea puhtoa bui puhtoro dihta Cohamacu to jiri tahtia waropu sãa masina. Á jina wiho jiina ti ño payoa wahaeraro seheta áta jiboa mari cãhu Moise cjirore to cûri dutiare cjuasinina. ⁹ Ahri jipihtiare Cohamacure ño payori wuhuru jiare marine cûno, marine mipu macainare buhero niri jire Cohamacu. Wahiquinare wajã jü mæoa, masa Cohamacure ti ño payori mehne ne Cohamacu caharu wahasi. Tí á yoari mehne ti ñaa yoari buhirire cosawerara. ¹⁰ Á wahiquinare waa, ti chua, ti sihnia, ti pjacu cosaa, ti õ sehe yoaa mehne Cohamacure ño payoa timari jire. Ahri ti á yoari wiho warota jira mipure. Á yoa tí dutia Moise cjirore to cûri dutia marine noaina wahachu yoaerari jire. Tí dutiare yoapanahata munanota jirucunocaja mari. Mari tuhotuare cohtotaeraja mari. Á jia wahma buheare Cohamacu to cûri baharo muna dutia sehe yaba cjihti jierara.

¹¹ Cristo sehe mari sacerdotea puhtoro jiro ta tuhsari jire. Á jiro marine noaare cû tuhsari jire. Cohamacure ño payori wahu munanota sacerdotea puhtoro to dahrari

wahu paina sacerdotea ti dahraa wuhuse yuhdoro noari wahu jira. Mæano macari wahu jira. Tí wahu ahri yahpa macari wahu jierara. Á yoa masa ti yoari wahu jierara.

¹² Cristo munanota Cohamacu to jiro waropu cã tahata sãari jire mari ñaare yoari buhirire Cohamacure waro sehe yoaro taro. Tõpu munanota õpu to jiri tahtia waro yoaro sehe jira mari piti dahre buhechu. Á yoaro cabritoa dire, wachuacã dire na sãa, waerari jire tiro. Tiro sehe to ya di warore Cohamacure to waro sehe yoaro niri jire yariaro. Jipihtia dachoripe Cohamacu mehne mari jirucuhito sehe to dire cohãri jire. Mari ñaa buhirire yariari jire. ¹³ “Yariainare pihana masa pjacu wete tiina jira”, ni cúa tiri jire Cohamacu Moise cjirore. Tó sehe jia ñaare wete tiare cosawea tiri jire cabritoa dire ti wari mehne. Wachua dire ti wari mehne, wachuacãre ti jãri nitine ti wari mehne tó sehe jia ñaare cosawea tiri jire. ¹⁴ Tó sehe jia ñaare wahiquina dire ti wari mehne, nitine ti wari mehne ti cosaweriro seheta tí yuhdoro Cristo sehe to dire to cohãno mehne mari ñaare yoarire noano cosawea pahonocahna. Tiro ñaa marieriro jiro, crusapu yariaro to basita to pjacu to catia mehne Cohamacure waro sehe yoari jire. Espiritu Santo á jirucuro to yoadohoa mehne á yoari jire tiro. Á yoa mari ñaa yoari buhirire Cristo to cosawechu ñano mari ñaa buhirire Cohamacu bonocahno, mari ñaa yoarire duhuchu yoara. Tí ñaa buhirire cjuasinina pichacapu wahahtina jimai mari. To cosawerina jina, Cohamacu catiro yare yoaina jija mari.

¹⁵ Á jiro “Õ sehe masare yuhdachu yoaihtja”, masare Cohamacu to ni yahu cûchu Cristo sehe to yahuare yahubasariro jira. Á yahubasara tiro Cohamacu to beserinare yuhdachu yoaro taro. To á yuhdachu yoachu jipihtia dachoripe tiro mehne jirucunahca mari to yaina. Á jina mari to yainare Cohamacu to wahtire cjuannahca mari. Moise cjirore to cûri dutia dihta jichu masa ti ñaa buhiri jisinia tiri jire. Á yoa crusapu yariaro tí pjata ti ñaa yoari buhirire yuhdachu yoari jire tiro to yainare. ¹⁶⁻¹⁷ Masano baharo to coyeare to wahtire joa õyura papera pui. To wahtire yahuro taro joa õyura. Tí püre joa õyuro to yariaerasinichu tí pü yaba cjihti jierara. To coyea to cjuarire na masierasina. Wiho mejeta, to yariachu ñua tí pü to ni joariro seheta to yare naahca tina. ¹⁸ To yariahto pano tí pü to yaba cjihti jieraro seheta yariaro marieno di wijaro marieno Cohamacu Moise cjirore to cûri dutia cãhu ne yaba cjihti jieraboa. Á jiro wahiquiro dire sacerdotea to wajã siteri baharo to dutiare quihõnota yoaro nia tiri jire. ¹⁹ Á yoaro

ō sehe yoa muhtaa tiri jire Moise cjiro: Cohamacu to cūri dutiare masare yahu pahñoa tiri jire. Baharo wachuacā dire, cabritoa dire co mehne morea tiri jire. Tuhsu, hisopo wama tidu dapu mehne oveja pjoari sohāa mehne ti űimiori pjoarire torēa tiri jire. Tí dapu mehne dire soharo, Cohamacu dutiare to joari tju bui wajā site payoa tiri jire. Jipihntina masa bui cūhare wajā site payoa tiri jire. ²⁰ Ā yoaro ō sehe nia tiri jire tiro: “Cohamacu marine to yahuri cjiri to dutiri cjiri ahri di mehne ti potocā jichu masija mari. Ahri dire űna to niriro seheta marine to yoahrtire masija mari. Tí dutiri cjirore yahti dutiri jire tiro marine”, nia tiri jire Moise cjiro. ²¹ Ā yoaro masare to yoariro seheta Cohamacure ti űo payori wuhu wahiquina cahsari wuhure, jipihntia tí wuhai jia cūhare wajā sitea tiri jire. ²² Ā tjira. To dutia ti niriro seheta payu űaare di cohāno mehne cosawero cahmana. Mahanocā dahsaa űaare paye baro mehne ti cosawechu noana. Ā jiro Cohamacu mari űaa yoari buhirire ne bosu to di cohāerachu.

Cristo to dire cohāno, to yaina ti űaa yoari buhirire cosaweha

²³ Tí jipihntia Cohamacure ti űo payori wuhu, tí wuhai jia cūhu muano macari wuhai jia yoaro seheta jiri jire mari piti dahre buhechu. Muano macari wuhu sehe potocāta Cohamacu ya wuhu waro jira. Ā jia ahri yahpa macari wuhure, tí wuhai jia cūhare wahiquina dire to wajā siteri mehne cosawero cahmari jire. Tí yuhdoro muanopu wahahntinare ti űaa buhiri cjuainare cosawero cahmana. Ā jiro wahiquina yuhdoro jiriro ya di to cohāno mehne tinare ti űaa yoari buhirire cosawero cahmana. ²⁴ Ā yoa Cohamacure ti űo payori wuhu masa ti yoari wuhu jira. Muano macari wuhu yoaro seheta jira tí wuhu cūhu, mari piti dahre buhechu. Ā jiro Cristo sacerdote jiro marine sini payobasaro taro ahri yahpa macari wuhure sāaerari jire. Potota muanopu wahari jire tiro Cohamacu panoi marine sini payobasaro taro. ²⁵ Mari judio masa mari sacerdotea puhto bui puhtoro cahmaripe Cohamacu to jiri tahtia waropu sāa tiri jire wahiquina dire waro taro. Cristo sehe to dire Cohamacure waro sehe yoaro taro, yariaro payu tahari sāaerari jire. ²⁶ Payu tahari yariariro jiro, ahri yahpa to jiro puro payu tahari yariaboa tiro. Payu tahari tiro mari űaa buhirire yariaruciruro jiboa. Wiho mejeta pihtiri dacho panocā mipure marine jipihntinare yuhduchu yoaro taro cū tahata bajuari jire tiro ahri yahpai. Ā bajuari jire to yariaa mehne mari űaa buhirire cohāno taro. ²⁷ Jipihntina masa

cū tahata yariaahca. Ti ā yariari baharo masa noinare, űaina cūhare beserohca Cohamacu. ²⁸ Cū tahata mari yariaro seheta Cristo cūhu cū tahata yariari jire payu masa ti űaa yoari buhirire cohāno taro. Baharo pari turi tarohca. Mari űaa yoari buhirire cohā tuhsariporu jirohca. Ā jiro pari turi mari űaa yoari buhirire cohāno taro nisi. Ā taro tirore cohtainare wahchea mehne tirore űu duainare yuhduchu yoaro tarohca.

10

¹ Cohamacu to dutia Moise cjirore to cūri cjiri noaa buhea yoaro seheta jipahta, cāno potori jierara. Tí dutia ti yoa dutiriro seheta cūhmaripe wahiquinare wajā, jū muo, Cohamacure űo payorucura. Tí ā yoa mehne masa ti űaa yoari buhirire cohāerara. ² Tí mehne ti űaa yoari buhirire cohāa, cū tahata Cohamacure ti űo payori baharo “Mipure űaa buhiri mariaha sāre”, ni tuhutuboa masa. Ā jia pari turi wahiquinare wajā jū muo Cohamacure űo payoeraboa. Tí ā yoarire duhunocaboa. ³ Cūhmaripe wahiquinare wajā jū muo, Cohamacure ti űo payochu tí tinare ti űaa yoari buhirire wacūchu yoara. Tó purocāta yoadoho duara tí tinare. ⁴ Wachua di mehne mari űo payori mehne, cabritoa di mehne mari űo payori mehne ne mari űaa yoari buhirire cohāerara.

⁵ Tí potocāta jira. Ti ā jichu űuno Cristo ahri yahpape to tahto pano ō sehe nia tiri jire Cohamacure:

“Wahiquinare jū muo ti wachu, trigo pohcare ti wachu cūhare muhu űucu űu ji coaerara muhu.

Ā jicu yu pjacure yoare muhu yu ya pjacu cjihtore.

⁶ űaa yoari buhirire ti cohāhtore wahiquinare wajā ti jū muochu űucu űu ji coaerara muhu.

⁷ Mu ā űu ji coaerachu űucu ō sehe nihi muhare:

‘Ōi jija. Mu cahmano seheta yahpapu yoi wahaihtja.

Āta wuhare ni yahura mu ya tjupu’, nihi yūhu’,

nia tiri jire Cristo to Pacurore.

⁸ “Wahiquinare jū muo ti wachu űucu, trigo pohcare ti wachu cūhare űucu űu ji coaerara muhu”, ni yahu muhtaa tiri jire tiro. Wahmanopure to dutia wahiquinare, trigo pohca cūhare ti waa mehne ti űo payo dutipachuta ā nia tiri jire tiro. ⁹ Ā ni tuhsu ō sehe ni namoa tiri jire: “Ōi jija. Mu cahmano seheta yahpapu yoi wahaihtja”, nia tiri jire. To ā nichu ō sehe masija mari. Panopu wahiquinare wajā jū muoa mehne ti űo payori cjirore duhuchu yoaro paye buhea sehere cūno niri jire Cohamacu. Ā cūno

mipare Cristo to yariaro mehne masare yuhdachu yorohca Cohamacu. ¹⁰Jesucristo to pjacure waro, yariaro, jipihtina mari to yainare mari ñaa buhirire cohâri jire. Cû tahata to pjacure wari jire mari ñaa yoari buhirire cohâno taro. Â yoaro Cohamacu to cahmano seheta yoaro niri jire.

¹¹Jipihtina mari judio masa mari yaina sacerdotea dachoripe Cohamacure ño payori wuhai dahrarucura. Â dahrarucura dachoripe mnanota wahiquinare wajâ, jû mño, Cohamacure sinirucura. Ti ã wajâ jû mporachuta ti mari ñano yoari buhirire ne cohâerara. ¹²Cristo sehe cû tahata mari ñaa yoari buhirire yariaro, mari ñaa yoari buhirire noano cohâ pahñonocari jire. Tîre cohâ tuhsu waha wahari jire to Pucaro cahapu to poto buhusehei dujuro waharo. Puhtoro jiro tópu dujira. ¹³Tópu dujuro cohtaro nina. Tirore ña tuhtiinare Cohamacu sehe to yuhdurucabasahatore cohtaro nina Cristo. ¹⁴Â jiro cû tahata to yariaro mehne ti ñaa yoari buhirire to cohâbasarinare ñaa buhiri marieina ti ã jirucuchû yoara tiro. ¹⁵Ti potocâ tjira. Âta ni yahura Espiritu Santo marine. Ô sehe ni yahura tiro:

¹⁶“Ô sehe nina Cohamacu: ‘Baharopare ô sehe ni yahuihtja Israe masare, “Yu dutiare ti wacûaru cûihtja”, ni yahuihtja”,

nina tiro. ¹⁷Ô sehe ni namona Cohamacu: “Ti ñaa yoari buhirire yu dutiare ti yuhdurucari cûhare pari turi wacû namosi yuhû’, nina tiro”, ni yahura Espiritu Santo. ¹⁸Mari ñaa yoari buhirire to ã bochu pari turi mari ñaa yoari buhiri yariahtirore cahmaeraja mari.

Cohamacu cahai suna cuiro marieno tiro mehne mari durucuboriro seheta tiro mehne durucu masija mipare

¹⁹Â jina yu coyea Cristo to yariaro mehne to di cohâno mehne mipare mari cûhu cuiro marieno Cohamacu to jiri tahtia waropu sâana, tiro mehne durucu masija. Â yoana tirore sini masija. ²⁰Mari catirucuhto cjhitore Cohamacu marine ã coâ yoaro niri jire. Cristo sehe mari ñaare yoari buhirire yariaro to di cohâri mehne Cohamacu mehne durucu masija mari. Sacerdotea puhto bui puhtoro ti tahtiapu to sâariro seheta Cristo sehe Cohamacu cahapu sari jire mari ñaa yoari buhirire bo dutiro waharo. Ti tahtia macari suhtirore ducataru suhtirore to tuhre cohâboro seheta Cristo to pjacure cohâri jire Cohamacu mehne mari jirucuhto sehe. ²¹Â jiro Cohamacu ya wuhai dahrariro mari Yairo Sacerdote tua yuhdurucaro jira tiro. ²²Â jina Cohamacure sinijihna mahñono marieno. Tirore noano wacû tuaa mehne, cuiro marieno tirore

sinijihna. Cristo mari ñaa yoari buhirire to cosaweinapu jija. Â jina “Buhiri tiina jija mari”, ni tuhoutuina jieraja mari. Â yoa wete mariea co mehne mari cosawero seheta Cristo to cosaweinapu jija. Â jiina jina Cohamacure sinijihna. ²³“Masare yuhdachu yoihtja”, to niri seheta yorohca. Â jina tiro marine to yuhdachu yoahtore noano masija mari. Tîre masina, ne boena tjijihna. Cohamacure ã wacû tuarucujihna. ²⁴Mari mehne macainare cahîna, tinare yoadohojihna mari jipihtina mari cahma cahî yoadohohto sehe. ²⁵Â jina noano cahmachurucujihna Cohamacu yare yoana tana. Paina sehe ti cahmachumarore duhua nina. Tina yoaro sehe yoana tjijihna. Mari mehne macainare wahchechu yojihna. Ahri yahpare mari puhtoro to tahto mahanocâ duhsara. Tîre masina tuaro wahchechu yojihna mari mehne macainare Jesu yainare.

²⁶Potocâ jia buheare noaa buheare mari masipanahta ñaare mari pari turi ã yorucuchû mari ñaa yoari buhirire cosawe namohto basioerara. ²⁷Â jiro tó sehe yoinare cua nina. Jipihtina tirore ña tuhtiinare buhiri dahrore, tuaro jânoi cohânohca Cohamacu tinare. Â jia to buhiri dahrehtore cuiina dihta jimana tirore duhuina. ²⁸Cohamacu dutia Moise cjirore to cûri cjirore yuhdurucainare buhiri dahrea, mari coyea judio masa wajâna tinare. Ne pja ñano marieno wajâna tinare. Tiaro ti yahusâchu tuhoro beseriro ti yuhdurucarire masino tinare buhiri dahre dutira. Tiaro mariachû puaro ti yahusâchu tinare buhiri dahre dutira. To ã dutichû tinare wajâna. ²⁹Ti yuhdoro Cohamacu macunore ña yabiina to buhiri dahrehtina jiaha. Cohamacu Cristo to di cohâno mehne mari ñaa yoari buhirire cohâna. To ã cohâhtore yahuri jire tiro marine. Â jia tina ti ñaa yoari buhirire cohârina jipahta baharo pari turi ñaare yorucua ti ñaa yoari buhirire to cohârire to di cûhare “Wiho waro jira”, nia nina. Â niina, to buhiri dahrehtina waro jia niaha. Â niina Espiritu Santore ñano ni durucua jira. Tiro tinare cahîro jira. Ti ã ñano durucuchû ñano tuaro buhiri dahrerohca Cohamacu tinare. ³⁰Ahrire mari noano masija. Cohamacu to basita ô sehe nia tiri jire: “Yuhû jija buhiri dahrehtiro. Ti ñaare yoari buhiri buhiri dahrehtja yuhû”, nia tiri jire tiro. Ô sehe ni namoa tiri jire: “Yuhû ñano yoinare yu yainare buhiri dahrehtja”, nia tiri jire tiro. ³¹Cohamacu catiriro marine to buhiri dahrechû cua yuhdurua.

³²Panopu musa jirire wacûga musa. Ti pjare Cohamacu yare wahma masi ducana payu tahari ñano yuhdurupanahta to yare

duhuerare m̄sa. ³³ C̄a tahari masa ti ñ̄rocaroi paina m̄sare ñ̄ano ni, ñ̄ano yoapere m̄sare. Paina Jesu yainare ti ñ̄ano yoach̄u ñ̄ana, tinare p̄ja ñ̄u, tinare piti tire. ³⁴ Ti peresu yoainare p̄ja ñ̄ure m̄sa. Tuhs̄u, m̄sa yare ti mapach̄uta wahchea mehne, “Noanohca”, nire m̄sa. Ahri yahpa macaa ȳhdoro noaare c̄jara m̄sa m̄nanop̄u. Tí noaa ã jirucuahca. Tíre masina, m̄sa c̄jare ti mach̄u cahyaerare m̄sa. ³⁵ ã jina cuiena t̄jiga. Cohamac̄ure ã wac̄u tuarucuga. M̄sa ã yoach̄u ñ̄ano tiro noano yoarohca m̄sare. ³⁶ Cohamac̄u “M̄sare ò sehe yoadohihta”, to ni c̄jire noano cohtaga m̄sa ñ̄ano yuh̄d̄panahta. ã cohtaina jina to cahmaare yoanahca m̄sa. ã yoana to ni c̄jire c̄j̄anahca. ³⁷ Ò sehe nina Cohamac̄u yare ti joari p̄u:

“Mahanoc̄a d̄hsara Cristo to wihito.

ã taro dói wihi bahrañ̄ohca.

³⁸ Ȳu yaina noaina sehe yuh̄re wac̄u tuarucuahca.

ã yoaa yaina jirucuahca.

Yuh̄u mehne ã jirucuahca.

Ȳu yare coh̄aina sehere ñ̄u yabija yuh̄u”,

nia tiri jire to ya durucua ti joari p̄u. ³⁹ Mari sehe Cohamac̄u yare coh̄aina jieraja mari.

ã jina pichacap̄u wahahtina jieraja mari. Cohamac̄ure wac̄u tuaja mari. ã jina to yuh̄d̄ch̄u yoaina jija.

11

Wac̄u tuaare yahuha

¹ Ò sehe jira wac̄u tuaa: Cohamac̄ure wac̄u tuana, marine to noano yoah̄tore noano masija mari. Cohamac̄u to niriro sehta to yoerasinipach̄uta to yahuare “Potoc̄ã t̄jira”, ni tuh̄otuja mari tirore wac̄u tuana. Tirore ñ̄erapanah̄ta, tirore wac̄u tuana, “Potoc̄ã t̄jira”, ni tuh̄otuja mari to yahuare tuh̄ona. ² Panop̄u macaina Cohamac̄ure ti wac̄u tuach̄u ñ̄ano ñ̄u ji coaa tiri jire tiro sehe.

³ Cohamac̄u to durucua mehne jipihtiare bajuamehnea tiri jire. ã jiro tiro mari ñ̄erari mehne jipihta mari mip̄u ñ̄are bajuamehnea tiri jire. Tíre mari noano masija Cohamac̄ure wac̄u tuana pinihta.

⁴ Cohamac̄ure wac̄u tuaro Abe sehe corderore wajã, j̄u m̄uo, Cohamac̄ure ñ̄o payoro “Noana”, nia tiri jire. To wahmino Caí yuh̄doro noanore waro, ñ̄o payoa tiri jire tiro Cohamac̄ure. ã jiro Cohamac̄u to warire wahchea tiri jire. ã wahchero “Noariro jira”, ni ñ̄ua tiri jire tiro Abere. ã Cohamac̄ure to wac̄u tuach̄u ñ̄ana mari tirore ñ̄u c̄ja. To yariari baharo jipach̄uta to wac̄u tuarire ñ̄u c̄ja mari.

⁵ Enoco Cohamac̄ure to wac̄u tuach̄u ñ̄ano wahchea tiri jire Cohamac̄u. ã

wahchero tirore to cahap̄u na m̄uo tiri jire. ãta nina Cohamac̄u yare ti joari p̄u. To na m̄uori baharo ne masa tirore bocaera tiri jire. To na m̄uoriro jiro ne yariaera tiri jire. ⁶ Cohamac̄ure wac̄u tuaerana, tirore wahch̄ech̄u yoa masieraja mari. Cohamac̄ure wac̄u tuaerana, tirore ñ̄o payo masieraja mari. “Potoc̄ã tiro Cohamac̄u warota jira. ã jiro tirore mari ñ̄o payoch̄u marine noano yoara tiro”, mari ni tuh̄otuerana tirore sini masieraja mari.

⁷ Noé Cohamac̄ure wac̄u tuaro, tirore to yahurire noano yuh̄tia tiri jire. Baharop̄u ti ñ̄ano wahahtore to yahuch̄u tuh̄oro noano yuh̄tia tiri jire tiro. ã yuh̄tiro, pjiria dohoriare yoaa tiri jire. ã yoa tia dohoria mehne tiro to coyea mehne dia mininore yuh̄dua tiri jire. ã wac̄u tuariro jiro ahri yahpa macaina ñ̄aina ti wac̄u tuerarire ti pichacap̄u ti wahahto c̄hure ñ̄ono nia tiri jire. ã jiro to wac̄u tuach̄u ñ̄ano “Noariro jira”, ni ñ̄ua tiri jire Cohamac̄u tirore.

⁸ Abrahã c̄jira c̄h̄u Cohamac̄ure wac̄u tuaro tirore yuh̄tia tiri jire. Pa dihtap̄ure tirore to wahti dihtap̄ure Cohamac̄u to waha dutich̄u tuh̄oro Abrahã yuh̄tia tiri jire. To ya dihtai jiriro wijaa waharo, to masierari dihtap̄u sua tiri jire. ⁹ “Ahri dihtare m̄hure waihtja”, Cohamac̄u to nich̄u tuh̄oro tirore wac̄u tuaro tí dihtaihta t̄juaa tiri jire tiro. Tóti jiro pa dihta macariro jiparota tóhta t̄juanocaa tiri jire. Tirore, to mac̄ano Isaa c̄h̄ure to panamino Jacobo c̄h̄ure tina cañ̄are “Ahri dihtare m̄sare waihtja”, ni yahua tiri jire Cohamac̄u sehe. ã jia tina tí dihtai jia, wahiquina cahsari wah̄sei jia tiri jire m̄nano jieraina jia. ¹⁰ Tóti jisinia tiri jire Abrahã Cohamac̄u mehne to jih̄tore cohtaro. Pa macap̄u Cohamac̄u to jiri macap̄u m̄nanop̄u to wahahtore cohtaro nia tiri jire tiro. Tí macare dahrea tiri jire Cohamac̄u. ã jiro tí maca ne pih̄tisi.

¹¹ Cohamac̄ure wac̄u tuaro Abrahã c̄jira b̄uc̄ro waro jiparota, to namono Sara mehne pohna tia tiri jire. To namono pohna marienicoro to jipach̄uta, “To niriro sehta yoarohca”, Cohamac̄ure nino, tirore wac̄u tuaro pohna tia tiri jire Abrahã. ¹² ã jiro Abrahã b̄uc̄ro waro jiparota pohna tia tiri jire. ã jia to panamana ji turiaínap̄u payu wahanocari jire. Ñ̄apichoha perire, padu pohcaricã c̄h̄ure mari quih̄ona bihoeraro sehta to panamana ji turiaína c̄h̄ure quih̄ona bihoeraja mari.

¹³ Jipihtina ahriina yu yahuina c̄jirip̄u Cohamac̄ure wac̄u tua tuh̄sinap̄u yariaa tiri jire. Cohamac̄u tinare “M̄sare waihtja”, to ni quih̄o c̄jirirore s̄erapahta yariaa tiri jire. Tíre ñ̄ahaerapahta Cohamac̄u to niriro sehta yoari p̄ja baharop̄u ti c̄j̄ahtire masia

tiri jire. Ā masia wahchea tiri jire. Ā jia õ sehe nia tiri jire tina: “Ahri yahpai tiniina jija. Pa yahpa macaina jija”, nia tiri jire tina. ¹⁴ Tó sehe niina pa yahpare ti ya yahpa cjihatore cohtaa nina. Tíre mari noano masija. ¹⁵ “Pa yahpa macaina jira”, nicu panopu ti cohãri yahpare nicu nieraja. Pa yahparu ti ji muhtari yahparu waha duaa, wahaboa. ¹⁶ Noa yuhduari yahpa sehere cahmaa nia tiri jire. Ti yahpa manopu jira. Ti ā cahmachu ñuno “Cohamacu sã puhtoro jira”, ti nichu tuhoro buo tierara Cohamacu. Ti ya maca cjihatore dahrebasa tuhsaa tiri jire tiro.

¹⁷⁻¹⁸ Cohamacu Abrahãre to macunore Isaare wajã ju muo dutia tiri jire. Tirore ñu duaro ā dutia tiri jire, “¿Potocãta yuhare wacũ tuajari?” nino. Cohamacure wacũ tuaro to niriro seheta yoaa tiri jimare Abrahã. “Mu macu Isaa mehne mu panamana ji turiainare payu cjuahca muhu”, Cohamacu to niriro jipachata to macunore wajãno taro nia tiri jimare Cohamacure ño payoro taro. ¹⁹ “Yu macu Isaare yu wajãchu Cohamacu tirore masonohca”, ni tuhuturo tirore wajãno taro nia tiri jimare. Ā niriro jiparota Cohamacu tirore ducata, wajã dutiera tiri jire. To pucaro to ā wajãboriro jiro, masariro yoaro sehe jia tiri jire Isaa, Abrahã to ñachu. Ā jiro Abrahã tirore catirirore pari tiri cjuaa tiri jire.

²⁰ Isaa Cohamacure wacũ tuaro, to pohñare Jacobore, Esaũ cãhure “Baharopu Cohamacu musare pjíro noano yoarohca”, nia tiri jire. ²¹ Cohamacure wacũ tuaro Jacobo to yariahto panocã José pohñare, muare “Cohamacu musare pjíro noano yoarohca”, nia tiri jire Jacobo. Na tuhcuca cãh, to tjuadu mehne tjua ñaha caha su, Cohamacure ño payoro, “Cohamacu musare noano yoarohca”, ni cãa tiri jire. ²² Cohamacure wacũ tuaro José to yariahto panocã Israe masa Egiptoĩ jiina ti wijaahtore yahuyua tiri jire. Ā ti wijaahtore masiyuro to yariari baharo to pjacu cjirore naa dutia tiri jire to pohñare.

²³ Cohamacure wacũ tuaa, Moisecãre tia sũ waro ñuo cjuaa tiri jire to pucũsuma, to masa bajuari baharo. Noarirocã to jichu ñua tirocãre ñuoa tiri jire. Ti yahpa macaina bui puhtoro ti pohñare to wajã dutirore yuhduarucanocaa tiri jire tina. Tirore cuiera tiri jire. ²⁴ Moise cjirore bucuoricoro Egipto yahpa macaina bui puhtoro macono jia tiri jire. Ā to bucuoricoro jiro Cohamacure wacũ tuaro “Ticoro macano”, tirore ti ni pisuchu cahmaera tiri jire Moise. ²⁵ Cohamacure yuhduarucariro jiro tirore bucuoricoro caharu mahaa numericã noano jiboa. Ā jiboriro jiparota tí yuhdoro tiro Cohamacu yaina mehne ñano yuhdu duaa tiri jire. ²⁶ Ā

ñano yuhduro Cristore ti bujapehto seheta ti bujaperiro jia tiri jire. Baharopu to noano yoari wapa Cohamacu tirore to noano yoah-tore masino ñano yuhdu duaa tiri jire Cristo to ñano yuhduhto seheta. Jipihina Egipto macaina ti noare ti cjuaro yuhdoro tiro Cohamacu sehere tuaro cahmaa tiri jire. Ñano yuhduparota, Cohamacure cahmaa tiri jire. ²⁷ Cohamacure wacũ tuaro, Egipto macaina bui puhtoro tiro mehne to suachu cuiera tiri jire Moise. Ā cuieraro ti yahpai jiriro tí yahpare cohã wahcãa waha tiri jire. Ā waharo Cohamacure bajuerarirore to ñuboriro seheta cuierariro jia tiri jire. Cohamacu tirore to yoa dutirire ne duhuera tiri jire Moise cjiro.

²⁸ Cohamacure wacũ tuaro Moise cjiro Israe masare Cohamacu to yuhduchu yoah-tore masia tiri jire. Ā masino Cohamacu to dutiriro seheta Israe masa ti sopacarire õa pjĩnine di mehne wajã site dutia tiri jire tiro. Ti ā yoachu ñuno anjo masare wajãriro ti masa wahmisumare wajãboriro Israe masa ti wahmisumare wajãera tiri jire. ²⁹ Cohamacure wacũ tuaa, Israe masa “Sohãri ma”, ti niri mapu co watoĩ jiri wah-sai co marieni wahsai waha waha tiri jire. Ti ā wahachu ñua Egipto macaina cãhu tinare ñu cũ, nunu ti wahcãmaa, mini yariaa waha tiri jire.

³⁰ Cohamacure wacũ tuaa Israe masa Jericó wama tiri maca macari sahrĩno tãa mehne ti yoari sahrĩno sã butiri sahrĩno baharo buñusehei soroa majarea tiri jire. Siete dachori waro tí macare soroa tinia tiri jire. Tõpe dachori ti soroa tiniri baharo tí sahrĩno sehte bora pihtia waha tiri jire. ³¹ Cohamacure wacũ tuaro tó pano mua mehne ñano yoarucuricoro cjiro Rahab wama tircororo, ti maca macaricoro Israe masare yoadohoa tiri jire. Tí macare ti cohãhto pano mahainacã Israe masa tõpu sãa ti duhti ñachu ticoro tinare yoadohoa tiri jire. To ā yoadohochu ñua Israe masa wajãera tiri jire tiorore. Tí maca macainare Cohamacure yuhduarucainare wajãpahta ticoro sehere wajãera tiri jire.

³² Painare Cohamacure wacũ tuainare yahu namoboa yuhu. Ā yahu duapaihta payure ā Cohamacure wacũ tuainare yahu joa pahño masieraca yuhu. Payu jira tina. Gedeõ, Baraca, Sansõ, Jeftõ, Davi, Samue, Cohamacu yare yahu muhtaina cãhu ahrina jipihina yu yahuborina jira. ³³ Cohamacure wacũ tuaina cãina paye yahparipũ jia, tí yahpari macainare cahma wajã yuhduarucaa tiri jire. Ā yoa paina noano dutiina jia tiri jire. Cohamacu tinare “Musare yoadohoihtja”, to niriro seheta tinare yoadohoa tiri jire. Tirore ti wacũ tuachu ñuno ā tinare yoadohoa tiri jire. Ā

wacū tuaa, yaya tinare ti chū duachū ti dūserire bihachū yoaa tiri jire tina. ³⁴ Tuaro jārī pichacapū jīpahta jēera tiri jire tina Cohamacare wacū tuaa. Paina tinare ti űosa wajā duachū duhti wahcāa wahaa tiri jire Cohamacare wacū tuaa. Tuairaina jīpahta Cohamacare wacū tuaa, tuaina wahaa tiri jire. Cohamacare wacū tuaina jia, cahma wajā tuaina jia tiri jire. Ā jia paye yahpari macaina surara tinare wajāa taina ne cāno pjaera tiri jire tinare. ³⁵ Cāa numia Cohamacare ti wacū tuachū űuno ti coyea ti yariachū űuno Cohamacū sehe tinare masobasaa tiri jire.

Paina “Cohamacare cahmaena tjiga”, ti ni peresu yoaina ti űabiario yoapeina Cohamacare wacū duhuera tiri jire. “Cohamacare mūsa wacū duhuchū mū sare wionahca”, nia tiri jimare tinare peresu yoaina Cohamacū yainare. Ti ā nipachūta tinare yūhtiera tiri jire Cohamacū cahapū tuaro waha duaa. Ā jia tinare űabiario ti yoapechū yariaa wahaa tiri jire. ³⁶ Painare Cohamacare wacū tuainare űano ni bējūpe tinare tjana mūjaa tiri jire. Ā yoa painare dahporire, yachūrire dahntenoca peresu yoaa tiri jire. ³⁷ Cohamacare wacū tuainare űaina tāa mehne doca wajāa tiri jire. Painare ti pjacūrire seroti mehne yihso ta mūjaa tiri jire. Painare űosaa pjīni mehne űosa wajāa tiri jire tina. Ti ā űano yoapeina oweja cahsari mehne, cabra cahsari mehne suhti tiina pjacūoina jia tiri jire. Ā jia paina tinare űano yoapea tiri jire. ³⁸ Tina Cohamacare wacū tuaina perī yū yahuina noa yūhdūaina ti jichū ahri yahpa macaina űaina tina mehne jiborina jierara. Ahrina Cohamacare wacū tuaina wūhūse marieina jia, masa marienopū, tūyucapū jī sitotaa tiri jire. Ā jī sitotaa, tūyucapū jia coparipū, yahpai jia coparipū cūhūre carī sitotaa tiri jire. ³⁹ Ahrina jīpihtina Cohamacare ti wacū tuachū űuno wahchea tiri jire tiro. Ti ā wacū tuapachūta Cohamacū tinare “Mū sare yūhdūchū yoaihtja”, to niriro mū sūerasinia tiri jire. ⁴⁰ To yūhdūchū yoerasinirire yahuro ō sehe ni tūhotua tiri jire Cohamacū. “Ahrina yū yainare baharopū jiina yū yaina mehne cāno potori yūhdūchū yoaihtja”, ni tūhotua tiri jire. Ā ni tūhoturo to niriro seheta yoarohca. To ā yoachū noa yūhdūara to pano yoariro yūhdoro.

12

Jesure ā wacūrucujihna mari

¹ Ā jina ahrina yū yahurinare payū Cohamacare wacū tuainare masina, jīpihtia űaa yoare duhunocajihna mari cūhū. Ō sehe jira mari piti dahre buhechū: Mūrocaperirore tirore mūroca tuachū

dojomehnea jira paye. To dahpo suhti mūcūa suhti tirore mūroca tuaerachū yoaboca. Tī yoaro seheta Cohamacū cahmaare mari yoa duachū dojomehnea cūhū jira. Ahri cūhūre duhujihna mari. Ā yoana mūrocapeina soro marieno ti mūrocaro seheta mari cūhū Cohamacū to cahmano seheta soro marieno yoajihna. ² Ā jina Jesure ā wacūrucujihna mari. Tirota jira marine wacū tua dūcachū yoariro. Ā yoa marine wacū tua namochū cūhūre yoara tiro. Crusapū yariario cāno pjari jire. Baharo to wahchehtore masino crusapū yariario jire. Ā yariario buo tiboriro jīparota buo tierari jire tiro. Ā yoaro mipure Cohamacū to puhtoro dujiro poto buhūsehei dujitiĵiāhno tiro dutiriro jira.

³ űaina masa tirore ti űabiario yoapachūta cāno pjari jire tiro. Tīre wacūga mūsa, mūsa cūhū űano yūhdūna, “Cāno pjaerari”, nina. Tīre wacūga mūsa “Tirore wacū tua duhuri”, nina. ⁴ Jesu to űano yūhdūariro sehe űaare yoaerapanahūta űabiario waro yūhdūerasinica mūsa. űaina mū sare wajāerasinica. ⁵ Ķ Cohamacū mū sare to pohmare to yahurire bonocajari mūsa? Mūsa űano yūhdūhtire to yahurire wacūga mūsa. Ō sehe nia tiri jire tiro: “Yū macū, mūhūre yū yahuchū yūhūre ā űūnocai tjiga űano yūhdūpaihta. Mūhūre yū tuhtichū tūhocū cahyai tjiga. ⁶ Jīpihtina yū cahūinare yahua. Ā yoa jīpihtina ‘Yū pohna jira mūsa’, yū ni űūinare yūhdūarūca dutieraja.

Ā jicū ti yūhdūarūcachū űūcū tinare buhiri dahreja”, nia tiri jire Cohamacū. ⁷ űano yūhdūna Cohamacū yare duhuena tjiga. Cohamacū mū sare to pohmare buhero nina. Tī mūcūsuma ti pohmare ā yahurucura. Ā yoa tinare buherucura. Tō seheta yoara Cohamacū cūhū marine to pohmare. ⁸ Cohamacū jīpihtina to pohmare ā yahurucura. Ā jina mū sare to yahuerachū to pohna waro jierara mūsa. Mūcūsuma marieina yoaro sehe jira mūsa to yahueraina. Ā jina “Sā Mūcū waro jira”, ni masierara mūsa Cohamacare, mū sare to yahuerachū. ⁹ Mari mūcūsuma marine ti yahuchū tūhona tinare űo payoja mari. Mari mūcūsumare mari űo payoriro yūhdoro űo payoro cahmana mari Mūcūre Cohamacare to yahuchū. Ā jina tirore yūhtiro cahmana marine. Ā yūhtina jina jīpihtia dachoripe tiro mehne jīnahca. ¹⁰ Mahaa nūmūricā ahri yahpai mari jīsinichū mari mūcūsuma marine yahua, buhiri dahrera. Ti mū sūro ti masino pūrocāta marine yahua, buhiri dahrera. Cohamacū sehe marine noano yahua. Ā jiro to masia mehne marine buhiri dahrera

marine noaina бұсқа дүтиро. Ǻта yoara tiro marine tiro yoaro sehe noaina mari jihto sehe. ¹¹ Marine to buhiri dahrechъ wahcheraja mari. Wiho mari cahyaja. Ǻ cahyapanahtha to Ǻ buhiri dahreri baharo noaina бұсқанаһса mari. Ǻ jina soro yoaro marieno noano jinahca.

Cohamacъ marine to dutiare mari yuhtierachъ cua nina marine

¹² Ǻ jina wacъ tuera cureina jipanahta Cohamacъre wacъ tuaina jiga. Tirore duhuena tjiga. ¹³ Noano potori mahare мұса wahaboro seheta noano potocǻ yoaga мұса. Мұса ǻ yoachъ нъ cъа, paina Jesu yaina soro jiare yoasi. Мұса noano yoachъ нъ cъа, noano wacъ tuera cureina cǻhъ wacъ tuaina wahaahca.

¹⁴ Jipihtina masa mehne noano jiga, cahmacheno marieno. Ǻ yoa нано yoarucuenta tjiga. Ǻna buhiri marieina dihta mari puhtoro Cristore нъаһса.

¹⁵ Noano yoaga мұса. Cohamacъ мұсаре to yoadohochъ tirore noano yuhtiga. Ǻna diaa ti toaare ti dojomehnenno seheta мұса cǻhъ Cristo yare duhuena tjiga, “Painare dojomehneri”, nina. ¹⁶ Ne numia mehne нано yoaina jiena tjiga. Ǻ yoa Cohamacъ yare cahmaeraina jiena tjiga. Cohamacъre cahmaerariro jia tiri jire Esaъ cjiro. Tiro masa wahmino jia tiri jimare. Ǻ jiro to pұcъro to yariari baharo to pұcъro yare cъahtiro jisinia tiri jimare. Cohamacъ to pұcъrore to ni cъiri cǻhure cъahtiro jisinia tiri jimare. Ǻ jiriro jiro cǻ dacho cǻ wapaihta chъare cahmano, ti wapa mehne to bahъro sehere to wahmino yoaro taro cohtotaa tiri jire. ¹⁷ To ǻ yoari baharo to dohse waharire masina мұса. To pұcъro tirore to wahire tuaro cahmaa tiri jimare Esaъ. To ǻ cahmapachъta to bahъrore to wahmino to yoari buhiri, baharo to cъaborire waera tiri jire to pұcъro Esaъre. Tіre yahco mehne to sinipachъta tirore waera tiri jire to pұcъro.

¹⁸ Cohamacъ to dutiare Moise cjirore to cъchъ mari coyea Israe masa cjiro Cohamacъ mehne jia tiri jire. Tina tiro mehne ti jiriro seheta мұса sehe jiare. Ǻ sehe yoaa tiri jire tina sehe. Tұcъpъ Cohamacъ mehne jia taa, суа tiri jire. Tъ sehe Sinai wama tidъ jira. Tұpъ ti sъchъ tuaro pichaca jъa tiri jire. Ǻ jiro nahitiano, buiri, tuaro wi-hnono cǻhъ jia tiri jire tъ tūcъi. ¹⁹ Tópъ ti sъchъ corneta bisiro coa taa tiri jire. Ǻ yoa durucua bisiro coa taa tiri jire. To ǻ durucua bisiro coa tachъ tūhoa, masa cǻno pjaeraa, “Ǻ durucu namoeno tjiјaro”, tuaro ni sinia tiri jire. ²⁰ Cohamacъ cuaro mehne ǻ sehe ni, dutia tiri jire tinare: “Jipihtina ahdъ tūcъre pihainare tǻa mehne doca wajǻga tinare. Ahdъre pihariro wahiquiro waro to

jipachъta tiro cǻhure tǻa mehne doca wajǻga tirore”. O носадъ mehne носа wajǻga tirore”, nia tiri jire Cohamacъ. To ǻ nichъ tūhoa to ǻ ni dutiare cǻno pjaera tiri jire tina. ²¹ Jipihtia tъ tūcъi jiro to нъrire нъ cъuro, ǻ sehe nia tiri jire Moise cjiro: “Cuicъ teterei nija”, nia tiri jire tiro.

²² Tó seheta Cohamacъ mehne ti ji dъcariro seheta jierara мұса sehe. Cohamacъ mehne jina wahana, Siǻ wama tidъpъ мұano macadъpъ мұса suboro seheta potota Cohamacъ mehne durucure мұса. Cohamacъ catiriro to ya macapъ мұса suboro seheta potota tiro mehne durucure мұса. Tі maca pa maca wahma maca Jerusalē мұano macari maca jira. Tópъre payъ anjao peri jira. ²³ Tina Cohamacъ mehne wahchea taa cahmachuina jira. Ǻ jina мұса sehe to ya maca macaina jina, tópъ Cohamacъ pohna ji mұhtaina mehne мұса cahmachuboriro seheta jira. Tina to pohna wamare to joa ǻri pұi мұanopъ ti wamare to joa ǻina jira. Tiro Cohamacъ sehe jipihtinare besehtiro jira. Tiro mehne macaina jira мұса sehe. Ǻ jina paina noaina Cohamacъ yaina mehne cahmachuina seheta jira мұса cǻhъ. Tinareta нъа marieina jichъ yoa tuhsъri jire Cohamacъ. ²⁴ Ǻ jina Jesu mehne macaina jira мұса sehe. Wahmanopъ Moise cjirore to duti cъiri cjirire cohtotaro “Mұsare yuhdъchъ yoaihtja yuһъ”, ni cъa tiri jire Cohamacъ marine. To ǻ ni cъiriro seheta yoariro jira Jesu. To dire cohǻ to yariaro mehne ǻ marine yuhdъchъ yoara. Abe cjiro to di cohǻchъ нъno Cohamacъ Abere wajǻriroro buhiri dahrea tiri jire. Jesu sehe to dire cohǻ to yariariro mehne noano yuhdъja mari. Ǻ jiro Abe to di cohǻri wiho warota jia tiri jire. Cristo sehe to di cohǻri baharo noa yuhdъaro yoari jire Cohamacъ marine. Ǻ jia to di cohǻri wiho warota jierara.

²⁵ Ǻ jina noano yoaga мұса. Cohamacъ yare мұсаре yahurirore noano yuhtiina jiga. Panopъ ahri yahpai jiriro Moise cjiro Cohamacъ yare to yahuchъ tūhoa, payъ tіre tuho duaera tiri jire. Ǻ ti tūhoerari buhirire buhiri dahrea tiri jire Cohamacъ tinare. Cristo sehe мұanopъ jiriro Cohamacъ yare yahuriro jira. Ǻ jiro panopъ macainare to buhiri dahreri yuhdoro buhiri dahrerohca Cohamacъ Cristore cahmaerainare. Cristo sehe мұanopъ jiriro Cohamacъ yare yahuriro jira. ²⁶ Tі pјare Moise cjirore to dutiare to cъiri pјare Cohamacъ to durucuro mehne yahpa нұhmichъ yoaa tiri jire. Mipъ sehere ǻ sehe ni yahuri jire tiro: “Ahri yahpa to нұhmichъ cǻ taha yoa namoihtja. Ahri yahpa dihtare нұhmichъ yoasi yuһъ. Мұanopъ cǻhure нұhmichъ yoai-

htja”, ni yahuri jire tiro. ²⁷ “Ahri yahpa to ñuhmichu cá taha yoa namoihtja”, nino jipihtiare to bajuamehnerire to cohãhtore masichu yoaro niri jire. Pãhtoro Cohamacu to suho jiropure cohãhto basioerara. Á jiro to bajuamehneri cjiire to cohãchu puhtoro to suho jiro dihta tjuarohca. ²⁸ Puhtoro to suho jiropu wahanahca mari. Á jina puhtoro to suho jiropure to cohãerachu ñuana, Cohamacure “Noana”, nijihna mari. Á jina tirore ño payoa mehne, cua pisaro mehne to yare yoajihna mari tirore wahchechu yoana tana. ²⁹ Pichaca jãno to cuaro to jiro seheta Cohamacu cuaro choro buhiri dahreriro jira.

13

Õ sehe Cohamacure wahchechu yoaga

¹ MUSA mehne macainare cahí duhuena tjiga. ² MASA MUSA masieraina ti jipachuta tinare MUSA wuhusepu noano mehne sãa ta dutiga. Paina á yoaa, masierapahta anjoare ti wuhusepu sãa ta dutiri jire. Á jina ti yoaro seheta yoaga MUSA cáhu.

³ Peresui jiiinare pja ñuga. MUSA sehe tina mehne peresui jiiina MUSA jiboro seheta tinare pja ñuga. Paina ti ñano yoaina cáhure pja ñuga. Tina yoaro sehe MUSA cáhu MUSA ñano yuhduboro seheta tinare pja ñuga.

⁴ Wamomaca duhteina jipihtina MUSA basi noano cahma ño payoga. Á yoa paina mehne ñano yoarena tjiga. Jipihtina numia mehne ñano yoinare, MUSA mehne ñano yoaa numia cáhure buhiri dahrerohca Cohamacu.

⁵ Niñerure cahina ne jiena tjiga. Õ sehe nia tiri jire Cohamacu: “MUSARE ne cohãsi. Á yoadohorucuihtja musare”, nia tiri jire tiro. Noho puro MUSA CJUAA mehne tó purota wahchega. Pjiro cahma namoena tjiga. ⁶ Á jina cuiro marieno õ sehe ni tuhutunahca mari:

“Mari puhtoro Cohamacu marine yoadohoriro jira.

Ne cuiisi mari.

Masa marine ti ñano yoahatore cuiisi mari”, ni tuhutunahca mari.

⁷ Cohamacu yare musare yahurinare musare dutirinare wacuga MUSA. Á yoa noano ti jia tirire noano ti yoaa tirire wacuga. Á wacuna, Cristore ti wacú tuariro seheta yoaga MUSA cáhu.

⁸ Jesucristo ne cohtotaerara. Панорп, mipu cáhure, baharopu cáhure to jiriro seheta jirucurohca tiro. ⁹ Payu buheare soro jia buheare tuhoena tjiga MUSA “Noa buheare sãpu cohãri”, nina. “Ahrire chuga. Ahrire chæna tjiga”, ni buhera cáina. Á ni ti nia buheare mari yuhtichu ti marine yoadoherara. Á jiro tó sehe jia buheare mari

yoachu wiho warota jira. Tí marine wacú tuaina jichu yoerara. Cohamacu sehe marine pja ñano wacú tuaina jichu yoara. Á jina to ya tuaa mehne tirore wacú tuaina jiga MUSA cáhu.

¹⁰ Cristo mari ñaa buhirire yariari jire mari ñaare cohãno taro. Sacerdotea sehe õ sehe niina jira: “Wahiquina mari wajã jũ mœoina, mari waina mehne yuhdunahca”, niina jira sacerdotea. Á niina ti ñaa yoari buhirire cohãina ne ji masierara. Cristo to crusai to yariaro mehne yuhduna ji masierara tina á ni tuhutuina. ¹¹ Mari judio masa mari sacerdotea puhtoro Cohamacu to jiri tahtia waropu dire na sãano wajã sitea tiri jire, masa ti ñaa yoari buhirire cosawero taro. Á yoa to wajãriro wahiquiro to pjacure ti maca duhtu cahapu jũ cohãnocahna. ¹² To yoariro seheta Jesu cáhu maca duhtu cahapu yariari jire, masa ti ñaa buhirire to di cohãno mehne cosawero taro. ¹³ Maca duhtu cahapu to yariachu ñua, ti ya buheare to cohãchu ñua judio masa puhtoa tirore ñu tuhtiri jire. Á jina mari cáhu tiro mehne macaina jijihna. Mari á jichu ñua, masa mari cáhure ñu tuhtiahca. ¹⁴ Ahri yahpapu mari ji dojahti maca ne mariahna. Á jina mipure mari baharopu jilhti macare cohtana nija mari. ¹⁵ Á jina Jesu to yoadohoro mehne Cohamacu mehne durucuja mari. Á jina tirore noano sinijihna. Sacerdote wahiquirore jũ mœo, Cohamacure to ño payoriro seheta Cohamacure mari duseri mehne noano durucu ño payojihna mari. “Cohamacu tuariro jira”, ni ño payorucujihna. Mari á nichu tiro wahcherohca. ¹⁶ MUSA mehne macainare noano yoaga. Á yoa tinare yoadohoga. Tíre boena tjiga. MUSA á noano yoana Cohamacure ño payona nica MUSA. Á yoana tirore wahchechu yoana nica.

¹⁷ MUSA puhtoare noano yuhtiga. Ti dutiro seheta yoaga. Cohamacu musare ñu wihbo, buhe dutiro cure tinare. To á cürina jia musare á ñu wihborucua nina “Cohamacure yuhdunucari”, nia. Á jina tinare noano yuhtiga MUSA. MUSA á yuhtichu ñua wahchea mehne musare yoadohoahca tina. MUSA yuhtierachu ñua tina cahyaahca. Á yuhtierana noano jisi MUSA.

¹⁸ Sãre sini payorucuga Cohamacure. Dacheripe noaa dihtare yoa duaja sã. Á jina “Ñaaare yoana nija”, ni tuhutueraja sã. ¹⁹ Ahri pinihtare tuaro sini payoga Cohamacure yuhure: Soaro mehne MUSA cahapu yu wahahtore tirore sini payoga.

Ahri pũre joariro noa duti batoaha

²⁰ Cohamacu mari puhtoro Jesure yariarore masori jire. Marine noano jichu

yoariro jira. Tiro “M̄sare ȳhd̄ach̄u yoaihtja”, ni c̄ua tiri jire Cohamac̄u marine. To ā ni c̄ūrire yoariro marine ȳhd̄ach̄u yoariro Jesu sehe jira. Mari ñaa buhirire yariari jire tiro. Ā jiro tiro tuariro ovejare ñu wihboriro yoaro sehe jiro, marine to yainare noano ñu wihbora. ²¹ Ā jiro Cohamac̄u tirore masoriro m̄sa c̄ūhare yoadohojaro jiphtia noaare to cahmaare m̄sa yoahto sehe. Ā jiro Jesucristo to yoadohoro mehne Cohamac̄u to cahmano seheta jipihtinare marine noaa sehere cohtotach̄u yoajaro. Jiphtia dachoripe Cristore ño payojihna. Āta yoajihna.

²² Ȳu coyea, ahrire tuaro m̄sare dutihtja: Ahri p̄ūi ȳu yahurire noano mehne t̄ahoga m̄sa. Ahri m̄sare ȳu joarocari p̄ū p̄jiri tju jierara. Ā jina ahrire noano t̄ahoga. ²³ Ahri c̄ūhare m̄sare yahuihtja: Mari coyero Timoteore peresu jirirore wioyuhti. Soaro mehne to wihich̄u m̄sare ñui wahac̄u tirore naaihtja. Ȳuh̄u mehne waharohca.

²⁴ M̄sa puhtoare, jiphtina painare Cohamac̄u yainare t̄oi j̄inare noa dutija. Italia macaina Jesu yaina c̄ūh̄u m̄sare noa dutira.

²⁵ Cohamac̄u to cah̄ia mehne m̄sare jiphtinare noano yoajaro.

Santiago

Santiago Israe masare macari waharinare joarocaha

¹ Yuh, Santiago ahri pui musare noa duti joarocai nija. Cohamacare, mari puhtoro Jesucristo cahure dahra cohtariro tjija yuh. Ajicu Israe masa ya curuari macainare doce curuari macainare Jesu yainare macari waharinare yu coyea musare joarocai nija.

Cohamacu sehe noano masichu yoara

² Yu coyea, payu jiahca musa niano yuhduhti. A niano yuhduna noano wahchea mehne tuhutuga. ³ A niano yuhduna, potocata Jesure musa wacu tuaare nona ninahca musa. A jina niano yuhdupanahta Jesure musa noano wacu tuaina jina, tirore wacu tua namoina wahanahca. A wahana musa niano yuhduare cano pjanahca. ⁴ A yoana duhuro marieno a cano pjarucuina jiga musa, tuho masiina, Cohamacu cahmaare noano masiina musa jihto sehe. A jina duhsaro marieno to yare yoarucuina jinahca musa.

⁵ Cohamacu duhsaro marieno jipihtinare wara. A waro tirore siniinare soro nino marieno wara tiro. To a jiriro jichu masina, musa masihti duhsachu tuhutuna, tirore siniga. Musa a sinichu musare masi namochu yoarohca tiro. ⁶ A sinina Cohamacare noano wacu tuatjiahnna siniga musa. "Sa sinichu Cohamacu waeraboca sare", ni tuhoutuena tjiga. To sehe ni tuhoutuina pjiri ma macaa pahcõri yoare sehe jira. Pahcõri ti suroca cohtotaro seheta tina cahu ti wacupure suroca cohtotara. Cano potori yoerara tina. A jia Cohamacare wacu tuaerara. ⁷ To sehe ni tuhoutuinare ti sinipachuta ne mahanocã ti siniare tinare wasi mari puhtoro Cohamacu. ⁸ Michare ahrire cahmariro jiparota namichacapure soro tuhutura tjoa. A yoaritore to wahaerara.

⁹ Jesu yainare wiho jinare Cohamacu sehe puhtoã sõnohca. To a yoachtina jia wahchejaro tina. ¹⁰ A jia Jesu yaina pache puã jia ti ya pache pihthitõre masia wahchejaro. Ti pache wiho warota jira, Cohamacu to ñuchu. Cohori ti doi baa boraã waharo seheta ti pache pihthia wahaahca. A jia tina cahu wahchejaro. ¹¹ Sa mija taro to tuaro sichu tja sehe ñaia wahara. A yoã cohori cahu ñai boraã waha, noã cohori ti jia cjiri pihthia wahara. Ata waharohca pache puare ti pachere ti na cahmachuno watõi. Tina ti pache mehneta butia wahaahca.

Ñano yoa dutiare yoerariro wahcheriro jira

¹² Nãno yuhduro cano pjaro, nãno yoa dutiare yoeraro wahcheriro jirohca. To a cano pjachu, to ñaare yoerachu jipihtia dachoripe muano macaa catiare tirore warohca Cohamacu. "Ti catiare waihca", ni cãa tiri jire Cohamacu jipihtina tirore cahĩnare. ¹³ Musare ti nãno yoa dutichu "Cohamacu yuhure ñano yoa dutiro nina", ni tuhoutuena tjiga. Nãno yoare tuhotuerojaro jira Cohamacu. A jiro tiro sehe masare ñano yoa dutiriro jierara. ¹⁴ Masa tuaro ñaare ti goã pjaata tita tinare ñano yoachu yoara. ¹⁵ A jia ñaare goã pjara masa. A goã pjaã, ti sehere tuhutura. A tuhutua, ti ñaare yoarucura tina. Ti a yoarucuri buhiri Cohamacu tinare pichacaru cohãnohca.

¹⁶ A jina yu coyea yu cahĩna, "Cohamacu yuhure to dutichu ñano yoahi", ni tuhoutuena tjiga. Potocã jierara ti. ¹⁷ Cohamacu muano macariro marine noã dihtare wara. Tiro pinihta sã dacho macarirõre, ñami macarirõre, ñahpichõha poca cahure bajuamehneriro jiro, tiro sehe to jiriro seheta a jirucunocahna. Ne cohtotaerara. ¹⁸ To cahmariro seheta tiro noã buhea mehne marine to pohna wahachu yoare. A yoare tiro to pohna ji mhtaina mari jihto sehe.

Potocãta Cohamacure ño payoa õ sehe jira

¹⁹ Yu cahĩna, yu coyea ahrire noano tuhoga musa. Cohamacu yare noano tuhoga musa. A tuhõna, noano tuhuturo marieno durucuenta tjiga. A yoa suaena tjiga. ²⁰ Cãiro suariro jiro, Cohamacu to cahmano seheta quihõno yoariro jierara. ²¹ A jina jipihtia musa ñaa yoarire, musa ñaare goã pjãrire duhuga musa. A jina Cohamacare noano yuhtiina jina to buheare tuaro cahmaga musa. To ya buheare musa tuaro cahmachu Cohamacu sehe musare pichacaru waha-borinare yuhduchu yoarohca.

²² To yare tuhõpanahta to nino sehe yoerana mahõare tuhutuna nica musa. "To nino sehe yu yoerachu noanõhca", ni tuhutuna mahõare tuhutuna nica musa. A jina to yare tuhõna ti sehere yoaga. ²³ Cohamacu yare tuhõpanahta, to nino sehe yoerana, to wuhduare ñõno mehne ñariro yoare seheta jira musa. ²⁴ Tiro to wuhduare to ñuri baharo waha, to ñarire boa wahara. ²⁵ Pãiro sehe to ñarire to boerario seheta Cristo to dutirire tuhõro tire yoaro, wahcheriro jirohca. Ti dutia Cristo to cahia mehne masare to yuhduchu yohti buhea jira. Ti buheare ne cohãerario wahcheriro jirohca. Tiro pinihta to tuhõrõre yoariro jira. A yoarirõre noano yoarohca Cohamacu.

²⁶ Căiro to ă durucumacancarire duhu masieraro, potocăta Cohamacure ăno payoerara. “Cohamacure noano ăno payoja”, ni tăhoturiro jiparota mahăoare tăhotura tiro. “Cohamacure ăno payoja”, niriro to jipachăta to ăno payoa ne yaba cjihti jierara. ²⁷ Potocăta Cohamacure mari Păcare mari ăno payona, to cahmano seheta ăno payona, ă sehe yoaja mari: Păcasuma marieinare, wapewahya numia căhure ăno ti yăhdăchă ăna, tinare yoadojoja mari. Ă jina ahri yahpa macaina ănaare ti yoaa barore ne yoa dueraja mari. Ă yoana potocăta Cohamacure ăno payoina jija mari.

2

Masare căno potori noano yoaro cahmana marine

¹ Yă coyea, noa yăhdăarirore Jesucristore mari păhtoro tăhona, tirore wacū tuaina jira măsă. Ă wacū tuaina jina masare căno potori noano yoaro cahmana măsare. ²⁻³ Ă yoa uru sororire, wamomaca săa sororire căariro, wapa tia suhtire săariro măsă Jesu yaina cahmachuno cahăpă to tachă ăna tirore noano mehne piti bocaboca. “Ōi dujiro jira”, niboca măsă tirore. Ă nipanahta tı pjata pjăcoriro căhă ăno suhti tirore măsă cahai to tachă ăna tiro sehere noano piti bocaeraboca. “Ōi ducuga. O yahpai dujiga”, niboca măsă tirore. ⁴ Măsă ă yoana masare căno potori yoerana nica măsă. Ă yoana ănaare tăhotuina masare beseina yoaro sehe jina nica măsă. “Ahriro sehe noariro jira. Ahriro ăariro jira”, ni besemana măsă.

⁵ Yă coyea, yă căhăna, yăhure tăhoga. Payă pjăcăoina sehere Cohamacure noano wacū tuahina cjihtire, păhtoro to săho jiropăre jihtina cjihtire besea tiri jire Cohamacă. “Tăpăre wahanahca măsă”, ni căa tiri jire Cohamacă tirore căhăinare. ⁶ Tinare to ă besepachăta măsă sehe pjăcăoinare noano yoerare. Pache păa sehe măsare ăno yoara. Ă yoaa tina masare beseriro cahăpă măsare naahna măsare yahusăa taa. ⁷ Măsă sehe “Cristo yaina”, masa ti niina jira. Payă pache păa sehe Cristore ăno ni durucuina jira. (Ă jiro pjăcăoinare măsă ăno payoriro yăhdoro pache păare măsă ăno payochă sehere ăna nina.)

⁸ Cohamacă dutia mehne macaa dutiare paye dutia bui curero jia dutiare ă sehe ni joaa tiri jire: “Mă basi mă căhăno seheta mă cahai jina căhure căhăga”, nina Cohamacă dutia. Ahri dutiare yoana, noare yoara măsă. ⁹ Wiho mejeta masare căno potori yoerana ăno yoana nina măsă. Ă jina Cohamacă dutiare yăhdăcaina jira măsă. Ăta nina Cohamacă yare ti joari păi. ¹⁰ Cohamacă dutiare yoaina

jipanahta cănotare măsă yoerachă paye dutiare măsă yoa păhăpachăta yaba cjihti jierara. ăna buhiri tina jisnina măsă. ¹¹ “Păiro namono mehne ăno yoaena tjiga” ni, măsare dutiriro Cohamacăta jira. “Masare wăjăna tjiga”, niriro tirota jira Cohamacă. Păiro namono mehne ăno yoerapanahta masănore wăjăna Cohamacă to dutiare yăhdăcaina jira măsă. ¹² Cristo marine tuaro căhăno, marine dutira marine yăhdăchă yoaro taro. To dutiare mari yoarire, mari yoerari căhure ăno marine besero tarohca. To ă besehtina jina to dutiare noano yoajihna. Ă yoa to cahmano seheta durucujihna mari. ¹³ Măpăre painare mari pja ănerachă Cohamacă sehe masare to beseri pja jichă marine pja ănsi. Wiho mejeta painare mari pja ănerachă Cohamacă sehe pja ăno, marine buhiri dahresi.

Cristore wacū tuaina sehe noare yoara

¹⁴ Yă coyea tăhoga măsă. “Cristore wacū tuaja yăhă”, căiro to nipachăta painare to noano yoadoherachă to ă nimari cjiro sehe ne yaba cjihti jierara. Tă sehe ni wacū tuamacanocarirore Cohamacă yăhdăchă yoasi. ¹⁵⁻¹⁶ ă Jesu yairo, Jesu yacoro ăna suhti dihta ti căachă ăna ti chăhti mariachă ăna dohse yoajari măsă tinare paye baro căaina jina? “Noano jiga măsă. Ă yoana noano suhti tiga. Ă jina noano chăa mehne yapi wahcăga”, nipanahta ti cahmaare măsă waerachă măsă ă nimari cjiro ne yaba cjihti jierara. ¹⁷ Ă yoa “Cristore wacū tuaja”, măsă nipachăta noare măsă yoerachă Cristore măsă wacū tuaa ne yaba cjihti jierara.

¹⁸ Măsă mehne macariro ahri yă buherire tăho dueraro ă sehe masjaro. Noare yoeraparota “Cristore wacū tuaja”, niboca tiro. Noare yoeraro Cristore to wacū tuare painare masichă yoa masierara. Noare yoariro pinihta noare to yoaa mehne Cristore to wacū tuare masichă yoa masina. ¹⁹ “Cohamacă căirota jira”, ni tăhotura măsă. Măsă ă ni tăhotuchă noa nina. Ă jipachăta ăno purota Cohamacăre yăhtiuro marieno tirore măsă masichă tı yaba cjihti jierara. Wată căhă măsă tăhoturo seheta tăhotura. Ă yoa Cohamacă to jia tiare masina tina. Ă masia, cuia, teterera. ²⁰ Căiro noano yoeraparota “Cristore wacū tuaja”, ni tăhoturiro jiro tăho masierariro jira. Cristore wacū tuamariro painare noano yoeraro potocăta Cristore wacū tuerara. ă sehe ni yahuihtja măsare ahrire: ²¹ Abrahă mari ănerachă cjiro to macăno Isaa wama tirore cjirore wăjăbasaa tiri jimare Cohamacăre. Ă yoaro tirore tăa mehne ti yoari tuhu bui duhu payoa tiri jimare. Ă duhu payoro Cohamacă to

duritiro seheta to macanore wajāno taro nia tiri jimare Cohamacure ño payoro taro. To ā yoachū ñuno potocāta Cohamacure to wacū tuarire masia tiri jire Cohamacu. To ā wacū tuariro to jichū masino, “Potocāta noariro jira”, ni ñua tiri jire Cohamacu tirore. ²² To ā ni ñuchū ahrire masina musa: Abrahā Cohamacure wacū tuaro tirore yahtia tiri jire. Ā yahtiro Cohamacure to wacū tuarire masichū yoaro nia tiri jire. ²³ Ā jiro Cohamacu yare ti joari pūi to niriro seheta ā wahaa tiri jire: “Abrahā Cohamacure wacū tuaa tiri jire. To ā yoachū ñuno ‘Noariro jira tiro’, ni ñua tiri jire Cohamacu tirore”, ni joaa tiri jire Cohamacu yare ti joari pūi. To ā ni ñuchū masia “Abrahā Cohamacu mehne macariro jira”, nina masa tirore.

²⁴ Ā jina ahri yu yahuhtire masina musa: “Cohamacure wacū tuaja” niriro, to noano yoerachū ñuno Cohamacu sehe tirore “Noariro jira”, ni ñuerara. Cohamacure wacū tuariro sehere potocāta to noano yoachū ñuno “Noariro jira”, ni ñuna Cohamacu tiro sehere. ²⁵ Āta ni ñua tiri jire Cohamacu Rahab wama tiricorore mua mehne ñano yoaruricororo cjirore. Josué cjiro to warocarinare noano piti boca “Noano sāa tahga”, nia tiri jire ticoro. Ā yoaro tina ti tjuaa duachū ticoro sehe pa maha sehere ñoa tiri jire tinare “Tinare ñu tuhtiina wajāri”, nino. To ā yoachū ñuno “Noaricoro jira”, ni ñua tiri jire Cohamacu ticorore. ²⁶ Ā tjira. Mari pjacupure catia mariachū ji masieraja mari. Ā jiro catia marieno mari pjacu yaba cjihti jierara. Tó seheta “Cohamacure wacū tuaja”, nipanahta painare mari noano yoerachū potocā jierara mari wacū tuaa. Ā jiro mari noano yoaa mariachū mari wacū tuaa yaba cjihti jierara, catia marieni pjacu to yaba cjihti jieraro seheta.

3

Mari duseroi wijaare yahuha

¹ Cohamacu yare masare buheina to yare ti noano yoerachū ñuno tina pinihtare masare buheraina yuhdoro Cohamacu buhiri dahrerohca. Tíre masina musa, yu coyea. Ā jina musa mehne macaina masare buheina payu jiena tjiga. ² Jipihtina payu tahari mari ñaare yoaja. Cāiro ñaare durucuerariro Cohamacu cahmaare noano yoariro jira tiro. Ā jiro paye ñaa cūhure yoerara. ³ Ā sehe jira ahri mari piti dahre buhechū: Cawalo to duseroi comaa pji to ñahmanore ña dihohti pjine mari cūja, tirore mari majareručachū yoana tana. Ā yoana tí pji comaa pji mehne tirore to wahahtoi mari waja majareruča dapoja. Tí pjica mahari pjica to jipachuta tí pji mehne tirore

wahachū yoaja mari. (Ā seheta mari dusero mahanocā to jipachuta tí dusero mehne pjíro ñano yoaja mari.) ⁴ Dohoria quitu mehne piti dahre yahu namoihtja musare: Busoca pjiria to jipachuta tiare wihnono to tuaro wārocachuta oturiro sehe mahari pjica mehne tia nohoi to waha duaroi oturocara. ⁵ Tó seheta jira mari duseroi wijaa. Mari dusero mahanocā to jipachuta tí dusero mehne pjíro yoaja mari. Mahari pichacacā pjíro to jū wahcāno seheta mari dusero mehne pjíro ñaare yoa masija. ⁶ Ā jiro mari dusero pichaca yoaro sehe jira. Mari duseroi wijaa jipihtia ñaare yoachū yoara marine. Pichaca to jū dūcaro seheta mari duseroi wijaa mehne mari noano jiborirore ñabiaro yoaja mari. Ñaare durucuna watino to dutiro seheta mari yoana nija. ⁷ Jipihtinare nūcu macainare wahiquinare, minichahcare, chihchō wahcāinare, wahire mari masa sitichū yoa masija. Mari payu tina barore masa sitichū yoa tuhsaja. Ā jia tina noano tuho masina. ⁸ Tinare mari yahtichū yoapachuta mari dusero sehe ñaare durucuro ne tjuaeraputiara. Ā jiro nuina ti niji siariro seheta mari dusero sehe ne niji siaeraputiara. Mari duseroi wijaa ñabiaa jira. Ā jiro ñima painare to wajāno seheta marine paina cūhure ñabiaro wahachū yoara mari duseroi wijaa. ⁹ Mari dusero mehne Cohamacu mari puhtoro mehne mari noano durucuja. Ā durucupanahta masa Cohamacu yoaro sehe jinare to bajuamehnerina ti jipachuta tinare ñabiaro ni durucuja mari. ¹⁰ Cū duseroihta noaa durucua cūhū, ñaa durucua cūhū wijara. Yu coyea, ā ni durucueraro cahmana. ¹¹ Máca pohtai mū wiori copai noaa co. ñaa co cūhū ne wijaerara. ¹² Yu coyea, higuera cū olivo pocare dicha tierara. Tuhsu, secu higuera pocare dicha tierara. Ā yoa máca pohtai mū wiori copai moa tia co to wijaachū moa mariea co wijaerara. (Tó seheta mari duseroi noaa durucua, ñaa durucua mehne wijaachū yoeraro cahmana. Ā ni durucuaeraro cahmana.)

Noano masia waro ā sehe jira

¹³ Cāina musa mehne macaina noano masiina jira. Noano masiina musa jia tiare ā sehe yoa ñonahca musa. “Paina yuhdoro noano masija sā”, niena tjiga. Ā nienata noaare yoaga musa. Ā noaare yoana potocāta noano masiina jira musa. ¹⁴ Wiho mejeta pairō paye barore to cūachū ñuna tíre tuaro cahmaina jina, paina mehne suarucuina jina, painare yuhdūruca duaina jina, “Noano masiina jija sā”, niena tjiga musa. Musā ā niina jina mahñoina jira musa. ¹⁵ Ā yoaina ti tuhotua ne Cohamacu ya tuhotua jierara. Ti tuhotua Co-

hamacure yuhdarucaina ti ñano tuhota jira. Ti tuhota sehe watino ya jira. ¹⁶ Masa ti cjuare tuaro cahmaina, painare yuhdaruca duaina ã cahma sayorucura. Æ yoaina jia jipihita ñaare yoarucura. ¹⁷ Paina sehe Cohamacu yare noano masiina sehe tina pinihta ã yoamacanocaa nierara. Æ yoa tina ne cahma sayoerara. Æ jia masa noaina, painare noano yuhtiina, pja ñuina, masare yoadohoina, masare cano potori yoaina jira tina. Tire yoaa, mahñono marieno yoara tina. ¹⁸ Æ yoana cahmachea marieno jina, painare “Cahmachena tjiga”, mari ni yahuna, noaina wahachu yoana nija mari masare.

4

Ahri yahpa macaa ñaare cahmana, Cohamacure cahmaeraina jira musa

¹ ¿Dohse jiro baro musa cahma sayojari? ¿Æ jina dohse jiro baro cahmachejari musa? Ñaare goa pjana, cahmache duara musa. Noaare yoa duapanahita ñaare yoara musa. ² Paye barore musa cahmana. Æ cahmana masare wajãna musa ti yare nana tana. Pairo paye barore to cjuachu ñuna tire musa tuaro cahmana. Æ cahmapanahita tire na masierara musa. Æ yoa tire cahma sayorucura musa. Cohamacure sinierana, musa cahmaare ne bocaerara. ³ Æ yoa sinina, musa ya cjihti dihtare sinimana musa, musa cahmano seheta yoarucuna tana. Paina ya cjihti sehere sini payoerara musa. Æ jiro musa sinichu Cohamacu musa siniare waerara. ⁴ Cohamacure cohãina jira musa. Ahri yahpa macaa ñaare cahmana, Cohamacure cahmaeraina jira musa. Ahri yahpa macaa ñaare cahmaina Cohamacure cahmaeraina ji tuhsura. ¿Tire masierajari musa? ⁵ Õ sehe nia tiri jire Cohamacu yare ti joari pui: “Cohamacu Espiritu Santore mari mehne jihtirore cùhre. Æ jiro Espiritu Santo sehe marine cahño, ñaare mari tuaro cahmapachuta cahmasãerara tiro. To manño to namonore to cahí doaro seheta marine tuaro cahña Espiritu Santo”, ni joaa tiri jire panopure. To ã ni joari wiho warota jierara. Potocãta jirota nina. ⁶ Æ yoa Cohamacu marine noano yoadohora tire mari noano yuhtihto cjihtore. Õ sehe nina Cohamacu yare ti joari pui: “Yuhu pinihta painare masi yuhdarucaja’ nirirore, Cohamacu ñu tuhtira. Pairo sehere ‘Ñariro, wiho jiriro jija’, niriro sehere Cohamacu yoadohora”, nina to yare ti joari pui. ⁷ Æ jina Cohamacure noano yuhtiina jiga musa. Æ yoa watinore yuhtiena tjiga. Musa ã yuhtierachu ñuno tiro sehe musare duhti wahcã murocaa waharohca. ⁸ Cohamacure noano yuhtiga musa.

Musa ã yoachu tiro sehe musare yoadohorohca. Ñaina jira musa. Æ jina ñaare yoa namoena tjiga. Ñaa cùhre cahmana, noaa cùhre cahmaina jira musa. Æ jina musa ñaa tuhutumarire cohtotaga. Musa ã yoachu ñuno Cohamacu musa ñaa yoari buhirire cohãnohca. ⁹ Musa ñaa yoarire tuaro cahyana, bujua witiga. Æ yoana musa ñaare yoari buhirire tiiga. Tire wahcheina jiena tjiga. Æ jina musa ñaa yoarire ñano yajeripohna tiga. ¹⁰ “Ñariro, wiho jiriro jija yuhu”, nina Cohamacure ño payoga. Musa ã yoachu ñuno tiro sehe ño payoga mehne noano yoarohca musare.

Ti coyeare Jesu yainare ti basi ñano quitidahre dutieraha

¹¹ Yu coyea Jesu yaina jina, musa basi ñano quitidahrena tjiga. Musa coyero ñano quitidahrena, tire buhiri dahre duti duaina jina nica musa. Cristo ya dutia sehe masare buhiri dahrehti dutia ji tuhsura. Æ jina masare ñano quitidahrena Cristo ya dutiare õ sehe nina nica musa: “Marine noano dutierara Cristo ya. Æ jina mari mu suro buhiri dahre dutijihna”, nina nica musa masare ñano quitidahrena. Æ nina Cristo ya dutiare ñano ni durucuina tjuara musa. Æ jina ti dutiare yoaeraina tjuara. ¹² Masare dutiare wariro, masare beseriro Cohamacuta jira. Masare pichacaru waha borinare tirota yuhduchu yoa masina. Æ yoa tirota masare pichacaru cohã masina. Æ jina mari sehe masare “Ñaina jira”, ni masieraja. Cohamacu dihta mari coyeare besehtiro jira.

Ñamichacure dohse mari jihtore masieraja mari

¹³ Mipure yuhure tuhoga musa. Õ sehe niina tuhoga yuhure: “Michare, ñamichacare pa macaru jina wahanahca. Tôpurre cù cahma jina, paye baro dua, nuchãnahca. Æ yoana wapatanahca mari”, nina cãina musa mehne macaina Cohamacure wacũno marieno. Æ niina jina, yuhu sehertuhoga musa. Tô sehe niinare ahrire yahui tai nija: ¹⁴ Ñamichacaru dohse musa jihtore masierara musa. Me ti ji, dói pihti muanoseheta jira mari jia tia. Me mahanocã jiro, pihtia wahara. Tô seheta mari cãhu mahanocã jina, varianahca. ¹⁵ Æ jina õ seheta ni tuhuro cahmana musare: “Cohamacu to cahmachu jinahca mari. Æ jina õ sehe yoanahca mari”, ni tuhuro cahmana musare. ¹⁶ Æ jipanahta mipure “Mari mu suro õ sehe yoanahca”, nirucumana musa Cohamacure wacũno marieno. Tô sehe nirucuna painare yuhdarucaina jina, ñaare yoara musa. ¹⁷ Æ jina noaare mari yoahtere

masipanahta tíre yoaerana ñaare yoana nija mari.

5

Pache p̄are yahuha Santiago

¹ Pache p̄a m̄sa m̄pire t̄hoga yuh̄ere. Baharop̄ure m̄sa ñano yuh̄d̄nahca. Á jina tii sañurucuga m̄sa. ² M̄sa pache ba pihtia wahaahca. Á yoa m̄sa suhtire cas̄ipoca c̄h̄u ch̄u pah̄ioahca. ³ Ahri dachorire, pihtiri dacho pano niñerure m̄sa p̄j̄iro wihboch̄u ne tí yaba c̄j̄hti jierara. M̄sa á wihboch̄u ñano niñerure m̄sa cah̄ich̄u masina Cohamac̄u. Tí niñeru to wapo w̄ij̄boriro seheta tí niñeru pihtia waharohca. Á jina niñerure m̄sa cah̄iri buhiri ñano yuh̄d̄nahca pichac̄ap̄u m̄sa j̄ch̄u m̄sa p̄jac̄ure j̄a p̄jaro seheta. ⁴ M̄sa weserire dahra cohtainare wapaerare m̄sa. Tinare mah̄iore m̄sa. Á jiro tinare m̄sa wapaerari niñerure ñano, m̄sa mah̄iorire masina Cohamac̄u. M̄sare dahra cohtaina wapa na duaa, sañurucura tina. Tí á ni sañurucuch̄u mari puhtoro Cohamac̄u tinare t̄hora. ⁵ Ahri yahp̄ap̄ure paȳu pache mehne jia tira m̄sa. Á jina m̄sa ji coa dihtare yoa tira m̄sa. Á jina p̄j̄iro wach̄u ti noano nuriro yoa sehe jira m̄sa. P̄j̄iro wach̄u p̄j̄iro to ch̄ari baharo tirore ti waj̄hti cuhtup̄u na wahc̄ana. Tó seheta m̄sa c̄h̄ure p̄j̄iro m̄sa c̄j̄ari baharo m̄sare to buhiri dahrehtop̄u na wahc̄anohca Cohamac̄u. ⁶ Noainare ñano ti yoaerapach̄uta peresu yoa waj̄a dutire m̄sa tinare. M̄sa á yoch̄u tina sehe m̄sare yuh̄d̄n̄ca masierare.

Cristo to tjua tahtore noano cohta dutiha marine Santiago

⁷ Á jina ȳu coyeya, mari puhtoro Cristo ahri yahp̄ap̄ure to tjua tahtore noano cohtaga. Wese p̄uro to toaa dicha tihti p̄jare noano to cohtaro seheta noano cohtaga. Puh̄iro to d̄ucach̄u. baharop̄u coro to ta namoch̄u c̄h̄ure to toaap̄ure “Coro ta s̄ajaro” nino, to wesere to noano duhtore noano cohtara tiro. ⁸ To á cohtariro seheta m̄sa c̄h̄u noano cohtaga. Mari puhtoro to tjua tahto mahanoc̄a d̄hsara. Á jina Cohamac̄ure á wac̄u tuarucuna to tahtore á cohtarucuga m̄sa.

⁹ Ȳu coyeya m̄sa basi nurena tjiga Cohamac̄u m̄sare to buhiri dahrehta sehe. Á yoa ahri wac̄uga m̄sa. Buhiri dahrehtiro to tahto mahanoc̄a d̄hsara. ¹⁰ Ȳu coyeya, ñano yuh̄d̄panahta mari puhtore noano cohtaga Cohamac̄u yare yahu muhtaina c̄j̄iri ti yoiriro seheta. Tina tí c̄ano p̄j̄iro seheta c̄ano p̄jaga m̄sa c̄h̄u tinare ñu c̄na. ¹¹ Á yoa ahri ȳu yahuhtire wac̄uga m̄sa. Ñano yuh̄d̄pahta

Cohamac̄ure duhueraina wahcheina jira. Panop̄u macarirore Job wama t̄irore c̄j̄irore t̄hore m̄sa. T̄iro ñano yuh̄d̄parota Cohamac̄ure duhuerari jire. Á jiro to ñano yuh̄d̄ari baharo Cohamac̄u t̄irore noano yoiri jire. Cohamac̄u mari puhtoro noano p̄j̄a ñ̄ariro jiro áta yoiri jire tiro. Tí j̄ip̄ihtiare masina m̄sa.

¹² Ȳu coyeya ahrire noano t̄hoga t̄j̄oa. Ó sehe ni wama payora masa: “M̄ano macariro mehne potoc̄a nina nija”, nina masare t̄ho dutia. Tuhs̄u, “Ahri yahpa mehne potoc̄a nina nija”, nina masa. Paye mehne c̄h̄ure wama payora tina. Tina yoa sehe á ni wama payoena tjiga. Ahrire m̄sare tuaro dutija. M̄sa painare yahuna, noano potota yahuga tinare. Wama payoro marieno ni yahuga tinare. Á m̄sa potoc̄a yahuch̄u ñano Cohamac̄u soro m̄sa niri buhirire buhiri dahresi.

¹³ M̄sa mehne macariro ñano yuh̄d̄ariro jiro, Cohamac̄ure sinijaro tiro. Pairo wahcheriro jiro Cohamac̄ure wahchea mehne basajaro. ¹⁴ M̄sa dohatina, Jesu yaina puhtoare p̄j̄irocaga m̄sa. M̄sa á p̄j̄irocach̄u tina sehe m̄sare se mehne wis̄ahca mari puhtoro Jesu wama mehne to tuaa mehne. Á wis̄o tuhs̄u, mari puhtore Cohamac̄ure m̄sare sini payoahca tina. ¹⁵ Á ti sini payoch̄u “Mari sinino seheta tiro yoaohca”, ti ni t̄hotuch̄u Cohamac̄u m̄sare dohatiinare m̄sa dohatiare yuh̄d̄ch̄u yoaohca. Á yoa m̄sa ña yoiri buhiri m̄sa dohatiina jich̄u ñua m̄sare sini payoahca. Ti á sini payoch̄u ñano m̄sa ñaa yoiri buhirire borohca Cohamac̄u. ¹⁶ Á yoa m̄sa mehne macaina mehne m̄sa ñaa yoirire cahma p̄u bah̄useheri yahuga. Á ni tuhs̄u, m̄sa basi Cohamac̄ure cahma sini payoga. M̄sa á sini payoch̄u m̄sa sini payoinare Cohamac̄u yuh̄d̄ch̄u yoaohca. Noaare yoina m̄sa jich̄u Cohamac̄ure tuaro m̄sa sini payoriro seheta yoaohca tiro. Á jia m̄sa sini payoa tua nica. Wiho jia jierara. ¹⁷ Cohamac̄u yare yahu muhtariro c̄j̄iro Elia wama t̄iriro mari yoa sehta mas̄no jia tiri jimare. Á jiro “Coro taero t̄j̄jaro” ni, tuaro sinia tiri jire Cohamac̄ure. To á ni sinich̄u tia c̄h̄ma noano pa c̄h̄ma dacho macai ahri yahp̄ap̄ure ne coro taera tiri jire. ¹⁸ Pari turi t̄j̄oa Cohamac̄ure corore to sinich̄u coro taa tiri jire. Á jiro pari turi ahri yahpai yuc̄ari d̄uc̄a, dicha tia tiri jire. (Á jia Cohamac̄ure mari sinia wiho jia jierara.)

¹⁹ Ȳu coyeya, m̄sa mehne macariro Cohamac̄u yare duhuriro c̄j̄iro Cohamac̄u yare pari turi to cahmahto c̄j̄ihtore tirore yahuna, noano yoana nina m̄sa. ²⁰ Á yoa ahrire masiga m̄sa: Cohamac̄ure duhuriro

cjirore Cohamacare pari turi cahmachu
yoana, pichacaru wahaborirore yuhdachu
yoana nica masa. A jiro payu to naa yoari
buhirire Cohamacu bo pahnonohca.

1 San Pedro

Jesu yainare macari waharinare joarocaha Pedro

¹ Yuhh, Pedro, Jesucristo buhe dutiro to cūrirota jija. Ā jicū musare yoaro macaa macaripū waha siterinare Ponto yahparū, Galacia yahparū, Capadocia yahparū, Asia yahparū, Bitinia yahparū tí yahparipū waharinare musare jipihtinare joarocaja yuhh. Musare noa duti joarocaja yuhh. ² Wahmanopure Cohamacū mari Pucū “Ō sehe yoaihtja”, to ni wacūyuro sehetā musare besea tiri jire. To ā beseri baharo to yairo Espiritu Santo sehe musare Cohamacū yaina cjihtire sōri jire. Ō sehetā sōri jire tiro Jesucristore noano yuhtitina mūsa jihto sehe, to di cohāri mehne mūsa űaa buhirire cosarina mūsa jihto sehe. Cohamacū to cahāa mehne musare noano jichū yoajaro.

Jesu yaina jina marine muanopū to naah-tore cohtana nija mari

³⁻⁵ Cohamacū marine tuaro pja űuno, Jesucristo yariaro to masa mūjari mehne marine pichacapū wahaborinare yuhdūchū yoare tiro. Ā marine yuhdūchū to yoachū pari turi mari masa bajuairo sehetā Cohamacū to pohmata wahaja mari. Ā waha tiro mehne mari ā jirucuhore noano masija mari. Ā jiro musare noano yoaro taro musare cohtarō nina. Tiro mehne mūsa ā jirucuhore cūnohca tiro. Ā jina ā jirucunahca mūsa. Tōpū Cohamacū musare to wahto ne baasi. Ahri yahparū mari ya ti wete wahāno sehetā, ti űaia waharo sehetā Cohamacū musare to wahto ne ā wahasi. Ā jia ne pihtisi. Ā jiro tirore mūsa wacū tuachū, Cohamacū to tuaa mehne musare űu wihboro, yuhdūchū yoarohca. Pihtiri dacho jichū musare to yuhdūchū yoarire masichū yoarohca tiro. Marine to ā pja űuchū űana, Cohamacure mari pūhtoro Jesucristo pūcūrore űo payo, “Noana”, nijihna tirore.

⁶ Ā to yuhdūchū yoahntina jina, mahano ahri yahpai mūsa jiro puro payū tahari mūsa űano yuhdūpanahta wahchera mūsa. ⁷ Ā űano yuhdūpanahta Cohamacure duhuerana mūsa tirore noano wacū tuarire masichū yoana nica mūsa. Uru ahri yahpa macaa pini pihtia wahaahca. Uru yuhdoro mūsa wacū tuaa sehe wiho waro jierara. Ā jia masa uru to jiare masi duaa doha űana. Urure ti doha űuno sehetā mūsa wacū tuare Cohamacū űu duaro “űano yuhdūjaro”, űiboca musare. Mūsa ā űano yuhdūri baharo potocāta tirore mūsa noano wacū tuarucuchū, Cristo űo payoa mehne

musare “Noano yoahre mūsa”, ninohca. Ahri yahparū tjua taro ā ninohca.

⁸⁻⁹ Tirore Jesucristore mūsa űuerapanahca cahāna mūsa. Ā yoa mipure tirore űuerapanahca tirore wacū tuara. Ā wacū tuana, tuaro wahchera mūsa. Cohamacū ā musare to wahchechū yoachū pjiro wahchera mūsa. Tí wahchea noa yuhdūara. Cohamacū musare pichacapū wahaborinare yuhdūchū yoarohca mūsa tirore noano wacū tuachū. Ā jina pjiro wahchera mūsa.

¹⁰ Cohamacū musare to ā yuhdūchū yoahore, musare to tuaro cahāre panopū macaina Cohamacū yare yahu muhtaina cjiri tīre masi duaa, buhe, sinitu űua tiri jire. Ā jia tīre yahuyū joaa tiri jire. ¹¹ Cristo to űano yuhdūhtore, to masa mūjahore, jipihtina bui pūhtoro to sūho jihtore tina to masa bajuahca panopūta yahuyū tuhsa tiri jire. Jesucristo to yairo Espiritu Santo to yoadohoa mehne ā yahuyūa tiri jire tina. Ā yahuyūa tina Cohamacū yare yahu muhtaina cjiri ti yahuyūre noano masi duaa sinitu űua tiri jire tina Cohamacure. Espiritu Santo “Cristo wihrohca”, to niriore “¿Dohse jichū wihrohca?” ni sinitu űua tiri jire tina. “¿To wihichū dohse waharohca?” nia, tō cūhare sinitu űua tiri jire. ¹² Tí ti yahuyūri cjiri ti basi ti masihti cjihti jiera tiri jire. Tīre tinare masichū yoaa tiri jire Cohamacū. Mari sehe mari masihti cjihti jiri jire Cohamacū yare yahu muhtaina cjiri ti joari cjiri. Muanopū tariro Espiritu Santo to yoadohoa mehne mipure noaa buheare musare sā yahuyū. Panopū mūsa masihti cjihtire ti yahuyūri cjiri tita jinocaata nina mipure musare sā yahuyū. Tí buheare anjoo cūhū tuaro masi duaa tiri jire.

Cohamacū marine űaa marieina ji dutira

¹³ Ā jina noano wacū masitjiāhna jiyuga mūsa. Ā yoana noano tūho masiina jiga. Cristo to tjua tachū Cohamacū musare noano to yoahore wacūga. Ā yoa tīre noano cohtaga. ¹⁴ Panopū Cohamacure masierasina űaare goa pjaina jimare mūsa. Mipure tīre yoarena tjiga. Ā yoarana ti pohna ti pūcūsumare noano ti yuhtiriro sehetā Cohamacure yuhtiga mūsa. ¹⁵ Ā yoana to yaina cjihtire musare beseriro űaa marieriro to jiro sehetā mūsa cūhū űaa marieinata jiga. Ā jina noaa dihtare yoaina jiga. ¹⁶ Āta ni joaa tiri jire Cohamacū yare ti joari pū: “űaa marieriro jija yuhh. Yū ā jichū mūsa cūhū űaa marieina jiga”, ni joaa tiri jire.

¹⁷ Tiro Cohamacū jipihtina cāinare ti yoarire űuno cāno potori besera tinare. űainare, noinare besera. To ā beseriro

jichu tirore “Yи Pиcи” ni duana noano yoaga. Ahri yahpai musa jiro puro cua pisaro mehne Cohamacure ño payoro mehne noano jirucuga musa jiape nino marieno. ¹⁸ Musa ñuchasuma cjiri ti yoari cjiri ne yaba cjihti jierari jire. Musa cahu ti yoariro sehe yoaina musa jipachuta Cristo musare to yaina cjihti yoare. Wapamoinare ti wapamorire ti boriro seheta tiro sehe musa ñaa yoari buhirire potota bonocare. Tíre noano masina musa. Musare ã yoaro plata mehne, uru mehne wapa wioerare tiro musare ã yoaro. Plata, uru butia wahaahca. ¹⁹ Tiro sehe oveja noariro, wete marieriro yoaro seheta jiriro Cristo to di mehne to yariari mehne musa ñaa yoari buhirire cohã, musare yuhduchu yoare. To di mehne marine ã yoaro wiho waro ã yoaro nierare. ²⁰ Panopure ahri yahpare to bajuamehnehto pano Cristo to ã wahahto cjihtore masi tuhsua tiri jire Cohamacu. Mipu sehere pihtiri dacho panocã to jichu, Cristore noano masichu yoare Cohamacu musare. ²¹ Cristo to yoadohoro mehne Cohamacure wacũ tuara musa. Cohamacu sehe Cristore yariarore masori jire. Æ yoaro tirore manopu cõno jipihtinare tirore ño payochu yoari jire Cohamacu. To ã yoachu tirore Cohamacure wacũ tuara musa. Musa ã wacũ tuachu tiro noano yoara musare. Æ jina musare to yuhduchu yoahore noano masi, cohtara musa.

²² Noaa buhea ti niriro seheta yoaina jina, musa ñaa yoari buhirire cohãrina jira musa. Æ jiina jina potocãta mari coyeare Jesu yainare cahĩ masina musa. Æ jina musa mehne macainare musa yajeripohnari mehne tuaro cahĩga. ²³ Æ yoa pari turi wahma masa bajuaina yoaro sehe jiina Cohamacu pohna wahare musa. Mari pucasuma ti pohna tirina jina baharo yarianahca. Tí yoaro sehe jierara Cohamacu pohna musa wahachu. Cohamacu to buhea mehne to catichu yoaa buhea mehne to pohna wahare musa. Tí buhea mehne Cohamacu mehne ã jirucunahca mari. ²⁴ Õ sehe nina Cohamacu yare ti joari pũ:

“Jipihtina masa tja yoaro sehe jira.

Æ yoa noaa ti cjuaa, tja cohorì yoaro sehe jira.

Tja ñaia wahara. Cohorì cãhu buru bora, baa wahara.

Tí yoaro seheta yariara masa cãhu.

²⁵ Mari puhtoro ya buhea sehe ne pihtisi.

To niriro seheta ã waharohca”, ni joaa tiri jire. Tí buhea musare ti yahuri cjiri noa buheata jira.

2

¹ Æ Cohamacu pohna jina jipihtia ñaa yoaaare, mahñoare, ti baharo buhusehei ñano yoa cohtaare, paina ti cjuaaare cjoare, painare ñaa quiti dahreare tire duhuga musa. ² Æ yoa wahma masa bajuaina pẽchore ti tuaro cahmano seheta musa cãhu noa buheare Cohamacu yare tuaro cahma namoga. Æ cahma namoga musa tirore musa wacũ tua namohto sehe, to yuhduchu yoaina musa wahahto sehe. ³ Æ yoaga musa mari puhtoro musare to noano yoaaare masiina jina.

Cristo catichu yoariro tãca yoaro sehe jiriro jira

⁴ Cristo catichu yoariro tãca yoaro sehe jiriro jira. Wuhu dahreina cãria tãcare ti cahmaeraro seheta masa tirore cahmaerare. Cohamacu sehe tirore to ñuchu to beseriro noa yuhduariro jira. To ã jiriro jichu tirore wacũ tuaga. ⁵ Musa cãhu wuhu macaa tãa yoaro sehe jira. Musa ã jina Cohamacu ya wuhu macaa tãare noano ti cãriro seheta musa to yaina cãhu noano mehne jinahca musa. Æ yoana Cohamacu ya wuhu macaina noaina sacerdotea jinahca musa. Æ jina sacerdotea wahiquinare wajã jũ muoa Cohamacure ti wariro seheta Jesu-cristo to yoadohoa mehne Cohamacu yare noano yonahca musa. Musa ã yoachu ñu ji coarohca Cohamacu. ⁶ Õ sehe nina Cohamacu yare ti joari pũ:

“Tãca wuhũ ti cũ muhtari tãca marieno wuhure yoa dũca masierara.

Tó seheta Cristo marieno yu yaina waha masierara masa.

Æ jiro tiro wiho jiriro jierara.

Æ jicu tirore Jerusalẽpu mipure cũ nija.

Tiro yu beseriro noa yuhduariro jira.

Æ jia tirore wacũ tuaina wahche, ne buo tisi”,

ni joaa tiri jire Cohamacu yare ti joari pũ.

⁷ Tirore wacũ tuaina sehe noa yuhduaro wahaahca. Æ jiro wiho jiriro jierara tiro. Tirore wacũ tuaeraina sehe soro wahaahca. Tinare õ sehe nina Cohamacu yare ti joari pũ:

“Ahriro Cristo tãca yoaro seheta jira.

Tãcare wuhu dahreina ti cohãno seheta masa tirore cohãahca.

Ti ã yoapachuta mipure wuhu dahreina wuhure yoaa ti cũ muhtari tãcare ti cõno seheta Cohamacu tirore puhtoro sõre”,

ni joaa tiri jire. ⁸ Õ cãhure nina Cohamacu yare ti joari pũ:

“Murocariro tãcare doca wahã suro to wacũ wahcãnore ne sũerara.

To seheta tãca yoaro sehe jirirore Cristore cahmaerana, tirore yuhduŕucana, Cohamacu cahapu susi mari", ni joaa tiri jire panopu. Tina Cohamacu ya buheare yuhtierare. Cohamacu panopu "Å waharohca", to niriro seheta Cristore cahmaerare tina. Å yoahtinare cãa tiri jire Cohamacu tinare.

Õ sehe jira Cohamacu yaina

⁹ Musa sehe Cohamacu to beserina jira. Tiro mari puhtoro to yaina sacerdotea tirore dahra cohtaina jira musa. Å jina to ya curua macaina ñaa marieina Cohamacu yainata jira musa. Åta jira musa. Cohamacu noa yuhduare to yoarire painare yahuhtina cjihti jira musa. Musare besea tiri jire nahitianoi jiina musa jiboro seheta ñaare yoarucu dutieraro. Å besero noano buhriaroi jiina ti noano ñu masino seheta, Cohamacure noano masiina, to yare yoarucuina ji dutira musare. ¹⁰ Panopure Cohamacu yaina jierari jire musa. Mipu pinihtare to yaina jira musa. Panopure musare pja ñuriro musare mariasiniri jire. Mipu sehere musare Cohamacu pja ñare.

Cohamacu yare yoaina jiga musa

¹¹ Yu cahina, ahri yahpai ji dojoahtina jierara musa. Cohamacu yaina jira musa. Musa ã jiina jichu ahrire tuaro yahuja musare: Musa ñaare goa pjaare ne yoaena tjiga. Tí ñaare yoana, Cohamacure ñu tuhtiina, ñaina wahana nica musa. ¹² Cohamacure cahmaeraina watoi jina noano yoaina jiga musa, musare "Yahusaari", nina. Musa ã yoaina jichu tina mipure musare ñano yahusã duapahta, musa noano yoare masiaha tina. Å masia, tina Cohamacure "Noariro, tuariro jira", niaha. Õ seheta niaha Cristo ahri yahpau to tjua tachu.

¹³ Mari puhtoro yuhti duana ahri yahpa macaina puhtoa cãhare yuhduŕucaina jiena tjiga musa. Ahri yahpa macarirore musa jipihntina bui puhtoro jirirore tiro cãhare yuhtiga. ¹⁴ Puhtoare yuhduŕucainare buhiri dahre dutiro, warocara tiro tirore yoadohoinare. Å yoa noano yoainare "Noano yoare musa", ni dutiro warocara tiro. To ã warocachu, tina cãhare yuhtiga musa. ¹⁵ Musa noano yoachu ñua tuho masieraina ti mu sũro musare quiti dahre duapahta quiti dahre masierara. Musa åta yoachu cahmana Cohamacu. Å jina musa puhtoare yuhtiga.

¹⁶ Cohamacu musa puhtoro jira. Painare dahra cohtaina jierara musa. Å jipanahta "Sãre dutiriro mariaha. Å jina ñaare yoanahca", ni tuhotuena tjiga "Ñaare yoari", nina. Cohamacure dahra cohtaina jira

musa. Å jina tirore noano yuhtiina jiga musa. ¹⁷ Jipihntina masare ño payoga. Mari coyea Jesu yainare cahiga. Cohamacure cua pisaro mehne ñuga. Ahri yahpa macaina jipihntina ti bui puhtoro jiriro cãhare ño payoga.

Cristo ñano yuhduro to cãno pjariro se-heta cãno pjaŕa musa cãhu

¹⁸ Dahra cohtaina, cua pisaro mehne musa puhtoare yuhtiina jiga. Noaina, musare noano yoaina duhtare yuhtiina jiena tjiga. Musa mehne suaina cãhare yuhtiga musa. ¹⁹ Musa ñano yoaperachuta musare ti buhiri dahrechũ Cohamacu to cahmano seheta tãre musa cãno pjachu "Noano yoare musa", ninohca Cohamacu musare. ²⁰ Musa ñano yoari buhiri tina musare ti buhiri dahrechũ tãre musa cãno pjachu tã yaba cjihti jierara. Tí yaba cjihti jierapachuta noano musa yoapachu ti buhiri dahrechũ tãre noano mehne musa cãno pjachu Cohamacu "Noano yoare musa", ninohca musare. ²¹ Å ñano yuhduhtinare ji dutire Cohamacu musare to yainare. Cristo musa ya cjihtire ñano yuhduare tirore musa ñu cũhto sehe. ²² Tiro ne ñano yoareare. Å yoa ne mahnoerare. ²³ Tirore ti tuhtichu, tiro sehe tinare tuhti cahmaerare. Tirore ti ñano yoapachuta "Cjãihtja musare", ne nierare tiro. Tí ã yoapachuta tinare Cohamacu to buhiri dahrehtore quihõno to yoahtere masino, "Yu Pucapu tinare buhiri dahrerohca", ni tuhoture tiro. ²⁴ Tiro to basi crusapu mari ñaa buhirire yariare. Å waha yariare pari turi mari ñaare yoarahto sehe, Cohamacu cahmaa sehene mari yoahto sehe. Tiro ñano cami tãre marine pichacapu wahaborinare yuhduchu yoaro taro. ²⁵ Oveja wisia ti butiro seheta mari cãhu pichacapu butihtina jimai. Mipu sehene Cristore ovejare ñu wihboriro yoaro sehe jirirore, marine ñu wihborirore wacũ tuaja mari. Å wacũ tuana, to yaina wahai mari.

3

Wamomaca duhteinare õ sehe yoaro cahmana tinare

¹ Å yoa dahra cohtainare yu dutiriro se-heta musa namosãnumiare dutiiltja. Musa manũsumare yuhduŕucaena tjiga tina Cohamacu ya buheare ti cahmahtõ sehe. Cãina tina to ya buheare cahmaeraina jia, tinare musa yuhduŕucaerachu ñua Cohamacu ya buheare cahmaboca tina. Tí buheare musa yahuerapachuta to yare cahmaboca tina. ² Åta cahmaboca tina musa noano yoare, musa ño payoa cãhare ñua. ³ Musa numia, carea numia yoaro sehe yoaena tjiga. Å yoa musa pjoarire wuhawe sapahtaa numia, uru darire busaa numia, wapa ti yuhduca

suhtire sãa numia jiena tjiga musa, musare “Goa pjachu yoari”, nina. ⁴ Å yoa musa cua pisaro mehne painare nihi siaroca mehne yoa numia jina, noano sehũdua numia jina, ahrireta ñu ji coachu yoaga. Ahrire musa yoachũ wiho waro jierara, Cohamacũ to ñuchũ. ⁵ Õ seheta yoa tiri jire panopũ macaa numia Cohamacũ ya numia cjiri. Tí numia Cohamacũre wacũ tuaa numia jia, ti manũsamare yuħdũcaera tiri jire. ⁶ Tõ seheta Sara cjiro to manũno Abrahã cjirore noano mehne yuhtia tiri jire. Å jiro tirore “Puhtoro”, ni pisua tiri jire. Å jina musa noano yoa numia jina, cuiro mariea numia jina, Sara cjiro pohna numia yoaro sehe jira musa cãhũ.

⁷ To noano yoariro seheta musa cãhũ maa musa namosãnumiare noano yoaga. Tí numia mari maa yoaro sehe tua numia jierara. Å jina ño payoa mehne noano yoaga tí numiare. Cohamacũ jipihtia dachoripe tiro mehne mari jihtore marine to wariro seheta tí numia cãhũre warohca tiro. Tí å jiina jichũ tí numiare noano yoaga. Cohamacũre musa siniare musa dojomehnerahto sehe tí numiare noano yoaga.

Noano ti yoapachũta paina tinare ti ñano yoare yahuha Pedro

⁸ Ahri mehne yahu batoihtja: Musa jipihina cãno mehne noano mehne jiga. Å jina musa mehne macainare noano pja ñuina jiga. Musa coyea Jesu yainare pũbuhuseheri cahma cahĩga. Å jina noano yoaga tinare. Å yoa “Wiho jiina jija”, ni tuhotuga. ⁹ Paina musare ñano ti yoachũ tinare ñano yoa cahmaena tjiga. Musare ti tuhtichũ tinare tuhti cahmaena tjiga. Musare ti å yoapachũta noano yoaga tinare. Å yoana “Noano jiga”, niga tinare. Tíre yoahina cjihtireta to yaina cũre musare Cohamacũ sehe musare noano yoaro taro.

¹⁰ Åta nina Cohamacũ yare ti joari pũi: “Musa noano wahchea mehne ji duana ne ñano ni durucuena tjiga.

Painare mahũoena tjiga.

¹¹ Ñaa yoare duhunocahga.

Noaa sehere yoaga.

Cahma musa basi ñu tuhtiro marieno jiga.

Musa noano jihtore tuaro cahmaga.

¹² Cohamacũ cahmaare yoaina mari puhtoro å ñu wihborucuro nina.

Tirore ti siniare å tuhorucuro nina.

Ñano yoaina sehere tiro ñu tuhtira”,

ni joaa tiri jire.

¹³ Noare musa tuaro yoachũ paina sehe musare ñano yuħdũchũ yoa dua bihosi tina.

¹⁴ Noano musa yoapachũta musare ñano yuħdũchũ ti yoachũ ñano Cohamacũ musare noano yoarohca. Å jina painare cuiena tjiga. Å yoa pjiro tuhotuena tjiga. ¹⁵ Cristore

“Sã puhtoro jira” ni, musa tuhotuna, ño payoga tirore. Å yoana Cristore musa wacũ tuare, Cohamacũ mehne musa jihtore paina ti sinituhto pano tinare musa yuhtitrore noano masiyuga. Å yuhtina nihi siaro mehne, noano ño payoa mehne yahuga tinare. ¹⁶ Noaina jiga. Å jina “Ñaaare yoaja”, ni tuhotusi musa. Å jia Cristo yare noano yoaina musa jichũ paina musare ñaa quitĩ dahrea, buoro wahaahca tina. ¹⁷ Ñaaare musa yoari buhiri musa ñano yuħdũchũ noaerara. Å yoa Cohamacũ cahmachũ noaare musa yoapachũta musa ñano yuħdũchũ noa nina tí pinihta.

¹⁸ Õ seheta yuħdũre Cristo. Cũ tahata jipihtina ti ñaa buhirire yariare tiro. Noariro jire. Å jiro ñaina mari jichũ mari yaro jiborirore ñano yuħdũre tiro. Ñano yuħdũre tiro marine Cohamacũ yaina wahachũ yoaro taro. To pjacũ yariaa wahare. Å yariaparoto catia mehne masari jire. ¹⁹ Å masariro jiro tiro ti buhiri dahrehtore cohtaina cjiri presu jiina cjiri yariarina cjirire buheri jire. ²⁰ Tina cohtaina panopũ Cohamacũre yuhtieraina cjiri jia tiri jire. Tí pjapũre Noé cjiro to jiri pjapũre, pjiria dohoriare dohoro nia tiri jire. Tiare to dohoro watõ Cohamacũre yuhtieraina cjirire ti yuhtichũ cahmano yoari pja cohtaa tiri jimare Cohamacũ. Å yoa mahainacã ochota dia mininore yuħdua tiri jire. ²¹ Minia ti yuħdũriro seheta bautisaa mehne yuħdũra masa. Mari pjacũre mari wete tju cosaro sehe jierara bautisaa. Soro sehe jira bautisaa. “Ñaa buhiri marieina jija”, mari ni masihto cjihtore Cohamacũre “Mũhũre wacũ tuaja”, mari ni yahua jira ahri bautisaa. Å yoa Jesucristo to masa majari mehne yuħdũra mari. ²² Tiro Jesucristo manopũ wahari jire Cohamacũ poto buhusehei jiro, tiro mehne dutiro taro. Å jiro tiro anjoa bui, manoo macaina puhtoa bui, dutiina bui ti puhtoro jira.

4

Cristo yaina jina noa sehere cohtotaina jinahca

¹ Mari ñano yuħdũna ñano yoare duhunocaja mari. Cristo ñano yuħdũri jire. Å jina tiro ñano yuħdũro to cuierariro seheta to suaerariro seheta musa cãhũ to yoariro seheta yoaga. ² Õ seheta yoaga musa ñaaare musa goa pjaare pari turi musa yoerahto sehe, Cohamacũ cahmaa sehere musa yoarucuhto sehe. ³ Panopũ Cohamacũre cahmaeraina ñaaare goa pjaare ti yoariro seheta yoarucuri jimare musa cãhũ. Buõ tiro marieno ñano yoana, ñaaare

goa pjaare yoana, cahana, cahaa bose nymarine yoana, “Cohamacu jira”, musa nia masurine, Cohamacu to ñu yabia masurine ño payona ahri sehereta yoari jimare musa. ⁴ Æ jina tó purota yoa batoaga. ⁴ Æ jia tí ñaputiare yoaina mehne musa jisinicu mipure musa tîre yoerachu ñaa tina sehe ñu caaa wahara. Æ yoa musare ñano quitî dojomehna. ⁵ Tí Æ yoachu ñano tí ñaa yoarire Cohamacu sehe sinitu ñano, yahu yuhdu dutirohca tinare. Tiro catiinare, yariaina cahure besehtiro buhiri dahretiro jira. ⁶ To Æ besehtiro jichu jipihntina masa sehe mipu yariarina cjirire noa buheare yahure Cristo tí yariatô pano. Õ sehetâ ni yahure tí pjacurire Cohamacu to yaria dutipachuta. Æ yahure tiro Cohamacu jipihntia dachoripe to jiro sehetâ tiro mehne tí jirucuhto cjihtore.

⁷ Pihtiri dacho cjihto mahanocâ duhsara. Æ jina noano taño masiina jiga, mipure Cohamacu mehne musa durucuhto noano. ⁸ Painare cahîna payu tahari ñaare tí yoapachuta Æ ñanocaja mari. Æ jina musa mehne macainare Æ cahîrucuga. Paye dutia yuhdoro tíreta yoaga. ⁹ Musâ mehne macainare ne nureno marieno musa wuhsepu sâa ta dutiga tinare. ¹⁰ Cohamacu musare cainare musa yoa masihtipe cûri jire. To Æ cûchu, musa yoa masiriro sehetâ musa mehne macainare tîre noano yoaga. To cûriro sehetâ painare noano yoadohona, Cohamacu to cûriro sehetâ noano yoana nica musa. ¹¹ Musâ Cohamacu yare noano yahuina jina, Cohamacu to yahuboriro sehetâ noano yahuga musa cahu. Masare yoadohoina jina Cohamacu to cûri tuaa mehne painare yoadohoga. Tí jipihntiare yoana Cohamacure masa tí ño payohto sehe Æ yoarucuga. Jesucristo sehe tîre musa yoachu yoadohorohca. Tirore jipihntia dachoripe ño payoa, “Tuariro jira”, nino cahmana jipihntinare. Æta nijaro.

Jesu yaina ti jiri buhiri ti ñano yuhduare yahuha Pedro

¹² Yu cahîina, mipure ñaputiario yuhduna, “Cue, soro jiro wahaca yuhare” ni, wacû cuaena tjiga. Musâ ñano yuhduchu Cohamacu musa tirore wacû tua namochu yoa duaro, “Ñano yuhdujaro”, nino nica tiro. ¹³ Cristo to ñano yuhdurîro sehetâ musa cahu Æ wahana, wahchega musa. Æ wahchena Cristo to si sitea mehne to tjua tachu musa noano wahchenahca. ¹⁴ Cristo yaina musa jiri buhiri paina musare tí tuhtichu Cohamacu to yairo Espîritu Santo to si siteriro musa mehne jiro nina. Æ jina wahchega musa. ¹⁵ Æ yoa masare musa wajârî buhiri, musa yacari buhiri, paina tí yoarire ñana tinare musa soro ní dojomehnerî buhiri

musa ñano yuhduchu ñaa nina. ¹⁶ Æ jipachuta Cristo yaina musa jiri buhiri ñano yuhduna, buo tiena tjiga. Ñano yuhdupanahta Cristo yaina musa jiare wahchena, Cohamacure “Noana” ni, ño payoga musa.

¹⁷ Cohamacu to yaina tí yoarire ñano to besehtî pja jiro nina mipure. Jipihntina mari to yaina mari yoarire ñano bese muhtanohca “Ahri ñaa jira. Ahri noaa jira”, nino. ¿Æ bese muhtano dohse yoarohcari to yaina jieraina sehere? Tirore yuhtieraina sehere tuaro buhiri dahrerohca. ¹⁸ Õ sehe nina Cohamacu yare tí joari pû: “Noaina yuhduahca. Tí Æ yuhduhto mijo curera. To Æ mijo curechu Cohamacure cahmaeraina sehe ne yuhdusi. Basioerara tinare”, nina Cohamacu yare tí joari pû. ¹⁹ Æ jina Cohamacu to cahmachu musa ñano yuhduna jina, noaare musa yoarire ne duhuena tjiga. Æ yoa musare bajumehnerirore musare ne duhuerarirore tirore wacû tuarucuga musa.

5

Jesu yaina ti yoatore yahuha Pedro

¹ Mipure Jesu yaina cahmachuina puhtoare yahuhtja. Yuhu Jesu yaina puhtoro jija. Musâ cahu tí puhtoa tjira. Musare yu yoaro sehe puhtoa jîinare ahrire yahui tai nija yuhu. Cristo to ñano yuhdurire ñarîro cjiro jichu, myanopu Cristo mehne yuhduhtiro jichu ahrire musare yahuhtja: ² Cohamacu yaina oveja yoaro sehe jira. Musâ sehe ovejare ñu wihboina yoaro sehe jira. Tinare Cohamacu musare to cûrinare musa yaina masare noano ñu wihboga. Æ yoana Cohamacu to cahmariro sehetâ noano yajeripohna tia mehne tinare ñu wihboga. Æ tinare ñu wihbona, “Sâ ñu wihbori wapa niñerure wapatanahca”, niena tjiga musa. Wahchea mehne tinare ñu wihboga. Wahchea mehne tinare ñu wihboga. ³ Æ ñu wihbona tinare ñano dutipena tjiga. Æ jina noano yoaga musa Jesu yaina musare tí ñu cûhto sehe. ⁴ Musâ Æ yoana Cristo jipihntinare marine ñu wihboriro to tjua tachu puhtoro to pisari soro noano si siteri sorore musare to waboriro sehetâ tiro musare noaare to wahtore cjuanahca. Tí musa cjuahnti ne pihntisi. Æ jina tiro mehne yuhdunahca musa.

⁵ Tinare yu dutiriro sehetâ musa wahma yapia cahu tinare musa puhtoare yuhtina jiga. Æ yoa musa mehne macainare jipihntinare ño payoa mehne yoadohoga. Õ sehe nina Cohamacu yare tí joari pû: “Masare yuhduruca duainare Cohamacu ñu tuhtira.

Painare ño payoina sehere ‘Wiho jiina jija’,
ni tãhotuina sehere noano yoara
tiro”,

nina to yare ti joari pũ. ⁶ ã jina Cohamacũ
tuariro musare to dutichũ “Wiho jiina jija”
ni, tirore ño payoga. Musa ã yoachũ to
quihõri pja jichũ musare paina ño payoahca
to dutiro mehne. ⁷ Tiro musare pjiro tãhotu
ñũ wihbora. ã jina ne pjiro tãhotuena tjiga
musa sehe.

⁸ ã yoa wacũ masi jinohbũ. Musare
ñũ tuhtiro wafino yairo suariro to maca
chũro seheta musare ñano yũhdũchũ yoa
duara. ã yoa musare ñano yoa dutira.

⁹ Jipihitropũ ahri yahpapũre paina Jesu
yainare ñano yũhdũchũ yoa, ñano yoa dutira
wafino. Tĩre masina, tirore yũhtiena tjiga.

ã jina Cristore tuaro wacũ tuaga musa.

¹⁰ ã yoa mahanocã musa ñano yũhdũri
baharo Cohamacũ musare yoadohorohca.
Musare noaina jichũ yoarohca. Tirore musa
wacũ tua namochũ, tirore musa ne duhuer-
achũ yoarohca musare. Tiro jipihitia da-
choripe mũanopũ Cristo mehne musa jih-
tore musare cũriro jira. Tiro Cohamacũ jira
jipihitnare pja ñũriro. ¹¹ “Jipihitia dachoripe
tiro tuariro jira”, ni ño payojihna tirore. Æta
yoarucujihna.

Noa duti batoaha Pedro

¹² Ahri pũcãre mahari pũcãre musare
yũ waroca duachũ Silvano sehe yũhũre
joabasahre. Tiro Jesu yairo yũ coyeyiro,
Jesu yare ã yoarucuriro jira, yũ tãhotuchũ.
Musare noano yahu duaja. ã jicũ “Ahri
buhea potocãta Cohamacũ musare to cahĩa
buhea jira”, ni yahucũ musare ahri pũre
joarocaja. ã jina ahri buheare ne duhuena
tjiga musa.

¹³ Musare to yaina cjhĩtĩre to beseriro se-
heta Jesu yaina Babilonia macaina cãhũre
besea tiri jire Cohamacũ. Tina sehe musare
noa dutira. Marco yũ macũ yoaro sehe jiriro
cãhũ musare noa dutira. ¹⁴ Musa mehne
macainare noano mehne piti bocasiniga.

Jipihitina Jesucristo yaina noano jiga
musa.

2 San Pedro

Jesu yainare joarocaha Pedro

¹ Yuhũ Simo Pedro Jesucristo buhe dutiro to cūrirota jija. Tireo dahra cohtariro jija. Jesucristo, Cohamacu waro jiro, ñaa buhiri marieriro jiro marine cāno potorita yuhdũchũ yoariro jira. Ā jiro tireo m̄sa wacũ tuachũ, to yaina wahachũ yoare m̄sare. M̄sa ā wacũ tuachũ wiho waro jierara, Cohamacu to ñuchũ. Ā to yaina m̄sa wahachũ mari cāno potorita to yaina jija. Ā jicu m̄sare joarocaja.

² Ā yoa Cohamacu cūhũre mari puhtoro Jesu cūhũre masi namona ti cahĩa mehne noano jirucunahca m̄sa. Ā noano m̄sa jihito sehe m̄sare sini payoja. Ā nicu m̄sare noa dutija. Cohamacu m̄sare pjĩro noano yoa namojaro.

Ō sehe jira Cristo yaina

³ Cohamacu ñaa marieriro jiro, to tuaa mehne marine to yaina jihtinare bese cū tuhsua tiri jire. To ā bese cūchũ tuhona, tireo masina to yaina wahaja mari. Ā wahana Cohamacu masi namona, to tuaa mehne to cahmano seheta noaina jinahca mari. ⁴ Tĩ to tuaa mehne marine noa yuhduaro yoare. “Ō seheta m̄sare noano yoihtja”, to niriro seheta marine noa yuhduaro yoara. Marine to ā yoachũ ñana Cohamacu to jiro seheta waha namonahca mari. Ā jina ahri yahpa macaa ñaare, mari ñaare goa pjaare mari duhunocaja. Tĩ ñaa sehe marine dojomehne yuhduamahre.

⁵ Cristore noano wacũ tuaina ji tuhsura m̄sa. Ā jina ō sehe yoa namoga tjoa: Noaare yoaina jiga m̄sa. Ā jina Cohamacu cahmaare noano masiina jiga m̄sa. ⁶ Ñano yoa duapanahca Cohamacu cahmaa sehene yoarucuina jiga m̄sa. Ā yoa Cristo yaina m̄sa jiri buhiri ñano yuhdupanahca ā cāno pjarucuga m̄sa. Ā jina Cohamacu ño payoina, to cahmaare yoaina jiga m̄sa. ⁷ Ā yoa m̄sa mehne macinare cahma ño payoina, tinare noano yoadohoina jiga m̄sa. Ā yoa jipihina paina cūhũre cahĩna jiga.

⁸ M̄sa ō sehe yoa namochuta noa yuhduara. M̄sa ā yoa namona, noano yoaina jirucunahca. Ā jina Cristo to cahmaare noano yoarucuina jinahca m̄sa. Wiho waro jiina jisi m̄sa. Ā yoa Cristore m̄sa wacũ tuari wiho waro jisi. Yũ niriro seheta m̄sa yoa namochũ pinihtare noa yuhduara. ⁹ M̄sa ā yoa namoerana Cohamacu yare ne masieraputiara m̄sa. Ā yoa namoeraina jina capari ñaeraina o capari noano ñũ bocaeraina yoaro sehe

jina, Cohamacu cahmaare ne masierana m̄sa. Ā yoa namoerana Cristo m̄sa ñaa yoari buhirire to cohāri c̄jirire ne wacũ payoerara m̄sa. Āta bonoca duara m̄sa.

¹⁰ Ā jina, yũ coyey, Cohamacu to yaina c̄jhtire m̄sare to ji dutichũ yahtire m̄sa. Ā yuhtiina jina, to yare ne wacũ duhuerana to cahmaare tuaro yoarucuga. M̄sa ā yoarucuna potocāta Cohamacu mehne jinahca m̄sa. Ā yoa potocāta to beserina jinahca m̄sa. Ā yoana to yare duhuina jisi m̄sa. ¹¹ M̄sa ā to cahmano sehe yoaina jina mari puhtoro marine yuhdũchũ yoariro Jesucristo to s̄ho jiro p̄ noano wahanahca m̄sa. Tõp̄ tiro mari puhtoro ā jirucurohca. Potocā to yaina waro m̄sa jichũ ñano “Noano mehne yũhũ mehne jiga m̄sa”, ninohca Jesu m̄sare.

¹² Ā yoa ahrire m̄sare ā wacũchũ yoarucuihtja. Ahri m̄sare yũ yahurire masi tuhsure m̄sa. Ā masina Cohamacu yare m̄sa tuhoro seheta noano yoana nina m̄sa. Ā yoaina m̄sa jipachuta ahri m̄sare yũ yahurire ā wacũchũ yoarucuihtja m̄sare. ¹³⁻¹⁴ Mahanocā duhsara yũ yariahto. Tire noano yahure mari puhtoro Jesucristo yuhũre. Ā jicu catisinicu waro ahri yũ yahurire m̄sare ā wacũchũ yoarucuihtja. Yũ ā yoachũ noa nina. ¹⁵ Ā jicu ahri yũ yahu joari c̄jirire m̄sare joa cū pahũoihca yũ yariari baharo m̄sa noano masihtō sehe. Ā jina ahri yũ yahurire ā wacũrucunahca m̄sa.

Cristo to tuariro to jia tiare ñaha Pedro cūhũ

¹⁶ Ā yoa Cristo to tuaa cūhũre to tahto cūhũre m̄sare yahuna, sã m̄sũ sũro yahuna nieraja. Masa ti m̄sũ sũro ti masia mehne ti yahua jierara m̄sare sã yahua. Tuariro to jiare sã basita ñũ. ¹⁷ Cristo to tua yuhduariro to jiare sãre ñore Cohamacu mari Pũchũ. To ā ñochũ tiro sehe noano si siteriro jire. To ā si sitechũ ō sehe nino coa tare to si sitero watōi: “Ahr̄iro yũ macũ, yũ cahĩro jira. Tiro mehne tuaro wahcheja”, nino coa tare Cohamacu tua yuhduariro. ¹⁸ M̄sanopũ to ā nino coa tachũ tuhõi sã. Tũcũ buipũ Cohamacu to jiri tũcũ Cristo mehne jii sã.

¹⁹ Tire ñurina jina, Cohamacu yare yahu mahtaina c̄jiri panopũ macaina ti joari c̄jiri potocā ti jichũ noano masija sã. Ti joari c̄jirire noano ñũ buherucuna noano yoana nina m̄sa. Tĩ ti joari c̄jiri Cohamacu yare marine noano masichũ yoara. Ahri yahpai ñaare ti yoari yahpai nahitianoi mari jiboro seheta buhriaro marine to noano ñũ masichũ yoaro seheta Cohamacu noano masichũ yoara marine. Ā jina Cohamacu yare ti

joarire ã buherucuga. Æ buherucuna Cristo to tjua tachupũ buhe duhunahca. Æ tjua taro to yare mari masierarire marine noano masi pahñochũ yoarohca. ²⁰ Jipihtia ahri yũ yahuri yuhdoro ahri sehere noano masiga musa: Cohamacũ yare yahu muhtaina cjiri panopũ ti joari cjirire mari mũ sũro tire buhena, “Õ sehe nino nica”, ni masieraja. ²¹ Ne masa ti mũ sũro Cohamacũ yare joaera tiri jire. Panopũ macaina cjiri Cohamacũ yare ti joachũ Espiritu Santo sehe ti joatore tinare masichũ yoaa tiri jire.

2

Cohamacũ yare potocã buherainare yahuha Pedro

¹ Panopũ mari coyea judio masa mehne macaina “Cohamacũ yare yahu muhtaina jija”, ni mahñoina jia tiri jire. Ti yoaro seheta mipũ cũhure musa mehne macaina ã ni mahñoina jiahca. Tina potocã ti buheborro seheta mahñoa sehere buheahca. Æ buhea Cristo ya sehere dojomehneahca. Æ yoa Cristo to yuhdũchũ yoaborina jipahta tirore “Sã puhtoro jira”, ni tahotuerara. Ti jipihtiare ti ã yoari buhiri dóihta Cohamacũ tinare tuaro buhiri dahrerohca. ² Æ mahñõ ti buhechũ tũhao tina ti ñaare goa pjariro seheta payũ masa tinare ñũ cũ ñano yoaaahca. Ti ã ñano yoachũ ñua paina masa cũhũ noaa buheare ñano quitu dahreahca. ³ Æ jia tina mahñoina niñerure wapa cahmaa, mahñoa, ti mũ sũro ti yahua buheare buheahca musare. Ti ã buheri buhiri Cohamacũ tinare tuaro buhiri dahrerohca yuhdũro marieno. Panoputa ã yoainare buhiri dahre duti tuhsua tiri jire tiro.

⁴ Tõ seheta panoputa Cohamacũ ñaina anjoa cũhure to buhiri dahrehtore cũ tuhsua tiri jire. Tinare pichacapũ nahitianopũ peresu yoaa tiri jire. Æ yoaro pihitiri dacho baharo tinare buhiri dahrerohca. ⁵ Tõ seheta panopũ macainare Cohamacũre cahmaerainare tiro buhiri dahrea tiri jire. Æ yoaro jipihtiro ahri yahpare miono, jipihtina masa ñainare mio wajãa tiri jire. To ã miohto pano Noe cjiro sehe ti pja macaina cjirire noaare yoa dutiro yahua tiri jimare. To ã yoaro watoi Cohamacũ ahri yahpare miono, Noéne tiro mehne macaina cũhure yuhdũchũ yoaa tiri jire. Tina jipihtina to yuhdũchũ yoarina ocho masa jia tiri jire. ⁶ Tõ seheta Sodoma wama tiri maca macaina cjirire Gomorra wama tiri maca macaina cjiri cũhure Cohamacũ buhiri dahrea tiri jire. Ti macarine pichaca mehne noano jũ pahñonocaa tiri jire. Æ yoaro baharopũ jiltinare tirore cahmaerainare ñono nia tiri jire. Ñainare to buhiri dahrehtore ñono nia tiri jire tinare.

⁷ Æ yoaro Lote wama tirore cjiro sehere yuhdũchũ yoaa tiri jire. Lote sehe noariro jia tiri jire. Æ jiro jiro Sodoma macaina Cohamacũ dutiare yuhdũrucaina ñabiario ti yoachũ ñano pomea waha, ñano tuhotua tiri jire. ⁸ Tiro noariro ñaina watoi jiro, dachoripe ñabiario ti yoachũ ñano, ñano ti durucuchũ tũhoro ñano yajeripohna tia tiri jire.

⁹ Tirore to yuhdũchũ yoachũ ñana ahri yũ yahuhtire masija mari. Cohamacũ mari puhtoro tirore cahmainare ti ñano yuhdũchũ ñano tinare yoadohorohca. Æ jiro ñaina sehere peresu yoaro tinare cjũara pihitiri dacho jichũ to buhiri dahrehto sehe. ¹⁰ Ñaare tuaro goa pjinare Cohamacũre yuhdũrucainare tina pinihtare ñano buhiri dahrerohca tiro. Ahrina musa mehne macaina mahñõ buheina ñaare yoaa, ne cuierara. Æ yoa bũo tierara tina. “Painare masi yuhdũrucaja”, ni tuhoutuina jira tina. Æ jiina jia muano macaina tuainare ne ño payoeraa, cuiro marieno ñano ni bujũpera tinare. ¹¹ Anjoa sehe ne ti yoaro sehe yoaerara. Tina sehe mahñõ buheina yuhdoro tuaina jira. Æ jipahta tina ne bujũpea mehne muano macaina tuainare ñano yahusaerara Cohamacũre, “Painare yuhdũrucaja”, nieraina jia.

¹² Wiho mejeta ahrina mahñõ buheina sehe nucũ macaina wahiquina yoaro sehe tũho masieraina jira. Nucapũ boca sua ti wajãhtina yoaro sehe jira tina. Ti cahmano seheta yoara tina. Æ jia ti masierainare bujũpe, ñano ni durucu cohtara. Æ yoina jia wahiquina yariahtina ti jiro seheta tina cũhũ to buhiri dahrehtina jirucuahca. ¹³ Tinare ti ñano yoari buhiri buhiri dahrerohca Cohamacũ. Tina ñaare goa pja yuhdũara. Æ yoaa dachopũ masa ti ñũrocaroi to jipachũta ñano yorarucara. Musa mehne bõse numũ yoaa, ti bõse numũ ñaare yoa yuhdũara. Æ jia musa bõse numũre ti wete dahrero seheta tinare musa ñũ cũchũ ti ñaa pihara musare.

¹⁴ Æ yoaa numiare ñua, ñaha duara tina. Tuhsũ, ñaare ã yeurare duara. Cohamacũre wacũ tuarea cuireinare ñaare yoa dutia, tõ sehe jiinare tinare ñũ cũchũ yoara. Æ yoa ti sahsero paye barore, niñeru cũhure mahñõ ma mihniina jira. Tina Cohamacũ to buhiri dahrehtina jira. ¹⁵ Tina Cohamacũ yare buheraa, soro jia buhea sehere buhera. Æ yoaa Balã yoaro sehe yoaa nina. Balã, Beor macũno jia tiri jire. Tiro sehe panopũ to ñaa yoari mehne niñerure wapata duaa tiri jimare. ¹⁶ To ã yoachũ ñano Cohamacũ tuhtia tiri jire tirore. To burro durucueraricoro jiparota masũno yoaro sehe to purore durucu tuhtia tiri jire. To ã tuhtichũ tũhoro

Balãa tuaro to ñaare yoa duamarire duhunocaa tiri jire. Tũho masierariro to yoa duamarire duhunocaa tiri jire.

¹⁷ Ahrina mahñoina mári pohtaripu co marieno yoaro sehe jira. Co mariea mári pohtari tí yaba cjihti jieraro seheta tina mahñoina ne yaba cjihti jierara. Á yoa me curuari mũano macaa core waboa curuarire wihnono to wãrocachu ti curuari yaba cjihti jierara. Á ti yaba cjihti jieraro seheta, tina mahñoina cãhu masare yoadohoera, ne yaba cjihti jierara. Á jiro nahitiano warore yoa tuhsua tiri jire Cohamacu tópu tinare buhiri dahrero taro. ¹⁸ Tina mahñoina ti durucua yaba cjihti jierara. Masiina yoaro sehe masare á buhemacanocahna. Ó sehe ni buhera tina: “Mari cahmano seheta mari yoachũ noa nina”, ni buhemana tina. Ti á ni buhechũ masa tuhoa ñaare goa pjaa, ti ya buheare cahmana. Paina masa Cohamacure potocãta wahma cahma dũcaina mahanocãta wahara ti ñaare ti duhuri baharo, quihõno yoeraina mehne macaina ti jiri baharo. Tinare mahñoina ti buhechũ tuhoa ñaare cahmana tjoa Cohamacu yaina jiborina jipahta. ¹⁹ Tinare ó sehe ni buhera mahñoina: “Mari cahmano seheta mari yoachũ noa nina”, ni buhemana tina. Ti á ni buhepachuta ti niriro sehe wahaerara tinare. Ñaare duhu du-aeraa, tĩre duhu masieraputiara. Ti á duhu masierachũ, tí ñaa ti puhtoro yoaro sehe jira. ²⁰ Mari puhtoro Jesucristore marine yũhdũchũ yoarirore wahma cahma dũcaina sehe ahri yahpa macaa ñaare duhunocamare. Ti á duhuri baharo pari turi ñaare yoaa tjoa, ñabiaro waro tjuara tina. Cristore ti masihto pano ti ji muhtaririo yũhdoro ñabiaro tjuara juna, pari turi ñaare yoaa tjoa. ²¹ Á ñabiaro tjuaa, Cohamacu tinare to dutiare yũhdũrũcaaa, noaa buhea sehere ti ne masi muhtaerachũ noabiaboa tinare. ²² Á jia pari turi ñaare yoaa, masape ti ni durucuruciriro seheta yoaa nina tina. Ó sehe ni durucua masa: “Diero toa tuhsũ pari turi to toa cũri cjirire chũra. Á yoa yesere ti cosari baharo pari turi tiro ñari sahbai cuhsura tjoa. (Tó seheta yoara noaa buheare cahmamarina cãhu pari turi ñaare cahmaa tjoa)”, ni durucua masa.

3

Cristo ahri yahpapũ to tjuu tahtore yahuha Pedro

¹ Yũ cahñina, mũsare cã pũ joaroca tuhsũ. Á jicũ ahri pũre mipure mũsare joarocai nija tjoa. Tuhsũ pũa taha joarocacũ ahri jipihitiare mũsare wacũchũ yoa duaĩ nija noaa dihtare mũsa tuhotuhto sehe. ² Panopũ macaina noaina Cohamacu yare yahu

muhtaina cjiri ti yahu joari cjirire wacũga mũsa. Mari puhtoro marine yũhdũchũ yoariro Cristo to dutia cãhũre wacũga. Tĩ dutiare sã to cũrina mũsare buhei.

³ Ahrire mũsa masichũ tuaro cahmaja. Á jina wahmanore ahrire wacũ muhtaga: Pihitiri dacho panocã Cohamacu yare bujũpeina jiahca. Tina ñaare goa pjarucuina jiahca. Ó sehe ni bujũpeahca: ⁴ “Cristo ‘Tjuu taihtja’, niparota ne tjuu tasi. ¿Tjuu ta duaparota dohsearo ne bajuerajari tiro? Ahri yahpa to ji dũcari baharo mari ñũchũsũma mũna ti yariari baharo jipihitiro soro sehe waharo marieno á jirucura. Á jiro ahri yahpare tahtiro mũanopũre mariahna”, ni bujũpeina jiahca. ⁵ Á ni bujũpea ahri sehere ne wacũerara tina: Panopũre Cohamacu to dutiro mehne ahri yahpare, mũano cãhũre bajuamehnea tiri jire. Á yoa tuhsũ ahri yahpai co dihta jiriro cjirore yahpa jichũ yoaa tiri jire tiro. Á yoaro co mehne ahri yahpa mipũ to jiro seheta ahri yahpare yoaa tiri jire tiro. ⁶ Á yoa baharopũ ahri yahpare miono, cohã pahñoa tiri jire ahri yahpa macaare ahri yahpa macaina cãhũre. (Á jiro ahri yahpare cã tahata soro wahachũ yoa tuhsua tiri jire Cohamacu.) ⁷ Á soro wahachũ yoaparota mipũre mũanore, ahri yahpa cãhũre pari turi cohtotachũ yoaerasinire tiro. Tiro to dutiro mehne ahri yahpare mũano cãhũre mipure ti jiro seheta jirucu namochũ yoaro nina. Á jiro cohtaro nina baharo jipihitropũre jũno taro. Á cohtaro nina Cohamacu tirore cahmaerainare buhiri dahrero taro. Á buhiri dahrero tinare pichacapũ cohãnohca.

⁸ Yũ cahñina ahrire wacũga mũsa: Mil cãhmarine “Yoabiari pja jira”, mari ni tuhotupachuta cã dachota jira Cohamacu to ñũchũ sehere. ⁹ “Cohamacu to niriro sehe ne so yoaeraputiara”, nina masa. Á jierara. Masare noano yoa duaro cohtasinino nina. Ne cũiro masanore pichacapũ cohã duaerara tiro. Á jiro jipihitina pano ti ñaare tuhotumarire ti duhuchũ, Cohamacure ti cahmachũ cahmasinina tiro.

¹⁰ Namipũre yaca bucũro to wacũenoca yacaro sãariro seheta Cristo ahri yahpapũre wacũenoca tarohca. To tachũ to tuaro bisichuta mũano macaa pihtia wahaahca. Jũ pihtia wahaahca. Á yoa ahri yahpa, ahri yahpa macaa cãhu jũ pihtia wahaahca. Cohamacu ahri yahpa macainare buhiri dahrero taro nina.

¹¹ “Ahri jipihitia pihtia wahaahca”, Cohamacu to nichũ tuhona ñaare duhuina, Cohamacu cahmaare yoaina jiro cahmana marine. ¹² Mari puhtoro Cristo ahri yahpapũ to tahtore cohtaina jina, soaro mehne

to tachu yoaga musa. Tí dachoi muanō macaa jū pihtia wahaahca. Jipihtia jū sipīa wahaahca. ¹³ To ā cuaro wahahto to jipachūta mari sehe Cohamacu to ni cūriro seheta jipihtiare to cohtotahtire cohtaja mari. Jipihtia ti jū pihtiari baharo ō sehe jirohca. Muanopu cāhu ahri yahpapu cāhu wahma jiahca. Ā yoa tí pjarure noaa dihtare yoaahca jipihtina. Ahrireta cohtaja mari.

¹⁴ Ā yoa yu cahīina, mari puhtoro to tah-tore cohtaina jina Cohamacu to űurocaroi noano yoaina jiga musa űaa buhiri marieina musa jihto sehe. Ā noano yoaina jiga musa Cohamacu musa mehne to wahchehto sehe. ¹⁵ Yoa cureri pja to bajuerachu űuna ahrire masiga musa. Masa tirore cahmaina to yuhduchu yohtina duhsasinina mini. Ā jiro tinare cohtasinino nina Cohamacu. Āta ni musare joarocari jire mari coyeiro mari cahīriro Paulo. Cohamacu to masia mehne tīre joarocari jire tiro. ¹⁶ Ā dihta ni joarocara Paulo to joarocaa taharipe. Cristo to tah-tore, űaare yoaeraina mari jihto cāhure yahuro ō sehe dihta ni joarocari jire tiro. Cāa tahari mijo cureare tiro yahu joarocari jire. Paina ne masieraina, tuho masieraina mahűoa mehne to ā nirire cohtota mājana. To ā niri jipachūta soro ni cohtota yahura tina. Paye Cohamacu yare ti joaa pūri cāhure tó seheta yoara tina. Ti ā yoachu űano Cohamacu tinare tuaro buhiri dahrerohca.

¹⁷ Yu coyea, yu cahīina ahri jipihtiare ti ā wahahto pano yahuyui nija musare. Ā jina ahrire masina, noano yoaga musa. űaina musare soro ni ti buhechu ne tuhoena tjiga tinare, “Cristore wacū tua duhuri”, nina. ¹⁸ Ā jina mari puhtoro marie yuhduchu yoarirore Cristore noano wacū tua namoga musa. Tirore, marie to cahīa cāhure noano masi namoga musa. Mīpūre, jipihtia dachoripe tirore noano wahche payojihna mari. “Noariro, tuariro jira”, nijihna mari tirore. Āta nijihna.

1 San Juan

Jesucristo catiare wariro jira

¹ Jesu Cohamacu ya duserore yahuriro jira. Dóiputa wahmanoputa jiriro tiro masare Cohamacu mehne ã jirucuchu yoariro jia tiri jire. Mipure sã tirore yahu joana nija. Tirore tuhona, catiuro warore tirore ñui sã. Á tjira. Tirore ñuna, sã wamomacari mehne tirore dahra ñui sã. ² Ahriro Cohamacu mehne ã jirucuchu yoariro ahri yahpau to masa bajuari baharo tirore sã ñui. Á jina tirore yahuja sã musare. Tiro jipihtia dachoripe to Pucuro mehne jirucuriro to jichu, mipure Cohamacu tirore ñore sãre. Tíre yahuja sã musare. ³ Cohamacu mehne macaina jija sã. To macuno mehne macaina cãhu jija sã. Á jina musa cãhu sã mehne macaina, Cohamacu mehne macaina, to macuno mehne macaina musa jihto cjihtire sã ñurire, sã tuhorire musa cãhure sã yahuja. ⁴ Ahrireta sã joaja noano mari wahchehti cjihtire.

Buhriaro to wete marieno seheta Cohamacure ñaa yoaa ne mariahna

⁵ Ahri buhea Cohamacu macuno sãre to yahuri cjiro jia nina. Miputa ahrire yahunahca sã musare: Cohamacu buhriaro yoaro sehe jira. Buhriaro wete marieno to jiro seheta tirore ne ñaa yoaa mariahna. Ñaa sehe nahitiano yoaro sehe jira. Cohamacure ne ñaa yoaa mariahna. To ã jia tiare yahuja musare. ⁶ Á jina nahitiano jina yoaro seheta mari ñaa yoaina jipanahta “Cohamacu mehne macaina jija” nina, mari mahñona nija. Á yoa Cohamacu yare quihõno yoeraja. ⁷ Á yoa buhriaropu jina yoaro seheta Cohamacu to yoariro seheta mari noaa sehere yoana, paina Jesu yaina mehne noano jina nija. Mari ã yoaina jichu Cohamacu macuno Jesu to di cohãno mehne, crusai to yariari mehne jipihtia mari ñaa yoari buhirire cohãna.

⁸ “Yuhu pini ne ñaa yoeraja”, ni wacuna, mahñoare tuhotuna nija mari. Mari ã ni tuhotuna Cristo yare potocã jiare ne masieraja. ⁹ Wiho mejeta Cohamacure mari ñaa yoarire mari yahuchu tiro quihõno yoariro jiro, mari ñaa boroahca. Á boro jipihtia mari ñaa buhirire cosawerohca tiro. To niriro seheta yoariro jira tiro. ¹⁰ “Ñaa yoeraja” nina, “Cohamacu mahñoriro jira”, nina nija mari. Ó seheta niina to buheare cahmaerara.

2

Cristo marine yoadohora

¹ Yu pohna, musa ñaa yoerahto sehe ahrire joai nija. Yu ã ni joapachuta ñaa yoaboca musa. Musa ã yoachu ñano Jesucristo noariro musa ya cjihtire to Pucurore ó sehe ni sini payorohca: “Ahrina ti ñaa yoari buhirire buhri dahrei tjiga”, ni sini payorohca to Pucurore. ² Cristo mari ñaa yoari buhirire cohãro jira. Mari ñaa yoari buhirire mari dihtare cohãerara. Jipihtiro macainapu cãhure ti ñaa yoari buhirire cohã masina tiro.

³ Cohamacu to dutiare yoana, tirore potocãta noano masija mari. ⁴ Cãiro Cohamacu dutiare yoeraparota “Yuhu Cohamacure masija” nino, tiro mahñoriro jira. Á jiro Cristo yare potocã jiare ne masierara. ⁵ Pairo sehe Cohamacu dutiare yoariro Cohamacure tuaro cahiro jira. “¿Cohamacu mehne macaina jijari mari?” ni masi duana, ó sehe mari masinahca: ⁶ “Cohamacu mehne macariro jija”, niriro Jesucristo yoaro seheta noaare yoariro jiro cahmana tirore. To ã yoariro jichu ñuna “Cohamacu mehne macariro jija”, ni masija mari.

Wahma dutiare yahu ducaha

⁷ Yu cahina, ahri dutia mipure musare yu yahuhto wahma dutia jierara. Ahri dutia musa wahmanopure cjariro cjiro muna dutia tjira. Tí dutiare musa tuho tuhsare. ⁸ Mipu sehere musare yu yahuhto muna dutia jiparota wahma dutia cãhu jira. Cristo, musa cãhu tí dutiare yoara. Miputa nahitiano to pihti wahcãchu mari ñu masino seheta mari masierarir masi ducã wahcãna nija mari. Á jiro buhriaro mehne mari ñu masino seheta Cristo musare potocã jiare masichu yoaro ta tuhsare.

⁹ “Yuhu buhriaropu jiro yoaro seheta Cohamacu dutiare yoariro jija”, cãiro niparota, painare ñu tuhtiriro jiro, tiro Cohamacu dutiare yoerara. ¹⁰ Á yoa pairore cahiro pinihta buhriaropu jiro yoaro seheta Cohamacu dutiare yoariro jira tiro. Á jiro ñaa pari turi yoa duerara. ¹¹ Pairore ñu tuhtiriro sehe nahitiano jiro yoaro seheta jiro nina. Tiro capari ñerariro yoaro seheta jira. To wahahtore ñu masierara tiro.

¹² Yu pohna, Cristo to yariaro mehne musa ñaa yoari buhirire cohãri jire. Á jicu musare yahu joai nija. ¹³ Musa pucusuma cãhu, musa Cristore wahmanopure jirirore masina musa. Musa ã masiina jichu musa cãhure yahu joai nija. Musa wahma yapia ñariro watinore yuhdurucare musa. Musa ã yuhdurucaina jichu musa cãhure yahu joai nija.

¹⁴ Yu pohna, Cohamacu mari Pucure musa masina. Musa ã masiina jichu musare mipure yahu joai nija. Musa pucusuma,

musa Cristore wahmanopare jirirore masina musa. Musa ā masiina jichu musare yahu joai nija. Musa wahma yapia potocāta musa Cohamacare wacū tuaina jira. Ā jina musa Cohamacu yare yoara. Ā yoana, musa ñariro watñore yuhduracare. Ā jicu musare yahu joai nija.

¹⁵ Ahri yahpare ahri yahpa macaa ñaare cahmaena tjiga. Ahri yahpa macaa ñaare cahmaina jina Cohamacu mari Pucu sehere cahmaerara musa. ¹⁶ Ñaina ti basi ñaare ti goa pjari, ñaare ti ñu duari mari Pucu Cohamacu ya jierara. “Noano cjua pahñoriro, masi pahñoriro jija yuhu. Ne cūiro masano yuhure yuhduracaerara”, masa ti ni tuhotua mari Pucu Cohamacu ya jierara. Ti jipihtia ahri yahpa macaa jira. ¹⁷ Ahri yahpa, ahri yahpa macaa cūhu masa ti cahmari cjiri pihitia wahaahca. Cohamacu cahmaare yoariro sehe jipihtia dachoripe Cohamacu mehne jirucurohca.

Cristore ñu tuhtiriro sehere yahuha João

¹⁸ Yu pohna, ahri dacho to pihtiho mahnocā dahsara. “Cristore ñu tuhtiriro tarohca” ni, Jesu yaina musare yahu tuhsure. Mipure Cristore ñu tuhtiina payu ji tuhsure. Ti ā jichu ñuna mipure pihtihti dacho cjihto mahnocā to dahsachu masija mari. ¹⁹ Ahrina Cristore ñu tuhtiina sehe mari mehne jipahta potocā mari mehne macaina jierare. Ā jia tina marine cohānocare. Tina mari mehne macaina jia, mari mehne jiboa. Marine cohānocare. Ti ā cohāchu mari mehne macaina ti jierachu masija mari.

²⁰ Cristo Espiritu Santore musa sehere ware. Ā jiro Espiritu Santo musa mehne jira. Ā jina musa jipihtina Cristo yare potocā jiare masi tuhsura. ²¹ Musare yahucu “Cristo yare masierara musa”, ni tuhotueraja yuhu. Musa Cristo yare masiina jichu ñucu musare yahuja. Cristo ya ne mahñoa jierara. Ti cūhure masiina musa jichu masija yuhu.

²² Ahriro jira mahñoriro: “Jesu Cohamacu masare yuhdachu yoa duti to warocariro Cristo waro jierara”, niriro sehe mahñoriro jira. Potocāta Cristore ñu tuhtiriro jira tiro. Cohamacare, to macano cūhure cahmaerario jira Cristore ñu tuhtiriro. ²³ Ō sehe tjira: Jesure cahmaerario sehe to Pucuro cūhure cahmaerario tjira. Jesure cahmariro sehe to Pucuro cūhure cahmariro jira.

²⁴ Wahmanopare Cohamacare musa tuhori cjirire noano wacūga. Tīre wacūna, Jesu mehne macaina jinahca musa. Ā yoa to Pucuro mehne macaina jinahca. ²⁵ Tīreta Jesu marine yahure. Ō sehe jira to yahuri cjiri: “Musa jipihtia dachoripe Cohamacu mehne jirucunahca”, ni cūre Jesu marine.

²⁶ Paina musare mahñoa nina. Ti ā mahñoare masicu musare yahu joai nija. ²⁷ Ā ti mahñoaina musa jipachuta musa sehere Cristo Espiritu Santore wa tuhsure. Espiritu Santo musa mehne jira. Musa mehne jiro musare buheriro jira. Ā jiro tiro jipihtiare musare yahura. To yahua potocāta jira. Mahñoare yahuerara tiro. Ā jina paio musare buhehtirore cahmaerara musa. Espiritu Santo to niriro seheta yoaga musa mipure. Ā yoana musa Cristo yare tuhona, tiro mehne macaina jiga.

²⁸ Ā tjira. Yu pohna, Cristo mehne macaina jiga musa. Ā jina Cristo to tahti dachore musa cuisu. Ā jina tiro to tahti dachore musa buo ti duhtisi. ²⁹ Cristo noaare yoariro to jichu musa masina. Tīre masina ahri cūhure masiga musa. Jipihtina noaare yoaina Cohamacu pohmata jira. Ahri cūhure masiga musa.

3

Musata Cohamacu pohna jira

¹ “Musa yu pohna jira” nino, tuacaro cahī yuhduracajari Cohamacu marine. To ā cahūna jinata to pohna jija mari. Ahri yahpa macaina ñaina Cohamacare masierara. Ā jia Cohamacu pohna mari jichu ñua tina mari cūhure masierara. ² Yu cahūna, mipure Cohamacu pohna jija mari. Ā jipanahta baharo mari jihti cjihtire mari noano masierasinja. Ā masierapanahta ahri sehere masija. Cristore mari ñuna, dóhta mari tirore ñu masinahca. Ā jina Cristo marine to bajuachu tiro to jiro seheta mari cohtotanahca. ³ Jipihtina ahrire masiina Cristo to tahtore cohtaina tirore ñu cūa ñaare yoa duaerara.

⁴ Ñaare yoana to dutiare yuhduracana nija. Ā jia jipihtina ñaare yoaina Cohamacu dutiare yuhduracaina jira. ⁵ Cristo masare ti ñaa buhirire cohāhtiro cjihto bajuari jire. Tiro ne ñaare yoaerara. Tīre masina musa. ⁶ Ā jia jipihtina Cristo yaina ñaare yoarucuerara. Pairo sehe ñaare ā yoarucueriro Cristore wacū tuaeraro, ne tirore masierara. Ā jiro Cristo yairo jierara. ⁷ Yu pohna, musare mahñoinare ne tuhoena tjiga. Jipihtina noaare yoaina Cristo yoaro sehe noaina jira. ⁸ Pairo sehe ñaare ā yoarucueriro watño yairo jira. Watño pinihta dóhta ñaare yoariro jia tiri jire. Ā jiro watño to ñaare yoaare, to ñaare yoa dutia cūhure duhuchu yoahitiro cjihto Cohamacu macano bajuari jire.

⁹ Cohamacu pohna jina Cohamacu yoaro seheta jiina jija. Ā jinata ñaare yoarucueraja. Cohamacu mari Pucu to jichu mari sehe ñaare yoarucu masieraja. ¹⁰ Ō sehe jinare

Cohamacu pohnare masinahca: Cohamacu pohna watino pohna yoaro sehe jierara. Naare yoarucuina, painare cahieraina Cohamacu pohna jierara.

Musa mehne macainare cahiga

¹¹ “Mari mehne macainare cahijihna”, ni buheare wahmanopure tuho tuhsure musa. ¹² Mari Cañ to ñano yoariro seheta yoena tjijihna. Tiro watino yairo jiro, to bahurore wajaa tiri jire. ¿Dohse yoaro tirore wajari, musa tuhotuchu? Tíre yahuihtja musare: Cañ to yoari cjiri ñaa jia tiri jire. To bahuro sehe to noaare yoariro jichu ñu tuhtiro to wahmino sehe tirore wajaa tiri jire.

¹³ Á jina yu coyea, ahri yahpa macaina musare ti ñu tuhtichu “¿Dohse jiro baro marine ñu tuhtijari tina?”, ni tuhotuena tjiga. ¹⁴ Mari pichacapu wahaborina jimai. Mipure manopu á jirucuhina cohtotarinaru jina nija mari. Jesu yainare cahina, Cohamacu marine to cohtotachu yoarire masija mari. Masare cahierariro pichacapu wahahtiro jira. ¹⁵ To coyeirore ñu tuhtiriro masare wajariro jira, Cohamacu to ñuchu. Masare wajaina ne manopu Cohamacu mehne jirucusi. Tíre noano masina musa. ¹⁶ Masare cahiare ó sehe masinahca. Jipihntia dachoripe Cohamacu mehne mari jihnto cjhntore Cristo yariaro marine tuaro cahire. Á yariaro marine to á cahirucurire masichu yoaro nire. Á jina Cohamacu to cahmachu mari cahure Jesu yaina yaro jiborirore yariaro cahmaboca. ¹⁷ Payu cjuariro Jesu yairore pjacurorore ñaparota tirore pja ñueraro, Cohamacure cahierara tiro. ¹⁸ Yu pohna, mari cahia sehe mari dusero dihta wijaero tjijaro. Masare mari cahina, potocata tinare yoadohoro cahmana marine.

Cuiro marieno Cohamacu cahai ji masija mari

¹⁹ Tó seheta cahina mari potocá Cohamacu yaina mari jia tia cahure masinahca. Á jina Cohamacu cahai ne cuiro marieno mari ji masija. ²⁰ Á jina “Ñaa buhiri jica yuhure”, mari ni tuhotupanahta, Cohamacu cahai cuiro marieno ji masija. Tiro sehe mari yuhdoro tuariro jiro jipihtiare masi pahñoriro jira. ²¹ Yu cahina, noaare yoana, “Noaa sehere yoana nija”, ni tuhotuna, Cohamacu cahai mari cuiro marieno ji masija. ²² Cohamacu to dutiare, to cahmaa cahure mari yoachu, tirore mari sinino purota tiro warohca. ²³ Ó sehe dutira tiro marine: “Cohamacu macunore Jesucristore wacu tuaga. Á yoa Cristo marine to dutiriro seheta musa mehne macainare cahiga musa”, ninota dutira marine.

²⁴ Cohamacu dutiare yoariro Cohamacu mehne macariro jiro nina. To á jiriro

jichu, Cohamacu tiro mehne macariro jira. Cohamacu mari mehne macariro to jiare mari masi duachu marine to wariro Espiritu Santo tíre marine masichu yoarohca.

4

Mahñoare ti buhechu, Cohamacu yare ti buhechu cahure noano ñu masi dutiha

¹ Yu cahina, paina “Cohamacu yairo Espiriture cjuaja”, niina ti jipachuta ti buhea mahñoa jira. Paina sehe Espiritu Santo warore cjuaina ne mahñoa marieno buhera tina. Payu “Cohamacu yare yahu muhtaina jija”, nipahta mahñoa jira mipure. Jipihtiropu jira tina. Á jina paina musare ti buhea sehe mahñoa buhea jichu ñu masiga musa. Cohamacu ya ti jichu cahure ñu masiga musa. ² Cohamacu yairo Espiritu Santore cjuainare musa ñu masi duana, ó sehe masinahca: “Jesucristo ahri yahpau mari yoaro sehe pjacu tiriro bajuari jire” ni, buheina Cohamacu yairo Espiritu Santore cjuaina jira tina. Á jina á ni buheinare ñu masinahca musa. ³ Paina sehe “Jesu ahri yahpau mari yoaro sehe pjacu tiriro bajuerari jire” ni, buheina Cohamacu yairo Espiritu Santore cjuaraina jira. Ti ya tuhotua Cristore ñu tuhtiro to tuhoturo seheta jira. “Cristore ñu tuhtiro tarohca”, ti nirire tuho tuhsure musa. Á yoa to ya buhea ahri yahpature wihi tuhsure.

⁴ Musa sehe yu pohna, Cohamacu yaina jira musa. Á jina “Cohamacu yare yahu muhtaina jija sa” ni, mahñoinare yuhduruca tuhsure musa. Musa mehne jiriro Espiritu Santo sehe tua yuhdurucara. Á jiro ahri yahpa macaina yairo watino yuhdoro tuara. Á jina mahñoinare yuhdurucare musa. Á jina ti buheare cahmaerare musa. ⁵ Mahñoa sehe ahri yahpa macaina ñaina jira. Á jia tina ahri yahpa macaa ñaare ti buhechu ahri yahpa macaina ñaina sehe tinare noano tuhora. ⁶ Mari sehe Cohamacu yaina jija. Á jia Cohamacure masiina marine noano tuhora. Paina sehe Cohamacu yaina jiaera, marine ne tuho duarera. Ti á tuho duarachu ñuna ti ya buhea Cohamacu ya buhea ti jierachu masinahca mari. Paina sehe marine ti tuhochu ti ya buhea noaa buhea ti jichu cahure masija mari.

Cohamacu painare tuaro cahirucuiro jira

⁷ Yu cahina, Cohamacu marine painare cahichu yoariro jira. To á yoariro jichu ñuna mari mehne macainare cahijihna mari. Masare noano cahina sehe Cohamacu pohna jira. Á jia tina Cohamacure noano masina. ⁸ Cohamacu jipihtinare tuaro cahirucuiro jira. To á cahirucuiro to jichu masare cahieraina sehe Cohamacure masierara. ⁹ Cohamacu marine to cahire

mari masi duana, ò sehe masinahca: Cohamacu sehe to macunore cáirota jirirore marine yuhduchu yoahtiro cjihtore ahri yahparure warocari jire. Á warocaro marine to cahiare marine masichu yoaro niri jire. ¹⁰ Cahia waro ò sehe jira: Cohamacure mari cahiri cjiri sehe potocã cahia waro jierara. Marine Cohamacu to cahia sehe potocãta cahia waro jira. Á yoa to macunore mari ñaa buhirire cohãhtiro cjihtore warocaro marine tuaro cahina tiro.

¹¹ Yu cahina, Cohamacu ã tuaro marine to cahichu ñuna mari cõhu mari mehne macainare cahijihna. ¹² Masa sehe ne Cohamacure ñuerare. Tirore ñueraina mari jipachuta mari mehne macainare mari cahichu, Cohamacu sehe mari mehne ã jirucuro nina. Á jiro potocãta marine cahĩ namorucuhu yoara tiro. ¹³ Cohamacu sehe marine to yairo Espiritu Santore ware. Á jina Espiritu Santore cõana, Cohamacu mehne mari noano jia tiare, tiro sehe mari mehne to noano jia tia cõhure masija mari. ¹⁴ Á yoa Cohamacu mari Pucu to macunore ahri yahpa macainare yuhduchu yoahtiro cjihtore to warocarire sã ñu. Tire ñuna painapure tire yahuja sã. ¹⁵ Cohamacu mehne macariro ò sehe niriro jira: “Jesu Cohamacu macuno jira”, niriro tiro pini Cohamacu mehne macariro jiro nina. Á yoa Cohamacu cõhu tiro mehne macariro jiro nina.

¹⁶ Á yoa marine Cohamacu to cahiare masija mari. Cohamacu jipihtinare tuaro cahirucuriro jira. Á jiro cáiro masare cahirucuriro jiro, Cohamacu mehne macariro jira. Á jiro Cohamacu cõhu tiro mehne macariro jira. ¹⁷ Á jina mari noano cahĩ namorucuja Cohamacure, paina cõhure, buhiri dahreri dacho jichu mari cuiro marieno mari jihto cjihtore. Á jina cuiisi mari ahri yahpai Cristo yoaro sehe jina. ¹⁸ Painare cahia mehne ne cuiro mariahna. Cohamacu marine to cahiare masina mari ñano wahahtore ne cuieraja. Masa cuia tinare buhiri dahrehtore cuiina jira. Á jiro cuiiro sehe Cohamacu cahiare masierariro jira.

¹⁹ Marine Cohamacu cahĩ muhtari jire. Á jina mari cõhu tirore cahija. ²⁰ Cáiro “Cohamacure cahija”, niriro jiparota pairore ñu tuhtiriro jiro, mahñoriro jira tiro. Tiro to ñurirore cahieraro, Cohamacure cahĩ masierara tiro, tirore ñueraro. ²¹ Á jiro õi jira marine Cristo to dutia: Cohamacure cahiriro jicu mu cahai jiriro cõhure cahiga.

5

Cohamacu pohna ahri yahpa macaa ñaare yoa duaerara

¹ Jipihtina Jesure “Cohamacu masare yuhduchu yoa duti to warocariro Cristo jira” niina, Cohamacu pohna jira. Paina pucunore cahina, to pohna cõhure cahija mari. ² Tó seheta Cohamacure cahina, to dutiare noano yoana to pohna cõhure mari cahina nija. ³ To dutiare noano yoana Cohamacure cahina nija. Cohamacu to dutiare mari yoachu marine waruorerara. Mari jipihtina Cohamacu pohna jina, ahri yahpa macaa ñaare cahmaeraja mari. Á jia to dutiare mari yoachu waruorerara. ⁴ Cohamacure wacu tuana ne ahri yahpa macaa ñaare cahmaeraja. Á jina tirore mari wacu tuari baharo ñano yoa duaeraja. ⁵ Ñaare cahmaerana ò sehe niina jija mari: “Jesu Cohamacu macuno jira”, niina jina ahri yahpa macaa ñaare cahmaeraina jija mari.

Cohamacu macunore yahuha João

⁶ Jesucristo ahri yahparu to tachu tirore João co mehne to bautisarire masina, crusaru to di cohãri cõhure masina, Cohamacu macuno to jiare masija mari. To bautisari dihta Cohamacu macuno to jiare marine masichu yoerara. To di cohãri cõhu marine tire masichu yoara. Espiritu Santo “Jesucristo Cohamacu macuno jira”, ni yahura marine. Tiro potocã ni yahuriro jira. ⁷ Á jia Jesu Cohamacu macuno to jiare tiaro marine yahura: ⁸ To macuno to jiare Espiritu Santo sehe marine yahura. Á yoa Jesure co mehne to bautisari cõhure masina, Cohamacu macuno to jiare masija mari. Á jina mari ya cjihtire to yariarire to di to cohãrire masina, Cohamacu macuno to jiare masija mari. Á jia tí sehe cõno potori marine masichu yoara Jesu Cohamacu macuno to jiare. ⁹ Masa ti yahuaure tãhona “Potocã tjira”, nija mari. Á niina jipanahta Cohamacu to macunore to yahuchu masa ti yahua yuhdoro tiro sehene noano tãhoro cahmana marine. Cohamacu waro to jichu to macunore to yahuaure tãhoro cahmana marine. ¹⁰ Á jia jipihtina Cohamacu macunore wacu tuaina Jesure yahua buheare noano tãhoro. “Potocã tjira”, ni tãhotura tina Jesure yahua buheare. Cohamacu to macunore to yahuaure tãhorerariro “Cohamacu mahñoriro jira”, niriro jira tiro. ¹¹ Cohamacu marine jipihtia dachoripe to catia mehne ã jirucuhu yoarohca. Cohamacu macuno yaina mari jichu ñuno ã jirucuhu yoarohca marine. Ahri jira Cohamacu marine to yahua. ¹² Cohamacu macuno yaina jia to catia mehne ã jirucuahca. Paina tirore cahmaeraina sehe to catia mehne ne ã jirucusi.

Yahu to joa batoa jira

¹³ M^usa Cohamac^u mac^uno^{re} wac^u tu-
aina Cohamac^u catia mehne \bar{a} jirucunahca.
Tⁱre m^usa masihtⁱ cⁱhtire m^usare yahu joai
nija.

¹⁴ Cohamac^u to cahmariro seheta mari
tirore dohse jiare mari sinich^u tiro marine
noano tuh^o n^un^unohca. \bar{A} mari sinina "Po-
toc^ata noano tuh^ora tiro", ni masija mari.

¹⁵ Tirore mari sinich^u, tiro marine tuh^ora.
To \bar{a} tuh^orire masina, tirore mari sinino
purota to wahtiro jich^u c^uh^ure masija mari.

¹⁶ M^usa coyeiro to \bar{n} aa^{re} yoach^u \bar{n} una,
tⁱ \bar{n} aa Cohamac^u pichacap^u to waha du-
tia \bar{n} aa jierach^u, tirore sini payobasaga Co-
hamac^ure. \bar{A} jiro Cohamac^u tirore yoad-
ohoro to catia mehne \bar{a} jirucuch^u yoaro-
hca tirore. Cohamac^u pichacap^u to waha
dutieraina dihtare sini payobasaga m^usa.
Paye \bar{n} aa sehe Cohamac^u pichacap^u to waha
dulia \bar{n} aa waro jira. C^uiro tⁱ \bar{n} aa warore
to yoach^u "Tirore sini payobasaga m^usa",
nieraja y^uh^u. ¹⁷ Jipih^tia \bar{n} aa yoaa \bar{n} aa warota
jira, Cohamac^u to \bar{n} uch^u. Tⁱ \bar{a} jipach^uta paye
 \bar{n} aa Cohamac^u pichacap^u to waha dutia \bar{n} aa
jierara.

¹⁸ Cohamac^u mac^uno Jesu sehe Cohamac^u
pohnare noano \bar{n} u wihbora. To \bar{a} \bar{n} u wih-
boch^u watⁱno sehe Cohamac^u pohⁿare ne
 \bar{n} ano yoa masierara. \bar{A} jia Cohamac^u pohⁿa
sehe \bar{n} aa^{re} \bar{a} yoarucuerara. Ahrire mari
masija.

¹⁹ Mari sehe Cohamac^u yaina jija. Watⁱno
sehe ahri yahpa macaina puhtoro jira. Ahri
c^uh^ure mari masija.

²⁰ Cohamac^u mac^uno ahri yahpap^ure taro
marine noano masich^u yoare tiro. To \bar{a}
yoach^u potoc^ata Cohamac^u waroreta mari
noano masija. Ahri c^uh^ure mari masija. Co-
hamac^u mac^uno Jesucristo yaina jija mari.
 \bar{A} jina potoc^ata Cohamac^u waro mehne
macaina jina nija. Ahriro y^u niriro po-
toc^ata Cohamac^u waro jira. \bar{A} yoa ahriro to
mac^uno to catia mehne \bar{a} jirucuch^u yoariro
jira. ²¹ Y^u pohⁿa, "Cohamac^u jira", tⁱ nia
mas^urine \bar{n} o payoena tjiga.

2 San Juan

Jesucristo yare, potocã cahña cãhure yahuha

¹⁻² Yũhũ bũcũro mũhũre Cohamacũ to besericorore mũ pohna cãhure ahri pũre joarocaja. Jesucristo yare yãhtiina jija mari. Tiro to buhea cãhũ mari mehne jipihitia dachoripe ã jirucuahca. Æ jicũ potocãta mũsare cahña yũhũ. Yũhũ dihta cahĩcũ nieraja mũsare. Paina Jesu yare masiina tina cãhũ potocãta cahña mũsare. ³ Cohamacũ mari Pũcũ, Jesucristo to macũno cãhũ potocãta ti cahña mehne marine noano yoaaahca. Æ jia pja ñũa mehne marine noano jichũ yoajaro tina.

⁴ Cohamacũ mari Pũcũ marine to dutiriro seheta cãina mũ pohna to yare yãhtiina ti jichũ masicũ wahcheja yũhũ. ⁵ Yũ cahĩricoro, mipũre mũhũre yũ dutihtto wahma dutia jierara. Wahmanopũre ahri dutia marine dõipũta ji tuhsũri jire. Õ sehe dutira marine. Mari mehne macainare cahñijhna. ⁶ To dutiare yoa pahñõna mari tirore cahña. Wahmanopũre mũsa tãhoriro seheta mipũ cãhure õ sehe dutira mũsare. Painare Æ cahĩrucuina jiga.

Payũ mahñõina jira

⁷ Payũ mahñõina “Potocã Jesucristo ahri yahpũpũ mari yoaro sehe pjacũ tiriro masa bajuerari jire”, niina cãhũ ahri yahpa macainare buhea wahare. Tõ sehe niina mahñõriro, Cristore ñũ tuhtiriro yoaro sehe jiina jira. ⁸ Noano yoaga mũsa. Cohamacũ ya wapare mũsa noano yoari wapare boena tjiga. Mũsa Æ boerachũ Cohamacũ noa yũhũaro yoarohca mũsare.

⁹ Jipihitina Cristo yare yũhũrucaina, Cristo yare quihõno buheraina Cohamacũ yaina jierara. Æ yoa Cristo yare ne cohãeraina Cohamacũ mari Pũcũ, to macũno mehne macaina jira tina. ¹⁰ Cristo ya buheare ne cahmaerariro, paye buheare yahuriro mũsa cahai to tachũ, tirore mũsa wũhũi sãa ta dutiena tjiga. Tirore piti bocaena tjiga. ¹¹ Paye buheare yahuriro Cristo yare cahmaerariro ñano yoara. Æ jiro tirore piti bocariro sehe ñano yoarirore yoadohoro nina.

Yahu joa batõa jira

¹² Payũ mũsare yahu duapaihta tĩre joa duaeraja. Mũsare ñũi waha duaja. Mũsare ñũcũ mũsa mehne sũhũduihtja mari noano wahchehti cijhtire.

¹³ Cohamacũ to besericoro mũ baho pohna sehe mũhũre noa dutira.

3 San Juan

João Gayo wama tirirore "Noariro jira", naha

¹ Yuhũ bũchũro mũhũre Gayore potocã yũ cahĩrirore ahri pũre joarocaja.

² Yũ cahĩriro, Cohamacũ mehne macariro mũ jichũ masija yũhũ. Tiro mehne mũ noano jĩro seheta mũ noano yũhdũhti cjihtire, mũ pjacũ dohatiro marieno mũ jihti cjihtire Cohamacũre sini payoja mũhũre. ³ Mahainacã Jesu yaina yũ cahai wihia mũ jia tiare yahuhre yũhũre. "Cristo to cahmano seheta potocãta yoa namono nihre Gayo", ni yahuhre tina yũhũre. Ti ã ni yahuchũ tũhocũ tuaro wahchehi yũhũ. ⁴ Mũsa Jesu yare yũ buherina cjiri to cahmano seheta mũsa yoachũ tũhocũ tuaro wahcheja.

⁵ Yũ cahĩriro, Jesu yainare yoadohocũ noano yoara mũhũ. Mũ ñũ masieraina ti jipachũta, tinare yoadohocũ noa yũhdũaro yoara mũhũ. ⁶ Tina panopũ mũ ñũ masieraina sehe Jesu yainare õi cahmachuinare sãre õ sehe ni yahuhre: "Gayo Jesu yainare noano cahĩna", ni yahuhre panopũ mũ ñũ masieraina sehe. Baharo mũ ya macare ti yũhdũ wahcãchũ ñũcũ tinare noano yoadohoga Cohamacũ to wahchehto sehe. ⁷ Tina Jesu yare buhe tinia wahaa, Cohamacũre cahmaeraina ti yoadohochũ cahmaerara. ⁸ Æ jina tinare Jesu yare buhe tiniinare yoadohojihna mari. Tinare ã yoadohona nija potocã jiare ti yahuhti cjihtire.

Diotrefe to ñaa yoarire yahuha João

⁹ Tó macainare Jesu yainare mahanocã joarocamahi. Yũ ã joarocapachũta Diotrefe to basi ti pũtoro yoaro sehe ji duaro, yũhũre tũho duaerayuhca. ¹⁰ Mũsa cahai yũ sũri baharo to yoarire mũsare yahu pahũoihtja. Sãre ñano durucuyuhca tiro. Mahũoa payũriro jira tiro. Æ yoa paye ñaa cũhũre yoayuhca tiro. Jesu yainare to yare buhe tiniinare ne tiro to wũhũre sãa ta dutierayuhca. Æ yoa paina tó macaina Jesu yaina sehe buhe tiniinare ti sãa ta dutichũ ñũno tiro sehe "Buhe tiniinare sãa ta dutiena tjiga mũsa ya wũhũsepũ", ni yahusãyuhca tinare. "Mũsa ya wũhũsepũ buhe tiniinare mũsa sã ta dutiri buhiri mari Jesu yaina mari cahmachuri wũhũpũre sãaena tjiga mũsa sehe", niyuhca Diotrefe tó macainare Jesu yainare.

¹¹ Yũ cahĩriro ñainare ñũ cũi tjiga. Noano yoaina sehene ñũ cũga. Noaare yoaina Cohamacũ yaina jira. Ñaare yoaina Cohamacũre masierara.

Demetrio noaa to yoarire yahuha João

¹² Jipihtina noano durucura Demetrio sehere. Æ yoa to yoarire ñũa noano to yoariro jichũ masina masa. Sã cũhũ tirore ãta ni yahuja. Sã yahua sehene potocã jichũ masina mũsa.

Yahu batoaha João

¹³ Mũhũre payũ yahu duamahi. Æ yahu duapaihta tĩre joaeraja. ¹⁴ Mahanocã baharota mũhũre ñũ duaaja. Æ jina tórcũ mari basi sũhdũnahca.

¹⁵ Noano jiga mũhũ. Mari mehne macaina õ macaina Jesu yaina cũhũ mũhũre noa dutira. Tó macaina mari mehne macaina jipihina noajaro.

San Judas

Juda Jesu yainare joarocaha

¹ Yuhū Juda Santiago bahuro Jesucristore dahra cohtariro musare Jesu yainare ahri pūre joarocaja. Musare Cohamacu mari Pucū besea tiri jire. Ā jina to cahīa mehne noano jira musa. Ā yoa musare Jesucristo űū wihboro nina. ² Noa dutija musare. Cohamacu musare pja űūno to yoadohoro mehne to cahīa mehne noano jiga musa.

Mahűoina ti buheare yahu dūcaha Juda (2P 2.1-17)

³ Cohamacu marine pichacapu waha-borinare to yuhdūchu yoa sehere tuaro joaroca duamahi musare, yū cahīinare. Ā joa duapaihta musare mipure mahűoa buheare cahma sāaeracu musare joarocaja. Ā jina Jesucristo ya yahua sehere tuaro yahuga. Ahri yahua sehere tūhona, mari Cohamacure noano wacū tuaja. Ahri yahua sehe Jesu to cūrina to yainare ti yahuri cĵiri āta jirucunocahna cohtotaro marieno. ⁴ Mahainacā masa űaina Cohamacure cahmaeraina wacūenoca musa cahai wihire. Musa mehne jia tina ō sehe ni yahumana musare: “Cohamacu yaina musa jichū, tiro cahīna musare. Ā jiro numia mehne musa űano yoachū tiro musare ne buhiri dahresi”, ni yahumana tina. Ā jia mari puhtore cāirota jirirore Jesucristore “Cohamacu macyno jierara”, ni yahumana tina. Ō sehe ni yahuinare Cohamacu to buhiri dahrehtore yahua tiri jire panopare. To yare ti joari pūi ā ni yahua tiri jire.

⁵ Mipure musare payere wacūchu yoa duaja. Ahrire musa masipachūta pari turi ahrire musare wacūchu yoa duaja. Cohamacu judio masare Egiptoi jĵinare to naa wiori baharo tina mehne macainare tirore wacū tuarainare tiro wajāa tiri jire. ⁶ Ā yoa paina cūhure wacūga musa. Paina anjoa sehe Cohamacu dutiare yoa duaera tiri jire. Ā jia tinare to ji duti to cūrirore tina ji duaera tiri jire. Ā yoa ti jimarirore cohānocaa tiri jire tina. Ti ā cohāchu űūno Cohamacu nahitianopu tinare peresu yoaa tiri jire. Ā jia tina pĵitiri dacho pano comaa dari mehne dahterina yoaro sehe jirucūca tina to peresu yoinara. Ā jiro pĵitiri dacho jichū tinare buhiri dahrerohca Cohamacu. ⁷ Āta yoaa tiri jire paina cūhū. Tina cūhure wacūga musa. Tina Sodoma wama tiri maca macaina, Gomorra wama tiri maca macaina tĵi macari cahacāi jia macari macaina cūhū numia mehne űano yoaa tiri jire. Soro yoaa cūhure yoaa, tina mūa sehe ti basita ti pĵacūgi mehne űano

yoaa tiri jire. Numia cūhū āta yoaa tiri jire. Ti ā yoari buhiri Cohamacu tinare jū pahűonocaa tiri jire. Tinare jūno Cohamacu jĵipĵitina tirore yuhdūrcainare to buhiri dahrehtore masare űūno nia tiri jire. Tinare to buhiri dahri pichaca ne yatisi.

⁸ Tina Cohamacu to buhiri dahrerina cĵiri yoaro seheta mipu cūhure āta yoarucura mahűoare buheina. Tina tūho masieraina yoaro seheta ti pĵacūri mehne űano yoara. Ā yoa Cohamacu dutiare ne cahmaerara tina. Ā yoa mūano macaina si siteinare tina sehe űano durucu cohtara. ⁹ Noaina anjoa sehe tuaina jĵipahta ā ni durucuerara. Miguel wama tirore anjoa puhtoro sehe Moise pĵacu cĵirore cahmano, wafino mehne cahma sayoa tiri jire. Tua yuhdūariro jĵiparota tiro “Wafino yuhdoro yuhū pinihta tuaja”, ni tūhotuera tiri jire. Ā jiro to mū sūro wafinore űano durucuera, tirore tuhtiera tiri jire. Ā jiro ō sehe nia tiri jire wafinore. “Cohamacu mūhure tuhtĵiaro”, nia tiri jire Miguel wafinore. ¹⁰ To ā yoariro jĵipachūta ahriina mahűoina sehe ti masierainare űano durucu cohtara. Ā yoa wahĵuina tūho masieraina ti mū sūro ti yoaro seheta tina mahűoina cūhū yoara. Ā yoaina jia, pichacapu wahaahca.

¹¹ Tinata űano yuhdūahca. Caĵi cĵiro to yoariro seheta űano yoara tina cūhū. Ā jia Balāa to yoariro seheta tina niűerure na duaa, mahűoare buhera. Ā yoa Coré to puhtore cohā duariro cĵiro yoaro seheta tina cūhū to seheta yoara. Ā jia tiro yoaro seheta tina cūhū pichacapu wahaahca. ¹² Tina mahűoina sehe musa cahma cahĵihti bose nūmūrine chūa, űo payoa marieno mehne tina ti cahmano pape, ti sahserota chūare bora painare waro marieno. Wete yoaro sehe tina musa bose nūmūrine noaa dachori jĵiborirore dojomehne cohtara. Me curuari wihnono to wārocaa curuari, co mariea me curuari ti yaba cĵihti jieraro seheta tina mahűoina ne yaba cĵihti jierara. Ā yoa dicha tiri pĵa jichū dicha tieraa yucūri yoaro sehe jira tina. Tĵi yucūri pua tahapu yariaa wahara. Cū taha dicha tieraa yucū, yariaa yucūri yoaro sehe waha tuhsara. Tĵi yucūrire ti duhari baharo pari turi yariaa wahara tĵoa. Tĵi yucūri yoaro seheta jia yaba cĵihti jierara tina mahűoina. ¹³ Ā yoa pĵiri ma maca pahcōri buĵua pahcōri yoaro sehe jira tina. Tĵi pahcōri ti cĵāruca ōchu, wete tia sahpo wahara. Dohse jiare tina mahűoina ti yoachū pahcōri maca sahpo wete tia sahpo ti waharo seheta mahűoina ti űaa yoaa jira. Ā yoa si mū wahcāa poca űahpichoha poca yoaro sehe jira tina. Tĵi űahpichoha poca ti wahahti mahare duhunoca, ti ā cohtotarucuro seheta tina cūhū quĵiűno buheraa,

ã cohtotarucura. Ti ã yoari buhiri nahitapanorꝯ, ñanorꝯ ã jirucuahca tina mahñoina.

¹⁴⁻¹⁵ Enoco panorꝯ macariro cjiro Adão panamana seis baharo to panami tiriõ õ sehe nia tiri jire tinare mahñoinare: “Tuhoga yahure. Cohamacꝯ payꝯ to yaina anjoa noaina mehne jipihtina ñainare ti ñaa buhiri buhiri dahrero tarohca. Æ yoaro jipihntina Cohamacꝯre ñu tuhtiinare ti ñaa yoari buhirire tinare buhiri dahrero tarohca Cohamacꝯ. Cohamacꝯre ñano ti durucuri buhiri cãhare tinare buhiri dahrero tarohca”, ni yahuyua tiri jire Enoco. ¹⁶ Tina mahñoina painare tuhtiina, nurerucuina ti ñano wacũa dihtare yoara tina. Æ yoa “Painare masi yãhdꝯꝯcaja sã”, nirucura tina. Æ jia ti cahmano sehe yoa duaa, paina ti cãaare na duaa, mahñõ cũ durucura tuhõ ji coaropꝯta.

Jesu yainare yahu namoha Juda

¹⁷ Mari pãhtoro Jesucristo buhe duti to cõrina ti buherire wacũga mꝯsa, yꝯ cahĩina. ¹⁸ Õ sehe ni buhere tina marine. “Ahri yahpa to pihtiõto panocã Cohamacꝯre, mꝯsa to yaina cãhare ñano durucu bujũpeina jiahca. Tina Cohamacꝯre cahmaeraa, ñaare ti goa pãaare yoaahca”, ni yahure Jesu to cõrina mꝯsare. ¹⁹ Jesu yainare ti basi ti cahma ñu tuhtichꝯ yoara tina mahñoina sehe. Æ yoa tina ñaina ti mꝯ sũro yoina jia, Espĩritu Santore ne cãaerara tina. Ti ñaa goa pãa dihtare yoara tina.

²⁰ Mꝯsa sehe yꝯ cahĩina, Jesucristo ya buheare noano tuhõ namoga, noano wacũ tuaina mꝯsa jihto sehe. Tĩ buhea sehe ñaa mariea buhea noa yãhdꝯara. Espĩritu Santo yoadohoa mehne Cohamacꝯ mehne durucuga mꝯsa. ²¹ Cohamacꝯ mꝯsare tuaro cahĩina. Tĩre masina tirore noano yãhtiina jiga mꝯsa. Æ yãhtiina jiga, Jesucristo mehne mꝯsa ã jirucũhtire mꝯsa cohtaro watoĩ. Tiro marine pãa ñũno mꝯanorꝯ ã jirucuchꝯ yorohca.

²² Cristo yare “Quihõno jieraboca”, ni tuhõtuinare pãa ñũga. ²³ Painare yoadohoga pichacapꝯ ti wahaerahto sehe. Æ jina painare pãa ñũga mꝯsa. Tinare yoadohona mꝯsa cãhꝯ ti ñaa yoaare ñu cũena tjiga. Wete tiri suhtirore mꝯsa cahmaeraro seheta, paina ti ñaa yoaare cahmaena tjiga mꝯsa, “Ti ñaa yoaare ñu cũ yoari”, nina.

Juda Cohamacꝯre to ñõ payoa jira

²⁴ Cohamacꝯ mari pãhtoro marine ñu wihbo masina ñaare mari yoaerahto sehe. Æ jiro tiro si siteriro marine ñaa buhiri marieinare mꝯanorꝯ to cahapꝯ cũ masina. Æ marine tõpꝯ to cũchꝯ mari wahchenahca. ²⁵ Tiro Cohamacꝯ cãirota jira. Pairo mariahna. Pichacapꝯ wahaborinare

marine yãhdꝯchꝯ yoariro jira. Tiro sehe panorꝯ, mĩpꝯre, jipihntia dachoripe cãhare noa yãhdꝯariro, mari bui pãhtoro jiriro, tua yãhdꝯariro, jipihntinare dutiriro jira. To ã jiriro jichꝯ mari pãhtoro Jesucristo to yoadohoa mehne tirore ñõ payoa mehne wahchejihna. Æta yoajihna.

Apocalipsis

Baharopure ahri dacho to dohse wahahtore marine masichu yoaha Jesucristo

¹ Ahri pui Jesucristo marine to masichu yoarire yahu joarocai nija. Cohamacu sehe tire yahu dutiro cūri jire tire, to yainare tire dakra cohtainare masichu yoa dutiro. Ā jiro michapucacāta to dohse wahahtore masichu yoari jire tiro. Mahanocā dūhsa mujano nina to ā wahahto. Jesucristo to ā cūchu tiro sehe anjore tire yuhare Joāore yahu dutiro warocari jire. ² Ā jicu yuhu Joāo jipihtiare yu űurire yahu joarocai nija. Cohamacu ya durucare Jesucristo ya buheare yahu joarocai nija.

³ Ahri pui baharopu to dohse wahahtore yahu joai nija. Mahanocā dūhsa mujano nina ahri jipihitia ti ā wahahto. Ā jia jipihitia ahri pūre buheina, yu yahuare noano tūhoina yu yahuriro sehe yoaina wahcheina jiahca.

Siete curuari macainare Jesu yaina cahmachuinare joarocaha Joāo

⁴ Yuhu, Joāo musare siete curuari macainare Jesu yainare Asia yahpa macainare joarocaja: Cohamacu to cahia mehne musare noa dutija. Ā yoa to yoadohoa mehne noano jiga musa. Tiro panoputa ā jirucuriro jia tiri jire. Mipu cāhure ā jirucura. Baharopu tarohca. To puhtoro dujiro panoi jiina siete pjacu bajueraina jira. Tina ti cahia mehne noano jiga musa tjoa. ⁵ Jesucristo to cahia mehne noano jiga musa tjoa. Cohamacu yare mahūono marieno yahuriro jira tiro. Ā jiro to yariari baharo to masa mujari baharo ne pari turi yariasi tiro. “Ō sehe masa mējaaahca yu yaina”, ni űu quihō mūhtariro jira tiro. Ā jiriro jiro jipihitina ahri yahpa macaina puhtoa ti bui puhtoro jira tiro. Marine cahūno to di cohāri mehne mari űaare cosawere tiro. ⁶ Ā cosawero marine puhtoa sōre tiro. Sacerdotea marine wahachu yoare tjoa. Cohamacu Jesu Pucuro to yare yoahinare marine sacerdotea sōre tiro. Jipihitia dachoripe “Tuariro jira”, ni wahche payorucunahca mari jipihitina tire. Jipihitina bui puhtoro ā jirucura tiro. Āta jirucujaro.

⁷ Noano wacū masi cohtaga musa. Me curuari watoi duji tarohca Cristo. To ā tachu űuahca jipihitina. Tire cja puha wajarina cijiri cāhu tire űuahca. To ā tachu űua ahri yahpa macaina tire cahmaeraina jipihitia curuari macaina tuaro cahya, tiiaha. Āta yoajaro.

⁸ Ō sehe nina mari puhtoro Cohamacu: “Yuhu jipihtiare bajuamehneriro jija. Ā yoa jipihitiare pihtichu yoahitiro jija. Tua yuhdurucariro jija yuhu. Panopu ā jirucua ti. Mipu cāhure ā jirucuja. Baharopu taihtja”, nina Cohamacu tua yuhdurucariro.

Cristore si siterirore to űurire yahuha Joāo

⁹ Yuhu Joāo musa coyeiro Jesu yairo jija. Ā jicu musa yoaro seheta yuhu cāhu Jesu yare yu yoari buhiri űano yuhdahi. Ā yoa musa yoaro seheta yuhure ti ā űano yoapachuta Jesu yoadohoa mehne Jesure cohāerahi. Mari cāno potori puhtoro to saho jiro macaina cijhti jija. Yu ya dihta macaina ti cohāriro jicu Patmo wama tiri nacopu jihu. Cohamacu yare, Jesucristo to buheri cāhure painare yu buheri buhiri tōpu ti cohāriro jihu. ¹⁰ Tōi yu jichu cā dacho domingo jichu Espiritu Santo yuhure cahānopu űono nihre. To ā űochu yu baharo buhusehei tuaro durucua bisiro coa tahre. Corneta to tuaro bisiro seheta tō seheta bisiro coa tahre to durucua. ¹¹ Ō sehe nino coa tahre yu tūhochu:

—Mipu mu űuhtire joari pui joa ōga. Mu ā joa ōri baharo siete curuari macainare Cohamacu yainare warocaga ti pūre. Tina siete curuari Asia yahpai jia macari macaina jira. Efeso macainare, Esmirna macainare, Pērgamo macainare, Tiatura macainare, Sardis macainare, Filadelfia macainare, Laodicea macainare mu űuhtire joarocaga —nino coa tahre yuhure.

¹² To ā nichu tūhocu majarerucahi yuhure durucurirore űai tai. Ā majarerucacu si-ete sihāa pocare ti duhu payoa yucare uru mehne ti yoari yucare űahi. ¹³ Ti yucu watoi ducurirore masūno yoaro sehe bajurirore űahi. Tiro yoari suhtiro to dahporipu sari suhtirore sārariro jihre. Ā jiro uru mehne ti yoari cahsaro mehne to pēbuhu bui tūā dihoriro jihre. ¹⁴ Ā yoa to pjoa yaja pjoari yoaro sehe noano yehsehre. To capari pichaca pohna yoaro sehe sihre. ¹⁵ To dahpori bronce wama tiri comaa siri comaa yoaro sehe si sitehre. Broncere pichaca mehne ti noano jāweri baharo tire wahtara noano si pa dutia. Ti noano wahtariro yoaro sehe to dahpori noano si sitehre. Ā yoa to durucua payu poayeri yoaro sehe tuaro bisiro coa tahre. ¹⁶ To wamomaca poto buhusehei siete űahpichoha pocare cjuahre. Ā yoa to duseroi űosari pji pu buhuseheri siori pjine cuhcūhre. Ā yoa sū dacho macariro to tuaro minoano seheta to wūhdūa tuaro si sitehre.

¹⁷ Ā jicu tire űacu to dahpori cahai doca caha sūhi yariariro yoaro sehe. Yu ā doca caha sūchu űuno tiro to wamomaca poto

buhusehe mehne yuhure duhu payo ò sehe nihre:

—Cuii tjiga. Yuhu jipihtiare bajuamehneriro jija. Á yoa jipihtiare pichtichu yoahitiro jija. ¹⁸ Catiriyo jija yuhu. Yariariyo jimai. Mipure ñuga. Jipihtia dachoripe á catirucuriro jija yuhu. Á yoa yariaina ti jiroi puhtoro jija. Yariaina ti jiro macari sopaca sawire yu cjuaboriro seheta tópu jinare na wio, pari turi catichu yoa masija yuhu. ¹⁹ Á jicu mipu wahahtore ñucu, joa óga. Baharopu to dohse wahahto cáhure ñucu joa óga muhu. ²⁰ Ahri siete ñahpichoha pocare yu poto buhusehei yu cjuaa pocare yahuihtja muhare. Siete siháa pocare ti duhu payoa yucu uru yucu cáhure yahuihtja. Ó sehe jia yahuare panopu masare ne yahuera tii. Ó sehe jira tí: Siete ñahpichoha poca siete curuari macaina yu yaina cahmachuina puhtoa jia nina mari piti dahre buhechu. Á jia siete siháa pocare ti duhu payoa yucu siete curuari macaina yu yaina jia nina mari piti dahre buhechu —nihre yuhure.

2

Efeso macainare Jesu yainare joa dũca dutiha Joãore

¹ Á ni tuhũ ò sehe ni namohre yuhure joa dutiriyo:

—Efeso macaina yu yaina, ti puhtoro cáhure ò sehe ni joarocaga muhu: “Yu wamomaca poto buhusehei siete ñahpichoha pocare cjuariyo jija. Á jicu siete siháa dapoa yucu uru mehne ti yoa yucu watoi tiniriyo jija. Á tiniriyo jicu musare ò sehe ni yahuja: ² Jipihtia musa yoirire masi pahñoja. Yu yu cjihĩre tuaro musa dahrarire, yuhure musa wacũ tua duhuerari cáhure noano masija. Ñaare yoainare musa ñu yabichu cáhure masija. Á yoa ‘Jesu buhe dutiro to cũrina jija’, nimirinare quihõno ti buherachu, quihõno ti yoerachu ñuna, mahñoina ti jichu masire musa. ³ Yu yare musa yoiari buhiri musa ñano yuhdũpanahta yuhure ne duhuerare musa. ⁴ Á noano yoaina jipanahta cãnore tó yoerare musa. Ahri jira tí: Yuhure musa noano cahĩ muhtariro seheta mipure yoerara musa. ⁵ Yuhure musa cahĩ muhtarire wacũga musa tjoa. Mipure yuhure musa cahĩera curerire wacũga. Á yoa Cohamacu yare tuaro cahmaga tjoa. Á cahmana, yu yare musa yoa muhtariro seheta yoaga tjoa. Musa á yoerachu sihãriare yu duhu payodu musa ya dũre yu dapodũre musare nanocaihtja. (Á nicu ò sehe ni yahui nija musare. Musa tó macaina yuhure cohãboca. Á cohãna tó purota pichtinahca musa ñaa yoaare duhuerana.) ⁶ Yuhure cahĩera cureina jipanahta

ahrire noano yoare musa: Nicolaita wama tiina ti ñaa yoirire ñu yabira musa. Yuhu cãhu ti yoirire ñu yabija. ⁷ Cahmori tiina jira musa. Á jina musa ya curuari macainare yu yainare Espiritu Santo to yahurire tuhoga musa. Ó sehe nina tiro: ‘Jipihtinare Jesure wacũ tua duhuerainare Cohamacu masare to cũno paraĩso wama tiro macadu dichare chu dutihtja. Tu dicha catichu yoa jira’, nina Espiritu Santo”, ni yahu joarocaga Efeso macaina yu yainare, ti puhtoro cáhure.

Esmirna macainare Jesu yainare joaroca dutiha Joãore

⁸ Esmirna macaina yu yainare, ti puhtoro cáhure ò sehe ni joarocaga muhu: “Yuhu jipihtiare bajuamehneriro jija. Á yoa jipihtiare pichtichu yoahitiro jija. Yariaa wahi. Pari turi catija tjoa. Á jicu ò sehe ni yahuja musare: ⁹ Musa ñano yuhdurire masija. Pjacuoina musa jichu cáhure masija. Á jipanahta Cohamacu yare noaare pjiro cjuara musa. Paina sehe ‘Judio masa jija’, nimirina mahñoina jira. Tina musare ti ñano quitu dahrerire masija. Tina Satana yaina jira. ¹⁰ Mipure musa ñano yuhduhtire cuiena tjiga. Tuhoga musa. Watĩno musare Cohamacure duhu dutiro cãina musa mehne macainare peresu yoa dutirohca. Diez dachori waro ñano yuhdũnahca musa. Ti á ñano yoachu musare ti á wajãmoñopachuta yuhure yu ya cáhure cohãena tjiga. Musa á yuhure cohãerachu ñucu jipihtia dachoripe Cohamacu cahapu musare á jirucuchu yoihtja. ¹¹ Cahmori tiina jira musa. Á jina musa ya curuari macainare yu yainare Espiritu Santo to yahurire tuhoga musa. Ó sehe nina tiro: ‘Jipihtina Jesure wacũ tua duhueraina pichacapu wahasi. Ti yariari baharo pichacapu wahasi’, nina Espiritu Santo”, ni joarocaga Esmirna macaina yu yainare, ti puhtoro cáhure.

Pérgamo macainare Jesu yainare joaroca dutiha Joãore

¹² Pérgamo macaina yu yainare, ti puhtoro cáhure ò sehe ni joarocaga muhu: “Yuhu ñosari pjĩ pu buhuseheri siori pjĩne cjuariyo jija. Musare ò sehe ni yahuihtja: ¹³ Musa yoirire, musa ya maca macaina ti yoiari cáhure masija. Tó macaina puhtoro Satana jira. Tó macaina Satanare ño payoina Antipare yu yare noano yahuriro cjiore wajãre. Tirore ti á wajãchu ñupanahta yu yare yoarucuna yuhure ne wacũ tua duhuerare musa. ¹⁴ Musa á wacũ tua duhuerapanahca mahanocã yuhure yuhdũrucare musa. Cãina musa mehne macaina Balãa ya buheare cahmana. Panopu Balãa puhtoro Balac wama tiriore ò sehe ni buhea tire: ‘Israe masare

yuhduraca duaca “Cohamacu jira”, masa nia masurine ño payo masa duhu payoa chüare chü dutiga tinare. Ñ yoa numia mehne ñano yoachü yoaga tinare’, ni buhea tire Baläa cjiro. Cäina masa mehne macaina to buheare cahmana. ¹⁵ Ñ yoa paina masa mehne macaina Nicolaita wama tiina ya buhea sehere duhu duarerara. ¹⁶ Ñ jina masa ñaa tuhutumari cjiire tuhutu cohtota, Cohamacu yare tuaro cahmaga tjoa. Masa ñ cahmaerachü ñuchü soaro mehne masa cahapü wahacü, ñ ñano yoina mehne cahmacheihca yü duseropü jiri pjï ñosari pjï mehne. ¹⁷ Cahmori tiina jira masa. Ñ jina masa ya curuari macainare yü yainare Espiritu Santo to yahurire tuhoga masa. Õ sehe nina tiro: ‘Jiphtinare Jesure wacü tua duhuerainare maná wama tiri chüare to ñori chüare waithta. Yehsea täa cühure waithta tinare. Ti täare wahma wamare yü joa ña täa jahca. Paina ti wamare ne masisi. Ti täare naina dihta ti wamare masiahca’, nina Espiritu Santo”, ni joarocaga Pérgamo macaina yü yainare, ti puhtoro cühure.

Tiatira macainare Jesu yainare joaroca dutiha Joäre

¹⁸ Tiatira macaina yü yainare, ti puhtoro cühure ñ sehe ni joarocaga muhu: “Yuhü Cohamacu macüno yü capari picha pohna yoaro sehe sira. Ñ jia yü dahpori bronze wama tiri comaa ti wahtari comaa yoaro sehe si sitera. Musare ñ sehe ni yahuja: ¹⁹ Masa yoirire masija yuhü. Cohamacure paina cühure masa cahüire, yuhure masa cohäerarire, painare masa yoadohorire, ñano yuhdurapanahca yuhure masa duhuerarire masija. Wahmanopü masa yoiriro yuhdoro mirü sehere noano yoa namona nina masa. Ti cühure masija yuhü. ²⁰ Masa ñ noano yoina jipanahta ñ sehe yuhure yuhduracahre masa: Jezabe wama tiricoro ‘Cohamacu yare yahu muhtaricoro jija’, ni mahñoricoro musare to ñano buhechü tuhona ticorore tuhtierare masa. Mahño buhero yü yainare yuhure dahra cohtainare numia mehne ñano yoachü yoara. Ñ jiro ‘Cohamacu jira’, ti nia masurine paina ño payo ti duhu payoa chüare chü dutira ticoro yü yainare. ²¹ To ñaare to cahyahore cohtasinimai. Yü ñ cohtapachüta müa mehne to ñano yoare ti cahyaerachü, tire ti duhuerachü. ²³ Ñ yoa ticoro ya buheare cahmainare wajähtja. Yü ñ yoachü ñua jiphtina yü yaina yü noano masiro jichü masiahca. Masa ti tuhutuare ti goa pjaa

cühure masija. Yü ñ masiro jichü masiahca tina ticorore yü buhiri dahrechü ñua. Jiphtina masa ñaare yoari buhirire buhiri dahreihntja musare. Ñ yoa masa noaare yoari wapa sehere noano yoahntja musare. ²⁴ Paina masa mehne macaina Tiatira macaina ticoro ya buheare cahmaerare. Masa sehe Satana ya buheare ‘Pano to yahuerari cjiiri’, ti nia buheare cahmaerare masa. Ñ jicu masa sehere duti namosi yuhü. ²⁵ Ahri dihtare yoa duti namoihtja musare: Masa cahapü yü tahto pano yü buheare masa masirire ne mahanocä duhuena tjiga. ²⁶⁻²⁷ Jiphtina ñaare duhuinare yü yare ñ yoarucuinare puhtoä söihtja. Yü Pücu yuhure to puhto söriro seheta masa cühure puhtoä söihtja. Jiphtia yahpari macaina bui puhtoä söihtja musare. Ñ puhtoä säana, masa docai jinare jiphtia yahpari macainare tuaro dutinahca masa. Dihi biatore mari yucücu mehne pohachü dói to wahtiaro seheta Cohamacure yuhduracainare äta yohanca masa. ²⁸ Ñ jicu musare yü yare ne duhuerainare bohrea müja tachü müja tariare waithta musare. ²⁹ Cahmori tiina jira masa. Ñ jina masa ya curuari macainare yü yainare Espiritu Santo to yahurire tuhoga masa”, ni joarocaga Tiatira macaina yü yainare, ti puhtoro cühure.

3

Sardis macainare Jesu yainare joaroca dutiha Joäre

¹ Sardis macaina yü yainare, ti puhtoro cühure ñ sehe ni joarocaga muhu: “Yuhü siete pjacu bajuerainare Cohamacu yainare dutiriro jija. Ñ yoa siete ñahpichoha pocare cjuariro jija. Musare ñ sehe ni yahuja: Masa yoirire masija. Õ sehe ni tuhutumana paina musare: ‘Tina Cohamacu yare noano yoa pahñoina jira’, ni tuhutumana musare paina. Ti ñ ni tuhutupachüta Cohamacu yare noano yoaerara masa. ² Ñ jina noano yoaga masa ‘Ñaare yoari’, nina. Cohamacu yare masa masirire noano wacüga, ‘To yare duhuri’, nina. Cohamacu to ñuchü noano yoa pahñoeasinire masa. ³ Ñ jina yü yare masa tuho muhtarire noano wacüga masa. Ñ wacüna yü yare yoaga tjoa. Cohamacu yare pari turi cahmaga tjoa. Yü nino sehe masa yoerachü wacüenoca musare buhiri dahreihntja. Yacariro wacüenoca to yacaro säariro seheta musare wacüenoca buhiri dahreihntja. ⁴ Cäina masa mehne macaina Sardis macaina ñaare yoarucüina jierara. Wete marieni suhtirore masa säaboriro seheta ti suhtirore masa wete piho dueraro seheta ti ñaa yoare piha duerare masa. Ñ noaina jina, yehseri suhtiro säaina yuhü

mehne tininahca mäsä sehe. Ä yoahcina cjihti jira mäsä. ⁵Jipihtina yu yare duhueraina äta yehsea suhti säaina jiahca. Ä yoa yuhü mehne ä jirucuhcina ti wamare to joa öri ptü tina cähu ti wamare joa öina jiahca. Ti wamare to joa örire pahä cohäsi yuhü. Yu Pucu to ñurocaroi, anjoa cähu ti ñurocaroi yu yaina mäsä jirire yahuihtja tinare. ⁶Cahmori tiina jira mäsä. Ä jina mäsä ya curuari macainare yu yainare Espiritu Santo to yahurire tuhoga mäsä”, ni joarocaga Sardis macaina yu yainare, ti puhtoro cähäre.

Filadelfia macainare Jesu yainare joaroca dutiha Joäore

⁷Filadelfia macaina yu yaina, ti puhtoro cähäre ö sehe ni joarocaga mähü: “Yuhü ñaa marieriro jija. Yu nino seheta yoariro jija. Davi cjiro panopu macariro puhtoro dutiriro waro sawire cjuariro jiro masare to dutiriro seheta tuua mehne dutihtja yuhü cähu. Ti tuua mehne yu yoa dutichu ne paina türe ducata masierara. Yu yoa dutierachü ne paina türe yoa masierara. ⁸Jipihitiare mäsä yoaare masija yuhü. Wacü tuaera cureina jipanahta yu buheare noano tuho, türe ne duhuerare mäsä. Ä jicu yu yare cüi müsare türe buhe duticu. Ä jia paina ‘Türe buhena tjiga’, ni ducata masierara müsare. ⁹Ä jicu ö sehe yoaihtja: Paina mäsä cahai jiina Satana yaina jira. ‘Judio masa jija’, nipahta judio masa waro jierara. Tinare mäsä panoi na tuhca caha su müsare ño payochu yoaihtja tinare. Yu ä yoachü ñaa müsare yu cahiare masiahca tina. ¹⁰Müsare yu yare yu duhu dutierachü tuhona noano yuhtire mäsä. Mäsä ä yoachü ñucu ahri yahpa macaina jipihitiare ti ñano yuhduhti pja jichu müsare ducataihtja mäsä ñano yuhduerahto sehe. Ti pja jipihitiare ti ñano yuhduhti pja jirohca. ¹¹Mahanocä duhsara ahri yahparü yu tjua tahto. Yu yare mäsä masirire boena tjiga. Ä yoa yuhäre ä yuhtirucuga, mäsä noano yoari wapare ‘Butiri’, nina. ¹²Ä jicu yu yare ä yoarucuinare yu Pucu ya wuhü macaina cjihtire cüihtja tinare. To ya wuhü macaa botari ti yoari pja ti jirucuro seheta Cohamacu mehne jirucuchü yoaihtja tinare. Ä jia Cohamacu mehne macaina ä jirucuahca. Ä jicu Cohamacu wuhü macaa botaripu yu joa öno seheta tinare ti pjacuripu ö sehe ni joa öihtja: Cohamacu yu Pucu wamare, to ya maca wama cähäre joa öihtja. To ya maca wahma maca Jerusalé jirohca. Ti maca muanopu Cohamacu cahapu tari maca jirohca. Yuhü wahma wama cjuaihca. Ti wama cähäre joa öihtja ti pjacuripu. ¹³Cahmori tiina jira mäsä. Ä jina mäsä ya curuari macainare yu yainare Espiritu Santo to yahurire tuhoga

mäsä”, ni joarocaga Filadelfia macaina yu yainare, ti puhtoro cähäre.

Laodicea macainare Jesu yainare joaroca dutiha Joäore

¹⁴Laodicea macaina yu yainare, ti puhtoro cähäre ö sehe ni joarocaga mähü: “Yuhü Cohamacu jipihitiare to yoarire, to yoahiti cähäre yoa sohtori tiriro jija. Yuhü potocä yoariro jija. Ä jicu mahñono marieno yu ñurire ä yahurucuriro jija. Jipihitiare yu Pucu to yoarire yoabasariro jija yuhü. ¹⁵Jipihitiare mäsä dohse yoarire masija yuhü. Yuhäre wacü tuaina jipanahta mahanocä wacü tuaina jira mäsä. Ö sehe jira ti: Co yusæera co sü mehne pjiroca si putia co yoaro sehe jira mäsä. Tö sehe jia core mari ji coaeraro seheta yuhäre wacü tuaera cureina mäsä jichu yuhü cähu müsare ji coaeraja. Yuhäre mäsä noano wacü tuachü noaboa yuhäre. Yuhäre mäsä wacü tuaerachü ña niboa yuhäre. Yuhäre mäsä wacü tuaerari yuhdoro mahanocä wacü tuaina mäsä jichu ña yuhduara. ¹⁶Mäsä ä jichu ñucu ñu yabi yuhduaja yuhü. Ñaa core yu cho cohäno seheta yuhäre mahanocä wacü tuainare ñu yabi yuhduaja yuhü. ¹⁷Ä jina ö sehe ni tuhutumana mäsä: ‘Jipihitiare cjuaja. Ne yaba duhsaerara marine’, ni tuhutumana mäsä. Ä nipahta pjacuinara yoaro sehe jira mäsä. Ä jina capari ñueraina ti ñu duaare ti masieraro seheta Cohamacu yare ne masierara mäsä. Ä jina suhti marieina ti buo tiro seheta Cohamacu to ñurocaroi mäsä ñaa yoarire buo tihtina jira mäsä. ¹⁸Mäsä ä jiina jichu ñucu ö sehe ni yahuihtja müsare: Uru warore mäsä nuchaboro seheta noaare yu cjuare naga mäsä. Musare yuhäre wacü tuachü yoaihtja. Ä jina potocäta Cohamacu ya mehne pjiro cjuanahca. Ä yoa yehseri suhtirore mäsä nuchü mäsä säano seheta yu di cohäri mehne yu yariaro mehne mäsä ñaa yoare cosawerina jiga. Ä yoana noaa suhti säaina ti buo tieraro seheta mäsä ñaare cosawerina jina buo tisi mäsä cähu. Ä yoa mäsä caparire mäsä co tiri baharo noano müsare bajuro seheta Cohamacu yare noano tuhoga, mäsä noano masihtö sehe. ¹⁹Jipihitiare yu cahünare yahuja. Ä jicu yu cahüna ti jichu ñucu, ti tuhöerachü tinare quihöno yoa dutija, tinare yoadhocü tacu. Ä jina yu ya sehere tuaro cahmaga. Ä yoa mäsä ñaare tuhutumari cjihtire cohtota, ti ñaare duhuga. ²⁰Tuhoga yuhäre. Mäsä wuhäre bihari wuhäre yu suruca yu säa dua yu pisurucuboro seheta, mäsä mehne macariro ji duai nija. Yu ä ji duachü tuhoina jina yuhäre mäsä mehne ji dutiga. Yu yaina jiga. Mäsä ä ji dutichü mäsä mehne jiihtja. Ä jicu mari suho churo seheta mäsä mehne

noano jiihtja. Ā jina yññu mehne macaina jinahca m̄sa. ²¹ Wafinore yñ yñhdarucari baharo yñ Pycñ p̄htoro to dujiro cahai dujija, yññu cññu duticñ tacñ. Tó seheta m̄sa cññu ñaa yoarire m̄sa yñhdarucari baharo yñ p̄htoro dujiro cahai dujinahca, m̄sa cññu dutina tana. M̄sare yñ cahai dujichñ yoahtja. ²² Cahmori tiina jira m̄sa. Ā jina m̄sa ya curuari macainare yñ yainare Espiritu Santo to yahurire tahoga m̄sa”, ni joarocaga Laodicea macaina yñ yainare, ti p̄htoro cññure –nihre yññure joa dutiriro.

4

M̄sanopñ Cohamacñre na tuhcuca caha sñ ti ño payoare ñññha João

¹ Yññure to ā ni yahuri baharo m̄sanopñ p̄jōari sopacare ñññi. Pari turi corneta to tuaro bisiro seheta tuaro durucua bisiro coa tahre yñ tuhochñ. Ō sehe nihre yñ tuhochñ:

–Ōpñ m̄ja taga. Ahri yñ yahuhti cjihti baharopñre wahahtore m̄ññure ñoihtja. Yñ niriro seheta ā waharohca –nino coa tahre m̄sanopñ.

² To ā ni yahuchata tōpñ m̄ja sacñ Espiritu Santo tuaa mehne ñññi nihñi. Ā jicñ p̄htoro dujirore m̄sanopñ ñññi. Tó cāiro dujihre.

³ Noano si siteriro dujihre. Diamante wama tia t̄aa yoaro seheta, rubí wama tia t̄aa yoaro seheta noano si siteriro dujihre tiro. Ā jiro buhini soro esmeralda yoaro sehe si siteri soro dacho macai dujihre tiro. ⁴ Ā yoa to dujiro cahai veinticuatro dujiare ñññi. Tí dujia p̄htoa dujia yñ ññ m̄htarirore duji soroahre. Tí dujiarñ veinticuatro Jesu yaina p̄htoa dujihre. Yehsea suhti tiina jihre. Ā yoa p̄htoa ti pisaa sorori uru sororire pisaina jihre tina. ⁵ Yñ ññ m̄htariro dujiroi orocasitahre. Ā yoa soro sehe jiro choro bisiro coa tahre. W̄p̄o cññu bisiro coa tahre. Tí dujiro panoi siete sih̄aa poca jihre. Siete sih̄aa poca mehne to piti dahre buhechñ Cohamacñ yaina siete pjacñ bajueraina jihre. ⁶ Ā yoa to dujiro panoi pjiri ma yoaro sehe vidro yoaro sehe sipari ma jihre. Noano co sitiri ma yoaro sehe jihre.

Ti dujiro cahai pititiaro soro sehe bajaina jihre. Ti pjacñri panoi ti baharo buññesehe cññure payñ capari tiina jihre tina. ⁷ Yñ ññ m̄htariro soro bajuriro yairo soh̄ariro yoaro sehe bajuhre. To baharo jiriro wachñ yoaro sehe bajuhre. Ti baharo jiriro mas̄ano wñhdñ sehe wñhdñ tiro jihre. Tina tiaro baharo jiriro cja to c̄j̄m̄ad̄p̄r̄ire saño dujiriro yoaro sehe bajuhre. ⁸ Tina seis d̄p̄ari w̄ñ d̄p̄ari tiina jihre. Ā jia ti w̄ñ d̄p̄ari p̄ñ buññesheripata

payñ capari tia d̄p̄ari jihre. Ā yoa dachoripe, ñaminipe ā dururucua nihre. Ne durucu duhuerare. Ō sehe ni durucuhre:

“Noariro, noariro, noariro Cohamacñ mari p̄htoro tua yñhdariro jira.

Tiro panop̄ta ā jirucua tiri jire.

Mipñ cññure ā jirucua.

Baharopñ tarohca”, ni durucurucua nihre.

⁹ Ā ni durucua tina pititiaro soro bajaina to tuaare durucua nihre p̄htoro dujiroi dajirirore. Ā durucua, tirore jipih-tia dachoripe jirucurirore wahche payoa “Noana”, ñia nihre. ¹⁰ Ti ā yoa payochñ ññña veinticuatro Jesu yaina p̄htoa sehe p̄htoro dujiroi dujiro panoi na tuhcuca caha sñ, tirore ño payohre. Tiro jipihtia dachoripe jirucuriro jira. Ā ño payoa ti p̄htoa pisaa sororire to dujiro panoi doca payohre. Ā doca payoa ō sehe nihre tina:

¹¹ “M̄ññ Cohamacñ s̄ñ p̄htoro waro jira.

Tuariro, noariro jira m̄ññ.

M̄ññ s̄ñ ño payoriro jii nina.

M̄ññure ā ño payorucuro cahmana s̄ñre.

Jipihtiare bajuamehneriro jira m̄ññ.

M̄ññ cahmariro seheta tí jipihtiare bajumehnea tiri jire m̄ññ”, nihre tina Cohamacñre, tó dujirore.

5

Joari p̄ñre tur̄eri tiare cordero cññure yahuha João

¹ Baharo tó dujiro to wamomaca potō buññesehe to c̄j̄ari p̄ñre joari p̄ñre ñññi. Tí p̄ñ p̄ñ buññesehe to joari p̄ñ to tur̄eri tia jihre. Ā yoa siete wiht̄a ñahaa mehne to wiht̄a ñahari tia jihre. ² Tí tiare tur̄eri tiare ñññ tuhsñ, tuariro anjore ñññi. Tiro tuaro durucua mehne ō sehe ni yahuhre:

–¿Ahri tiare wiht̄a ñahaare pahr̄eboriro ñññ buhiri marieriro diro sehe jijari, m̄sa tahotuchñ? –nihre tiro anjo.

³ Ā niparota tí tiare pahr̄ētiore bocaerare. M̄sanopñ, ahri yahp̄arñ, catiina watōi, yaria tuhs̄aina watōi ne tí tiare ñahaare pahr̄ētiro mariahare. Ā jiro tí tiare buhehtiro mariahare. ⁴ Ā jicñ pahr̄ētiore, tí p̄ñre ñññtiore ti bocaerachñ ñññ tuaro tiññi yññ. ⁵ Yñ ā tiichñ ññno c̄ñiro Jesu yaina p̄htoa mehne macariro ō sehe nihre yññure:

–Tiēcñ t̄jiga. Tí tiare ñahaare c̄ñiro pahr̄ē masina. Tiro Juda ya curua macariro tuariro jira. Tuariro jiro “Yairo soh̄ariro”, tí ni pisuriro jira. Tiro p̄htoro Davi panamino j̄i tur̄iariro jira. Wafinore yñhdarucariro jira tiro. Ā jiro tiro tí tiare siete ñahaare pahr̄ē masiriro jira –nihre tiro yññure.

⁶ To ã nichu tuhocu puhtoro dujiro panoi cordero to ducuchu ñuhi. Cuatro soro bajuina, Jesu yaina puhtoa tina watoi ducuhre tiro cordero. Tiro ti wajãriro cjiro sehe bajuhre. Siete sahari tiroiro, siete capari tiroiro jihre. Tí siete sahari ã yoa siete capari mehne to piti dahre buhechu Cohamacu yaina pjacu bajueraina siete bajueraina yoaro sehe jira. Tina to yaina pjacu bajueraina jipihtiro ahri yahpapu Cohamacu to warocarina jihre. ⁷ Æ jiro cordero sehe puhtoro dujiro cahapu saro, tirore to poto buhusehei to cjuari tiare tuãwe nahre. ⁸ To ã tuãwe nachu ñua cuatro soro bajuina, veinticuatro puhtoa cãhu cordero panoi na tuhcuca caha su, tirore ño payohre. Tina puhtoa jipihitina arpa wama tia buaputãare, uru wahwari cãhure cjuahre. Tí wahwari incienso noano wahpaa posa tia wahwari jihre. Tí incienso mehne to piti dahre buhechu Cohamacu yaina tirore ti sini payori yoaro sehe jihre. ⁹⁻¹⁰ Æ tirore ño payoa õ sehe ni wahmaa basaare tina basa payohre tirore:

“Muhu ti wajãriro cjiro jira.

Æ jicu mu di cohãri mehne sã ñaa yoari buhirire cohãre muhu Cohamacu yaina sã jihto sehe.

Æ jicu jipihitia curuari macainare cãinare, jipihitia duseri durucuinare cãinare, jipihitia yahpari macainare cãinare sã ñaa yoari buhirire mu di cohãri mehne cosawere muhu Cohamacu yaina sã jihto sehe.

Sãre jipihitinare Cohamacu yaina cjihtire cãre muhu.

Æ jicu sacerdotea cãhure muhu sãre Cohamacure dahra cohtaina sã jihto sehe.

Æ yoacu ahri yahpa macaina bui puhtoa sãhure muhu sãre.

Æ yoariro jicu tí tiare wihtã ñahaare pahrãhtiro jira muhu”, ni basa payohre tina corderore.

¹¹ Pari turi ñacu millones anjoa perire ñuhi. Puhtoro dujirore cuatro soro bajuinare, veinticuatro puhtoare anjoa sehe tinare soroa ducu sãhure. Tina anjoa peri tuaro ti sañurucu payochu ñuhi. ¹² Æ sehe ni tuaro sañurucu payohre tina:

“Cordero ti wajãriro muhu jipihitinare dutiriro, jipihitiare cjuariro, masi pahñoriro, tua yuhduariro jira muhu.

Masa ti ñaa buhiri ti wajãriro mu jichu ñana ã ni ño payoja mãhure.

‘Noabiariro jira’, ninahca mãhure.

Mãhure noano durucunahca”,

ni sañurucu payohre anjoa peri.

¹³ Æ jicu paina cãhure ti sañurucu payoa coa tachu tuhohi. Jipihitina muano macaina,

ahri yahpa macaina, catiina, yariaina cahapu jiina cãhu, pjiri ma macaina, jipihitiropu jiina õ sehe ni durucu payoa coa tahre:

“Cohamacure to dujiropu dujirirore, Cordero cãhure musare puarore noano durucunahca.

Musare wahche payonahca.

‘Noa Yuhduaina, Tua Yuhduaina jira’ nina, jipihitia dachoripe ã nirucunahca musare”,

ni durucu payoa coa tahre.

¹⁴ Æ jia tina cuatro soro bajuina ti ã durucu payochu tuhoa “Æta ni durucu payojaro”, nihre. Æ jia Jesu yaina puhtoa sehe na tuhcuca caha su Cohamacure, Cordero cãhure ño payohre.

6

Papera tiare to nari tiare wihtã ñaharire pahrãna Cordero

¹ Baharo papera tiare to nari tiare Cordero wihtã ñaha mãhtanore pahrãhre. To ã pahrãchu ñuhi. To ã pahrãri baharo cãiro soro bajuina mehne macariro, “Ñuna taga”, nihre. Æ nino wãpo yoaro sehe bisihre tiro.

² To ã niri baharo ñuhi yahu. Yehseriro cawalore ñuhi. Tiro bui pisariro buedure cjuahre. Tirore puhtoro pisari sorore wahre paio sehe. To ã wari baharo tiro sehe tirore ñu tuhtiinare yuhduarocar wahahre.

³ Baharo cã wihtã ñahanore pahrã tuhsu Cordero pa wihtã ñahanore pahrãhre tjoa. To ã pahrãri baharo paio soro bajuina mehne macariro “Ñuna taga”, to nichu tuhohi tjoa.

⁴ Æ jicu paio cawalore sohãrironore ñuhi tjoa. Tiro bui pisarironore tuaare wahre paio sehe. Ahri yahpa macainare cahma wajã dutihtirore cãhure tirore. Æ jia jipihitiro macaina cahma wajãahca ahri yahpapu. Æ yoa pjiri pjã ñosari pjãne wahre tirore.

⁵ Baharo puarore pahrã tuhsu Cordero parore pahrãhre tjoa. Æ jicu puaro ti durucuri baharo paio soro bajuina mehne macariro “Ñuna taga”, to nichu tuhohi.

To ã niri baharo ñiriro cawalore ñuhi. Tiro bui pisariro balanza quihõnora cjuahre.

⁶ Tirore yu ñuri baharo soro bajuina watoi õ sehe nino coa tahre:

–Cã dacho dahrari wapa mehne trigore cã kilota nuchuahca masa. Cã dacho dahrari wapa mehne cebada wama tia yaparire tia kilota nuchuahca masa. (Trigo, cebada cãhu pihitia wahaahca. Æ jia tí wapa buju niahca.) Wiho mejeta chua dahrea sere, vino cãhure dojochu yoaena tjiga – nino coa tahre.

⁷ Baharo tiarore pahrã tuhsu Cordero parore pahrãhre tjoa. To ã pahrãri baharo

païro soro bajuina mehne macarïro ji bato tïrïro “Ñuna taga”, nihre tjoa.

⁸ To ã nichu tuhocu wapoarïro cawalore ñuhi. Tïro bui pisarïro “Yariachu yoarïro” wama tihre. Æ yoa to baharo tarïro “Yari-aina ti jïro” wama tihre. Æ jïro tinare tuaare wahre païro sehe. Ahri yahpapure cuarta parte masare wajã dutihre. Cahma wajãa mehne, jaca baa mehne, dohatia mehne, wahiquina nuscari macaina suaina mehne tópeina masare ti wajãhtore cùhre tinare.

⁹ Baharo pititïaro wihtã ñahaare pahrê tuhsu Cordero paro ñahanore pahrêhre tjoa. To ã pahrêchu altar docai Jesu yaina ti wajãrina ti catiri yajerïpohnarine ñuhi. Cohamacu yare ti yahuri buhiri, “Jesu yaina jïa”, ti ni yahuri buhiri tinare wajãri jire.

¹⁰ Tina sañurucua ò sehe nihre Cohamacure: —Muhu sã puhtoro, ñaa marierïro, mahñono marieno, mu nirïro seheta yoarïro jira muhu. ¿Ahri yahpa macainare, sãre wajãrinare dohse jichu buhiri dahreihcari muhu? —ni sañurucuhre tina.

¹¹ Æ jïro tinare yehsea suhti yoaa suhtire wahre. Tinare ã waro ò sehe nihre tinare:

—Sosiniga. Paina musa coyea Jesu yaina musa yoarïro seheta mipu cãhure noaa buheare buhesinia nina. Musare ti wajãriro seheta tina cãhure ti wajã pahñohto duhsasiniga. Æ jina tinare jïpihtinare ti wajãhto pano mahanocã sosiniga musa —nihre tinare.

¹² Baharo cinco wihtã ñahaare pahrê tuhsu Cordero paro wihtã ñahanore pahrêhre tjoa. Tóre to ã pahrêchuta tuaro yahpa ñuhmihre. To ñuhmini baharo sã dacho macarïro ñïrïro choro wahahre. Ñïri suhtïro yoaro seheta ñïrïro choro wahahre. Æ yoa sã ñami macarïro di yoaro sehe sohãrïro wahahre.

¹³ Æ yoa ñahpïchoha poca yahpapu boraahahre. Yucucu dïcha yahsaare wihnono to wã bure bororo seheta ñahpïchoha poca boraahahre.

¹⁴ Ti ã wahari baharo muano butia wahahre. Pãpera tiare mari turêchu to bajueraro seheta bajuerare muano. Æ yoa jïpihtia tãyucu cãhu nuscopo cãhu pa seheru sãrãchãre.

¹⁵ To ã wahachu ñua, ahri yahpa macaina bui puhto coparïpu tãyucu macaa tãa docaru cãhure duhtihre. Paina puhto, surara puhto, pache pu, tuaina, jïpihtina tinare dahra cohtaina, dahra cohtaina jieraina cãhu tóihã duhtimahre.

¹⁶ Æ duhtia tãyucure, tãa cãhure ò sehe nihre:

—Sã bui bora pjaga. Sãre nuoga. Siro puhtorore to dujïroi dujïrirore cui yuhduaja. Cordero suaro, sãre ñano buhiri dahrerohca. “Æ buhiri dahreri”, nina nuoga sãre.

¹⁷ Jïpihtinare tuaro ti buhiri dahrehti dacho ji tuhsura. Æ jia ti buhiri dahrehtore

ne cãiro duhtïro bihoeraro, cãno pjasi —nihre tina jïpihtina.

7

Israe masa pjacurire Cohamacu to wama ña òhtore yahuha Joã

¹ Baharo pititïaro anjoare ñuhi. Tina jïpihtïropu wahahre. Cãiro norterpu waharo tópu tari wihnonore taerachu yoahre. Païro surpu, païro sã muja taropu, païro sã sãanopu wahahre. Nortepu waharïro yoaro seheta yoahre tina cãhu. Æ jïro ahri yahpapu, pjïri mapu cãhure ne wihnono taerare. Ne cãdu yucucure wihnono wã ñuhmichu yoæare.

² Æ yoa païro anjore ñuhi tjoa. Sã muja taropu taro nihre tiro. Cohamacu catïrïro to wama ña ònore na taro nihre tiro. Æ na taro paina pititïaro anjoare tiro sañurucuhre. Tina anjoa sehe ahri yahpare, pjïri ma cãhure Cohamacu to dojomehne dutiina jihre.

³ Tinare sañurucuro ò sehe nihre anjo:

—Cohtasiniga. Cohamacure dahra cohtaina ti wãhdua pocare to wamare òna tana nija. Sã ã òhto pano ahri yahpare, pjïri mare, yucuri cãhure dojomehnesiniena tjiga musa —nihre tiro paina pititïaro anjoare.

⁴ Æ jïro Cohamacu to wama mehne ti wãhdua pocare ti òhtinare “Ópeina jira”, ni yahuhre yuhure cãiro. Israe masa doce curuari macaina ciento cuarenta y cuatro mil masa ti òhtina jïyuhti.

⁵ Ahrina jïyuhti ti òhtina: Doce mil masa Juda panamana ji turiaina ti òhtina jihre. Paina doce mil masa Rubê panamana ji turiaina ti òhtina jihre. Paina doce mil masa Gad panamana ji turiaina ti òhtina jihre.

⁶ Paina doce mil masa Aser panamana ji turiaina, paina doce mil masa Neftali panamana ji turiaina, paina doce mil masa Manase panamana ji turiaina ti òhtina jihre.

⁷ Paina doce mil masa Simeo panamana ji turiaina, paina doce mil masa Levi panamana ji turiaina, paina doce mil masa Isacar panamana ji turiaina ti òhtina jihre.

⁸ Paina doce mil masa Zabulô panamana ji turiaina, paina doce mil masa José panamana ji turiaina, paina doce mil masa Benjami panamana ji turiaina ti òhtina jihre. Tópeinata jïpihtina masa ciento cuarenta y cuatro mil to wama mehne ti òhtina jihre.

Payu yehsea suhti tiinare yahuha Joã marine

⁹ Baharo payu masare ñuhi. Jïpihtia yahpari macainare, jïpihtia curuari macainare, jïpihtia duseri durucuinare, jïpihtia macari macainare cãinare Cristore cahmaina dihtare tói ducuinare ñuhi. Puhtoro to dujïro panoi, Cordero panoi ducuhre tina masa.

Payu masa jihre. Ā jia quihō bihoina jierare. Yehsea suhti tiina jihre tina. Ā yoa pjaa pō pūrīne cjuahre. ¹⁰ Ā jia tina jipihtina ō sehe ni tuaro sañurucuhre:

“Cohamacu jira säre yuhdachu yoariro.

Tiro to dujiroi dujiro jira.

Cordero cāhu säre yuhdachu yoariro jira”, ni sañurucuhre tina. ¹¹ Ā jia jipihtina anjoa, Jesu yaina puhtoā cāhu, soro bajuina mehne puhtoro to dujiro cahai ducuhre. Ā ducua to dujiro panoi doca caha su, Cohamacure wahche payohre. ¹² Ō sehe ni wahche payohre tina:

“Ā tjira.

Cohamacu sā puhtoro mūhare noano durucua.

Noa yuhduariro, masi pahñoriro jira mūhu.

Mūhare ‘Noana’, nija.

Mūhare ño payoja.

Tua yuhduariro jira mūhu.

Mū tuua mehne yoariro jira mūhu.

Tó seheta jirucuriro jira mūhu jipihtia dachoripe.

Ā tjira”,

ni wahche payohre tina.

¹³ Ti ā nichu tuhoro cāiro Jesu yaina puhtoā mehne macariro yuhre ō sehe ni sinituhre:

—Āhrina yehsea suhti tiinare masijari mūhu? ĀTi tarīrore masijari mūhu? —ni sinitu ñuhre yuhre.

¹⁴ To ā nichu tuhoca:

—Masieraja —ni yuhtihī.

—ĀNoa jijari tina? —ni sinituhi tirore.

Yu ā nichu tuhoro ō sehe nihre yuhre:

—Āhrina ñabiaro yuhdari dacho jichu cāno pjaina jira. Ti suhti cosawerina ti jiro seheta Cordero to di cohāno mehne ti ñaa buhirire cosawerina jira. Ā jia noano yehsea suhti tiina jira. ¹⁵ Ā to cosawerina jia Cohamacu to dujiro panoi tirore ā ño payorucura. Dachoripe, ñaminipe tirore ā ño payorucura, sacerdotēa Cohamacu wūhai ti yoariro seheta. Ā jiro tina mehne ā jirucuro, tinare yoadohorca Cohamacu “Soro wahari”, nino. ¹⁶ Ne pari turi jūca baasi tina. Ā jia ñahma yapiosī tina. Ne sū dacho macariro siro tinare ne jū pjasī. Tuaro sia tinare ñano yuhdachu yoasi. ¹⁷ Puhtoro dujiro potoi ducuriro Cordero tinare ñu wihborohca. Ovejare ñu wihboriro yoaro sehe tinare ñu wihborohca. Ā ñu wihboro mārī pohtaripū catichu yoaā mārī pohtaripū tinare mū tā wahcānohca, ovejare ñu wihboriro to mū tāno seheta. Ā yoaro ā wahcherucuhu yoarohca tinare. Ā jia ne pari turi tiisi tina —ni yahuhre Jesu yaina puhtoā mehne macariro yuhre.

8

Seis papera ti wihtā ñahaare pahrē tuhsuro parore pahrēha Cordero

¹ Seis papera ti wihtā ñahaare pahrē tuhsuro parore pahrēhre tjoa Cordero. To ā pahrē tuhsuchū cū hora dacho macai tōpu muanopu noano dihta marieaa wahahre. ² To ā wahari baharo siete anjoare Cohamacu panoi ducuinare ñuhi. Tinare siete cornetarire wahre paio. ³ Pairo anjo uru wahware inciensore posa tihti wahware cjuariro altar cahapu su, ducuhre. Tōi to ducuchū payu inciensore tirore wahre, jipihtina Cohamacu yaina tirore ti siniri mehne morehtire. Ā jiro uru altarpū Cohamacu to dujiro panoi jiri altarpū tí inciensore jū muohre Cohamacure. ⁴ Ā jia anjo to cjuari wahwa macaa inciensore altarpū to poho siteri baharo tí incienso macaa me Cohamacu yaina tirore ti siniri mehne mujaa wahahre. ⁵ Ā wahari baharo altar macaa niti mehne tí wahwa wahpa wahachu, yahpai poho cūnocahre. To ā poho cūnocachuta wapo pja, soro sehe jiro bisī mūa, oroca site mūa, yahpa ñuhmi mūahre.

Cornetarire yahuha Joāo

⁶ Baharo siete anjoa cāina ti cornetarire putia taa nihre.

⁷ Cūiro anjo to yariare puti muhtahre. To ā putichū co poca yusua poca pichaca mehne, di mehne morea poca yahpapu bora su cahahre. Ti bora su cahachuta yahpa jūa wahahre. Ō puro jāhre: Āhri yahpa dacho maca sūro caharoi jūa wahahre. Ā jiro tó puro posata yucuri cāhu jūa wahahre. Tó puro posata tja cāhu jūa wahahre.

⁸ Anjo cāiro to ā puti muhtari baharo paio anjo to yaria cornetare putihre tjoa. To ā putichū pjidū tācu yoaro sehe bajudu noano jūrucudū pjiri mapure waharoca ñojaa wahahre. Ā jiro yahpa to jāriro puro tó purota pjiri ma di ma doja wahahre. ⁹ Ā jia pjiri ma macaina wahi dacho maca mahano suboro waroi yariaa wahahre. Tópe busota dohoa buso cāhu minia wahahre pjiri mapure.

¹⁰ Puarō anjoa ti putiri baharo paio anjo cāhu to yaria cornetare putihre tjoa. To ā putichū pjiria ñahpichohaca, sihāria yoaro sehe siria yahpapu bora su cahaa wahahre. Āhri yahpa macaa mārī dacho macabo cureroi tópe mārī bui bora su cahaa wahahre ñahpichohaca. Tópe co wijaa copari bui cūhare bora su cahaa wahahre. ¹¹ Tópe mārīta sūēa mārī wahahre. To ā wahachu payu masa tí mārī macaa core, tí copari macaa co cūhare sihnimaa, yariaa wahahre. Tia ñahpichohaca “Sūēnia”, wama tihre.

¹² Tiaro anjoa ti putiri baharo pairo anjo cãhu to yaria cornetare putihre tjoa. To ã putichu sũ dacho macariro, ñami macariro cãhu dacho maca suboro waroi dojoa wahahre. Ñahpichoha peri cãhu dacho maca suboro waroi jia poca tópe poca dojoa wahahre. Tópe poca m̃ano macaa poca noano buhrierare. Dachopu pititia horari waro sũ dacho macariro ne buhrierare. Ñamine pititia horari waro sũ ñami macariro, ñahpichoha poca cãhu ne buhrierare.

¹³ Baharo ñaroca muohi tjoa. Muanopu wurirore cjare ñuhi. Æ jicu to sañurucuchũ tuhohi. Õ sehe nihre tiro:

—Ñabiara. Ñabiara. Tiaro anjoa mipu putierasiniina ti putiri baharo pinihtare ñabiara waharohca. To ã wahachu ahri yahpai jiina ñabiara yuhduahca —nihre tiro.

9

¹ Baharo pititiaro anjoa ti putiri baharo pairo anjo to yaria cornetare putihre tjoa. To ã putichu ñahpichohaca yoaro sehe jiriro anjo muanopu bora tarirore ñuhi. Yu ã ñano watoi tirore cãari copa macari sawire wahre. ² Æ jiro tiro ti copare to pjõochu pichaca me wijaahre. Pjiri pichaca macaa me yoaro seheta pjiro me wijaahre ti copare. Æ wijaaro ti me dóihta sũ dacho macarirore, m̃ano cãhure butia wahachu yoahre. ³ Æ yoa ti me puhichai jiina poreroa yahpapu tahre. Pichõno soroa ti tuaro purino seheta tina cãhu tuaro purihre. ⁴ Æ jiro tjare, yucãrire, paye toaare ñano yoa dutierare tinare. Masa dihtare ñano yoa dutihre tinare. Cohamacu to wamare ti wãhduã pocare õmahnoeraina dihtare ñano yoa dutihre tinare poreroare. ⁵ Æ ñano yoa dutiparota tinare wajã dutierare. Tinare wajã dutieraparota cinco sãri waro tinare ñano purichu yoa dutihre. Pichõno soroa tjoaa ti purino seheta purichu yoaina jihre poreroa cãhu. ⁶ Tinare ti ã purichu yoachu masa yariaa waha duaahca. Ti ã yaria dua-pachuta tinare yaria dutisi.

⁷ Poreroa sehe cawaloa yoaro sehe bajuhre. Ti cahma wajãhto pano cawaloare ti suhti sãariro seheta tó seheta bajuina jihre tina poreroa cãhu. Ti dapu pocai puhtoa ti pisaa sorori uru sorori yoaro sehe bajuhre. Ti wãhduã poca masa yoaro sehe bajuhre. ⁸ Ti pjoari numia pjoari yoaro sehe jihre. Æ yoa ti piri yaya piri yoaro sehe jihre. ⁹ Pẽ buhu ducatarĩ cahsaro comaa cahsaro yoaro sehe bajuhre ti cutiro. Æ yoa tina ti wachu payu cawaloa m̃arocaina ti m̃arocarõ sehe ti wã dũpuri bisihre. Cawaloa tunua busore wajaina

ti cahma wajãnopu wahaã, ti bisiro se-heta bisihre poreroa wã dũpuri. ¹⁰ Æ yoa pichõno soroa ti pichõno tiro seheta, tjoariaca ti cjuaro seheta jihre tina poreroa. Ti pichõri mehne tjoaa, cinco sãri waro masare purichu yoahre. ¹¹ Tina puhtoro cjuaina jihre. Cãari copa puo jihre ti puhtoro. Tiro anjo jihre. Hebreo ya mehne Abadón wama tihre tiro. Griego ya mehne Apolión wama tihre. (Apoliõn “Pihtichu yoariro”, nino nina.)

¹² Poreroa masare ñano ti purino yoari baharo ahri ti ñano yuhdu m̃ahhtariro cjiro pihtia wahahre. Tó baharo puã taha pari turi ñano yuhduãsiniahca masa.

¹³ Baharo cã wamomaca pihtiina anjoa ti putiri baharo pairo anjo to yaria cornetare putihre tjoa. To ã putichu Cohamacu panoi ducuri altarpũ uru altarpũ durucua bisi wijaro coa tahre. Tĩ altar macaa sahari pititia saharipũ durucua bisi wijaro coa tahre. ¹⁴ Æ durucuro cornetare putiriro anjore yahuhre:

—Eufrates wama tiri ma pjiri mapu pere-supu jijnare anjoare wioga. Tina pititiaro anjoa jira —nino coa tahre.

¹⁵ Æ nino coa tachũ tuhoro anjo sehe tinare pititiarore wiohre, payu masare wajãhtinare. Ahri horare, ahri dachore, ahri sãre, ahri cãhmare quihõno cohtaa nihre tina pititiaro anjoa. Ti cohtariro mu sũra. Æ jia wajãã taa nina. Jipihtina dacho maca doca curero masare wajãahca. ¹⁶ Æ yoa ti surarare “Õpeina jira”, ti nichu tuhohi. Tina cawaloa bui pisaina jihre. Doscientos millones surara jihre.

¹⁷ Æ yoa cawaloare tina bui pisaina cãhure ñuhi. Tina cawaloa bui pisaina ti pẽ buhure ducataa suhti, comaa suhti, sohãã suhti, yahsaa suhti, ewu sehe bajua suhti jihre. Æ jia cawaloa ti dapu poca yaya sohãina yoaro sehe bajuhre. Ti dũseripũ pichaca, me, azufre wama tia me cãhu wijaahre. ¹⁸ Æ jia cawaloa dũseri wijaa masare wajãhre. Jipihtina dacho maca mahano suboro waroi tópeina masare wajãhre. Pichaca mehne, me mehne, azufre mehne payu masare wajãhre. ¹⁹ Tina cawaloa ti dũseri mehne wajãhre. Æ yoa ti pichõri mehne wajãhre tjoa. Ti pichõri sohtoapu agãã dapu poca yoaro sehe bajuhre. Æ jia ti pichõri mehne ñano yoahre tina masare.

²⁰ Payu masa yariaeraina ti wajã dũharina sehe ti ñaa yoarire ne duhuerare. Wafiare ño payo duhuerare. “Cohamacu jira”, ti nia masari cãhure ño payo duhuerare. Tĩ masari uru mehne, plata mehne, bronce wama tiri comaa mehne, tãã mehne, yucari mehne ti yoari masari jihre. Tĩ masari sehe ñũerare. Tũhoerare. Tinierare. ²¹ Paye

ñaa cãhure tina ne cahyaerare. Masare ti wajãrire, numia mehne ti ñano yoarire, ti yacari cãhure ne cahyaerare tina. ã jia yaya ti yoaro sehe yoaa, ti cãhure ne cahyaerare tina.

10

Mahari tiacãre papera tiacãre na taha anjo

¹ Baharo paio tuariro anjo muanopu to duji tachu ñahi. Me curua watoi tahre. ã yoa buhini soro to dapu bui pisahre. To wãhdãa sã dacho macariro yoaro sehe si sitehre. To ñuchãa pichaca yoaro sehe bahunre. ² ã yoa mahari tiacã papera tiacãre to pjãri tiacãre cãhãre tiro. To dahporo pototo bahunsehe macari dahporo mehne pjiri mãpu tu cãhãre. To dahporo cõ bahunsehe macari dahporo sehe macarocai tu cãhãre. ³ ã ducuro yaya ti sañurucuro seheta tiro tuaro sañurucuhre. To ã sañurucuri baharo siete wãpoa yahua coa tamahre. ⁴ Ti ã yahuchã tuhocã joa ducamahã. Yu ã joa ducapachãta muanopu yuhãre õ sehe ni ducuro coa tahre:

—Siete wãpoa ti nirire painare yahui tjiga. ã jicu tãre joa nai tjiga —nino coa tahre yuhãre.

⁵ To ã niri baharo pjiri mãpu ducuriro, macarocai ducuriro anjo to wamomaca pototo bahunsehe siãroca mwohre muanopu. ⁶ ã siãroca mwoho Cohamacã ã catirucuriro wama mehne wama payohre. Tiro Cohamacã sehe jipihtiare muanore, muanõ macaare, ahri yahpare, ahri yahpa macaare, pjiri mare, pjiri ma macaare yoariro jira. ã wama payoro õ sehe nihre anjo:

—Cohamacã mehne potocã nii nija. Tõ purota cohtanahca. ⁷ Seis anjoa cornetarire ti putiri baharo paio anjo to putichã Cohamacã panopu “Õ sehe yoaihtã”, to niriro seheta ã yoarohca. Panopu masare tãre noano yahuera tiri jire. Baharo tirore dahra cohtainare, to yare yahu mãhtaina sehẽre noano yahu pahñoa tiri jire tiro. Ti to yahu cãrãre mipãre yoarohca tiro —nihre anjo.

⁸ To ã niri baharo muanopu yuhãre durucuro coa tariro pari turi durucuro coa tahre tjõa. Õ sehe nino coa tahre yuhãre:

—Pjiri mãpu ducuriro macarocai ducuriro siro anjo cahapã wahaga. ã wahacã papera tiacãre to cãuari tiacãre naga —nino coa tahre yuhãre.

⁹ To ã nino coa tachã tuhocã anjo cahapã wahahi. Tirore papera tiacãre yu sinichã tuhoro õ sehe ni yãhtihre yuhãre:

—Naga. ã jicu ahri tia papera tiacãre chãga. Mũ wahãa chũchũ mi yoaro sehe

noano bisirohca. Mũ pjaropu mũ bũrori baharo suẽa waharohca —nihre yuhãre.

¹⁰ To ã nichũ tuhocã ti tiacãre anjore yu nari baharo chũhi. Yu wahãa chũchũ mi yoaro sehe bisihre. Yu chũ bũrori baharo yu pjaropu suẽa wahahre. ¹¹ Yu ã chũri baharo õ sehe nihre yuhãre:

—Pari turi macari macaina, yahpari macaina, payũ dũseri durucuina, tina bui puhtoã cãhũ baharo ti dohse wahahtore, Cohamacã tinare to dohse yoahõ cãhũre yahuyuga mũhũ —nihre yuhãre.

11

Pũaro Cohamacã yare yahuhtinare yahu joaha João marine

¹ Baharo yuhãre quihõdũre wahre Cohamacã. Tjuadũ puro yoadũ jihre tu. Tãre waro õ sehe nihre yuhãre:

—Yu ya wãhũre quihõi wahaga. Ti wãhũ macari altar cãhũre quihõga. ã yoa tuhũ, ti wãhũ yuhãre ñõ payoinare quihõga. ² Sopaca wija surucari wapare noari wapare quihõi tjiga. Ti wapa yuhãre cahmaerainare ti cãri wapa jira. Tina cuarenta y dos sãri waro Cohamacã ya macare ti macã macaina cãhũre ñano yoahãca. ã jicu quihõi tjiga ti ya wapare noari wapare. ³ ã jicu yu yare yahuinare pũarore warocaihtã. Mil doscientos sesenta dachori waro yu yare yahuahca. Masa ti coyẽa ti yariari baharo ti sãa suhti barore sãina jiahca tina yu yahu dutiina —ni yahuhre yuhãre.

⁴ Ahri yahpa macaina bui puhtoro Cohamacã panõi puadũ Olivo wama tia yucũ ducura. Puadũ sihã payoa yucũ cãhũ ti yucũ चाहã ducura. Ti yucũ mehne piti dahre to buhechũ ahriina pũaro to yare yahuina ti yucũ yoaro sehe jira. ⁵ ã jia tinare ñũ tuhtiina tinare ti ñano yoa duchũ tina sehe ti dũsero macãã picha pohna mehne jũ pahñoahca tinare ñũ tuhtiinare. Õ seheta tinare ñano yoainare wajãhãca tina pũaro Cohamacã yare yahuina. ⁶ ã yoa tina pũaro ti coro ta dutierachũ coro tasi. ã jiro Cohamacã yare ti yahuro puro coro tasi. ã jia mãrãne di mãri wahachũ yoahãca tina. ã jia ahri yahpare ñano wahachũ yoahãca. Jipihtia dohse jiare, jipihtina dohse jĩinare masare ñano wahachũ yoahãca. Ti dohse yoa duaro puro ã ñano wahachũ yoahãca ahri yahpare. ⁷ Ti ã yoa pahñochũ waro sãri coparũ jiro ñãrigo nũcũ macariro wijaarohca. ã wijaaro Cohamacã yare yahuina mehne cahmacheno-hca. ã cahmacheno tua yãhdũrãcãro tinare wajãnohca. ⁸ To ã wajãri baharo ti pjacãri cjiri pjiri macã macari mahapũ coãhãca. Yahuina puhtorore ti cãã puha wajãri macã jira ti macã. Ti macã macaina ñaina jia

Sodoma macaina, Egipto macaina yoaro se-heta jia, ti pjare Sodoma, Egipto cãhu wama tirohca ti maca mari piti dahre buhechu. ⁹ Å coãa tia numu noano coãa, pa numu dacho macai ti pjacuri ti mahai coãahca. Å jia jipihtia yahpari macaina, jipihtia cu-ruari macaina, jipihtia duseri durucuina tópe numari waro ti pjacurire ñurucuahca. Å ñurucua tópe numari waro ti pjacurire ya dutisi. ¹⁰ Ti ã yariarina jichu ñua ahri yahpa macaina wahcheahca. Å wahchea bose numare yoaa, ti basi paye barore ã wanocaahca. Tina puaro Cohamacu yare yahuina masare ñano yuhduchu yoarina jiri jire. Å jia ti ã yariachu ñua wahche yuhduahca ahri yahpa macaina. ¹¹ Å jiro tia numu baharoi pa numu dacho macai Cohamacu ti pjacurire masonohca. To ã masochu tina pari turi wahcãrucu saahca. Ti ã wahcãrucu sachu ñua jipihtina cui yuhduahca tinare. ¹² Baharo tina puaro muanoru tuaro durucuro coa tachu tãhoahca. Õ sehe ninohca tinare:

—Õru muja taga masa —nino coa tarohca.

To ã nichu tãhoa me curua watoi mujaa wahaahca. Ti yabirina cjiri ti mujachu ñuahca. ¹³ Ti ã mujachuta yahpa tuaro ñuhminohca. To ã ñuhmichu ti maca macaa wuhuse décima parte boraa wahaahca. Å jia yahpa ñuhmino mehne siete mil masa yariaa wahaahca. Paina dahsaina sehe caaa wahaahca, Cohamacure muano macarirore “Turairo jira”, ni ño payoahca tirore.

¹⁴ Ahri jipihtia ti ã wahari baharo puataha masa ñano yuhdu tuhsuina jiaha. Ti ã yuhdari baharocãta pari turi doihata masa ñano yuhduahca tjoa.

Seis cornetarire ti putiri baharo paio putiha

¹⁵ Baharo seis cornetarire ti putiri baharo paio anjo to yariare putihre. To ã putichu muanoru tuaro durucua coa tahre. Õ sehe nia coa tahre:

“Mipu Cohamacu Cristo mehne ahri yahpa macaina bui puhtoahca jiaha.

Å jia jipihtina bui puhtoa ã jirucuahca”, nia coa tahre. ¹⁶ Å yoa Cohamacu panoi puhtoa dujiaru dujiina veinticuatro Jesu yaina puhtoa Cohamacu panoi caha su, tireo ño payohre. ¹⁷ Å ño payoa õ sehe nihre:

“Sã puhtoro Cohamacu, tua yuhduariro jira muhu.

Muhu panoru ã jirucua tiri jire.

Mipu cãhure ã jirucura muhu.

Mu tuaa mehne masa ti puhtoro mu jirucachu ‘Noana’, nija muhure.

¹⁸ Jipihtina ahri yahpa macaina muhure cahmaeraina muhu mehne suamare. Mipure tinare mu buhiri dahrehti pja jira.

Yariaina cãhure mu buhiri dahrehti pja jira. Å jiro mu yaina sehere noare ti yoari wapore mu wahti pja jira.

Cãina tina muhure dahra cohtaina mu yare yahu muhtaina jira.

Å yoa tina, paina mu yaina mehne jipihtina muhure ño payoina jira.

Å jicu puhtoare, wiho jiina cãhure mu yaina ti jiri wapa noano yoaihca muhu.

Å jiro ahri yahpa macainare dojomehne cohtainare mu cohãhti pja jira mipure”, ni ño payohre puhtoa Cohamacu.

¹⁹ Ti ã yoari baharo muano macari wuhu Cohamacu ya wuhu to pjõori wuhu jihre. Å jina ti wuhai jiri carore ñuhi sã. Ti caro puhicharu Cohamacu masare to dutiare jia õa pjini tãa pjini sãahre. Sã ã ñuchuta orocasite muu, wupu pja muu, soro jiro bisi muu, yahpa ñuhmi muu, co poca yusaa poca muanoru payu bora tahre.

12

Numinore pinono cãhure yahuha João

¹ Baharo ahri yahpa to dohse wahahtore muanoru ñohre. To ã ñori wiho waro jierara. Õ sehe ñu muhtahi: Muanoru numinore ñuhi. Ticoro to suhtiro sã dacho macariro yoaro sehe si sitehure. Sã ñami macariro bui ducuhre. Puhtoro to pisari soro barore doce ñahpichoha poca cjuari sorore pisaricoro ducuhre. ² Å ducuro mahanocã dahsahre to pohna tihto. Å jiro ticoro sañurucuhre. ³ Baharo pari turi ñuhi muanoru: Pjiriro pinonore sohãiroro ñuhi. Siete dapu poca tiriro jihre. Jipihtia to dapu poca puhtoa ti pisaa sorori barore pisaa dapupoca jihre. Å jiro diez sahari tiriro jihre tiro. ⁴ To pichõno mehne ñahpichoha pocare wahba siteroca borohre. Jipihtia ñahpichohare dacho macabo cureroi wahba siteroca borohre. Å jiro numino pohna tihticoro panoi ducuhre pinono. To macanocã to bajuachu churo taro nimahre.

⁵ Baharocãta cjuu tuhsahre wihãrircãre. Jipihtia yahpari macaina ti puhtoro cjihito jihre tirocã. To ã puhtoro tuariro jichu, masa tireo yuhduhucaã cãno pjasi. To ã masa bajuachuta Cohamacu to dujiro caharu tirocãre naa wahcãa wahahre. ⁶ To ã yoachu numino sehe masa marienoru duhti wahcãa wahahre. Cohamacu to cahnoyurioru duhti wahcãhure ticoro. Tõrãre mil doscientos sesenta dachori waro Cohamacu ticorore ñu wihborohca.

⁷ Wahmanore muanoru cahma wajã dũcaã tiri jire. Miguel wama tiriro anjo to yaina anjoa cãhu pinono mehne cahmachea tiri jire. Ti ã cahmachechu pinono to yaina anjoa mehne Miguere cahmachea tiri jire. ⁸ Å yoa Miguel cãhu

pinonore yuhdurucaca tiri jire. Ā jiro pinono yaina anjoa cāhure mānopu ji namo dutiera tiri jire. ⁹ Ā jiro pjiriro pinonore cohānoca tiri jire Cohamacu. Tiro pinono watīnota jiro nina. Satana wama tiriro jira. Panopu tiro pinono pjacu tiriro jia tiri jire. Tiro jipihitiro yahpa macainare mahūoriro jira. Tireto to yaina anjoa mehne mānopu jirirore yahparu cohā boroa tiri jire.

¹⁰ Baharo mānopu sañurucuro coa tachu tuhohi:

—Mipure Cohamacu masare yuhdūchu yoahre juna. Mipū pinihtare Cohamacu mari puhtoro jiro tahre to tuaare ñono taro. To warocario Cristo cāhu to puhtoro jiare to tuaare ñohre jipihitinare. Watīnore mānopu jirirore yahparu cohā borohre. Ā cohā bororo to tuaare ñohre Cohamacu. Tiro watīno sehe dachoripe, ñaminipe Jesu yainare “Ahrina ñaina jira”, ni yahusāno niri jire Cohamacu. Ā jiro mari coeyare Jesu yainare yahusāriro jiri jire. ¹¹ Cristo Cordero wama tiriro to di cohāri mehne mari coeya Jesu yaina tireto wacū tuaina ti ñaa yoari buhirire cohāre tiro. Ā wacū tuaina jia watīnore yuhdurucare. Ā yoa Cohamacu yare yahua, watīnore yuhdurucare. To yare ti yahuri buhiri paina tinare ti wajā duapachuta, tina cuieraa, Cristo yare duhuerare. ¹² Ā jina mūsa māno macaina wahchega. Watīnore yahparu to cohā borochu ñana wahchega. Wiho mejeta ahri yahpa macaina, pjiri ma macaina cāhu pjacuoina wahanaha mūsa sehe. Ahri yahparu tireto to cohā borori baharo mūsa cahapu jira watīno. Tireto to buhiri dahrehto mahanocā dūhsara. Ā jiro sua yuhdūara tiro. Mūsa cahapu suro, pjacuoina masare tjuachu yoarohca tiro — ni sañurucuro coa tachu tuhohi.

¹³ Pinonore yahparu to cohā borochu ñano, pinono sehe numinore, wiħārirocā pocorore nūnu ti wahcāhre. ¹⁴ Ā jiro ticorore pjiriro cja to waa dūpurire wahre Cohamacu, masa marienopu to wu duhti wahcāhto sehe. Tōpu to suri baharo tia cahma noano pa cūhma dacho maca waroi ticorore ñu wiħbohre Cohamacu. To ā ñu wiħbohchū pinono ticorore ñano yoa masierare. ¹⁵ Tōi to jichū ñano pinono pjiriro core cho cohāhre ticorore mūroca būrochu yoaro taro. ¹⁶ To ā yoachū yahpa sehe ticorore yoadohohre. Pinono to dūseroi wijaa core yahpa sehe wiħmi na pahñonocahre. ¹⁷ To ā wahachū ñano pinono sua yuhdūahre. Ā suaro cāina ticoro panamana ji turiaina mehne cahmacheno wahahre pinono. Tina sehe Cohamacu dutiare yoaina jia, Jesu ya buheare noaa buheare ne duhueraina jihre. ¹⁸ Ā yoa pinono pjiri ma dūhtu cahai

ducuhre.

13

Ръаро нъсч macainare yahuha Joāo

¹ Ā yoa nūcu macarirore tí mai jirirore to wahcā wiħichū ñūhi. Tiro sehe siete dapu poca, diez sahari tiriro jihre. To sahari puhtoia ti pisaa sorori barore pisahre. To dapu pocare to wamare joa ōri dapu poca jihre. Tí wama to ñari wama jichū ñu yabira Cohamacu. ² Tiro nūcu macariro yairo dohroriro yoare sehe bajuhre. Ā jiro oso yoaro sehe dahpori tiriro jihre. Yairo sohāriro pjiriro wuru yoaro sehe dūsero tiriro jihre. Ā yoa pinono sehe to tuaare wahre nūcu macarirore. Ā waro tireto to puhtoro dujiroi cūno, tiro yoaro sehe payu masare dutichū yoahre pinono nūcu macarirore. ³ Cū dapu nūcu macarirore dapu ti wajāmaro dapu yoaro sehe bajuhre. To ā bajupachuta to camino sehe yatia wahahre. Tí dapu to catichū ñua, cūaa wahahre jipihitina ahri yahpa macaina. Ā cūaa, nūcu macarirore ño payohre. Ā jia tiro mehne macaina wahahre masa. ⁴ Ā yoa nūcu macarirore pinono to tuaare to wachū ñua masa sehe tireto pinonore na tuhcuca caha su, ño payohre. Ā jia nūcu macarirore cūhare na tuhcuca caha su, tireto ño payohre. Ā ño payoa ō sehe nihre:

—Ne paio mū yoaro sehe tuariro mari-ahna. Pairo mūhare ne yuhdurucaca masierara —ni ño payohre masa nūcu macarirore.

⁵ Ā yoa tiro nūcu macariro “Tua yuhdurucariro jija”, to nipachuta Cohamacure to ñano durucupachuta ā tuhhotunocasinihre Cohamacu sehe. Ā jiro cuarenta y dos sari waro tiro nūcu macariro masare dutisinimahre. Tó purota to puhtoro jiltore cūre Cohamacu. ⁶ Ā jiro tiro Cohamacure ñano durucuhre. To wamare, to wūhare, mānopu to jiro macaina cūhare ñano durucuhre nūcu macariro. ⁷ Ā yoaro Cohamacu yainare cahma wajāno tinare yuhdurucahre. To ā yoapachuta ā ñunocasinihre Cohamacu. Cohamacu to ā yoa dutierachū yoeraboa. Ā jiro jipihitina ahri yahpa macaina bui puhtoro sāsanimahre nūcu macariro. Jipihitina yahpari macaina bui, macari macaina bui, jipihitina dūseri durucujina bui puhtoro sāsanimahre tiro. ⁸ Ā jia jipihitina ahri yahpa macaina tiro nūcu macariro panoi na tuhcuca caha su tireto ño payohre. Ahri yahpare Cohamacu to bajumehnehto pano to yaina cjihire ā jirucuhitine ti wamare joa ō tuhsua tiri jire. Tí tju to ā joa ōri tju Cordero ti wajāriro ya tju jira. Tí tju ti wamare joa ōeraina dihta nūcu macarirore ño payohre.

⁹ Cahmori tiina jira musa. Ā jina tuhoga. ¹⁰ Jipihtina Cohamacu yaina peresu wahahtina, baharo peresu wahaahca. Jipihtina tina ñosari pji mehne ti ñosa wajaahntina, baharo ti pji mehne yariaahca. Tire masina mari Cohamacu yaina ñano yuhdupanahta tirore cohäena tjijihna. Ā yoa tirore wacü tuarucujihna.

¹¹ Baharo paio nucu macarirore ñuhi tjoa. Yahpa puhichapu jiriro to wijaachu ñuhi. Pua saharo oveja sahari yoaro sehe bajua sahari sahari tiroro jihre. Ā yoa pinono yoaro sehe durucuhre. ¹² Ā jiro nucu macariro ji muhtariro sehe baharo jiriro sehene puhtoro söhre. To ā puhtoro söriro sehe jipihtia yahpári macainare ji muhtarirore ño payochu yoahre. Ji muhtariro nucu macariro ti wajamariro camino yatiriro jihre. ¹³ Ā yoa baharo jiriro nucu macariro bajuamehneare yoahre masa ti ñu csahto sehe. Ā yoaro masa ti ñurocaroi pichaca pjiri pichaca manopu bora tachu yoahre. ¹⁴ Ā yoa ji muhtariro to ñurocaroi paio nucu macariro sehe bajuamehnea mehne masare mahñohre “Ahriro musa ño payohtiro jira”, nino. Tiro masare mahñono, ji muhtariro masare masare yoa dutihre tirore ti ño payohto sehe. Tiro ji muhtariro ñosari pji mehne ti ñosario jiparota catiriro jihre. Tiro yoaro sehe bajuri masareta yoa dutihre paio nucu macariro masare. ¹⁵ Ā yoa baharo jiriro nucu macariro sehe ji muhtariro masare catichu yoahre masare to dutihtu sehe. Ā jiro ti masare ño payoerainare wajä dutihre masare masu sehe. ¹⁶ Ā yoaro jipihtinare ti wamomacari poto buhusehei ti wuhdua poca cähure joa õ dutihre nucu macariro baharo jiriro. Wiho jiiinare, puhtoare, pache puare, pjacwoinare, dahra cohtainare, dahra cohtaina jierainare, jipihtinare ti wamomacarine ti wuhdua poca cähure joa õ dutihre. ¹⁷ Tiro ji muhtariro nucu macariro to wamare, to númerore joa ñerainare ne nuchu dutierare. Tuhsu, tinare dua dutierare. ¹⁸ Tire noano wacü masiga musa. Tuho masiina jina nucu macariro to númerore noano ñu masiga. Ti número muno wama yoaro sehe jira. Ti número seis cientos sesenta y seis jira.

14

Cohamacu to yuhduchu yoaina canota wahma basaare basaha

¹ Baharo Siõ wama tidu täcu bui ducurirore Corderore ñuhi. Tiro mehne ciento cuarenta y cuatro mil masa jihre. Tina to ya wamare to Pucuro ya wama cähure ti wuhdua pocare ti joa ñrina jihre. ² Tinare yu ñuchuta manopu durucuro coa

tahre. Pjiri poaye to bisiro seheta wapo pjiro to bisiro seheta bisiro coa tahre to durucua. Ā yoa arpa wama tiare ti buaputëno seheta bisiro coa tahre to durucua. ³ Tõi puhtoro to dujiro चाहai pititiroro soro bajuina, Jesu yaina puhtoa cähu paina jihre. Ā jia tina panoi ciento cuarenta y cuatro mil masa ducuhre. Tõi ducua canota wahma basaare basaa nihre. Ti basaare tina dihta masihre. Ahri yahpai jina ciento cuarenta y cuatro mil Cristo to yuhduchu yoaina dihta ti basaare masihre. ⁴ Ne tina cü tahacä numino mehne ñano yoarerare. Ā yoa Corderore ñu cüna jia, to yare ā yoarucaina jihre. Ā jiro tinare ñaina mehne jiiinare to yuhduchu yoahntinare naahre Cohamacu sehe. Ā to yuhduchu yoarina jia, Cohamacu yaina cjihti, Cordero yaina cjihti cähu ji muhtaina jihre. ⁵ Tina mehne macaina ne cäiro mahñoriro mariahna. Ā jia Cohamacu to tuhotuchu ñaa buhiri marieina jihre tina.

Tiaro anjoa yahuroca boroha

⁶ Baharo manopu wärirore anjore ñuhi. Tiro ahri yahpa macainare jipihtia curuari macainare, jipihtia duseri durucuinare, jipihtia yahpári macainare noaa buheare yahuhtiro jihre. Ti buhea ne cohtotaeraa, ā jirucura. ⁷ Ā jiro anjo sañurucuro õ sehe niroca borohre:

–Cohamacure cui, ño payoga. “Tua yuhduariro, noa yuhduariro jira”, niga tirore. Mipure tiro masare to buhiri dahrehti pja jiro nina. Tiro manore, yahpare, pjiri mare, mári pohtari cähure yoariro jira. Ā jina tirore na tuhcuca caha su, wahche payoga –ni sañurucuhre anjo.

⁸ To ā niri baharo paio anjo manopu wäriro õ sehe niroca borohre:

–Tinare cohänocahre. Pjiri maca Babilonia wama tiri maca macainare cohänocahre Cohamacu. Tina to cohärina sehe jipihtina painare ñano yoachu yoare. Masa tinare ñu cü ñaare goa pja, tire yoare. Cahaina vinore ti tuaro goa pjaro seheta tina ñaare tuaro goa pjare Babilonia macainare ñu cü –ni yahuroca borohre paio anjo.

⁹⁻¹⁰ Tina puaro anjoa ti ā niri baharo paio anjo ti baharo wäriro õ sehe tuaro niroca borohre:

–Jipihtina nucu macarirore ño payoinare, to masare ño payoinare, ti wuhdua pocare, ti wamomacarine to wamare joa ñrina cähure buhiri dahrerohca Cohamacu. Tina mehne suaro, tina pinine tuaro waro buhiri dahrerucurohca Cohamacu. Nucu macarirore ño payoina jipihtina pichacapu wahaahca. Tõpu tuaro purñohca tinare pichaca mehne, azufre wama tia mehne ti wijäri pichaca mehne. Noaina anjoa, Cordero cähu ti ñurocaroi ñano yuhduahca

tina. ¹¹ Tí pichaca ã me tirucurohca. Ne yatisi. Tinare ã purirucuchũ yoara. Jipihtina nũcũ macarirore na tuhcuca caha sũ ño payoinare ã purirucurohca. Dachoripe, ñaminipe ã purirucunocanoahca. To masũre ño payoina, to wamare ti joarina cũhu tó seheta ñano yũhdũahca —niroca borohre anjo.

¹² Ti ã ñano yũhdũchũ ñũna Cohamacũ yaina to dutiare yoaina, Jesure cohãeraina jina, to yare duhuena tjiga. Ñano yũhdũpanahta Cohamacũ yare cohãena tjiga.

¹³ Baharo mũanopũ yũhũre durucuro coa tachũ tũhohi. Õ sehe nihre yũhũre:

—Ahrire joaga mũhũ. Cohamacũ yaina tirore cohãeraina jina mipũre mũsa yariari baharopũ cũhũre wahcheina jira mũsa —niroca borohre yũhũre.

To ã niri baharo Espĩritu Santo sehe õ sehe ni namohre tjoa:

—Ã tjira. Potocã tjira. Tina tuaro ti dahraare duhu, soahca. Mũanopũ ti wahachũ noano ti yoarire wacũnohca Cohamacũ. Á yoa ti ã yoari wapa tinare noano yoarohca. Á jia tina wahcheina jira —ni namohre Espĩritu Santo.

Wese macaa toaa dichare mari bese nano seheta Cohamacũ to yainare bese nanoahca. Ñaina sehẽre soro bese daporohca.

¹⁴ Baharo me curua yehseri curuare ñũhi. Tí curua bui masũno yoaro sehe bajuriro dujihre. Tiro uru soro pũhoro to pisari soro barore pisahre. Á yoa yoari pji siori pjiĩne cjuahre tiro. ¹⁵ Baharo paioo anjo Cohamacũ wũhũ jiriro wijaa tahre. Á wijaa taro tuaro sañurucuhre me curua bui dujirirore:

—Mũ yoari pji mehne wese macaa dichare ahri yahpa macaa dichare dũte naa pahũoga. Mipũre to quihõri pja sũra. Mipũ dĩa sehe sohã tuhsũhre —nihre anjo.

¹⁶ To ã nichũ tũhoro to yoari pji mehne ahri yahpa macaa dichare naa dũcahre me curua bui dujiriro.

¹⁷ Baharo paioo anjo cãhũ mũano macari wũhũ Cohamacũ wũhũ jiriro wijaa tahre. Tiro cãhũ yoari pji siori pjiĩne cjuahre. ¹⁸ Á yoa paioo anjo altar cahapũ jiriro wijaa tahre. Tiro sehe altar macari pichacare ñũ wihboriro jihre. Á wijaa taro yoari pji siori pjiĩne cjuarirore õ sehe ni sañurucuhre:

—Mũ yoari pji mehne ahri yahpai jiri wese, se wese macaa dichare naaga. Se sehe ñi tuhsũhre —ni sañurucuhre.

¹⁹ To ã nichũ tũhoro anjo to yoari pji mehne ahri yahpa macaa se tõhorine yihso nahre. To ã yoari baharo tí tõhorine se tõhorine to tũ tihãhtoĩ cohãhre. To ã cohãriro seheta Cohamacũ tirore cahmaerainare tuaro suaro, cohãnohca. ²⁰ Tĩ maca dũhtũ cahai ti tũ tihãhtoĩ tí se tõhorine tũ tihãhre. Tõĩ ti

tũ tihãchũ di wijaaahre. Di ma yoaro sehe jihre tí di. Tres cientos kilómetros yoari ma, cã metro noano pa metro dacho macai cãri ma jihre.

15

Masa ti ñano yũhdũhtore anjoa cũ batoha masare

¹ Baharo mũanopũ soro jirore ñũhi. Tĩre ñũa masa cãaa wahaca. Ahri yahpapũre to dohse wahahtore marine ñohre. Á jiro tí wiho waro jia nierara. Õ sehe ñũhi: Siete anjoa jihre. Cohamacũ suaro, siete tahari masare buhiri dahre batoaro taro nihre. Á jia tina siete anjoa sehe buhiri dahre dutiro to cũhtina jihre.

² Anjoare yũ ñũri baharo pjiri mare noano co sitiri ma yoaro sehe jiri mare ñũhi. Tĩ ma pichaca mehne jiri ma jihre. Á yoa nũcũ macarirore to masũ cãhũre yũhdũrucainare ñũhi. Tina to wamare to nũmerore cjuæraina jihre. Tina yũ ñũchũ pjiri ma co sitiri ma dũhtũ cahai ducuhre. Tõĩ ducuina arpa wama tiare buapũtãre cjuahre. Tĩ buapũtã Cohamacũ to wari jihre. ³ Á jia Cohamacũre dahra cohtariro Moise cjiro ya basaare cãnota basaa nihre tina. Cordero ya basaa cãhũre basaa nihre. Õ sehe ni basahre:

“Sã pũhoro mũhũ Cohamacũ tua yũhdũariro jira.

Mũ yoarire ñũna ñũ cãaa wahaja sã.

Mũ yoari noa yũhdũara.

Mũhũ jipihtia yahpari macaina bui pũhoro jira.

Noano mahũono marieno, quihõno yoarucura mũhũ.

⁴ Jipihtina mũhũre wahche payoahca.

Jipihtina mũhũre ‘Tuariro jira’, niahca.

Mũhũ dihta ñaa marieriro jira.

Jipihtia yahpari macaina mũ cahapũ sũa, na tuhcuca caha sũ, mũhũre wahche payoahca.

Áta yoahca tina jipihtina noano mũ yoarire ñũa”.

ni basaa nihre tina.

⁵ Baharo mũanopũ ñũroca mũocũ, Cohamacũ wũhũre pjõri wũhũre ñũhi. Tõĩ Cohamacũ to ya tahtia waroi to dutia to joaa pjiĩni tã pjiĩni ti wihbori pjiĩni jihre.

⁶ Tĩ wũhũre yũ ñũchũta siete anjoa tí wũhũ puhichapũ jirina wijaa tahre. Tina Cohamacũ to buhiri dahre dutiro to cũhtina jihre. Tinape ti buhiri dahrehtire cjuahre tina siete anjoa. Noaa suhti, wete maria suhti, si sitea suhti tiina jihre. Á jia ti cutiro bui uru cahsaro mehne tũã dihorina jihre.

⁷ Tĩ wũhũpũ jirina ti wijaa tachũ pititiaro soro bajuina mehne macariro tinare siete anjoare siete uru wahwarire wahre. Tĩ

wahwari Cohamacu suaa to buhiri dahrehti mehne noano wahpaa wahwari jihre ti wahwari. Tiro Cohamacu ā jirucuriro jira. ⁸ To ā wachu Cohamacu wuhu puhichapu to si sitea mehne to tuaa mehne me ti sahsea wahahre. To ā me wuhu wahachu ne masa ti wuhure sāa masierare. Siete anjoare Cohamacu buhiri dahre dutiro to cūriro seheta masare ti buhiri dahre batoari baharo pari turi ti wuhuru sāa masina tjoa. To buhiri dahrehto pano sāa masierare.

16

Cohamacu masare to buhiri dahrehtore yahuha

¹ Baharo Cohamacu wuhai tuaro durucuro coa tahre. Siete anjoare yahuro nihre:

—Siete wahwarihi posa tiare yahpapu pio siteroca borona wahaga. Yahpa macainare Cohamacu to niriro seheta buhiri dahresiniga mipure —ni durucuro coa tahre.

² To ā nino coa tachu tuhoro ji muhtariro anjo to cjuari wahwai posa tiare yahpapu pio siteroca borohre. To ā pio sitechu nucu macariro wamare joa ōrina, to masare űo payoina űano camī tihre. Tī camī tuaro purihre tinare.

³ To ā pio siteri baharo paio anjo tjoa to cjuari wahwai posa tiare pio siteroca borohre tjoa pjiri mapu. To ā pio sitechata tī ma di ma wahahre. Variariro di yoaro sehe jihre tī di. Ā wahachu tī ma puhichapu jiina yaria pihtia wahahre.

⁴ Puro ti ā pio siteri baharo paio anjo tjoa to cjuari wahwai posa tiare pio siteroca borohre tjoa mārīpu, tī mārī pohtaripu cūhure. To ā pio sitechu mārī di mārī dihta wahahre. ⁵ To ā wahachu űano paio anjo mārīre cohtariro ō sehe nihre:

—Cohamacu mūhu űaa marieriro jira. Mīpu cūhure ā jirucuriro jira mūhu. Panopu cūhure ā jirucua tīre mūhu. Ā jicu masa tī űano yoachu űucu quihōno tinare buhiri dahrehtore mūhu. Di mārīne yoacu noano yoahre mūhu. ⁶ Nucu macariro yaina sehe mu yainare wajāa, di cohāchu yoahre. Mu yare yahuina cūhure wajāa, di cohāchu yoahre. Tī ā wajāri buhiri mārī di mārī wahahre. Ā yoa tinare dire mu ā sihnichu yoachu noa nina. Ō seheta mu yoachu cahmahre tina —nihre mārīne cohtariro anjo.

⁷ To ā niri baharo altarpū durucuro coa tahre:

—Ā tjira. Cohamacu sā puhtoro tua yuhduariro jira mūhu. Mahōno marieno, quihōno masare bese, buhiri dahrera mūhu —ni durucuro coa tahre.

⁸ Tiaro anjoa ti pio siteri baharo paio anjo to cjuari wahwai posa tiare pio siteroca

borohre tjoa sū dacho macariro bui. To ā pio sitechata sūre masare tuaro sichu yoahre Cohamacu. ⁹ Ā jiro sū dacho macariro masare tuaro sihre. Ā jia Cohamacu tinare to buhiri dahre dutichu masia, tirore űano durucuhre masa. Ā űano yuhduapahta Cohamacure maca duaerare. Cohamacure “Tuariro jira”, ni wahche payo duaerare.

¹⁰ Pititiaro anjoa ti pio siteri baharo paio anjo tjoa to cjuari wahwai posa tiare pio siteroca borohre tjoa nucu macariro to dujiro bui. Puhtoro dujiro jihre to dujiro. To ā pio siteri baharo nucu macariro to yaina ti jiri yahpapu nahitiano wahahre. Ā jia to yaina masa űano purīpachuta, űano camī tipahta, ne ti űaa yoarire cahyaerare. Ā yoa tīre duhuere. Ā jia Cohamacu tinare to camī dahrechū masia tirore mūano macarirore űano durucuhre.

¹² Cū wamomaca pihtiina anjoa ti pio siteri baharo paio anjo tjoa to cjuari wahwai posa tiare pio siteroca borohre tjoa Eufrates wama tiri ma pjiri mapu. To ā pio sitechata tī ma sihbi cahaa wahahre. Sū muja taro macaina puhtoa ti yaina masa mehne tī māre ti pahā tahto sehe ā yoahre.

¹³ Baharo tiaro wafiare taharo bucuna yoaro sehe bajuinare űuhi. Cūiro pinono puhichapu jiriro to duseropu wijaa tahre. Pairo wafīno nucu macariro duseropu wijaa tahre. Pairo wafīno “Cohamacu yare yahuriro jija”, ni mahōriro duseropu wijaa tahre. ¹⁴ Tina tiaro wafīa bajuamehneare yoaina jihre. Jipihtiro macaina puhtoare cahmachuchū yoahre tina cahma wajā dutia taa. Tī ā cahma wajāhti dacho Cohamacu tua yuhduariro jipihtinare to dutihti dacho, pihtihti dacho jira. ¹⁵ Ō sehe nihre Jesu: “űuga musa. Yacariro wacūenoca to yacaro taro seheta yuhu cūhu wacūenoca taihtja. Yu tahtore noano cohtariro wahcheriro jirohca. To yare noano cahnoriro, to suhti sāariro jira wahcheriro. Ā yoariro jiro yu tachū buo tisi tiro suhti marieriro yoaro sehe jieraro”, nihre Jesu. ¹⁶ Baharo tiaro wafīa yahpari macaina bui puhtoare cahmachuchū yoahre tinare. Tī cahmachuno Hebreu ya dusero mehne “Armagedon” wama tihre.

¹⁷ Seis anjoa ti pio siteri baharo paio anjo tjoa to cjuari wahwai posa tiare me curuari cahapu pio siteroca borohre tjoa. To ā pio siteri baharo puhtoro dujiropu Cohamacu wuhai jiri dujiropu tuaro durucuro coa tahre:

—Tō puro tjica —nino coa tahre.

¹⁸ To ā nichata orocasite mūa, wupu pja mūa, soro jiro bisī mūa, cuaro yahpa űuhmihre. Ahri yahpai masa ti ji ducari baharo ne tō sehe űaca yahpa űuhmiera tihre.

Paye ñuhmia yuhdoro cuaro yahpa ñuhmihre.
 19 Á to ñuhmichu pjiri macare tia maha yihti
 muaa wahahre. Á jia bujua macari ahri yah-
 pai jia macari bora wahahre. Á jiro Babilo-
 nia wama tiri maca pjiri maca macainare
 wacũhre Cohamacu tinare buhiri dahrero
 taro. Ti ñaare yoari buhiri tina mehne tu-
 aro suahre. Á suaro tinare tuaro buhiri
 dahrehre. 20 To á yoachũ jipihtia nacopo,
 täyucũ cãhu cohõ pihtia wahahre. Á jia
 ne mariahare. 21 Á yoa bujua poca co poca
 yusua poca yahparũ masa bui bora tahre.
 Jipihtia poca co poca cuarenta kilos nacua
 poca jihre. Tina bui ti á bora tachũ Co-
 hamacu masare to tuaro buhiri dahrechũ
 masia ñano durucuhre masa Cohamacure.

17

*Mua mehne ñano yoarucuricorore ñabiaro
 yoaricorore buhiri dahre dutirohca*

1 Baharo siete wahwarire cjuaina anjoa
 mehne macariro yũ caharũ wihiro õ sehe
 nihre yuhare:

—Ñui taga. Payu mári bui dujiricorore
 mua mehne ñano yoarucuricorore ñabiaro
 yoaricorore Cohamacu to buhiri dahre-
 htore ñuĩhca mahu. 2 Ahri yahpa macaina
 puhtoa ticoro mehne ti ñano yoaboro
 seheta ticoro yoaro seheta yoare tina.
 Cohamacu ya sehene cahmaerare. Ahri
 yahpa macainare to cahachu yoaboro
 seheta tina mehne to ñano yoaboro seheta
 ticoro masare ñaare goa pjachu yoare. Á
 yoaro ñaare yoachũ yoare masare —ni
 yahuhre anjo yuhare.

3 To á niri baharo Espiritu Santo sehe to
 bajuamehneare yuhare ñohre. Anjo sehe
 masa marienopũ naahre yuhare. Tõi numi-
 no ñui. Ticoro nacu macariro sohãriro
 bui pisaricoro jihre. Nacu macariro sehe to
 pjacũ payu wama ti joa õriro jihre. Tí wama
 ñaa wama Cohamacu to ñu yabia wama
 jihre. Á yoa siete dapu poca tiri, diez
 sahari tiro jihre nacu macariro. 4 Tuhsu,
 numino sehe noano yahsa suhti puhtoa ti
 sãa suhti sehe jiare sãaricoro jihre. Sohãa
 suhti cãhure sãaricoro jihre. Payu urure,
 wapa tia tãare, perla yaparĩ cãhure õa
 suhtire sãaricoro jihre ticoro. Uru wahware
 cjuahre ticoro. Tí wahwai posa tia ñaa to
 yoari jihre. Mua mehne ñano yoaro pjiro
 ñano yoahre ticoro. Tí ñaare ñu yabira
 Cohamacu. 5 To wuhduai to wama ti joa
 õricoro jihre. Tí wamare noano masier-
 aja mari. Tí wama piti dahre buheri
 wama jira. Ahri jira ti wama: “Pjiri maca
 Babilonia wama tiri maca jira. Jipihtia
 ñaa yoare goa pjaare yoa dũcaricoro, Co-
 hamacure cahmaerachũ yoaricoro jira” ni,
 to wuhduai ti joa õricoro jihre. 6 Á jicu ticoro

payu Cohamacu yainare wajãricoro to jichu
 masihi. Cahaare to wahchero seheta tinare
 wajãno ti di cohãchũ wahchehre ticoro. Jesu
 yare ti yahuri buhiri ticoro wajãhre tinare.
 Ticorore ñucũ, ñu cãaa wahahi.

7 —¿Dohseacu mũhu ñu cãaa waharide?
 —nihre anjo yuhare—. Mu masierarire
 mũhure yahuihtja. Numinore mũhure
 yahuihtja. To pisariro cãhure yahuihtja.
 Tiro nacu macariro, siete dapu poca tiri,
 diez sahari tiro jihre. 8 Tiro panopũ jiro
 jire. Mipure mariahna tiro. Baharo tiro
 cããri coparũ jiro wijaa tarohca. To á wijaa
 tari baharo pichacaru waharohca. Ahri
 yahpa macaina tire ñu cãa, ño payore
 tire. Ahri yahpa to jihto pano Cohamacu
 to yaina cjihtire á jirucuhinare ti wamare
 joa õa tiri jire. To joa õeraina jire nacu
 macarirore ño payoina. Tiro sehe panopũ
 jia tiri jire. Mipũ sehene mariahna. Baharo
 pari turi bajoarohca tjoa. Á jia to bajuachu
 ñua masa tire ñu cãaa wahaahca.

9 Mipure yu yahuihtire masi duana, noano
 tuhonahca musa. Á yoana noano masi-
 ina jiga. Nacu macariro dapu poca si-
 ete dapu poca siete täyucũ jira, mari piti
 dahre buhechu. Tí täyucũ bui pisara ticoro
 mua mehne ñano yoarucuricoro. Tí dapu
 poca siete puhtoa yoaro sehe jira, mari piti
 dahre buhechu. Payu masa bui puhtoa jira.
 10 Cinco puhtoa cohã tuhsare. Pairo tina
 baharo jiro puhtoro jira mipure. Pairo
 sehe baharo puhtoro sãanohca. Á sãano
 mahanocã puhtoro jirohca tiro. 11 Á jiro
 nacu macariro panopũ ji muhtariro, mipũ
 marieriro tina siete puhtoa baharo puhtoro
 jirohca. Siete puhtoa mehne macariro jira.
 Baharo pichacaru waharohca.

12 Nacu macariro sahari diez sahari diez
 puhtoa yoaro sehe jira mari piti dahre
 buhechu. Payu masa bui puhtoa jira. Tina
 puhtoa sãaerasinihre. Baharopũ puhtoa sãa
 mahanocã puhtoa jiahca. Yoari pja ji dutisi
 tinare. Á puhtoa jia nacu macariro mehne
 puhtoa jiahca. 13 Tina diez puhtoa cãno
 potori tuhoutuina jira. Tina nacu macarirore
 ti ya yahpari macaina bui puhtoro sãahca.
 14 Á jia Cordero mehne cahma wajãahca.
 Ti á cahma wajãpachũta Cordero to be-
 seinã mehne tire ne cohãeraina mehne
 tinare yuhdũrũcaahca. Tiro jipihtia paina
 puhtoa bui puhtoro jira. Á jiro tinare
 yuhdũrũcarohca —ni yahuhre yuhare anjo.

15 Ahrire yuhare yahu namohre anjo:

—Mua mehne ñano yoarucuricoro mári
 bui dujire. Tí mári ahri yoaro sehe jira mari
 piti dahre buhechu: Yahpari macaina, payu
 curuari macaina, payu dũserire durucuina
 yoaro sehe jira tí mári. 16 Nacu macariro,
 diez puhtoa mehne mua mehne ñano
 yoarucuricorore ñu yabiahca. Tina diez

puhtoa nucu macariro mehne ticoro yare ma pahño, suhti marienicoro cohāahca ticorore. Ā yoaa to pjacure chuahca. Tí ā yoari baharo ticorore jū pahñoahca. ¹⁷ Tina diez puhtoa cāno potori tuhotua nucu macarirore ti ya yahpari macaina bui puhtoro sōahca. Tinare ā yoachu yoare Cohamacu, to cahmano seheta yoaro taro. Ā jiro nucu macariro sehe puhtoro jirohca. Jipihtia Cohamacu panopu to yahuriro seheta to yoari baharo nucu macarirore cohānohca. ¹⁸ Ticoro mu nūricoro mehne ō sehe ni piti dahre buhera: Ticoro pjiri maca Babilonia wama tiri maca yoaro sehe jira. Jipihtina paina puhtoa bui jira tí maca macaina —nihre anjo yuhure.

18

Babilonia wama tiri maca to cohāri maca jira

¹ Baharo paio anjo manopu dujiarirore nūhi. Tiro puhtoro waro jihre. To si sitea jipihitropu noano buhria sahsea wahahre. ² To ā dujari baharo ō sehe ni tuaro sañurucu yahure:

—Cohāri jihre. Babilonia wama tiri maca pjiri maca macainare cohāri jihre. Mipure watia, payu naina pjacu bajueraina cāhu tí macai jia nina. Naina baro wahiquina wūina peri cāhu masa tí nū yabiina tí macai jia nina. ³ Jipihtia yahpari macaina tí maca macainare nainare nū cūa, tina cāhu nāno yoare. Ā yoa yahpari macaina bui puhtoa tí maca macaina numia mehne nāno yoare. Ticoro ā mūa mehne nāno yoarucuricoro jiro wapa tiare nuchua tire. Pjiro to ā nuchuchū ahri yahpa macaina pache duaina pjiro wapatare —ni yahure anjo.

⁴ Baharo pari turi manopu durucuro coa tahre. Ō sehe nihre:

—Yu yaina ahricoro mūa mehne nāno yoarucuricoro mehne jiena tjiga mūsa. Ticoro mehne mūsa jichū mūsa cāhure buhiri dahrerohca. Ā jina to nāno yoare nū cūena tjiga. ⁵ To nāno yoari payu jinocahna. To nāno yoarire pari tju mari duhu payo mūochū tí tju sehe manopu wahā sunocaboa. Ā jia to nāno yoari payu jinocahna. Ā jiro to nāno yoarire wacūna Cohamacu. Ā wacūno ticorore buhiri dahre dutirohca. ⁶ Ticoro tuaro to buhiri dahrehticoro jijaro. Masare to nāno yoachū yoariro seheta ticoro cāhure nāno yuhdūchū yoajaro. Masare ā nāno to yoariro seheta tí yuhdoro ticorore nāno buhiri dahrejaro. ⁷ Ticoro “Noaricoro jija”, ni tuhotumare. Ā ni tuhoturo, wapa bujuare pjiro cjuare ticoro. To wapa bujuare pjiro to cjuaro purota ticorore pjiro nāno yuhdūchū yoajaro. Tó purota ticorore cahyachū

yoajaro. To basi ō sehe ni tuhotumana ticoro: “Ōi puhtorocoro yoaro sehe jiricoro dujija. Wapewahyoro jieraja. Ā jico ne nāno yuhdūsi yuhū”, ni tuhotumana ticoro. ⁸ Ā ni tuhoturicoro to jichū wacūenoca ticorore buhiri dahrehto jirohca. Ticoro dohati, yapainare yahco tii, jūca barohca. Tuhsū, ticorore jū borohca. Mūsa puhtoro Cohamacu ticorore buhiri dahre dutiriro tua yuhduariro jira. Ā jiro tó seheta yū niriro seheta ticorore buhiri dahre dutirohca —nino coa tahre manopu.

⁹ Ā jia ticoro yoaro sehe jiri macare Babiloniare Cohamacu to buhiri dahreri baharo ahri yahpa macaina puhtoa tuaro cahya, tiiahca. Tí maca macaina mehne nāno yoaina jire. Ā jia tí maca to jūchū nūa tiiahca tina. ¹⁰ To ā jūchū nūa tina puhtoa yoaropu nūrocarucuahca, “Mari cāhure buhiri dahreri”, nia. Tó nūrocarucua ō sehe niahca:

—Cue, pjacūori maca jira, Babilonia. Sí maca pjiri maca tuari maca jimahre. Wacūenoca sí macare buhiri dahrehre —niahca tina.

¹¹ Jipihtropu macaina pache duaina tí macare nūa tuaro cahya tiiahca. Tí maca to pihtichū nūa, tí pachere nuchūina mariachū nūa cahyaahca tina. Ā jia tiiahca. ¹² Tí na tarire urure, platare, wapa bujua tāare, perla wama tia poca cāhure nuchūina mariachū. Ā yoa paye tí na tari cjirire suhti noaa suhtire, yahsaa suhti puhtoa tí sāa suhti yoaro sehe jia suhtire, seda wama tia suhtire, sohāa suhtire nuchūina mariachū. Ā yoa paye tí na tarire yucuri me sitia yucurire nuchūina mariahca. Ā yoa paye tí na tarire marfil wama tiro mehne tí yoarire, wapa bujua yucuri mehne tí yoarire, bronce wama tiri comaa mehne tí yoarire, comaa mehne tí yoarire, marmol wama tiro mehne tí yoarire nuchūina ne mariahca. ¹³ Ā yoa paye tí na tarire canela wama tiare tí chware coachu yoare, paye tí chware coachu yoare, incensore, mirra wama tia me sitiare, paye me sitiare nuchūina mariahca. Ā yoa paye tí na tarire vinore, chūa wajaa sere, trigo pohcare noano tí shaweri pohcare, trigo yaparire, wachūare, corderoare, cawaloare, tunua buso cawaloa tí wajaa busore nuchūina mariahca. Dahra cohtainare nuchū tinare cjuaina cāhu mariahca. Masa tí jipachūta tinare nuchūina jimahre. Mipure mariahca. Ā jia cahyaahca pache duaina. ¹⁴ Ā jia ō sehe niahca tina tí maca macaina cjirire:

—Ade, nācaro wahajari. Jipihtia mūsa cahiri cjiri pihtia wahahre. Ā yoa jipihtia noaa mūsa cjuari cjiri pihtia wahahre. Ā tí

pihtia wahachu tíre pari turi bocasi musa – niahca pache duaina.

¹⁵ Tina tí macare pachere duaa, pjíro wapatamare. Á jia tina tí macare yoaropu ñarocarucua, “Mari cühare buhiri dahreri”, nia. Á ñarocarucua tí macare tuaro cahya, tiiahca. ¹⁶ Ó sehe niahca tí macare:

–Cue, pjacuoína jira sí maca pjiri maca noari maca macaina cjiri. Sí maca numino yoaro sehetá noaare cjuhare. Numino sehe noaa suhtire, yahsaa suhti puhtoa ti sãa suhti yoaro sehe jia suhtire, sohãa suhti cühare sãahre. Á yoa uru, wapa bujua tãa, perla wama tia poca ða suhtire sãahre. Tó sehetá yoahre sí maca macaina. ¹⁷ Á jia wacüenoca sí maca buti pihtia wahahre – niahca tí macare.

Á yoa jipihtina dohoa buso mehne tini-ina, tí buso puá, ti musa, paina pjiri mapu dahra wapataina cãhu tí macare yoaropu ñarocarucua. ¹⁸ Tóí ñarocarucua tí macare to jüchu ñua ó sehe ni sañurucua: –Noaa macari sí maca yoaro sehe jia macari ne paye macari mariahna –ni sañurucua tina.

¹⁹ Á cahyaina jia ti dapu poca bui dihtare oré payoahca. Á jia tuaro yahco tiia ó sehe niahca:

–Cue, pjacuoína jira sí maca macaina cjiri. Noari maca jímare. Jipihtina do-hoa buso cjuaina pjiri mapu tiniina sí maca macaa pache mehne noano wapatahahi mari. Á yoa dóihita sí maca macaa buti pihtia wahahre –niahca buso macaina.

²⁰ Tí macare to cohãchu ñuna wahchega musa muano macaina. Cohamacu yaina, Jesu to cürina, to yare yahu muhtaina jip-ihitina musa wahchega. Tí maca macaina musare ñano yuhdachu yoare. Ti á yoari buhiri buhiri dahrehre Cohamacu. Á jina wahchega musa.

²¹ Á yoa tuariro anjo pjiria tãcare arëni soro puro jiria tãcare na wahcõ, pjiri mapu doca ñohre. Á doca ñono ó sehe nihre:

–Ahria tãca to bora ñojariro sehetá pjiri maca Babilonia wama tiri maca tuaro boraro bisirohca. To á borari baharo tí macare pari turi ñusi masa. ²² Tí macare butia wahachu yoarohca. Á jia tí macai basaare musa basarucuriro sehe ne coa tasi. Arpa wama tiare musa buaputërucuriro sehe, flauta wama tia pocare, corneta cühare musa putirucuriro sehe pari turi tí macai coa tasi. Á yoa tí maca mariachu pari turi tí macai dahraina dahrasi. Á yoa tãca mehne musa soari cühare tuhomahnosi. ²³ Ne tí maca to buhria coãriro sehe ne jisi. Á yoa wamomaca dũhteina musa bose numare musa dahreriro sehe pari turi ne

coa tasi. Tí maca macaina pache duaina nuchaina mehne paina yuhdoro cjuhare musa. Á jina yaya wijõ wijüina yoaro sehe yoana jipihtiro macainare mahñohre musa. Musa á yoarire ñu cãaa, Cohamacu sehere cahmaerare masa –nihre tuariro anjo.

²⁴ Tí maca macaina Cohamacu yare yahu muhtainare paina to yaina cühare jipihtiro macainare wajãri jire.

19

¹ Babilonia to dohse wahahtore yu ñari baharo muano puay masa sañurucua coa tahre yu tuhochu. Ó sehe ni sañurucuhre:

“Aleluya.

Cohamacure noano durucujihna.

Cohamacu marine yuhdachu yoariro jira.

Tirore noano ño payojihna.

Tua yuhduariro jira tiro.

² Mahñono marieno quihõno masare buhiri dahrera tiro.

Ñaricorore musa mehne ñano yoarucuri-corore ñu cãa jipihtiro macaina, ahri yahpa macaina ñano yoahre.

Ticoro sehere buhiri dahrehre Cohamacu.

Á jiro tirore dahra cohtainare ticoro to wajãri buhiri buhiri dahrehre tiro”,

ni sañurucua coa tahre.

³ Pari turi sañurucua coa tahre:

“Aleluya. Cohamacure noano durucujihna.

Tí maca ñari maca to jãri maca á me tirucurohca”,

ni sañurucua coa tahre.

⁴ Á yoa veinticuatro Jesu yaina puhtoá, pititiaro soro bajuina mehne na tuhcuca caha su, Cohamacure to dujiroi dujirirore wahche payohre. Ó sehe ni wahche payohre tina: “Amén. Aleluya. Á tjira. Cohamacure noano durucujihna”, nihre tina.

⁵ Baharo puhtoro dujiropu ó sehe nino coa tahre:

“Mari puhtoro Cohamacure wahche payoga.

Tirore dahra cohtaina, tirore ño payoína, wiho jüina, puhtoá cãhu jipihtina musa tirore noano durucuga”, nino coa tahre.

Cordero to wamomaca dũhtehti numu bose numare yahuha João

⁶ Baharo puay masa ti durucuchu tuhohi. Pjiri poaye, wãpo mehne to bisiro coa taro sehetá durucua coa tahre yu tuhochu:

“Aleluya.

Cohamacure noano durucujihna.

Tiro mari puhtoro sehe puhtoro sãa tuhsare.

Tua yuhduariro jira tiro.

⁷⁻⁸ Cordero to wamomaca dũhtehti pja jira mipare.

To wamomaca dũhtehticoro noano ti cahno tuhsaricoropu jira.

Ticorore noari suhtiro wete marieni suhtirore wahre.

Tí suhtiro Cohamacu yaina noaare ti yoari yoaro sehe jira, mari piti dahre buhecha.

Ā jina ti wamomaca dahtehti pja to jichu wahchejihna mari.

Cohamacure ‘Tua yuhduariro jira’, nijihna’, ni durucua coa tahre.

⁹ Ti ā niri baharo anjo ō sehe nihre yuhure:

—Ahrire joa naga: “Cordero to wamomaca dahteri namu bese namure to pjirocarina wahcheina jira”, ni joa naga —nihre anjo yuhure.

Ā ninota ō sehe ni namohre:

—Potocā tjiira ahri yu yahuri. Cohamacu ya durucua jira —ni namohre yuhure.

¹⁰ To ā nichu tuhocuta tiro panoi na tuhcuca caha su, tirore ño payoi tai nimahi. Yu ā yoai cahachu waro ō sehe nihre tiro yuhure:

—Tire yoai tjiga. Mu yoaro seheta yuhu cahu Cohamacure dahra cohtarirota jija. Mu coyea Jesu yaina jipihtina to ya buheare duhueraina yoaro sehe yuhu cahu Cohamacure dahra cohtarirota jija. Ā jicu Cohamacure na tuhcuca caha su, tiro sehere ño payoga —nihre anjo yuhure.

Cohamacu yare yahu muhtaina cjiri panopu macaina Espiritu Santo to yoadohoro mehne Jesu ya buheareta yahuyua tiri jire.

Cawalo yehseriro bui pisarirore yahuha Joāo

¹¹ Baharo muano parī muu wahachu ñuhi. Tóí cawalo yehseriro jihre. Tiro bui pisariro ō sehe wama tihre: To niri seheta yoariro potocā yoariro wama tihre tiro. Quihōno masare ñaina, noainare bese, tirore ñu tuhtina mehne cahma wajāna. ¹² To capari picha pohna yoaro sehe jihre. Ā yoa to dapui payu puhtoia pisaa sorori jihre. Ā jiro to pjacū wama joa ōriro jihre. Tí wamare tiro dihta masihre. Paina masierare. ¹³ To sāari suhtiro yoari suhtiro di wahāri suhtiro jihre. Tiro ō sehe wama tihre: Cohamacu ya duserore yahuriro wama tihre tiro. ¹⁴ Ā jia to yaina surara muano macaina tiro baharo wahare. Yehseina cawaloa bui pisaina noano yehsea suhtire, wete mariea suhtire sāaina jihre. ¹⁵ To duseroi ñosari pjine siori pjine cuhcūhre. Tí pjī yahpari macainare to yuhduaruchahti pjī jihre. Ā jiro to tuaa mehne to dutichu ne cáiro tirore yuhduarucaro bihosi. Cohamacu tua yuhduariro payu yahpari macaina mehne sua yuhduara. To ā suachu cawalo bui pisariro tinare tuaro buhiri dahrerohca. ¹⁶ To suhtiroi, to ñuchucu cāhure ahri wamare joa ōri jihre:

“Jipihtina paina puhtoia bui puhtoro”, ni joa ōri jihre.

¹⁷ Baharo sū siroi ducurirore anjore ñuhi. Jipihtina muanopu wainare yucaā perire sañurucu muohre tiro. Ō sehe ni tuaro sañurucu muohre:

—Cahmachuna taga. Cohamacu to bese namu chuna taga. ¹⁸ Payu yahpari macaina bui puhtoare, surara puhtoare, surara perire, cawaloare, tina bui pisainare, jipihtina paina masare, dahra cohtainare, dahra cohtaina jierainare, paina puhtoare, wiho jünare tina jipihtina ti pjacūi cjirire chuna taga —nihre anjo yucaare.

¹⁹ Baharo nucu macarirore, ahri yahpa macaina bui puhtoia ti surara peri cāhure ñuhi. Tina cahmachuhre cawalo bui pisariro mehne to yaina surara peri mehne cahma wajāa taa. ²⁰ Tí ā cahma wajāchu cawalo bui pisariro nucu macarirore peresu yoahre. Pairo “Cohamacu yare yahu muhtariro jija”, ni mahñoriro cāhure peresu yoahre. Tiro mahñoriro sehe nucu macariro to ñurocaroi bajuamehneare yoariro jihre. To bajuamehnea mehne nucu macariro to wamare wahāinare to masure ño payoinare mahñohre “Ahri Cohamacu ya jira”, nino. Tina puarore to peresu yoari baharo tinare catiinareta pichacapu cohāhre. Tí pichaca pjiri ma puro jiri pichaca pjiri pichaca azufre mehne jari pichaca jihre. ²¹ Ā jiro duhsainare ti surara peri cjirire ñosari pjī mehne to duseroi jiri pjī mehne wajāhre cawalo bui pisariro sehe. Ā to wajāri baharo yucaā peri ti pjacūi cjirire chua, yapi yuhduu wahahre.

20

Mil cūhmari waro Cristo to yaina mehne masare dutirohca

¹ Baharo pairo anjo muanopu to dujia tachū ñuhi. Cuāri copa macari sawire, pjiri da, comaa da cāhure cjuhre tiro. ² Ā duji wihiro pinonore ñahahre tiro. Tiro pinono panopu pinono sehe pjacu tiriro jiro, watino Satana wama tiriro jihre. Tirore ñahano tirore dahtehre mil cūhmari waro peresu yoaro taro. ³ Ā dahte tuhsu, cuāri copapu cohāhre tirore jipihtia yahpari macainare mil cūhmari waro to mahñorahto sehe. Ā cohā tuhsuro tí copare biha, wihtā ñahanocahre. Ā jiro mil cūhmari baharo pari turi mahaa dachoricā tirore wiosininohca.

⁴ Baharo puhtoia dujiare ñuhi. Tí dujia dujiina cāhure ñuhi. Tinare masa bui dutihtinare cūhre Cristo. Paina cāhure ñuhi. Tina sehe Jesu yare Cohamacu yare ti yahuri buhiri ti dapu pocare dute cohārina cjiri jihre. Nucu macarirore to masu cāhure ne na tuhcuca caha su ño payoerare. Ā yoa

ti wuhduu pocare ti wamomacari cūhare to wamare joa ò dutierare tina. Á jia paina tinare ti wajāri baharo masaa wahahre tjoa. Masahre tina mil cūhmari waro Cristo mehne puhtoia jia taa. ⁵ Paina Cristo yaina yariaina cjiri sehe masaerasinire. Ti wajārina ti masari baharo mil cūhmari puhtoia ti jiri baharo paina cūhu masaa wahaahca. Á jia ti wajārina cjiri Cristo yaina to baharo masa muhtaina jihre. ⁶ To maso muhtaina sehe tuaro wahcheina jiahca. Nāa marieina jiahca tina. Á jia pichacapu wahaasi tina. Masa pichacapu wahaasi, pari turi ti yariaro sehe wahara. Á jia tina to maso muhtaina pichacapu wahaarera. Tina yaria masa muhtaina sacerdotea jiahca, Cohamacu, Cristo cūhare ño payoa taa. Á jia mil cūhmari waro Cristo mehne masa bui puhtoia jiahca.

⁷ Mil cūhmari baharo Satanare peresui jirirore wiorohca. ⁸ To á wiori baharo ahri yahpa macainare mahñono waharohca tiro. Gog wama tiinare, Magog wama tiina cūhare mahñono waharohca. Á jia tina to mahñoare tuhoa, ti surara perire cahmachuahca cahma wajāa taa. Tina surara peri payu jiahca. Pjiri ma macaa padu pohcaricā payu ti jiro seheta payu surara jiahca. ⁹ Tina ahri yahpāre waha sitea, Cohamacu yaina ti jiri macare Cohamacu to cahiri macare soroa wahaahca. Ti á soroari baharo Cohamacu tinare muano macari pichaca mehne júroca bororohca. ¹⁰ Á wahari baharo watinore tinare mahñorirore pichacapu cohānohca. Ti pichaca pjiri ma puro jiri pichaca azufre mehne júri pichaca jira. Tóru nuca macarirore “Cohamacu yare yahu muhtariro jija”, ni mahñorirore cohā tuhsahre. Tói ti jichu dacho, ñamipu cūhare á ñano purñucurohca tinare.

Cohamacu masare buhiri dahre batoara

¹¹ Baharo pjiro puhtoro to dujirore noano yehserore ñuhi. Ti dujiro bui dujirore cūhare ñuhi. Tói to dujichu, ahri yahpa macaa cūhu muano macaa cūhu pihtia wahahre. Á pihtia wahaasi pari turi ji namoerare. ¹² Á yoa puhtoro panoi yariaina cjiri ti ducuchu ñuhi. Tina wiho jiina, puhtoia cjiri cūhu jihre. Tói ti ducuchu joa òa tjurire pjōohre. Ti tjuri masa ti yoarire ti joa òa tjuri jihre. Á jiro beseriro ti tjurire ñu tuhsu ti yoarire masihre. Tíre masino yariainare besehre ñaina, noainare. Baharo pa tju cūhare pjōohre. Ti tju Cohamacu mehne á jirucuhitinare ti wamare joa òri tju jihre. ¹³ Baharo pjiri mapu yaria miniina, diapu ti cohārina cūhu wahcā mujaa wahahre. Á yoa yahpa puhichapu jiina, yariaina ti jirore jiina cūhu mujaa wahahre. Ti á mujaa sūchu tói dujirore ti yoarire masi pahño, tinare

besehre ñaina, noainare. ¹⁴ Baharo yariarore, yariaina ti jiro cūhare cohānohca Cohamacu pari turi mari yariaerahto sehe. Pichacapu cohānohca. Ti pichaca pjiri ma puro jiri pichaca pjiri pichaca jihre. Pichacapu wahaasi sehe pari turi yariaina seheta wahara. ¹⁵ Á jiro á jirucuhitina ti wamare Cohamacu to joa òri tju jipihtina ti wamare joa òmahnoeraina sehene pichacapu cohānohca tiro.

21

Muano, yahpa cūhare wahmaare cohtotaroahca Cohamacu

¹ Baharo muano, ahri yahpa cūhare wahmaare to cohtotarire ñuhi. Muano pu jiri muhtari, yahpapu jiri muhtari, pjiri mapu jiri muhtari cūhu pihtia wahahre. Mariahre. ² Á yoa yūhu Joāno noari macare, wahma macare Jerusalēne ñuhi. Ti maca muano pu Cohamacu cahapu to duji tachu ñuhi. Wamomaca dūhtehcorore noaa suhti mehne wahma sūora wamomaca dūhtehcorore wahchechu yoaro taro. Tó seheta ti macare cahnoyure Cohamacu, to yainare wahchechu yoaro taro. ³ Tíre yū ñuri baharo puhtoro dujirore to sañurucuro coa tachu tuhoi:

—Ñuga. Mipure masa watoi jiro nina Cohamacu. Tina mehne jirohca tiro. Á jia to yaina jiahca tina. Á yoa Cohamacu to basi tina mehne macariro jiro, ti yairo Cohamacu jirohca. ⁴ Á jiro á wahcherucuchu yoarohca tiro tinare. Á jia pari turi cahyasi tina. Á jia ne pari turi yariasi tina. Ne ñano yajeripohna tia, yahco tia, puria cūhu marihca tinare. Ahri jipihtia panopu macaa cjiri pihtia wahaahca —ni sañurucuro coa tahre.

⁵ Baharo puhtoro dujirore dujirore ò sehe nihre:

—Ñuga. Jipihtiare wahma cohtotachu yoaihca —nihre.

To á niri baharo yūhure ò sehe nihre tjoa:

—Ahri yu niare joa naga. Yu nia potocā tjira. Á jiro yu niriro seheta á waharohca. Á jicu yu niare joa naga —nihre yūhure.

⁶ Baharo ò sehe nihre tjoa yūhure:

—Tó puro tjica. Yūhu jipihtiare ba juamehneriro jija. Á yoa jipihtiare pihtichu yoahiro jija tjoa. Naha yapioina tuaro ti core cahmano seheta yu cahapu waha duaina Jesure cahmaahca. Á jia Jesure yūhtiaha. Tiro catichu yoaa co yoaro sehe jira. Tirore cahmainare wapa cahmano marieno yūhu mehne á jirucuchu yoaihtja tinare. ⁷ Jipihtina yūhure wacū tua duhuerainare ò sehe yoaihtja: Ti yairo Cohamacu jiihtja. Á jia tina sehe yu pohna jiahca. ⁸ Wiho mejeta cuia yu yare

duhuina, yuhure cahmaeraina, ñabiaare yoaina, masare wajaina, numia mehne ñano yoaina, ma mehne ñano yoaa numia, yaya, “Cohamacu jira”, ti nia masarine ño payoia, jipihitina mahñoina pichacapu wahaahca. Tói pjiri ma puro jiri pichaca pjiri pichaca azufre mehne jano nina. Tópu wahaina pari turi ti yariaro sehe waha nina –nihre yuhure.

Wahma maca Jerusalēne yahuha

⁹ Baharo cūiro anjo yu cahapu wihihre. Tiro siete wahari cjuaina, to buhiri dahre dutiro to cūina anjo mehne macariro jihre. Ā wihiro, ò sehe nihre yuhure:

–Ñui taga. Cordero to wamomaca duhtericorore ñoihca muhure –nihre anjo yuhure.

¹⁰ To ā nini baharo Espiritu Santo yuhure Cohamacu ya macare ñohre. Ō sehe bajuro ñohre yuhure: Muadu tācu buipū yuhure na mujahre. Tópu Jerusalēne Cohamacu ya macare noari macare ñohre yuhure. Cohamacu cahapu muanopu jiri maca duji taro nihre ahri yahpau. ¹¹ Cohamacu to si sitea mehne si siteri maca jihre ti maca. Wapa tia taa yoaro sehe si sitehre. Diamante wama tia taa yoaro sehe si sitehre. Ā yoa vidro yoaro sehe noano co sitiri maca jihre ti maca. ¹² Pjiri sahrino muari sahrino ti sahrī sāari maca jihre ti maca. Doce sopacari tihre ti sahrino. Tí sopacaripe cohtahre anjo. Tí maca macaa sopa pahmaripu Israe masa curuari doce curuaripe ti wama wahāhre. ¹³ Sū maja taro sehe ti sahrino cjuahre tia sopaca. Norte sehe tia sopaca jihre. Sur sehe tia sopaca jihre. Sū sāano sehe cūhure tia sopaca jihre. Jipihitiro doce sopacari waro cjuahre ti sahrino. ¹⁴ Tí sahrino doce taa bui pisahre. Tí tāape Cordero to cūrina doce to cūrina sā cāina wama wahāhre.

¹⁵ Ā yoa anjo yuhure yahuriro quihōdu uru mehne ti yoadere cjuahre. Tí macare, ti maca macaa sopacaripe, sahrino cūhure quihōno taro nihre. ¹⁶ Tí maca to yoaro purota sahre. Muano cūhu tó purota muahre. Ā yoa anjo to quihōdu mehne ti macare quihōhre. Tí maca dos mil doscientos kilómetros yoari maca jihre. Tó purota sari maca jihre. Tó purota muari maca jihre. ¹⁷ Ā jiro ti maca macari sahrinore quihōhre anjo. Sesenta y cinco metros muari sahrino jihre. Masa mari quihōno sehetā quihōno nihre tiro anjo.

¹⁸ Tí sahrino diamante wama tia taa mehne to yoari sahrino jihre. Ā yoa ti maca sehe uru mehne to yoari maca jihre. Tí uru wete mariea jia vidro yoaro sehe noano co sithre. ¹⁹ Tí sahrino docai jia tāare payu soro jia wapa tia taa wahāhre. Tí taa sahrinoi pisaa taa doce taa jihre. Ji muhtaria tācare

diamante wama tia taa wahāhre. To baharo jiria tācare zafiro wama tia taa wahāhre. Puaria baharo jiria tācare ágata wama tia taa wahāhre. Tiaria baharo jiria tācare esmeralda wama tia taa wahāhre. ²⁰ Pititia poca baharo jiria tācare ónice wama tia taa wahāhre. Cū wamomaca pihtia poca baharo jiria tācare rubí wama tia taa wahāhre. Seis poca baharo jiria tācare crisólito wama tia taa wahāhre. Siete poca baharo jiria tācare berilo wama tia taa wahāhre. Ocho poca baharo jiria tācare topacio wama tia taa wahāhre. Nueve poca baharo jiria tācare crisoprasa wama tia taa wahāhre. Diez poca baharo jiria tācare jacinto wama tia taa wahāhre. Once poca baharo jiria tācare amatista wama tia taa wahā batoahre. ²¹ Ā yoa doce sopa pahmari doce perla mehne to yoaa pahmari jihre. Tí pahmaripe cū yapa perla yapa mehne to yoaa pahmari jihre. Ā jiro ti maca macari maha uru mehne to yoari maha jihre. Tí uru wete marieni uru jihre. Ā jiro vidro yoaro sehe noano co sitiri maha jihre ti maha.

²² Tí macai Cohamacu wuhure ñuherahi. Mariahre. Tí macai jipihitropu mari puhtorero Cohamacu tua yuhuarioro, Cordero cūhure ño payora masa. Ā jiro ti maca jipihitiro Cohamacu wahu yoaro sehe jihre. ²³ Tí macai Cohamacu to si sitea noano buhriahre. Cordero cūhu sihāria yoaro sehe buhriahre. Ā jia sū dacho macariro cūhure ñami macariro cūhure tói ti buhriachu cahmaerare. ²⁴ Ā yoa ahri yahpai ti buhria mehne jiaha jipihitiro macaina. Ā jia jipihitia yahpapi macaina puhtoa ti macapu noa yuhduu ti cjuare na wihiahca. ²⁵ Ā yoa dachore ti maca macaa sopacari pjōori sopacari jiaha. Tópu ne ñami marianohca. Ā jia ti sopacaripe ne bihasi. Ā susurucuahca. ²⁶ Ā yoa jipihitia yahpapi macaina noare ti cjuare ti macapu naa wihiahca. ²⁷ Ñaa sehere ti macapu ne naa wihisi. Buu tichu yoaina, ñaare yoaina cūhu ti macapu ne wahasi. Mahñoina cūhu wahasi. Cordero to joari tju ti wama wahāina dihta ti macapu wahaahca. Tí tju to yuhduchu yoaina ti wamare to joa òri tju jira. Tí tju ti wama wahāina ā jirucuahca.

22

¹ Baharo noari mare catichu yoari mare ñohre yuhure anjo. Tí ma noano co sitiri ma Cohamacu, Cordero cūhu ti dujiropu tari ma jihre. ² Ā yoa ti maca macari maha dacho macai buruahre ti ma. Tí ma pu buhuseheri duhtu cahai catichu yoaa yucu ducuhre. Tí yucu sūripe dicha tihre. Cū cahmare doce tahari dicha tihre. Ā yoa ti yucu macaa

pūri mehne noano co tiahca jipihtia yahpari macaina. ³Ti macare ne ñaa marianohca. Ti macai Cohamacu to dujiro jirohca. Cordero to dujiro cahu jirohca toi. A jia jipihtina masa toi jiina tinare dahra cohtaina tina pano na tuhcu caha su, tinare wahche payoahca. A jiro toi ñaa marianohca. ⁴Tina Cohamacure ñu piti boca dujiahca. A yoa ti wuhduu pocai to wama wahaina jiahca. ⁵Tõpõre ñami marianohca. A jia sihãa pocare cahmasi toi jiina. Sũ to buhriachu cahũre cahmasi. Mari puhtoro Cohamacu to buhriaro jirohca. A jia ti macai jiina pa sehe macaina bui puhtoã ã jirucuahca.

Jesucristo ahri yahpau to tjua tahto mahanoã dahsara

⁶Baharo anjo yahure õ sehe nihre:

–Jipihtia ahri ti yahuri cõiri potocã tjira. A jia ti niriro seheta waharohca. Mari puhtoro Cohamacu to yare yahu muhtainare masichu yoariro jira. Tiro sehe mipõre to yairo anjore warocahre tirore dahra cohtainare masichu yoaro taro. Baharocã to dohse wahahtore masichu yoaro taro to yairo anjore warocahre – nihre anjo yahure.

⁷Jesu sehe õ sehe nihre:

–Tuhoga musa. Mahanoã dahsara yu tjua tahto. Ahri tju macaa yahuare yuhduũcaeraina wahcheina jiahca –nihre Jesu.

⁸Yuhu João ahri jipihtiare yu joa narire tuhohi. A yoa tire ñuhi. A jicu yu tuhori baharo, yu ñuri baharo yahure ñoriro anjo panoi na tuhcu caha sumahi. Tirore ño payoi tai nimahi. ⁹Yu ã yoachũ ñuno õ sehe nihre yahure:

–Tire yoai tjiga. Mu jiro seheta jiriro yuhu cahũ Cohamacure dahra cohtarirota jija. Mu coyca Cohamacu yare yahu muhtaina, jipihtina ahri tju macaa dutiare yoaina cahũ ti jiro seheta yuhu cahũ Cohamacure dahra cohtarirota jija. A jicu Cohamacu panoi na tuhcu caha su, tiro sehere ño payoga – nihre anjo yahure.

¹⁰A yoa õ sehe ni yahu namohre yahure:

–Ahri tju baharo to dohse wahahtore yahura. To ã wahahto mahanoã dahsara. To ã mahanoã dahsachu ahri tju yahurire ñuoi tjiga muhu. ¹¹Ti pja yu yahuri pjare ñaina sehe ã yoarucuwahnojarõ ñaare. Naputiina cahũ ñabiaro yoarucuwahnojarõ. Noaina sehe noano yoarucujaro. A yoaga ñaa marieina ã ñaa marieina jirucujaro ti pjare –nihre anjo yahure.

¹²Õ sehe nihre Jesu:

–Tuhoga musa. Mahanoã dahsara yu tjua tahto. Musare yu yainare yu wahtore na tai tai nija. A jicu noaare musa yoari wapa musare noano yoaihtja. ¹³Yuhu jipihtiare bajuamehneriro jija. A yoa jipihtiare pihchũ yoahiro jija tjõa.

¹⁴Jipihtina wete mariea suhtire sãaina ti jiro seheta ti ñaa yoari buhirire cosaweina ti macapu suahca. A sua, ti maca macaa yucu catiare waa yucu dichare chũahca. A jia wahcheina jiahca tina. ¹⁵Ti macapu sueraina sehe ahri jira: Ñabiaina, yaya, numia mehne ñano yoaina, muã mehne ñano yoaa numia, masare wajãina, “Cohamacu jira”, ti nia masurine ño payoina, mahũo ji coaina, mahũoa payoina cahũ jira ti macapu sueraina –nihre Jesu.

¹⁶A yoa õ sehe ni yahu namohre Jesu:

–Yuhu, Jesu yu yairo anjore warocahi musare yu yainare ahri tju macaare yahui tai. Puhtoro Davi panamino ji turiariro jija yuhu. Yuhu bohrea muja tachũ muja taria noano si siteria ñahpichoca yoaro sehe jiriro jija –ni yahu namohre Jesu.

¹⁷Espõritu Santo Jesure “Tjua taga”, nina. Jesu yaina to wamomaca duhtehticoro yoaro sehe jiina cahũ “Tjua taga”, nina. Jipihtina ti “Tjua taga”, nirire tuhoina cahũ “Tjua taga”, nijaro Jesure.

Ñahma yapioina core tuaro ti cahmano seheta Cohamacu cahapu waha duana Jesure tuaro cahmaga. Tiro catichu yoaa co yoaro sehe jira. Tirore cahmainare wapa cahmano marieno ã jirucuchũ yoarõhca Cohamacu.

¹⁸Yuhu João, jipihtina ahri tju macaare Cohamacu yare tuhoinare musare õ sehe ni cua pisaro mehne yahuihtja. Ahri buhea mehne paye buhea mehne more suhu yahu namoina Cohamacure yuhduũcaea nina. Ti ã yuhduũcachũ ñuno jipihtia ahri tju to buhiri dahrehtore to yahuriro seheta cũnohca tina cahure. A jiro to seheta tina cahure buhiri dahrerõhca. ¹⁹A yoa ahri tju macaa yahuare yahu duhaina Cohamacure yuhduũcaina jira. Ti ã yuhduũcachũ ñuno catichu yoaa yucu dichare tinare chũ dutisi. A jia ã jirucusi tina. Tuhsu, to ya macapu noari macapu waha dutisi. Ti yucu, ti maca cahũ ahri tju ti yahuripu jira.

²⁰Jipihtia ahri tju macaare yahuriro õ sehe nina:

–A tjira. Mahanoã dahsara yahpau yu tjua tahto –nina tiro.

A tjia. Sã puhtoro Jesu tjua tahga.

²¹Mari puhtoro Jesu to cahã mehne jipihtina musa noano jiga.